



# Xela wezria cube nen salmo ca'

Tabaa Zapotec  
New Testament & Psalms

## Contents

Salmos . . . . .	1
San Mateo . . . . .	93
San Marcos . . . . .	137
San Lucas . . . . .	165
San Juan . . . . .	210
Los Hechos . . . . .	243
Romanos . . . . .	285
1 Corintios . . . . .	303
2 Corintios . . . . .	320
Gálatas . . . . .	331
Efesios . . . . .	338
Filipenses . . . . .	344
Colosenses . . . . .	348
1 Tesalonicenses . . . . .	352
2 Tesalonicenses . . . . .	356
1 Timoteo . . . . .	358
2 Timoteo . . . . .	363
Tito . . . . .	367
Filemón . . . . .	370
Hebreos . . . . .	371
Santiago . . . . .	384
1 San Pedro . . . . .	389
2 San Pedro . . . . .	394
1 Juan . . . . .	397
2 Juan . . . . .	402
2 Juan . . . . .	403
Judas . . . . .	404
Apocalipsis . . . . .	406

## Xela wezria cube nen salmo ca'

### New Testament and Psalms in Zapotec, Tabaa (MX:zat:Zapotec, Tabaa)

copyright © 1981 Wycliffe Bible Translators, Inc.

© 1981, Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

## Copyright Information

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Psalms

in Zapotec, Tabaa

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

ISBN 978-1-5313-0746-2

---

PDF generated on 21 Sep 2016 from source files dated 21 Sep 2016

80626b72-93df-58ae-9f5e-9d86733fab46

---

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit [www.DBS.org](http://www.DBS.org) (USA), [www.BibleLeague.ca](http://www.BibleLeague.ca) (Canada), and [www.OpenDoors.org](http://www.OpenDoors.org) (Europe). May God bless your work in sharing and teaching these Scriptures, until, as it is written, the earth is *“filled with the knowledge of the glory of the LORD, as the waters cover the sea.”* (Habakkuk 2:14)

---

## SALMO CA'

## 1

<sup>1</sup>Ba neza zrentę naca na cheę bėnnea'  
quebe dxezi'e da dxuluzėjni'i benne' wen  
da caleła ca' le',

ne quebe dxune' tuze benne' dul-la ca',  
ne quebe dxune' tu zren benne' ca' dxelún  
le' cheę Dios.

<sup>2</sup>Zue' xel-la' dxebé lawe' da dxuzúe' dizra'  
da nadxixruj bea Xránadxu,  
ne ca naca da nadxixruj bea na,  
te zra ne chizrela dxelaba lazre' na.

<sup>3</sup>Benne' nigá naque' ca tu xaga zua na dxu'a  
xegu nisa,

da dxunna na da zixre cheę na lu beu'  
cheęqueze na,  
ne xrlęue na quebe dxase na.

Ca naca da dxun benne' nigá, dxępe ban na.  
<sup>4</sup>Quegá caní zaj naca benne' wen da caleła  
ca'.

Zaj naque' ca tu xizre laga' da dxua be'  
bdunu'.

<sup>5</sup>Quebe xelexegá'ana chawe' benne' wen da  
caleła ca'

gate guchi'a Dios cheę',  
ne quebe xelú'u benne' dul-la ca' naga zaj  
nazraga  
benne' xrlátaje ca'.

<sup>6</sup>Dxezaca ba lazre' Dios ca da dxelún benne'  
xrlátaje ca'.

Da dxelún benne' wen da caleła ca'  
che na le' naga xelebía xi'e.

## 2

<sup>1</sup>¿Bizr cheę na' dxeledábaga benne' xęzr la  
xu ca' neda'?

¿Bizr cheę na' dxululaba lázrequeze bėn-  
neache  
da guzúa na neda' chalá'ala?

<sup>2</sup>Dxeledábagaqueze benne' wenná bea ca',  
ne dxelún tuze dizra' benne' ca' dxeleńná  
bea ca xelune'

cheę Xránadxu Dios, ne cheę Bėnnea'  
gucá'a Le'.

<sup>3</sup>Dxeleńné': "Guselá cuńadxu lu xel-la'  
dxenná bea cheę',  
ne guzúadxu chalá'ala da zaj nadxixruj  
bé'ene' dxi'u."

<sup>4</sup>Naga dxe' Xránadxu xabáa dxuzrizre'.  
Quebe dxezi' leńe' cheę da dxelegú'u lazre'  
xelune'.

<sup>5</sup>Lu xel-la' dxezrá'a cheę' dxedil-le' le',

ne lu xel-la' snia cheę' dxuchebe' le'.

<sup>6</sup>Dxenné': "Lu xi'a lá'azxa chia', xi'a Sión  
ba nuzúa' benne' gaque' Wenná Bea waláz  
chia' neda'."

<sup>7</sup>Dxenná Wenná Bea na': "Guzenda' le'e da  
guzre Xránadxu neda'."

Guzre' neda': "Lue' nacu' Zri'ina'.  
Ná'aqueze naca' Xrau'.

<sup>8</sup>Gunabe neda', na' gunna' Lue' xúgute cue'  
xęzr la xu ca',  
na' gaca chiu' dutę ca naca xęzr la xu.

<sup>9</sup>Guzíxenu' bėnneache xęzr la xu ca' nen  
vara xia,  
ne ca tu dxe'e xu guzuzru' le'."

<sup>10</sup>Na'a, le'e, wenná bea, le xene da nigá  
dxuzėjni'ida' le'e.

Le guseđe da nigá dxusizreda' le'e,  
benne' dxeleńná bea lu xęzr la xu.

<sup>11</sup>Le gun zrin cheę Xránadxu Dios, dutę xel-  
la' dxezrebe cheęle.

Nen xel-la' dxezrize cheęle, le be lau Le'.

<sup>12</sup>Le gapa ba lá'ana Zrí'ine' cheę quebe zre'e,  
checa' cuía xile la neza cheęle, lawe' da la  
zra'ate Le'.

Da ba neza zrentę naca na cheę xúgute  
benne'  
dxuluxrén lazre' Le'.

## 3

<sup>1</sup>Xrana' Dios, ba naxánle'e benne' dx-  
eledábague' neda'.

Benne' zantę dxeledíl-lalęe' neda'.

<sup>2</sup>Benne' zantę dxeleńné' chia': "Quebe  
guselá Dios le'."

<sup>3</sup>Lue', Xrana' Dios, dxucú'uju' neda'.

Nacu' Benne' dxebéłena', ne Benne' dxuzę  
chawe' neda'.

<sup>4</sup>Gudxezre xa'a, bláwizra' Xrana' Dios,  
na' Le' bechebe' chia' naga zue' lu xi'a  
lá'azxa cheę'.

<sup>5</sup>Guta', ne gusia',  
na' bebana' lawe' da nuxru Xrana' neda'.

"Quebe zreba' gaxúa gaxúa bėnneache,  
benne' zaj naxęchaje' neda'."

<sup>7</sup>Guzę, Xrana' Dios.

Bselá neda', Dios chia'.

Ben we' xraga benne' ca' dxeledíl-lalęe'  
neda',

ne guzuzruj lazxa benne' xriwe' ca'.

<sup>8</sup>Xel-la' weselá za' lu na'u, Xrana' Dios.

Ben da chawe' cheę bėnneache chiu'.

## 4

<sup>1</sup>Bechebe chia' gate dxuláwizra' Lue', Dios.

Nacu' Benne' dxuchi'e ca da dxuna'.  
Gate guzúa' lu da štebe, Lue' btipu' lazra'.  
Bexache lazre' neda', ne bene ca da dx-  
uchálajlena' Lue'.

<sup>2</sup>Le'e, bēneache, ¿ájatescha' gucá'ana dít-  
jale neda'?

¿Ájatescha' zri'ile da quebe zaca, ne chéa-  
jlele da wēn lazre'?

<sup>3</sup>Le xexúnbea ba gucá'a Xránadxu  
nu benne' dxape' Le' ba lá'ana.

Xrana' Dios xenne' gate dxuláwizra' Le'.

<sup>4</sup>Le zrebe lau Dios, ne quebe gunle dul-la.  
Le gulaba lazre' chee' naga dxásale, ne le  
sua zrize.

<sup>5</sup>Le gute lau Le' béadu ca' lu da naca du  
lazre',  
ne le guxrén lázre' Xránadxu Dios.

<sup>6</sup>Benne' zantę dxelennę': "¿Nuzra gun  
gá'anatu' chawe'?"

Dutę xel-la' zri'i lazre' chiu' bxue netu',  
Xran.

<sup>7</sup>Lue' bzu' xel-la' dxebé lu xichaj lázrdawa',  
da naca na zrendxa ca da zaj napa benne'  
zaj nápale'e zrua',

ne xrise uva wal-la.

<sup>8</sup>Dutę xel-la' dxebeza zri lazre' gata', ne  
gasia',

lawe' da dxunu' Lue', Xran, zua' zri'a  
chawe'.

## 5

<sup>1</sup>Bzę naga dizra' chia', Xran.

Bde lazre' ca dxebezre lazra'.

<sup>2</sup>Bene ca guchálajlena' Lue', Wenná Bea  
chia', ne Dios chia', q lawe' da  
guláwizraja' Lue', Dios.

<sup>3</sup>Xran, che zílala xennu' chi'a.

Che zílala xídaqueza' lau Lue', ne wabeza  
lazra' Lue'.

<sup>4</sup>Nacu' Dios quebe dxezaca ba lazru' da  
calęla.

Benne' wēn da calęla quebe súaqueze' naga  
zu' Lue'.

<sup>5</sup>Quebe dxu'u lataj xelezrín benne' wēn da  
calęla lau'.

Dxecuidenu' xúgute' benne' dxelunę' da  
zrinnağ.

<sup>6</sup>Guzría xí'quezu' benne' ca' dxelezí xę'e.

Guzú' chalá'ala benne' wete benne', ne  
benne' guzrí xę'.

<sup>7</sup>Neda' waca chu'a lizru' lawe' da  
nazr'ile'enu' neda'.

Güe lá'ana' Lue' lu xudau' lá'azxa chiu' dutę  
xel-la' dxezrebe.

<sup>8</sup>Bsi neda' chee' guna' da xrlátaje chiu',  
Xran,  
lawe' da zrále'e benne' dxeledábague'  
neda'.

Gulú'u neda' neza chawe' chiu'.

<sup>9</sup>Benne' caní quebe dxelennę' da li.

Lu xichaj lázrdawe' xu'u da calęla.

Xedxu lbę'e zaj naca na ca tu ba chee' benne'  
gate da naxalaj na.

Zaj nupę'e dizra' chawe' chee' da zaj naca  
na da wēn lazre'.

<sup>10</sup>Bde benne' ca' lu da ba xa', Xrana' Dios.

Ben cheajlecházie' cáteze zaj naca  
xrtizraqueze'.

Lawe' da naxánle'e da calęla da dxelunę'  
ne lawe' da guledábague' Lue', bebéaje'  
chalá'ala.

<sup>11</sup>Welebęle'e benne' ca' dxuluxrén lazre'  
Lue'.

Welebęzre xá'aqueze' dutę xel-la' dxelebé  
lawe' da dxucú'uju' le'.

Lau Lue' welebęle'e benne' ca' zaj nazr'ine'  
Lue'.

<sup>12</sup>Gúnquezu' da chawe' chee' benne' xrlá-  
taje, Xran.

Gucu'uju' bēnnea' lawe' da dxezaca ba  
lázreľenu' le'.

## 6

<sup>1</sup>Lue', Xran, quebe til-lu' neda' lu xel-la'  
snia chiu',

ne quebe gudéu' neda' ba xa' lu xel-la'  
dxezrá'a chiu'.

<sup>2</sup>Bexache lazre' neda', Xran, lawe' da quebe  
chawe' zua'.

Bexún neda', Xran, lawe' da dxedéa' xel-la'  
zi'.

<sup>3</sup>Stębele'e zua xichaj lázrdawa'.

Xran, ¿bátala gácalęnu' neda'?

<sup>4</sup>Gudá, Xran, bselá bēnne'du xu'a.

Bselá neda' dutę xel-la' zri'i lazre' chiu'.

<sup>5</sup>Naga zaj zra' benne' gate ca', quebe nu  
dxeajsá lazre' Lue'.

Lu lataj ba xa' ¿núzraqueze güe lá'ana Lue'?

<sup>6</sup>Ba dxexedú lazra' lawe' da dxebezre lazra'.  
Tu zre' tu zre' dxebisane ga dxásia' nisa da  
dxebezra'.

Dxusebisa' xrcugua' nisa da dxebezra'.

<sup>7</sup>Ba dxane xiaj lawa' xel-la' dxebezre.

Ba bebízqueze nisa xuzru xiaj lawa' lawe'  
da zrále'e

benne' dxulusaca zi'e neda'.

<sup>8</sup>Le cuasa naga zua', xúgutele dxunle da  
zrinnağ

lawe' da ba ben Dios dxebézreľe'a.

<sup>9</sup>Xrana' Dios ba benne' da dxata' xueda' Le'.  
Ba guzi' Xrana' Dios da dxuchálajlęna' Le'.  
<sup>10</sup>Dxelexedu'e, ne zaj zua lu da stębele'e  
xúgute  
benne' dxeledábage' neda'.  
Chadite xelexebigę' naga zua', ne xelexe-  
du'e'ene'.

## 7

<sup>1</sup>Xrana' Dios, dxuxrén lazra' Lue'.  
Gúcale neda' ne bselá neda' lu na' benne'  
ca' dxulusaca zi'e  
neda',  
<sup>2</sup>cheę quebe xelex-le' neda' ca dxun bezre  
xixre',  
na' xuluzúruje' neda' naga quebe nu chilá'  
nu guselá neda'.  
<sup>3</sup>Xrana' Dios, che bęna' neda' caní:  
Che bi da zrinnaj bęn ni'a na'a.  
<sup>4</sup>Che bi da caleła bęna' cheę benne' zue'  
chawe' nen neda'.  
(Bselá' bęnnea' dxedábage' neda' lálcala  
quebe bi nuna' cheę'.)  
<sup>5</sup>Che caní bęna',  
bę lataj benne' dxedábage' neda' gau zi' ne  
xezrúnęne' neda'.  
Bę lataj bęnnea' guchuchu gulájaje' neda' lu  
xu,  
ne xusunitię' xel-la' ba lá'ana chia'.  
<sup>6</sup>Xran, dutę xel-la' dxezrá'a chiu', guzė.  
Bexechaj benne' ca' dxulusaca zi'e neda' lu  
xel-la' dxelezrá'a cheę'.  
Gusel-la da gácale na neda' gate guchi'u da  
dxaca chia'  
ca da gunná be'u.  
<sup>7</sup>Xúgute benne' zaj zre'e xęzr la xu  
xelezrague' lau'.  
Gunná be'e benne' ca' dutę xel-la' szren  
chiu'.  
<sup>8</sup>Lue', Xran, guchi'u cheę benne' xúgute  
xęzre.  
Bchi'a ca da nuna' lu da naca xrlátaje,  
ne lu da naca du lazre' chia'.  
<sup>9</sup>Bęn cheajsė naze da zrinnaj da dxelún  
benne' węn da caleła ca',  
san bzua chawe' benne' xrlátaje,  
lawe' da nacu' xrlátaje, Dios, ne dxenná'u  
da xu'u  
xichaj lázrdau bęnneache.  
<sup>10</sup>Diósqueze dxucu'uje' neda'.  
Dxuselė' benne' zaj naque' du lazre'.  
<sup>11</sup>Xlátaje dxuchi'a Dios cheę da dxelún bęn-  
neache.  
Tu dxezrá'azqueze Dios da dxelún benne'  
węn da zrinnaj ca'.

<sup>12</sup>Che quebe xelexájaje lazre' Dios gulė' xia  
cheę'.  
Ba nuzúa cuásate' xaga nalá xęche'ze cheę'.  
<sup>13</sup>Ba naxrúa cuásate' xia cheę' ca' cheę  
wedil-la.  
Ba nuzúa cuásate' xaga nalá xęche'ze da  
dxelala.  
<sup>14</sup>Benne' węn da zrinnaj dxugú'u lazre' ca  
da caleła gune'.  
Xu'u lázrdawe' da zrinnaj da gune', na'  
dxebeájaje' da węn lazre'.  
<sup>15</sup>Ba gudęne' tu xędxu situj naga cheajlec-  
haze bęnneache,  
na' lézqueze' xeajcházije' lu xędxu na'.  
<sup>16</sup>Da zrinnaj da bęne' dxebage na lézqueze',  
na' da bsaque' bęnneache xezrize na  
xíchaje'.  
<sup>17</sup>Güe lá'anaqueza' Xrana' Dios ca da xrlá-  
taje da dxuęe',  
ne gúl-laqueza' cheę La Xrana' Dios, Bęn-  
nea' naque' szrente.

## 8

<sup>1</sup>Lue' Dios, Xránantu', zrente naca Lau' du  
gabí'i xęzr la xu.  
Zrendxa naca xel-la' szren chiu' ca xabáa.  
<sup>2</sup>Bidu ca', ne bidu dxe'ene ca' dxelúl-labe'  
ca naca na.  
Zúaquezu' lataj chawe' naga quebe xelexrín  
benne' ca'  
dxeledábage' lue'.  
Dxuzúa zriu' benne' dxeledábage' lue',  
ne benne' dxelecuídenę' Lue'.  
<sup>3</sup>Gate dxenná'a xabáa da nunu' Lue',  
ne beu', ne belaj ca', da ca' nuzú' cha cheę  
na,  
<sup>4</sup>na' dxuchęba': "¿Ájazra naca bęnneache,  
dxulaba lazru' cheę le'?"  
¿Ájazra naca bęnneache, dxe'u gunne xue  
le'?"  
<sup>5</sup>Bęnu' le' látezdxa szren ca nacu'  
Lue'queze,  
ne bzu' cheę' xel-la' szren, ne xel-la' ba  
lá'ana.  
<sup>6</sup>Bęnu' dxenná bę'ene' xúgute da ca' nunu'.  
Xúgute na bdeu' lu ne'e,  
<sup>7</sup>zrila' ca', ne bezre ca',  
ne xúgute bę xixre' ca',  
<sup>8</sup>bę zaj zua xrila, ne bela ca',  
ne xúgute da zaj zua na lu nísadau'.  
<sup>9</sup>Xránantu', Dios,  
szrente naca Lau' du gabí'i xęzr la xu.

## 9

<sup>1</sup>Xran, dutę lázrdawa' güe lá'ana' Lue'.

Guzenda' bėnneache ca zaj naca da zrente da benu'.

<sup>2</sup> Wabėquezda', ne gúl-laqueza' ca naca chiu'.

Gul-la' cheę lau' Lue', nacu' Dios zrente.

<sup>3</sup> Buluzrunnuj benne' dxeledábague' neda'.

Xeajlechazie', ne belexenitie' lau Lue'

<sup>4</sup> lawe' da nucá'ana chawu' da xrlátaje da dxuna'.

Dxe'u lataj blau chiu', ne lu da xrlátaje dxuchi'u.

<sup>5</sup> Gudil-lu' benne' xęzr la xu ca', ne bzria xi'u benne' wėn da caleła ca'.

Bsulu' la benne' ca' chadía chacanna.

<sup>6</sup> Ba gulebía xi' benne' dxeledábague' neda'.

Chadía chacanna zaj nazrinnaj lataj cheę benne' ca',

ne xęzre cheę' ca', da ca' bchínnuju' Lue'.

Netú benne' cheajsá lazre' benne' ca'.

<sup>7</sup> Xránadxu Dios súatequeze' chadía chacanna.

Ba nucueze' lataj blau cheę' naga guchi'e cheę bėnneache.

<sup>8</sup> Lu da xrlátaje guchi'e cheę bėnneache dutę xęzr la xu,

ne cheę benne' xúgute xęzre ca' lu da naca li lazre'.

<sup>9</sup> Xránadxu Dios gaque' ca tu lataj ga xelezrá chawe' benne' xache',

naga xelezré'e chawe' gate zrin zra cheę da zi' da xa'.

<sup>10</sup> Benne' ca' zaj núnbe'e Lue', Xran, xuluxrén lazre' Lue',

lawe' da quebe bsan lazru' benne' ca' belexílaje' Lue'.

<sup>11</sup> Le gul-la cheę Xránadxu, Bėnnea' zue' xęzre Sión.

Le guzėn benne' xęzre ca' ca zaj naca da ca' nune',

<sup>12</sup> lawe' da dxeajsá lazre' cheę benne' ca', ne dxexebéaj lazre' cheę benne' węte benne'.

Quebe gul-la lazre' ca da dxululáwizra benne' ba xache' ca' Lę'.

<sup>13</sup> Bexache lazre' neda', Xran.

Gunná' da dxezaca' lu ni'a na' benne' ca' dxelecuídene' neda'.

Dxeca'u neda' lu na' xel-la' gute,

<sup>14</sup> cheę guzenda' bėnneache da dxue lá'ana' Lue',

naga dxu'untu' xęzre Sión,

ne cheę beda' lawe' da bseláu' neda'.

<sup>15</sup> Xeajlechaze benne' xęzr la xu ca' lu xędxu da gulęe'.

Xeajlechu'e lu xralaj da bulucueze'.

<sup>16</sup> Xránadxu Dios blé'eng' ca da zaj naque' ne cheę

da zi' da xa' da gudichaj be'e cheę benne' ca' dxelunę' da caleła.

Xeajchaze benne' wėn da caleła na' lu da nun ni'a ná'queze'.

<sup>17</sup> Benne' wėn da caleła ca' xeledéqueze' lu lataj ba xa'.

Xúgute benne' ca' dxelal-la lazre' Xránadxu Dios.

<sup>18</sup> Quegá chadía chacanna gal-la lazre' Dios benne' xache' ca',

ne quegá tu chi'ize xenite da dxelebeza lazre' lę'.

<sup>19</sup> Guxasa, Xrana' Dios.

Quebe gu'u lataj xelexegá'ana szrėnqueze bėnneache.

Xelelá' lau' benne' xęzr la xu ca' cheę guchi'u cheę'.

<sup>20</sup> Xran, bėn xelezrebe benne' ca' Lue'.

Ben xelexúnbea benne' xęzr la xu ca' zaj naque' bėnneacheze.

## 10

<sup>1</sup> ¿Bizr cheę na' zu' zitu', Xran?

¿Bizr cheę na' dxucache cuinu' gate dxeledé xel-la' zi' bėnneache chiu'?

<sup>2</sup> Benne' wėn da caleła dxenáu zi' xuzre' benne' xache'

lu xel-la' dxucá'ana szren cuine', na' xeajchaze benne' xache' na' lu da ba nucuéza bėnnea'.

<sup>3</sup> Dxucá'ana szren cuine' ca naca da dxezá lazre'.

Nupé'e dizra' da dxenné' cheę benne' dxucude',

na' dxucá'ana dítaje' Xránadxu Dios.

<sup>4</sup> Benne' wėn da caleła na' lu xel-la' dxucá'ana szren cuine'

quebe dxape' Dios ba lá'ana, ne quebe dxéquene' che zua Dios.

<sup>5</sup> Tu dxúnzqueze' da caleła,

ne quebe dxéquene' guchi'u Lue' ca da dxunę'.

Dxuzúe' chalá'ala xúgute benne' dxeledábague' lę'.

<sup>6</sup> Lu xichaj lázrdawe' dxenné': "Quebe bi seque' guzaga na neda'.

Cabata' bi gaca chia' da caleła."



<sup>7</sup>Tu dxennézqueze' dizra' schanni',  
ne da wen lazre', ne ca naca da calela da  
gune'.

Dxeledxúaj dxu'e dizra' calela, ne dizra'  
xálaze.

<sup>8</sup>Dxu'a xezre ca' dxucache cuine' chee  
quele' bénneache.

Bagácheze dxutie' benne' dxeledeze' na'.  
Bagácheze dxenné'e chee bi gune' chee  
benne' xache' ca'.

<sup>9</sup>Bagácheze dxebeze' ca dxun bezre xixre'.  
Dxebeze' ga séquene' quele' benne'  
xache' ca'.

Dxel-le' benne' xache' lu xralaj chee', ne  
dxexu'e le'.

<sup>10</sup>Dxine' xu bénnea' gudel-le'.

Dxusaca zie' benne' zan nen ne'e wal-la.

<sup>11</sup>Lu xichaj lázrdawe' dxenné': "Nal-la lazre'  
Dios benne' caní.

Nucache lawe', ne quebe lé'ene' da dxuna'."

<sup>12</sup>Guxasa, Xrana' Dios, ne bze na'u.

Quebe gal-la lazru'u benne' xache' ca'.

<sup>13</sup>¿Ájazra chen' benne' ca' dxelune' da  
calela

dxuluzúe' Dios chalá'ala?

Lu xichaj lázrdawe' dxelenné': "Quebe xe-  
béaj lazre' Dios."

<sup>14</sup>Dios, Lue' blé'equeznu' da nigá,

lawe' da dxenná'u benne' wen da calela,  
ne da ca' dxune' quebe naca na xrlátaje,  
na' xebéaj lázrequezu' bénnea'.

Dxuluzúa cuina benne' xache' ca' lu na'u.

Lue' dxácalequezu' bi wezébedu ca'.

<sup>15</sup>Dxugú' xel-la' wal-la chee benne' wen da  
calela.

Guleaj lávela da calela da nune', da na'  
bene' lu da bagache'.

<sup>16</sup>Chadía chacanna naca Xránadxu Wenná  
Bea cheedxu.

Lu xezr la xu chee' ba gulebía xi' benne'  
dxelecuídene' Le'.

<sup>17</sup>Bnézruju' ca da bululáwizra benne' dx-  
exruj lázre'du ca' Lue', Xran.

Lue' dxupa'u lázxdau bénne'du ca' chee  
xuluzé nague' xrtizru',

<sup>18</sup>chee guchi'u chee bi wezébedu ca',

ne chee benne' dxeledé'e xel-la' zi',  
chee québedxa bi da calela xelún benne' ca'  
dxelune' da calela chee bénne'du caní.

## 11

<sup>1</sup>Dxuxrén lazra' Xrana' Dios.

Ájazra chen' dxi'u bénne'du xu'a:

"Bzrunnuj, guxíaj lu xi'ala ca tu bxinne?"

<sup>2</sup>Le na' xque, dxulucuéza benne' ca' dx-  
elune' da calela

xaga nalá xéche'ze.

Ba zaj naxrúe' xaga nalá xéche'ze chee' lu  
du chee na,

chee xelútie' bagácheze benne' xrlá-  
taje ca'.

<sup>3</sup>Chete ca' xelexinnaj da dxulusé chuchu da  
xrlátaje,

¿ájazra xelún benne' xrlátaje ca'?

<sup>4</sup>Xránadxu Dios zúaqueze' lataj lá'azxa  
chee'.

Xabáaqueze zua lataj blau naga dxe' Dios.

Dxelenná' xanne xiaj lawe'.

Dxelé'ene' ca da dxelún bénneache.

<sup>5</sup>Xránadxu Dios dxudé'e chawe' benne' xr-  
látaje ca' lu da stebe.

Dxecuídene' benne' ca' dxelune' da calela,  
ne benne' dxelune' da zrinnaj.

<sup>6</sup>Gudé'e benne' ca' dxelune' da calela lu da  
zi' da xa',

da zaj naca na xi', ne da dxuzézrele'e da  
dxala na ca xedxe,

ne tu be' lálé'e, da ca' sel-le' lawe' benne'  
ca'.

<sup>7</sup>Caní gune' lawe' da naca xrlátaje Xrá-  
nadxu Dios,

ne nazrí'ine' da naca na xrlátaje.

Benne' li lazre' ca' xeledé'ene' lawe'.

## 12

<sup>1</sup>Xrana' Dios, bselá bénneache chiu' lawe'  
da québedxa

dxape' benne' xezica Lue' ba lá'ana.

Quebe nu chilá' benne' li lazre' ládújla bén-  
neache ca'.

<sup>2</sup>Xúgute bénneache ca' dxelezí xé'e le sa'  
ljwezre'.

Lu da wen lazre' ba zaj nupé'e dizra' chee  
xelezí xé'e le'.

<sup>3</sup>Xránadxu Dios guzría xi'e xúgute benne'  
quebe dxuluchálaje' du lazre',

ne benne' ca' dxuluchálaje' da dxucá'ana  
szren cuine'.

<sup>4</sup>Benne' ca' gupenne': "Ne chee dizra'  
cheentu'

zru'éntu' da chawe'.

Ca dxezá lázrentu' guchálajntu', ¿nuzra  
nna be'e netu', xca'?"

<sup>5</sup> Dxenná Xránadxu Dios: “Na'a xídaqueza' lawe' da

dxulusaca zi'e benne' xache' ca',  
na' dxelebezre lazre' benne' baxache' ca'.  
Guselá' benne' ca' dxelánene' da guna'.”

<sup>6</sup> Xrtizra' Xránadxu Dios zaj naca na du lazre'.

Zaj naca na ca xiaj plata da ba gudé na lu xi',  
da ba gudé na lu xi' gazre lasa.

<sup>7</sup> Xran, guxúequezu' Lue' bénneache chiu' ca'.

Chadía chacanna gucu'uju' le' lu na' benne' zaj zre'e

lu zra na'a zra.

<sup>8</sup> Gáteteze na' dxaca da calela  
gate dxulucá'ana szren bénneache da naca sban.

### 13

<sup>1</sup> ¿Ájatequeze gal-la lazru' neda', Xran?

¿Gal-la lázrtequezu' neda'?

¿Ájatequeze quebe le'enu' da dxaca chia'?

<sup>2</sup> ¿Ájatequeze gun na ba xen guchaga lawa' da dzezaca'?

¿Ájatequeze gaca wi'ine lazra' te zra, ne chizrela?

¿Ájatequeze nna be'e benne' dxedábague' Lue' neda'?

<sup>3</sup> Gunná' da dxaca chia', Xran, ne bechebe chia'.

Btipa lazra' chee quebe gatia',

<sup>4</sup> ne chee quebe nna benne' dxedábague' neda':

“Ba betia' ni'a ne'e.”

Benne' ca' dxeledábague' neda' xelebene' che cheajcházia' lu da calela.

<sup>5</sup> Neda' dxuxrén lazra' Lue' xexache lazru' neda'.

Duté lázrdawa' dxebeda' lawe' da dxuseláu' neda'.

<sup>6</sup> Gúl-laqueza' chee Xrana' Dios lawe' da ba nuné' chia' da xrlátaje.

### 14

<sup>1</sup> Benne' lázxdau zide' dxezá' lazre', dxenné': “Quebe zua Dios.”

Benne' caní zaj nazrinnaj xichaj lázrdawe'. Dxeluné' da sban ca'.

Quebe nu chilá' benne' dxuné' da xrlátaje.

<sup>2</sup> Xránadxu Dios zue' xabáa dxenné'e bénneache

chee lé'ene' che zua nu benne' dxéajni'ingé',  
bénnea' dxape' ba lá'ana Dios.

<sup>3</sup> Xúgute' zaj xu'e neza xuca'.

Xúgute' zaj nazrinnaj xichaj lázrdawe'.

Quebe nu chilá' benne' dxuné' da xrlátaje, netúgue'.

<sup>4</sup> ¿Quebe dxeléajni'i benne' ca' dxeluné' da sban?

Dxulusunitié' bénneache chia' ca dxuzuzruj tu benne'

xeta da dxawe',

ne quebe dxeléquebe'ene' zua Xrane' Dios.

<sup>5</sup> Duté xel-la' dxelezrebe dxelezrize benne' ca'

lawe' da dxacale Dios benne' xrlátaje ca'.

<sup>6</sup> Belún le' chee da gulenná benne' xache' ca',

san benne' caní xelebeza lazre' Xránadxu Dios.

<sup>7</sup> Xídatega Bénnea' guselé' benne' Israel ca'. Gate gun Xránadxu xelexezrín benne' chee' ca',

benne' ca' zaj nada'u zítu'la,

na' welebé zri'ine zre sua Jacob,

ne welebélé'eqezne' benne' Israel ca'.

### 15

<sup>1</sup> Xran, ¿núzraqueze benne' sue' naga zu' Lue'?

¿Núzraqueze benne' sue' naga naca lá'azxa chiu'?

<sup>2</sup> Waca bénnea' naque' du lazre', ne dxuné' da xrlátaje,

bénnea' zua da líqueze lu xichaj lázrdawe',

<sup>3</sup> bénnea' quebe dxenné' chee le sa' ljwezre', ne quebe bi da calela dxuné' chee le sa' ljwezre',

ne quebe dxu'e lataj nu benne' si tizre' le sa' ljwezre'.

<sup>4</sup> Waca bénnea' quebe dxape' ba lá'ana nu benne' dxuné' da sban.

Dxape' ba lá'ana benne' ca' dxelape' ba lá'ana Xránadxu Dios,

bénnea' quebe dxuché'e dizra' da ba gunné' lácala bi da' gunítie'.

<sup>5</sup> Waca bénnea' dxusangé' dumí chee' ne quebe dxenabe' xíchajen,

ne quebe dxezí' lu ne'e dumí chee' nnie' chee'

nu benne' quebe bi zria nabague'.

Nu benne' dxuné' caní cabata' cheajchazie' lu da calela.

### 16

<sup>1</sup> Bxue neda', Dios, lawe' da dxuxrén lazra' Lue'.

<sup>2</sup> Lu xichaj lázrdawa' gucha' Xrana' Dios: “Lue' nacu' Xrana'.

Quebe bi xetú da xrlátaje de chia' da quebe naca na chiu'."

<sup>3</sup>Tuze benne' ca' zaj naque' chee Dios lu xezr la xu, ne benne' ca' zaj naque' du lazre' dxezaca ba lázrelena'.

<sup>4</sup>Waxánqueze da dxelezaca benne' ca' dxe-lape' ba lá'ana tu díos quebe bi zaca.

Quebe guna' le' tu zren gate dxuluzríe' zren lau díos na', ne quebe guchíneda' la díos na'.

<sup>5</sup>Xránadxu Dios dxugawe' neda', ne naque' da ba neza chia'.

Lue', Dios, nuxru' ca da naca chia'.

<sup>6</sup>Ca da nuzú' chia' zaj naca na da dxezi'a ba neza, ne xrtante zaj naca da nunnu' chia'.

<sup>7</sup>Tu gucá'ana szrénzqueza' Xránadxu Dios, Bénnea' dxusédene' neda'.

Chizrela gate ne dxasia' dxuzéajni'ine' neda' lu xichaj lázrdawa'.

<sup>8</sup>Xránadxu Dios nuxrén lazra' gusi'e' neda'. Lawe' da zué' cuita', quebe bi seque' guchebe na neda'.

<sup>9</sup>Chee le' na' gubé lázrdawa', ne gubéle'equezda',

na' zra gacha' lu xedxu ba cueza lazra'

<sup>10</sup>lawe' da quebe gucá'anu' bénne'du xu'a lu lataj ba xa',

ne quebe gu'u lataj guzru nu benne' ná-caqueze' chiú'.

<sup>11</sup>Gulé'enu' neda' da guna' chee gata' chia' xel-la' nabán.

Naga zu' Lue' wabéle'equezda', na' cuitu' Lue' súatequeze da ba neza chia'.

## 17

<sup>1</sup>Bze naga chi'a, Xran.

Ben xanne' da dxuláwizra' Lue'.

Guzí' da dxenaba' Lue', naca' du lazra'.

<sup>2</sup>Benna lataj xelá'a lau' chee guchi'u chia', lawe' da dxelé'enu' xúgute cáteze zaj naca na.

<sup>3</sup>Lue' dxenná' xánniu' xichaj lázrdawa' ne dxelé'enu' neda' chizrela.

Gunná' xánniu' da dxuna', na' quebe bi da calela blé'enu'.

Ba nuna' quebe bi dizra' calela nnia'.

<sup>4</sup>Dxuzía' dizra' ca naca da dxennáu',

na' quebe dxuna' ca da dxelún benne' wen da zrinnaj ca'.

<sup>5</sup>Bxue neda' lu neza chawe' chiu', chee quebe cheajcházia' lu da calela.

<sup>6</sup>Dxuláwizra' Lue', Dios, lawe' da dxennu' chi'a.

Bze naga chi'a, na' bene da dxennía'.

<sup>7</sup>Ble'e ca dxexache lázrel'e' u bénneache.

Bselá benne' ca' dxuluxrén lazre' Lue' lu na' benne' dxeledábague' le'.

<sup>8</sup>Bxue neda' ca dxun benne' dxuxúe' xiaj lawe'.

Gudeze neda' ca dxun bedxuj dxézreba' zrí'ineba' zran xrlaba'

<sup>9</sup>chee quebe bi xelún chia' benne' ca' dx-elune' da calela,

benne' dxeledábague' neda', ne dxelaca lazre' xelúti'e' neda'.

<sup>10</sup>Quebe dxelaxache lazre' le sa' ljwezre', na' duté xel-la' dxulucá'ana szren cuine' dxuluchálaje'.

<sup>11</sup>Gáteteze dxedá' dxeléchaje' neda'.

Dxelaca lazre' xeline' neda' xu.

<sup>12</sup>Zaj naque' ca tu bezre xixre'dau' dxaca lázreba' bi gáguba'.

Zaj naque' ca tu bezre xixre', ba nucache cuínaba' chee quél-laba' béadu ca'.

<sup>13</sup>Gudá, Xran, gudábaga' benne' ca' dx-elune' da calela, na' bchiche' lu xu.

Bselá neda' lu na' benne' ca' dxelune' da calela, guchínenu' xia chiu'.

<sup>14</sup>Bselá neda' lu na' benne' ca' nen ni'a ná'quezu', Xran.

Bselá neda' lu na' bénneache, benne' ca' zaj dxe'e gunne xue

chee xezr la xu nigaze,

benne' ca' dxeláguqueze' da zácále'e' chiu'.

Da nigáqueze dxulugawe' zrí'ine' ca', ne dxexegá'anaqueze da dxelágu zrí'ine zre sue'.

<sup>15</sup>Le'eda' neda' lau Lue' lawe' da naca' xrlátaje.

Xezaca ba lazra' gaca' ca nácaquezu' Lue' gate xebana'.

## 18

<sup>1</sup>Nazrí'ida' Lue', Xran.

Lue' dxuzé chuchu' neda'.

<sup>2</sup>Lue', Xran, nacu' ca tu xiaj naga ze chúchua',

ne ca tu xu'u zren naga xu'u chawa', na'  
nacu' weselá chia'.

Dios chia', Lue' dxuzé chuchu' neda', na'  
guxrén lazra' Lue'.

Dxucu'uju' neda', ne dxuselá'u' neda', ne  
dxucache chawu' neda'.

<sup>3</sup>Wannéqueza' Xránadxu Dios,  
Bénnea' naca chee' güe lá'anadxu Lē'.  
Lē' guselé' neda' lu na' benne' ca' dx-  
eledábage' neda'.

<sup>4</sup>Guzúa' lu da stēbe chee' xel-la' gute,  
na' guca da calela ca tu xegu nisa da bchebe  
na neda'.

<sup>5</sup>Guzúa' lu da stēbe chu'a lataj ba xa'  
lawe' da zua' lu da stēbe chee' xel-la' gute.

<sup>6</sup>Lu da zi' da xa' bláwizra' Xrana' Dios, ne  
gunnéqueza' Dios chia'.

Lē' benne' chi'a naga zuē' lataj lá'azxa  
chee',  
ne bze' nague' da bchálaja' lawe'.

<sup>7</sup>Nadxa guzrú' lu xezr la xu nigá.

Gulezrize lane xi'a ca'.

Gulezrízele'ē na lawe' da bzra'a Le'.

<sup>8</sup>Bdxuaj zren chee' xi' lu zrine',  
ne bdxuaj xi' lu dxu'e da bzezxe na da de  
lawe',  
na' xi' na' gudel-la na bau ca'.

<sup>9</sup>Bzéxruje' da zria zran xabáa, na' bétaje',  
na' guzúa da chul-la zran ni'ē.

<sup>10</sup>Gudéé' lu be' zrie' tu da nazí le na  
querubín.

Chadí gudée' lu be' bduu'.

<sup>11</sup>Gúcuē' da chul-la, da bcache na Lē',  
da na' naca na beuj bza da xuzru na nisa.

<sup>12</sup>Lu da dxácatite legala chee' da xu'u lu beuj  
bza,  
na' beledxúaj bau dxelala, ne xiaj bezxe'.

<sup>13</sup>Zran xabáa gunné guziu' chee' chi'i Xrá-  
nadxu,  
na' ben chi'i Dios szrentē ládújla bau dxe-  
lala ca',  
ne xiaj bezxe' na'.

<sup>14</sup>Bsane' xaga nalá xéche'ze chee' ca',  
na' bese dínnaje' benne' ca' dxeledábage'  
neda'.

Bsane' xesa guziu' ca', ne bzria xi'ē benne'  
ca'.

<sup>15</sup>Nadxa belelá' da zaj de lu situj chee'  
nísadau',  
ne ble'e lau lane xezr la xu da zua na zran  
nísadau',  
gate na' gudil-lu' benne' ca' dxeledábage'  
neda', Xran,

ne lu xel-la' dxezrá'a chiu' bzagu' benne'  
ca'.

<sup>16</sup>Bétaje' lu da sibe, ne bequé'ē neda'.

Bebéaje' neda' lu da naca ca tu nisa zila.

<sup>17</sup>Bselé' neda' lu na' benne' wal-la dx-  
eledábage' neda',

ne lu na' benne' ca' dxelecuídene' neda',  
benne' zaj nácadxe' wál-la ca neda'.

<sup>18</sup>Buluzague' neda' gate na' zua' lu da sté-  
bele'ē,

san Xrana' Dios gúcalene' neda'.

<sup>19</sup>Bebéaje' neda' naga xu'a, ne bzue' neda'  
tu lataj zren.

Bselé' neda' lawe' da bezaca ba lazre' chia'.

<sup>20</sup>Xránadxu Dios bexunne' chia' cáteze naca  
da xrlátaje da nuna'.

Cáteze naca da xrlátaje da nuna' bexunne'  
chia'

<sup>21</sup>lawe' da dxuna' ca da dxusede Xrana'  
neda',  
ne quebe guleaj xíchaja' Dios chia'.

<sup>22</sup>Dxuna' ca naca da dxenná bé'ene' neda',  
ne quebe bsana' da ca' nadxíruj be'ē.

<sup>23</sup>Guca' li lazre' lau Lē',  
ne bxue cuina' chee' quebe guna' da calela.

<sup>24</sup>Chee' le na' bexunna Xránadxu Dios chia'  
cáteze naca da xrlátaje da bēna',  
cáteze naca da xrlátaje da nuna' lau Lē'.

<sup>25</sup>Dxexache lazru' chee' benne' dxexache  
lazre' le sa' ljwezre',

ne nacu' li lazre' nen benne' naque' li lazre'.

<sup>26</sup>Dxunu' da naca chawe' chee' benne'  
naque' chawe',

na' gacu' snia nen benne' wen da calela.

<sup>27</sup>Guseláu' benne' zaj zuē' lu da zi' da xa',  
san guzéxruju' benne' dxulucá'ana szren  
cuine'.

<sup>28</sup>Lué'queze guzalju' xi' chia'.

Xrana' Dios, guzani'u chia' naga zua' lu da  
chul-la.

<sup>29</sup>Nen xel-la' waca chiu' guzría xi'a benne'  
zante  
dxeledíl-lalene' neda'.

Che Lue', Dios, síalenu' neda'  
waca guchínnaja' ze'e da zaj naxechaj xezre  
ca'.

<sup>30</sup>Li lazre' zaj naca da dxun Dios, na' du  
lazre' naca xrtizre'.

Dxucu'uje' xúgute benne' ca' dxelebeza  
lazre' Lē'.

<sup>31</sup>Tuze Xránadxu naque' Dios,

Tuze Dios cheedxu naque' Benne' dx-  
ucu'uje' dxi'u.

<sup>32</sup>Dios naque' Bénnea' dxunge' neda' benne'  
wal-la,

ne Benne' dxunge' li lazre' da dxuna' neda'.

<sup>33</sup> Dxunge' ni'a ca zaj naca ni'a bzrina' xixre'

ne dxuzúda chúchue' neda' lu xi'a Sión chee'.

<sup>34</sup> Dxusédene' neda' chee gaca cha'a lu wedil-la,

ne chee gaca guchíneda' xaga nalá xéche'ze da naca na xia gache'.

<sup>35</sup> Lu xel-la' weselá chiu' bcu'uju' neda',

ne nen na'u xabela gúcalenu' neda'.

Xel-la' zri'i lazre' chiu' ba nucá'ana szren na neda'.

<sup>36</sup> Ben chawu' neza naga tea',

chee quebe cuila' lu neza na'.

<sup>37</sup> Blaga' benne' dxeledábage' neda', na' xejzrena' le',

na' quebe bebi'a cadxa bétetea' benne' ca'.

<sup>38</sup> Bena' benne' ca' we', na' quebe guca xelexase'.

Xejlecházie' zran ni'a.

<sup>39</sup> Btipu' lazra' chee cha'a lu wedil-la.

Bzéxruju' benne' dxeledábage' neda' zran ni'a.

<sup>40</sup> Benu' buluzrunnuj benne' dxeledábage' neda' lawa',

chee bzria xi'a benne' ca' dxelecuídene' neda'.

<sup>41</sup> Gulenné' nu benne' gácalene' le' san quebe nu chilá'.

Gulenné' Xránadxu Dios, san quebe benne' chee'.

<sup>42</sup> Bzúzruja' benne' ca' ca bxrte xu da dxua be'.

Bléajja' le' ca dxuléajja' guna' la neza ca'.

<sup>43</sup> Bseláú' neda' lu na' benne' ca' dxeledábage',

na' benu' neda' benne' xíchaje xezr la xu ca',

na' benne' ca' quebe núnbe'a dxelune' zrin chia'.

<sup>44</sup> Gate belenne' chia', na' buluzúe' xrtizra'. Benne' zaj zra' xezr la xu ca' belune' ca gunná be'eda'.

<sup>45</sup> Benne' zitu' ca' gulate ni'a ne'e, na' beledxúaje' dxelezrízie' lu xezre zrentau' chee' ca'.

<sup>46</sup> Gaca ba lá'azxa Xránadxu Dios. Gaca ba Bénnea' dxucu'uje' neda'.

Xegá'ana szrénczeze Dios, Bénnea' dxuselé' neda'.

<sup>47</sup> Naca Dios Bénnea' dxebéaj lazre' benne' dxeledábage' neda',

ne dxuzúe' benne' ca' zran ni'a.

<sup>48</sup> Naque' Bénnea' dxuselé' neda' lu na' benne' ca'

dxeledábage' neda'.

Dxunge' dxenná be'eda' benne' ca' guledábage' neda'.

Bselé' neda' lu na' benne' xichaj zra'a ca'.

<sup>49</sup> Chee le' na' xecheba' chiu', Xran, lau benne' xezr la xu ca',

na' gúl-laqueza' chee Lau' Lue'.

<sup>50</sup> Dxun Dios dxenná bea bénnea' waláz chee',

ne dxexache lazre' bénnea' guqué'e, bénnea' naque' David,

ne zri'ine zre sue' chadía chacanna.

## 19

<sup>1</sup> Dxulé'e lau zran xabáa ca naca xel-la' szren chee Dios.

Dxuchálajqueze na ca zaj naca da nunge'.

<sup>2</sup> Tu zra tu zra dxuzén na zra xula da nigá,

na' tu zre' tu zre' dxé na zre' xula da ná'queze.

<sup>3</sup> Quebe dxuluchine na xrtizra' bénneache, ne quebe nu dxen chi'i na,

<sup>4</sup> san dxezriluj da dxeleenná na du gabí'i xezr la xu,

ne dxelezrín xrtizra' na dapa saca chee xezr la xu.

Dios bene' xabáa ca tu xu'u naga zua gu-bizra.

<sup>5</sup> Che zílala dxalaj na ca tu benne' wechaga na'.

Dxebé na ca tu benne' dxezá chégüe' lu witja.

<sup>6</sup> Dxedxuaj na chalá'a naga dxalaj na,

na' dxezrín na chalá'a naga dxebía na.

Dxuchá'a na xúguté da zaj de.

<sup>7</sup> Du lazre' naca da nadxixruj bea Xránadxu, ne dxuzé chacha na bénne'du xú'udxu.

Li lazre' naca da dxexechébe Xránadxu, ne dxunezruj na xel-la' sina chee benne' ca'

quebe zaj nape' na.

<sup>8</sup> Da líqueze zaj naca da nadxixruj bea Xránadxu,

na' dxelebéle'e benne' ca' dxelune' ca zaj naca na.

Du lazre' zaj naca da dxuzéajni'i Xránadxu dxi'u,

da dxuluzúa na dxi'u lu xel-la' naxaní'.

<sup>9</sup> Cháwedau' naca zrédexu Xránadxu,

da gun na súadxu chadía chacanna.

Da líqueze zaj naca da dxuchi'a Xránadxu cheedxu,

ne zaj naca na chawe'.

<sup>10</sup> Zaj naca na da dxezá lázredxadxu ca oro, ne ca oro zrenté da zácale'e na.

Zaj naca na zixredxa ca bzrina'dau', da nacale'e na zixre.

<sup>11</sup> Dxulusizre na neda', wen zrin chiu'.

Lawe' da dxuna' ca zaj naca na, da zrente dxezi'a.

<sup>12</sup> Netú benne' quebe gaca lé'ene' da calela da dxuné'.

Bselá neda', Xran, lu da calela da quebe dxéquebe'eda' dxuna'.

<sup>13</sup> Bucache chawe' neda', wen zrin chiu', chee' quebe bi dul-la guna' du lazra'.

Quebe gu'u lataj nna be'e dul-la neda'.

Nadxa gaca' du lazra', ne quebe baga' zria chee' dul-la na'.

<sup>14</sup> Gaca da dxuchálaja', ne da dxulaba lazra' da dxezaca ba lazru' Lue', Xran

Nacu' Benne' dxuxúe' neda', ne Benne' dx-exá'ue' neda'.

## 20

<sup>1</sup> Dxenaba' Xránadxu xenne' chi'u lu zra zu' lu da stebe,

ne gucu'uj La Dios chee' Jacob lue'.

<sup>2</sup> Dxenaba' Le' naga zue' lataj lá'azxa chee' sel-le'

da gácale na lue',

ne chee' xi'a Sión xide' guxre' lue'.

<sup>3</sup> Dxenaba' Le' cheajsá lazre' ca naca xúgute guna' bzu' chee',

ne si' lu ne'e béadu ca' dxuzez xu' lawe'.

<sup>4</sup> Dxenaba' Le' gunne' lue' ca naca da dxezáz lazru',

ne guné' xúgute da dxéquenu' xrlátaje.

<sup>5</sup> Béle'entu' gate guselé' lue',

na' chísantu' tu da gulé'e lawe na La Dios cheedxu.

Dxenaba' Xránadxu gunne' lue' xúgute da dxenabu' lau Le'.

<sup>6</sup> Na'a nezda' dxuselá Xránadxu bénnea' ba gucá'aqueze'.

Naga zue' xabáa lá'azxa chee' xenne' chi'i bénnea'.

Xel-la' waca zrente chee' guselé' bénnea'.

<sup>7</sup> Bal-la benne' dxuluxrén lazre' carro ca' chee' wedil-la,

na' xezícadxe' dxuluxrén lázre' bzrina' ca'. Dxi'u dxuxrén lázredxu La Xránadxu Dios.

<sup>8</sup> Benne' ca' gulate ni'a ne'e, ne xeajlecz-hazie'.

Dxi'u bexásadxu, na' zedxu.

<sup>9</sup> Bselá netu', Xran, nacu' Wenná Bea cheentu'.

Ben chi'intu' gate dxuláwizrantu' Lue'.

## 21

<sup>1</sup> Benne' dxenná bea dxebéle'ene' nen xel-la' waca chiu', Xran, na' ca naca xel-la' weselá chiu' dxebéle'ene'.

<sup>2</sup> Bnézruju' le' da guzá lazre',

ne quebe bzagu' da gunabe' Lue'.

<sup>3</sup> Guzí' lu na'u le', ne benu' dxaca chawe' chee'.

Nuzriu' xíchaje' tu da naca na oro.

<sup>4</sup> Gunabe' Lue' gunnu' le' xel-la' nabán,

na' bnézruju' na le' chee' síaqueze' zane' iza.

<sup>5</sup> Zrente naca xabáa chee' lawe' da bseláu' le'.

Bennu' le' xel-la' ba lá'ana, ne xel-la' szren.

<sup>6</sup> Lawe' da nunu' gaca chawe' chee' chadía chacanna

dxunu' dxebéle'ene' lau Lue'.

<sup>7</sup> Lawe' da dxuxrén lazre' wenná bea na' Xránadxu,

xexache lazre' Dios szrente le',

na' quebe sue' lu da stebe.

<sup>8</sup> Xulétaju' xúgute benne' dxeledábague' lue'.

Xel-la' waca chiu' xulétaju' benne' ca' dx-elecuídené' lue'.

<sup>9</sup> Lu zra na' zra'u le' gaca chee' benne' ca'

ca guzú' le' lu xi' ga dxulúzrie' bla'dau'.

Xránadxu guzúzruje' benne' ca' lu xel-la' dxezrá'a chee',

na' xi' na' guzezxe na le'.

<sup>10</sup> Xúgute da beluné' lu xezr la xu nigá guzria xi'u,

ne xegú' zri'ine zre sue' ládujla bénneache,

<sup>11</sup> lawe' da gulaca lazre' xeluné' da calela chiu' Lue'.

Gulilaj lazre' ca da xeluné', san quebe bi xelezéquene',

<sup>12</sup> lawe' da galagu' benne' ca'.

Nucuezu' xaga nalá xéche'ze chiu' chee' le'.

<sup>13</sup> Begá'ana szrénqueze Lue', Xran, lu xel-la' wal-la chiu'.

Tu gúl-lazquezdxu, ne tu güe

lá'anazquezdxu Lue'

ca naca xel-la' waca chiu'.

## 22

<sup>1</sup> Dios chia', Dios chia', ¿bizr chee na' nusán lazru' neda'?

¿Bizr chee na' quebe dxennu' da dxenaba' Lue'

chee' guseláu' neda'?

<sup>2</sup> Dios chia', dxuláwizra' Lue' te zra, ne quebe dxexechębu' chia'.

Dxuláwizra' Lue' chizreła, ne quebe dxezí'i lazra'.

<sup>3</sup> Lá'azxa nacu' Lue'.

Nacu' Benne' dxebeze' naga dxelúe lá'ana benne' Israel Lue'.

<sup>4</sup> Xra xrtáuntu' gulebeza lazre' Lue'.

Gulebeza lazre', na' bseláu' le'.

<sup>5</sup> Bululáwizre' Lue', na' belelé'.

Buluxrén lazre' Lue', na' quebe belexe-  
dué'eng'.

<sup>6</sup> Neda' naca' ca tu bęła' gúna'dau', ne quegá bęnneache.

Dxelecuide bęnneache neda', ne dxuluzúe' neda' chalá'ala.

<sup>7</sup> Xúgute' benne' dxelelé'e neda' dxelún le' chia'.

Lu da dxelún le' chia' dxelexrá dxu'e,  
ne dxulutá xíchaje', dxelelé'e:

<sup>8</sup> "Bzua cuine' lu na' Xránadxu cheę guselé' le'.

Guselé' le' che dxezaca ba lázreleņe' le'."

<sup>9</sup> Lue' nacu' Bęnnea' bęxru' neda' gate gúlaja'.

Benu' bęren lazra' Lue' gate na' ne dxázretea'.

<sup>10</sup> Guxu'a lu na'u gate quebe ne gálajtea'.

Gate ne xu'a lu le'e xrna'a, báchequeze nacu' Dios chia'.

<sup>11</sup> Quebe xębigu' naga zua' lawe' da zua gágute' da gusaca zi na neda',

ne quebe nu chilá' benne' gácalęe' neda'.

<sup>12</sup> Zaj naxechaj benne' dxeledábague' neda' ca bezre ca'.

Zaj naxechaj benne' neda' zaj naque' ca bezre wal-la ca' cheę Basán.

<sup>13</sup> Gulaca lazre' xuluzría xi'e neda' ca tu bezre xixre' dxedunba', ne dxebezre xa'aba'.

<sup>14</sup> Bebizre lazra' ca nisa da nalalaj na lu xu, na' ca naca zrita xu'a bulusán ljwezre na.

Lázrdawa' guca na ca xina' da bxuna na lu le'a ca nisa.

<sup>15</sup> Bexaca xel-la' wal-la chia' ca tu xé'ena xu la'a,

na' luzra' bedá' na chichja'.

Nuzú' neda' lu xu xrte cheę xel-la' gute.

<sup>16</sup> Zaj naxéchaje' neda' ca becu' ca'.

Zaj naxechaj benne' węn da zrinnaj ca' neda'.

Gulídue' ni'a na'a.

<sup>17</sup> Waca gulaba' ca naca zrita xu'a,

na' benne' ca' dxelelé'e neda', ne dxelelé'e xánne' neda'.

<sup>18</sup> Belexelé'e zra lana' late' weaj, na' lawe' zra lana' gulebeje' da gaca bea na.

<sup>19</sup> Quebe xębigu' naga zua', Xran. Nacu' xel-la' wal-la chia'.

Gudázega gácalęnu' neda', Xran.

<sup>20</sup> Bselá bęnne'du xu'a lu na' benne' gu'e neda' xia.

Bęnnea' guzría xi'e neda' guņe' ca dxun becu'.

<sup>21</sup> Bselá neda' lu dxu'a bęzre xixre'.

Bselá neda' lu luzu bęzre wal-la ca'.

<sup>22</sup> Guzenda' bi bíchadau' ca' lau' Lue'.

Güe lá'anaqueza' Lue' ladaj benne' zaj nazrague' lau'.

<sup>23</sup> Le'e, dxezrebele Xránadxu, le güe lá'ana Le'.

Le gucá'ana szreņe', le'e, zri'ine zre sua Jacob.

Le zrebe Le', le'e, zri'ine zre sua Israel.

<sup>24</sup> Quebe bzua Dios chalá'ala, ne quebe gucuđene' da zi' da xa' da guledé benne' xache' ca', ne quebe bcache lawe' lau benne' ca' san gate bululáwizre' Le', benne' chi'e.

<sup>25</sup> Güe lá'anaqueza' Lue' laduj benne' zan zaj nazrague' lau'.

Ca da guchebe lazra' gúnqueza' lau benne' ca' dxelezrebe' Lue'.

<sup>26</sup> Xelagu benne' dxexruj lazre', ne weléla-  
jquezne'.

Benne' ca' dxelebigue' lau Xránadxu xelúe lá'anaqueze' Le'.

Tu gácazqueze da ba neza cheę benne' ca'.

<sup>27</sup> Cheajlesá lazre' benne' dutę xęzr la xu Xránadxu,

na' xelxebí'e lau Le'.

Xúgute' cue' benne' cheę xúgute' cue' xęzr la xu xelúe lá'anaqueze' Le',

<sup>28</sup> lawe' da xu'u lu na' Xránadxu xel-la' dxenná bea,

na' nna be'eng' xúgute' benne' xęzr la xu ca'.

<sup>29</sup> Xeláguqueze xúgute' benne' zren ca' cheę xęzr la xu nigá,

ne xelúe lá'anaqueze' Dios.

Xuluzú zribe lau Le' xúgute' benne' ca' xelate,

benne' ca' quebe xelezéquene' xelęgú'u chawe'

bęnne'du zaj xu'e cheę quebe xelatie'.

<sup>30</sup> Zri'ine zre sua benne' ca' xelunbe' zrin  
chee Xránadxu.  
Xuluzenne' zri'ing' ca' ca naca chee Xrá-  
nadxu  
cadxa cheajsete chee bénneache.  
<sup>31</sup> Xelezrine', ne xuluzenne' bénneache ca  
naca  
da xrlátaje da dxun Dios.  
Xuluzenne' benne' quebe ne xelálaje' ben  
Dios da caní.

## 23

<sup>1</sup> Xránadxu Dios dxuxúe' neda' ca tu benne'  
dxuxúe' zrila' chee'.  
Quebe bi dxexájrjeda'.  
<sup>2</sup> Ca dxelzrúa zríla'du ca' ba guláguba'  
xixre' xá'adau',  
caní dxune' chia' chee xezí' lazra'.  
Gune' chia' ca dxaca chee zríla' ca'  
dxeché'e-ba' dxu'a xegu nisa da de  
zrize.  
<sup>3</sup> Dxuxuzúa chúchue' neda' lu xichaj lázr-  
dawa'.  
Dxusi'e neda' lu da xrlátaje chee gaca li da  
guchebe lazre'.  
<sup>4</sup> Láqueze tea' naga sua' lu da stebe chee xel-  
la' gute,  
quebe bi da calela guchebe na neda',  
lawe' da zúalenu' Lue' neda', Xran,  
na' dxelálacé zrise', ne blazru chiu' neda'.  
<sup>5</sup> Dxucuezu' da xi'aj gawa' lálala benne'  
dxeledábage' neda' zaj naxechaj  
neda'.  
Dxugú'u da za xichja' da dxapa na neda' ba  
lá'ana,  
ne dxusezráteu' zriga' chia'.  
<sup>6</sup> Da xrlátaje, ne xel-la' dxexache lazre' chiu'  
da lítegaze xelzúalé na neda' xúgute zra  
naca bana',  
na' lizru', Dios, gaca na lizra' chadía cha-  
canna.

## 24

<sup>1</sup> Chee Dios naca xezr la xu nigá ne xúgute  
da zaj de lawe na.  
Naca chee' xezr la xu, ne xúgute bénneache  
zaj zre'e ga na'.  
<sup>2</sup> Bzue' na lawe' nísadau',  
ne bzalé' lane na situjla zran nísadau'.  
<sup>3</sup> ¿Nu seque' cuen xi'a chee Xránadxu?  
¿Nu seque' chu'u xudau' lál'azxa chee'?'  
<sup>4</sup> Waca benne' ca' zaj naque' du lazre' ca  
naca da dxelune',  
ne ca naca da dxulaba lazre'.  
Benne' ca' quebe ne xelechisa ne'e lau  
bedáu' xi'aj xaga ca',

ne quebe bi ne xelechebe lazre' da naca wen  
lazre'.  
<sup>5</sup> Xránadxu gune' da chawe' chee benne'  
caní.  
Dios guchi'e chee benne' caní, ne guselé'  
le'.  
<sup>6</sup> Caní zaj naca bénneache dxelebigue' lau  
Le',  
benne' ca' dxelexu'e naga zua Dios chee  
Jacob.

<sup>7</sup> Le salaj dxa xu'u chee xudau'.  
Le salaj dxa xu'u chawe' ca',  
na' chu'u Wenná Bea szrente'.  
<sup>8</sup> ¿Nuzra na' Wenná Bea szrente' nigá?  
Naque' Xránadxu, Benne' wal-la,  
Bénnea' nape' duté xel-la' waca.  
Naque' Xránadxu, Bénnea' dxedxúaje'  
chawe' lu wedil-la.

<sup>9</sup> Le salaj dxa xu'u chee xudau'.  
Le salaj dxa xu'u chawe' ca',  
na' chu'u Wenná Bea szrente'.  
<sup>10</sup> ¿Nuzra na' Wenná Bea szrente' nigá?  
Naque' Xránadxu, Benne' dxenná bé'ene'  
xúgute da zaj zua.  
Le' naque' Wenná Bea szrente' na'.

## 25

<sup>1</sup> Xran, dxennía' Lue' duté lázrdawa'.  
<sup>2</sup> Dxuxrén lazra' Lue', Dios chia'.  
Quebe gu'u lataj xedué'eda'.  
Quebe gu'u lataj benne' dxeledábage'  
neda' xuluzétaje' neda'.  
<sup>3</sup> Da líqueze, benne' ca' dxelebeza lazre' Lue'  
quebe xeleque zréajene'.  
Xeledué'e benne' ca' dxeledábage' xr-  
tizru'.  
<sup>4</sup> Xran, ble'e neda' da dxaca lazru' guna'.  
Ble'e neda' da dxezaca ba lazru' guna'.  
<sup>5</sup> Bsede neda' guna' ca naca da li chiu'  
lawe' da nacu' Dios dxuseláu' neda'.  
Tu dxebeza lázrezqueza' Lue'.  
<sup>6</sup> Bsa lazre', Xran, gacu' zri'i lazre',  
ne xexache lazru' chia' cáteze da dxúnte-  
quezu'.  
<sup>7</sup> Quebe chajsá lazru' dul-la da bena' gate ne  
naca'  
benne' cuide', ne ca gudábaga' xr-  
tizru'.  
Nen duté xel-la' dxexache lazre' chiu', bsa  
lazre' neda',  
ne nen duté xel-la' zri'i lazre' chiu', Xran.  
<sup>8</sup> Xrlátaje, ne li lazre' naca Xránadxu Dios.  
Chee le na' gusédene' benne' dul-la ca' da  
dxal-la' xelune'.



<sup>9</sup> Gulé'eng' benne' dxexruj lazre' ca' da xrlátaje da xeluné',  
ne gusédene' benne' zren lazre' ca' da xeluné'.

<sup>10</sup> Lu xel-la' dxexache lazre',  
ne lu da li dxeché Xránadxu benne' ca' dxeluné'  
ca naca xel-la' wezríá cheé', ne ca da dxusede Le'.

<sup>11</sup> Lawe' da dxunu' ca da ba gunnú', Xran,  
gunité lau' ca naca dul-la nuna', da naca na zren.

<sup>12</sup> ¿Nu benne' dxezrebe' Xránadxu Dios?  
Le' gusédene' benne' nigá da dxal-la' guné'.

<sup>13</sup> Gaca cheé' tu da ba neza zrente,  
na' zri'ine zre sue' gaca cheébe' xezr la xu.  
<sup>14</sup> Xránadxu Dios naque' tuze nen benne' ca' dxelezrebe' Le',  
na' guné' xelúnbe'ē xel-la' wezríá cheé'.

<sup>15</sup> Tu dxennázqueza' Xránadxu Dios  
lawe' da guselé' neda' lu na' benne' ca' dxelaca lazre' xelexe-le' neda'.

<sup>16</sup> Gunná' neda', ne bexache lazre' neda'  
lawe' da zua' tuza', ne dxezaca zi'a.

<sup>17</sup> Naxánle'ē da stēbe da zaj zua lázrdawa'.  
Bselá neda' lu da stēbe zua'.

<sup>18</sup> Gunná' ca dxezaca zi'a, ne ca dxunle'a  
zrin,  
na' bnite lau xúgutē dul-la da nabaga'.

<sup>19</sup> Gunná' benne' ca' dxeledábage' neda' ca  
naxánle'ēne',  
ne ca dxelecuídelē'ēne' neda'.

<sup>20</sup> Bxue bēnne'du xu'a, ne bselá neda'.  
Quebe gu'u lataj xedué'eda' lawe' da dxuxrén lazra' Lue'.

<sup>21</sup> Zaj nuxru da xrlátaje, ne xel-la' li lazre'  
neda'

lawe' da dxebeza lazra' Lue'.

<sup>22</sup> Dios, bselá benne' Israel ca'  
lu xúgutē da dxelezaca zi'ē.

## 26

<sup>1</sup> Bchi'a chia', Xran, lawe' da nuna' da xrlátaje.

Bxren lazra' Lue', Xrana' Dios, ne quebe ben chupa lazra'.

<sup>2</sup> Gunná' xanne' lázrdawa', Xran, ne bxue ca da nuna'.

Gunná' xanne' da xu'u lu xichaj lázrdawa'

<sup>3</sup> lawe' da dxeque be'eda' dxexache lazru' neda',

ne dxuna' ca naca da li chiu'.

<sup>4</sup> Quebe ne guna' tu zren benne' ca' dxeluné'  
da xrlátaje cúzreze,

ne quebe ne guna' tuze benne' ca' dxululé'e cuine' xrlátaje.

<sup>5</sup> Dxequídeda' da dxelún benne' ca' dxeluné'  
da calela  
naga dxelezrague',

ne quebe ne chu'a tu zren benne' ca' dxuluzúē Dios chalá'ala.

<sup>6</sup> Dxelé'enu' quebe bi zria nabaga',  
na' waca biga' lu cugu chiu', Xran,

<sup>7</sup> cheé cuezre xa'a, xapa' Lue': "Xcalenu'",  
ne cheé guzenda' bēnneache ca naca da zren ca' da nunu'.

<sup>8</sup> Xran, nazrí'ida' lizru' naga zu',  
ne lataj lá'azxa naga zua da xabáa chiu'.

<sup>9</sup> Quebe guzríá xi'u neda' tu zren nen benne'  
dul-la ca',

ne quebe gutiu' neda' tu zren nen benne'  
ca' dxelútiē' benneáche,

<sup>10</sup> benne' ca' dxeluné' da calela,  
ne tu dxulunézrujzqueze' dumí cheé xelexé'  
lu da zaj nune'.

<sup>11</sup> Neda' tu gúnzqueza' da naca li lazre'.

Bselá neda', ne bexache lazre' neda'.

<sup>12</sup> Tu núnzqueza' da xrlátaje, na' güe  
lá'anaqueza'  
Xránadxu Dios

lau benne' ca' zaj nazrague' cheé'.

## 27

<sup>1</sup> Xránadxu Dios naque' xel-la' naxaní' chia',  
ne Benne' dxuselé' neda'.

¿Nu benne' gaca guchebe' neda'?

Xránadxu Dios naque' Benne' dxucu'uje'  
neda'.

¿Nu benne' gaca guzúē' neda' lu da stébele'ē?

<sup>2</sup> Gate guléchaj benne' ca' dxeluné' da calela  
chia',

nen benne' ca' dxulusaca zi'ē neda',  
ne benne' ca' dxeledábage' neda' cheé  
xuluzríá xi'ē neda',

na' gulechégtiē', ne xeajlecházíē'.

<sup>3</sup> Láqueze xeléchaj tu cue' benne' dxjaque'  
wedil-la neda',

benne' ca' dxeledábage' neda', quebe  
zrébequeza'.

Láqueze xuluzúē' neda' lu wedil-la, neda'  
guxrén lázrequeza' Dios.

<sup>4</sup> Tu da gunábeda' Xránadxu Dios.

Da nigáze sa lazra', da naca na cheé sua'  
lizre Xránadxu

xúgutē zra gaca bana',

chee gulaba lazra' ca naca da xrtante chee  
Xránadxu,  
ne chee guchálajlena' Le' lu xudau' lá'azxa  
chee'.

<sup>5</sup> Le' gucache chawe' neda' lu lataj lá'azxa  
chee'  
lu zra dxaca da calela.

Gucache chawe' neda' lu lataj cheéqueze'  
naga zúaqueze'.

Guzúe' neda' tu naga se cháweda'.

<sup>6</sup> Nadxa gune' guzétaja' benne' dx-  
eledábage' neda',  
ne zaj naxéchaje' neda',

na' nen duté xel-la' dxebe gutia' béadu ca'  
guzúa'-ba'

lu cugu chee'.

Gúl-laqueza', ne tu güe lá'anazqueza' Xrá-  
nadxu.

<sup>7</sup> Xran, ben chi'a gate ne dxuláwizra' Lue'.

Bexache lazre' neda', ne bechebe chia'.

<sup>8</sup> Lu xichaj lázrdawa' benda' chi'u, gunnú':  
"Bexilaj chia'."

Xexíflaja' chiu', Xran.

<sup>9</sup> Quebe gucache lau' chia' neda'.

Lu xel-la' dxezrá'a chiu' quebe xebigu' naga  
zua' neda',  
wen zrin chiu'.

Nacu' Benne' dxácalene' neda'.

Quebe gusanu' neda', ne quebe cueaj xi-  
chju' neda',

Dios, weselá chia'.

<sup>10</sup> Lácala xulusán xra xrna'a neda',  
tu xecá'azqueze Xránadxu Dios neda'.

<sup>11</sup> Bsede neda' da dxaca lazru' guna', Xran,  
ne ble'e neda' da li lazre' da dxal-la' guna',  
lawe' da zaj naxán benne' dxeledábage'  
neda'.

<sup>12</sup> Quebe gu'u lataj benne' dxeledábage'  
neda'

xeluné' chia' da dxelaca lazre'

lawe' da zaj naxechaj benne' wen lazre'  
neda'

nen benne' dxelaca lazre' xulusaca zi'e  
neda'.

<sup>13</sup> Xránadxu Dios guchebe lazre' le'eda' da  
xrlátaje chee'

naga gaca bana'.

La quebe guxéajle'a da nigá, na' gute ni'a  
na'a.

<sup>14</sup> Le cueza xelá' Xránadxu.

Le gutipa lázrele, na' Le' guzé chúchue' le'e.

Awe', le cueza xelá' Xránadxu.

## 28

<sup>1</sup> Xran, dxuláwizra' Lue'.

Nacu' Benne' dxucú'uju' neda'.

Bze naga chi'a lawe' da che quebe xennu'  
neda'

gaca' ca tu benne' dxu'e lataj ba xa'.

<sup>2</sup> Ben chi'a dxuláwizra' Lue',  
ne dxechisa na'a lau' naga zu' lataj lá'azxa  
chiu'.

<sup>3</sup> Quebe guzrí'a xi'u neda' tu zren nen benne'  
wen da calela ca',

ne cá'anqueze nen benne' ca' dxeluné' da  
zrinnaj,

benne' ca' dxelenné' dizra' cháweda' lau  
le sa' ljwezre',

san xu'u lázrdawe' da calela gune' chee'.

<sup>4</sup> Bde benne' ca' lu da ba xa' cáteze naca chee  
da beluné',

cáteze naca da calela da zaj nune'.

Buneczruj chee' benne' ca' cáteze da beluné',  
da na' dxal-la' xezezí'e.

<sup>5</sup> Lawe' da quebe gulape' ba lá'ana da ben  
Xránadxu,

ne quegá da bene' lu ni'a ná'queze',

guxrínna'je' benne' ca', ne gudée' le' lu da  
ba xa'.

<sup>6</sup> ¡Gaca ba Xránadxu Dios, Bénnea' benne'  
chi'a

gate bláwizra' Le'!

<sup>7</sup> Xránadxu naque' Bénnea' dxuzé chúchue'  
neda',

ne dxucu'uje' neda'.

Bxren lazra' Le', na' gúcalene' neda',

na' chee' le' na' gubéle'eda', na' gul-laqueza',  
ne güe lá'anaqueza' Le'.

<sup>8</sup> Xránadxu naque' Bénnea' dxuzé chúchue'  
benne' chee' ca',

ne naque' Benne' dxucu'uje', ne dxuselé'  
bénnea' guqué'e.

<sup>9</sup> Bselá benne' chiu' ca', ne ben gaca chawe'  
chee' da naca chee'.

Bxue benne' ca', ne bexru le' chadía cha-  
canna.

## 29

<sup>1</sup> Le güe lá'ana Xránadxu, le'e, zrle xabáa.  
Le güe lá'ana xel-la' szren chee', ne xel-la'  
waca chee'.

<sup>2</sup> ¡Da xabáa naca La Xránadxu!

¡Le güe lá'ana na!

Le guzú zríbele lau Xránadxu lá'azxa gate  
xelé'e.

<sup>3</sup> Chi'i Xránadxu dxen na lawe' nísadau'.

Dxen chi'i Dios xabáa ca guziu' da dxenné'  
na.

Dxedá chí'e lawe' nísadau'.

<sup>4</sup>Dxen chi'i Xránadxu ca naca xel-la' wal-la cheę na.

Dxen chi'i Xránadxu dutę xel-la' szren cheę na.

<sup>5</sup>Chi'i Xránadxu dxichaj na xaga cedro ca'.  
Dxichaj na xaga cedro ca' zaj zę na xi'a LÍbano.

<sup>6</sup>Dxuxrite na xi'a LÍbano ca' ca dxelexrite bęzredu ca',

na' dxuxrite xi'a Hermón ca tu bęzredau'.

<sup>7</sup>Chi'i Xránadxu dxun na chaze xesa.

<sup>8</sup>Chi'i Xránadxu dxuxrize na le'ę xixre' lawe' lataj.

Dxuxrize na le'ę xixre' cheę xęzr la xu Cades.

<sup>9</sup>Chi'i Xránadxu dxuxrize na xaga wal-la ca'.

Dxuchibe na xrlegue xaga ca',  
na' lu xudau' cheę' dxeleńna xúgutę bęn-  
neache:  
“¡Gaca ba Dios!”

<sup>10</sup>Dxenná be'e Xránadxu nísadau' ca'.  
Chadía chacanna dxenná be'ę ca Wenná Bea.

<sup>11</sup>Xránadxu Dios dxuzę chache' benne' cheę' ca'.

Dxuzúę' le' lu da ba neza cheę xel-la' dxe-  
beza zri lazre'.

### 30

<sup>1</sup>Gucá'ana szrena' Lue', Xran, lawe' da bechisu' neda',  
ne quebe bńęzruju' lataj benne' ca' dx-  
eledábague' neda'  
xelún le' chia'.

<sup>2</sup>Xrana' Dios, bláwizra' Lue', na' bexunu' neda'.

<sup>3</sup>Xran, bseláu' neda' lu lataj ba xa'.  
Bexunu' neda' cheę quebe chu'a xędxu ba.

<sup>4</sup>Le gul-la cheę Xránadxu, le'e nácale benne' cheęqueze'.

Le xę Le': “Xcalenu’”, ne dxajsá lázrele naque' lá'azxa,

<sup>5</sup>lawe' da tu chí'idauze dxezré'ę san chadía chacanna zua xel-la' zri'i lazre' cheę'.

Wabęzredxu tu zreze, san che zílala wabéle'ędxu.

<sup>6</sup>Gate guzúa chawa' gunnía': Quebe nu seque' gutá neda',

<sup>7</sup>lawe' da bęę chuchu' neda', Xran, ca tu xi'a zren,  
ne blé'enu' neda' cháwedau'.

Gate bcache lau', na' guzúa' stębe.

<sup>8</sup>Xran, guláwizra' Lue', ne gata' xueda' Lue'.

<sup>9</sup>¿Bizra da ba neza gaca na chiu' che gatia',  
ne chu'a xędxu ba?

¿Güe lá'ana' Lue' gate ba naca' xu xrte?

¿Waca nu guzenda' da li chiu'?

<sup>10</sup>Bęę naga neda', Xran, ne bexache lazre' neda'.

Xran, gúcale neda'.

<sup>11</sup>Benu' bexaca xel-la' dxebezre chia' xel-la' wexá'a.

Bcuasu' xel-la' dxewí'ine lazre' chia', ne bzu' chia' xel-la' dxebé.

<sup>12</sup>Cheę le na' tu gúl-lazqueza' chiu', lawe' da nacu'

da ba neza chia', ne quebe sua zríqueza'.

Xrana' Dios, tu güe lá'anazqueza' Lue' chadía chacanna.

### 31

<sup>1</sup>Dxuxrén lazra' Lue', Xrana' Dios.  
Quebe gu'u lataj xedué'eda'.

Lu da xrlátaje chiu' bselá neda'.

<sup>2</sup>Bęę naga chi'a, ne bselá neda'.

Bęę chuchu neda', ne bucí'uj neda' cheę la'.

<sup>3</sup>Nacu' Benne' dxuzę chuchu' neda', ne dxucú'uju' neda'.

lawe' da nacu' li lazre' gulé'enu' neda' neza,  
ne gusi'u neda' neza na'.

<sup>4</sup>Bebéaj neda' lu xralaj da ba zaj nucueze',  
cheę xelęl-le' neda'.

Lue' nacu' Benne' dxuxúę' neda'.

<sup>5</sup>Lu na'u dxuzúa' bęnne'du xu'a, Xran.  
Lue' bexá'awenu' neda', Dios li lazre'.

<sup>6</sup>Dxecuídeda' benne' ca' dxelebeza lazre' dios ca'  
quebe bi zaj zaca.

Neda' dxebeza lazra' Xrana' Dios.

<sup>7</sup>Béle'ęda', ne sua' lu da ba neza lawe' da dxexache lazru' neda'.

Caní dxunu' lawe' da dxelé'equeznu' ca da dzezaca zí'a.

Nézenu' ca dxedéa' lu da ba xa'.

<sup>8</sup>Quebe bdeu' neda' lu na' benne' ca' dx-  
eledábague' neda'.

Bęę chuchu' neda' tu lataj chawe'.

<sup>9</sup>Bexache lazre' neda', Xrana' Dios, lawe' da zua' lu da ba xa'.

Ba bebizre nisa xuzru xiaj lawa' lawe' da dxewí'ine lazra'

dutę bęnne'du xu'a, ne dutę bęla' dxen chia'

<sup>10</sup>lawe' da dxedé xel-la' nabán chia' lu da ba xa',

ne dxedéa' iza chia' ca' dxebezre lazra'.

Dxedú lazra' lawe' da nabaga' zria, na' dx-  
elélé zrita xu'a.

<sup>11</sup> Xúgute benne' ca' dxeledábague' neda' dxelecuídene' neda',  
na' benne' walíZR chia' dxuluzúe' neda' chelá'ala,  
na' benne' zaj núnbe'e neda' dxelecuase' neda'.

Benne' ca' dxelelé'ene' neda' la neza dxuluzrúnnuje' naga zua'.

<sup>12</sup> Benne' caní ba gulal-la lazre' neda' ca dxelal-la lazre'  
tu benne' gate.

Naca' neda' ca tu xé'ena xu da nalá'a.

<sup>13</sup> Dxenda' dizra' schanni' da dxeleenná benne' zantę chia',  
na' gátęteze zua da dxuchebe na neda'.

Dxácate na' dxelune' tuze dizra' bi xelune' chia',  
ne zaj nune' xelútię' neda'.

<sup>14</sup> Neda' dxuxrén lazra' Lue', Xran.

Dxennía' nacu' Lue' Dios chia'.

<sup>15</sup> Lu na'u Lue' zaj xu'u zra chia' ca'.

Bselá neda' lu na' benne' ca' dxeledábague' neda',

ne lu na' benne' ca' zaj nau zi' xuzre' neda'.

<sup>16</sup> Lu xel-la' szren chiu' bxue neda', wen zrin chiu'.

Lu xel-la' dxexache lazre' chiu' bselá neda'.

<sup>17</sup> Quebe gu'u lataj xedué'eda', Xran, lawe' da dxuláwizra' Lue'.

Ben xelxedué'e benne' ca' dxelebéaj xíchaje' Lue'.

Ben xelxúia zrię' lu lataj ba xa'.

<sup>18</sup> Ben quebe gaca xelenné' benne' ca' dxelezi xé'e,

benne' ca' dxeleenné' da calęla cheę benne' xrlátaje ca',

da dxeleenné' lu xel-la' dxulucá'ana szren cuina,

ne lu xel-la' dxulucá'ana ditaj benne' caní.

<sup>19</sup> Da zrentę naca xel-la' zri'i lazre' chiu' da napu'

cheę bi gunu' cheę benne' ca' dxelape' Lue' ba lá'ana,

da na' dxunu' lau xúgute bėnneache

ne cheę benne' ca' dxelebeza lazre' Lue'.

<sup>20</sup> Lu da bagácheze naga zu' Lue' dxucachu' benne' ca'

cheę quebe bi xelún bėnneache cheę'.

Dxuzú' benne' ca' tu lu xu'u nagache

cheę quebe bi gun cheę' xel-la' wetil-la dizra' cheę bėnneache.

<sup>21</sup> ĴGaca ba Xránadxu Dios!

Lu xel-la' dxexache lazre' cheę' bęne' da zrentę

cheę gúcalęne' neda' tu lu xęzre naga guca wedil-la.

<sup>22</sup> Gate na' guzúia da dxuchebe neda' gunnía':

Zua' naga quėbedxa le'e Xrana' neda'.

Lue' bennu' chi'a da guta' xueda' Lue' gate na' bláwizra' Lue'.

<sup>23</sup> ĴLe zri'i Xránadxu, xúgutele le'e nácale benne' cheę Léqueze'!

Xránadxu dxuxúe' benne' ca' quebe dxulusanę' Lę',

na' dxuxunęzrujle'e cheę benne' ca' dxulucá'ana szrenę' Lę'.

<sup>24</sup> Le gutipa lázrele, xúgutele le'e dxebeza lázrele Xránadxu Dios,

na' Lę' guzė chúchue' le'e.

## 32

<sup>1</sup> ĴBa neza zrentę naca na cheę bėnnea'

Dios ba bnite lawe' dul-la da gubáguę', ne ba gudúe' zria da guzúia cheę'!

<sup>2</sup> ĴBa neza zrentę naca na cheę bėnnea'

Dios quebe dxusebague' lę' zria,

bėnnea' quebe dxezi xé'e!

<sup>3</sup> Gate quebe guxrúalepa' dul-la gubaga', bedú lazra' lawe' da gudxęzra' bedú zra.

<sup>4</sup> Te zra ne chizrela bdeu' neda' xel-la' zi', Xran.

Bedú lazra' ca dxebizre beaj nisa beu' la.

<sup>5</sup> Nadxa guxrúalepa' dul-la gubaga',

ne quebe bcacha' zria da guzúia chia'.

Bechugu lazra' guxrúalepa' na lau Lue', Xran,

na' Lue' bnite lau' cheę dul-la gubaga'.

<sup>6</sup> Xúgute bėnneache chiu' dxal-la' xuluchálajlęne' Lue'

gate dę lataj xelęzrelne' Lue', na' gate zrin da zi' da xa'

da xelęzaque',

da gaca na ca tu xęgu nisa zren da dxedxuaj na,

na' quebe bi gune na benne' ca'.

<sup>7</sup> Lue' nacu' ca tu lataj naga gaca gucache cuina',

na' gucache chawu' neda' cheę quebe bi da saca'.

Tu gul-lazqueza' zizraj ca bseláu' neda' lawe' da dxuxú' neda'.

<sup>8</sup> Dxenná Xránadxu: "Gulé'eda' lue' neza naga dxal-la' tau'.

Gusédeda' lue', ne guzėjni'ida' lue' ca dxal-la' gunu'.

<sup>9</sup> Quebe gacu' ca tu bzrina' u tu bea, be quebe bi dxelėjni'iba',

bea ca' dxun na ba xen nna be'enu'-ba', na' cu'u xia dxú'aba',  
cheeḡ gunu' xelunba' ca dxaca lazru'."

<sup>10</sup> Benne' wen da calela ca' dxun na ba xen xeledéḡ' lu da zi' da xa'.

Benne' ca' dxuluxrén lazreḡ Xránadxu, tu dxuxúezqueze' le' nen dutḡ xel-la' zri'i lazre' chee'.

<sup>11</sup> Le'e, benne' xrlátaje, le be, ne le sua lu da ba neza,

neḡ cheeḡ da ben Xránadxu, gúcaleneḡ le'e.

Nen dutḡ xel-la' dxebé le gul-la, le'e, nácale li lazre' lau Le'.

### 33

<sup>1</sup> Le be le'e, benne' xrlátaje, lau Xránadxu Dios.

Xrtante naca lau Dios da dxelúe lá'ana benne' xrlátaje ca' Le'.

<sup>2</sup> Le gucá'ana szren Dios nen da zríadi'i na du da dxínnele.

Le gúl-laqueze cheeḡ nen da dxúl-lalenle, ne nen tu da nua na chi du.

<sup>3</sup> Le gul-la cheeḡ Le' tu da cube.

Le gul-la cháwedau', quínnele dutḡ xel-la' dxebé.

<sup>4</sup> Li lazre' naca xrtizra' Xránadxu Dios, na' nuneḡ dutḡ lu xel-la' li lazre' cheeḡ.

<sup>5</sup> Le' nazrí'ineḡ da naca xrlátaje, ne da naca du lazre'.

Zaj núnbea bènneache xel-la' dxexache lazre' cheeḡ Xránadxu du gabí'i xezr la xu.

<sup>6</sup> Ne cheeḡ xrtizra' Xránadxu Dios, bene' xabáa,

na' xúguteḡ belaj da zaj nalá' zran xabáa bene'

nen be' dxedxuaj dxu'e.

<sup>7</sup> Le' dxuxutubeḡ nísadau', ne dxexuneḡ na ca tu xi'a nisa.

Dxegá'a chaweḡ nisa lu da situj ca' naga nucuezeḡ cheeḡ na.

<sup>8</sup> Le zrebe Xránadxu Dios, xúguteḡle zrale xezr la xu nigá.

Le zrebe lau Le', xúguteḡle le'e zrale lu xezr la xu

<sup>9</sup> lawe' da gunnezeḡ, na' guca xezr la xu.

Gunná be'eneḡ na, na' zúaqueze na.

<sup>10</sup> Xránadxu Dios dxuneḡ dxexaca dácheze dizra' zaj nun

bènneache xezr la xu ca',

ne dxuneḡ dxelaca níteze da ca' zaj nuneḡ xeluneḡ.

<sup>11</sup> Dizra' ba nun Xránadxu Dios tu súazqueze na chadía chacanna.

Da dxegú'u be'e lu lázrdawe' tu wadíazqueze na

lau xúguteḡ bènneache.

<sup>12</sup> Ba neza zrentḡ naca na cheeḡ benne' xezr la xu ca'

Xránadxu naqueḡ Dios cheeḡ le', benne' xezr la xu ca' gucá'a Dios cheeḡ xelaqueḡ benne' chee'.

<sup>13</sup> Naga zué' xabáa cheeḡ dxenná' Xránadxu Dios,

na' dxelé'eneḡ xúguteḡ cuen bènneache.

<sup>14</sup> Naga zué' lataj lá'azxa cheeḡ dxenné'ḡ, na' dxelé'eneḡ ca zaj zra' bènneache lu xezr la xu.

<sup>15</sup> Le' beneḡ xichaj lázxdau xúguteḡ benne' ca',

na' dxenné'ḡ xúguteḡ da dxeluneḡ.

<sup>16</sup> Quebe la benne' wenná bea ne cheeḡ benne'

dxjaqueḡ wedil-la zanteḡ cheeḡ,

ne quebe la benne' wal-la ne cheeḡ xel-la' wal-la da napé'.

<sup>17</sup> Quebe nu benne' le' ne cheeḡ bzrina', ne quebe nu la ne cheeḡ xel-la' wal-la zren cheeḡ.

<sup>18</sup> Le na' xque, dxuxúe Xránadxu Dios benne' ca' dxelezrebeḡ Le'.

Dxuxúeḡ benne' ca' dxelebeza lazreḡ Le' xexache lazreḡ le'

<sup>19</sup> cheeḡ guseléḡ le' lu xel-la' gute,

ne cheeḡ gugaweḡ le' gate dxaca gubina'.

<sup>20</sup> Dxebeza lázredxu Xránadxu Dios.

Le' naqueḡ Bénnea' dxácaleneḡ dxi'u, ne dxucu'ujeḡ dxi'u.

<sup>21</sup> Cheeḡ le na' du lázredxu béle'equezdxu lau Le',

lawe' da tu dxuxrén lázrezquezdXu La lá'azxa cheeḡ.

<sup>22</sup> Bexache lazre' netu', Xránantu',

lawe' da dxebeza lázrentu' Lue'.

### 34

<sup>1</sup> Tu güe lá'anazqueza' Xránadxu Dios te zra chizrela.

Tu gúl-lazqueza' da güe lá'ana na Le'.

<sup>2</sup> Xezaca ba lázreḡena' Xránadxu Dios.

Xelén benne' dxexruj lazre' da caní, na' welebéle'eneḡ.

<sup>3</sup> Le gucá'ana szren Xránadxu Dios tu zren nen neda',

na' tu zren gucá'ana szrendxu La lá'azxa chieḡ.

<sup>4</sup> Bláwizra' Xránadxu Dios, na' Le' benne' chia',

ne bselé' neda' lu xúguteḡ da buluchebe na neda'.

<sup>5</sup> Benne' ca' gulebeza lazre' Lē' belelé'ene'  
da xabáa chee',  
ne quebe belexedué'ene'.

<sup>6</sup> Neda', benne' xache', bláwizra',  
na' ben Xránadxu Dios chia',  
ne bselé' neda' lu xúgute da dzezaca zi'a.

<sup>7</sup> Gubáz chee Xránadxu zue' cuita benne' ca'  
dxelezrebe' Lē',  
na' dxucu'uje' benne' ca'.

<sup>8</sup> Le guxúe xque, na' lé'ele naca xrlátaje  
Xránadxu Dios.

Ba neza zrentē naca na chee bēnea' dx-  
uxrén lazre' Lē'.

<sup>9</sup> Le zrebe Xránadxu Dios, le'e, nácale  
benne' chee Lēqueze',  
lawe' da quee bi dxelexazrje benne' ca'  
dxelezrebe' Lē'.

<sup>10</sup> Bezre xíxre'du ca' dxelexáizrjeba', ne dx-  
eledunba'.

Benne' ca' dxelebeza lazre' Xránadxu Dios  
quebe bi da chawe' xelexáizrjene'.

<sup>11</sup> Le da, bidau', ne le xen chia'.

Gusédeda' le'e chee zrēbele Xránadxu Dios.

<sup>12</sup> ¿Nu benne' ládujla le'e dxaca lazre'  
xegá'ane'

lu xel-la' nabán,

bēnea' dxaca lazre' sue' zane' iza chee  
lé'ene' da chawe'?

<sup>13</sup> Bxue xanne' ca dxuchálaju' chee quebe  
nneu' da calela,  
ne chee quebe guchálaju' da wen lazre'.

<sup>14</sup> Bsan da calela da dxunu', na' ben da  
xrlátaje.

Ben ba xuzre gapu' xel-la' dxebeza zri  
lazre',  
ne ben ca naca chee na.

<sup>15</sup> Dxuxúe Xránadxu Dios benne' ca' zaj  
naque' xrlátaje,  
ne dxuzé nague' da dxululáwizre' Lē'.

<sup>16</sup> Dxezrá'a Xránadxu Dios benne' ca' dx-  
elunē da calela,  
chee quebe sua nu benne' chajsá lazre'  
benne' wen da calela ca'.

<sup>17</sup> Benne' xrlátaje ca' dxululáwizre' Xrá-  
nadxu Dios,  
na' Lē' dxenne' chee',  
ne dxuselé' benne' ca' lu xúgute da dx-  
elezaca zi'e.

<sup>18</sup> Gágute zua Xránadxu Dios naga zaj zra'  
benne' ca'

dxelexewi'ine lazre',

ne dxuselé' benne' ca' dxelexewi'ine lazre'.

<sup>19</sup> Da zantē da dzezaca zi' benne' xrlátaje.

Dxuselá Xránadxu Dios bēnea' lu xúgute  
da ca'.

<sup>20</sup> Lē' dxuxúequeze' xúgute zrita xu'e,  
na' netú zrita chee' quebe gachaj na.

<sup>21</sup> Dul-la da dxun benne' wen da calela gute  
na lē',  
na' xelebía xi' benne' ca' dxelecuídene'  
benne' xrlátaje.

<sup>22</sup> Xránadxu Dios dxexá'awe' bēne'du xu'u  
benne' wen zrin chee' ca',  
na' xúgute benne' ca' dxuluxrén lazre' Lē'  
québequeze xelebía xi'e.

## 35

<sup>1</sup> Xran, bsizre benne' ca' dxelenné' chia'.

Gudíl-lalē benne' ca' dxeledíl-lalēne' neda'.

<sup>2</sup> Gudá gucu'uju' neda' lu wedil-la,

ne gúcale neda'.

<sup>3</sup> Gudel-la xia chee wedil-la chee guzagu'  
benne' ca'  
dxululague' neda'.

Guzre neda' nacu' Benne' dxuselé' neda'.

<sup>4</sup> Ben xelexedué'e, ne xelexeque zrēaje benne'  
ca'

dxelaca lazre' xelútie' neda'.

Ben xuluzrunnuj, ne xelexedué'e benne' ca'  
dxelaca lazre'

xelunē' chia' da calela.

<sup>5</sup> Ben xelaque' ca tu xizre bebe da dxua be',  
ne gusel-la gubáz chee xabáa chiu' chee  
gulague' benne' ca'.

<sup>6</sup> Ben chul-la neza naga xeledéé', na' gaca na  
naga xelebile',

ne gusel-la gubáz chee xabáa chiu' chee  
gulague' benne' ca'.

<sup>7</sup> Bulucache' tu xralaj chee queła na neda',  
ne quegá bi nuna' chee'.

Gulene' tu xēdxu naga cheajcházia' neda',  
ne quegá bi de da dxagu na zria chia'.

<sup>8</sup> Gusel-la da guzría xi na benne' ca', ne  
quebe xelexeque be'ene'.

Ben queła xralaj chee' na' lēqueze',  
ne cheajlecházie' naga xelebía xi'e.

<sup>9</sup> Nadxa béle'equezda' ca naca da nun Xrá-  
nadxu Dios.

Sua' lu da ba neza lawe' da bselé' neda'.

<sup>10</sup> Xúgute zrita xu'a xelenná na: Xran,  
¿núzraqueze naca  
ca nacu' Lue'?

Dxuseláu' benne' xache' lu na' benne' wál-  
ladxa ca lē',

ne benne' dxexazrje lu na' benne' dxebane'  
da du de chee'.

<sup>11</sup> Belasa benne' dxelexechebe' da wen  
lazre'.

Gulawe' zria neda' chee tu da quebe dxaca  
be'eda'.

<sup>12</sup> Belexebi'e neda' da calęla cheę tu da xrlá-taje da bena',

cheę xuluzúę' neda' lu da ba xa'.

<sup>13</sup> Neda', gate quebe chawe' gulezúę', bewi'ine lazra'.

Bena' gubasa da bsaca zi na neda', ne du lazra' bláwizra' Dios cheę xexune' benne' ca'.

<sup>14</sup> Bewi'ine lazra' cheę benne' ca' ca dxuna' cheę

le sa' ljwezra', u cheę bi bíchequeza'.

Guzúá' lu da baxache' ca dxun benne' cheę xrnę'e gate dxatie'.

<sup>15</sup> Gulebé benne' ca' gate zua' lu da ba xa', ne belezraguę'.

Belezraga benne' dxeledábaguę' neda', benne' wen da calęla, na' chadite gulel-le' neda'.

Tu belúezqueze' neda', ne quebe gulezúa zrie'.

<sup>16</sup> Bulusaca zi'e neda', ne belún le' chia', ne gulagu lazxe' lu xel-la' dxelezá'a cheę neda'.

<sup>17</sup> Xran, ¿átate scha' gu'u latja da dxelunę'? Bselá neda' lu na' benne' caní dxuluzría xi'e neda',

benne' zaj naque' ca bezre xixre' ca'.

<sup>18</sup> Xapa' Lue': Xcalenu', lálwela benne' zan ca' zaj nadupe' chiu' Lue'.

Tu güe lánazqueza' Lue' ládujla benne' zan ca'.

<sup>19</sup> Quebe gu'u lataj xelebé benne' ca' dxeledábaguę' neda', ne quebe bi nuna' cheę'.

Quebe gu'u lataj xelún la benne' ca' chia', benne' dxelecuídenę' neda',

ne quebe bi dę da dxagu na zria chia'.

<sup>20</sup> Benne' caní quebe dxelaca lazre' xelezúę' lu

xel-la' dxebeza zri lazre',

na' lu xel-la' dxelezí xę cheę' dxeleonné' cheę benne' ca'

dxelebeza zri lazre' lu xęzr la xu nigá.

<sup>21</sup> Belún le' chia'.

Gulenné': "¡E! ¡E! ¡Ba blé'entu' da nune'!"

<sup>22</sup> ¿Xran, ba blé'equeznu' da dxelunę'!

¡Quebe sua zriu'!

¡Xran, quebe gusanu' neda'!

<sup>23</sup> ¿Guxasa, guzúa guchi'u chia'!

¡Gudá, Xrana' Dios, cheę gácalenu' neda'!

<sup>24</sup> ¡Bchi'a chia' lu da xrlátaje chiu', Xrana' Dios!

¡Quebe gu'u benne' ca' lataj xuluzrizre' chia'!

<sup>25</sup> ¡Quebe gu'u lataj xelenné': "Ba guca da dxezá lázredxu!"

¡Quebe xelenné': "Ba bendxu chie'!"

<sup>26</sup> Bęn xelexeduę'e, ne xeleque zréaje xúgute benne' ca'

dxelebeņę' gate bi dxaca chia'.

Bsi'e xel-la' stu', ne bęn xelaca xala benne' ca'

dxeledábaguę' neda'.

<sup>27</sup> Bęn xelúl-la, ne xelebé benne' ca' zaj dę'e neda',

cheę xelennáqueze': "Tu xegá'ana szręnzqueze Xránadxu,

Béńnea' dxezá lazre' sua lu xel-la' dxebeza zri lazre'

benne' wen zrin cheę'!"

<sup>28</sup> Tu guchálajqueza' cheę da xrlátaje chiu', ne cheę da dxue lánazqueze na Lue' te zra chizrela.

## 36

<sup>1</sup> Da zrinnaĵ da dxun benne' dxuzúa chalá'ala Dios

dxuchálaję lu le' lu xichaj lázrdawe'.

Quebe dxezá lázrequeze' gape' Dios ba lánana.

<sup>2</sup> Cheę le' na' dxulę'e cuinę' ca tu benne' zrentę.

Dxéquenę' quebe dxelę'e Dios da zrinnaĵ da dxunę',

ne quebe dxecuide Dios le'.

<sup>3</sup> Da tu dxuchálajqueze' naca na da zrinnaĵ, ne da wen lazre'.

Québedxa dxéajini'ine', ne québedxa dxune' da xrlátaje.

<sup>4</sup> Dxulaba lazre' ca naca da calęla guņę' gate dę' naga dxate'.

Xu'e neza da quebe naca neza chawe'.

Quebe dxecuídenę' da calęla.

<sup>5</sup> Xrana' Dios, zrentę naca xel-la' dxexache lazre' chiu'

da dxezrintę na xabáa,

na' dxezrintę lu beuj xel-la' li lazre' chiu'.

<sup>6</sup> Da xrlátaje chiu' naca na ca tu xi'a zren chiu',

na' ca dxuchi'u naca na ca tu nísadau' sítuję.

Xrana' Dios, tu dxuxúezquezu' bęńneache, ne bę xixre' ca'.

<sup>7</sup> Xrdante naca xel-la' dxexache lazre' chiu', Dios.

Cheę le' na' dxuluxrén lazre' bęńneache Lue' ca dxelún

bedxuj dxé'enedu ca' dxelexezraba'  
zran xrila bedxuj.  
<sup>8</sup> Welélajquezne' chee da dele'e lizru',  
na' Lue' gunézruju' xel'é'aje' da naca ca tu  
xegu da  
naca na da dxezaca ba lazru' Lue'.  
<sup>9</sup> Naga zu' Lue' zua beaj naga dxalaj nisa da  
dxunna na  
xel-la' nabán.  
 Lu xel-la' naxaní' chiu' walé'entu' da naca  
lení'.  
<sup>10</sup> Bexache lazre' benne' ca' zaj núnbe'e Lue',  
ne bzua chee benne' li lazre' ca' da xrlátaje  
chiu'.  
<sup>11</sup> Quebe gu'u lataj tábaga benne' dxucá'ana  
szren cuina neda',  
ne quebe gutá benne' dxun da calela neda'.  
<sup>12</sup> Xeajlechaze benne' ca' dxelune' da zrin-  
naj.  
 Lue' benu' xeajlechaze benne' ca', na'  
quebe gaca xelexase'.

## 37

<sup>1</sup> Quebe su' stebe ne chee da dxelún benne'  
ca'  
dxelune' da calela,  
ne quebe se lazru' da zaj nápal'e benne'  
dxelune' da zrinnaj,  
<sup>2</sup> lawe' da xeledé chee benne' ca' ca dxaca  
chee xixre'du ca',  
na' gaca chee benne' ca' ca dxaca chee  
xixre' da nadxugu,  
dxebizre na.  
<sup>3</sup> Bxren lazre' Xránadxu Dios, ne ben da  
xrlátaje,  
na' súaquezu' lu xezr la xu, ne sí'quezu' ba  
neza da li.  
<sup>4</sup> Bezaca ba lazre' nen Xránadxu,  
na' Le' gúnnaqueze' chiu' da dxezá lazru'.  
<sup>5</sup> Bzua cuinu' lu na' Xránadxu,  
ne bxren lazre' Le', na' Le' gune' ca da  
dxenabu'.  
<sup>6</sup> Gulé'ene' da xrlátaje chiu' ca tu xel-la'  
naxaní',  
ne da li lazre' chiu' ca lawe' zra.  
<sup>7</sup> Guzá' zrije lau Xránadxu, ne guleza lazre'  
Le'.  
 Quebe su' stebe ne chee benne' dxezi'e ba  
neza,  
bénnea' dxúnqueze' da calela.  
<sup>8</sup> Bsan xel-la' xichaj zra'a, ne quebe cú-  
denu'.  
 Quebe sa lazru' bi xusacu' benne' ca' dx-  
elune' da calela,

<sup>9</sup> lawe' da guzrí'a xi' Dios benne' ca' dxelune'  
da calela.  
 Benne' ca' dxelebeza lazre' Xránadxu, gaca  
chee' xezr la xu.  
<sup>10</sup> Chadite te chee benne' ca' dxelune' da  
calela.  
 Le'enu' lizre lataj benne' ca', san québedxa  
zaj zre'e na'.  
<sup>11</sup> Benne' dxexruij lazre' ca' gaca chee' xezr  
la xu,  
na' xelexezaca ba lazre' lu xel-la' dxebeza  
zri lazre' zrenté.  
<sup>12</sup> Benne' dxelún da calela dxelilaj lazre' bi  
xelune'  
chee benne' xrlátaje,  
ne lu xel-la' dxelezrá'a chee' xelagu lazxa  
benne' ca'.  
<sup>13</sup> Xránadxu Dios guzrízrequeze' chee  
benne' ca' dxelune'  
da calela  
lawe' da nézene' ba za zra cheajsé chee  
benne' ca'.  
<sup>14</sup> Benne' dxelune' da zrinnaj dxelebáje' xia  
chee',  
ne dxuluzé' xaga nalá xéche'ze chee',  
chee xuluzrí'a xi'e benne' xache' ca', ne  
benne' dxelexazrje',  
chee xelúti'e' benne' ca' dxelune' da li  
lazre'.  
<sup>15</sup> Xia nalá chee benne' ca' chaze na lu  
lazrdáuqueze',  
na' gáchajqueze xaga nalá xéche'ze chee'.  
<sup>16</sup> Cháwedxa naca da du da de chee benne'  
xrlátaje  
ca da gunní'a da zaj napa zánete' benne' dul-  
la ca',  
<sup>17</sup> lawe' da welátequeze ni'a na' benne' dx-  
elune' da zrinnaj.  
 Xránadxu ná'queze dxuxúe' benne' xrlá-  
taje ca'.  
<sup>18</sup> Nunbea Xránadxu ca zaj naca zra xelexú'a  
benne'  
du lazre' ca',  
na' da zaj napa benne' ca' xelexú'a na chadía  
chacanna.  
<sup>19</sup> Quebe xelexedué'ene' gate quebe dxaca  
chawe' chee  
bénneache,  
na' lu zra chee gubina' gata' da xelawe'.  
<sup>20</sup> Xelebía xi' benne' dxelune' da zrinnaj,  
na' benne' ca' dxeledábaga' Xránadxu,  
ca dxaca chee xiaj xixre' ca'.  
 Xeledé chee', ne xelexenitie' ca zren chee  
xi'.



<sup>21</sup> Benne' ca' dxelún da calela tu da dxelenabe' tu chí'idauze, ne quebe dxuluxunézruje' na, na' benne' xrlátaje dxexache lazre' le', ne dxunézruje' chee'.

<sup>22</sup> Benne' ca' dxelé'e Xránadxu le' chawe', gaca chee benne' ca' xezr la xu, na' benne' ca' quebe dxelé'ene' chawe', xelebía xí'queze'.

<sup>23</sup> Da dxelún benne' xrlátaje ca' zaj naca na da ble'e Xránadxu le', na' dxelé'ene' cháwedau' ca da dxelune'.

<sup>24</sup> Gate dxelejchaze benne' xrlátaje ca' quebe cheajlechaze' tu chí'ize lawe' da nuxru Xránadxu na' benne' ca'.

<sup>25</sup> Benne' cuide' guca', ne na'a ba gúxrúa', ne cabata' ble'eda' tu benne' xrlátaje gusán Dios le', na' quebe xeledá zri'ine zre sue' xelebéaje' guna'.

<sup>26</sup> Benne' xrlátaje nigá tu dxexache lázrezqueze', ne dxunézruje' bi dxexazrje nu benne', na' zri'ine zre sue' zaj naque' da ba neza chee' bénneache.

<sup>27</sup> Québedxa gunu' da calela, san ben da xrlátaje,

na' gaca bánquezu' chadía chacanna,

<sup>28</sup> lawe' da nazri'i Xránadxu da naca li lazre', ne quebe dxusané' benne' zaj de'e Le'. Chadía chacanna tu guxúezqueze' benne' ca',

san guzría xi'e xrtia ljwezre benne' ca' dxelune' da calela.

<sup>29</sup> Benne' xrlátaje ca' gaca chee' xezr la xu nigá, na' xelezrá'queze' chadía chacanna lu xezr la xu.

<sup>30</sup> Benne' xrlátaje dxuchálajqueze' da naca sina, na' ca dxuchi'e naca na xrlátaje.

<sup>31</sup> Da nadxixruj bea Dios tu xú'uzqueze na xichaj lázrdawe'.

Chee' le' na' quebe cheajchaze bénnea'.

<sup>32</sup> Benne' wen da zrinnaj dxenné'e benne' xrlátaje,

ne dxune' ba xuzre gutié' le'.

<sup>33</sup> Quebe gusán Xránadxu le' lu na' benne' wen da calela na',

ne quebe guzría xi'e le' gate dxuchi'e chee'.

<sup>34</sup> Guleza lazre' Xránadxu, ne ben ca da ba gunné',

na' Le' chísaqueze' Lue' chee' gaca chiu' xezr la xu nigá.

Gate xelebía xi' benne' dul-la ca', na' lé'enu' na.

<sup>35</sup> Ble'eda' tu benne' wen da zrinnaj, nagá'ane' szrente',

na' guxánle'e da de' chee' ca dxegula tu xaga zrente'.

<sup>36</sup> Na' gudé' chee', na' québedxa zue' na'a.

Bexílaja' le', san quebe nu bezrelda'.

<sup>37</sup> Blaba lazre' ca naca chee' benne' li lazre', ne gunná' benne' xrlátaje

lawe' da naga cheajsé' gaca tu da ba neza chee' benne' dxebeze' zri lazre'.

<sup>38</sup> Benne' dxelune' da calela xelebía xí'queze'.

Quebe nu cha' xrtia ljwezre benne' dxelune' da zrinnaj.

<sup>39</sup> Xránadxu Dios guseláquezé' benne' xrlátaje ca',

na' Le' gutipe' lazre' benne' ca' lu zra chee' da stebe.

<sup>40</sup> Xránadxu Dios gácalene' le', ne guselé' le'. Guselé' le' lu na' benne' ca' dxelune' da calela,

na' gune' gaca chawe' chee' lawe' da bu-luxrén lazre' Le'.

## 38

<sup>1</sup> Xrana' Dios, quebe til-lu' neda' lu xel-la' dxezrá'a chiu'.

Quebe gudéu' neda' da ba xa' lu xel-la' snia chiu',

<sup>2</sup> lawe' da belúe' xaga nalá xéche'ze chiu' neda',

na' be' na'u neda'.

<sup>3</sup> Quebe bi chawe' zua bela' dxen chia' lawe' da dxezra'u neda',

ne quebe zaj zua zrita xu'a cháwedau' lawe' da nuna' dul-la.

<sup>4</sup> Ca naca da zrinnaj da nuna' ba zria cháqueze na xíchaja'.

Zaj naca na chia' ca tu xua' z'i'ile'e.

<sup>5</sup> We' da zaj zria bel-la' dxen chia' ba dxelelá na,

ne ba dxeluzru na,

da na' dxaca chia' lawe' da bena' da calela.

<sup>6</sup> Nucache lawa', ne dxexedué' ele'eda',

ne dxebezre xacha' te zra chizrela,

<sup>7</sup> lawe' da ca naca bel-la' dxen chia' dxelá na, ne quebe bi chawe' zua bela' dxen chia'.

<sup>8</sup> Nate ni'a na'a, ne dxéqueda' ba naxúzru-jne zrita xu'a.

Dxebezre lazra' lawe' da zua stębe lązrdawa'.

<sup>9</sup>Xran, ca naca da dxezá lazra' zaj zua na nen Lue',

na' da dxebezre lazra' dxelé'equeznu' Lue'.

<sup>10</sup>Dxate lązrdawa', ne ba bedú lazra', ne québedxa dxelé'eda' cháwedau'.

<sup>11</sup>Dxelexebiga ljwezra', ne le sa' ljwezra' ca' zítu'la

ne cheę xízrawe' chia',

na' benne' walízr chia' ba belexeuase' zítu'la.

<sup>12</sup>Benne' ca' dxelaca lazre' xelútie' neda' dxuluzalę' xralaj,

na' benne' ca' dxelúe lazre' bi gaca chia' dxelenné' chia'

wabía xi'a, ne tu zaj zúaze' bi xulusaque' neda'.

<sup>13</sup>Neda' quebe dxenda' ca dxaca cheę tu benne' cuezru,

ne naca' ca tu benne' quebe dxaca nne', benne' quebe dxexrá dxu'e.

<sup>14</sup>Naca' ca tu benne' quebe dxenne',

bénnea' quebe dxexechębe',

<sup>15</sup>lawe' da dxebeza lazra' Lue', Xrana' Dios. Lue' xechębu' waláz chia', Xrana' Dios.

<sup>16</sup>Gunnia': Quebe gu'u lataj xelebenę' ne cheę da dxaca chia'.

Gate dxeajchazia', quebe gu'u le' lataj xulucá'ana szren cuine'

lawe' da zua' lu da baxache'.

<sup>17</sup>Ba zua' cheajcházia',

ne tu dxelázqueze dutę bel-la' dxen chia'.

<sup>18</sup>Cheę le' na' xrúalepequeza' da calęla da bena',

ne xewine lazra' ca naca dul-la da nabaga'.

<sup>19</sup>Benne' ca' dxeledábague' neda' zaj zúaqueze' chawe',

ne zaj naque' benne' wal-la.

Zaj naxánle'e benne' ca' dxelecuídene' neda',

ne quebe bi dę da dxagu na zria chia' lau le'.

<sup>20</sup>Benne' ca' dxelunę' da calęla cheę benne' ca'

dxelunę' da xrlátaje

zaj naque' benne' dxeledábague' neda' lawe' da

tu dxúnzqueza' da xrlátaje.

<sup>21</sup>Quebe gusanu' neda', Xrana' Dios.

Dios chia', quebe su' zitu' naga zua'.

<sup>22</sup>Ben ba xuzre gácalęnu' neda', Xran.

Nacu' Benne' dxuselé' neda'.

lu da guchálaja'.

Tu guxúe xánnezqueza' ca da guchálaja' dxácatę na'

zua benne' wen da calęla naga zua'.

<sup>2</sup>Guzúa' zrize ca tu benne' quebe dxaca nnie',

ne québequeze bchálaja' da xrlátaje, na' bzáladxa xel-la' dxudía chia'.

<sup>3</sup>Guca lązrdawa' ca tu da dxala,

na' lu da dxulaba lazra' guca na ca tu xi'.

Na' gunaba' lau Xránadxu, gunnía':

<sup>4</sup>Xran, ble'e neda' da gaca chia',

ne ájatę zra gaca bana'.

Bzėjni'i neda' chaditę nazruzre gatia'.

<sup>5</sup>Nunu' chia' sua' bábaze zra,

na' iza chia' québequeze bi naca na lau Lue'.

įDa líqueze quebe bi zaj naca zra cheę xúgutę bėnneache!

<sup>6</sup>įDa líqueze zaj naca bėnneache ca tu zrúl-laze!

įDa líqueze dácheze naca zaj dxe' bėnneache gunne xue

cheę xel-la' nabán cheę'!

įDxulucúdię' xel-la' gunnía', ne quebe zaj nézene'

nu cheę gaca na!

<sup>7</sup>Na'a, Xran, įbízraqueze cueza lazra'?

Tuzu' Lue' dxal-la' cueza lazra'.

<sup>8</sup>Bselá neda' lu xúgutę da zrinnađ da bena'.

Quebe gu'u lataj benne' xala ca' xelún le' chia'.

<sup>9</sup>Guzúa' zrize, ne quebe bi bchálaja'

lawe' da Lu'e' queze bęnu' guca caní chia'.

<sup>10</sup>Becá'a xízrawe' da bzu' lu bęla' dxen chia'. Bache gatia' lu da dxusacu' neda'.

<sup>11</sup>Dxudéu' ba xa' tu benne' ba nun dul-la cheę dxuzėjni'inu' le',

ne ca dxun bėadu dxuteba' ladxe' dxuzría xi'u

da nazrí'idxe bėnnea'.

įDa líqueze quebe bi zaj naca zra cheę xúgutę bėnneache!

<sup>12</sup>Bene da dxenaba' lau Lue', Xran,

ne bżę naga ca da dxuláwizra' Lue'.

Quebe su' zrize gate zua' dxebezra' lau'

lawe' da naca' lau Lue' ca tu benne' dxedaze', ne quebe dę lizre',

ne naca' ca tu benne' quebe dę xęzr la xu cheę'

ca gulaca xra xrtawa' ca'.

<sup>13</sup>Bsan neda' cheę gata' lataj xezí' le dipa' nédxula ca xexá'a xenitia'.

### 39

<sup>1</sup>Neda' gunnía': Guxúe xanne' cuina' cheę quebe guna' dul-la

## 40

<sup>1</sup>Nen dutę xel-la' zren lazre' chia' guleza lazra' Xrana' Dios, na' bżę nague' chia', ne benne' da gunábeda' Lę'.

<sup>2</sup>Bebéaje' neda' ca tu lu xędxu situj, ne lu da naca ca guna' guzra'.

Bżue' ni'a ca tu lu xiaj xre, ne begu'e neda' neza li.

<sup>3</sup>Bene' dxul-la' tu da cube da naca na da dxue lá'ana' Xránadxu.

Benne' zantę xeledé'ęę' da nigá dxunę', na' xelezrebe' Lę', ne xulxren lazre' Xránadxu Dios.

<sup>4</sup>Ba neza zrentę naca na cheę bęnnea' dxuxrén lazre' Xránadxu Dios,

ne quebe dxunę' ca dxelún benne' ca' dxulucá'ana szrenę' bedáu' xiaj xaga ca',

ne quegá ca dxelún benne' ca' dxelún lazre'.

<sup>5</sup>Da zantę benu', Xrana' Dios, da dxebántu',

ne ca zaj naca da dxezá lazru' gunu' cheęntu' quebe gaca gulábantu' lau Lue'.

Chela nu guzenda' ca zaj naca na, ne che guchálaja' cheę na, quebe baben tu na.

<sup>6</sup>Quebe dxezaca ba lazru' béadu ca' gutia' lau',

u da gunna' Lue', ne quebe gunabu' béadu ca' guzézxea' lau', u dxen cheę

béadu ca' da guzúa' lau' ne cheę dula nabaga',

san gusalaju' naga' cheę xenda' chi'u.

<sup>7</sup>Nadxa gunná': Guná' xque, za'a neda'.

Lu xiche lá'azxa naxúaj na ca naca chia'.

<sup>8</sup>Dxezaca ba lazra' guna' ca da dxaca lazru' Lue', Dios chia',

na' da nadxixruj be'u zua na lu xichaj lázrdawa'.

<sup>9</sup>Ca naca da xrlátaje chiu' ba bzenda' bęnneache

naga zaj nazraga chiu' bęnneache zantę.

Gunná' xque, quebe guzúa zria',

ca nézqueznu' Lue', Xrana' Dios.

<sup>10</sup>Quebe bcácheza' ca da xrlátaje chiu' lu lázrdawa'.

Ba bchálajqueza' ca naca xel-la' li lazre' chiu',

ne ca dxuseláu' bęnneache.

Quebe guzúa' zri ca naca xel-la' dxexache lazre' chiu',

ne ca naca da li chiu' ládujla benne' zantę zaj nazraguę' chiu'.

<sup>11</sup>Xran, quebe chenu' xexache lazru' neda'. Xel-la' dxexache lazre' chiu', ne da li chiu' tu dxelácalezqueze na neda'.

<sup>12</sup>Lawe' da ba guléchajle'ę da calela ca' neda',

da calela ca' da ba nuna' zaj zria na neda', na' quebe gaca nna'a naga zu'.

Zaj naxándxa na ca zaj naca xicha xíchaja', na' dxedú lazra'.

<sup>13</sup>Dxenaba' lau', Xran, guseláu' neda'.

Xran, bęn ba xuzre gácalęnu' neda'.

<sup>14</sup>Ben xelexedué'e, ne xeleque zréaje xúgute benne' ca' dxelaca lazre' xelútie' neda'.

Ben xeajxaca bżębela, ne xelexedué'e benne' ca' dxelezá lazre' xelunę' chia' da calela.

<sup>15</sup>Bęn xeleque zréaje' lawe' da belún zréaje' neda'

benne' ca' gulé'ę neda': "E, e."

<sup>16</sup>Bęn xelebé, ne xelezúe lu da ba neza xúgute benne' ca'

dxelebeze' Lue', ne bęn xełennáqueze benne' ca' zaj nazrí'inę' Lue', weselá cheę'.

Xelenné': "Xegá'ana szręnqueze Xránadxu."

<sup>17</sup>Láqueze sua' neda' lu da ba xa', ne lu da baxache',

guxúequeze Xrana' Dios ájala gunę' chia'.

Nacu' Benne' dxácalęne' neda', ne Benne' weselá chia'.

Dios chia', quebe chenu' gácalęnu' neda'.

## 41

<sup>1</sup>Ba neza zrentę naca na cheę bęnnea' dxe'ę gunne xue

cheę benne' xache'.

Lu zra gate zuę' lu da stębe, guselá Xránadxu bęnnea'.

<sup>2</sup>Xránadxu guxúequeze' le', ne gunézruje' le' xel-la' nabán.

Gaca na tu da ba neza zrentę cheę bęnnea' lu xęzr la xu nigá,

na' quebe gudé Xránadxu le' lu na' benne' ca' dxeledábaguę' Lę'.

<sup>3</sup>Xránadxu Dios gúxruqueze' le' gate zúe' lu xel-la' dxudía.

Gun chawe' dutę da naque' gate na' quebe  
chawe' zue'.

<sup>4</sup>Gunnía': Xrana' Dios, bexache lazre' neda'.  
Bexún benne'du xu'a lawe' da bena' dul-la  
gate gudábaga' Lue'.

<sup>5</sup>Benne' ca' dxeledábage' neda' dxeleonné'  
chia' da caleła.

Dxeleonné': "¿Bátala gate benne' nigá, ne  
xenite le'?"

<sup>6</sup>Che xedajleonné'e neda', dxelún lazre'.  
Dxelebéaje' neda' dizra' cheę bi da caleła  
gaca xelenné' chia',  
na' gate dxelexedxúaje', na' dxelexrúe'  
dizra' na'.

<sup>7</sup>Gate dxelezraga benne' dxelecuídene'  
neda',

na' tu dxeleonnézqueze' chia'.  
Tu dxuluchálajlequeze' ljwezre' chia'

da caleła, dxeleonné':

<sup>8</sup>"Ba guxú'e tu xízrawe' da gute na le',  
ne québedxa xexásaqueze' ga na' de'."

<sup>9</sup>Cá'anqueze bennea' guleza zri lazre' nen  
neda',

bennea' bxren lazra', na' gudágulequeze'  
neda',

benne' nigá dxedábagazegue' neda'.

<sup>10</sup>Lue', Xrana' Dios, bexache lazre' neda',  
ne ben xexasa' neda',

na' xunézruja' benne' ca' ca da dxal-la'  
xelezí'e.

<sup>11</sup>Caníqueze nezda' ba bena' da dxezaca ba  
lazru' Lue',

cheę quebe bi xelebéle benne' ca' dx-  
eledábage' neda'.

<sup>12</sup>Ca naca chia' neda', ba bęxruquezu' neda'  
lawe' da

naca' du lazre',  
ne ba bzu' neda' lau Lue' chadía chacanna.

<sup>13</sup>¡Gaca ba Xránadxu, Dios cheę benne' Is-  
rael ca'

gaxuane iza, ne chadía chacanna!  
¡Ca'an naca na, ne ca'an gaca na!

## 42

<sup>1</sup>Ca dxun bzrina' xixre' dxebezre xa'aba'  
lawe' da

dxebíleba' nisa,  
ca' dxuláwizra benne'du xu'a da naca chiu',  
Dios.

<sup>2</sup>Dxebile benne'du xu'a da naca chiu', Dios  
ban.

¿Bata gaca xida' cheę guzúa cuina' lau Dios?

<sup>3</sup>Nisa xuzru xiaj lawa' guca na ca xeta dx-  
awa'

te zra chizrela,  
dxácate na' gulé'e neda' xúgute zra: "¿Ga  
na' Dios chiu'?"

<sup>4</sup>Dxajsá lazra' cheę da caní, ne dxebezre  
lazra'.

Dxajsá lazra' ca guxá'aleña' benne' zan ca',  
ne nuzúa' lawe' le' lizre Dios.

Tu dxúl-lazquezdxu lu xel-la' dxebé,  
ne dxue lá'anaquezdxu Dios lu laní.

<sup>5</sup>¿Bizr cheę na' dxate ni'a na'u, benne'du  
xu'a?

¿Bizr cheę na' zu' stebe lu xichaj lázrdawa'?

Guleza lazre' Dios lawe' da güe lá'anaqueza'  
Le' da xula.

Naque' Benne' dxuselé' neda', ne Dios chia'.

<sup>6</sup>Dios chia', ba nate ni'a na' benne'du xu'a  
lu xichaj lázrdawa'.

Cheę le' na' dxajsá lazra' chiu' nigá zua' lu  
xezr la xu

xechalá'a xegu Jordán,  
ne lu xęzr la xu cheę benne' Hermón naga  
zua xi'a Mizar.

<sup>7</sup>Ca schaga da dxun nísadau', ne da dxun tu  
bdua nisa

zren chiu', Dios,  
ca' dxeque benne'du xu'a lawe' da dxusaca  
zi' na'u neda'.

<sup>8</sup>Te zra xexache lazre' Xránadxu neda',  
na' chizrela tu gúl-lazqueza' da güe lá'ana'  
Le',

ne tu guchálajlequeza' Dios,  
Bennea' dxunne' xel-la' nabán chia'.

<sup>9</sup>Xapa' Dios: Lué'queze dxucu'uju' neda'.

¿Bizr cheę na' nal-la lazru' neda'?

¿Bizr cheę na' dxewí'ine lazra' lawe' da  
dxusaca zi'

benne' dxedábage' neda'?

<sup>10</sup>Ca tu benne' dxelé'e zrita xu'a, ca' dxelún  
benne' ca'

chia', dxelún le' chia'.  
Tu zra tu zra dxeleonné' chia': "¿Ga na' Dios  
chiu'?"

<sup>11</sup>¿Bizr cheę na' dxate ni'a na'u, benne'du  
xu'a?

¿Bizr cheę na' zu' stebe lu xichaj lázrdawa'?

Guleza lazre' Dios lawe' da güe lá'anaqueza'  
Le' da xula.

Naque' Benne' dxuselé' neda', ne Dios chia'.

## 43

<sup>1</sup>Bchi'a chia', Dios, ne ble'e lau naca' xrlá-  
taje.

Bselá neda' lu na' benne' ca' dxuluzúe' Lue'  
chalá'ala,  
ne lu na' benne' ca' dxelezí xē'e, ne dx-  
elune' da zrinnaj.

<sup>2</sup> Nacu' Lue' Dios chia', ne dxuzé chuchu'  
neda'.

¿Bizr chee na' nusán lazru' neda'?

¿Bizr chee na' dxewí'ine lazra' lawe' da  
dxusaca zi' neda'  
benne' ca' dxeledábague' neda'?

<sup>3</sup> Gusel-la chia' xel-la' naxaní' chiu', ne da li  
chiu'.

Da caní xulusí na neda' neza.

Xeleché na neda' lu xi'a lá'azxa chiu', ne  
naga zúaquezu' Lue'.

<sup>4</sup> Chu'a naga zua lucugu chee Dios.

Chu'a lau Dios, Bénnea' dxunē' dxebeda',  
na' zua' lu da ba neza.

Güe lá'ana' Lue' nen da zriadí'i na du, Dios  
chia'.

<sup>5</sup> ¿Bizr chee na' dxate ni'a na'u, bēnne'du  
xu'a?

¿Bizr chee na' zu' stēbe lu xichaj lázrdawa'?  
Guleza lazre' Dios lawe' da güe lá'anaqueza'  
Lē' da xula.

Naque' Benne' dxuselé' neda', ne Dios chia'.

#### 44

<sup>1</sup> Dios, bache bēnentu' lawe' da buluzén Xra  
xrtáuntu' netu'  
ca naca da bēnu' lu zra chee', da naca na iza  
ba guledé na.

<sup>2</sup> Bzria xi'u bēnneache xēzr la xu xezícadxa  
ca' lau  
xra xrtauntu' ca', na' bzu' le' xlataj  
benne' ca'.

Bsaca zi'u benne' xēzr la xu ca', san bzua  
chachu'  
bēnneache chiu' lu xēzr la xu nigá.

<sup>3</sup> Xra xrtáuntu' ca' quebe gulezi'e xēzr la xu  
nigá

nen xia nalá cheéqueze',  
Ne quebe buluselá cuine' nen xel-la' wal-la  
da zaj nape'.

Lue' bseláuquezu' le' nen xel-la' waca chiu',  
ne nen xel-la' wal-la chiu',  
ne nen xel-la' naxaní' chiu', lawe' da bezaca  
ba lazru' nen le'.

<sup>4</sup> Dios, nacu' wenna' bea chia'.

Bselá zri'ine zre sua Jacob.

<sup>5</sup> Nen xel-la' waca chiu' xebéajntu' benne'  
ca'  
dxeledábague' netu'.

Lu Lau' Lue' guchuchuj guléajntu' benne'  
ca'  
dxeledábague' netu'.

<sup>6</sup> Quebe guxrén lazra' xaga nalá xéche'ze  
chia',

ne quebe guselá xia chia' neda'.

<sup>7</sup> Lue' bcu'uju' netu' lau benne' ca' dx-  
eledábague' netu',

ne bēnu' belexedué'e benne' ca' belecuí-  
dene' netu'.

<sup>8</sup> Nē chee Dios tu súazquezentu' lu da ba  
neza,

na' chadía chacanna güe lá'anantu' Lau'  
Lue'.

<sup>9</sup> Nusán lazru' netu', ne nunu' dxexe-  
dué'entu',

ne quebe dxéajlenu' benne' cheentu' ca'  
dxjaque' wedil-la.

<sup>10</sup> Bēnu' buzrúnjntu' lau benne' ca' dx-  
eledábague' netu',

na' benne' ca' dxelecuídene' netu' gulegüe'  
ca naca

da nápantu'.

<sup>11</sup> Bdeu' netu' ca zri'la' ca' lu na' benne'  
xelútie' netu',

ne ba bese dínnaju' netu' ládujla benne'  
xēzr la xu ca'.

<sup>12</sup> Bdéu' netu', benne' chiu' ca' cá'aze, ne  
quebe bi guzi'u.

<sup>13</sup> Dxunu' dxelún la benne' walízre cheentu'.  
Benne' zaj naxéchaje' netu' dxelún lē', ne  
dxuluzrizre' cheentu'.

<sup>14</sup> Nuzú' netu' ca tu da dxelenná benne' xēzr  
la xu ca'

naca na da baxáchele'e.

Xúgute benne' dxelelé'ene' netu' dxulutá  
xíchaje',

ne dxelexebánene' ca da baxache' nácantu'.

<sup>15</sup> Tu zra tu zra tu dxexedué'ezquezda',

ne tu zúazqueza' lu da stébele'e

<sup>16</sup> lawe' da dxelenné' schanni' chia', ne dxu-  
luzúe'

neda' chalá'ala,

ne dxulutíl-lale' neda' benne' ca' dx-  
eledábague' neda',

nen benne' ca' dxelexebeaj lazre' neda'.

<sup>17</sup> Xúgute da caní dxaca cheentu', ne quebe  
ne

gal-la lazrentu' Lue',

ne quebe ne guzúantu' chalá'ala xel-la'  
wezría chiu'.

<sup>18</sup> Quebe ne gusán lázrentu' Lue',

ne quebe ne xecuásantu' lu da gunná  
be'enu' netu'.

<sup>19</sup> ¿Bizr chee na' nuzú' netu' chalá'ala tu lataj chee be snia ca', ne nuzú' netu' naga xelaze gátentu'?  
<sup>20</sup> La gul-la lázrentu' La Dios chee dxu, ne bca'ana szrentu' tu dios da quebe bi zaca,  
<sup>21</sup> ¿quebe dxal-la' zra'a Dios netu' ne chee da nigá?  
 Le' nézquezne' da zaj zua lu xichaj lázxdau bénneache.  
<sup>22</sup> Lawe' da nácantu' chiu', tu zra tu zra ba zaj zúatequeze' xelútie' netu'.  
 Zaj nuné' netu' ca zrila' ca' ba zua xelútie'-ba'.  
<sup>23</sup> ¿Bebán, Xran!  
 ¿Bizr chee na' dxasiu'?  
 ¿Bebán!  
 ¿Quebe su' zitu' tu chi'ize!  
<sup>24</sup> ¿Bizr chee na' nucache cuinu', ne quebe dxeque be'enu' ca dzezaca zí'intu', ne ca dxuluchine benne' ca' netu'?  
<sup>25</sup> Ba nate ni'a na' bénne'du xú'untu', ne dxeajcházetentu' lu xu, na' ba détentu' sudxú'ala lu xezr la xu.  
<sup>26</sup> ¿Guxasa, gúcale netu', ne duté xel-la' dxexache lazre' chiu', bselá netu'!

## 45

<sup>1</sup> Xu'u lázrdawa' tu dizra' xrtante, na' gúl-laqueza' tu da naca chee Wenná Bea.  
 Gúl-laqueza' tu da bzuaj tu benne' dxuchálajle'e cháweda'u'.  
<sup>2</sup> Nacu' xrtánle'edxa ca xúgute bénneache. Dxezilé'entu' ba neza chee dizra' dxuchálaju', lawe' da nucá'anaqueze Dios Lue' cháweda'u' tu chí'izqueze.  
<sup>3</sup> Bda' xia chiu' dxu'a le'u, Lue', benne' wal-la, lu duté xel-la' szren chiu', ne xel-la' dxenná bea chiu'.  
<sup>4</sup> Lu xel-la' szren chiu' chepe bánquezu'. Bchine dizra' li, ne xel-la' dxexruj lazre', ne da xrlátaje, na' guzéajni'i Cuinu' da zri'a ca'.  
<sup>5</sup> Zaj nalále'e xaga nalá xéche'ze chiu' ca', da xelute na benne' xezr la xu ca' lau Lue', ne cheajlechaze na lu lázrdau benne' ca' dxeledábague' Lue'.  
<sup>6</sup> Lataj blau naga dxe'u, Dios, naca na da chadía chacanna, ne súatequeze na.  
 ¿Xrlátaje naca ca dxenná be'u!

<sup>7</sup> Nazri'inu' da naca xrlátaje, ne dxecuídenu' da calela.  
 Chee le na' ba nuzúa Dios chiu' Lue' xlátaju', naga dxebéle'edxenu' ca le sa' ljwezru' ca'.  
<sup>8</sup> Dxelá xizre zra lanu' nen xala da naca na nizre xaga, ne xiaj, da ca' dxelelá na xizre.  
 Lu xu'u lizru' da zácalle'e na dxuluzúe' Lue' lu da ba neza.  
<sup>9</sup> Bi nu'ula chee wenná bea ca' zaj zúabe' ládújla nu'ula chiu' ca' zaj naque' blaudxa.  
 Chalá'a xabeja chiu' dxe' nu'ula gácabe' zru'ulu' nácube' oro da za na xezre Ofir.  
<sup>10</sup> Bene, nú'uladau', ne gunná' xque, ne bze naga da nnia':  
 Bzala lazru' lazriu' ne lizre xrau',  
<sup>11</sup> na' benne' wenná bea sa lazre' xel-la' xrtan chiu'.  
 Bzexruj lazru' lau le' lawe' da naca le' xranu'.  
<sup>12</sup> Xelelá' nu'ula xezre Tiro lau lue', zaj nu'e da xelunne' chiu', na' xelenaba benne' gunní'a ca' gunu' tu culuén chee'.

<sup>13</sup> Xrtanle'e naca bi nu'ula chee wenná bea lu xu'u naga zue'.  
 Zra lánabe' nazi' lechítaje na oro.  
<sup>14</sup> Xeleché'e-be' lau wenná bea, nácube' zra lánabe' da núale'e lechítaje na.  
 Nu'ula wégú'du ca' chjácabe' cuzru lebe'.  
 Nu'ula caní, nu'ula ljwézrebe' xuluzúabe' lawe' lue'.

<sup>15</sup> Lu duté xel-la' dxebé, ne lu da ba neza xeleché'e-be', na' xelú'ube' lu xu'u lizru', wenná bea.  
<sup>16</sup> Waláz chee xra xrna'u xelxezúa zri'inu', bi ca' gunu' xelenná beabe' du gabí'i xezr la xu.  
<sup>17</sup> Guna' cheajlesá lazre' xúgute bénneache lau' lue'.  
 Chee le na' xelúe lánana bénneache lue' chadía chacanna, ne gaxuane iza.

## 46

<sup>1</sup> Dios naque' Benne' dxuxúe' dxi'u, ne dxune' dxi'u benne' wal-la.  
 Zúatequeze' gácalene' dxi'u gate dxededxu xel-la' zi'.

<sup>2</sup> Chee le na', quebe zrédexu lácala xru'  
xęzr la xu nigá  
na' cheajlechaze xi'a ca' lu nísadau',  
<sup>3</sup> ne lácala xeajrxuza zren chee nísadau'  
xuluninne na,  
ne dxelúnle'e na schaga,  
na' welegrízequeze xi'a ca' ne chee da dx-  
ezrú'.

<sup>4</sup> De tu xegu da dxunna na xel-la' dxebé lu  
xęzre chee Dios,  
ne lu xu'u lá'azxa chee Dios, Benne' nape'  
dute xel-la' szren.

<sup>5</sup> Dios zue' xęzre na', ne cabata' cuía xi na.  
Dxaní'sise' xide' gácalęne' bėnneache zaj  
zre'e xęzre na'.

<sup>6</sup> Dxelegrėbele'e benne' xęzr la xu ca',  
na' dxelegrize benne' chee wenná bea ca'.  
Dxenné Dios ca dxenné guziu', na' dxexuna  
xęzr la xu.

<sup>7</sup> Dios, Bėnnea' nape' dute xel-la' waca,  
zúalęne' dxi'u.  
Dios na' chee Jacob dxucache chawe' dxi'u.

<sup>8</sup> Le da lé'ele da ca' nun Xránadxu.  
Le nna' ca naca da dxebánedxu da nune' lu  
xęzr la xu.

<sup>9</sup> Dxebeque zrię' wedil-la da dxelaca du  
gabí'i xęzr la xu.

Dxuzúruje' da dxuzala na xaga nalá  
xėche'ze ca',  
ne dxíchuje' xaga tuče' ca' chee wedil-la,  
na' dxuzezxe' da ca' zaj nache' benne'  
wedil-la ca'.

<sup>10</sup> Dxenná Dios: "Le sua zrize, ne le xúnbea  
naca' Dios.

Naca' szrendxa ca zaj naca xúgute cue' xęzr  
la xu.

Naca' szrendxa ca dute xęzr la xu."

<sup>11</sup> Dios, Bėnnea' nape' dute xel-la' waca,  
zúalęne' dxi'u.

Dios na' chee Jacob dxucache chawe' dxi'u.

## 47

<sup>1</sup> Le capa na'le, le'e, xúgute bėnneache!  
Le güe lá'ana Dios nen dute xel-la' dxebé!

<sup>2</sup> Dxał-la' zrédexu Xránadxu, nape' dute  
xel-la' szren.

Naque' Wenná Bea zren dxenná bé'ene'  
dute xęzr la xu.

<sup>3</sup> Bzue' benne' xęzr ca' zran ní'adxu.

Bzue' dxi'u chee nna be'edxu zánete cue'  
xęzr la xu ca'.

<sup>4</sup> Bequé'e tu xęzr la xu da gaca na cheedxu,

Da naca tu xęzr la xu xrtante chee zri'ine  
zre sua Jacob,  
benne' ca' nazrí'ine'.

<sup>5</sup> Dxeğüen Dios naga dxe'e dxenná be'e.  
Dxelebezre luzu da dxulucęzre' gate dx-  
egüen Xránadxu ga na'.

<sup>6</sup> Le gul-la da gaca ba Dios!

Le gul-la!

Le gul-la da gaca ba Wenná Bea cheedxu!

Le gul-la!

<sup>7</sup> Dios naque' Wenná Bea dute lu xęzr la xu  
nigá!

Le gul-la chee' nen dute xel-la' dxėajni'i  
chee!

<sup>8</sup> Dxe' Dios naga dxenná be'e, lu lataj na'  
naca na lá'azxa.

Dxenná bé'ene' xúgute cue' xęzr la xu ca'.

<sup>9</sup> Dxelegraga benne' dxelenná bé'ene'  
xúgute cue' xęzr la xu

tu zren nen bėnneache chee Dios chee  
Abraham.

<sup>10</sup> Benne' ca' dxelenná be'e du gabí'i xęzr la  
xu

buludé' xel-la' dxenná bea chee' lu na'  
Dios.

Le' dxenná bé'ene' xúgute benne' wenná  
bea ca'.

## 48

<sup>1</sup> Zrente naca Xránadxu!

Le naca chee' güe lá'anale'edxu Le'

ga naca lu xęzre chee Dios cheedxu,

da dxe' na lu xi'a lá'azxa chee'!

<sup>2</sup> Sión, da naca na xi'a chee Dios, naca na  
sibe, ne xrtante.

Naca na xęzre chee Wenná Bea zrente,  
da dxunna na xel-la' dxebé dute xęzr la xu  
nigá.

<sup>3</sup> Dios ba blé'ene' dxucache chawe' dxi'u,

lu xu'u zaca ca' chee xęzre chee' na'.

<sup>4</sup> Belezraga benne' wenná bea ca',

na' belelé'e chee xeledíl-lalęne' xęzre nigá,

<sup>5</sup> na' gate belelé'ene' na, na' belexebánene'.  
Belegrėbe', na' buluzrúnuje'.

<sup>6</sup> Gulegrė'e lu da stebe,

ne gulezúe' xel-la' dxudía ca dxaca chee tu  
nu'ula

ba zua sanę' bidau'.

<sup>7</sup> Gulaque' ca da ca' dxeledá lawe' nísadau'  
dxexrite na

gate dxácale'e be' bdunu' lu nísadau'.

<sup>8</sup> Bendxu ca da ben Dios, na' na'a ba ble'edxu  
na,

ga naca lu xęzre chee Xránadxu, nape' dute  
xel-la' waca,

da naca na xezre chee Xránadxu Dios.  
Le' guzúa chawe' xezre nigá chadía chacanna.

<sup>9</sup>Ga naca lu xudau' chiu' Lue', Dios dxajsá lázredxu ca naca xel-la' zri'i lazre' zren chiu'.

<sup>10</sup>Gáteteze na' dxelúe lá'ana bénneache Lue',

na' ca naca xel-la' szren chiu' dxezrín na du gabí'i xezr la xu.

Ca naca da xrlátaje dxenná be'u.

<sup>11</sup>Xelebéle'e bénneache zaj zre'e Sión.

Xelebéle'e bénneache zaj zre'e xezre ca' chee Judá ne chee da dxuchi'u chee'.

<sup>12</sup>Le'e, bénneache chee Dios, le chechaj dxu'a xezre na',

ne le gulaba ca zaj naca xu'u sibe ca',

da dxuluzé chacha na xezre na'.

<sup>13</sup>Le nna' xque ca naca ze'e zren naxechaj na xezre na'.

Le nna' xanne' ca zaj naca xu'u wal-la chee na,

chee guzenle bi chee ca naca xezre na'.

<sup>14</sup>Dios nigá nácaqueze' Dios cheedxu chadía chacanna.

Le' tu gulé'ezquezne' dxi'u neza.

#### 49

<sup>1</sup>Le xen da nigá, le'e, benne' xúgute cue' xezr la xu.

Le guzé nágale, le'e, benne' duté xezr la xu,

<sup>2</sup>le'e, benne' blau, ne le'e, benne' xezícadxa, le'e, benne' gunní'a, ne le'e, benne' xache'.

<sup>3</sup>Guchálajqueza' xel-la' sina, ne guzėjni'ida' le'e da xu'u lázrdawa'.

<sup>4</sup>Guzé naga' tu dizra' sina.

Gúl-laqueza' chee tu da nagache,

ne quinnia' da zríadi'i na du chen.

<sup>5</sup>¿Bizr chee na' dxun na ba xen zreba' lu zra chee da stebe,

gate naxechaj da caléla neda' da dxelún benne'

dxeledábage' neda'?

<sup>6</sup>Benne' ca' dxuluxrén lazre' da zaj de chee', ne dxulucá'ana szren cuine' lawe' da zaj nápalé'e.

<sup>7</sup>Quebe xelezéquene' xelaxá'awe' le sa' ljwezre',

ne quebe gaca xulunézruje' Dios da guselá na le'

<sup>8-9</sup>chee tu xelaca bánzqueze', ne chee cabata' xeluzru bel-la' dxen chee' lawe' da zrente naca da dxexa'u na xel-la' nabán chee bénneache,

ne cabata' seque' nu benne' quízruje' na.

<sup>10</sup>Xelelé'ene' dxelátequeze benne' sina ca', ne xelízrué' cáteze dxaca chee benne' xala ca',

ne chee benne' lázrdau zide' ca', na' dxulucá'ane' xel-la' gunní'a chee' lu na' benne' xula ca'.

<sup>11</sup>Dxeléquene' wazráqueze zri'ine zre sue' chadía chacanna,

na' xelaxegá'ana lizre' chee xelaca na chee xúgute cuen

xrtia ljwezre',

na' dxelu'e la xezr la xu chee' ca' ca zaj nazí láqueze'.

<sup>12</sup>Quebe xelaxegá'anatequeze bénneache lu da ba lá'ana.

Zaj naque' ca be xixre' ca', be dxeláteba'.

<sup>13</sup>Ca da dxelune' naca na da xálaze, na' dxelexezaca ba lazre' xrtia ljwezre' ca' nen da dxelennaze'.

<sup>14</sup>Zaj naque' ca tu cue' zrila' zjácaba' lataj ba xa',

naga guxúe xel-la' gute leba'.

Benne' xrlátaje ca' xelenná bé'ene' benne' gunní'a ca'

gate za' chaní',

na' xelebía xi' da ca' guta' chee',

na' lataj ba xa' gaca na naga tu xelezúazqueze'.

<sup>15</sup>Dios xexá'awe' xel-la' nabán chia' lu lataj ba xa'

lawe' da xeché'e neda' naga zúaqueze' Le'.

<sup>16</sup>Quebe su' stebe gate nu benne' dx-ezrué'ene' xel-la' gunní'a,

ne gate dxune' lizre' da zácále'dxa,

<sup>17</sup>lawe' da gate gatié' quebe bi xexu'e,

ne quebe chéajle xel-la' gunní'a chee' le'.

<sup>18</sup>Lácala dxácate naca bane' dxé cuine' zue' lu da ba neza zrente,

na' dxelúe lá'ana bénneache le' gate dxepe bane',

<sup>19</sup>san chu'e naga zaj zra xra xrtawe' ca',

ne cabátadxa lé'ene' xel-la' naxaní'.

<sup>20</sup>Bénnea' dxelapa bénneache le' ba lá'ana san quebe

bi dxėjni'ine'

naque' ca be xixre' ca', be dxeláteba'.

#### 50

<sup>1</sup>Ba gunné Xránadxu Dios, ne ba nutube' bénneache

chee duté xezr la xu,

benne' zaj zre'e naga dxalaj gubizra,

ne benne' zaj zre'e naga dxebía na.



<sup>2</sup> Lu xi'a Sión, da naca na xrtánle'e ba bzani' Dios.

<sup>3</sup> Xelá' Dios cheedxu, ne quebe sua zrié'. Gálajqueze xi' lau Le', ne gácale'e be' bdunu' da chechaj na Le'.

<sup>4</sup> Xutúbequeze' benne' zaj zre'e xabáa na'ala, ne benne' zaj zre'e xezr la xu, chee guchi'e chee bénneache chee'.

<sup>5</sup> Dxené': "Le xutube benne' chia' ca', benne' ca' beluné' tu xel-la' wezría nen neda'

da buluzúa chúchue' nen dxen chee béadu ca'."

<sup>6</sup> Da zua xabáala gulé'e lau na naque' xrlátaje,

lawe' da naca Dios Benne' guchi'e chee bénneache.

<sup>7</sup> Dxené': "Le xen, bénneache chia', na' guchálaja'.

Le guzé nágale, benne' Israel, na' nnia' da gagu na zria cheele.

Neda', Dios, naca' Dios cheele.

<sup>8</sup> Quebe til-la' le'e ca naca béadu ca' bétele lawa',

ne ca naca béadu ca' bzéxzele, da zaj zúaqueze na lawa' neda'.

<sup>9</sup> Quebe ca'a lu na'ale medu ca', ne chivo biu ca', be nápaquezle

<sup>10</sup> lawe' da zaj naca chia' xúgute be xixre' ca', ne zane gaxúa be xixre' zaj zraba' lu xi'adu ca'.

<sup>11</sup> Xu'u lu na'a xúgute be zua xrila, ne naca chia' xúgute be zaj naca banba'.

<sup>12</sup> Chela neda' dxeduna', quebe xapa' le'e ca' lawe' da naca chia' xezr la xu, ne xúgute da de lawe na.

<sup>13</sup> Dxun na ba xen gawa' bela' bezre ca'? Xí'aja' dxen chee chivo biu ca'?

<sup>14</sup> Le guzúa lau Dios da güe lá'anale Le' ne le gunezruj ca da guchebe lázrele lau Dios szrenté.

<sup>15</sup> Bláwizra neda' lu zra zu' lu da zi' da xa', na' guselá' lue', na' lue' gapu' neda' ba lá'ana."

<sup>16</sup> Dios guzre' benne' wen da calela: "¿Bi dxéquenu' lue', dxuchálaju' ca nadxixruj bi'a,

ne dxenniú' ca naca chee xel-la' wezría chia'?

<sup>17</sup> Lue' dxecuídenú' neda' che dxusízreda' lue',

ne dxuzú' chalá'ala dizra' chia'.

<sup>18</sup> Gate dxelé'enu' gubán, na' dxunu' le' tu zren,

ne nacu' tu zren benne' ca' dxeledálene' nu'ula

quebe zaj naca zru'ule'.

<sup>19</sup> Dxuchálajquezu' da calela, ne tu dxúnzquezu' da wen lazre'.

<sup>20</sup> Tu dxenné'zquezu' da calela chee bi bichequezu',

Ne dxagu' zria chee bi chee xrná'aquezu'.

<sup>21</sup> Da caní' benu', na' neda' guzúa' zrize.

Gúquenu' naca' tu benne' ca nacu' lue'.

Na'a wadíl-laqueza' lue', ne gulé'eda' lue' ca ba benu'."

<sup>22</sup> Le chéajni'i da nigá na'a, le'e dxal-la lázrele Dios.

Ga gaze guzuzruj Dios le'e, ne quebedxa sua nu guselá' le'e.

<sup>23</sup> Bénnea' guzúe' lawa' da güe lá'ane' neda' gape'

neda' ba lá'ana,

na' bénnea' dxuxúchá cuine' chee guné' da xrlátaje,

gulé'eda' le' ca guselá' le', naca' Dios chee'.

## 51

<sup>1</sup> Gúcale' neda', Dios, lu duté xel-la' dxexache lazre' chiu'.

Duté xel-la' dxexache lazre' chiu' bsula zria da nabaga'.

<sup>2</sup> Gudíbe neda' ca naca da calela da nuna', ne bca'ana chawe' neda' chee dul-la da bena',

<sup>3</sup> lawe' da dxexúnbe'a ca bena' gudábaga' Lue',

ne ca naca dul-la chia' tu dxáguze na zria neda'.

<sup>4</sup> Lau' Lue' bena' dul-la.

Awe', lau' Lué'queze, ne ba bena' da calela lau' Lue'.

Caní dxaca na chia' chee gaca bea nacu' xrlátaje lu da dxenniú',

ne nacu' du lazre' ca da dxuchi'u chee bénneache.

<sup>5</sup> Gunná' xque, báchequeze nabaga' dul-la gate gúlajtea',

ne lu dul-la zúaqueza' gate guzrán xrna'a neda'.

<sup>6</sup> Lue' dxezá lazru' sua da li lu xichaj lázrdawa',

ne lu xichaj lázrdawa' ba bzéajni'inu' neda' da naca sina.

<sup>7</sup> Bca'ana chawe' neda' nen da na' dxuchí-nenu',

na' xegá'ana' xrlátaje.

Gudíbe neda', na' gaca' chíchedxa ca tu bezze'.

<sup>8</sup> Ben xenda' xel-la' dxebe', ne da ba neza, na' xelexezi' le dipa zrita xu'a, da ba gudíchaju'.

<sup>9</sup> Quebe gusá lazru' ca naca dul-la da bena', na' bsula xúgute da calela da nuna'.

<sup>10</sup> Dios, bzua neda' tu lázrdawa' xrlátaje, ne bzua tu be' li lazre' lu xichaj lázrdawa'.

<sup>11</sup> Quebe gucuasu' neda' lau' Lue', ne quebe xeca'u lu xichaj lázrdawa' be' lá'azxa chiu'.

<sup>12</sup> Bexunna neda' xel-la' dxebe' chee xel-la' weselá chiu', ne bzua chuchu be' chawe' da xu'a.

<sup>13</sup> Nadxa gusédeda' benne' ca' dxelune' da zrinnaj  
ca dxaca lazru' xelune',  
na' benne' dul-la ca' xelexexaque' chiu' Lue'.

<sup>14</sup> Bselá neda' lu zria da nabaga', betia' benne'.

Lue' Dios, nacu' Dios dxuseláu' neda', na' gúl-laqueza' chee da xrlátaje nacu' Lue'.

<sup>15</sup> Xran, gusalaj dxu'a, na' guzenda' bénneache da dxue lá'ana' Lue'.

<sup>16</sup> Quebe dxaca lazru' béadu ca' gutia'-ba' lau',  
ne quebe dxaca lazru' béadu ca' guzézxea' lau'.

<sup>17</sup> Da guzúadxu lau Dios da dxaca lazre' naca na  
tu lázxdau dxexruj lazre'.

Tu lázxdau dxexruj lazre', ne da dxexíaje lazre'  
quebe guzú' chalá'ala, Dios.

<sup>18</sup> Dute xel-la' zri'i lazre' chiu', ben gaca chawe' chee  
xezre Sión.

Bsegula ze'e da nazečaj na xezre Jerusalén.

<sup>19</sup> Nadxa xezaca ba lazru' nen béadu ca' gútentu' lau'

dute da naca xrlátaje cheentu',  
ne béadu ca', ne da du ca' guzézxentu' lau'.  
Nadxa xelútie' béadu ca' lu cugu chiu'.

## 52

<sup>1</sup> ¿Bizr chee na' dxucá'ana szren cuinu' chee da calela  
da nunu', lue', benne' wal-la?

Tu zúazqueze xel-la' dxexache lazre' chee Dios.

<sup>2</sup> Tu dxuchálajzquezu' chee da calela da gunu' chee le sa' ljwezru'.

Da dxennú' naca na ca tu xia da nalále'e, dxezi xē'u ljwezru'.

<sup>3</sup> Nazrí'idxenu' da calela quézcala da xrlátaje,  
ne dxedánnedxenu' da wen lazre' quézcala da li.

<sup>4</sup> Nazrí'inu' xúgute dizra' da dxulucá'ana ditaj na bénneache,  
lue', benne' dxezi xē'u.

<sup>5</sup> Chee le na' guzría xi' Dios lue' tu chí'izqueze.

Waxele' lue', ne xequé'e lue' naga zúaquezu',  
ne gucuase' lue' naga zaj zra' benne' ban ca'.

<sup>6</sup> Xelelé'e benne' xrlátaje ca' da nigá, na' xelezrébequeze'.

Xuluzrízrqueze' chiu' lue', xelenné'.

<sup>7</sup> “Le na' xque, benne' nigá quebe bxren lazre' Dios  
chee gucu'uje' le'.

Bxren lázrequeze' ca naca xel-la' gunní'a zrente chee',

ne guzúaqueze' lu da calela da dxune'.”

<sup>8</sup> Neda' naca' ca tu xaga olivo xa'a lu xu'u lizre Dios.

Tu dxuxrén lázrequeza' xel-la' dxexache lazre' chee  
Dios chadía chacanna.

<sup>9</sup> Güe lá'anaqueza' Lue' chadía chacanna lawe' da benu' da caní,

ne cueza lazra' lau Lue' lawe' da naca na xrlátaje lau xúgute  
benne' chiu' Lue'.

## 53

<sup>1</sup> Benne' xala ca' dxelenná lu lázrdawe':  
Quebe zua Dios.

Xúgute' zaj naque' sban, ne zaj nune' da calela.

Quebe nu chilá' benne' dxune' da xrlátaje.

<sup>2</sup> Dios zue' xabáa dxenné'e bénneache chee lé'ene' che zua tu benne' sina,  
bénnea' dxape' Dios ba lá'ana.

<sup>3</sup> Xúgute' benne' zaj nabéaj xíchaje' Dios.

Xúgute' zaj naque' sban.

Quebe nu chilá' benne' dxune' da xrlátaje,  
netú gue'.

<sup>4</sup> Dxenná Dios: “¿Quebe dxelájni'i benne' caní  
dxelune' da calela?

Dxele'aj dxelawe' da dxelebanē' chee bénneache chia',  
ne quebe dxelexílaje' neda'.”

<sup>5</sup> Za zrin zra xelexruse' ca da quebe ne xelezaque',  
lawe' da gusedinnaj Dios zrita ca' chee benne'  
guledábage' bénneache chee'.  
Dios na' nuzúe' chalá'ala benne' ca',  
na' bénneache chee' xuluzría xi'e benne' ca'.  
<sup>6</sup> Dxenaba' Dios guné' dxuaj Sión da gácale na benne' Israel ca'.  
Gate ba nun Dios xelexzrín bénneache chee' lu xezr la xu cheéqueze',  
xelebé zri'ine zre sua Jacob,  
ne xelezúa lu da ba neza benne' Israel ca'.

## 54

<sup>1</sup> Bselá neda', Dios, nen xel-la' waca chiu'.  
Gúcale neda', Dios, nen xel-la' wal-la chiu'.  
<sup>2</sup> Bene da dxenaba' lau', Dios, ne bechebe chia'.  
Bze naga da guchálajlena' Lue'.  
<sup>3</sup> Za'aca benne' snia ca' xeledíl-lalene' neda'.  
Benne' xichaj zra'a ca' dxelaca lazre' xelútie' neda',  
benne' ca' quebe dxelape' ba lá'ana Lue', Dios.

<sup>4</sup> Dios naque' Benne' dxácalene' neda'.  
Xránadxu Dios zúalene' benne' ca' dxuluxúe' neda'.  
<sup>5</sup> Ca naca da calela dxelún benne' dxeledábage' neda',  
xuzrí'i Dios na chee benne' ca'.  
Guzría xi'e benne' ca' lawe' da naque' li lazre'.  
<sup>6</sup> Du lazra' cu'a da gudéa' lau Lue', Xran.  
Gúe lá'anaqueza' Lau' lawe' da nácale'e na xrlátaje.  
<sup>7</sup> Bseláu' neda' lu xúgute da štebe guzúa'.  
Ble'eda' gulebía xi' benne' ca' dxeledábage' neda'.

## 55

<sup>1</sup> Bze naga, Xran, ca da dxuchálajlena' Lue', ne quebe guzú' chalá'ala ca da dxenaba' lau'.  
<sup>2</sup> Guzúa ban lazre', ne bechebe chia'.  
Dxuláwizra' Lue' lu da dxuchálaja', ne zua' štebe,  
<sup>3</sup> lawe' da benne' dxeledábage' neda' dxelenné' chia',  
ne lawe' da dxelún la benne' wen da calela neda'.

Bulusebage' neda' da zrinna,  
ne duté xel-la' dxelezrá'a zaj nau zi' xuzre' neda'.

<sup>4</sup> Dxe' gunne xue lázrdawa' lu bēla' dxen chia',  
ne dxuchebe xel-la' gute neda'.

<sup>5</sup> Zua' lu xel-la' dxezrebe, ne dx-ezríztequeza',  
na' zúale neda' da dxuchebe na neda'.

<sup>6</sup> Na' gunnía': ¿Nuzra gunna neda' xrila' ca xrila tu bsia  
chee' cha'a lu be'la naga xezí' lazra'?

<sup>7</sup> Da líqueze guzrúnnuja' zítu'la,  
na' súaqueza' le'e xixre' lawe' lataj.

<sup>8</sup> Guna' ba xuzre la' lu be' bdunu', ne lu be' wal-la.

<sup>9</sup> Bzria xi' benne' ca' dxelune' da calela, Xran.

Bzaga naze da dxelune',  
lawe' da ble'eda' da zrinna, ne da calela da dxelune'  
lu xezre.

<sup>10</sup> Te zra chizrela dxeledé' lawe' ze'e da naxechaj na xezre,  
ne dxelune' da zrinna, ne da calela lu xezre nigá.

<sup>11</sup> Nazrate xezre nigá da calela da dxelune',  
ne tu dxelúnzqueze' da wen lazre', ne xel-la' dxezi xe  
lu neza chee na.

<sup>12</sup> La guca tu benne' bénnea' dxedábage' neda',  
bénnea' ben le' chia',  
na' bchaga lawa' da na'.  
La guca tu benne' dxecuídene' neda' bénnea' gudábage' neda',  
na' bcache cuina' lau le'.

<sup>13</sup> Lue', bénnea', gucu' ca tu le sa' ljwezra'.  
Bsi'u neda', ne gucu' tuze neda'.

<sup>14</sup> Tu zren bchálajdxu du lázredxu,  
ne lu xel-la' zri'i lazre' gudadxu lu xu'u lizre Dios.

<sup>15</sup> Dios, ben queła xel-la' gute benne' ca' dxelune'  
da calela chadite.

Ben xelexú'e lu lataj ba xa' zaj naca bane',  
lawe' da nazrate xu'u lizre' da calela da dxelune'.

<sup>16</sup> Ca naca chia' neda', bláwizra' Dios,  
na' Xrana' Dios bselé' neda'.

<sup>17</sup> Che zílala, ne wagubizra, ne ca dxebía gubizra  
guchálajlequeza' Dios, ne guláwizra' Le',  
na' Le' xenne' chia'.

<sup>18</sup> Xexá'awē' benne'du xu'a lu wedil-la da dxaca chia' neda',  
ne gunē' cueza' zri lazra',  
lácala zaj zra' zánete benne' dxeledábague'  
neda'.  
<sup>19</sup> Wene Dios, na' guzría xi'queze' benne' ca'.  
Naque' Bénnea' zúatequeze' dxenná be'e  
nédxute.  
Caní gunē' chee benne' ca' lawe' da quebe  
dxuluché'e  
ca dxelunē', ne quebe dxelezrebe'  
Dios.  
<sup>20</sup> Guchisa na' benne' wēn da zrinnaj chee  
gu'e benne' ca'  
dxelebeza zri lazre' nen le'.  
Gudíhaje' xrba chee xel-la' wezría da bene'  
nen benne' ca'.  
<sup>21</sup> Dizra' bchálaje' zaj naca na dizra' zren  
lazre',  
san xu'u lázrdawē' xel-la' dxezrá'a.  
Dxunē' xrtantē dizra' dxuchálaje',  
san zaj naca na ca xia da zaj nalále'e.  
<sup>22</sup> Bda xua chiu' cuzru Xránadxu, na' Le'  
gutipe' lazru'.  
Québequeze gu'e lataj cheajchaze benne'  
chawe' tu chi'ize.  
<sup>23</sup> Lue', Dios, gunu' xelxú'u benne' ca' dx-  
elunē'  
da calēla lataj ba xa',  
benne' dxelute benne', ne benne' dxelezi  
xe'e,  
gate quebe ne xelezrine' gachaj catite dxal-  
la' xelaca bane',  
san neda' guxrén lazra' Lue'.

## 56

<sup>1</sup> Bexache lazre' neda', Dios, chee quebe  
xuluzría xi'  
bénneache neda'.  
Tu zra tu zra dxulusaca zi' bénneache  
neda', benne' ca'  
dxeledíl-lalēne' neda'.  
<sup>2</sup> Te zra chizrela benne' ca' dxeledábague'  
neda'  
dxulucá'ana dífaje' neda',  
lawe' da zaj zra' benne' zante, benne'  
dxeledíl-lalēne' neda'  
lu xel-la' dxulucá'ana szren cuine'.  
<sup>3</sup> Lu zra dxezreba', dxuxrén lazra' Lue'.  
<sup>4</sup> ¡Dxuxrén lazra' Dios, na' güe lá'ana' xr-  
tizre'!  
¡Dxuxrén lazra' Dios, na' québedxa zreba'!  
¿Bízraqueze gaca gun bénneache chia'  
neda'?

<sup>5</sup> Xúgute zra dxuluchuque' xrtizra'.  
Ca naca da dxelegú'u be'e zaj naca na chee  
xelunē' chia'  
da calēla.  
<sup>6</sup> Dxelezrague', ne dxulucache cuine'.  
Dxelenná' xánnie' ca da dxuna'.  
Dxelilaj lazre' ca xelunē' xelútie' neda'.  
<sup>7</sup> Dios, bxue ca da dxelunē',  
na' dutē xel-la' dxezrá'a chiu' bzria xi'  
benne' ca'.  
<sup>8</sup> Nézqueznu' Lue' ca dxuzrúnnuja' lau  
benne' ca'.  
Bsa lazre' nisa da ba gudxezra'.  
¿Quebe zaj naxúaj na lu xiche chiu'?  
<sup>9</sup> Gate dxuláwizra' Dios, lu zra ná'queze  
xuluxuzrunnuj  
benne' ca' dxeledábague' neda'.  
Nézquezda' zúale Dios neda'.  
<sup>10</sup> ¡Dxuxrén lazra' Dios, na' güe lá'ana' xr-  
tizre'!  
¡Dxuxrén lazra' Xránadxu, na' güe lá'ana'  
xrtizre'!  
<sup>11</sup> ¡Dxuxrén lazra' Dios, na' québedxa zreba'!  
¿Bízraqueze gaca gun bénneache chia'  
neda'?  
<sup>12</sup> Nabaga' ca da nachēbe lazra' chiu', Dios.  
Gúl-laqueza' da güe lá'ana' Lue'.  
<sup>13</sup> Ba bseláu' benne'du xu'a lu xel-la' gute,  
ne bebéaju' ni'a naga zaj zua cheajlechaze  
na,  
chee gaca chu'a lau Dios lu xel-la' naxaní'  
da dxunne'  
chee benne' ca' zaj naca bane'.

## 57

<sup>1</sup> Bexache lazre' neda', Dios.  
Bexache lazre' neda', lawe' da dxuxrén  
lazra' Lue'  
dute lázrdawa'.  
Quezru' neda' ca dxun bedxuj dxézreba'  
zrí'ineba'  
zran xrflaba', cadxa te chee da štebe  
caní.  
<sup>2</sup> Guláwizra' Dios, Benne' zrentē.  
Guláwizra' Dios chee gácalēne' neda'.  
<sup>3</sup> Naga zúate' xabáa chee' sel-le' nu guselá  
neda' lu na'  
bénnea' dxáca lazre' guzría xi'e neda'.  
Gusel-la Dios xel-la' dxexache lazre', ne da  
li chee'.  
<sup>4</sup> Zua' lu da štebe ca tu benne' zuē' ládujla  
bezre xixre' ca'.  
Xu'a ládujla bénneache zaj naque' ca bezre  
xixre' ca'  
dxeláguba' bénneache.

Dizra' da dxelenné' chia' zaj naca na ca tu xia natuche',  
ne xaga nalá xéche'ze ca',  
na' xrtizre' zaj naca na ca tu xia da nalále'e.  
°Xega'ana szrénquezu' lu xabáa, Dios.  
Xel-la' szren chiu' sua na lawe' duté xezr la xu.  
°Ba zaj nabeche' xralaj chee xeled-le' neda'.  
Ba dxedú lazra' lu da dxaca chia'.  
Ba zaj naxene' tu xedxu chee cheajcházia' lu'ule na.  
Lu'ule da na' ba xejlecházqueze le'.  
°Ba zúatequeze lázrdawa', Dios.  
Ba zúatequeze lázrdawa' chee gúl-laqueza' da güe lá'ana' Lue'.  
°Bebán lazre', bénne'du xu'a, ne le xebán lázrele,  
le'e dxínnele da dxúl-lalene, ne da zríadi'i na du.  
Che zílala chásaqueza'.  
°Güe lá'anaqueza' Lue' ládujla bénneache chiu', Xran.  
Gúl-laqueza' chiu' lau benne' xúgute cue' xezr la xu,  
°lawe' da naca xel-la' dxexache lazre' chiu' zrendxa ca xabáa,  
na' da li chiu' naca na zrendxa ca beuj bza ca'.  
°Xegá'ana szrénquezu' lu xabáa, Dios.  
Xel-la' szren chiu' sua na lawe' duté xezr la xu.

## 58

°Le'e dxenná beale ¿da li dxuchálajle da naca xrlátaje?  
¿Dxuchi'ale ca naca da li chee bénneache chia'?  
°¿Cabíze'!  
¿Lu lázrdaule dxugú'u beale da zrinnaj!  
¿Stébele'e dxuzúale bénneache lu xezr la xu chia'!  
°Zaj nazrinnaj lázxdau benne' ca' zaj nabéaj xíchaje' neda' gate gulálajte'.  
Belexase dínnaje' dxelún lazre' gate gulezanté xrne'e le'.  
°Dizra' da dxelenné' zaj naca na da dxelute bénneache ca da zria zran lazxa bela'.  
Zaj naca na ca bela' snia, be nácaba' be cuezru.  
°Quebe dxenba' chi'i benne' dxunné' leba' lácala dxenné'e xrtandau'.  
°Dios, gudichaj lazxa benne' ca'.

Gudichaj, Xran, lazxa benne' ca' zaj naque' ca bezre xixre' ca'.  
°Ben xelexenitíe' ca nisa da dxelalaj na lu xu.  
Gate dxulusangé' xaga nalá xéche'ze chee', ben xeledé na chalá'ala.  
°Ben xeledé chee' ca dxaca chee be zaga dxellexúnaba'.  
Ben québedxa xeledé'ene' gubizra ca tu bidau' dxálajbe' ba nátebe'.  
°Nédxula gate quebe ne la xesu' lu xi' xecá'a Dios benne' ca' tu lu be' bduun', benne' zaj naca bangé', ne benne' ca' zaj zua xelatie'.  
°Wabé benne' xrlátaje gate lé'ene' xebéaj lazre' Dios benne' ca' dxelunge' da calela.  
Guchuchu guléaje' dxen chee benne' zaj nabéaj xíchaje' Dios.  
°Nadxa nne bénnea': "Da líqueze de lazruj chee benne' xrlátaje.  
Da líqueze zua Dios, Bénnea' dxuchi'e chee bénneache zaj zre'e lu xezr la xu."

## 59

°Bselá neda' lu na' benne' ca' dxeledábague' neda', Dios chia'.  
Bselá neda' lu na' benne' ca' dxelunge' chia' da calela.  
°Bselá neda' lu na' benne' ca' dxelunge' da zrinnaj.  
Bselá neda' lu na' benne' ca' dxelutie' benne',  
°lawe' da dxelilaj lazre' xelútie' neda'.  
Zaj nazraga benne' wal-la ca' chee xeledíl-lalene' neda',  
quegá lawe' da bi zria nabaga', ne quegá ne chee dul-la nuna' neda', Xran.  
°Lácala quebe bi bena' chee benne' ca', zá'aca chégüe', ne dxulucueze' bi xelunge' chia'.  
Bebán chee xidu' naga zua', na' le'enu' da dxelunge'.  
°Lue', Xran, Dios chee benne' zan dxjaque' wedil-la,  
ne Dios chee benne' Israel ca',  
bebán chee gudéu' ba xa' benne' xúgute cue' xezr la xu.  
Quebe xexache lazru' xúgute benne' ca' dxeledábague' Lue',  
ne dxelunge' da zrinnaj.

<sup>6</sup> Xelelé'ē gate cuía gubizra, ne xelebezre  
xē'e  
ca dxelún becu', na' xeléchajē' xēzre.

<sup>7</sup> Gunná' xque, da dxuluchálajē' naca na ca  
da dxelēxexēbe'.

Dizra' dxelenné' zaj naca na ca xia zaj nalá  
na,

lawe' da dxelenné': "¿Nuzra xene?"

<sup>8</sup> Lue', Xran, guzrizru' cheē benne' ca'.

Gun lau' cheē benne' xúgūtē cue' xēzr la xu  
ca'.

<sup>9</sup> Zaj naca wal-la benne' ca' dxeledábague'  
neda'.

Cueza lazra' Lue' lawe' da dxucu'uju' neda',  
Dios.

<sup>10</sup> Dios, Bénnea' dxexache lazre' neda', cuía  
lawē' lawa' neda'.

Dios gunē' le'eda' gaca cheē benne' ca'  
dxeledábague' neda'

ca da dxezá lazra'.

<sup>11</sup> Quebe gutiu' benne' ca', cheē quebe xelal-  
la lazre'

bénneache chia' ca da gunu'.

Bese dinnaj benne' ca' nen xel-la' waca  
chiu'.

Lue', Xran, Benne' dxucu'uj netu', ben  
cheajlecházie'.

<sup>12</sup> Ben xeledule' lu xel-la' dxulucá'ana szren  
cuine',

ne cheē dul-la dxelune' lu da dxuluchálajē',  
ne ne cheē dizra' schanni', ne da wen lazre'  
da dxelenné'.

<sup>13</sup> Bzria xi'e lu xel-la' dxezá'a chiu'.

Bzria xi'e cheē québedxa xelezúe'.

Dios, ben xeleque be'engē' dxenná be'enu'  
zri'ine zre sua Jacob.

Dxenná be'u du ca naca xēzr la xu.

<sup>14</sup> Dxelelé'ē gate dxebía gubizra, ne dxele-  
bezre xē'e

ca dxelún becu', ne dxeléchajē' xēzre.

<sup>15</sup> Dxeledé' ca benne' dxeledazē', dxelíljajē'  
da xelawē',

na' che quebe dxeléljane', na' du xēla dx-  
elawē' zria tuē' xetúe'.

<sup>16</sup> Neda' gúl-laqueza' cheē xel-la' waca chiu',  
na' che zílala güe lánana' xel-la' dxexache  
lazre' chiu',

lawe' da gúcalenu' Lué'queze neda',

ne bcu'uju' neda' gate guzúa' lu da sté-  
belē'e.

<sup>17</sup> Lue' dxutipu' lazra', na' gúl-laqueza'  
chiu',

lawe' da nacu' Lue', Dios, Bénnea' dx-  
ucu'ujē' neda',

ne Dios, dxexache lazru' neda'.

## 60

<sup>1</sup> Dios, Lue' ba bzu' netu' chalá'ala, ne bēnu'  
xeajcházentu'.

Bzrá'ale'enu' netu'.

Na'a bedá gácalenu' netu'.

<sup>2</sup> Bēnu' guzrú' xēzr la xu, ne bēnu' bxlaj na.  
Bexún na naga bxlaj na lawe' da dxebía xi  
na.

<sup>3</sup> Bēnu' blé'entu' netu', benne' chiu', da  
naca stébelē'e.

Bēnu' guca cheentu' ca güé'entu' tu da ben  
na xeajcházentu'.

<sup>4</sup> Bnézruju' tu da dxulé'e lau cheē benne'  
dxelezrebe' Lue',

Da xeluxre' cheē gulé'e lau da naca li.

<sup>5</sup> Cheē xelélé' benne' ca' nazr'iqueznu' Lue',  
bsel-la le' dutē xel-la' waca chiu', ne bene  
chia'.

<sup>6</sup> Dios gunné' lu lataj lánazza cheē':  
"Wabéquezda' neda'.

Gunna' late weaj cheēle xēzr la xu cheē  
benne' Siquem,

ne gudxixra' cheēle xēzr la xu de cuita xegu  
Sucot.

<sup>7</sup> Chia' naca xēzr la xu Galaad, ne chia' naca  
xēzr la xu

cheē zri'ine zre sua Manasés.

Xēzr la xu cheē zri'ine zre sua Efraín naca  
na ca

tu da napa chi'i na xíchaja'.

Xēzr la xu cheē zri'ine zre sua Judá naca na  
naga dxenná be'a.

<sup>8</sup> Xēzr la xu cheē benne' Moab naca na ca tu  
zriga' da xuzru nisa guná'a,

na' xēzr la xu cheē benne' Edom guchichan'  
nen zrela'.

Si'a ba neza xēzr la xu cheē benne' Filistea."

<sup>9</sup> ¿Nuzra che' neda' cheē guzétaja' xēzre da  
naxechaj na

ze'e sibe?

¿Nuzra che' neda' cheē guzétaja' benne'  
Edom ca'?

<sup>10</sup> ¿Quegá Lue' na' che'u neda', Dios, nacu'  
Bénnea'

bzue' netu' chalá'ala,

ne quebe guxéjlenu' benne' cheentu' ca',  
benne' dxjaque'

wedil-la?

<sup>11</sup> Gúcale netu' chee séquentu' tíl-lalentu'  
benne' ca'  
dxeledífl-lalene' netu',  
lawe' da naca dácheze xelácale bènneache  
netu'.  
<sup>12</sup> Tu zren nen Dios gundxu tu da zrente,  
na' Le' gulague' benne' ca' dxeledífl-lalene'  
dxi'u.

## 61

<sup>1</sup> Bene, Dios, da dxuláwizra' Lue'.  
Bze naga da dxuchálajlena' Lue'.  
<sup>2</sup> Zitu' naga zua lazria' dxuláwizra' Lue',  
lawe' da dxedú lazra'.  
Guché' neda' naga zua Bénnea' naque' ca tu  
xi'a xiaj,  
Bénnea' nácadxe' szren ca neda',  
<sup>3</sup> Nacu' Lue' Benne' nuxrué' neda',  
ne nacu' ca tu ze'e xiaj da dxucu'uj na neda'  
lau benne' ca'  
dxeledábague' neda'.  
<sup>4</sup> Tu súazqueza' lu xu'u lá'azxa chiu'.  
Sua chawa'a cuitu' Lue' ca zaj zua chawe'  
bedxuj dxé'enedu ca'  
zran xrila bedxuj.  
<sup>5</sup> Lawe' da bennu' Lue', Dios, ca da guchebe  
lazra' chiu',  
benu' napa' ca da dxelapa benne' ca' dx-  
elezrebe' Lue'.  
<sup>6</sup> Gunu' gaca bana' neda', wenná bea, zánete  
zra.  
Iza chia' xelaca na ca da zaj naca chee chupa  
cuen bènneache.  
<sup>7</sup> Tu súazqueza' lau', Dios.  
Bcueza xel-la' dxexache lazre' chiu', ne da  
li  
chee xulucá'ana chawe' na neda',  
wenná bea.  
<sup>8</sup> Caníqueze gúl-laqueza' chee lau' tu  
chí'izqueze,  
ne gúnqueza' tu zra tu zra ca da guchebe  
lazra'.

## 62

<sup>1</sup> Tuze nen Dios dxebeza zri lazre' bènne'du  
xu'a.  
Léqueze' dxuselé' neda'.  
<sup>2</sup> Tuze Le' dxucu'ujé' neda', ne dxuselé'  
neda'.  
Naque' Bénnea' dxuxre' neda', na' quebe  
negue lazra'.  
<sup>3</sup> ¿Ajatezcha' gucuézale da gunle chee tu  
benne',  
na' dxunle ba xen xúgutele guzría xile le',  
ca dxun tu benne' dxuchínnaje' tu ze'e da  
ba de chalá'ala,

u tu le'aj da ba guzru'?

<sup>4</sup> Dxunle tuze dizra' ájazra xebéajle neda' lu  
xel-la' szren chia'.  
Nazrí'ile da wen lazre'.  
Nen dxú'ale dxennele da xrlátaje, san xu'u  
lázrdaule da calela.

<sup>5</sup> Lue', bènne'du xu'a, guleza lazre' tuze  
Dios,  
lawe' da naca Le' Bénnea' dxebeza lazra'.  
<sup>6</sup> Tuze Le' dxucu'ujé' neda', ne dxuselé'  
neda'.  
Naque' Bénnea' dxuxre' neda', na' quebe  
negue lazra'.  
<sup>7</sup> Naca Dios Bénnea' dxuselé' neda', ne  
naque' da ba neza chia'.  
Naca Dios Bénnea' dxucu'ujé' neda', ne  
Benne' dxuxre' neda'.  
<sup>8</sup> Le cueza lazre' Le' tu chí'izqueze, le'e,  
bènneache.

Le xe'e ca da dxezá lázrele.  
Naca Dios Bénnea' dxuxre' dxi'u.  
<sup>9</sup> Da líqueze, da dácheze zaj naca bènneache,  
ne ca tu da wen lazre' benne' zren ca'.  
Quebe bi dxelé'e tu lu zrgú'unsá.  
Zaj nácadxe' zraze ca tu be' da dxezá'a  
lázredxu.  
<sup>10</sup> Quebe guxrén lázrele da sile gate dxexú-  
bele,  
ne quebe gucá'ana szren cuínale chee da ca'  
dxebanle.  
Che dxegula xel-la' gunn'a chee, quebe  
zezaca ba lázrele  
chee da na'.  
<sup>11</sup> Tu lásaze gunná Dios:  
na' chupa lasa benda' da nigá:  
Chee Dios naca xel-la' waca.

<sup>12</sup> Chiu' Lue', Xran, naca xel-la' dxexache  
lazre'  
lawe' da dxunézruju' lazruj chee tu tu bèn-  
neache  
cáteze da zaj nune'.

## 63

<sup>1-2</sup> Dios, Lue' nacu' Dios chia'.  
Dxebile bènne'du xu'a da naca chiu',  
na' belá' dxen chia' dxezá lazre' na da naca  
chiu'.  
Naca chia' ca zúaqueza' tu xezr la xu bizre  
naga  
quebe bi nisa de.  
Dxaní'siseze xida' lau Lue' chee le'eda' xel-  
la' waca chiu',  
ne xel-la' szren chiu',

cáteze ba ble'eda' da naca chiu' lu lataj lá'azxa chiu'.

<sup>3</sup> Cháwedxa naca xel-la' dxexache lazre' chiu'

ca xel-la' nabánqueze.

Cheę le' na' güe lá'anaqueza' Lue'.

<sup>4</sup> Caníqueze nnia' chiu' da xrlátaje dxácate naca bana'.

Cheę gucá'ana szrena' Lau' chísaqueza' na'a.

<sup>5</sup> Xélaje bénne'du xu'a da naca na ca bese zrita,

ne bel'a da dxánnele'e,

na' dutę xel-la' dxebé güe lá'anaqueza' Lue'

<sup>6</sup> gate dxajsá lazra' chiu', ne dea' ga dxata', ne gate dxulaba lazra' ca naca chiu' gate dxennaza' chizrela.

<sup>7</sup> Lawe' da dxácalenu' neda', béle'eda' cuitu' ca dxelún bedxuj dxé'enedu ca' zran xrila bedzuj.

<sup>8</sup> Naca bénne'du xu'a Lue' tuze.

Nen na'u wal-la nuxru' neda'.

<sup>9</sup> Benne' ca' gulezá lazre' xuluzría xi'e neda' cheajlecházie' lataj ba xa'.

<sup>10</sup> Xelebía xi'e lu xia nalá.

Xelaque' da xelagu becu' xixre' ca'.

<sup>11</sup> Neda', wenna' bea, beda' lu da naca cheę Dios.

Xegá'ana ba lá'ana núteteze benne' dxuluchínene' la',

lawe' da xelexxuj dxu'a benne' ca' dxelenné' da wen lazre'.

## 64

<sup>1</sup> Dios, bze naga chi'a lawe' da zua' stebe dxuláwizra' Lue'.

Bxue xel-la' nabán chia' lawe' da dxezreba' bi xelún benne' ca' dxeledábague' neda'.

<sup>2</sup> Bcache chawe' neda' cheę quebe xelún benne' wen

da calęla chia' ca da dxelezá lazre', ne cheę quebe xelún benne' dxelún da zrin-naj chia'

ca da zaj nune' xelune' chia'.

<sup>3</sup> Dizra' dxuluchálaje' zaj naca na ca xia zaj nalále'e na,

ne dxelenné' schanni' ca dxun tu benne' dxusane'

xaga nalá xéche'ze cheę'.

<sup>4</sup> Caní dxelenné' bagácheze cheę xelune' cheajlechaze

benne' zaj naque' li lazre'.

Chadite dxelune' na, ne quebe bi dxelezre-be'.

<sup>5</sup> Dxelune' ba xuzre xelune' da zrinnağ da zaj nune' xelune',

na' dxuluzię' xralaj ca' cheę xelęle' bėn-neache,

dxelenné': "¿Nuzra le'e da dxundxu?"

<sup>6</sup> Dxelíłaje' ca zaj naca da zrinnağ xelune', ne dxelenná' xánnie' ca zaj naca na.

Ca da zaj xu'u xichaj lázrdawe' zaj naca na stębele'e

ca zaj naca lázrdauqueze'.

<sup>7</sup> Dios gune' benne' ca' we' nen tu xaga nalá xéche'ze cheę'.

Chadite xelu'e xízrawe' zren ca'.

<sup>8</sup> Dizra' buluchalaj benne' ca' xelún na cheajlecházie',

na' xelezrebe xúgute' bėnneache gate xelélé'ene' benne' ca'.

<sup>9</sup> Nadxa xelezrebe xúgute' bėnneache, ne xuluzenne'

ca da nun Dios,

na' xuluxúnbe'e ca zaj naca da bęne' Le'.

<sup>10</sup> Béqueze benne' xrlátaje lau Xránadxu, ne guxrén lazre' Le',

na' xelezúa lu da ba neza xúgute' benne' zaj naque' li lazre'.

## 65

<sup>1</sup> Naca chiu' Lue', Dios, güe lá'anantu' Lue' lu xęzre Sión,

na' guntu' da guchebe lázrentu' chiu'.

<sup>2</sup> Lue' dxénqueznu' da dxuchálajęntu' Lue', na' xelélé' lau Lue' xúgute' bėnneache.

<sup>3</sup> Nabágalę'a da zrinnağ da bena',

san Lue' dxunite lau' ca da gudábagantu' Lue'.

<sup>4</sup> Ba neza zrentę naca na cheę bėnnea' dxeca'u Lue',

ne dxenníu' le' gaque' chiu', cheę súaqueze' lataj lá'azxa chiu'.

Xélajquezentu' da xrlátaje da de lizru', da ca' da zaj de

xudau' lá'azxa chiu'.

<sup>5</sup> Lu da xrlátaje chiu' gunu' da zaj naca zrentę gate gunu'

ca da dxenábantu' Lue', Dios, Benne' dxuselé' netu'.

Xúgute' bėnneache zaj zra' dutę xęzr la xu dxelebeza lazre' Lue',

ne cá'aqueze dxelebeza lazre' benne' dxeledé'e

zítu'la lawe' nísadau'.

<sup>6</sup> Lué'queze dxuzúa chuchu' xi'a zren ca' nen xel-la' waca chiu'.

Nácaquezu' Benne' wal-la.

<sup>7</sup> Dxebeche zriu' nísadau' gate dxelucu na,



ne schaga da dxelún xeajxruza chee na.  
 Dxebeche zriu' benne' xezr la xu gate dx-  
 elédábague' Lue'.  
<sup>8</sup> Chee lə na' benne' zaj zre'ē dutə xezr la xu  
 xelezrebe' ca naca da zrentə da dx-  
 unu'.  
 Dxuzú' lu da ba neza bėnneache zaj zra' du  
 gabí'i xezr la xu.  
<sup>9</sup> Dxenna' u xezr la xu, ne dxesel-lu' nisa xiuj.  
 Dxunu' dxúnnale'ē na lina chee na.  
 Nuzúaquezu' lu xezr la xu xegu ca' da zaj  
 dēlē'e na nisa.  
 Dxcucuezu' zrua' za da xelagu bėnneache,  
 ca ba núnquezu' gaca na.  
<sup>10</sup> Dxesel-lu' nisa xiuj naga ba zaj nune' na'.  
 Dxunu' dxexaca na xu xa'a.  
 Dxcucu na nen nisa xiuj na'.  
 Dxunu' dxelegula chawe' da du ca' ba zaj  
 naxaza na.  
<sup>11</sup> Dxunu' dxelexezi' bėnneache ba neza tu  
 iza tu iza  
 ne chee da dxunézruju',  
 na' ca zaj naca beuj bza chiu' dxelunna na  
 xiuj  
 da dxun na dxelegula chawe' da zaj naza  
 bėnneache.  
<sup>12</sup> Dxelunna na xiuj naga dxeledá bē xíxre' du  
 ca' da dxeláguba',  
 na' dxelebé bėnneache dxelelé'ēne' ca bane  
 zaj zua xí'adu ca'.  
<sup>13</sup> Lache' ca' zaj zra' zrila' ca',  
 na' dxu'a xégudu ca' zaj naxaza zrua' xtila,  
 na' dxelebezre xa'a bėnneache chiu' dutə  
 xel-la' dxelebé,  
 ne dxelúl-laqueze' chiu'.

## 66

<sup>1</sup> Le gucá'ana szren Dios dutə xel-la' dxebé,  
 le'e zrale dutə xezr la xu.  
<sup>2</sup> Le gul-la ca naca xel-la' szren chee lə'.  
 Le gucá'ana szrene' gate dxue lán' anale Lə'.  
<sup>3</sup> Le xē Dios: "Dxebánele'ēquezentu' ca zaj  
 naca da nunu'."  
 Ne chee xel-la' szren chee xel-la' waca chiu'  
 xuluzúa  
 xrtizru' benne' ca' dxeledábague' lue'.  
<sup>4</sup> Xúgute bėnneache zaj zra' dutə xezr la xu  
 xelúe  
 lán'anaqueze' Lue', ne xelúl-laqueze'  
 chiu'.  
 Tu xelúl-lazqueze' chee Láquezu'.  
<sup>5</sup> Le da, lé'ele ca zaj naca da nun Dios.  
 Da zrébedxu zaj naca da bēne' chee benne'  
 ca'

belunə' da caləla.  
<sup>6</sup> Bēne' bexaca nísadau' xu bizre.  
 Guledé bėnneache chee' ní'aze' naga nedxu  
 dē tu xegu situj.  
 Dxu'a nísadau' na' gubéle'ēdxu lau Dios.  
<sup>7</sup> Dutə xel-la' waca chee' nna be'ē chadía  
 chacanna.  
 Dxcuxéqueze' ca da dxelún bėnneache  
 dutə xezr la xu.  
 Benne' dxeledábague' Lə' quebe  
 xelezrué'ēquezne' xel-la' szren.  
<sup>8</sup> Le'e, bėnneache, le gucá'ana szren Dios  
 cheedxu,  
 ne le guzén bėnneache ca da dxue lán' anale  
 Lə'.  
<sup>9</sup> Léqueze' bxue' dxi' u chee naca bandxu,  
 ne quebe bē'ē lataj cheajchádzedxu.  
<sup>10</sup> Lué'queze bxu' netu' ca da bəntu', Dios.  
 Bdeu' netu' xel-la' zi' ca dxelún bėnneache  
 dxuludé'  
 xia plata lu xi' chee xegá'ana chawe  
 na.  
<sup>11</sup> Bənu' xeajchú'untu' tu lu xralaj.  
 Bda' u cúzruntu' tu xua zí'ile'ē.  
<sup>12</sup> Bənu' guledé xíchajntu' benne' zaj zrie'  
 bzrina' chee' ca'.  
 Gudentu' tu lu xi', ne tu lu nisa situj,  
 na' bebəaju' netu', ne bzu' netu' tu lataj  
 naga zúantu'  
 lu da ba neza.  
<sup>13</sup> Chú'uqueza' lu xu' u lizru' chee guzézxea'  
 béadu ca',  
 ne gunna' chiu' ca da guchebe lazra' guna',  
<sup>14</sup> da na' guchebe lazra' ca da gunnía'  
 gate guzúa' lu da stébele'ē.  
<sup>15</sup> Guzézxea' béadu ca', bē dxelanne lau'  
 Lue',  
 ne guna' cuen zren chee zríla' du ca' lau',  
 ne gutia' bēzre ca', ne chivo biu ca' lau'.  
<sup>16</sup> Le da, xénele, xúgutele dxezrébele Dios,  
 na' guzenda' le'e ca da bēne' gúcaləne'  
 neda'.  
<sup>17</sup> Du lazra' bláwizra' Lə',  
 ne bca'ana szrénqueza' Lə'.  
<sup>18</sup> La guzé lazra' tu da caləla,  
 quebe ben Xránadxu chia'.  
<sup>19</sup> Da líqueze bene Dios chi'a.  
 Bzə nague' ca da gunábəda' Lə'.  
<sup>20</sup> Gaca báqueze Dios!  
 jQuebe bzue' chalá'ala da bchálajləna' Lə',  
 san bexache lazre' neda'!

## 67

<sup>1</sup> Dios, bexache lazre' netu', ne ben da chawe' cheentu'.

Dutę xel-la' zri'i lazre' chiu' guzúale netu',  
<sup>2</sup> cheę xelúnbea bėnneache du gabí'i xęzr la

xu  
ca naca da dxaca lazru',  
ne cheę xeleneze bėnneache dutę xęzr la xu  
ca dxuseláu' bėnneache.

<sup>3</sup> Xúgutę bėnneache dxelúe lá'angę' Lue',  
Dios.

Dxelúe lá'ana xúgutę bėnneache Lue'.

<sup>4</sup> Le be, ne le sua lu da ba neza, le'e, bėn-  
neache dutę xęzr la xu,  
lawe' da guchi'a Dios cheęle ca naca da  
xrlátaje,  
ne guxúequeze' xúgutę bėnneache.

<sup>5</sup> Xúgutę bėnneache dxelúe lá'angę' Lue',  
Dios.

Dxelúe lá'ana xúgutę bėnneache Lue'.

<sup>6</sup> Xęzr la xu nigá ba zria na lina cheę na,  
lawe' da ben Dios cheędxu da chawe'  
cheędxu.

<sup>7</sup> Dios ba beņę' chawe' cheędxu,  
na' gátęteze dxal-la' xelapa bėnneache Le'  
ba lá'ana.

## 68

<sup>1</sup> Guzé, Dios, ne beše dinnaj benne' ca' dx-  
eledábague' Lue',

ne ben xuluzrunnuj benne' ca' dxelecuí-  
denę' Lue'.

<sup>2</sup> Ca dxun tu be', dxulaga na zren cheę xi',  
ca' gulagu' benne' ca'.

Ca dxuna xina' lu xi', ca' xelexenite benne'  
ca' lau Dios,  
benne' ca' dxelunę' da zrinnağ.

<sup>3</sup> Xelebé benne' xrlátaje ca', ne xelexúę' lu  
da ba neza lau Dios,  
ne xelexritequeze' lu xel-la' dxelebe cheę'.

<sup>4</sup> Le gul-la cheę Dios!

Le gul-la da du ca' cheę Láqueze'!

Le gucá'ana szren Bėnnea' dxe'e xabáa,  
nazí le' Jah!

Le be lau Le'!

<sup>5</sup> Ca xra bi dxé'enedu ca', ne ca benne'  
dxuxúe

nu'ula ca' zaj zue' tuze,  
naca Dios lu latağ lá'azxa naga zúaqueze'.

<sup>6</sup> Dxun Dios xelexúa xrtia lįwezre bėnneache  
quebe nu  
xrtia lįwezre' zaj zra'.

Dxebéaje' benne' zaj xu'e lu na' benne' zitu'  
ca'

cheę xelexúę' lu da ba neza.

Benne' ca' dxeledábaga Dios zaj zue' tu lu  
xęzr la xu bizre.

<sup>7</sup> Dios, gate bdxúaju' lau bėnneache chiu',  
ne gudáu' lu xęzr la xu bizre na',

<sup>8</sup> na' guzrú' xęzr la xu na'.

Cá'anqueze gúcale'e xiuj lau Dios.

Xi'a Sinaí guzrize na lau Dios,

Dios cheę benne' Israel ca'.

<sup>9</sup> Gusel-lu' tu nisa xiuj zílale'e, Dios.

Gate belexedú lazre' bėnneache chiu', Lue'  
btipu' lazre'.

<sup>10</sup> Bėnneache zaj naca chiu' zaj zúaqueze' lu  
xęzr la xu chiu'.

Dutę da chawe' chiu', Dios, dxuxú' benne'  
xache' ca'.

<sup>11</sup> Xránadxu Dios gusel-le' tu dizra' chawe',  
na' gulezrá' benne' zante, benne' buluzen-  
ne' bėnneache  
ca naca dizra' chawe' na'.

<sup>12</sup> Buluzrúnnuje'!

įBuluzrunnuğ wenná bea ca' nen  
ca naca benne' cheę' dxjaque' wedil-  
la,

na' benne' ca' zaj nagá'ana lu xu'u lizre'  
belexeque'e  
da bulucá'ana benne' ca' buluzrúnnu-  
je'.

<sup>13</sup> Lácala bcache cuínale naga dxuxúele  
zrila' ca',

gacu zra lánale da naca na ca xrila bgúgudu  
ca' da  
zaj nazí lechítaje na plata,

na' dube' cheę xrláaba' ca' zaj nazí lechítaje  
na oro.

<sup>14</sup> Gate beše dinnaj Dios zrente wenná bea  
ca' latağ na',

na' bexruğ bezxe' da bgacu na xi'a Salmón.

<sup>15</sup> Tu xi'a zrente naca xi'a Basán.

Tu xi'a zri'a naca xi'a Basán na'.

<sup>16</sup> Bizr cheę na' dxenna'le, le'e, xi'a zri'a ca',  
xi'a na' naga dxaca lazre' Dios súaqueze'?

Da líqueze súaqueze Xránadxu lu xi'a na'  
chadía chacanna.

<sup>17</sup> Da zaj naché' benne' ca' lu wedil-la da  
napa Dios

zánęte cue' gaxúa zaj naca na.

Xránadxu Dios zezé'e xi'a Sinaí cheę suę'  
latağ lá'azxa cheę'.

<sup>18</sup> Begüénu' xabáa, zeche'u benne' ca' be-  
béaju'  
lu na' xel-la' gute,  
na' guzi'u da chawe' ca' da belunna bén-  
neache,  
ne cá' anqueze guzúa da bennu' chee benne'  
ca'  
guledábage' Lue',  
chee súaquezu' ládujla bénneache, Dios,  
leu' Jah.

<sup>19</sup> ¡Gaca ba Xránadxu!  
¡Tu zra tu zra dxusezrate' dxi'u da chawe'  
chee'!  
¡Naque' Dios, dxuselé' dxi'u!

<sup>20</sup> Dios, Bénnea' naque' Dios cheedxu guselé'  
dxi'u.  
Léqueze Xránadxu Dios guselé' dxi'u lu na'  
xel-la' gute.

<sup>21</sup> Da líqueze Dios guné' we' xichaj benne' ca'  
dxeledábage' Le'.  
Gune' we' xichaj benne' quebe dxulusane'  
ca zaj naca  
dul-la da dxelune'.

<sup>22</sup> Gunná Xránadxu: "Guna' xezrinle lázrele,  
xeza'ale lu xi'a Basán.  
Guna' xeza'ale lu da situj chee nísadau',  
xezrinle lázrele,

<sup>23</sup> lawe' da guna' guchuchu guléajle dxen  
chee benne' ca'  
dxeledábage' le'e,  
na' xelelé'e becu' chee dxen chee benne'  
ca'."

<sup>24</sup> Belelé'e bénneache ca guledá bénneache  
chiu' belúe  
lá'ane' Lue', Dios.  
Dute' xel-la' dxelebé gulu'e lataj lá'azxa  
chiu', Dios,  
Wenná Bea chia'.

<sup>25</sup> Benne' ca' dxelul-la zeajzrie' láwe'la,  
na' benne' zaj nu'e da dxulucuezre'  
zja'aque' bzébele.

Ládujla zjaca nu'ula cuíde'du ca' zaj  
núxrube'  
da du ca' dxulusézxebe'.

<sup>26</sup> Le güie lá'ana Dios naga zaj nazraga bén-  
neache chee'.  
Le güie lá'ana Xránadxu, le'e nácale zri'ine  
zre sua Israel.

<sup>27</sup> Zaj zra' zri'ine zre sua Benjamín na',  
guque' benne'  
cuídedxa, na' dxelelé' be'e.  
Zaj nazraga benne' xíchaje chee zri'ine zre  
sua Judá na',

ne benne' xíchaje chee zri'ine zre sua Zab-  
ulón,  
ne benne' xíchaje chee zri'ine zre sua Nef-  
talí.

<sup>28</sup> Dios, ble'e lau xel-la' wal-la chiu'.  
Bzua chacha, Dios, da na' benu' cheentu'.

<sup>29</sup> Ne chee xel-la' szren chee xudau' chiu' da  
zua na  
xezre Jerusalén,  
xelegú'u benne' wenná bea ca' da xelunne'  
lau'.

<sup>30</sup> Gudil-la benne' dxjaque' wedil-la chee  
dute' xezr la xu  
zaj nazrague' chee xeledíl-laléne' Lue',  
benne' ca' zaj naque' ca bezre zan ca' nen  
biadu cheeba' ca',  
cadxa xuluzúa xügüte' dizra' chiu',  
na' xelunne' ca naca xia plata da zaj nape'.  
Bese dinnaj benne' dute' xezr la xu dxelex-  
ezaca ba lazre'  
xeleziúe' lu wedil-la.

<sup>31</sup> Xelelá' benne' xíchaje chee xezr la xu  
Egipto.

Benne' xezr la xu Etiopía xelune' ba xen  
xulucá'ana szrene' Dios.

<sup>32</sup> ¡Le gul-la chee Dios, le'e zrale du gab'i  
xezr la xu!  
¡Le gul-la chee Xránadxu!

<sup>33</sup> ¡Le gul-la chee Bénnea' dxe'e xabáa na'ala,  
da zua na nédxute!  
¡Le nna' xque, wanné', ne zízrajle'e nne'!

<sup>34</sup> ¡Le nne' nápalé'e Dios xel-la' waca!  
¡Lu xel-la' szren chee' dxuxúequeze' benne'  
Israel ca',  
na' zran xabáa nalá' xel-la' waca chee'!

<sup>35</sup> Benne' zrébentu' nacu' Lue', Dios,  
naga zu' lataj lá'azxa chiu'.

Dios chee benne' Israel ca', Léqueze' dxu-  
tipe' lazre'  
bénneache chee'.  
¡Gaca ba Dios!

## 69

<sup>1</sup> Bselá neda', Dios.

Naca' ca tu benne' dxepe' lu nisa.

<sup>2</sup> Naca' ca tu benne' xu'e lu guzra' situj, ne  
quebe dxaca se'e.

Naca' ca tu benne' xu'e lu nisa sítujle'e,  
na' nisa na' ba dxacu na xíchaje'.

<sup>3</sup> Ba dxajxréqueda' lawe' da ba gunnéle'a, ne  
ba da lba'a.

Ba dxelátete' lawa' dxenná'a gácale' Dios  
neda'.

<sup>4</sup> Ba naxándxa benne' dxelecuídene' neda' ca naxán xicha xíchaja', ne quebe bi de bi nuna'. Zaj naca benne' wál-lale'ē benne' dx-eledábague' neda', benne' ca' dxuluzría xi'ē neda', ne quebe bi de bizr chee' na'.  
¿Dxal-la' quízruja' da quebe gulana'?

<sup>5</sup> Dios, nézqueznu' Lue' naca da xálaze da nuna',

ne dxelé'eqeznu' dul-la da beña'.

<sup>6</sup> Quebe gu'u lataj xelexedu'é ne chia' neda' benne' ca' dxuluxrén lazre' Lue', Xrana' Dios szrente'.

Quebe gu'u lataj xelexe zréaje ne chia' neda' benne' ca' dxelebeza lazre' Lue', Dios chee' benne' Israel ca'.

<sup>7</sup> Lawe' da nazrí'ida' Lue' bulucháchalene' neda',

na' lu xel-la' stu' zúaqueza'.

<sup>8</sup> Ca tu benne' zitu' naca' lau bi bícha'dau' ca', ne quebe zaj núnbea bi chee' xrna'a neda'.

<sup>9</sup> Lawe' da dxé'le'a gunne xue chee' lizru' dxal-la na lu lázrdawa'.

Gate dxelenné' benne' ca' schanni' chiu' Lue', Dios, naca ca dxelenné' schanni' chia' neda'.

<sup>10</sup> Gudxezra', ne beña' gubasa, na' bde cuina' xel-la' zi', na' chee' le' na' bulucháchalene' neda'.

<sup>11</sup> Cá'anqueze bgacu cuina' zra lana' tuzruj. Buluzé' neda' ca tu da dxulé'e na da baxache' zrente'.

<sup>12</sup> Gulenné' chia' benne' ca' zaj xu'ē xu'u lawe',

na' benne' ca' dxelezuzre' belún le' chia' lu da belul-le'.

<sup>13</sup> Neda' bláwizra' Lue', Xrana' Dios, lu zra dxezaca ba lazru' Lue'.

Dios, lu xel-la' dxexache lazre' zren chiu', ne lawe' da líqueze nacu' weselá cheentu', bene chia'.

<sup>14</sup> Bebéaj neda' lu da stēbe zua', naca' ca tu benne'

xu'ē lu guzra' situj, ne quebe gu'u lataj cházedxa'.

Bselá neda' lu na' benne' ca' dxelecuídene' neda'.

Naca' ca tu benne' xu'ē lu nisa situj.

<sup>15</sup> Quebe gu'u lataj gatia' ca tu benne' xe-gache' lu nisa situj, ne quebe gaca' ca tu benne' chu'ē lu da situj,

ne quebe gaca' ca tu benne' cheajchazie' tu lu xēdxu situj.

<sup>16</sup> Bechebe chia', Xrana' Dios, lawe' da chawe' naca xel-la' dxexache lazre' chiu'.

Gudá, gúcale' neda', lawe' da zrente' naca xel-la' dxexache lazre' chiu'.

<sup>17</sup> Gunná' xque ca da dxaca chia' neda', wēn zrin chiu'.

lawe' da zua' lu da stēbele'ē, bēn ba xuzre xennu' chia'.

<sup>18</sup> Gudá naga zua', ne bselá neda'.

Bselá neda' lawe' da zaj naxánle'ē benne' ca' dxeledábague' neda'.

<sup>19</sup> Lue' nézqueznu' ca dxulucháchalene' neda', ne ca zua'

lu da stēbele'ē, ne ca dxulucá'ana díta-je' neda'.

Dxelé'eqeznu' xúgute' benne' ca' dxelecuídene' neda'.

<sup>20</sup> Lawe' da dxelún le' chia' dxedú' lazra', ne zua' lu da stēbe.

Guleza' nu benne' xexache lazre' neda', san quebe nu chilá'.

Guleza' nu benne' xelexúe zrene' neda', san quebe nu chilá'.

<sup>21</sup> Bulugawe' neda' da sla',

na' gate gubíleda', buluxí'aje' neda' da zichaj.

<sup>22</sup> Ca naca laní chee' benne' ca' bēn gaca na ca tu

xralaj naga cheajlecházie',

ne bēn xexaca da ba neza chee' tu da gun na cheajlecházie'.

<sup>23</sup> Bēn xelechul-la xiaj lawe' chee' québedxa xelélé'ene',

ne bēn tu xelexrízrezqueze benne' ca'.

<sup>24</sup> Dutē xel-la' dxezrá'a chiu' ble'e benne' ca',

ne dutē xel-la' xichaj zra'a chiu' bē' benne' ca'.

<sup>25</sup> Bēn quebe nu chilá' lu xu'u lizre benne' ca',

ne quebe nu sua lu xēzr la xu chee',

<sup>26</sup> lawe' da guláu zi' xuzre' bēnnea' bēnu' Lue' wē',

ne dxuluzrizre' ca naca xel-la' zi' dxedé bēnnea' bē'u Lue'.

<sup>27</sup> Ble'e dul-la da zaj nabaga benne' ca',

ne quebe gu'u le' lataj xelaque' tuze benne'  
xrlátaje chiu'.

<sup>28</sup> Busula la benne' ca' lu xiche chee benne'  
ca'

zaj nape' xel-la' nabán,

ne quebe guzáju' le' naga zaj naxúaj la  
benne' xrlátaje ca'.

<sup>29</sup> Neda' zua' lu da ba xa', ne lu da stébele'e.  
Bselá neda', Dios, ne bechisa neda'.

<sup>30</sup> Gúl-laqueza' da güe lá'ana' La Dios chia'.  
Gucá'ana szrena' Le' nen da dxue lá'ana'  
Le'.

<sup>31</sup> Da nigá kezaca ba lázredxa Dios ca tu  
bezre, be gutia' lawe',  
u ca tu me', béadu zaj zua lúzuba', ne  
xrúguba'.

<sup>32</sup> Xeलेlé'equeze benne' baxache' ca' da nigá,  
na' xelebené'.

Le biga lau Dios, na' gaca bánquezle,

<sup>33</sup> lawe' da dxene Xránadxu benne' ca' dx-  
elexájrjengé',

ne quebe dxuzúé' chalá'ala benne' chee'  
ca', benne'

zaj xu'e lizre xia.

<sup>34</sup> Le güe lá'ana' Le', le'e zrle xabáa, ne le'e,  
zrle lu xezr la xu,  
ne le'e zrle lawe' nísadau', ne cá'anqueze  
xúgute

da zaj naca ban xúgute lataj caní.

<sup>35</sup> Dios guselé' benne' zaj zre'e xezre Sión,  
ne xexuné' xezre ca' zaj zra na lu xezr la xu  
chee

benne' Judá ca',

na' tu xelezúazqueze' na', ne gata' chee'  
xezr la xu na'.

<sup>36</sup> Zri'ine zre sua benne' wen zrin chiu' ca',  
gaca

chee' xezr la xu na',

na' benne' ca' zaj nazrí'ine' Lau' Lue'  
xelezúe' na'.

## 70

<sup>1</sup> Bselá neda', Dios.

Gúcaleche neda', Xran.

<sup>2</sup> Ben xelexedué'e, ne xelezúa lu da stébe  
benne' ca'

dxelaca lazre' xelútie' neda'.

Ben xelexebigue', ne xelexala benne' ca'  
dxelebené'

lawe' da zua' lu da stébe.

<sup>3</sup> Ben xelexegá'ana xala benne' ca' dxelun  
le' chia'.

<sup>4</sup> Benne' ca' zá'aque' lau Lue' xelebené',

ne xelezúe' lu da ba neza.

Benne' ca' dxelé'e Lue': "Xcalenu'" lawe' da  
bseláu' le',

tu dxelenázqueze': "¡Zrente naca  
Dios!"

<sup>5</sup> Zua' lu da stébe, ne nate ni'a na'a.

Gudázega gácalenu' neda', Dios.

Nacu' Weselá chia', ne Xrana'.

Quebe chenu', Xran.

## 71

<sup>1</sup> Za'a lau' Lue', Xran, chee guxru' neda'.

Ben québedxa xedué'eda'.

<sup>2</sup> Gúcale neda', ne bselá neda' nen dute da  
naca xrlátaje chiu'.

Bze naga chi'a, ne bselá neda'.

<sup>3</sup> Nacu' ca tu xiaj xre naga sua' chawe', na'  
waca xida'

naga zu' te zra chizrela.

Gunná be'entu' nu guselá neda', lawe' da  
nacu' Lue'

ca tu xiaj xre naga dxaca dipa lazra'.

<sup>4</sup> Dios chia', bselá neda' lu na' benne' ca' zaj  
nabéaj xíchaje' Lue',

ne lu na' benne' ca' dxelune' da calela ne zaj  
naque' xichaj zra'a,

<sup>5</sup> lawe' da dxebeza lazra' Lue', Xrana' Dios.

Nacu' Bénnea' dxuxúe' neda' gate nácatea'  
bídu'te.

<sup>6</sup> Lue' núxruquezu' neda' gate gúlajtea'.

Lue' be'nu' bdxuaja' lu le'e xrna'a.

¡Tu güe lá'anazqueza' Lue'!

<sup>7</sup> Belexebane benne' zante ca naca chia',  
ne ca naca chiu', dxuxúe xánniu' neda'.

<sup>8</sup> Ben tu gul-lazqueza' da güe lá'ana' Lue',  
ne gucá'ana szrena' Lue' du zra.

<sup>9</sup> Quebe guzú' neda' chalá'ala gate ba  
guxrúa'.

Gate ba bedú lazra', quebe gusanu' neda'.

<sup>10</sup> Benne' dxeledábage' neda' dxelenné'  
chia',

na' benne' ca' dxelezá lazre' xelútie' neda'  
belune' tuze dizra',

<sup>11</sup> dxelenné': "Ba bsan Dios le'.

Chéajdxu cheajtéladxu le' lawe' da  
québedxa nu zua

nu guselá le'."

<sup>12</sup> ¡Dios, quebe su' zitu' naga zua'!

¡Dios chia', gudázega gácalenu' neda'!

<sup>13</sup> ¡Ben xelexedué'ene'!

"Ben xelexenite benne' ca' dxeledábage'  
neda'."

"Ben xelezúa xel-la' stu', ne xelexe zréaje  
benne' ca'

dxelezá lazre' xelune' chia' da calela."

<sup>14</sup>Neda' tu cueza lázrezqueza' Lue',  
ne tu güe lá'anazqueza' Lue'.  
<sup>15</sup>Guzenda' bēnneache nacu' xrlátaje,  
ne tu guzénzquezda' lē' ca da bēnu' bseláu'  
neda',  
láqueze quebe nezda' bal-la lasa bseláu'  
neda'.  
<sup>16</sup>Tu guchálajzqueza' chee da zrente da  
bēnu' Lue',  
Xrana' Dios,  
ne gusá'a lazre' bēnneache chee da xrlátaje  
cheéquezu'.  
<sup>17</sup>Dios, Lue' bsédenu' neda' gate nácatea'  
bidau'te.  
Dxulé'eda' bēnneache ca naca da zrente da  
bēnu'.  
<sup>18</sup>Dios, quebe gusán lazru' neda' gate bache  
guxrúa',  
ne ba bgucha'.  
Be' neda' lataj guzenda' zri'ine zre sua' ca  
naca  
xel-la' waca chiu',  
ne guzenda' bi za xelalaj ca naca xel-la' wal-  
la chiu',  
<sup>19</sup>ne ca naca da xrlátaje chiu', da naca na da  
zrente, Dios.  
Lue' ba bēnu' da zaj nácale'e na zrente.  
Dios, ¿Núzraqueze ca Lue'?'  
<sup>20</sup>Lue' bēnu' gudéa' lu da stēbe zante, ne lu  
da calela ca',  
na' gunu' xexaca bana', na' da xula xechisu'  
neda' lu xēdxu ba.  
<sup>21</sup>¡Gucá'ana szrendxu' neda',  
ne xue zrénzquezu' neda'!  
<sup>22</sup>¡Cá'anqueze güe lá'anaqueza' Lue', quín-  
nia' da gul-lalēna'!  
¡Dios chia', gúl-laqueza' chee da li chiu',  
quínnia'  
da du' zríadi'i na du!  
¡Nacu' Benne' Lá'azxa chee benne' Israel  
ca'!  
<sup>23</sup>¡Sua' lu da ba neza gate gúl-laqueza' chiu'  
Lue',  
ne béqueze bēnne'du xu'a, bēnne'du'  
bexa'u!  
<sup>24</sup>¡Tu guchálajzqueza' chee da xrlátaje chiu'  
te zra chizrela,  
lawe' da bēnu' belexedué'e, ne guleque  
zréaje  
benne' ca' belunē' ba xuzre xelunē' chia' da  
calela!

## 72

<sup>1</sup>¡Dios, bēn guchi'a wēnná bea da dxaca  
cheentú'

ca dxuchi'aquezu' Lue',  
ne bēn xelaca xrlátaje zri'ine wēnná bea  
na'!  
<sup>2</sup>Nadxa lē' guchi'a chee bēnneache chiu' ca  
naca  
da naca xrlátaje,  
ne ca naca da li guchi'e chee benne' chiu'  
ca' zaj zue'  
lu da ba xa'.  
<sup>3</sup>Lu xi'a ca' xelebeza zri lazre' bēnneache  
chiu',  
ne lu xi'adu ca' xelezúe' lu da naca chawe'.  
<sup>4</sup>Guchi'e chee benne' ca' zaj zue' lu da ba xa'  
lu xēzre cheentú',  
ne guselé' bidu ca' chee benne' ca' dx-  
elaxárzjene',  
ne guzría xi'e benne' ca' dxulusaca zi'e  
bēnneache.  
<sup>5</sup>Xelezrebe' Lue' dxácatē ne zua gubizra,  
ne beu' lawe' tu cuen tu cuen bēnneache.  
<sup>6</sup>Gaca wēnná bea na' ca nisa xiuj da dxaca  
naga ba nadín,  
ne ca xrlé'ēla da dxaca dxēla lu xēzr la xu.  
<sup>7</sup>Lu zra chee wēnná bea na' gaca da xrlátaje,  
ne xelebeza zri lazre' bēnneache dxácatē ne  
zua beu'.  
<sup>8</sup>Nna be'e dutē xēzr la xu,  
ne dxu'a xegu Eufrates, ga zrintē dxu'a  
nísadau'.  
<sup>9</sup>Lau lē' xuluzú zribe benne' ca' zaj zre'e  
xēzr la xu,  
na' guzēxruje' lazre' benne' guledábague'  
Le'.  
<sup>10</sup>Benne' wēnná bea chee xēzr la xu Tarsis,  
ne wēnná bea ca' chee tu tu cue' xēzr la xu  
zitu' ca'  
xelelé'e zaj nu'e da xulunézruje' chee',  
na' benne' wēnná bea chee xēzr la xu Sabá,  
ne wēnná bea chee Seba xulunézruje' chee'  
da gunn'a.  
<sup>11</sup>Xúgutē benne' wēnná bea ca' xuluzú  
zribe' lau lē',  
na' benne' xúgutē cue' xēzr la xu xelunē'  
zrin chee'.  
<sup>12</sup>Lē' guselé' benne' ca' dxelexárzjene',  
benne' dxululáwizre' lē',  
ne guselé' benne' ca' zaj zue' lu da ba xa',  
ne quebe sua nu benne' gácalēnē' lē'.  
<sup>13</sup>Xexache lazre' benne' xache' ca', ne  
benne' ca'  
dxelexárzjene',  
na' guselé' benne' xache' ca' chee xelaca  
bane'.  
<sup>14</sup>Xexá'awē' benne' xache' ca' lu na' benne'  
wēn lazre' ca',

ne benne' snia ca'.  
 Gune' ba xuzre guselé' benne' ca' lu na'  
 benne' ca'  
 dxelutie' benne'.  
<sup>15</sup>Gaca ban wenná bea nigá,  
 na' xulunéruje' chee' oro chee xezr la xu  
 Sabá,  
 na' tu xelenábazqueze bènneache Dios gá-  
 calene' le',  
 ne te zra chizrela xelenabe' Dios gune' gaca  
 chawe'  
 chee wenná bea na'.  
<sup>16</sup>Tu zrigadauze zrua' xtla xelaze' lu xezr la  
 xu,  
 ne lu xi'adu ca',  
 da cuiále'e na ca da dxebíu lu xi'a Líbano,  
 na' benne' zaj zre'e lu xezre ca' xelane' ca  
 xixre' ze lu xezr la xu.  
<sup>17</sup>Tu súazqueze la benne' wenná bea na'.  
 Tu xuluchálajzqueze' chee la le' dxácatę ne  
 zua gubizra.  
 Ne chee le' gaca da ba neza chee bènneache  
 xúgute  
 cue' xezr la xu,  
 na' xelenné' chee' naca chee' da ba neza  
 zrente.  
<sup>18</sup>Xrlátaje naca Xránadxu Dios, Dios chee  
 benne' Israel ca',  
 na' tuze Le' dxune' da dxexebánedxu.  
<sup>19</sup>Xrlátaje naca La Le' da naca na da xabáa  
 chadía chacanna,  
 na' dute xezr la xu nigá xelelé'ene' da xabáa  
 chee'.  
 jCa'an naca na, ne ca'an gaca na!  
<sup>20</sup>Nigá dxexuzre xrtizra' David, da dx-  
 uchálajlęne' Dios.  
 David nigá naque' zri'ine Isai.

## 73

<sup>1</sup>Da líqueze ba ben Dios da chawe' chee  
 benne' Israel ca',  
 benne' ca' zaj naque' du lazre' lau Dios.  
<sup>2</sup>Neda' ba guzúa cheajcházia' lu dul-la.  
 Ba guzúa guna' tu da zrinnaĵ,  
<sup>3</sup>lawe' da guca' zre'e lazre' ne chee benne'  
 gunn' a ca',  
 gate ble'eda' ca dxelepe ban benne' ca' zaj  
 nabéaj xíchaje' Dios.  
<sup>4</sup>Benne' caní quebe zaj zuę' stebe chee xel-  
 la' gute,  
 lawe' da zaj zúale'e chawe'.  
<sup>5</sup>Quebe dxeledé' lu da ba xa' ca da dxeledé  
 xúgute benne' ca',  
 ne quebe dxelezaca zi'e ca da dxaca chee  
 xezícadxa bènneache.

<sup>6</sup>Chee le' na' dxulucá'ana szren cuine'.  
 Tu dxelexúbezquezne' dxelune' da calela.  
<sup>7</sup>Dxelánnie' lawe' da dxelagu cháwele'e.  
 Dxelezíle'e ca naca da dxelezá lazre'.  
<sup>8</sup>Dxelún le' chee Dios, ne dxeleenné' calela  
 ca da zrinnaĵ  
 da xelune'.  
 Dute xel-la' dxulucá'ana szren cuina dxu-  
 luchálaje' da zrente.  
<sup>9</sup>Dxeleenné' chee da ca' zaj zua xabáa,  
 ne dxuluchálaje' ca benne' zaj nape' dute  
 xezr la xu.  
<sup>10</sup>Chee le' na' xúgute bènneache dxelune' le'  
 tu zren,  
 ne dxelezi'e ca da dxeleenná benne' gunni'a  
 ca'.  
<sup>11</sup>Dxeleenná benne' ca' dxelune' da calela:  
 "¿Ájazra gaca neze Dios?  
 ¿Dxelé'equeze Bènnea' zuę' na'ala?"  
<sup>12</sup>Benne' caní zaj naque' benne' zaj nabéaj  
 xíchaje' Dios,  
 na' dxelepe bané' lu xezr la xu, ne dxelaque'  
 gunn' a.  
<sup>13</sup>Da líqueze, dácheze naca guca' du lazre',  
 ne quebe bi da calela nuna'.  
<sup>14</sup>Gudéa' lu da ba xa' tu zra tu zra,  
 ne gudéa' xel-la' zi' xúgute zra.  
<sup>15</sup>La nnia' neda': Guchálaja' ca dxuluchalaj  
 benne' ca',  
 na' si xę'a bènneachedu ca' chiu', Dios.  
<sup>16</sup>Gate blaba lazra' chee chéajni'ida' da nigá,  
 guca na stébele'e chia' neda'.  
<sup>17</sup>Gate guxu'a lu lataĵ lá'azxa chee Dios,  
 na' guque be'eda' da gaca chee benne' ca'  
 gate cheajsé.  
<sup>18</sup>Da líqueze nunu' chee benne' ca' chea-  
 jlecházie',  
 ne gunu' xelebía xi'queze'.  
<sup>19</sup>Chadite gulebía xi'queze'.  
 Belexenite' lu xel-la' gulezrébele'e.  
<sup>20</sup>Zaj naque' ca tu da ble'edxu lu xęla da  
 dxexenite na  
 gate dxexebandxu.  
 Ca'an gaca, Xran, gate chasu', guzú'  
 chalá'ala ca da  
 gulaca benne' ca'.  
<sup>21</sup>Gate guca' zre'e lazre' chee benne' ca',  
 guzúa lázrdawa' lu da stebe.  
<sup>22</sup>Lawe' da guca' xichaj zide', na' quebe  
 gxúajni'ida'  
 guca' ca tu be xixre' lau Lue'.  
<sup>23</sup>Tu guzúazqueza' nen Lue', na' guca'u na'a  
 xabęla.

<sup>24</sup> Bsi'u neda' chee guna' da dxulé'enu' neda',  
na' te nigá xezí' lu na'u neda' lu xabáa chiu'.  
<sup>25</sup> Quebe nu xetú zua chia' xabáa san tuzu' Lue',  
ne quebe nu xetú dxezá lazra' lu xezr la xu,  
san tuzu' Lue'.  
<sup>26</sup> Dxelexedú lazre' bela' dxen chia', ne lázr-  
dawa'.  
Dios naque' Benne' dxutipe' lazra',  
ne naque' da ba neza chia' chadía chacanna.  
<sup>27</sup> Benne' ca' dxelexeuase' naga zu' xelex-  
enítie'.  
Guzría xi'u xúgute benne' ca' xelexebeaj  
xíchaje' Lue'.  
<sup>28</sup> Ca naca chia' neda', dxaca chawe' chia'  
lawe' da gubiga'  
lau Dios.  
Tu dxebeza lázrezqueza' Xránadxu Dios,  
chee guchálajqueza' ca naca da zrenté da  
nune'.

## 74

<sup>1</sup> Dios, ¿tu chí'izqueze nuzú' netu' chalá'ala?  
¿Dxezra'u netu', nácantu' ca zrila' chiu' ca'?'  
<sup>2</sup> Bsá lazre' bénneache chiu', benne' ca'  
guzi'u nédxudaute.  
Benne' ca' bexa'u chee gunu' xelaque'  
benne' cheéquezu',  
benne' ca' zaj zre' e lu xi'a Sión nigá, naga  
zúaquezu' Lue'.  
<sup>3</sup> Gudá xedajnná'u ca nabía xi' xezre nigá,  
ne ca naca da caléla da belún benne' ca'  
dxeledábage' netu', lu lataj lá'azxa  
chiu'.  
<sup>4</sup> Dxelebezre xa'a benne' ca' dxeledábage'  
Lue'  
laduj naga zaj nazraga bénneache  
chiu'.  
Zaj nuzúe' nigá da dxululé'e na xu'untu' lu  
na' benne' ca'.  
<sup>5</sup> Buluzría xi'e xezre nigá,  
ca dxun tu benne' dxine' ca naca xaga zaj  
zē tu xi'a.  
<sup>6</sup> Na'a nen xa waga chee' ca', ne nen xaga  
chee' ca',  
ba buluzría xi'e ca naca lechítaje chee xu-  
dau' chiu'.  
<sup>7</sup> Ba buluzézxie' lataj lá'azxa chiu'.  
Bulucá'ana dítaje' xu'u lizru'.  
Buluchínnaje' na.  
<sup>8</sup> Lu lázrdawe' gulenné': "Guzría xí'tegadxu  
na tu chí'ize."

Ba buluzézxie' xúgute xu'u naga bezrá-  
gantu' chiu'  
lu xezr la xu chiu'.  
<sup>9</sup> Québedxa dxelé'entu' da la'axza ca' da  
dxululé'e na  
da guchísantu' lu xezr la xu cheentu'.  
Québedxa nu chilá' benne' guchálaje' waláz  
chiu',  
ne quebe nu zua ládujla netu', benne'  
nézene' bátaqueze lantu'.  
<sup>10</sup> Dios, ¿Báta cueza na xulucháchale benne'  
ca' netu',  
benne' ca' dxulusaca zi'e netu'?  
¿Chadía chacanna welenné' benne' dx-  
eledábage' lue'  
schanni' chee Lau'?'  
<sup>11</sup> ¿Bizr chee na' quebe dxebéaj lazru' benne'  
ca'?'  
¿Bizr chee na' quebe dxuzría xi'u benne' ca'  
dxelune' da caléla?  
<sup>12</sup> Lue', Dios, nacu' Wenná Bea chia' nédxu-  
daute.  
Lue'queze dxuseláu' bénneache dutē xezr  
la xu.  
<sup>13</sup> Xel-la' waca chiu' benu' nísadau' chupa  
la'a.  
Gula'u xichaj be schanni' ca' lu nísadau'.  
<sup>14</sup> Bzúzruju' xichaj be schanni' leba' levi-  
atán,  
Na' benu' gulagu be xixre' leba', bea ca' zaj  
zraba' lu xu bizre.  
<sup>15</sup> Benu' gulaj nisa beaj, ne nisa xegu ca'.  
Bsebizru' xegu zri'a ca'.  
<sup>16</sup> Chiu' Lue' naca te zra, ne cá'anqueze chiu'  
naca dxela.  
Lue' bzu' beu', ne gubizra naga dxeledé na.  
<sup>17</sup> Lue' bzu' tu chí'ize ca naca da zaj de xezr  
la xu nigá.  
Lue' benu' beu' la ca', ne beu' zaga ca'.  
<sup>18</sup> Bsa lazre' da nigá: Benne' ca' dx-  
eledábage' lue'  
ba zaj nun le' chiu' Lue', Xran.  
Benne' xala ca' ba gulenné' schanni' chee  
Lau'.  
<sup>19</sup> Quebe gusanu' lu na' benne' zaj naque' ca  
be snia ca'  
benne' ca' nazrí'iquezu',  
ne quebe gal-la lazru' tu chí'ize bénneache  
chiu' zaj  
zue' lu da ba xa'.  
<sup>20</sup> Gunná' ca naca xel-la' wezría da benu',  
lawe' da gáteteze naca chul-la lu xezr la xu,  
na' zaj zra' benne' ca' dxelune' da zrinnaj.  
<sup>21</sup> Quebe gu'u lataj xelegá'ana lu xel-la' stu'  
benne'



ca' zaj zuę' lu da baxache'.  
 Benne' dxelezaca zi'e, ne benne' dxelexázr-  
 jene'  
 xelúe lá'ane' Lau'.  
<sup>22</sup> ¡Guzé, Dios!  
 ¡Ben ca ba gunnáu'!  
 ¡Bsa lazre' ca dxelún benne' xala ca', dxelún  
 le' chiu'  
 te zra te zra!  
<sup>23</sup> Quebe gal-la lazru' ca da gulenná benne'  
 ca'  
 dxeledábague' lue'.  
 Da schaga dxelún benne' ca' dxeledábague'  
 Lue'  
 tu dxénzqueze na.

## 75

<sup>1</sup> "Xcalenu", dxentu' Lue', Dios:  
 "Xcalenu."  
 Dxuzentu' bénneache zúalenu' netu', ne ba  
 nunu' da ca'  
 dxexebánequezentu'.  
<sup>2</sup> Dxenná Dios: "Ba nuzúa' zra guchi'a cheę  
 bénneache.  
 Guchi'a ca naca da xrlátaje.  
<sup>3</sup> Lácala xru' dutę xęzr la xu, ne xelexrize  
 xúgute  
 da zaj naca ban na,  
 neda' gúxruqueza' ca naca lane xęzr la xu  
 na'.  
<sup>4</sup> Dxapa' benne' xala ca': Quebe gáwele.  
 Dxapa' benne' ca' dxelune' da caleļa:  
 Quebe gucá'ana szren cuinale.  
<sup>5</sup> Quebe guxrén lázrele xel-la' wal-la cheęle.  
 Quebe gácale benne' lázxdau zide'."  
<sup>6</sup> Quebe za xel-la' szren naga dxalaj gubizra,  
 ne naga dxebía na,  
 ne quebe za na le'ę xixre' lawe' lataj.  
<sup>7</sup> Dios naque' Bénnea' guchi'ę cheę bén-  
 neache.  
 Dxcucá'ane' cá'aze tu benne', ne dxucá'ane'  
 szren xetú benne'.  
<sup>8</sup> Dios nuxre' tu zriga', da nazratę na xrise  
 uva wal-la,  
 da zeaje na xel-la' dxezrá'a cheę'.  
 Dxulálaje' na cheę xelę'aj benne' ca' dx-  
 elune' da caleļa.  
 Xelę'aje' na xebizrtę na.  
<sup>9</sup> Neda' guzénquezda' bénneache,  
 ne gul-la' da güe lá'ana' Dios cheę Jacob.  
<sup>10</sup> Le' guchínnajqueze' xel-la' waca cheę  
 benne'  
 wen da caleļa ca'.  
 Gusezrendxę' xel-la' waca cheę benne' xr-  
 látaje ca'.

## 76

<sup>1</sup> Zaj núnbea benne' Judá ca' Dios,  
 na' láduļa benne' Israel zrentę nácaqueze  
 La Le'.  
<sup>2</sup> Lu xęzre Salem zua lataj lá'azxa cheę'.  
 Lu xęzre Sión zua naga zúaqueze'.  
<sup>3</sup> Lataj na' gudíchaje' xaga nalá xéche'ze ca',  
 ne xía da dxucu'uj na benne' lu wedil-la,  
 ne ca naca da dxuluchínene' lu wedil-la.  
<sup>4</sup> Benne' xabáa nacu' Lue',  
 ne Benne' wál-ladxa ca xi'a zri'a ca'.  
<sup>5</sup> Xeajlechaze benne' wal-la ca', ne guláse  
 dínnaje'.  
 Netú benne' wal-la ca' quebe belexechisa  
 ne'ę cheę  
 xelune' wedil-la.  
<sup>6</sup> Dios cheę benne' Israel ca', gate gudil-lu'  
 benne' ca',  
 guláse dínnaj bzrina' ca', ne benne'  
 gulebę'ba'.  
<sup>7</sup> Nacu' Lue' Benne' zrębedxu.  
 ¡Nu benne' gaca se' lau Lue' gate dxezra'u?  
<sup>8</sup> Xabáate gunnáu', na' guchi'u cheę bén-  
 neache.  
 Dxelezrebe bénneache lu xęzr la xu, na'  
 dxelebeze'  
<sup>9</sup> zra seu' Lue', Dios, cheę guchi'u cheę bén-  
 neache,  
 ne cheę guseláu' xúgute benne' dxexruj  
 lazre' zaj  
 zre'ę lu xęzr la xu.  
<sup>10</sup> Da líqueze xel-la' dxelezrá'a cheę bén-  
 neache  
 gaca na tu da gucá'ana szren na Lue'.  
 Guzúa zriu' xel-la' dxelezrá'a cheę bén-  
 neache zaj nagá'ane'.

<sup>11</sup> Le chebe lázrele da gunle cheę Dios,  
 na' le gun da na' cheę Xránadxu, Dios  
 cheęle.  
 Xúgute benne' zaj zre'ę du gabi'ila xelexé'ę,  
 na' xulunézruje' da zaj nu'e cheę Dios,  
 Bénnea' dxezrébedxu.  
<sup>12</sup> Guzague' da xu'u lu xichaj lázxdau benne'  
 blau ca'.  
 Le' dxuchebe' benne' wenná bea ca' zaj  
 zre'ę lu xęzr la xu.

## 77

<sup>1</sup> Nen chi'a bláwizra' Dios.  
 Bláwizra' Dios, na' Le' buzę nague' chi'a.  
<sup>2</sup> Guxu'a lau Xránadxu lu zra guzúa' lu da ba  
 xa'.

Chizrela guchisa na'a lau Le', ne quebe guzúa zria'.

Quebe be'a lataj nu benne' xue zrene' neda'.

<sup>3</sup>Bsa lazra' chee Dios, ne guzúa stêbe.

Gudawa' zria lawe', ne bedú lazra'.

<sup>4</sup>Begúe' bchigala chia'.

Guzúa' stêbele'e, ne quebe guca guchálaja'.

<sup>5</sup>Blaba lazra' ca naca zra nédxute.

Ca naca iza zan ca' da ba guledé chee na.

<sup>6</sup>Bsa lazra' ca naca da bil-la' chizrelála, ne blaba lázrequeza' ca zaj naca na, na' gunaba be' xu'a:

<sup>7</sup>¿Guzúa Xránadxu dxi'u chalá'ala tu chí'ize ne québedxa gácalene' dxi'u?

<sup>8</sup>¿Cabátadxu xexache lazre' dxi'u?

¿Cabátadxu guné' ca da guchêbe lazre'?

<sup>9</sup>¿Gul-la lázrequeze Dios xexache lazre' dxi'u?

¿Dxezré'e dxi'u, na' québedxa xexache lazre' dxi'u?

<sup>10</sup>Nadxa gunná': Caní dxuna' lawe' da quebe chawe' zua'.

Chee le na' cheajsá lazra' chee xúgute da zrente

da ben Dios zrente lu iza ba guledé chee na.

<sup>11</sup>Cheajsá lazra' chee da zrente ca' da ben Jah.

Awe', cheajsá lazra' chee da ben'u nédxu-dauté da ca' dxexebánentu'.

<sup>12</sup>Gulaba lazra' ca naca xúgute da ba ben'u, ne guchálaja' ca zaj naca da nunu'.

<sup>13</sup>Dios, lá'azxa naca da dxusédenu' netu' ca guntu'.

¿Zua xetú Dios naque' benne' zren ca naca Dios chegentu'?

<sup>14</sup>Lue' nacu' Dios, dxunu' da ca' dxexebánentu'.

Blé'enu' xúgute benneache lu xezr la xu ca zrente naca xel-la' waca chiu'.

<sup>15</sup>Nen xel-la' waca chiu' bexa'u benneache chiu',

zri'ine zre sua Jacob, ne zri'ine zre sua José.

<sup>16</sup>Xegu nisa ca' belelé'en Lue', Dios.

Belelé'e xegu nisa ca' Lue', na' belezré-bele'e na.

Cá'anqueze gulezúa stêbe nísadau' situj ca'.

<sup>17</sup>Nisa xiuj zila bdxuaj na lu beuj bza ca', ne gulennéle'e guziu', ne gulépele'e xesa.

<sup>18</sup>Lu be' bdxunu' ben guziu' chiu' da gunnéle'e na.

Bulusaní' xesa guziu' ca naca xezr la xu.

Guzúa stêbe, ne guzrixe xezr la xu.

<sup>19</sup>Lawe' nísadau' guza'u,

ne lawe' nisa zila ca' gudéquezu',

ne quebe naca bea naga bléaju'.

<sup>20</sup>Guche'u benneache chiu' ca zrila' ca'

lu na' Moisés, ne lu na' Aarón.

## 78

<sup>1</sup>Le xen, le'e, benneache chia', ca da dxusédeda'.

Le xen xanne' ca da dxuchálaja'.

<sup>2</sup>Guchíneda' dizra' ca da dxuluchalaj benne' sina ca',

na' guzéajni'ida' le'e da ca' gulezúa na bagácheze gate nate,

<sup>3</sup>da ca' bendxu, ne bénbeadxu na,

da ca' belixruj be'e xra xrtáudxu ca' dxi'u.

<sup>4</sup>Quebe gucáchedxu na lau zrí'inedxu ca'.

GuzénquezdXu zrí'inedxu ca' ca naca xel-la' szren

chee Xránadxu,

ne ca naca xel-la' waca chee', ne ca zaj naca da zren ca'

da bene'.

<sup>5</sup>Bzue' tu da nadxixruj bea na da xelún benne' Israel ca',

ne da bdxixruj be'ene' ca' da xelún zri'ine zre sua Jacob.

Gunná bé'ene' xra xrtáudxu ca' xuluzenne' bi chee' ca'

ca naca da gunná bé'ene',

<sup>6</sup>chee xelúnbea zrí'ine' bidu ca' za xelálajbe' ca naca na,

na' bi caní xuluzenbe' zri'inebe' da na',

<sup>7</sup>chee xuluxrén lázrebe' Dios,

ne quebe xelal-la lázrebe' da ca' ben Dios, ne chee xuluzúabe' dizra' da ca' gunná be'e.

<sup>8</sup>Quebe xelácabe' ca gulaca xra xrtáube' ca'. Benne' ca' quebe buluzúe' dizra' chee', ne guledábague' Le',

ne quebe buluzúa chúchue' ca buluxrén lazre' Dios,

ne quebe gulaque' li lazre' lu da naca chee Dios lu

be' zaj nácaqueze'.

<sup>9</sup>Benne' zri'ine zre sua Efraín, benne' zaj nu'e

da dxuluchínene' lu wedil-la buluzrúnnuje' naga dxaca wedil-la.

<sup>10</sup>Quebe belune' ca naca xel-la' wezria' da ben Dios,

ne quebe buluzúe' dizra' da gunná bé'ene'.

<sup>11</sup>Gulal-la lazre' da ca' ben Dios,

ne xel-la' waca ca' blé'ene' Le'.

<sup>12</sup>Lau xra xrtawe' ca' bene' xel-la' waca ca' lu xezr la xu Egipto, ne lu xezr la xu Zoán.

<sup>13</sup> Gusalje' neza lu nísadau' naga guledé benne' ca'.

Benë' nísadau' na' ca xi'a ca' chalá'a weaj.

<sup>14</sup> Te zra blé'ene' benne' ca' neza nen tu beuj bza da xjácáene',

ne chizrela nen beuj bza da naca na ca tu xi'.

<sup>15</sup> Gulé'ë xiaj ca' naga naca xu bizre, na' bxf'aje' benne' ca' nisa da gulaj na le'ë xiaj ca' ca tu xegu nisa.

<sup>16</sup> Benë' gulaj tu xegu nisa le'ë xiaj na', na' bzriluj na ca tu xegu zren.

<sup>17</sup> Lácala benë' caní belúndaqueze' dul-la lau Dios le'ë xixre' lawe' lataj, ne guledábague' Dios nape' dutë xel-la' szren.

<sup>18</sup> Gulegú'u lazre' xulu'zúa zrië' Dios. Gulenabë' xelawe' ca da dxelezá lazre' le'.

<sup>19</sup> Gulenné' cheë Dios, gulenné':

¿Wazeque Dios na' gunne' da gágudxu le'ë xixre' nigá?

<sup>20</sup> Da líqueze gulé'ë xiaj na', na' gulaj nisa na', na' bzriluj na ca tu xegu zren.

¿Wazéquequezne' gunne' dxi'u xeta, ne gunne' belá da gágudxu?

<sup>21</sup> Cheë le' na' bzra'a Xránadxu gate benne' da na',

ne gusel-le' xi' da bzezxe na bal-la bënneache cheë', na' bsdxi'ule'ë xel-la' dxezrá'a cheë' nen benne' Israel ca',

<sup>22</sup> lawe' da quebe guléajle'ë cheë Dios, ne quebe buluxrén lazre' Le' guselé' le'.

<sup>23</sup> Gunná bé'ene' beuj zran xabáa, ne gusalaje' dxa xu'u cheë xabáa,

<sup>24</sup> na' benë' bxinnaj xeta maná ca dxinnaj xiuj cheë gulagu benne' cheë' na.

Bnézruje' le' da naca ca zrua' cheë xabáa.

<sup>25</sup> Gulawe' da dxelagu gubáz cheë xabáa ca'. Gusél-lalë'ë da gulawe', na' guléla-jtëquezene'.

<sup>26</sup> Benë' guca be' da za' chalá'ala naga dxalaj gubizra,

ne xel-la' waca cheë' benë' guca be' za' chalá'ala naga dxedé gubizra beu' zaga,

<sup>27</sup> na' gusel-le' cheë benne' ca' belá ca ze bxrte xu,

béadu zaj zua xrila naxanba' ca xuzre' da dxe' dxu'a

tu xegu zren.

<sup>28</sup> Benë' guléxrujba' chale'aj cheë benne' ca'. Guléxrujba' dútequeze naga zaj zua xu'u xide cheë'.

<sup>29</sup> Gulawe'-ba', ne guléajquezene'.

Dios bnézruje' chie' ca naca da gulaca lazre'.

<sup>30</sup> Gate quebe ne xelélajene', ne ne dxelawe'-ba',

<sup>31</sup> bzra'a Dios benne' ca',

na' betie' benne' zaj nácadxe' benne' wal-la,

ne benne' Israel ca' zaj nácadxe' benne' waca.

<sup>32</sup> Láqueze benë' caní, na' belúndaqueze' dul-la,

ne láqueze belelé'ene' xel-la' waca ca' da benë',

quebe buluxrén lazre' Le'.

<sup>33</sup> Cheë le' na' guchugue' zra cheë benne' ca' ca

tu be' dxecá'adxu,

ne ca zaj naca iza da gulezúe', bdee' le' lu da zi' da xa'.

<sup>34</sup> Gate betie' bal-la benne' ca', na' xezí-cadxë' belexaque' cheë Dios.

Belexeb'i lazre', ne du lazre' bulucháaljéne' Le'.

<sup>35</sup> Xeajlesá lazre' naca Dios Benne' dxuxúe' le',

ne Dios na' nape' dutë xel-la' szren naque' Bénnea'

bxá'awene' le',

<sup>36</sup> san quebe guca li lazre' da gulenné' lawe' da belún lazre' lau Dios.

<sup>37</sup> Quebe gulaque' li lazre' nen Le',

ne quebe belunë' du lazre' ca naca xel-la' wezríja cheë'.

<sup>38</sup> Dios bexache lazre' cheë benne' ca',

ne bnite lawë' dul-la belunë', ne quebe bzria xi'ë le'.

Zane' lásatë bzue' chalá'ala xel-la' dxezrá'a cheë',

ne quebe bzre'ë le' dutë ca da dxéquene'.

<sup>39</sup> Xeajsá lazre' Dios zaj naque' belá dxen.

Zaj naque' ca tu be' da dxedé na, ne quebe xezrín na.

<sup>40</sup> Zane' lasa guledábague' Le' le'ë xixre' lawe' lataj na',

ne zane' lasa buluzúe' Le' baxache'.

<sup>41</sup> Zane' lasa buluzúe' Dios chalá'ala, ne buluché'ë Dios lá'azxa cheë benne' Israel ca'.

<sup>42</sup> Gulal-la lazre' ca naca xel-la' waca zren  
chee',  
ne ca bene' lu zra na' bxá'awene' le' lu da  
zi' da xa',  
<sup>43</sup> gate bene' xel-la' waca ca' lu xezr la xu  
Egipto,  
ne blé'ene' da ca' da dxebánedxu lu xezr la  
xu Zoán.  
<sup>44</sup> Bexune' xegu chee' ca' dxen,  
na' québedxa guca da xele'aj benne' Egipto  
ca'.  
<sup>45</sup> Gusel-le' be'a ládujla benne' ca', be bu-  
ludeba' le' xel-la' zi'.  
Gusel-le' bluzru ca' buluzría xiba' xezr la xu  
chee'.  
<sup>46</sup> Gusel-le' biche zu ca' guláguba' lina chee',  
ne buluzría xiba' da zaj zua lu xezr la xu  
chee'.  
<sup>47</sup> Gusel-le' xiaj bezxe' zri'a da bzria xi na lba  
uva chee' ca',  
ne gusel-le' da zaga da bsebizre na xaga  
higo chee' ca'.  
<sup>48</sup> Gusel-le' xiaj bezxe' zri'a da bete na be  
xixre' chee' ca',  
ne gusel-le' xesa da bete na zrila' chee' ca'.  
<sup>49</sup> Bdee' benne' Egipto ca' lu xel-la' zi' zren,  
lawe' da bzrá'ale'e benne' ca',  
na' guca da ca' ca zánete' gubáz ca' chee' xel-  
la' gute.  
<sup>50</sup> Quebe bzague' xel-la' dxezrá'a chee',  
ne quebe bnite lawe' chee' chee' quebe  
xelátie',  
san betie' le' nen tu xízrawe' wal-la.  
<sup>51</sup> Betie' bi biu nedxu chee' benne' ca',  
bi biu nedxu ca' chee' benne' Egipto ca'.  
<sup>52</sup> Nadxa beche'e benne' chee' ca' ca tu  
benne'  
dxeche'e zrila' ca',  
ne bsi'e le' le'e xixre' lawe' lataj.  
<sup>53</sup> Bsi'e le' zri'a chawe', ne quebe bi belezre-  
be',  
san gulate benne' guledábage' Le' lu  
nísadau'.  
<sup>54</sup> Beche'e le' lu xezr la xu lá'azxa chee',  
naga zua xi'a nigá da guca cheé'queze'.  
<sup>55</sup> Bebéaje' benne' zaj zre'e lu xezr la xu na'  
lau  
benne' chie' ca',  
na' gulé'e xezr la xu chee' cha chee' benne'  
Israel ca',  
ne bzre'e le' lizre benne' ca' bebéaje'.  
<sup>56</sup> Da xula buluzúe' Dios chalá'ala, ne bu-  
luché'e  
Dios, nape' duté' xel-la' szren.

Quebe buluzúe' dizra' da ca' gunná be'ene'  
le'.  
<sup>57</sup> Da xula guledábage' Dios ca belún xra  
xrtawe' ca'.  
Gulaque' ca tu bdxequé' xala chee' xaga nalá  
xéche'ze.  
<sup>58</sup> Buluché'e Le' ne chee' lataj ca' naga bu-  
lucá'ana  
szrene' bedáu' xiaj xaga ca',  
ne ne chee' bedáu' xiaj xaga chee' ca'  
bzrá'ale'e Dios.  
<sup>59</sup> Bzra'a Dios gate blé'ene' na,  
na' gucuidele'ene' benne' chee' ca', benne'  
Israel.  
<sup>60</sup> Guleaj xíchaje' xu'u xide lá'azxa chee' zua  
na xezre Silo,  
xu'u xide na' guzuáqueze' ládujla benne'  
ca'.  
<sup>61</sup> Be'e lataj belecá'a benne' ca' dx-  
eledábage' dxi'u  
xi'ina lá'azxa chee',  
da na' dxulé'e na xel-la' waca, ne xel-la'  
szren chee'.  
<sup>62</sup> Bzre'e benne' chee' ca',  
na' bdee' le' lu na' benne' ca' belútie' le'.  
<sup>63</sup> Benne' wal-la ca' gulátie' lu wedil-la.  
Quebe nu zra' benne' wegú', benne'  
xelezúalene'  
nu'ula wegú' ca'.  
<sup>64</sup> Cá'anqueze gulate bxruze ca' lu wedil-la,  
na' nu'ula chee' bxruze ca' quebe gulebezre  
xache'  
chee' bxruze ca'.  
<sup>65</sup> Nadxa guca Xránadxu ca tu benne' dxexe-  
bang' lu bchigala.  
Guque' ca tu benne' wal-la dxebezre xe'e  
gate ba né'aje'  
xrise uva wal-la.  
<sup>66</sup> Na' blague' benne' guledábage' Le',  
ne bca'ane' le' cá'aze chadía chacanna.  
<sup>67</sup> Bzue' chalá'ala zri'ine zre sua José,  
ne quebe bequ'é'e zri'ine zre sua Efraín,  
<sup>68</sup> san bequ'é'e zri'ine zre sua Judá,  
ne xi'a Sión, da na' nazrí'ile'ene'.  
<sup>69</sup> Lu xi'a na' bene' xudau' lá'azxa chee',  
da guca na ca naca da zua na xabáa.  
Bzua chúchue' na chadía chacanna,  
ca nácaqueze xezr la xu nigá.  
<sup>70</sup> Bequ'é'e David, benne' wen zrin chee'.  
Bebéaje' le' naga zaj zra' zrila' ca'.  
<sup>71</sup> Beche'e le' naga zue' dxuxúe' zrila' ca' zaj  
nache'eba' bedau',  
chee' gaque' wenna' bea, benne' guxúe' bén-  
neache chee',

zri'ine zre sua Jacob, benne' zaj naque'  
benne' Israel ca'.

<sup>72</sup> Dute<sub>̄</sub> xel-la' du lazre' chee' bxue' benne'  
ca'.

Bxue' le' dute<sub>̄</sub> xel-la' waca zren chee'.

## 79

<sup>1</sup> Dios, ba gulú'u benne' xezr la xu zitu' ca'  
lu xezr la xu  
chee bènneache chiu'.

Bulucá'ana dítaje' xudau' lá'azxa chiu'.

Buluzría xi'e xezre Jerusalén.

<sup>2</sup> Bulucá'ane' bēla' dxen chee wēn zrin chiu'  
ca' naga

gulagu bē zua xrila le'.

Bē xixre' ca' guláguba' bēla' dxen chee  
benne' ca'

zaj naque' chiu'.

<sup>3</sup> Ca nisa bululálaje' dxen chee benne' ca'  
xúgute lu neza  
chee xezre Jerusalén,

ne quebe nu chilá' benne' gucache' benne'  
ca'.

<sup>4</sup> Benne' xezr la xu walizre' cheentu' ca'  
dxulucháchalene' netu'.

Benne' zaj zre'e xezre walizr ca' dxu-  
lucá'ana dítaje' netu',  
ne dxelún le' cheentu'.

<sup>5</sup> ¿Bata cuézaqueze gaca caní cheentu',  
Xran?

¿Tu chí'izqueze dxezra'u netu'?

¿Tu chí'izqueze gaca xel-la' dxezrá'a chiu'  
ca tu xi'?

<sup>6</sup> Bzra'a benne' xezr la xu ca' quebe zaj  
númbe'e Lue',

na' benne' xezr la xu ca' quebe dxululáwiz-  
re' Lue',

<sup>7</sup> lawe' da ba buluzría xi'e zri'ine zre sua  
Jacob,

ne bulucá'ana dítaje' xu'u lizre benne' ca'.

<sup>8</sup> Quebe gusebagu' netu' ca naca da zrinnaj  
da belún

xra xrtauntu' ca'.

Gudázega xexache lazru' netu', lawe' da  
dxezraga láule'entu'.

<sup>9</sup> Gúcale' netu', Dios, nacu' Bénnea' dxuselé'  
netu',

chee gaca ba Lau'.

Bselá netu', ne bnite lau dul-la nuntu' chee  
xegá'ana szren Lau',

<sup>10</sup> lawe' da xelenná bènneache: "¿Ga na Dios  
chee benne' ca'?"

Bebéaj lazre' benne' ca' belúti'e wēn zrin  
chiu' ca'.

<sup>11</sup> Caní ben chee xelelé'e xúgute benne' chiu'  
ca' zaj xu'e

lu na' benne' ca' dxeledábague' netu'.

Dute<sub>̄</sub> xel-la' waca zren chiu' bselá benne' ca'  
ba zaj nachugue'

chee' xelatie'.

<sup>12</sup> Bunezruj chee benne' xezr la xu walizre'  
cheentu'

ca' xegazre cue'

ca da calela da belune', bulucá'ana dítaje'  
Lue', Xran.

<sup>13</sup> Netu', bènneache chiu', nácantu' ca zrila'  
chiu' ca',

güe lá'anaquezentu' Lue' chadía chacanna.

Tu cuen tu cuen zri'ine zre suantu' gúl-  
laquezentu' da

güe lá'anantu' Lue'.

## 80

<sup>1</sup> Bene cheentu', Lue' dxuxú' benne' Israel  
ca',

Lue' na', dxuxú' zri'ine zre sua José ca  
zrila'du ca',

ne dxe'u lataj blau chiu' da zua na láwela  
querubín ca'.

<sup>2</sup> Ble'e xel-la' szren chiu' lau zri'ine zre sua  
Efraín,

ne Benjamín, ne Manasés.

Ble'e xel-la' waca chiu', ne gudá guseláu'  
netu'.

<sup>3</sup> Beché' netu', Dios.

Bexache lazre' netu', na' lantu'.

<sup>4</sup> Xránantu' Dios, napu' dute<sub>̄</sub> xel-la' waca,  
¿bata chajsequeze zra'u netu',

ne quebe xennu' ca da nábantu' Lue'?

<sup>5</sup> Bzúale'u netu' lu xel-la' dxewí'ine lazre',  
ne bzíalale'u nisa dxebézrentu'.

<sup>6</sup> Be'u lataj xezr la xu walizre ca' bulucá'ana  
dítaje' netu',

na' benne' ca' dxeledábague' netu' belún le'  
cheentu'.

<sup>7</sup> Beché' netu', Dios, napu' dute<sub>̄</sub> xel-la' waca.  
Bexache lazre' netu', na' lantu'.

<sup>8</sup> Bebéaju' tu zrigu' lba uva lu xezr la xu  
Egipto da naca na

bènneache chiu'.

Blagu' benne' xezr la xu gulezré'e nigá, na'  
guzu' nigá

zrigu' lba uva na'.

<sup>9</sup> Gú'unu' lba uva na' chee gula na.

Bdélé'e lue zrigu' lba uva na', na' gucu na  
xezr la xu na'.

<sup>10</sup> Gulú'u na zrul-la xúgute xi'a ca',

na' zruze na ca' gulegú'u na zrul-la xaga  
cedro zren ca'.

<sup>11</sup> Gulechiluj zruze na, belezrintę na dxu'a nísadau',  
ne belezrintę na dxu'a xegu Eufrates.  
<sup>12</sup> ¿Bizr cheę na' gucá'u le'aj da naxechaj na le na?  
Na'a xúgute benne' dxeledé na' dxelebane' da zixre cheę na.  
<sup>13</sup> Dxuluchuchu dxululéaj cuche xixre' ca' lba uva na',  
na' be xixre' ca' dxeláguba' na.  
<sup>14</sup> Bedá cheęntu', Dios, napu' dutę xel-la' waca.  
Gunná' netu' ga na' zu' xabáa, ne gudá xedajnná'u lba uva chiu'.  
<sup>15</sup> Gudá, guseláu' lba uva nigá, da gúza-quezu'.  
Bechuj cheę lba uva na', ba bzua chuchu' gaca na chiu'.  
<sup>16</sup> Benne' ca' dxeledábague' netu' ba gulechúgue' lba na',  
ne ba guládue' na xi'.  
Gunná' benne' ca' lu xel-la' dxezrá'a chiu',  
ne bzria xi' benne' ca'.  
<sup>17</sup> Bzua chuchu, ne bxue benne' ca' ba guca'u,  
benne' xęzr la xu na' ba nuzúa chuchu'.  
<sup>18</sup> Cabátadxa cueaj xíchajntu' Lue' xecha lasa.  
Bcache chawe' netu', naca bantu', na' güe lá'anantu' Lau'.  
<sup>19</sup> Xránantu' Dios, napu' dutę xel-la' waca, beché' netu'.  
Bexache lazre' netu', na' lantu'.

## 81

<sup>1</sup> Lu dutę xel-la' dxebé le gul-la cheę Dios, Bénnea' dxutipe' lázredxu.  
Lu da ba neza cheęle le cuezre xa'a lau Dios cheę zri'ine zre sua Jacob.  
<sup>2</sup> Le gul-la, ne le capa xídadau'.  
Le quinne xrtan da con zriádi'i na du, ne da dxúl-lalęne.  
<sup>3</sup> Le gucuezre luzu da dxulucuezre' gate naca beu' dxe'ene,  
da naca na zra nuzúadxu gundxu laní lá'azxa.  
<sup>4</sup> Naca na tu da dxun na ba xen xelún benne' Israel ca',  
da bdxixruj bea Dios xelún zri'ine zre sua Jacob.  
<sup>5</sup> Bzue' na ca tu da gulé'e lau na zri'ine zre sua José  
gate beledxúaje' lu xęzr la xu Egipto,

naga benda' tu xrtizra' bėnneache da quebe guxéajni'ida'.  
<sup>6</sup> Gunná Dios: “Begúa' xua' da buludé'e' benne' chia' ca'.  
Bsezrá'a benne' chia' ca' da zi'i.”  
<sup>7</sup> Lu da ba xa' da guzúale, bláwizrale neda', na' bselá' le'e.  
Becheba' cheęle naga nagacha' lu beuj bza gate na'  
gunnéle'e guziu',  
na' bxua' ájala gunle naga zaj de beaj nisa zaj nazí le Meriba.  
<sup>8</sup> Le xene, bėnneache chia', na' gusízreda' le'e.  
Le'e, benne' Israel, che dxaca lázrele sile da dxennía',  
<sup>9</sup> quebe gápale tu dios cheę benne' xula,  
ne quebe guzú zríbele lau tu dios cheę benne' zitu'.  
<sup>10</sup> Neda', Xránale, naca' Dios cheęle.  
Bebéaja' le'e lu xęzr la xu Egipto.  
Le salaj dxú'ale, na' gunna' da gágule.  
<sup>11</sup> Bėnneache chia' quebe belúe lazre' da gunnía'.  
Benne' Israel ca' quebe gulaca lazre' xezezi' lu ne'e neda'.  
<sup>12</sup> Cheę le na' bsana' benne' ca' lawe' da gulaque' lázxdau zide'.  
Belunę' ca da guléquene' xrlátaje.  
<sup>13</sup> Che la gulebé' gunne xue bėnneache chia' cheę da gunnía',  
ne che la belún benne' Israel ca da ble'eda' le',  
<sup>14</sup> na' chadite' bzria xi'a benne' guledábague' le',  
ne gudíl-lalęna' benne' guledíl-lalęne' le'.

<sup>15</sup> Che la belún benne' Israel caní,  
na' benne' ca' dxelecuídene' Xránadxu bu-luzúe' xrtizre',  
(san chadia' chacanna zaj nabague' zria),  
<sup>16</sup> na' Dios gune' xelawę' zrua' xtla cháwedau',  
ne gune' xelélajquezne' nen bzrína'dau'.

## 82

<sup>1</sup> Zua Dios naga zaj nazraga benne' dxu-luchi'e cheę bėnneache cheę'.  
Dios dxuchi'e cheę benne' ca' dxuluchi'e cheę bėnneache.  
<sup>2</sup> Dxenná Dios: “¿Bátadxa guchi'ale cheę bėnneache chia' da quebe naca xrlátaje,

ne gápale ba lá'ana benne' ca' zaj nabéaj xíchajé' Dios?"

<sup>3</sup> Le gácale benne' xache' ca', ne bidau' wezebe ca'.

Le gun da xrlátaje chee benne' baxache' ca' ne chee benne' ca' dxelexáxrjene'.

<sup>4</sup> Le guselá benne' ca' dxeledé' lu da ba xa', ne benne' ca' quebe bi zaj nape'.

Le guselá benne' ca' lu na' benne' ca' zaj nabéaj xíchajé' Dios.

<sup>5</sup> Quebe bi zaj nézene', ne quebe dxeléa-jni'ine',

na' dxeledé' lu da chul-la.

Dxuluzrizre' ca naca da zaj de lu xezr la xu.

<sup>6</sup> Neda' gunná': Le'e nácaquezle ca dios ca', ne nácale xúgutele ca zrí'inequeze Dios szrente,

<sup>7</sup> Wátele ca dxelate xezícadxa bénneache, na' cheajházele ca cheajchaze nüteteze benne' dxenná be'e.

<sup>8</sup> jGuxasa, Dios!

jBchi'a chee bénneache zaj zra' lu xezr la xu,

lawe' da naca duté xezr la xu chiu' Lue'!

### 83

<sup>1</sup> jDios, quebe sua zriu'!

Quebe su' zrize, Dios, ne quebe gusezxuj dxu'u,

<sup>2</sup> lawe' da dxelebezre xa'a benne' ca' dxeledábague' Lue', ne dxulucá'ana szren cuina benne' ca' dxelecuidene' Lue'.

<sup>3</sup> Bagácheze ba zaj nune' tuze dizra' bi xelune' chee bénneache chiu', ne ba zaj nune' bi xelune' chee benne' ca' dxuxúquezu' Lue'.

<sup>4</sup> Gulenné': "Le chu'u, guzrí'a xidxu benne' ca'

chee québedxa xelaque' tu cue' xezr la xu, ne québedxa nu sua benne' cheajsá lazre' la Israel."

<sup>5</sup> Ba belune' tuze dizra'.

Zaj nune' tuze dizra' xeledábague' Lue'

<sup>6</sup> benne' Edom ca', ne benne' Ismael ca', ne benne' Moab ca', ne benne' zri'ine zre sua ca' Agar,

<sup>7</sup> ne benne' Gebal ca', ne benne' Amón ca', ne benne' Amalec ca', ne benne' Filistea ca', ne benne' zaj zre'e xezre Tiro.

<sup>8</sup> Cá'anqueze benne' Asiria ca' zaj nune' le' tuze.

Xúgute benne' caní dxelune' zrin chee zri'ine zre sua Lot.

<sup>9</sup> Ben chee benne' caní ca benu' chee benne' Madián ca',

ne ca benu' chee Sísara, ne ca benu' chee Jabín dxu'a xegu Císón,

<sup>10</sup> benne' ca' gulátie' lu xezr la xu Endor, na' belexaque' ca xrch'e bezre da gun na bebe lu xezr la xu.

<sup>11</sup> Ben gaca chee benne' blau ca' chee benne' caní

ca guca chee Oreb, ne chee Zeeb, ne ben gaca chee benne' dxelenná bé'ene' benne' caní

ca guca chee Zeba, ne chee Zalmuna,

<sup>12</sup> lawe' da gulenná benne' caní: "Gaca cheedxu xezr la xu naga zaj zra' bénneache chee Dios."

<sup>13</sup> Dios chia', ben xelaque' ca xizre bebe da dxua be' gate dxedube na.

Ben xelaque' ca xrlácue xia xéladu ca' da dxua be' bduun'.

<sup>14</sup> Ca dxun tu xi' da dxuuzexze na tu xi'a zren, ne ca dxun xi' da dxuuzexze na tu din zren,

<sup>15</sup> ca'an gudáu zi' xuzre benne' caní tu lu be' bduun',

ne bchebe le' nen tu be' bduun' chiu'.

<sup>16</sup> Ben xelexedué'ele'ene',

ne ben xelape' Lue' ba lá'ana, Xran.

<sup>17</sup> Ben xelaque' zréajene' ne xelezúa sté-bele'e tu chí'izqueze.

Ben xelexegá'ana díraje', ne xelexenítie'.

<sup>18</sup> Ben xelexúnbe'e nacu' Lue' Xránantu' Dios.

Tuzu' Lue' nacu' Dios zrente lawe' duté xezr la xu.

### 84

<sup>1</sup> Nazrí'ile'eda' xudau' chiu' Lue', Dios, napu' duté xel-la' waca.

<sup>2</sup> Dxaca lázrele'eda' sua' ga na', ne dxezá lazra' sua' lu xudau' chiu', Xran. Duté da naca', ne duté lázrdawa' dxul-la' chiu' Lue', Dios ban.

<sup>3</sup> Ba belún chjegu ca' xrú'neba', na' buchuj ca' zaj de lataj naga dxuluzríaba' biadu cheeba' ca'

naga zua lu cugu chiu' Lue', Dios, napu' duté xel-la' waca.

Nacu' Lue' Wenná Bea chia', ne Dios chia'.

<sup>4</sup> Ba neza zrente naca na chee benne' ca' zaj zre'e xudau' chiu'.

Chadí'a chacanna xelúe lá'anaqueze' Lue'.

<sup>5</sup> Ba neza zrente naca na chee benne' ca',

Lue' dxuzúa chuchu' le',

benne' ca' dxelezá lazre' chjaque' xi'a lá'axza chiu', xi'a Sión.

<sup>6</sup> Gate dxeledé' lache' bizre nazí le na

Lache' Nisa Dxebézredxu,  
 dxexaca na lataj naga dxalaj nisa,  
 na' gusezrá nisa xiuj ca zaj naca beaj ca'.  
 7 Dxelácadxé' benne' wal-la dxácaté ne zaj  
 xu'e neza  
 lawe' da xelexé'engé' Dios lu xi'a lá'azxa  
 cheé', xi'a Sión.  
 8 Bene, Xran, ca naca da dxenaba' Lue', Dios,  
 napu' duté xel-la' waca.  
 Bene, Dios, nacu' Dios cheé' Jacob.  
 9 Ben da xrlátaje cheé' benne' wenna' bea  
 cheentu', Dios,  
 benne' wenna' bea na' guca'u Lue'.  
 10 Cháwedxa naca sua' tu zraze lu xudau'  
 chiu'  
 quézcala sua' chi gaxúa iza naga xula.  
 Dxacaxa lazredxa' sua' dxa xu'a xudau' chee'  
 Dios chia'  
 ca tu benne' nada'u,  
 quézcala súaqueza' tu lizra' zaca naga  
 quebe zua Dios.  
 11 Xránadxu Dios naque' Benne' dxuxúe'  
 dxi'u,  
 ne Benne' Wenna' Bea xabáa cheé'dxu.  
 Dxoné' dxi'u da chawe' duté xel-la' zri'i  
 lazre' cheé',  
 ne dxuné' dxelapa bénneache dxi'u ba  
 lá'ana.  
 Quebe xezúengé' zi' guné' da chawe' chee'  
 benne' ca' zaj naque' du lazre'.  
 12 ¡Dios, napu' duté xel-la' waca!  
 ¡Ba neza zrenté naca na cheé' benne' ca'  
 dxuluxrén lazre' Lue'!

## 85

1 Benu' da xrlátaje cheé' bénneache chiu',  
 Xrana' Dios.  
 Benu' belexelá zri'ine zre sua Jacob,  
 benne' ca' gulu'e lu na' benne' zitu' ca'.  
 2 Bnite lau' da zrinnaj da belún bénneache  
 chiu'.  
 Bdeu' chalá'ala ca zaj naca dul-la chee'  
 benne' ca'.  
 3 Bzua zriu' xel-la dxezrá'a chiu',  
 ne bsanu' xel-la' xichaj zra'a chiu'.  
 4 Ben xezúantu' lu da ba neza cheé' xel-la'  
 weselá chiu', Dios,  
 ne québedxa zra'u netu'.  
 5 ¿Tu chí'izqueze zra'u netu'?  
 ¿Wazrá'aquezu' tu cuen tu cuen zri'ine zre  
 suantu'?  
 6 ¿Québedxa gunu' xexaca bantu',  
 cheé' súantu' lu da ba neza lau Lue'?  
 7 ¡Xran, bexache lazre' netu', ne bselá netu'!  
 8 Guzé naga' da nne' Xrana' Dios.  
 Nne' da guzúa na bénneache cheé'

lu xel-la' dxebeza zri lazre',  
 cheé' québedxa xelún benne' lá'azxa chee'  
 da xálaze.  
 9 Da líqueze Le' zúatequeze' guselé' benne'  
 ca' dxelezrebe' Le',  
 cheé' sua da xabáa chee' lu xezr la xu  
 cheé'dxu.  
 10 Zaj nazraga xel-la dxexache lazre', ne da li  
 cheé' Dios.  
 Zaj naca tuze da xrlátaje, ne xel-la' dxebeza  
 zri lazre'.  
 11 Da li chee' gusezrá na xezr la xu nigá,  
 na' sel-le' da xrlátaje cheé' da za xabáa.  
 12 Xránadxu gúnnaqueze' dxi'u da  
 cháwedau',  
 na' gúnnale'e xezr la xu cheé'dxu.  
 13 Nu benne' naque' xrlátaje waca xezrine'  
 lau Dios,  
 na' guné' gundxu ca da ba blé'ene' gundxu.

## 86

1 Bze naga, Xran, ne bene chia',  
 lawe' da zua' lu da ba xa', ne dxexáizrjeda'.  
 2 Bxue neda' lawe' da naca' chiu'.  
 Bselá neda', Dios chia', naca' wen zrin chiu',  
 ne dxuxrén lazra' Lue'.  
 3 Bexache lazre' neda', Xrana' Dios,  
 lawe' da dxuláwizra' Lue' te zra chizrela.  
 4 Ben béle'eda' neda', wen zrin chiu',  
 lawe' da dxuzúa cuina' lau Lue', Xran,  
 5 na' Lue', Xran, nacu' xrlátaje, ne dxunite  
 lau' cheentu'.  
 Zúatequezu' xexache lazru' benne' ca' dxu-  
 luláwizre' Lue'.  
 6 Xrana' Dios, bene da dxuchálajlęna' Lue',  
 ne bze naga ca da dxenaba' lau'.  
 7 Lu zra sua' lu da stébele'e wannéqueza'  
 Lue',  
 lawe' da dxexechébequezu' Lue' chia'.  
 8 Xran, quebe nu chilá' Dios ca Lue',  
 ne quebe nu dxun ca da dxunu' Lue'.  
 9 Xelélé' bénneache duté xezr la xu da bęnu'  
 Lue',  
 na' xelúe lá'anaqueze' Lue', Xran,  
 ne xulucá'ana szrene' Lau' Lue',  
 10 lawe' da nacu' Lue' szren, ne dxunu' da  
 dxexebánentu'.  
 Tuzu' Lue' nacu' Dios.  
 11 Bseé neda' da dxaca lazru' guna', Xrana'  
 Dios,  
 na' guna' ca naca da li chiu'.  
 Gunná be'e lázrdawa' cheé' zreba' La cuinu'.  
 12 Duté lázrdawa' güe lá'anaqueza' Lue',  
 Xrana' Dios,  
 ne gucá'ana szrénqueza' Lau' chadía cha-  
 canna,



<sup>13</sup>lawe' da zúatequezu' xexache lazru' neda',  
ne bseláu' bénne'du xu'a lu lataj ba xa'.

<sup>14</sup>Dios, belasa benne' dxulucá'ana szren  
cuine',  
ne dxeledábague' neda',  
na' benne' xichaj zra'a ca' belung' tuze  
dízra' xelútie' neda',  
ne quebe dxelezrebe benne' ca' Lue'.

<sup>15</sup>Lue', Xrana', nacu' Dios dxexache lazru'  
netu',  
ne nacu' zren lazre',  
ne quebe dxezrá'azeu', san zúatequezu'  
xexache lazru' netu',  
ne nacu' li lazre'.

<sup>16</sup>Gunná' ca naca chia', ne bexache lazre'  
neda'.

Benna chia' neda', wen zrin chiu', xel-la'  
waca chiu',  
na' bxue neda', zri'ine nu'ula wen zrin  
chiu'.

<sup>17</sup>Ble'e neda' tu da gaca bea na gaca chawe'  
chia',  
ne ben xelexé'e benne' ca' dxelecuídene'  
neda' da na',  
ne ben xelexedué'ene',  
lawe' da nacu' Lue', Xrana' Dios, Bénnea'  
gúcalene' neda',  
ne bexúe zrene' neda'.

## 87

<sup>1</sup>Lane xezre Sión zria na lu xi'a lá'azxa.

<sup>2</sup>Nazrí'idxa Xránadxu Dios lataj naga dxu-  
luchi'a benne' zaj zre'e xezre Sión,  
ca nazrí'ine' xúgute xu'u lizre zri'ine zre  
sua Jacob.

<sup>3</sup>Da xrtante ca' dxelelná bénneache ca  
naca xezre chee Dios.

<sup>4</sup>Cheajsá lazra' lu xezr la xu Egipto, ne lu  
xezr la xu Babilonia  
ga na' zaj zra' bénneache zaj núnbe'e neda'.  
Le mna' xque, lu xezr la xu Filistea, ne lu  
xezre Tiro, ne lu  
xezr la xu Etiopia gulalaj benne' caní  
zaj naque' chia'.

<sup>5</sup>Ca naca chee xezre Sión nnia':  
Benne' nigá, ne bénnea' gulálaje' ga na', na'  
neda',  
Dios zrente, guzúa chúchua' xezre na'.

<sup>6</sup>Gate gulaba Xránadxu Dios benne' ca' zaj  
naque' chee',  
mne': "Benne' nigá gúlaje' lu xezre na'."

<sup>7</sup>Benne' ca' dxelul-le', ne benne' ca' dxe-  
line' xide xelenné':  
Ca naca da ba neza zúantu' lu xezre na'.

## 88

<sup>1</sup>Xran, nacu' Dios dxuseláu' neda'.

Te zra, ne chizrela dxuláwizra' Lue'.

<sup>2</sup>Bene da dxuchálajlena' Lue',  
ne bzē naga da dxuláwizra' Lue'.

<sup>3</sup>Dxedú lazra' lu da caleja ca' da dxaca na  
chia',  
ne ba zua' gatia'.

<sup>4</sup>Dxeleque bénneache neda' ca tu benne'  
gate,  
lawe' da dxátele'e ni'a na'a.

<sup>5</sup>Nagá'ana' cá'aze ládujla benne' gate.

Naca' ca benne' gulátie' lu wedil-la, ne zaj  
de' xēdxu ba ca',

benne' ca' québedxa dxajsá lazru', Dios,  
ne québedxa zaj xu'e lu na'u Lue'.

<sup>6</sup>Dxaca chia' cáteze ba nuzú' neda' tu xēdxu  
zren  
naga naca chul-la, ne nácale'e situj.

<sup>7</sup>Dxéqueda' dxezrá'le'u neda'.

Da dxaca chia' naca na ca dxazia' zran  
xeajxruza zri'a  
chee nísadau'.

<sup>8</sup>Benu' belexebiga bi ljwezra' ca' naga zua'.

Benu' neda' ca tu da dxusegute na benne'  
ca'.

Naca' ca tu benne' xu'e lizre xia ne quebe  
gaca xēdxúaje'.

<sup>9</sup>Dxelechul-la xiaj lawa' ne chee da dxezí  
dhezaca'.

Xúgute zra dxuláwizra' Lue', Xrana' Dios.

Dxechisa na'a lau Lue'.

<sup>10</sup>¿Dxúnquezu' xel-la' waca chee xabáa dxá-  
calenu'  
benne' gate ca'?

¿Dxelexasa benne' gate ca' dxelúe lá'ane'  
Lue'?

<sup>11</sup>¿Dxuluchalaj benne' zaj nagache' lu xēdxu  
ba chee

xel-la zri'i lazre' chiu',

na' dxuluchalaj chee da li lazre' chiu'  
benne' zaj xu'e

lataj chul-la chee benne' gate ca'?

<sup>12</sup>¿Welexúnbea benne' zaj xu'e lataj chul-la  
na' ca

naca da zrente da dxunu',

na' welexúnbea benne' zaj xu'e naga quebe  
nu dxajsá lazre' le'

ca nacu' xrlátaje'?

<sup>13</sup>Neda' dxuláwizra' Lue', Xrana' Dios.

Xúgute zila dxezrín lau' da dxenaba' Lue'.

<sup>14</sup>¿Bizr chee na' dxebéaj xíchaju' neda',  
Xran?

¿Bizr chee na' quebe dxenná'u neda' chee  
gácalenu' neda'?

<sup>15</sup> Dxezí dzezaca', ne ba zua' gatia'.  
Nácatea' bi cuíde'te dxedéa' xel-la' zi' da  
dxudeu' neda',  
na' dxedú lazra'.  
<sup>16</sup> Dxéqueda' dxezrá'le'u neda'.  
Da dxuchebu' neda' ba bsedú na lazra'.  
<sup>17</sup> Zaj naxechaj da caní neda' du zra.  
Dxulusaca zi na neda' gáteteze na'.  
<sup>18</sup> Benu' belexebiga bi ljwezra' ca' naga zua',  
na' tuze da naca chul-la dxedále na neda'.

## 89

<sup>1</sup> Tu gúl-lazqueza' chee xel-la' zri'i lazre'  
chiu', Xran.  
Guzenda' tu cuen tu cuen zri'ine zre  
súantu' nacu' li lazre'.  
<sup>2</sup> Nezda' tu súazqueze xel-la' zri'i lazre' chiu',  
ne chadí chacanna zua xel-la li lazre' chiu',  
cáteze zúaqueze xabáa.  
<sup>3</sup> Lue' gunnáu': "Bena' xel-la wezría nen  
bénnea' ba gucá'a.  
Guchebe lazra' chee David, wen zrin chia',  
'gunnia': Guna' tu cházqueze zri'ine zre su'.  
Guna' xelenná be'ę tu chí'izqueze lu waláz  
chiu'."  
<sup>5</sup> Benne' zaj zra' xabáa dxelúe lá'ane' Lue',  
ne chee da zrente ca' da dxunu', Xran,  
ne ne chee xel-la' li lazre' chiu', naga zaj  
nazrague'.  
<sup>6</sup> Quebe nu zua xabáa, benne' naque' ca Lue',  
Xran.  
Quebe nu zua benne' szrente, benne'  
naque' ca Lue'.  
<sup>7</sup> Benne' zaj zra' xabáa dxelape' Dios ba  
lá'ana,  
na' xúgute benne' ca' zaj nazraga chee'  
dxelezrebe' Le'.  
<sup>8</sup> Xran, nacu' Dios chee benne' zante, benne'  
zaj zra' xabáa.  
Quebe nu zua, benne' naque' ca Lue', Xran.  
Nacu' Benne' wál-late, ne tu nácazquezu' li  
lazre'.  
<sup>9</sup> Xu'u lu na' u xeajxruza zren chee nísadau'.  
Gate dxelasa xeajxruza ca' Lue' dxebeque  
zriu' na.  
<sup>10</sup> Bchúchuju' benne' Egipto ca', na' belex-  
egá'ane'  
ca tu da gate.  
Beše dínnaju' benne' ca' dxeledábage' lue'  
nen na'u wál-late.  
<sup>11</sup> Chiu' Lue' naca xabáa, ne chiu' Lué'queze  
naca xezr la xu.  
Benu' xezr la xu nigá, ne da ca' zaj nnita  
lawe na.

<sup>12</sup> Benu' da de chalá'a naga za' be' zaga,  
ne da de chalá'a naga dxedé gubizra beu'  
zaga ca'.  
Xel-la dxelebe dxelul-la chiu' xi'a Tabor, ne  
xi'a Hermón.  
<sup>13</sup> Benne' wál-late nacu' Lue'.  
Da zrente naca xel-la waca chiu', ne  
nagá'ana szren na.  
<sup>14</sup> Lu da xrlátaje, ne lu da li lazre' dxenná  
be'u.  
Lu xel-la zri'i lazre', ne lu da li lazre' zaj zua  
ca da dxunu'.  
<sup>15</sup> Ba neza zrente naca na chee benne' ca'  
dxelul-le'  
da dxue lá'ana na Lue',  
ne zaj zue' lu xel-la naxani' chiu', Xran.  
<sup>16</sup> Ne chiu' Lue' dxelebéle'ene' du zra,  
ne dxulucá'ana szrene' Lue' ca naca da  
xrlátaje chiu'.  
<sup>17</sup> Lué'queze nacu' xel-la wal-la chee benne'  
ca',  
ne xel-la xrtan chee'.  
Dxúnnadxu' netu' xel-la' waca lawe' da ca'  
dxéquenu' xrlátaje.  
<sup>18</sup> Xránadxu Dios dxucu'uje' dxi'u,  
na' Dios lá'axza chee benne' Israel ca'  
naque'  
Wenná Bea cheedxu.  
<sup>19</sup> Nédxudaute bchálaju' lu da blé'enu'  
benne'  
wen zrin chiu' ca', benne' zaj naque' li  
lazre', gunnáu':  
Ba gucá'a tu benne' wal-la ládujla bén-  
neache chia',  
ne ba bzua' le' gaque' wenná bea, ne dxá-  
calena' le'.  
<sup>20</sup> Ba gucá'a David, wen zrin chia'.  
Bzúaqueza' le' gaque' wenná bea.  
<sup>21</sup> Neda' tu gácalézqueza' le'.  
Xel-la waca chia' gutípaqueza' lazre'.  
<sup>22</sup> Benne' ca' guledábage' Le' quebe  
xelezéquene'  
bi xelune' chee',  
na' benne' ca' dxelune' da calela quebe  
xelezéquene'  
xuluchúchuje' le'.  
<sup>23</sup> Guchúchujqueza' benne' dxeledábage'  
Le', ne gucuasa'  
benne' ca' lau le'.  
Guna' we' benne' ca' dxelecuídené' le'.  
<sup>24</sup> Tu zri'izqueza' le', ne gaca' li lazre' nen le',  
na' ne chia' neda' gápadxe' xel-la' wal-la.  
<sup>25</sup> Guna' nna be'ę duté dxu'a nísadau' zren,

ne dutę dxu'a xęgu Eufrates.

<sup>26</sup> Lę' xę'e neda': "Lue' nacu' Xra'.

Nacu' Dios chia', dxucu'uju' neda', ne dxuseláu' neda'."

<sup>27</sup> Neda' guzúa' lę' ca zri'ina' blau,

na' nna be'ęę' xúgute benne' wenná bea zaj zre'e lu xęzr la xu.

<sup>28</sup> Tu chí'izqueze nuzúa' cheę' xel-la' zri'i lazre' chia',

na' ca naca xel-la' wezría chia' gaca líqueze na nen lę'.

<sup>29</sup> Guna' tu cházqueze zri'ine zre sue',

na' xelenná be'e lu waláz cheę' dxácate ne zua xabáa.

<sup>30</sup> Che xulusán zri'ine zre sua David da nadx-ixruj be'a,

ne che quebe xelune' ca da nuchi'a cheę',

<sup>31</sup> ne che xelecuae' lu da dxenná be'a,

ne che quebe xelune' ca da dxapa' lę',

<sup>32</sup> na' gu'a lę' zrise lawe' da dxeledábage' neda',

ne quina' lę' xide lawe' da dxelune' da calęla.

<sup>33</sup> Quebe gusana' ca nazrí'ida' David,

ne quebe gusana' gaca' li lazre' nen lę',

<sup>34</sup> ne quebe gal-la lazra' xel-la' wezría da nuna',

ne quebe guchá'a ca da ba gunnía'.

<sup>35</sup> Tu lásaze bzetaj cuina' guchebe lazra',

na' cabata' gun lazra' cheę' David,

<sup>36</sup> gunnía': Tu cházqueze zri'ine zre sue',

na' xelenná be'e lu waláz cheę' lawa' neda' dxácate ne zua gubizra.

<sup>37</sup> Xel-la' dxenná bea cheę' tu sua chúchuzqueze na

ca zua beu' zran xabáa.

Tu sua chúchuzqueze na dxácate ne zua xabáa.

<sup>38</sup> Lue', Dios, guleaj xíchaju', ne bzu' chalá'ala bėnnea' guca'u,

ne dxezrá'le'u lę'.

<sup>39</sup> Nuzú' chalá'ala xel-la' wezría bėnłenu' David,

węn zrin chiu',

ne nucá'ana dítaju' xel-la' dxenná bea cheę'.

<sup>40</sup> Nuxrínnaju' ze'e da naxechaj na xęzre zréntau' cheę',

ne nuzría xi'u ca naca lataj wal-la cheę' cheę' wedil-la.

<sup>41</sup> Xúgute bėnneache, benne' dxeledaze ga na' dxelebane' cheę' da zaj dę cheę',

na' benne' xęzre walızr cheę' dxelún lę' cheę'.

<sup>42</sup> Ba bęnu' bedxúaj chawe' benne' guledábage' lę',

na' dxelebéle'ęę'.

<sup>43</sup> Ben dítaju' da ca' dxuchínene' lu wedil-la, ne quebe gúcalenu' lę' lu wedil-la na'.

<sup>44</sup> Ba gudú' ca naca da xrtante cheę',

ne nucá'ana dítaju' xel-la' dxenná bea cheę'.

<sup>45</sup> Benu' naque' ca tu benne' gula gate ne zue' iza cuide' cheę',

ne bsi'u lę' xel-la' stu'.

<sup>46</sup> Xrana' Dios, ¿bátaqueze quebe xennu' cheętu'?

¿Tu chí'izqueze dxezrá'aquezu' netu'?

<sup>47</sup> Bsa lazre' látega sua' lu xęzr la xu.

Látega nunu' xel-la' nabán cheę' xúgute bėnneache.

<sup>48</sup> Quebe zua nu benne' gaca banę' tu chí'izqueze.

Xúgute' xelatię'.

Quebe zua nu benne' lę' lu na' xel-la' gute.

<sup>49</sup> Xran, ¿ba bsanu' David, ne québedxa nazrí'inu' lę',

ca bzetaj cuinu' guchebe lazru' zrí'iquezenu' lę'?

<sup>50</sup> Gunná' xque, Xran, ca dxelún lę' chia' neda',

węn zrin chiu',

ne ca dxuchaga lawa' da dxelún lala benne' xúgute xęzr la xu

chia' neda'.

<sup>51</sup> Benne' ca' dxeledábage' lue' dxu-lucá'ana dítaje'

bėnnea' guca'u Lue', Xran.

Dxulucá'ana dítaje' lę' gáteteze zéaje'.

<sup>52</sup> Ba neza zrentę gaca Xránadxu Dios chadía chacanna.

Ca' naca na, ne ca' gaca na.

## 90

<sup>1</sup> Xránantu' Dios, ba cua ba cua, Lue' nacu' ca tu xu'u naga zra cháwentu'.

<sup>2</sup> Nédxudautę ca za gunu' xi'a zri'a ca',

ne ca za sua xęzr la xu, ne bėnneache,

na' nédxudautę, ne lu da za za' nácaquezu' Lue' Dios.

<sup>3</sup> Dxu'u bėnneache xelexaque' da gulaque', dxelexaque' xu xrte.

<sup>4</sup> Chiu' Lue' chi gaxúa iza zaj naca na ca neaje, da ba gudé na,

ne ca tu chí'idau'ze chizrela.

<sup>5</sup> Dxegú' bėnneache ca dxun guba'u,

da dxua na xúgute xizre laga ca'.

Zaj naque' ca tu bchigala da dxexenite na gate dxexebandxu.

<sup>6</sup> Zaj naque' ca tu xixre' da dxegula na che zílala.

Dxegula na, ne dxelá'te na xiaj, na' xelate' zua gubizra dxelechugue' na, na' dxebizre na.

<sup>7</sup> Dxebía xi'ntu' lawe' da dxezra' u netu'. Stébele'e zúantu' lawe' da dxezrá'le'u netu'.

<sup>8</sup> Dxenna'u ca da calela da nuntu'. Dzulé'enu' lálwela zria da nabáantu'.

<sup>9</sup> Dxuzáchiu' iza cheentu' lawe' da dxezra' u netu'.

Dxelexedú iza cheentu' ca tu be' da dxecá'antu'.

<sup>10</sup> Ca zaj naca zra naca bantu', zaj naca na ga xun chi iza, na' che nácantu' benne' wal-la, waca bantu' du tápalalaj iza,

san ca zaj naca iza ca', dxedentu' xel-la' zi', ne dxéquentu' zede.

Chadí dxeledé iza ca', na' xenítentu'.

<sup>11</sup> ¿Nuzra núnbea xanne' ca naca xel-la' dxezrá'a chiu'?

¿Nuzra núnbea ca naca xel-la' xichaj zra'a chiu'?

<sup>12</sup> Ble'e netu' ca láteze zaj naca zra cheentu' chee gácantu' benne' dxeléajni'ine'.

<sup>13</sup> Xran, bexaca netu' tuze.

¿Bátadxa chenu'?

Bexache lazre' netu', wen zrin chiu'.

<sup>14</sup> Tu tu zila bzua xichaj lárdauntu' xel-la' zri'i lazre' chiu',

na' duté xel-la' dxebe tu gul-lazquezentu' chiu'

xúgute zra naca bantu'.

<sup>15</sup> Benna netu' zane' iza chee bentu' ca zaj naca iza

bsaca zi'u netu',

ne ca zaj naca iza guzúantu' lu da stébe.

<sup>16</sup> Be lataj netu', wen zrin chiu', le'entu' da zrenté da dxunu',

ne xelelé'e zri'ine zre suantu' da xabáa chiu'.

<sup>17</sup> Xránantu' Dios, ben gaca cheentu' da chawe' chiu'.

Ben chepe ban ca naca zrin dxuntu'.

Awe', Xran, ben chepe ban ca naca zrin dxuntu'.

## 91

<sup>1</sup> Bénnea' dxuxrén lazre' Xránadxu Dios chee guxúe' le',

ne dxuzúe' Dios, Bénnea' nape' duté xel-la' waca,

chee gácalene' le',

<sup>2</sup> waca xe'e Dios: Nacu' Bénnea' dxebeza lazra',

ne Bénnea' dxucache chawe' neda'.

Nacu' Dios chia', na' dxuxrén lazra' Lue'.

<sup>3</sup> Dios gucache chawe' lue' lu xúgute da stébe da quebe zaj nalá',

ne lu xúgute xízrawe' da dxelute na bénneache.

<sup>4</sup> Gucache chawe' lue' ca dxun tu bedxuj dxézreba' biadu cheeba' zran xrílaba', na' chu'u chawu' lu na' Le'.

Xel-la' li lazre' chee' gácale na lue', ne gucache chawe na lue'.

<sup>5</sup> Quebe bi guchebe lue' chizrela, ne quebe bi da stébe te zra,

<sup>6</sup> ne quebe bi xízrawe' chee da chul-la,

ne quebe bi da calela ca' da dxelute na bénneache te zra.

<sup>7</sup> Welate chi gaxúa bénneache cuitu' lue',

ne gaxúa gaxúa bénneache gáguze naga zu', san quebe bi sacu' lue'.

<sup>8</sup> Wanna'u, na' walé'enu'

ca ba xa' xeledé benne' ca' dxelune' da calela.

<sup>9</sup> Nuzú' Xránadxu Dios ca Benne' dxebeza lazru', ne Dios,

Bénnea' nape' duté xel-la' waca, chee gucache chawe' lue'.

<sup>10</sup> Chee le' na' quebe bi da calela gaca na chiu',

ne quebe bi xízrawe' chu'u na lizru'.

<sup>11</sup> Dios gusebague' gubáz chee xabáa chee' ca' chee xelácalene' lue',

na' xuluxúe' lue' gáteteze chéaju'.

<sup>12</sup> Xeluxre' lue' lu ne'e chee quebe ga'a xiaj ni'u.

<sup>13</sup> Guléajquezu' bezre xixre' ca', ne belá' ca', bezre xixre' schanni' ca', ne be snia ca'.

<sup>14</sup> Dxenná Dios: "Guselá' xúgute benne' ca' zaj

nazri'ine' neda',

ne gucache chawa' benne' ca' dxelexechebe' naca' Xrane'.

<sup>15</sup> Gate xelenné' neda', na' xecheba' chee'.

Gate zaj xu'e lu da stébe, súalequeza' le'.

Guselá' le', ne guna' le' ba lá'ana.

<sup>16</sup> Guna' xelaca bané' zánete iza, ne guselá' le'."

## 92

<sup>1</sup> Chawe' naca dxue lánanantu' Lue', Xrana' Dios,

ne gúl-lantu' da dxucá'ana szren na Lue',  
Dios szrente.

<sup>2</sup> Chawe' naca dxuzéntu' bénneache tu  
zra tu zra  
ca dxexache lazru' netu',  
na' dxela dxulé'entu' nacu' li lazre'.

<sup>3</sup> Dxúl-lantu' da caní, dxínnentu' da dxúl-  
lalentu'  
da ze chi du cheę na,

ne dxínnentu' da con zríadi'i na du da  
dxennéle'e xrtandau'.

<sup>4</sup> Xrana' Dios, ne cheę da dxunu' Lue', dx-  
unu' dxebéle'eda'.

Ca zaj naca da nun na'u zua' lu da ba neza.

<sup>5</sup> Da zrente zaj naca da nunu', Xrana' Dios.

Da zrénlé'e zaj naca da dxugú'u lazru'  
gunu'.

<sup>6</sup> Québequeze neze benne' lázxdau zide',  
ne quebe dxéajni'i benne' xala ca naca da  
nigá.

<sup>7</sup> Gate dxelegula benne' dxelebéaj xíchaje'  
Dios  
ca dxegula xixre',

ne dxépe ban da dxelún benne' wen da  
zrinnaj,

naca na cheę xelebía xi'e tu chí'izqueze.

<sup>8</sup> Lue', Xrana' Dios, tu nácazquezu' Dios  
szrente.

<sup>9</sup> Dxunna bea na ca gaca cheę benne'  
dxedábague' Lue',  
Xrana' Dios.

Dxunna bea na xelebía xi' benne' ca' dx-  
eledábague' Lue'.

Xelase dinnaj xúgutę benne' ca' dxelune'  
da zrinnaj.

<sup>10</sup> Lue' dxunu' dxezrendxa xel-la' wal-la  
chia' ca naca  
xel-la' wal-la cheę bezre.

Dxugú'u da za xíchaja' da dxutipa na lazra'.

<sup>11</sup> Dخال-la' le'eda' xelezrá' zran ni'a benne'  
dxeledábague' neda',

na' xenda' xelebezre xache' benne' ca'  
guledíl-lalengé' neda',

benne' ca' dxelune' da calela.

<sup>12</sup> Welexán benne' xrlátaje' ca' dxun xaga  
zina'.

Xelegule' ca dxun xaga cedro lu xi'a Líbano.

<sup>13</sup> Zaj naque' ca tu xaga zę na lu xudau' cheę  
Xránadxu Dios,

da dxegúlale'e na lu chale'aj cheę xu'u lizre  
Dios cheędxu.

<sup>14</sup> Zaj naque' ca xaga ca' dxelebía da xixre  
cheę na gate

ba zaj nagula na, ne zaj naca na xaga xa'a  
wal-la.

<sup>15</sup> Benne' caní xuluzenne' bénneache naca li  
lazre'

Xrana' Dios, Bénnea' dxuzé chíchue' neda',  
ne quebe bi zúale Le' da quebe naca xrlá-  
taje.

## 93

<sup>1</sup> Xránadxu Dios naque' Wenná Bea,  
ne nacue' zra lanę' da zácale'e.

Nácue' zra lanę', ne da nagú'u le'ę naca na  
xel-la' waca zren.

Nuzúa chíchue' xezr la xu nigá, na' quebe  
nu seque' gutá na.

<sup>2</sup> Lataj naga dxe'u dxenná be'u, Xran,

zua chuchu na nédxudaute,  
na' Lue' zúaquezu' chadía chacanna.

<sup>3</sup> Dxelebezre xa'a xęgu ca', Xran.

Dxelebezre xa'a na, ne dxelenné na zizraj.

<sup>4</sup> Xránadxu, Bénnea' zue' xabáa nápadxe'  
xel-la' waca

ca da zaj napa xęgu ca' dxelebezre xa'a na,  
ne ca da zaj napa xęajxruza cheę nísadau'.

<sup>5</sup> Chíchule'ę zaj naca da nadxixru be'u,  
Xran.

Lá'azxa nácaqueze xudau' chiu' chadía  
chacánnaqueze.

## 94

<sup>1</sup> Xrana' Dios, dxebéaj lazru' bénneache.

Lue', Bénnea' dxebéaj lazre' bénneache,  
ble'e cuinu'.

<sup>2</sup> Dxuchi'u Lue' cheę da dxelún xúgutę bén-  
neache.

Guxasa, bexizruj da dxal-la' xelezi' benne'  
dxulucá'ana szren cuine'.

<sup>3</sup> Xrana' Dios, ¿Bátadxaqueze xelún benne'  
wen da calela caní?

¿Bátadxaqueze xelebé benne' ca' dxelebéaj  
xíchaje' Dios?

<sup>4</sup> ¿Bátadxaqueze xulucá'ana szren cuine', ne  
xelenné' dizra' zi'?

¿Bátadxaqueze xulucá'ana szren cuina  
benne' ca'  
dxelebéaj xíchaje' Dios?

<sup>5</sup> Benne' caní dxuluxrínnaje' bénneache  
chiu' Lue', Xran,

ne dxulusaca zi'ę bénneache guca'u Lue'.

<sup>6</sup> Dxelútie' nu'ula tuze ca', ne benne' zitu'  
ca',

ne dxelune' xelátebe' bidau' wezebe ca'.

<sup>7</sup> Dxelenné': "Quebe bi dxelé'e Dios, Xrana  
benne' ca'.

Dios cheę benne' Israel ca' quebe dxue  
lazre' cheę da na'."

<sup>8</sup> Le chéajni'i, le'e, benne' lázxdau zide'.  
Le'e, benne' xala, ¿bátadxaqueze quebe  
chéajni'ile?

<sup>9</sup> Dios bene' nágadxu.  
¿Québequeze dxénne' da dxennale?  
Dios bene' xiaj laudxu.

¿Québequeze dxelé'ene' da dxunle?  
<sup>10</sup> Díósqueze dxuzúe' lu da ba xa' benne' xęzr  
la xu ca'.

¿Québequeze til-le' le'e?  
Díósqueze dxunę' dxelėjajni'i bėnneache.  
¿Québequeze gueque be'ene' da xu'u xichaj  
lázdaule?

<sup>11</sup> Xránadxu Dios nézquezne' da xu'u xichaj  
lázxdau  
xúgute bėnneache.  
Nézene' zaj naca na da dácheze.

<sup>12</sup> Ba neza zrentę naca na cheę bėnnea' dx-  
uzėjajni'inu', Xran,  
ne dxusėdenu' le' ca naca da nadxixruj  
be'u,

<sup>13</sup> cheę cueza zri lazre' gate za zra dxaca da  
calela,  
ca zrin zra xelxú'u xędxu ba benne' dx-  
elunę' da zrinnaj.

<sup>14</sup> Québequeze cueaj xichaj Xránadxu Dios  
bėnneache cheę',  
ne quebe gusán lazre' benne' ca' ba gucá'a  
Le'.

<sup>15</sup> Naca xrlátaje ca xuluchi'e cheę bėn-  
neache,  
na' xelúnqueze da xrlátaje xúgute benne'  
zaj naque' li lazre'.

<sup>16</sup> ¿Núzraqueze gácale neda' tıl-lalędxu  
benne'  
wen da calela ca'?

¿Núzraqueze súale neda' tıl-lalędxu benne'  
dxelunę' da zrinnaj?

<sup>17</sup> Chela ca gúcale Xránadxu neda', bachelja  
xu'a xędxu ba.

<sup>18</sup> Gate gunnía': Xran, ba zua cheajházia',  
na' Lue', dutę xel-la' zri'i lazre' chiu' gú-  
calęnu' neda'.

<sup>19</sup> Gate dxe'a gunne xue, ne zua' lu da stebe,  
Lué'queze dxexúe zrenu' neda', na' dxe-  
béle'ęda'.

<sup>20</sup> Québequeze nacu' tuze benne' ca' dxu-  
luchi'e cheę  
bėnneache da quebe naca xrlátaje,  
benne' ca' dxulucá'ane' ca xrlátaje da  
quebe naca na xrlátaje.

<sup>21</sup> Benne' canı dxelunę' tuze dizra' da  
xelunę' cheę  
benne' xrlátaje,

na' dxelechugue' cheę gate bėnnea' quebe  
bi zria nabague'.

<sup>22</sup> Xránadxu Dios naque' ca tu xu'u naga zua  
chawa'.

Dios chia' naque' ca tu xiaj xre da dxuzę  
chacha na neda'.

<sup>23</sup> Le' xexízruje' benne' ca' dxelunę' da  
calela cáteze naca  
da zrinnaj da belunę'.

Guzría xi'e benne' ca' lu da calela da dx-  
elunę'.

Xránadxu Dios guzría xi'e benne' ca' dx-  
elunę' da calela.

## 95

<sup>1</sup> Le da, güe lá'anadxu Xránadxu Dios dute  
xel-la' dxebé.

Dute xel-la' dxebé gúl-ladxu cheę Bėnnea'  
nuzúa chúčhue'  
dxi'u naga ladxu.

<sup>2</sup> Cheajdxu lau Le', ne xędxu Le': Xcalenu'.  
Dute xel-la' dxebé gúl-ladxu da güe  
lá'anadxu Le'.

<sup>3</sup> Naca Xránadxu tu Dios szrentę,  
ne naque' Wenná Bea szrentę lawe' dios ca'  
cheę bėnneache.

<sup>4</sup> Dxenná bé'ene' du gabí'i xęzr la xu,  
naga naca situj, ne naga naca sibe cheę xi'a  
ca'.

<sup>5</sup> Dxenná bé'ene' nısadau' da núnqueze Le',  
ne cá'anqueze xęzr la xu da bene'.

<sup>6</sup> Le da, gucá'ana szrendxu Le', gátadxu  
sudxú'ala.

Guzú zrıbedxu lau Xránadxu, Bėnnea'  
nunę' dxi'u.

<sup>7</sup> Le' naque' Dios cheędxu.  
Nácadxu benne' ca' dxuxúequeze', ne ná-  
cadxu ca zríla'du ca'  
cheéqueze'.

<sup>8</sup> Che dxenle chi'e na'a zra, quebe gun zide'  
lázdaule

ca belún xra xrtáule ca' naga nazı le na  
Meriba,

ne ca belunę' lu zra na' le'e xixre' lawe' lataj  
naga

nazı le na Masah,

<sup>9</sup> naga buluchá'a xra xrtáule neda', ne  
belunę' neda' da stebe  
lácala belelé'ene' xúgute da bena'.

<sup>10</sup> Lawe' chua iza beditaj lazra' cheę benne'  
ca',

na' gunnía': Zaj naque' benne' dxelebėaj  
xıchaje' neda',

ne quebe dxelunę' ca da dxulé'ęda' le'.

<sup>11</sup> Chee le na', dutę xel-la' dxezrá'a chia' bzetaj cuina' gunnía':  
Quebe xelexú'uqueze' naga xelexezi' lazre'  
nen neda'.

## 96

<sup>1</sup>Le gul-la chee Xránadxu tu da cube.  
Le gul-la chee Xránadxu, le'e zrale du gabí'i  
xezr la xu.  
<sup>2</sup>Le gul-la chee Xránadxu, ne le güe lá'ana  
La lá'azxa chie'.  
Tu zra tu zra le guzén ca naca xel-la' weselá  
da dxunne'.  
<sup>3</sup>Le guzén benne' xezr la xu ca' ca naca xel-  
la' szren chee',  
Ne benne' xúgute xezre ca zaj naca xel-la'  
waca zren nune'.  
<sup>4</sup>Szrente naca Xránadxu, ne naca chee' güe  
lá'analé'edxu Le'.  
Naca chee' gápadxé' xel-la' ba lá'ana ca dios  
ca  
chee' bėnneache,  
<sup>5</sup>lawe' da zaj naca xúgute dios ca' bedáu'  
xijaj xaga ca'.  
Xránadxu Dios bene' xabáa na'.  
<sup>6</sup>Zúale Le' da xabáa, ne xel-la' szren.  
Nazrate xudau' chee' xel-la' waca, ne da  
xrtante.  
<sup>7</sup>Le güe lá'ana Xránadxu, le'e zrale du gabí'i  
xezr la xu.  
Le güe lá'ana xel-la' szren chee', ne xel-la'  
waca chee'.  
<sup>8</sup>Le gapa ba lá'ana Xránadxu ca da naca  
chee' si'e.  
Le gua da gunézrujle, ne le da chale'aj chee  
xudau' chee'.  
<sup>9</sup>Le gucá'ana szren Xránadxu lu xel-la' xr-  
tante chee'  
da naca lá'azxa chee'.  
Le zrebe lau Le', le'e zrale du gabí'i xezr la  
xu.  
<sup>10</sup>Le xe bėnneache xezr la xu: Naca Xrá-  
nadxu Wenná Bea.  
Nuzúa chúčhue' xezr la xu nigá, na' quebe  
nu seque' gutá na.  
Guchi'e chee' bėnneache ca naca da xrlátaje.  
<sup>11</sup>Le be, le'e, xabáa, ne xezr la xu.  
Le cuezre xa'a, le'e, nísadau', ne bea ca'  
zrale na'.  
<sup>12</sup>Le be, le'e, le'e xixre', ne bea ca' zrale na'.  
Xaga ca' zaj dxe' xi'a ca' welunna schaga lu  
xel-la' dxebé  
<sup>13</sup>lau Xránadxu gate xide'.  
Xide' guchi'e chee' bėnneache zaj zre'e xezr  
la xu.  
Nna bé'ene' bėnneache du gabí'i xezr la xu.

Nna be'e Le' ca naca da xrlátaje, ne ca naca  
da li.

## 97

<sup>1</sup>Naca Xránadxu Benne' Wenná Bea.  
Le be, le'e zrale xezr la xu.  
Le be, le'e zrale dxu'a nísadu ca'.  
<sup>2</sup>Zaj naxechaj beuj, ne da chul-la Le'.  
Ca naca da li, ne da xrlátaje dxenná be'e.  
<sup>3</sup>Cuíá lau xi' lau Le',  
ne guzezxe na benne' guledábague' Le'.  
<sup>4</sup>Ca naca xesa ca' chee' bulusení na xezr la  
xu.  
Dxel'e xezr la xu na, ne dxezrixe na.  
<sup>5</sup>Dxelexuna xi'a ca' ca da zixre chee' bézu-  
dau' lau Xránadxu,  
lau Xrana bėnneache zaj zre'e du gabí'i xezr  
la xu.  
<sup>6</sup>Dxulé'e xabáa ca naca da xrlátaje chee',  
na' dxelelé'e bėnneache dutę xezr la xu ca  
naca  
xel-la' szren chee'.  
<sup>7</sup>Dxal-la' xelexedu'e'e xúgute benne' ca' dx-  
ulucá'ana szrene'  
bedáu' xijaj xaga ca',  
benne' ca' dxulucá'ana szren cuine' ca zaj  
naca bedáu' xijaj xaga ca'.  
Xúgute dios chee' bėnneache ca' dxal-la'  
xuluzú zribe na  
lau Xránadxu Dios.  
<sup>8</sup>Belén benne' zaj zre'e Sión, na' gulebene'.  
Gulebé benne' zaj zre'e Judá, ne chee' da  
guchi'u Lue', Xran.  
<sup>9</sup>Szrente nacu' Lue', Xran, lawe' dutę xezr  
la xu.  
Szrendxa nacu' Lue' ca xúgute dios chee'  
bėnneache.  
<sup>10</sup>Le'e, núlale nazrí'ile Xránadxu, le cuide da  
calela.  
Le' dxuxúe' bėnne' du zaj xu'e bėnneache  
chee'.  
Dxuselé' le' lu na' benne' dxelebėaj xíchajé'  
Dios.  
<sup>11</sup>Zuale da dxusení na benne' xrlátaje ca',  
na' xel-la' dxebé zúale na benne' li lazre'  
ca'.  
<sup>12</sup>Le be, le'e, benne' xrlátaje, lau Xránadxu.  
Le gusá lázrele ca da nun Dios lá'azxa, ne le  
güe lá'ana Le'.

## 98

<sup>1</sup>Le gul-la chee Xránadxu tu da cube lawe'  
da nune' da ca'  
da dxebánedxu.  
Ne chee' xel-la' wal-la chee', ne xel-la' waca  
lá'azxa chee'

ba bđinne'.

<sup>2</sup> Ba nuzén Xránadxu ca dxune' dxuselé' bėnneache.

Ba bzenne' bėnneache xęzr la xu ca' ca naca da xrlátaje chee'.

<sup>3</sup> Ba nune' ca da guchebe lazre' chee benne' Israel ca'

ca naca xel-la' li lazre' chee', ne xel-la' nazr'i zren chee'.

Bėnneache du gab'i xęzr la xu ba belelé'ene' ca naca da ben Dios cheędxu.

<sup>4</sup> Le gul-la lu xel-la' dxebe lau Xránadxu, le'e zrale du gab'i xęzr la xu.

Le güe lá'ana Le' nen da gúl-lale, ne lu xel-la' dxebe chee le cuezre xa'a.

<sup>5</sup> Le gul-la da güe lá'anale Xránadxu.

Le gul-la nen da con zríadi'i na du ca' da quínnele.

<sup>6</sup> Le gucuezre luzu da ca' dxulucuezre', ne da dxutíl-lale ca',

ne le cuezre xa'a lu xel-la' dxebe lau Xránadxu, Wenná Bea cheędxu.

<sup>7</sup> Le gun schaga nísadau', ne bea ca' zrale na'.

Le gul-la, le'e, xęzr la xu, ne le'e zrale na'.

<sup>8</sup> Le capa na'le, le'e xęgu ca'.

Le gul-la lu xel-la' dxebe, le'e, xi'a ca', lau Xránadxu

<sup>9</sup> lawe' da xide' xedajnná bé'ene' xęzr la xu nigá.

Nna bé'ene' benne' zaj zre'e du gab'i xęzr la xu lu da xrlátaje,

ne bėnneache dutę xęzr la xu lu da naca li lazre'.

## 99

<sup>1</sup> Naca Xránadxu Dios Benne' Wenná Bea, na' dxelezrize xúgute bėnneache lau Le'.

Dxe'e lataj blau chee' da zua na lávela querubín ca',

na' dxezrú' lu xęzr la xu.

<sup>2</sup> Szrente' naca Xránadxu lu xi'a Sión.

Naque' szren lawe' xúgute cue' xęzr la xu ca'.

<sup>3</sup> Le güe lá'ana La Xránadxu da naca na szren,

ne da dxal-la' zrébedxu.

¡Lá'azxa naca Le'!

<sup>4</sup> Lue', Wenná Bea szrente', nazr'ínu' da naca xrlátaje.

Nuzú' chachu' da naca li lazre'.

Ba nunu' da naca xrlátaje, ne da naca li lazre'

ládujla zri'ine zre sua Jacob.

<sup>5</sup> Le gucá'ana szren Xránadxu Dios.

Le guzú zríbele lau Le' naga dxe'e.

¡Lá'azxa naca Le'!

<sup>6</sup> Moisés, ne Aarón gulaque' bxruze chee' ca'.

Samuel guque' tu benne' bchálajlene' Le'.

Gulenné' Xránadxu Dios, na' Le' bechebe'.

<sup>7</sup> Tu lu beuj bza bchálajlene' benne' ca'.

Buluzúe' dizra' da gunná bé'ene',

ne da ca' bdxixruj be'ene' le'.

<sup>8</sup> Xránantu' Dios, bechebu' lau benne' ca'.

Blé'enu' le' nacu' Dios, dxunite lau' chee bėnneache,

lácala dxudéu' le' xel-la' zi' ne chee dul-la da zaj nabague'.

<sup>9</sup> Le gucá'ana szren Xránadxu Dios.

Le guzú zríbele lau Le' lu xi'a lá'azxa chee', lawe' da lá'azxa naca Xránadxu Dios.

## 100

<sup>1</sup> Le gul-la lau Xránadxu Dios, le'e zrale du gab'i xęzr la xu!

<sup>2</sup> Le gucá'ana szren Le' dutę xel-la' dxebe!

¡Le da lau Le', dxúl-lale dutę xel-la' dxebe!

<sup>3</sup> Cabata' gal-la lázrele naca Xránadxu Díosqueze.

Le' bene' dxi'u, na' nácadxu chee Le'.

Nácadxu xęzre chee', ne zríla' du chee'.

<sup>4</sup> Le chu'u lataj naga zua xudau' chee', xe le' Le': Xcalenu',

ne chale'aj chee na, güe lá'anale Le'.

Le xe Le': Xcalenu', ne le güe lá'ana Le'.

<sup>5</sup> Chawe' naca Xránadxu, na' chadía chacanna zua

xel-la' zri'i lazre' chee'.

Xel-la' li lazre' chee' tu súazqueze na chadía chacanna.

## 101

<sup>1</sup> Tu gúl-lazqueza' ca naca xel-la' zri'i lazre', ne xel-la' li lazre' chiu'.

Tu gúl-lazqueza' chiu' Lue', Xrana' Dios.

<sup>2</sup> Dxaca lazra' guna' da naca li lazre'.

¡Bátala xidu' gácalenu' neda'?

Guna' da naca du lazre', ne cá'anqueze guna' caní

lu xu'u lizra'.

<sup>3</sup> Québequeze cu'u lazra' guna' tu da zrinna. Dxecuídeda' da dxelún benne' ca' dxelebéaj xíchaje' Dios.



Québequeze gu'a lataj xelegue' naga zua'  
neda'.

<sup>4</sup>Gucuasa' lu xichaj lázrdawa' da calela,  
ne quebe cu'u lazra' chee da calela.

<sup>5</sup>Guzía' chalá'ala benne' dxelenne'  
bagácheze  
chee benne' xula.

Quebe gu'a lataj súale neda' tu benne' dx-  
ucá'ana szren cuine',  
u naque' benne' wenná be'e.

<sup>6</sup>Le'eda' chawe' benne' ca' zaj naque' li  
lazre' lau Dios,  
chee xelezre'e lawa' neda'.

Tuze benne' ca' zaj naque' du lazre' xelune'  
zrin chia'.

<sup>7</sup>Quebe gu'a lataj benne' wecache lan chu'e  
lizra'.

Quebe gu'a lataj tu benne' wen lazre'  
xegá'ane' naga zua'.

<sup>8</sup>Tu zra tu zra guzría xi'a benne' ca' dx-  
elune' da calela,

benne' ca' zaj zre'e lu xezr la xu chia'.

Gucuasa' xúgute benne' ca' dxelune' da  
zrinnaj lu xezre chee  
Xránadxu Dios.

## 102

<sup>1</sup>Xrana' Dios, bene da dxenaba' lau',  
ne bze naga da dxuláwizra' Lue'.

<sup>2</sup>Quebe gucache lau' lawa' neda', lawe' da lu  
da stebe zua'.

Bze naga neda', ne bechébeche chia' gate  
dxuláwizra' Lue'.

<sup>3</sup>Naca xel-la' nabán chia' ca zren chee xi' da  
dxexenítete.

Xu'u da la lu zrita chia' ca tu xi' da dxálate'e  
na.

<sup>4</sup>Dxedú lazra', ne naca lázrdawa' ca tu xixre'  
da dxecuade,

na' québedxa dxenná na gudagu xeta.

<sup>5</sup>Lawe' da dxebezre wé'le'a ba nazrítale'a.

<sup>6</sup>Naca' ca tu situgún dxedaba' tu lu xezr la  
xu bizre,

ne ca tu bzriu zríaba' lawe' tu xu'u ze la'a.

<sup>7</sup>Dxíchaja' bchigala, ne naca' ca tu bxinne'  
zríaba' túzeba'  
xrgu'u sibe.

<sup>8</sup>Tu zra tu zra tu dxuluchácalezqueze  
benne'  
dxeledábage' neda'.

Benne' ca' dxelecuídené' neda' dxu-  
luchínene' la' neda'

gate nu benne' dxelegú'e de'.

<sup>9</sup>Lu waláz chee xeta dxawa' de,  
na' nisa dxebezra' dxechixre na da dxé'aja'.

<sup>10</sup>Caní dxaca chia' lawe' da dxezra'u neda',

ne dxecuídenu' neda'.

Guca'u neda', na' gudxú'unu' neda'.

<sup>11</sup>Naca xel-la' nabán chia' ca tu zrul-la da  
dxedeze,

na' naca' ca tu xixre' da ba nabizre.

<sup>12</sup>Lue', Xrana' Dios, tu chí'izqueze zu',  
na' cheajlesá lazre' xúgute cuen bénneache  
Lau'.

<sup>13</sup>Chasu', ne xexache lazru' benne' zaj zre'e  
xezre Sión,

lawe' da ba bzrin zra xexache lazru' benne'  
ca'.

<sup>14</sup>Netu', wen zrin chiu', nazrí'intu' xiaj ca'  
chee xezre na'.

Dxéquentu' zi' lawe' da ba nabía xi na.

<sup>15</sup>Nadxa benne' xezr la xu ca' xelezrebe' lau'  
Lue', Xran.

Xelezrebe' xúgute benne' wenná bea chee  
xezr la xu nigá

da xabáa chiu',

<sup>16</sup>gate ba bechisu' xezre Sión, Xran,  
ne xelexé'eqezne' ca naca da xabáa chee  
na,

<sup>17</sup>gate na' guzé nagu' da dxelenaba benne'  
ca' guleaj xíchaju',

ne québedxa guzú' chalá'ala da dxelata'  
xuene' Lue'.

<sup>18</sup>Xuaj da nigá chee xululaba benne' ca' za  
zá'aca,

na' benne' ca' za xelalaj xelúe lá'ane' Xrá-  
nadxu Dios.

<sup>19</sup>Naga zua Xránadxu xabáa gunné'e.

Naga zu'e' xabáa blé'ene' lu xezr la xu nigá.

<sup>20</sup>Dxelé'ene' benne' dxelebezre xache',  
benne' zaj xu'e

lizre xia,

na' gusané' benne' ca' ba zaj nachugue'  
chee' xelatíe'.

<sup>21</sup>Xuluzenne' benne' zaj zre'e xezre Sión ca  
szren naca

La Xránadxu Dios,

chee xelúe lá'ane' Le' lu xezre Jerusalén,  
<sup>22</sup>gate xelezraga bénneache chee xúgute  
xezre, ne xúgute cue'

xezr la xu

chee xulucá'ana szrene' Xránadxu Dios.

<sup>23</sup>Xránadxu Dios bene' gute ni'a na'a gate ne  
naca' cuide'.

Xeláteze ca betíe' neda'.

<sup>24</sup>Nadxa gunnía': Dios chia', quebe gutiu'  
neda',  
gate quebe ne guéxrua'.

Lue' tu chí'izqueze zu'.

<sup>25</sup>Nédxudaute' Lue' bzu' xezr la xu nigá, na'  
nen na'u  
benu' xabáa.

<sup>26</sup> Xelebía xi' da ca', san tu zúazquezu' Lue'.  
Welexru xúgute da ca' ca tu ladxe'.  
Ca dxuchadxu zra lánadxu tuzruj, ca'  
gucha'u da ca',  
na' xucúbeu' na.  
<sup>27</sup> Túzqueze ca nacu' Lue',  
ne québequeze te chiu' Lue'.  
<sup>28</sup> Zrí'inentu' netu', wen zrin chiu',  
xelezrabe' chawe',  
na' guzé chúchuquezu' zri'ine zre súantu'  
lau Lue'.

## 103

<sup>1</sup> Be lá'ana Xránadxu Dios, lue', bénne'du  
xu'a.  
Be lá'ana Le' lá'azxa, duté da naca'.  
<sup>2</sup> Be lá'ana Xránadxu, lue', bénne'du xu'a,  
ne quebe gal-la lazru' ca da chawe' da nune'  
chiu'.  
<sup>3</sup> Dxunite lawé' cheé xúgute dul-la nabaga'a.  
Dxexuné' neda' ca naca xúgute xízrawé' da  
xu'a.  
<sup>4</sup> Dxuxúé' neda' cheé quebe gatia'.  
Lu xel-la' zri'i lazre' cheé', ne xel-la' dxex-  
ache lazre' cheé'  
dxuné' chawe' chia'.  
<sup>5</sup> Dxuzánle' da chawe' da dxaca chia' chee  
xegá'ana'  
benne' cuide',  
ne benne' wal-la ca dxaca cheé tu bsia.  
<sup>6</sup> Xránadxu Dios dxuchi'e cheé da dxaca  
cheé benne'  
dxeledéé' da ba xa',  
ne dxucá'ana chawe' da dxaca cheé'.  
<sup>7</sup> Blé'ene' Moisés da ca' gulú'u lazre' guné',  
ne be'e lataj benne' Israel ca' belelé'ene' da  
ca' bene'.  
<sup>8</sup> Naca Xránadxu Benne' dxexache lazre', ne  
Benne' zri'i lazre'.  
Quebe dxezrá'azie', san zrenté naca xel-la'  
zri'i lazre' cheé'.  
<sup>9</sup> Quebe nníaqueze', ne quebe zrá'aqueze'.  
<sup>10</sup> Quebe dxudéé' dxi'u lu da ba xa' ca naca  
zria  
da nabágadxu,  
ne quebe ne guzrí'a xi'e dxi'u ne cheé dul-la  
da nabágadxu.  
<sup>11</sup> Ca sibe naca xabáa lawe' xezr la xu,  
caníqueze naca xel-la' zri'i lazre' zren cheé'  
nen benne' ca'  
dxelape' Le' ba lá'ana.  
<sup>12</sup> Ca zitu' naca naga dxalaj gubizra, ne naga  
dxebía na,  
caníqueze dxucuae' zitu' dul-la da nabá-  
gadxu.

<sup>13</sup> Ca zri'i lazre' naca xra bidu ca' nen  
zri'inequeze',  
caníqueze naca zri'i lazre' Xránadxu nen  
benne' ca'  
dxelape' Le' ba lá'ana.  
<sup>14</sup> Le' nézene' ca nácadxu lu be'a dxen  
cheédxu.  
Dxajsá lazre' nácadxu xu xrte.  
<sup>15</sup> Ca naca xel-la' nabán cheédxu, nácadxu ca  
tu xixre'.  
Dxegúladxu ca tu xiaj xixre',  
<sup>16</sup> na' dxedé be' dxua na le na, na' dxexenite  
na,  
na' québedxa nu dxelé'equeze le na.  
<sup>17</sup> Ca naca cheé benne' ca' dxelape' ba lá'ana  
Xránadxu,  
zúale xel-la' zri'i lazre' cheé' benne' ca'  
chadí'a chacanna,  
na' xel-la' xrlátaje cheé' zúalequeze na  
xúgute zri'ine zre sua  
benne' ca',  
<sup>18</sup> benne' ca' dxelúnqueze' ca naca xel-la'  
wezrí'a nune',  
ne benne' ca' dxeluné' ca zaj naca da nadx-  
ixruj be'e.  
<sup>19</sup> Nuzúa Xránadxu lataj cheé' xabáa naga  
dxe'e dxenná be'e.  
Nácaqueze' Wenná Bea lawe' xúgute da zaj  
zua.  
<sup>20</sup> Le güe lá'ana Xránadxu, le'e, gubáz chee  
xabáa ca',  
Nácale benne' wal-la, ne benne'  
chúchule'e,  
na' dxunle ca dxenná Le', ne dxuzé nágale  
ca dxe'e le'e.  
<sup>21</sup> Le güe lá'ana Xránadxu, le'e, dxenná beale  
xabáa.  
Nácale wen zrin cheé', ne dxunle ca dxaca  
lazre' Le'.  
<sup>22</sup> Le güe lá'ana Xránadxu, xúgutele le'e ba  
nun Dios le'e,  
zrale xúgute lataj naga dxenná bea Le'.  
jBe lá'ana Xránadxu, lue', bénne'du xu'a!

## 104

<sup>1</sup> Be lá'ana Xránadxu Dios, lue', bénne'du  
xu'a.  
jXrana' Dios, szrenté nacu' Lue'!  
Nacu' zra lanu' da xabáa, ne da xrtante.  
<sup>2</sup> Dxugacu cuinu' xel-la' naxani' ca zra lanu'.  
Dxechilju' xabáa ca tu xu'u ladxe' chiu'.  
<sup>3</sup> Nunu' lizru' lawe' nisa da zé ná'ala.  
Dxuchínenu' beuj ca' ca tu da dxudé xua  
naga dxe'u Lue',  
da dxedá na lu be'.

<sup>4</sup>Dxuchínenu' be' ca' ca gubáz chiu' ca',  
 ne xesa ca' ca wən zrin chiu' ca'.  
<sup>5</sup>Bzua chuchu' xezr la xu nigá lu lane na,  
 na' quebe nu gaca gutá lə na.  
<sup>6</sup>Bgacu' xezr la xu nigá nen nísadau' ca  
 dxun tu benne'  
 dxacue' zra lane',  
 na' nisa na' bgacu na xi'a ca'.  
<sup>7</sup>Gate gudil-lu' nisa na', na' bzrunnuj na.  
 Bebiga na gate ben na chi'u zizraj.  
<sup>8</sup>Nisa na' bgacu na xi'a ca' xajxedxé na  
 dxu'a xegu ca',  
 lataj ca' ba nunu' chee nisa na'.  
<sup>9</sup>Bzu' naga ze lau cheajsé na, naga québedxa  
 gaca te na,  
 chee québedxa gacu na xezr la xu bizre na'.  
<sup>10</sup>Dxunu' beaj ca' dxelalaj na dxu'a xégudu  
 ca',  
 ne xegu ca' dxeledé na ládujla xi'a ca'.  
<sup>11</sup>Lu xegu ca' dxelé'aj be xixre' ca' nisa,  
 na' dxegúa na xel-la' dxelebile chee burro  
 xixre' ca'.  
<sup>12</sup>Lu xaga zaj nnita dxu'a xegu ca' zaj zra'  
 béadu ca'  
 zaj zua xrila.  
 Dxelúl-laba' ládujla zruze na ca'.  
<sup>13</sup>Zran xabáa dxesel-lu' xiuj da dxaca na lu  
 xi'a ca',  
 na' dxezrate xezr la xu na' ca naca da  
 xrlátaje da dxunu'.  
<sup>14</sup>Dxusegulu' xixre' da dxelagu be zre ca',  
 ne xixre'du ca' da dxelagu bėnneache,  
 ne da ca' dxuluchine bėnneache dxelune'  
 xel-la' wagu,  
<sup>15</sup>ne uva ca' da dxelune' xrise uva wal-la da  
 dxuzúa na  
 bėnneache ca' xel-la' dxelebé,  
 ne olivo ca' da dxelune' da za da dxelegú'e  
 xíchajé',  
 ne zrua' da dxelune' xeta chee xelaca bané'.  
<sup>16</sup>Xaga cedro ca' da zaj zua na xi'a Lfbano  
 dxelezilé'e na nisa xiuj.  
 Zaj naca na xaga chee Xránadxu Dios, da ca'  
 guza Lə'.  
<sup>17</sup>Lu xaga ca' dxuluzría bxínnedu ca'  
 xrú'uneba',  
 na' lu zruze na ca' zaj zua lizre bxuze' ca'.  
<sup>18</sup>Zaj zua chivo xi'a ca' lu xi'a zri'a ca',  
 na' lu bluaj ca' chee xi'a ca' zaj zua bzrizru'  
 ca'.  
<sup>19</sup>Benu' beu' da dxulé'e na tu beu' tu beu'  
 chee iza,  
 na' gubizra núnbea na gate dxal-la' cuía na.  
<sup>20</sup>Benu' dxela, na' gate bache nachul-la,

na' dxeledxúaj be dxela ca'.  
<sup>21</sup>Dxelebezre xa'a be zre xixre' ca', zaj  
 nauba' be xeláguba'.  
 Dxelíljaba' da nun Dios xeláguba'.  
<sup>22</sup>Gate dxalaj gubizra, na' dxelexezrinba' lu  
 bluaj cheeba',  
 naga dxeláseba' te zra.  
<sup>23</sup>Nadxa dxeledxúaj bėnneache dxelune'  
 zrin,  
 na' dxelúnqueze' zrin ca dxebía gubizra.  
<sup>24</sup>Xran, da zante zaj naca da benu',  
 Dute xel-la' sina chiu' benu' da ca'.  
 Nazrate xezr la xu nigá da ca' benu'.  
<sup>25</sup>Na' zua nísadau', da zri'a, ne da laga,  
 naga zaj xu'u zánete bea ca', béadu ca', ne  
 be zri'a ca'.  
<sup>26</sup>Lu nísadau' na' zaj zra' da dxeledá lawe'  
 nísadau' ca'.  
 Zua be zri'a na' benu' Lue', nazi' laba' levi-  
 atán.  
<sup>27</sup>Xúgute bea ca' dxuluxrén lázreba' Lue',  
 chee gunézruju' da xeláguba' ca zrin chee  
 na.  
<sup>28</sup>Dxunézruju' leba', na' dxelecá'aba' na.  
 Dxunézruju' da dxeláguba', na' dxeléljeba'.  
<sup>29</sup>Gate quebe dxenná'u-ba', na' dx-  
 elezrébeba'.  
 Gate dxucuasú' be' dxelecá'aba', na' dx-  
 eláteba',  
 ne dxelexácaba' xu xrte.  
<sup>30</sup>Gate dxesel-lu' be' chiu', na' xelexaca  
 banba'.  
 Dxunézruju' xel-la' nabán cube chee da ca'  
 zaj zua  
 xezr la xu nigá.  
<sup>31</sup>¡Chadía chacanna gaca ba Xránadxu Dios!  
 Dxezaca ba lazre' Xránadxu chee da ca' ba  
 núnqueze'.  
<sup>32</sup>Dxenné'e xezr la xu nigá, na' dxezrú' na.  
 Dxuté' xi'a ca', na' dxeledxúaj na zren.  
<sup>33</sup>Gúl-laqueza' chee Xránadxu dxácate na'  
 naca bana'.  
 Xúgute zra zúaqueza' neda' gul-la' da güe  
 lá'ana' Dios chia'.  
<sup>34</sup>Chawe' naca chia' da ca' dxulaba lazra' ca  
 naca chee',  
 na' dxebéle'eda' ne chee Xrana' Dios.  
<sup>35</sup>Welebía xi' benne' dul-la ca' zaj zre'e lu  
 xezr la xu nigá,  
 Na' québedxa cha benne' ca' dxelebéaj  
 xíchajé' Dios.  
 ¡Be lá'ana Xránadxu Dios, lue', bėnne'du  
 xu'a!  
 ¡Le güe lá'ana Xránadxu!

## 105

<sup>1</sup>Le güie lá'ana Xránadxu Dios!

¡Le gucá'ana szren La Le'!

¡Le guzén bénneache dutę xęzr la xu ca naca da nune'!

<sup>2</sup>Le gul-la chee'!

¡Le gul-la da güie lá'anale Le'!

¡Le guchalaj cheę da zrente ca' da nune'!

<sup>3</sup>Le be lu da naca chee'!

Xúgute benne' ca' dxelapa ba lá'ana Xránadxu dxal-la' xelebéle'ene'.

<sup>4</sup>Le naba Xránadxu gácalęne' le'e.

Tu zra tu zra le guxrén lazre' Xránadxu Dios.

<sup>5-6</sup>Le'e, zri'ine zre sua Abraham, wen zrin cheę Xránadxu.

Le'e, zri'ine zre sua Jacob, bénnea' guquę'e, Le gusá lazre' xel-la' waca ca', ne da zrente ca' da bene',

ne ca naca da bchi'e cheęe.

<sup>7</sup>Le' naque' Xránadxu, ne Dios cheędxu.

Le' dxenná bé'ene' bénneache zaj zre'e dute xęzr la xu.

<sup>8</sup>Lácala te cheę chi gaxúa cuen bénneache, québequeze gal-la lazre' da guchebe lazre' lu xel-la' wezría cheę',

<sup>9</sup>xel-la' wezría na' bénlene' Abraham, da na' bzetaj cuine' guchebe lazre' cheę Isaac,

<sup>10</sup>na' bzua chúchue' na ca tu da nadxixruj bea na, da gun Jacob,

da gaca na tu xel-la' wezría da zeajlí canna nen

benne' Israel ca',

<sup>11</sup>da bene' gate na' gunné': "Chiu' lue' gunna' xęzr la xu cheę

benne' Canaán ca',

da gaca na tu da xudele lu na' zri'ine zre súale."

<sup>12</sup>Gate na' bábaze zaj naque'

gulezre'e lu xęzr la xu nigá ca benne' zitu' ca',

<sup>13</sup>ne guledé' tu xęzr la xu xetú xęzr la xu, ne tu xęzre xetú xęzre.

<sup>14</sup>Quebe be' Dios lataj nu benne' bi gune' cheę

bénneache cheę',

na' ne cheę benne' ca' gudil-le' benne' wenna' bea ca'.

<sup>15</sup>Guzre' le': "Quebe bi gunle cheę benne' ca' gucá'a,

ne quebe gunle da calela cheę benne' ca' dxuluchalaje'

waláz chia'."

<sup>16</sup>Bene' guta' tu gubina' lu xęzr la xu na', na' gudúe' ca naca xeta xelawe'.

<sup>17</sup>Gusel-le' tu benne' cuía lawe' lau benne' chie' ca',

bénnea' naque' José, bi na' belutię'-be' cheę gácabe'

wen zrin cheę benne' zitu'.

<sup>18</sup>Buluzré'e ní'abe' lu xędxu cheę cuaga da bexrú na ní'abe',

gate na' gulu'e-be' lizre xia lu xęzr la xu Egipto,

<sup>19</sup>ca bzrin zra guca li ca da gunná José dxal-la' gaca.

Caní guca, ble'e xrtizra' Xránadxu cúnna' da li.

<sup>20</sup>Nadxa benne' wenna' bea cheę Egipto gusel-le'

nu gusán José na'.

Bénnea' dxenná bé'ene' zánete cue' xęzr la xu bsane'-be'.

<sup>21</sup>Bzue'-be' gácabe' xrana benne' zaj zre'e lizre',

ne cheę nna be'ebe' ca naca da xu'u lu ne'e,

<sup>22</sup>cheę tıl-labe' benne' szren ca' cheę wenna' bea cáteze

dxaca lázrebe',

ne cheę guzėjni'ibe' benne' gula cheę xęzr la xu Egipto

cheę xelaque' benne' sina.

<sup>23</sup>Gudé na' gulu'e benne' Israel ca' lu xęzr la xu Egipto,

na' guzúa Jacob lu xęzr la xu cheę zri'ine zre sua Cam.

<sup>24</sup>Gulánle'e bénneache cheę Xránadxu lu xęzr la xu na',

na' bene' gulaque' wál-ladxa ca benne' guledábage' Le'.

<sup>25</sup>Bcha Dios lázxdau benne' Egipto ca' cheę xelecuídene'

bénneache cheę',

cheę xelegú'u lazre' xelune' da calela cheę wen zrin cheę' ca'.

<sup>26</sup>Nadxa gusel-le' Moisés, wen zrin cheę', lau bénneache

cheę' ca', ne Aarón, bénnea' guquę'e.

<sup>27</sup>Benne' caní be'e Dios lataj belune' xel-la' waca ca'

cheę xabáa,

ne xel-la' waca zrente ca' lu xęzr la xu cheę zri'ine zre sua Cam.

<sup>28</sup>Gusel-la Dios tu da chul-la da bgacu na dute xęzr la xu na',

san benne' Egipto ca' quebe buluzúe' dizra'  
da gunná be'ene' le'.

<sup>29</sup>Nadxa bene' bexaca nisa xegu chee benne'  
ca' dxen,

ne betie' xúgute' bela zaj zraba' xegu ca'.

<sup>30</sup>Busezrate' xezr la xu chee' bluzru ca' ga  
bzrinte' gulezraba'

xu'u lizre benne' wenná bea chee benne'  
Egipto ca'.

<sup>31</sup>Gunnaze Dios, na' belelá' zánete' be'a chee  
bezre,

ne be'a lase ca' duté lu xezr la xu chee  
benne' ca'.

<sup>32</sup>Waláz chee' nisa xiuj gusel-le' xiaj bezxe'  
lu xezr la xu

chee benne' ca',

ne xi' da bzezxe na ca naca xezr la xu chee'.

<sup>33</sup>Bzria xi'e ca zaj naca lba uva chee', ne ca  
zaj naca xaga higo chee',

na' bzúxuje' ca zaj naca xaga zaj zé lu xezr  
la xu chee'.

<sup>34</sup>Gunnaze', na' belelá' biche zu ca',

da quebe nu seque' gulaba lēba',

<sup>35</sup>na' guláguba' duté xixre' xa'a lu xezr la xu  
chee',

ne guláguba' duté lina da dxunna xezr la xu  
na'.

<sup>36</sup>Nadxa betie' xúgute' bi biu nedxu chee  
benne' Egipto ca',

bi zaj nácabe' bi blau chee'.

<sup>37</sup>Bebéaje' bēneache chee' na' zaj nu'e  
dumí plata,

ne dumí oro,

na' quebe nu chilá' benne' ládujla le',  
benne' quebe

chawe' zue'.

<sup>38</sup>Gulebé benne' Egipto ca' gate beledxúaj  
benne' ca' ga na',

lawe' da belezrébe'e le'.

<sup>39</sup>Bzalaj Dios tu beuj da gulú'u na benne' ca'  
zrul-la,

ne tu xi' da bsaní na chee' chizrela.

<sup>40</sup>Gulenabe' Dios, na' gusel-le' chee' btau  
ca',

ne bene' gulélajene' xeta da bdxuaj na  
xabáa.

<sup>41</sup>Gule'e tu xiaj xre, na' gulaj nisa  
da gude' na lu xezr la xu bizre na' ca tu xegu  
nisa.

<sup>42</sup>Caní ben Dios lawe' da bsa lazre' xrtizre'  
lá'azxa

da guchebe lazre' gune' chee Abraham, wen  
zrin chee'.

<sup>43</sup>Bebéaje' bēneache chee' lu xezr la xu  
Egipto, dxelebene'.

Lu da ba neza gulezrá' benne' ca' guqu'é'e.

<sup>44</sup>Bnézruje' benne' ca' xezr la xu chee  
benne' xezica ca',

na' da belún benne' xezr la xu ca' bexaca na  
chee benne'

chee' ca',

<sup>45</sup>chee xulupá'ane' ca naca xrba chee' ca',

ne xelune' ca naca da gunná bé'ene' ca'.

¡Gaca ba lá'azxa Xránadxu Dios!

## 106

<sup>1</sup>¡Gaca ba lá'azxa Xránadxu Dios!

¡Le xé Xránadxu Dios: "Xcalenu!"

Caní dxal-la' gunle lawe' da naque' xrlátaje,  
ne lawe' da tu chí'izqueze dxexache lazre'

dxí'u.

<sup>2</sup>¿Núzraqueze seque' gulé'ene' ca naca xel-  
la' waca zrente' ca'

da nune' Xránadxu?

¿Núzraqueze seque' güe lá'ane' Le' ca dxal-  
la' gundxu?

<sup>3</sup>Ba neza zrente' naca na chee' benne' ca'  
dxelune' da xrlátaje,

benne' ca' tu dxelúnzqueze' da naca xrlá-  
taje.

<sup>4</sup>Bsa lazre' chia', Xrana' Dios, gate dxunu'  
da chawe'

chee' bēneache chiu'.

<sup>5</sup>Gudá bselá neda' chee' gaca le'eda' da  
chawe' gunu'

chee' benne' ca' ba guca'u Lue',

ne chee' beda' gate xelezrá' bēneache chiu'  
lu da ba neza,

ne chee' bélena' bēneache chiu'.

<sup>6</sup>Ba bentu' dul-la cáqueze belún xra  
xrtáuntu' ca'.

Bentu' da calela, ne bentu' da zrinnaj.

<sup>7</sup>Gate gulezrá' xra xrtáuntu' lu xezr la xu  
Egipto,

quebe bululaba lazre' ca naca xel-la' waca  
ca' chee' xabáa

da benu'.

Quebe xeajlesá lazre' ca bexache lázrele'u  
le'.

Guledábague' Lue' dxu'a nísadau' da nazí le  
na Xrna.

<sup>8</sup>Le' bselé' benne' ca' chee' gaca ba lá'ana La  
Le',

ne chee' gulé'e lau ca naca xel-la' waca  
chee'.

<sup>9</sup>Gudil-le' nísadau' Xrna na', na' bebizre na,  
na' guledé bēneache chee' laduj nísadau'  
na' lu xu bizre.

<sup>10</sup> Bselé' benne' ca' lu na' benne'  
guledábage' Le',  
ne bebéaje' le' lu na' benne' ca' bulusaca  
zi'e le'.

<sup>11</sup> Nadxa nísadau' na' bgacu na benne' ca'  
guledábage' le'.

Netú benne' ca' quebe nu begá'ana.

<sup>12</sup> Nadxa benne' chee' ca' guléajle'e dizra'  
chee',

ne belul-le' da belúe lá'ane' Le'.

<sup>13</sup> Chadí gulal-la lazre' ca da bene'.

Quebe gulebeze' ca la' dizra' chee' Dios.

<sup>14</sup> Gulezá lazre' tu da calela le'e xixre' lawe'  
lataj na',

na' buluché'e Dios le'e xixre' na'.

<sup>15</sup> Gudé na' bnezruj Dios ca da gulenabe',

san gusel-le' ládujla le' tu da gute na bal-la  
benne' ca'.

<sup>16</sup> Gulaque' xa lazre' chee' Moisés naga zaj  
zre'e,

ne chee' Aarón, Bénnea' gucá'a Xránadxu  
Dios.

<sup>17</sup> Nadxa bzra xezr la xu na', ne gudebe na  
Datán,

ne bgacu na benne' ca' zaj de'e Abiram.

<sup>18</sup> Nadxa guxalaj xi' naga zaj nazraga benne'  
ca',

na' bzezxe na benne' ca' dxelune' da calela.  
<sup>19</sup> Belune' tu bedáu' bezre da naca na oro lu  
xi'a Horeb,

na' buluzú zribe' lau bedáu' oro na'.

<sup>20</sup> Caní bulucá'ane' Dios, Benne' xabáa,  
chee' xulucá'ana szrene' tu bedáu' bezre,  
da naca na ca tu bezre dxáguba' xixre'.

<sup>21</sup> Gulal-la lazre' Dios, Bénnea' bselé' le',  
Bénnea' bene' xel-la' waca zrenté' ca' lu  
xezr la xu Egipto,

<sup>22</sup> ne bene' xel-la' waca ca' chee' xabáa lu  
xezr la xu

chee' zri'ine zre sua Cam,

ne da ca' buluchebe na dxi'u dxu'a Nísadau'  
Xrna.

<sup>23</sup> Nadxa guca lazre' Dios guzría xi'e bén-  
neache chee',

san Moisés, bénnea' gucá'a Dios, bzua  
cuine' lau Dios

chee' guzúa zrie' xel-la' dxezrá'a chee' Dios,  
na' bene' quebe guzría xi' Dios benne' ca'.

<sup>24</sup> Buluzúe' chalá'ala xezr la xu xrtante da  
gunezruj Dios le',

ne quebe guléajle'e dizra' chee'.

<sup>25</sup> Tu gulennézqueze' chee' Dios lu xu'u xide  
chee' ca',

ne quebe buluzé' nague' da gunná Xránadxu  
Dios.

<sup>26</sup> Chee le na' bzetaj cuine' gunné' ca da  
gune' chee' benne' ca'.

Gunné' gune' xelate benne' ca' le'e xixre'  
lawe' lataj na',

<sup>27</sup> ne gusi'e bèneache chee' lu xel-la' stu'  
lau benne'

xezr la xu ca',

ne guse dínnaje' le' ládujla benne' xezr la  
xu ca'.

<sup>28</sup> Nadxa belune' tuze benne' ca' dxu-  
lucá'ana szrene'

bedáu' xia nazí le na Baal-peor,  
ne gulawe' béadu ca' belútie' lau díos gate  
ca'.

<sup>29</sup> Buluche'e Dios ne chee' da belune',  
na' guxalaj tu xízrawe' zren da bete na  
benne' zan benne' ca'.

<sup>30</sup> Nadxa guxasa Finees, ne betie' bénnea'  
bene' dul-la,

na' guleza xízrawe' zren na'.

<sup>31</sup> Da na' ben Finees guzi' Dios ca tu da  
dxucá'ana xrlátaje na

bénnea',

da gulé'e lawe na lau xúgute cuen bén-  
neache ca'.

<sup>32</sup> Cá'anqueze buluché'e Dios dxu'a beaj nisa  
nazí le na

Meriba,

na' guca da calela chee' Moisés ne chee'  
benne' ca',

<sup>33</sup> lawe' da ne chee' da belune' guca Moisés  
xichaj zra'a,

na' bexúbeté Moisés da gunné'.

<sup>34</sup> Gate gulu'e lu xezr la xu nigá quebe bu-  
luzría xi'e

bénneache zaj nite' ga na'.

Caní guca, quebe belune' ca da guzre Dios  
le' xelune'.

<sup>35</sup> Gulaque' tuze benne' xezr la xu ca',  
ne bulusédie' benne' Israel ca' xelune' ca  
dxelún benne' ca',

<sup>36</sup> na' bulucá'ana szrene' bedáu' xia xaga ca'  
chee' benne' ca',

da na' ben na bxrinnaj Dios bénneache  
chee'.

<sup>37</sup> Belútie' zri'ine' bi biu, ne bi nu'ula chee'  
lau bedáu' chee' da xriwe' ca',

<sup>38</sup> ne bululálaje' dxen chee' bi dxé'enedu ca',  
bi quebe zaj nunbe' dul-la,

da naca na dxen chee' zri'ine' bi biu, ne bi  
nu'ula,

bi ca' belútie' lau bedáu' xia xaga ca' chee'  
bénneache Canaán,

na' guca sban xezr la xu na' ne chee' dxen  
chee' bidu ca'.

<sup>39</sup> Da ca' belunę' ben na le' sban,  
na' gulebéaj xíchaje' Dios lu da belunę'.  
<sup>40</sup> Chee le na' bzrá'ale'ę Dios bénneache  
chee',  
na' gucuídene' benne' ca' zaj naca chee'.  
<sup>41</sup> Nadxa bdeę' benne' ca' lu na' benne' xęzr  
la xu ca',  
na' benne' ca' dxelecuide bénneache chee  
Dios  
gulenná bé'ene' le'.  
<sup>42</sup> Benne' ca' guledábage' le' bulusaca zi'e  
bénneache  
chee Dios,  
ne buluxrínnaje' le' lu xel-la' dxenná bea  
chee'.  
<sup>43</sup> Zánete lasa Dios bselé' bénneache chee'  
ca',  
san guledábage' ca da bsízrene' le',  
na' gulape' xel-la' stu' lawe' da belunę' da  
calela.  
<sup>44</sup> Lácala caní belunę', gate gulezre'ę lu da  
stebe,  
Dios gunné'ę ca da dxelezaque',  
ne benne' ca da bululáwizre' Le',  
<sup>45</sup> na' xejásá lazre' xel-la' wezría da bėnlene'  
benne' ca',  
na' bexíaje lazre' chee xel-la' dxezrá'a chee'  
lawe' da nácale'ę benne' dxexache lazre'.  
<sup>46</sup> Cá'anqueze bene' belexache lazre' benne'  
ca'  
benne' ca' guleché'ę le' ca benne' zaj  
nada'u.  
<sup>47</sup> ¡Bselá netu', Xránantu', nacu' Dios  
cheentu'!  
¡Becá'a netu' ládujla benne' xęzr la xu ca',  
chee güe lá'anantu' Lau' lá'azxa,  
ne chee béle'entu' lu da dxúl-lantu' chiu'!  
<sup>48</sup> Cháwedau' naca Xránadxu, Bénnea'  
naque' Dios chee  
benne' Israel ca' nédxudaute, ne  
chadía chacanna.  
Xúgute bénneache dxal-la' xelenné': ¡Ca'an  
gaca na!  
¡Gaca ba lá'azxa Xránadxu Dios!

## 107

<sup>1</sup> ¡Le güe lá'ana Xránadxu, Benne' xrlátaje!  
¡Chadía chacanna naque' Benne' zri'i lazre'!  
<sup>2</sup> Da nigá dxal-la' xelenná benne' ca' ba  
naxá'awe Xránadxu le',  
benne' ca' bselé' lu na' benne' guledábage'  
Le'.  
<sup>3</sup> Beche'ę le' naga gulezrá' benne' xęzr la xu  
zitu' ca',

da zaj zua naga dxalaj gubizra, ne naga  
dxebía na,  
ne naga za' be' zaga, ne naga dxedé gubizra  
beu' zaga ca'.

<sup>4</sup> Bal-la benne' ca' guledé' le'ę xixre' naga  
quebe bi neza zua,  
ne quebe belezrelne' xęzre naga xelezúe'.  
<sup>5</sup> Guledunę', ne gulebílene',  
ne québedxa bi gulebeza lazre'.  
<sup>6</sup> Nadxa lu da dxelezaque' gulenné' Xrá-  
nadxu,  
na' bselé' benne' ca' lu da dxelezaque'.  
<sup>7</sup> Na' buzre'ę le' tu neza li,  
chee chjaque' tu xęzre naga xelezúe'.  
<sup>8</sup> Dخال-la' xelúe lá'ane' Xránadxu lawe' da  
bexache lazre'  
Xránadxu le',  
ne lawe' da bene' chee' da ca' da dxe-  
bánedxu.  
<sup>9</sup> Dxuxí'aje' benne' ca' dxelebile lazre',  
ne dxugawe' benne' ca' dxeledún nen da  
chawe' chee'.

<sup>10</sup> Bal-la benne' caní gulezúe' lu da chul-la,  
ne lu da stebe  
chee xel-la' gute.  
Gulaque' ca benne' zaj xu'e lizre xia,  
ne zaj nadxéaj du xia, ne dxeledé' ba xa',  
<sup>11</sup> lawe' da guledábage' xrtizra' Xránadxu,  
ne buluzúe' chalá'ala da bzéajni'i Dios  
zrente le'.  
<sup>12</sup> Belexedú lazre' lu zrin z'ítę da dxelunę'.  
Xelejcházie' zran xua da zaj nu'e,  
ne quebe nu chilá' gácalene' le'.  
<sup>13</sup> Nadxa lu da dxelezaque' gulenné' Xrá-  
nadxu,  
na' bselé' benne' ca' lu da dxelezaque'.  
<sup>14</sup> Nadxa bebéaje' benne' ca' lu da chul-la  
ne lu da stebe chee xel-la' gute,  
ne bzúzruje' du xia ca' da zaj nadxéaje'.  
<sup>15</sup> Dخال-la' xelúe lá'ane' Xránadxu lawe' da  
bexache lazre' le',  
ne lawe' da bene' chee' da ca' da dxe-  
bánedxu.  
<sup>16</sup> Bchínnaje' dxa xu'u ca' zaj naca na xia  
gache,  
ne bzúzruje' xia ca' da zaj naxechaj na  
benne' ca'.  
<sup>17</sup> Bal-la benne' ca' gulaque' benne' xala,  
ne guledé' xel-la' z'í' ne chee dul-la da zaj  
nabague',  
ne ne chee da zrinnaj ca' da belunę'.  
<sup>18</sup> Belexegútene' da dxelé'aj dxelawe',

na' xáteze ca gulátie'.

<sup>19</sup> Nadxa lu da dxelezaque' gulenné' Xránadxu,

na' bselé' benne' ca' lu da dxelezaque'.

<sup>20</sup> Gusel-le' dizra' chee' chee' benne' ca', na' bexune' le', ne bselé' le' lu xel-la' gute.

<sup>21</sup> Dxal-la' xelúe lá'ane' Xránadxu lawe' da bexache lazre' le', ne lawe' da bene' chee' da ca' da dxe-bánedxu.

<sup>22</sup> Dxal-la' xelé'e Le'; Xcalenu'.

Dxal-la' xelú'e da xulunézruje' Le',

na' lu xel-la' dxelebé chee' dxal-la' xelúl-le', ne xuluzenne' bénneache ca zaj naca da nune'.

<sup>23</sup> Bal-la benne' ca' guledé'e lu nísadau'

lu da zren ca' da dxedá lawe' nísadau'.

Belezi'e dumí zren lu zrin dxelune' lu nísadau'.

<sup>24</sup> Belelé'ene' ca naca da ca' dxun Xránadxu, da ca' dxune' lu nísadau' da zaj naca na da dxebánedxu.

<sup>25</sup> Gunnéze', na' guzú lau dxaca be' bdunu', na' gulasa xeajxruxa zren lu nísadau'.

<sup>26</sup> Beleguén da dxedá lawe' nísadau' ca' ca lu xi'a zri'a

da naca na nísadau',

na' belexetaj na lu da situj lawe' nísadau' na'.

<sup>27</sup> Gulechégie', ne xeajleté' ni xeajleté' na' ca

benne' dxelezuzre,

na' guca dácheze ca da zaj nusédie'.

<sup>28</sup> Nadxa lu da dxelezaque' gulenné' Xránadxu,

na' bselé' benne' ca' lu da dxelezaque'.

<sup>29</sup> Bzua zrie' be' bdunu' na' da dxaca na, ne gulezúa zri xeajxruxa chee' nísadau' na'.

<sup>30</sup> Gulebéle'ene' lawe' da zaj zua zri xeajxruxa ca',

na' guché'e Dios le' cháwedau' naga zjaque'.

<sup>31</sup> Dxal-la' xelúe lá'ane' Xránadxu lawe' da bexache lazre' le',

ne lawe' da bene' chee' da ca' da dxe-bánedxu.

<sup>32</sup> Dxal-la' xuluzenne' ca naca xel-la' szren chee' naga

zaj nazraga bénneache chee',

ne xelúe lá'ane' Le' naga zaj nazraga benne' gula ca', benne'

dxelenná be'e.

<sup>33</sup> Ben Xránadxu gulebizre xegu nisa ca',

ne busú'aje' beaj nisa ca'.

<sup>34</sup> Xu xa'a bexune' na xu bizre,

ne chee' da calela da belún benne' ca' zaj zre'e na'.

<sup>35</sup> Naga naca xu bizre bexune' na xu nisa, na' xu xiaj bexune' na naga dxalaj nisa.

<sup>36</sup> Bzre'e ga na' benne' ca' benne' dxeledún, na' belune' tu xezre naga xelezúe'.

<sup>37</sup> Gulaze' xezr la xu na', na' belexaze' lba uva ca',

na' belexezi'le'e lina chee' na.

<sup>38</sup> Bene' da chawe' chee' benne' ca', na' gulánle'e bidu chee' ca',

ne quebe be'e lataj xeelase ca zaj naca be xixre' chee' ca'.

<sup>39</sup> Gate buludé benne' dxelenná bea benne' ca' lu xel-la' zi',

ne bulusaca zi'e le',

ne gulenná bé'edxene' le', ne belune' le' da calela,

ne buludé' le' lu da ba xa',

<sup>40</sup> bca'ana ditaj Dios benne' xíchaje' ca',

ne bene' guledé'e le'e xixre' lawe' lataj naga quebe bi neza de.

<sup>41</sup> Bselé' benne' xache' ca' lu da zi' da xa' da dxeledé'e,

ne bzánle'e zri'ine benne' ca' ca dxelán zri'la' ca'.

<sup>42</sup> Gate dxelelé'e benne' xrlátaje ca' da caní, na' dxelebéle'ene',

na' benne' ca' dxelune' da calela quebe bi gaca xelemné'.

<sup>43</sup> Benne' ca' zaj naque' sina dxal-la' xulaba lazre'

ca zaj naca da caní,

ne dxal-la' xelexúnbe'e ca naca xel-la' zri'i lazre'

chee' Xránadxu.

## 108

<sup>1</sup> Ba zúatequeze lázrdawa', Dios, chee' gúl-laqueza' da güe lá'ana' Lue'.

Da nigá dxugú'u na neda' lu da ba neza.

<sup>2</sup> Bebán lazre', bénne'du xu'a, na' le xebán lázrele,

le'e dxínnele da dxúl-lalenle, ne da con zrádi'i na du.

Che zílala cheajsa'queza'.

<sup>3</sup> Güe lá'anaqueza' Lue' ládujla bénneache chiu', Xran.

Gúl-laqueza' chiu' lau benne' duté xezr la xu,

<sup>4</sup> lawe' da naca xel-la' dxexache lazre' chiu' zrendxa ca xabáa,



na' da li chiu' naca na zrendxa ca beuj bza ca'.

<sup>5</sup>Xegá'ana szrénquezu' xabáa, Dios.

Xel-la' szren chiu' sua na lawe' duté xezr la xu.

<sup>6</sup>Cheé xeledá benne' ca' nazrí'iqueznu' Lue', bselá le' duté xel-la' waca chiu', ne bene chia'.

<sup>7</sup> Lu lataj lá'azxa cheé' gunná Dios: "Wabéquezda' neda'.

Gunna' late weaj cheeḷe xezr la xu chee benne' Siquem ca',

ne gudixra' cheeḷe xezr la xu de cuite xegu Sucot.

<sup>8</sup>Chia' naca xezr la xu Galaad, ne chia' naca xezr la xu chee zri'ine zre sua Manasés.

Xezr la xu chee zri'ine zre sua Efraín naca na ca tu da napa chi'i na xíchaja'.

Xezr la xu chee zri'ine zre sua Judá naca na naga dxenná be'a.

<sup>9</sup>Xezr la xu chee benne' Moab naca na ca tu zriga'

da xuzru nisa guná'a,

na' lu xezr la xu chee benne' Edom chu'una' zrela' gula.

Si'a ba neza xezr la xu chee benne' Filistea."

<sup>10</sup> ¿Nuzra che' neda' chee chu'a xezre da naxechaj ze'e sibe?

¿Nuzra che' neda' chee guzétaja' benne' Edom ca'?

<sup>11</sup> ¿Quegá Lue' na' che'u neda', Dios.

Nacu' Bénnea' bzua netu' chalá'ala, ne quebe guxéajlenu' benne' cheentu' ca', benne' dxjaque'

wedil-la, Dios?

<sup>12</sup> Gúcalé netu' chee séquentu' tíl-lalentu' benne' ca'

dxeledíl-lalene' netu',

lawe' da naca dácheze xelácalé bénneache netu'.

<sup>13</sup>Tu zren nen Dios gundxu tu da zrente,

na' Le' gulague' benne' ca' dxeledil-lalene' dxi'u.

## 109

<sup>1</sup> Dios, dxue lá'ana' Lue'!

Quebe xegá'anu' zrize

<sup>2</sup> lawe' da dxelenná benne' ca' dxelune' da caleḷa,

ne benne' wen lazre' ca' chia' neda'.

Dxelenné' chia' da naca da wen lazre'.

<sup>3</sup> Lu xel-la' dxelecuide chee' zaj naxéchaje' neda',

ne dxelenné' chia'.

Dxeledíl-lalene' neda', ne quebe bi nuna' chee benne' ca'.

<sup>4</sup> Lácala bzri'ida' benne' ca', na'a dxeledábague' neda',

san neda' dxenaba' gaca da chawe' chee benne' ca'.

<sup>5</sup> Lácala bena' neda' da chawe' chee benne' ca', dxelune' chia'

da caleḷa,

ne lácala bzri'ida' le', dxelecuídené' neda'.

<sup>6</sup> Bzua tu benne' wen da zrinna'j chee' guchi'e chee

benne' wen da caleḷa ca',

ne ben sua tu benne' nnie' chee benne' ca', benne' guzúe' ca' naca da caleḷa belún benne' ca'.

<sup>7</sup> Gate na' zri'a chee', ben gaca bea na zaj nabague' zria.

Ble'e da xelenabe' lau' ca tu dul-la da dxelune'.

<sup>8</sup> Bzache zra xelaca ban benne' ca', ne ben xelú'u xezica' benne' waláz chee'.

<sup>9</sup> Bca'ana zri'ine' ca' bidau' wezebe,

ne xelaca zru'ule' nu'ula tuze ca'.

<sup>10</sup> Ben xelaca zri'ine' bi dxeledaze chee' xelenábabe' guna',

ne ben xelezrélebe' xeta xelágube' zitu' naga zaj zua lízrebe'

da zaj naxinna'j.

<sup>11</sup> Ben xelú'u da ca' zaj nape' lu na' bénne' ca'

bulusané' le' dumí.

Ben xelaxúa benne' zitu' ca' da ca' zaj nune'.

<sup>12</sup> Ben quebe nu zrel-la benne' xexache lazre' le',

ne quebe nu benne' zrel-la xexache lazre' bidau' wezebe

chee' ca'.

<sup>13</sup> Ben xelebía xi' zri'ine zre sua benne' ca', ne québedxa nu cha' zri'ine zre sue',

si' le' ca zaj nazi'i la benne' ca'.

<sup>14</sup> Bsa lazre' ca da caleḷa da belún xra xrtawe', Xran,

ne quebe xusulu' dul-la da gulún xrne'e ca'.

<sup>15</sup> Tu chí'izqueze bsa lazre' ca da caleḷa da zaj nune'.

Québedxa cheajsá lazru' benne' ca'

<sup>16</sup> lawe' da quebe xeleajsá lazre' xelaxache lazre' le sa' ljwezre' ca',

san bulusaca zi'e benne' baxache' ca', benne' dxelexájrjengé',

ne benne' dxexruj lazre' ca', na' belútie'  
bénne'du ca'.

<sup>17</sup> Beledánene' da dxugú'u na de', na' da  
caníze guca na chee'.

Quebe gulaca lazre' xelenabe' gaca chawe'  
chee bénneache,  
na' da chawe' bebíga na naga zaj zue'.

<sup>18</sup> De' da gulegú'e bénneache guca na ca tu  
da gulacu cuine',

na' guxú'u na le'e ca nisa gulé'aje',  
ne guxú'u na zrita chee' ca da za.

<sup>19</sup> Tu chí'izqueze ben gaca na chee' ca xicha  
da dxelácie',

ne gaca na ca tu xpádxue' dxuluchela le'e.

<sup>20</sup> Gaca da nigá da quízruj Xránadxu Dios  
benne' ca'

dxelenné' calela chia',  
ne da quízruje' benne' ca' dxelune' da  
calela,

ne dxelenné' calela chee' bénne'du xu'a.

<sup>21</sup> Xrana' Dios, ben culuén chia' chee  
xegá'ana'  
xrlátaje lau'.

Bselá neda' lawe' da dxexache lázrele'u  
bénneache,

<sup>22</sup> ne lawe' da dxezaca zi'a, ne dxexájrjeda',  
ne dxeque zi' lázrdawa'.

<sup>23</sup> Dxedé chia' ca dxedé chee' tu zrul-la gate  
dxebía gubizra.

Dxaca chia' ca dxaca chee' biche xuaj gate  
dxua be' leba'.

<sup>24</sup> Dxelate zriba' lawe' da dxuna' gubasa,  
ne nazríta'e'a lawe' da quebe bi dxawa'.

<sup>25</sup> Naca' ca tu da dxulucá'ana dítaje'.

Dxelenné'e neda', ne dxelún le' chia', dxu-  
lutá xíchaje'.

<sup>26</sup> Gúcale neda', Xrana' Dios.

Bselá neda' lawe' da dxexache lazru' bén-  
neache.

<sup>27</sup> Ben xeleque be'ene' Lué'queze dxácalenu'  
neda'.

Lué'queze, Xrana' Dios, ba nunu' da nigá.

<sup>28</sup> Dxelegu'e neda' de', san ben Lue' gaca  
chawe' chia'.

Guxasa, ben xelexedué'e benne' ca' dx-  
eledábage' neda',  
san ben beda' neda'.

<sup>29</sup> Ben xelzrá' lu xel-la' stu' benne' ca' dxe-  
lenné'  
da calela chia'.

Ben xeleque zrájene' tu chí'izqueze.

<sup>30</sup> Du lazra' gúl-laqueza' da güe lá'analé'a  
Xránadxu Dios.

Ládujla benne' zan ca' güe lá'ana' Le'.

<sup>31</sup> Le' zue' cuita xabela chee' benne' xache'  
ca'

chee' guselé' bénne'du zaj xu'e lu na' benne'  
ca'  
dxuluchi'e chee'.

## 110

<sup>1</sup> Xránadxu Dios guzre' Xrana': "Gudxé'e  
chalá'a xabela chia'  
cadxa zrin zra guna' ga benne' ca' dx-  
eledábage' lue'  
xuluzúa zribe' lau'."

<sup>2</sup> Naga zu' Sión, gun Xránadxu zriluj xel-la'  
dxenná bea chiu'.

Dxenné': "Gunná be'e benne' ca' dx-  
eledábage' lue'.

<sup>3</sup> Lu zra gate tíl-lalenu' benne' ca' dx-  
eledábage' lue',  
du lázrequeze benne' chiu' ca' chjaque'  
wedil-la.

Ca dxun xrlé'ela chee' bálala, dxacu na xi'a  
lá'azxa,

caníqueze xelaca benne' cuide' chiu' ca',  
xelelé'e naga zu' xelácalene' lue'."

<sup>4</sup> Guchebe lazre' Xránadxu, ne quebe  
gunitie' xrtizre',  
gunné': "Chadía chacanna nacu' bxruze ca  
guca bxruze  
Melquisedec."

<sup>5</sup> Zua Xránadxu chalá'a xabela chiu'.

Gate zre'e, na' guzría xi'e benne' wenna' bea  
ca'.

<sup>6</sup> Guchi'e chee' benne' duté xezr la xu, na'  
gutie' zánete  
benne' xezr la xu ca'.

Guzría xi'e benne' dxelenná be'e duté xezr  
la xu.

<sup>7</sup> Xi'aj benne' wenna' bea nigá nisa xégudu  
zua na dxu'a neza,  
na' xexape' xel-la' wal-la chee'.

## 111

<sup>1</sup> Dute lázrdawa' güe lá'ana' Xránadxu Dios  
tu zren nen  
benne' xrlátaje ca', benne' zaj  
nazrague' lau Le'.

<sup>2</sup> Da zrente zaj naca da ca' nun Xránadxu  
Dios,

na' xúgute benne' ca' dxelezaca ba  
lázrele' da nune',  
ne dxelaca lazre' xelélé'ene' na.

<sup>3</sup> Da xabáa, ne da xrtante zaj naca da dxune'  
Le',

ne tu chí'izqueze zua da xrlátaje chee'.

<sup>4</sup> Dxune' dxeajsá lázredxu ca naca xel-la'  
waca zrente

da dxunę'.  
 Xránadxu Dios naque' zren lazre', ne dxex-  
 ache lazre'  
 bénneache.  
<sup>5</sup>Dxugawe' benne' ca' dxelezrebe' Lę'.  
 Tu chí'izqueze dxeajsá lazre' xel-la' wezría  
 da nune'.  
<sup>6</sup>Blé'ene' bénneache chee' ca' ca naca xel-  
 la' waca chee  
 da ca' bene'.  
 Dxunézruje' benne' chee' ca' da zaj napa  
 benne' xezica  
 xęzr la xu ca'.  
<sup>7</sup>Li lazre', ne xrlátaje zaj naca da ca' dxunę'.  
 Li lazre' zaj naca xúgute' da bdxixruj be'e.  
<sup>8</sup>Tu chí'izqueze, ne chadíá chacanna zaj zua  
 da ca' bdxixruje'.  
 Lu da li, ne lu da li lazre' nune' ca zaj naca  
 na.  
<sup>9</sup>Gusel-łe' tu benne' weselá chee guselé'  
 bénneache chee'.  
 Tu chí'izqueze nadxixruj be'e xel-la' wezría  
 chee'.  
 Lá'azxa, ne tu da zrédexu naca La Lę'.  
<sup>10</sup>Chee su laudxu gácadxu sina, dxun na ba  
 xen zrédexu  
 Xránadxu Dios.  
 Dxeléajni'i xanne' xúgute' benne' ca' dx-  
 elunę' ca zaj naca  
 da nadxixruje'.  
 Tu chí'izqueze dxal-la' güe lá'anadxu Lę'.

## 112

<sup>1</sup>Ba neza zrentę naca na chee' bénnea' dx-  
 ezrebe'  
 Xránadxu Dios,  
 ne ca zaj naca da bdxixruj be'e dxezaca ba  
 lázrele'ene'.  
<sup>2</sup>Zri'ine zre sua bénnea' xelape' xel-la'  
 dxenná bea  
 lu xęzr la xu,  
 na' gaca chawe' chee' benne' xrlátaje ca'.  
<sup>3</sup>Da zan da de, ne xel-la' gunni'a zaj zra na  
 xu'u lizre',  
 ne tu chí'izqueze zua da xrlátaje da dxun  
 bénnea'.  
<sup>4</sup>Dxusaní' tu xi' lu da chul-la naga zaj zra'  
 benne' li lazre' ca',  
 benne' ca' zaj naque' zren lazre', ne xrlá-  
 taje,  
 ne dxelexache lazre' bénneache.  
<sup>5</sup>Tu benne' xrlátaje dxexache lazre' bén-  
 neache,  
 ne dxusanę' le' dumí.

Lu da xrlátaje dxenná bé'ene' da zaj xu'u lu  
 ne'e.  
<sup>6</sup>Chee le' na' quebe bi gutá na le' lu lataj naga  
 zue',  
 na' tu chí'izqueze xeajlesá lazre' bénneache  
 ca'.  
<sup>7</sup>Quebe zrebe' gate xenne' dxaca da calela  
 chee  
 da xu'u lu ne'e.  
 Ze chacha lázrdawe' lawe' da dxuxrén lazre'  
 Xránadxu Dios.  
<sup>8</sup>Zua chawe' lázrdawe', ne quebe bi dxezre-  
 be',  
 ca zrindxa zra lé'ene' gaca chee' benne' ca'  
 guledábage' le'  
 ca da dxezá lazre'.  
<sup>9</sup>Dxisię' da de chee', ne dxunézruje' da  
 gácale  
 benne' xache' ca',  
 ne tu chí'izqueze zua da xrlátaje da dxunę'.  
 Lu da xabáa xegá'ana szren xel-la' dxenná  
 bea chee'.  
<sup>10</sup>Walé'e benne' wen da calela da nigá, na'  
 gueque zréajene'.  
 Gágu xa'ate' lazre', ne cue'e gunne xue.  
 Xelenite da ca' dxelezá lazre' benne' ca'  
 dxelunę' da calela.

## 113

<sup>1</sup>Le'e, wen zrin chee' Xránadxu Dios, le güe  
 lá'ana Lę'!  
 Le güe lá'ana La Xránadxu Dios!  
<sup>2</sup>Gaca ba lá'azxa La Xránadxu Dios,  
 na'a zra, ne chadíá chacanna!  
<sup>3</sup>Naga dxalaj gubizra ca zrintę naga dxebíá  
 na  
 gaca ba lá'azxa La Xránadxu Dios!  
<sup>4</sup>Szrentę nagá'ana Xránadxu Dios lawe'  
 dute' xęzr la xu,  
 na' lówela xabáa dxe' da xabáa chee'!  
<sup>5</sup>Núzraqueze naca ca naca Xránadxu Dios,  
 Bénnea' dxe'e xabáa na'la?  
<sup>6</sup>Dios dxun cuine' dxexruj lazre' chee'  
 lé'ene'  
 da de zran xabáa, ne lu xęzr la xu.  
<sup>7</sup>Dios dxechise' benne' xache' lu xu xrte,  
 ne dxebéaje' benne' baxache' lu da dxezaca  
 zi'e,  
<sup>8</sup>na' dxunę' dxelebé' benne' caní ládujla  
 benne'  
 dxelenná be'e,  
 ládujla benne' ca' dxelenná bé'ene' bén-  
 neache chee'.  
<sup>9</sup>Dxunę' zua nu'ula zue' tuze ládujla  
 zrí'inequeze' ca',

na' dxebé nu'ula nigá lawe' da naque' xrna  
bi cheéqueze'.

¡Gaca ba lá'azxa Xránadxu Dios!

### 114

<sup>1</sup>Gate beledxúaj benne' Israel ca' lu xezr la  
xu Egipto,  
beledxúaj zri'ine zre sua Jacob lu xezr la xu  
chee

benne' zitu' ca',

<sup>2</sup>na' gulaca zri'ine zre sua Judá ca tu xu'u  
lizre Dios,  
gulaca benne' Israel ca' naga dxenná be'e.

<sup>3</sup>Ble'e Nísadau' Xrna da nigá, na' bzrunnuj  
na,

na' gugá xegu Jordán.

<sup>4</sup>Gulexrite xi'a zri'a ca' ca dxelexrite chivo  
ca',

na' gulexrite xí'adu ca' ca dxelexrite  
chíbudu ca'.

<sup>5</sup>¿Bizra guca chiu', nísadau', lawe' da ben na  
bzrúnnuju'?

¿Bizra guca chiu', xegu Jordán, lawe' da ben  
na gugú'?

<sup>6</sup>Le'e, xi'a zri'a ca', ¿Bizr chee na' guxrítele  
ca dxelexrite  
chivo ca'?

Le'e, xi'adu ca', ¿Bizr chee na' guxrítele ca  
dxelexrite  
chíbudu ca'?

<sup>7</sup>Dxezrize xezr la xu lau Xránadxu Dios, lau  
Dios chee Jacob.

<sup>8</sup>Dios nigá bene' bexaca xiaj xre' tu beaj  
nisa,

na' bexaca xiaj tu ga dxalaj nisa.

### 115

<sup>1</sup>Quegá netu', Xran.

Quegá cuintu', san Lué'queze dxal-la'  
xucá'ana szrentu'  
ne chee xel-la' zri'i lazre' chiu', ne xel-la' li  
lazre' chiu'.

<sup>2</sup>¿Bizr chee na' dxun na ba xen xuluchebe  
bénneache netu':  
"Gazra zua Dios chee?"

<sup>3</sup>Dios cheedxu zue' xabáa.

Dxuné' ca da dxaca lázrequeze'.

<sup>4</sup>Dios ca' chee benne' ca' zaj naca na bedáu'  
plata,

ne bedáu' oro, da nun ni'a na' bénneache.

<sup>5</sup>Zaj zua dxu'a na, san quebe dxeleonné na.  
Zaj zua xiaj lau na, san quebe dxelelé'e na.

<sup>6</sup>Zaj zua naga na, san quebe dxelén na.

Zaj zua zrina na, san quebe dxelelé'e na.

<sup>7</sup>Zaj zua na' na, san quebe bi dxelecá'a na.

Zaj zua ni'a na, san quebe dxeledá na.

Quebe dxedxuaj chi'i na lba na.

<sup>8</sup>Ca zaj naca na, zaj naca benne' ca' zaj nune'  
na,

ne benne' ca' dxuluxrén lazre' na.

<sup>9</sup>Le guxrén lazre' Xránadxu, le'e, benne'  
Israel ca'.

Le' dxácalene' le'e, ne dxuxúe' le'e.

<sup>10</sup>Le guxrén lazre' Xránadxu, le'e, bxruze  
chee Dios,

nácale zri'ine zre sua Aarón.

Le' dxácalene' le'e, ne dxuxúe' le'e.

<sup>11</sup>Le guxrén lazre' Xránadxu, le'e dxucá'ana  
szrenle Le'.

Le' dxácalene' le'e, ne dxuxúe' le'e.

<sup>12</sup>Xránadxu dxajsá lazre' dxi'u, na' gune'  
dxi'u da chawe'.

Gune' da chawe' chee benne' Israel ca'.

Gune' da chawe' chee bxruze chee', zri'ine  
zre sua Aarón.

<sup>13</sup>Gune' da chawe' chee xúgute benne' dxe-  
lape' Le' ba lá'ana,

benne' blau ca', ne benne' quebe zaj naque'  
blau.

<sup>14</sup>Gun Xránadxu chan zri'inu' ca',  
ne chan zri'ine bi biu chiu' ca'.

<sup>15</sup>Gun Xránadxu da chawe' chiu'.

Naque' Bénnea' ben xabáa, ne xezr la xu.

<sup>16</sup>Chee' tuze Xránadxu naca xabáa,  
san bnézruje' bénneache xezr la xu.

<sup>17</sup>Benne' zaj mate quebe gaca xelúe lá'ane'  
Xránadxu,

ne quebe gaca benne' ca' zaj zue' lu xedxu  
ba.

<sup>18</sup>Dxi'u, benne' ban, güe lá'anadxu Xrá-  
nadxu,

na'a zra, ne chadía chacanna.

¡Le güe lá'ana Xránadxu!

### 116

<sup>1</sup>¡Nazrí'ida' Xránadxu Dios

lawe' da benne' chi'a, ne da gunaba' lawe',

<sup>2</sup>ne lawe' da bze' nague' chia'!

Chee' le' na' guláwizra' Le' dxácaté naca  
bana'.

<sup>3</sup>Guzúa' lu da stébe chee xel-la' gute,

ne bzreba' ba zua' chu'a lataj ba xa'.

Guzúa' lu da stébe, ne guzaca zí'a.

<sup>4</sup>Nadxa bláwizra' Xránadxu Dios, gunnía':

Xrana' Dios, bselá bénne' du xu'a.

<sup>5</sup>Cháwe'le'e naca Xránadxu Dios, ne xrlá-  
taje naque'.

Awe', dxexache lazre' Dios cheedxu dxi'u.

<sup>6</sup> Duxúe Xránadxu benne' dxexruj lazre' ca'.

Gate na' guzúa' lu da štebe bselé' neda'.

<sup>7</sup> Ben dípa lazre', bėnne'du xu'a, lawe' da nun Xránadxu da chawe' chiu'.

<sup>8</sup> Lue', Xran, bseláu' bėnne'du xu'a lu na' xel-la' gute, cheę québedxa cuezre we'a, ne cheę quebe cheajcházia'.

<sup>9</sup> Ta' lau Xránadxu Dios naga zaj zra' benne' ca' zaj naca bane'.

<sup>10</sup> Guxéajle'a chee', na' chee le na' bchálaja', lácala guzaca zí'le'a.

<sup>11</sup> Lu xel-la' dxezrebe chia', gunnía':

Zaj naca xúgute bėnneache benne' wen lazre' ca'.

<sup>12</sup> Bizra quízrujqueza' Xránadxu Dios cheę xúgute da chawe' da bene' chia'?

<sup>13</sup> Si'a lu ne'e xel-la' weselá, ne guláwizra' Xránadxu Dios.

<sup>14</sup> Na'a guna' da ca' guchebe lazra' lau Xránadxu.

Guna' na lau xúgute bėnneache chee'.

<sup>15</sup> Xránadxu Dios dxe'e gunne xue cheę bėnneache chee' gate dxelátie'.

<sup>16</sup> Xrana' Dios, da li naca' wen zrin chiu'.

Naca' wen zrin chiu', ne zri'ine nu'ula wen zrin chiu'.

Lue' búzruju' da zaj nadxéaj na neda'.

<sup>17</sup> Da güe lá'ana' Lue' gaca na ca tu béadau' gutia' lau', ne gucá'ana szrena' Lau', Xrana' Dios.

<sup>18</sup> Lau Xránadxu Dios guna' da ca' guchebe lazra' chee',

da guna' lau xúgute bėnneache chee'.

<sup>19</sup> Guna' na chale'aj xu'u lizre Xránadxu Dios,

da dxe' na lu'ule xezre Jerusalén.

¡Gaca ba lá'azxa Xránadxu Dios!

## 117

<sup>1</sup> ¡Le güe lá'ana Xránadxu Dios, le'e, benne' dutę xezr la xu!

¡Le güe lá'ana Le', le'e, xúgute bėnneache,

<sup>2</sup> lawe' da zrente naca xel-la' zri'i lazre' chee' ca nazrí'ine' dxi'u,

ne chadía chacanna naca xel-la' li lazre' chee'!

¡Le güe lá'ana Xránadxu!

## 118

<sup>1</sup> ¡Le güe lá'ana Xránadxu Dios lawe' da naque' xrlátaje, ne lawe' da chadía chacanna dxexache lazre' dxi'u!

<sup>2</sup> Dخال-la' xelenná benne' Israel ca':

¡Chadía chacanna dxexache lazre' dxi'u!

<sup>3</sup> Dخال-la' xelenná zri'ine zre sua Aarón:

¡Chadía chacanna dxexache lazre' dxi'u!

<sup>4</sup> Dخال-la' xelenná benne' ca' dxelezrebe' Xránadxu Dios:

¡Chadía chacanna dxexache lazre' dxi'u!

<sup>5</sup> Gate na' guzúa' lu da štebe bláwizra' Xránadxu Dios,

na' bechebe Xránadxu, ne bselé' neda' lu da na'

bexru na neda'.

<sup>6</sup> Zuale Xránadxu neda', na' québequeze zreba'

bi xelún bėnneache chia' neda'.

<sup>7</sup> Zuale Xránadxu neda' ládujla benne' ca' dxelácalęne' neda'.

Cheę le na' le'eda' cheajchaze benne' ca' dxelecuídene' neda'.

<sup>8</sup> Cháwe'dxa naca guxrén lázredxu Xránadxu Dios

quézcala guxrén lázredxu bėnneache.

<sup>9</sup> Cháwe'dxa naca guxrén lázredxu Xránadxu Dios

quézcala guxrén lázredxu benne' dxeleenná be'e.

<sup>10</sup> Gulechaj benne' xúgute cue' xezr la xu neda',

na' lu La Xránadxu Dios guzría xi'a benne' ca'.

<sup>11</sup> Guléchaje' neda', ne buluchídie' neda',

na' lu La Xránadxu Dios guzría xi'a benne' ca'.

<sup>12</sup> Guléchaje' neda' ca dxelún beşcutuche',

na' guca xel-la' dxelezrá'a chee' ca tu xi' da dxuzezxe na

xixre' xeche' bizre,

na' lu La Xránadxu Dios guzría xi'a benne' ca'.

<sup>13</sup> Buluzrigue' neda' cheę cheajcházia'

na' gúcalę Xránadxu Dios neda'.

<sup>14</sup> Naca Xránadxu Dios ca tu xu'u naga zua chawa',

na' tu gúl-lazqueza' chee' lawe' da Léqueze' dxuselé' neda'.

<sup>15</sup> Xel-la' dxelebé dxelul-la benne' xrlátaje ca'

lawe' da dxuselá Xránadxu le'.

Dutę xel-la' waca chee' dxun Xránadxu Dios da zrente ca'.

<sup>16</sup> Szrentę nagá'ana xel-la' waca zren chee  
Xránadxu Dios.

Da zrentę ca' dxun xel-la' waca zren chee  
Xránadxu.

<sup>17</sup> Québequeze gatia', san gaca bana',  
na' guzenda' bėnneache ca zaj naca da nun  
Xránadxu.

<sup>18</sup> Bde Xránadxu neda' lu da ba xa',  
san quebe bdeę' neda' lu na' xel-la' gute.

<sup>19</sup> Gusalaj dxa xu'u cheę chu'a naga guchi'u  
chia', Xran,  
na' chu'a na', ne güe lá'ana' Lue', Xrana'  
Dios.

<sup>20</sup> Dxa xu'u nigá naca na cheę Xránadxu  
Dios.  
Dxa xu'u nigá dxelú'u benne' xrlátaje ca'.

<sup>21</sup> Güe lá'ana' Lue', Xran, lawe' da bennu'  
chia',  
ne bseláu' neda' lu da guca chia'.

<sup>22</sup> Xiaj na' da buluzúa benne' wen xu'u ca'  
chalá'ala,  
le na' naca na xiaj blau.

<sup>23</sup> Da nigá ben Xránadxu,  
na' naca na tu da dxexebánedxu.

<sup>24</sup> Zra nigá naca na zra da ben Xránadxu.  
Béle'ędxu, ne súadxu lu da ba neza lu zra  
nigá.

<sup>25</sup> Xrana' Dios, dxata' xueda' Lue' guseláu'  
netu' na'a.  
Dxata' xueda' Lue', Xrana', gunu' chepe ban  
na'a da dxuntu'.

<sup>26</sup> Ba neza zrentę naca na cheę bėnnea' ze'ę  
waláz cheę  
Xránadxu Dios.

Lu xu'u lizre Xránadxu Dios nigá dx-  
enábantu'  
gaca chawe' chiu'.

<sup>27</sup> Xránadxu naque' Dios, ne ba benne' dxi'u  
tu da dxusaní na.

Le guchéaj béadu ca' gütele lawe' lu luzu  
cugu cheę'.

<sup>28</sup> Nacu' Lue' Dios chia', na' güe lá'ana' Lue'.  
Dios chia', gucá'ana szrena' Lue'.

<sup>29</sup> Je güe lá'ana Xránadxu Dios lawe' da  
naque' xrlátaje,  
ne lawe' da chadía chacanna dxexache  
lazre' dxi'u!

## 119

*Da dxun da bdxixruj be'e Dios dxi'u*

<sup>1</sup> Ba neza zrentę naca na cheę benne' ca' tu  
dxelúnzqueze'

da naca du lazre',  
benne' ca' tu dxelúnzqueze' ca dxenná da  
bdxixruj bea  
Xránadxu Dios.

<sup>2</sup> Ba neza zrentę naca na cheę benne' ca' tu  
dxelúnzqueze'  
ca dxuseđe dizra' cheę' dxi'u,  
na' dute xichaj lázrdawe' dxuluzúe' dizra'  
cheę'.

<sup>3</sup> Benne' caní québequeze dxelune' da zrin-  
naj,  
benne' ca' tu dxelúnzqueze' ca dxenná Dios  
dxal-la' xelune'.

<sup>4</sup> Lue', Xran, bsízrenu' netu' cheę gun xán-  
nentu'  
ca zaj naca da bdxixruj be'u Lue'.

<sup>5</sup> Dxaca lázrele'a tu gúnzqueza'  
ca zaj naca xrba chiu'.

<sup>6</sup> Nadxa québequeze xedué'eda',  
na' cue'a gunne xue guna' xúgute' da bdx-  
ixruj be'u.

<sup>7</sup> Dute xel-la' li lazre' chia' güe lá'ana' Lue'  
gate ba nuséđia'  
da ca' nuchi'u cheentu', da zaj naca na  
xrlátaje.

<sup>8</sup> Tu gúnzqueza' ca da dxenná be'u.  
Québequeze cueaj xíchaju' neda'.

*Dxal-la' gundxu da gunnáqueze Dios*

<sup>9</sup> ¿Ájala gun benne' cuide' gunbe' da naca na  
xrlátaje?

Dxal-la' tu gúnzquezebe' ca dxenná xr-  
tizru'.

<sup>10</sup> Dute xichaj lázrdawa' dxuna' ba xuzre  
guna'  
da dxennáu' Lue'.

Quebe gu'u lataj guzúa' chalá'ala ca da bdx-  
ixruj be'u.

<sup>11</sup> Lu xichaj lázrdawa' tu dxúnzqueza' ca da  
dxennáu' Lue'  
cheę quebe guna' dul-la tábaga' Lue'.

<sup>12</sup> Ba lá'azxa nacu' Lue', Xrana' Dios.  
Bséđe neda' da ca' dxenná be'u.

<sup>13</sup> Nen dxú'aqueza' ba bzenda' bėnneache  
ca zaj naca da ca' nuchi'u cheentu'.

<sup>14</sup> Dxebéle'ędxeda' tu dxúnzqueza' ca  
dxuseđe dizra' chiu' netu',  
quez ca dxelebé benne' ca' déle'ę xel-la'  
gunní'a cheę'.

<sup>15</sup> Gulaba lazra' ca zaj naca da bdxixruj be'u  
Lue',

ne nna' xánnia' ca dxennáu' dxal-la' guntu'.  
<sup>16</sup> Bélé'eda' guna' ca da dxenná be'u,  
 ne quebe gal-la lazra' ca zaj naca xrtizru'.

*Dxebéle'edxu dxundxu da dxennáqueze*  
 Díos

<sup>17</sup> Ben gaca chawe' chia' neda', wen zrin  
 chiu',  
 na' gaca bana', ne tu gúnzqueza' ca naca  
 xrtizru'.

<sup>18</sup> Gusalaj xiaj lawa' chee nna'a  
 da zrentę ca' da zaj zua na lu da bdxixruj  
 be'u.

<sup>19</sup> Naca' ca tu benne' dxedaze' lu xęzr la xu  
 nigá.

Ben chéajni'ida' da dxenná da bdxixruj  
 be'u.

<sup>20</sup> Dxedú lazra' lawe' da tu chí'izqueze  
 dxezá lazra' guna' da ca' nuchi'u cheentu'.

<sup>21</sup> Gudil-lu' benne' ca' dxulucá'ana szren  
 cuine',

benne' wen da calela ca',  
 benne' ca' dxuluzú' chalá'ala da bdxixruj  
 be'u.

<sup>22</sup> Quebe gu'u lataj nu benne' nne' schanni'  
 chia',

na' quegá gucá'ana dítaję' neda'  
 lawe' da tu dxúnzqueza' ca dxusédenu'  
 netu'.

<sup>23</sup> Cá'anqueze benne' dxelenná bea ca' gu-  
 lenné' chia'.

Neda', wen zrin chiu', blaba lazra' ca zaj  
 naca xrba chiu'.

<sup>24</sup> Dxezaca ba lázreļa' da dxusęde dizra'  
 chiu' netu'.

Dxuluzéajni'i na neda'.

*Dutę lázrdaudxu gundxu da dxennáqueze*  
 Díos

<sup>25</sup> Zua bėnne'du xu'a lu da stębe chee xel-la'  
 gute.

Ben dipa xichaj lázrdawa' nen xrtizru'.

<sup>26</sup> Ble'eda' Lue' ca zaj naca da dxuna', na'  
 bezi'u neda'.

Bsęde neda' ca zaj naca xrba chiu'.

<sup>27</sup> Ben chéajni'ida' ca gaca guna' ca bdxixruj  
 be'u

chee gulaba lazra' ca zaj naca da zrentę ca'  
 da bęnu'.

<sup>28</sup> Dxedú lazra' lawe' da dxewi'ine lázreļa'a.  
 Bęxru chacha neda' ne chee xrtizru'.

<sup>29</sup> Quebe gu'u lataj guna' da naca na wen  
 lazre'.

Lu xel-la' dxexache lazre' chiu' bsęde neda'  
 da bdxixruj be'u.

<sup>30</sup> Bechugu lazra' guna' da naca li lazre',

na' dxe'a gunne xue guna' da ca' nuchi'u  
 cheentu'.

<sup>31</sup> Tu dxúnzqueza' ca dxusęde dizra' chiu'  
 netu'.

Xran, quebe guzú' neda' lu xel-la' stu'.

<sup>32</sup> Tu gúnzqueza' ca bdxixruj be'u,  
 gate guzéajni'idxenu' neda'.

*Dxaca lázredxu chéajni'idxu xrtizra' Díos*

<sup>33</sup> Xran, bsęde neda' chee guna' ca naca xrba  
 chiu',

na' tu gúnzqueza' ca naca na ca zrindxa zra  
 cheajsę chia'.

<sup>34</sup> Bzéajni'i neda', na' tu gúnzqueza' da bdx-  
 ixruj be'u,

na' dutę lázrdawa' guna' ca naca na.

<sup>35</sup> Ble'e neda' chee guna' da bdxixruj be'u,  
 lawe' da dxaca lázrequeza' guna' ca dxenná  
 na.

<sup>36</sup> Ben sa lazra' guna' ca dxusęde dizra' chiu'  
 netu',

chee quebe gaca' benne' wecude.

<sup>37</sup> Quebe gu'u lataj gucá'ana szrena' bedáu'  
 xia xaga ca'.

Ben dipa xichaj lázrdawa' chee guna' ca  
 dxenná xrtizru'.

<sup>38</sup> Ben ca dxenná xrtizru' da guchebe lazru'  
 chia' neda',

wen zrin chiu', chee zreba' Lue'.

<sup>39</sup> Bde chalá'ala dizra' schanni' da dxelenné'  
 chia',

da na' dxezreba', lawe' da xrlátaje zaj naca  
 xrba chiu'.

<sup>40</sup> Dxezá lazra' guna' da bdxixruj be'u.

Ben dipa xichaj lázrdawa' nen da xrlátaje  
 chiu'.

*Dxuxrén lázredxu xrtizra' Díos*

<sup>41</sup> Gudá xexache lazru' neda', Xrana' Díos.  
 Gudá guseláu' neda', ca ba guchebe lazru'  
 gunu'.

<sup>42</sup> Becheba' lau bėnnea' dxusi'ę neda' xel-la'  
 stu', gunnía'.

Dxuxrén lazra' xrtizra' Xrana' Díos.

<sup>43</sup> Ben tu séquezda' guchálaja' dizra' li lazre'  
 chiu',

lawe' da dxebeza lazra' da ca' dxuchi'u  
 cheentu'.

<sup>44</sup> Tu gúnzqueza' ca dxenná da bdxixruj  
 be'u.

Guna' na tu chí'izqueze, ne chadía cha-  
 canna.

<sup>45</sup> Láqueza' neda'

lawe' da dxe'a gunne xue guna' ca bdxixruj  
 be'u.

<sup>46</sup> Guchálajqueza' ca dxusede dizra' chiu' netu' lau benne' wenná bea ca', na' québequeze xedué'eda'.

<sup>47</sup> Wabéle'eqezda' guna' ca bdxixruj be'u, da ca' nazrí'ile'eda'.

<sup>48</sup> Dxechebe lazra' guna' ca bdxixruj be'u, da nazrí'ida', na' gulaba lazra' ca naca xrba chiu'.

*Tu zúazqueze xrtizra' Dios*

<sup>49</sup> Bsa lazre' da guchebe lazru' chia' neda', wen zrin chiu', da na' benu' dxebeza lazra'.

<sup>50</sup> Gate na' guzaca zi'a, guzúa tu da bexúe zren na neda'

lawe' da ben dipa xrtizru' xichaj lázrdawa'.

<sup>51</sup> Benne' dxulucá'ana szren cuine' belún lalé' chia' neda',

san québequeze gusana' da dxenná da bdxixruj be'u.

<sup>52</sup> Xeajsá lazra' da bchi'u cheentu' nédxudauté, Xran, na' bexaca zrena'.

<sup>53</sup> Nen duté xel-la' dxezrá'a guzúa' lu da stébe

ne chee benne' ca' dxeluné' da zrinna, benne' ca' dxuluzúe' chalá'ala da bdxixruj be'u.

<sup>54</sup> Xrba chiu' ca' gulaca na chia' ca tu da dxul-la'

gate na' zua' tu xéjr la xu zitu'.

<sup>55</sup> Chizrela xeajsá lazra' lau' Lue', Xrana' Dios, na' tu bénzqueza' ca dxenná da bdxixruj be'u.

<sup>56</sup> Lu da ba neza caní guzúa'

lawe' da tu bénzqueza' ca zaj naca da bdxixruj be'u.

*Dxebedxu dxulábadxu xrtizra' Dios*

<sup>57</sup> Da dxezá lazra' nácaquezu' Lue', Xrana' Dios.

Ba gunniá' tu gúnzqueza' ca naca xrtizru'.

<sup>58</sup> Duté lázrdawa' dxenaba' Lue' xidu' gá-calenu' neda'.

Bexache lazre' neda' ca ba gunnáu' gunu'.

<sup>59</sup> Gunná' xannia' ca zaj naca da dxuna', na' xecha lasa dxuna' ca dxusede dizra' chiu' netu'.

<sup>60</sup> Bena' ba xuzre, ne quebe guzreda' chee tu gúnzqueza' ca bdxixruj be'u.

<sup>61</sup> Xralaj chee benne' ca' dxeluné' da caléla zaj nuchelé na neda', san quebe ne gal-la lazra' ca dxenná da bdxixruj be'u.

<sup>62</sup> Dxéla dxasa' chee güe lá'ana' Lue' lawe' da xrlátaje zaj naca da ca' dxuchi'u cheentu'.

<sup>63</sup> Naca' tuze nen xúguté benne' ca' dx-elezrebe' Lue', benne' ca' tu dxelúnzqueze' da bdxixruj be'u.

<sup>64</sup> Xrana' Dios, dxezrín duté xéjr la xu xel-la' dxexache lazre' chiu'.

Bséde neda' chee guna' ca dxenná xrba chiu'.

*Zácalé'é da wnnáqueze Dios*

<sup>65</sup> Ba benu' guca chawe' chia' neda', wen zrin chiu'.

Xran, benu' na cáteze dxenná xrtizru'.

<sup>66</sup> Bséde neda' chee gueque be'eda' da naca xrlátaje, ne chee chéajni'ida' lawe' da dxéajlé'a da bdxixruj be'u.

<sup>67</sup> Nédxula ca bzéxruju' neda' gudéa' chalá'ala,

na' na'a tu dxúnzqueza' ca dxenná xrtizru'.

<sup>68</sup> Nacu' xrlátaje, ne dxunu' gaca chawe' cheentu'.

Bséde neda' guna' ca naca xrba chiu'.

<sup>69</sup> Benne' dxulucá'ana szren cuine' gulenné' chia'

da wen lazre' san duté lázrdawa' tu gúnzqueza' ca bdxixruj be'u.

<sup>70</sup> Quebe xu'u xel-la' dxéajni'i lázrdau benne' ca'.

Neda' dxezaca ba lázrelena' da dxenná da bdxixruj be'u.

<sup>71</sup> Chawe' naca bzéxruju' neda'

chee gusédia' guna' ca naca xrba chiu'.

<sup>72</sup> Cháwedxa naca da bdxixruj be'u chia' neda'

quez ca gaxúa gaxúane dumí oro, ne plata.

*Cháwele'é naca da wnnáqueze Dios*

<sup>73</sup> Nen ná'quezu' benu' neda' cáteze naca'. Bzéajni'i neda' chee gusédia' guna' ca bdxixruj be'u.

<sup>74</sup> Benne' dxelezrebe' Lue' xelélé'eng' neda'. Xelebene' lawe' da dxebeza lazra' gaca ca dxenná xrtizru'.

<sup>75</sup> Xran, ba nézqueza' xrlátaje naca da dxuchi'u cheentu', na' lu duté xel-la' li lazre' chiu' bsaca zi'u neda'.

<sup>76</sup> Lu duté xel-la' dxexache lazre' chiu' bexúe zren neda'

cáteze dxenná da guchebe lazru' chia' neda', wen zrin chiu'.



<sup>77</sup> Bexache lazre' neda' chee gaca bana' lawe' da dxezaca ba lázreġena' da bdxixruj be'u.

<sup>78</sup> Ben xelexedué'e benne' ca' dxulucá'ana szren cuina lawe' da gulenné' schanni' chia', ne quebe bi bena' chee'.

Neda' gulaba lazra' ca da bdxixruj be'u.

<sup>79</sup> Ben xelexelá' benne' ca' dxelezrebe' Lue', chee xelenne' chia', na' xulusédie' da dxusede dizra' chiu' netu'.

<sup>80</sup> Ben gaca' du lazre' ca naca xrba chiu' chee québequeze xedué'eda'.

*Gun Dios ca dxenná xrtizre'*

<sup>81</sup> Zua bénne'du xu'a lu da stebe lawe' da dxebeza' xidu' guseláu' neda', na' dxebeza lazra' gaca ca dxenná xrtizru'.

<sup>82</sup> Dxezé bxrinne xiaj lawa' lawe' da dxezá lazra' xrtizru',

dxennia': ħBátaqueze xexúe zrenu' neda'?

<sup>83</sup> Dxebizra' ca tu buzude xide zę na lu zren, san quebe dxal-la lazra' guna' ca dxenná xrba chiu'.

<sup>84</sup> ħBal-la zra gaca bana' neda', wen zrin chiu'?

ħBátaqueze gudéu' lu da ba xa' benne' ca' dxeláu zi' xuzre' neda'?

<sup>85</sup> Benne' dxulucá'ana szren cuine' gulene' tu xedxu naga cheajcházia'.

Québequeze dxelune' ca dxenná da bdxixruj be'u.

<sup>86</sup> Da líqueze zaj naca xúgute da bdxixruj be'u.

Gúcale neda' lawe' da dxeláu zi' xuzre' neda',

ne quebe bi nuna' chee'.

<sup>87</sup> Xeláteze la belutie' neda', san quebe ne gusana' guna' ca bdxixruj be'u.

<sup>88</sup> Lu xel-la' dxexache lazre' chiu' ben dipa xichaj lázrdawa', chee tu gúnzqueza' ca dxusede dizra' chiu' netu'.

*Dxéajle'dxu xrtizra' Dios*

<sup>89</sup> Xrana' Dios, tu chí'izqueze zua xrtizru' xabáa na'la.

<sup>90</sup> Xel-la' li lazre' chiu' sua na chee xúgute bénneache.

Lue' bzua chúchuquezu' xęzr la xu, na' zúaqueze na.

<sup>91</sup> Ne chee da gunnáquezu' zaj nnita xúgute da de, na' xúgute da ca' dxelún na zrin chiu'.

<sup>92</sup> La quebe bezaca ba lázreġena' da bdxixruj be'u

bache benitia' lu da guzaca zi'a.

<sup>93</sup> Cabátaqueze gal-la lazra' da bdxixruj be'u lawe' da ne chee da ca' ba btipu' lazra'.

<sup>94</sup> Chiu' Lue' naca' neda'.

Bselá neda', lawe' da dxuna' ba xuzre guna' ca bdxixruj be'u.

<sup>95</sup> Benne' dxelebéaj xichaj Dios gulenné'e neda' chee

xuluzria xi'e neda', san neda' dxulaba lazra' ca dxusede dizra' chiu'.

<sup>96</sup> Dxelé'equezda' dxeajsé chee xúgute da de lu xęzr la xu,

san da bdxixruj be'u Lue' québequeze cheajsé chee na.

*Dxaca lázredxu gúnbeadxu xrtizra' Dios*

<sup>97</sup> Dios, nazri'ilé'eda' da bdxixruj be'u.

Du zra dxulaba lazra' ca naca na.

<sup>98</sup> Ne chee da bdxixruj be'u nunu' nácadxa' sina ca benne' ca' dxeledábague' neda'

lawe' da tu zúalezqueze da bdxixruj be'u neda'.

<sup>99</sup> Dxéajni'idxeda' ca benne' ca' dxulusé-dene' neda'

lawe' da dxulaba lazra' ca dxusede dizra' chiu' neda'.

<sup>100</sup> Ba guxéajni'idxeda' ca benne' gula ca' lawe' da tu dxúnzqueza' ca dxenná da bdxixruj be'u.

<sup>101</sup> Bena' ba xuzre quebe bi da caleġa guna' chee tu gúnzqueza' ca dxenná xrtizru'.

<sup>102</sup> Quebe bsana' dxuna' da ca' nuchi'u cheęntu'

lawe' da Lué'queze bsédenu' neda'.

<sup>103</sup> Xrtizru' naca na ca tu da zírreġe lu dxu'a.

Nácadxa na zixre ca bzrina'dau' lu dxu'a.

<sup>104</sup> Ne chee da bdxixruj be'u naca' benne' sina.

Chee le' na' dxecuédeda' xúgute da wen lazre'.

*Xrtizra' Dios dxuzéajni'i na dxi'u*

<sup>105</sup> Ca tu xi' naca xrtizru' naga dxedá', da dxusení na neza xu'a.

<sup>106</sup> Bzétaja' Dios, ne guchebe lazra'

tu gúnzqueza' ca nuchi'u cheęntu' da naca na xrlátaje.

<sup>107</sup> Dxezaca zílę'a.

Xrana' Dios, btipa lazra' cáteze guchebe lazru' gunu'.

<sup>108</sup> Xrana' Dios, dxata' xueda' Lue' si'u da dxue lá'ana' Lue',  
ne gusédenu' neda' guna' ca nuchi'u cheentu'.

<sup>109</sup> Tu zúazqueza' lu da stebe chee xel-la' gute,  
san québequeze ne gal-la lazra' guna' ca bdxixruj be'u.

<sup>110</sup> Benne' dxelebéaj xichaj Dios buluzale' xralaj  
da queła na neda'  
san neda' quebe bsana' dxuna' ca bdxixruj be'u.

<sup>111</sup> Ba gucá'a da dxusede xrtizru' neda' chee gaca na  
da gápaqueza' chadía chacanna  
lawe' da zaj naca xrtizru' da dxezaca ba lázrele'a.

<sup>112</sup> Zúatequeze lázrdawa' guna' ca zaj naca xrba chiu'  
tu chí'izqueze, ca zrindxa zra cheajsé chia'.

*Bexácadxu chawe' ne chee xrtizra' Xrá-nadxu*

<sup>113</sup> Dxecuídada' benne' ca' dxelunę' láweze da xrlátaje,  
san nazrí'ida' da dxenná da bdxixruj be'u.

<sup>114</sup> Nacu' Lue' ca tu xu'u naga zua chawa', ne ca tu  
da dxucu'uj na neda',  
lawe' da dxebeza lazra' gaca na ca dxenná xrtizru'.

<sup>115</sup> Le gucuasa naga zua', le'e, benne' wen da caleła,  
lawe' da tu gúnzqueza' ca bdxixruj bea Dios chia'.

<sup>116</sup> Bze chacha neda' cáteze dxenná xrtizru',  
na' gaca bana',  
ne quebe xedué'eda' chee da na' dxebeza lazra'.

<sup>117</sup> Bze chacha neda', na' la',  
ne tu xezaca ba lázrequeza' ca naca xrba chiu'.

<sup>118</sup> Bchuchu bléaju' xúgute benne' ca' bulu-saę' ca naca  
xrba chiu'

lawe' da wen lazre' naca xel-la' sina chee benne' ca'.

<sup>119</sup> Ca bebe bzria xi'u xúgute benne' ca' dx-elebéaj xichaje'  
Lue' lu xęzr la xu nigá.

Chee le na' nazrí'ida' da dxusede dizra' chiu' netu'.

<sup>120</sup> Dxezrize beła' dxen chia' lawe' da dx-ezreba' Lue',

ne dxezreba' da dxuchi'u cheentu' da naca na xrlátaje.

*Dxal-la' gundxu ca dxenná xrtizra' Xrá-nadxu*

<sup>121</sup> Ba bena' ca da nuchi'u cheentu', ne ca naca da xrlátaje.

Quebe gudéu' neda' lu na' benne' ca' dxu-luchínene' neda'.

<sup>122</sup> Guchebe lazre' chia' gunu' gaca chawe' chia'.

Quebe gu'u lataj benne' ca' dxulucá'ana szren cuine'  
xuluchínene' neda' xadía.

<sup>123</sup> Guzé bxxrinne xiaj lawa' lawe' da dxebeza' xidu'  
guseláu' neda',

ne guchi'u cheentu' ca dxenná xrtizru'.

<sup>124</sup> Dute xel-la' dxexache lazre' chiu' ben gaca chawe'

chia' neda', wen zrin chiu',  
ne bseđe neda' guna' ca naca xrba chiu'.

<sup>125</sup> Naca' wen zrin chiu'.

Bzėjni'i neda' chee gúnbe'a da dxusede dizra' chiu' netu'.

<sup>126</sup> Xrana' Dios, ba bzrin zra bi gunu',  
lawe' da ba buluzúę' chalá'ala da bdxixruj be'u.

<sup>127</sup> Chee le na' neda' nazrí'idxeda' da bdxixruj be'u Lue'

quézcala oro, ne quézcala galega oro.

<sup>128</sup> Chee le na' dxéqueda' zaj nácadxa li lazre'  
da bdxixruj be'u ca xúgute da de,  
na' dxecuídada' xúgute da zaj naca na da wen lazre'.

*Dxaca lázredxu gundxu ca dxenná xrtizra' Dios*

<sup>129</sup> Dxebánentu' ca dxusede dizra' chiu' netu'.

Chee le na' du lazra' tu dxúnzqueza' ca dxenná na.

<sup>130</sup> Gate nu dxuzájla' a ca naca xrtizru', dxu-sani na.

Dxun na dxelėjni'i benne' dxexruj lazre' ca'.

<sup>131</sup> Guxá dxu'a, ne gucá'a lazra'

lawe' da dxezá lazra' gúnbe'a da bdxixruj be'u.

<sup>132</sup> Gunná' neda', ne bexache lazre' neda',  
ca tu dxúnzquezu' chee benne' ca' zaj nazrí'ine' Lue'.

<sup>133</sup> Ben tu gúnzqueza' ca dxenná xrtizru',  
ne quebe gu'u lataj da zrinnaj nna be'e na neda'.

<sup>134</sup> Bselá neda' lu na' benne' xichaj zra'a ca',

na' tu gúnzqueza' ca dxenná da bdxixruj be'u.

<sup>135</sup> Ben gaca chawe' chia' neda', wen zrin chiu',  
ne bsədə neda' guna' ca zaj naca xrba chiu'  
ca'.

<sup>136</sup> Nisa gudxezra' guca na ca tu xegu nisa  
lawe' da quebe dxelún bénneache ca bdx-  
ixruj be'u.

*Da li naca da dxenná Xránadxu*

<sup>137</sup> Xrana' Dios, xrlátaje nacu' Lue',

ne li lazre' naca ca dxuchi'u cheentu'.

<sup>138</sup> Da dxusede dizra' chiu' netu', da na' bzu'  
lu na'ntu',  
naca na da li, ne da li lazre'.

<sup>139</sup> Dxedú lazra' lawe' da dxé'le'a gunne xue  
lawe' da gulal-la lazre' benne' ca' dx-  
eledábage' neda'  
ca zaj naca xrtizru'.

<sup>140</sup> Du lázrele'ę naca xrtizru',  
na' nazrí'ida' neda' na, naca' wen zrin chiu'.

<sup>141</sup> Ddexruj lazre' naca', na' dxuluzúę' neda'  
chalá'ala,

na' quebe ne gal-la lazra' da bdxixruj be'u.

<sup>142</sup> Tu chí'izqueze zua da dxuchi'u cheentu',  
na' da li naca da bdxixruj be'u.

<sup>143</sup> Da dxezaca zi'a, ne da stębe zua' zaj  
nuchuchuj na neda',  
san dxezaca ba lázrelena' da bdxixruj be'u.

<sup>144</sup> Tu chí'izqueze naca li lazre' da dxusede  
dizra' chiu'.

Bzėjni'i neda', na' gaca bana'.

*Dxal-la' gulaba lázredxu da gunná Dios*

<sup>145</sup> Dutę lázrdawa' dxuláwizra' Lue', Xrana'  
Dios.

Ben gaca chawe' chia', na' tu gúnzqueza' ca  
dxenná xrba chiu'.

<sup>146</sup> Dxuláwizra' Lue'.

Bselá neda', na' tu gúnzqueza' ca dxusede  
dizra' chiu' netu'.

<sup>147</sup> Bálala dxasa', na' dxuláwizra' Lue'.

Dxebeza lazra' gaca ca dxenná xrtizru'.

<sup>148</sup> Dxenná'aza' bedú xela,  
cheę gulaba lazra' da bdxixruj be'u.

<sup>149</sup> Dutę xel-la' dxexache lazre' chiu' bene  
chi'a.

Xrana' Dios, da bchi'u cheentu' btipa lazra'.

<sup>150</sup> Benne' dxeláu zi' xuzre' neda' ba zaj zre'ę  
xelune' chia'  
da calęla.

Zaj nusane' da dxenná da bdxixruj be'u.

<sup>151</sup> Xrana' Dios, zu' Lue' gagu naga zua',  
ne da li zaj naca xúgutę da bdxixruj be'u.

<sup>152</sup> Gate nate ba núnbe'a da dxusede dizra'  
chiu' netu',  
da na' nuzú' cheentu' tu chí'izqueze.

*Da gunná Dios dxuzėjni'i dxi'u*

<sup>153</sup> Gunná' xque ca dxezaca zi'a, ne bselá  
neda'

lawe' da quebe ne gal-la lazra' da dxenná da  
bdxixruj be'u.

<sup>154</sup> Bechebe waláz chia', ne bexa'u neda'.

Btipa lazra' nen xrtizru'.

<sup>155</sup> Stębele'ę naca xelélé benne' ca' dxelebéaj  
xíchaje'

Lue', Dios,

lawe' da quebe dxelebé'ę gunne xue xelune'  
ca naca xrba chiu'.

<sup>156</sup> Xrana' Dios, dxexache lázrele'u bén-  
neache chiu'.

Btipa lazra' cáteze dxenná xrtizru' gunu'.

<sup>157</sup> Zánete zaj naca benne' ca' zaj nau zi'  
xuzre' neda',

ne benne' ca' dxeledábage' neda',

san quebe ne gusana' dxuna' ca dxusede  
dizra' chiu' netu'.

<sup>158</sup> Ble'eda' benne' ca' dxelún lazre', na' dx-  
egúteda' benne' ca'

lawe' da quebe dxelune' ca dxenná xrtizru'.

<sup>159</sup> Gunná'xque, Xran, ca nazrí'ida' da bdx-  
ixruj be'u.

Dutę xel-la' dxexache lazre' chiu', btipa  
lazra'.

<sup>160</sup> Da líqueze zaj naca xúgutę xrtizru',

ne tu chí'izqueze zaj naca da dxuchi'u  
cheentu' lu  
da xrlátaje chiu'.

*Da gunná Dios dxutipa lázredxu*

<sup>161</sup> Benne' ca' dxelenná be'ę dxeláu zi' xuzre'  
neda'

na' quebe bi nuna' cheę'.

Dutę lázrdawa' dxezreba' ca zaj naca xr-  
tizru'.

<sup>162</sup> Dxebéle'ęda' lu da dxenná xrtizru'

ca dxebe bénnea' dxezrel-lene' tu xel-la'  
gunná'a zrente.

<sup>163</sup> Dxecúdeda', ne dxegúteda' da wen lazre'.  
Nazrí'ida' da dxenná da bdxixruj be'u.

<sup>164</sup> Gazre lasa tu zra dxue lá'ana' Lue'

lawe' da xrlátaje naca ca dxuchi'u cheentu'.

<sup>165</sup> Dxelebeza zri lázrele'ę benne' ca' zaj  
nazrí'ine'

da bdxixruj be'u,

na' quebe bi de da gun na cheajlecházie'.

<sup>166</sup> Xrana' Dios, dxebeza' Lue' xidu' guseláu'  
neda',

ne tu dxúnzqueza' ca naca da bdxixruj be'u.

<sup>167</sup> Dute lázrdawa' tu dxúnzqueza' da dxusede dizra' chiu' netu', ne nazrí'ile'eda' ca naca na.  
<sup>168</sup> Tu dxúnzqueza' ca naca da bdxixruj be'u, ne ca dxusede dizra' chiu' netu' lawe' da dxelé'equeznu' xúgute da dxuna'.

*Dxebéle'eledxu xrtizra' Dios*

<sup>169</sup> Xrana' Dios, bene da dxuláwizra' Lue'. Bzéajni'i neda' ca dxenná xrtizru' gunu'.  
<sup>170</sup> Bene da dxenaba' lau Lue'. Bselá neda' ca dxenná xrtizru' gunu'.  
<sup>171</sup> Tu güe lá'anzqueza' Lue', Xran, gate ba nusédenu' neda' guna' ca naca xrba chiu'.  
<sup>172</sup> Tu guchálajzqueza' ca naca xrtizru' lawe' da xrlátaje naca ca dxenná be'enu' netu'.  
<sup>173</sup> Guzúatequeze gácalenu' neda' lawe' da dxuna' ba xuzre guna' ca bdxixruj be'u.  
<sup>174</sup> Dxezá lazra' guseláu' neda', Xrana' Dios. Dxezaca ba lázrelena' da bdxixruj be'u.  
<sup>175</sup> Ben gaca bana', na' güe lá'ana' Lue', na' da dxuchi'u chia' xelácalę na neda'.  
<sup>176</sup> Gudéa' chalá'ala ca dxedá tu zrila' naníteba'.  
 Bexilaj neda', wen zrin chiu', lawe' da quebe ne gal-la lazra' da bdxixruj be'u.

## 120

<sup>1</sup> Gate guzúa' lu da stebe bláwizra' Xránadxu Dios, na' Le' gúcalęne' neda'.  
<sup>2</sup> Bselá neda', Xrana' Dios, lu na' benne' wen lazre' ca', ne lu na' benne' dxelezí xę'e ca'.  
<sup>3</sup> ¿Bizra gunna Dios le'e, benne' dxelezí xę'e?  
 ¿Bizra da ba neza gaca na cheęle gate gudęę' le'e lu da zi' da xa'?  
<sup>4</sup> Gudęę' le'e lu na' benne' ca' xuludęę' le'e xaga nalá xęche'ze, ne xuluzręę' le'e xi' galaj.  
<sup>5</sup> Edxugúa neda'.  
 Dxaca chia' ca zúaqueza' ládujla benne' Mesec, ne ca zua' tu lu xu'u xide cheę benne' Cedar.  
<sup>6</sup> Da zrente ba guzúa' ládujla benne' caní dxuluzúę' chalá'ala xel-la' dxebeza zri lazre'.

<sup>7</sup> Neda' dxezá lazra' gata' xel-la' dxebeza zri lazre'.  
 Gate dxuchálaja' cheęn, dxeledíl-lalę benne' ca' neda'.

## 121

<sup>1</sup> Chisa xíchaja' nna'a da dxelún bénneache lu xi'a ca'.  
 ¿Gazra za' da gácalę na neda'?  
<sup>2</sup> Da gácalę na neda' za' lu na' Xránadxu Dios, Bénnea' beņę' xabáa, ne xęzr la xu.  
<sup>3</sup> Quebe gu'e lataj cheajcházıu'.  
 Quebe gase Bénnea' dxuxúequeze' lue'.  
<sup>4</sup> Gunná' xque, quebe te bchigala cheę Bénnea'.  
 Québequeze gase Bénnea' dxuxúequeze' benne' Israel ca.  
<sup>5</sup> Xránadxu Dios dxucú'uję' lue'.  
 Xránadxu Dios zue' cuitu' xabęla dxęgu'e lue' zrul-la.  
<sup>6</sup> Quebe guzeze gubizra lue' te zra, ne quebe bi gune beu' lue' chizrela.  
<sup>7</sup> Xranu' Dios guxúequeze' lue' cheę quebe bi da calęla gaca na chiu'.  
 Guxúequeze' bénne'du xu'u.  
<sup>8</sup> Xránadxu Dios guxúequeze' lue' gate dxedxúaju', ne gate dxexú'u, na'a zra, ne chadía chacanna.

## 122

<sup>1</sup> Gubélena' benne' ca' gulę'e neda':  
 "Chéajdxu xu'u lizre Xránadxu Dios."  
<sup>2</sup> Na'a zúadxu nigá, zęntu' dxa xu'u ze'e da naxechaj lue', xęzre Jerusalén.  
<sup>3</sup> Jerusalén naca na tu xęzre da belexunę', na' naca na xrtante, ne dxé'le'e na cháwedau'.  
<sup>4</sup> Lu xęzre na' zjaca xúgute cuen bénneache zaj dę'e Xránadxu Dios.  
 Dxelunę' ca dxenná dizra' da guzre Dios benne' Israel ca', cheę xelúe lá'ane' La Xránadxu Dios.  
<sup>5</sup> Lu xęzre na' zaj dxe' benne' ca' dxuluchi'e cheę benne' Israel ca', naga zaj dxe' benne' xrtia David, benne' ca' dxeleonná be'e.  
<sup>6</sup> Le naba lau Dios gata' xel-la' dxebeza zri lazre' lu xęzre Jerusalén,

chee xepele ban da dxelún benne' ca' zaj nazrí'ine' xezre na'.

<sup>7</sup>Dxenábantu' Dios sua xel-la' dxebeza zri lazre'

lu'u'le ze'e da naxechaj na lue', Jerusalén, ne chee xelezrá' chawe' benne' zaj xu'e xu'u zren chiu'.

<sup>8</sup>Nazrí'ida' le sa' ljwezra', ne bi ljwezra' ca', na' dxenní'a':

Gata' xel-la' dxebeza zri lazre' chiu', xezre Jerusalén.

<sup>9</sup>Lawe' da nazrí'ida' xu'u lizre Xránadxu Dios

dxuna' ba xuzre gaca chawe' chiu'.

## 123

<sup>1</sup>Chisa xíchaja' nna'a naga zu', Xran, naga zu' Lue', zu' xabáa na'la.

<sup>2</sup>Ca dxun tu bi wen zrin dxenná'abe' bi nna xránabe',

ne ca dxun nu'ula wen zrin dxenná'abe' bi nna nu'ula xránabe',

caní dxenná'adxu bi nna Xránadxu Dios ca zrindxa zra xexache lazre' cheedxu.

<sup>3</sup>Bexache lazre' cheentu', Xránantu' Dios. Bexache lazre' cheentu', lawe' da dxedú lázrentu'

lawe' da dxulucá'ana ditaj bénneache netu'.

<sup>4</sup>Dxedú lázrentu' lawe' da dxelún lala benne' gunní'a ca'

cheentu',

ne dxulucá'ana ditaj netu', benne' ca' dxulucá'ana szren cuine'.

## 124

<sup>1</sup>Chela ca gúcale Xránadxu Dios dxi'u.

Caní dxal-la' xelenná benne' Israel ca' na'a.

<sup>2</sup>Chela ca gúcale Xránadxu Dios dxi'u gate guledíl-lale benne' ca' dxi'u,

<sup>3</sup>na' buluzría xi'te' dxi'u

lu duté xel-la' dxelezzá'a zrenté chee',

<sup>4</sup>ne guca cheedxu ca dxaca chee benne' dxugacu nísadau' le', da na' gute na le'.

<sup>5</sup>Chela guca caní cheedxu, na' bétete da na' dxi'u.

<sup>6</sup>Dxal-la' xedxu Xránadxu Dios; Xcalenu', lawe' da quebe be'e lataj benne' ca' xuluzría xi'e dxi'u.

<sup>7</sup>Beladxu ca dxelá tu bxinne lu xixruj chee benne' wezén bxinne.

Bzria xi' Xránadxu xel-la' dxenná bea chee benne' ca', na' beladxu.

<sup>8</sup>Naca Xránadxu Dios Bénnea' dxácale' dxi'u,

Bénnea' bénqueze' xabáa, ne xezr la xu.

## 125

<sup>1</sup>Benne' ca' dxuluxrén lazre' Xránadxu Dios zaj naque' ca xi'a Sión,

da quebe nu seque' gutá, san tu chí'izqueze zua chacha na.

<sup>2</sup>Ca zaj zua xi'a ca' da zaj naxechaj na Jerusalén,

zua Xránadxu Dios, dxuxúequeze' bénneache chee' na'a zra,

ne chadía chacanna.

<sup>3</sup>Quegá tu chí'izqueze xelenná bea benne' ca' dxelune'

da calela lu xezr la xu chee benne' xrlátaje ca',

chee quebe xelaca benne' xrlátaje ca' tuzen benne'

wen da zrinna' ca'.

<sup>4</sup>Xrana' Dios, ben gaca chawe' chee benne' xrlátaje ca',

ne chee benne' ca' zaj naque' li lazre'.

<sup>5</sup>Benne' ca' dxelebéaj xichaj Dios chee xelune' da calela,

xucuasa Xránadxu Dios benne' ca' tu zren nen benne' ca'

dxelune' da zrinna'.

Dxenaba' gata' xel-la' dxebeza zri lazre' chee benne' Israel ca'.

## 126

<sup>1</sup>Gate Xránadxu Dios bselé' dxi'u lu na' benne' zitu' ca',

ne begu'e dxi'u lu xezre Sión, gúquedxu dxennedxu xela.

<sup>2</sup>Nadxa bzrízredxu, ne be lánadxu Xránadxu Dios.

Nadxa gulenná benne' xezr la xu ca':

“Da zrenté ca' ben Dios, Xrana benne' ca', chee'.”

<sup>3</sup>Da zrenté ca' ben Xránadxu Dios cheedxu dxi'u,

na' zúadxu lu da ba neza zrenté.

<sup>4</sup>Bselá Xránadxu dxi'u lu na' benne' zitu' ca',

na' bezrindxu lu xezr la xu cheedxu

ca dxezrín nisa guba'u lu xegu bizre ca'.

<sup>5</sup>Benne' ca' dxelebezre' tie' dxelaze',

nen xel-la' dxelebé xelexezi'e lina.

<sup>6</sup>Dxebezre tie' zéaje' nu'e binne cháwe'du ca',

na' duté xel-la' dxebé dxezrine' zeajnu'e lina chee'.

## 127

<sup>1</sup> Chela ca zúale Xránadxu Dios benne' ca' dxelunę' tu xu'u  
dáceze naca xelunę' zrin na'.  
Chela ca dxuxúe Xránadxu Dios tu xęzre,  
dáceze naca dxuluxúe benne' ca' le na.  
<sup>2</sup> Dáceze naca dxásazele che zílala,  
ne dxunle zrin cáteze dxalaj gubizra ca  
dxebíadxu na,  
ne dutę xel-la' dxudía dxezile da gágule,  
lawe' da dxunna Dios da xelagu benne' ca'  
nazr'ine'  
dxácate na' dxelásię'.  
<sup>3</sup> Le nna' xque, zaj naca zr'inedxu bi ca'  
benna Xránadxu dxi'u.  
Zaj naca be' tu da gunni'a zrentę.  
<sup>4</sup> Zr'inedxu dxelálajbe' cheędxu gate ne  
nácadxu cuide'  
zaj nácabe' ca xaga nalá xéche'ze ca' da  
nuxru benne'  
zeje' wedil-la.  
<sup>5</sup> Ba neza zrentę naca na cheę bénnea'  
nuxruę' zánete  
xaga nalá xéche'ze caní.  
Québequeze xedué'ene' gate zri'a cheę'  
tu zren nen benne' ca' dxeledíl-lalęne' le'.

## 128

<sup>1</sup> Ba neza zrentę naca na cheę benne' ca'  
dxelezrebe' Xránadxu Dios,  
benne' ca' tu dxelúnzqueze' ca nadxixruj  
be'e Dios.  
<sup>2</sup> Gate dxagu' da dxezi'u cheę zrin da nunu'  
gaca chiu' tu da ba neza, ne gaca chawe'  
chiu'.  
<sup>3</sup> Gaca zru'ulu' ca tu lba uva da dxebía da  
zixre  
cuita xu'u lizru',  
na' zri'inu' ca' xelácabe' ca xaga olivo ca' zaj  
zę  
dxu'a ga dxagu'.  
<sup>4</sup> Caní gun Xránadxu gaca chawe' cheę bén-  
nea' dxezrebe' Le'.  
<sup>5</sup> Dxenaba' gun Xránadxu, zuę' xi'a Sión,  
gaca chawe' chiu',  
cheę le'enu' gaca chawe' cheę xęzre  
Jerusalén xúgute zra naca banu',  
<sup>6</sup> ne cheę le'enu' zri'ine zre su'.  
Dxenaba' gata' xel-la' dxebeza zri lazre'  
cheę benne' Israel ca'.

## 129

<sup>1</sup> Zúadxu lu da stébele'ę gate nácatedxu  
cuide',  
waca xelenná benne' Israel ca'.

<sup>2</sup> Zúadxu lu da stébele'ę gate nácatedxu  
cuide'  
san quebe buluzria xi'ę dxi'u.  
<sup>3</sup> Belunę' we' cúzrudxu gate belinę' dxi'u  
xide,  
na' gulaca cúzrudxu ca xęzr la xu naga  
dxdé xia cheę bezre.  
<sup>4</sup> Xlátaje naca Xránadxu Dios.  
Bselé' dxi'u lu na' benne' ca' buluchínene'  
dxi'u xadíaze.  
<sup>5</sup> Ben cheajlechaze, ne xelebígaqueze  
xúgute benne' ca' dxelecuídenę' benne'  
Sión ca'.  
<sup>6</sup> Ben xelaque' ca xixre'du ca' dxelebía na  
xrgu'u  
da dxelebizre na gate ne zaj nadxé'ene na,  
<sup>7</sup> da na' quebe nu benne' dxexeque'ę na,  
ne quebe seque' nu benne' gunę' na tu cheaj  
weaj.  
<sup>8</sup> Quebe xelenná benne' dxeledéę' naga zaj  
zria na:  
Dxenábantu' gun Xránantu' Dios gaca  
chawe' cheęle.  
Lu La Xránantu' Dios dxenábantu' gaca  
chawe' cheęle.

## 130

<sup>1</sup> Ga ni zua' lu da stébele'ę dxuláwizra' Lue',  
Xrana' Dios.  
<sup>2</sup> jXran, bene chi'al  
jBę naga da dxenaba' lau!  
<sup>3</sup> Xrana' Dios, chela nna' xánniu' ca naca  
dul-la nabágantu'  
jnúzraqueze xegá'ana xrlátaje lau Lue'?'  
<sup>4</sup> Lué'quezu' dxunite lau' cheęntu'  
cheę gápantu' Lue' ba lá'ana.  
<sup>5</sup> Dutę lázrdawa' dxebeza lazra' Xránadxu  
Dios,  
ne dxuxrén lazra' xrtizre'.  
<sup>6</sup> Dxebeza lazredxa' Xránadxu Dios  
cáqueze dxelún benne' ca' dxuluxúę' xęzre  
ca',  
dxelebeze' chaní',  
ne cáqueze dxelún benne' ca' dxelicha  
bchigala,  
dxelebeze' chaní'.  
<sup>7</sup> Benne' Israel ca' dxal-la' xelebeza lazre'  
Xránadxu Dios  
lawe' da dxexache lazre' Xránadxu bén-  
neache cheę',  
ne dxexá'awe' benne' ca' lu na' benne'  
guledábaguę' Le'.  
<sup>8</sup> Dios xexá'awe' benne' Israel ca'  
lu na' xúgute dul-la da zaj nabague'.

## 131

<sup>1</sup> Xrana' Dios, ba bsana' xel-la' dxucá'ana szren cuina',  
ne ba bcuasa' xel-la' dxeque xrlátaje cuina'.  
Quebe dxulapa napa' lu da zaj naca szren,  
da ca' quebe naca chia' gulapa' na'a.

<sup>2</sup> Quebe bi gunnía', ne guzúa' zrize ca tu bi dxe'ene  
za bexuzrtę gúzrebe'.

Naca bénne'du xu'a ca tu bi dxe'ene za bexuzrtę gúzrebe'.

<sup>3</sup> Le cueza lazre' Xránadxu Dios, le'e, benne' Israel  
na'a zra, ne chadía chacanna.

## 132

<sup>1</sup> Bsa lazre', Xrana' Dios, ca guca cheę David,  
ne ca guzaca zi'e,

<sup>2</sup> ne ca da guchebe lazre' gunę' chiu',  
da guchebe lazre' lau', Dios wal-la cheę Jacob.

<sup>3</sup> Gunné': "Québequeze chu'a xu'u lizra',  
ne québequeze gáta'a ga dxasia'

<sup>4</sup> ne québequeze guchúdia' xiaj lawa'  
ne québequeze gasia'

<sup>5</sup> ca zrindxa zra ba bęna' tu xu'u lizre Xrana'  
Dios  
naga súaqueze Dios wal-la cheę Jacob."

<sup>6</sup> Bénedxu zua xí'ina lá'azxa naga xu'u xel-  
la' wezría  
lu xęzr la xu Efrata,  
na' bezréledxu na lu xęzr la xu cheę bén-  
nea' le' Jaar.

<sup>7</sup> Gunnantu': Chéajntu' naga zua Dios  
cheęntu'.

Guzú zřibentu' zran ni'a Le'.

<sup>8</sup> Guxasa, Xránantu' Dios, nen xí'ina naga  
xu'u  
xel-la' wezría chiu',  
ne gudá lu xi'a naga súaquezu' Lue'.

<sup>9</sup> Ben xelún bxruze chiu' ca' da naca xrlá-  
taje,  
ne xelebezre xa'a xúgute bęnneache chiu',  
lu dute  
xel-la' dxelebé cheę'.

<sup>10</sup> Lawe' da nazr'ínu' David, wen zrin chiu',  
quebe guzú' chalá'ala wenná bea na' ba  
guca'u Lue'.

<sup>11</sup> Da líqueze bzetaj cuina Xránadxu Dios,  
guchebe lazre' cheę David quebe gucuase'  
ca da gunné'.

Gunné': "Guna' xelenná bea zri'ine zre su'  
naga

dxenná béaquezu' Lue'.

<sup>12</sup> Che zri'ínu' ca' tu xelúnzqueze' ca naca  
xel-la' wezría chia',  
ne ca naca xrtizra' da gusededa' le',  
zri'ínu' ca' tu xelenná béazqueze' naga  
dxenná be'u lue'."

<sup>13</sup> Lawe' da gucá'a Xránadxu Dios xęzre Sión,  
guca lazre' sua xu'u lízrequeze' ga na'.

<sup>14</sup> Gunné': "Tu gácazqueze lataj nigá naga  
súaqueza' neda'.

Tu súazqueza' nigá lawe' da caní dzezaca ba  
lazra' guna'.

<sup>15</sup> Guna' gáta'le'ę lina cheę benne' ca',  
ne guna' xelelaj benne' xache' ca' xeta.

<sup>16</sup> Guna' xelún bxruze chia' ca' da naca  
chawe',

na' xelebezre xa'a xúgute bęnneache chia'  
lu dute

xel-la' dxelebé cheę'.

<sup>17</sup> Lataj na' guna' xexaca xel-la' dxenná bea  
cheę David.

Guna' xelezúa na' zri'ine zre sua wenná bea  
na'

ba gucá'a neda'.

<sup>18</sup> Guna' xeleque zréaje benne' guledábague'  
Le',

na' guna' chepe ban xel-la' dxenná bea cheę  
David na'."

## 133

<sup>1</sup> Le nna' xque, xrtantę naca, ne cháwe'le'ę  
naca

gate zaj nazraga bęnneache cheę Dios, zaj  
naque' tuze.

<sup>2</sup> Naca na ca tu da za da dxuluzúa xíchaje',  
da dxedínnetę na dxu'a lawe',

ca na' dxedínnetę na lu luzru Aarón,  
ne dxedínnetę na ga zria zře'.

<sup>3</sup> Dxedínnetę na ca xrlę'ęla da dxexruj lu xi'a  
Hermón,

ne dxexruj na lu xi'a Sión lawe' da gun  
Xránadxu Dios

gaca chawe' cheę bęnneache zaj zře'ę na',  
ne gunne' benne' ca' xel-la' nabán da zeajlı  
canna.

## 134

<sup>1</sup> Le na' xque, le güe lá'ana Xránadxu Dios,  
le'e, nácale wen zrin cheę Xránadxu,  
zrale xu'u lizre Xránadxu chizreła.

<sup>2</sup> Le chísa na' le lau lataj lá'azxa,  
ne le güe lá'ana Xránadxu Dios.

<sup>3</sup> Dxenaba' lau Xránadxu zuę' Sión gunę'  
gaca chawe' chiu',

naque' Bęnnea' bęne' xabáa, ne xęzr la xu.

## 135

<sup>1</sup> ¡Le güe lá'ana La Xránadxu Dios!  
 ¡Le güe lá'ana Le', le'e, wen zrin chee Xránadxu,  
<sup>2</sup> le'e zrale xu'u lizre Xránadxu Dios,  
 lu chale'aj chee xu'u naga zúaqueze Dios!  
<sup>3</sup> ¡Le güe lá'ana Xránadxu lawe' da naque'  
 xrlátaje!  
 ¡Le gul-la da güe lá'anale La Le', lawe' da  
 naque' zri'i lazre'!  
<sup>4</sup> Xránadxu Dios ba guqué'e zri'ine zre sua  
 Jacob.  
 Guqué'e zri'ine zre sua Israel chee xelaque'  
 bènneache chee'.  
<sup>5</sup> Nézquezdxu szrentę naca Xránadxu Dios.  
 Xránadxu naque' szrendxa ca xúgute dıos  
 chee benne' zitu' ca'.  
<sup>6</sup> Xúgute da dxaca lazre' Xránadxu gune',  
 dxune' na zran xabáa, ne lu xęzr la xu,  
 ne lu nısadau', ne lu da situj chee nısadau'  
 ca'.  
<sup>7</sup> Dxune' zá'aca beuj dapa saca chee xęzr la  
 xu.  
 Dxune' dxelepe xesa guziu' gate dxaca xiuj.  
 Dxune' dxaca be' gáteteze.  
<sup>8</sup> Bene' gulate bi biu nedxu chee benne'  
 Egipto ca'.  
 Gulate bi biu nedxu chee bènneache,  
 ne beadu ca' chee bę xixre' chee' ca'.  
<sup>9</sup> Bene' xel-la' waca ca' da za xabáa, ne da  
 zrentę ca'  
 da bene' lu xęzr la xu chee benne' Egipto  
 ca',  
 da ca' ben Dios da guca chee Faraón,  
 ne chee xúgute wen zrin chee Faraón na'.  
<sup>10</sup> Bzria xi'e bènneache zánete cue' xęzr la  
 xu ca',  
 ne betię' benne' wenna' bea ca',  
 benne' zaj nápal'e xel-la' dxeleenná bea.  
<sup>11</sup> Betię' Sehón, wenna' bea chee benne'  
 amorreo ca',  
 ne Og, wenna' bea chee benne' Basán ca',  
 ne xúgute benne' wenna' bea chee benne'  
 Canaán ca'.  
<sup>12</sup> Bequé'e xęzr la xu nigá lu na' benne'  
 wenna' bea ca',  
 na' bnézruje' na lu na' bènneache chee',  
 benne' Israel ca'.  
<sup>13</sup> Xrana' Dios, chadıa chacanna zua lau'  
 Lue'.  
 Tu cheajlesá lázrezqueze bènneache Lue'.  
<sup>14</sup> Xránadxu Dios guchi'e chee bènneache  
 chee',

ne xexache lazre' cheedxu dxi'u, wen zrin  
 chee'.  
<sup>15</sup> Bedau' xia xaga ca' chee benne' xęzr la xu  
 ca'  
 zaj naca na oro, ne plata.  
 Zaj naca na da belún bènneache.  
<sup>16</sup> Zaj zua dxu'a na san quebe dxeleenné na.  
 Zaj zua lau na san quebe dxelelé'e na.  
<sup>17</sup> Zaj zua naga na san quebe dxelén na, ne  
 quebe  
 dxeleca'a na be'.  
<sup>18</sup> Benne' ca' dxelune' na zaj nácaqueze' ca  
 léqueze na,  
 ne canı zaj naca xúgute benne' dxuluxrén  
 lazre' na.  
<sup>19</sup> Le'e, benne' xrtıa Israel, le güe lá'ana  
 Xránadxu Dios.  
 Le'e, benne' xrtıa Aarón, le güe lá'ana Xránadxu  
 Dios.  
<sup>20</sup> Le'e, benne' xrtıa Levı, le güe lá'ana Xránadxu  
 Dios.  
<sup>21</sup> Le'e, núlale dxezrebele Xránadxu Dios, le  
 güe lá'ana  
 Xránadxu Dios.  
<sup>22</sup> Le'e, zrale xęzre Sıón, le güe lá'ana Xránadxu  
 Dios,  
 Bènnea' zúaqueze' xęzre Jerusalén.

¡Gaca ba lá'azxa Xránadxu Dios!

## 136

<sup>1</sup> ¡Le güe lá'ana Xránadxu Dios, Benne' xrlá-  
 taje!  
 ¡Chadıa chacanna dxexache lazre' dxi'u!  
<sup>2</sup> ¡Le güe lá'ana Dios, naque' szrénędxa ca  
 zaj naca dıos  
 chee xęzr la xu ca'!  
 ¡Chadıa chacanna dxexache lazre' dxi'u!  
<sup>3</sup> ¡Le güe lá'ana Xránadxu, naque' szrén-  
 ędxa ca zaj naca  
 xrana xęzr la xu ca'!  
 ¡Chadıa chacanna dxexache lazre' dxi'u!  
<sup>4</sup> ¡Le güe lá'ana Dios na', dxune' xel-la' waca  
 zri'a ca'!  
 ¡Chadıa chacanna dxexache lazre' dxi'u!  
<sup>5</sup> ¡Le güe lá'ana Dios na', bene' xabáa dute  
 xel-la' sina chee'!  
 ¡Chadıa chacanna dxexache lazre' dxi'u!  
<sup>6</sup> ¡Le güe lá'ana Dios na', bzue' xęzr la xu  
 lawe' nısadau'!  
 ¡Chadıa chacanna dxexache lazre' dxi'u!  
<sup>7</sup> ¡Le güe lá'ana Dios na', bene' gubizra ne  
 beu'!  
 ¡Chadıa chacanna dxexache lazre' dxi'u!



<sup>8</sup> ¡Benē' gubizra chee gusení na te zra!  
 ¡Chadía chacanna dxexache lazre' dxi'u!  
<sup>9</sup> ¡Benē' beu' ne belaj ca' chee xulusení na  
 chizrela!  
 ¡Chadía chacanna dxexache lazre' dxi'u!  
<sup>10</sup> ¡Le güe lá'ana Dios na', betie' bi biu nedxu  
 chee  
 benne' Egipto ca'!  
 ¡Chadía chacanna dxexache lazre' dxi'u!  
<sup>11</sup> ¡Le güe lá'ana Dios na', bebéaje' benne'  
 Israel ca'  
 lu xezr la xu Egipto na'!  
 ¡Chadía chacanna dxexache lazre' dxi'u!  
<sup>12</sup> ¡Beche' e le' dutē xel-la' waca zren chee'!  
 ¡Chadía chacanna dxexache lazre' dxi'u!  
<sup>13</sup> ¡Le güe lá'ana Dios na', bene' chupa la'a  
 nísadau'  
 da nazí le na Xrna!  
 ¡Chadía chacanna dxexache lazre' dxi'u!  
<sup>14</sup> ¡Bdee' benne' Israel ca' laduj nísadau' na'!  
 ¡Chadía chacanna dxexache lazre' dxi'u!  
<sup>15</sup> ¡Bgacue' nísadau' na' Faraón, benne'  
 wenná bea chee Egipto,  
 ne benne' zeje' wedil-la chee' ca'!  
 ¡Chadía chacanna dxexache lazre' dxi'u!  
<sup>16</sup> ¡Le güe lá'ana Dios na', beche' e benne'  
 chee' ca'  
 le' e xixre' lawe' lataj!  
 ¡Chadía chacanna dxexache lazre' dxi'u!  
<sup>17</sup> ¡Le güe lá'ana Dios na', betie' wenná bea  
 blau ca'!  
 ¡Chadía chacanna dxexache lazre' dxi'u!  
<sup>18</sup> ¡Betie' wenná bea wal-la ca'!  
 ¡Chadía chacanna dxexache lazre' dxi'u!  
<sup>19</sup> ¡Betie' Sehón, wenná bea chee benne'  
 amorreo ca'!  
 ¡Chadía chacanna dxexache lazre' dxi'u!  
<sup>20</sup> ¡Betie' Og, wenná bea chee xezr la xu  
 Basán!  
 ¡Chadía chacanna dxexache lazre' dxi'u!  
<sup>21</sup> ¡Bnézruje' xezr la xu chee benne' ca' chee  
 gaca na  
 chee benne' chee' ca'!  
 ¡Chadía chacanna dxexache lazre' dxi'u!  
<sup>22</sup> ¡Benne' na chee benne' Israel ca', benne'  
 wen zrin chee' ca'!  
 ¡Chadía chacanna dxexache lazre' dxi'u!  
<sup>23</sup> ¡Naque' Dios na', quebe gul-la lazre' dxi'u  
 gate buluzetja benne' ca' dxi'u!  
 ¡Chadía chacanna dxexache lazre' dxi'u!  
<sup>24</sup> ¡Le' bselé' dxi'u lu na' benne' ca' guledíl-  
 lalene' dxi'u!

¡Chadía chacanna dxexache lazre' dxi'u!  
<sup>25</sup> ¡Naque' Dios na', dxugawe' xúgute da zaj  
 naca ban!  
 ¡Chadía chacanna dxexache lazre' dxi'u!  
<sup>26</sup> ¡Le güe lá'ana Dios chee xabáa!  
 ¡Chadía chacanna dxexache lazre' dxi'u!

## 137

<sup>1</sup> Dxu'a xegu chee xezr la xu Babilonia  
 gudxé'edxu,  
 ne gudxézredxu gate xeajsá lázredxu chee  
 xezre Sión.  
<sup>2</sup> Lu zruze xaga labada' dxu'a xegu na'  
 buquéladxu da cun zríadi'i na du cheedxu  
 ca'.  
<sup>3</sup> Benne' ca' guleché' e dxi'u ca benne' zaj  
 nada'u  
 gulenábenē' dxi'u gúl-ladxu.  
 Benne' ca' buluzría xi' xezre cheedxu gulé' e  
 dxi'u  
 súadxu lu xel-la' dxebe, gulenné':  
 Le gul-la cheentu' da ca' bíl-lale lu xezre  
 Sión.  
<sup>4</sup> ¡Ájazra gúl-ladxu da güe lá'anadxu Xrá-  
 nadxu Dios  
 naga zúantu' lu xezr la xu chee benne' zitu'  
 ca'?  
<sup>5</sup> Chela gal-la lazra' lue', xezre Jerusalén,  
 gun Dios gunita na'a xabela xel-la' waca  
 chee na.  
<sup>6</sup> Ben xedá' luzra' chíchajla' che quebe chea-  
 jsá lazra' chiu',  
 ne che quebe gucá'ana szrena' lue',  
 Jerusalén,  
 nacu' da dzezaca ba lázrelda'.  
<sup>7</sup> Xrana' Dios, bsa lazre' da calēla da belún  
 benne' Edom  
 lu zra na' guzría xi' xezre Jerusalén,  
 gate na' gulenné': "Le guchinnaj na. Le  
 guchinnaj na,  
 ca zrintē lu lane chee na."  
<sup>8</sup> Le'e, benne' Babilonia, cuía xile.  
 Ba neza zrentē gaca na chee bēnnea' gunē'  
 chee  
 ca da benle le'e cheentu' netu'.  
<sup>9</sup> Ba neza zrentē gaca na chee bēnnea' que'e  
 bidu chee ca',  
 ne quine' -be' lu xiaj xre na'.

## 138

<sup>1</sup> Xrana' Dios, dutē lázrdawa' güe lá'ana'  
 Lue'.  
 Tu dxúl-lazqueza' da dxue lá'ana' Lue' lau  
 dios ca' chee  
 benne' zitu' ca'.

<sup>2</sup>Dxuzú zriba' lau xudau' lá'azxa chiu',  
ne dxue lá'ana' Lau' lawe' da nacu' li lazre',  
ne dxexache lazru' bénneache chiu',  
ne lawe' da blé'enu' nacu' Benne' szrentę,  
na' szrentę naca xrtizru'.

<sup>3</sup>Gate bláwizra' Lue', na' gúcalenu' neda'.  
Nen dutę xel-la' waca chiu' btipu' lazra'.

<sup>4</sup>Xúgute benne' wenná bea du gabí'i xęzr la  
xu  
xelúe lá'ang' Lue', Xrana' Dios.  
Caní xelunę' lawe' da ba belenne' ca naca  
xrtizru'.

<sup>5</sup>Xelúl-le' cheę da ba nunę' Xránadxu Dios,  
lawe' da zrentę naca xel-la' ba cheę Xrán-  
nadxu.

<sup>6</sup>Szrentę naca Xránadxu Dios, ne dxá-  
calęne'  
benne' baxache' ca',  
na' quebe dxu'e' lataj benne' dxucá'ana  
szren cuinę'  
zrine' lau Le'.

<sup>7</sup>Lácala zua' lu da ba xa', Lue' dxutipu'  
lazra'.

Dxedábagu' benne' ca' dxeledábague'  
neda',  
ne dutę xel-la' waca chiu' dxuseláu' neda'.

<sup>8</sup>Gun Xránadxu Dios da guchębe lazre'  
chia'.

Xrana' Dios, tu dxexache lázrezquezu' bén-  
neache chiu'.

Quebe gusanu' dxunu' zrin da guzú lau'  
dxunu'.

### 139

<sup>1</sup>Xrana' Dios, ba gunná' xánniu' neda'  
ne núnbea xánniu' neda'.

<sup>2</sup>Nézqueznu' gate dxe'a, ne gate dxasa'.  
Zítu'la nézqueznu' da zaj xu'u xichaj lázr-  
dawa'.

<sup>3</sup>Ba gunná' xánniu' ca dxuna', ne ca dxex-  
ezí' lazra'.

Nézqueznu' xúgute da dxuna'.

<sup>4</sup>Gate quebe ne guchálaja' ba nézqueznu'  
Lue', Xran,  
xúgute da nnia'.

<sup>5</sup>Gátetezla cuita' neda' zúaquezu' Lue',  
Xran,  
ne nuzę na'u neda'.

<sup>6</sup>Ca szrentę naca da nézenu' Lue' naca na da  
dxebáneda'.

Nácale'ę na sina da quebe gaca chéajni'ida'.

<sup>7</sup>¿Gala cha'a zítu' naga quebe zúaqueze Be'  
chiu'?

¿Gala guzrúnnuja' naga quebe zúaquezu'  
Lue'?

<sup>8</sup>Che cuena' sibe zran xabáa, na' zúaquezu'  
Lue',

ne che xétaja' lu da situj cheę xęzr la xu, na'  
zu' Lue'.

<sup>9</sup>La séqueda' tea' lu be', ne cha'a zítu' naga  
dxalaj gubizra,

u tea' xechalá'a nísadau' naga dxebía gu-  
bizra,

<sup>10</sup>cá'anqueze na' súalęnu' neda',  
ne guxru na'u xabęla neda'.

<sup>11</sup>Chela gaca guna' gacu da chul-la neda',  
u guna' xexaca lení' da naxechaj neda',  
cheę

xaca na da chul-la,

<sup>12</sup>da chul-la na' quebe gaca gucache na  
neda' lau Lue',

na' chizrela xaca na ca te zra lau'.

Túzqueze ca zaj naca da chul-la, ne xel-la'  
naxani' lau Lue'.

<sup>13</sup>Lue' bęnu' da zaj xu'u lu bęla' dxen chia'.

Lue' bzajju' neda' lu le'ę xrna'a.

<sup>14</sup>Güe lá'anaqueza' Lue' lawe' da szrentę zaj  
naca da dxunu',

ne dxebáneda' ca zaj naca na.

Dutę lázrdawa' nézquezda' caní naca na.

<sup>15</sup>Blé'eqeznu' neda' gate gulá' gubinna  
zrita xu'a,

gate na' belezraga na lu le'ę xrna'a,

gate na' bgula' lu da bagácheze na'.

<sup>16</sup>Ble'enu' bęla' dxen chia' gate gulá' gu-  
binna na.

Xúgute da caní ba naxúaj na lu xiche chiu',  
na' ca gudé na' gulá' gubinna na,

na' xúgute na gulaca na cáteze zaj naxúaj  
na.

<sup>17</sup>Dios, szrentę zaj naca da dxuwía lazru'  
gunu'.

Da zantę ca zaj naca na.

<sup>18</sup>Chela gaca lazra' gulaba' ca zaj naca na,  
zaj naca na ca xuzre' dxe' dxu'a tu xęgu  
zren.

Gate dxexebana', ne zúalęqueza' Lue'.

<sup>19</sup>Dios, da líqueze gutiu' benne' ca' dxelunę'  
da calela.

Cheę le' na', le gucuasa naga zua', le'e, węte  
benne'.

<sup>20</sup>Chiu' Lue', Dios, dxelenné' dizra' schanni'.  
Benne' ca' dxeledábague' lue' dxuluzétaje'  
Lau' lu da xálaze.

<sup>21</sup>Xrana' Dios, dxecuídada' benne' ca' dxu-  
luzúe' Lue'  
chalá'ala,

ne dxezrá'li'a benne' ca' dxeledábague' Lue'.

<sup>22</sup>Dutē lázrdawa' dxeuífededa' benne' ca'.  
Dxéqueda' benne' ca' ca benne' ca' dx-  
eledábague' nédaqueza'.

<sup>23</sup>Gunná' xanne' neda', Dios, ne gunná' da  
xu'u na lázrdawa'.  
Bxue neda' chee nézenu' da xu'u lu xichaj  
lázrdawa'.

<sup>24</sup>Gunná' che zúale tu da calela neda',  
na' bsi neda' lu neza chawe' chiu' da zeajli  
canna.

## 140

<sup>1</sup>Xrana' Dios, bselá neda' lu na' benne' ca'  
dxelunē' da calela.

Bxue neda' chee quebe bi xelún benne'  
xichaj zra'a ca'  
chia' neda'.

<sup>2</sup>Benne' caní dxuluwía lazre' da calela ca' da  
xelunē'.

Tu zra tu zra dxulutíl-lalene' bémeache.

<sup>3</sup>Da dxelenné' naca na ca lazxa belá' da zaj  
nalále'e.

Xrtizra' benne' ca' zaj naca na ca nisa snia  
chee belá'.

<sup>4</sup>Xrana' Dios, bxue neda' chee quebe bi  
xelún benne' ca'  
dxelunē' da calela chia' neda'.

Bselá neda' lu na' benne' xichaj zra'a ca',  
benne' ca' dxelunē' ba xuzre cheajcházia'.

<sup>5</sup>Benne' ca' dxulucá'ana szren cuine' zaj  
nabeque'  
tu da que'l-la na neda'.

Ba zaj nuzale' xralaj dxu'a neza.

Ba zaj nabeque' da ca' xelēl-la na neda'.

<sup>6</sup>Gucha' Xrana' Dios: Lue' nacu' Dios chia'.  
Xrana' Dios, bene chi'a dxuláwizra' Lue'.

<sup>7</sup>Xrana' Dios, nacu' weselá chia'.

Lue' bcu'uju' xíchaja' lu zra guca wedil-la.

<sup>8</sup>Xran, quebe gu'u lataj gaca ca da dxelezá  
lazre' benne' ca'  
dxelunē' da calela.

Quebe gu'u lataj chepe ban da dxuluwía  
lazre' xelunē',

chee quebe xulucá'ana szren cuine'.

<sup>9</sup>Zaj naxechaj benne' ca' dxelunē' da calela  
neda'.

Ben gaca chee benne' ca' ca de' da dxelaca  
lazre' gaca

chee benne' xula.

<sup>10</sup>Ben xexruj xi' lawe' benne' ca'.

Bzra benne' ca' lu xi'.

Bzra benne' ca' lu da sítuje'e naga cabá-  
tadxa xelexedxúaje'.

<sup>11</sup>Quebe gu'u lataj xegá'ana lu xezr la xu  
bénnea' dxenné'  
da calela.

Ben gaca da calela chee benne' xichaj zra'a,  
da guzria xi na le'.

<sup>12</sup>Nezda' xechebe Xránadxu Dios waláz chee  
benne' baxache',  
ne guzé chache' da zaj xu'u lu na' benne'  
xache' ca'.

<sup>13</sup>Da líqueze benne' xrlátaje ca' xelúe lá'ane'  
Lau' Lue',  
na' benne' li lazre' ca' xelexúe' naga zu'  
Lue'.

## 141

<sup>1</sup>Xrana' Dios, dxuláwizra' Lue'.

Gudázega gácalenu' neda'.

Bene chi'a gate nnia' Lue'.

<sup>2</sup>Ben la' da dxenaba' lau Lue' ca zren xala.  
Ble'e na'a da dxechisa' lau' ca tu béadau'  
dxútia'-ba' lau'.

<sup>3</sup>Xrana' Dios, bxue dxu'a nigá,  
ne bxue xide dxu'a chee quebe nnia' tu da  
calela.

<sup>4</sup>Quebe gu'u lataj gaca lazra' guna' tu da  
calela,

ne chee quebe guna' tu da calela tu zren  
nen benne' ca'

dxelunē' da zrinnaj,

ne chee quebe gágulēna' benne' ca' dx-  
elunē' da calela

lu laní chee'.

<sup>5</sup>Che gudé benne' xrlátaje neda' lu da ba xa',  
gaca na chia'

tu da chawe',

na' che til-le' neda', gaca na chia' ca tu da  
dxelále'e zixre

da dxegu'e xíchaja'.

Tu nábazqueza' Dios guzague' da calela da  
dxelún benne' ca'

dxelunē' da calela.

<sup>6</sup>Gate xeledxú'une' benne' xíchaje ca' chee  
benne'

wēn da calela ca' zran xi'a xiaj ca',

na' xeleque be'e bēnneache naca li ca da  
gunnía'.

<sup>7</sup>Xelase dinnaj zrita chee benne' ca' dxu'a  
xēdxu ba chee' ca'.

Xelaca na ca bhecu xu, da dxelase dinnaj  
na naga

dxa'ana bezre.

<sup>8</sup>Chee le' na' dxenná' naga zu' Lue', Xrana'  
Dios.

Dxuxrén lazra' Lue', quebe gúsán lazru'  
neda'.

<sup>9</sup>Bxue neda' cheę quebe xelęl-la xralaj ca'  
cheę benne' ca'  
dxelunę da calęla neda',  
ne cheę quebe cheajcházia' lu da zaj  
nabeque' benne'  
węn da calęla ca'.  
<sup>10</sup>Ben cheajlechaze benne' ca' dxelunę da  
calęla lu xralaj  
da zaj nabęchequeze'  
dxácate na' tea' neda' ga na' zri'a chawe'.

## 142

<sup>1</sup>Zizraj dxuláwizra' Xránadxu Dios.  
Du lazra' dxenaba' Xránadxu xexache lazre'  
neda'.  
<sup>2</sup>Lau Le' dxawa' zría ca da dxaca chia'.  
Lau Le' dxulé'eda' ca da stębe zua' neda'.  
<sup>3</sup>Gate zua lázrdawa' lu da stębe, Lue', Xran,  
nézenu'  
da dxaca chia'.  
La neza naga dxedá' gulebeque' xralaj da  
quęl-la na neda'.  
<sup>4</sup>Dxenná'a cuita' xabęla, san quebe nu chilá'  
gácalę neda'.  
Quebe nu chilá', benne' guxúęqueze' neda'.  
Quebe nu chilá', benne' dxe' gunna xue'  
chia' neda'.  
<sup>5</sup>Dxuláwizra' Lue', Xrana' Dios, dxennia':  
Dxebeza lazra' tuzu' Lue'.  
Tuzu' Lue' dxezá lazra' lu xęzr la xu nigá.  
<sup>6</sup>Bene da dxuláwizra' Lue', lawe' da dxezaca  
zí'le'a.  
Bselá neda' lu na' benne' ca' dxeláu zi'  
xuzrę' neda',  
lawe' da zaj naquę' wál-ladxa ca neda'.  
<sup>7</sup>Bebéaj neda' lu da dxaca chia', cheę gaca  
güe lá'ana' Lue'.  
Benne' xrlátaje ca' xelęchaje' neda' lawe' da  
gunu' gaca chawe' chia'.

## 143

<sup>1</sup>Xrana' Dios, bene da dxuchálaja' lau Lue'.  
Bzę naga da dxenaba' lau'.  
Gudá gácalęnu' neda' lawe' da nacu' li  
lazre', ne xrlátaje.  
<sup>2</sup>Quebe guchi'u chia' neda', węn zrin chiu',  
ca naca da nabaga',  
lawe' da lau' Lue' quebe nu chilá' benne'  
naquę' du lazre'.  
<sup>3</sup>Gúcalę neda' lawe' da dxeláu zi' xuzrę'  
neda'.  
Xeláteze bache xelútię' neda'.  
Ba belunę' naca' ca tu benne' dxedé' lu da  
chul-la

ca naca cheę benne' gate ca'.  
<sup>4</sup>Zua lázrdawa' lu da stębele'ę, ne dxewi'ine  
lázrele'a.  
<sup>5</sup>Dxeajsá lazra' ca guca nédxudaute.  
Dxulaba lazra' ca naca xúgute da bęnu'.  
Dxeajsá lazra' ca naca da zrentę ca' da  
bęnu'.  
<sup>6</sup>Dxechisa na'a lau Lue'.  
Naca' ca tu xęzr la xu bizre, dxebíleda'  
Lu'ęqueze.  
<sup>7</sup>Gudázega gácalęnu' neda', Xran, lawe' da  
dxedú lazra'.  
Quebe chenu' gácalęnu' neda', cheę quebe  
gaca' ca tu benne'  
ba xu'ę dxdu ba.  
<sup>8</sup>Che zílala bęn cheajsá lazra' dxexache  
lazru' bęnneache  
chiu' ca'  
lawe' da dxuxrén lázrequeza' Lue'.  
Bzėjani'i neda' ca dxal-la' guna'  
lawe' da dxezá lazra' guna' da dxaca lazru'  
Lue'.  
<sup>9</sup>Xrana' Dios, bselá neda' lu na' benne' ca'  
dxeledábague'  
neda'  
lawe' da dxuzúa cuina' lu na'u cheę guxúę-  
quezu' neda'.  
<sup>10</sup>Bsęde neda' cheę guna' da dxaca lazru'  
Lue',  
lawe' da nacu' Lue' Dios chia'.  
Gusel-la Be' xrlátaje chiu' cheę chę'ę neda'  
la neza chawe' chiu'.  
<sup>11</sup>Cheę gaca bea na nacu' xrlátaje, Xran,  
gutipu' lazra'.  
Lawe' da nacu' xrlátaje, guseláu' neda' lu da  
dxaca chia'.  
<sup>12</sup>Lawe' da nacu' li lazre', guzría xi'u benne'  
ca'  
dxeledábague' neda',  
ne guzría xi'u xúgute benne' ca' dxelaca  
lazre'  
xuluzría xi'ę neda',  
lawe' da naca' neda' węn zrin chiu'.

## 144

<sup>1</sup>Gaca ba lá'azxa Xránadxu Dios,  
Bęnnea' dxuzę chache' neda'!  
Naquę' Bęnnea' dxuzázraje' na'a cheę cha'a  
lu wedil-la,  
ne dxuzázraje' zrube na'a cheę séqueda' tíl-  
lalęna' benne' ca'  
dxelunę da calęla.  
<sup>2</sup>Naquę' Benne' dxexache lazre' neda',  
ne naquę' ca tu xu'u naga zę chawa'.  
Dxuzúa chache' neda', ne dxuselę' neda'.

Dxucu'uje' neda', na' dxuxrén lazra' Le'.  
Dxune' dxuluzúa bénneache chia' dizra'  
chia'.

<sup>3</sup>Xrana' Dios, ¿ájazra naca nu benne', dxeaj-  
jsá lazru' le'?

¿Ájazra naca nu benne' dxe'u gunne xue  
chee'?

<sup>4</sup>Naca benne' ca tu da níteze.

Zaj naca zra chee' ca tu zrul-la da dxedeze.

<sup>5</sup>Xrana' Dios, gusalaj zran xabáa, ne betaj  
gácalenu' neda'.

Bta xi'a ca', na' dxuaj zren chee xi'.

<sup>6</sup>Bzalaj xesa guziu', ne blaga benne' ca'  
dxelune' da calela.

Bzalaj xaga nalá xéche'ze chiu', ne bzria xi'  
le'.

<sup>7</sup>Naga zu' na'la, bzē na'u, ne bselá neda' lu  
da stébele'e zua'.

Bselá neda' lu na' benne' zitu' ca',

<sup>8</sup>benne' ca' tu dxelennézqueze' da wēn  
lazre',

ne dxuluzétaje' Dios gate dxelezí xē'e.

<sup>9</sup>Dios, gúl-laqueza' chiu' da cube, quínnia'  
da dxúl-lalēna'.

Nen tu da dxínnia' da nua chi du chee na  
gúl-laqueza' chiu'.

<sup>10</sup>Nacu' Lue' Bénnea' dxune' dxeledxúaj  
chawe'

benne' wenna' bea ca'.

Dxuseláu' David, wēn zrin chiu', lu xia nalá  
chee

benne' wēn da calela ca'.

<sup>11</sup>Bexa'u neda', ne bselá neda' lu na' benne'  
zitu' ca',

benne' ca' tu dxelennézqueze' da wēn  
lazre',

na' dxuluzétaje' Dios gate dxelezí xē'e.

<sup>12</sup>Ben xelegula bi biu cheentu' ca tu xaga da  
dxequila chawe',

ne zaj nácabe' bi cuide'.

Ben xelaca bi nu'ula cheentu' ca bd'u'a xiaj  
xrtante' ca'

da zaj nmita tu lu xu'u zren.

<sup>13</sup>Ben chatē lízrentu' xúgute' cuen lina  
cheentu'.

Ben xelánle'e bē xixre' cheentu', chee xelá-  
caba'

gaxúa gaxúane bē xixre'du ca' lu xēzr la xu  
cheentu'.

<sup>14</sup>Ben xelaca bezre cheentu' bē wal-la chee  
xelunba' zrin.

Ben quebe xelexanba' gate quebe ne zrin  
cha beu' cheeba' ca'.

Ben quebe nu cha' cuezre xache' la neza  
cheentu'.

<sup>15</sup>Ba neza zrentē naca na chee' bénneache  
ca' dxaca caní chee'.

Ba neza zrentē naca na chee' bénneache ca'  
naca Xránadxu Dios chee'.

## 145

<sup>1</sup>¿Gucá'ana szrena' Lue', Dios chia', ne  
Wenná Bea chia'!

¿Tu güe lá'anazqueza' Lau' Lue' chadía cha-  
canna!

<sup>2</sup>¿Tu zra tu zra güe lá'ana' Lue'!

¿Tu güe lá'anazqueza' Lau' Lue' chadía cha-  
canna!

<sup>3</sup>¿Szrentē naca Xránadxu Dios, ne naca  
chee'

tu güe lá'anazquezdXu Le'!

¿Québequeze séquedxu gúnbeadxu ca  
szrentē naque'!

<sup>4</sup>Xúgute' cuen bénneache chiu' xelúe lá'ane'  
da beñu' Lue',

ne xuluzenne' benne' xēzr la xu ca' ca naca  
da zrentē da beñu'.

<sup>5</sup>Gulaba lazra' ca naca da xrtante' chee' da  
xabáa chee'

xel-la' szren chiu', ne ca naca da  
zrentē da nunu'.

<sup>6</sup>Xúgute' bénneache xuluchálaje' ca naca  
xel-la' waca chee'

da zrentē da nunu',

na' neda' guzenda' le' ca naca xel-la' szren  
chiu'.

<sup>7</sup>Xuluzenne' le sa' ljwezre' ca naca xel-la'  
zri'i lazre' zren

chiu',

ne tu xelúl-lazqueze' chee' da xrlátaje da  
nacu' Lue'.

<sup>8</sup>Xránadxu Dios naque' zri'i lazre', ne dxex-  
ache lazre'

bénneache chee'.

Dxezrene', ne quebe dxezrá'aze', na' dxex-  
ache lázrele'e dxi'u.

<sup>9</sup>Dxun Xránadxu Dios da chawe' chee'  
xúgute' bénneache,

ne dxexache lazre' xúgute' da zaj naca ban  
da nune'.

<sup>10</sup>Xúgute' da ca' nunu' xelúe lá'ana na Lue',  
Xran,

na' bénneache chiu' xulucá'ana szrene'  
Lue'.

<sup>11</sup>Dxelenné' ca szrentē naca xel-la' dxenná  
bea chiu'.

Dxuluchálaje' ca naca xel-la' waca zrentē  
chiu',

<sup>12</sup> chee xuluzenne' xúgute bènneache ca  
naca da zrente' ca'  
da nunu',  
ne ca naca da xabáa chee xel-la' szren chee  
xel-la' dxenná bea  
chiu'.

<sup>13</sup> Xel-la' dxenná bea chiu' tu súazqueze na,  
ne nna be'enu' xúgute cuen bènneache.

<sup>14</sup> Nuxru Xránadxu Dios xúgute benne' ca'  
dxeajlecházie',  
ne dxechise' xúgute benne' ca' zaj nada'u lu  
zrin wal-la.

<sup>15</sup> Xúgute bènneache dxelenné'e Lue' chee  
gácalenu' le',  
na' Lue' gunézruju' da xelawe' ca zrin zra  
chee na.

<sup>16</sup> Dxuzé na'u, ne dxunézruju' ca naca da  
chawe'  
da dxelexázrje xúgute da zaj naca ban.

<sup>17</sup> Xlátaje naca Xránadxu Dios lu xúgute da  
dxune',  
ne dxexache lazre' xúgute da zaj naca ban  
da nun Le'.

<sup>18</sup> Xránadxu Dios zúatequeze' gácalene'  
xúgute benne' ca'  
dxululáwizre' Le',  
xúgute benne' ca' du lazre' dxululáwizre'  
Le'.

<sup>19</sup> Guné' ca dxelezá lazre' benne' ca' dx-  
elezrebe' Le'.

Cá'anqueze xenne' chee' gate xululáwizre'  
Le', ne guselé'  
benne' ca'.

<sup>20</sup> Xránadxu Dios dxuxúequeze' xúgute  
benne' ca'  
zaj nazrí'ine' Le',  
san guzría xi'e xúgute benne' ca' dxelebéaj  
xíchaje' Le'.

<sup>21</sup> Du lazra' güe lá'ana' Xránadxu Dios.  
Xúgute benne' dxal-la' tu xelúe  
lá'anazqueze' Le' lá'azxa  
chadía chacanna.

## 146

<sup>1</sup> ¡Gaca ba lá'azxa Xránadxu Dios!

¡Du lazra' güe lá'ana' Xránadxu Dios!

<sup>2</sup> ¡Dxácate naca bana' güe lá'ana' Xránadxu  
Dios!

¡Tu gúl-lazqueza' da güe lá'ana' Xránadxu  
Dios dxácate  
naca bana'!

<sup>3</sup> Quebe guxrén lázrele benne' dxelenná  
bea,  
ne quegá bènneache lawe' da quebe  
xelezéquene'  
xuluselé' le'e.

<sup>4</sup> Dxeledxúaj be' zaj xu'e, na' xelexexaque'  
xu xrte.  
Lu zra ná'queze xelenite da dxuluwía lazre'  
xelune'.

<sup>5</sup> Ba neza zrente' naca na chee bènnea', dxá-  
cale' Dios chee  
Jacob le',

bènnea' dxebeza lazre' Xránadxu Dios.

<sup>6</sup> Dios na' bené' xabáa, ne xezr la xu, ne  
nísadau',  
ne xúgute da zaj zra' lataj ca'.

Naque' Bènnea' tu dxúnzqueze' da li lazre'.

<sup>7</sup> Dxuchi'e chee benne' baxache' ca',  
ne dxugawe' benne' ca' dxeledune'.

Xránadxu Dios dxuselé' benne' ca' zaj  
nada'u lu na'  
benne' ca'.

<sup>8</sup> Xránadxu Dios dxexune' xiaj lau benne' la  
chul-la ca'.

Xránadxu Dios dxechise' benne' ca' dxeaj-  
jlecházie'.

Xránadxu Dios nazrí'ine' benne' xrlátaje  
ca'.

<sup>9</sup> Xránadxu Dios dxuxúe' benne' zitu' ca'.

Nuxre' bidau' wežebe ca', ne nu'ula tuze  
ca',

na' dxuchínajje' da dxelún benne' ca' dx-  
elune' da calela.

<sup>10</sup> Tu nna béazqueze Xránadxu Dios.

Le'e, benne' xezre Sión, nna be'e Dios  
cheeje  
ne xúgute cuen zri'ine zre súale.

¡Gaca ba lá'azxa Xránadxu Dios!

## 147

<sup>1</sup> ¡Le güe lá'ana Xránadxu Dios lawe' da naca  
chawe'

gúl-ladxu da güe lá'anadxu Dios cheedxu,  
lawe' da xrtante naca güe lá'anadxu Le'!

<sup>2</sup> Xránadxu Dios xexune' xezre Jerusalén.

Xequé'e benne' Israel ca' zaj zue' xezr la xu  
zitu' ca'.

<sup>3</sup> Dxexune' benne' ca' dxelexewí'ine  
lázrele'e,

ne dxudé'e ladxe' naga zaj naca we' chee  
benne' ca'.

<sup>4</sup> ¡Nézquezne' ca zaj naxán belaj ca'!

¡Tu tu belaj ca' dxu'e la na!

<sup>5</sup> ¡Szrente naca Xránadxu Dios, ne nape'  
dute' xel-la' waca!

¡Quebe bi de da quebe dxéajni'ine'!

<sup>6</sup> Xránadxu Dios dxácalene' benne' dxexruj  
lazre' ca',  
na' dxuzéxruje' benne' ca' dxelune' da  
calela.

<sup>7</sup> ¡Le gul-la da güe lá'ana Xránadxu Dios!  
¡Le gul-la, ne le quinne da cun zríadi'i na du  
lau Dios cheedxu!

<sup>8</sup> ¡Le' dxudé'e beuj ca' zran xabáa!  
¡Le' dxesel-le' nisa xiuj lu xezr la xu!  
¡Le' dxune' dxelezría xíxre'du ca' lu xi'a ca'!  
<sup>9</sup> ¡Le' dxunézruje' da dxelagu be xixre' ca'!  
¡Dxunézruje' da dxelagu béchajdu ca', be  
dxelebezre xa'aba'!

<sup>10</sup> Da dxezaca ba lázreleñe' quebe naca na  
xel-la' wal-la  
chee bzrina' ca',  
ne quegá xel-la' wal-la chee bénneache.

<sup>11</sup> Dxezaca ba lázreleñe' benne' ca' dxelezre-  
be' Le',  
ne benne' ca' dxelebeza lazre' Le' chee  
xexache lazre' le'.

<sup>12</sup> ¡Le güe lá'ana Xránadxu Dios, le'e zrale  
xezre Jerusalén!  
¡Le güe lá'ana Dios chee, le'e zrale xezre  
Sión!

<sup>13</sup> ¡Le' dxuzúa chúchu'e dxa xu'u chee xezre  
chee!  
¡Dxune' dxaca chawe' chee benne' ca' zaj  
zre'e xezre chee!

<sup>14</sup> ¡Dxebeque' xel-la' dxebeza zri lazre' lu  
xezr la xu chee!  
¡Gúnnale'e chee zrua' chawe'!

<sup>15</sup> ¡Dxusel-le' xrtizre' chee benne' ca' zaj  
zre'e duté xezr la xu,  
na' chadí dxaca ca da dxenné'!

<sup>16</sup> ¡Dxugacue' xezr la xu bezxe' da naca na ca  
zrila!  
¡Dxuzéxruje' xrl'e'ela dxela ca de!

<sup>17</sup> ¡Dxune' dxelexruj xiaj bezxe' ca weaj xía-  
jdu ca'!

¿Nu benne' gaca guchaga lawe' da zaga  
chee na?

<sup>18</sup> ¡Dxenná be'e, na' dxexuna na!  
¡Dxune' dxaca be', na' dxexaca bezxe' na'  
nisa guba'u!

<sup>19</sup> ¡Bzéajni'ine' Jacob ca naca xrtizre', ne  
bdee' xrba chee',  
ne da ca' gunná be'e lu na' benne' Israel ca'!

<sup>20</sup> Quebe ne gune' caní chee xezr la xu xezí-  
cadxa ca',

na' benne' xezr la xu ca' quebe dx-  
elexúnbe'e xrba chee'.

¡Gaca ba lá'azxa Xránadxu Dios!

## 148

<sup>1</sup> ¡Le güe lá'ana Xránadxu Dios!  
¡Le güe lá'ana Xránadxu, le'e, zrale xabáa!  
¡Le güe lá'ana Le', le'e, zrale dxala!

<sup>2</sup> ¡Le güe lá'ana Le', le'e, gubáz chee xabáa  
chee' ca'!

¡Le güe lá'ana Le', le'e, benne' zante chee'!

<sup>3</sup> ¡Le güe lá'ana Le', le'e, gubizra, ne beu'!

¡Le güe lá'ana Le', le'e, belaj dxusenile!

<sup>4</sup> ¡Le güe lá'ana Le', le'e, xabáa ca',

ne le'e, nisa zrale lówela xabáa!

<sup>5</sup> ¡Le güe lá'ana La Xránadxu,

lawe' da gunná bé'enge', na' guzúale!

<sup>6</sup> ¡Bene' súale tu chí'ize, ne chadía cha-  
canna!

¡Bzue' chee tu da bdxixruj be'e da quebe  
te chee na!

<sup>7</sup> ¡Le güe lá'ana Xránadxu lu xezr la xu,  
le'e, bea zri'a zrale lu nísadau', ne xúgute  
nisa situj,

<sup>8</sup> ne le'e, xesa guziu', ne xiaj xiuj, ne bezxe',  
ne beuj ca',

ne le'e, be' bduñu' ca', dxunle ca gunná  
be'e!

<sup>9</sup> ¡Le güe lá'ana Le', le'e, xí'adu ca', ne xi'a  
zri'a ca',

ne le'e, xaga zixre ca', ne xaga cedro ca',

<sup>10</sup> ne le'e, be' xixre' ca', ne bea ca' dxuluxúe  
bénneache,

ne le'e, be' snia ca', ne be' zaj zua xrila!

<sup>11</sup> ¡Le güe lá'ana Le', le'e, benne' wenná bea  
ca', ne xúgute

bénneache,

ne le'e, benne' dxeleñná be'e, ne benne'  
dxuluchi'e,

<sup>12</sup> ne le'e, benne' wegú' ca', ne nú'uladu ca',  
ne le'e, benne' gula ca', ne bidu ca'!

<sup>13</sup> ¡Le güe lá'ana La Xránadxu!

¡Szárentedxa naca La Le' ca xúgute la bén-  
neache!

¡Da xabáa chee' dxulé'e lau na lu xezr la xu,  
ne xabáa!

<sup>14</sup> ¡Le' nune' xezr chee' xezre wal-la!

¡Le güe lá'ana Le', le'e, bénneache chee',

nácale zri'ine zre sua Israel!

¡Nácale benne' nazrí' Le'!

¡Le güe lá'ana Xránadxu!

## 149

<sup>1</sup> ¡Le güe lá'ana Xránadxu Dios!  
 ¡Le gul-la chee Xránadxu tu da cube!  
 ¡Le güe lá'ana Le' naga zaj nazraga bën-  
 neache chee'!  
<sup>2</sup> ¡Le be, le'e, benne' Israel, lau Bénnea'  
 bene' le'e!  
 ¡Le sua xel-la' dxebé, le'e, zrale Sion, lau  
 Bénnea' naque'  
 Wenná Bea chee!  
<sup>3</sup> ¡Le güe lá'ana La Xránadxu, ne guxa'ale!  
 ¡Le guchunchu xide ca', ne le quinne  
 da cun zríadi'i na du ca', dxue lá'anale Le'!  
<sup>4</sup> ¡Xránadxu Dios dxezaca ba lázrelene' bën-  
 neache chee'!  
 ¡Dxape' ba lá'ana benne' dxexruj lazre' ca',  
 ne dxuselé' le'!  
<sup>5</sup> Dxal-la' xelebéqueze bënneache chee' lu  
 da xabáa chee',  
 ne xelúl-le' dutę xel-la' dxelebé du xęla.  
<sup>6</sup> Dxal-la' xelebezre xe'e, xelúe lá'anę' Dios,  
 zaj nu'e xia da zaj nalá dxupa la'ate,  
<sup>7</sup> chee xelexebéaj lazre' benne' xęzr la xu  
 ca',  
 ne xuludéę' xel-la' zi' benne' xęzre ca',  
<sup>8</sup> ne xuluchéaje' benne' wenná bea chee' ca'  
 du xia,  
 ne benne' dxeleenná be'e nen du xia,  
<sup>9</sup> ne xuluzría xi'e benne' ca' ca ba nun Dios  
 gaca chee'.  
 Da nigá gaca na da xabáa chee bënneache  
 chee Dios.

¡Le güe lá'ana Xránadxu!

## 150

<sup>1</sup> ¡Le güe lá'ana Xránadxu Dios!  
 ¡Le güe lá'ana Xránadxu lu xudau' chee'!  
 ¡Le güe lá'ana xel-la' waca chee' lu xabáa  
 chee'!  
<sup>2</sup> ¡Le güe lá'ana Le' ca zaj naca da zren da  
 nune'!  
 ¡Le güe lá'ana Le' ca naca xel-la' szren  
 chee'!  
<sup>3</sup> ¡Le güe lá'ana Le', gucuézrele luzu ca' da  
 dxulucuezre'!  
 ¡Le güe lá'ana Le', quínnele da cun zríadi'i  
 na du,  
 ne da ca' dxínnele!  
<sup>4</sup> ¡Le güe lá'ana Le', guchúnehule xide, ne  
 guxa'ale!  
 ¡Le güe lá'ana Le', quínnele da cun zríadi'i  
 na du,  
 ne gucuézrele bchiuj!  
<sup>5</sup> ¡Le güe lá'ana Le', gutíl-lale xíadu ca'!

¡Le güe lá'ana Le', gutíl-lale xia zren ca'!

<sup>6</sup> ¡Le güe lá'ana Xránadxu, xúgutele naca  
 banle!

¡Le güe lá'ana Xránadxu Dios!



## DIZRA' CHAWE' CA NACA CHEE JESUCRISTO DA BZUAJ SAN MATEO

*La benne' ca' gulaque' xra gula chee Cristo  
(Lc. 3.23-38)*

<sup>1</sup> Da caní zaj naca na la chee benne' zaj naque' xra wdé chee Jesucristo. Jesús nigá nababe' zri'ine zre sua David, ne zri'ine zre sua Abraham.

<sup>2</sup> Abraham nigá guque' xra Isaac. Isaac nigá guque' xra Jacob. Jacob nigá guque' xra Judá, ne benne' biche' ca'.

<sup>3</sup> Judá nigá guque' xra Fares, ne Zara, na' Tamar guque' xrna Fares, ne Zara caní.

Fares nigá guque' xra Esrom. Esrom nigá guque' xra Aram.

<sup>4</sup> Aram nigá guque' xra Aminadab. Aminadab nigá guque' xra Naasón.

<sup>5</sup> Naasón nigá guque' xra Salmón. Salmón nigá guque' xra Booz, na' Rahab guque' xrna Booz nigá.

Booz nigá guque' xra Obed, na' Rut guque' xrna Obed nigá.

Obed nigá guque' xra Isaí.

<sup>6</sup> Isaí nigá guque' xra David, benne' wenná bea.

Wenná bea David nigá, ne nu'ula na' nédx-ute guque' zru'ula Urías gulaque' xra xrna Salomón.

<sup>7</sup> Salomón nigá guque' xra Roboam.

Roboam nigá guque' xra Abías.

Abías nigá guque' xra Asa.

<sup>8</sup> Asa nigá guque' xra Josafat.

Josafat nigá guque' xra Joram.

Joram nigá guque' xra Uzías.

<sup>9</sup> Uzías nigá guque' xra Jotam.

Jotam nigá guque' xra Acáz.

Acáz nigá guque' xra Ezequías.

<sup>10</sup> Ezequías nigá guque' xra Manasés.

Manasés nigá guque' xra Amón.

Amón nigá guque' xra Josías.

<sup>11</sup> Josías nigá guque' xra Jeconías ne benne' biche' ca' ca lu zra ca' gate benne' Babilonia guleché'e benne' Israel ca' lu xezr la xu Babilonia.

<sup>12</sup> Jeconías nigá guque' xra Salatiel.

Salatiel nigá guque' xra Zorobabel.

<sup>13</sup> Zorobabel nigá guque' xra Abiud.

Abiud nigá guque' xra Eliaquim.

Eliaquim nigá guque' xra Azor.

<sup>14</sup> Azor nigá guque' xra Sadoc.

Sadoc nigá guque' xra Aquim.

Aquim nigá guque' xra Eliud.

<sup>15</sup> Eliud nigá guque' xra Eleazar.

Eleazar nigá guque' xra Matán.

Matán nigá guque' xra xetú benne' le' Jacob.

<sup>16</sup> Jacob nigá guque' xra José, benne' chee María, xrna Jesús, Bénnea' naque' Cristo.

<sup>17</sup> Caní naca, gulaca chidá' cue' bënneache gate guzú lau zua Abraham, ca bzrinte zra zua David, na' gulaca xechidá' cue' bënneache ca' gate guzú lau zua David, ca bzrinte zra gate na' benne' Babilonia ca' guleché'e benne' Israel ca' lu xezr la xu chee', na' gulaca xechidá' cue' bënneache ca' gate guzú lau zra na', ca bzrinte zra gulaj Cristo.

*Ca guca gate gulaj Cristo*

*(Lc. 2.1-7)*

<sup>18</sup> Caní guca gate na' gulaj Jesucristo. María, xrna Jesús ba nachébebe' gácabe' zru'ula José. Nédxula ca za xelenite', nu'ula nigá ba zue' zi'i ne chee xel-la' waca chee Be' Lá'azxa chee Dios. <sup>19</sup> José, benne' chee María nigá, naque' benne' xrlátaje. Quebe guca lazre' gulé'ene' ca ba naca chee María lau benne' xezre ca'. Guca lazre' gusane' le' bagácheze. <sup>20</sup> Dxácate dxudé lazre' da nigá, ble'e lau tu gubáz chee xabáa, gubáz chee Xránadxu, ga zua José na' lu bchigala, na' guzre' le'.

—José, zri'ine zre sua David, quebe zrebu' si' lu na'u María chee gácabe' zru'ulu', lawe' da bidu biu na' sanbe' zabe' ne chee Be' Lá'azxa chee Dios. <sup>21</sup> Zrú'ulu' gúxrube' tu bidu biu cheebe', na' lue' gu'u labe' Jesús. Caní gu'u labe' lawe' da guse-labe' bënneache lu dul-la da zaj nabague'.

<sup>22</sup> Xúgute da caní gulaca ca' chee guca ca da gúnna Xránadxu lu dxu'a benne' ca' buluchálaje' waláz chee'. <sup>23</sup> Caní gunné': Tu nú'uladau' guádaube' sanbe' tu bidu biu cheebe',

na' xelu'e labe' Emanuel.

Emanuel zéaje na: Dios zúaleñe' dxi'u.

<sup>24</sup> Ca bebán José, na' bene' cáteze gunná gubáz chee Xránadxu, na' guzú' lu ne'e María chee gácabe' zru'ule'. <sup>25</sup> Quebe gulaque' tuze ca gusandxa María bidu biu nedxu cheebe', na' buluzúe' labe' Jesús.

## 2

*Dxeleznín benne' sina ca' lu xezre Jerusalén*

<sup>1</sup> Bidau' Jesús gúlajbe' lu xezre Belén da nababa xezr la xu Judea gate dxenná bea benne' le' Herodes ga na'. Nadxa beleznín benne' ca' lu xezre Jerusalén, benne' zá'aque' chalá'a naga dxalaj gubizra, zaj naque' benne' sina gula. <sup>2</sup> Na' gulenabe':

—¿Ga zua bidu na' ba gúlajbe' chee gá-cabe' benne' nna bé'eng' benne' judío ca'? Gate zuantu' chalá'a naga dxalaj gubizra blé'entu' belaj cheebe', na' bla'ntu' nigá chee gúe lá'ana gúe szrentu'-be'.

<sup>3</sup> Ca guneze Herodes, benne' wenná bea, da nigá, na' guzúe' stébe, ne cá'anqueze guca chee xúgute' benne' zaj zre'e Jerusalén. <sup>4</sup> Nadxa Herodes, wenná bea na', btupe' xúgute' benne' xíchajé chee bxruze ca', ne benne' dxuluxúzajle'e da nadxixruj bea Dios, na' gunábene' benne' ca':

—¿Gazra na' galaj Cristo?

<sup>5</sup> Benne' caní gulé'e le':

—Lu xezre Belén da nababa xezr la xu Judea, lawe' da bzuaj caní tu benne' bchálajé' waláz chee Dios, gate na' gunné':

<sup>6</sup> Lue', Belén chee xezre ca' zaj nababa na Judá, nacu' lue' xezre da quebe naca na da bzébedxa ládujla benne' ca' dxelezná be'e'eng' xezr la xu Judá nigá, lawe' da ládujla bénneache chiu' dxuaj tu benne' nna be'e, na' guxúequeze' bénneache chia', benne' Israel.

<sup>7</sup> Nadxa Herodes, wenná bea na', bláwizre' bagácheze benne' sina gula ca', na' gunábene' le' bátala ble'e lau belaj na' belelé'eng'. <sup>8</sup> Nadxa gusel-le' benne' ca' chjaque' xezre Belén, ne guzre' le':

—Le hjaca na', ne le naba xanne' chee bidu na', na' ca cheajxrácale-be', na' le guzén neda' chee cha'a neda' gúe lá'ana gúe szrena'-be'.

<sup>9</sup> Ca bexuzre belén benne' sina gula ca da gunná Herodes, wenná bea, nadxa besí'aque', na' belaj da belelé'eng' gate zaj zre'e chalá'a naga dxalaj gubizra zeaj na lau le', na' bzrinte na, ne guzúa na naga zua bidu na'. <sup>10</sup> Gate benne' sina gula ca' belelé'eng' belaj na', nadxa gulebéle'eng'.

<sup>11</sup> Ca gulu'e lu xu'u, belelé'eng' bidu na', ne xrnabe' María. Nadxa buluzú zribe' dx-elúe lá'ana dxelúe szrene' bidu na'. Nadxa gulesálajé' xua chee' ca', ne bulunézruje'-be' oro, ne xalaj zixre, ne mirra da naca na zichaj. <sup>12</sup> Ca gudé na', Dios guzre' benne' ca' lu bchigala québedxa xelexedé'e naga zua Herodes. Chee le na belexequé'e neza xula, belexezrine' lazrie'.

*Ca guca beleché'e Jesús lu xezr la xu Egipto*

<sup>13</sup> Ca gudé bes'aca benne' sina gula ca', nadxa tu gubáz chee xabáa, gubáz chee Xránadxu ble'e lawe' José lu bchigala, na' guzre' le':

—Guxasa. Becá'a bidu na', ne xrnabe', na' le hjaca lu xezr la xu Egipto, na' xegá'anu' ga na' ca zrindxa zra xapa' lue' xetú. Caní dxal-la' gunu' lawe' da wexilaj Herodes bidu nigá chee gutie'-be'.

<sup>14</sup> Nadxa José guxase', na' chizrélala beche'e bidu na', ne xrnabe', na' bexu'e-be' lu xezr la xu Egipto. <sup>15</sup> Gulezré'e na' ca bzirindxa zra gute Herodes. Caní guca ca naca da gunná Xránadxu lu dxu'a benne' bchálajé' waláz chee', gunné': “Xuláwizra' bi biu chia' chee xedxúajbe' lu xezr la xu Egipto.”

*Dxenná be'e Herodes benne' ca' xelútie' bidu biu ca'*

<sup>16</sup> Gate gúquebe'e Herodes gulezí xé benne' sina ca' le', na' bzá'alé'e, ne gunná bé'eng' benne' ca' xelútie' xúgute bi biu dxé'enedau', ca zrinte bidu ca' ba zaj zua chup iza, bidu ca' zaj zrabe' xezre Belén, ne bidu ca' zaj zrabe' lu xézredu ca' zaj naxečaj na xezre Belén na'. Caní ben Herodes cáteze buluzén benne' sina gula ca' le' ca naca zra na' belelé'eng' belaj na'. <sup>17</sup> Ca'an guca ca da bzuaj Jeremías, bénnea' bchálajé' waláz chee Dios ba guca zan' iza, gunné':

<sup>18</sup> Guca tu schaga lu xezre Ramá.

Guca webezre, ne gulebezre xache'.

Raquel na' dxebézrele'e chee bi chee' ca'. Québequeze dxaca lazre' xexaca zrene' lawe' da ba gulate bi chee' ca'.

<sup>19</sup> Ca gudé gute Herodes, na' tu gubáz chee xabáa, gubáz chee Xránadxu ble'e lawe' José lu bchigala naga zue' Egipto, na' guzre' le':

<sup>20</sup> —Guxásache. Beche'e bidu chiu' nigá, ne xrnabe'. Bexíaj lu xezr la xu Israel, lawe'

da ba gulate benne' ca' gulaca lazre' xelútie' bidu nigá.

<sup>21</sup> Nadxa guxasa José, na' beche'e bidu na', ne xrnabe', na' belexezrine' lu xezr la xu Israel. <sup>22</sup> Ca guneze José dxenná bea Arquelao naga nababa Judea waláz chee xre', Herodes na', na' bzrebe José xexíaje' ga na'. Nadxa bexíaje' naga nababa Galilea ca da ba guzre gubáz chee xabáa le' lu bchigala. <sup>23</sup> Ca bezrine' na', na' bexíaje' cheaxezúe' lu xezre Nazaret. Caní guca ca da gulenná benne' ca' buluchálaje' waláz chee Dios, gulenne' Jesús nigá si le' benne' Nazaret.

### 3

*Juan dxegu'e lban le'e xixre' lawe' lataj*

(Mr. 1.1-8; Lc. 3.1-9, 15-17; Jn. 1.19-28)

<sup>1</sup> Ca lu zra ca' bla' Juan, bénnea' bchue' bénneache nisa, dxegu'e lban le'e xixre' lawe' lataj naga nababa Judea. <sup>2</sup> Dxenné':

—Le xebí'i lazre' lawe' da ba zua gáguze zra nna bea Dios lu xezr la xu nigá.

<sup>3</sup> Juan nigá naque' bénnea' bchalaj Isaías chee'. Isaías bchálaje' waláz chee Dios gate bzuaje' caní:

Dxene chi'i benne' dxebezre xe'e le'e xixre' lawe' lataj, dxenné':

Le gucá'ana chawe' neza naga te Xránadxu. Le xulí neza lase ca' lau Le' naga té'e.

<sup>4</sup> Zra lana Juan nigá nune na xicha zra camello, ne bazxu dxu'a le'e chee' naca na xide, na' dxawe' biche xuaj, ne bzrína'dau' chee' bézudau'. <sup>5</sup> Belezrín benne' belenne' ca da dxuchalaj Juan, benne' zá'aque' xezre Jerusalén, ne benne' chee' xúgute' xezre ca' zaj nababa Judea, ne benne' zá'aque' xézredu ca' zaj nnita gáguze xegu Jordán. <sup>6</sup> Ca gulexráulepe' dul-la chee', Juan nigá bchue' benne' ca' nisa lu xegu Jordán.

<sup>7</sup> Gate ble'e Juan benne' zan benne' xudau' fariseo, ne benne' xudau' saduceo zá'aque' chee' xelexedxúe' nisa, na' guzre' benne' ca':

—Le'e, be snia. ¿Zua nu guzre le'e guzrúnnajle da ba xa' da za'? <sup>8</sup> Le gun da xrlátaje da xelunna bea na ba bebí'i lázrele. <sup>9</sup> Quebe guéquele lale, dxennale le'eze: “Nalatu' lawe' da nácantu' xrtia Abraham.” Neda' dxapa' le'e: Dios waca xexune' xiaj caní zri'ine xrtia Abraham. <sup>10</sup> Le'e nácale ca xaga ca'. Xia waga bache nalá na chee' chugu na xaga ca', na' xúgute

xaga ca' quebe dxelebía na da zixre chawe' welechugue na, na' xelezxe na lu xi'. <sup>11</sup> Da li neda' dxuchúa' le'e nisa, da dxunna bea na ba bebí'i lázrele, san Bénnea' ze'e ca te chia' neda', Le' gune' ca da zéaje' xel-la' dxedxúa nisa, guzúe' le'e Dios Be' Lá'azxa, ne xi' chee'. Benne' nigá nácadxe' blau ca neda', na' quebe zaca' cuéajza' zrele' xu'u ni'e. <sup>12</sup> Cá'anqueze nácale ca zrua' xtila. Benne' nigá ba nu'e da dxun be', cuéaje' xrte zrua' xtila na', na' xebéaje' chalá'ala xizre chee' na, na' xuzrá chawe' zrua' xtila na' lu da'a chee' na, san guzezxe' xizre na' lu xi' da quebe xexula na.

*Da guca gate gudxúa Jesús nisa*

(Mr. 1.9-11; Lc. 3.21-22)

<sup>13</sup> Nadxa Jesús bezé'e naga nababa Galilea, na' bezrine' dxu'a xegu Jordán naga zua Juan chee' guchúe' Le' nisa. <sup>14</sup> Nédxute' Juan quebe guca lazre', na' dx'e Jesús:

—Lue' dxal-la' guchú'u neda' nisa. Quebe zaca' neda' guchúa' Lue' nisa.

<sup>15</sup> Jesús guzre' le':

—Be' lataj gaca caní na'a. Dxun na ba xen gundxu xúgute' da xrlátaje lau Dios.

Nadxa Juan bene' ca'. <sup>16</sup> Gate bexuzre gudxúa Jesús nisa, na' la bxálajte' xabáa, na' ble'e Juan Be' Lá'azxa chee' Dios dxétaje' ca tu gugu chíchidau', zeajsúaba' lawe Jesús.

<sup>17</sup> Nadxa ben tu chi'i lu be', gunné':

—Benne' nigá naque' Zrí'inequeza' nazrí'ite' lazra'. Dxezaca ba lázrelena' Le'.

### 4

*Dxaca lazre' da xriwe' gun na baga Jesús zria*

(Mr. 1.12-13; Lc. 4.1-13)

<sup>1</sup> Nadxa Be' Lá'azxa chee' Dios la guché'te' Jesús le'e xixre' lawe' lataj naga gúe lazre' da xriwe' gun zréaje na Le'. <sup>2</sup> Quebe bi gudagu Jesús chua zra chua xela, na' ca gudé na' gudune'. <sup>3</sup> Nadxa da xriwe' bzrin na naga zua Jesús chee' gun zréaje na Le', na' dx'e na Le':

—Che Lue' nacu' Zri'ine Dios, gunná be'e xiaj caní xelexaca na xeta xtila.

<sup>4</sup> Jesús bechebe':

—Lu xiche chee' Dios dxenné': “Quebe gaca ban nu benne' gawe' xétaze, san nen xúgute' dizra' chee' Dios gaca bane'.”

<sup>5</sup> Nadxa da xriwe' guché na Jesús lu xezre lá'azxa Jerusalén, na' bzua na Le' xíchajte xudau', <sup>6</sup> na' guzre na Le':

—Che Lue' nacu' Zri'ine Dios, guxrite' nigá, lawe' da dxenná lu xiche chee' Dios: Dios nna bé'ene' gubáz chee' xabáa chee' ca' chee' xelácalene' Lue'.

Welexehise' Lue' nen ne'e chee' quebe gunu' zi' ni'u lu xiaj ca'.

<sup>7</sup>Na' gunná Jesús:

—Cá'anqueze dxenná lu xiche chee' Dios, dxé'e bénneache: “Quebe guchínenu' Xranu' Dios cáteze dxaca lazru'.”

<sup>8</sup>Nadxa da xriwe' guché na Le' tu lu xi'a sibe, na' ble'e na Le' ca naca xúgute' cue' xezr la xu zaj nnita lu xezr la xu, ne ca naca xel-la' guni'a chee' na. <sup>9</sup>Na' gunná da xriwe', dxé na Le':

—Xúgute' da caní gunna' chiu' che guzú zribu' gucá'ana szrenu' neda'.

<sup>10</sup>Nadxa Jesús guzre' na:

—Bexíaj, da xriwe', lawe' da dxenná Dios lu xiche chee', dxé'e bénneache: “Bca'ana szren Xranu' Dios, ne be lá'ana tuze Le'.”

<sup>11</sup>Nadxa da xriwe' becuasa na lau Jesús, na' belezrín gubáz chee' xabáa chee' Dios, ne bulunézruje' da dxechine Jesús.

*Dxuzú lau Jesús dxuchálaje' xrtizra' Dios naga nababa Galilea*

(Mr. 1.14-15; Lc. 4.14-15)

<sup>12</sup>Gate ben Jesús xu'u Juan lizre xia, na' bezé'e zexíaje' naga nababa Galilea.

<sup>13</sup>Quebe bga'ana Jesús xezre Nazaret. Xea-jsúe' lu xezre Capernaum da zua na dxu'a nísadau' naga zaj zra' xrtia Zabalón, ne xrtia Neftalí. <sup>14</sup>Caní guca ca da bzuaq Isafás, benne' bchálaje' waláz chee' Dios, gunné':

<sup>15</sup>Lu xezr la xu chee' Zabalón, ne chee' Nef-talí,

naga zrua neza da zeaj na dxu'a nísadau', chalá'a naga dxalaj gubizra xechalá'a xegu Jordán.

Naga nababa Galilea,

naga zaj zra' benne' quebe zaj naque' judío.

<sup>16</sup>Bénneache zaj zra' lu da chul-la belelé'ene' tu da dxusaníle'e na,

na' benne' zaj zra' naga xu'u zrul-la chee' xel-la' gute

ba bsaní' tu xi' naga zaj zre'e.

<sup>17</sup>Ca lu zra na' guzú lau Jesús dxegu'e lban, dxenné':

—Le xebi'i lázrele, lawe' da ba zua gáguze zra nna bea Dios lu xezr la xu nigá.

*Jesús dxuláwizre' tapa benne' wezén bela*  
(Mr. 1.16-20; Lc. 5.1-11)

<sup>18</sup>Gate na' zeaj Jesús dxu'a nísadau' ga nababa Galilea, na' blé'ene' chupa benne'. Tue' le' Simón, ne zua xetú le' Pedro, na' xetúe' le' Andrés, biche Simón na'. Benne' caní zaj naque' benne' wezén bela, na' dx-uluzale' xixruj bela chee' lu nisa. <sup>19</sup>Nadxa Jesús dxé'e benne' caní:

—Le gun neda' tuze, na' guna' le'e benne' gutúpale chia' bénneache ca dxunle dxezenle bela.

<sup>20</sup>La bulucá'anate' xixruj chee' ca', na' zjácálene' Jesús.

<sup>21</sup>Xelátédauze gusá'aque', na' ble'e Jesús xechupa benne'. Tue' le' Jacobo, ne xetúe' le' Juan, biche Jacobo nigá. Zaj naque' zri'ine Zebedeo, ne zaj xu'e tu lu da dxedá lawe' nísadau' nen xre', dxexlún chawe' xixruj chee'. Jesús bláwizre' le', <sup>22</sup>na' la bulucá'anate' da dxedá lawe' nísadau' na', ne xre', na' zjácálene' Jesús.

*Jesús dxusédene' bénneache naga nababa Galilea*

(Lc. 6.17-19)

<sup>23</sup>Zeaj Jesús xúgute' xezre zaj nababa Galilea, na' tu tu xezre ca' dxuzéajni'ine' bénneache lu xu'u ca' naga dxulucá'ana szren benne' judío ca' Dios. Na' dxegu'e lban ca nna bea Dios, ne dxexune' xúgute' benne' ca' ca zaj naca xízrawe' cha chee'.

<sup>24</sup>Ca'an guca, xúgute' benne' chee' xezr la xu Siria belenne' ca da dxun Jesús, na' belezrine' lau Jesús, zaj naché'e benne' we' ca', benne' zaj xu'e xízrawe', ne benne' zaj zue' lu xel-la' dxudía, ne benne' zaj xu'e be' xriwe', ne benne' zaj xu'e chuna', ne benne' zaj naxrú'unie' bine, na' bexún Jesús xúgute' benne' caní. <sup>25</sup>Zjácálene' benne' zan Le', benne' zaj nababe' xezre ca' zaj nababa Galilea, ne benne' zá'aque' xezre Decápolis ca', ne benne' Jerusalén, ne benne' zaj nababe' xezre ca' zaj nababa Judea, ne benne' zá'aque' xechalá'ala xegu Jordán naga dxalaj gubizra.

## 5

*Lban da bchalaj Jesús tu lu xi'a*

<sup>1</sup>Gate ble'e Jesús xúgute' benne' zan ca' zá'aque' naga zue', nadxa guluéne' tu lu xi'a, ne gudxé'e na'. Nadxa benne' ca' dxusede Jesús beledube' cuité'. <sup>2</sup>Nadxa guzú lau Jesús dxusédene' benne' ca'.

*Nu benne' naca chee' tu da ba neza*  
(Lc. 6.20-23)

<sup>3</sup>Gunná Jesús:

—Da ba neza zrentę naca na cheę benne' ca' dxelexúnbe'e ca naca xel-la' dxexazrje cheę' lau Dios. Benne' caní zaj naca cheę' xelexú'e naga dxenná bea Dios xabáa.

<sup>4</sup>'Da ba neza zrentę naca na cheę benne' ca' dxelelé'ele' zaj zuę' lu da baxache' lawe' da zaj nabague' dul-la. Dios dxexúe zrene' benne' caní.

<sup>5</sup>'Da ba neza zrentę naca na cheę benne' zaj naque' zren lazre'. Benne' caní xelexí'e cheę' xęzr la xu da nachębe lazre' Dios gunézruje' benne' caní.

<sup>6</sup>'Da ba neza zrentę naca na cheę benne' du lazre' dxelaca lazre' xelunę' da naca xrlátaje lau Dios. Dios gácalęne' benne' caní.

<sup>7</sup>'Da ba neza zrentę naca na cheę benne' dxelexexache lazre' benne' xula. Dios wex-ache lazre' benne' caní.

<sup>8</sup>'Da ba neza zrentę naca na cheę benne' ca' zaj xu'u xichaj lázrdawe' da xrlátaje. Benne' caní welelé'ene' Dios.

<sup>9</sup>'Da ba neza zrentę naca na cheę benne' dxelebeza zri lazre' nen bénneache. Dios guzúe' le' ca bi cheęqueze'.

<sup>10</sup>'Da ba neza zrentę naca na cheę benne' dxeledęe' xel-la' zi' lu na' benne' ca' dxelune' cheę' da caleļa cate' dxelune' da xrlátaje. Benne' caní zaj naca cheę' xelexú'e naga dxenná bea Dios xabáa.

<sup>11</sup>'Da ba neza zrentę naca na cheęle le'e che benne' dxelellné' schanni' cheęle, ne dxelunę' cheęle da caleļa, ne dxelellné' cheęle xúgute' dizra' węn lazre' lawe' da nácale chia' neda'. <sup>12</sup>Le be, ne le xezaca ba lázrele lawe' da wazile tu da zrentę da gunna Dios le'e xabáa. Caní gaca na lawe' da cá'unqueze caní guláu zi' xuzre' benne' ca' buluchálaje' waláz cheę Dios, benne' ca' gulezré'e nédxudxa ca le'e.

*Nácale ca zede', ne ca tu xi' lu xęzr la xu (Mr. 9:50; Lc. 14:34-35)*

<sup>13</sup>Na' gunná Jesús:

—Le'e nácale ca zede' cheę bénneache lu xęzrla xu nigá. Che zede' nigá xenite xel-la' sna'a cheę na, ¿ájazra gácalele bénneache ca'? Québedxa gaca guchínedxu zede' caní. ¡Chú'unadxu na, na' xululéaj bénneache le na!

<sup>14</sup>'Le'e nácale ca tu xi' cheę bénneache zaj zre'e xęzr la xu. Tu xęzre da zua na tu lu xi'a, quebe gáchequeze na. <sup>15</sup>Gate guzáladxu tu xi', quebe gudúsedxu na. Guzúadxu na sibe naga gusení na cheę xelexé'e xúgute

benne' zaj zre'e lu xu'u. <sup>16</sup>Cá'unqueze le gun le'e. Le gięe lataj gusení xi' da nácale lau bénneache ca' cheę xelexé'ene' ca da xrlátaje da dxunle. Nadxa xelúe lá'ane' Xrale Dios zuę' xabáa.

*Da bchalaj Jesús ca naca cheę da nadxixruj bea Dios*

<sup>17</sup>Gunná Jesús:

—Quebe dxal-la' guéquele le'e za'a neda' cheę cua' ca naca da bdxixruj be'e Moisés, ne ca naca dizra' da buluchalaj benne' ca' buluchálaje' waláz cheę Dios. Quebe za'a cheę cua' na. Za'a cheę gulé'eda' cáteze zéaje na. <sup>18</sup>Da li dxapa' le'e. Dxácatę zaj zua xabáa, ne xęzr la xu nigá, quebe dúaqueze tu dizra', ne tu da da' lu da nadxixruj bea na nigá ca zrindxa zra gaca xúgute' ca da dxal-la' gaca na. <sup>19</sup>Cheę le' na', che tu benne' guzúe' chalá'ala bítetezla da nigá da bdxixruj bea Dios, láqueze naca na tu da dauze, ne che guzėjni'ine' bénneache cheę xelúnqueze' ca', benne' nigá xegá'ane' cá'aze naga dxenná bea Dios xabáa. Bénnea' guzúe' dizra' da nadxixruj bea nigá, ne gulé'ene' bénneache cheę xelúnqueze' ca', benne' nigá wegá'anaqueze' ba lá'ana naga dxenná bea Dios xabáa. <sup>20</sup>Dxapa' le'e, che quebe gunle da nácadxa xrlátaje ca da dxelún benne' ca' dxuluxuzájle'e da nadxixruj bea Dios, ne ca da dxelún benne' xudau' fariseo ca', cabata' xexú'ule le'e naga dxenná bea Dios xabáa.

*Da bchalaj Jesús ca naca cheę xel-la' dxęzrá'a*

*(Lc. 12:57-59)*

<sup>21</sup>Na' gunná Jesús:

—Le'e ba bénele ca gulenná xrtíale gula ca': "Quebe gütele benne'," na' "Núteteze benne' gutię' benne' waxíaje' cheę cuía xi'e." <sup>22</sup>Neda' dxapa' le'e, núteteze benne' dxezré'e le sa' ljwezre' waxíaje' cheę cuía xi'e. Na' bénnea' dxenné' schanni' cheę le sa' ljwezre' waxíaje' lau benne' cheę xu'u lawe' blau, na' xuludęe' le' cheę cuía xi'e. Bénnea' dxenné' cheę le sa' ljwezre' tu dizra' sban, benne' nigá nácaqueze cheę' chéaje' lu lataj ba xa'.

<sup>23</sup>'Che gu'u lu xudau' tu da gunézruju' lau Dios, ne na' cheajsá lazru' cheę tu da nunu' cheę le sa' ljwezru', <sup>24</sup>bca'ana da na' gunézruju' na', teca xexíaju' xegá'anu' chawe' nen le sa' ljwezru'. Nadxa waca

xexíaju' lu xudau' chee' bi gunézruju' lau Dios.

<sup>25</sup>'Che zua nu benne' dxebagu' chee', na' che'e' lue' lau benne' guchi'e' chiuu', bexaca chawe' nen le' la neza na', chee' quebe gudée' lue' lau bènnea' dxuchi'e' da dxaca. Che quebe gunu' caní, nadxa benne' dxuchi'e' da dxaca na' gudée' lue' lu na' benne' dxusézxuje' bènnea' ca' lizre xia, na' xelegú'e' lue' lizre xia na'. <sup>26</sup>Da li dxapa' lue'. Quebe xedxúaju' na' che quebe quízruju' xúgute' da dxebagu' chee' benne' na'.

*Da bchalaj Jesús ca naca chee' benne' dxíchaj'e' xrba chee' xel-la' nuchaga na'*

<sup>27</sup>Na' gunná Jesús:

—Le'e bache bénquezle ca gulenné' nédxute: “Quebe gunu' dul-la da dxichaj na xrba chee' xel-la' nuchaga na'.” <sup>28</sup>Neda' dxapa' le'e, núteteze benne' ne'e' tu nu'ula, ne sa lazre' le', báchequeze beñe' dul-la nen nu'ula na' lu xichaj lázrdawe'.

<sup>29</sup>'Che xiaj lau' da zua xabəla dxuzúa na lue' lu dul-la, guleaj na, ne gudxú'una na zítu'la. Nácadxa chawe' nite late' da naca na chee' be'l-la' dxen chiu' quézcala chu'u lataj ba xa' dutə be'l-la' dxen chiu'. <sup>30</sup>Che na'u da zua xabəla chiu' dxuzúa na lue' lu dul-la, guchugu na, ne gudxú'una na zítu'. Nácadxa chawe' nite late' da naca na chee' be'l-la' dxen chiu', quézcala chu'u lataj ba xa' dutə be'l-la' dxen chiu'.

*Jesús dxusédene' ca naca chee' benne' dxexel'é' nen zru'ule'*

(Mt. 19.9; Mr. 10.11-12; Lc. 16.18)

<sup>31</sup>Na' gunná Jesús:

—Cá'anqueze gulenné' nédxute: “Núteteze benne' dxexel'é' nen zru'ule', dxal-la' gunézruje' nu'ula na' tu xiche da dxul'é' na belexel'é'.” <sup>32</sup>Neda' dxapa' le'e, che tu benne' dxexel'é' nen zru'ule', na' nu'ula nigá quebe guzúaleñe' benne' xula, benne' chee' nu'ula nigá dxuzú'e' le' lu dul-la chee' da dxichaj na xrba chee' xel-la' nuchaga na' che tu benne' biu xula guchaga ne'e' nen nu'ula na' bsan benne' chee' le'. Cá'anqueze le' dxune' dul-la nen nu'ula na'.

*Jesús dxusédene' ca naca chee' benne' dxucá'ana lie' xrtizre'*

<sup>33</sup>Na' gunná Jesús:

—Cá'anqueze ba bénele ca gulenná benne' gula ca', gulenné': “Quebe gucá'anu' cá'aze ca da nachebe lazru' nen dizra' bca'ana liu' lau Xránadxu Dios.”

<sup>34</sup>Neda' dxapa' le'e: Quebe dxal-la' guzétjale xabáa chee' guca'ana lile dizra' chee'le, lawe' da naca na naga dxe' Dios, <sup>35</sup>ne quebe guzétjale xezr la xu nigá lawe' da naca na naga nuzúa Dios ni'e, ne quebe guzétjale Jerusalén lawe' da naca na xezre chee' Benne' Blau naque' Wenná Bea. <sup>36</sup>Quebe guzétjale xíchajle chee' guca'ana lile dizra' chee'le lawe' da quebe séquele gunle da chiche, ne da gasaj netú xicha xíchajle. <sup>37</sup>Le mnaze: “Awe’,” u le mnaze: “Cabi,” lawe' da gate tu benne' dxudadxe' chee' chee' da nigá, naca na chee' da xriwe'.

*Dxul'é' Jesús ca naca chee' nu benne' dxexe-béaj lazre'*

(Lc. 6.29-30)

<sup>38</sup>Na' gunná Jesús:

—Le'e ba bénele ca da gulenné' nédxute: “Che tu benne' cuéaje' xiaj lau', cá'anqueze gunu' chee', ne che cuéaje' lazru', cá'anqueze gunu' chee'.” <sup>39</sup>Neda' dxapa' le'e, quebe tíl-lalele nu benne', san che tu benne' gu'e' chalá'a xragu', be' lataj gu'e' xechalá'a xragu'. <sup>40</sup>Che tu benne' gaca xúze'leñe' lue', ne dxaca lazre' cue' zrau', be' lataj xúate' xicha chiu'. <sup>41</sup>Che dxuluse-bágu'e' lue' gu'u xua chee' tu cuéndau', bia na chupa cuenla. <sup>42</sup>Che núteteze benne' bi dxenabe' chiu', bnézruje' na, ne quebe guzagu' ca gunézruju' chee' nu benne' bi dxenabe' chite'.

*Jesús dxusédene' ca dxal-la' zri'idxu benne' ca' dxeledábague' dxi'u*

(Lc. 6.27-28, 32-36)

<sup>43</sup>Na' gunná Jesús:

—Cá'anqueze ba bénele ca da gulenné' nédxute: “Bzri'i le sa' ljwezru', ne gucuide benne' dxedábague' lue'.” <sup>44</sup>Neda' dxapa' le'e, le zri'i benne' ca' dxeledábague' le'e. Le naba gaca chawe' chee' benne' dxeleñné' chee'le. Le gun da chawe' chee' benne' dxelecuídene' le'e. Le naba lau Dios gaca chawe' chee' benne' dxeleñné' schanni' chee'le ne dxelune' chee'le da calela. <sup>45</sup>Che gunle caní gácale bi cheéqueze Xrale zue' xabáa, lawe' da dxun Le' dxusaní' gubizra naga zaj zra' benne' wen da calela ne naga zaj zra' benne' xrlátaje ca', ne dxusel-la' nisa xiuj lu xezr la xu chee' benne' chawe' ca', ne lu xezr la xu chee' benne' ca' dxelune' da calela. <sup>46</sup>Che nazrí'ile tuze benne' zaj nazrí'ine' le'e, ¿ájazra na' dx-ezá lázrele quizruj Dios le'e? Cá'anqueze

dxelún benne' wechizruj ca', zaj nazrí'ine' le sa' ljwezre'. <sup>47</sup> Che le'e dxugápale diuzre tuze le sa' ljwézrele, ¿bizra da xrlátaje dxunle? Cá'anqueze dxelún benne' quebe zaj núnbe'e Dios. <sup>48</sup> Le gaca benne' xrlátaje cáteze naca Xrale zué' xabáa, naque' xrlátaje.

## 6

*Dxelúe Jesús ca naca da xrlátaje da dxelún bénneache*

<sup>1</sup>Caní gunná Jesús:

—Le guxúe xanne' cuínale chee quebe gunle da naca chee xel-la' benne' xudau' chee le lau bénneache chee xeledé'eng' na. Che ca'an dxunle, na' Xrale Dios zué' xabáa québequeze bi gunne' le'e. <sup>2</sup>Chee le na', gate lue' dxácalenu' benne' dxelexázejene', quebe guzennu' xúgute' bénneache ca da dxunu', ca dxelún benne' ca' dxelune' xrlátaje cúzreze la neza, ne lu xu'u naga dxulucá'ana szren benne' judío ca' Dios. Dxelune' da caní chee xeledené' bénneache xrlátaje chee'. Da li dxapa' le'e, ba déqueze lazruj chee'. <sup>3</sup>Gate lue' gunézruju' late' chee' benne' dxelexázejene', ben na luéze chee quebe neze le sa' ljwezru'. <sup>4</sup>Ben da caní bagácheze, na' Xrau' Dios, Bénnea' dxelé'eng' ca da dxunu' bagácheze, Le' gunne' lazruj chiu'.

*Jesús dxusédene' ca dxal-la' gundxu xel-la' dxuláwizra Dios*

(Lc. 11.2-4)

<sup>5</sup>Na' gunná Jesús:

—Gate le'e gunle xel-la' dxuláwizra Dios, quebe gunle ca dxelún benne' ca' dxelune' xrlátaje cúzreze. Dxeledánene' dxelune' xel-la' dxuláwizra Dios zaj zeze' lu xu'u naga dxulucá'ana szren benne' judío ca' Dios, ne la neza, chee xeledé'e bénneache da dxelune'. Da li dxapa' le'e, ba déqueze lazruj chee'. <sup>6</sup>Gate lue' dxuláwizru' Dios, guxú'u lu xu'u chiu'. Bsezxuj dxa xu'u chiu', na' bláwizra Dios guchálajlenu' Xrau' Dios zúalene' lue' naga zu' tuzu'. Nadxa Xrau' Dios, Bénnea' dxelé'eng' ca da dxunu' bagácheze, Le' xuzri'e chiu'.

<sup>7</sup>Gate dxuláwizru' Dios dxuchálajlenu' Le', quebe tuz ca da nneu' zánete' lasa ca dxelún benne' ca' quebe zaj núnbe'e Dios. Dxeléquene' wen Dios chee' lawe' da dxeledené'le'e. <sup>8</sup>Quebe gunle ca dxelún benne' ca', lawe' da Xrale Dios ba nézquezne' ca da

dxechínnele le'e nédxula ca za ná bale na. <sup>9</sup>Chee le na', le guláwizra Dios nnale caní:

Xrantu' Dios, zu' xabáa,  
gaca lá'azxaqueze Lau'.

<sup>10</sup>Gudá nna be'u lu xezr la xu nigá.

Gaca lu xezr la xu nigá ca dxaca lazru' Lue',  
cáteze dxaca xabáa.

<sup>11</sup>Benna netu' da gáguntu' na'a.

<sup>12</sup>Bnite lau cheentu' ca naca da calela da bentu',

ca netu' ba bnite launtu' chee benne'  
belune' cheentu'  
da calela.

<sup>13</sup>Quebe gu'u lataj nu gun zréaje netu',

2 san bselá netu' lu na' da xriwe'.

Naca chiu' gápaquezu' xel-la' dxenná bea,  
ne xel-la' waca,

ne da xabáa chadía chacanna. ¡Ca'an gaca na!

<sup>14</sup>'Che le'e gunita laule chee benne' belune' chee da calela, na' Xrale Dios zué' xabáa gunita lawe' chee le'e. <sup>15</sup>Che le'e quebe gunita laule chee benne' ca', na' Xrale Dios quebe gunita láuqueze' chee le'e ca naca dul-la da nabá gale.

*Jesús dxusédene' ca dxal-la' gundxu gubasa*

<sup>16</sup>Na' gunná Jesús:

—Gate le'e dxunle gubasa, quebe guzúale baxache' laule ca dxelún benne' dxelune' xrlátaje cúzreze. Benne' caní dxelune' ca' chee xeledé'e bénneache le' dxelune' gubasa. Da li dxapa' le'e, ba déqueze lazruj chee benne' ca'. <sup>17</sup>Lue', gate dxunu' gubasa, bza xíchaju' chawe', ne gudibe lau', <sup>18</sup>chee quebe xeléquebe'e bénneache dxunu' gubasa. Tuze Xrau' Dios na', Bénnea' zúalene' lue' naga zu' tuzu', Le' dxennátequeze', na' gunne' da naca na chiu'.

*Jesús dxusédene' chee da gunní'a chee xabáa*

(Lc. 12.33-34)

<sup>19</sup>Na' gunná Jesús:

—Quebe gutúpale da gunní'a lu xezr la xu nigá, naga guteba' na, ne da ca' dxelebía xi na, na' xelú'u gubán ne xelebane' na. <sup>20</sup>Le'e, le gun da xrlátaje, da gaca na ca guzrá cháwele da gunní'a xabáa, naga quebe guteba' na, ne da ca' quebe bi xeleque na, na' québequeze xelú'u gubán chee xelequé'e na. <sup>21</sup>Naga nuzrale da gunní'a chee, na' zúaqueze lázrdaule.

*Jesús dxusédene' cheę tu xi' da xú'udxu*  
(Lc. 11.34-36)

<sup>22</sup>Na' gunná Jesús:

—Xiaj laule zaj naca na ca tu xi' cheę bel-la' dxen cheęle. Che xiaj laule zaj naca na chawe', dutę ca naca bel-la' dxen cheęle naxaní'. <sup>23</sup>Che xiaj laule quebe zaj naca na chawe', dutę ca naca bel-la' dxen cheęle nachul-la na. Cá'anqueze che xi' da xu'ule xexaca na tu da chul-la, chúl-lale'ędxa súaquezle.

*Jesús dxusédene' cheę Dios, ne cheę da gunní'a*

(Lc. 16.13)

<sup>24</sup>Na' gunná Jesús:

—Netú benne' quebe séquene' guzúa cuine' lu na' chupa xranę', lawe' da wazré'ę tu xranę' ne wazrí'ine' xetúe', u wéquene' ba lá'ana tu xranę' na' xetúe' guzúe' chalá'ala. Quebe séquele guzúa cuinle lu na' Dios, ne lu na' da gunní'a.

*Jesús dxusédene' ca dxun Dios, dxuxúę' xúgute' bi cheę' ca'*

(Lc. 12.22-31)

<sup>25</sup>Na' gunná Jesús:

—Cheę le na' dxapa' le'e, quebe cue'le gunne xue ga sa' da gágule da xí'ajle cheę gaca banle, ne ga sa' zra lánale da gácule. Zácadxa xel-la' nabán cheęle ca da dxágule, ne zácadxa bel-la' dxen cheęle ca zra lánale. <sup>26</sup>Le nna'xque bxínnedu ca' dxeledaba' lu be'. Quebe dxelázaba'. Quebe dxelelápaba'. Quebe ga dxuluxuzrá cháweba' na. Xrale Dios zue' xabáa dxunézruje' da dxeláguba'. Zácadxale le'e ca bxínnedu ca'. <sup>27</sup>¿Nuzra benne' ládujla le'e gaca gusetunna cuine' xate' lawe' da dxe'ę gunne xue?

<sup>28</sup>¿Bizr cheę na' dxe'le le'e gunne xue cheę zra lánale? Le nna'xque ca dxelegula xiaj ca' zaj zę le'ę xixre'. Quebe dxelún na zrin, ne quebe dxelache na du. <sup>29</sup>Dxapa' le'e, Salomón benne' wenná bea na' quebe gucue' ca da xrtan cheę xiaj caní, na' le' gudá'le'ę cheę' da gunní'a. <sup>30</sup>Che Dios dx-udxęne' xrtánle'ę xiaj caní da ca' zaj zua na na'a le'ę xixre', na' wxre xelexe na lu xi', quegá gundxę' da chawe' cheęle le'e, benne' québetę ca dxejlí lazre'. <sup>31</sup>Cheę le na', quebe cué'tecale gunne xue, nnae: "¿Ga sa' da gágudxu? ¿Ga sa' da xí'ajdxu? ¿Ga sa' da gácudxu?" <sup>32</sup>Cheę da caní zaj dxe' gunne xue benne' quebe zaj núnbe'ę Dios, san le'e, zua tu Xrale xabáa ba nézquezne'

ca naca xúgute' da dxechínnele. <sup>33</sup>Zria laudxa cuele gunne xue cheę nna bea Dios lu xichaj lázrdaule, ne cheę gunle da xrlátaje da xezaca ba lazre' Dios, na' sile xúgute' da ca' dxechínnele. <sup>34</sup>Quebe cuele gunne xue na'a da naca na cheę wxre, lawe' da wxre ca'an gáta'queze da cuele gunne xue. Tu zra tu zra déqueze da guchaga laudxu.

## 7

*Jesús dxusédene' cheę benne' dxuchi'ę da dxun le sa' ljwezre'*

(Lc. 6.37-38, 41-42)

<sup>1</sup>Na' gunná Jesús:

—Quebe guchí'ale da dxelún le sa' ljwézrele cheę quebe guchi'a Dios caní cheęle le'e. <sup>2</sup>Le' guchi'ę cheęle le'e cáteze dxunle le'e cheę le sa' ljwézrele, ne cáteze dxunle le'e cheę le sa' ljwézrele, ca'an gun Dios nen le'e. <sup>3</sup>¿Bizr cheę na' dxená'u bębedau' da xu'u xiaj lau le sa' ljwezru', ne quebe dxená'u da zrentę da xu'u na xiaj láuquezu' lue'? <sup>4</sup>¿Ájazra gunu' xu'u le sa' ljwezru': "Benna lataj xebéaja' bębedau' da xu'u xiaj lau'", che da zrendxa xu'u xiaj láuquezu' lue'? <sup>5</sup>Lue', benne' dxun xrlátaje cúzreze. Bebéaj nedxu da zrentę da xu'u xiaj láuquezu', na' gaca le'enu' cháwedau' xebéaju' bębedau' da xu'u xiaj lau le sa' ljwezru'.

<sup>6</sup>Quebe gunézruje' da naca lá'azxa cheę benne' dxelunę' ca dxelún becu' snia, checa xelexéchaje', ne xuluzúruę' le'e. Quebe guzúale da zaca cheęle lau benne' dxelunę' ca dxelún cuche, dxuluchuchuj dxululéa-jba' da dxugágule-ba'.

*Dxuchalaj Jesús ca dxal-la' nábadxu, ne xexílajdxu, ne nńedxu dxu'a dxa xu'u*

(Lc. 11.9-13; 6.31)

<sup>7</sup>Na' gunná Jesús:

—Le naba, na' Dios gunne' na cheęle. Le xilaj na, na' xezrélele na. Le nńe dxu'a dxa xu'u, na' sáluje' cheęle. <sup>8</sup>Le gun caní lawe' da benne' bi dxenabe', dxezi'ę na. Benne' bi dxexílaje', dxeajxraque' na, na' benne' dxennę' dxu'a dxa xu'u, zua nu benne' sáluje' cheę'.

<sup>9</sup>Netule le'e quebe gunézruje' zrí'inele tu xiaj che lebe' dxenábabe' le'e tu xeta. <sup>10</sup>Quebe gunézruje' zrí'inele tu bela' snia che lebe' dxenábabe' le'e tu bela. <sup>11</sup>Che le'e, benne' węn da caleļa, nézele gunézruje'



zrí'inele da naca na chawe', da cháwedxa gunna Xrale Dios zua xabáa, gunne' da chawe' chee benne' bi dxenábene' Le'.

<sup>12</sup> 'Le gun chee le sa' ljwézrele ca dxaca lázrele le'e xelún lebe' chee. Da nigá naca da nadxixruj bea na Moisés, ne da dxenná na lu xiche naga naxúaj da gulenná benne' ca' buluchálaje' waláz chee Dios.

*Jesús dxusédené' chee dxa xu'u lechide' (Lc. 13.24)*

<sup>13</sup> Na' gunná Jesús:

—Le chu'u lu dxa xu'u lechide'. Dxa xu'u laga, ne neza xu zaj naca naga zjaca benne' xelebía xi'e, na' benne' zanté zjaque' na'.

<sup>14</sup> Dxa xu'u lechide', ne neza lase zaj naca naga zjaca benne' xelezí'e xel-la' nabán da zeajlí canna, na' bábase benne' dxelexezrele' na.

*Naca bea tu xaga ne chee da zixre dxebía na (Lc. 6.43-44)*

<sup>15</sup> Na' gunná Jesús:

—Le guxúe cuínale chee benne' wen lazre' ca', benne' dxeleonné' zaj naque' benne' dxuluchálaje' waláz chee Dios. Benne' caní zá'aque' naga zrale le'e, zaj nun cuine' ca tu benne' dxexruj lazre' ca naca tu zrí'la'dau', san lu xichaj lázrdawe' zaj naque' snia ca tu becu' xi'a. <sup>16</sup> Le'e xúnbeale le' ne chee da dxeluné'. Da zixre da dxebía lba uva quebe xuchíbedxu na lu xaga xeche', na' da zixre da dxebía xaga higo quebe xuchíbedxu na lu xeche' ga'. <sup>17</sup> Ca'an naca, xúgute xaga chawe' dxelebía na da zixre chawe', na' xaga da quebe naca na chawe', quebe dxebía na da zixre chawe'. <sup>18</sup> Xaga chawe' ca' quebe dxelebía na da zrinnaj, na' xaga zrinnaj na' quebe dxebía na da chawe'. <sup>19</sup> Xúgute xaga zrinnaj welechugue na, na' xelexe na lu xi'. <sup>20</sup> Ca'an naca, le'e xúnbeale benne' ca' ne chee da ca' dxeluné'.

*Quegá xúgute benne' xelu'e naga dxenná bea Dios xabáa (Lc. 13.25-27)*

<sup>21</sup> Na' gunná Jesús:

—Quebe xelu'e naga dxenná bea Dios xabáa xugute benne' ca' dxel'é'e neda': "Xrana', Xrana'." Welú'u tuze benne' ca' dxeluné' ca da dxaca lazre' Dios zue' xabáa. <sup>22</sup> Ca zrin zra na', benne' zanté xel'é'e neda': "Xránantu', Xránantu', netu' bchálajntu' ne chee Lau' Lue', ne bchí-mentu' Lau' bebéajntu' be' xriwe' ca', ne nen Lau' Lue' bñle'entu' xel-la' waca ca'

chee xabáa." <sup>23</sup> Nadxa neda' xápaqueza' benne' ca': "Quebe númbe'a le'e. Le cuasa cuita' neda', le'e, ba benle da caléla."

*Jesús dxusédené' chee chupa lane xu'u (Lc. 6.47-49; Mr. 1.22)*

<sup>24</sup> Na' gunná Jesús:

—Bénnea' dxenne' chia', ne dxune' ca da dxenná', naque' ca tu benne' naxéa-jni'iqueze', benne' bene' tu lizre' lu xiaj xre. <sup>25</sup> Guca xiuj, na' bdxuaj guba'u, ne guxasa be' bduun' chee xuluzría xi na xu'u na', san quebe guzré'e na lawe' da xu'u lane na lu xiaj xre. <sup>26</sup> Bénnea' quebe dxuzé naque' chia', ne quebe dxune' ca da dxenná', naque' ca tu benne' xala, benne' bene' tu lizre' lu xu dxeze. <sup>27</sup> Guca xiuj, na' bdxuaj guba'u ne guxasa be' bduun' chee xuluzría xi na xu'u na', na' chadite guzré'e na, ne guzría xite na.

<sup>28</sup> Ca bexuzre bchalaj Jesús, na' belexebanne benne' ca' ca naca da bsédené', <sup>29</sup> lawe' da dxusédené' benne' ca' ca tu benne' nape' xel-la' dxenná bea, ne quegá ca dxelún benne' ca' dxuluxuzájle'e da nadxixruj bea Dios.

## 8

*Dxexún Jesús tu benne' dxuzru lu xpele' (Mr. 1.40-45; Lc. 5.12-16)*

<sup>1</sup> Gate bexetaj Jesús lu xi'a na', benne' zanté zjácálené' Le'. <sup>2</sup> Na' bzrin tu benne' we' dxuzru lu xpele', ne bzu zribe' lau Jesús. Dxe'e Le':

—Xran, che dxaca lazru', waca xexunu' neda'.

<sup>3</sup> Nadxa Jesús guxrúa ne'e bénnea'. Dxe'e le':

—Dxaca lazra'. Na'a dxexuna' lue'.

Ca gunné' caní, benne' we' na' bexácate' ca naca xízrawe' chee'. <sup>4</sup> Na' Jesús guzre' le':

—Gunná' xque. Quebe nu xu'u ca'. Bexíajze na'a xeajxel'é'e cuinu' lau bxruze, ne xeajnezruj guna' ca da dxenná bea lu da bdxixruj be'e Moisés, chee xelexé'e benne' ca' ba bexacu' na'a.

*Dxexún Jesús bi wen zrin chee tu benne' dxenná be'e lu wedil-la (Lc. 7.1-10)*

<sup>5</sup> Ca bexú'u Jesús lu xezre Capernaum, na' bzrin lawe' tu benne' Roma, benne' dxenná be'ene' benne' ca' dxjaque' wedil-la, na' guta' xuene' Le', <sup>6</sup> dxe'e Le':

—Xran, bi wen zrin chia' dēbe' lizra'. Naxrú'ünebe' bine, ne dxezácale'ēbe'.

<sup>7</sup>Jesús dxe'e le':

—Wazá'a xexuna'-be'.

<sup>8</sup>Benne' dxenná be'e na' gunné':

—Xran, quebe naca chia' chu'u lizra'. Cun gunneze, na' xexaca bi wen zrin chia'.

<sup>9</sup>Caní waca gunu' lawe' da zua benne' dxenná bé'ene' neda', ne cá'aqueze neda' dxenná be'eda' benne' ca' dxjaque' wedilla. Gate dxapa' tube': “Guxíaj”, na' dxéajbe'. Na' gate dxapa' bi xula: “Gudá”, na' dxídabe'. Na' gate dxuchineda' bi wen zrin chia' chee bi da gunbe', na' dxunbe' na.

<sup>10</sup>Gate bene Jesús da nigá, bebánene', na' guzre' benne' ca' zjácalene' Le':

—Da li dxapa' le'e, ládujla benne' Israel quebe nu ne xezrelda', benne' dxéajle'e chia' ca dxun benne' nigá. <sup>11</sup>Neda' dxapa' le'e, zá'aca benne' zanté chalá'a naga dxalaj gubizra, ne xechalá'ala naga dxebea gubizra, na' xelebé'e tu zren xelawe' nen Abraham, ne Isaac, ne Jacob naga dxenná bea Dios xabáa. <sup>12</sup>Benne' ca' gucá'a zga'ale Dios chee xelu'e naga dxenná bea Le', guzale' benne' ca' lataj chul-la naga xelebezre', ne xeláguxa'atē lazxe'.

<sup>13</sup>Nadxa Jesús guzre' benne' dxenná be'e na':

—Bexíaj lizru'. Waca ca da ba guxéajle'u.

Ca lu zra ná'queze bexácatē bi wen zrin chee'.

*Dxexún Jesús xrna zru'ule Pedro*

(Mr. 1.29-31; Lc. 4.38-39)

<sup>14</sup>Guxíaj Jesús lizre Pedro, na' blé'ene' xrna zru'ule' de' lu da'a, xu'e da la. <sup>15</sup>Xeajté' ne'e, na' bedxúaj da la da xu'e. Nadxa nu'ula na' guxase', ne guzú lawe' dxusení'e da xelagu benne' ca'.

*Dxexún Jesús benne' zantē benne' we'*

(Mr. 1.32-34; Lc. 4.40-41)

<sup>16</sup>Ca guzríá gubizra, na' belezrín benne' zantē lau Jesús, zaj naché'e benne' zaj xu'e be' xriwe' ca'. Nen dízra'ze da gunná Jesús, bebéajē' be' xriwe' ca', ne bexunē' xúgute' benne' we' ca'. <sup>17</sup>Da nigá guca na ca da gunná Isaías, benne' bchálaje' waláz chee Dios, gunné': “Le' bequé'e xízrawe' ca' da nápadxu, ne gubague' ca da dxezácadxu.”

*Dxelaca lazre' benne' chjácalene' Jesús*

(Lc. 9.57-62)

<sup>18</sup>Gate na' ble'e Jesús benne' zantē zaj naxéchaje' Le', na' guzre' benne' ca' dxusé-dene' gulelague' xechalá'a nísadau' tu lu da dxedá lawe' nisa. <sup>19</sup>Na' bzrin lau Jesús tu benne' dxuxuzájle'e da bdixruij be'e Dios, na' dxe'e Le':

—Benne' Wesede, dxaca lazra' sálēna' Lue' gáteteze chéaju'.

<sup>20</sup>Na' Jesús guzre' le':

—Beza' zaj zua bluaj cheeba', na' bxinne' zaj zria xrú'üneba', san neda', Benne' Gulje' Bénéache, ne naga xrua xíchaja' quebe ga zua.

<sup>21</sup>Bzrin xetú benne' naque' benne' ba bsédequeze Jesús, na' guzre' Le':

—Xran, benne' neda' lataj xexá'a nedxu chee cheajxecacha' xra'.

<sup>22</sup>Nadxa Jesús guzre' le':

—Gudálen neda'. Be' lataj benne' gate ca' xulucache ljwezre'.

*Dxebeque zri Jesús be' bdunu', ne xeajxruxa chee nísadau'*

(Mr. 4.35-41; Lc. 8.22-25)

<sup>23</sup>Nadxa guxú'u Jesús lu da dxedá lawe' nísadau', na' benne' ca' dxusé-dene' belune' Le' tu zren. <sup>24</sup>Na' guzú lau dxaca tu be' bdunu' lawe' nísadau', na' xeajxruxa chee nísadau' guxú'u na lu da dxedá lawe' nísadau' na', dxácatē dxase Jesús. <sup>25</sup>Nadxa benne' ca' dxusé-dene' bulusebane' Le', na' dxelé'e Le':

—Xránantu'. Bselá netu'. Ba dxázentu' lu nisa.

<sup>26</sup>Jesús guzre' le':

—¿Bizr chee na' dxezrébele'ele? Nácale benne' látega dxelejilí lázre' Dios.

Nadxa guxasa Jesús. Gudil-le' be' bdunu', ne nísadau', na' la belebé zritē na. <sup>27</sup>Benne' ca' belexebánene', gulenné':

—¿Núzraqueze benne' nigá? Dxuluzúa be', ne nísadau' dizra' chee'.

*Benne' Gadara zaj xu'e be' xriwe'*

(Mr. 5.1-20; Lc. 8.26-39)

<sup>28</sup>Gate bezrín Jesús xechalá'a nísadau' na' lu xezr la xu chee benne' Gadara, na' chupa benne' biu belexedxúaje' lu bluaj chee benne' gate, na' belezrine' lau Jesús. Dxúpatē benne' ca' zaj xu'e be' xriwe', ne zaj naque' benne' sníale'e, na' netú benne' quebe dxexázrene' xedé'e la neza na'. <sup>29</sup>Na' gulezú lawe' dxelebézrexe'e. Dxelenné':

—¿Bizr chee na' za'u naga zúantu', Jesús, Zri'ine Dios? ¿Za'u nigá chee gusaca zi'u netu', ne quebe ne zrin zra?

<sup>30</sup>Tu chi na' zra tu cue' cuche dxeláguba'.  
<sup>31</sup>Be' xriwe' ca' gulata' xue na Jesús, gu-lenná na:

—Che Lue' xebéaju' netu' nigá, benna lataj cheajchú'untu' lu cuche ca'.

<sup>32</sup>Nadxa Jesús guzre' na:

—Le chjaca xca'.

Nadxa be' xriwe' ca' belexedxúaj na lu benne' ca', na' belexú'u na lu cuche ca'. Nadxa xúgute cuche ca' belelázruba' tu dxu'a xi'a zren, na' xejlecházeba' lu nísadau' naga gulázeba' nisa, na' guláteba'.

<sup>33</sup>Benne' ca' buluxúe'-ba' belezrebe', na' besá'aca chégüe', ne belexezrine' lu xezre. Buluchálaje' ca guca xúgute da caní, ne ca guca chee benne' ca', belexedxúaj be' xriwe' zaj xu'e'. <sup>34</sup>Nadxa xúgute benne' zaj zre'e lu xezre na' beledxúaje', ne belezrine' naga zua Jesús. Na' ca belelé'ene' Le', gulata' xuene' Le' xezé'e lu xezr la xu chee'.

## 9

*Dxexún Jesús tu benne' zaj zua zri ni'a ne'e*  
(Mr. 2.1-12; Lc. 5.17-26)

<sup>1</sup>Nadxa Jesús guxú'e tu lu da dxedá lawe' nísadau', na' gulague' xechalá'a nísadau', na' bezrine' lázrequeze'. <sup>2</sup>Na' bedajlegu'e tu benne' biu lau Le', zaj zua zri ni'a ne'e, zaj naxrúe' benne' na' tu lu ta'a blaga'. Gate ble'e Jesús ca dxeléajle'e chee', na' gunné', dxé'e benne' we':

—Ben dipa lazru', zrí'ina'dau'. Dul-la chiu' dxunite lawa'.

<sup>3</sup>Nadxa bal-la benne' dxuluxuzájle'e da nadxixruj bea Dios gulenné' lu xichaj lázrdawe': "Benne' nigá dxucá'ana dítaje' Dios nen xrtizre'." <sup>4</sup>Lawe' da neze Jesús ca gulenné' lu xichaj lázrdawe', na' dxé'e benne' ca', gunné':

—¿Bizr chee na' dxennale caní lu xichaj lázrdaule? <sup>5</sup>¿Bízrala da quebe nácadxa stebe guna'? ¿Nnia': "Dul-la chiu' ba bnite lawa'", u che nnia': "Bexasa, guzá?" <sup>6</sup>Chee le na' gulé'eda' le'e neda', Benne' Gulje' Bénneache, napa' xel-la' dxenná bea lu xezr la xu nigá gunité lawa' dul-la.

Nadxa dxé'e benne' zaj zua zri ni'a ne'e, gunné':

—Bexasa. Becá'a ta'a chiu'. Bexíaj lizru'.

<sup>7</sup>Bénnea' zaj zua zri ni'a ne'e bexase', na' zexíajte' lizre'. <sup>8</sup>Gate belelé'e bénneache da nigá, na' belezrebe', ne belúe lá'ane' Dios lawe' ba bnézruje' xel-la' waca caní chee bénneache.

*Jesús dxuláwizre' Mateo*  
(Mr. 2.13-17; Lc. 5.27-32)

<sup>9</sup>Ca bezá Jesús na', na' blé'ene' tu benne' biu le' Mateo, dxé'e lataj naga dxuchízruje' waláz chee xezre Roma, na' dxé'e le', gunné':

6 —Ben neda' tuze.

Nadxa Mateo nigá guxase' zéajlene' Jesús.

<sup>10</sup>Gate na' dxé' Jesús dxawe' xeta lizre Mateo nigá, benne' zante wechizruj, ne benne' dul-la belezrine', ne gulebé'queze' dxelawe' cuita Jesús, ne benne' ca' dxusé-dene'. <sup>11</sup>Benne' xudau' fariseo ca', gate belelé'ene' da nigá, dxelé'e benne' ca' dxusede Jesús, gulenné':

—¿Bizr chee na' Benne' dxusedene' le'e dxágulene' benne' wechizruj ca', ne benne' wen da zrinmaj ca'?

<sup>12</sup>Jesús benne' da nigá, na' dxé'e benne' ca', gunné':

—Quebe dxelechine benne' chawe' nu benne' dxexune' bénneache. Benne' we' dxelechínene' le'. <sup>13</sup>Le chjaca, le cheajse de ca da dxenná da naxúaj na lu xiche chee Dios, dxenné': "Neda' dxaca lazra' xexache lázrele le sa' ljwézrele, quegá gútele be xixre'du ca' lu cugu chia'." Bla' neda', quegá chee guláwizra' benne' xrlátaje. Dxuláwizra' benne' dul-la chee xelexebí'i lazre'.

*Jesús dxusedene' ca naca chee gubasa*  
(Mr. 2.18-22; Lc. 5.33-39)

<sup>14</sup>Nadxa belezrín lau Jesús benne' ca' dxeledálene' Juan, bénnea' dxuchúe' bénneache nisa, na' gulenábene' Le':

—¿Bizr chee na' quebe dxelún gubasa benne' dxusedenu' Lue', ca dxuntu' netu', ne ca dxelún benne' xudau' fariseo ca'? Tu dxúnzquezentu' gubasa.

<sup>15</sup>Na' Jesús dxé'e benne' ca', gunné':

—¿Ájala chee na' xelezúa ba xácheze benne' zaj zue' laní chee wechaga na' dxácate zua benne' wechaga na' nen le'? Wazrín zra gate dua benne' wechaga na'. Nadxa xelúnqueze' gubasa.

<sup>16</sup>Quegá nu dxudá tu ladxe' cube le'e tu zra lánadxu gula, lawe' da gate cheajxedxe'

da cube na', ne xrube xu na da gula na', na' dxézadxa da gula na'. <sup>17</sup> Ca'anqueze quebe nu benne' que'e xrise uva wal-la cube lu bzude xide gula lawe' da che ca'an gune', gate cue' chi'i xrise uva wal-la, na' dxeza bzude xide na', na' xelebía xi' xrise uva wal-la na', ne bzude xide na'. Chee le na' dxal-la' ca'adxu xrise uva wal-la cube lu bzude xide cube. Che ca'an gundxu, xelegá'ana chawe' dxúpaté na.

Bchalaj Jesús da caní ca naca chee benne' ca' dxelezi' lu ne'e xrtizre'.

*Dxexún Jesús bi nu'ula chee Jairo, ne nu'ula', xejt'é zra lana Jesús*

(Mr. 5.21-43; Lc. 8.40-56)

<sup>18</sup> Dxácate na' dxuchalaj Jesús da nigá, na' bzin tu benne' xíchaje chee benne' judfo ca', na' bzu zribe' lau Jesús, dxenné':

—Bi nu'ula chia' za gütetébe'. Che Lue' xidu' ne guzé na'u lebe', wexaca banbe'.

<sup>19</sup> Na' guxasa Jesús, guxíajlene' le' nen benne' ca' dxusédene'. <sup>20</sup> Nadxa bzin tu nu'ula we' cúzruła Jesús, ba naca chazrinnu iza dxé'ene' tu we' dxaque dxen, na' xejt'é zra lana Jesús. <sup>21</sup> Dxenné' lu xichaj lázrdawe': "Che cheajtaza' zra lane', na' xexaca'."

<sup>22</sup> Jesús guxéchaje', guné'e nu'ula', na' dxé'e le':

—Ben dipa lazru', zri'ina'dau'. Bache bexacu' lawe' da dxéajle'u chia'.

La bexácate nu'ula na'.

<sup>23</sup> Gate na' bzin Jesús lizre benne' xíchaje chee benne' judfo ca', na' blé'ene' zaj zra' benne' wil-la xulucache' bi nu'ula na', ne benne' zaj zre'e dxelune' zralaj. <sup>24</sup> Gunná Jesús, dxé'e benne' ca':

—Le xedxúaj nigá. Quegá nate bi nú'uladau' nigá. Dxásezebe'.

Na' buluzrizre' chee'. <sup>25</sup> Gudé bebéaje' benne' ca', na' guxú'u Jesús, ne bérxue' na' bi nu'ula na', na' guxásabe'. <sup>26</sup> Du ca naca xezre ca' bzriluj dizra' chee da ben Jesús.

*Dxexún Jesús chupa benne' la chul-la*

<sup>27</sup> Ca bedxúaj Jesús na', na' chupa benne' xjaque' cuzru Le', dxelenné' zizraj:

—Bexache lazre' netu', Lue', Zri'ine David.

<sup>28</sup> Ca guxú'u Jesús lu xu'u naga zúaqueze', na' benne' la chul-la caní gulebigue' lau Le', na' Jesús guzre' benne' ca':

—¿Dxéajlele wazéqueda' xexuna' le'e?

Na' gulé'e Le':

—Awe', Xran.

<sup>29</sup> Nadxa Jesús gudane' xiaj lau benne' ca', dxenné':

—Gaca chee ca dxéajlele.

<sup>30</sup> Belexaca xiaj lawe'. Nadxa Jesús gunné' xuene' benne' ca', gunné':

—Le guxúe xanne' chee quebe nu neze da nigá.

<sup>31</sup> Gate beledxúaje', na' buluchálaje' du ca naca xezre ca' ca da ben Jesús chee'.

*Dxexún Jesús tu benne' quebe dxaca nnié'*

<sup>32</sup> Ca bezá' Jesús nen benne' ca', na' belezrin bal-la benne' zaj naché'e tu benne' biu quebe dxaca nnié', benne' xu'e be' xriwe'. <sup>33</sup> Cáteze bebéaj Jesús be' xriwe' nigá, na' benne' quebe dxaca nnié' bezú lawe' dxuchálaje'. Na' benne' ca' belexebánele'e, dxelenné':

—Cabata' ne lé'edxu gaca caní ládujla benne' Israel ca'.

<sup>34</sup> Benne' xudau' fariseo ca' gulenné':

—Benne' nigá dxebéaje' be' xriwe', dxuchíne' xel-la' waca chee da xriwe', da na' dxenná be'e na be' xriwe' ca'.

*Dxexache lazre' Jesús bénneache ca'*

<sup>35</sup> Gudé Jesús tu tu xezre zren, ne tu tu xézredau', dxusédene' benne' ca' lu xu'u ca' naga dxulucá'ana szrene' Dios tu tu lataj ca'. Gulu'e lban chee dizra' chawe' ca nna bea Dios, ne bexunte' bénneache zaj nape' tu tu cue' xízrawe' ca da dxelezaque'. <sup>36</sup> Gate ble'e Jesús bénneache ca', na' bexache lazre' le' lawe' da zaj zre'e xácheze', ne dxelecuán lazre'. Zaj naque' ca zrila' ca' quebe zua benne' guxúe'-ba'. <sup>37</sup> Nadxa guzre' benne' ca' dxusédene':

—Da li, da zrente' de da lápadxu, na' bábaze benne' wen zrin zaj zre'e. <sup>38</sup> Chee le' na' le naba lau Xrana lina nigá, sel-le' benne' wen zrin xeelape' lina chee'.

## 10

*Dxeca'a Jesús chazrinnu benne' xelaque' gubáz chee'*

(Mr. 3.13-19; Lc. 6.12-16)

<sup>1</sup> Nadxa Jesús bláwizre' chazrinnu benne' ca' dxusédene', na' bnézuje' le' xel-la' dxenná bea chee xelexebéaje' be' xriwe' ca', ne chee xelexexune' bénneache zaj xu'e tu tu cue' xízrawe' ca da dxelezaque'.

<sup>2</sup> Caní zaj le' chazrinnu benne' gubáz ca' chee Jesús:

Benne' nedxu le' Simón, ne léqueze' Pedro.

Xetúe' naque' benne' biche Pedro, le' Andrés.

Xechupe' zaj le' Jacobo, ne Juan, benne' zaj naque' zri'ine Zebedeo.

<sup>3</sup> Xezícala benne' ca' zaj le' Felipe, ne Bartolomé, ne Tomás.

Xetue' le' Mateo, benne' wechizruj chee xezre.

Xetue' le' Jacobo, zri'ine Alfeo.

Xetue' le' Lebeo, benne' léqueze' Tadeo.

<sup>4</sup> Xetúe' le' Simón, benne' dxe'e gunne xue chee xezr la xu Israel.

Xetúe' le' Judas Iscariote, béne'a gudé' Jesús lu na' benne' dxeledábague' Le'.

*Dxesel-la Jesús benne' gubáz chee' ca' chea-  
jlezenne' bénneache xrtizre'e*

(Mr. 6.7-13; Lc. 9.1-6)

<sup>5</sup> Nadxa gusel-la Jesús benne' chazrinnu caní. Guzre' le':

—Quebe cheajle naga zaj zra' benne' quebe zaj naque' judío, ne quebe chu'ule xezre ca' zaj nababa Samaria. <sup>6</sup> Le hjyaca naga zaj zra' benne' Israel zaj naque' ca zrila' zaj naníteba'. <sup>7</sup> Le hjyaca zaj ule lban, xe le bénneache ba bzrin gáguze zra nna bea Dios lu xezr la xu nigá. <sup>8</sup> Le xexún benne' zaj xu'e we' guzru', ne benne' bila xízrawe' dxelé'eng'. Le gusebán benne' gate. Le xebéaj be' xriwe' da zaj xu'u bénneache. Cá'aze guzile xel-la' dxenná bea nigá, na' cá'aze le guchine na, quebe bi sile.

<sup>9</sup> Quebe gúale dumí oro, ne dumí plata, ne dumí lase. <sup>10</sup> Quebe gúale xixruj xeta da gágule la neza. Quebe gúale xetú cue' zra lánale, ne zréale, ne xaga da gúxrule. Benne' wen zrin wazrúequeze' da gawe'.

<sup>11</sup> Gate na' zrinle le'e tu xezre zren u tu xézredau', le quilaj na' tu benne' du lazre', na' le xegá'ana lizre' ca zrindxa zra xeza'ale na'. <sup>12</sup> Gate na' chu'ule lu xu'u na', le xe bénnea' naca lizre' na': "Xela dxebeza zri lazre' suale na le'e." <sup>13</sup> Che benne' ca' zaj naca chee' xelezí'e xel-la' ba lá'ana caní, le gucá'ana cá'aze na. Che quebe zaj naca chee' xelezí'e da nigá, na' quebe gata' chee'.

<sup>14</sup> Che quebe lataj dxeluné' le'e, ne quebe dxelenne' chee le, le xedxúaj lu xu'u na' u lu xezre na', na' le xebibe bxrtedu na' zria ní'ale. <sup>15</sup> Da li dxapa' le'e, ca zrin zra guchi'a Dios, Dios gundxe' da ba xa' chee benne' xezre na' quez ca da guné' chee benne' Sodoma, ne benne' Gomorra, xezre ca' guzria xi'e.

*Xelebé nawe' bi ca' chee Jesús*

<sup>16</sup> Na' gunná Jesús:

—Le na' xque nigá. Neda' dxesel-la' le'e, gácale ca zrila' zaj zra'ba' ládujla becu' xi'a ca'. Chee le' na', le gaca sina ca' zaj naca be'la', san le gaca dxexruj lazre' ca zaj naca bgúgudu ca'. <sup>17</sup> Le guxúe cuínale. Zaj zra' benne' xuludé' le'e lu na' benne' xu'u lawe', ne xuluzálaje' le'e lu xu'u naga dxulucá'ana szrene' Dios. <sup>18</sup> Cá'anqueze weleché'e le'e lau benne' xu'u lawe' ca', ne lau benne' dxelenná bea lawe' da nácale chia' neda'. Ca'an gaca guchálajle ca naca chia' neda' lau benne' ca', ne lau benne' quebe zaj naque' judío. <sup>19</sup> Gate na' xuludé' le'e lu na' benne' dxuchi'a da dxaca, quebe gunne xue cue'le ca da nnale u ájala guchálajle, lawe' da gate zrin zra guchálajle, Dios gunne' ca da guchálajle. <sup>20</sup> Quegá le'eze guchálajle, lawe' da Be' Lá'azxa chee Dios guchálajle' lu dxú'ale.

<sup>21</sup> Xuludé bénneache benne' bíchequeze' lu na' benne' xelútie' le'. Cá'anqueze xra xrna xuludé' zri'ine', na' zri'ine' ca' xeledábagabe' xra xrnáquezebe' chee xelátie'. <sup>22</sup> Xúgute bénneache xelezré'e le'e lawe' da nácale chia' neda', san bénnea' guxru chache' dizra' chee Dios ca zrin zra cheajsé chee', la bénnea'. <sup>23</sup> Gate xelebé nawe' le'e tu xezre, le xuzrunnuj xetú xezre. Da li neda', Benne' Gulje' Bénneache, dxapa' le'e, xida' nédxula ca quebe ne tache tale xúgute xezre chee benne' Israel.

<sup>24</sup> Netú benne' quebe naque' szrendxa ca benne' dxusédené' le'. Cá'anqueze netú benne' wen zrin quebe naque' szrendxa ca xrané'. <sup>25</sup> Tu benne' dxuséde dxal-la' gun zi' lazre' gaque' ca naca benne' dxusédené' le', na' benne' wen zrin dxal-la' gun zi' lazre' gaque' ca naca xrané'. Che benne' naque' xrane xu'u dxelé'e le' Beelzebú, da xriwe', chezradxa xelenné' chee bi chee' ca'.

*¿Núzraqueze dxal-la' zrédexu?*

(Lc. 12.2-9)

<sup>26</sup> Na' gunná Jesús:

—Chee le' na', quebe zrébele bénneache. Xúgute da bagácheze gaca béaqueze na, na' xúgute da dxelaca ga nagache gulé' láuqueze na. <sup>27</sup> Da nigá dxapa' le'e lu da chul-la, le guchalaj na te zra. Da dxapa' le'e bagácheze, le nne zizraj chee xelén xúgute benne'. <sup>28</sup> Quebe zrébele benne' xelútie' be'la' dxen chee le. Quebe xelezéquene'

xelútię' bėnne'du xu'ule. Le zrebe Dios. Le' dxezéqueņe' guzrıa xi'e bėl-la' dxen cheeļe, ne bėnne'du xu'ule lu lataj ba xa'.

<sup>29</sup> Dxelúti'e chupa bxinnedu ca' nen tu dumıdau'. Netuba' quebe gáteba' chee quebe ne güe lataj Xrale. <sup>30</sup> Cá'anqueze xicha xıchajle, xúgute na zaj nababa na. <sup>31</sup> Cheę ļe na', quebe zrėbele. Zácadxale le'e quezcala bę zan bxinnedu ca'.

*Dxal-la' xechębedxu nácadxu cheę Jesu-cristo*

(Lc. 12.8-9)

<sup>32</sup> Na' gunná Jesús:

—Xúgute benne' ca' dxelexechebe' zaj naque' chia' neda' lau bėnneache, cá'anqueze neda' wechębequeza' zaj naque' chia' neda' lau Xra' zuę' xabáa. <sup>33</sup> Benne' ca' quebe dxelexechebe' zaj naque' chia' lau bėnneache, nėda'queza' quebequeze xechęba' zaj naque' chia' lau Xra' zuę' xabáa.

*Da naca Jesús naca na tu da dxun na chupa la'a bėnneache*

(Lc. 12.51-53; 14.26-27)

<sup>34</sup> Na' gunná Jesús:

—Quebe guéquele bla'a neda' chee guzúa' xel-la' dxebeza zri lazre' lądujla bėnneache. Bla'a neda', quegá cheę guzúa' xel-la' dxebeza zri lazre', san cheę guzúa' wedil-la. <sup>35</sup> Bla'a neda' cheę guna' tábaga' tu benne' xre', ne cheę guna' tábaga' tu bi nu'ula xrnabe', ne cheę guna' tábaga' tu zru'a lızre' tau zrı'ine'. <sup>36</sup> Ca'an gaca, tu tu benne' tıl-lalę xrtıa lıwezre' ļe'.

<sup>37</sup> Che tu benne' nazrı'idxene' xra xrne'e quezca neda', quebe naca cheę gaque' chia', na' che nazrı'idxene' bi cheę' ca' quezca neda', quebe naca cheę gaque' chia'. <sup>38</sup> Che tu benne' quebe gun cuine' ca tu benne' zėjte'e le'e xaga bėguaj, ne gunę neda' tuze, quebe naca cheę gaque' chia'. <sup>39</sup> Benne' dxaca lazre' gapa chi'e xel-la' nabán cheę' gunitie' na. Bėnnea' zúatequeze gudėę' xel-la' nabán cheę' ne chia' neda', guselę' xel-la' nabán cheę'.

*Da gunna Dios dxi'u*

(Mr. 9.41)

<sup>40</sup> Na' gunná Jesús:

—Che tu benne' gape' le'e ba lá'ana, nėda'queze gape' ba lá'ana, na' bėnnea' dxape' neda' ba lá'ana, dxápaqueze' ba lá'ana Dios, Bėnnea' gusel-ļe' neda'. <sup>41</sup> Che

tu benne' gape' ba lá'ana tu benne' dxuchalaje' waláz cheę Dios lawe' da ze'e waláz cheę Dios, benne' nigá wazı'queze' tuze ca da si' bėnnea' dxuchalaje' waláz cheę Dios. Na' che tu benne' gape' ba lá'ana tu benne' xrlátaje lawe' da naque' benne' xrlátaje, benne' nigá wazı'queze' tuze ca da si' benne' xrlátaje na'. <sup>42</sup> Núteteze benne' gunézruje' tu zrıga' nisa zaga da xi'aj tu bidu canı lawe' da naque' chia' neda', da lıqueze wazı'e da gunezruj Dios ļe'.

## 11

*Dxelezrıń benne' ca' gusel-la Juan lau Jesús*  
(Lc. 7.18-35)

<sup>1</sup> Gate bexzre Jesús bchálajlene' bėnneache, na' bchálajlene' chazrinnu benne' ca' dxusėdene'. Bezė'e na' cheę cheajsėdene', ne cheajchálaje' lban xúgute xęzre ca' lu xęzr la xu na'.

<sup>2</sup> Juan, bėnnea' bchue' bėnneache nisa, xu'e lızre xia, na' benņe' ca naca da dxun Cristo. Nadxa gusel-ļe' chupa benne' ca' dxeledálene' ļe' lau Jesús. <sup>3</sup> Benne' chupe' canı buluchebe' Jesús:

—ıNacu' Lue' Cristo, Bėnnea' dxal-la' xide', u che dxal-la' cuézantı' xelá' xetı benne'?

<sup>4</sup> Na' bechębe Jesús:

—Le hjaca cheajęzrele Juan da canı dx-elé'ele, ne da dxenle. <sup>5</sup> Le xe'e ca dxaca, dxelexel'e benne' gulaque' la chul-la. Dxelexedá benne' gulezıa zrı ni'a ne'e. Belexexaca benne' gulezaque' we' guzru', ne belexexaca ban benne' ca' gulatie'. Benne' xache' ca' dxeleņne' dizra' chawe' cheę Dios. <sup>6</sup> Ba neza zrentę naca na cheę bėnnea' quebe xucuán lazre' sálęne' neda'.

<sup>7</sup> Ca besı'aca benne' chupa ca', na' guzú lau Jesús dxuchálajlene' benne' zaj zre'e na' ca naca cheę Juan. Dxennę':

—ıBizra xeajna'le le'e le'e xixe' na'? ıXeajna'le tu xia da dxuxrıze be'? <sup>8</sup> Che cabı, ıbizra xeajna'le na'? ıXeajna'le tu benne' nacue' zra lanę' da zaca? Nėzquezle benne' ca' zaj nácuę' ladxe' zaca, lızre benne' dxeleńná be'e zaj zra' benne' canı. <sup>9</sup> ıBızraqueze xeajna'le? ıXeajna'le tu benne' dxuchálaje' waláz cheę Dios? Awe'. Ca'an guca. Bėnnea' ble'ele na' nácadxę' blau ca tu benne' dxuchálaje' waláz cheę Dios. <sup>10</sup> Lu xiche cheę Dios naxıaj na ca naca

chee Juan na'. Dxenná na: Neda' dxesel-la' benne' gubáz chia' nédxula ca Lue', chee gucueze' neza naga teu'. <sup>11</sup> Da li dxapa' le'e, ládujla xúgute' bénneache quebe nu chilá' benne' nácadxe' blau ca naca Juan, bénnea' bchue' bénneache nisa. Naga dxenná bea Dios, bénnea' nácadxe' benne' dxexruj lazre' nácadxe' blau ca naca Juan na'.

<sup>12</sup> 'Ca lu zra bla' Juan, bénnea' bchue' bénneache nisa, bzrinte' na'a zra, zaj zra' benne' dxelune' zi' lazre' xelu'e naga dxenná bea Dios xabáa, na' benne' dxelune' zi' lazre' dxelezrué'enge' na. <sup>13</sup> Ca da bzuj Moisés lu xiche chee da nadxiruj bea na, ne ca gulenná xúgute' benne' buluchálaje' waláz chee Dios, dxuchalaj na ca naca chee xel-la' dxenná bea chee Dios, bzrinte' ca bla' Juan na'. <sup>14</sup> Che le'e dxaca lázrele chéajlele da nigá, Juan na' naque' Elías, bénnea' bchálaje' waláz chee Dios gate nate, na' dxal-la' xel'é chee guchálaje' waláz chee Dios. <sup>15</sup> Che zua nágale, le xen da nigá.

<sup>16</sup> '¿Ajazra zaj naca benne' zaj zre'e na'a zra? Zaj naque' ca bidu ca' dxelebé'ebe' dxelítajbe' lawe' xi'a, ne dxelennebe' zizraj, dxelé ljwézrebe' ca': <sup>17</sup> "Bcuézrentu' bchiuj san quebe bxá'ale le'e. Bil-la xáchentú' san quebe gudxézrele." <sup>18</sup> Caní zaj naque' lawe' da bla' Juan, quebe dxawe', ne quebe dxí'aje' da zaca, na' le'e dxennale xu'e be' xriwe'. <sup>19</sup> Nadxa bla' neda', Benne' Gulje' Bénneache, dxawa', ne dxí'aja', na' dxennale naca' neda' benne' wagu xrata, ne benne' dxi'aj, ne ljwezre benne' dul-la, ne benne' wechizruj chee Roma. Naca bea nu benne' nape' xel-la' sina chee Dios ne chee da dxun bénnea'.

*Ca gaca chee bénneache quebe dxuluzúe' xrtizra' Dios*

(Lc. 10.13-15)

<sup>20</sup> Nadxa guzú lau Jesús dxedil-le' bénneache chee xezre ca' naga bene' xel-la' waca ca' chee xabáa, lawe' da quebe belexebí'i lazre' benne' zaj zre'e na'. Na' gunné':

<sup>21</sup> —Baxache' nácale le'e zrale xezre Corazín. Baxache' nácale le'e zrale xezre Betsaida. Caní nácale lawe' da checa' la ba guca lu xezre Tiro, ne lu xezre Sidón ca naca xel-la' waca ca' chee xabáa ca da gulaca ládujla le'e, da zrente' ba zeaj gulácue' zra lane' tuzruj, ne gulegú'e de xíchaje' da zaj naca bea na belexebí'i lazre'. <sup>22</sup> Neda' dxapa'

le'e, lu zra guchi'a Dios, gundxe' da ba xa' chee quez ca da ba xa' gune' chee benne' Tiro, ne benne' Sidón. <sup>23</sup> Le'e zrale xezre Capernaum, ¿dxéquele Dios wechise' le'e xabáa? Dios gudé' le'e lataj ba xa'. Caní gaca na lawe' da checa' la ba guca lu xezre Sodoma ca naca xel-la' waca ca' chee xabáa ca da gulaca ládujla le'e, nagá'anatequeze xezre na' lu zra na'a zra. <sup>24</sup> Neda' dxapa' le'e, lu zra guchi'a Dios, gundxe' da ba xa' chee quez ca gune' da ba xa' chee benne' Sodoma ca'.

*Dxenná Jesús: "Le da naga zua' xezi' lázrele"*

(Lc. 10.21-22)

<sup>25</sup> Ca lu zra na' gunná Jesús:

—Dxue lá'ana' Lue', Xrae, nacu' Xrana xabáa, ne Xrana xezr la xu nigá. Dxue lá'ana' Lue' lawe' da bcácheu' da caní lau benne' sina ca', ne lau benne' dxeléajni'ine', san blé'enu' na bidu caní. <sup>26</sup> Ca'an naca, Xrae, lawe' da naca na ca dxaca lazru' Lue'.

<sup>27</sup> 'Xra' ba bdee' lu na'a xúgute' da caní. Quegá nu benne' núnbe'e neda', Zri'ine Dios, san Xra' Dios núnbe'e neda'. Quegá nu benne' núnbe'e Xra', san neda', Zri'ine Dios, núnbe'a Le', ne zaj núnbea benne' ca' Le', benne' ca' dxaca lazra' gulé'eda' le' ca naca Xra'. <sup>28</sup> Le da naga zua', xúgutele le'e dxeajxréquele lu zrin dxunle chee xudau', ne ca naca xua da núale, na' neda' guna' xezi' lázrele. <sup>29</sup> Le gunna lataj xrúa' le'e ca nu benne' xrué' bezre xugu' cheeba', ne le gusede chia' lawe' da naca' dxexruj lazre', ne dxe'ene lazre', na' wazrué'ele xezi' lázrele lu bénne'du xu'ule. <sup>30</sup> Da na' naca na ca xugu' chee bezre da xrúa' le'e québeté' ca naca na stebe chee gúale na, na' xua da xrúa' le'e naca na zraze.

## 12

*Bi ca' dxusede Jesús dxelequ'é' dau zrúa' xtila gate naca zra dxulupá'ana judío*

(Mr. 2.23-28; Lc. 6.1-5)

<sup>1</sup> Ca lu zra na' xu'u Jesús neza zéaje' ládujla naga de xel-la' zrúa' xtila, ne naca zra dxulupá'ana benne' judío. Dxeledún benne' ca' dxusede Jesús, na' gulezú lawe' dxelálaje' dau naga zria zrúa' xtila, ne dxelawe' na. <sup>2</sup> Gate belelé'e benne' xudau' fariseo ca' da caní, na' gulé' Jesús:

—Guná' xque ca dxelún benne' ca' dxusédenú', dxeluné' zrin da quebe naca cheé' xeluné' lu zra dxupá'anadxu.

<sup>3</sup>Jesús guzre' benne' ca':

—¿Quebe ne gulábale le'e ca ben David gate na' le', ne benne' ljwezre' ca' guleduné'? <sup>4</sup>Guxú'e lu xu'u cheé Dios, ne gulawé' xeta xtila lá'azxa, da quebe zaj naca cheé' xelawé', le', ne benne' ljwezre' ca', san tuze bxruze ca' zaj naca cheé' xelawé' na. <sup>5</sup>¿Quebe ne gulábale da naxúaj na lu da bdxixruj be'e Moisés ca dxelún bxruze ca' lu xudau', dxeluné' zrin cheé xudau' lu zra dxupá'anadxu, ne quebe zaj nabague' zria? <sup>6</sup>Neda' dxapa' le'e, de tu da naca blaudxa ca xudau' nigá. <sup>7</sup>¿Quebe ne chéajni'ile ca zéajé da naxúaj na lu xiche cheé Dios? Dxenná na: Neda' dxaca lazra' xexache lázrele le sa' ljwézrele, ne quegá gútele be xixre'du ca' lu cugu chia'. La ba guxéajni'ile da nigá, quebe ne guzria xile bénneache quebe zaj nabague' dul-la. <sup>8</sup>Cheé le na', neda', Benne' Gulje' Bénneache, napa' xel-la' dxenná bea dxuna' zrin chia' lu zra dxupá'anadxu.

*Dxelún Jesús tu benne' zua zri ne'e*  
(Mr. 3.1-6; Lc. 6.6-11)

<sup>9</sup>Nada Jesús bezé'e na', na' guxú'e tu lu xu'u naga dxelúe lá'ane' Dios. <sup>10</sup>Zua tu benne' zua zri ne'e ga na'. Benne' judío ca' gulaca lazre' xelezrele' ajala xeluné' cheé gaca xelagu zrié' cheé Jesús. Cheé le na' gulenábene' Le':

—¿Dxunna Dios lataj xexundxu benne' we' lu zra dxupá'anadxu?

<sup>11</sup>Jesús guzre' benne' ca':

—Núteteze benne' zue' ládujla le'e, che zua tu zri-la' cheé', ne che bíxreba' tu xedxu situj lu zra dxupá'anadxu, ¿quebe chéajé' cheajxeléaje'-ba' xca'? <sup>12</sup>Da zrendxa zaca tu benne' quez ca tu zri-la'. Ca'an naca dxunna Dios lataj gundxu tu da xrlátaje lu zra dxupá'anadxu.

<sup>13</sup>Nadxa Jesús guzre' benne' we' na':

—Bli na'u.

Ca blí ne'e, na' bexaca na ca ne'e xetu.

<sup>14</sup>Nadxa beledxúaj benne' xudau' fariseo ca', ne gulezú lawé' dxelíaje' ajala xeluné' xelútie' Jesús.

*Da gunná tu benne' bchálaje' waláz chee Dios ca dxal-la' gaca chee Jesús*

<sup>15</sup>Gate gúquebe'e Jesús da nigá, na' bezé'e na', na' benne' zante' zjácálene' Le'. Bexún Jesús xúgute' benne' we' zaj zre'e ládujla

benne' ca'. <sup>16</sup>Jesús gunné xúene' benne' ca' quebe nu xululé'ene' nu naca Le'. <sup>17</sup>Caní guca ca da gunná Isaías, benne' bchálaje' waláz chee Dios, gunné':

<sup>18</sup>Benne' nigá naque' wen zrin chia', benne' ba gucá'a.

Benne' nigá nazrí'ida', ne dxezaca ba lázrelena' Le'.

Guzúaqueza' xichaj lázrdawe' Be' Lá'azxa chia'.

Guzenne' bénneache xúgute' xezr la xu ca dxuchi'a da dxaca.

<sup>19</sup>Quebe tíl-laléqueze' bénneache, ne quebe cuézrexe'e.

Netú benne' quebe xenne' chi'e la neza.

<sup>20</sup>Quebe quichje' tu xia da ba nachaj, ne quebe xusul-le' xi' da ba dxaca wexul-la na,

ca zrindxa zra xuzúe' xel-la' dxenná bea chawe' cheé'.

<sup>21</sup>Bénneache xúgute' xezr la xu xuluxrén lázrequeze' Le'.

*Dxelenné' napa Jesús xel-la' dxenná bea chee da xriwe'*

(Mr. 3.19-30; Lc. 11.14-23; 12.10)

<sup>22</sup>Nadxa guleché'e lau Jesús tu benne' la chul-la, benne' quebe dxaca nnié', lawe' da xu'e be' xriwe'. Jesús bexune' benne' nigá, na' belé'ene', ne bennié'. <sup>23</sup>Xúgute' benne' ca' belexebánene', gulenné':

—¿Naca benne' nigá Zri'ine David zra?

<sup>24</sup>Gate belén benne' xudau' fariseo da nigá, na' gulenné':

—Benne' nigá dxebéaje' be' xriwe', dxuchínene' xel-la' dxenná bea chee Beelzebú, xrane be' xriwe' ca'.

<sup>25</sup>Dxeque be'e Jesús ca da dxelenné', dx-elé'e ljwezre', na' guzre' le':

—Lu xu'u lawe' cheé gáteteze xezre, che xelaca chupa la'a benne' xu'u lawe' ca', ne bal-le' xeledíl-lalene' xezcadxe', na' wexul-la wenite xel-la' dxenná bea cheé benne' ca'. Cá'anqueze che tu xezre benne', u tu cue' xrtía ljwezre xelaque' chupa la'a, ne xeledíl-lalene' le sa' ljwezre', wenítequeze xezre na', u xrtía ljwezre ca'.

<sup>26</sup>Cá'anqueze, che Satanás, da xriwe', dxebéaje na ljwezre da xriwe', leze na dxexún na chupa la'a cuina na. ¿Ajazra gácaqueze nna bea na? <sup>27</sup>Le'e dxennale chia' dxebéaje' be' xriwe' ca', dxuchíneda' xel-la' dxenná bea chee Beelzebú da xriwe'. Che naca na ca', ¿Nuzra dxúnnaqueze xel-la' dxenná bea chee benne' ca' zaj naca le'e



tuze chee xelebéaje' be' xriwe' ca'? Chee le' na' léqueze' dxululé'etene' nanéguele le'e. <sup>28</sup> Che neda' dxebéaja' be' xriwe' ca' dxuchínea' xel-la' waca chee Be' Lá'azxa chee Dios, da nigá dxunna bea na ba bla' xel-la' dxenná bea chee Dios ládujla le'e.

<sup>29</sup> 'Ĵajzra gun tu benne' chu'e lizre tu benne' wal-la chee que'e da de chee' che nédxula quebe guchéaje' ni'a na' bénnea'? Che gune' caní, na' wazéquene' que'e da de chee bénnea'.

<sup>30</sup> 'Nu benne' quebe dxácalene' neda', dxedábagu'e neda', na' benne' quebe dxex-zígalene' neda', dxexúsie' na.

<sup>31</sup> 'Chee le' na' dxapa' le'e, gunité lau Dios chee bénneache xúgute' dul-la zaj nabagu'e, ne xúgute' da calela da dxelenné', san che xelenné' schanni' chee Be' Lá'azxa, cabata' gunité lau Dios chee'. <sup>32</sup> Núteteze benne', che bi nnie' schanni' chia' neda', Benne' Gulje' Bénneache, Dios gunité lawe' chee', san che tu benne' nnie' schanni' chee Be' Lá'azxa, québequeze gunité lau Dios chee' lu xezr la xu nigá ne cá'anqueze lu xezr la xu da za za'.

*Da dxun tu benne' dxule'e na ca naque'*

*(Lc. 6.43-45)*

<sup>33</sup> Na' gunná Jesús:

—Che naca chawe' tu xaga, dxebía na da zixre chawe', na' che naca tu xaga bize, dxebía na da zixre bize. Ca'an naca, tu xaga naca bea na ne chee da zixre da dxebía na.

<sup>34</sup> Le'e, be snia ca'. 'Ĵajzra gunle le'e nnele da xrlátaje che le'e nácaquezle benne' wen da calela xca'? Ca da dxedxuaj dxú'adxu naca na ca da zua na lu xichaj lázrdaudxu.

<sup>35</sup> Benne' xrlátaje dxenné' da naca xrlátaje lawe' da zua da xrlátaje lu xichaj lázrdawe', na' benne' wen da calela dxenné' da calela lawe' da zua da calela lu xichaj lázrdawe'.

<sup>36</sup> Neda' dxapa' le'e, lu zra guchi'a Dios, xúgute' bénneache xuludée' ca da gulenné', tu tu dizra' xala da gulenné'. <sup>37</sup> Ca naca dizra' da ba gunnú', Dios guchi'e chiu', na' Le' nnáqueze' che xedxúaju' xrlátaje, u che webagu' zria.

*Bénneache wen da calela ca' dxelenábene' Jesús gung' tu xel-la' waca chee xabáa*

*(Mr. 8.12; Lc. 11.29-32)*

<sup>38</sup> Nadxa bal-la benne' xudau' fariseo, ne benne' dxuluxuzájle'e da nadxixruj bea Dios gulé'e Jesús:

—Benne' Wesede, dxaca lázrentu' le'entu' chiu' gunu' tu xel-la' waca da za xabáa.

<sup>39</sup> Na' guzre Jesús benne' ca':

—Bénneache wen da calela, benne' zaj naque' chupa lazre', dxelenábene' neda' guna' tu xel-la' waca da za xabáa. Quebe xelélé'equenze' tu xel-la' waca, san tuze ca da dxunna bea na ca da guca chee Jonás, benne' bchálaje' waláz chee Dios.

<sup>40</sup> Ca guca chee Jonás, guxú'e lu le'e bela zren chunna zra chunna xela, cá'anqueze gaca chia' neda', Benne' Gulje' Bénneache, waxú'ukeza' lu xedxu ba chunna zra chunna xela. <sup>41</sup> Benne' gulezré'e xezre Nínive welexásaqueze' lu zra guchi'a Dios gate guchi'e chee bénneache zaj zre'e na'a, na' benne' Nínive ca' xululé'ene' zaj nabaga zria benne' caní lawe' da belexebí'i lazre' benne' Nínive gate na' bchalaj Jonás dizra' chee Dios lau benne' ca', na' blaudxa ca Jonás na' naca Benne' zue' nigá. <sup>42</sup> Cá'anqueze nu'ula na' gunná be'e chalá'a naga dxedá gubizra beu' zaga ca' wexásaqueze' lu zra guchi'a Dios gate guchi'e chee bénneache zaj zre'e na'a, na' nu'ula na' gulé'ene' zaj nabaga zria benne' caní lawe' da bezé'e naga naca zítu'te chee xezr la xu nigá chee xenne' dizra' sina da bchalaj Salomón, na' blaudxa ca Salomón na' naca Benne' zue' nigá.

*Ca naca chee be' xriwe' da bexú'u na tu benne'*

*(Lc. 11.24-26)*

<sup>43</sup> Na' gunná Jesús:

—Gate tu be' xriwe' dxedxuaj na tu benne', na' dxedá na lataj naga nabizre, dxexilaj na naga xezí' lazre' na, na' che quebe xezrele na, na' dxenná na lu xichaj lázrdau na: <sup>44</sup> “Webi'a xexá'a lizra' naga bedxúaja'.” Ca xezrin na, le'e na benne' na', naque' ca tu xu'u da naxíajlbe lu'ule na, ne nalúa na, ne nagá'ana chawe na.

<sup>45</sup> Nadxa cheaj na cheajezrí' na xegazre be' xriwe' da zaj naca na xríwédxa ca le' na, na' xúgute' na dxelú'u na lu bénnea', na' naca chee benne' na' da caléladxa ca guca chee' nedxu. Cá'anqueze gaca chee bénneache wen da calela caní.

*Benne' zaj naque' ca xrna Jesús, ne ca benne' biche' ca'*

*(Mr. 3.31-35; Lc. 8.19-21)*

<sup>46</sup> Jesús ne zue' dxuchálajlene' benne' caní gate belezrín xrne'ē ne benne' biche' ca' ga na'. Gulezré'ē chalé'ajla, ne dxelaca lazre' xuluchálajlene' Jesús. <sup>47</sup> Nadxa tu benne' guzre' Jesús:

—Xrna'u, ne bi bichu' ca' zaj zre'ē chalé'ajla. Dxelaca lazre' xuluchálajlene' Lue'.

<sup>48</sup> Jesús guzre' benne' nigá:

—¿Núnbeale nuzra na' xrna'a, ne bi bícha'dau' ca'?

<sup>49</sup> Nadxa ble'e Jesús benne' ca' dxusé-dene', dxenne':

—Benne' caní zaj naque' xrna'a, ne bi bícha'dau' ca'. <sup>50</sup> Caní naca na lawe' da núteteze benne' dxune' ca' da dxaca lazre' Xra' zue' xabáa, benne' nigá naque' benne' bícha', ne benne' zana', ne xrna'a.

### 13

*Da bsede Jesús ca da ben benne' dxaza*

(Mr. 4.1-9; Lc. 8.4-8)

<sup>1</sup> Lu zra na' bdxuaj Jesús xu'u, na' xea-jdxé'ē dxu'a nísadau'. <sup>2</sup> Na' lawe' da belezraga benne' zante naga zua Jesús, guxú'ē tu lu da dxdé' lawe' nísadau', ne gudxé'ē na'. Xúgute benne' ca' belexegá'ane' dxu'a nísadau' na'. <sup>3</sup> Nadxa bsede Jesús benne' ca' da zante da bchálaje', dxenne':

—Tu benne' dxaza guzé'ē zíaje' guza.

<sup>4</sup> Dxácate dxaze', bal-la bínnedu ca' xejlechaze na dxu'a neza. Na' belelá' bínnedu ca', guláguba' bínnedu ca'. <sup>5</sup> Bal-la bínnedu ca' xejlechaze na lu xiaj naga quebe dxé'teca xu. Bínnedu caní chadí gulezría na lawe' da quebe dxé'teca xu. <sup>6</sup> Gate bla' gubizra, na' gulecuade na. Lawe' da quebe dxé'teca xu, na' gulebizre na. <sup>7</sup> Bal-la bínnedu ca' xejlechaze na naga bezríale'ē lba xeche', na' lba xeche' ca' belegula na, ne blule na da du ca' naze'. <sup>8</sup> Bal-la bínnedu ca' xejlechaze na lu xu bebe, na' belúnna'ē na. Bal-la xágadu ca' belunna na tu gaxúa tu tu na, na' xebal-la na belunna na ga xun tu tu na, na' xebal-la na belunna na chi dxua tu tu na. <sup>9</sup> Che zua nágale, le xene.

*Dxenná Jesús bizr chee na' dxuchálaje' da dxululé'e na*

(Mr. 4.10-12; Lc. 8.9-10)

<sup>10</sup> Nadxa benne' ca' dxusede Jesús gulebigue' naga zue' Le', ne buluchēbe' Le':

—¿Bizr chee na' dxuchálajlenu' benne' ca' da dxululé'e na?

<sup>11</sup> Bechebe Jesús, dxenne':

—Dios dxunne' lataj nézele le'e da n-gache ca dxenná bea Le' xabáa, san benne' caní quebe dxu'ē lataj. <sup>12</sup> Benne' nape' late', Dios gunézrujdxé' le', na' gápale'ē, san benne' quebe bi nape', Dios wequé'ē ca da du nape'. <sup>13</sup> Chee le' na' dxuchálajlenu' benne' caní da dxululé'e na, lawe' da cate' dxelenné'ē quebe dxelélé'ene'. Cate' dxelenné' quebe dxeléajni'ine'. <sup>14</sup> Ca naca da dxaca chee benne' caní dxaca na ca gunná Isaías, béennea' bchálaje' waláz chee Dios, gunné':

Da li wenle. Cate' dxenle quebe dxéajni'ile. Da li wanná'le. Cate' dxenna'le quebe dx-elé'ele.

<sup>15</sup> Caní naca na lawe' da zaj naca lázrdau zide' benne' caní.

Quebe dxelaca lazre' xelenne'.

Dxulugácuē' xiaj lawe' chee quebe xeledé'ene'.

Quebe dxelenne', na' quebe dxeléajni'ine'.

Quebe dxeléxíaje' neda' chee xexuna' le'.

<sup>16</sup> Ba neza zrente naca na cheele le'e lawe' da dxelé'ele nen xiaj laule, ne dxenle nen nágale. <sup>17</sup> Da li dxapa' le'e, benne' zante, benne' ca' buluchálaje' waláz chee Dios, ne benne' xrlátaje ca' gulaca lazre' xeledé'ene' da caní dxelé'ele le'e. Quebe belelé'ene' na. Gulaca lazre' xelenne' da caní dxénnele le'e. Quebe be lenne' na.

*Jesús dxuzéajni'ine' benne' ca' ca naca chee benne' dxaza*

(Mr. 4.13-20; Lc. 8.11-15)

<sup>18</sup> Na' gunná Jesús:

—Le xenne ca zéaje' da naca chee benne' dxaza nigá. <sup>19</sup> Benne' dxelenne' ca naca chee Béennea' dxenná be'ē xabáa, ne quebe dxeléajni'ine' zaj naque' ca bínnedu ca' xejlechaze na dxu'a neza. Za da xriwe' ne dxugúa na ca naca dizra' da ba gulez'ē lu xíchaj lázrdawe'. <sup>20</sup> Ca naca chee bínnedu ca' xejlechaze na lu xiaj, da caní dxululé'e na ca naca chee benne' ca' dxelézi'ē dizra' na' du lazre'. <sup>21</sup> Ca na' guca chee bínnedu ca', quebe guca xuludé lue na, ne quebe guz'í bea na, ca'an dxaca chee benne' caní, gate na' bi da dxelézaque', u che nu zeajnáu zi' xuzre' le' lawe' da zaj nazi'ē dizra' nigá, na' dxeléxebigüe'. <sup>22</sup> Bínnedu ca' xejlechaze na ládujla xeche' dxululé'e

na ca naca chee benne' dxelenne' dizra' nigá, san dxelebé'le'e gunne xue da naca chee xezr la xu nigá, na' ca naca xel-la' gunn'a dxezi xe na benne' ca'. Xúgute da caní dxuluzaga na dizra' nigá, na' quebe dxun na da dxal-la' gun dizra' nigá lu xichaj lázrdawe'. <sup>23</sup> Ca naca chee bínnedu ca' da xeajlechaze na lu xu bebe, da caní dxululé'e na ca naca chee benne' ca' dxelenne' dizra' nigá, ne dxelájni'ine' na, na' zaj naque' ca bínnedu ca' belúnna'le'e na. Bal-la benne' zaj naque' ca bínnedu ca' belunna na tu gaxúa tu tu na, na' xebal-le' zaj naque' ca bínnedu ca' belunna na ga xun tu tu na, na' xebal-le' zaj naque' ca bínnedu ca' belunna na chi dxua tu tu na.

*Da bchalaj Jesús ca naca chee xixre' zrinnaj da dxenná'queze na ca dxenná' xel-la' zrua' xtila*

<sup>24</sup> Nadxa bchalaj Jesús xetú da dxululé'e na, dxenné':

—Ca dxaca ga ni dxenná bea Dios naca na ca da guca gate tu benne' guze' binne cháwe'dau' lu xezr la xu chee'. <sup>25</sup> Gate dxelase xúgute', na' bzrin tu benne' dx-ezré'e le', ne xeajaze' binne xixre' zrin-naj lówela zrua' xtila, na' bezé'e. <sup>26</sup> Gate na' bgula xel-la' zrua' xtila, ne bla' dau chee na, cá'anqueze bla' xixre' zrinnaj ca'. <sup>27</sup> Nadxa benne' wen zrin ca' xeajleguzre' xrane na, dxelé'e le': "Xran, guzu' binne cháwe'dau' lu xezr la xu chiu'. ¿Gazra gúz' xixre' zrinnaj caní?" <sup>28</sup> Gunná xrán-abe': "Tu benne' dxezré'e neda' bene' da nigá." Nadxa benne' wen zrin ca' bu-luchébe' le': "¿Dxaca lazru' chéajntu' cheajlépentu' xixre' zrinnaj ca'?" <sup>29</sup> Le' guze' wen zrin ca': "Quebe gaca na. Gate na' lázrule xixre' zrinnaj ca', walázrutéle xel-la' zrua' xtila. <sup>30</sup> Xelegúlaxda na cháwe'la tu zren ca xecá'adxadxu zrua' xtila. Nadxa nna be'eda' benne' wen zrin ca' xelequé'e nedxu xixre' zrinnaj ca', na' xuluchéaje' xelumé' tu xrúnjuđu weaj chee guzézxedxu na. Nadxa xeelape' zrua' xtila na, ne xezrá chawe' na lizra'."

*Da bchalaj Jesús ca naca chee binne mostaza*

*(Mr. 4.30-32; Lc. 13.18-19)*

<sup>31</sup> Nadxa bchalaj Jesús xetú da dxululé'e na, dxenné':

—Da dxaca chee benne' dxelezi' lu ne'e nna be'e Dios le' naca na ca da guca gate tu benne' guze' binne mostaza lu xezr la

xu chee'. <sup>32</sup> Da li binne mostaza nigá naca na da bízrujdxu lawe' xúgute binne ca'. Gate ba nagula na naca na tu xaga zrendxa lawe' xúgute xixre' cuan. Dxaca na ca tu xaga zren naga dxelezeque' cheajlezría bxínnedu ca' xru'uneba' lu zruze na.

*Da bchalaj Jesús ca naca chee cua zichaj chee xeta xtila*

*(Lc. 13.20-21)*

<sup>33</sup> Nadxa bchalaj Jesús xetú da dxululé'e na, dxenné':

—Da dxaca chee benne' dxelezi' lu ne'e nna be'e Dios le' naca na ca da guca gate tu nu'ula bchixre cua zichaj chee xeta xtila lawe' chunna xaga cua zrua' xtila, na' dute na guxasa na bliche.

*Ca bchine Jesús da dxulé'e na caní*

*(Mr. 4.33-34)*

<sup>34</sup> Xúgute da caní bchálajle Jesús benne' ca', dxuchálaje' da dxululé'e na, na' quebe bchálajlene' benne' ca' che quebe bchálaje' da dxululé'e na. <sup>35</sup> Caní guca ca da gunná benne' bchálaje' waláz chee Dios, gunné': Guchálaja' ca naca da dxulé'e na da guchálaja'. Gulé'eda' ca naca da nagache gate guzrete xezr la xu.

*Jesús dxuzéajni'ine' ca naca chee da dxulé'e na chee xixre' zrinnaj da dxenná'queze na ca dxenná' xel-la' zrua' xtila*

<sup>36</sup> Nadxa Jesús bze' benne' ca' dizra', na' guxú'e lu xu'u. Benne' ca' dxuséde Jesús gulebigue' lau Le', na' gulé'e Le':

—Bzéajni'i netu' da dxulé'e na ca naca chee xixre' zrinnaj da dxenná'queze na ca dxenná' xel-la' zrua' xtila.

<sup>37</sup> Nadxa Jesús guzre' benne' ca':

—Bénnea' dxaze' binne cháwe'dau' nigá naque' Benne' Gulje' Bénneache. <sup>38</sup> Naga dxaze' binne nigá naca na lu xichaj lázrdau bénneache. Binne cháwe'du ca' zaj naca benne' ca' dxenná be'e Dios, na' xixre' zrinnaj ca' zaj naca na benne' ca' zaj naque' chee da xriwe'. <sup>39</sup> Bénnea' dxezré'e xrane xezr la xu na', ne xeajaze' xixre' zrinnaj naque' da xriwe' ná'queze. Zra xeelape' naca na zra bzebe chee xezr la xu nigá, na' benne' ca' xeelape' zrua' xtila na' zaj naque' gubáz chee xabáa chee Dios. <sup>40</sup> Ca belexequé'e xixre' zrinnaj ca', ne buluzré'e na lu xi' chee xelexze na, ca'an gácaqueze lu zra bzebe na'. <sup>41</sup> Neda', Benne' Gulje' Bénneache, sel-la' gubáz chee xabáa

chia' ca' chee xulucuase' naga nna be'a xúgute benne' ca' dxuluxrínnajte' benne' xula, ne benne' ca' dxelune' da calela. <sup>42</sup>Nadxa gubáz chee xabáa ca' xuluzré'e benne' ca' dxelune' da calela lu xi' gabila naga xebezeze', ne xeláguxa'ate lazxe'. <sup>43</sup>Nadxa benne' ca' dxelune' da xrlátaje ca da dxenná be'e Dios xelácaqueze' ca gu-bizra naga dxenná bea Díos, Xra benne' ca'. Che le'e zua nágale, le xene.

*Da dxulé'e na ca naca chee tu xel-la' gunní'a da nagache*

<sup>44</sup>Na' gunná Jesús:

—Naga dxenná bea Dios naca na ca tu xel-la' gunní'a da nagache na tu lu xezr la xu. Tu benne' bezrélene' xel-la' gunní'a nigá, na' bucache' na. Ne zúale'e xel-la' dxebé xexíaje' xejaxétie' xúgute da nape', na' bezi'e xezr la xu na'.

*Da dxulé'e na ca naca tu bga da zácále'e na*

<sup>45</sup>Na' gunná Jesús:

—Naga dxenná bea Dios naca na ca tu da dxexilaj tu benne' wete, dxexílaje' bga ca' da zaj zaca na. <sup>46</sup>Gate dxezrélene' tu da zácále'e, na' zexíaje' zexaxétie' xúgute da nape', na' si'e bga na'.

*Da dxulé'e na ca naca tu xixruj bela*

<sup>47</sup>Na' gunná Jesús:

—Ca naca chee benne' ca' xelexú'e naga dxenná bea Dios, naca na ca tu xixruj bela, da dxuluzale' lu nísadau', na' dxelezene' zane' cue' bela. <sup>48</sup>Gate dxezrá xixruj na', na' benne' ca' dxelezene' bela dxelexequé'e na dxu'a nísadau', na' dxelebé'e dxelexebé'e' bela ca'. Bela chawe' ca' dxuluxuzré'e-ba' lu xcuite, na' bela xala ca' dxeledxú'üne'-ba'. <sup>49</sup>Ca'an gaca lu zra bzebe na'. Xeledxúaj gubáz chee xabáa ca', xelexebéaje' benne' ca' dxelune' da calela ládujla benne' xrlátaje ca'. <sup>50</sup>Xuluzré'e benne' ca' dxelune' da calela lu xi' gabila, naga xebezeze', ne xeláguxa'ate lazxe'.

*Da zaca ca da zaj naca na da cube, ne da zaj naca na da gula*

<sup>51</sup>Nadxa bchebe Jesús benne' ca', dxenné':

—¿Dxéajni'ile le'e xúgute da caní?

Benne' ca' gulenné':

—Awe', Xran.

<sup>52</sup>Nadxa guzre' benne' ca':

—Gate tu benne' dxusédene' da nadxixruj bea Díos, ne nazédene' ca dxenná

bea Díos, naque' ca tu benne' xrane xu'u nézene' cuéaje' da zaj naca na da cube, ne da zaj naca na da gula ládujla da nuzrá chawe'.

*Jesús dxexezrine' Nazaret*

(Mr. 6.1-6; Lc. 4.16-30)

<sup>53</sup>Gate bexuzre bchalaj Jesús da dxulé'e na caní, na' bezé'e na'. <sup>54</sup>Bezrine' naga naca lazrie'. Na' guzú lawe' dxusédene' benne' ca' zaj zre'e lu xudau' chee xezre na', na' belexebanne benne' ca', gulenné':

—¿Gazra bsede benne' nigá xel-la' sina nigá? ¿Ájazra dxune' xel-la' waca caní?

<sup>55</sup>Benne' nigá naque' zri'ine gubizre xaga, na' naca xrne'e María. Naque' bi biche Jacobo, ne José, ne Simón, ne Judas. <sup>56</sup>Bi zane' zaj zu'e nigá nen dxi'u. ¿Ájazra na' dxaca dxune' da caní?

<sup>57</sup>Chee le' na' buluzúe' Jesús chalá'ala. Jesús guzre' benne' ca':

—Xúgute benne' xula dxelape' ba lá'ana tu benne' dxuchálaje' waláz chee Díos. Benne' lazrie', ne xrtia ljwezre' quebe dxelúne' ca'.

<sup>58</sup>Jesús quebe benteque' na' xel-la' waca ca' lawe' da quebe guléajle'e chee'.

## 14

*Ca gute Juan, bènnea' bchue' bènneache nisa*

(Mr. 6.14-29; Lc. 9.7-9)

<sup>1</sup>Lu zra na' Herodes, benne' dxenná be'e xezre ca' zaj nababa na Galilea, benne' ca naca da dxun Jesús. <sup>2</sup>Na' guzre' bi wen zrin chee' ca':

—Benne' nigá naque' Juan, bènnea' bchue' bènneache nisa. Ba bebane' ládujla benne' gate. Chee le' na' nape' xel-la' waca zren nigá.

<sup>3</sup>Caní gunné' lawe' da gudela Herodes nigá Juan na', ne bchéaje' le' du xia, ne gulu'e le' lizre xia. Bene' caní ne chee Herodías, zru'ula Felipe, biche Herodes na'. <sup>4</sup>Caní bene' lawe' da guzre Juan le':

—Quebe naca chiu' súalenu' nu'ula nigá.

<sup>5</sup>Herodes guca lazre' gutie' le', san dxezrebe' da xelún bènneache ca' lawe' da dxeléquene' naca Juan benne' dxuchálaje' waláz chee Díos. <sup>6</sup>Gate bzin zra dzezria iza Herodes, na' belune' laní chee', na' bxa'a bi nu'ula chee Herodías na', na' bezaca ba lazre' Herodes na' da dxunbe'. <sup>7</sup>Chee le' na' Herodes guchebe lazre' lau benne'

ca' gunézruje' ca da naba bi nú'uladu na'.  
 8 Lawe' da ba guzre xrnabe' lebe', na' gun-  
 abe':

—Benna nigá xichaj Juan, bènnea' bchue' bènneache nisa. Gulú'u na tu lu xé'ena.

9 Nadxa guzúa stębe Herodes, bènnea' dxenná be'e, san lawe' da ba guchebe lazre', na' benne' zaj zře'e dxágulęę' le' belenne' ca', cheę le' na' guzre' tu benne' węn zrin cheę' gunézruje' na lebe'. 10 Gunná bé'ene' nu benne' guchugue' xichaj Juan naga xu'e lizre xia. 11 Nadxa xeajlexri'e xíchaje' tu lu xé'ena, ne bulunézruje' na bi nú'uladu na', na' lebe' bnézruje' na xrnabe'.

12 Nadxa belezřin benne' ca' bseęe Juan, na' belexú'e le', ne xeajlecachę' le'. Nadxa xjaque' xeajleguezre' Jesús.

*Dxugagu Jesús chi xun gaxúa benne' biu*  
 (Mr. 6.30-44; Lc. 9.10-17; Jn. 6.1-14)

13 Gate ben Jesús da na', na' bezé'e na', bexu'e tu lu da dxedá lawe' nísadau', na' bzřine' tu naga quebe nu zra' benne'. Gate belén bènneache, na' gusiá'que' ni'e, na' belezřine' naga zua Jesús. 14 Gate bedxúaj Jesús lu da dxedá lawe' nísadau', na' blé'ene' benne' zante, ne bexache lazre' le', na' bexune' benne' ca' quebe chawe' zaj zue'. 15 Gate ba za xrinne, benne' ca' dxusęde Jesús gulebigue' lau Le', dxelenné':

—Lataj nigá quebe bi de, ne ba dxedé zra. Bze benne' caní dizra' cheę chjaque' xézredu ca', ne xelezí'e da xelawe'.

16 Jesús guzře' le':

—Quebe dxun na ba xen chjaque'. Le gunezruj le'e da xelawe'.

17 Benne' ca' gulé'e Le':

—Gázxuze xeta xtila de cheędxu nigá, ne chúpaze bela.

18 Jesús guzře' benne' ca':

—Le gunna na nigá.

19 Nadxa gunná bé'ene' gulebé' benne' zan ca' lawe' zřie. Guquę'e xeta xtila, ne bela ca', na' gunné'e xabaala, ne guzre' Dios: "Xcalenu'." Nadxa búzruje' xeta xtila, ne bnézruje' na benne' ca' dxusędenę', na' benne' ca' gulísie' na lówela benne' zan ca'. 20 Xúgute' gulawe', ne gulélajene'. Ca gudé na' bulusuzře'e chazřinnu ga' da bízrujdu ca' zaj nagá'ana.

21 Benne' gulawe' na zaj naque' chi xun gaxúa benne' biu, ne quebe nu blaba nu'ula, ne bidu ca'.

*Jesús dxedé' lawe' nisa*  
 (Mr. 6.45-52; Jn. 6.16-21)

22 Nadxa gunná be'e Jesús benne' ca' dxusędene' xelu'e lu da dxedá lawe' nísadau' cheę xelague' nísadau' nédxudxa ca Le' cheę xelexezřine' xéxhala'a nísadau' na', dxácatę Le' dxuzę benne' zan ca' dizra'. 23 Ca gudé bze' dizra' benne' zan ca', na' guluéne' tu lu xi'a xeajchálajlene' Dios naga zue' tuze'. Gate guxrinne zua Jesús tuze' na'. 24 Dxácatę na' ba zeaj da na' dxedá lawe' nísadau' gachaj láwe'tę nísadau' na'. Nadxa guxasa xeajxruza cheę nísadau' na', da dxutá na da dxedá lawe' nísadau' na', lawe' da dxácale'e be', ne quebe dxue na lataj sa na. 25 Gate gudé dxęla gubiga Jesús naga zaj zře'e, zéaje' lawe' nisa. 26 Gate belelé'e benne' ca' dxedá Jesús lawe' nisa, na' belezrebe', na' lu xel-la' dxelezrebe gulebézřexę'e, gulenné':

—Da dxedá dxęla na'.

27 Jesús guzře' benne' ca':

—Le gun dipa lázrele. Neda' nigá. Quebe zřebele.

28 Na' gunná Pedro, dxę'e Jesús:

—Xran, che Lue' na', gunná be'e xida' lawe' nisa naga zu' na'te.

29 Jesús guzře' le':

—Gudá xca'.

Nadxa Pedro bdxúaje' lu da dxedá lawe' nísadau', ne guzú lawę' dxezė'e lawe' nisa cheę zřine' naga zua Jesús. 30 Gate dxeque be'ene' ca dxun be' na', na' bzrebe', ne guzú lau dxazię' lu nísadau' na'. Ca'an guca gudxezre xę'e, gunné':

—Xran, becá'a neda'.

31 Nadxa becá'a Jesús ne'e, ne guzře' le':

—Látega dxeajlí lazru' neda'. ¿Bizř cheę na' ben chupa lazru'?

32 Gate belexęięne' lu da dxedá lawe' nísadau', na' bebé' zři be' na'. 33 Nadxa benne' ca' zaj zře'e lu da dxedá lawe' nísadau' na' buluzú zřibe' lau Jesús, dxelé'e Le':

—Da li nacu' Zři'ine Dios.

*Jesús dxexunę' benne' wę' ca', benne' zaj zře'e lu xęzre Genesaret*  
 (Mr. 6.53-56)

34 Guledé'e xecha la'a nísadau', na' belezřine' lu xęzř la xu cheę benne' Genesaret ca'. 35 Gate benne' ca' zaj zře'e xęzre na' belexęunbe'e Jesús, na' buludé'e dizra' xezícala xézredu ca', na' guleché'e xúgute' benne' wę' naga zua Jesús. 36 Gulata'

xuene' Jesús gu'e lataj xulutá benne' ca' zra lane' naze. Xúgute benne' buluté' zra lane' belexexaque'.

## 15

*Da dxurrinnaj na bénneache*  
(Mr. 7.1-23)

<sup>1</sup> Nadxa benne' fariseo ca', ne benne' dxuluxuzájle'e da bdxixruj be'e Moisés, benne' ca' beledxuaje' lu xezre Jerusalén, gulebigue' lau Jesús, na' buluchébe' Le', dxelenné':

<sup>2</sup> —¿Bizr chee na' benne' ca' dxusédenu' quebe dxuluzúe' dizra' ca naca da gulún xra xrtaudxu? Quebe dxelíbequeze ne'e ca naca da zéajlentu' gate dxelawe'.

<sup>3</sup> Jesús bchébe' benne' ca', gunné':

—¿Bizr chee na' le'e quebe dxuzuale dizra' da dxenná be'e Dios? Dxunle ca naca da zéajlele. <sup>4</sup> Dios gunné': "Gudapa ba lá'ana xra xrna'u." Cá'anqueze gunné': "Benne' nne' schanni' chee xra xrne'e, le gute bénnea'." <sup>5</sup> Le'e dxennale waca xe tu benne' xra xrne'e: "Quebe séqueda' bi gunna' le'e lawe' da ba guchébe lazra' gunéruja' Dios xúgute da de chia'." <sup>6</sup> Dxennale che tu benne' dxune' caní quebedxa dxun na ba xen gácalene' xra xrne'e. Caní dxunle le'e, dxuzuale chala'ala da bdxixruj be'e Dios, chee gunle ca naca da zéajlele. <sup>7</sup> Le'e, láweze dxunle da xrlátaje. Da li naca da gunná Isafas, bénnea' bchálaje' waláz chee Dios, ca naca chee le'e, gunné':

<sup>8</sup> Benne' caní dxelape' neda' ba lá'ana nen dxú'aze'.

Quebe dxelape' neda' ba lá'ana duté lázrdawe'.

<sup>9</sup> Dácheze naca dxelúe lá'ane' neda'.

Da gulenná be'ene' bénneache naca na da ca' dxulusédene'.

<sup>10</sup> Nadxa Jesús gunné' benne' ca', dxenné':

—Le xene, ne le chéajni'i. <sup>11</sup> Da dxu'u na dxu'a bénneache quegá le na guxrinnaj na bénneache. Da dxedxuaj na dxu'a bénneache naca na da dxurrinnaj na bénneache.

<sup>12</sup> Nadxa benne' ca' dxuséde Jesús gulebigue' lau Le'. Dxelé'e Le':

—¿Nézenu' gulaca tula benne' xudau' fariseo ca' gate belenne' da gunnáu'?

<sup>13</sup> Jesús guzre' benne' ca':

—Bíteteze xágadau' da quebe guza Xra' zue' xabáa, welépeda'. <sup>14</sup> Le gusán benne'

ca'. La chul-la zaj naque', ne dxulusi'e neza le sa' ljwezre' la chul-la ca'. Che tu la chul-la che'e le sa' ljwezre' la chul-la, dxúpate' xelebixre' tu lu xedxu.

<sup>15</sup> Nadxa Pedro guzre' Jesús:

—Bzéajni'i netu' ca naca chee da dxulé'e nigá.

<sup>16</sup> Gunná Jesús:

—¿Cá'anqueze le'e quebe dxéajni'ile? <sup>17</sup> ¿Quebe nézele xúgute da dxu'u na dxú'adxu zezaj na le'edxu, na' te na' xedxuaj na? <sup>18</sup> Da dxedxuaj na dxú'adxu naca na da za' lu xichaj lázrdaudxu. Da nigá naca na da dxurrinnaj na bénneache. <sup>19</sup> Lu xichaj lázrdau bénneache dxeledxuaj da dxezá lazre' da calela, ca naca xel-la' wete benne', ne ca naca xel-la' zualé zru'ula benne' xula, ne ca naca da sban da dxelún bénneache, ne ca naca xel-la' gubán, ne xel-la' wen lazre', ne xel-la' wetupa dizra' bizruj. <sup>20</sup> Da caní dxulurrinnaj na bénneache. Che tu benne' quebe dxexibe ne'e ca da zéajlele gate dxawe' xeta, da nigá quebe dxurrinnaj na le'.

*Tu nu'ula zitu' dxéajle'e chee Jesús*  
(Mr. 7.24-30)

<sup>21</sup> Nadxa bedxuaj Jesús na', zexíaje' chala'a naga zaj nababa xezre Tiro, ne xezre Sidón. <sup>22</sup> Tu nu'ula Canaán zue' na' ze'e dxebezre xe'e cúzrela Jesús, dxenné':

—Xran, Zri'ine David, bexache lazre' neda'. Xu'ube' be' xriwe' zri'ina' nu'ula, ne cáritega dxezácabe'.

<sup>23</sup> Quebe bi bechebe Jesús. Nadxa belezrín benne' ca' dxusédene', ne gulata' xuene' Le', gulé'e Le':

—Bsel-la nu'ula nigá lawe' da ze'e dxebezre xe'e cúzrudxu.

<sup>24</sup> Nadxa gunná Jesús:

—Dios gusel-le' neda' gácaleza' benne' Israel ca' zaj naque' ca zríla'du ca' zaj naníteba'.

<sup>25</sup> Gubiga nu'ula na' naga zua Jesús, ne bzu zribe' lau Le', ne dxé'e Le':

—Xran, gúcale neda'.

<sup>26</sup> Jesús guzre' le':

—Quebe naca xrlátaje cá'adxu da dxelagu zrí'inedxu, chee gunézrujdxu na bécudu ca'.

<sup>27</sup> Nadxa nu'ula na' guzre' Jesús:

—Awe', Xran, san bécudu ca' dxeláguquezeba' da bizrujdu ca' dxelexruj zran naga dxelagu xránaba'.

<sup>28</sup>Nadxa Jesús guzre' le':

—Nú'uladu, da zrentę naca xel-la' dxeax-  
jl lazre' chiu'. Gaca ca dxaca lazru'.

Lu zra ná'queze bexaca zrí'ing' nú'uladu  
na'.

*Jesús dxexung' benne' zantę benne' we'*

<sup>29</sup>Jesús guzé'e na', gudé'e dxu'a nísadau'  
cheę Galilea. Guluéné' tu lu xi'a, ne gudxé'e  
na'. <sup>30</sup>Benne' zan belezrinę' naga zua Jesús,  
zaj naché'e benne' zrinnaj ca', ne benne'  
la chul-la ca', ne benne' quebe dxaca xe-  
lenné', ne benne' zan zaj nadxugu ni'a na',  
ne zánedxa benne' we'. Buluzré'e benne'  
ca' lau Jesús, na' Le' bęxunę' le'. <sup>31</sup>Ca'an  
guca belexebane benne' ca' gate belelé'ene'  
dxellené' benne' ca' quebe guca xelen-  
né' nédxula, ne belexexaca benne' ca' gu-  
laque' benne' ni'a na' dxugu, ne dxeledá  
benne' ca' gulaque' benne' zrinnaj, ne dx-  
elelé'e benne' ca' gulaque' benne' la chul-  
la. Gulezú lawę' dxelúe lá'anę' Dios cheę  
benne' Israel ca'.

*Jesús dxugawę' tapa cue' tu gaxúa benne'  
biu*

*(Mr. 8.1-10)*

<sup>32</sup>Nadxa Jesús gunné' benne' ca' dxusé-  
denę'. Dxe'e le':

—Dxexache lazra' cheę benne' caní lawę'  
da ba zeaj chunna zra zráleņę' neda' nigá,  
ne quebe bi de da xelawę'. Quebe dxaca  
lazra' xesel-la' le' cheę cheajxaque' lizre'  
quebe ne xelawę' cheę quebe xelate ni'a  
ne'e la neza.

<sup>33</sup>Nadxa benne' ca' dxusęde Jesús gulé'e  
Le':

—¿Ájazra guntu' zrélentu' da xelagu  
cátite benne' zan caní? Lataj nigá quebe nu  
chilá' benne' zua lizre' nigá.

<sup>34</sup>Jesús bchebe' benne' ca', dxenné':

—¿Bal-la xeta xtila nápałe?

Benne' ca' belexechebe':

—Gazre na, ne xetú chupa bęladau'.

<sup>35</sup>Nadxa Jesús gunná bę'ene' benne' zan  
ca' xelebé'e lu xu. <sup>36</sup>Guqué'e da gazre  
xeta xtila, ne bęladu ca', na' guzre' Dios:  
“Xcalenu'.” Nadxa bzúzruje' na, ne bnézru-  
je' na benne' ca' dxusędenę', na' benne' ca'  
gulísię' na cheę benne' zan ca'. <sup>37</sup>Xúgute'  
gulawę', ne beléłajtęne'. Gudé na' bu-  
lusuzrate' gazre ga' da bízrujdu ca' zaj  
nagá'ana. <sup>38</sup>Benne' gulagu zaj naque' tapa  
cue' chí gaxúa benne' biu, ne quebe nu  
blaba nu'ula, ne bidu ca'. <sup>39</sup>Gudé na' Jesús

bze' benne' zan ca' dizra', na' bexu'e lu da  
dxedá lawę' nísadau' zexíaje' naga nababa  
xezre Magdala.

## 16

*Dxelenabe' Jesús gunę' tu xel-la' waca cheę  
xabáa*

*(Mr. 8.11-13; Lc. 12.54-56)*

<sup>1</sup>Benne' xudau' fariseo ca', ne benne'  
xudau' saduceo ca' xjaque' naga zua Jesús  
cheę xuluxunęguene' Le'. Cheę le na' gu-  
lenabe' Jesús gunę' tu xel-la' waca zrentę da  
za xabáa. <sup>2</sup>Jesús bechebe' benne' ca':

—Xelate' zua gubizra dxennale le'e:  
“Gun chawę' wxre lawę' da da' beuj xrna  
zran xabáa.” <sup>3</sup>Che zílala dxennale: “Quebe  
chawę' gun na'a zra lawę' da dá'le'e beuj  
xrna zran xabáa.” Le'e dxulé'e cuínale  
da quebe nácale. Dxácaqueze dxennale  
ca naca da gun zran xabáa. Quebe dxaca  
xuzájla'ale ca sa'yeaj da dxaca na'a zra.  
<sup>4</sup>Benne' wen da caleła caní, benne' zaj  
nabéaj xíchaje' Dios, dxelenabe' guna' tu  
xel-la' waca zrentę. Quebe xelelé'ene' xetú  
xel-la' waca. Welelé'ene' tuze da gaca na ca  
da guca cheę Jonás.

Nadxa bulucá'ana Jesús benne' ca',  
zjá'aque'.

*Da dxelún benne' xudau' ca' da naca na ca  
cua zichaj cheę xeta xtila*

*(Mr. 8.14-21)*

<sup>5</sup>Gate benne' ca' dxusęde Jesús guladé'e  
xechalá'a nísadau', na' gulal-la lazre' xelu'e  
chizre'. <sup>6</sup>Jesús guzre' le':

—Le nna'xque. Le guxúe cuínale ca naca  
cheę cua zichaj cheę xeta xtila cheę benne'  
fariseo ca', ne cheę benne' saduceo ca'.

<sup>7</sup>Benne' ca' dxusęde Jesús gulezú lawę'  
dxelé' ljęwezre':

—Caní dxenné' lawę' da quebe núadxu  
xeta xtila.

<sup>8</sup>Jesús dxeque be'ene', na' guzre' le':

—¿Bizr cheę na' dxennale naca na lawę'  
da quebe núale xeta xtila? Láteze dxéajlele  
chia'. <sup>9</sup>¿Quebe ne chéajni'ile, ne quebe  
dxeajsá lázrele cheę da gazxu' xeta xtila da  
bgawa' gazxu' cue' chí gaxúa benne' biu,  
ne bal-la ga' becá'ale? <sup>10</sup>¿Quebe dxeajsá  
lázrele cheę da gazre xeta xtila da bgawa'  
tapa cue' chí gaxúa benne' biu ca', ne bal-  
la ga' becá'ale? <sup>11</sup>¿Ájazra na' quebe dxeque  
be'ele quegá bchálaja' cheę xeta xtila gate  
gunniá' le guxúe cuínale ca naca cheę cua

zichaj chee xeta xtila chee benne' fariseo ca', ne chee benne' saduceo ca'?

<sup>12</sup> Nadxa guleque bé'ene' quegá guzre Jesús le' xuluxúe cuine' chee da naca cua zichaj chee xeta xtila, san ca naca da dxulusede benne' fariseo ca', ne benne' saduceo ca'.

*Pedro dxenné' Jesús naque' Cristo*  
(Mr. 8.27-30; Lc. 9.18-21)

<sup>13</sup> Gate bzzrin Jesús naga nababa xezre Cesarea da ben Filipino, na' bchebe' benne' ca' dxusédene':

—¿Nuzra na' dxelenná bénneache naca' neda', Benne' Gulje' Bénneache?

<sup>14</sup> Na' benne' ca' gulenné':

—Bal-la benne' dxelenné' nacu' Juan, bennea' bchué' bénneache nisa. Xebal-le' dxelenné' nacu' Elías, na' xebal-le' dxelennáqueze' nacu' Jeremías, u xetú benne' bchálaye' waláz chee Dios.

<sup>15</sup> Nadxa guzre Jesús benne' ca':

—¿Gazra le'e? ¿Nuzra na' dxennale naca'?

<sup>16</sup> Gunná Simón Pedro:

—Lue' nacu' Cristo, Zri'ine Dios ban.

<sup>17</sup> Bechebe Jesús:

—Ba neza zren naca na chiu' Simón, zri'ine Jonás. Netú benne' quebe ne gulé'ene' lue' da nigá, san Xra' zua xabáa, Le' blé'ene' lue'. <sup>18</sup> Neda' dxapa' lue', nacu' Pedro, da zéaje na tu xiaj, na' lawe' xiaj xre nigá guzúa' benne' xeleajli lazre' neda', na' xel-la' dxenná bea chee da xriwe' quebe seque na gucu'uj na benne' ca'. <sup>19</sup> Neda' gunna' lue' da naca na zren xia chee xel-la' dxenná bea chee xabáa, na' da guchéaju' lue' lu xezr la xu nigá gaca na da ba nadxéajqueze na xabáa, na' da xesezru' lue' lu xezr la xu nigá gaca na da ba naxézrequeze na xabáa.

<sup>20</sup> Nadxa Jesús gunná bé'ene' benne' ca' dxusédene' chee quebe nu xel'é' naca Le' Cristo.

*Jesús dxuchálaje' ca gaca gate gatie'*  
(Mr. 8.31—9.1; Lc. 9.22-27)

<sup>21</sup> Lu zra ná'queze guzú lau Jesús dxuzéajni'ine' benne' ca' dxusédene' dxal-la' xexiáje' xezre Jerusalén, na' benne' gula ca', ne benne' xíchaje' ca' chee bxruze ca', ne benne' dxuluxuzájle'e da nadxixruj bea Dios wulusaca zi'e Le'. Na' guzre' benne' ca' dxusédene' welute benne' Jerusalén ca' Le'. Nadxa gate gaca chunna zra xebane'.

<sup>22</sup> Nadxa Pedro guléaje' Jesús chalá'ala, ne guzú lawe' dxedil-le' Le', dxenné':

—Dios quebe gu'e lataj, Xran. Cabata' gaca chiu' da caní.

<sup>23</sup> Jesús bexéchaje', na' guzre' Pedro:

—Gucuasa cuita' neda', lue', da xriwe', lawe' da nacu' tu da dxusunegue na neda'. Quebe dxulaba lazru' ca dxun Dios. Ca dxun bénneache dxulaba lazru'.

<sup>24</sup> Nadxa Jesús guzre' benne' ca' dxusédene':

—Che nu benne' dxaca lazre' gaque' neda' tuze, dxal-la' guzié' chalá'ala da naca chee', ne guzúa cuine' chee gatie', na' nadxa gaca xídalene' neda'. <sup>25</sup> Bénnea' dxaca lazre' gapa chi'e xel-la' nabán chee' gunitie' na. Bénnea' gunitie' xel-la' nabán chee' lawe' da dxune' zrin chia', benne' nigá zrué'ene' xel-la' nabán du lazre'.

<sup>26</sup> ¿Bízraqueze ba neza naca na chee tu benne' che gata' chee' xúgute' xel-la' gunní'a da de lu xezr la xu nigá, na' cuía xi'e lau Dios? Quebe bi gaca quizruj tu benne' chee la bénne'du xu'e lau Dios. <sup>27</sup> Neda', Benne' Gulje' Bénneache wida' xecha lasa nen xel-la' szren chee Xra', ne nen gubáz chee xabáa ca'. Nadxa xuzría chee tu tu benne' ca naca da zaj nun tu tue'. <sup>28</sup> Da li dxapa' le'e, bal-la benne' zaj zre'e nigá quebe xelatie' cadxa xelelé'ene' neda', Benne' Gulje' Bénneache, xida' xedajjnná be'a.

## 17

*Dios dxuch'é'e ca dxenná' lau Jesús*  
(Mr. 9.2-13; Lc. 9.28-36)

<sup>1</sup> Ca gudé guca xrupa zra, na' Jesús guch'é' Pedro, ne Jacobo, ne Juan, bi biche Jacobo, na' bi cá'aze xjálalene' Le' tu lau xi'a sibe. <sup>2</sup> Na' Dios bche'e ca dxenná' lau Jesús lávela benne' ca'. Lawe' guca tite na ca gubizra, na' zra lane' guca na da chiche ca xel-la' naxani'. <sup>3</sup> Na' benne' caní belelé'ene' Moisés, ne Elías, benne' gulezrá' gate nate, dxuluchálajlene' Jesús. <sup>4</sup> Nadxa Pedro guzre' Jesús:

—Xran, cháwe'le'e zúadxu nigá. Che dxaca lazru', guntu' chunna xu'u lágadau', tu chiu', ne tu chee Moisés, ne tu chee Elías.

<sup>5</sup> Dxácaté dxenné Pedro, bla' tu beuj da dxaca tite na, da gucu na benne' ca', na' lu beuj na' belenne' chi'i Dios, dxenné':



—Benne' nigá naque' Zri'ina' nazrí'ite lazra', ne chee Le' dxezaca ba lazra'. Chee Le' le xene.

<sup>6</sup> Gate belenne' da nigá, na' gulate' sudxú'ala lu xu. Dxelezebe'e. <sup>7</sup> Nadxa Jesús gubigue' naga zaj zre'e, na' bte' benne' ca', ne guzre' le':

—Le chasa. Quebe zrébele.

<sup>8</sup> Gate na' belenné'e, québedxa nu belelé'eng'. Tuze Jesús zue'.

<sup>9</sup> Nadxa gate dxelexétaje' lu xi'a na', Jesús gunná bé'eng' benne' ca', dxenné':

—Quebe nu guchálajle ca da ble'ele ca zrindxa zra neda', Benne' Gulje' Bénneache, xebana' ládujla benne' gate.

<sup>10</sup> Nadxa benne' ca' dxusede Jesús buluchébe' Le':

—¿Bizr chee na' dxelenná benne' ca' dxuluxúzjle' da nadxiruj bea Dios dxun ba xen xelá' Elías nédxudxa ca xelá' Cristo?

<sup>11</sup> Jesús guzre' benne' ca':

—Da li xelá' Elías nédxudxa, ne gucá'ana chawe' ca naca da dxal-la' gaca. <sup>12</sup> Neda' dxapa' le'e, ba bla' Elías, na' benne' ca' quebe belexúnbe'e le'. Bulusaque' le' cáteze da gulaca lazre'. Cá'aqueze xulusaque' neda', Benne' Gulje' Bénneache.

<sup>13</sup> Nadxa benne' ca' dxusede Jesús guléque be'ene' dxuchalaj Jesús ca naca chee Juan, bénnea' bchue' bénneache nisa.

*Jesús dxexung' tu bi biu dxe'ebe' chuna'*

*(Mr. 9.14-29; Lc. 9.37-43)*

<sup>14</sup> Gate belezrine' naga zaj zra' benne' zante, na' tu benne' gubigue' naga zua Jesús, ne bzu zribé' lau Le', dxenné':

<sup>15</sup> —Xran, bexache lazre' zri'ina', dxe'ebe' chuna', ne da zrenté da dxezácabe'. Zánete lasa ba xeajházebe' lu xi', ne lu nisa. <sup>16</sup> Ba bedajgu'a-be' lau benne' caní dxusedenu', na' quebe guca xelexuné'-be'.

<sup>17</sup> Jesús bechébe':

—Le'e, benne' wen chupa lazre', ne benne' lázrdau zide'. ¿Bátate zualéna' le'e? ¿Bátate naca' zren lazre' nen le'e? Le cheajxri' bi cuide' na' nigá.

<sup>18</sup> Nadxa Jesús gudíl-le' be' xriwe' na', na' bebéaje' na lu bel-la' dxen chee bi cuide' na', na' zra ná'queze bexacátebe'.

<sup>19</sup> Gudé na' benne' ca' dxusede Jesús gulenné' Le' chalá'ala, na' buluchébe' Le':

—¿Bizr chee na' quebe guca netu' xebéajntu' be' xriwe' na'?

<sup>20</sup> Jesús guzre' benne' ca':

—Lawe' da naca láteze ca dxéajlele chia'. Da li dxapa' le'e, che la nápaie xel-la' dx-eajlí lazre', lácala naca na láteze ca naca tu binnedau' chee mostaza, waca xeje xi'a nigá: "Gucuasa nigá chéaju' xetú lataj", na' xi'a na' wacuasa na. Quebe bi de da quebe gaca gunle che nápaie xel-la' dx-eajlí lazre'. <sup>21</sup> Ca naca be' xriwe' caní, dxun na ba xen guchálajlele Dios, ne gunle gubasa chee séquele xebéajle be' xriwe' caní.

*Jesús dxuchálaje' xecha lasa ca gaca gate gatie'*

*(Mr. 9.30-32; Lc. 9.43-45)*

<sup>22</sup> Dxácate na' dxeledé' naga nababa Galilea, Jesús guzre' benne' ca':

—Neda', Benne' Gulje' Bénneache wadéa' lu na' bénneache. <sup>23</sup> Xelútie' neda', na' gate gaca chunna zra, xebana'.

Gate belenne' dizra' nigá, na' bewi'ine lázrele'eng'.

*Da dxuluchízruje' bénneache chee xudau'*

<sup>24</sup> Gate Jesús ne benne' ca' dxusedene' belezrine' lu xezre Capernaum, na' benne' dxuluchízruje' chee xudau' belezrine' lau Pedro, na' buluchébe' le':

—¿Quebe dxizruj benne' dxusedene' le'e chee xudau'?

<sup>25</sup> Pedro bechébe':

—Awe'. Díxruje' na.

Nadxa, gate na' guxú'u Pedro lu xu'u, guzre Jesús le':

—¿Aja dxéquenu', Simón? ¿Nuzra na' dxuluchízruj lazruj chee xezr la xu benne' ca' dxelenná bea lu xezr la xu nigá? ¿Dxuluchízruje' benne' walázar chee', u benne' zitu' ca'?

<sup>26</sup> Bechébe Pedro:

—Benne' zitu' dxuluchízruje'.

Jesús guzre' le':

—Na' benne' walázar chee' quebe xelízruje'. <sup>27</sup> Na'a, chee quebe nu guchá'adxu, guxíaj lu nisadau' na', ne guchize da na' dxeláleu' bela lu nisa na', na' bebéaj bela nedxu queļu'-ba'. Dxú'aba' na' xezrelnu' tu dumí da quízruju' chiu' lue', ne chia' neda'. Bia na, ne xeajtizruj na lau benne' ca'.

## 18

*Nu benne' nácadxa blau xabáa*

*(Mr. 9.33-37; Lc. 9.46-48)*

<sup>1</sup> Tu lasa gulebiga benne' ca' dxusede Jesús naga zue', na' buluchébe' Le':

—¿Nuzra benne' nácadxe' blau naga dxenná bea Dios?

<sup>2</sup>Nadxa Jesús gunné' tu bidau', na' bze'-be' lau benne' ca' dxusédene'. <sup>3</sup>Dxenné':

—Da li dxapa' le'e, che quebe xexácale ca bidu nigá, québequeze chu'ule naga dxenná bea Dios xabáa. <sup>4</sup>Ca'an naca, benne' nácadxe' blau naga dxenná bea Dios xabáa, naca benne' gaque' dxexruij lazre', ne xexaque' ca bidu nigá. <sup>5</sup>Benne' gape' ba lá'ana tu bidau' caní lu La' neda', néda'queza' gape' ba lá'ana.

*Ca naca da dxun na gundxu dul-la*  
(Mr. 9.42-48; Lc. 17.1-2)

<sup>6</sup>Na' gunná Jesús:

—Núteteze benne' guné' gun tu bidu caní dul-la, bi dxeajlí lázrebe' neda', cháwela guchéajladxu lbe'e tu xiaj zi'i da dxutu, na' cheajchú'unadxu le' situj lu nísadau'. <sup>7</sup>Edxugúa bénneache lawe' da déle'e da dxun na xelún bénneache dul-la. Tu gátazqueze da caní, na' edxugúa bénneache dxeluné' xelún bénneache dul-la. <sup>8</sup>Cheé le' na', che na'u u ni'u dxun na gunu' dul-la, guchugu na, ne gudxú'una na zitu'. Cháwedxa xexú'u lu xel-la' nabán li lazre' nadxugu ni'u u na'u, quézcala xelegú'e lue' lataj ba xa', zua dxúpaté na'u, ne dxúpaté ni'u. <sup>9</sup>Che xiaj lau' dxun na gunu' dul-la, guleaj na, ne gudxú'una na zitu'. Wenla chu'u lu xel-la' nabán li lazre' nen tuze xiaj lau', quézcala xelegú'e lue' lu xi' gabila, zua dxúpaté xiaj lau'.

*Da dxulé'e na ca naca cheé zrila' naníteba'*  
(Lc. 15.3-7)

<sup>10</sup>Na' gunná Jesús:

—Gutu guzú' chalá'ala netú bidu caní. Neda' dxapa' le'e, zaj zra' gubáz cheé xabáa cheé bidu caní lau Xra' xabáa. <sup>11</sup>Neda', Benne' Gulje' Bénneache, bla'a bedajselá' benne' zaj nanitié'.

<sup>12</sup>¿Ajazra dxéquele le'e? Che tu benne' nape' tu gaxúa zrila', na' nite tuba', ¿quebe gucá'ane' be' tápalalaj chennu na' le'e xixre', na' cheajdilje' zrila' na' naníteba'? <sup>13</sup>Gate ba bezrelne'-ba', wabéle'edxene' cheé be tu na' quézcala cheé be tápalalaj chennu ca' quebe guleníteba'. <sup>14</sup>Cá'anqueze Xrale le'e, zue' xabáa, quebe dxaca lazre' nite netú bidu caní.

*Ca dxal-la' gunité laudxu cheé le sa' ljwézredxu*

(Lc. 17.3)

<sup>15</sup>Na' gunná Jesús:

—Che bi bichu' dxunbe' chiu' da calela, bchálajle tuze lebe', cheé xúnbeabe' da calela da benbe'. Che xenbe' da dxu'u-be', na' ba bexacu' tuze bi bichu'. <sup>16</sup>Che quebe xenbe' da dxu'u-be', guché' tu chupa benne' cheé gaca chupa u chunna benne' xelexechébe' ca naca da dxu'u-be'. <sup>17</sup>Che quebe xenbe' cheé benne' ca', guzre ca naca benne' dxelzraga lu xudau'. Che quebe xenbe' cheé benne' ca', le guzúa-be' ca tu benne' quebe dxéajle'e cheé Dios, u ca tu benne' dxuchíruje' waláz cheé benne' zitu' ca'.

<sup>18</sup>Da li dxapa' le'e, da guchéajle lu xezr la xu nigá, naca na da ba nadxéajqueze na xabáa, ne da xesézrele lu xezr la xu nigá naca na da ba nazézrequeze na xabáa.

<sup>19</sup>Cá'anqueze dxapa' le'e, che chúpale le'e gácale tuze ca da nábale Dios, na' Xra' zua xabáa gunné' na. <sup>20</sup>Naga zaj zra' chúpabe', u chúnname' zaj nazrágabe' lu La' neda', na' zúaqueza' neda' laduj lebe'.

<sup>21</sup>Nadxa Pedro bchébe' Jesús:

—Xran, che bi bícha'dau' gunbe' chia' da calela, ¿bal-la lasa dxun na ba xen gunité lawa' cheébe'? ¿Gazre lasa?

<sup>22</sup>Bechébe' Jesús:

—Dxapa' lue', quegá gazre lasa, san ga xun chi da gazre lasa.

*Benne' wen zrin quebe guca lazre' gunité lawe' cheé le sa' ljwézre'*

<sup>23</sup>Na' gunná Jesús:

—Da gaca naga dxenná bea Dios xabáa naca na ca da guca gate tu benne' dxenná bea guca lazre' gucá'ana chawe' da dxelalla benne' wen zrin cheé'. <sup>24</sup>Gate guzú lawe' dxucá'ana chawe' na, na' guleché'e lau le' tu benne' dxebage' cheé' zane' cue' chi gaxúa dumí. <sup>25</sup>Lawe' da quebe de cheé benne' wen zrin na' da quízruje' xrané', na' gunná be'e xrané' ta'u benne' wen zrin na', ne zru'ule', ne zrí'ine' ca', ne ca nácaqueze da nape', cheé gazruj da na' dxebage'. <sup>26</sup>Nadxa bzu zribe benne' wen zrin na' lau xrané', na' guta' xuene' le', dxenné': "Xran, ben zren lazre' neda', na' quízrujqueza' ca naca na." <sup>27</sup>Na' xrané' bexache lazre' le', ne bnite lawe' da na' dxebage' cheé', ne bsané' le'. <sup>28</sup>Gate benne'

wen zrin na' bedxúaje', na' bezrague' xetú benne' wen zrin ljwezre', benne' dxebugue' chee' látedau'. Na' gudele' lba bènea', ne guzú lawe' dxusézxuje' chi'i bènea', dxe'le' le': "Gudizruj neda' da dxal-lu' chia'." <sup>29</sup> Nadxa benne' wen zrin ca' xezícala guleque bé'ene' da nigá, na' belewí'ine lázrele'ene', na' xjaque' xejleguezre' xrane' xúgute' da ba guca. <sup>32</sup> Nadxa xrane' na' gunná bé'ene' xejlenné' benne' wen zrin na', na' guzre' le': "Bi wen zrin calela. Neda' bnite lawa' chiu' ca naca da na' dxebugu' chia' lawe' da guta' xúenu' neda'." <sup>33</sup> Cá'anqueze lue' dxal-la' xexache lazru' le sa' ljwezru' na' ca bena' neda' bexache lazra' lue'." <sup>34</sup> Xrane' na' bzrá'ale'e bènea', na' bdee' le' xel-la' zi' dxácaté na' quízruje' ca naca da na' dxalle' chee'.

<sup>35</sup> Nadxa gunná Jesús:

—Cá'anqueze gun Xra' zua xabáa chee'le le'e che quebe gunité laule duté lázrdaule chee' le sa' ljwézrele.

## 19

*Da bchalaj Jesús ca naca chee' benne' dxu-lusán ljwezre'*

(Mr. 10.1-12; Lc. 16.18)

<sup>1</sup> Ca gudé bchalaj Jesús da caní, na' bezé'e xezre ca' zaj nababa Galilea, na' bezrine' chala'ala naga nababa Judea, da zua chala'ala xegu Jordán naga dxalaj gu-bizra. <sup>2</sup> Benne' zan zjálalene' Le', na' bex-une' benne' zante, benne' we'.

<sup>3</sup> Nadxa bal-la benne' xudau' fariseo gulebigue' naga zua Jesús chee' xelebéaje' Le' dizra' chee' gaca xelagu zrie' Jesús, na' buluchébe' Le':

—¿Waca nu benne' gusané' zru'ule' ne chee' bíteteze da gune'?

<sup>4</sup> Bechebe Jesús:

—¿Quebe ne gulábale le'e lu xiche lá'azxa da na' dxenná na: "Bennea' bene' benne' ca' nédxudaute bene' le' benne' biu, ne nu'ula'?" <sup>5</sup> Cá'anqueze gunné': "Chee' le na' benne' biu gusané' xra xrne'e chee' gaque' tuze nen zru'ule', na' dxupe' xelaque' ca tuze benne'." <sup>6</sup> Caní naca

na, québedxa zaj naque' chupe', san tuze benne' zaj naque'. Chee' le na' quebe dxalla' xelá'a bèneache da na' ba nuchaga Dios.

<sup>7</sup> Nadxa buluchébe' Jesús:

—¿Bizr chee' na' gunná be'e Moisés nu benne' gunézruje' zru'ule' tu xiche da dxul'é na belexel'é, na' gusané' le'?

<sup>8</sup> Jesús guzre' benne' ca':

—Caní bene' lawe' da gulaca lazrdau zizraj xra xrtaule. Moisés benne' lataj gusanle zrú'ulale, san nédxudaute quebe guca na ca'. <sup>9</sup> Neda' dxapa' le'e, che tu benne' gusané' zru'ule', ne quebe dxdálene' benne' biu xula, na' che xezúalene' nu'ula xula, benne' nigá gune' dul-la súalene' nu'ula quebe naque' zru'ule', na' che nu benne' biu xequ'é tu nu'ula nusán benne' chee', cá'anqueze gun dul-la bènea' súalene' nu'ula quebe naque' zru'ule'.

<sup>10</sup> Nadxa benne' ca' dxuséde Jesús gulé'e Le':

—Che ca' dxaca chee' benne' zúalene' nu'ula, quebe dxal-la' súalentu' nu'ula.

<sup>11</sup> Jesús guzre' benne' ca':

—Quegá xúgute' benne' gaca xezezí'e dizra' nigá, san tuze benne' ca' ba nun Dios chee' xezezí'e na. <sup>12</sup> Zaj zra' benne' quebe dxezezúalene' nu'ula lawe' da quebe zaj naca xánnie' benne' biu. Na' zaj zra' benne' québedxa zaj naca xánnie' benne' biu lawe' da zaj nun bèneache naca caní. Na' zaj zra' benne' dxelexegá'ane' cá'aze, quebe nu dxezezúalene' chee' gaca xelune' zrin chee' Dios, Bènea' dxenná be'e xabáa. Benne' gaca si'e dizra' nigá dxal-la' si'e na.

*Jesús dxenabe' gaca chawe' chee' bidu ca'*

(Mr. 10.13-16; Lc. 18.15-17)

<sup>13</sup> Nadxa belezrín benne' lau Jesús zaj nach'é bal-la bidau' chee' guzé ne'e bidu ca', ne nabe' Dios gaca chawe' chee'be', san benne' ca' dxuséde Jesús gulezú lawe' dxeledil-le' benne' ca' zaj nach'é bidu ca'.

<sup>14</sup> Jesús guzre' le':

—Le güe bidu ca' lataj xeleda'be' naga zua'. Quebe guzrúnnale-be', lawe' da benne' zaj naque' ca bidu caní xelu'e naga dxenná bea Dios xabáa.

<sup>15</sup> Nadxa bze Jesús ne'e lawe' bidu ca', na' gudé na' bezé'e lataj na'.

*Tu benne' cuide' nape' xel-la' gunní'a*

(Mr. 10.17-31; Lc. 18.18-30)

<sup>16</sup> Tu benne' cuide' guxíaje' naga zua Jesús, na' bchebe' Lé':

—Benne' Wesede chawe'. ¿Bi da xrlátaje dxal-la' guna' chee gapa' xel-la' nabán zeajlí canna?

<sup>17</sup>Jesús guzre' le':

—¿Bizr chee na' dxu'u neda', benne' wesede chawe'? Quebe nu chilá' benne' nazre' chawe', san tuze Dios. Che dxaca lazru' zrué'enu' xel-la' nabán li lazre', bzua dizra' ca bdxixruj be'e Dios.

<sup>18</sup>Benne' cuide' na' gunné':

—¿Bila na'?

Jesús guzre' le':

—Quebe gutiu' benne'. Quebe súalenu' zru'ula benne' xula. Quebe cuanu'. Quebe nneu' da wen lazre' chee benne'. <sup>19</sup>Gudapa ba lá'ana xra xrna'u. Bzri'i le sa' ljwezru' ca nazri'i cuinu'.

<sup>20</sup>Benne' cuide' na' gunné':

—Xúgute da caní dxuna' nácatea' bí-dau'te. ¿Bíradxa quebe ne guna'?

<sup>21</sup>Na' guzre Jesús le':

—Che dxaca lazru' gacu' benne' li lazre', bexiáj, xeajete ca naca da napu', ne bnezruj na benne' xache' ca'. Nadxa gapu' xel-la' gunní'a xabáa. Na' gudátega nen neda'.

<sup>22</sup>Gate benne' cuide' na' benne' da nigá, bezé'e dxexíaje lazre' lawe' da nápal'e' xel-la' gunní'a.

<sup>23</sup>Nadxa gunná Jesús, dxé'e benne' ca' dxusédené':

—Da li dxapa' le'e, stébele'e naca chu'u tu benne' gunní'a naga dxenná bea Dios xabáa. <sup>24</sup>Da xula dxapa' le'e, chadidxa gaca te tu bea', be dxebía bénneache lu negue' tu xeche' zriche, quézcala chu'u tu benne' gunní'a naga dxenná bea Dios.

<sup>25</sup>Gate belenne' benne' ca' dxusede Jesús da nigá, na' belexebánele'ene', na' bu-luchébe ljwezre':

—¿Nuzra la xca'?

<sup>26</sup>Jesús guné'e benne' ca', ne guzre' le':

—Da nigá quebe gaca xelún bénneache, san Dios waca guné' ca naca.

<sup>27</sup>Nadxa gunná Pedro:

—Xran, netu' ba bcá'anantu' ca naca da nápantu', ne zeájentu' Lue'. ¿Bizra gápantu' xca'?

<sup>28</sup>Bechebe Jesús:

—Da li dxapa' le'e, ca lu zra na' gate na' xúgute xelexaca na cube, gate neda', Benne' Gulje' Bénneache, cue'a lataj

chawe' chia' naga nna be'a, le'e na' ba gudálele neda' cué'quezle lu chazrinnu lataj naga nna beale, chee guchí'ale chee chazrinnu cue' benne' Israel, benne' judío ca'. <sup>29</sup>Xúgute benne' ca' ba bulucá'ane' lizre', u benne' biche', u nu'ula zane', u xre', u xrne'e, u zru'ule', u zrí'ine', u xezr la xu chee', chee xelune' zrin chia', xezezi'queze' tu gaxúala na, ne xezezi'queze' xel-la' nabán zeajlí canna. <sup>30</sup>Benne' zante zaj naca blau na'a xelaque' benne' bzebe, na' benne' zante zaj naca benne' bzebe na'a xelaque' benne' blau.

## 20

*Da dxulé'e na ca naca chee benne' wen zrin ca'*

<sup>1</sup>Na' gunná Jesús:

—Da gaca naga dxenná bea Dios xabáa naca na ca da guca gate tu xrane zánete cue' xezr la xu guzé'e lizre' che zílala, zeáje' zeajtláje' benne' wen zrin ca' chee cheajlechibe' uva chee'. <sup>2</sup>Bca'ana cháwelene' benne' wen zrin ca' quízruje' tu dumí lazruj chee' tu zra, na' gusel-le' benne' ca' zeajleguene' zrin lu xezr la xu chee'. <sup>3</sup>Ca gudé na' guzé'e lizre' ca dxedá na, na' blé'ene' benne' zaj zre'e lawe' xi'a zaj nalátajze'. <sup>4</sup>Na' guzre' benne' ca': “Cá'anqueze le'e, le chjaca wen zrin lu xezr la xu chia', na' gunna' le'e da naca chawe'.” Na' benne' ca' xjaque'. <sup>5</sup>Xrane na' guzé'e da xula wa gubizra, ne cá'anqueze dxexedá' chunna, ne tuze ca bene'. <sup>6</sup>Xetu' du dxedá' gazxu' guxíaje' lawe' xi'a, na' blé'ene' zaj zra' na' benne' zaj nalátajzqueze', ne guzre' le': “¿Bizr chee na' zrale le'e nigá bedú zra quebe bi zrin dxunle'?”

<sup>7</sup>Gulenné': “Quebe nu ne xé netu' guntu' zrin chee'.”

'Na' guzre' benne' ca': “Cá'anqueze le'e, le cheajén zrin lu lina chia', na' gunna' le'e da naca chawe'.” <sup>8</sup>Gate gul-la' chizrela, xrane na' guzre' benne' xu'u lu ne'e zrin na': “Gunné benne' wen zrin ca', ne gudízuje', su lau' quízruju' benne' ca' belelá' bzébedxa, na' bzébeté quízruju' benne' ca' belelá' nédxute.” <sup>9</sup>Nadxa belezrín benne' ca' belú'e lu zrin na' gate dxexedadxa gazxu', na' tu tu benne' ca' belezi'e lazruj chee' du naxá' lazruj tu zra wen zrin. <sup>10</sup>Gudé na' gate belezrín benne' ca' gulu'e nédxute lu zrin na', guléquene'

xelezí'ē da zrendxa, san cá'anqueze gulezi' tu tu benne' ca' lazruj tu zra wen zrin weaj.

<sup>11</sup> Gate gulezi'ē na, na' gulezú lawe' dxelawe' zria lau xrane zrin na', <sup>12</sup> dxelenné': "Benne' caní belelá' bzébedxa, tu chí'idau'ze ga beluné' zrin, na' gudízrujquezu' benne' caní ca gudízruju' netu', na' netu' bedú zra bentu' zrin, ne ca naca da la chee zra nigá bchaga launtu'."

<sup>13</sup> Bechebe xrane na', dxe'ē tu benne' ca': "Ljwézra'dau', quebe bi dxuna' chiu' da quebe naca na chawe'. ¿Quebe bca'ana cháwelená' lue' quízruja' lue' lazruj tu zra wen zrin? <sup>14</sup> Guzi' lazruj chiu', ne bexíaj. Neda' dxaca lazra' gunézruja' chee benne' ca' belú'ē bzébedxa ca da gudízrujqueza' lue'. <sup>15</sup> ¿Quebe gaca guna' ca da dxaca lazra' nen dumí chia'? ¿Dxacu' xa lazre' lawe' da naca' neda' benne' xrlátaje?"

<sup>16</sup> Na' gunná Jesús:

—Ca'an naca, benne' ca' zaj naca benne' bzebe xelaque' benne' blau, na' benne' blau ca' xelaque' benne' bzebe lawe' da ba gunnía' benne' zan, san bábaze benne' ca' xelaque' blau.

*Xecha lasa dxuchalaj Jesús ca gaca gate gatié'*

(Mr. 10.32-34; Lc. 18.31-34)

<sup>17</sup> Gate xu'u Jesús neza, xexíaje' Jerusalén, guléaje' cheeze benne' chazrinna' ca' dxusédené', ne guzre' le':

<sup>18</sup> —Dxelé'ele le'e ba xexíajdxu Jerusalén naga neda', Benne' Gulje' Bénneache, xuludé' benne' ca' neda' lau benne' xíchaje ca' chee bxruze ca', ne lau benne' ca' dxuluxuzájle'ē da bdxixruj be'e Dios, na' xelechugue' chia' gatia'. <sup>19</sup> Xuludé' neda' lu na' benne' zitu' ca' chee xelún le' chia', na' xelu'ē neda', ne xuludé'ē neda' xaga béguaj, san zra guxunne zra xebana'.

*Da gunaba xrna Jacobo ne Juan*

(Mr. 10.35-45)

<sup>20</sup> Nadxa gubiga xrna Jacobo, ne Juan lau Jesús, bi ca' zaj naca be' zri'ine Zebedeo, naché'ē bi ca', na' bzu zribe' lau Jesús, dxenabé' culuén. <sup>21</sup> Jesús bchebe' nu'ula na':

—¿Bi na' dxenabu'?

Nu'ula na' guzre' Jesús:

—Gate zrin zra nna be'u, na' gudxixruj be'e cue' tu zri'ina' caní chalá'a xabéla chiu', ne xetube' xéglala.

<sup>22</sup> Jesús bechebe', guzre' bi ca':

—Quebe nézele le'e bi na' dxenábale. ¿Waca xí'ajle le'e ca da xí'aja' neda', da na' naca na ca xel-la' zi' da tea' neda', ne waca si'le da naca na ca xel-la' dxedxúa nisa ca da si'a neda' gate chu'a lu xel-la' gute?

Na' gulenabe':

—Wácantu'.

<sup>23</sup> Nadxa Jesús guzre' bi ca':

—Da li xí'ajle ca da xí'aja' neda', ne si'le da naca ca xel-la' dxedxúa nisa na' da si'a neda', san da cue'le chalá'a xabéla chia', ne chalá'a xéglala chia' quebe naca na chia' gunna' na le'e. Xra' gunézruje' na chee bi ca' ca da ba nucueze'.

<sup>24</sup> Gate xechí benne' ca' dxuséde Jesús belenne' ca', na' belezré'ē dxupa bi chee nu'ula na'. <sup>25</sup> Jesús gunné' benne' ca', ne guzre' le':

—Ba nézele le'e ca dxelún benne' xíchaje chee xezr la xu ca', dxelenná bé'ene' benne' ca', na' benne' nácadxe' blau ládujla benne' ca' dxelenná be'ē, dxuchínene' xel-la' dxenná bea chee'. <sup>26</sup> Le'e quebe dxalla' gunle ca'. Benne' dxaca lazre' gaque' blau ládujla le'e dxal-la' guné' zrin chee xezicadxale le'e, <sup>27</sup> na' bènea' dxaca lazre' gaque' xíchaje cheele, dxal-la' gaque' wen zrin chee xúgutele le'e. <sup>28</sup> Dxal-la' guné' ca bēna' neda', Benne' Gulje' Bénneache, quebe bida' chee nu gun zrin chia' neda', san bla'a chee guna' zrin chee bēneache, ne chee guzúa' xel-la' nabán chia' ca da quízruja' chee guselá' benne' zanté.

*Jesús dxexung' chupa benne' la chul-la*

(Mr. 10.46-52; Lc. 18.35-43)

<sup>29</sup> Gate dxelaxedxúaje' xezre Jericó, na' benne' zanté zjácalené' Jesús. <sup>30</sup> Naga dxeledéé' zaj dxe' chupa benne' la chul-la dxu'a neza, na' gate belenne' dxedé Jesús na' gulebezre xé'ē, dxelenné':

—Xran, Zri'ine David, bexache lazre' netu'.

<sup>31</sup> Benne' zan ca' guledil-le' dxúpaté' na' chee xelezúé' zrize, san le' gulebezre xé'ē zízrajdxa, dxelenné':

—Xran, Zri'ine David, bexache lazre' netu'.

<sup>32</sup> Nadxa Jesús gulezē', na' gunné' benne' la chul-la ca', na' bchebe' le':

—¿Bi dxaca lázrele guna' chee'ē?

<sup>33</sup> Belexechebe benne' ca':

—Xran, dxaca lázrentu' xelé'entu'.

<sup>34</sup> Jesús bexache lazre' benne' ca', ne bte' xiaj lawe'. Na' belexelé'ete' benne' la chul-la ca', na' xjácálene' Jesús.

## 21

*Ca da guca gate bexú'u Jesús Jerusalén*

(Mr. 11.1-11; Lc. 19.28-40; Jn. 12.12-19)

<sup>1</sup> Gate belezrin Jesús, ne benne' ca' dxusé-dene' gagu naga zua xezre Jerusalén, ne ba belezrine' xezre Betfagé, da zua na gagu naga zua xi'a naga zaj da' xaga olivo, na' Jesús gusel-le' chupa benne' ca' dxusédene' chee tu da xelune'. <sup>2</sup> Dxe'e le':

—Le hjaca xézredu na' da zua le nna' nigá. Na' lé'ele tu burro bzrise' da'ba' xaga, na' tu búrrodau' zúáleba' leba'. Le sezre-ba', ne le che'e dxúpatéba' nigá. <sup>3</sup> Che nu benne' bi xe'e le'e, le xe'e: “Xránadxu nachinne' leba', na' la xesél-la'tequeze'-ba.”

<sup>4</sup> Da nigá guca na chee guxá ca da gunná benne' bchálaje' waláz chee Dios, gunné':

<sup>5</sup> Le xe benne' zaj zra' xezre Sión:

“Le nna', Benne' nna bé'ene' le'e ze'e naga zúale.

Dute' xel-la' dxexruj lazre' zrié' tu burro bzrise'.

Zrié' tu búrrodau', zri'ine tu be dxua xua.”

<sup>6</sup> Nadxa dxupa benne' ca' dxuséde Jesús besiá'que', ne belune' ca da ba gunná be'e Jesús le'. <sup>7</sup> Xeajlexri'e' burro bzrise', ne zri'ineba', na' belezrúe' zra lane' cúzruba', na' guzría Jesús leba'. <sup>8</sup> Benne' zan ca' gulechílaje' zra lane' la neza na', na' xebal-le' buluchibe' zina' da buluzale' la neza. <sup>9</sup> Benne' zjaque' lówela, ne benne' zá'aque' bzebe gulezú lawe' dxelebezre xe'e, dxelen-né':

—¡Gaca ba lá'azxa Zri'ine wenná bea David! ¡Ba neza zrente' naca na chee bènnea' ze'e waláz chee Xránadxu Dios! ¡Gaca ba lá'azxa Dios!

<sup>10</sup> Gate guxú'u Jesús xezre Jerusalén, ca naca bènneache zaj zre'e na' beledxé'ena zrague', na' buluchébe ljwezre':

—¡Nuzra benne' nigá?

<sup>11</sup> Bal-la benne' ca' gulenné':

—Benne' nigá naque' Jesús, benne' dxuchálaje' waláz chee Dios, ze'e xezre Nazaret da nababa Galilea.

*Jesús dxuchi'e' lu xudau'*

(Mr. 11.15-19; Lc. 19.45-48; Jn. 2.13-22)

<sup>12</sup> Ca gudé na' guxú'u Jesús dxale'aj xudau' chee Dios, na' bebéaje' xúgute' benne' wete, ne benne' dxelá'awe' na'. Bdxixre' blag ca' chee benne' ca' dxuluché'e dumí, ne bdxixre' da ca' zaj dxe' benne' ca' dx-elúti'e' bgúgudu ca'. <sup>13</sup> Nadxa guzre' benne' ca':

—Lu xiche lá'azxa naxúaj da dxenná Dios: “Lizra' nigá naca na xu'u naga xelenaba bènneache lawa' neda”, san le'e ba nunle na ca tu lizre gubán.

<sup>14</sup> Lu dxale'aj xudau' na' gulebiga lau Jesús bal-la benne' la chul-la, ne benne' zrinnaj ca', na' Le' bexune' benne' ca'.

<sup>15</sup> Belezrá' benne' xíchaje' ca' chee bxruze ca', ne benne' ca' dxuluxuzájle'e da nadxixruj bea Dios, gate na' belenne' ca dxelebezre xa'a bidu ca' lu xudau', dxelennabe': “¡Gaca ba lá'azxa zri'ine wenná bea David!”

<sup>16</sup> Gulé'e Jesús:

—¡Dxennu' ca dxelenná benne' caní?

Bechébe Jesús:

—Dxenda' na. ¡Quebe ne gulábele le'e lu xiche lá'azxa naga naxúaj na chee da dxaca nigá? Dxenná na caní:

Ba benu' xelú'l-la bidu ca', ne bidu dxe'ene ca'.

Da dxelúe lá'anabe' Dios naca na da li.

<sup>17</sup> Nadxa bca'ana Jesús benne' ca'. Bezé'e xezre na', na' bezrine' xezre Betania, naga bejgá'ane' xela na'.

*Jesús dxugu'e' de' xaga higo*

(Mr. 11.12-14, 20-26)

<sup>18</sup> Che zílala ca zexíaj Jesús xezre na', na' gudune'. <sup>19</sup> Zítu'la blé'ene' tu xaga higo dxu'a neza, na' gate bzrine' naga zua na, quebe bi da zixre chee na blé'ene'. Lágaze zria na. Nadxa Jesús guzre' xaga higo na':

—Cabata' cuíaquezu' da zixre.

Gubizrete' xaga higo na'. <sup>20</sup> Ca belelé'e benne' ca' dxuséde Jesús da nigá, na' belexebene', ne buluchébe' Jesús:

—¡Ájazra na' chadite' gubizre xaga higo nigá?

<sup>21</sup> Bechébe Jesús:

—Da li dxapa' le'e, che nápa'e xel-la' dxeajlí lazre', ne quebe gun chupa lázrele, quegaze da nigá gaca gunle ca da bena' neda' chee xaga higo nigá, san waca xe'le xi'a nigá: Gucuasa nigá, xeajsúa lu nísadau', na' gaca na. <sup>22</sup> Che dxeajlí lázrele, na' xezi'le bíteteze da nába'e Dios.

*Xel-la' dxenná bea da xu'u lu na' Jesús*  
(Mr. 11.27-33; Lc. 20.1-8)

<sup>23</sup>Nadxa guxí'u Jesús lu chila xudau', na' dxácate' na' dxusédene' benne' zaj zre'e na', gulebiga naga zua Jesús benne' xíchaje ca' chee' bxruze ca', ne benne' gula chee' judío ca', na' buluchebe' Le':

—¿Bi xel-la' dxenná bea napu' dxunu' da caní? ¿Núzraqueze benna lue' xel-la' dxenná bea nigá?

<sup>24</sup>Bechebe Jesús:

—Cá'anqueze neda' gucheba' le'e tu. Che xechébele da nigá, na' neda' xapa' le'e bi xel-la' dxenná bea napa' dxuna' da caní. <sup>25</sup>¿Nu benne' gusel-le' Juan dxuchúe' bènneache nisa? ¿Dios, che bènneacheze?

Gulezú lawe' dxuluchálajle ljwezre', dxe-lenne':

—Che nnadxu Dios gusel-le' le', na' xe'e dxi'u: “¿Bizr chee' na' quebe guxéajlele chee'?” <sup>26</sup>Che nnadxu bènneache gusel-le' le', dxal-la' zrédexu bi xelún benne' zan ca' cheedxu dxi'u, lawe' da dxeleque xúgute' bènneache bchalaj Juan na' waláz chee' Dios.

<sup>27</sup>Chee' le' na' gulé'e Jesús:

—Quebe nézentu'.

Nadxa Jesús guzre' benne' ca':

—Cá'anqueze neda' quebe xapa' le'e bi xel-la' dxenná bea napa' dxuna' da caní.

*Da dxul'é e na ca naca chee' chupa bi biu chee' tu benne'*

<sup>28</sup>Na' guzre' Jesús benne' ca':

—¿Aja dxéquele le'e chee' da nigá? Tu benne' zaj zra' chupa zrí'ine' bi biu, na' guzre' tube': “Zrí'ina', guxíaj xején zrin lu lina chee' uva chia.” <sup>29</sup>Zrí'ine' na' bechébebe': “Quebe dxaca lazra'.” Ca gude' na' bexíaje lázrebe', na' guxíajbe' xejénquezbe' zrin. <sup>30</sup>Cá'anqueze xrabe' na' guxíaje' xejné'e xetube', ne guzre'-be', na' bi nigá bechébebe': “Waca, xrae. Na'a cha'a.” Quebe guxíajbe'. <sup>31</sup>¿Núlabe' bi chupa caní benbe' ca da guca lazre' xrabe'?

Gulenná benne' ca':

—Bi nedxu.

Na' gunná Jesús, dxe'e benne' ca':

—Da li dxapa' le'e, benne' wechizruj ca', ne nu'ula dxeledále benne' biu zante xelexú'e naga dxenná bea Dios nédxudxa ca le'e <sup>32</sup>lawe' da bla' Juan, bedajlé'ene' le'e da naca xrlátaje, na' le'e quebe guxéajlele chee'. Benne' wechizruj ca', ne nu'ula ca'

dxeledále benne' biu zante guléajle'e chee'. Le'e, gate ble'e'le da nigá, quebe bexíaje lázrele chee' chéajlele chee'.

*Da dxul'é e na ca naca chee' benne' wen zrin caléla ca'*

(Mr. 12.1-12; Lc. 20.9-19)

<sup>33</sup>Nadxa gunná Jesús:

—Le xene ca naca da nadxixruj bea nigá.

Tu benne' xrane tu xezr la xu guze' lba uva ca', ne bené' le'aj chee' na. Bené' tu xedxu naga xelešie' uva ca', ne guchise' tu xu'u sibe chee' gaca nu' guxúe ca naca na. Na' bca'angé' na lu na' benne' wen zrin ca', ne guzé'e zéajé' zitu'. <sup>34</sup>Gate bzrin zra xuluchibe' uva ca', na' gusel-le' tu chupa bi wen zrin chee' zeajlexezri'be' da dxal-la' xezí' xrane na'. <sup>35</sup>Benne' wen zrin ca' gule-que'e bi wen zrin chee' ca'. Belúlele'e tube', ne belutie' xetube', na' xetube' buluzríe'-be' xiaj. <sup>36</sup>Nadxa xrane na' gusél-ladxé' bi wen zrin chee' bi zandxa ca nedxu. Benne' wen zrin ca' tuz ca bulusaque' bi ca'. <sup>37</sup>Naga xejché'tequeze na gusel-le' zrí'inequeze' lawe' da dxéquene': Welape' ba lá'ana zrí'ina'. <sup>38</sup>Gate belelé'ene' zrí'ine', na' benne' wen zrin ca' gulé' ljwezre': “Bi nigá xezí' lu na'be' ca naca da caní. Du gute-be' chee' xegá'ana cheedxu da caní.” <sup>39</sup>Chee' le' na' guléle'-be', ne belexebéaje'-be' lu xezr la xu na', na' belutie'-be'.

<sup>40</sup>Nadxa Jesús bchebe' benne' ca':

—Gate xida xrane xezr la xu na', ¿ájazra gune' chee' benne' wen zrin ca'?

<sup>41</sup>Gulé'e Le':

—Gutié' benne' ca' dxelune' da caléla ne quebe xexache lazre' le'. Nadxa gucá'analene' xezr la xu na' benne' wen zrin xula, benne' xuluxunézruje' da dxal-la' xezí' le' gate zrin zra chee' na.

<sup>42</sup>Nadxa Jesús guzre' benne' ca':

—¿Quebe ne gulábale le'e xiche lá'azxa? Caní dxenná na:

Xiaj na' da buluzúa benne' wen xu'u ca' ch'alá'ala,

le' na' naca na xiaj blau na'a.

Da nigá naca na da ben Xránadxu, ne naca na tu da dxexebánedxu.

<sup>43</sup>Chee' le' na' dxapa' le'e, Dios wequé'e da naca cheele le'e naga dxenná be'e, na' gunézruje' na benne' xelune' da naca chee' xel-la' dxenná bea chee' Dios. <sup>44</sup>Che tu benne' cheajchazie' lawe' xiaj nigá waxúzruje', na' che xexruj na lawe' tu benne', na' guzuzruj na le'.

<sup>45</sup> Gate benne' xíchaję ca' cheę bxruze ca', ne benne' xudau' fariseo ca' belenne' da bchalaj Jesús, guleque bé'ene' cheę léqueze' bchalaj Jesús da caní. <sup>46</sup> Gate gulaca lazre' xełęle' Le', belezrebe' benne' xęzre ca' lawe' da dxelęaję benne' ca' naca Jesús benne' dxuchálaję' waláz cheę Dios.

## 22

*Da dxulé'e na ca naca cheę laní wechaga na'*

<sup>1</sup> Guzú lau Jesús dxuchálajęne' benne' ca' xecha lasa tu da dxulé'e na, dxę'e le':

<sup>2</sup> —Ca da gaca xabáa naga dxenná bea Dios naca na ca da guca gate tu benne' wenná bea beņę' tu laní wechaga na' cheę bi biu cheę'. <sup>3</sup> Gusel-le' benne' węn zrin cheę' ca' cheajletupe' benne' ca'an gunnę' lizre', san benne' ca' quebe gulaca lazre' xédajgaque'. <sup>4</sup> Nadxa gusél-ladxę' benne' węn zrin cheę' ca', benne' xula. Dxę'e le': "Le xę benne' ca' gunnía', ba nucueza' xel-la' wagu. Ba gunná be'eda' xelútię' bezre ca', ne bę dxelanne, na' ca naca na bache de. Dخال-la' xełelé'e nigá naga zra' wechaga na'." <sup>5</sup> Benne' ca' gunnę' quebe gulaca lazre' xédajgaque'. Tu benne' ca' guxíaję' lu xęzr la xu cheę', ne xetú benne' guxíaję' wete. <sup>6</sup> Xebal-la benne' ca' gulęle' bi węn zrin ca' cheę wenná bea na', na' bulucháchalęne'-be', ne belútetę'-be'. <sup>7</sup> Nadxa wenná bea na' bzrá'ale'e, na' gusel-le' benne' cheę' ca', benne' zjaca wedil-la xeajleguętię' benne' wete benne' ca', ne xeajlezęzxe'te' lazre' benne' ca'. <sup>8</sup> Nadxa guzre' bi węn zrin cheę' ca': "Bal-la bi de ba de cheę wechaga na', na' benne' ca' gunnía' quebe zaj naca cheę' xełelé'e. <sup>9</sup> Le hjaca neza zri'a ca', ne le nņę xúgute benne' lé'e'le, cheę xełelé'e laní cheę wechaga na'." <sup>10</sup> Benne' węn zrin ca' xjaque' la neza ca', na' xeajletupe' xúgute bęnneache, benne' belelé'ene' zaj naque' benne' calęla, ne benne' xrlátaje. Ca'an guca guzrate xu'u na' bęnneache. <sup>11</sup> Nadxa wenná bea na' guxú'e xeajné'e benne' ca' gunnę', na' blé'ene' tu benne' dxę'e na', quebe nazi'e zra lane' cheę laní cheę wechaga na'. <sup>12</sup> Guzre' le': "Lue', benne', íájazra guca guxú'u nigá, ne quebe nazi'u zra lanu' cheę laní wechaga na'?" Bęnnea' gudxę'e zrize. <sup>13</sup> Nadxa wenná bea na' guzre' bi zaj zúabe' ga na', "Le guchéaj ni'a ne'e, ne le guzale' chalé'ajla naga naca chul-la, naga cuezre', ne xáguxa'atę' lazre'."

<sup>14</sup> Benne' zante gunnía', na' bábase' zaj naca cheę' xelu'e nigá.

*Ca naca cheę dumí da dxuluchízruje'*  
(Mr. 12.13-17; Lc. 20.20-26)

<sup>15</sup> Nadxa benne' fariseo ca' besiá'que', ne belune' tuze dizra' xełebéaję' Jesús dizra' cheę xełezęquene' xelawe' zri'a cheę'.

<sup>16</sup> Nadxa gulesel-le' bal-la benne' ca' zaj naque' fariseo ca' tuze, ne bal-la benne' ca' zaj de'e Herodes, cheę zeajleguezre' Jesús:

—Benne' wesęde, nézentu' dxennú' da li, ne dxusędentu' da li da zaj naca cheę Dios, ne quebe dxezrebu' bi xełenná bęnneache, ne quebe dxenná'u ca da zaj napa bęnneache. <sup>17</sup> Gunná xque. íAja dxęquenu' lue'? íDxun na ba xen quízrujdxu da dxuluchízruj benne' ca' nasel-la César, benne' zitu', che cabí?

<sup>18</sup> Jesús ba nézene' ca da dxelaca lazre' xelune' cheę', na' guzre' benne' ca':

—Le'e, láweze dxunle da xrlátaje. íBizr cheę na' dxuzúale da guzri'a xi na neda'?

<sup>19</sup> Le gulé'e neda' dumí na' da dxízrujle cheę wechízruj.

Nadxa bulunézruje' Le' tu dumí cheę xęzre Roma. <sup>20</sup> Gate blé'ene' na, na' Jesús bchebe' benne' ca':

—íNuzra lau ni, ne le' da naxúaj na nigá?

<sup>21</sup> Belexechebe':

—Cheę César na'.

Na' guzre Jesús benne' ca':

—Le gunezruj cheę César da naca cheę César, ne le gunezruj cheę Dios da naca cheę'.

<sup>22</sup> Gate belenne' da nigá, na' belexe-bánene', ne besiá'que' naga zua Jesús.

*Da buluchębe' Jesús cheę benne' xelexe-bane' lđdujla benne' gate*

(Mr. 12.18-27; Lc. 20.27-40)

<sup>23</sup> Zra ná'queze belezrín bal-la benne' saduceo ca' naga zua Jesús. Benne' saduceo ca' dxelennę' quebe xelexebán benne' gate. Gulé'e Jesús:

<sup>24</sup> —Benne' wesęde, Moisés gunnę' che tu benne' nuchaga ne'e gatie', ne quebe nu bidu cheę' chilá', na' bi biche' dxal-la' guchaga na'abe' nen nu'ula gute benne' biu cheę' na' cheę sua tu bi cheę benne' ba gutię'. <sup>25</sup> Naga zúantu' gulezrá' gazre benne' gulácabe' zri'ine tuze benne'. Bi nedxu bchaga na'abe', na' gútebe'. Bi gudxupe' bchaga na'abe' nen nu'ula na' gute benne' biu cheę' lawe' da quebe nu zri'ine bi nedxu



na' gúlajbe'. <sup>26</sup> Cá'anqueze gúcaqueze na chee bi gudxupe', na' gudé na' chee bi guxunne', na' cá'anqueze guca chee xúgute bi gazre ca'. <sup>27</sup> Ca gudé na', na' gute nu'ula na'. <sup>28</sup> Gate xelexebán benne' gate, ¿nula bi gazre caní gácabe' benne' chee nu'ula na' lawe' da tu tu bi gazre ca' bchaga na'abe' nen nu'ula na'?

<sup>29</sup> Jesús bechebe':

—Le'e dxeque zrējajele lawe' da quebe núnbeale da naxúaj na lu xiche lá'azxa, ne ca naca xel-la' waca chee Dios. <sup>30</sup> Gate zrin zra xelexebán benne' gate, québedxa xuluchaga na' bénneache, ne québedxa xelúti'e' bi nu'ula chee xuluchaga na'abe'. Xelaque' ca zaj naca gubáz chee xabáa chee Dios. <sup>31</sup> Ca naca na che dxal-la' xelexebán benne' gate, ¿quebe ne gulábale le'e ca gunná Dios? Gunné': <sup>32</sup> “Neda' naca' Dios chee Abraham, ne Dios chee Isaac, ne Dios chee Jacob.” Dios quebe naque' Dios chee benne' gate, san naque' Dios chee benne' ban, benne' ca' ba gulatíe' lu xezr la xu nigá.

<sup>33</sup> Gate belenne' da nigá, na' belexebane benne' ca' ca naca da dxusede Jesús.

*Da gunná be'e Dios da naca blau*  
(Mr. 12.28-34)

<sup>34</sup> Gate benne' fariseo ca' guleque bé'ene' ba bzua zri Jesús benne' saduceo ca', na' belezrague'. <sup>35</sup> Tu benne' ca', benne' naque' benne' dxuxuzájle'e' da nadxixruj bea na, guca lazre' guxúe' ájala nne Jesús. Bchebe' Le':

<sup>36</sup> —Benne' wesede, ¿bizrla da gunná be'e Dios naca blau?

<sup>37</sup> Bechébe Jesús:

—Dxal-la' zri'inu' Xranu' Dios duté xichaj lázrda'u, ne duté bénne'du xu'u, ne duté xel-la' dxéajni' chiu'. <sup>38</sup> Da nigá naca da nadxixruj bea da blaudxa, ne da dx-undxa na ba xen. <sup>39</sup> Da nadxixruj bea da gudxupe' nácaqueze na ca', da dxenná na: Bzri'i le sa' ljwezru' ca nazri'i cuinu'. <sup>40</sup> Che tu benne' dxune' ca zaj naca chupa da nadxixruj bea caní, dxune' ca naca xúgute da nadxixruj bea da bzujaj Moisés, ne ca naca xúgute da bulusede benne' ca' buluchálaje' waláz chee Dios.

*¿Nuzra zri'ine naca Cristo?*  
(Mr. 12.35-37; Lc. 20.41-44)

<sup>41</sup> Dxácate ne zaj nazraga benne' fariseo ca' na', <sup>42</sup> Jesús bchebe' le':

—¿Ájala dxéquele le'e chee Cristo? ¿Nuzra zri'ine naque'?

Benne' ca' gulé'e Le':

—Zri'ine David na'.

<sup>43</sup> Nadxa guzre Jesús benne' ca':

—¿Ájazra na' David gate bchálaje' chee Cristo dxé'e Le': Xran? Gate gunná David da nigá bchálaje' da ble'e Be' Lá'azxa le'. Caní naca da na' gunná David:

<sup>44</sup> Xrana' Dios guzre' Xrana':

“Gudxé'e chalá'a xabela chia' cadxa guzú'a' zran ni'u benne' ca' quebe chawe' dxelelé'ene' Lue'.”

<sup>45</sup> ¿Ájazra naca na naca Cristo zri'ine David, che David ná'queze dxé'e Le': “Xrana'”?

<sup>46</sup> Quebe nu benne' guca xechébequeze' chee', na' ze lau zra na' netú québedxa nu bexazre bi guchébedxa Le'.

## 23

*Jesús dxedil-le' benne' xudau' ca'*  
(Mr. 12.38-40; Lc. 11.37-54; 20.45-47)

<sup>1</sup> Nadxa Jesús guzre' benne' ca' zaj zre'e' na', ne benne' ca' dxusédene', <sup>2</sup> dxenné':

—Benne' ca' dxuluxuzájle'e' da nadxixruj bea Moisés, ne benne' xudau' fariseo ca' zaj napé' xel-la' dxenná bea xuluxuzájle'e' da nadxixruj bea Moisés. <sup>3</sup> Chee le na' le guzú'a dizra' chee benne' caní, ne le gun xúgute da xelenné'. Quebe gunle ca da dxelún benne' ca', lawe' da dxelelé'e' da ca' dxal-la' gunle, na' quebe dxelúnqueze' na. <sup>4</sup> Dxelune' xua zí'ile'e' da quebe dxelezeque xelezúe bénneache, ne dxelelé'e' bé'ene' bénneache chee xelu'e na. Benne' ca' ne quebe dxuluzúe' na netú zrube ne'e' chee da dxuluzúe benne' xubla. <sup>5</sup> Xúgute da dxelún benne' ca' naca na chee xelelé'e' bénneache. Dxeledánnene' dxelu'e luzxgue', ne ne'e' ladxe' laga naga naxúaj dizra' chee Dios, ne dxelácu'e' zra lane' da zeajzé luzre na tunna. <sup>6</sup> Dxelaca lazre' xelebé'e' naga ze láweze naga dxelawe', ne naga naca blau lu xu'u ca' naga dxeledube'. <sup>7</sup> Dxelaca lazre' xelapa bénneache le' ba lá'ana la neza ca', ne xelé'e le': “Benne' wesede.” <sup>8</sup> Na'a le'e, quebe güele lataj nu xé le'e, “Benne' wesede”, lawe' da xúgutele nácale bi bíchele tule xetule, ne tuze Benne' dxusédene' le'e, neda', Cristo. <sup>9</sup> Quebe nu xe le'e: Xrae, lu xezr la xu nigá, lawe' da zua tuze Xrale, Dios na' zue' xabáa. <sup>10</sup> Quebe güele lataj nu xé le'e: Xran, lawe' da zua tuze Xránale, neda', Cristo. <sup>11</sup> Bénéa' dxune' zrin chee

xezícadxale le'e nácadxē' blau ládujla le'e.  
<sup>12</sup>Bénnea' dxucá'ana szren cuine' wexéxru-  
 jla bénnea', na' bénnea' dxaque' dxexruj  
 lazre' wegá'angē' szren.

<sup>13</sup>'Edxugua le'e, benne' dxusédele da  
 nadxixruj bea na, ne le'e, benne' fariseo  
 ca'. Láweze dxunle da xrlátaje. Dxusézxujle  
 neza chee xabáa chee quebe nu chu'u na.  
 Lé'eqeque quebe dxú'ule, ne quebe dxuele  
 lataj benne' dxelaca lazre' xelu'e.

<sup>14</sup>'Edxugua le'e, benne' dxusédele da  
 nadxixruj bea na, ne le'e, benne' fariseo ca'.  
 Láweze dxunle da xrlátaje. Dxegúale lizre  
 nu'ula ca' ba gulate benne' biu chee', na'  
 chee xulé'ele xrlátaje cuínale, dxuwízrale  
 Dios xcha lu xudau'. chee le na' da zrente  
 da guzría xi na le'e.

<sup>15</sup>'Edxugua le'e, benne' dxusédele da  
 nadxixruj bea na, ne le'e, benne' fariseo ca'.  
 Láweze dxunle da xrlátaje. Le'e dxedale du  
 ca naca xezr la xu nigá ne ca naca nísadau'  
 chee si' tu benne' ca naca da zéajlele chee  
 Dios, na' gate bache dxunle na, na' dxugá-  
 padxale bénnea' dul-la ca da nabágale le'e  
 chee cuía xi'e lu lataj ba xa'.

<sup>16</sup>'Edxugua le'e. La chul-la nácale, ne  
 dxaca lázrele cu'ule benne' neza. Dxennale  
 che tu benne' dxuzétaje' xudau', quebe  
 dxun na le' ba xen, na' che dxuzétaje' oro  
 chee xudau', da na' dxun na le' ba xen.  
<sup>17</sup>Nácale benne' xala, ne la chul-la. ¿Nula  
 da naca na blaudxa, oro, che xudau' na' da  
 dxucá'ana na lá'azxa oro na'? <sup>18</sup>Cá'anqueze  
 dxennale le'e che nu dxuzetaj cugu lá'azxa,  
 quebe dxun na le' ba xen, san che dxuzéta-  
 je' guna' da zria na lawe' cugu lá'azxa, da  
 na' dxun na le' ba xen. <sup>19</sup>Nácale benne' xala  
 ne la chul-la. ¿Nula da naca na blaudxa,  
 guna' na', u cugu lá'azxa na' da dxucá'ana  
 na lá'azxa guna' na'? <sup>20</sup>Che nu benne' dx-  
 uzétaje' cugu lá'azxa, quegaze cugu lá'azxa  
 dxuzétaje', san cá'anqueze dxuzétaje' ca  
 naca da zria lawe na. <sup>21</sup>Bénnea' dxuzéta-  
 je' xudau', quegaze xudau' na' dxuzétaje'.  
 Cá'anqueze dxuzétaje' Dios zue' lataj na'.  
<sup>22</sup>Cá'anqueze benne' dxuzétaje' xabáa, dx-  
 uzétaje' lataj naga zria Dios, ne Diósqueze,  
 Bénnea' zrie' lataj na' dxuzétaje'.

<sup>23</sup>'Edxugua le'e, benne' dxusédele da  
 nadxixruj bea na, ne le'e, benne' fariseo ca'.  
 Láweze dxunle da xrlátaje. Dxunézrujle  
 chee xudau' tu cue' chee da chi cue' chee  
 xixruj weaj, ne chee bínnedu ca' chee anís,

ne chee cumín. Quebe dxunle da zaj naca  
 na blaudxa da zaj zua na lu da nadxixruj  
 bea na, ca naca chee gácale xrlátaje, ne chee  
 xexache lázrele le sa' ljwézrele, ne chee  
 chéajlele chee Dios. Da caní zaj naca na da  
 dxun na ba xen gunle, ne quebe gusanle  
 da ca' ba dxunle. <sup>24</sup>La chul-la nácale, ne  
 dxaca lázrele cu'ule benne' neza. Dxecá'ale  
 da naca ca tu bé'adau', be zrua lawe' da  
 dxí'ajle, na' quebe dxeeque be'ele dxí'ajle da  
 naca ca tu camello, be dxelaga benneache.

<sup>25</sup>'Edxugua le'e, benne' dxusédele da  
 nadxixruj bea na, ne le'e, benne' fariseo ca'.  
 Láweze dxunle da xrlátaje. Nácale ca zaj  
 naca zriga', ne xé'ena da dxíbele cúzreze  
 na. Lu'ule na quebe dxíbele. Caní nácale  
 lawe' da lu lázrdaule nácale ca gubán, ne  
 benne' dxucude. <sup>26</sup>Benne' fariseo la chul-  
 la. Nedxu le quibe lu'ule zriga', ne xé'ena,  
 na' cá'anqueze xegá'ana chawe' cúzrela.

<sup>27</sup>'Edxugua le'e, benne' dxusédele da  
 nadxixruj bea na, ne le'e, benne' fariseo  
 ca'. Láweze dxunle da xrlátaje. Nácale ca  
 tu ba chiche da nalá na xrtante cúzrela,  
 na' lu'ule na nazrate na zrita chee benne'  
 gate', ne xúgutē da sgute. <sup>28</sup>Ca'an nácale  
 le'e. Cúzrela nala'le ca benne' xlátaje, na'  
 lu lázrdaule nazrate na da wen lazre', ne da  
 calela da dxunle.

<sup>29</sup>'Edxugua le'e, benne' dxusédele da  
 nadxixruj bea na, ne le'e, benne' fariseo  
 ca'. Láweze dxunle da xrlátaje. Dx-  
 ucá'anale cháwedau' ba ca' naga zaj na-  
 gache benne' ca' buluchálaje' waláz chee  
 Dios, ne dxuele lechítaje lu'a chee benne'  
 xrlátaje ca'. <sup>30</sup>Dxennale: "Chela netu'  
 ba zúantu' gate na' gulezrá' xra xrtauntu'  
 ca', quebe gúcalentu' benne' ca' belutie'  
 benne' ca' buluchálaje' waláz chee Dios."  
<sup>31</sup>Gate dxennale ca', le'e dxexúmbeaquezle  
 nácale zri'ine zre sua benne' ca' belutie'  
 benne' ca' buluchálaje' waláz chee Dios.  
<sup>32</sup>Dxusexúzrele dxunle ca da gulezú lau  
 belún xra rxtáule ca'.

<sup>33</sup>'Be snia nácale, ne xrtia be snia. ¿Ajazra  
 gunle chee gáchele lu da zi' da xa' chee lataj  
 ba xa'? <sup>34</sup>Chee le na' neda' sel-la' chee  
 benne' ca' xuluchálaje' waláz chee Dios, ne  
 benne' sina ca', ne benne' ca' xulusédene'  
 le'e. Lé'eqeque gútele, ne gudá'le xaga  
 béguaj bal-la benne' ca', na' xebal-le' gunle  
 le' zi' lu xudau' ca', na' gau zi' xúzrele le' tu  
 xezre xetú xezre. <sup>35</sup>Ca'an gaca, le'e bágale

zria chee xel-la' gute chee xúgute benne' xrlátaje ca' belute xra xrtáule ca', gate guzú lau na nu bēte Abel, benne' xrlátaje, ne naga bzrinte bētele Zacarías ládújla naga zua lataj lál'azxa chee xudau' ne lataj naga dxuluzexzē' bē xixre'du ca', bē dxelegú'e lu cugu chee Dios. <sup>36</sup> Da li dxapa' le'e, bēneache zaj zre'e na'a xelebague' zria chee xúgute da caní.

*Jesús dxebexzē' chee xezre Jerusalén  
(Lc. 13.34-35)*

<sup>37</sup>Nadxa gunná Jesús:

—Jerusalén, Jerusalén, le'e na' dxútele benne' ca' dxuluchálaje' waláz chee Dios, ne dxuzríale xiaj benne' gubáz ca' dxesella Dios naga zúale. Zane' lásate guca lazra' gutupa' zr'ínele chia' ca dxun bedxuj, dxutúpaba' be dxé'enedau' zran xrlába', san quebe guca lázrele. <sup>38</sup> Le nna'xque na'a, lízrele xelexegá'ana na dácheze, <sup>39</sup>lawe' da dxapa' le'e, québedxa lé'ele neda' cadxa zrin zra nnale: La'azxa naca bēneache zē'e waláz chee Xránadxu.

## 24

*Jesús dxenné' wabía xi' xudau'  
(Mr. 13.1-2; Lc. 21.5-6)*

<sup>1</sup>Nadxa bedxúaj Jesús xudau', na' dxácatē dxexedxúaje' na', gulebiga benne' ca' dxusédene' lau Jesús, ne gulezú lawe' dxuluchálajlene' Lē' ca naca chee xudau' na'.

<sup>2</sup>Bechebe Jesús:

—¿Dxelé'ele xúgute da caní? Da li dxapa' le'e, netú xiaj caní quebe xegá'ana zeajzría cuzru ljwezre na. Ca naca na cuía xi na.

*Ca naca da xelunna bea na ba za zra bzebe  
(Mr. 13.3-23; Lc. 21.7-24; 17.22-24)*

<sup>3</sup>Nadxa xjaque' lu xi'a naga zaj zē xaga olivo, na' gate dxe' Jesús na', benne' ca' dxusédene' belezrine' lau Lē', ne bagácheze buluchēbe' Lē':

—Gunná netu'. ¿Bata gaca da na'? ¿Bi gunna bea na gate zrin zra xela'u, ne gate cheajsé chee xezr la xu nigá?

<sup>4</sup>Nadxa Jesús guzre' benne' ca':

—Le guxúe cuínale chee quebe nu si xē le'e. <sup>5</sup>Benne' zan xelulé'e. Xelún lazre' xelenné' zaj naque' Cristo, na' xelezi xē'e benne' zan. <sup>6</sup>Wenle le'e dxaca wedil-la, ne waca wedil-la gáteteze na'. Quebe zrébele, lawe' da dxal-la' xelaca da caní. Da caní quebe zaj naca na chee zra bzebe. <sup>7</sup>Tu cue' xezr la xu tíl-lalē na xetú cue' xezr la xu,

ne tu xezre tíl-lalē na xetú xezre. Wata' gubina', ne welata' xízrawe' ca', ne wazrú' gáteteze na'. <sup>8</sup>Xúgute da caní zaj naca na naga dxezú lau ca da xelezaca bēneache.

<sup>9</sup>'Nadxa xuludé'e' le'e naga si sácale, na' bál-lale welútequeze'. Ca naca bēneache xelexúdene' le'e lawe' da dxunle da naca chia'. <sup>10</sup>Lu zra na' benne' zan québedxa xeléajle'e chia', na' xelexúdene' le sa' ljwezre', ne xuludé'e' le sa' ljwezre' lu na' benne' guledábague' le'. <sup>11</sup>Welelá' benne' zan benne' wen lazre'. Xelenné' dxuluchálaje' waláz chee Dios, na' xelezi xē'e benne' zante. <sup>12</sup>Lawe' da gáta'le'e da calēla, benne' zan québedxa xelexrí'ine' le sa' ljwezre'. <sup>13</sup>Bēneache' zua chache' ca zrinte zra bzebe, la bēneache'. <sup>14</sup>Ca naca dizra' chawe' nigá ca nna bea Dios, zralaj na du gabí'i xezr la xu chee xelén ca naca benne' chee xúgute cue' xezr la xu, na' te na' cheajsé chee xezr la xu nigá.

<sup>15</sup>'Benne' gulabe' da nigá dxal-la' chéajni'ine'. Daniel, benne' bchálaje' waláz chee Dios, bzuaje' ca naca chee tu da dxezra'a Dios, da dxuxrinna' na. Gate lé'ele da nigá zua na lataj lál'azxa chee xudau', <sup>16</sup>nadxa benne' zaj zre'e xezre ca' zaj nababa Judea dxal-la' xuluzrúnnuje', ne chjaque' lu xi'a zren. <sup>17</sup>Che tu benne' zē' chju'u chee', quebe dxal-la' xexétaje' bi cheajxeléaje' lu xu'u. Dخال-la' guzrúnnujje'. <sup>18</sup>Benne' zue' le'e xixre' quebe dxal-la' xezrine' lize' cheajezri'e xicha chee' da gácue'. <sup>19</sup>Edxugúa nu'ula ca' zaj zre'e lu zra na' zaj zue' zi'i, ne nu'ula ca' zaj nu'e bidau', ne dxelázrebe'. <sup>20</sup>Le naba Dios quebe gun na ba xen guzrúnnuje' beu' zaga, ne quegá lu zra dxupá'analē, <sup>21</sup>lawe' da che ca' gaca na, na' da zrēntēdxa da xelezi saca bēneache ca da quebe ne xelexaque' ca guzú lautē zua xezr la xu nigá, ne québedxa bi xelexaque' caní ca te chee da nigá. <sup>22</sup>Che Dios quebe guzáchie' zra ca', na' netú quebe nu la. Guzáchie' na chee gacalēne' benne' ca' bache nabéaje' chee'.

<sup>23</sup>'Chee lē na', quebe chéajle che nu xē le'e: "Le nna'xque, nigá zua Cristo", u che nu xē le'e: "Le nna' xque, na'la zue'." <sup>24</sup>Caní dxapa' le'e lawe' da xelulé' benne' zan, benne' guzrí xē'e, na' xelenné' zaj naque' Cristo, u zaj naque' benne' dxuluchálaje' waláz chee Dios, na' da zrentē xululé'ene', ne xelunē' xel-la' waca zren

ca' chee xelezí xē'e benne' ca' ba nabéaj Dios. Caní xelune' che xelezéquene'. <sup>25</sup> Ba bchálajlena' le'e caniqueze na'a quebe ne gaca na. <sup>26</sup> Chee le na', che nu xē le'e: "Le nna'xque, na' zue' le'e xixre'", quebe chéajle na', u che nu xē le'e: "Le nna'xque, lu xu'u nigá zue'", quebe chéajlele. <sup>27</sup> Ca dxun tu xesa guziú, dxēpe na naga dxalaj gubizra, na' dxelé'edxu na naga dxebía gubizra, ca'an gaca gate xida' neda', Benne' Gulje' Bénneache. <sup>28</sup> Gáteteze de tu da nate, na' dxelexezraga laba ca'.

*Ca da gaca gate ba zua xelá' Benne' Gulje' Bénneache*

(Mr. 13.24-37; Lc. 21.25-33; 17.26-30, 34-36)

<sup>29</sup> Na' gunná Jesús:

—Gate bache guca zra na' gate xelezaca zi' bénneache, nadxa gubizra chul-la na naga zua na, na' beu' quebe gusení na, na' belaj xelexruij na, na' xelexrízequeze ca naca da zaj naca na szren da dxeledá' lu be'. <sup>30</sup> Nadxa lé'ele zran xabáa da gulé'e na ba zua xelá'a neda', Benne' Gulje' Bénneache, na' ca naca bénneache zaj zre'e xezr la xu xelexbézrequeze'. Nadxa xelexé'ene' neda', Benne' Gulje' Bénneache, zezá'a lu beuj zran xabáa, zúale neda' dutē xel-la' dxenná bea, ne da xabáa. <sup>31</sup> Nadxa sél-laqueza' gubáz chee xabáa chia' ca', na' xulucúezre' zizraj lúzuba' chee xuluxutupe' benne' ca' ba nabéaja' chia' dapa saca chee xezr la xu nigá, ne du ca naca xezr la xu nigá.

<sup>32</sup> Le gusede ca naca da dxulé'e xaga higo. Gate dxelexedxé'ene zruze na, ne dxezría na laga' dxe'ene, ba nézele ba za xaca beu' la. <sup>33</sup> Cá'anqueze gate lé'ele dxelaca xúgute da caní, dxal-la' nézele gágute ba zua cheajsé chee xezr la xu, ne ba zua gaca na. <sup>34</sup> Da li dxapa' le'e, xúgute da caní xelaca na nédxula gate quebe ne xelate bénneache zaj zre'e lu zra na'. <sup>35</sup> Xabáa ne xezr la xu weledé chee na. Dizra' chia' quebe te chee na.

<sup>36</sup> Gate za zra na', ne bila zra na', quebe nu neze, quegá gubáz chee xabáa zaj zre'e xabáa, ne neda', Zri'ine Dios. Tuze Xradxu Dios nézene' gate zrin zra na'.

<sup>37</sup> Ca guca lu zra ca' gate zua Noé, cá'anqueze gaca na gate xelá'a neda', Benne' Gulje' Bénneache. <sup>38</sup> Ca lu zra ca' gate quebe ne gun Dios nisa xiuj da guzría xi na bénneache, gulezrá' bénneache ca' dxelé'aj dxelawe', ne dxuluchaga ne'e, ne

dxulunézruje' zrí'ine' ca' chee xuluchaga na'be', cadxa bzrin zra guxú'u Noé lu da zren na' dxedá lawe' nísadau' da nazí le na arca. <sup>39</sup> Quebe guleque bé'eng' ca da dxal-la' gaca na, cadxa bzrin zra guca xiuj na', ne beje na ca naca benne' ca'. Cá'anqueze gaca gate xelá'a neda', Benne' Gulje' Bénneache. <sup>40</sup> Ca lu zra ca' xelexrá' chupa benne' biu le'e xixre'. Tue' xeché'e, na' xetúe' xegá'ane'. <sup>41</sup> Xelexrá' chupa nu'ula dxelútue'. Tue' xeché'e, na' xetúe' xegá'ane'.

<sup>42</sup> Le sua le'e ban lazre' lawe' da quebe nézele bi zra xelá'a neda', Xránale. <sup>43</sup> Da nigá dxal-la' nézele: Che tu xrane xu'u nézene' bi zra chizrela zrin gubán, waxíchaje' bchigala, ne quebe gu'e lataj xusalaj benne' gubán lizre' chee cuane'. <sup>44</sup> Chee le na', le sua le'e ban lazre' lawe' da xelá'a neda', Benne' Gulje' Bénneache, gate québela dxéquele ca'.

*Benne' wen zrin li lazre', ne benne' wen zrin quebe naque' li lazre'*

(Lc. 12.41-48)

<sup>45</sup> Na' gunná Jesús:

—iNuzra na' benne' wen zrin li lazre' ne dxéajni'ine', bénnea' xrane' dxucá'analene' le' benne' zaj zre'e lizre' chee gunézruje' da xelawe' gate zrin zra chee na? <sup>46</sup> Ba neza naca na chee benne' wen zrin na', gate xezrín xrane', lé'ene' le' dxune' ca naca da nabague'. <sup>47</sup> Da li dxapa' le'e, xrane' gucá'analene' le' ca naca da nape'. <sup>48</sup> Che benne' wen zrin na' gaque' benne' wen da calela, ne guéquene' quebe xelá' ze xrane', <sup>49</sup> ne che su lawe' gusaca zi'e xezicala benne' wen zrin ca', ne xi'aj gágulene' benne' dxelezuzre', <sup>50</sup> nadxa xrane' xezrine' zra gate québela dxebeze'. Gaca na zra quebe nézene', <sup>51</sup> na' gusaca zí'le'e le'. Chugue' chee' gaque' tuze benne' ca' dxelune' láweze da xrlátaje. Cuezre', ne xáguxa'ate lazze'.

## 25

*Da dxulé'e na naca chee chi nu'ula cuide'*  
<sup>1</sup> Gunná Jesús:

—Ca gaca chee benne' xelu'e naga dxenná bea Dios xabáa naca na ca da guca chee chi nu'ula cuide' caní. Guleque'e xi' chee' ca', chee chjaque' laní chee wechaga na', dxelebeze' bátala xelá' benne' wechaga na'. <sup>2</sup> Gazxu' nu'ula caní gulaque' gat lazre', na' xegaxu' nu'ula caní zaj naque' ban

lazre'. <sup>3</sup> Nu'ula ca' quebe zaj naque' ban lazre' belú'ē xi' chee' ca', san quebe belú'ē da za zxezxe na da xelegu'ē lu xi' chee' ca'. <sup>4</sup> Nu'ula ban lazre' ca' belú'ē xi' chee' ca', ne da za zxezxe na da xelegu'ē na. <sup>5</sup> Lawe' da guzré benne' wechaga na', na' gulaca wase ca zaj naque', na' xúgute' gulasie'. <sup>6</sup> Dxela ben tu chí'i benne' dxebezre xē'e, dxenné': "Ba za wechaga na'. Le dxuaj si' lu na'le le'." <sup>7</sup> Xúgute' nu'ula cuide' caní gulase', na' gulezú lawe' bulugale' xi' chee' ca'. <sup>8</sup> Nadxa gazxu' nu'ula ca' quebe zaj naque' ban lazre' gulé'ē gazxu' nu'ula ban lazre' ca': "Le gunna late' da za zxezxe na cheentu', lawe' da ba dxelxula xi' cheentu'." <sup>9</sup> Nu'ula ban lazre' ca' belexechebe': "Quebe gaca, lawe' da che gúnnantu' late' cheele, quebe gaca na da dxechínnentu' netu', ne da dxechínnéle le'e. Le chjácala naga dxutie' na, ne le cheajxri cheele." <sup>10</sup> Dxácate' zjaca nu'ula ca' quebe zaj naque' ban lazre', na' bezrín wechaga na'. Nu'ula ban lazre' ca' gulu'ē nen le' lu laní chee wechaga na', na' bsezxuj dxa xu'u na'. <sup>11</sup> Gudé na' belexezrín xegazxu' nu'ula ca', na' gulenné': "Xran, xran, gusalaj chú'untu'." <sup>12</sup> Le' bechebe': "Cabata'. Da líqueze quebe núnbe'a le'e."

<sup>13</sup> Nadxa Jesús guzre' benne' ca':

—Le sua le'e ban lazre', lawe' da quebe nézele bi zra, u bi xel-la' xelá'a neda', Benne' Gulje' Bénneache.

*Da dxulé'e na ca naca chee benne' gulez'ē dumí*

<sup>14</sup> Na' gunná Jesús:

—Ca gaca chee benne' xelu'ē naga dxenná bea Dios xabáa, naca na ca da guca gate tu benne' zué' chee se'ē chéaje' zitu', na' gunné' bi wen zrin chee' ca', ne bcá'analene' bi wen zrin ca' dumí chee'.

<sup>15</sup> Tu bi ca' bnézruje' gazxu' cue' dumí, na' xetube' bnézruje' chupa cue' dumí, na' xetube' bnézruje' tu cue' dumí. Bnézruje' chee tu tube' ca da xelezéquebe' xuluchínebe' na. Nadxa guzé'ē zéaje' zitu'.

<sup>16</sup> Bi wen zrin na' guzi'be' gazxu' cue' dumí bchínebe' dumí na', na' bezi'be' xegazxu' cue' dumí. <sup>17</sup> Cá'anqueze bi wen zrin na' guzi'be' chupa cue' dumí, bezi'be' xechupa cue' dumí. <sup>18</sup> Bi wen zrin na' guzi'be' tu cue' dumí na' guxiájbe', ne bcáchebe' dumí chee xránabe' tu lu xedxu da benbe' lu xu.

<sup>19</sup> Zane' iza ba guca gate bezrín xrane bi wen zrin ca', na' guzú lawe' dxezi'ē da bdee'

lu na' bi wen zrin ca'. <sup>20</sup> Nedxu bzrin bi wen zrin na' guzi'be' gazxu' cue' dumí, na' bnézruje' xránabe' xegazxu' cue' dumí, na' guzrebe' le': "Xran, bennu' neda' gazxu' cue' dumí. Nigá dē xegazxu' cue' da bezi'a nen dumí chiu'." <sup>21</sup> Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zrédxaqueze. Guxú'u naga zua' neda', ne gubéle'e." <sup>22</sup> Gudé na' bzrin bi wen zrin na' guzi'be' chupa cue' dumí, na' gunabe': "Xran, bennu' neda' chupa cue' dumí. Nigá dē xechupa cue' da bezi'a nen dumí chiu'." <sup>23</sup> Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zrédxaqueze. Guxú'u naga zua' neda', ne gubéle'e." <sup>24</sup> Gate bzrin bi wen zrin na' guzi'be' tu cue' dumí, na' guzrebe' xránabe': "Xran, nezda' nacu' benne' dxenné' xue, ne dxezi'u da quebe guzu', ne dx-execa'u da quebe besiu'. <sup>25</sup> Chee le' na' bzreba', na' guxá'a xejcáchia' dumí chiu' lu xu. Nigá dē da naca chiu'." <sup>26</sup> Na' xránabe' guzre' lebe': "Nacu' bi wen zrin calela, ne zrawede. Ba nézqueznu' dxezi'a da quebe guza', ne dxexecá'a da quebe besia'. <sup>27</sup> Chee le' na' la xju'u dumí chia' na' lu na' benne' dxelízruje' chee dumí da dxuluchínebe', na' gate za' neda', na' xezi'a da naca chia' nen da belezí'e." <sup>28</sup> Nadxa guzre' benne' ca' zaj zre'ē na': "Le xecá'a dumí na' da núxrube', ne le gunezruj na bénnea' nape' chi cue' dumí. <sup>29</sup> Benne' nape' wazidxe' da zrendxa, na' benne' quebe nape', ca late' da du na' nape' wecá'a na. <sup>30</sup> Ca naca bi wen zrin nigá, bi wedegún, le xebéaj-be' chalé'ajla naga naca chul-la, naga cuézrebe', ne xáguxa'ate' láxzabe'."

*Ca gun Dios gate guchi'ē chee bénneache zaj zre'ē xezr la xu*

<sup>31</sup> Na' gunná Jesús:

—Gate xelá'a neda', Benne' Gulje' Bénneache, ne Benne' Wenná Bea, nen ca naca gubáz chee xabáa chia', na' cué'queza' lataj naga nna be'a, da naca na da xabáa. <sup>32</sup> Na' bénneache chee xúgute' cue' xezr la xu xelexezraguē' lawa' neda', na' xebéaja' cha chee' ca dxun benne' dxuxúe' zrila'. xebéaje' chíbudu ca' ládujla zrila' ca'. <sup>33</sup> Guzrá'a benne' ca' zaj naca zrila'

chia' chalá'a xabela chia', na' benne' ca' zaj naca ca chíbudu ca' guzrá'a le' chalá'a xéglala chia'. <sup>34</sup> Nadxa xapa' benne' ca' zaj zra' chalá'a xabela chia': "Le da le'e, nácale xrlátaje lau Xra'. Le chu'u naga dxenná bea Xra', lataj na' bcueze' chee gate na' bene' xezr la xu nigá. <sup>35</sup> Caní dxaca lawe' da guduna', na' bgágule neda'. Gubíleda', na' bénnale da gu'a. Gudá' ca tu benne' xu'e neza, na' gulu'ule neda' lízrele. <sup>36</sup> Bxáxrjeda' zra lana' gácu'a', na' bgácule neda'. Quebe chawe' guzúa', na' bedajnábele neda'. Guxu'a lizre xia, na' bedajnábele neda'." <sup>37</sup> Nadxa benne' xrlátaje caní xelenné': "Xran, ¿bata blé'entu' Lue' dxedunu', na' bgáguntu' Lue'? ¿Bata blé'entu' Lue' dxebilenu', na' bénnantu' da gu'u? <sup>38</sup> ¿Bata blé'entu' Lue' ca tu benne' xu'e neza, na' gulú'untu' Lue' lízrentu'? ¿Bata blé'entu' Lue' dxexáxrjenu' zra lanu', na' bgácuntu' Lue'? <sup>39</sup> ¿Bata bénnantu' quebe chawe' zu', u xu'u lizre xia, na' bedajnábantú' Lue'?" <sup>40</sup> Neda' xechéba': Da li dxapa' le'e, ca da benle chee bénnedu caní, benne' zaj naca dxexruj lazre', chee néda'queza' benle ca'.

<sup>41</sup> Nadxa neda', Benne' Wenná Bea, xapa' benne' ca' zaj zra' chalá'a xéglala chia': Le cuasa cuita' neda', le'e, nácale wen da caléla lau Xra'. Le chjaca lu xi' chee lataj ba xa' da nabeza na chee da xriwe', ne chee gubáz chee na ca'. <sup>42</sup> Caní dxaca lawe' da guduna', na' le'e quebe bénnale da gawa'. Gubíleda', na' quebe bénnale da xí'aja'. <sup>43</sup> Gudá' ca tu benne' xu'e neza, na' quebe gulu'ule neda' lízrele. Bxáxrjeda' zra lana' gacua', na' quebe bgácule neda'. Quebe chawe' guzúa' ne guxu'a lizre xia, na' quebe bedajnábele neda'. <sup>44</sup> Nadxa benne' ca' xeléqueze' neda': "Xran, ¿bata blé'entu' Lue' dxedunu', u dxebilenu', u xu'u neza, u dxexáxrjenu' zra lanu', u quebe chawe' zu', u xu'u lizre xia, na' quebe gúcalentu' Lue'?" <sup>45</sup> Neda', benne' wenná bea, xechéba': Da li dxapa' le'e, lawe' da quebe bi benle chee bénnedu caní, benne' zaj naca dxexruj lazre', quebe bi benle chee néda'queza'. <sup>46</sup> Benne' caní chjácaqueze' lataj ba xa', na' benne' xrlátaje ca' chjaque' lu xel-la' nabán da zeajli canna.

## 26

*Dxelíljaje' ájala xelele' Jesús*

(Mr. 14.1-2; Lc. 22.1-2; Jn. 11.45-53)

<sup>1</sup> Gate bexuzre bchalaj Jesús caní, na' guzre' benne' ca' dxusédene':

<sup>2</sup> —Ca ba nézquezle, xechupa zraze na'a súadxu Laní Pascua, da naca na zra dxuluxucube benne' judío ca guca gate Dios bebéaje' bénneache chee' lu xezr la xu Egipto, na' neda', Benne' Gulje' Bénneache, xuludé' neda' lu na' benne' xuludé'e neda' xaga béguaj.

<sup>3</sup> Ca lu zra na' benne' xíchaje ca' chee bxruze ca', ne benne' dxuluxuzájle'e da bdxixruj Moisés, ne benne' gula sina ca' chee judío ca', belezrague' chale'aj chee xu'u zaca chee Caifás, bxruze blau. <sup>4</sup> Na' belíljaje' ájala xelele' Jesús lu da wen lazre' chee xelútie' Le'. <sup>5</sup> Gulenné':

—Quebe gundxu na lu zra laní nigá, chee quebe xeledábaga benne' ca' dxi'u.

*Tu nu'ula dxegu'e Jesús da dxelá zixre*  
(Mr. 14.3-9; Jn. 12.1-8)

<sup>6</sup> Zua Jesús xezre Betania lizre Simón, béneae' gü'e'ene' we' guzru'. <sup>7</sup> Bzrin tu nu'ula naga zua Jesús, nu'e tu zruágadau' da naca na xiaj alabastro, ne nazrate na da dxelá zixre da zácale'e na. Gate na' dxe' Jesús ga dxelawé', na' nu'ula nigá gulu'e' na xichaj Jesús. <sup>8</sup> Gate belelé'e benne' ca' dxusede Jesús da nigá, na' belezré'e, ne gulezú lawe' dxelenné':

—¿Bizr chee na' guzría xi' da nigá? <sup>9</sup> Da nigá waca la gudá'u na sí'adxu da zrente, chee gácale' dxu benne' xache' ca'.

<sup>10</sup> Jesús benne' da nigá, na' guzre' benne' ca':

—¿Bizr chee na' dxunle nu'ula nigá zede? Da nigá bene' naca na tu da xrlátaje. <sup>11</sup> Benne' xache' ca' tu zrázqueze' ládujla le'e, na' neda' quegá tu súaleza' le'e. <sup>12</sup> Ca naca da ben nu'ula nigá, gulu'e' da zixre na' bel-la' dxen chia', naca na da xucá'ana chawe na neda' chee zra gachia' lu xedxu ba. <sup>13</sup> Da li dxapa' le'e, gáteteze xuluchálaje' dizra' chawe' chia' nigá du gabí'i xezr la xu, na' zrlájqueze ca da ben nu'ula nigá, chee cheajlesá lazre' bénneache le'.

*Judas dxechébe lazre' gudé' Jesús*  
(Mr. 14.10-11; Lc. 22.3-6)

<sup>14</sup> Nadxa tu benne' chazrinnu ca' dxusede Jesús, béneae' le' Judas Iscariote, guxíaje' xeajchálajlene' benne' xíchaje ca' chee bxruze ca'. <sup>15</sup> Guzre' le':

—*¿Ájate gúnnale neda' che ca' gudéa' Jesús lu na'le?*

Nadxa benne' ca' gulírzuje' lē' chi dxua dumí plata. <sup>16</sup>Ca lu zra na' guzú lau Judas dxexilaje' ájala gune' gudéé' Jesús lu na' benne' ca'.

*Da dxágudxu chee xucúbedxu ca guca gate gute Xránadxu*

(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup>Zra nedxu chee laní na' gate na' dxelawe' xeta xtila da quebe nachixre cua zichaj chee na, benne' ca' dxuséde Jesús belezrine' lau Lē', na' buluchebe' Lē':

—*¿Gazra dxaca lazru' gucuézentu' da gágudxu chee laní pascua chee benne' judío?*

<sup>18</sup>Jesús guzre' lē':

—Le hjaca lu xēzre na', naga zua lizre tu benne', na' le xē'e: "Bennea' dxusédene' dxi'u dxenné': Zra chia' gatia' ba zua gágute, na' lizru' lue' gawa' chee Laní Pascua tu zren nen benne' ca' dxusédeda'."

<sup>19</sup>Benne' ca' dxuséde Jesús belunē' ca da gunná bé'ene' lē', na' bulucueze' da xelawe' chee Laní Pascua.

<sup>20</sup>Gate gula chizrela, na' gudxé' Jesús ga gawe' tu zren nen benne' ca' dxusédene'.

<sup>21</sup>Dxácatē na' dxelawe', guzre Jesús benne' ca':

—Da li dxapa' le'e, tule le'e naca bénnea' gudéé' neda' lu na' benne' ca' dxelunē' da calela.

<sup>22</sup>Nadxa benne' ca' belexewí'inele'e, na' gulézú lawē' tu tue' dxuluchebe' Jesús:

—Xran, ¿quebe naca neda'?

<sup>23</sup>Na' bechebe Jesús:

—Bénnea' dxudé ne'e lu xé'ena tu zren nen neda', benne' na' gudéé' neda'. <sup>24</sup>Neda', Benne' Gulje' Bénneache, waxá'a naga dxal-la' gatia' ca naxúaj na lu xiche chee Dios, san edxugúa bénnea' gudéé' neda'. Cháwedxa naca la quebe gulaj bénnea'.

<sup>25</sup>Nadxa gunná Judas, bénnea' gudéé' Jesús, dxenné':

—Benne' dxuséde, ¿quebe naca neda'?

Na' bechebe Jesús, gunné':

—Awe', lue' na'.

<sup>26</sup>Dxácatē dxelawe', Jesús guqué'e xeta xtila, na' guzre' Dios: "Xcalenu'." Gudé na' bzúzruje' na, na' bnézruje' na benne' ca' dxusédene', dxenné':

—Le gagu. Da nigá naca na be'l-la' dxen chia'.

<sup>27</sup>Gudé na' guqué'e tu zriga', na' guzre' Dios: "Xcalenu'", na' bnézruje' na benne' ca', dxenné':

—Le xi'aj xúgutele da xuzru lu zriga' nigá. <sup>28</sup>Da nigá naca na dxen chia' da guzúa chacha na xel-la' wezría cube da dxun Dios. Dxen nigá lalaj na ne chee benne' zante chee gunitē lau Dios dul-la zaj nabaga benne' ca'. <sup>29</sup>Dxapa' le'e, quebedxa xi'aja' ca naca xrise uva nigá ca zrindxa zra xi'aja' da cube tu zren nen le'e naga dxenná bea Xra'.

*Jesús dxenné' nna Pedro quebe núnbe'e Lē'*  
(Mr. 14.26-31; Lc. 22.31-34; Jn. 13.36-38)

<sup>30</sup>Ca gudé belul-lē' chee Dios, na' gusiá'que' zjaque' lu Xi'a Xaga Olivo Ca'. <sup>31</sup>Nadxa Jesús guzre' benne' ca':

—Xúgutele le'e gusán lázrele neda' na'a zre', lawe' da naxúaj na lu xiche chee Dios, dxenné': "Gutia' benne' dxuxúe' zrila', na' zrila' ca' xelase dinnajba'." <sup>32</sup>Gate te xebana' neda', cha'a neda' ga nababa Galilea nédxudxa ca le'e.

<sup>33</sup>Nadxa bechebe Pedro:

—Lácala xúgute benne' caní xulusán lazre' Lue', quebe guna' neda' ca'.

<sup>34</sup>Nadxa Jesús guzre' lē':

—Da li dxapa' lue', lu zre' na'a zre' nédxudxa gate cuezre xjeaj, lue' wannáu' chunna lasa quebe núnbe'u neda'.

<sup>35</sup>Pedro guzre' Jesús:

—Lácala gatia' neda' tu zren nen Lue', quebequeze nnia' quebe núnbe'a Lue'.

Cá'anqueze gulenná xúgute benne' ca' dxuséde Jesús.

*Jesús dxuchálajlene' Dios naga zaj xze' xaga olivo ca' nazí le na Getsemaní*  
(Mr. 14.32-42; Lc. 22.39-46)

<sup>36</sup>Nadxa bzrin Jesús nen benne' ca' dxusédene' tu lataj nazí le na Getsemaní, na' guzre' lē':

—Le cue'e nigá dxácatē cha'a neda', guchálajlene' Dios.

<sup>37</sup>Jesús guché'e Pedro, ne dxupaté zri'ine Zebedeo, na' guzú lawē' bewí'inele'ene' ne guzúale'e stebe. <sup>38</sup>Nadxa guzre' benne' ca':

—Dxewí'ine lázrele'a dxunte na gute na neda'. Le xegá'ana le'e nigá, ne le sua ban lazre' tu zren nen neda'.

<sup>39</sup> Nadxa Jesús guzé'e zéaje' xelate' caníladxa, na' guté' sudxú'ala lu xu, ne bchájlajlęne' Dios, dxenné':

—Xrae, chela gaca, bde na chalá'ala quebe gaca chia' ca naca xel-la' gute caní da naca na ca tu da sla' da xí'aja'. Quebe gaca na ca dxaca lazra' neda'. Gaca na ca dxaca lazru' Lue'.

<sup>40</sup>Nadxa bezrín Jesús naga zaj zra' benne' ca' dxusédene', na' blé'ene' benne' ca' dxelásie', na' guzre' Pedro:

—¿Quebe gúcale le'e quíchale bchigala nen neda' tu chí'idau'ze? <sup>41</sup>Le mnaze, ne le guchálajle Dios cheę quebe gun zréaje da xriwe' le'e. Da li bėnne'du xu'ule dxaca lázre'le'e na, san lu be'la' dxen cheęle dxate ni'a na'le.

<sup>42</sup>Da gudxupe' lasa guxíaj Jesús bchá-lajlęne' Dios caní:

—Xrae, che quebe gaca te chalá'ala ca naca da dxal-la' saca', gaca na ca dxaca lazru' Lue'.

<sup>43</sup>Ca gudé na' bezrine', ne belé'ene' benne' ca' dxusédene', dxelásie' lawe' da ba dxeleZRude' lawe' dxelaca wásele'e. <sup>44</sup>Bca'ane' benne' ca', guzé'e zéaje' bchá-lajlęne' Dios da guxunne' lasa, na' gunnáqueze' ca da ba gunné' ca'an bache.

<sup>45</sup>Nadxa bezrine' naga zaj zra' benne' ca' dxusédene', na' guzre' le':

—Le gase na'a, ne le xezí' lazre'. Ba bzrin zra gate neda', Benne' Gulje' Bėnneache, tea' lu na' benne' dul-la ca'. <sup>46</sup>Le chasa, ne le chu'u. Ba za bėnnea' dxudé'e' neda'.

*Dxelech'é Jesús ca tu benne' wen da zrin-naj*

(Mr. 14.43-50; Lc. 22.47-53; Jn. 18.2-11)

<sup>47</sup>Ne dxuchálajte Jesús na' gate bzrin Judas. Naque' tu benne' chazrinnu ca', na' zá'acale benne' zante le', benne' zaj nu'e xia ca' ne xaga ca'. Benne' caní zaj naque' benne' gulesel-la benne' xíchaję ca' cheę bxruze ca', ne benne' gula sina ca' cheę judío ca'. <sup>48</sup>Judas, bėnnea' dxudé'e' Jesús, ba blé'ene' benne' ca' ca tu da gune' da gulé'e na nu na' naca Jesús. Gunné':

—Bėnnea' gunupa' neda', Le' na'. Le che'e ca tu benne' wen da zrinnaĵ.

<sup>49</sup>Nadxa bzrin Judas lau Jesús, dxenné':

—Diuzre, Benne' dxusęde.

Na' bnupe' Jesús.

<sup>50</sup>Bechebe Jesús:

—Ljwezra', ¿bi cheę za'u?

Nadxa gulebiga benne' ca', gulele' Jesús, na' beleché'e Le' ca tu benne' wen da zrin-naj.

<sup>51</sup>Tu benne' ca' dxusęde Jesús guláje' xia cheę', ne guchugue' chalá'a naga bi wen zrin cheę bxruze blau. <sup>52</sup>Nadxa Jesús guzre' le':

—Begú'u xia chiu' lu zre na, lawe' da xúgute benne' dxelute benne' nen xia nalá, cá'anqueze gate le'. <sup>53</sup>¿Quebe nézenu' wazéqueda' neda' naba' Xra', na' Le' sélate' na'a naga zua' da zandxa ca chazrinnu cue' gubáz cheę xabáa, zaj naque' zánete' tu tu cue'? <sup>54</sup>Na'a che ca'an guna', ¿ájazra gaca gaca na ca da naxúaj na lu xiche cheę Dios, da dxenná na caní dxal-la' gaca na?

<sup>55</sup>Nadxa guzre Jesús benne' ca':

—Le'e bđxuaĵle nen xia nalá ca', ne nen xaga ca' cheę quélale neda', dxunle neda' ca tu benne' gubán. Xúgute zra gudxe'a neda' lu xudau' dxusędeda' le'e, ne quebe gudélale neda'. <sup>56</sup>Xúgute da caní dxaca na cheę gaca na ca da gulenná benne' ca' buluchálaje' waláz cheę Dios, da na' naxúaj na lu xiche cheę Dios.

Nadxa xúgute benne' ca' dxusęde Jesús bulucá'ane' Le' tuze', buluxuzrinnuje'.

*Dxezrín Jesús lau benne' ca' cheę xu'u lawe' blau cheę judío ca'*

(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup>Benne' ca' gulele' Jesús guleché'e Le' lau Caifás, bxruze blau, ga na' zaj nazraga benne' ca' dxuluxuzájle'e da bđixruĵ be'e Moisés, nen benne' gula sina ca'. <sup>58</sup>Pedro zéaje nawe' Jesús zítu'la, na' bzrine' chale'aj cheę lizre bxruze blau, na' guxú'e, ne gudxé'e tu zren nen bi xa'aga cheę lé'ene' ájala xexuzre da dxaca na'.

<sup>59</sup>Benne' xíchaję ca' cheę bxruze ca', ne benne' gula sina ca', ne xúgute benne' ca' cheę xu'u lawe' blau cheę judío ca' belí-laje' ájala xuluzría xi'e Jesús, lálaca naca na da wen lazre', cheę xelezquene' xuludé'e' Le' gatie'. <sup>60</sup>Quebe bi belezrelnę', lálaca belezrín benne' zan benne' gulenné' da wen lazre' cheę Jesús. Naga xeaĵete na belezrín chupa benne' wen lazre'. <sup>61</sup>Dxelenné':

—Benne' nigá gunné': “Wazéqueda' neda' guchínnaja' xudau' cheę Dios, na' xexuna' na lawe' chunna zraze.”



<sup>62</sup>Nadxa guxasa bxruze blau, na' guzre' Jesús:

—¿Quebe bi dxexechëbu'? ¿Bizra da dxelenné' chiu' lue'?

<sup>63</sup>Jesús guzúe' zrize. Nadxa bxruze blau na' guzre' Le':

—Lu La Dios ban dxenná be'eda' lue' nneu' da li. Gunná che nacu' lue' Cristo, Zri'ine Dios.

<sup>64</sup>Jesús guzre' le':

—Nácaqueza' ca dxennáu' lue'. Cá'anqueze dxapa' le'e, walé'ele neda', Benne' Gulje' Bénneache, cue'a chalá'a xabëla chee Dios nen xel-la' szren chee', na' xelá'a lu beuj bza chee xabáa.

<sup>65</sup>Nadxa bxruze blau gucheze' zra lané' chee blé'ene' quebe nabague' zria, na' gunné':

—Benne' nigá dxenné' schanni' chee Dios. ¿Nachínnedxadxu benne' xechëbe'? Ba bénquezle le'e ca dizra' schanni' dxenné'. <sup>66</sup>¿Bi dxennale le'e?

Benne' ca' gulenné':

—Nabague' zria, ne dxal-la' gatie'.

<sup>67</sup>Nadxa buluzré'e zrene' lau Jesús, ne belú'e Le', na' xebal-le' belegape' dxu'a lawe'. <sup>68</sup>Na' gulé'e Le':

—¿Nácaquezu' Lue' Cristo? Gunné' xa'a nu be Lue'.

*Dxenná Pedro quebe núnbe'e Jesús*

(Mr. 14.66-72; Lc. 22.56-62; Jn. 18.15-18, 25-27)

<sup>69</sup>Dxácatë na' dxe' Pedro chalé'ajla, na' tu nu'ula wen zrin bzrine' lau Pedro ne guzre' le':

—Cá'anqueze lue' nacu' Jesús, benne' Galilea na', tuze.

<sup>70</sup>Pedro ben chúchue' xrtizre' lávela xúgute benne' ca', gunné':

—Quebe nezda' nu chee na' dxenníu'.

<sup>71</sup>Nadxa Pedro zexíaje' chee xedxúaje' chale'aj na', na' ble'e xetú nu'ula ca' le', ne guzre' benne' ca' zaj zré'e na':

—Cá'anqueze benne' nigá dxedálëne' Jesús, benne' Nazaret na'.

<sup>72</sup>Xecha lasa ben chúchue' Pedro xrtizre', na' bzétaje' Dios, gunné':

—Quebe núnbe'a benne' na'.

<sup>73</sup>Xetú chí'idau' guca belezrín benne' zaj zré'e na' lau Pedro, na' gulé'e le':

—Da li, tuze nácaquezu' nen bënnea' lawe' da xel-la' dxenné' chiu' dxunna bea na lue'.

<sup>74</sup>Nadxa guzú lau Pedro dxuzría xi' cuí-nazqueze', ne dxuzétaje' Dios, dxenné':

—Quebe núnbeaqueza' benne' na'.

Dxácatë na' gudxezre xjeaj. <sup>75</sup>Nadxa xejás lazre' Pedro ca da guzre Jesús le': Nédxudxa ca cuezre xjeaj, lue' wannáu' chunna lasa quebe núnbe'u neda'. Bedxúaj Pedro na', na' gudxézrele'e.

## 27

*Dxelech'é Jesús lau Pilato*

(Mr. 15.1; Lc. 23.1-2; Jn. 18.28-32)

<sup>1</sup>Gate guxani', xúgute benne' xíchaje' ca' chee bxruze ca', ne benne' gula sina ca' chee benne' judío ca' belunge' tuze dizra' ájala xelunge' chee xelútië' Jesús. <sup>2</sup>Nadxa beleché'e Le' nadxéaje', ne xejlegu'e Le' lau Poncio Pilato, benne' dxenná be'e waláz chee xezr la xu Roma.

*Ca guca gate gute Judas*

<sup>3</sup>Nadxa Judas, bënnea' bdee' Jesús, gate guque bé'ene' ba buluzría xi'e Jesús, bexíajele'ene', na' bunézruje' da chi dxua dumí plata lau benne' xíchaje' ca' chee bxruze ca', ne benne' gula sina ca'. <sup>4</sup>Dxe'e le':

—Neda' bëna' dul-la lawe' da bdea' tu benne' naque' du lazre' chee gatie'.

Belexechëbe benne' xíchaje' ca':

—¿Bizra naca cheentu' da nigá? Chiu' lue' naca da na'.

<sup>5</sup>Nadxa Judas buzale' dumí na' lu xudau', ne bezé'e, na' xejxelú'u du lb'e'e.

<sup>6</sup>Benne' xíchaje' ca' chee bxruze ca' bu-luxutupe' dumí na', dxelenné':

—Quebe gaca cú'udxu dumí nigá naga xu'u dumí chee xudau', lawe' da naca na lazruj chee benne' dxute benne'.

<sup>7</sup>Nadxa belunge' tuze dizra' xelá'awe' tu xezr la xu nen dumí na' da nazí le na xezr la xu chee wen xesu' zruaga, chee gaca na tu lataj naga xelegache benne' zitu'. <sup>8</sup>Chee le' na' nazí le xezr la xu na' Xezr La Xu Chee Dxen ca lu zra na'a zra. <sup>9</sup>Caní guca na chee gaca ca da gunná Jeremías, benne' bchálaje' waláz chee Dios, gunné': "Gulequ'é chi dxua dumí plata da naca na da zaca Le' da buluzúa benne' Israël. <sup>10</sup>Nen dumí na' belá'awe' xezr la xu chee benne' wen xesu' zruaga, cáteze gunná be'e Xrana' neda'."

*Dxezrín Jesús lau Pilato*

(Mr. 15.2-5; Lc. 23.3-5; Jn. 18.33-38)

<sup>11</sup> Guleché'e Jesús lau bénnea' dxenná be'e waláz chee xezr la xu Roma, na' le' bchebe' Jesús:

—¿Nacu' Lue' Wenná Bea chee judío ca'?

Jesús gunné':

—Ca' naca na, ca dxennáu' lue'.

<sup>12</sup> Gate benne' xíchaje ca' chee bxruze ca', ne benne' gula sina ca' gulawe' zria chee Jesús, na' Le' quebe bi bechebe'. <sup>13</sup> Nadxa gunná Pilato, dxe'e Jesús:

—¿Quebe dxennu' ca da dxelenná benne' caní chiu'?

<sup>14</sup> Jesús quebe bi bechebe'. Ca'an guca bebanne bénnea', ne quebe bezrela lazre' ájala nne'.

*Dxelechuqe' chee Jesús gatig'*

(Mr. 15.6-20; Lc. 23.13-25; Jn. 18.38—19.16)

<sup>15</sup> Gate dxu'u laní na', bénnea' dxenná be'e na' xu'u lawe' dxusane' tu benne' wen da zrinnaj, núteteze benne' dxelaca lazre' benne' ca'. <sup>16</sup> Ca lu zra na' xu'u tu benne' lizre xia, benne' wénle'e da zrinnaj, nazí le' Barrabás. <sup>17</sup> Ca zaj nazraga benne' ca' na', Pilato bchebe' le':

—¿Nuzra dxaca lázrele gusana' neda'? ¿Gusana' Barrabás, che Jesús, bénnea' le' Cristo?

<sup>18</sup> Caní gunné' lawe' da ba nézene' buludé'e Jesús lawe' le' lawe' da dxelaque' xa lazre' chee Jesús.

<sup>19</sup> Dxacate' na' dxe' Pilato naga dxuchi'e chee bénneache, na' zru'ule' gusel-le' tu benne' xeajezre' Pilato: “Quebe guchixre chiu' da naca chee benne' xrlátaje na', lawe' da gunedá' xela ba dxele, da bzúale'e na neda' stebe ne chee Le'.”

<sup>20</sup> Benne' xíchaje ca' chee bxruze ca', ne benne' gula sina ca' belegú'u xele' benne' ca' chee xelenabe' la Barrabás, ne gate Jesús. <sup>21</sup> Bénnea' dxenná be'e bchájléne' benne' ca' xecha lasa. Buchebe' le':

—¿Nula benne' chupa caní dxaca lázrele le'e gusana'?

Benne' zan ca' gulenné':

—Barrabás.

<sup>22</sup> Pilato bchebe' benne' ca':

—¿Bizra guna' chee Jesús, benne' le' Cristo?

Xúgute' belexechebe':

—Bde'e xaga béguaj.

<sup>23</sup> Nadxa gunná Pilato, dxe'e benne' ca':

—¿Bizra da caléla nune'?

Benne' ca' gulezú lawe' dxelebezre xe'e, gulenné':

—Bde'e xaga béguaj. Bde'e xaga béguaj.

<sup>24</sup> Gate Pilato guque bé'ene' quebe bi séquene', na' benne' zan ca' dxeledábague' le', na' gunná bé'ene' bla' nisa, na' gudibe ne'e lávela benne' ca', dxenné':

—Quebe bi dul-la nabaga' chee xel-la' gute chee benne' xrlátaje nigá. Naca na chee le'e.

<sup>25</sup> Xúgute benne' ca' belexechebe':

—Netu', ne zrí'inentu' nabáganu' ca naca chee xel-la' gute chee'.

<sup>26</sup> Nadxa Pilato bsane' Barrabás, ne gunná bé'ene' belech'é'e Jesús chee xelu'e Le', na' bdee' Le' chee te'e xaga béguaj.

<sup>27</sup> Nadxa benne' dxjaque' wedil-la chee bénnea' dxenná be'e guleché'e Jesús, ne gulegú'e Le' lu xu'u lawe'. Belexezraga ca naca benne' dxjaque' wedil-la naga ze Jesús. <sup>28</sup> Belequ'é'e zra lané', ne bulugácu'e Le' tu ladxe' bzawe. <sup>29</sup> Buluzú'e xíchaje' tu da naca na zruze xaga xeche', ne buluguxre' Le' tu xaga ne'e xabéla. Nadxa buluzú zribe' lau Jesús, ne belún le' chee', dxelenné':

—Gaca xabáa chiu', Wenná Bea chee judío ca'.

<sup>30</sup> Cá'anzeze buluzré'e Le' zrene', na' gulequ'é'e xaga da nudxu Jesús, ne guline' na xíchaje'. <sup>31</sup> Ca gudé belún le' chee Jesús, na' belexegúe' ladxe' bzawe, na' buluxugácu'e Le' zra lánaqueze'. Nadxa belech'é'e Le' chee te'e xaga béguaj.

*Dxludé'e Jesús xaga béguaj*

(Mr. 15.21-32; Lc. 23.26-43; Jn. 19.17-27)

<sup>32</sup> Ca gusiá'que' na', belexezrague' tu benne' xezre Cirene, le' Simón, na' gulenná bé'ene' le' bi'e xaga béguaj chee Jesús.

<sup>33</sup> Ca'an guca belezrine' tu lataj nazí le na Gólgota, da dxennadxu, Lataj Chee Zrita Xichaj Benne' Gate. <sup>34</sup> Na' bulunézruje' da xi'aj Jesús xrise uva wal-la da nachixre na da sla', san gate bxue Jesús ca naca na, quebe gu'e na.

<sup>35</sup> Ca beuzre benne' dxjaca wedil-la buludé'e Le' xaga béguaj, na' gulebéaje' da gaca bea na chee xelxelé'e ca naca zra lana Jesús. Ca'an guca guxá ca da gunná benne' bchálaje' waláz chee Dios, gunné': “Belexelé'e zra lana' leze'. Gulebéaje' da gaca bea na.” <sup>36</sup> Nadxa gulebé'e dxuluzuzre' Jesús. <sup>37</sup> Buluzré'e xichaj Jesús na' tu xiche da naxúaj na da nabague', da dxenná na: Jesús, wenná bea chee judío ca'.

<sup>38</sup> Cá'anqueze buludé'e chupa benne' gubán tu zren nen Jesús le'e xaga béguaj ca', tue' chala'a xabela, ne xetúe' chala'a xéglala ga da' xaga béguaj chee Jesús. <sup>39</sup>Benne' dxeledé'e na' dxelún le' chee Jesús. Dxulutá xíchaje', <sup>40</sup>ne dxeleñné':

—¿Dxuchínnaju' xudau', na' lawe' chunna zraze xexunu' na? Bselá cuinu'. Che nacu' Zri'ine Dios, bexetaj le'e xaga béguaj na'.

<sup>41</sup>Cá'anqueze belún la chee' benne' xíchaje ca' chee bxruze ca', ne benne' dxuluxuzájle'e da bdxixruj be'e Moisés, ne benne' xudau' fariseo ca', ne benne' gula sina ca'. Dxelé ljwezre':

<sup>42</sup>—Bselé' benne' xula, san quebe dxezéquene' guselá cuine'. Che naque' Wenná Bea Chee Xezre Israel, dxal-la' xexétaje' le'e xaga béguaj, na' chéajlédxu chee'. <sup>43</sup>Le' bxren lazre' Dios. Na'a guselá Dios Le' che da li dxaca lazre', lawe' da gunná Le' naque' Zri'ine Dios.

<sup>44</sup>Cá'anqueze gubán ca' zaj da' xaga béguaj ca' nen Jesús gulenné' schanni' chee Jesús.

*Ca guca gate gute Jesús*

(Mr. 15.33-41; Lc. 23.44-49; Jn. 19.28-30)

<sup>45</sup>Nadxa ca naca xezr la xu na' guchul-la na. Guzú lau na wagubizra ca bzrinte na ca dxedá chunna. <sup>46</sup>La ná'queze Jesús gudxezre xe'e, dxenné':

—Elí, Elí, ¿lama sabactani?

(Da nigá zéaje na: Dios chia', Dios chia', ¿bizr chee na' nusán lazru' neda'?)

<sup>47</sup>Bal-la benne' zaj zre'e na' belenne' ca da gunná Jesús, na' gulenné':

—Benne' nigá dxenné' Elías, benne' bchálaje' waláz chee Dios.

<sup>48</sup>Dxácate na' guzá' chegu tu benne' ca', xeaxrí'e tu da dxezrupe nisa, na' ca bse-bise' na nen nupe zichaj, na' bzu'e' na lawe' tu xaga, ne bzrigue' na dxu'a Jesús chee xrupe' na. <sup>49</sup>Benne' xezica ca' gulenné':

—Le guxúe xca'. Quebe gunu' ca'. Nná'xquedxu che wida Elías guselé' Le'.

<sup>50</sup>Xecha lasa gudxezre xa'a Jesús, na' guti'e. <sup>51</sup>Lu zra ná'queze ladxe' da ze lu xudau' bdxuaj na chúpala, guzú lau na xíchaje, bedxúajte na dxe'ela. Guzrú' xezr la xu, na' xiaj xre ca' gulzruqueze na.

<sup>52</sup>Gulexalaj ba, na' belexebán benne' gate ca', benne' guléajle'e da naca chee Dios.

<sup>53</sup>Ca gudé bebán Jesús, na' benne' caní

belexedxúaje' lu xedxu ba, ne belexexú'e lu xezre lá'azxa Jerusalén, naga benne' zan belelé'ene' benne' ca'.

<sup>54</sup>Nadxa benne' dxenná be'e lu wedil-la, ne benne' dxjaque' wedil-la, benne' ca' dxuluzuzre' Jesús, gate belelé'ene' guzrú', ne xezícadxa da ca'an gulaca, na' belezre-bele'e, dxeleñné':

—Da lítegage benne' nigá guque' Zri'ine Dios.

<sup>55</sup>Nu'ula zan zaj zre'e na' dxeleñné'e zítu'la, nu'ula ca' xjácalene' Jesús gate bezé'e ga nababa Galilea, ne gulácaléqueze' Le'. <sup>56</sup>Ládujla nu'ula ca' xu'u María Magdalena, ne María xrna Jacobo ne José, ne xrna zri'ine Zebedeo ca'.

*Dxulucache' Jesús lu xedxu ba*

(Mr. 15.42-47; Lc. 23.50-56; Jn. 19.38-42)

<sup>57</sup>Ca guzú lau dxaca waxrinne, na' bla' tu benne' gunní'a le' José, benne' xezre Arimatea, benne' dxéajlequeze' chee Jesús.

<sup>58</sup>Benne' nigá guxíaje' xeaxchálajlene' Pilato, na' benabe' bel-la' dxen chee Jesús. Pilato gunná bé'ene' xulunézruje' le' bel-la' dxen na'. <sup>59</sup>Nadxa José beque'e bel-la' dxen na', na' bchele' na tu ladxe' da naxadxe. <sup>60</sup>Nadxa gulu'e Le' lu ba da naca na cheéqueze José na', da bene' tu lu xiaj. Gulexrúe' tu xiaj blaga zren dxu'a ba chee Jesús, na' bezé'e ga na'. <sup>61</sup>Gulezrá' María Magdalena, ne xetú María, zaj dxe'e le nna' dxu'a ba na'.

*Dxulubia dxuluxue' ba chee Jesús*

<sup>62</sup>Zeaj zra xula, da naca na zra ca gudé zra bulucueze', na' benne' xíchaje ca' chee bxruze ca', ne benne' xudau' fariseo ca' belezrine' lau Pilato. <sup>63</sup>Dxelé'e le':

—Xran, dxeajsá lázrentu' ca naca da gunná benne' wen lazre' na' gate na' zue'. Gunné' gate gaca chunna zra, na' xebane' ládujla benne' gate. <sup>64</sup>Chee le na', bdxixruj be'ene' benne' ca' xulubia xuluxue' ba chee' na' cadxa gaca chunna zra, chee quebe xelélé' benne' ca' bsédene' xedajlexebéaje' bel-la' dxen na' chizrela, na' te na' xuluzenne' bénneache ba bebane' ládujla benne' gate. Che ca'an gaca, na' dizra' wen lazre' bzebe nigá gun na da zrinnaaj zrendxa ca da nedxu.

<sup>65</sup>Pilato guzre' benne' ca':

—Na' zaj zra' benne' dxjaque' wedil-la xuluzuzre' na. Le chjaca le'e, ne le guxúe xanne' ba na' ca se lau séquele.

<sup>66</sup>Nadxa xjaque', xeajlexúe' ba na'. Bu-luchiche' tu da gunna bea na che xalaj ba na', na' bulucá'ane' benne' dxjaca wedil-la ga na'.

## 28

*Ca guca gate bebán Jesús*

(Mr. 16.1-8; Lc. 24.1-12; Jn. 20.1-10)

<sup>1</sup>Ca gudé chee zra dxulupá'ana judío ca', ca za dxani' zra nedxu, na' María Mag-dalena, ne xetú María na' xjaque' xeajlen-né'e ba chee Jesús. <sup>2</sup>Chadite guzrú'le'e na lawe' da betaj tu gubáz chee xabáa chee Xránadxu, na' bzrine' dxu'a ba na', ne bequ'e xíajta'a zren na' da zrua na dxu'a ba na', na' gudxé'e lawe na. <sup>3</sup>Gubáz na' dxácátite legale', ne naca chiche zra lane' ca bezxe'. <sup>4</sup>Gate belelé'e benne' dx-jaque' wedil-la gubáz chee xabáa na', na' belezrízene' xel-la' dxelezrebe, ne belex-egá'ane' ca benne' gate ca'. <sup>5</sup>Nadxa gunná gubáz chee xabáa na', dxe'e nu'ula ca':

—Quebe zrêbele. Ne zda' dxexíajle Jesús, bënnea' gudé'e xaga béguaj. <sup>6</sup>Quebe zue' nigá lawe' da ba bebane', cáteze na' gunné'. Le da nna'le lu ba naga gulegú'e Le'. <sup>7</sup>Le cheajxáquezega, le cheajezre benne' ca' bsédene' ba bebane' ládujla benne' gate, na' chéajje' ga nababa Galilea nédxudxa ca le'e. Na' lé'ele Le'. Da nigá naca na da nabaga'a xapa' le'e.

<sup>8</sup>Nadxa nu'ula ca' besia'que' dxu'a ba na', zeajxaca chégúe'. Dxelezrebe', ne dx-elebene'. Zjaque' zeajleguezre' benne' ca' bsede Jesús. <sup>9</sup>Dxácate na' Jesús bhague' nu'ula ca', ne bgape' le' diuzre. Belezrine' lau Jesús, dxelúe lá'ane' Le', ne bulunide' ni'a Jesús. <sup>10</sup>Le' guzre' nu'ula ca':

—Quebe zrêbele. Le chjaca, le cheajézre bi bícha'dau' ca' dxal-la' chjaque' naga nababa Galilea. Na' xelexelé'ene' neda'.

*Ca da gulenná benne' dxjaque' wedil-la*

<sup>11</sup>Dxácate zjaca nu'ula ca', na' benne' ca' dxjaca wedil-la gulu'e xezre, ne buluchála-jlene' benne' xíchaje ca' chee bxruze ca' ca da guca. <sup>12</sup>Benne' xíchaje ca' buluchála-jlene' benne' gula sina ca' chee xelune' tuze dizra'. Nadxa bulunézruje' benne' dxjaque' wedil-la dumí zrente. <sup>13</sup>Dxelenné':

—Le nna le'e belelá' benne' ca' bsede Jesús na' chizrela, dxácate dxásele le'e, na' belexexú'e bel-la' dxen chee'. <sup>14</sup>Che benne' dxenná be'e na' xenne' da nigá, netu'

guchálajlentu' le', ne gucá'ana cháwentu' chee quebe bi gaca cheele le'e.

<sup>15</sup>Nadxa benne' dxjaque' wedil-la gulez' lu ne'e dumí na', na' besia'que' belune' ca bache zaj nézene'. Da nigá naca na ca dxeleenná judío ca' zéajte lu zra na'a zra.

*Jesús dxelel-le' benne' gubáz chee' ca'*

(Mr. 16.14-18; Lc. 24.36-49; Jn. 20.19-23)

<sup>16</sup>Nadxa xjaca benne' chinéaj ca' bsede Jesús, na' belezrine' lu xi'a naga ba guzre Jesús le'. <sup>17</sup>Gate belelé'ene' Jesús, na' bulucá'ana szrene' Le'. Bal-le' gulaca chupa lazre'. <sup>18</sup>Nadxa Jesús gubigue' naga zaj zra' benne' ca', na' guzre' le':

—Neda' ba nazi' lu na'a ca naca xel-la' dxenná bea xabáa, ne lu xezr la xu nigá. <sup>19</sup>Chee le' na' le chjaca, le cheajchálajle benne' zaj zre'e du ca naca xezr la xu nigá, ne le cheajsdene' ca naca da bsédeda' le'e. Le guchúe' le' nisa lu La Xra', ne lu La Zrí'ine', ne lu La Be' Lá'azxa. <sup>20</sup>Le gúsede-ne' xelaque' wezúa dizra' ca naca da ba gunná be'eda' le'e, na' neda' tu súalezzeza' le'e xúgute zra cadxa cheajse chee xezr la xu nigá. ¡Ca'an gaca na!

## DIZRA' CHAWÉ' CA NACA CHEÉ JESUCRISTO DA BZUAJ SAN MARCOS

*Da bchalaj Juan, benne' bchue' bénneache nisa*

(Mt. 3.1-12; Lc. 3.1-9, 15-17; Jn. 1.19-28)

<sup>1</sup>Caní guzú lau dizra' chawé' ca naca chee Jesucristo, Zri'ine Dios.

<sup>2</sup>Bzrin lazre' da bzuaj Isafás, benne' bchálaje' waláz chee Dios, ca da gunná Dios: jLe nna'xque nigá!

Neda' dxesel-la' benne' gubáz chia', benne' cuía lawé' lau Lue'.

Bénnea' gupé'e neza naga teu' chee ilúnbe'e bénneache Lue'.

<sup>3</sup>Welénqueze chi'i benne' dxebezre xe'e le'e xixre' lawe' lataj.

Dxenné': "Le gupá'a neza naga te Xránadxu lu xichaj lázrdaule.

Le xebéaj li neza lase chee' ca'."

<sup>4</sup>Caní guca lawe' da bla' Juan le'e xixre' lawe' lataj, na' bchálaje' dizra' chee Dios, ne gunné' dxal-la' xeledxúa bénneache nisa, na' bchue' le' nisa, benne' ca' belexebi' lazre' chee gu-nite lau Dios dul-la da zaj nabague'.

<sup>5</sup>Ca'an guca, guledxúaj bénneache zan lu xezre Jerusalén, ne xúgute xezre ca' zaj nababa Judea, na' xjaque' naga zua Juan, na' Juan nigá bchue' benne' ca' nisa lu xegu Jordán, benne' ca' gulexrúalepe' dul-la da zaj nabague'.

<sup>6</sup>Caní guca zra lana Juan. Gucue' zra lané' ladxe' xicha zra camello, bia dxelebía bénneache, ne tu xpádxue' xide bchela le'e. Dxawé' biche xuaj, ne dxé'aje' bzrína'dau' chee bézudau'. <sup>7</sup>Ca dxuchálaje' dizra' chee Dios, dxenné':

—Gate te chia' neda', na' xida xetú benne', bénnea' nápadxe' xel-la dxenná bea ca neda'. Quebe naca chia' xáchua' chee lechja' zrele'. <sup>8</sup>Da lítega, neda' bchua' le'e nisa. Le' gune' da zéaje xel-la dxedxúa nisa nigá, guzúe' Be' Lá'azxa lu xichaj lázrdaule.

*Ca da guca gate gudxúa Jesús nisa*

(Mt. 3.13-17; Lc. 3.21-22)

<sup>9</sup>Ca da guca lu zra ca', guzú' Jesús lu xezre Nazaret chee ga nababa Galilea, na' bzrine' lau Juan. Juan nigá bchue' Jesús nisa lu

xegu Jordán. <sup>10</sup>Gate bdxuaj Jesús lu nisa, la blé'etene' naxalaj xabáa, ne blé'ene' betaj Be' Lá'azxa. Dxulé'e lawé' ca tu bgúgudu chiche, na' bzrine' ca li xichaj Jesús. <sup>11</sup>Ben tu chi'i da za xabáa, da dxenná na:

—Lue' nacu' Zri'ina'. Nazri'ida' Lue', ne dxezaca ba lázrele'da' Lue'.

*Dxaca lazre' Satanás da xriwe' gun ga бага Jesús dul-la*

(Mt. 4.1-11; Lc. 4.1-13)

<sup>12</sup>Nadxa Be' Lá'azxa guché'e Jesús le'e xixre' lawe' lataj. <sup>13</sup>Guzúa Jesús le'e xixre' lawe' lataj chua zra chua xela. Na' bzrin Satanás da xriwe', ne guca lazre' na gun na бага Jesús dul-la. Guzúa Jesús naga zaj zra' be xixre' be snia, na' gubáz chee xabáa chee Dios gulácalene' Jesús.

*Jesús dxezú lawé' dxusédené' bénneache*

(Mt. 4.12-17; Lc. 4.14-15)

<sup>14</sup>Ca gudé guxú'u Juan lizre xia, na' bzrin Jesús lu xezre ca' zaj nababa Galilea, ne dxuchálajlene' bénneache dizra' chawé' ca dxenná bea Dios. <sup>15</sup>Gunná Jesús:

—Ba bzrin zra. Ba zua báguze gate nna bea Dios xezr la xu nigá. Chee le na', le xebi' lazre', ne le cheajlí lazre' dizra' chawé' nigá.

*Dxenné Jesús tapa benne' wezén bela chee xelaque Le' tuze*

(Mt. 4.18-22; Lc. 5.1-11)

<sup>16</sup>Gate gudá Jesús dxu'a nísadau' chee Galilea, na' blé'ene' Simón, ne Andrés, biche Simón na'. Benne' caní dxuluzale' xixruj bela chee' lu nísadau' lawe' da zaj naque' wezén bela. <sup>17</sup>Na' gunná Jesús:

—Le gun neda' tuze, na' guzúa' le'e gácale wen zrin chia'. Cheajxrile bénneache ca dxunle dxezenle bela.

<sup>18</sup>La bulucá'anate' xixruj chee' ca', na' zjácálene' Jesús.

<sup>19</sup>Nadxa gudé Jesús xelate' ca na'la, na' blé'ene' Jacobo, ne Juan, benne' ca' zaj naque' zri'ine Zebedeo. Zaj zre'e lu da dxedá lawe' nísadau', dxelexexune' xixruj bela chee' ca'. <sup>20</sup>Ca gunné' Jesús Jacobo, ne Juan, na' la bulucá'anate' xre' Zebedeo ne wen zrin chie' ca' zaj zre'e lu da dxedá lawe' nísadau', na' zjácálene' Jesús.

*Tu benne' xu'e be' xriwe'*

(Lc. 4.31-37)

<sup>21</sup>Gate gul-la na gulu'e lu xezre Capernaum, na' gate bzrin zra dxulupána

benne' judío ca', guxú'u Jesús lu xu'u naga dxelúe lá'ana judío ca' Dios, ne bsédene' benne' ca' zaj zře'e na'. <sup>22</sup> Belexebánene' ca naca da dxuséde Jesús le' lawe' da dxuchálaje' nen duté xel-la dxenná bea, ne quegá ca dxuluchalaj benne' ca' dxuluxuzájle'e da nadxixruj bea Dios. <sup>23</sup> Nadxa bla' tu benne' xu'e be' xriwe' lu xu'u na', na' gudxezre xa'a na lu dxu'a bénnea'. <sup>24</sup> Gunná na:

—¿Bizra ná pantu' chiu', Jesús, benne' Nazaret? ¿Za'u guzríá xí'u netu'? Ba nézquezda' nu nacu'. Benne' Lá'axza chee Dios nacu'.

<sup>25</sup> Jesús gudil-le' na, gunné':

—Zrize guzúa. Bedxúaj lu beł-la' dxen chee benne' nigá.

<sup>26</sup> Nadxa be' xriwe' na' bxrízle'e na bénnea', ne gudxezre xá'alé'e na, na' bedxúaj na. <sup>27</sup> Belexebánele'e xúgute benne' zaj zře'e na', dxelé ljwezre':

—¿Bizra dizra' cube da nigá? Duté xel-la dxenná bea chee' dxenná be'ene' be' xriwe' ca', na' dxuluzúa na dizra' chee'.

<sup>28</sup> La bzirłujtę dizra' chee xel-la waca chee Jesús du ca naca xęzre ca' zaj nababa Galilea.

*Jesús dxexung' xrna' zru'ula Pedro*  
(Mt. 8.14-15; Lc. 4.38-39)

<sup>29</sup> Ca belexedxúaje' lu xu'u na' chee judío ca', na' belezrine' lizre Simón, ne Andrés. Jacobo ne Juan dxelune' Jesús tu zren. <sup>30</sup> Lu xu'u na' de xrna' zru'ula Simón, xu'e da la. La buluchálajlete' Jesús ca dxaca chee nu'ula nigá. <sup>31</sup> Le' la bęxrutę' ne'e, bechise' le'. La bedxúajtę da la da xu'e, na' bseni'e da gulawe'.

*Jesús dxexung' bėnneache zan*  
(Mt. 8.16-17; Lc. 4.40-41)

<sup>32</sup> Ca gula guzré zra na', ca guzríá gubizra, na' guleché'e xúgute benne' we' lau Jesús, ne benne' ca' zaj xu'e be' xriwe'. <sup>33</sup> Ca naca benne' xęzre gulebigue' dxa xu'u naga zua Jesús. <sup>34</sup> Jesús bexune' zánete benne' we' ca zaj naca xízrawe' da xu'u tu tuęe, ne bebéaje' zane' be' xriwe' zaj xu'u bėnneache ca'. Quebe be'e lataj be' xriwe' ca' xelenné na lawe' da zaj núnbea na Le'.

*Dxuchalaj Jesús lau bėnneache zaj zře'e Galilea*

(Lc. 4.42-44)

<sup>35</sup> Ca bebán Jesús bál-lala, ne nachúl-late, bedxúaje' guzė'e zéaje' tu lataj naga

nadache' bėnneache, na' bchálajlene' Dios. <sup>36</sup> Simón Pedro, ne benne' ca' zaj zrálene' le' belexexílaje' Jesús. <sup>37</sup> Ca xeajlexraque' Jesús, na' gulé'e Le':

—Xúgute bėnneache dxelexíłaje' Lue'.

<sup>38</sup> Na' gunná Jesús:

—Chéajdxu xęzre walizre ca' chee guchálajlena' benne' ca' xrtizra Dios. Chee le' na' belja'.

<sup>39</sup> Lu xu'u ca' naga dxelúe lá'ana judío ca' Dios, da ca' zaj zua tu tu xęzre ca' chee ga nababa Galilea, bchalaj Jesús dizra' chee Dios, ne bebéaje' xízrawe' xriwe' ca' da zaj xu'u benne' we' ca'.

*Jesús dxexung' tu benne' dxé'ene' xízrawe' guzru'*

(Mt. 8.1-4; Lc. 5.12-16)

<sup>40</sup> Nadxa bzin lau Jesús tu benne' dxé'ene' xízrawe' guzru', na' bzu zribe', ne guta' xuene' Le', dxenné':

—Che Lue' dxaca lazru', waca xexunu' neda'.

<sup>41</sup> Jesús bexache lazre' le', na' bli ne'e, gudane' le'. Dxenné':

—Dxaca lazra'. Na'a dxexacu'.

<sup>42</sup> Ca gunné' caní, la becuásate xízrawe' na', na' begá'ane' chawe'. <sup>43</sup> Nadxa Jesús bsízrene' le', na' besel-le' le'. <sup>44</sup> Caní gunné':

—Quebe nu xu'u ca da guca chiu'. Guxíaj lau bxruze xeajlé'e cuinu', ne bnezruj ca naca da gunná be'e Moisés xelún benne' ca' xellexaque'. Caní gunu' chee xelélé'ene' ba bexacu' na'a.

<sup>45</sup> Nadxa benne' nigá, ca bezé'e, guzú lawe' dxuchálajlene' tu tu benne' ca guca chee' bexaque'. Ca'an guca, québedxa guca chu'u Jesús zaca bal-la lau lu xęzre. Begá'ane' le'e xixre' lawe' lataj. Bėnneache chee xúgute xęzre ca' belezrine' lau Jesús naga zue'.

## 2

*Jesús dxexung' tu benne' quebe gaca se'e*  
(Mt. 9.1-8; Lc. 5.17-26)

<sup>1</sup> Ca gudé chupa chunna zra, na' guxú'u Jesús xecha lasa lu xęzre Capernaum. Belėnne bėnneache zua Jesús tu lu xu'u. <sup>2</sup> La belezrágate benne' zante naga zua Jesús. Ca'an guca, québedxa guque lu xu'u, ne dxa xu'u. Bchalaj Jesús xrtizra Dios. <sup>3</sup> Na' belezrín tapa benne' lu xu'u naga zua Jesús, zaj nu'e tu benne' quebe gaca se'e. <sup>4</sup> Lawe' da quebe gulezėquene' xelezrine' lau Jesús,

lawe' da zaj zra' bèneache zante ga na', na' gulesáluje' chju'u chee xu'u naga zua Jesús. Na' bululétaje' da'a da zrua benne' na' quebe gaca se'e. <sup>5</sup>Lawe' da dxeque be'e Jesús ca dxelejílí lazre' benne' ca' Lē', na' gunné', dxē'e bēnnea' quebe gaca se'e:

—Zrí'ina'dau', ba nanite lau dul-la da nabagu'.

<sup>6</sup>Zaj dxē'e bal-la benne' ga na', benne' dxuluxuzájle'e da nadxiruj bea Dios, na' gulenné lanze': <sup>7</sup>—¿Bizr chee na' dxuchalaj caní benne' nigá? Dxcu'ána díraje' Xránadxu Dios. ¿Núzraqueze gaca gunite lau dul-la da zaj nabaga bēnneache? Tuze Dios na'. <sup>8</sup>Dxeque be'e Jesús lu lárzdawe' ca dxelenné lane' chee', na' gunné':

—¿Bizr chee na' dxéquele caní? <sup>9</sup>¿Bizra dizra' quebe naca na stébela xapa' benne' nigá quebe gaca se'e? ¿Naca na stēbe xapa' lē', ba nanite lau dul-la nabagu'? Cabí. ¿U che stēbe xapa' lē', bexasa, becá'a da denu', ne bexíaj? <sup>10</sup>Na'a, chee nézele le'e neda', Benne' Gulje' Bēnneache, napa' xel-la dxenná bea lu xēzr la xu gunite lawa' dul-la da zaj nabaga bēnneache.

Na' gunná Jesús, dxē'e bēnnea'.

<sup>11</sup>—Lue' dxapa', bexasa, becá'a da'a chiu', ne bexíaj lizru'.

<sup>12</sup>Ca'an guca, la bexásate', na' bequé'e da'a chee', ne bedxúaje' lau xúgute' bēnneache. Ca'an guca, xúgute' benne' ca' belexebánene', na' belúe lá'angē' Xránadxu Dios. Dxelenné':

—Cabata' ne lé'edxu gaca na ca guca da nigá.

*Dxenné Jesús benne' lē' Leví*

*(Mt. 9.9-13; Lc. 5.27-32)*

<sup>13</sup>Ca gudé na' bedxúaj Jesús zéaje' dxu'a nísadau', na' xúgute' bēnneache lu xēzre ca' belezrine' lau Lē'. Nadxa bsédene' benne' ca' xrtizra Dios. <sup>14</sup>Ca gudé Jesús na', ble'ene' Leví, zri'ine Alfeo, dxē'e lataj chee wechizruj. Na' gunná Jesús, dxē'e lē':

—Ben neda' tuze.

La guxásate' Leví, guxíajlene' Jesús.

<sup>15</sup>Ca' guca, gate gudxé' Jesús dxawe' lizre Leví, na' zánete' benne' wechizruj, ne benne' dul-la ca' gulebé'e dxelágulene' tu zren nen Jesús, ne benne' ca' dxusédene'. Cení naca lawe' da zjácale' benne' zante Jesús. <sup>16</sup>Nadxa benne' ca' dxuluxuzájle'e da nadxiruj bea Dios, ne benne' fariseo ca', gate belelé'ene' ca da dxun Jesús,

dxágulene' benne' wechizruj ca', ne benne' dul-la ca', na' gulenné', dxelé'e benne' ca' dxusede Jesús:

—¿Bizra da nigá? Dxagu dxé'ajlene' benne' wechizruj ca', ne benne' dul-la ca'.

<sup>17</sup>Ca ben Jesús da nigá, gunné':

—Benne' chawe' ca' quebe dx-elechínene' benne' dxexún bēnneache. Benne' wē' ca' dxelechínene' bēnnea'. Quegá bla'a dxennéa' benne' xrlátaje ca'. Benne' dul-la ca' dxennéa'.

*Ca dxal-la' xelún bēnneache gate dxelune' gubasa*

*(Mt. 9.14-17; Lc. 5.33-39)*

<sup>18</sup>Ca guca lu zra na', belún gubasa benne' ca' dxusede Juan, ne benne' ca' dxulusede benne' fariseo ca'. Na' belezrín benne' ca', bedajleguezre' Jesús:

—¿Bizr chee na' dxelún gubasa benne' ca' dxusede Juan, ne benne' ca' dxulusede benne' fariseo ca', na' benne' ca' dxusedenu' Lue' quebe dxelune' gubasa? ¿Bizr chee na'?

<sup>19</sup>Na' Jesús guzre' benne' ca':

—¿Waca xelún gubasa benne' zaj zre'e laní chee wechaga na' dxácatē na' zua benne' wechaga na' nen le'? Dxácatē na' zua wechaga na' nen le' quebe gaca xelune' gubasa. <sup>20</sup>Wazrín tu zra gate dua benne' wechaga na'. Lu zra na' xelune' gubasa.

<sup>21</sup>Quegá nu benne' xudé'e tu ladxe' cube lē'e zradxu gula. Che ca'an gune', ladxe' cube da xudé'e wazrube xu na da gula, na' wachézadxa na. <sup>22</sup>Cá'anqueze, quegá nu benne' que'e xrise uva wal-la cube lu bzude xide gula. Che ca'an gune', na' xrise uva wal-la cube na' wacheza na bzude xide gula, na' walalaj xrise uva wal-la, ne cuía xi bzude xide na'. Xrise uva wal-la cube lu bzude xide cube dxal-la' chuzruj na.

*Benne' ca' dxusede Jesús dxelíchaje' dau chee zrua' xtila zra dxulupá'ana judío ca'*

*(Mt. 12.1-8; Lc. 6.1-5)*

<sup>23</sup>Gate gudé Jesús naga zē zrua' xtila zra dxulupá'ana benne' judío ca', ná'atē na' benne' ca' dxusede Jesús, ca zaj xu'e neza, gulezú lawē' dxelíchaje' dau naga zria zrua' xtila. <sup>24</sup>Nadxa benne' fariseo ca' gulé'e Jesús:

—Gunná'xque. ¿Bizr chee na' dxelune' zrin da quebe dxal-la' xelune' zra dx-upá'anadxu?

<sup>25</sup>Jesús guzre' benne' ca':

—¿Cabata! ne gulábale ca da ben David gate guduné', ne bxáwrjene' da gagu le', ne da gugawe' benne' ca' zaj zrálene' le'?<sup>26</sup> Guxú'e lu xu'u chee Dios gate naca Abiatar bxruze blau, na' David gudawe' xeta xtila da dxelu'e lau Dios, da quebe dxal-la' gagu benne' xula, san tuze bxruze ca' zaj naca chee' xelawe' na. Na' bnéwrjite David da galagu benne' ca' zrálene' le' chee xeta xtila na'.

<sup>27</sup> Cá'anqueze gunná Jesús, dxé'e benne' ca':

—Dios gudíxruje' zra dxupá'anadxu chee gaca ba neza chee bénneache, quegá bene' bénneache chee xeluné' zrin chee zra dxupá'anadxu. <sup>28</sup> Chee le' na', neda', Benne' Gulje' Bénneache, naca' xrane zra dxupá'anadxu.

### 3

*Ca guca chee tu benne' nazrinnaj ne'e*

(Mt. 12.9-14; Lc. 6.6-11)

<sup>1</sup> Gate guxú'u Jesús da xula lu xu'u naga dxelúe lá'ana judío ca' Dios, ze tu benne' biu nazrinnaj ne'e ga na'. <sup>2</sup> Judío ca' buluzuzre' Jesús che xexuné' benne' we' nigá lu zra dxulupá'ane', chee xelexéquene' xelagu zria Jesús. <sup>3</sup> Nadxa gunná Jesús, dxé'e benne' biu na' nazrinnaj ne'e:

—Guxasa. Guzé laduj benne' caní.

<sup>4</sup> Nadxa gunaba Jesús lau judío ca', dxé'e le':

—¿Naca chee zra dxupá'anadxu gundxu da xrlátaje, u che gundxu da calela? ¿Waca gupá'adxu xel-la nabán chee nu benne', u che guzría xidxu xel-la nabán chee'?

Na' gulezúa zrize judío ca'. <sup>5</sup> Nadxa Jesús gunná zi'e benne' ca'. Bewí'inene' ca naca xel-la lázrdau zide' chee'. Nadxa guzre' benne' nazrinnaj ne'e:

—Guchiluj na'u.

Guchiluj ne'e, na' bexaca na. <sup>6</sup> Ca'an guca, belexedxúaj benne' fariseo ca', na' beluné' xel-la wezría nen benne' ca' zaj de'e Herodes ájala xelútie' Jesús.

*Bénneache zan dxelezrague' dxu'a nísadau'*

<sup>7</sup> Nadxa gucuasa Jesús laduj benne' ca', na' guxíaje' dxu'a nísadau' nen benne' ca' dxusédene'. Zjácale benne' zan ca' Jesús, benne' chee xezre ca' zaj nababa Galilea. <sup>8</sup> Gate belén bénneache ca naca da zren ca' da dxun Jesús, belezrín benne' zan

lau Le', benne' chee xezre ca' zaj nababa Judea, ne benne' xezre Jerusalén, ne benne' chee xezre ca' zaj nababa Idumea, ne benne' gusá'aque' xechalá'a xegu Jordán, ne benne' gusá'aque' xezre ca' zaj naxečaj na xezre Tiro, ne xezre Sidón. <sup>9</sup> Chee le' na' gunná be'e Jesús benne' ca' dxusédene' xulucueze' tu da dxedá lawe' nísadau' checa xuluchide' bénneache zan Le'. <sup>10</sup> Caní guca lawe' da bexún Jesús benne' zante, na' benne' we' ca' gulebigue' lau le' chee cheajleté' Le'. <sup>11</sup> Gate be' xriwe' ca' zaj xu'u bénneache belelé'e na Jesús, na' buluzú zribe na lau Le', ne gulebezre xa'a na. Dxeleenná na:

—Lue' nacu' Zri'ine Dios.

<sup>12</sup> Jesús gudil-le' be' xriwe' ca' chee quebe xululé'e na da naca Le'.

*Jesús dxenné' chazrinnu gubáz chee'*

(Mt. 10.1-4; Lc. 6.12-16)

<sup>13</sup> Ca gudé na' guluén Jesús tu lu xi'a, na' gunné' benne' ca' guca lazre'. Na' gulebigue' lau Le'. <sup>14</sup> Bchague' chazrinnu benne' xeluné' Le' tuze, benne' sel-le' cheajlechálaje' xrtizra Dios. <sup>15</sup> Bzue' lu na' benne' caní xel-la dxenná bea chee xelexexuné' benne' we' ca', ne chee xelexebéaje' be' xriwe' ca' lu bel-la' dxen chee bénneache ca'. <sup>16</sup> Benne' chazrinnu caní zaj le': Simón, bénnea' bzua Jesús xetú le' Pedro, <sup>17</sup> ne Jacobo ne Juan, biche Jacobo, benne' ca' zaj naque' zri'ine Zebedeo. (Benne' chupa caní bzua Jesús le' Boanerges, da zéaje na benne' wal-la ca guziu'.)

<sup>18</sup> Bchague' Andrés ne Felipe, ne Bartolomé, ne Mateo, ne Tomás, ne Jacobo zri'ine Alfeo, ne Tadeo, ne Simón, benne' dxue lázrele'e chee lazrie',

<sup>19</sup> ne Judas Iscariote, bénnea' xudé'e Jesús lu na' benne' ca' dxeledábague' Le'.

*Nu benne' dxenné' schanni' chee Be' Lá'azza*

(Mt. 12.22-32; Lc. 11.14-23; 12.10)

Ca gudé na' bzin Jesús tu lu xu'u nen benne' ca' dxusédene'. <sup>20</sup> Xecha lasa gulebiga bénneache zan naga zua Jesús, na' québedxa dxaca lataj xelawe'. <sup>21</sup> Gate belene benne' xrtia Jesús ca da dxun Le', na' belezrine' chee xelexeché'e le'. Dxeleenné':

—Quebe zua xrlátaje xichaj lázrdawe'.



<sup>22</sup> Cá'anqueze benne' ca' dxuluxuzájle'e da nadxixruj bea Dios, benne' gusá'aque' Jerusalén, dxelenné':

—Benne' nigá zrague' Beelzebú, xrane be' xriwe' ca', na' ne chee xrane be' xriwe' ca' dxebéaje' be' xriwe' ca'.

<sup>23</sup> Nadxa gunné Jesús benne' ca', na' bchájlajlene' le' tu da dxulé'e na. Dxenné':

—¿Wazeque Satanás da xriwe' xebéaj cuine na? <sup>24</sup> Che benne' dxelenná bea xelexaque' chupa la'a, quebe díaqueze xel-la dxenná bea chee'. <sup>25</sup> Cá'anqueze che benne' zaj zre'e tu lu xu'u xelaque' chupa la'a, quebe xeledíaqueze benne' zaj zre'e lu xu'u na'. <sup>26</sup> Cá'anqueze, che Satanás tábaga cuínaqueze na, ne xexaca na chupa la'a, quebe díaqueze na. Wadéqueze chee na.

<sup>27</sup> Quebe nu seque chu'u lizre benne' wal-la chee cuane' da de chee' che quebe guchéaje' le' nédxuda. Nadxa seque' cuane' da de lizre benne' wal-la na'.

<sup>28</sup> Da li dxennía', dxapa' le'e: Xúgutē dul-la da dxelún bēneache, ne dizra' schanni' da dxelenné', ájateze zaj naca na, gunitē láuqueze Dios chee'. <sup>29</sup> Na'a, ca naca núteteze benne' nne' schanni' chee Be' Lá'azxa, cabata' gunitē lau Dios chee bēne-ne'. Webía xí'queze'.

<sup>30</sup> Caní gunná Jesús lawe' da dxelenné':

—Zraga Jesús da xriwe'.

*Nu naca ca xrna Jesús, ne bi biche' ca' (Mt. 12.46-50; Lc. 8.19-21)*

<sup>31</sup> Ca gudé na' bzzin xrna Jesús nen bi biche' ca'. Gulebeze' chalé'ajla, na' gulesel-le' tu benne' nne' Jesús. <sup>32</sup> Benne' ca' zaj zre'e cuita Jesús gulé'e le':

—Xrna'u ne bi bichu' ca' zaj ze' chalé'ajla, dxelenné' Lue'.

<sup>33</sup> Gunná Jesús, dxé'e benne' ca':

—¿Nézele nuzra na' xrna'a, ne bi bicha' ca'?

<sup>34</sup> Nadxa gunná' Jesús benne' ca' zaj zre'e cuita Le', na' gunné':

—Benne' caní zaj zrálene' neda' nigá zaj naque' ca' xrnáqueza', ne bi bicha' ca'. <sup>35</sup> Caní naca na lawe' da xúgutē benne' dx-elune' ca da dxaca lazre' Dios, benne' caní zaj naque' bi bicha' ca', ne bi zana' ca', ne xrna'a.

#### 4

*Da dxulé'e na ca naca chee benne' dxaza dxa'ana (Mt. 13.1-23; Lc. 8.4-15)*

<sup>1</sup> Xetú lasa guzú lau Jesús dxusédene' benne' ca' dxu'a nísadau', na' belezraga bēneache zantē naga zue'. Naxánle'e benne', na' ben na ba xen guxú'u Jesús tu lu da dxedá lawe' nísadau' da dxe na', na' gudxé'e lu'u'le da dxedá lawe' nísadau', na' bēneache zan ca' gulezré'e dxu'a nísadau'.

<sup>2</sup> Nadxa bchalaj Jesús da dxululé'e na, na' bsédene' benne' ca' da zantē. Ca dxusédene' benne' ca', na' bchálaje' caní:

<sup>3</sup> —Le xene da nigá. Tu benne' dxaza dxa'ana zéaje' guza. <sup>4</sup> Ca zéaje' dxaze', na' xeajlechaze bal-la binnedu ca' dxu'a neza. Na' belezrín bxinne, ne guláguba' binnedu caní. <sup>5</sup> Xezicadxa binnedu ca' xeajlechaze na lu xiaj naga quebe déteca xu. Binnedu caní belezría na lawe' da quebe déteca xu. <sup>6</sup> Ca bdxuaj gubizra, na' bzezze na le na, na' lawe' da quebe zaj nun lue na lu da situj, gulebizre na. <sup>7</sup> Xezicadxa binnedu ca' xeajlechaze na naga dxelezría xixre' xeche'. Xixre' xeche' caní gulegúladxa na ca le na, na' bululule na le na, na' quebe gulebía na da gágudxu. <sup>8</sup> Xezicadxa binnedu ca' xeajlechaze na lu xu bebe. Belezría na cháwedau', na' belegula na, ne gulezríale'e na da gágudxu. Bal-la na gulebía na chi dxua tu tu na. Xebal-la na gulebía na ga xun tu tu na. Xebal-la na gulebía na tu gaxúa tu tu na.

<sup>9</sup> Gunnadxa Jesús, dxé'e benne' ca':

—Che nu benne' zua nague', dxal-la' xenne' da nigá.

<sup>10</sup> Ca gudé na', ca gucuasa Jesús cuita benne' zan ca', na' gulenaba benne' ca' zrálene' benne' ca' dxuséde Jesús bi zéaje ca naca da dxulé'e nigá. <sup>11</sup> Na' gunná Jesús, dxé'e benne' ca':

—Dios dxunne' le'e lataj nézele ca naca chee da nagache chee da dxenná bea Le'. Na'a, ca naca chee benne' ca' zaj zre'e cúzrela, dxuchálajlene' le' dízra'ze da dxululé'e na. <sup>12</sup> Caní dxuna' lawe' da dxelenné'e, na' quebe dxelaca lazre' xelelé'ene'. Dxelenné', na' quebe dxelaca lazre' xeléajni'ine', chee quebe xelexebí'i lazre', na' chu'u xel-la wenite lau chee dul-la da za nabague'.

<sup>13</sup> Na' gunnadxa Jesús:

—¿Quebe dxéajni'ile ca naca da dxulé'e nigá? ¿Ájalaqueze chéajni'ile xezicadxa

dizra' ca' da dxulul'é na? <sup>14</sup> Benne' dx-  
 aza dxá'ane' naque' benne' dxuchálaje' xrtizra  
 Dios. <sup>15</sup> Bal-la bénneache zaj naque'  
 ca binnedu ca' xeajlechaze na dxu'a neza.  
 Dxeleenne' xrtizra Dios, na' ca dxedé na',  
 dxezrín Satanás, na' dxucuasa na dizra'  
 nigá da zua na xichaj lázrdau benne' ca'.  
<sup>16</sup> Benne' xula ca' zaj naque' ca binnedu  
 ca' xeajlechaze na lu xiaj. Ca dxeleenne'  
 xrtizra Dios, na' dxelebe'le'ene' dxelezi'e  
 na. <sup>17</sup> Tu chí'idauze dxelune' caní. Gate  
 dxeledé' xel-la zi', ne zua da dxedábaga  
 le' ne chee' xrtizra Dios, na' dxelexeuase'  
 lawe' da quebe guxaze xrtizra Dios lú'ulete  
 xichaj lázrdawe' ca guca chee' binnedu ca'  
 quebe belún lue na lu xu situj. <sup>18</sup> Benne' xula  
 ca' zaj naque' ca binnedu ca' xeajlechaze na  
 ládujla xixre' xeche' ca'. Dxeleenne' xrtizra  
 Dios. <sup>19</sup> Lawe' da dxelebe'dxe' gunne xue  
 da naca chee' xezr la xu nigá dxezi' xe  
 xel-la gunn'a le', na' dxelezá lazre' da zanté  
 da dxelelé'ene'. Xúgute' da caní dxelú'u na  
 xichaj lázrdau benne' caní, na' xuluxunite  
 na dizra' da guxú'u xichaj lázrdawe', na'  
 quebe gaca gun na ca da dxal-la' gun dizra'  
 nigá. <sup>20</sup> Zaj zra' benne' dxeleenne' xrtizra  
 Dios, ne dxelezi' lu ne'e na. Bal-le' zaj  
 naque' ca binnedu ca' gulebía na chi dxua  
 tu tu na. Benne' xula zaj naque' ca binnedu  
 ca' gulebía na ga xun tu tu na. Benne'  
 xula zaj naque' ca binnedu ca' gulebía na tu  
 gaxúa tu tu na.

*Xúgute' da nagache gul'é lawe na*  
 (Lc. 8.16-18)

<sup>21</sup> Cá'anqueze gunná Jesús, dxé'e benne'  
 ca':

—¿Gúadxu xi', ne guzúadxu na zran  
 xi'ina u che zran ga dxásedxu? Quebe  
 gundxu ca', san guzúadxu na sibe chee  
 gusení na. <sup>22</sup> Xúgute' da nagache gul'é lawe  
 na, na' xúgute' da xu'u xichaj lázrdaudxu  
 wénqueze na. <sup>23</sup> Che nu benne' zua nague',  
 dxal-la' xenne' da nigá.

<sup>24</sup> Cá'anqueze gunná Jesús:

—¡Le xene xanne' ca da dxénele! Ca  
 da dxudxíxrele, nen le na' gudxíxrequeze  
 Dios chee, na' gúnnadxe' le'e dxénele.  
<sup>25</sup> Caní gaca na, benne' nape' da naca chee  
 xrtizre'e, gunézrujdxé' chee', na' benne'  
 quebe bi nape', ca da dauze da nape'  
 xecá'ate' na.

*Da dxul'é na ca naca chee binne da dxeg-  
 ula na*

<sup>26</sup> Na' gunnáqueze Jesús:

—Da dxenná bea Dios naca na ca da  
 dxaca gate tu benne' dxaze' binnedu ca' lu  
 xu. <sup>27</sup> Dxásie' chizrela, dxase' te zra, na'  
 binnedu caní dxelezría na, ne dxelegula  
 na, ne quegá nézene' ájala. <sup>28</sup> Dxaca na  
 caní lawe' da nácaqueze ca da dxun xezr la  
 xu. Nedxu dxebía na xrlegue na, nadxa za  
 dau, na' bzébeté dxebía na binnedu ca' lu  
 dau. <sup>29</sup> Gate ba gulegula xíxredu caní, na'  
 dxechugue' na lawe' da ba bzrin zra xeque'e  
 na.

*Da dxul'é na ca naca chee binne mostaza*  
 (Mt. 13.31-32; Lc. 13.18-19)

<sup>30</sup> Cá'anqueze gunná Jesús:

—¿Ájala gutil-la lébedxu da dxenná bea  
 Dios, u che bila dizra' da dxul'é na cá'adxu  
 da gutil-la lébedxu le na? <sup>31</sup> Naca na ca tu  
 binne mostaza da dxázadxu lu xu. Binnedu  
 nigá nácadxa cuide' ca da zaj mmita lu xezr  
 la xu. <sup>32</sup> Gate ba gúzadxu na dxegula na, na'  
 dxaca na da zrendxa ca xixre' ca' da zaj naca  
 na ba dagu, na' dxebía zruze na zren, na'  
 dxácate' dxelebia bxinnedu ca' zran zrula  
 chee na.

*Ca bgune Jesús da dxul'é na caní*  
 (Mt. 13.34-35)

<sup>33</sup> Caní bseje Jesús benne' ca' xrtizra Dios,  
 na' bchálaje' zánete' da dxulul'é na caní,  
 cadite' guléajni'ine'. <sup>34</sup> Quebe bchálaje' da  
 xula. Tuze dizra' da dxul'é na bchálajlene'  
 benne' ca'. Bzájla'adxé' ca naca na benne'  
 ca' dxusédene'.

*Jesús dxebeche zrié' be' bdunu'*  
 (Mt. 8.23-27; Lc. 8.22-25)

<sup>35</sup> Lu zra ná'queze, ca gul-la chizrela, na'  
 gunná Jesús, dxé'e benne' ca' dxusédene':

—Chéajdxu xecha la'a nísadau'.

<sup>36</sup> Besá'aque' naga zaj zra' benne' zan  
 ca', na' guleché'e Jesús lu da dxedá lawe'  
 nísadau' naga ba dxé'queze', na' gulennita  
 xezícadxa da ca' dxeledá lawe' nísadau' ca'  
 naga zaj zra' benne', na' xjácálene' Le'.  
<sup>37</sup> Nadxa guzú lau dxaca tu be' bdunu' lu  
 nísadau' na', na' dxu'ute' nisa lu da dxedá  
 lawe' nísadau'. Caní guca guzú lau dxezrá  
 nisa lu da dxedá lawe' nísadau'. <sup>38</sup> Jesús  
 de' dxásie' lu xcúgüe' naga nácadxa sibe lu  
 da dxedá lawe' nísadau'. Na' bulusebane'  
 Jesús, dxelé'e Le':

—Benne' weséde, ¿quebe dxe'u gunne xue wátedxu nate ca na'a?

<sup>39</sup>Nadxa guxasa Jesús, na' bchálajlene' be' bđunu', ne nísadau'. Dxenngé':

—¿Gudxé zri'! ¿Zrize guzúa!

Gudxé zri' be' bđunu', na' nísadau' guzúa zri na. <sup>40</sup>Nadxa gunná Jesús, dxe'e benne' ca' dxusédene':

—¿Bizr chee na' dxezrébele'e le'e? ¿Quebe dxeajlí lázrele Dios?

<sup>41</sup>Belezrébele'edxe', ne dxelé ljwezre':

—¿Núzraqueze benne' nigá? Dxuluzúa dizra' be' bđunu', ne nísadau' chee'.

## 5

*Tu benne' xezre Gadara, benne' xu'e be' xriwe'*

(Mt. 8.28-34; Lc. 8.26-39)

<sup>1</sup>Bezrín Jesús, tu zren nen benne' ca' dxusédene' xecha la'a nísadau' lu xezr la xu chee benne' Gadara ca'. <sup>2</sup>Ca bedxúaj Jesús lu da dxedá lawe' nísadau', na' bzrin tu benne' xu'e be' xriwe' naga zua Jesús. Bedxúaje' lu bluaj naga zaj nagache benne' gate ca'. <sup>3</sup>Benne' biu nigá zúaqueze' lu bluaj na'. Quebe nu dxezúe guchéaj lebe' chalásaze, lácala nu guchéaj lebe' nen du xia. <sup>4</sup>Zane' lasa buluchéaje' lebe' nen du xia na'abe', ne ní'abe'. Bzizrujbe' du xia ca', na' quegá nu guzeque mna be'ene' lebe'. <sup>5</sup>Dxedáquezebe' te zra chizrela lu xi'a ca', ne lu bluaj ca' naga zaj nagache benne' gate. Dxebezre xa'abe', ne dxeajcházebe' lu xiaj ca', dxun we' cuínabe'. <sup>6</sup>Gate ble'ebe' zítu' la ba za Jesús, na' guzá chégube', xejazú zríbebe' lau Le'. <sup>7</sup>Gunné zizraj be' xriwe' xu'ube', dxe na Jesús:

—¿Bizra dxaca chiu' nen neda', Jesús, Zri'ine Dios szrenté? Lu La Xránadxu Dios, dxata' xueda' Lue', quebe gudéu' neda' xel-la zi'.

<sup>8</sup>Caní gunná na lawe' da gunná Jesús, dxe'e na:

—Lue', da xriwe', bedxúaj lu bel-la' dxen chee benne' nigá.

<sup>9</sup>Nadxa gunaba Jesús, dxe'e na:

—¿Bi leu'?

Na' bechebe na:

—Da Zan lea', lawe' da naxantu'.

<sup>10</sup>Guta' xue na Jesús chee quebe xesel-le' na, ne quebe gucuase' na zítu' lu xezr la xu na'. <sup>11</sup>Zaj zra' gagu lu xi'a na' tu cue'

cuche zaj zraba' dxeláguba'. <sup>12</sup>Gulata' xue be' xriwe' ca' Jesús, gulenná na:

—Besel-la netu' lu cuche ca'. Benna lataj chú'untu' leba'.

<sup>13</sup>Nadxa Jesús be'e na lataj. Na' be' xriwe' ca' beledxúaj na lu bénnea', na' gulú'u na cuche ca'. Zaj nácaba' ca galaj gaxúa cuche ca', na' buludxixre cuínaba' tu chejéa. Xea-jlechásteba' lu nísadau', ne gulátete'ba' lu nisa na'.

<sup>14</sup>Benne' ca' dxuluxúe' cuche ca' buluxu-zrúnnuje', na' xejalezenne' benne' zaj zre'e lu xezre, ne benne' zaj zre'e le'e xixre'. Na' belezrín benne' ca' naga zua Jesús, benne' ca' belezrín ca' da ba guca. <sup>15</sup>Gate belezrín benne' ca' naga zua Jesús, na' belelé'ene' bénnea' guxú'ube' be' xriwe' ca', dxe'ebe' ga zua Jesús, nácube' tu ladze', ne ba bezúa xrlátaje lu xichaj lázraube', na' gulezrebe'.

<sup>16</sup>Benne' ca' belelé'e ca naca da guca chee benne' guxú'ube' be' xriwe' ca', ne ca guca chee cuche ca' buluchálaje' chee da ba guca.

<sup>17</sup>Nadxa benne' xezre ca' gulata' xuene' Jesús xedxúaje' lu xezr la xu chee'.

<sup>18</sup>Ca bexú'u Jesús lu da dxedá lawe' nísadau', na' bénnea' guxú'ube' be' xriwe' ca' guta' xuebe' Jesús gu'e lataj chéajlebe' Le'. <sup>19</sup>Quebe be' Jesús lebe' lataj, san dxe'e lebe', gunné':

—Bexiaj lizru', ne xejáchálajle xrtiu' ca' ca naca da zren ca' da ben Xranu' nen lue', ne ca bexache lazre' lue'.

<sup>20</sup>Nadxa bezá'abe' zexíajbe', ne guzú laube' dxuchálajbe' lu xezre ca' zaj nababa Decápolis ca naca da zren da ben Jesús nen lebe'. Belexebánele'e xúguté benne' zaj zre'e xezre ca'.

*Bi nu'ula chee Jairo, ne nu'ula na' xejaté' zra lana Jesús*

(Mt. 9.18-26; Lc. 8.40-56)

<sup>21</sup>Begüén Jesús lu da dxedá lawe' nísadau', na' bezrine' xecha la'a nísadau'. Belezrín benne' zan naga ze', na' Le' begá'ane' dxu'a nísadau'. <sup>22</sup>Ca'an guca bzrin tu benne' xíchaj chee xu'u naga dxelúe lá'ana judío ca' Dios, benne' le' Jairo. Gate blé'ene' Jesús, na' bzu zribe' zran ni'e. <sup>23</sup>Guta' xuene' Jesús, dxe'e Le':

—¿Bi nu'ula chia' ba dxátebe'! ¿Gudá, bze na'u lebe' chee xexácabe', ne xaca banbe'!

<sup>24</sup>Nadxa guxíajle Jesús bénnea', na' bénneache zan xjácálene' Le', ne dxuluchíte' Le'. <sup>25</sup>Ládújla bénneache ca' za tu nu'ula

quebe chawe' zuę', ba zeaj chazrinnu iza nape' we' dxen. <sup>26</sup> Da zren da bulusaca benne' dxelexun bėnneache ca' nu'ula nigá, na' bache ben dítaje' xúgute' da nape'. Quegá bi gúcale na le', san bzálaxa we' cheę'. <sup>27</sup> Gate ben nú'ula' dxuluchalaj bėnneache ca naca cheę Jesús, na' bzrine' cúzrula Jesús ládujla bėnneache, na' xea-jtę' zra lana Jesús. <sup>28</sup> Caní bene' lawe' da gunné' lu xichaj lázrdawe': Cun cheajtaza' zra lana Jesús, na' xexácatea'. <sup>29</sup> La gulézatę xel-la we' chie', ne la guque bé'etęne' ba bexaca bel-la' dxen cheę' cheę xízrawe' na'. <sup>30</sup> Gúquebe'e Jesús ben zrin xel-la waca cheę'. Cheę le' na' bexéchaje', dxenné'e bėnneache ca', na' gunábene' le':

—¿Nuzra bedajtá zra lana'?

<sup>31</sup> Nadxa benne' ca' dxusęde Jesús gulé'e Le':

—Dxelé'equeznu' bėnneache zan dxuluchie' Lue'. ¿Bizr cheę na' dxenabu' "Nuzra bedajtá neda'?"

<sup>32</sup> Jesús guzúe' dxenné'e cuite' cheę lé'ene' nua' bedajtá Le'.

<sup>33</sup> Nadxa guxíaj nu'ula nigá, dxezrízie' dxezrebe' lawe' da nézene' ca da ba guca cheę', na' bzu zribe' lau Jesús, na' gunné' ca naca da li. <sup>34</sup> Nadxa gunná Jesús, dxę'e nu'ula':

—Bi nú'uladau', ba bexacu' lawe' da gux-eajlí lazru' neda'. Bexíaj, cútudxa zrebu'. Ba bexácatequezu' cheę xízrawe' da guzx-acu'.

<sup>35</sup> Ne dxuchálajte Jesús gate belezrín benne' gusá'aca lizre benne' xíchaje cheę xu'u naga dxelúe lá'ana judío ca' Dios, na' gulé'e xra nú'uladau' na':

—Bi nú'uladau' chiu' ba gútebe'. ¿Bizr cheę na' dxunu' zędedxa benne' dxusęde nigá?

<sup>36</sup> Gate Jesús benne' ca da gulenná benne' caní, dxę'e benne' xíchaje cheę xu'u na', gunné':

—Quebe zrebu'. Guxeajlí lazre' neda'.

<sup>37</sup> Quebe be'e lataj chjácale bėnneache zan ca' Le'. Tuze be'e lataj gusá'acale Pedro, ne Jacobo, ne Juan, biche Jacobo nigá, nen Le'. <sup>38</sup> Ca belezrine' lizre benne' xíchaje na', na' ble'e Jesús bėnneache dxelún schaga. Dxelebezre benne', ne dxelebezre xa'ate'. <sup>39</sup> Nadxa guxú'u Jesús lu xu'u, na' dxę'e benne' ca', gunné':

—¿Bizr cheę na' dxunle schaga? ¿Bizr cheę na' dxebézele? Quegá nate bidau' nu'ula. Dxásezebe'.

<sup>40</sup> Belún lala benne' ca' cheę'. Nadxa Jesús bebéaje' xúgute' benne' ca', na' guché'e xrabe', ne xrna bidau' nigá, ne benne' ca' zjácále' Le', na' guxú'e naga de nú'uladu na'. <sup>41</sup> Bęxrue' na'be', ne guzre' lebe':

—Bi nú'uladau', lue' dxapa': jGuxasa!

<sup>42</sup> La bexásate' nú'uladu na', na' guzátebe' lawe' da ba zéajbe' chazrinnu iza. Na' benne' ca' zaj zre'e lu xu'u na' belezre-bele'e. <sup>43</sup> Jesús gunná bé'ene' benne' ca' cheę quebe nu xelé'e ca da bene'. Nadxa guzre' benne' ca' xulugawe' nú'uladu na'.

## 6

*Dxezrín Jesús lazrie' da nacan xezre Nazaret*

(Mt. 13.53-58; Lc. 4.16-30)

<sup>1</sup> Jesús bezé'e naga zuę', ne bezrine' lazrie', na' benne' ca' dxusędene' xjácále' Le'. <sup>2</sup> Ca gula zra dxulupá'ana judío ca', na' bezú lau Jesús dxusędene' benne' ca' zaj zre'e lu xu'u naga dxelúe lá'ana judío ca' Dios. Bėnneache zan belenne' cheę', ne belexébene', dxele'ne':

—¿Gazra będe benne' nigá ca nácate? ¿Bizra xel-la sina da nunezruj Le', ne xel-la waca zren caní da dxunę'? <sup>3</sup> ¿Quegá benne' nigá gubizre xaga, zri'ine María, na' benne' biche' ca' zaj naque' Jacobo, ne José, ne Judas, ne Simón, na' nu'ula zane' ca' cá'anqueze zaj zrálene' dxi'u?

Cheę le' na' quebe guléajle'e cheę Jesús. 'Na' gunná Jesús, dxę'e benne' ca':

—Xúgute' benne' dxelape' ba lá'ana tu benne' dxuchálaje' waláz cheę Dios, san benne' walázr cheę' ca', ne benne' xrtie' ca', ne benne' zaj zre'e xu'u lizre' quebe dxelape' le' ba lá'ana.

<sup>5</sup> Cheę le' na' quebe ben Jesús lazrie' na' netú xel-la waca zren. Tuze bexune' bál-laze benne' we' gate na' guxrúa ne'e xichaj benne' ca'. <sup>6</sup> Bebane Jesús lawe' da quebe guléajle'e cheę'.

*Jesús dxusel-le' benne' ca' dxusędene' cheajle'chálaje' xrtizra Dios*

(Mt. 10.5-15; Lc. 9.1-6)

Ca gudé na' bedé Jesús xecha lasa xézredu ca' zaj nnita gáguze, na' będene' benne' zaj zre'e ga na'. <sup>7</sup> Gunné' benne' chazrinnu dxusędene', ne guzú lawe'

dxesel-le' le' chupa weaje', ne bnézuje' le' xel-la waca xulucuase' be' xriwe' ca' lu bel-la' dxen chee' bénneache ca'. <sup>8</sup> Gunná bé'ene' le' quebe bi xelu'e chee la neza, con tuze xaga da xuluchiche'. Quebe xelu'e xixruj xeta, ne xeta, ne dumí. <sup>9</sup> Waca xululéaje' zrele', ne xelácu'e tu cueze zra lane'. <sup>10</sup> Gunnadxa Jesús, dx'e' benne' ca':

—Gate na' chu'ule le'e tu lu xu'u chee benne', waca xegá'anatele lizre bénnea' ca zrindxa zra xezá'ale lu xezre na'. <sup>11</sup> Che zrinle tu lu xezre naga quebe xuluxé lawe' le'e, ne quebe xelénene' cheele, waca xezá'ale, na' cuibetele bxrte xu da dxedá' ní'ale. Da nigá gaca na tu da dxulé'e na zaj nabaga benne' xezre na' zria, benne' dxeledábaga' le'e. Da li dxennéa', lu zra guchi'a Dios chee' bénneache, waxache' gá-cadxa da ba xa' da xeledé benne' xezre Sodoma, ne benne' xezre Gomorra quézcala da xeledé benne' xezre ca' naga quebe buluzé nague' cheele.

<sup>12</sup> Nadxa gusá'aca benne' ca' dxusede Jesús, na' buluchálajlene' bénneache chee xelexeb'i lazre'. <sup>13</sup> Cá'anqueze belxebéaje' zánete be' xriwe' ca' lu bel-la' dxen chee bénneache ca', na' gulegiü'e da za zane' benne' we', na' bel'exaxaque'.

*Ca gute Juan, benne' bchue' bénneache nisa (Mt. 14.1-12; Lc. 9.7-9)*

<sup>14</sup> Na' ben wenna' bea Herodes ca naca da zren ca' da dxun Jesús lawe' da guzé dizra' chee'. Bal-la benne' dxelenné':

—Juan, benne' bchue' bénneache nisa, bache bebane' ládujla benne' gate, na' chee le' na' nape' xel-la waca zren nigá.

<sup>15</sup> Benne' xula dxelenné':

—Elías, bénnea' bchálaje' waláz chee Dios benne' nigá.

Benne' xula dxelenné':

—Nácalje' bénnea' dxal-la' xelá' guchálaje' waláz chee Dios, che nácalje' benne' gulasa, benne' bchálaje' waláz chee Dios.

<sup>16</sup> Ca ben Herodes da caní, na' gunné':

—Benne' nigá naque' Juan, bénnea' gunná be'eda' neda' gulechugue' xíchaje'. Benne' nigá ba bebane' ládujla benne' gate.

<sup>17</sup> Caní gunná Herodes lawe' da gunná be'e le' buluzé' Juan na' lizre xia, ne buluchéaje' le' du xia, da na' bene' lawe' da dxezrá'a Herodías le'. Herodías nigá guque' zru'ula Felipe, benne' biche Herodes.

Herodes nigá bequ'e' nu'ula' chee guque' zru'ule'. <sup>18</sup> Gunná Juan, dx'e' Herodes:

—Quebe dxal-la' súalenu' zru'ula bi bichu'.

<sup>19</sup> Chee le' na' Herodías guzré'e Juan, ne guca lazre' gútete' le'. Quebe guca chee' <sup>20</sup> lawe' da neze Herodes naca Juan nigá tu benne' xrlátaje, ne benne' naque' tuze nen Dios, na' bezrebe' le'. Chee le' na' quebe be'e lataj Herodías na' gútete' Juan nigá, na' lálcala quebe guxéajni'ine' ca naca xugúte' da bchalaj Juan, Herodes nigá bze nague' chee' du lazre'. <sup>21</sup> Herodías na' bzrelene' ájala gune' ca da dxaca lazre' gate na' guxú'u laní ca gula la Herodes. Gulé'aj gulagu benne' xíchaje' ca', ne benne' dxelenná be'e lu wedil-la, ne benne' zaj naque' blau lu xezre ca' zaj nababa Galilea. <sup>22</sup> Nadxa guxú'u bi nu'ula chee' Herodías na' lu xu'u naga dxelé'aj dxelawe', ne bxá'abe' lau benne' ca'. Bezaca ba lazre' Herodes ca bxá'abe', ne tuze ca belún benne' ca' zaj zra' dxelawe' tu zren nen le'. Gunná wenna' bea Herodes, dx'e' nu'ula cuide' nigá:

—Gunaba neda' ca da dxedánenu', na' gunna' na chiu'.

<sup>23</sup> Guchebe lazre' Herodes, ne bzétaje' Dios gunézuje' bíteteze da nábabe', lálcala nábabe' gáchajte naga dxenná be'e le'.

<sup>24</sup> Nadxa nu'ula cuide' nigá bdxúajbe', xeajchálajlebe' xrnabe', gunabe':

—¿Bizra naba'?

Gunná xrnabe':

—Gunaba xichaj Juan, bénnea' bchue' bénneache nisa.

<sup>25</sup> La guxu'ute' nu'ula cuide' nigá naga zua wenna' bea, na' gunabe', dx'e'be' le':

—Dxaca lazra' gunnu' neda' na'a tu lu xé'ena xichaj Juan, bénnea' bchue' bénneache nisa.

<sup>26</sup> Nadxa wenna' bea nigá bewí'inele'e, ne lawe' da ba bzétaje' Dios, na' belénete' benne' ca' da gunné', quebe guca lazre' guzruné' ca da gunaba bi nu'ula nigá.

<sup>27</sup> Chee le' na' gusel-la wenna' bea tu benne' dxexe' wedil-la, ne gunná bé'ene' le' cheaxrí'e xichaj Juan na'. <sup>28</sup> Guxíaj benne' nigá lu xu'u lizre xia, na' bdxixré' xichaj Juan na', ne bexu'e na tu lu xé'ena. Bnézruje' na bi nu'ula na', na' lebe' bnézruje' na xrnabe'.

<sup>29</sup> Gate gulénneze benne' ca' da nigá, benne' ca' bseǵe Juan, na' xeaǵlexexrí'e bē-la-la' dxen chee', na' xeaǵlecáchete' na.

*Jesús dxugawe' chi xun gaxúa benne' biu*  
(Mt. 14.13-21; Lc. 9.10-17; Jn. 6.1-14)

<sup>30</sup> Ca gudé na' belexezrín benne' gubáz ca' chee' Jesús naga zua Le', ne buluzenne' Le' xúgute' ca da belunge', ne ca da bulusédene' benne' ca' naga xjaque'. <sup>31</sup> Nadxa gunná Jesús, dxé'e benne' ca':

—Le chu'u. Chéajdxu xezí' lázredxu chadite' naga xu'u lataj.

Gunné' caní lawe' da dxesá'aca benne' dxesá'aca, ne dxelexezrín benne' dxelexezrín, na' quebe dxelu'e lataj xelawe'.

<sup>32</sup> Nadxa Jesús ne benne' gubáz chee' ca' belexexú'e leze' tu lu da dxedá lawe' nísadau', na' belezrine' tu lataj naga quebe nu chilá' benne'. <sup>33</sup> Benne' zan ca' belelé'ene' ca' zjaque', ne belexexúnbe'e Jesús, na' gusá'aca chégü'e' xjá'aque' na'. Benne' xúgute' xezre ca' belezrine' lataj na' nédxudxa ca Jesús. <sup>34</sup> Gate bedxúaj Jesús lu da dxedá lawe' nísadau', na' blé'ene' benne' zante, ne bexache lazre' le' lawe' da zaj zre'e ca zrla' ca' quebe zua benne' dxuxú'e' leba'. Na' guzú lawe' dxusédene' benne' ca' da zante. <sup>35</sup> Ca gula guzré', belezrín benne' ca' dxusede Jesús lau Le', na' gulé'e Le':

—Ba dxaca waxrinne, na' quegá nu lizre benne' zua lataj nigá. <sup>36</sup> Besel-la benne' caní chee' cheajxaque' xezre ca' zaj nnita gálaze chee' xelezí'e xeta xelawe' lawe' da quebe bi de nigá da xelawe'.

<sup>37</sup> Na' gunná Jesús, dxé'e le':

—Le gunezruj le'e da xelawe'.

Na' gulenné', dxelé'e Jesús:

—¿Waca chéajntu' cheajgá'untu' xeta xtila, quízrujntu' lazruj chee' chupa gaxúa zra chee' gugágudxu benne' zan caní?

<sup>38</sup> Na' gunná Jesús, dxé'e le':

—¿Bal-la xeta xtila nápa'e? Le chea-jnná'.

Ca gulénezene', na' gulenné', dxelé'e Jesús:

—Gaxxu' xeta xtila, ne chupa bēladau'.

<sup>39</sup> Nadxa gunná be'e Jesús gulebé'e xúgute' bēnneache ca' tu cue' weaj lu xrgúie xa'a. <sup>40</sup> Na' gulebé'e tu cue' weaj, du tu gaxúe', du chi xune'. <sup>41</sup> Nadxa Jesús bēxrue' gaxxu' xeta xtila ca', ne da chupa bēladau'. Na' guchisa lawe' xabaala, gunabe' lau Dios gun la'azxe' na, na' bzúzruje' xeta xtila ca',

ne bnézruje' na benne' ca' dxusédene' chee' gulísie' na chee' benne' ca'. Cá'anqueze gudísie' da chupa bēladau' chee' xúgute' benne' ca'. <sup>42</sup> Na' gulagu xúgute' ne gulélajte'. <sup>43</sup> Nadxa buluxutube' ca da begá'ana chee' xeta xtila, ne chee' bēladau' ca', na' guca chazrinnu xcuite xca'a. <sup>44</sup> Benne' ca' gulawe' xeta xtila ca' zaj naque' chi xun gaxúa benne' biu.

*Dxezá Jesús lawe' nísadau'*

(Mt. 14.22-27; Jn. 6.16-21)

<sup>45</sup> La gunná be'ete' Jesús benne' ca' dxusé-dene' gulu'e' lu da dxedá lawe' nísadau' chee' gulelague' nísadau' na' nédxudxa ca Le', chee' xelexezrine' lu xezre Betsaida dxácate Le' dxuzé' dizra' bēnne' ca'. <sup>46</sup> Ca gudé bze' dizra' benne' ca', na' guzé'e zéaje' lu xi'a zeajchálajlene' Dios. <sup>47</sup> Gate gula guxrínnequeze, ba zeaj da dxedá lawe' nísadau' na' gachaj lawe' nísadau', na' begá'ana Jesús tuze' lu xu dxu'a nísadau'. <sup>48</sup> Gate blé'ene' ca' dxelezraga lawe' dxulúsé'e da dxedá lawe' nísadau' lawe' da za be' na', dxuzrí'i na da dxedá lawe' nísadau' na', na' gula balá' gubiga Jesús naga zaj zre'e, dxezé'e lawe' nísadau' na', ne guca lazre' té'e lau da dxedá lawe' nísadau' na'. <sup>49</sup> Gate belelé'ene' Le' ze'e lawe' nísadau' na', guléquene' da dxedá dxela, na' gulebezre xe'e. <sup>50</sup> Belelé'e xúgute' ca dxezé'e lawe' nísadau', na' belezrébele'e. Na' gunná Jesús, dxé'e benne' ca' dxusédene':

—Ga zrēbele. Neda' nigá. Le gun chuchu lázrele.

<sup>51</sup> Nadxa guluén Jesús lu da dxedá lawe' nísadau' naga zaj zre'e, na' guleza be' na'. Na' guleque zrējene', ne belexebánele'ene', <sup>52</sup> lawe' da quebe ne xeléajni'ine' ca naca xel-la waca zren da bēne' chee' xeta xtila ca', lawe' da ne dxun zide' xichaj lázrdawe'.

*Dxexún Jesús benne' we' ca' lu xezre Gene-saret*

(Mt. 14.34-36)

<sup>53</sup> Gate na' gulelague' nísadau', belezrine' lu xezr la xu chee' benne' xezre Gene-saret, na' buluchéaje' xaga da dxedá lawe' nísadau' dxu'a nísadau' na'. <sup>54</sup> Ca beledxúaje' lu da dxedá lawe' nísadau', la belexexún-beate bēnneache ca' Jesús. <sup>55</sup> La gusá'aca chégute' zjaque' lu xezre ca' xeaǵlexrí'e benne' we' ca' tu tu ta'a, na' zeajlegúe'e le' naga zaj nézene' xedé Jesús. <sup>56</sup> Gáteteze

xézredu ca', ne xezre ca', ne le'e xixre' naga dxedé Jesús, na' buluzúe' benne' we' ca' du la neza, ne gulata' xuene' Jesús gunézruje' lataj cheajletaze' zra lane', na' xúgute benne' ca' xejleté' zra lane' belexécate'.

## 7

*Da dxucá'ana sban bénneache*  
(Mt. 15.1-20)

<sup>1</sup> Benne' fariseo ca' nen bal-la benne' dxuluxuzájle'e da bdxixruj be'e Moisés, benne' gusá'aque' Jerusalén, belezrine' lau Jesús. <sup>2</sup> Benne' caní belelé'ene' ca dxelún bal-la benne' dxusede Jesús, dxelawe' xeta ne quebe zaj naxibe ne'e ca dxelenná bea benne' xudau' ca'. Chee le na' gulenná benne' Jerusalén ca':

—Zaj naca sban na' benne' ca' dxusede Jesús.

Nadxa gulezí tizre' le'.

<sup>3</sup> Caní gulenná benne' ca' lawe' da zjácále benne' xudau' fariseo ca', ne xúgute benne' judío ca' ca naca da belún xra xtau benne' ca', quebe dxelawe' xeta che quebe zaj naxibe ne'e zane' lasa. <sup>4</sup> Gate zjaque' lawe' xi'a wa'u, ca dxelexezrine' quebe dxelawe' xeta che quebe xelibe ne'e ca zaj nadxixruj bea benne' xudau' ca'. Cá'anqueze dexda da zanté da zjácálene', ca xexadxé zriga' da dxelé'aje', ne zruaga, ne zriga xé'ena, ne da naga dxelásie'. <sup>5</sup> Nadxa benne' fariseo ca', ne benne' ca' dxuluxuzájle'e da bdxixruj be'e Moisés gulénábene' Jesús:

—¿Bizr chee na' quebe zjácále benne' ca' dxusédeni' ca naca da gulún benne' gula? Dxelawe' xeta, zaj naca sban ne'e.

<sup>6</sup> Na' bechebe Jesús:

—Láweze dxunle da xrlátaje. Lu lázrdaule xu'ule da calela. Cháwedau' bchála-juqeze Isaías ca nácale le'e gate na' bzuaje' caní:

Bénneache caní dxelúe lá'ane' neda' nen dxú'aze'.

Xichaj lázrdawe' ca' zaj nacuasa na neda'.

<sup>7</sup> Níteze naca xel-la ba lá'ana da dxelu'e neda',

lawe' da dxulusédené' da zaj nadxixruj bea bénneacheze.

<sup>8</sup> Caní naca xca', le'e dxuzúale chalá'ala ca da nadxixruj bea Dios, na' zéajlele ca naca da gulún bénneache ca dxíbele zruaga, ne zriga' cheele, ne zánete da caní da dxunle.

<sup>9</sup> Na' gunnadxé, dxé'e benne' ca':

—Chala'ala dxuzúale ca da nadxixruj bea Dios chee zéajlele ca naca da tu dxúnzquezle. <sup>10</sup> Caní gunná Moisés na': "Gudapa ba lá'ana xra xrna'u." Cá'anqueze gunné': "Che tu benne' nne' schanni' chee xre', che xrne'e, con gátequeze bénnea'." <sup>11</sup> Le'e dxennale, "Che tu benne' xe'e xra xrne'e: Corbán," da zéaje na, quebe gaca gácalena' le'e lawe' da bache bnézruja' chee Dios ca naca da de chia'. <sup>12</sup> Che ca'an dxenné', nadxa le'e québedxa dxu'ule le' lataj gácalene' xra xrne'e. <sup>13</sup> Gate dxunle caní dxuzúale chalá'ala xrtizra Dios, chee gunle ca da zéajlele. Na' zéajquezle dxunle zánete da zaj naca na caní.

<sup>14</sup> Xecha lasa gunné' Jesús bénneache ca', na' gunné', dxé'e le':

—Le guzé nágale xúgutele, ne le chéajni'i. <sup>15</sup> Netú da dxé'aj dxagu benne' quebe seque gucá'ana na le' sban. Da dxedxuaj na lu xichaj lázrdau bénneache, le na' dxucá'ana na le' sban. <sup>16</sup> Le'e zua nágale, le xene.

<sup>17</sup> Gate gucuasa Jesús naga zaj zra' benne' ca', na' guxú'e lu xu'u. Nadxa benne' ca' dxusédené' gulénábene' Le' ca naca chee da dxulé'e nigá. <sup>18</sup> Nadxa gunná Jesús, dxé'e le':

—¿Cá'anqueze le'e quebe dxéajni'ile? ¿Quebe dxéajni'ile xúgute da dxé'aj dxagu bénneache quebe seque gucá'ana na le' sban <sup>19</sup> lawe' da quebe dxu'u na lu xichaj lázrdawe'. Dxu'u na lu le'e, na' dxedxuaj na?

Cate' gunná Jesús caní blé'ene' zaj naca chawe' xúgute da dxé'aj dxágudxu. <sup>20</sup> Na' gunnadxé':

—Ca naca da dxedxuaj na lu xichaj lázrdau bénneache, le na' dxucá'ana na le' sban <sup>21</sup> lawe' da lu xichaj lázrdau bénnea' dxeledxúaj ca da calela da dxuwía lazre', ne dul-la da dxucá'ana ditaj xel-la wechaga na', ne dul-la chee da sban, ne wete benne', <sup>22</sup> ne xel-la gubán, ne da dxezá lazre' gapa da naca chee benne' xula, ne da calela ca', ne xel-la wezrí xe', ne da dxezá lazre' da sban, ne xel-la zre'e lazre', ne xel-la wechalaj dizra' bizruj, ne xel-la dxun szren cuina, ne xel-la dxuchalaj bigaze. <sup>23</sup> Xúgute da calela caní dxeledxúaj na lu xichaj lázrdau bénneache, ne dxuluxrinnaj na le'.

*Tu nu'ula quebe naca judío dxeajlí lazre' Jesús*

(Mt. 15.21-28)

<sup>24</sup> Na' bezá'a Jesús naga zue', guxíaje' lu xezre ca' zaj nababa xezre Tiro, ne xezre Sidón. Guxú'u Jesús tu lu xu'u, ne quegá guca lazre' nu xene. Quebe guca gache'. <sup>25</sup> La gunézetē tu nu'ula zua Jesús na'. Nu'ula nigá zua tu zrí'ine' nu'ula, xu'ube' be' xriwe'. Bla' nu'ula' naga zua Jesús, ne bzu zribe' lawe'. <sup>26</sup> Nu'ula nigá quebe naque' nu'ula judío. Naque' nu'ula chee tu xezre nababa xezr la xu Sirofenicia. Bzrine' lau Jesús, na' gunabe' Le' xebéaje' be' xriwe' da xu'u zrí'ine' nu'ula. <sup>27</sup> Gunná Jesús, dxé'e nu'ula':

—Be' lataj xelagu nedxu zri'ine benne' lu xu'u, lawe' da quebe naca chawe' cúadxu xeta xtila chee bidu ca', ne gunézrujdxu na chee bécudu ca'.

<sup>28</sup> Na' gunná nu'ula':

—Awe', Xran, san bécudu ca' zaj zra' zran ga dxelágube' dxeláguquezba' xeta bizruj da dxuluzexruj bidu ca'.

<sup>29</sup> Nadxa gunná Jesús:

—Ne chee dizra' da ba gunnéu', bexíaj na'a. Bache bedxúaj be' xriwe' lu bel-la' dxen chee zri'inu' nu'ula.

<sup>30</sup> Gate bezrín nu'ula' lizre', na' blé'ene' zrí'ine' nu'ula' debe' lu da naga dxásebe', na' be' xriwe' ba bedxúaj na lu bel-la' dxen cheebe'.

*Dxexún Jesús tu benne' nacuézruē', ne quebe dxaca nnie'*

<sup>31</sup> Nadxa bedxúaj Jesús, bezé'e naga nababa xezre Tiro, na' gudétie' naga nababa xezre Sidón, ne xezre ca' zaj nababa Decápolis, na' bezrine' dxu'a nísadau' chee xezr la xu Galilea. <sup>32</sup> Nadxa bedajleguá' benne' ca' tu benne' nacuézruē', ne quebe dxaca nnie', na' gulenábe' Jesús xrua ne'e benne' nigá. <sup>33</sup> Guché Jesús benne' nigá chalá'ala naga zaj zra' benne' ca', na' bdie' zrube ne'e lu naga bénnea', na' bzre'e zrene', ne bte' lawe' luzre bénnea'. <sup>34</sup> Nadxa la gunná'te' xabáa, ne gucá'a lazre', gunné':

—Efata.

Dizxa' nigá zéaje na: Bxalaj.

<sup>35</sup> Ca' gunné' caní, na' bxalaj naga benne' cuezru nigá, ne bexaca luzre'. Nadxa guca bchálaje'. <sup>36</sup> Na' gunná Jesús, dxé'e benne' ca' quebe nu xelé'e ca da bene'. Lácala gunná'be'ene' le' caní, buluchílujdxé' dizra' ca da bene'. <sup>37</sup> Benne' ca' zaj zra' na' belexe-bánele'ene', dxelenné':

—Xúgute dxune' cháwedau'. Ddexune' benne' cuezru ca', na' dxeléntene', ne dxexune' benne' ca' quebe dxaca nnie', na' dxelenné'tie'.

## 8

*Dxugagu Jesús chua gaxúa benne' biu (Mt. 15.32-39)*

<sup>1</sup> Ca lu zra ca' zaj nazraga benne' zan, na' quebe bi de da xelawe'. Ca'an guca gunné' Jesús benne' ca' dxusédene', na' guzre' le':

<sup>2</sup> —Neda' ddxexache lazra' benne' caní lawe' da bache guca chunna zra zaj zre'e nigá nen neda', ne quebe bi de da xelawe'.

<sup>3</sup> Che ca' xesel-la' le' lizre' quebe xelawe', na' xelate ni'a ne'e la neza lawe' da zá'aca bal-le' zitu'.

<sup>4</sup> Na' belexechebe benne' ca' dxusede Jesús, dxelé'e Le':

—¿Ajazra gundxu gunézrujdxu da xelawe' nigá, ga quebe nu chilá' benne'?

<sup>5</sup> Jesús bchebe' le':

—¿Bal-la xeta xtila nápaale le'e?

Benne' ca' gulenné':

—Gazre na.

<sup>6</sup> Nadxa gunná be'e Jesús xelebé' xúgute bénneache ca' lu xu. Nadxa guquqé'e xeta xtila, ne guzre' Dios:

—Xcalenu'.

Nadxa bzúzruje' na, ne bnézruje' na benne' ca' dxusédene', na' benne' caní gulsie' na lówela xúgute bénneache ca'.

<sup>7</sup> Zaj nápaqueze' tu chupa béladau'. Na' Jesús gunabe' Dios gunē' na chawe'. Nadxa gunná bé'ene' gulise benne' ca' le' na. <sup>8</sup> Gulagu xúgute bénneache ca', ne belezúale'e chawe'. Ca' gudé na' buluszre'e gazre xcuite xca'a nen xeta bizruj da belegá'ana. <sup>9</sup> Benne' ca' gulawe' zaj naque' ca' chua gaxúa benne' biu. Nadxa Jesús bze' benne' ca' dizra'. <sup>10</sup> Nadxa guxú'e lu da dxedá lawe' nísadau' nen benne' ca' dxusédene'. Xjaque' lu xezr la xu chee benne' xezre Dalmanuta.

*Dxelenabe' Jesús gune' tu xel-la waca (Mt. 16.1-4; Lc. 12.54-56)*

<sup>11</sup> Nadxa belezrín benne' xudau' fariseo ca' ga na', ne gulezú lawe' dxulutil-le' dizra' nen Jesús. Gulenabe' Jesús gune' tu xel-la waca da za xabáa, chee xelenézene' bi xel-la waca nape'. <sup>12</sup> Nadxa Jesús gucá'a dxgua lazre', gunné':



—¿Bizr chee na' dxelenaba benne' caní guna' tu xel-la' waca da za xabáa? Da li dxapa' le'e, quebequeze bi xel-la waca guna' lau le'e.

<sup>13</sup> Nadxa Jesús bca'ane' benne' ca', na' bexu'e lu da dxedá lawe' nísadau', dxexíaje' xechelá'a chee nísadau'.

*Da naca ca cua zichaj chee xeta xtila*  
(Mt. 16.5-12)

<sup>14</sup> Gulal-la lazre' benne' ca' dxusede Jesús xelu'e da xelawe', na' zaj nu'e tuze xeta xtila lu da dxedá lawe' nísadau'. <sup>15</sup> Nadxa Jesús gunná bé'ene', dxé'e benne' ca':

—¡Le nna'xque nigá! Le guxúe cuínale da naca cua zichaj chee xeta xtila chee benne' xudau' fariseo ca', ne ca naca cua zichaj chee xeta xtila chee Herodes.

<sup>16</sup> Nadxa benne' ca' dxusede Jesús gulé ljwezre':

—Le' dxenné' caní lawe' da quebe de xeta xtila gágudxu.

<sup>17</sup> Dxeque be'e Jesús da dxelenné', na' guzre' le':

—¿Bizr chee na' dxennale quebe de xeta xtila gágudxu? ¿Quebe ne chéajni'ile ne quebe dxeque be'e? ¿Nácale'e zide' lázr-daule? <sup>18</sup> ¿Quebe dxelé'ele nen xiaj laule, ne quebe dxenle nen nágale? ¿Quebe dxeajsá lázrele? <sup>19</sup> Gate na' bgawa' chi xun gaxúa benne' biu nen gazxu' xeta xtila, ¿bal-la xcuite xca'a xeta bizruj da becá'ale?

Benne' ca' gulenné':

—Chazrinnu na.

<sup>20</sup> Na' gunná Jesús:

—Na' gate na' bgawa' chua gaxúa benne' biu nen gazre xeta xtila, ¿bal-la xcuite xca'a da zaj zraté becá'ale?

Le' gulenné':

—Gazre na.

<sup>21</sup> Nadxa Jesús guzre' benne' ca':

—¿Ne la gázqueze quebe dxéajni'ile?

*Jesús dxexung' tu benne' la chul-la*

<sup>22</sup> Ca gudé na' Jesús, ne benne' ca' dxusé-dene' belexzrine' lu xezre Betsaida, na' benne' Betsaida guleché'e tu benne' la chul-la lau Jesús, na' gulata' xuene' Le' guté' le'. <sup>23</sup> Jesús gudele' na' benne' la chul-la, ne bebéaje' le' dxu'a xezre. Na' btupe' zrene' lu xiaj lawe', ne guxrúa ne'e le'. Na' bchébe' le' chete dxelé'ene'. <sup>24</sup> Benne' la chul-la gunné'e, na' gunné':

—Dxelé'eda' benne' ca', zaj naque' ca weaj xaga, na' dxesí'aque'.

<sup>25</sup> Nadxa Jesús guxrúa ne'e xiaj lawe' da xula, na' benne' na' gunná' dxgüe'. Na' bexaque', ne xúgute bache dxelé'ene' cháwedau'. <sup>26</sup> Nadxa Jesús besel-le' le' lizre', dxé'e le':

—Quebe chu'u lu xezre nigá, ne quebe nu xu'u caní.

*Pedro dxenné' naca Jesús benne' nasel-la Dios*

(Mt. 16.13-20; Lc. 9.18-21)

<sup>27</sup> Ca gudé na' Jesús, ne benne' ca' dxusé-dene' xjaque' lu xézredu ca' zaj nababa xezre Cesarea naga dxenná bea Filipino. Dxá-cate zaj xu'e neza bchébe Jesús benne' ca':

—¿Nuzra na' dxelenná benne' naca' neda'?

<sup>28</sup> Belexechebe':

—Bal-la benne' dxelenné' nacu' Juan, bènea' bchué' bèneache nisa. Benne' xula dxelenné' nacu' Elías, bènea' bchá-laje' waláz chee Dios. Benne' xula dxelenné' nacu' tu benne' xula bchá-laje' waláz chee Dios.

<sup>29</sup> Nadxa Jesús bchébe' le':

—¿Gazra le'e? ¿Nuzra dxennale le'e naca' neda'?

Pedro gunné':

—Lue' nacu' Cristo, benne' nasel-la Dios.

<sup>30</sup> Nadxa gunná be'e Jesús benne' ca'. Gunné':

—Quebe nu xele ca'.

*Dxuchalaj Jesús ca dxal-la' gatié'*

(Mt. 16.21-28; Lc. 9.22-27)

<sup>31</sup> Nadxa guzú lau Jesús dxulé'ene' benne' ca' ca dxal-la' sáca'le'e Le', Benne' Gulje' Bénneache, ne ca xelún benne' gula chee judfo ca', ne benne' xíchaje ca' chee bxruze ca', ne benne' dxuluxuzájle'e da nadxixruj bea Dios, xuluzúe' Le' chalá'ala. Nadxa guzre' le' welútie' Le', san xebane' zra gux-unne zra. <sup>32</sup> Da nigá guzre' le' caníqueze. Nadxa Pedro guché'e Jesús chalá'ala, ne guzú lawe' dxedil-le' Le'. <sup>33</sup> Jesús bexécha-je', ne gunné'e benne' ca' dxusé-dene', na' gudil-le' Pedro, dxé'e le':

—Gucuasa cuita' nigá, lue', da xriwe'. Quebe dxéquenu' da nigá ca dxun Dios. Ca dxun bèneache dxunu'.

<sup>34</sup> Nadxa Jesús gunné' benne' ca' dxusé-dene', ne xúgute bèneache ca', na' guzre' le':

—Che nílale dxaca lázrele gunle neda' tuze, dxal-la' guziále chalá'ala xúgute da dxezá lázrele le'e, ne gácale ca tu benne' zéaje' chee te'e xaga béguaj, na' gunle neda' tu zren. <sup>35</sup>Che tu benne' dxaca lazre' guselé' xel-la nabán chee', benne' nigá gunitie' xel-la nabán chee'. Bénnea' gunitie' xel-la nabán chee' ne chia' neda', ne ne chee dizra' chawe' chia', benne' nigá guselé' xel-la nabán chee'. <sup>36</sup>Che tu benne' gape' xúgute da naca chee xezr la xu nigá, na' gunitie' bénne'du xu'e, ¿bízraqueze da ba neza gaca na chee bénnea'? <sup>37</sup>Quebe bi gaca gunezruj tu benne' chee guselé' bénne'du xu'e. <sup>38</sup>Che tu benne' gapa stu'e chia' neda', ne chee dizra' chawe' chia' lau bénne' caní, benne' dxulucá'ana Dios, ne dxelún dulla, la gaze neda', Benne' Gulje' Bénneache, gapa stú'queza' chee bénnea' gate xida' nen xel-la szren chee Xra', ne nen gubáz chee xabáa lá'azxa ca'.

## 9

<sup>1</sup>Ca'anqueze guzre Jesús benne' ca':

—Da li dxapa' le'e, zaj zra' nigá benne' quebe xelatie' nédxula ca xelélé'ene' xida xel-la dxenná bea chee Dios nen xel-la waca chee'.

*Ca guca gate bcha ca gunná Jesús  
(Mt. 17.1-13; Lc. 9.28-36)*

<sup>2</sup>Ca gudé xrupa zra, guché Jesús Pedro, ne Jacobo, ne Juan, na' guxíajlene' benne' canize tu lu xi'a sibe. Na' bcha ca gunná Jesús lau benne' ca'. <sup>3</sup>Zra lana Jesús bexaca na chiche ca bezxe' da dxágute na laudxu. Quegá nu chilá' benne' lu xezr la xu gaca quibe' zra lané' chee xegá'ana na chiche ca guca zra lana Jesús. <sup>4</sup>Na' benne' ca' dxusede Jesús belelé'ene' Elías, ne Moisés, benne' gulate nédxudate, dxuluchálajlene' Jesús. <sup>5</sup>Pedro guzre' Jesús:

—Benne' wesede, cháwele'e naca zradxu nigá. Guntu' chunna xu'u lágadau', tu chiú', ne tu chee Moisés, ne tu chee Elías.

<sup>6</sup>Caní gunná Pedro lawe' da dxelezrebe benne' ca' dxusede Jesús, na' Pedro quebe nézene' ca da dxenné'. <sup>7</sup>Nadxa betaj tu beuj naga zaj zre'e, da bcache na le', na' lu beuj na' belenne' tu chi'i benne', gunné':

—Benne' nigá naque' Zri'ina' nazr'ite lazra'. Le xen da dxenné'.

<sup>8</sup>Gate gulenné'e, québedxa nu nalá' nen le', san tuze Jesús.

<sup>9</sup>Dxácaté dxelexétaje' lu xi'a na', gunná be'e Jesús benne' ca' quebe nu xuluchá-lajlene' ca naca da belelé'ene' gate te na' xebán Benne' Gulje' Bénneache ládujla benne' gate. <sup>10</sup>Chee le na' gulezúe' zrize ca naca da ba guca. Buluchebe ljwezre':

—¿Bizra zéaje da na', xebane' ládujla benne' gate?

<sup>11</sup>Nadxa buluchebe' Jesús:

—¿Bizr chee na' dxeleenná benne' ca' dxuluxuzájle'e da nadxixruj bea Dios dxal-la' xelá' Elías nédxula ca Cristo?

<sup>12</sup>Bechebe Jesús, na' guzre' le':

—Da li xelá' Elías nedxu, ne gucá'ana chawe' xúgute. ¿Bizra dxenná da naxúaj na lu xiche chee Dios ca gaca chia' neda', Benne' Gulje' Bénneache? Dxenná na da zan da saca', na' xuluzúa bénneache neda' chalá'ala. <sup>13</sup>Neda' dxapa' le'e, ba bla' Elías, na' belune' chee' ca naca xúgute da gulaca lazre' ca da dxenná na lu xiche chee Dios ca da dxal-la' gaca chee'.

*Dxexún Jesús tu benne' cuide' xu'ube' be' xriwe'*

*(Mt. 17.14-21; Lc. 9.37-43)*

<sup>14</sup>Ca gudé na' belexezrine' naga zaj zra' xezícadxa benne' ca' dxusede Jesús, na' belelé'ene' benne' zan zaj naxéchaje' le', ne zaj zráqueze na' benne' dxuluxuzájle'e da nadxixruj bea Dios, na' dxulutí-lalene' le' dizra'. <sup>15</sup>Gate belelé'ene' Jesús, na' xúgute' belexebánene', na' gusi'aca chégüe' naga zua Jesús, ne bulugape' le' diuzre. <sup>16</sup>Ca'an guca, Jesús bchebe' benne' ca':

—¿Bizra na' dxedíl-lalele benne' ca'?

<sup>17</sup>Nadxa tu benne' ze' ga na' bechebe':

—Benne' wesede, nache'a zri'ina' nigá chee xexunu'-be' lawe' da xu'ube' be' xriwe' da ba nun na lebe' bi quebe dxaca nnebe'. <sup>18</sup>Gáteteze na' dxu'ube' da xriwe', na' dxel-la na lebe', ne dxin na lebe' lu xu. Dxezríá bzrina' xú'abe', ne dxagu láxzabe'. Chee le na' ba dxéxrujle'ebe'. Ba gunaba' benne' ca' dxusedenu' xelxebéaje' be' xriwe' na', san quebe gulezéquene'.

<sup>19</sup>Bechebe Jesús:

—Le'e, benne' quebe dxéajlele chia'. ¿Ájate dxal-la' súalena' le'e? ¿Ájate dxal-la' gaca' benne' zren lazre' nen le'e? Le cheajxri' bi cuide' na' nigá.

<sup>20</sup>Na' xeajlexrí'e-be'. Gate be' xriwe' na' ble'e na Jesús, na' ben na gudel-la chuna'

bi cuide' na', ne gudinna lebe' xu, na' dxe-bixre dxtúl-labe' lu xu, ne guzríá bzrina' dxú'abe'. <sup>21</sup>Nadxa bchebe Jesús xrabe':

—¿Bátate dxezácabē' caní'?

Gunná xrabe':

—Gate nácatēbe' bidau'. <sup>22</sup>Zane' lasa be' xriwe' na' dxugú'u na lebe' lu xi', ne lu nisa chee gute na lebe'. Che wazéquenu' bi gunu' cheebe', bexache lazre' netu', ne gúcalē netu'.

<sup>23</sup>Na' guzre Jesús le':

—Che wazéquenu' lue' chéajle'u chia', xúgute wazeque chee benne' dxéajle'ē chia'.

<sup>24</sup>Nadxa xra bi cuide' nigá gunné' zizraj:

—Dxéajle'a chiu'. Gúcalē neda' chee chéajledxa'.

<sup>25</sup>Gate ble'e Jesús dxelezraga benne' zan, na' gudil-le' be' xriwe' na', dxenné':

—Lue', be' xriwe', dxunu' benne' quebe dxaca nniē', ne cuezru, neda' dxenná be'eda' lue' xedxúaju'. ¿Bsan bi cuide' nigál ¿Quebedxa xexú'u lu be'l-la' dxen cheebe'!

<sup>26</sup>Na' be' xriwe' na' gudxezre xa'a na, ne ben na gudel-la chuna' bi cuide' na', na' bedxúaj na. Na' begá'anabe' ca tu benne' gate. Ca'an guca, gulenná benne' zan ca':

—Ba gútebe'.

<sup>27</sup>Nadxa gucá'a Jesús na'be', bechise'-be'. Na' benne' cuide' na' bezēbe'.

<sup>28</sup>Nadxa guxú'u Jesús tu lu xu'u, na' benne' ca' dxusédene' buluchebe' Le' naga zue' tuze':

—¿Bizra chee na' quebe guzéquentu' netu' xebéajntu' be' xriwe' na'?

<sup>29</sup>Nadxa Jesús guzre' benne' ca':

—Ca naca be' xriwe' caní séquele xebéajna na che nábale lau Dios, ne gunle gubasa.

*Jesús dxuchálaje' da xula ca gaca gate gatié'*

(Mt. 17.22-23; Lc. 9.43-45)

<sup>30</sup>Gate besí'aque' naga zaj zre'e, na' belexedéé' naga nababa Galilea. Jesús quebe guca lazre' nu neze ga zue', <sup>31</sup>lawe' da dxuzéajni'ine' benne' ca' dxusédene', na' guzre' le':

—Zua tu benne' gudéé' neda', Benne' Gulje' Bénneache, lu na' benne' ca' dxeledábague' neda', na' xelútié' neda', san gate gaca chunna zra natia', na' xebana'.

<sup>32</sup>Benne' ca' quebe guléajni'ine' ca da dxé'e le', ne belezrebe' xuluchebe' Le'.

*Nu benne' naque' blau*

(Mt. 18.1-5; Lc. 9.46-48)

<sup>33</sup>Nadxa belezrine' lu xezre Capernaum, na' gate zaj zre'e lu xu'u na', bchebe Jesús benne' ca' dxusédene':

—¿Bizra dizra' dxutíl-lalele ljwézrele za'le la neza?

<sup>34</sup>Gulezré'e zrize lawe' da bulutil-le' dizra' la neza na' che nule' nácadxe' benne' blau. <sup>35</sup>Nadxa Jesús gudxé'e, na' gunné' benne' chazrinnu, benne' ca' dxusédene', na' guzre' le':

—Che núlale dxaca lázrele gácale benne' blau, dxal-la' gácale ca benne' bzebe, ne gunle zrin chee xúgute bénneache.

<sup>36</sup>Nadxa guqué'e tu bidau', na' bzue' lebe' gachaj lawe' benne' ca'. Na' bnide'-be', ne guzre' benne' ca':

<sup>37</sup>—Benne' na' gape' ba lá'ana tu bidau' ca bidu nigá lawe' da nazrí'ine' neda', bēneane' gape' ba lá'ana neda', na' bēneane' gape' ba lá'ana neda', quegá tuza' neda' gape' ba lá'ana, cá'anqueze gape' ba lá'ana Xra' nasel-le' neda'.

*Benne' quebe dxedábague' dxi'u, dxácalēne' dxi'u*

(Lc. 9.49-50; Mt. 10.42)

<sup>38</sup>Nadxa Juan guzre' Jesús:

—Benne' Wesēde, blé'entu' tu benne' dxebéaje' be' xriwe' da xu'u bēneache, dxuchínene' Lau' Lue', san bēneane' quebe dxune' dxi'u tu zren. Chee le' na' gúzrentu' le' québedxa guné' ca'.

<sup>39</sup>Jesús guzre' benne' ca' dxusédene':

—Quebe bi xe'e le'. Che nu benne' guné' tu xel-la waca, guchínene' La' neda', benne' nigá quebe gaca nne' schanni' chia'. <sup>40</sup>Caní naca na lawe' da benne' quebe dxedábague' dxi'u, dxácalēne' dxi'u. <sup>41</sup>Núteteze benne' gunne' le'e tu zriga' nisa ne chee La' neda' lawe' da nácale chia' neda', Cristo, da líqueze dxennía', wazí'queze' da dxal-la' sí'e.

*Ca naca da dxun na dxi'u benne' dul-la*

(Mt. 18.6-9; Lc. 17.1-2)

<sup>42</sup>Gunnadxa Jesús:

—Núteteze benne' gulé'ene' tu bidau' chee gunbe' dul-la, bidu na' dxéajlebe' chia', cháwedxa guchéajdxu tu xiaj zi'i lba bēneane', ne cheajchú'unadxu le' lu da situj chee nísadau'. <sup>43</sup>Che na'u dxun na gunu' dul-la, wendxa guchugu na'u na'. Cháwedxa xexú'u xabáa naga gaca banu'

nen tuze na'u quézcala xexíaju' lataj ba xa' nen dxúpatę na'u, naga quebe xexula xi' da xezacu'. <sup>44</sup>Lataj ba xa' na' quebe xelate bzuga', bę dxeláguba' benne' ca' dxelunę' da calęla, na' xi' na' cabata' xexúl-laqueze na. <sup>45</sup>Na' che ni'u dxun na gunu' dul-la, guchugu ni'u na'. Cháwedxa xexú'u xabáa naga gaca banu' nen tu ni'u, quézcala xexíaju' lataj ba xa' nen dxúpatę ni'u, naga quebe xexula xi'. <sup>46</sup>Lataj ba xa' na' quebe xelate bzuga', bę dxeláguba' benne' ca' dxelunę' da calęla, na' xi' na' cabata' xexúl-laqueze na. <sup>47</sup>Che xiaj lau' dxun na gunu' dul-la, guleaj xiaj lau' na'. Cháwedxa xexú'u naga dxenná bea Dios nen tuze xiaj lau', quézcala xexíaju' lataj ba xa' nen dxúpatę xiaj lau'. <sup>48</sup>Lataj ba xa' na' quebe xelate bzuga', bę dxeláguba' benne' ca' dxelunę' da calęla, na' xi' na' cabata' xexúl-laqueze na.

<sup>49</sup>'Ca dxundxu gate dxugú'udxu zede' belá' da guzáladxu lu xi' cheę xegá'ana chawe' na, ca'an gaca cheę xúgute benne'. Cá'anqueze dxugú'udxu zede' da dxuzéxedxu lau Dios. <sup>50</sup>Zede' na' naca na da chawe', san che xenite xel-la sna'a cheę na, ¿ájala gundxu cheę guchinedxu zede' na'? Le gaca le'e ca zede' chawe' na', ne le sua lu xel-la zri lázre' tule nen xetule.

## 10

*Ca naca cheę bę dxelęlé'ę nen zru'ule'*  
(Mt. 19.1-12; Lc. 16.18)

<sup>1</sup>Nadxa bedxúaj Jesús xezre Capernaum, na' guxíaje' naga nababa Judea xechalá'a xegu Jordán naga dxalaj gubizra. Na' belezraga bęnneache zan naga zua Jesús, na' xecha lasa na' bsędene' le' cáqueze dxunę'. <sup>2</sup>Nadxa bal-la benne' xudau' fariseo ca' belezrine' lau Jesús, na' buluchebe' Le' cheę da gun nne' Le' tu da quebe dxal-la' nne'. Buluchebe' Le':

—¿Waca tu benne' xelęlé'ę nen zru'ule'?

<sup>3</sup>Nadxa bechebe Jesús:

—¿Bizra gunná be'e Moisés le'e?

<sup>4</sup>Na' belexechebe benne' ca':

—Benna Moisés lataj gunézrujdxu zru'uladxu tu xiche da dxenná na dxelá'adxu, na' gusandxu le'.

<sup>5</sup>Nadxa Jesús guzre' le':

—Caní gunná be'e Moisés lawe' da zaj naca zizraj lázrdaule le'e. <sup>6</sup>Gate nédxudau' gate bęn Dios xúgute da dxelę'dxdu, na'

bęnę' bęnneache benne' biu, ne nu'ula, na' gunné': "Cheę le' na' benne' biu na' gusane' xruze xrne'ę cheę gaque' tuze nen zru'ule', <sup>8</sup>na' dxupe' xelaque' ca tuze benne'." Ca' naca na, quębedxa zaj naca chupe', san tuze benne' zaj naque'. <sup>9</sup>Cheę le' na' netú benne' quebe dxal-la' xelęlé'ę da nuchaga Dios.

<sup>10</sup>Gate zaj zra' lu xu'u benne' ca' dxusede Jesús buluchebe' Le' xetú lasa ca naca cheę da nigá. <sup>11</sup>Na' Jesús guzre' benne' ca':

—Che tu benne' xelęlé'ę nen zru'ule', ne xezúalene' nu'ula xula, dxíchuje' xrba cheę wechaga na' lawe' da dxusebague' zru'ule' nedxu na' dul-la. <sup>12</sup>Cá'anqueze che tu nu'ula gusane' benne' cheę, ne xezúalene' benne' xula, la gázqueze dxíchuje' xrba cheę wechaga na' da dxusebague' benne' cheę dul-la.

*Jesús dxenabe' Dios gun chawe'ę bidu ca'*  
(Mt. 19.13-15; Lc. 18.15-17)

<sup>13</sup>Nadxa bęnneache ca' guleché'ę bidu cheę ca' lau Jesús cheę xrua ne'ę lebe', na' benne' ca' dxusede Jesús gulezú lawe' dxeledil-le' benne' ca' zaj nachęlé'ę bidu ca'. <sup>14</sup>Gate ble'e Jesús da dxelunę', na' bzre'ę, ne guzre' le':

—Le güe bidu ca' lataj xelęlá'abe' naga zua'. Quebe guzágale-be' lawe' da benne' zaj naque' ca bidu caní xelu'ę naga dxenná bea Dios. <sup>15</sup>Da li dxapa' le'e, che tu benne' quebe gape' ba lá'ana da dxenná bea Dios ca dxelún bidu caní, cabata' chu'u bęnnea' naga dxenná bea Le'.

<sup>16</sup>Nadxa gúca'a Jesús bidu ca', ne bnide'-be'. Guxrúa ne'ę lebe', na' gunabe' Dios gun chawe'ę-be'.

*Benne' cuide' nape' da gunní'a dxuchála-jlene' Jesús*

(Mt. 19.16-30; Lc. 18.18-30)

<sup>17</sup>Gate bexú'u Jesús neza, na' guzá chegu tu benne' biu, na' bzu zribe' lau Jesús, ne bchebe' Le':

—Benne' xrlátaje, bi dxal-la' guna' cheę gapa' xel-la nabán zeajlí canna?

<sup>18</sup>Jesús guzre' le':

—¿Bizr cheę na' dxu'u neda' xrlátaje? Quębedxa nu chilá' naca xrlátaje. Tuze Dios naque' xrlátaje. <sup>19</sup>Núnbeaquezu' ca da bdxixruj bea Dios gate na' gunné':

Quebe quichju' xrba cheę wechaga na'.

Quebe gutiu' benne'.

Quebe cuanu' cheę benne'.

Quebe nneu' chee' nu benne' da quebe naca na.

Quebe gagu lanu'.

Gudapa ba lá'ana xra xrna'u.

<sup>20</sup>Nadxa bénnea' bechebe':

—Benne' wesede, xúgute' da caní dxuna' nácatea' bidau'.

<sup>21</sup>Na' Jesús gunné'e le' xrtandau', ne guzre' le':

—Tu da dxexájrjenu'. Guxíaj xeajete xúgute' da napu', na' bnezruj benne' xache' ca' dumí chee' na. Nadxa gapu' da gunní'a xabáa. Na' gudá, gacu' ca tu benne' zéajé' chee' te'e xaga béguaj, ne ben neda' tuze.

<sup>22</sup>Gate bene' da nigá, na' benne' cuide' na' bewí'ine lázrele'e, na' be'xíaje' dxewí'ine' lawe' da nácalé'e benne' gunní'a.

<sup>23</sup>Nadxa Jesús gunné'e ni naze, na' guzre' benne' ca' dxusédené':

—Stébeté naca chu'u benne' gunní'a naga dxenná bea Dios.

<sup>24</sup>Belexebánele'e benne' ca' dxusede Jesús ca naca dizra' gunná Jesús, na' Le' guzre' le' xetú lasa:

—Zrí'ina'dau', stébeté naca xelú'u naga dxenná bea Dios benne' dxuluxréen lazre' xel-la gunní'a. <sup>25</sup>Chadidxa te tu bea zren lu negue xeché' quézcala chu'u tu benne' gunní'a naga dxenná bea Dios.

<sup>26</sup>Gate belén benne' ca' dizra' nigá, na' belexebánele'ene', na' buluchebe ljwezre':

—¿Núzraqueze la xca'?

<sup>27</sup>Jesús gunné'e benne' ca', ne guzre' le':

—Quebe seque' nu bénne' gune' da nigá, san Dios wazéquene'. Quebe bi de da quebe gaca gun Dios.

<sup>28</sup>Nadxa Pedro guzre' Jesús:

—Xránantu', netu' ba bcá'anantu' xúgute' da nápanu', ne zéajlentu' Lue'.

<sup>29</sup>Na' bechebe Jesús:

—Da li dxapa' le'e, núteteze benne' gusane' lizre', u benne' biche', u nu'ula zane', u xre', u xrne'e, u zru'ule', u zrí'ine', u xezr la xu chee' ne chia' neda', u ne chee' dizra' chawe' chia', <sup>30</sup>benne' nigá si'e na'a lu xezr la xu nigá tu gaxúa cue' ca' da si'e, xu'u ca', ne benne' biche' ca', ne nu'ula zane' ca', ne xrne'e ca', ne xezr la xu chee' ca', na' weláu zi' xúzrequeze bénneache le'. Lu xezr la xu da za' wazí'queze' xel-la nabán zeajlí canna. <sup>31</sup>Zánete' benne' zaj naca na'a benne' blau xelaque' ca benne' bzebe, na' zánete' benne' zaj naca na'a ca benne' bzebe xelaque' benne' blau.

*Dxuchalaj Jesús xetú lasa ca gaca gate gatié'*

(Mt. 20.17-19; Lc. 18.31-34)

<sup>32</sup>Gate zaj xu'e neza dxelegüene' zjaque' Jerusalén, na' Jesús zria lawe' lau benne' ca' dxusédené'. Dxelezrebe benne' ca', ne lu xel-la dxelezrebe zjácáleñe' Le'. Na' da xula gucá'a Jesús benne' chazrinnu ca' dxusédené', na' guzú lawe' dxé'e le' ca naca da dxal-la' gaca chee'. <sup>33</sup>Na' guzre' le':

—¿Le na' xque nigá! Dxeüendxu zéajdxu Jerusalén naga tu benne' gudé'e neda', Benne' Gulje' Bénneache, lu na' benne' xíchaje' ca' chee' bxruze ca', ne lu na' benne' dxuluxuzájle'e da nadxixruj bea Dios, na' xelechugue' chia' chee' gatia', na' wuludee' neda' lu na' benne' zitu' ca'. <sup>34</sup>Nadxa xelún le' chia' neda', ne xelu'e neda', ne xuluzré'e neda' zrene', na' xelutié' neda'. Gate gaca chunna zra xebana' ládujla benne' gate.

*Jacobo ne Juan dxelenabe' Jesús bi gune' chee'*

(Mt. 20.20-28)

<sup>35</sup>Nadxa Jacobo ne Juan, zri'ine Zebedeo, belezrine' lau Jesús, na' gulé'e Le':

—Benne' Wesede, dxaca lázrentu' gunu' cheentu' da nábantú' Lue'.

<sup>36</sup>Nadxa bchebe Jesús le':

—¿Bi dxaca lázrele guna'?

<sup>37</sup>Na' belexechebe' Le':

—Benna netu' lataj cué'entu', tuntu' chalá'a xabela chiu', ne xetuntu' chalá'a xéglala chiu' naga nna be'u xabáa chiu'.

<sup>38</sup>Na' guzre Jesús le':

—Le'e quebe nézele da dxenábale. ¿Waca xí'ajle le'e da na' xi'aj neda', da zéajje na ca naca da sácadxu? ¿Waca chuale nisa ca chua' neda' nisa lu xel-la gute?

<sup>39</sup>Le' belexechebe':

—Wácantu'.

Na' Jesús guzre' le':

—Da li wé'ajle ca naca da na' xi'aj neda', ne chuale nisa ca chua' neda' nisa. <sup>40</sup>Chee' cué'ele chalá'a xabela chia' u chalá'a xéglala chia', quegá neda' gunna' na. Gaca chee' benne' ca' ba nucueza Dios chee'.

<sup>41</sup>Gate xechí benne' ca' dxusede Jesús belenne' na, na' belezré'e nen Jacobo ne Juan. <sup>42</sup>Jesús gunné' benne' ca', na' guzre' le':

—Ba nézquezle ca dxelún benne' dxelenná be'e benne' xezr la xu ca'. Dxelún cuine' xrane benne' xezr la xu ca'.

Benne' blau ládujla le' dxezi'e ba neza xel-la dxenná bea chee'. <sup>43</sup> Quebe gaca caní ládujla le'e. Che nu benne' dxaca lazre' gaque' benne' blau ládujla le'e, benne' nigá dxal-la' guné' zrin chee ljwezre', <sup>44</sup> na' che nu benne' ládujla le'e dxaca lazre' gaque' benne' xíchaje, benne' nigá dxal-la' gaque' ca tu benne' nada'u chee guné' zrin chee xúgute ljwezre'. <sup>45</sup> Caní gaca na lawe' da cá'anqueze neda', Benne' Gulje' Bénneache, bla'a, quegá chee xelún bénneache zrin chia' neda'. Bla'a chee guna' zrin chee bénneache, ne chee guzúa' xel-la nabán chia' chee guselá' benne' zan.

*Dxexún Jesús tu benne' la chul-la le' Bartimeo*

(Mt. 20.29-34; Lc. 18.35-43)

<sup>46</sup> Nadxa belezrine' xezre Jericó. Gate na' bedxúaj Jesús xezre nigá nen benne' ca' dxusédene', ne nen benne' zante, na' zua tu benne' la chul-la le' Bartimeo, zri'ine Timeo, dxe'e dxu'a neza dxenabe' guna'. <sup>47</sup> Na' ca bémne' dxedé Jesús, benne' Nazaret, ga na', na' benne' la chul-la nigá guzú lawe' dxenné' zizraj:

—Jesús, Zri'ine David, bexache lazre' neda'!

<sup>48</sup> Benne' zan ca' guledil-le' le' chee sue' zrize, na' le' zizrajdxá gunné':

—¿Zri'ine David, bexache lazre' neda'!

<sup>49</sup> Nadxa gugá Jesús, na' gunné':

—Le nne le'.

Na' gulenné' benne' la chul-la na', gulé'e le':

—Bdipa lazru'. Guxasa lawe' da dxenné' lue'.

<sup>50</sup> Nadxa bzale' lazxe' naxrúa cuzre' chalá'ala, na' guxritie' chee zrine' lau Jesús.

<sup>51</sup> Nadxa Jesús gunábene' le':

—¿Bizra dxaca lazru' guna' chiu'?

Na' gunná benne' la chul-la:

—Benne' Weséde, dxaca lazra' xexunu' xiaj lawa'.

<sup>52</sup> Na' Jesús guzre' le':

—Waca xexáju'. Bache bexacu' lawe' da guxéajle'u chia'.

La ble'ete' benne' la chul-la na', na' guxía-jlene' Jesús la neza.

## 11

*Dxu'u Jesús xezre Jerusalén*

(Mt. 21.1-11; Lc. 19.28-40; Jn. 12.12-19)

<sup>1</sup> Gate belezrine' gáguze naga dxe' xezre Jerusalén, ne zaj xu'e la neza naga zaj dxe' xezre Betfagé, ne xezre Betania zran xi'a chee xaga olivo ca', na' Jesús gusel-le' chupa benne' ca' dxusédene', <sup>2</sup> na' guzre' le':

—Le chjaca lu xézredau' da dxe' tu chi na', na' gate zrinle na', cheajxrácale tu burro da'ba' xaga, bea na' netú benne' quebe ne cuié' leba'. Le sezre-ba', ne le che'-ba' nigá. <sup>3</sup> Che nu benne' nabe' le'e bizr chee na' dxesézrele-ba', xégale le': “Xránadxu dxechine'-ba'”, na' la xesé-la'te' leba'.

<sup>4</sup> Nadxa xjaque', ne xeajlexraque' burro na' da'ba' xaga dxu'a dxa xu'u cuita neza, na' gulesézre'-ba'.

<sup>5</sup> Nadxa bal-la benne' zaj zre'e na' gulé'e le':

—¿Bizra' dxunle? ¿Bizr chee na' dxesézrele búrrua'?

<sup>6</sup> Nadxa le' gulé'e benne' ca' ca ba gunnáqueze Jesús, na' belúe' le' lataj. <sup>7</sup> La belexeché'ete' búrrua' lau Jesús, na' buluzrie' zra lané' cúzruba', na' guzría Jesús leba'. <sup>8</sup> Benne' zante gulechíluje' xicha chee', ne xladxe' la neza, na' benne' xula gulechugue' zina' da gulixrué' la neza.

<sup>9</sup> Na' benne' ca' zaj zrie' lawe', ne benne' ca' zjaque' bzébe, gulezú lawe' dxelenné' zizraj:

—¿Gaca ba! ¡Lá'azxa naca benne' ze'e, nase-la Xránadxu Dios Le'! <sup>10</sup> ¡Lá'azxa naca xel-la dxenná bea da za', xel-la dxenná bea chee xradxu David! ¡Gaca ba Dios!

<sup>11</sup> Ca'an guca gate na' guxú'u Jesús xezre Jerusalén, na' guxú'e lu xudau'. Ca gudé gunné'e xúgute da zaj nnita du cuité', na' bezé'e xexáje' xezre Betania nen benne' chazrinnu ca' dxusédene', lawe' da ba zeaj dxezré'.

*Jesús dxugu'e de' xaga higo*

(Mt. 21.18-19)

<sup>12</sup> Gute xu zra xula gate na' gusá'aque' xezre Betania, gudún Jesús. <sup>13</sup> Na' blé'ene' zítu'la dxe' tu xaga higo zria na laga', na' xeajnné'e che zria da zixre lu xaga na', san quebe bi zria na. Lágaze zria na lawe' da quebe ne zrin zra cuía na da zixre. <sup>14</sup> Nadxa Jesús guzre' xaga higo na':

—Cabátadxá nu gagu da zixre chiu'.

Benne' ca' dxusede Jesús belénqueze' na.

*Jesús dxexún lbe'ę lu xudau'*  
(Mt. 21.12-17; Lc. 19.45-48; Jn. 2.13-22)

<sup>15</sup> Ca gudé na' belexezrine' xęzre Jerusalén. Ca guxú'u Jesús lu xudau', guzú lawe' dxulague' lu xudau' benne' zaj zře'e wete, ne benne' zaj zře'e wewa'u na'. Na' bdxixre' blaga cheę benne' weče'ę dumí cheę benne' zitu', ne bdxixre' naga dxelebé' benne' wete bgúgudu ca'. <sup>16</sup> Quebe be'e lataj nu benne' xudéę' xua ca' lu xudau'. <sup>17</sup> Nadxa bsédene' bėnneache ca', dxenné':

—Lu xiche lá'axza dxenná Dios: “Lizra' gaca na tu xu'u naga xuluchálajle Dios benne' zá'aque' xúgutę xęzre.” Le'e ba nunle lizra' ca tu lizre benne' gubán ca'.

<sup>18</sup> Na' benne' xíchaję ca' cheę bxruze ca', ne benne' dxuluxuzájle'ę ca da nadxixruj bea Dios belenne', na' gulezú lawe' dx-elexíluje' ájala gaca xelútete' Jesús lawe' da dxelezrebe' Le'. Ca'an guca lawe' da dxelexebane xúgutę bėnneache ca naca da dxuęde Jesús le'. <sup>19</sup> Ca gula chizrela, Jesús bezé'ę lu xęzre.

*Dxebizre xaga higo*  
(Mt. 21.20-22)

<sup>20</sup> Ca gula zra xula che zílala, na' Jesús, ne benne' ca' dxusédene' belexedéę' na', na' belelé'eng' xaga higo na', ba nabizre na dutę lue na. <sup>21</sup> Nadxa xeajsá lazre Pedro, na' guzre' Jesús:

—Benne' wesęde, gunná'xque xaga higo nigá da gulu'u na de'. Bache gubizre na.

<sup>22</sup> Jesús gunné':

—Le cheajlí lazre Dios. <sup>23</sup> Da li dxapa' le'e, che nütetezele mnale, xełe xi'a nigá: “Cuasa lue' nigá, xeajchú'u lu nísadau’”, ne che quebe dxun chupa lázrele, na' chéajlele waca da ba gunnale, na' gácaqueze na. <sup>24</sup> Cheę le na' dxapa' le'e, xúgutę da nábale Dios gate dxuchálajlele Le', che chéajlele ba guzile na, ca'an gácaqueze. <sup>25</sup> Gate na' dxuchálajlele Dios, che dxezrá'ale nu benne', le gunitę lau cheę bėnnea' cheę cá'anqueze Xrale zuę' xabáa gunitę lawe' dul-la da nabágale. <sup>26</sup> Che quebe gunitę laule cheę bėnnea', Xrale zuę' xabáa quebe gunitę lawe' dul-la da nabágale.

*Ca naca xel-la dxenná bea da napa Jesús*  
(Mt. 21.23-27; Lc. 20.1-8)

<sup>27</sup> Nadxa belexezrine' xęzre Jerusalén, na' ca dxedá Jesús le'aj xudau', na' gulebiga lau Le' benne' xíchaję ca' cheę bxruze ca',

ne benne' dxuluxuzájle'ę da nadxixruj bea Dios, ne benne' gula ca'. <sup>28</sup> Na' benne' caní gulenábene' Jesús:

—¿Bizra xel-la dxenná bea napu' dxunu' da caní? ¿Nuzra benna lue' xel-la dxenná bea nigá?

<sup>29</sup> Na' bečebe Jesús:

—Cá'anqueze neda' de tu da nábeda' le'e. Che xechébele chia', nadxa xapa' le'e ca naca xel-la dxenná bea da napa' dxuna' da caní. <sup>30</sup> ¿Nuzra gusel-la Juan bchue' bėnneache nisa? ¿Dios che bėnneache? Le xechebe na'a.

<sup>31</sup> Nadxa gulezú lau benne' ca' dxu-luchálajle' leze', dxelę ljwezre':

—Che xędxu Le', Dios gusel-le' le', na' mnáqueze': “¿Bizr cheę na' quebe guxéajlele cheę'?” <sup>32</sup> Che mnadxu bėnneache gulesel-le' le', dxal-la' zrėbedxu da xelún benne' xęzre ca'.

Caní gulenné' lawe' da xúgutę benne' xęzre nigá dxelájle'ę guca Juan benne' bchálajle' waláz cheę Dios. <sup>33</sup> Ca'an guca, gulenná benne' ca', dxelę Jesús:

—Quebe nézentu'.

Nadxa gunná Jesús, dxe'e le':

—Cá'anqueze neda' quebe nnia' ca naca xel-la dxenná bea da napa' dxuna' da caní.

## 12

*Da dxul'e na ca naca cheę benne' węn zrin quebe zaj naque' xrlátaje*

(Mt. 21.33-46; Lc. 20.9-19)

<sup>1</sup> Nadxa guzú lau Jesús dxuchálajlene' benne' ca' tu da dxul'e na. Dxe'ę le':

—Zua tu benne' bde'ę lba uva ca' lu xęzr la xu cheę', na' bene' le'aj cheę na. Bene' tu xiaj lutju naga guchuchuje' uva ca', ne bene' tu bdupa' naga cue' benne' guxúę' da caní.

<sup>2</sup> Nadxa bdeę' xęzr la xu cheę' na' lu na' benne' węn zrin ca' cheę xelune' la'a lina cheę na, na' guzú'ę zéaję' xęzre zitu'. <sup>3</sup> Ca gula zra cheę lina, na' gusel-le' tu bi węn zrin cheę' cheajxęzri'ibe' lu na' benne' węn zrin ca' ca naca lina da dxal-la' xęzi' benne' xranbe'. <sup>4</sup> Na' benne' węn zrin ca' gulel-le'-be', ne buluzalje'-be', na' belexesel-le'-be' dáchezebe'. <sup>5</sup> Nadxa xránabe' gusel-le' bi węn zrin xula, na' bi nigá belú'e-be' xiaj, ne gulelé'ę xíchajbe', ne bulucháchalęne'-be'. <sup>6</sup> Na' xránabe' na' gusel-le' xetube', na' bi nigá belútete' benne' ca' lebe'. Ca gudé

na' xránabe' gusel-le' bi zandxa bi xula, na' cá'anqueze belú'e bál-labe', ne belútete' xebál-labe'.

<sup>6</sup> 'Xránabe' zua tu zrí'ine' bi biu, bi nazrí'ilé'ene', na' naga bzébetę gusel-le' zrí'ine' nigá, dxenné' lu xichaj lázrdawe': Dخال-la' xelape' ba lá'ana zrí'ina'. <sup>7</sup> Benne' wen zrin ca' gulenné', dxelé ljwezre': "Bi nigá gueque cheebe' xęzr la xu nigá. Gútetędxu-be' na'a, na' dxi'u xegá'anedxu da nigá." <sup>8</sup> Ca'an guca, gulęl-le'-be', ne belútete'-be', na' gulebéaje' bel-la' dxen cheebe' lu xęzr la xu na'.

<sup>9</sup> Nadxa Jesús gunábene' benne' xudau' ca':

—¿Ájazra gun xrane xęzr la xu nigá? Walé'e, na' gútetę' benne' wen zrin ca', na' gudé'e' xęzr la xu chee' lu na' benne' xula ca'. <sup>10</sup> Ba blábale da naxúaj na lu xiche chee Dios. Dxenná na:

Xiaj na' da quebe buluchine benne' wen xu'u,

xiaj na' naca na'a xiaj blau chee xu'u.

<sup>11</sup> Da nigá ben Xránadxu, na' dxexebánedxu chee na.

<sup>12</sup> Nadxa gulaca lazre' xelęl-le' Jesús lawe' da zaj nézene' bchálaje' da dxulé'e nigá chee gulé'ene' ca zaj naca le'. Quebe bi gulunę' lawe' da gulezrebe' bi xelún benne' xęzre ca'. Chee le' na' bulusane' Jesús, besí'aque'.

Da bchalaj Jesús chee da dxuchizruj xu'u lawe'

(Mt. 22.15-22; Lc. 20.20-26)

<sup>13</sup> Ca gudé na' gulesel-le' lau Jesús bal-la benne' xudau' fariseo, ne benne' zaj de'e Herodes chee gulebéaje' Le' dizra' chee xelezéquene' xelawe' Le' zria. <sup>14</sup> Benne' caní belelé'e lau Jesús, na' gulé'e Le':

—Benne' wesęde, ba nézentu' ca dxenáu' da li, ne quebe dxezí'u ca da dxelenaze bėnneache, lawe' da quebe dxenná'u Lue' ca zaj naca cúzreze bėnneache. Da li naca ca dxusėdenu' bėnneache da naca chee Dios. ¿Dxunna da nadxixruj bea Dios lataj quízrujdxu da dxuchizruj benne' dxenná bea Roma dxi'u, che cabí? ¿Dخال-la' quízrujdxu, che quebe quízrujdxu?

<sup>15</sup> Jesús dxéquebe'ene' quegá da lazre' dxelenábene' Le' da nigá, na' guzre' le':

—¿Bizr chee na' dxebéajle neda' dizra'? Le dajguá nigá tu dumí da dxízrujle chee le'eda' na.

<sup>16</sup> Na' bedajlegüé'e na, na' ca ble'e Jesús le' na, na' gunábene' le':

—¿Nu lau da' dumí nigá, ne nu la naxúaj na nigá?

Na' gulé'e Le':

—Chee benne' dxenná bea Roma.

<sup>17</sup> Nadxa Jesús guzre' benne' ca':

—Le gunezruj chee benne' dxenná bea Roma da naca chee', na' le gunezruj chee Dios da naca chee Dios.

Na' belexebánene' ca naca da bchalaj Jesús.

Da bchalaj Jesús ca xelexebán benne' gate

(Mt. 22.23-33; Lc. 20.27-40)

<sup>18</sup> Nadxa belezrín lau Jesús bal-la benne' xudau' saduceo. Benne' caní dxelenné' quebe xelexebán benne' gate. Ca'an guca, gulenábene' Jesús caní:

<sup>19</sup> —Benne' wesęde, Moisés bzuaje' cheędxu da nadxixruj bea nigá: "Che tu benne' biu gatie', ne xegá'ana zru'ulę', na' quebe nu zua bi chee bėnnea', na' benne' biche' dخال-la' xequé'e nu'ula na' gute benne' chee' chee sua zrí'ine bėnnea' gutie'." <sup>20</sup> Gulezrá' gazre benne' biche'. Benne' nedxu bchaga na'abe', na' gútebe' quebe nu zrí'inebe' zua. <sup>21</sup> Na' benne' gudxupe' bequé'e nu'ula na', na' cá'anqueze gutie' quebe nu zrí'ine' zúaqueze. Cá'anqueze guca chee benne' guxunne'. <sup>22</sup> Ca'an guca, benne' gazre caní gulezúalene' nu'ula na', na' netue' quebe nu zrí'ine' guzúa. Naga xaajsetę na gútebe nu'ula'. <sup>23</sup> Na'a xca', gate na' xelexebán benne' gate, ¿nula benne' biu caní gaque' benne' chee nu'ula na', lawe' da gulezúalę benne' gazre ca' le'?

<sup>24</sup> Nadxa Jesús guzre' benne' ca':

—Nanítele le'e lawe' da quebe núnbeale da naxúaj na lu xiche chee Dios, ne quebe nézele ca naca xel-la waca chee Dios. <sup>25</sup> Gate na' xelexebán benne' gate, québedxa xuluchaga ne'e, ne québedxa xuluchaga na' bi nu'ula ca'. Xelaque' ca zaj naca gubáz chee xabáa. <sup>26</sup> Na'a, ca naca chee benne' gate che xelexebane', ¿quebe ne gulábale ca da naxúaj na lu xiche chee Moisés ca gunná Dios gate na' bchálajlene' Moisés tu lu xágadau' da dxala xi'? Gunná Dios caní: "Neda' naca' Dios chee Abraham, ne chee Isaac, ne chee Jacob." <sup>27</sup> Dios naque' Dios, quegá chee benne' gate ca'. Naque' Dios



chee benne' ban ca'. Ca'an naca, álega nanítele le'e.

*Da nadxixruj bea Dios da naca blau*  
(Mt. 22.34-40)

<sup>28</sup> Na' zéqueze tu benne' dxuxuzájle'e da nadxixruj bea Dios, na' benne' da dxuchalaj Jesús, ne nézene' bzri'e dizra' chawe', na' gunábene' Le':

—¿Bizra da nadxixruj be'e Dios naca na da blaudxa?

<sup>29</sup> Na' Jesús guzre' le':

—Da bdxixruj be'e da naca na da blaudxa ca xúgute dxenná na caní: Le xene benne' Israel. Xránadxu Dios tuze naque'.

<sup>30</sup> Bzri'i Xranu' Dios du lazru', ne nen duté bénne' du xu'u, ne nen duté xichaj lázrda'u, ne nen duté xel-la wal-la da napu'. Da nigá naca da nadxixruj bea da blaudxa, <sup>31</sup> na' da nadxixruj bea gudxupe' nácaqueze na ca le na, da dxenná na caní: Bzri'i benne' xula ca nazri'i cuinu'. Quebe zua xetú da nadxixruj bea da naca blaudxa ca da chupa caní.

<sup>32</sup> Nadxa gunná bénnea' dxuxuzájle'e da nadxixruj bea Dios, dxe'e Jesús:

—Ca'an xanne naca ca bechebu', Benne' dxusede. Da li naca ca dxennáu'. Zua tuze Dios, ne quebe nu zua xetú ca Le', <sup>33</sup> na' che zri'idxu Dios du lázredxu, ne nen duté xichaj lázrdaudxu, ne nen duté bénne' du xú'udxu, ne nen duté xel-la wal-la da nápadxu, ne che zri'idxu benne' xula ca nazri'i cuínadxu, da caní zaj zácadxa na ca xúgute be xixre' ca' dxútedxu-ba' lau Dios, ne ca xúgute da dxuzéxedxu lu cugu chee Dios.

<sup>34</sup> Nadxa Jesús, ca benne' bchálaje' chawe', na' guzre' le':

—Xeláteze ne de na chee nna bea Dios xichaj lázrda'u.

Na' québedxa nu bexazre nábene' Le' dizra' ca'.

*¿Nu zri'ine' naca Cristo?*  
(Mt. 22.41-46; Lc. 20.41-44)

<sup>35</sup> Jesús dxusedene' benne' ca' lu xudau', na' gunné':

—¿Bizr chee na' dxelenná benne' dxuluxuzájle'e da nadxixruj bea Dios naca Cristo zri'ine David? <sup>36</sup> David ná'queze ca bzéajni'i Be' Lá'azxa le', gunné':

Xránadxu Dios guzre' Xrana':  
“Gudxé'e chalá'a xabela chia',  
ca zrin zra ba nuzúa' benne' dxeledábague' lue',

chee na be'enu' le'.”

<sup>37</sup> Che David ná'queze dxenné': “Xrana’”,  
¿ájala chee na' naque' zri'ine'?

Benne' zan ca' du lazre' buluzé nague' chee'.

*Jesús dxulé'ene' zaj nachixre benne' ca' dxuluxuzájle'e da nadxixruj bea Dios*

(Mt. 23.1-36; Lc. 11.37-54; 20.45-47)

<sup>38</sup> Ca dxusede Jesús benne' ca', na' gunné':

—Le gapa chi'i cuínale chee benne' ca'an dxuluxuzájle'e da nadxixruj bea Dios. Benne' caní dxeledánene' dxelácue' zra lane' tunna, ne dxeledánene' xulugapa bénneache le' diuzre nen dizra' ba lá'ana lau bénneache ca'. <sup>39</sup> Benne' caní dxeledánene' dxelebé'e lataj blau lu xu'u naga dxelezraga benne' dxelúe lá'ane' Dios, ne dxeledánene' dxelebé'e lataj blau naga dxelawe' xrche'. <sup>40</sup> Benne' caní dxelegüe' lizre xrlataj nu'ula ca' ba gulate benne' chee', na' chee xululé'e cuine' ca benne' xrlátaje, dxelune' xel-la dxuluwizraj Dios tunna. Le' zaj nabágadxe' zria.

*Dumí da gulu'u nu'ula xache' ba gute benne' chie'*  
(Lc. 21.1-4)

<sup>41</sup> Tu lasa gate na' dxe' Jesús lu xudau' cuita naga dxelegü'e dumí, na' dxenné'e ca dxelún benne' ca' dxelegü'e dumí, ne ca dxelún benne' gunní'a ca', dxelegü'e dumí zren. <sup>42</sup> Ca'an guca, bzrin tu nu'ula xache' ba gute benne' chie', na' gulu'e chupa dumí lásedau' da quebe zaj zácate can. <sup>43</sup> Nadxa gunné' Jesús benne' ca'an dxusedene', na' guzre' le':

—Da li dxapa' le'e, nu'ula xache' nigá bnézrujdxé' ca xúgute benne' ca'an gulegü'e dumí. <sup>44</sup> Xúgute benne' ca' gulegü'e da québedxa dxelechínne'. Nu'ula xache' nigá gulu'e ca naca da nape', da nunte gawe'.

## 13

*Dxuchalaj Jesús ca gaca gate xrinnaj xudau'*  
(Mt. 24.1-2; Lc. 21.5-6)

<sup>1</sup> Gate bedxúaj Jesús lu xudau', na' tu benne' dxusedene' guzre' Le':

—Benne' Wesede, gunná'xque ca zren naca xudau', ne xiaj xrtante caní.

<sup>2</sup> Bechebe Jesús:

—¿Dxelé'enu' na'a ca zren naca xudau' nigá? Québedxa xegá'ana tu xiaj cuzru

ljwezre nigá. Ca naca xudau' nigá wabía xí'queze na.

*Da xelunna bea na gate cheajsé cheę xęzr la xu nigá*

(Mt. 24.3-28; Lc. 21.7-24; 17.22-24)

<sup>3</sup>Nadxa xjaque' lu xi'a cheę xaga olivo ca', da zua na chalá'a ca li dxa xu'u xudau'. Gate dxe' Jesús ga na', na' Pedro, ne Jacobo, ne Juan, ne Andrés gulé'e Jesús leze':

<sup>4</sup>—Dxaca lázrentu' gulé'enu' netu' bata gaca caní. ¿Bizra da ca' xelunna bea na gaca xúgute da caní?

<sup>5</sup>Na' bechebe Jesús:

—Le gapa chí'i cuínale cheę quebe nu si xę le'e, <sup>6</sup>lawe' da xelalá' benne' zante xelún lu'a neda', weleonné' zaj naque' Cristo, na' welezí xę'e benne' zante.

<sup>7</sup>'Le'e, gate xénele gaca wedil-la, ne ba dxaca wedil-la, quebe zrébele. Cá'queze dxal-la' gaca na, san quegá ne zrin zra cheajsé cheę na, <sup>8</sup>lawe' da xelalá-lalę benne' tu xęzr la xu benne' xetú xęzr la xu, na' tu xęzre benne' tıl-lalę na xetú xęzre. Wazrú' zánete xęzre, ne wata' gubina', ne wadxé'e na zraga bėnneache. Da caní zaj naca na naga su lauze ca naca da xezezaca zi' bėnneache.

<sup>9</sup>'Le guxúe cuínale lawe' da xuludé'e le'e lu na' benne' xu'u lawe', na' xuluzalję' le'e lu xu'u naga dxulucá'ana szreņę' Dios. Xuludé'e le'e lau benne' xu'u lawe' ca', ne lau benne' dxeleńná be'e lawe' da nácale chia' neda'. Gate ca'an gaca, na' guchálajle chia' neda' lau benne' ca'. <sup>10</sup>Nédxudxa ca zrin zra cheajsé cheę na, dizra' chawe' chia' gaca lban cheę na lau bėnneache zaj zre'e xúgute xęzr la xu. <sup>11</sup>Gate xelexé'e le'e cheę xuludé'e le'e lu na' benne' xu'u lawe' ca', quebe cue'le gunne xue bi nnae, ne quebe quilaj lázrele ájala guchálajle. Nnele ca da gunna Dios le'e zra na' lawe' da quegá le'eze nnele, san Be' Lá'azxa, Le' nne'. <sup>12</sup>Ca xelún bėnneache lu zra na', xuludé'e' bi biche' ca' lu na' benne' xelútie' lebe'. Cá'anqueze xelún xruze xrna' ca', xuludé'e' zrí'inequeze'. Na' zrí'ine' ca' weledábagabe' xruze xrnabe', ne xelunbe' xelátie'. <sup>13</sup>Xúgute bėnneache xelezre'e le'e lawe' da nácale chia' neda'. Bėnnea' ze tipe' ca zrindxa zra cheajsé cheę na, la bėnnea'.

<sup>14</sup>'Daniel, bėnnea' bchálaje' waláz cheę Dios bzujaje' ca naca cheę da sban da guzrí'a xi na. Gate lé'ele le'e zria da nigá lataj lá'azxa naga quebe dxal-la' cuía na, nadxa

benne' zaj zre'e xęzre ca' zaj nababa xęzr la xu Judea dxal-la' xuluzrńnuje', ne chjaque' lu xi'a zren. (Benne' dxulabe' da nigá dxal-la' cheajń'ine' da naca cheę na.) <sup>15</sup>Nu benne' zria chju'u lizre' lu zra na' quebe dxal-la' xexétaje' cheę bi xebéaje' lu xu'u. <sup>16</sup>Benne' ze le'e xixre' quebe dxal-la' xęzrine' lizre' cheę xequé'e zra lane'. Dخال-la' xuluzrńnujte benne' caní. <sup>17</sup>Baxache' xelaca nu'ula zaj zue' zi'i, ne nu'ula ca' zaj nuxre' bidu dxe'ene lu zra na'. <sup>18</sup>Le naba lau Dios cheę quebe gaca beu' zaga gate na' dxal-la' guzrńnujle, <sup>19</sup>lawe' da xezezaca zidxa bėnneache lu zra ca'an ca da quebe ne xelezacate', gulala ben Xránadxu Dios xęzr la xu nigá, ne québedxa xelezacdxę' ca'. <sup>20</sup>Che Xránadxu Dios quebe guzáchie' zra ca', québedxa nu láqueze', san ba bzachie' zra ca'an lawe' da nazrí'ine' bi cheę' ca', bi ca' ba gucá'a Le'.

<sup>21</sup>'Lu zra na', che nu benne' dxe'e le'e: "Le na' xque, nigá zua Cristo", u che nne': "Le na' xque, na' ze'", quebe chėjlele cheę'. <sup>22</sup>Welelá' benne' xelezí xę'e, benne' xelune' lu'a Cristo, ne xelune' lu'a xel-la waca cheę xabáa cheę xelezí xę'e bi ca' ba gucá'a Dios che xelezéquene'. <sup>23</sup>Le sua le'e ban lazre'. Neda' ba gucha' le'e xúgute nédxute ca gaca na.

*Ca gaca gate xida Benne' Gulje' Bėnneache*  
(Mt. 24.29-35, 42-44; Lc. 21.25-36)

<sup>24</sup>Nadxa gunná Jesús:

—Lu zra ca', gate te zra cheę xel-la zi' caní, na' chul-la gubizra, ne québedxa gusení' beu'. <sup>25</sup>Belaj ca' xelexruij na zran xabáa, na' ca da zaj nalá' zaj ze tipa zran xabáa welezrízete na. <sup>26</sup>Ca nadxa xelexé'ene' neda', Benne' Gulje' Bėnneache, za'a lu beuj bza, napa' xel-la waca zren, ne da xabáa chia'. <sup>27</sup>Na' la sél-latea' gubáz cheę xabáa chia' ca' cheę xuluchague' benne' ca' gunní'a, benne' zaj zre'e dapa saca cheę xęzr la xu nigá, benne' zitu' zá'aca nila, zá'aca na'la.

<sup>28</sup>'Le gusede ca naca da dxulé'e na ca naca cheę xaga higo. Gate na' dxelexedxé'ene zruze na, ne zá'aca xrlegue na, na' ba nézele za beu' la. <sup>29</sup>Cá'anqueze, gate na' lé'ele ba dxelaca da caní, nézele ba zua gáguze zra cheajsé na, ne gácate na. <sup>30</sup>Da li dxapa' le'e, xúgute da caní gaca na nédxudxa ca xelate bėnneache zaj zre'e lu zra na'. <sup>31</sup>Xabáa ne

xęzr la xu nigá wadé cheę na. Xrtizra' nigá quebe te na ca'anze, san waca li na.

<sup>32</sup>Ca naca cheę zra na', ne cheę beu' na' quegá nu neze bata gaca na. Quebe zaj neze gubáz cheę xabáa, ne Zrí'inequeze Dios quebe nézene'. Tuze Xradxu Dios nézene'.

<sup>33</sup>Cheę lę na', le sua le'e ban lazre'. Le guxúe, ne le guchálajlę Dios lawe' da quebe nézele bátala zrin zra na'. <sup>34</sup>Gaca na ca guca cheę tu benne' biu, benne' guzę'e zęaje' zitu'. Gate na' za dxúaje' xu'u, na' dxudęe' da nape' lu na' bi wen zrin cheę' ca', ne dxunęzruje' tu tube' zrin da xelunbe', ne dxusebague' benne' ze' dxa xu'u guxúe xánnie'. <sup>35</sup>Cheę lę na', le sua le'e ban lazre' lawe' da quebe nézele le'e bátala xelá' xrane xu'u, che dxe xrinneze, che dxęla, che ca cuezre xjeaj, che che zílala, <sup>36</sup>ga gaze xelę'e chadí dute, na' cheajxraque' le'e dxásele. <sup>37</sup>Ca da dxennía', dxapa' le'e, dxapa' xúgute benne': ¡Le sua ban lazre'!

## 14

*Dxelexegá'ane' dizra' cheę xelę-lę' Jesús*

(Mt. 26.1-5; Lc. 22.1-2; Jn. 11.45-53)

<sup>1</sup>Xechupa zra za zrin cheę xelune' laní cheę cheę xulusá lazre' ca' naca da ben Dios gate na' bebéaje' benne' Israel ca' lu xęzr la xu Egipto, laní na' dxelawe' xeta xtila da quebe nachixe cua zichaj cheę na. Na' benne' xíchaje' ca' cheę bxruze ca', ne benne' dxuluxuzájle'e da nadxirruj bea Dios belilaj lazre' ájala xelune' cheę xelę-lę' Jesús bagácheze cheę xelútie' Lę'. <sup>2</sup>Na' gulenné':

—Quegá gundxu na lu laní, cheę quebe dxę'ena zraga bęnneache.

*Tu nu'ula dxegúę'e da za xichaj Jesús*

(Mt. 26.6-13; Jn. 12.1-8)

<sup>3</sup>Zua Jesús lu xęzre Betania, lu lizre tu benne' lę' Simón, benne' guzrie' wę' guzru'. Dxácatę zaj dxe'e dxelawe' na', na' bzrin tu nu'ula nu'e tu da dau' da naca na xiaj xrtan da nazí le na alabastro, ne nazratę na da za da dxelá zixre cheę xiaj nardo, da zácalę'e na. Na' gulę'e da dau' na', ne blálaje' da za na' xichaj Jesús. <sup>4</sup>Bal-la benne' ca', benne' zaj zre'e na', belezre'e, na' gulenné', dxelę ljwezre':

—¿Bizr cheę na' ben ditaj nu'ula nigá da za na'? <sup>5</sup>Waca ta'u da na' cheę sídxadxu ca lázrujdxu cheę tu iza, cheę gácalędxu benne' xache' ca'. Na' guledil-lę' nu'ula'.

<sup>6</sup>Na' Jesús guzre' lę':

—Quebe xęle nu'ula nigá ca'. ¿Bizr cheę na' dxunle lę' zęde? Ca naca da ben nu'ula nigá chia' neda' naca na da cháwle'e. <sup>7</sup>Benne' xache' ca' tu zrázqueje' ládujla le'e. Waca gunle benne' ca' chawe' gate dxaca lázrele, san neda' quegá tu súaleza' le'e. <sup>8</sup>Nu'ula nigá bene' ca da guzęuene', gulu'e da za bel-la' dxen chia' nédxula cheę zra gate gachia' lu xędxu ba. <sup>9</sup>Da li dxapa' le'e, gáteteze na' gaca lban cheę dizra' chawe' chia' lu xúgute xęzre zaj nnita xęzr la xu nigá, ca'anqueze zrálajqueze ca naca da ben nu'ula nigá, cheę xulusá lazre' cheę'.

*Judas dxexegá'ane' dizra' gudęe' Jesús lu na' benne' ca' dxeledábague' Lę'*

(Mt. 26.14-16; Lc. 22.3-6)

<sup>10</sup>Nadxa Judas Iscariote, tu benne' chazrinnu ca' dxusęde Jesús, guxiaje' xeajchálajlęne' benne' xíchaje' ca' cheę bxruze ca' cheę xelęxegá'ane' dizra' ájala gune' gudęe' Jesús lu na' benne' ca'. <sup>11</sup>Ca belén benne' ca' ca gunná Judas, gulebéle'ene', na' gulechebe lazre' xulunęzruje' lę' dumí. Nadxa Judas guzú lawe' dxexilaje' ájala gudęe' Jesús lu na' benne' ca'.

*Da dxágudxu cheę gusá lázredxu ca gute Jesús*

(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup>Zra nedxu cheę laní gate dxelawe' xeta xtila da quebe nachixe cua zichaj cheę na, ne dxelutię' zríla'dau' cheę Laní Pascua, gate na' dxulusá lazre' ca guca gate bebéaj Dios benne' Israel ca' lu xęzr la xu Egipto, na' benne' ca' dxusęde Jesús buluchebe' Lę': —¿Gazra dxaca lazru' chęajntu' chea-jcuęzentu' da gágudxu Laní Pascua?

<sup>13</sup>Nadxa Jesús gusel-lę' chupa benne' ca' dxusędene'. Dxe'e lę':

—Le chjaca lu xęzre Jerusalén, na' cheajxrácale tu benne' biu ze nu'e tu dxe'e nisa. Le chjácłene', <sup>14</sup>na' naga xęxu'e, xęle benne' xrane xu'u na': "Benne' Wesęde cheędxu dxenné': ¿Gazra zua xu'u naga guna' Laní Pascua, cheę gawa' tu zren nen benne' ca' dxusędeda'?" <sup>15</sup>Nadxa gulę'ene' le'e tu xu'u zren da naca na gudxupe' cuía sibe da bache nabeza na. Na' gucuzęle da gágudxu.

<sup>16</sup>Nadxa benne' ca' dxusędene' belexedxúaje' gusá'aque', na' belezrine'

xezre Jerusalén. Na' guca xúgute ca da ba guzre Jesús le', na' bulucueze' da xelawe' lu Laní Pascua.

<sup>17</sup> Ca gula chizrela, na' bzrin Jesús nen benne' chazrinnu ca' dxusédene'. <sup>18</sup> Na' ca zaj dxe'e dxelawe', na' gunná Jesús, dxe'e le':

—Da li dxapa' le'e, tu benne' ládujla le'e, benne' dxawe' tu zren nen neda', gudée' neda' lu na' benne' ca' dxeledábage' neda'.

<sup>19</sup> Nadxa benne' ca' gulezúa xácheze', ne gulezú lawe' dxuluchébe' Jesús tu tue':

—¿Neda' xca'?

Na' xetúe' cá'anqueze guzre' Le':

—¿Neda' xca'?

<sup>20</sup> Nadxa bechébe Jesús, dxe'e le':

—Tu benne' ládujla le'e chazrínmule, benne' dxawe' tu zren nen neda' lu xé'ena nigá. <sup>21</sup> Da li gatia' neda', Benne' Gulje' Bénneache, ca da naxúaj na chia' lu xiche chee Dios. Baxache' naca chee benne' na' gudée' neda' lu na' benne' ca' dxeledábage' neda'. Cháwedxa gaca chee bènea' la ca gúlaje'.

<sup>22</sup> Dxácate zaj zré'e dxelawe', na' gucá'a Jesús xeta xtila, ne guzre' Dios: "Xcalenu'." Ca gudé búzruje' na, na' bnéruje' na chee benne' ca', ne guzre' le':

—Le gagu na. Da nigá dxulé'e na ca gaca chee bel-la' dxen chia'.

<sup>23</sup> Nadxa guqué' tu da dxé'ajdxu, ne ca gudé guzre' Dios: "Xcalenu'", na' bnéruje' na benne' ca', na' xúgute' gulé'aje' late' weaj da na'. <sup>24</sup> Nadxa Jesús guzre' le':

—Da nigá zéaje na dxen chia' da dxucá'ana chawe na xel-la wezría cube. Dxen chia' nigá lalaj na ne chee benne' zan. <sup>25</sup> Da li dxapa' le'e, québedxa xí'aja' xrise uva caní ca zrindxa zra gate na' xí'aja' da cube naga dxenná bea Dios xabáa.

*Dxulé'e Jesús nna Pedro quebe núnbe'e Jesús*

(Mt. 26.30-35; Lc. 22.31-34; Jn. 13.36-38)

<sup>26</sup> Ca gudé belul-le' da gaca ba Dios, na' belegüene' lu Xi'a Xaga Olivo Ca'. <sup>27</sup> Nadxa gunná Jesús, dxe'e le':

—Xúgutele le'e gusán lázrele neda' na'a xela lawe' da naxúaj na lu xiche chee Dios, dxenné': "Gutia' benne' dxuxúe' zrila' ca', na' zrila' ca' welase dinnajba'." <sup>28</sup> Gate te xebana' lu xedxu ba, wexá'a neda' nédxula ca le'e naga nababa Galilea.

<sup>29</sup> Nadxa Pedro guzre' Jesús:

—Láqueze xúgute benne' caní xulusán lazre' Lue', neda' québequeze guna' ca'.

<sup>30</sup> Jesús guzre' le':

—Da li dxapa' lue', lu xela nigaze, nédxula ca za cuezre xjeaj chupa lasa, nnau' chunna lasa quebe núnbe'u neda'.

<sup>31</sup> Na' dxennáqueze Pedro na', gunné':

—Láqueze gatia' tu zren nen Lue', québequeze nnia' quebe núnbe'a Lue'.

Cá'anqueze gulenná xúgute'.

*Jesús dxuchálajlene' Dios tu lataj nazí le na Getsemaní*

(Mt. 26.36-46; Lc. 22.39-46)

<sup>32</sup> Nadxa belezrine' tu lataj naga nazí le na Getsemaní, na' gunná Jesús, dxe'e benne' ca' dxusédene':

—Le cuezra nigá dxácate cha'a cheajchálajlena' Dios.

<sup>33</sup> Nadxa Jesús guché'e Pedro, ne Jacobo, ne Juan, na' guzú lau dxezúa xáche'le'e.

<sup>34</sup> Na' dxe'e benne' ca', dxenné':

—Ba dxunte na watia' lawe' da zua xáche'le'a. Le xegá'ana le'e nigá, ne le sua ban lazre'.

<sup>35</sup> Nadxa Jesús guz'é zéaje' xelate' ca na'la, na' guzúe' sudxú'ala, gunabe' Dios che gaca, quebe té'e xel-la zi' ca da dxal-la' saque' lu zra na'. <sup>36</sup> Ca dxuchálajlene' Dios na', gunné':

—Xrae, xúgute wazéquenu' Lue'. Bselá neda' chee quebe saca zi'a lu da caní. Quebe gaca ca dxaca lázreza' neda', san ca dxaca lazru' Lue' gaca na.

<sup>37</sup> Nadxa bezrine' naga zaj zra' benne' ca'an dxusédene', ne xeajxraque' le' dxelásie'. Na' Jesús guzre' Pedro:

—Simón, ¿dxásequezu' nigá? ¿Quebe guzéquenu' gusebán lazru' tu chí'idau'ze?

<sup>38</sup> Le sua ban lazre', ne le guchálajle Dios chee quebe gun zréaje da xriwe' le'e. Da li, lu xichaj lázrdaule dxaca lázrele gunle da xrlátaje, san lu belá' dxen chee dxate ni'a na'le.

<sup>39</sup> Nadxa Jesús guxíaje' da xula zeajchálajlene' Dios, na' tuze ca dxenné'. <sup>40</sup> Nadxa ca bezrine', xecha lasa xeajxraque' benne' ca'an dxusédene', dxelásie' lawe' da xu'u' bchigala xiaj lawe'. Benne' caní quebe belexezrela lazre' bi xelé'e Le'. <sup>41</sup> Na' ca bezrín Jesús da guxunne' lasa, na' guzre' benne' ca':

—¡Le gase na'a, ne le xezí' lázre!' ¡Bache na! ¡Ba bzrin zra tea' neda', Benne' Gulje' Bénneache, lu na' benne' dul-la ca'!  
<sup>42</sup> ¡Le chasa! ¡Le chu'u na'a! ¡Ba za benne' gudé' neda' lu na' benne' ca' dxeledábage' neda'!

*Dxelel-le' Jesús*

(Mt. 26.47-56; Lc. 22.47-53; Jn. 18.2-11)

<sup>43</sup> Dxácate dxuchalaj Jesús caní, na' bzrin Judas, tu benne' nabábalene' benne' chazrinnu ca' dxuséde Jesús, na' zjácale benne' zan le', zaj nu'e xia nalá, ne xaga ca'. Zaj naque' benne' gulesel-la benne' xíchajé ca' chee' bxruze ca', ne benne' ca' dxuluxuzájle'e da nadxixruj bea Dios, ne benne' gula sina ca'. <sup>44</sup> Judas, benne' dxudé' Jesús lu na' benne' ca' dxeledábage' Le', ba blé'ene' benne' ca' tu da gune' da gaca bea na nule' naca Jesús, gunné':

—Bénnea' gunupa', benne' na' quél-lale. Le xeché'e, ne le guxúe xanne' chee' quebe xelé'.

<sup>45</sup> Na' ca' bzrine' na', gubigue' lau Jesús, ne dxé'e Le':

—Benne' Weséde.

Na' bnupe' Le'. <sup>46</sup> Nadxa benne' ca' gulél-le' Jesús, ne belexeché'e Le' ba nadxéaje'.

<sup>47</sup> Tu benne' dxune' Jesús tu zren guléaje' xia nalá chee', na' guchugue' naga tu bi wen zrin chee' bxruze blau. <sup>48</sup> Nadxa Jesús guzre' benne' ca':

—¿Bdxuajle le'e zale nen xia nalá, ne xaga ca' chee' quél-lale neda', dxugúnele neda' ca' tu benne' gubán? <sup>49</sup> Xúgute' zra guzúa' neda' ládujla le'e dxusédeda' le'e lu xudau', na' cabata' gudél-lale neda'. Da nigá dxaca na chee' gaca li ca da naxúaj na lu xiche chee' Dios.

<sup>50</sup> Nadxa xúgute' benne' ca' dxuséde Jesús bulusán lazre' Le'. Buluzrúnnuje'.

*Dxuzrunnuj tu bi cuide'*

<sup>51</sup> Tu bi cuide', bi zéajlebe' Jesús, ne nácube' tu ladxe' laga, gulél-la benne' ca' lebe'. <sup>52</sup> Na' bsanbe' ladxe' laga da nácube', na' bzrúnnujbe' gala xídezebe'.

*Dxezrín Jesús lau benne' ca' chee' xu'u lawe' blau chee' judío ca'*

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Nadxa belexé'e Jesús lau bxruze blau, na' belezraga xúgute' benne' xíchajé ca'

chee' bxruze ca' ga na', ne benne' gula sina ca', ne benne' ca' dxuluxuzájle'e da nadxixruj bea Dios. <sup>54</sup> Pedro nawe' Jesús zítu'la, na' bzrine' chale'aj chee' lizre bxruze blau, naga begá'ane' tu zren nen zruza ni'a na' benne' xu'u lawe' ca', dxuluxuché'e dxu'a xi'.

<sup>55</sup> Na' bxruze blau, ne xúgute' benne' chee' xu'u lawe' blau chee' judío ca' gulíl-laje' tu da gagu na zria Jesús chee' xezequene' xuluzria xi'e Le' chee' gatie', na' quebe bi belezrélene'. <sup>56</sup> Benne' zante' belún lazre' chee' Jesús. Quebe bedxúaj dizra' chee' tuze ca' dxelenné' tu'e ne xetúe'. <sup>57</sup> Bal-le' belase', na' gulagu zria Jesús da wen lazre', dxelenné':

<sup>58</sup> —Netu' ba bémentu' chee', gunné': “Neda' guchínnaja' xudau' nigá da belún bénneache, na' ca gaca chunna zra xechisa' xetú xudau' da quebe xelún bénneache.”

<sup>59</sup> Cá'anqueze quebe butil-le ca da dxelenné'.

<sup>60</sup> Nadxa bxruze blau guxase' ládujla xúgute' benne' ca', na' bchebe' Jesús:

—¿Quebequeze bi dizra' dxuxuzri'u Lue'? ¿Bizra da nigá dxelenné' chiu' Lue'?

<sup>61</sup> Jesús guzúe' zrize, ne gútuqueze bi dizra' buzri'e. Na' bxruze blau bchebe' Le' xecha lasa, dxenné':

—¿Nacu' Lue' Cristo, Zri'ine Dios Lá'axza?

<sup>62</sup> Na' gunná Jesús, dxé'e le':

—Awe', ca' naca'. Walé'ele neda', Benne' Gulje' Bénneache, dxé'a chalá'a xabela chee' Dios, nape' dute xel-la waca. Walé'ele neda' zezá'a lu beuj bza.

<sup>63</sup> Nadxa bxruze blau gucheze' zra lané', na' gunné':

—¿Núzradxa nachínedxu benne' xelagu zria Le'? <sup>64</sup> Le'e bache bénquezle ca dxenné' schanni' chee' Dios. ¿Bi dxennale le'e xca'?

Xúgute' benne' ca' gulenné':

—Nabía xi'e dxal-la gatie'.

<sup>65</sup> Nadxa bal-la benne' ca' gulezú lawe' dxuluzré'e Le' zrene', na' bulucache' lau Jesús, ne buluzálaje' Le'. Dxelenné':

—Gunné' xa'a nuzra dxue Lue'.

Na' benne' zruza ni'a na' benne' xu'u lawe' belú'e lau Jesús.

*Dxenná Pedro quebe núnbe'e Jesús*

(Mt. 26.69-75; Lc. 22.56-62; Jn. 18.15-18, 25-27)

<sup>66</sup> Pedro guzúe' lu chale'aj zriila, na' bzrin tu nu'ula wen zrin chee' bxruze blau, <sup>67</sup> na' ca'

ble'ebe' Pedro dxe'e dxu'a xi' dxuxuché'e, na' gunná'abe' le', ne gúzrebe' le':

—Lue' dxedálequezu' Jesús, benne' Nazaret na'.

<sup>68</sup>Na' bechebe Pedro, dxenné':

—Quebe núnbe'a bénnea', ne quebe nezda' nu chee na' dxuchálaju'.

Na' bedxúaj Pedro chale'aj naga dxelu'e. Nadxa gudxezre xjeaj. <sup>69</sup>Nadxa nu'ula wen zrin chee bxruze blau na' gunná'abe' Pedro xecha lasa, na' gunabe', dxe'ebe' benne' ca' zaj zre'e na':

—Benne' nigá naque' tuze benne' ca'an.

<sup>70</sup>Pedro xecha lasa bzue' Jesús chalá'ala. Xetú chí'idau' benne' ca' zaj zre'e na' gulé'e Pedro xecha lasa:

—Da líqueze lue' nacu' tuze benne' ca'an lawe' da nacu' benne' chee xezre ca' zaj nababa Galilea. Ca dxuchálaju' naca bea na da na'.

<sup>71</sup>Nadxa Pedro guzú lawe' dxuzría xi' cuine', ne ben chúchu'e xrtizre', gunné':

—Quebe núnbe'a bénnea' dxennale le'e ca'.

<sup>72</sup>Ca'an guca, gudxezre xjeaj da gudxupe' lasa. Nadxa Pedro xeajás lazre' ca da guzre Jesús le', gunné': “Nédxudxa ca za cuezre xjeaj chupa lasa, lue' nnau' chunna lasa quebe núnbe'u neda'.” Na' ca xeajás lazre' da nigá, gudxézrele'e.

## 15

### *Dxezrín Jesús lau Pilato*

(Mt. 27.1-2, 11-14; Lc. 23.1-5; Jn. 18.28-38)

<sup>1</sup>Ca guxaní' che zila, na' benne' xíchaje ca' chee bxruze ca' belexedupe' nen benne' gula sina ca', ne benne' ca' dxulux-uzájle'e da nadxixruj bea Dios, ne xúgute benne' chee xu'u lawe' blau chee judío ca'. Guleché'e Jesús nadxéaje', na' buludé'e Le' lu na' Pilato. <sup>2</sup>Pilato gunábene' Jesús:

—¿Nacu' Lue' wenna' bea chee judío ca'?

Na' bechebe Jesús:

—Ca' naca na, ca ba gunnáu' lue'.

<sup>3</sup>Na' benne' xíchaje ca' chee bxruze ca' gulawe' zria Jesús da zante. <sup>4</sup>Nadxa Pilato gunábene' Jesús xecha lasa:

—¿Quebe bi dizra' dxuzri'u? Gunná'xque ca da zánete da dxelawe' zria Lue'.

<sup>5</sup>Jesús quebe bi dizra' ca buzri'e. Ca' guca, bebánele'e Pilato.

### *Dxelichaj be'e gate Jesús*

(Mt. 27.15-31; Lc. 23.13-25; Jn. 18.38—19.16)

<sup>6</sup>Pilato zua tu da dxúnqueze' tu iza tu iza gate dxaca Laní Pascua. Dxusane' tu benne' xu'e lizre xia, núteteze benne' xelenaba bénneache ca' le'. <sup>7</sup>Lu xu'u lizre xia na' xu'u tu benne' le' Barrabás, benne' nune' tu zren benne' ca' beluti'e benne' ca', gate na' gudíl-lalene' benne' Roma ca'. <sup>8</sup>Na' belezrín lau Pilato benne' xezre ca', ne gulezú lawe' dxelenabe' lau Pilato guné' ca dxúnqueze'. <sup>9</sup>Na' bechebe Pilato:

—¿Dxaca lázrele le'e gusana' bénnea' naque' wenna' bea chee judío ca'?

<sup>10</sup>Caní gunná Pilato lawe' da dxeque be'ene' buludé'e' benne' xíchaje ca' chee bxruze ca' Jesús lu ne'e lawe' da dxelaque' zre'e lazre' Le'. <sup>11</sup>Na' benne' xíchaje ca' chee bxruze ca' beleché'e benne' xezre ca', ne gulegú'u xel-le' le' chee xelxenabe' lau Pilato gusane' Barrabás. <sup>12</sup>Nadxa Pilato gunábene' benne' ca':

—¿Bi dxaca lázrele le'e guna' chee bénnea' naque' wenna' bea chee judío ca'?

<sup>13</sup>Nadxa belexechebe', gulenné' zizraj:

—Bde'e xaga béguaj.

<sup>14</sup>Na' Pilato bchebe' benne' ca':

—¿Bizra da caléla nun benne'?

Xecha lasa gulenné' zizraj:

—Bde'e xaga béguaj.

<sup>15</sup>Nadxa Pilato bsane' Barrabás lawe' da dxaca lazre' xegá'ane' chawe' nen benne' xezre ca'. Na' ca gudé na' bsebage' benne' ca' xeline' Jesús tu xide, na' bde'e' Le' lu na' benne' ca' chee xuludé'e' Le' xaga béguaj.

<sup>16</sup>Nadxa benne' dxjaque' wedil-la guleché'e Jesús lu chale'aj xu'u lawe', na' bulutupe' xúgute ljwezre' benne' dxjaque' wedil-la lataj na'. <sup>17</sup>Na' bulugácu'e Jesús tu ladxe' bzawe, ne buluzri'e' xíchaje' tu da zaj nune' nen zruze xaga xeche'. <sup>18</sup>Nadxa gulezú lawe' dxelenné' zizraj:

—¿Gaca ba wenna' bea chee judío ca'!

<sup>19</sup>Na' belú'e xíchaj Jesús nen tu xia xtila, ne buluzré'e Le' zrene'. Na' buluzú zribe' lawe', dxelape' Le' ba lá'ana. <sup>20</sup>Ca gudé bulucá'ana dítaje' Le' caní, na' belexegu'e ladxe' bzawe, na' buluxugácu'e' Le' zra lá'anaqueze'. Nadxa belexebéaje' Le' chee chjaque' naga xuludé'e' Le' xaga béguaj.

### *Dxuludé'e Jesús xaga béguaj*

(Mt. 27.32-44; Lc. 23.26-43; Jn. 19.17-27)

<sup>21</sup> Tu benne' chee xezre Cirene le' Simón, xra Alejandro, ne Rufo, zezé'e le'e xixre', na' ca bedé' na', na' bulusebague' le' gu'e xaga béguaj chee Jesús.

<sup>22</sup> Guleché'e Jesús tu lataj nazí le na Gól-gota, da zéajé na "Lataj Chee Zrita Xichaj Benne' Gate." <sup>23</sup> Nadxa bulunézruje' Jesús xrise uva wal-la da nachixre da sla' chee mirra. Jesús quebe gu'e na. <sup>24</sup> Nadxa buludé'e Le' xaga béguaj, na' benne' dx-jaque' wedil-la gulebéaje' da gulé'e na nule' xelexale' zra lana Jesús, na' bila xelexúa tu tue'.

<sup>25</sup> Guca che zílala gate na' buludé'e Jesús xaga béguaj. <sup>26</sup> Buludé'e da naxúaj xichaj xaga béguaj chee Jesús da dxulé'e na da nabague', da naxúaj na caní: "Wenná Bea Chee Judío Ca'." <sup>27</sup> Cuita Jesús buludé'e le'e xaga béguaj ca' chupa benne' gubán, tue' chalá'a xabéla chee', ne xetúe' chalá'a xéglala chee'. <sup>28</sup> Ca'an guca, guca li ca da naxúaj na lu xiche chee Dios naga dxenné' caní: "Buluzue' Le' tu zren nen benne' wen da zrinna' ca'."

<sup>29</sup> Na' benne' dxeledé' na' gulenné' schanni' chee Jesús, ne buluté' xíchaje', dxelelé':

—Awe'. Guchínnaju' Lue' xudau' cheentu', na' gate gaca chunna zra, na' xechisu' na. <sup>30</sup> Bselá' cuinu' na'a, ne bexetaj le'e xaga béguaj na'.

<sup>31</sup> Cá'anqueze belún benne' xíchaje' ca' chee bxruze ca', ne benne' dxuluxuzájle'e da nadxixruj bea Dios. Belún le' chee Jesús, dxelé' ljweze':

—Benne' xula bselá' benne, san Le' québequeze dxezéquene' guselá' cuine'. <sup>32</sup> Lue', Cristo, wenná bea chee benne' Israel, bexetaj le'e xaga béguaj na' chee le'entu', na' chéajlentu' chiu'.

Cá'anqueze belún benne' ca' zaj de'e le'e xaga béguaj ca' tu zren nen Jesús, gulenné' schanni' chee'.

#### *Dxate Jesús*

(Mt. 27.45-56; Lc. 23.44-49; Jn. 19.28-30)

<sup>33</sup> Ca bzrin wagubizra, na' guchul-la dute lu xezr la xu nigá tu chi'i wal-la gula. <sup>34</sup> Ca gudé' na', na' gunná Jesús zizraj:

—Eloi, Eloi, ¿lama sabactani'?

Da nigá zéajé na: "Dios chia', Dios chia', ¿bizr chee na' nusanu' neda'?"

<sup>35</sup> Bal-la benne' ca' zaj zre'e na' belenne' na, na' gulenné':

—Le xene. Dxenné' Elías, bénnea' bchálaje' waláz chee Dios.

<sup>36</sup> Nadxa tu benne' guzá chégúe', na' xea-jlá'awaje' lu xrise uva zichaj tu da dxezrupe na nisa, na' bzue' na lawe' tu xia xtila da bcuene' dxu'a Jesús chee xi'aje', na' gunná benne' nigá:

—Cuézadxu. Guxúexquedxu che wida Elías chee xulétaje' Le'.

<sup>37</sup> Nadxa Jesús gudxezre xe'e, na' gútete'. <sup>38</sup> Ca ná'queze gudxeza ladxe' da ze lu xudau', guca na chúpala. Gucá'a na dxa'la, bedxúajte na zri'la. <sup>39</sup> Na' benne' dxenná be'e lu wedil-la, benne' ze' lau Jesús, gate na' blé'ene' ca gudxezre xe'e, ne ca guca gútete', na' gunné':

—Da líqueze benne' nigá guque' Zri'ine Dios.

<sup>40</sup> Cá'anqueze zaj ze na' bal-la nu'ula dx-elenné' zítu'la. Ládujla nu'ula caní zaj ze María Magdalena, ne Salomé, ne María, xrna Jacobo cuide' ne José. <sup>41</sup> Nu'ula caní gusá'acalene' Jesús, ne gulácalene' Le' gate na' gudé' naga nababa Galilea. Cá'anqueze zaj ze na' zánedxa nu'ula xula, nu'ula ca' belezrine' Jerusalén tu zren nen Jesús.

#### *Dxulucache' Jesús lu xedxu ba*

(Mt. 27.57-61; Lc. 23.50-56; Jn. 19.38-42)

<sup>42-43</sup> Ca za chizrela bzrin José, benne' Arimatea ga na'. Benne' nigá naque' benne' blau ládujla benne' ca' chee xu'u lawe' blau chee judío ca'. Cá'anqueze le' dxebeze' zra la' Dios chee nna be'e. Lawe' da naca zra dx-ulucueze', zra nedxu chee zra dxulupá'ane', du lazre' guxú'e lau Pilato, na' gunabe' si'e lataj xexu'e Jesús. <sup>44</sup> Bebánele'e Pilato ca bennene' ba gute Jesús, na' gunné' benne' dxenná be'e lu wedil-la na' chee gunabe' che ba guca ca'. <sup>45</sup> Gate bénnea' dxenná be'e lu wedil-la gunné' ca'an guca, nadxa Pilato bnézruje' José lataj bexu'e Jesús. <sup>46</sup> Nadxa José guzi'e tu ladxe' xtila laga, na' bulétaje' Jesús, ne bulazre' Le' ladxe' xtila na'. Na' gúxrue' Jesús tu lu ba da ba gudene' le'e xiaj xre, na' bsézxuje' ba na' nen tu xiaj zren. <sup>47</sup> María Magdalena, ne María, xrna José belelé'equezne' naga bulucache' Jesús.

<sup>1</sup> Ca gudé zra dxulupá'angé', na' María Magdalena, ne Salomé, ne María, xrna Jacobo, gulezí'e da dxelá zixre chee cheajlelu'e Jesús. <sup>2</sup> Na' bál-la'la zra nedxu chee da gazre zra belezrine' dxu'a ba gate na' za dxalaj gubizra. <sup>3</sup> Na' gulenné', dxelé' ljwezre':

—¿Nuzra cua xiaj da naxexxuj ba?

<sup>4</sup> Ca gulenné'e, na' belelé'ene' xiaj zren na' da buluséxxujé' ba, ba nadúa na. <sup>5</sup> Ca gulu'e lu ba, na' belelé'ene' tu benne' dxe'e chala'a xabela, nácue' zra lane' tunna da chiche, na' belezrebe'. <sup>6</sup> Na' gunná benne' nigá, dxe'e nu'ula ca':

—Quebe zrébele. Le'e dxexifajle Jesús, benne' Nazaret, bénnea' gudé'e le'e xaga béguaj. Bache bebán bénnea'. Québedxa xu'e nigá. Le nna' lataj naga gulexrué' Le'. <sup>7</sup> Le hjaca na'a, le cheajezre benne' ca' bsédene', ne Pedro cuía lau Jesús chéajé' naga nababa Galilea ca le'e. Na' xelé'equeze Le' ca ba gunnáqueze'.

<sup>8</sup> Nadxa nu'ula ca' buluzrúnnuje', besí'aque' dxu'a ba lawe' da belezrébele'e. Quebe nu' guléqueze' ca da guca na lawe' da dxelezebe'e.

*Jesús dxulé'e lau María Magdalena*

*(Jn. 20.11-18)*

<sup>9</sup> Ca gudé bebán Jesús ládujla benne' gate ca guxaní' zra nedxu chee da gazre zra, na' ble'e lawe' zate ca' María Magdalena, nu'ula na' bebéaj Jesús gazre be' xriwe' guxú'e. <sup>10</sup> Nu'ula nigá guxíaje' xeajezre' benne' ca' gulaque' Jesús tuze, zaj zre'e baxácheze, ne dxelezebe'. <sup>11</sup> Gate na' gulenne' nabán Jesús, na' ba ble'e nu'ula nigá Le', quebe guléajle'e.

*Dxulé'e lau Jesús chupa benne' bsédene'*

*(Lc. 24.13-35)*

<sup>12</sup> Ca gudé na' ble'e lau Jesús nazrala chupa benne' ca' bsédene' zaj xu'e neza le'e xixre'. <sup>13</sup> Benne' caní belexebi'e, na' xeajleguezre' benne' xezícala. Cá'anqueze benne' caní quebe guléajle'e.

*Jesús dxusebague' benne' gubáz chee' ca' da dxal-la' xelune'*

*(Mt. 28.16-20; Lc. 24.36-49; Jn. 20.19-23)*

<sup>14</sup> Ca gudédxa, na' ble'e lau Jesús chinéaj benne' ca' bsédene' ca zaj dxe'e dxelawe', na' gudil-le' le' lawe' da quebe guléajle'e ba bebangé', ne lawe' da zaj naque' lázrdau zide' lawe' da quebe guléajle'e chee benne'

ca' belexelé'ene' Le' ca gudé bebangé'. <sup>15</sup> Na' gunné', dxe'e benne' ca':

—Le hjaca du ca naca xezr la xu. Le cu'u lban chee dizra' chawe' chia' chee xelénqueze xúgute bénneache. <sup>16</sup> Benne' chéajle'e, ne chue' nisa, la bénnea', na' benne' quebe chéajle'e, wabía xi' bénnea'. <sup>17</sup> Da dxelunna bea caní xululé'e benne' ca' xeléajle'e chia', xuluchínene' La neda' chee xelxebéaje' be' xriwe'. Xuluchá-laje' dizra' nazrala. <sup>18</sup> Welúxrue' bēla' ca', ne che xelé'aje' da gute benne', quebe bi xeléquene'. Cá'anqueze wuluxrúa ne'e benne' quebe chawe' zaj zue', na' xellexaque'.

*Dxexepe Jesús xabáa*

*(Lc. 24.50-53)*

<sup>19</sup> Ca gudé bchálaj Xránadxu Jesús nen benne' ca', na' Dios bechise' Le' xabáa, na' gudxé'e chala'a xabela chee Dios. <sup>20</sup> Nadxa benne' ca' guledxúaje', xeajlelu'e lban chee dizra' chawe' nigá du ca naca xezr la xu nigá. Léqueze Xránadxu gúcalene' le', na' bdxixruj be'e dizra' chee' ne chee xel-la waca ca' da za xabáa da belune'. ¡Ca'an gaca na!



## DIZRA' CHAWE' CA NACA CHEE JESUCRISTO SDA BZUAJ SAN LUCAS

*Dizra' dxuchalaj San Lucas, dxé'ę Teófilo*

<sup>1</sup> Benne' zan ba belune' ca da gulezéquene' buluzúaje' cáteze naca da guca ládujla dxi'u, <sup>2</sup> cáteze na' gulé benne' ca', benne' belelé'ęne' nédxudautę ca naca da guca na, na' buluchálaje' dizra' chawe' na'. <sup>3</sup> Cá'anqueze neda' ba bchi'a xánnia' xúgutę da ca' gulaca na nédxudautę, na' dxéqueda' chawe' guzúaja' da nigá chiu' cáteze guca, bi nazrí'tę lazra', lue', Teófilo. <sup>4</sup> Dxuna' caní chee nézenu' naca na da li ca da ba bululé'ęne' lue'.

*Gubáz chee xabáa dxuzenne' ca galaj Juan, benne' guchúę' bėnneache nisa*

<sup>5</sup> Gate na' naca Herodes wenná bea chee xezre ca' zaj nababa Judea, na' zua tu bxruze le' Zacarías, benne' nababe' cue' bxruze ca' gunná be'e Abías ca ni'te. Zru'ula Zacarías na' le' Elisabet, na' ná-caqueze Zacarías na' zre sua benne' ca' gulebábale bxruze Aarón. <sup>6</sup> Zacarías ne zru'ulę' Elisabet gulaque' xrlátaje lau Dios, ne dxelunę' ca zaj naca da bdxixruj bea Xránadxu, ne ca da naxúaj na lu da gunné'. Ca'an guca, quebe nu guzeque gagu zria le' lau Dios. <sup>7</sup> Quebe nu zrí'ing' chilá', lawe' da naca Elisabet na' nu'ula wizre, na' dxúpate' zaj bezúale'ę gula.

<sup>8</sup> Tu zra, gate belexala bxruze ca' naga nababa Zacarías xelunę' zrin lu xel-la bxruze chee' lau Dios, <sup>9</sup> cáteze naca da dx-elún bxruze ca', na' bexala Zacarías chu'ę lu lataj lá'azxa chee Xránadxu lu xudau' chee guzezę' xala. <sup>10</sup> Dxácate' na' dxezxe xala na', ca naca benne' ca' zaj zra' chalé'ajla dxuluchálajlęne' Dios. <sup>11</sup> Nadxa ble'e lau tu gubáz chee xabáa chee Xránadxu, ze' chalá'a xabęla chee cugu naga zria xala dxezxe na. <sup>12</sup> Ca ble'e Zacarías gubáz chee xabáa na', guzúę' stebe, ne bzrėbele'ę.

<sup>13</sup> Gubáz chee xabáa na' guzre' le':

—Zacarías, quebe zrebu', lawe' da ba ben Dios dizra' da dxuchálajlęnu' Le', na' nu'ula chiu', Elisabet, walaj tu zrí'ing', bi na' guzú' labe' Juan. <sup>14</sup> Wabéle'ęnu', ne gaca chiu' tu da ba neza zrentę, na' benne' zan xelebene' lawe' da ba galaj bidu na'.

<sup>15</sup> Ca'an gaca lawe' da gaca zrí'inu' szrentę lau Dios. Quebe xí'ajbe' xrise uva wal-la, u da dxusuzre na bėnneache, na' gate gála-jtebe' tu súalezqueze Be' Lá'azxa nen lebe'.

<sup>16</sup> Ne chee lebe' benne' zan xelexaque' bi chee Xránadxu Dios. <sup>17</sup> Juan nigá quia laube' lau Xránadxu, na' Be' na', ne xel-la waca da gulezúale na Elías, bėnnea' bchálaje' waláz chee Dios gate nate, xelezúale na lebe', chee guzúabe' tuze benne' ca' zaj naque' xra xrna nen zrí'ing', ne chee gulé'ebe' benne' dxeledábague' Dios chee xelunę' ca dxenná xrtizra' Dios. Ca'an gaca, gucá'ana cháwebe' bėnneache chee xezezi' lu ne'ę Xránadxu.

<sup>18</sup> Zacarías na' bchebe' gubáz chee xabáa:

—¿Ajazra gaca nezda' gaca caní? Neda' ba nagúlale'a, ne cá'anqueze naca nu'ula chia'.

<sup>19</sup> Na' bechebe' gubáz chee xabáa na':

—Neda' naca' Gabriel, ne naca' wen zrin chee Dios. Le' gusel-le' neda' chee guchála-jlęna' lue', ne guzenda' lue' dizra' chawe' nigá. <sup>20</sup> Na'a, lawe' da quebe guxéajlę'u da gucha' lue', xegá'anu' quebe gaca nńu' cadxa galaj zrí'inu'. Caní gaca na ca zrintę zra chee na.

<sup>21</sup> Dxácate' na' zaj zra' benne' ca' chalé'ajla, dxelebeze' Zacarías, ne dxelexe-bánene' lawe' da dxezréle'ęne', quebe dxedxúaje' lu lataj lá'azxa. <sup>22</sup> Gate bedxúaj Zacarías, quėbedxa dxaca mńie'. Nadxa guleque bé'ene' ba ble'e Zacarías tu da ble'e Dios le' lu lataj lá'azxa na'. Na' le' bta ná'ase', lawe' da quebe dxaca mńie'.

<sup>23</sup> Ca xeajsę chee zra ca' dxal-la' gun Zacarías zrin chee xudau', na' bezé'ę zexía-je' lizre'. <sup>24</sup> Ca gudę na' zru'ulę' Elisabet ba zue' zi'i, na' quebe bdxúaje' lataj bchına' chię' ca gazxu' beu', na' dxennę' lu lázrdawe': <sup>25</sup> "Xrana' Dios ba bene' chia' da nigá chee quėbedxa xuluzúa bėnneache neda' chalá'ala."

*Gubáz chee xabáa dxuzenne' ca galaj Jesús*

<sup>26</sup> Ca gudę xrupa beu' gate na' bchálajlę gubáz chee xabáa na' Zacarías, na' Dios gusel-le' le' tu xezre nababa Galilea nazi le na Nazaret, <sup>27</sup> chee cheajchálajlęnu' tu nu'ula cuide'dau' lebe' María. Lebe' ba zua guchaga na'be' benne' biu na' le' José, benne' naque' zrí'ine zre sua wenná bea David.

<sup>28</sup> Gubáz chee xabáa na' guxú'ë naga zua María na', na' guzre'-be':

—Padiuzre. Dios dxunge' lue' tu culuén. Xránadxu zúalene' lue'. Dios ba bene' tu da cháwedxa chiu' quézcala chee xúgute nu'ula ca'.

<sup>29</sup> Gate María na' ble'ebe' gubáz chee xabáa na', bebánebe' ca naca dizra' na', na' gunabe' lu lázrdaube': ¿Bizr chee na' dxugape' neda' diuzre caní?

<sup>30</sup> Nadxa gunná gubáz chee xabáa na':

—María, quebe zrebu' lawe' da ba bzué'enu' tu culuén da dxun Dios chiu' lue'. <sup>31</sup> Na'a, zua da gunna Dios chiu', na' galaj tu bidu biu chiu', na' guzú' labe' Jesús.

<sup>32</sup> Lebe' gácabe' szren, na' xelennáqueze' naque' Zri'ine Dios szrente, na' Xránadxu Dios guné' Le' wenná bea ca guca xra xrtawe' David, <sup>33</sup> chee nna bé'etecaze' xezr la xu Israel, na' xel-la dxenná bea chee' quebe cheajséqueze chee na.

<sup>34</sup> Nadxa María bchébebe' gubáz chee xabáa:

—¿Ájazra gaca da nigá, lawe' da quebe nu benne' biu zúalena'?

<sup>35</sup> Gubáz chee xabáa na' gunné':

—Be' Lá'azxa chee Dios sue' xichaj lázrda'u, na' xel-la waca chee Dios szrente sua na nen lue'. Chee le na' bidu na' gálajbe' gácaquezebe' chee Dios, na' sí'queze labe' Zri'ine Dios. <sup>36</sup> Cá'anqueze bila ljwezru' Elisabet wálajqueze bidu chee' lálcala ba naque' benne' gula. Ca'an naca, nu'ula na' gulenné' naque' wizre, ba zeaj xrupa beu' bnezruj Dios chee'. <sup>37</sup> Quebe bi de da quebe gaca gun Dios.

<sup>38</sup> Nadxa gunná María:

—Neda' nácaqueza' wen zrin chee Xránadxu. Gun Dios chia' ca da ba gunnáu'.

Na' gubáz chee xabáa na' bezé'ë naga zua María na'.

*María zeajxúebe' Elisabet*

<sup>39</sup> Ca lu zra na' María guzá'abe' zéajbe' tu xézredau' da zua na laduj xi'a ca' chee ga nababa Judea. <sup>40</sup> Na' guxú'ube' lizre Zacarías, ne bgápabe' diuzre Elisabet.

<sup>41</sup> Gate ben Elisabet dizra' da gunné' María, na' bidu na' xú'ube' le'e Elisabet guxrítebe', na' guzúalé Be' Lá'azxa le'.

<sup>42</sup> Nadxa gunné' tu chi'ë zizraj:

—Dios ba bene' tu da cháwedxa chiu' quézcala chee xúgute nu'ula ca', lawe' da ba zua da benna Dios chiu'. <sup>43</sup> ¿Núzraqueze

naca' neda', za xrna Xrana' ga zua' neda'? <sup>44</sup> Cáteze benda' dizra' da gunnéu', na' guxrite bidu chia' lu le'a lu xel-la dxebe' cheebe'. <sup>45</sup> Ba neza naca na' chiu' guxéajle' lu lawe' da gaca li ca da gunná Xránadxu.

<sup>46</sup> Nadxa gunná María:

Bénne' du xu'a dxue lá'ana na Xrana'.

<sup>47</sup> Lázrdawa' dxebe' na ca dxun Dios, weselá chia'.

<sup>48</sup> Lawe' da gudxé' Dios gunne xue chia', nácaqueza' wen zrin chee'.

Na'a su lau na, xúgute benne' xelenné' nazi'a tu culuen zren chee Dios.

<sup>49</sup> Dios Szrente ba bene' tu da zrente chia' neda'.

Chee le na' lá'azxa naca La Le'.

<sup>50</sup> Le' xexache lázrqueze' xúgute benne' ca' dxelezrebe' Le'.

<sup>51</sup> Da zrente ba ben Le'.

Bzue' zrila benne' ca' dxulucá'ana szren cuine'.

<sup>52</sup> Bebéaje' benne' blau ca' lu lataj chee', ne bechise' benne' dxexruj lazre' ca'.

<sup>53</sup> Bnézrujle'ë da gulagu benne' dxeledún, na' benne' gunn'a ca' bca'angé' le' cá'aze.

<sup>54</sup> Gúcalene' benne' Israel, benne' wen zrin chee' ca'

lawe' da bezrí lázrqueze' le',

<sup>55</sup> ca da guchebe lazre' chee xra xrtáudxu ca',

chee Abraham, ne chee benne' xrtie' ca' chadía chacanna.

<sup>56</sup> María begú'anabe' Elisabet ca chunna beu', na' ca gudé' na' bezrinbe' lízrebe'.

*Ca gulaj Juan, benne' bchue' bènneache nisa*

<sup>57</sup> Ca gudé' na' guxá' beu' chee Elisabet na' chee galaj bidu chee', na' guzangé' tu bi biu chee'. <sup>58</sup> Benne' walírz chee' ca', ne xrtia ljwezre' belezrine' dxelebene' nen le', gate belenne' Dios bezrí lázrele'ë le'. <sup>59</sup> Gate guca xrunu' zra, belezrine' chee xelechúgue' lu xpélabe' da gulé'e na naca be' bi chee Dios, na' gulaca lazre' xuluzúe' labe' Zacarías ca le xrabe'.

<sup>60</sup> Na' gunná xrnabe':

—Quebe gaca. Dxa-la' si' labe' Juan.

<sup>61</sup> Na' gulé'ë le':

—¿Bizr chee na'? Quebe nu chilá' xrtia ljwézre le' ca'.

<sup>62</sup> Na' buluchebe' xra bidu na', bulutá ne'ë chee xelenézene' ájazra guzúe' labe'. <sup>63</sup> Na' xrabe' na' gunabe' tu blágadau', na' bzuaaje' le'ë na: Juan si' labe'. Na' xúgute benne' ca'

belexebánene'. <sup>64</sup>Ca' guca Zacarías benne', na' guzú lawe' dxue lá'ane' Dios. <sup>65</sup>Ca belelé'ene' da nigá, xúgute benne' walírz chee' belexebánene', na' ca naca xezre zaj mña laduj xi'a ca ga nababa Judea, buluchálaje' ca da guca. <sup>66</sup>Xúgute benne' belemné' na, gulezú lawe' dxeleñné' lu lázrdawe', ne buluchebe ljwezre' tue' xetúe':

—¿Ájzraqueze gun bi nigá?

Naca bea na Xránadxu zúalene'-be'.

*Ca da bil-la Zacarías*

<sup>67</sup>Na' Be' Lá'azxa guzúalene' Zacarías, xra bidu nigá, na' bchálaje' waláz chee' Dios, gunné':

<sup>68</sup>¡Gaca ba Xránadxu, Dios chee' xezre Israel! Ba ble'e naga zúadxu, bèneache chee', na' bselé' dxi'u.

<sup>69</sup>Ba gusel-le' tu benne' wál-lale'e, weselá cheedxu.

Béneae' gulaj ládujla xrtia David, benne' wen zrin chee'.

<sup>70</sup>Ca'an guchebe lazre' Dios lu dxu'a benne' ca' buluchálaje' waláz chee' nédxudaute.

<sup>71</sup>Guchebe lazre' guselé' dxi'u lu na' benne' dxeleze'e dxi'u, ne lu na' benne' dxelecuídene' dxi'u.

<sup>72</sup>Xezrí lazre' xra xrtáudxu ca', ne quebe gal-la lazre' xel-la wezríá lá'azxa chee'.

<sup>73</sup>Da nigá naca na da guchebe lazre' Dios da bzua chache' nen xra xrtáudxu Abraham,

da naca tu da gunne' cheedxu dxi'u.

<sup>74</sup>Guchebe lazre' guselé' dxi'u lu na' benne' dxeleze'e dxi'u

chee' gaca gundxu zrin chee', ne quebe zrébedxu,

<sup>75</sup>ne gácadxu xrlátaje lau Le', ne gácadxu bi cheéqueze' xúgute zra naca bandxu.

<sup>76</sup>Lue', zrí'ina'dau', sí'queze lau' bi guchálajzeze waláz chee' Dios szrenté, lawe' da quia lau' lau Xránadxu, salju' neza chee' Xránadxu,

<sup>77</sup>Guzénenu' béneache chee', Le' gunite lawe' dul-la chee',

ne guselé' benne' ca'.

<sup>78</sup>Ca'an gaca lawe' da dxexezrí lazre' Dios dxi'u.

Dxune' na'a dxalaj tu xi' chee' xabáa da dxusení' cheedxu,

<sup>79</sup>na' gusení' na naga zaj zra' benne' zaj zre'e lu na' xel-la gute,

chee' cu'u na dxi'u lu neza xrtante lau Dios.

<sup>80</sup>Bidu na' bgúlabe', ne bgula béne'du xu'ube' chawe' lu da naca chee' Dios. Guzáaquezbe' le'e xixre' lawe' lataj cadxa bzrin zra ble'e laube' xezre Israel.

2

*Ca guca gate gulaj Jesús  
(Mt. 1.18-25)*

<sup>1</sup>Ca lu zra na' gate dxenná bea Augusto, benne' xezre Roma, benne' dxenná be'e xúgute cue' xezr la xu, le' gunná bé'ene' xelú'u lu xiche xúgute benne' zaj zre'e xezr la xu.

<sup>2</sup>Da nigá naca da nédxudau' gulú'u béneache lu xiche. Guca caní gate naca Cirenio benne' zaj xu'u lu ne'e xezre ca' zaj nababa Siria.

<sup>3</sup>Xúgute béneache dxun na ba xen chjaque' lu xezre naga zaj nababe' chee' xelu'e lu xiche.

<sup>4</sup>Chee' le' na' José guzé'e lu xezre Nazaret, da nababa Galilea, chee' bzrine' lu xezre Belén, da nababa Judea, naga gulaj wenná bea David.

Bzrin José na' lawe' da naque' xrtia David na'.

<sup>5</sup>José guxíaje' Belén chee' chu'e lu xiche tu zren nen María. María nigá ba nachébebe' guchaga ná'alebe' José, na' ba bnezruj Dios chee'be'.

<sup>6</sup>Dxácate' na' zaj zre'e lu xezre Belén, na' bzrin zra san María bidu chee'.

<sup>7</sup>Lu xezre na' gulaj bidu nedxu chee', na' bchele'-be' ládxedu ca', na' gúxrue'-be' xu'u naga dxelún chi'e da dxelagu bea ca', lawe' da quebe ga bzrela tu lataj lu xu'u naga che'e.

*Dxuluchálajle' gubáz chee' xabáa benne' ca' dxuluxúe' zrla' ca'*

<sup>8</sup>Gagu cuita xezre Belén zaj zra' benne' ca' dxuluxúe' zrla' ca', dxelexegá'ane' le'e xixre' chizrela, dxuluxúe' zrla' chee' ca'.

<sup>9</sup>Naga zaj zre'e ble'e lau tu gubáz chee' xabáa chee' Xránadxu. Na' xel-la naxaní' chee' Xránadxu Dios bsaní' na naga zaj zre'e. Ca'an guca, belezrebele'e. <sup>10</sup>Na' gubáz chee' xabáa na' guzre' le':

—Quebe zrébele, lawe' da dxuzenla' le'e tu dizra' chawe'.

Ne chee' dizra' nigá xelebéle'e xúgute béneache.

<sup>11</sup>Na'a, lu xezre chee' David, ba gulaj tu bidau' gácabe' weselá chee'e.

Bi nigá naque' Cristo, Xránadxu. <sup>12</sup>Da nigá gaca na tu da gunna bea na chee'e. Cheajxrácale bidu dxe'ene nigá,

dxélabe' ládxe'du ca', ne debe' tu xu'u naga dxelún chi'e da xelagu bea ca'.

<sup>13</sup> Chadí lau, cuita gubáz chee xabáa na' bululé'e lau zandxa gubáz chee xabáa, dxelúe lán'ane' Dios, dxelenné':

<sup>14</sup> ¡Gaca ba Dios na'ala,

na' lu xezr la xu nigá sua xel-la dxebeza zri lazre' chee bénneache,

benne' dxeluné' ca da dxaca lazre' Dios!  
<sup>15</sup> Gate besí'aca gubáz chee xabáa ca', zeajxaque' xabáa, nadxa benne' ca' dxuluxúe' zrila' gulezú lawe' dxelé' ljwezre' tue' xetúe':

—Chéajxquedxu lu xezre Belén cheajn-nadxu da ba guca, ca da ba gunná Xránadxu Dios, guzre' dxi'u.

<sup>16</sup> Ca'an guca, besí'aca zéxujué', na' xea-jlexraque' María ne José, ne bidu dxe'ene na', debe' xu'u naga dxelún chi'e da xelagu bea ca'. <sup>17</sup> Gate belelé'ene' bidu na', na' buluchálajlene' benne' ca' ca da gunná gubáz chee xabáa ca da naca chee bidu na'.

<sup>18</sup> Na' xúgute benne' ca' belenne' da nigá belexebánele'ene' ca da gulenná benne' caní. <sup>19</sup> María bcache' da nigá lu xichaj lázrdawe', na' blaba lazre' ca naca da nigá. <sup>20</sup> Ca'an guca besí'aca benne' ca' dxuluxúe zrila', dxulucá'ana szrene' Dios, ne dxelúe lán'ane' Le' ca naca xúgute da belenne', ne da belelé'ene', lawe' da guca xúgute ca da guzre gubáz chee xabáa na' le'.

*Ca guca gate belú'e bidu Jesús lu xudau'*

<sup>21</sup> Ca guca xrunu' zra, na' gulechugue' tu lu xpela bidu na' ca da nadxixruj bea na chee Dios, na' belú'e La bidu na' Jesús, cáteze naca da gunná gubáz chee xabáa na', guzre' María nédxudxa ca za gu'e bidu na'.

<sup>22</sup> Ca bzirin zra chee xeluné' ca bdxixruj bea Moisés chee xellexaque' chawe' lau Dios, na' belú'e bidu na' lu xezre Jerusalén chee xuluzúe'-be' lu na' Xránadxu Dios. <sup>23</sup> Beluné' caní lawe' da ba naxúaj lu da nadxixruj bea Xránadxu Dios da dxenná na caní: Xúgute bi biu, bi nedxu gálajbe' dxal-la' guzúale-be' chee Xránadxu Dios. <sup>24</sup> Na' xjaque' xejlegu'e dxen chee be xíxre'du ca' lau Dios ca da dxenná da nadxixruj bea na chee Xránadxu Dios, da dxenná na: Chupa bgugu, che chupa bxínnedau'.

<sup>25</sup> Ca lu zra na' zua tu benne' biu gula lu xezre Jerusalén, le' Simeón. Naque' tu benne' chawe', na' dxue lán'anaqueze' Dios, ne dxebeze' benne' sel-la Dios chee

guselé' bénneache Israel. Zúale Be' Lán'azxa chee Dios Simeón na'. <sup>26</sup> Be' Lán'azxa ba guzre' Simeón na' quebe gatie' cadxa lé'ene' Cristo, benne' na' sel-la Xránadxu Dios. <sup>27</sup> Simeón nigá xuxíaje' lu xudau' lawe' da bsi' Be' Lán'azxa chee Dios le'. Na' gate xra xrna bidu Jesús zaj nu'e-be' lu xudau' chee xeluné' cheebe' ca da bdxixruj be'e Moisés, <sup>28</sup> na' Simeón na' guqué'e bidu na'. Bnide'-be', ne be lán'ane' Dios, gunné':

<sup>29</sup> Xrana', na' waca gunnú' lataj gatia' lu xel-la dxebeza zri lazre' lawe' da ba benu' ca da guchébe lazru' chia', naca' wen zrin chiu'.

<sup>30</sup> Nen xiaj láuqueza' ba ble'eda' Benne' Weselá,

<sup>31</sup> Bénnea' ba bzu' chee gácalene' xúgute bénneache.

<sup>32</sup> Le' naque' tu xi' da gusení na chee benne' quebe zaj nababe' Israel.

Ne chee Le' gaca tu da ba neza chee bénneache chiu', benne' Israel.

<sup>33</sup> José ne xrna Jesús belexebánele'ene' ca da gunná Simeón chee bidu Jesús. <sup>34</sup> Nadxa Simeón gunabe' lau Dios guné' chee' da chawe', na' guzre' María, xrna Jesús:

—¡Gunná'xque nigá! Bidu nigá, Dios nuzúe' lebe' chee gunbe' chee benne' Israel ca', cheajlecházie' benne' zante' lu na' da xriwe', na' benne' zante' xellexaxe' lau Dios. Lebe' gácabe' tu da dxunna bea chee Dios, na' benne' zante' xuluzúe' lebe' chalá'ala. <sup>35</sup> Ne chee lebe' gulé'e lau ca da dxeajlesá lazre' tu tue'. Na' chiu' lue' da nigá gaca na ca tu xia nalá, da cheajsúa lu lázrda'u.

<sup>36</sup> Cán'aqueze zua na' tu nu'ula dxenné' waláz chee Dios, le' Ana. Nu'ula nigá naque' zri'ine Fanuel, ne xrtia Aser. Ba naque' nu'ula gúlale'e. Bchaga ne'e gate na' naque' nu'ula cuide'te, na' guzúalene' benne' chee' gazre iza. <sup>37</sup> Na' begá'ane' tuze', ne ba xu'e tapa lalaj tapa iza. Quebe becuase' xudau', na' dxune' zrin chee Xránadxu Dios te zra chizrela. Dxune' gubasa, ne dxuchálajlene' Dios. <sup>38</sup> Ana na' bzirínqueze' na', na' ca gudé guzre' Dios: "Xcalenu'", na' guzú lawe' dxuchálaje' chee bidu Jesús nen xúgute benne' ca' dxelebeze' benne' na' sel-la Dios chee guselé' benne' Jerusalén ca'.

*Ca guca gate belexezrine' xezre Nazaret*

<sup>39</sup> Ca belune' xúgute ca da dxenná da nadxixruj bea Xránadxu, nadxa besía'que' xjaque' naga nababa Galilea, na' belexezrine' xezre Nazaret da naca lazrie'.  
<sup>40</sup> Na' bidu Jesús bgúlabe', ne gúcadxabe' chuchu, ne gúcadxabe' bi naxéajni'i, na' Dios bca'ane' lebe' chawe'.

*Ca guca gate bzin bidu Jesús lu xudau'*

<sup>41</sup> Xra xrna' Jesús, tu tu iza dxjá'aque' xezre Jerusalén gate dxu' lu laní chee xulusá lazre' benne' judío ca da ben Dios, bebéaje' xra xrtawe' ca' lu xezr la xu Egipto. <sup>42</sup> Ca guque Jesús chazrinnu iza, na' xjá'aque' xúgute' Jerusalén, ca dxelún-queze' ca dxaca laní. <sup>43</sup> Ca gudé laní, na' besía'que', na' bidu Jesús begá'anabe' Jerusalén, ne quebe guleque be'e xrnabe', ne José. <sup>44</sup> Dxeléquene' Jesús zezabe' ládujla benne' zan ca', na' besía'que' tu zra nez. Gate belexilje'-be' ládujla benne' xrtie' ca', ne benne' ca' zaj núnbe'e, <sup>45</sup> quebe belexezréne'-be'. Ca'an guca belexebi'e zezajá'aque' Jerusalén chee cheajlexedílje'-be' na'.

<sup>46</sup> Ca gudé guca chunna zra, nadxa belexezréne'-be' lu xudau', dxe'ebe' ládujla benne' ca' dxuluxúzajle'e da nadxixruj bea Dios, na' dxenbe' ca dxelenné', ne dxuchébebe' benne' ca'. <sup>47</sup> Xúgute' benne' ca' dxelenne' dxelexebánene' chee'be' ca naca xel-la sina chee'be', ne ca naca da dxuchálajlebe' le'. <sup>48</sup> Gate belelé'e xra xrnabe' lebe', na' belexebánene'. Na' gunná xrnabe', dxe'e-be'.

—Zri'ina', ¿bizr chee na' benu' caní nen netu'? Cadite stebe ba guzúantu' chiu' dxexílajntu' lue', xrau' ne neda'.

<sup>49</sup> Nadxa Jesús dxe'e'be' le':

—¿Bizr chee na' dxexílajle neda'? ¿Quebe nézele le'e dxal-la' guna' neda' da naca chee Xra'?

<sup>50</sup> Xra xrnabe' quebe guléajni'ine' ca da gúzrebe' le'.

<sup>51</sup> Nadxa bezálebe' le' zezajá'aque' Nazaret, na' gúcaquezebe' bi wezúa dizra' chee xra xrnabe'. Na' xrnabe' bcache chawé' xúgute da nigá lu lázrdawe'.  
<sup>52</sup> Jesús zéajbe' dxegúlabe' lu bel-la' dxen chee'be', ne lu xichaj lázrdaube', na' dxedxúajquezebe' chawe' lau Dios, ne lau bénneache.

### 3

*Juan, benne' dxuchúe' bénneache nisa, dxuchálaje' xrtizra' Dios le'e xixre'*

(Mt. 3.1-12; Mr. 1.1-8; Jn. 1.19-28)

<sup>1</sup> Iza chinu' ca dxenná bea Tiberio, benne' dxenná be'e ca naca xezr la xu, na' Poncio Pilato dxenná be'e naga nababa Judea, na' Herodes dxenná be'e naga nababa Galilea, na' Felipe, benne' biche Herodes, dxenná be'e naga nababa Iturea, ne Traconite, na' Lisania dxenná be'e naga nababa Abilinia. <sup>2</sup> Na' Anás, ne Caifás zaj naque' bxruze blau. Ca lu zra na' Dios bchálajlene' Juan, zri'ine Zacarías, naga zua Juan le'e xixre' lawe' lataj. <sup>3</sup> Juan na' gudé' ca naca xézredu ca' zaj nnitan' chalá'a weaj xegu Jordán, na' dxe'e benne' ca' dxal-la' xelexebi' lazre', ne xeledxúe' nisa chee gunite lau Dios chee xtul-le'. <sup>4</sup> Caní guca ca na' gunná Isaías, benne' bchálaje' waláz chee Dios, gunné': Nen tu chi'i bénnea' dxenné' zizraj le'e xixre' lawe' lataj. Dxenné':

Le gucueza neza naga te Xránadxu.

Le xulí chawe' neza lase chee'.

<sup>5</sup> Ca naca zritudu ca' le xuzrá na.

Ca naca xi'a ca', ne xí'adu ca' xelexaca na tu li.

Neza xúca'du ca' xelexelí na.

Neza da quebe nalí xelexaca na tu li.

<sup>6</sup> Ca naca bénneache xeledé'ene' Benne' Wselá sel-la Dios.

<sup>7</sup> Gate benne' ca' belezrine' lau Juan chee xeledxúe' nisa, na' le' dxe'e benne' ca':

—Xrtia bēla snia. ¿Ble'e nu benne' le'e chee cuásale ca naca xel-la dxezrá'a chee Dios da ba za? <sup>8</sup> Le gun da gulé'e na ba bebí'i lázrele, ne quebe nnale lu lázrdaule: Nácantu' xrtia ljwezre Abraham. Neda' dxapa' le'e, Dios wazéquene' xexune' xiaj caní xrtia Abraham. <sup>9</sup> Xa waga ba de cuásate na chee chugue' xaga ca', na' xúgute xaga da quebe dxelebia na da zixre chawe' welechugue na, na' xuluzré'e na lu xi'.

<sup>10</sup> Nadxa benne' ca' buluchēbe' le':

—¿Bi dxal-la' guntu'?

<sup>11</sup> Juan bechebe':

—Benne' de chupa zre' dxal-la' gunézruje' tu na benne' quebe de chee', na' benne' de da dxawe' dxal-la' gunézruje' da gagu bēnea' quebe bi de chee'.

<sup>12</sup> Cá'anqueze belelá' benne' wechizruj ca' chee xeledxúe' nisa, na' buluchēbe' Juan:

—Benne' wesede, ¿bi da dxal-la' guntu' netu'?

<sup>13</sup>Juan guzre' le':

—Quebe guchízruje da zrendxa ca da nadxiruj bea na.

<sup>14</sup>Cá'anqueze bal-la benne' dxjaque' wedil-la buluchebe' le':

—¿Gazra netu'? ¿Bi da dxal-la' guntu'?

Juan bechebe':

—Quebe guchébele benne', ne quebe gágule le' zria lu da wen lazre' chee' cuale dumí chee', na' le be nen cadite názruje.

<sup>15</sup>Benne' zaj zre'e na' zaj zue' stebe, na' dxuluchebe' lu lázrdawe' che Juan na' naque' Cristo, benne' nase-la Dios. <sup>16</sup>Juan na'gunné':

—Neda', da li dxuchúa' le'e nisa nen nisa. Wida tu benne' gune' da dxulé'e xel-la dxedxúa nisa nigá, guzúe' le'e Be' Lá'azxa, ne xi' chee'. Benne' nigá nápadxe' xel-la dxenná bea ca neda', na' quebe naca chia' cuéaja' xel-la chee' da xu'u ni'e. <sup>17</sup>Ba nuxre' da dxun be' chee', na' guchi'e naga dxine' zrua' xtila. Na' xutupe' zrua' xtila, guzrá' chawe' na lizre'. Guzezxe' xizre chee' na lu xi' da cabata' xul-la na.

<sup>18</sup>Ca naca dizra' nigá, ne zezícadxa dizra' zan bchájlajlene' benne' ca' ca naca dizra' chawe' chee' Dios. <sup>19</sup>Juan gudil-le' Herodes, benne' dxenná be'e, lawe' da zúalene' Herodías, zru'ula Felipe, benne' biche Herodes na', ne lawe' da ba bene' da zante da calela. Nadxa Herodes <sup>20</sup>béndxaqueze' da calela, gulu'e Juan lizre xia.

*Da guca gate gudxúa Jesús nisa*

*(Mt. 3.13-17; Mr. 1.9-11)*

<sup>21</sup>Gate ne dxuchúa Juan na' bénneache nisa, cá'anqueze Jesús gudxúe' nisa, na' gate dxuchájlajlene' Dios, na' b'xalaj xabáa, <sup>22</sup>na' betaj Be' Lá'azxa lawe' Jesús. Ble'e lawe' ca tu bgugu chiche, na' ben tu chí'e xabáa, dxenné':

—Lue' nacu' zri'ina' nazrí'ite lazra'. Dx-zacaca ba lázrelena' Lue'.

*Ca naca xra xrtau Jesucristo*

*(Mt. 1.1-17)*

<sup>23</sup>Jesús napé' ca chi dxua iza gate guzú lawe' dxune' zrin chee'. Dxeleque benne' naque' zri'ine José. Naca Jesús zre sua Elí, xra María.

<sup>24</sup>Elí na' guque' zri'ine Matat, Matat na' guque' zri'ine Leví, Leví na' guque' zri'ine Melqui, Melqui na' guque' zri'ine Jana,

Jana na' guque' zri'ine xetú José.

<sup>25</sup>José nigá guque' zri'ine Matatías, Matatías na' guque' zri'ine Amós, Amós na' guque' zri'ine Nahum, Nahum na' guque' zri'ine Esli, Esli na' guque' zri'ine Nagai.

<sup>26</sup>Nagai na' guque' zri'ine Maat, Maat na' guque' zri'ine xetú Matatías, Matatías nigá guque' zri'ine Semei, Semei na' guque' zri'ine xetú José, José nigá guque' zri'ine Judá.

<sup>27</sup>Judá na' guque' zri'ine Joana, Joana na' guque' zri'ine Resa, Resa na' guque' zri'ine Zorobabel, Zorobabel na' guque' zri'ine Salatiel, Salatiel na' guque' zri'ine Neri.

<sup>28</sup>Neri na' guque' zri'ine xetú Melqui, Melqui nigá guque' zri'ine Adi, Adi na' guque' zri'ine Cosam, Cosam na' guque' zri'ine Elmodam, Elmodam na' guque' zri'ine Er,

<sup>29</sup>Er na' guque' zri'ine Josué, Josué na' guque' zri'ine Eliezer, Eliezer na' guque' zri'ine Jorim, Jorim na' guque' zri'ine xetú Matat,

<sup>30</sup>Matat nigá guque' zri'ine xetú Leví, Leví nigá guque' zri'ine Simeón, Simeón na' guque' zri'ine xetú Judá, Judá nigá guque' zri'ine xetú José, José nigá guque' zri'ine Jonán,

Jonán na' guque' zri'ine Eliaquim, <sup>31</sup>Eliaquim na' guque' zri'ine Melea, Melea na' guque' zri'ine Mainán, Mainán na' guque' zri'ine Matata, Matata na' guque' zri'ine Natán.

<sup>32</sup>Natán na' guque' zri'ine David, David na' guque' zri'ine Isaí, Isaí na' guque' zri'ine Obed, Obed na' guque' zri'ine Booz, Booz na' guque' zri'ine Salmón, Salmón na' guque' zri'ine Naasón.

<sup>33</sup>Naasón na' guque' zri'ine Aminadab, Aminadab na' guque' zri'ine Aram, Aram na' guque' zri'ine Esrom, Esrom na' guque' zri'ine Fares, Fares na' guque' zri'ine xetú Judá,

<sup>34</sup>Judá nigá guque' zri'ine Jacob, Jacob na' guque' zri'ine Isaac, Isaac na' guque' zri'ine Abraham, Abraham na' guque' zri'ine Taré, Taré na' guque' zri'ine Nacor.

<sup>35</sup>Nacor na' guque' zri'ine Serug, Serug na' guque' zri'ine Ragau, Ragau na' guque' zri'ine Peleg,

Peleg na' guquē' zri'ine Heber,  
 Heber na' guquē' zri'ine Sala,  
<sup>36</sup>Sala na' guquē' zri'ine Cainán,  
 Cainán na' guquē' zri'ine Arfaxad,  
 Arfaxad na' guquē' zri'ine Sem,  
 Sem na' guquē' zri'ine Noé,  
 Noé na' guquē' zri'ine Lamec,  
<sup>37</sup>Lamec na' guquē' zri'ine Matusalén,  
 Matusalén na' guquē' zri'ine Enoc,  
 Enoc na' guquē' zri'ine Jared,  
 Jared na' guquē' zri'ine Mahalaleel,  
 Mahalaleel na' guquē' zri'ine xetú Cainán.  
<sup>38</sup>Cainán na' guquē' zri'ine Enós,  
 Enós na' guquē' zri'ine Set,  
 Set na' guquē' zri'ine Adán,  
 Adán na' guquē' ca zri'inequeze Dios.

## 4

*Satanás da xriwe' dxilaj lazre' na ájala  
 gusebaga na Jesús dul-la*

(Mt. 4.1-11; Mr. 1.12-13)

<sup>1</sup>Jesús, zúalē Be' Lá'azxa Le', bezé'e xegu  
 Jordán, na' guché Be' Lá'azxa Le' le'e xixre'  
 lawe' lataj. <sup>2</sup>Na' guzúe' chua zra, na' Sa-  
 tanás da xriwe' gudilaj lazre' na ájala si xe  
 na Le'. Quebe bi gadagu Jesús da chua zra  
 ca', na' ca gudé na' gudune'. <sup>3</sup>Nadxa gunná  
 da xriwe', guzre na Le':

—Che da li nacu' Lue' Zri'ine Dios, ben  
 xelxaca xiaj caní xeta xtila.

<sup>4</sup>Na' bechebe Jesús:

—Naxúajqueze na lu xiche chee Dios,  
 dxenné': Quegá nen xeta xtilaze gaca ban  
 bèneache, san cá'anqueze nen xrtizra'  
 Dios gaca ban bèneache.

<sup>5</sup>Nadxa da xriwe' guché na Jesús tu xi'a  
 sibe, na' chaditē ble'e na Le' xúgute cue'  
 xezr la xu da zaj nnita lu xezr la xu nigá,  
<sup>6</sup>na' guzre na Le':

—Neda' gunna' Lue' ca naca xel-la  
 dxenná bea nigá, ne xel-la szren chee  
 xúgute xezr la xu caní, lawe' da zaj xu'u  
 da caní lu na'a neda', na' gunézruja' na  
 nu dxaca lazra' gunézruja' na. <sup>7</sup>Gunna' na  
 chiu' che lue' guzú zribu' lawa', ne gucá'ana  
 szrenu' neda'.

<sup>8</sup>Jesús bechebe':

—Gucuasa lue', Satanás, lawe' da dxenná  
 xiche chee Dios, dxé'e bèneache: "Bca'ana  
 szren Xranu' Dios, ne ben zrin chee tuze  
 Le'."

<sup>9</sup>Nadxa da xriwe' na' guché na Jesús lu  
 xezre Jerusalén, na' bcuén na Le' xichaj ze'e  
 xudau', na' guzre na Le':

—Che da li na' nacu' Zri'ine Dios,  
 guxrite' nigá cheajxezu' lu xu, <sup>10</sup>lawe' da  
 lu xiche chee Dios dxenné':  
 Dios gusebague' gubáz chee xabáa chee' ca'  
 xuluxue' Lue'.

<sup>11</sup>Xelechísaqueze' Lue' nen ne'e,  
 chee quebe gaca we' ni'u lawe' xiaj ca'.

<sup>12</sup>Jesús bechebe':

—Cá'anqueze naxúaj na lu xiche chee  
 Dios, dxé'e bèneache: "Quebe guchínenu'  
 ca dxaca lazru' Xranu' Dios."

<sup>13</sup>Gate da xriwe' québedxa bezrela lazre'  
 na ájala gun zréaje na Jesús, na' becuasa na  
 tu chi'i.

*Jesús dxune' zrin chee' naga nababa Galilea*

(Mt. 4.12-17; Mr. 1.14-15)

<sup>14</sup>Na' Jesús bezrine' Galilea, ba nápalē'e  
 xel-la waca chee Be' Lá'azxa, na' ca naca  
 xézredu ca' zaj nababa na' buluchálaj bēn-  
 neache ca naca xel-la waca chee'. <sup>15</sup>Jesús  
 bsédene' benne' ca' tu tu lu xudau' ca', na'  
 xúgute' belúe lá'ane' Le'.

*Jesús dxexezrine' Nazaret*

(Mt. 13.53-58; Mr. 6.1-6)

<sup>16</sup>Nadxa Jesús bezrine' Nazaret, xezre  
 naga bgule'. Lu zra dxulupá'ana benne'  
 judío ca' guxú'e lu xu'u ga na' dxelezraga  
 benne' judío ca', ca xu'u lawe' dxune', chee  
 gulabe' da naxúaj na lu xiche chee Dios.  
<sup>17</sup>Buludé'e Lu ne'e xiche naga naxúaj dizra'  
 bzuaj Isaías, benne' bchálaje' waláz chee  
 Dios, na' gate gusálaje' na, na' blabe' naga  
 naxúaj da dxenná:

<sup>18</sup>Be' Lá'azxa chee Xránadxu zúalēne' neda',  
 lawe' da guquē'e neda' chee guchálajlēna'  
 benne' baxache' ca' dizra' chawe'  
 chee'.

Gusel-le' neda' chee xexuna' benne' ca'  
 quebe chawe' zaj zué',  
 ne chee guzenda' benne' ba zaj nadxéaje' lu  
 da zrinnaj, waca xelélé',

ne chee xexuna' lau benne' la chul-la ca',  
 ne chee guselá' benne' dxelezaca zi'e,

<sup>19</sup>ne chee guzenda' bèneache ba bzrin zra  
 Xránadxu Dios gucá'ane' le' chawe'.

<sup>20</sup>Nadxa Jesús butubē' xiche na', na' bdeé'  
 na lu na' benne' dxuxúe' xu'u na', na'  
 bebé'e. Xúgute' benne' zaj zre'e lu xu'u na'  
 dxelenné'e Le', <sup>21</sup>na' Jesús guzú lawe' dxé'e  
 benne' ca':

—Na'a zra guca ca da naxúaj na laule le'e.

<sup>22</sup> Xúgute' gulenné' chawe' chee Jesús, ne belexebánene' ca naca dizra' chawe' da dxuchalaje'. Na' buluchebe ljwezre':

—¿Quegá benne' nigá zri'ine José?

<sup>23</sup> Jesús guzre' le':

—Da líqueze le'e wele neda' dizra' nigá: Lue', benne' dxexúnu' benne' we' ca', bexún cuinu', ne xele neda': Ca da bémentu' benu' lu xezre Capernaum, cá'anqueze ben na lázriu' nigá na'a.

<sup>24</sup> Nadxa gunná Jesús:

—Da li dxapa' le'e, tu benne' dxuchálaje' waláz chee Dios, quebe nu dxue le' ba lá'ana lazrie'. <sup>25</sup> Dxapa' le'e, gulezrá' nu'ula zan ba gulate benne' chee' lu xezr la xu Israel ca lu zra guzúa Elías, benne' bchálaje' waláz chee Dios, gate na' quebe guca xiuj chun iza xugachaj, ne gúcale'e gubina' ca naca xezr la xu na'. <sup>26</sup> Dios quebe gusel-le' Elías lau netú nu'ula, nate benne' chee', zue' xezr la xu Israel. Gusel-le' le' lau tu nu'ula, nate benne' chee', zue' lu xezre Sarepta, da zua na gagu naga dxe' xezre Sidón. <sup>27</sup> Cá'anqueze gulezrá' benne' zan benne' dxeledxé'ene' we' guzru' lu xezr la xu Israel ca lu zra guzúa Eliseo, benne' bchálaje' waláz chee Dios, na' netúe' quebe bexaque'. Tuze Naamán, benne' xezr la xu Siria bexaque'.

<sup>28</sup> Gate belén benne' ca' zaj zre'e xu'u na' da nigá, na' belezrá'ale'e. <sup>29</sup> Na' gulase', ne belexebáje' Jesús xezre na', na' beleché'e Le' dxu'a chjéaj naga zria xezre na', chee xuludixre' Le' na'. <sup>30</sup> Na' Jesús bedée' ládujla benne' ca', na' bezé'e zexíaje'.

*Jesús dxexungé' tu benne' xu'e be' xriwe' (Mr. 1.21-28)*

<sup>31</sup> Nadxa Jesús bexíaje' Capernaum, tu xezre nababa Galilea, na' guzú lawe' dxusédene' benne' ca' lu zra lá'azxa chee judío ca'. <sup>32</sup> Belexebánene' ca naca da dxusédene', lawe' da dxuchálaje' ca tu benne' nape' xel-la dxenná bea.

<sup>33</sup> Lu xu'u na' zua tu benne' xu'e be' xriwe', na' dxebezre xe'e, <sup>34</sup> dxenné':

—Bsan netu'. ¿Bizra chee na' dxunu' netu' zede, Jesús, benne' Nazaret? ¿Za'u guzría xi'u netu'? Neda' núnbe'a Lue', ne nezda' nacu' benne' lá'azxa chee Dios.

<sup>35</sup> Jesús gudil-le' be' xriwe' na', dxenné':

—Zrize guzúa. Bsan benne' biu nigá.

Nadxa be' xriwe' na' gudín na bénnea' xu lau xúgute' benne' ca', na' bedxúaj na lu

xichaj lázrdau bénnea', ne quebe bi ben na chee'. <sup>36</sup> Xúgute' belexebánene', na' gulé' ljwezre':

—¿Bizra dizra' da caní? Benne' nigá dxenná bé'ene' be' xriwe' ca' nen duté xel-la dxenná bea chee', ne nen xel-la waca, na' be' xriwe' ca' dxeledxúaj na.

<sup>37</sup> Na' buluchálaje' ca naca chee Jesús xúgute lu xezre ca' zaj nababa na'.

*Jesús dxexungé' xrna zru'ula Pedro (Mt. 8.14-15; Mr. 1.29-31)*

<sup>38</sup> Nadxa bedxúaj Jesús lu xu'u na', na' guxú'e lizre Simón. Xrna zru'ula Simón na' quebe chawe' zue', xú'ule'e da la, na' gulata' xuene' Jesús xexune' le'. <sup>39</sup> Jesús gubigüe'e cuíte', na' gudil-le' da la na', na' bedxúaj na. Ca ná'queze bexásate', na' guzú lawe' dxusenie' da xelawe'.

*Jesús dxexungé' benne' zan quebe chawe' zaj zue'*

*(Mt. 8.16-17; Mr. 1.32-34)*

<sup>40</sup> Ca dxe'bía gubizra, benne' ca' zaj nnta' benne' quebe chawe' zaj zue' lizre' belú'e le' lau Jesús, na' Le' bze ne'e tu tu benne' ca', ne bexuné' le'. <sup>41</sup> Cá'anqueze zánete be' xriwe' belexedxúaj na lu xichaj lázrdau benne' ca'. Dxelenná na:

—Lue' nacu' Zri'ine Dios.

Jesús gudil-le' be' xriwe' ca'. Quebe be'e na lataj xelenné na, lawe' da zaj neze na naca Le' Cristo.

*Jesús dxuchálaje' naga nababa Galilea (Mr. 1.35-39)*

<sup>42</sup> Ca dxani'sise', bdxuaj Jesús xezre na', guxíaje' naga xaajsúe' tuze'. Na' benne' ca' belexexíaje' Le', na' belezrine' xuluzague' Le' chee quebe xeze'e. <sup>43</sup> Jesús gunné':

—Dxun na ba xen guzenda' bénneache xezícadxa xezrdu ca' ca dxenná bea Dios, lawe' da chee guna' caní gusel-le' neda'.

<sup>44</sup> Ca'an guca gudá Jesús ca naca xezre ca' zaj nababa Galilea, na' bchálaje' lu xu'u naga dxelezraga judío ca' lu xezre ca'.

## 5

*Dxelezengé' bela zan (Mt. 4.18-22; Mr. 1.16-20)*

<sup>1</sup> Gate zua Jesús dxu'a nísadau' chee Genesaret, na' belezrín benne' zan, ne buluchídete' Le', lawe' da dxelaca lazre' xelenne' xrtizra' Dios. <sup>2</sup> Jesús blé'ene' chupa da dxedá lawe' nísadau' lu nísadau' na', zaj zra' gáguze lu xu bizre, lawe' da ba



belexedxúaj benne' wezén bela ca' lu'ule da dxedá lawe' nísadau', na' zaj zre'e dx-elexibe' xixruj chee' ca'. <sup>3</sup> Nadxa guxú'u Jesús tu lu da dxedá lawe' nísadau', da naca na chee Simón, na' guzre' Simón guzrigue' na xelate' lu nísadau' na'. Jesús gudxé'e lu da dxedá lawe' nísadau' na', na' guzú lawe' dxusédené' benne' ca'. <sup>4</sup> Ca bexuzre bchálaje', na' guzre' Simón:

—Bsa da dxedá lawe' nísadau' chiu' naga nácdaxa situj nísadau', na' le guzal-la xixruj chee'le na' chee senle bela.

<sup>5</sup> Simón bechebe':

—Benne' Wesede, bedú xela bentu' zrin, ne quebe bi bela ne sentu'. Lu dizra' chiu', na'a guzal-la' xixruj nigá.

<sup>6</sup> Ca belune' ca gunná Jesús, na' bela zante gulezene', na' gúcate wadxeza xixruj na'. <sup>7</sup> Nadxa bulutá ne'e gulenné' benne' ljwezre' zaj zre'e xetú lu da dxedá lawe' nísadau' chee xelácalene' le'. Benne' ca' belezrine', na' bulusezrate' dxúpaté da dxedá lawe' nísadau' ca', na' gulácaté na zi'i, ne dxácaté welaze na lu nísadau'. <sup>8</sup> Gate ble'e Simón Pedro da nigá, na' bzu zribe' lau Jesús, gunné':

—Gucuasa cuita' neda', Xran, lawe' da naca' neda' benne' dul-la.

<sup>9</sup> Caní gunná Simón lawe' da dxezrebele'e ne chee da guca na, ne cá'aqueze dxelezrebe benne' ljwezre' ca', gate belelé'ene' bela zan ca'. <sup>10</sup> Cá'aqueze belezrebe Jacobo ne Juan, zri'ine Zebedeo, benne' zaj naque' ljwezre Simón na'. Jesús guzre' Simón:

—Quebe zrebu'. Ná'atela su lau' senu' bénneache lu da naca chee Dios.

<sup>11</sup> Nadxa, ca belexebeáje' da dxedá lawe' nísadau' na' dxú'ela nísadau', na' bu-lucá'ane' ca naca da ca', na' zjálcalene' Jesús.

*Jesús dxexune' tu benne' dxé'ene' we' guzru'*

(Mt. 8.1-4; Mr. 1.40-45)

<sup>12</sup> Gate Jesús zue' tu xezre, na' bzrin tu benne' dxé'ene' we' guzru', na' ca blé'ene' Jesús, bzu zribe', ne gudíxrujté lawe' lu xu, na' bca'ana szrene' Le', gunné':

—Xran, che dxaca lazru', waca xexunu' neda'.

<sup>13</sup> Nadxa Jesús bte'-be' nen ne'e, gunné':

—Dxaca lazra'. Bache bexacu'.

Ca gunné' ca', we' guzru' na' bedxúajte na. <sup>14</sup> Jesús bsebage' bénnea' quebe nu xe'e da nigá. Nadxa gunné':

—Guxíaj na'a, xejlé'e cuinu' lau bxruze, ne gulu'u dumí chee xexádxu' lau Dios ca da gunná be'e Moisés chee xeleneze benne' ba bexacu' ca naca xízrawe' chiu'.

<sup>15</sup> Ca naca xel-la waca chee Jesús bzrílu-jdxa na, na' benne' zante belezrague' lau Jesús chee xelenne' da dxuchálaje', ne chee xexune' le' ca naca xízrawe' chee'. <sup>16</sup> Nadxa Jesús bezé'e na', na' bzrine' naga quebe nu chilá' benne', na' bchálajlene' Dios.

*Jesús dxexune' tu benne' naxrú'une ní'a ne'e*

(Mt. 9.1-8; Mr. 2.1-12)

<sup>17</sup> Tu zra zua Jesús dxusédené', na' bal-la benne' xudau' fariseo ca', ne benne' dx-uluxuzájle'e da nadxixruj be'e Moisés, zaj dxe'e na', benne' zá'aque' ca naca xézredu ca' zaj nababa Galilea, ne xezre ca' zaj nababa Judea, ne chee xezre Jerusalén, na' zúiale xel-la waca chee Xránadxu Dios Jesús, na' bexune' benne' ca' quebe chawe' zaj zue'. <sup>18</sup> Nadxa belezrín tapa benne' zaj nu'e tu benne' zua zri ní'a ne'e, dee' tu lu blaga', na' gulaca lazre' xelegú'e le' lu xu'u chee xelíxru'e le' lau Jesús. <sup>19</sup> Quebe guca xelezrine' lau Jesús lawe' da zrále'e benne' zan ga na'. Nadxa gulegüéne' chju'ula, ne gulesaluje' chju'u, na' bululétaje' benne' na' de' lu blaga' ládujla benne' zan ca' lau Jesús. <sup>20</sup> Gate ble'e Jesús ca dxeléajle benne' ca' chee', na' guzre' benne' quebe chawe' zue':

—Bénne'dau', ba bnite lawa' dul-la chiu'.

<sup>21</sup> Nadxa benne' ca' dxuluxuzájle'e da nadxixruj bea na, ne benne' xudau' fariseo ca' gulezú lawe' dxelenné' lu xichaj lázrdawe': ¿Nuzra benne' nigá, dxenné' schanni' chee Dios? Quebe nu benne' séquene' gunite lawe' dul-la chee bénneache. Tuze Dios gaque'.

<sup>22</sup> Jesús dxéquebe'ene' da dxelenné' lu xichaj lázrdawe', na' guzre' benne' ca':

—¿Bizr chee na' dxéquele le'e caní?

<sup>23</sup> ¿Bízrala na quebe naca na stébe guna', che xapa' benne' nigá: Ba bnite lawa' dul-la chiu', u che xapa' le': Guxasa bexíaj? <sup>24</sup> Gulé'eda' le'e neda', Benne' Gulje' Bénneache, napa' xel-la dxenná bea lu xezre la xu nigá chee gunite lawa' dul-la chee bénneache.

Nadxa guzre' benne' na' naxrú' une ni'a ne'e:

—Lue' dxapa', bexasa, bexúa blaga' chiu', ne bexíaj.

<sup>25</sup> Ca gunné' ca', bexásatę benne' na' lau xúgute benne' ca', na' bequę'e blaga' cheę', ne bezé'e xezíaje' lizre' zeajxę lá'ane' Dios.

<sup>26</sup> Xúgute benne' ca' belexebáne', na' belúe lá'ane' Dios, ne nen xel-la dxelezrebe gulenné':

—Na'a ble'edxu da dxebánequezdxu.

*Jesús dxenné' Leví*

(Mt. 9.9-13; Mr. 2.13-17)

<sup>27</sup> Ca gudé na' bezá'a Jesús, na' blé'ene' tu benne' dxuchizruje' waláz cheę xezre Roma, le' Leví. Dxe'e naga dxuchízruje', na' guzre' le':

—Ben neda' tuze.

<sup>28</sup> Na' guxasa Leví, bca'ane' ca' naca cheę' ca', na' guxíajlene' Jesús.

<sup>29</sup> Ca gudé na', Leví gulu'e tu xrche' zrentę lizre' cheę bca'ana szrene' Jesús, na' zrále'ęqueze na' xezícadxa wechizruj ca', ne xezícadxa benne' zaj dxe'e dxágulene' benne' ca'. <sup>30</sup> Na' benne' xudau' fariseo ca', ne benne' ca' dxuluxuzájle'e da nadxixruj bea na' gulezú lawę' dxelezi tizre' benne' ca' dxusede Jesús, dxelé'e le':

—¿Bizr cheę na' dxe'aj dxágulele benne' wechizruj caní, ne benne' dul-la ca'?

<sup>31</sup> Jesús bechebe':

—Quebe zaj nachine benne' zaj zua chawe' nu benne' dxexúne' le'. Benne' quebe chawe' zaj zue' dxelechínene' le'.

<sup>32</sup> Neda' quegá za'a dxennéa' benne' xrlátaje. Za'a dxennéa' benne' dul-la, cheę xelexeb' i lazre'.

*Dxuluchebe' Jesús ca naca cheę gubasa*

(Mt. 9.14-17; Mr. 2.18-22)

<sup>33</sup> Nadxa buluchebe' Jesús:

—¿Bizr cheę na' dxelúnle'e gubasa, ne dxuluchálajle Dios benne' ca' zjácálene' Juan, ne benne' ca' zjácálene' benne' xudau' fariseo ca', san benne' ca' dxusedenu' tu dxelé'aj dxeláguzqueze'?

<sup>34</sup> Jesús bechebe':

—¿Wazéquele xele benne' zaj zra' laní cheę wechaga na' xelune' gubasa dxácate na' zua benne' wechaga na' nen benne' ca'?

<sup>35</sup> Wazrín zra gate wechaga na' na' xecuase' nen benne' ca'. Ca lu zra na' xelune' gubasa.

<sup>36</sup> Nadxa bchálajlene' le' ca naca da dxulé'e nigá:

—Quegá nu benne' cheze' tu zre' cube cheę xudé'e na tu zre' gula. Che ca' gune', na' guzria xi'e ca naca zre' cube na', na' ladxę'du cube na' quebe gulé'e na cháwedau' nen ladxę' gula na'.

<sup>37</sup> Cá'unqueze quebe gaca cá'adxu xrise uva cube lu bzude xide gula, lawe' da che ca' gundxu, xrise uva cube na' gutín na bzude xide gula, na' gaca ditje xrise uva na', ne bzude xide na'. <sup>38</sup> Cheę le na' dxalla' cá'adxu xrise uva cube lu bzude xide cube, na' dxúpatę na' xegá'ana chawe' na.

<sup>39</sup> Che tu benne' xi'aje' xrise uva wal-la gula, québedxa nna na cheę' xi'aje' xrise uva cube, lawe' da dxenné': "Nétajdxa da gula na'."

## 6

*Benne' ca' dxusede Jesús dxelálaje' dau zrua' xtila lu zra lá'azxa cheę judío ca'*

(Mt. 12.1-8; Mr. 2.23-28)

<sup>1</sup> Tu lu zra lá'azxa cheę judío ca', gudé Jesús naga naxaza zrua' xtila, na' benne' ca' dxusedene' zjaque' dxelálaje' dau zrua' xtila, na' dxelezrube na nen ne'e, ne dxelawe' zrua' xtila na'. <sup>2</sup> Nadxa benne' xudau' fariseo ca' buluchebe' le':

—¿Bizr cheę na' dxunle le'e tu zrin da quebe naca na' gunle zra lá'azxa cheędxu?

<sup>3</sup> Jesús bechebe':

—¿Quebe ne gulábale le'e ca ben David ne benne' ljwezre' ca' gate guledune'?' <sup>4</sup> Guxú'u David na' tu lu xudau' cheę Dios, ne guquę'e xeta xtila da gulú'u bxruze lau Dios, na' gudawe' na, ne bnéruzje' cheę benne' ca' zjácálene' le', ne quebe naca cheę' xelawe' xeta xtila na'. Tuze bxruze ca' naca cheę' xelawe' na.

<sup>5</sup> Cá'unqueze guzre Jesús benne' ca':

—Neda', Benne' Gulje' Bénneache, nápaqueza' xel-la dxenná bea ca naca cheę zra lá'azxa.

*Jesús dxexune' benne' nazrinnaj ne'e*

(Mt. 12.9-14; Mr. 3.1-6)

<sup>6</sup> Xetú lu zra lá'azxa cheę judío ca', guxú'u Jesús tu lu xu'u, na' guzú lawę' dxusedene' benne' zaj nazraguę' na'. Zua na' tu benne' nazrinnaj ne'e xabela. <sup>7</sup> Benne' ca' dxuluxuzájle'e da nadxixruj bea na, ne benne' xudau' fariseo ca' dxuluzuzre' Jesús cheę xelélé'ene' che xexún Jesús bënnea' lu zra lá'azxa cheę', cheę xelezéque' xelawe' zria Jesús. <sup>8</sup> Jesús ba nézene' ca da dxelegú'u lazre', na' guzre' bënnea' nazrinnaj ne'e:

—Guxasa, ne guzé laduj nigá.

Benne' na' guxase', na' guzé' na'. <sup>9</sup>Nadxa gunná Jesús, guzre' benne' ca':

—Na'a gucheba' le'e tu: ¿Bízrala na' waca gundu xra lá'axxa chee, da xrlátaje che da calela? ¿Gucache cháwedxu xel-la nabán chee tu benne', che guzría xidxu na'?

<sup>10</sup>Nadxa Jesús guné'e benne' ca' zaj naxechaj Le', na' guzre' benne' we' na':

—Bli na'u nigá.

Benne' na' bene' ca', na' bexacáte ne'e na'. <sup>11</sup>Na' benne' ca' zaj zre'e na' belezrá'ale'e, na' gulezú lawe' dxuluchebe ljwezre' bi xelexéquene' xelune' chee Jesús chee xuluzría xi'e Le'.

*Jesús dxequ'e benne' chazrinnu ca' xe-laque' gubáz chee'*

(Mt. 10.1-4; Mr. 3.13-19)

<sup>12</sup>Ca lu zra na' Jesús guxíaje' tu lu xi'a xeajchálajlene' Dios, na' guzúe' bedú xela dxuchálajlene' Dios. <sup>13</sup>Ca guxani' gunné' benne' ca' dxusédene', ne guqué'e chazrinnu benne' ca', na' bzre'e benne' ca' xelaque' gubáz chee'. <sup>14</sup>Benne' caní zaj naque':

Simón, (bénnea' bzue' le' Pedro),  
Andrés, (benne' biche Simón na'),  
Jacobo, Juan, Felipe, Bartolomé,

<sup>15</sup>Mateo, Tomás,

Jacobo, (zri'ine Alfeo),

Simón, (bénnea' dxedábague' benne' Roma ca')

<sup>16</sup>Judas, (benne' biche Jacobo), ne Judas Iscariote, (bénnea' gudé'e Jesús lu na' benne' ca' dxeledábague' Le').

*Jesús dxusédene' benne' zante*

(Mt. 4.23-25)

<sup>17</sup>Jesús bdinne' lu xi'a na' nen benne' ca' dxusédene', na' bzrine' tu lache' nen benne' ca'. Benne' zan zaj zre'e na' zaj nababe' xezre ca' zaj nababa Judea, ne Jerusalén, nen benne' zaj nababe' Tiro, ne Sidón. Benne' caní belelé'e chee xelenne' da dxuchalaj Jesús, ne chee xexún Jesús le' ca naca xízrawe' dxeledxé'eng'. <sup>18</sup>Cá'anqueze benne' ca' zaj xu'e be' xriwe' belexaque'. <sup>19</sup>Xúgute' benne' ca' gulaca lazre' xuluté' Jesús lawe' da dxexún Le' xúgute' nen xel-la waca chee'.

*Benne' ca' naca da ba neza zren chee', ne benne' ca' zaj naque' baxache'*

(Mt. 5.1-12)

<sup>20</sup>Nadxa Jesús gunné'e benne' ca' dxusédene', na' guzre' le':

—Ba neza zrente naca na chee le'e, dxéquebe'ele nácale benne' xache', lawe' da waxú'ule le'e naga dxenná bea Dios.

<sup>21</sup>Ba neza zrente naca na chee le'e, dxedunle da dxunna Dios, lawe' da wélajquezle.

<sup>22</sup>Ba neza zrente naca na chee le'e, dxebézrele ne chee dula, lawe' da guzrízrequeze.

<sup>23</sup>Ba neza zrente naca na chee le'e, gate xelexebéaje' le'e chalé'ajla, ne gate xelenné' schanni' chee, ne gate xulucá'ana ditje' lale ca tu da sban lawe' da nácale bi chia' neda', Benne' Gulje' Bénneache. <sup>24</sup>Le béle'e, ne le sua lu da ba neza lu zra na' lawe' da zrué'ele tu da zren lu xabáa chee Dios. Cá'anqueze benne' xra xrtau benne' caní bulusaca zi'e benne' ca' buluchálajé' waláz chee Dios.

<sup>25</sup>Baxache' nácale le'e, benne' gunní'a, lawe' da ba nácale xel-la dxebé da naca chee xezra lu nigá.

<sup>26</sup>Baxache' nácale le'e, nélajle na'a, lawe' da wadunle le'e.

<sup>27</sup>Baxache' nácale le'e dxuzrízrele na'a, lawe' da cuezre xáchele.

<sup>28</sup>Baxache' nácale le'e gate xúgute' bèneache dxelenné' da chawe' chee, lawe' da ca' belún xra xrtáule, gulenné' da chawe' chee benne' wen lazre' ca', benne' gulenné': "Netu' dxuchálajntu' waláz chee Dios."

*Dxal-la' zri'idxu benne' ca' dxeleucidene' dxi'u*

(Mt. 5.38-48; 7.12)

<sup>29</sup>Na' gunná Jesús:

—Dxapa' le'e dxénele chia', le zri'i benne' ca' dxeleucidene' le'e, ne le gun chawe' chee benne' ca' dxelezré'e le'e. <sup>30</sup>Le nne' chawe' chee benne' ca' dxelenné' calela chee, ne le naba lau Dios gaca chawe' chee benne' ca' dxelenné' schanni' chee. <sup>31</sup>Che nu benne' cape' xragale, le guzete' xecha la'a, ne che nu benne' que'e xicha chee, le güe lataj ca'ate' zrale. <sup>32</sup>Le gunezruj nüteteze benne' bi nabe' le'e, ne che nu benne' que'e da naca chee, quebe xenábale na. <sup>33</sup>Le gun chee bèneache cáteze na' dxaca lázrele xelune' chee.

<sup>34</sup>Che le'e nazri'ile tuze benne' ca' zaj nazri'ine' le'e, ¿bízraqueze da chawe' dxunle? Cá'anqueze dxelún benne' ca' dxelune' da calela. <sup>35</sup>Che dxunle chawe'

chee tuze benne' ca' dxelune' le'e chawe', ¿bízraqueze da chawe' dxunle? Cá'anqueze dxelún benne' wen da zrinnaj ca'. <sup>34</sup> Che bi dxusanle chee tuze benne' ba nézele wexunne' na, ¿bízraqueze da chawe' dxunle? Cá'anqueze benne' wen da calëla ca' dxulusane' da naca chee' chee' benne' ca' dxelune' da calëla, lawe' da zaj nézene' wulunézrujte benne' ca' le na. <sup>35</sup> Dخال-la' zri'ile le'e benne' ca' dxeleze' le'e, ne gunle da chawe' chee', ne gusanle chee' benne' ca' da xelenabe' le'e, lácala quebe xelexexunne' na. Che gunle ca', da zrendxa da si' lu na'le, ne gácale bi ca' chee' Dios szrente, lawe' da naca Le' zri'i lazre' nen benne' ca' quebe dxelexezaca ba lazre', ne benne' wen da calëla ca'. <sup>36</sup> Le xezri' lazre' bënneache ca dxun Dios, dxezri' lazre' le'e.

*Quebe guzále chalá'ala le sa' ljwézrele*  
(Mt. 7.1-5)

<sup>37</sup> Na' gunná Jesús:

—Quebe guzále chalá'ala le sa' ljwézrele, na' Dios quebe guzúe' le'e chalá'ala. Quebe bi nnele chee le sa' ljwézrele, na' Dios quebe guchi'e cheele le'e. Le gunité lau chee le sa' ljwézrele, na' Dios gunité lawe' cheele le'e. <sup>38</sup> Le gunezruj chee' bënneache, na' Dios gunne' cheele le'e. Dios cu'e lu xcuite cheele tu xi'ina da nálate, ne da naxi'tequeze, ne gunibete' na, ne na sua dí'atequeze na. Dios gudxírequeze' cheele ca da dxudxírele chee' bënneache.

<sup>39</sup> Nadxa Jesús bchálaje' da dxul'é'e nigá, gunné':

—¿Waca tu benne' la chul-la cu'e neza xetú la chul-la? Che ca' gune', dxúpate' xelebixre' tu lu xedxu. <sup>40</sup> Netú benne' dxusede gácadxe' szren ca naca bënnea' dxusedene' le', na' gate xuzre gusedie', gaque' ca naca bënnea' bsédene' le'.

<sup>41</sup> ¿Bizr chee' na' dxenná'u bébedu na' xu'u na xiaj lau le sa' ljwezru', ne quebe dxéquebe'enu' ca naca da zren da xu'u na xiaj lau' lue'? <sup>42</sup> Che quebe dxéquebe'enu' ca naca da zren na' da xu'u na xiaj lau' lue', ¿ájazra dxunu' dxexázrenu' dxu'u le sa' ljwezru': "Benna lataj xebéaja' bébedu na' xu'u na xiaj lau'?" Lue', benne' dxun láweze xrlátaje, bebéaj zá'teca lue' ca naca da zren da xu'u na xiaj lau', na' nadxa le'enu' cháwedau' xebéaju' bébedu na' xu'u na xiaj lau le sa' ljwezru'.

*Naca bea tu benne' ne chee' da dxune'*  
(Mt. 7.17-20; 12.34-35)

Nadxa gunná Jesús: <sup>43</sup> —Tu xaga xrlátaje quebe cuía na da zixre calëla, na' xaga da quebe naca chawe' quebe gaca cuía na da zixre chawe'. <sup>44</sup> Tu tu xaga naca bea na ne chee' da zixre da dxebía na. Quebe gaca guchíbedxu da zixre chee' xaga higo tu lu xaga xeche', ne quebe guchíbedxu da zixre chee' lba uva lu xeche' bisigá. <sup>45</sup> Benne' xrlátaje, da xrlátaje dxenné' bënnea' lawe' da naxaza da xrlátaje lu xichaj lázrdawe', na' benne' wen da calëla, da calëla dxenné' bënnea' lawe' da xu'u da calëla lu xichaj lázrdawe'. Dxu'e na' dxenné' na ca naca da xu'u lu xichaj lázrdawe'.

*Dxuchalaj Jesús chee' chupa lane xu'u*  
(Mt. 7.24-27)

Gunná Jesús: <sup>46</sup> —¿Bizr chee' na' dxele neda': "Xran, Xran", ne quebe dxunle ca da dxapa' le'e? <sup>47</sup> Xapa' le'e aja naca bënnea' ze'e nen neda', ne dxenne' xrtizra'a, ne dxuné' ca da dxapa' le'. <sup>48</sup> Naque' ca tu benne' bene' tu xu'u. Da zren gudene', na' bzrie' lane na lawe' xiaj xre. Gate bdxuaj xegu, na' xeajchú'ule'e na le'e xu'u na', quebe bi guzeque' gune na xu'u na' lawe' da zria lane na lawe' xiaj xre. <sup>49</sup> Na' bënnea' dxenne' xrtizra'a, ne quebe dxune' ca da dxapa' le', naque' ca tu benne' bene' xu'u chee' lawe' xu dxeze, ne quebe guzalé' lane na, na' gate bdxuaj xegu na', ne xeajchú'ule'e na le'e xu'u na', na' guché na le' na, na' tu ch'izqueze bzria xi na le' na.

## 7

*Jesús dxexune' bi wen zrin chee' tu benne'*  
*Roma*

(Mt. 8.5-13)

<sup>1</sup> Gate bexuzre bchálajle Jesús benne' ca', na' bezé'e zexíaje' Capernaum. <sup>2</sup> Zua tu benne' Roma na', benne' dxenná' be'e lu wedil-la, na' zua tu bi wen zrin chee' nazri'ile'ene'-be', na' bi na' quebe chawe' zúabe', ne dxaca wátebe'. <sup>3</sup> Gate ben benne' Roma na' ca da dxun Jesús, na' gusél-le' bal-la benne' gula sina chee' judío ca', chee' xeajleguezre' Jesús xide' xexune' bi wen zrin chee'. <sup>4</sup> Benne' gula ca' belezrine' lau Jesús, na' gulezú lawe' dxelata' xuene' Le', dxelenné':

—Benne' Roma nigá naca chee' gácalenu' le', <sup>5</sup> lawe' da dxape' ba lá'ana

xəzre cheədxu, na' léqueze' benne' tu xu'u cheədxu ga dxezrágaxu.

<sup>6</sup>Nadxa Jesús guxiájlene' benne' gula ca'. Gate belezrine' gagu naga zua lizre benne' Roma na', le' gusel-le' bal-la benne' ljwezre' xeajleguezre' Jesús:

—Xran, quebe senu' gunne xue, lawe' da quebe naca chia' chu'u lizra'. <sup>7</sup>Cheə le na' ne quebe bexazrda' néda'queza' xedajdilja' Lue'. Cun gunnaze, na' xexaca bi wen zrin chia'. <sup>8</sup>Néda'queza' zua benne' dxenná bé'ene' neda', na' neda' dxenná be'eda' benne' dxjaca wedil-la. Che xapa' tu bēnea': Guxíaj, na' waxíajbe', ne che xapa' xetube': Gudá, na' wídabe', ne che nna be'eda' bi wen zrin chia' da gunbe', na' gunbe' na.

<sup>9</sup>Gate ben Jesús da nigá, na' bebánene', na' gunné' e benne' ca' zjácále Lē', gunné':

—Da li, quebe ne cheajxraca' tu benne' xəzre Israel dxeajlí lazre' neda' ca dxun benne' nigá.

<sup>10</sup>Gate belexezrín benne' ljwezre benne' Roma na' lizre', na' belelé'ene' ba bexaca bi wen zrin na'.

*Jesús dxusebane' bi biu cheə tu nu'ula ba gute benne' chie'*

<sup>11</sup>Ca gudé na' Jesús guzé'e zéaje' tu xəzre da nazí le na Naín, na' xjácále Lē' benne' ca' dxusédene', ne benne' zante. <sup>12</sup>Gate bzrine' gáguze naga zua xəzre na', blé'ene' benne' zaj nu'e tu bi gate zeajlecaché'-be', na' naca be' bi tulicha' cheə xrnabe', nu'ula na' ba gute benne' chie'. Benne' zan, benne' lazrié' zjácálene' le'. <sup>13</sup>Gate Xránadxu blé'ene' nu'ula na', na' bexache lazre' le', ne guzre' le':

—Québedxa cuezru'.

<sup>14</sup>Nadxa gubiga Jesús dxu'a xi'ina xu'tube', na' bte' na. Na' benne' ca' zeajlexexu'e-be' gulague'. Na' Jesús guzre' bi gate na':

—Bidau', dxapa' lue', guxasa.

<sup>15</sup>Na' bi na' ba nate bexásabe' gudxe'be', na' bezú laube' dxuchálajbe'. Na' Jesús bunézruje'-be' lu na' xrnabe'. <sup>16</sup>Gate belelé'e benne' ca' da nigá, na' belezrebe', ne gulezú lawe' dxelúe lá'ane' Dios, dxelenné':

—Tu benne' zrente, benne' dxenné' waláz cheə Dios, ba ble'e ládujla dxi'u.

Cá'anqueze dxelenné':

—Dios ba ble'e dxácálene' xəzr chee'.

<sup>17</sup>Ca naca naga nababa Judea, ne xəzre walíZR cheə na belén bēneache ca naca xel-la waca cheə Jesús.

*Juan, bēnea' bchue' bēneache nisa dxesel-le' gubáz cheə lau Jesús*

(Mt. 11.2-19)

<sup>18</sup>Naga xu'u Juan lizre xia, bēnene' ca naca cheə da nigá lawe' da benne' ca' zjácálene' Juan buluzenne' le' da dxaca na. Juan gunné' chupa benne' ca', <sup>19</sup>na' gusel-le' le' lau Jesús cheə cheajlechebe' Lē' che da li naque' Cristo, bēnea' dxal-la' xide', u che dxal-la' xelebeze' benne' xula. <sup>20</sup>Nadxa benne' ca' gusel-la Juan belezrine' lau Jesús, na' gulé'e Lē':

—Juan, bēnea' bchue' bēneache nisa nasele-le' netu' zedajchébentu' Lue' che Lue' na' nacu' Cristo, bēnea' dxal-la' xide', u che dxal-la' cuézantu' benne' xula.

<sup>21</sup>Ca lu zra na' Jesús bexune' benne' zante' benne' we', ne benne' dxé'ene' xízrawe' da dxedá du zren, ne benne' ca' zaj xu'e be' xriwe', na' bexune' benne' la chul-la ca'. <sup>22</sup>Nadxa Jesús guzre' benne' ca' nasele-la Juan:

—Le cheajxaca, ne le xə Juan ca naca da ba ble'ele, ne da bénele. Benne' la chul-la ca' dxelexelé'ene', na' benne' zrinna' ca' dxelexedé', na' benne' dxeledxé'ene' we' guzru' ba belexaque', na' benne' xache' ca' dxelenne' dizra' chawe' cheə Dios. <sup>23</sup>Ba neza zren naca na cheə benne' quebe gusan' lazre' neda'.

<sup>24</sup>Gate besí'aca benne' ca' gusel-la Juan, na' Jesús guzú lawe' dxuchálajlene' benne' zaj zre'e na' ca naca cheə Juan na', dxenné':

—¿Bizra guxiájle le'e xeajinna'le le'e xixre' lawe' lataj? ¿Tu xia xtila da dxutá be'? <sup>25</sup>Che cabí, ¿bizra xeajinna'le? ¿Tu benne' nacu zra lane' da zácále'e? Ba nézquezele le'e benne' ca' dxelacu zra lane' da zácále'e, ne dxelé'aj dxelawe' da zácále'e zaj zre'e lizre benne' blau ca'. <sup>26</sup>Che cabí, ¿bizra xeajinna'le? ¿Tu benne' dxuchálaje' waláz cheə Dios? Awe', ble'ele tu benne' nácadxe' szren ca tu benne' dxuchálaje' waláz cheə Dios. <sup>27</sup>Juan nigá naque' bēnea' naxúaj na cheə' lu xiche cheə Dios, dxenné': Dxelele-la' gubáz chia' lau Lue',

cheə gucá'ana chawe' neza naga teu'.

<sup>28</sup>Dxapa' le'e, ládujla xúgutē benne' quebe nu chilá' benne' dxuchálaje' waláz cheə Dios nácadxe' szren ca Juan nigá. Na'a

benne' nácadxe' dxexruj lazre' naga dxenná bea Dios nácadxe' blau ca Juan nigá.

<sup>29</sup>Na' gunná Jesús:

—Gate na' benne' dxexruj lazre' ca', ne benne' wechizruj ca' belenne' da dxuchalaj Juan, guleque bé'ene' Dios naque' xrlátaje, na' beledxúe' nisa lu na' Juan. <sup>30</sup>Benne' xudau' fariseo ca', ne benne' ca' dxu-luxuzájle' da nadxixruj bea na buluzúe' chalá'ala ca naca da dxaca lazre' Dios gunne' chee', na' quebe beledxúe' nisa lu na' Juan.

<sup>31</sup>Na' gunná Xránadxu:

—¿Ájazra gutil-la lébeda' benne' zaj zre'e na'a zra? ¿Ájazra zaj naque'? <sup>32</sup>Zaj naque' ca bidu ca' dxelebe'be' dxelítajbe' lawe' xi'a, ne dxelebezre xa'abe', dxelebe' bidu ljwézrebe': “Bcuézrentu' bchiuj da bénele, san quebe bxá'ale. Bil-la xáchentú', san quebe gudxézrele.” <sup>33</sup>Caní zaj naca benne' ca' lawe' da bla' Juan, bènnea' bchue' bènneache nisa, ne quebe gudawe' xeta, ne quebe gu'e xrise uva wal-la, na' gulenné' xu'e be' xriwe'. <sup>34</sup>Nadxa bla'a neda', Benne' Gulje' Bénneache, dxe'aj dxawa', na' dxeleonné' naca' wagu xrata, ne benne' dxé'ajle'e, ne dxeleonné' naca' ljwezre benne' dul-la ca', ne benne' wechizruj ca'. <sup>35</sup>Xel-la sina chee Dios naca bea na ne chee da dxelún benne' ca' zaj nape' xel-la sina chee Dios.

*Da bchalaj Jesús lizre Simón, benne' xudau' fariseo*

<sup>36</sup>Tu benne' xudau' fariseo gunné' Jesús cheajtawe' xeta lizre', na' Jesús guxíaje' lizre bènnea', na' gudxé'e dxawe'. <sup>37</sup>Nadxa tu nu'ula dul-la chee xezre na', gate benne' bzrin Jesús dxawe' xeta lizre benne' fariseo na', na' bzrin nu'ula na' ga na', nu'e tu da' naca na xiaj zaca, da nazráté na da dxelá zixre. <sup>38</sup>Gate bzrin nu'ula na' naga zua Jesús, na' gudxé'e zran ni'e dxebezre', ne guzú lawe' dxibe' ni'a Jesús nen nisa dxebezre', ne bsebizre' ni'e nen xicha xíchaje', ne bnupe' ni'a Jesús, na' gulu'e na da dxelá zixre na'. <sup>39</sup>Na' benne' xudau' fariseo, bènnea' gunné' Jesús lizre', gate blé'ene' da nigá, gunné' lu lázrdawe': “Chela benne' nigá da li naque' benne' dxuchálajle' waláz chee Dios, guéquebe'equeze' aja naca chee nu'ula nigá dxuté' ni'e, lawe' da naque' nu'ula dul-la.” <sup>40</sup>Nadxa Jesús guzre' benne' fariseo na':

—Simón, de tu da guchálajlena' lue'.

Na' bechebe benne' fariseo na':

—Gunná, Benne' Wesede.

<sup>41</sup>Jesús gunné':

—Chupa benne' dxelal-le' dumí chee tu benne' tu dxusántezeze' benne' dumí. Tu'e dxal-le' chee' lazruj chee chupiza, na' xetúe' dxebugue' lazruj chee chupa beu'. <sup>42</sup>Lawe' da quebe dxelezéquene' xelex-exízruje' chee bènnea', na' le' bnite lawe' chee dxúpaté benne' ca' ca naca da dxelebugue' chee'. Na'a gunná, ¿nula benne' caní zrí'idxene' bènnea'?

<sup>43</sup>Simón bechebe':

—Dxéqueda' bènnea' bnite lawe' chee' da zrendxa.

Na' Jesús guzre' le':

—Da li dxennáu'.

<sup>44</sup>Nadxa Jesús gunné'e nu'ula na', na' guzre' Simón:

—¿Dxelé'enu' nu'ula nigá? Neda' guxu'a lizru', ne quebe nu gunná be'enu' quibe ni'a, san nu'ula nigá gudibe' ni'a nen nisa dxebezre', ne bsebizre' na nen xicha xíchaje'. <sup>45</sup>Quebe bnupu' neda', san nu'ula nigá, gate guxú'utea', quebe dxusane' dxunúpequeze' ni'a. <sup>46</sup>Quebe gulu'u da za xíchaja', san nu'ula nigá gulu'e ni'a da dxelále'e zixre. <sup>47</sup>Chee le' na' dxapa' lue', lawe' da nazrí'ile'ene' neda', da nigá naca bea na ba bnite lawa' chee' ca naca dul-la zan chee', san bènnea' naca bábaze dul-la chee' da bnite lawa', láteze zrí'ine' neda'.

<sup>48</sup>Nadxa Jesús guzre' nu'ula':

—Dul-la chiu' ba bnite lawa'.

<sup>49</sup>Na' benne' ca' zaj zre'e nen Le', ne zaj dxe'e na' gulezú lawe' dxeleonné' lu lázrdawe': “¿Nuzra benne' nigá, dxunite láuqueze' dul-la?”

<sup>50</sup>Jesús guzre' nu'ula na':

—Ba naláu' lawe' da guxéajle'u chia'. Bexíaj duté xel-la dxebeza zri lazre'.

## 8

*Nu'ula ca' belún zrin chee Jesús*

<sup>1</sup>Ca gudé da nigá, gudá Jesús zane' xezre, ne xézredu ca', dxusédene', ne dxuchálaje' ca dxenná bea Dios. Benne' hazrinnu gubáz ca' zjácálene' Le'. <sup>2</sup>Cá'anqueze zjácále Le' bal-la nu'ula ca', benne' ca' bexune' le' ca naca xízrawe' chee', ne be'éaje' be' xriwe' ca' da zaj xu'e. Ládujla nu'ula ca' ziaj María Magdalena, nu'ula na' belexedxúaj gazre be' xriwe' lu xichaj lázrdawe'. <sup>3</sup>Ládujla le' zjájqueze Juana,

zru'ula Chuza, benne' na' xu'u lu ne'e da napa Herodes. Cá'anqueze ládujla le' ziaj Susana, na' zjaca nu'ula zandxa na', nu'ula ca' dxelácalene' Jesús nen da zaj nape'.

*Da dxulé'e na ca naca chee benne' dxaze' zrua' xtila*

(Mt. 13.1-9; Mr. 4.1-9)

<sup>4</sup>Benne' zan beledxúaje' lu xezre ca' chee xeledé'ene' Jesús, na' gate belezraga benne' zan naga zue', na' bchálaje' tu da dxulé'e na, dxé'e le':

<sup>5</sup>—Tu benne' dxaze' guzé'e zjaze' zrua' xtila. Ca zéaje' dxaze' na, bal-la bínnedu ca' xeajlechaze na dxu'a neza, na' benne' ca' bululáje' na, na' belezrín bxínnedau' guláguba' na. <sup>6</sup>Xebal-la bínnedu ca' xeajlechaze na lu xiaj ca', na' gate bínnedu caní belezría na, chadite gulebizre na, lawe' da quebe gudxé' gupa'. <sup>7</sup>Xebal-la bínnedu ca' xeajlechaze na naga zaj dxé' lue xeche', na' bululule xeche' ca' le' na. <sup>8</sup>Xebal-la bínnedu ca' xeajlechaze na lu xu bebe, na' gate belegula na, na' gulezríale' na. Bal-la na gulezría na tu gaxúa weaj.

Gate bexuzre bchalaj Jesús da nigá, na' gunné' zizraj:

—¡Che le'e zua nágale, le xene!

*Jesús dxenne' bizr chee na' dxuchálaje' da dxulé'e na*

(Mt. 13.10-17; Mr. 4.10-12)

<sup>9</sup>Nadxa benne' ca' dxusede Jesús gulenábene' Le' bizra zéaje da dxulé'e nigá.

<sup>10</sup>Jesús guzre' le':

—Dios dxuzéajni'ine' le'e ca naca da nache chee xel-la dxenná bea chee', san benne' xula, dxuchálajlena' le' da dxulé'e na caní, chee gate dxeledé'ene' xelaque' ca benne' quebe dxeledé'ene', ne gate dxelenne' quebe dxeláajni'ine'.

*Jesús dxuxuzájle'e da dxulé'e na ca naca chee bénnea' dxaze'*

(Mt. 13.18-23; Mr. 4.13-20)

<sup>11</sup>Na' gunná Jesús:

—Da nigá naca ca zéaje da dxulé'e na': Bínnedu ca' zéaje na xrtizra' Dios.

<sup>12</sup>Bínnedu ca' xeajlechaze na dxu'a neza zéaje na benne' ca' dxelenne' xrtizra' Dios, san za' da xriwe', na' dxegúa na dizra' na' lu xichaj lázrdau benne' ca', chee quebe xeláajle'e, ne quebe xeledé'. <sup>13</sup>Bínnedu ca' xeajlechaze na lu xiaj ca' zéaje na benne' ca' dxelenne' dizra' na, ne dxelezi'e na dute

xel-la dxelebe', san quebe dxaze na lu xichaj lázrdawe'. Dxeláajle'e tu chí'idau'ze, na' gate dxeledé' lu da zi' da xa', na' dxulusán lazre' na. <sup>14</sup>Bínnedu ca' xeajlechaze na naga zaj dxé' lue xeche' zéaje na benne' ca' dxelenne' dizra' na', na' dxejaxaque', na' lawe' da dxelezene' gunne xue da zante, ne dxelezé lazre' xel-la gunní'a, ne da xe'le'aj xelawe' da zácalle'e, na' xúgute da caní dxulusunite na dizra' na', na' quebe dxun na zrin lu xichaj lázrdawe'. <sup>15</sup>Na' bínnedu ca' xeajlechaze na lu xu bebe zéaje na benne' ca' zua chawe', ne du lazre' lázrdawe', na' gate dxelenne' dizra' na', dxuluzía chache' na, na' dxun zrin dizra' na' lu xichaj lázrdawe'.

*Da dxulé'e na ca naca chee tu da dxegú'u lení'*

(Mr. 4.21-25)

<sup>16</sup>Gunná Jesús:

—Netú benne' che gugalé' da dxegú'u lení', quebe gudúsié' na tu xi'ina, u zranle ga dxasié', san guzúe' na sibe, chee cu'u lení' na chee benne' zaj zre'e lu xu'u na'. <sup>17</sup>Quebe bi de da nagache' da quebe gulé'e lau na, ne quebe bi xu'u lu xichaj lázrdau bènneache da quebe gaca bea na, ne lá'tequeze na.

<sup>18</sup>'Chee le' na, le xene xanne'. Tu benne' nazi'e xrtizra' Dios, wazidxe', san benne' quebe dxezi'e na, wegá'a ca da du dxéquene' nape'.

*Dxelezrín lau Jesús xrne'g, ne benne' biche' ca'*

(Mt. 12.46-50; Mr. 3.31-35)

<sup>19</sup>Nadxa xrna Jesús, ne benne' biche' ca' belezrine' naga zue', san quebe gulezéquene' xelezrine' lau Le', lawe' da zrále'e benne' zan ga na'. <sup>20</sup>Tu benne' na' bzenne' Jesús, gunné':

—Xrna'u, ne bi bichu' ca' zaj zre'e chale'aj nigá, dxelaca lazre' xuluchálajlene' Lue'.

<sup>21</sup>Jesús guzre' le':

—Benne' ca' dxelenne' xrtizra' Dios, ne dxelune' ca' dxenná na, benne' caní zaj naque' ca xrna'a, ne benne' bícha'dau' ca'.

*Jesús dxuzúa zrie' be' bduunu', ne xeajxrza chee nísadau'*

(Mt. 8.23-27; Mr. 4.35-41)

<sup>22</sup>Tu zra guxú'u Jesús tu lu da dxedá lawe' nísadau' nen benne' ca' dxusédené', na' guzre' le':

—Cheajdxu xecha la'a nísadau'.

Na' gusiá'que', <sup>23</sup> ne dxácatę zjaque' lu nísadau' na', guse Jesús. Na' guzú lau dxácale'e be' bđunu' lu nísadau', na' guzú lau dxu'u nisa lu da dxedá lawe' nísadau' na', ne ba dxácatę waxaze na lu nísadau'.

<sup>24</sup>Nadxa bulusebanę Jesús, dxelé'e Le':

—¡Benne' Wesede! ¡Benne' Wesede! ¡Ba dxázedxu lu nisa nigá!

Nadxa guxasa Jesús, na' gudil-le' be' bđunu' na', ne nisa na', na' ca naca da ca' belezúa zri na. <sup>25</sup>Nadxa Jesús guzre' benne' ca' dxusédenę':

—¿Quebe ne chéajle cheę Dios?

Benne' ca' belezrebe', ne belexebánenę', na' buluchebe ljwezre':

—¿Núzraqueze benne' nigá, dxenná be'ene' be', ne nisa, na' dxuluzúa na dizra' cheę'?

*Tu benne' Gadara xu'e be' xriwe'*

*(Mt. 8.28-34; Mr. 5.1-20)*

<sup>26</sup>Nadxa belezrine' xecha la'a nisa lu xęzr la xu cheę xęzre Gadara, chalá' ca'ala cheę Galilea. <sup>27</sup>Gate bedxúaj Jesús lu da dxedá lawe' nísadau' na', na' bžrin tu benne' xęzre na' lau Le'. Zánete iza ba guca xu'u be' xriwe' ca' benne' nigá. Quebe gúcuę' zra lane', ne quebe guzię' netú lu xu'u, san xejachu'e tu lu ba ca'. <sup>28</sup>Gate blé'ene' Jesús, na' xejazú zribe' lau Le', na' gudxęzre xę'e, dxenné':

—¿Bizr cheę na' za'u naga zua', Jesús, Zri'ine Dios szrentę? Dxata' xueda' Lue' quebe gusaca zi'u neda'.

<sup>29</sup>Gunná na caní lawe' da ba gunná be'e Jesús be' xriwe' ca' xelxedxúaj na lu xichaj lázrdau benne' nigá. Zane' lasa be' xriwe' ca' ba gulela na benne' nigá. Benne' xęzre na' gulele' benne' nigá, ne buluchájje' le' ni'a ne'e nen du xia, san le' bzúxuje' du xia na', na' be' xriwe' ca' guleché na le' le'e xixre' lawe' lataj. <sup>30</sup>Jesús bchebe' be' xriwe' ca':

—¿Bi lele?

Na' bechebe le na:

—Neda' lea': Da Zan.

Ca' gunná na lawe' da xu'u be' xriwe' zantę benne' na'. <sup>31</sup>Be' xriwe' ca' gulenaba na Jesús quebe sel-le' na lataj chul-la. <sup>32</sup>Lu xi'a naga zua Jesús, na' zrlé'e cuche zan dxeláguba, na' be' xriwe' ca' gulata' xue na Jesús gu'e lataj da ca' cheajxęzrá na lu cuche ca', na' bnezruj Jesús na lataj.

<sup>33</sup>Nadxa be' xriwe' ca' belexedxúaj na lu xichaj lázrdau benne' na', na' gulú'u na lu cuche ca', na' xúgute cuche ca' buluzrún-nujba', ne gulebixreba' dxu'a chjéa, na' xejlecházeba' lu nísadau', naga gulépeba', guláteba'.

<sup>34</sup>Benne' ca' dxuluxúe' cuche ca', gate belelé'ene' ca da guca, na' buluzrúnnuje' lu xel-la dxelezrebe, na' gulé'e benne' zaj zre'e le'e xixre', ne benne' zaj zre'e lawe' xęzre ca da guca. <sup>35</sup>Nadxa benne' ca' beledxúaje' xejlenné'e ca da guca. Gate belezrine' naga zua Jesús, na' belelé'ene' bėnnea' belexedxúaj be' xriwe' ca' lu xichaj lázrdawe', dxę'e zran ni'a Jesús, ba nácue' ladxe', ne ba bezúa chawe' xichaj lázrdawe', na' benne' ca' belezrebe'. <sup>36</sup>Na' benne' belelé'e ca da guca buluchájlęne' benne' xula ca' ca guca gate bexaca bėnnea' guxú'e be' xriwe' ca'. <sup>37</sup>Gate be lenne' caní, ca naca benne' zaj zre'e lu xęzr la xu cheę xęzre Gadara gulezú lawe' dxelata' xúene' Jesús xęz'é'e lazrie', lawe' da dx-elezebele'e. Ca'an guca, guxú'u Jesús lu da dxedá lawe' nísadau', cheę xęz'é'e xéaje'. <sup>38</sup>Bėnnea' belexedxúaj be' xriwe' ca' lu xichaj lázrdawe' gunabe' lau Jesús gunęzruje' lataj chéajlene' Le', san Jesús busebague' le' xegá'ane' lázrie', na' guzre' le':

<sup>39</sup>—Bęxiaj lizru', na' bchalaj cheę xúgute ca da ba bęn Dios chiu'.

Na' benne' na' bezé'e xęxiąje', na' bchála-jlene' benne' xęzre ca' ca da bęn Jesús cheę le'.

*Jesús dxęxunę' bí nu'ula cheę Jairo, ne tu nu'ula xęajtę' zra lanę'*

*(Mt. 9.18-26; Mr. 5.21-43)*

<sup>40</sup>Gate bežrín Jesús xecha la'a dxu'a nísadau', benne' ca' zaj zre'e na' gulezi' lu ne'e Le' nen dutę xel-la dxelebe', lawe' da xúgute' dxelebeze' Le'. <sup>41</sup>Nadxa bžrin tu benne' le' Jairo, benne' blau cheę xu'u naga dxelezraga judío ca', na' bzu zribe' lau Jesús, ne guta' xúene' Le' chéaje' lizre', <sup>42</sup>lawe' da zua tuze bi nu'ula cheę'. Xu'ube' chazrinnu iza, na' ba dxaca wátebe'. Gate guzá' Jesús zéaje', benne' zantę zjácálene' Le', ne buluchídetę ljwezre'.

<sup>43</sup>Ládujla benne' ca' zeaj tu nu'ula quebe chawe' zue', na' chazrinnu iza ba zeaj dxé'ene' we' dxen da dxaca cheę nu'ula ca'. Ba gudízruje' benne' dxelexún bėnneache ca' xúgute' ca da gudape', na' quebe bi



gulezéquene' xeluné' chee' xexaca nu'ula na'. <sup>44</sup>Nu'ula na' gubigué' cúzrula Jesús, na' xeajté' zran ni'a zré', na' la ná'queze bexágate dxen da dxaca nu'ula na'.

<sup>45</sup>Nadxa Jesús bchebe':

—¿Nuzra bta neda'?

Xúgute' gulenné': "Quebe nu ne gutá Lue'", na' Pedro, ne benne' ljwezre' ca' gulenné':

—Benne' Wesede, benne' caní dxuluchídee' Lue', ne dxuluzrigue' Lue', na' dxuchébequezu', dxennáu': "¿Nuzra bta neda'?"

<sup>46</sup>Jesús gunné':

—Tu benne' bte' neda' lawe' da gúquebe'eda' ben zrin xel-la waca chia' da bexún na tu benne'.

<sup>47</sup>Gate gúquebe'e nu'ula na' ba neze Jesús da guca, nadxa gudé' dxezrízete', na' bzu zribe' lau Jesús, ne guxrúalepe' lau xúgute' benne' ca' bizr chee' na' bte' Jesús, ne ca guca bexácate'. <sup>48</sup>Nadxa gunná Jesús, guzre' nu'ula na':

—Zrí'ina'dau', ba bexacu' lawe' da xuxéajlé'u chia'. Bexíaj na'a, duté xel-la dxebeza zri lazre'.

<sup>49</sup>Ne dxuchálajte Jesús, bzrin tu benne' naga zé Jesús, benne' guz'é'e lizre Jairo, benne' blau chee' xu'u ga na' dxelezraga judío ca', na' guzre' Jairo:

—Ba gute bi nu'ula chiui'. Québedxa guzúa xuzru' Benne' Wesede nigá.

<sup>50</sup>Gate ben Jesús ca gunné', na' guzre' Jairo:

—Quebe zrebu'. Con guxeajle. Bi nu'ula chiui' na' xexácabe'.

<sup>51</sup>Gate bzrin Jesús xu'u na', netú quebe be' lataj chú'ule' Le', san tuze Pedro, ne Jacobo, ne Juan, ne xra xrna bi nu'ula na'.

<sup>52</sup>Xúgute' benne' zaj zré'e na' dxelebezre', ne dxelebezre xache' chee' bi nu'ula na'. Jesús gunné':

—Quebe cuézrele. Bi nú'uladu nigá quebe nátebe'. Dxásezebe' na'.

<sup>53</sup>Na' benne' ca' buluzrizre' chee', lawe' da zaj nézquezne' ba gútebe'. <sup>54</sup>Nadxa Jesús guqu'é'e na' bi na', na' gunné' zizraj:

—¿Bi nu'ula, bexasal!

<sup>55</sup>Na' bebanbe', ne bexásatebe'. Na' Jesús busebague' le' xulunézruje' da gágube'.

<sup>56</sup>Xra xrnabe' belexebánele'ene'. Jesús busebague' le' quebe nu xel'é'e ca da guca.

## 9

Jesús dxesel-le' benne' chazrinnu ca' xeluné' xrchine'

(Mt. 10.5-15; Mr. 6.7-13)

<sup>1</sup>Jesús bchague' benne' chazrinnu ca' dxusédene', na' bnézruje' le' xel-la waca, ne xel-la dxenná bea chee' xellexebéaje' xúgute' cue' be' xriwe' ca' da zaj xu'u bénneache, ne chee' xellexuné' benne' ca' zaj xu'e xízrawe'. <sup>2</sup>Na' gusel-le' le' chee' xuluzenne' bénneache ca dxenná bea Dios, ne chee' xellexuné' benne' zaj xu'e xízrawe' ca'. <sup>3</sup>Na' guzre' le':

—Quebe bi gúale chee' la neza. Quebe gúale xaga da guchíchele, na' xixruj cheele, ne da gágule, ne dumí. Le gua' tu cue'ze zra lánale. <sup>4</sup>Gáteteze xu'u naga chú'ule, le xegá'ana na' cadxa zrin xra xeza'ale lu xezre na'. <sup>5</sup>Naga quebe xelezi'e dizra' guchálajle le', le xedxúaj xezre na', ne le cuibe bxrte xu da da' ní'ale, da gulé'e na zaj nabague' zria lau Dios.

<sup>6</sup>Nadxa beledxúaje', na' ca naca xézredu ca' xeajlechálaje' dizra' chawe' chee' Dios, ne belexexuné' benne' zaj xu'e xízrawe' ca'.

*Ca guca gate gute Juan, benne' bchue' bénneache nisa*

(Mt. 14.1-12; Mr. 6.14-29)

<sup>7</sup>Herodes, benne' dxenná be'ene' xezr la xu na', benne' ca' naca xúgute' da dxun Jesús, na' guzúe' stebe lawe' da dxeleenná bal-la benne' ba bebán Juan ládujla benne' gate. <sup>8</sup>Xebal-le' dxeleenné' Elías, bénnea' bchálaje' waláz chee' Dios ba bele'e, na' xebal-le' dxeleenné' ba bebán tu benne' ca' buluchálaje' waláz chee' Dios ca ni'te. <sup>9</sup>Herodes gunné':

—Néda'queza' gunná be'eda' nu gudxugu xichaj Juan. ¿Nuzra benne' nigá xca' da zanté dxenda' dxune'?

Nadxa Herodes bene' ba xuzre lé'ene' Jesús.

*Jesús dxugawe' chi xun gaxúa benne'*

(Mt. 14.13-21; Mr. 6.30-44; Jn. 6.1-14)

<sup>10</sup>Gate belexezrin benne' gubáz ca' chee' Jesús lau Le', na' gulé'e Le' ca da ba beluné'. Na' Jesús beche'e benne' ca', na' besía'que' zeajxaque' tu lataj da nagá'ana zitu' naga zaj dxe' xezre ca', naga zua lu xezr la xu chee' xezre Betsaida. <sup>11</sup>Gate benne' xezre na' belenne' zua Jesús na', na' gusiá'que' zjaque' naga zua Le'. Na' Jesús guzi'

lu ne'e benne' ca', ne bchálajlene' le' ca dxenná bea Dios, ne bexune' benne' zaj xu'e xizrawe' ca'.

<sup>12</sup> Gate guzú lau zeaj dxezré', na' gulebiga benne' chazrinu gubáz ca' chee Jesús lau Le', na' gulé'e Le':

—Bze benne' caní dizra' chee chjaque' naga xelasie', ne xelíajé' da xelawe' xézredu ca' zaj nnita gagu, lawe' da ga zúadxu nigá quebe bi de.

<sup>13</sup> Jesús guzre' le':

—Le gunezruj le'e da xelawe'.

Nadxa benne' ca' bele'e Jesús:

—Quebe dedxa cheentu' ca gáxzuga xeta xtiladau', ne chúpaga bela, u ¿wachea-jxríquezentu' da xelagu catite benne' zan caní?

<sup>14</sup> Zaj zra ca chi xun gaxúa benne' biu ca' ga na'. Nadxa Jesús guzre' benne' ca' dxusédene':

—Le xe benne' ca' xelebé'e chi xun weaje' tu cue' tu cue'.

<sup>15</sup> Ca'an belune', na' gulebe'e xúgute'.

<sup>16</sup> Nadxa Jesús guqué'e da gazxu' xeta xtila ca', ne chupa bela ca'. Na' guchisa lawe' xabaala, ne guzre' Dios "Xcalenu'", na' ca bexuzre búzruje' na, na' bnézruje' na benne' ca' dxusédene' chee xelisie' na chee benne' zan ca'. <sup>17</sup> Xúgute' gulawe', ne belélaje'. Ca gudé na' bulusuzré'e chazrinu ga' da bízrujdu ca' belexegá'ana na.

*Pedro dxenné' Jesús naque' Cristo*  
(Mt. 16.13-19; Mr. 8.27-29)

<sup>18</sup> Tu zra gate zua Jesús dxuchálajlene' Dios naga quebe zaj zra benne' zan ca', na' zralé benne' ca' dxusédene' Le', na' Le' bchebe' benne' ca':

—¿Nuzra dxeleenná benne' naca' neda'?

<sup>19</sup> Le' belexechebe':

—Bal-le' dxeleenné' nacu' Juan, bénnea' bchue' bénneache nisa, na' xebal-le' dxeleenné' nacu' Elías, bénnea' bchálaje' waláz chee Dios, na' xebal-le' dxeleenné' nacu' tu benne' ca' buluchálaje' waláz chee Dios ca ni'ite, na' bebane'.

<sup>20</sup> Nadxa Jesús bchebe':

—Na' le'e, ¿nuzra dxennale naca'?

Na' gunná Pedro:

—Nacu' Cristo chee Dios.

*Jesús dxuzenne' benne' ca' ca gaca gate gatie'*

(Mt. 16.20-28; Mr. 8.30—9.1)

<sup>21</sup> Jesús bsebage' benne' ca' quebe nu xelé'e ca'. <sup>22</sup> Na' guzre' le':

—Neda', Benne' Gulje' Bénneache, dxal-la' téle'a xel-la zi', na' benne' gula sina ca', ne benne' xíchaje ca' chee bxruze, ne benne' ca' dxuluxúzajle'e da nadxiruj bea na xuluzúe' neda' chalá'ala. Xelútie' neda', san gate gaca chunna zra, na' xebana'.

<sup>23</sup> Ca gudé na' guzre' ca naca benne' zaj zre'e na':

—Che nu benne' dxaca lazre' gaque' neda' tuze, dxal-la' guzúe' chalá'ala xúgute da naca chee', na' gune' neda' tuze xúgute zra, lálala gate benne' na'. <sup>24</sup> Benne' dxaca lazre' gapa chi'e xel-la nabán chee', gunítie' na, san benne' gunítie' xel-la nabán chee' lawe' da naque' chia, wazrué'ene' na.

<sup>25</sup> ¿Bizra da ba neza gaca na chee tu benne' che gape' ca naca da de lu xezr la xu nigá, san cuía xi' léqueze'? <sup>26</sup> Che nu benne' xedué'ene' chia' neda', ne chee dizra' chia', cá'anzeze neda', Benne' Gulje' Bénneache, wedué'eda' chee bénnea' gate za'a neda' chee nna be'a nen xel-la szren chee Xra', ne chee gubáz lá'axza chee xabáa ca'. <sup>27</sup> Da li dxapa' le'e, bál-lale zrale nigá quebe gátele nédxudxa ca lé'ele zra nna bea Dios.

*Gate bcha lu'a lesaca Jesús*  
(Mt. 17.1-8; Mr. 9.2-8)

<sup>28</sup> Ca guzre xi' gudé gunná Jesús da nigá, na' guluéne' tu lu xi'a chee guchálajlene' Dios, na' xjácale Pedro, ne Jacobo, ne Juan Le'. <sup>29</sup> Dxácaté dxuchálajlene' Dios, na' bcha lu'a lesaca Jesús, na' zra lané' bexaca na da chiche, ne guca tite na. <sup>30</sup> Nadxa bululú'e lau chupa benne' dxuluchálajlene' Jesús. Zaj naque' Moisés ne Elías. <sup>31</sup> Naga zeje Jesús benne' ca' gúcatite' legala, na' dxuluchálajlene' Jesús ca gaca gate gatie' Le' xezre Jerusalén. <sup>32</sup> Gulácale'e welase Pedro ne benne' ljwezre' ca', san bulusebán lazre', na' belelé'ene' ca naca xel-la szren chee Jesús, ne chupa benne' ca' zaj zélene' Jesús. <sup>33</sup> Gate benne' ca' belexesía'que' naga ze Jesús, na' Pedro gunné':

—Benne' Wesede, néquega zúadxu nigá. Benna netu' lataj guntu' chunna xu'u lága'dau', tu chiu', ne tu chee Moisés, ne tu chee Elías.

Pedro quebe dxéquebe'ene' ca da dxenné'. <sup>34</sup> Dxácaté dxenná Pedro caní, na' bla' tu beuj da gucu na naga zaj zre'e, na' belezrebe

Pedro, ne benne' ljwezre' ca' gate gulezré'e lu beuj na'. <sup>35</sup>Na' belenne' chi'i nu dxuchalaj lu beuj na', gunná:

—Bi nigá naque' Zri'ina', nazrí'itę lazra'. Le xen da dxuchálajbe'.

<sup>36</sup>Ca gadé belenne' chi'i na', na' belelé'ene' Jesús ba ze' tuze'. Na' benne' caní gulezúe' zrize, na' quebe nu gulé'e ca da belelé'ene'.

*Jesús dxexung' tu bi biu xu'ube' be' xriwe' (Mt. 17.14-21; Mr. 9.14-29)*

<sup>37</sup>Gute xu, gate belexexétaje' lu xi'a na', na' benne' zan zjaque' zeajlexrígale' Jesús.

<sup>38</sup>Nadxa tu benne' ca' gunné' zizraj, guzre' Jesús:

—Benne' Wesede, dxata' xueda' Lue' da-jxú' bi biu chia' lawe' da tu lícha'tę bi chia' naca, <sup>39</sup>na' tu be' xriwe' dxaze na lebe', ne dxucuezre xa'a na lebe', ne dxudxixre dx-utula na lebe', na' dxebia' bzrina' dxú'abe'. Dxusaca zi na lebe', ne quebe dxaca lazre' na gusán na lebe'. <sup>40</sup>Ba guta' xueda' benne' ca' dxusédenu' cheę xelexebéaje' na, san quebe gulezéquene'.

<sup>41</sup>Jesús bechebe':

—Le'e, benne' wen chupa lazre', ne wen da caleła. ¿Ájate dxal-la' súalęna' le'e? ¿Ájate dxal-la' guchaga lawa' nen le'e? Xea-jxri' zri'inu' na' nigá.

<sup>42</sup>Gate bi cuide' na' ba zéajbe' gagu, na' be' xriwe' na' gudín na lebe' xu, ne bdxixre btula na lebe'. Na' Jesús gudil-le' be' xriwe' na', ne bexunę' bi cuide' na', na' bdeę'-be' lu na' xrabe'. <sup>43</sup>Xúgute' benne' ca' belexebánene' ca naca xel-la szren cheę Dios.

*Jesús dxuzennę' benne' ca' xecha lasa ca gaca gate gatie'*

*(Mt. 17.22-23; Mr. 9.30-32)*

Dxácate' na' xúgute' benne' ca' dxelexebánene' ca da dxun Jesús, Le' guzre' benne' ca' dxusédene':

<sup>44</sup>—Le xen xanne' da nigá, ne quebe gal-la lázrele na. Neda', Benne' Gulje' Bénneache, wuludęe' neda' lu na' bénneache.

<sup>45</sup>Benne' ca' dxusédene' quebe gulęajni'ine' ca da dxenná Jesús lawe' da quebe ne gunęzruj Dios lataj xelęajni'ine', na' belezrebe' xelenabe' Jesús guzęajni'ine' le' ca da na' gunné'.

*¿Nuzra naca blau?*

*(Mt. 18.1-5; Mr. 9.33-37)*

<sup>46</sup>Nadxa benne' ca' dxusede Jesús gulezú lawe' dxuluchębe ljwezre' núzraqueze naca

blau ládujla le'. <sup>47</sup>Jesús gúquebe'ene' ca da dxelenné'. Nadxa guquęe' tu bi biúdau', ne bze'-be' cuite', <sup>48</sup>na' guzre' benne' ca':

—Benne' gape' ba lá'ana tu bidu caní lawe' da nazrí'ine' neda', néda'queza' dxape' ba lá'ana, na' benne' dxape' ba lá'ana neda', dxápaqueze' ba lá'ana Dios, Bénnea' nasel-le' neda'. Cá'anqueze bénnea' nácadxe' benne' dxexruj lazre' ládujla le'e, benne' nigá naque' benne' blau.

*Benne' quebe dxdábague' dxi'u zuę' gá-calęne' dxi'u*

*(Mr. 9.38-40)*

<sup>49</sup>Nadxa Juan guzre' Jesús:

—Benne' Wesede, blé'entu' tu benne' dxuchínene' Lau', dxebéaje' be' xriwe' ca' lu xichaj lázrdau benne' ca', na' gúzrentu' le' quebe gunę' ca' lawe' da quebe naque' dxi'u tuze.

<sup>50</sup>Jesús guzre' le':

—Quebe guzágale ca da dxunę' lawe' da benne' quebe dxdábague' dxi'u zuę' gá-calęne' dxi'u.

*Jesús dxedil-le' Jacobo ne Juan*

<sup>51</sup>Gate ba za zrin zra dxal-la' xexíaj Jesús xabáa, ben zi' lazre' chéaje' Jerusalén. <sup>52</sup>Na' gusél-le' gubáz chee' ca' xelebia' lawe', na' benne' ca' xjaque' tu xęzredau' nababa Samaria cheę cheajlecuęe' naga sua Jesús.

<sup>53</sup>Benne' Samaria ca' quebe gulaca lazre' xegá'ana Jesús na', lawe' da guleque bé'ene' zéaje' Jerusalén. <sup>54</sup>Gate Jacobo ne Juan, benne' ca' dxusede Jesús, belelé'ene' da nigá, na' gulé'e Jesús:

—Xran, ¿dxaca lazru' nna béantu' xetaj xi' da za xabáa cheę guzríia xi na benne' caní, ca ben Elías, bénnea' bchálaje' waláz cheę Dios?

<sup>55</sup>Nadxa Jesús gunę'e le', ne gudil-le' le', dxenné':

—Le'e quebe nézele nu be' zúale le'e.

<sup>56</sup>Caní naca lawe' da bla' neda', Benne' Gulje' Bénneache, quegá cheę guzríia xi'a xel-la nabán cheę bénneache, san cheę gucache chawa' le' na.

Nadxa xjaque' xetú xęzredau'.

*Benne' dxelaca lazre' chjácálene' Jesús*

*(Mt. 8.19-22)*

<sup>57</sup>Ca zjaque' lu neza na', tu benne' biu guzre' Jesús:

—Xran, dxaca lazra' sálęna' Lue' gáteteze chéaju'.

<sup>58</sup>Jesús bechebe':

—Beza ca' zaj zua bluaj cheeba', na' bxínnedu ca' zaj zria xru'üneba', san neda', Benne' Gulje' Bénneache, quebe bi de ga xrua xíchaja'.

<sup>59</sup>Na' Jesús guzre' xetú benne':

—Ben neda' tuze.

Benne' nigá gunné':

—Xran, benna neda' lataj cheajcáchea' xra'.

<sup>60</sup>Na' Jesús bechebe':

—Be lataj benne' ca' zaj naque' ca benne' gate xulucache' ljwezre', na' lue', guxíaj, xejchalaj ca dxenná bea Dios.

<sup>61</sup>Nadxa tu benne' xula guzre' Jesús:

—Xran, dxaca lazra' guna' Lue' tuze, san steca, benna neda' lataj xexá'a cheajzéa' dizra' benne' zaj zra' lizra'.

<sup>62</sup>Jesús guzre' benne' na':

—Benne' dxugá'ane' bezre, na' nne'e' cúzrule', quebe gaca chee' bènnea' guné' zrin chee' da dxenná bea Dios.

## 10

*Jesús dxesel-le' benne' gaxún chi ca'*

<sup>1</sup>Ca gudé na', Xránadxu guqué'e' xegaxún chi benne' ca', na' gusél-le' chupa weaje' xelebía lawe' lau Le' xúgute' xezre, ne xézredu ca' naga dxal-la' chéajje' Le'.

<sup>2</sup>Guzre' benne' ca':

—Da li dxenné'a', lina da zren naca na, na' benne' wen zrin bábaze zaj naque'. Chee' le na' le naba lau Xrane zrin na' sel-le' benne' wen zrin ca' xelexequé'e' lina na'.

<sup>3</sup>¡Le chjaca! Le nna'xque, neda' dxesel-la' le'e, gácale ca zrfla'du ca' ládujla becu' xi'a ca'. <sup>4</sup>Quebe gúale xixruj, ne dumí, ne zrélae, ne quebe gagale la neza nu gucháaljlele. <sup>5</sup>Gate chu'uile tu lu xu'u, na' gugápale diuzre, nnale: “Xel-la dxebeza zri lazre' gaca chee' benne' zaj zre'e lu xu'u nigá.”

“Che zaj zra' na' benne' dxebebeza zri lazre', na' da gunábale gaca chee' benne' ca', san che quebe nu chilá' naca caní, le naba quebe gaca da ba gunábale. <sup>7</sup>Le xegá'ana lu xu'u ná'queze, na' le xi'aj le gagu ca da xelunne' lawe' da benne' wen zrin quebe te le tuné'. Quebe cheajsúale tu xu'u xetú xu'u. <sup>8</sup>Gate zrinle tu xezre naga xelezí' lu ne'e le'e, le gagu ca da xelunne'. <sup>9</sup>Le xexún benne' zaj xu'e xízrawe' zaj zre'e na', na' le xe'e: “Xel-la dxenná bea chee' Dios ba zua nen le'e.”

<sup>10</sup>Che zrinle tu xezre naga quebe xelezí' lu ne'e le'e, le xedxúaj la neza chee' xezre na',

na' nnale: <sup>11</sup>“Ca naca bxrtedu' da' n'antu' dxexebíentetu' na chee' gaca tu da gulé'e na le'e nabágate zria lau Dios. Dخال-la' nézele ba bla' ládujla le'e xel-la dxenná bea chee' Dios.” <sup>12</sup>Dxapa' le'e, ca lu zra guchi'a Dios, da xelezaca benne' zaj zre'e lu xezre nigá gácadxa na xel-la zi' ca da xelezaca benne' xezre Sodoma, xezre na' bzria xi' Dios.

*Da gaca chee' xezre naga quebe beluné' ca dxenná xrtizra' Dios*

(Mt. 11.20-24)

<sup>13</sup>Na' gunná Jesús:

—¡Edxugúa le'e, benne' xezre Corazín! ¡Edxugúa le'e, benne' xezre Betsaida! Chela lu xezre Tiro, ne lu xezre Sidón belélé'ene' ca naca xel-la waca chee' xabáa da ba gulaca ládujla le'e, gate na'te ba belexeb'i lazre', belácue' zra lane' tuzruj, ne buluzríe' de xíchaje'. <sup>14</sup>Lu zra guchi'a Dios da dxaca, na' sácadxale le'e xel-la zi' ca da xelezaca benne' Tiro, ne Sidón. <sup>15</sup>Na' le'e, benne' xezre Capernaum, ¿dxéquele waxásale zríntele xabáa? ¡Lataj chúl-lala xétajle!

<sup>16</sup>Nadxa guzre' benne' ca' dxusédene':

—Benne' xenne' chee' le'e, chia' neda' xenne', na' benne' guzúe' le'e chalá'ala, neda' na' gusaque' ca', na' benne' guzúe' neda' chalá'ala, Dios, Bénnea' gusel-le' neda' guzúe' chalá'ala.

*Dxelexezrín benne' gaxún chi ca'*

<sup>17</sup>Benne' gaxún chi ca' belexezrine' lu xel-la dxelebé, dxelenné':

—Xran, be' xriwe' ca' dxuluzúaqueze na dizra' cheentú' gate dxuchínentu' Lau'.

<sup>18</sup>Jesús guzre' benne' ca':

—Ca' naca, na' neda' ble'eda' da xriwe' bexruj na zran xabáa ca tu xesa da dxeajsúa na lu xu. <sup>19</sup>Neda' ba benna' le'e xel-la dxenná bea chee' guléajle be snia ca', ne békrujni, ne chee' guchúchujle duté xel-la dxenná bea chee' da xriwe', na' quebe bi seque guné na le'e. <sup>20</sup>Quebe bele lawe' da dxelún be' xriwe' ca dxennale le'e, san le be lawe' da ba naxúaj lale xabáa na'la.

*Jesús dxebebe'*

(Mt. 11.25-27; 13.16-17)

<sup>21</sup>Lu zra ná'queze gubéle'e Jesús, zúale Be' Lá'azxa Le', na' gunné':

—Dxue lá'ana' Lue', Xrae, Xrane xabáa ne xezr la xu, lawe' da ba blé'enu' bènnea' du caní da bcácheu' chee' benne' sina ca', ne

benne' dxeléajni'ing'. ¡Ca' naca, Xrae, lawe' da ca'an guca lazru' Lue'!

<sup>22</sup> Xra' ba benne' neda' xúgute. Quegá nu neze nu na' naca Zrí'ing', san tuze Xrá'queza', ne quegá nu neze nu na' naca Xra', san tuze Zrí'inequeze', ne nu benne' ca' dxaca lazre' Zrí'ine' guzéajni'ing' le' Nu na' naca Xre'.

<sup>23</sup> Nadxa guné'e benne' ca' dxusédene', na' guzre' benne' cá'anze:

—Ba neza naca na chee benne' ca' dxelélé'ene' ca da dxelélé'ele le'e, <sup>24</sup> lawe' da dxapa' le'e, zánete benne' ca', benne' buluchálaje' waláz chee Dios, ne benne' wenná bea ca' gulaca lazre' xeledé'ene' ca da dxelélé'ele le'e, san quebe belelé'ene' na. Gulaca lazre' xelenne' ca da dxenle le'e, san quebe belenne' na.

*Da dxulé'e na ca ben benne' Samaria, benne' naque' chawe'*

<sup>25</sup> Nadxa tu benne' dxuxuzájle'e da nadxixruj bea Dios bdxúaje', ne guxiáje' xea-jchálajlene' Jesús chee gaca guzúa zri'e' Le', na' bchebe' Le':

—Benne' Weséde, ¡bizra dxal-la' guna' chee gata' chia' xel-la nabán da zeajlí canna?

<sup>26</sup> Jesús bechebe':

—¡Bizra da naxúaj na lu da nadxixruj bea Dios? ¡Aja dxéquenu' da dxulabu'?

<sup>27</sup> Bénnea' dxuxuzájle'e da nadxixruj bea Dios bechebe':

—Bzri'i Xranu' Dios duté lárda'u, ne nen duté bénne'du xu'u, ne nen duté xel-la dxun zi' lazre' chiu', ne nen duté xel-la dxulaba lazre' chiu', na' bzri'i le sa' ljwezru' ca nazrí'i cuinu'.

<sup>28</sup> Nadxa gunná Jesús, guzre' le':

—Cháwe'le'e bechebu'. Che dxunu' caní, na' gapu' xel-la nabán na'.

<sup>29</sup> Bénnea' dxuxuzájle'e da nadxixruj bea Dios guca lazre' gucá'ana chawe' cuine', na' guzre' Jesús:

—¡Nuzra na' le sa' lwezra'?

<sup>30</sup> Bechebe Jesús:

—Tu benne' guzé'e Jerusalén, bétaje' zíaje' Jericó. Lu neza na' xu'e, na' guléla gubán le', ne gulebang' ca naca da nape', ne zra lane'. Na' buluzálaje' le', ne besía'que' zaj nucá'ane' le' ca benne' gate. <sup>31</sup> Nadxa gudé tu bxruze neza na', na' gate blé'ene' le', gudé'e chala'ala. <sup>32</sup> Cá'anqueze gudé na' tu benne' xrtia Leví, benne' dxune'

zrin chee xudau', na' gate blé'ene' bénnea', gudé'e chala'ala. <sup>33</sup> Nadxa tu benne' Samaria gudé'e neza na', na' gate blé'ene' le' bexache lazre' le'. <sup>34</sup> Gubigue' cuita benne' na', ne btupe' tu da za lu we' chee', ne xrise uva wal-la, na' bchele' na ladxe'. Nadxa bcuene' le' cuzru bea chee', na' beche'e le' tu lu xu'u naga xegá'ane', ne bxue' le' na'. <sup>35</sup> Zra xula, ca bezá' benne' Samaria na', na' guléaje' chupa dumí da bnézruje' xrane xu'u na', ne guzre' le': "Bxue benne' nigá, na' che ba gucá'adxa xelate' dumí chiu', neda' xexunna' na gate xelá'a."

<sup>36</sup> Nadxa Jesús guzre' benne' dxuxuzájle'e da nadxixruj bea Dios:

—¡Nula benne' chunna caní guque' le sa' ljwezre bénnea' gulela gubán ca'?

<sup>37</sup> Na' gunná bénnea' dxuxuzájle'e da nadxixruj bea Dios:

—Bénnea' bexache lazre' le'.

Nadxa Jesús guzre' le':

—Bexiáj lue', na' gúnquezu' ca'.

*Jesús dxezrine' lizre Marta ne María*

<sup>38</sup> Jesús bexu'e neza, na' bezrine' tu xézredau', na' lu xezre na' zua tu nu'ula le' Marta, na' gulu'e Jesús lizre'. <sup>39</sup> Marta na', zua tu bi bile' le' María, na' María na' gudx'é zran ni'a Jesús chee xenne' da dxuchálaje'. <sup>40</sup> Marta déle'e da dxune', na' bzrine' lau Jesús, ne guzre' Le':

—Xran, ¡quebe dxexache lazru' neda' lawe' da dxucá'ana bi bila' neda' chee guna' tuza' zrin cheentu'? Guzre-be' gácalebe' neda'.

<sup>41</sup> Jesús bechebe':

—Marta, Marta, dxezéle'enu' gunne xue, ne zu' štebe ca naca chee da ca' dxunu', <sup>42</sup> san de tuze da dxun na ba xen nu gun. María ba bezrelne' da cháwedxa, na' netú benne' quebe seque' cue' na.

## 11

*Ca dxal-la' gundxu guchálajle'dxu Dios (Mt. 6.9-15; 7.7-11)*

<sup>1</sup> Tu zra Jesús bchálajlene' Dios tu lataj, na' gate bexuzre bchálajlene' Dios, na' tu benne' ca' dxusédene' guzre' Le':

—Xran, bsede netu' guchálajlentu' Dios, ca ben Juan, bsédene' benne' ca' zaj de'e le'.

<sup>2</sup> Jesús gunné':

—Gate guchálajle Dios, na' nnale: Xrantu' Dios, zu' xabáa,

gaca lá'azxa Lau' Lue'.

Gudá nna be'u.

Gaca ca dxaca lazru' lu xęzr la xu, ca da dxaca xabáa.

<sup>3</sup>Benna cheentu' da gáguntu' na'a zra.

<sup>4</sup>Bnite lau dul-la cheentu' ca dxunite launtu' cheę benne' ca' dxelune' cheentu' da calela.

Quebe gu'u lataj da xriwe' cu'u na netu' neza cheę na, na' bselá netu' lu na' da calela.

<sup>5</sup>Nadxa Jesús guzre' benne' ca':

—Che tu benne' ládujla le'e zua tu ljwezre', na' che zrine' lizre benne' ljwezre' na' dxela, ne xę'e le': “Bi ljwezra', guleaj neda' chunna xeta xtila ‘lawe' da zua tu bi ljwezra' za belá'tebe' lizra', na' quebe bi de chia' gugawa'-be'.” <sup>7</sup>¿Wechebe benne' ljwezre' na', benne' xu'u lu xu'u: “Quebe gunu' neda' zęde. Naxeexuj dxa xu'u chia', na' bi chia' zaj debe' nigá. Quebe gaca chasa' bi gunna' chiu'?” <sup>8</sup>Neda' dxapa' le'e, lácala quebe chase' bi gunézruje' le' lawe' da naque' ljwezre', san chase' cheę quebedxa gunę' le' zęde, na' gunézruje' le' ca naca da nachínne'. <sup>9</sup>Caní dxapa' le'e: Le naba, na' Dios gunne' cheęle.

Le xexilaj, na' xezrélele.

Le nne dxu'a dxa xu'u, na' xalaj cheęle.

<sup>10</sup>Ca' naca na, lawe' da benne' dxenabe', na' si'e, ne benne' dxexilaje', na' xezrélene', ne benne' dxenné' dxu'a dxa xu'u, na' xalaj cheę'.

<sup>11</sup>Che tu benne' ládujla le'e naque' xra xrna', ¿waca gunézruje' zrí'ine' tu xiaj che nábabe' tu xeta xtila? ¿Waca gunézruje'-be' tu bela' che nábabe' tu bela? <sup>12</sup>¿Waca gunézruje'-be' tu bęxrujni che nábabe' tu zrita? <sup>13</sup>Che le'e nácale benne' wen da calela, na' nézele gunézruje' da chawe' cheę zrí'inele, ¿quebe nácdxa Xrale zua xabáa li lazre' cheę gunne' cheę nu benne' nabe' Be' Lá'azxa?

*Dxelenné' napa Jesús xel-la dxenná bea cheę da xriwe'*

(Mt. 12.22-30; Mr. 3.19-27)

<sup>14</sup>Tu zra Jesús bebéaje' be' xriwe' lu xichaj lázrdau tu benne', da nucá'ana na le' quebe dxaca nnie', na' gate bedxúaj be' xriwe' na', na' benné' bėnnea'. Na' benne' ca' belexebánene' cheę da nigá. <sup>15</sup>Na' bal-le' gulenné':

—Benne' nigá dxebéaje' be' xriwe' ca', dxuchínene' xel-la dxenná bea cheę Beelzebú, xrane be' xriwe' ca'.

<sup>16</sup>Xebal-la benne' gulaca lazre' gulé'e Jesús xel-la waca cheę, na' gulenabe' Le' gunę' tu xel-la waca da za xabáa. <sup>17</sup>Le' nézene' ca da dxelaca lazre', na' guzre' benne' ca':

—Che benne' zaj zre'e tu xęzre xel-laque' chupa la'a, ne xeledil-le', wabía xi' xęzre na', na' che benne' tu lu xu'u xel-laque' chupa la'a, cá'anqueze welebía xi' benne' ca'. <sup>18</sup>Cá'anqueze, che da xriwe' ca' xelaca na chupa la'a, ¿ájazra xegá'ana xel-la dxenná bea cheę na? Da nigá dxapa' le'e lawe' da dxennéle dxebéaja' be' xriwe' ca', dxuchíneda' xel-la dxenná bea cheę Beelzebú da xriwe'. <sup>19</sup>Che caní naca na, ¿nuzra dxunexruj xel-la dxenná bea benne' ca' dxusédele le'e cheę xelexebéaje' be' xriwe' ca'? Cheę le' na', benne' caniqueze dxululé'ene' dxeque zréajele. <sup>20</sup>Na'a che neda' dxebéaja' be' xriwe' ca', dxuchíneda' xel-la dxenná bea cheę Dios, da li xel-la dxenná bea cheę Dios ba bla' na ládujla le'e.

<sup>21</sup>Che tu benne' wal-la nape' da guchínene' lu wedil-la, ne dxuxúequeze' lizre', na' da zra lizre' napa chí'e na. <sup>22</sup>Che za' xetú benne' nácdaxe' wal-la ca le', ne dxucul-le' le', nadxa que'e ca naca da dxuchínene' lu wedil-la, da na' dxuxrén lazre', na' quisie' da gudapa bėnnea'.

<sup>23</sup>'Benne' quebe zue' gácalene' neda', dxedábague' neda', na' benne' quebe dxex-eque'e nen neda' dxúsela bėnnea'.

*Be' xriwe' da dxexezrín na lizre na (Mt. 12.43-45)*

<sup>24</sup>Gunná Jesús:

—Gate tu be' xriwe' dxedxuaj na lu xichaj lázrdau tu benne', dxedá na lataj naga nabizre dxexilaj na naga sua na xezí' lazre' na, na' gate quebe dxezrele na, na' dxenná na: “Wexá'a lizra' naga bezá'a.” <sup>25</sup>Gate xezrín na, na' le'e na bėnnea' naque' ca tu xu'u da nalúa lu'ule na, ne nabá'ate na. <sup>26</sup>Nadxa xezíaj na, zeajxezrín na xegazre be' xriwe' da zaj nácdaxa na xriwe' ca le' na, na' ca naca da ca' xelú'u na xelezúa na lu xichaj lázrdau bėnnea', na' naga cheajsetę cheę benne' na' nácdaxa da calela cheę' ca da guca cheę' nédxula.

*Da ba neza cheę bėnneache da naca na li lazre'*

<sup>27</sup>Dxacate Jesús dxenné' da caní, tu nu'ula ládujla benne' ca' gunné' zizraj:

—Ba neza zrenté naca na chee nu'ula na' guzane' Lue', ne bsegule' Lue'.

<sup>28</sup>Na' gunná Jesús:

—Ba neza zrendxa naca na chee benne' ca' dxelenne' ca da dxenná Dios, ne dxune' ca dxenná dizra' na'.

*Dxelenabe' Jesús guné' tu xel-la waca da za xabáa*

(Mt. 12.38-42; Mr. 8.12)

<sup>29</sup>Benne' ca' ne zaj zre'e cuita Jesús, na' Le' guzú lawe' dxuchálajlene' le', gunné':

—Benne' zaj zre'e lu zra caní zaj naque' benne' wen da calela, na' dxelenabe' neda' guna' tu xel-la waca da za xabáa, na' québedxa bi xelexé'ene' ca da ble'e Jonás, bénnea' bchálaje' waláz chee Dios. <sup>30</sup>Ca guca chee Jonás, guque' tu da ble'e na benne' gulezré'e lu xezre Nínive, cá'anqueze neda', Benne' Gulje' Bénneache, gaca' tu da gul'é na benne' zaj zre'e lu zra na'a zra. <sup>31</sup>Lu zra guchi'a Dios, gate Dios guchi'e chee benne' zaj zre'e lu zra na'a zra, na' chasa nu'ula na' gunná bé'ene' xezr la xu da zua chalá'a naga dxedé gubizra beu' zaga ca', na' gul'é'ene' zaj nabaga zria benne' caní, lawe' da nu'ula na' guzú'e zítu'te chee xenne' ca naca xel-la sina chee Salomón, na' nigá zua tu Benne' nácadxe' blau ca Salomón na'. <sup>32</sup>Lu zra guchi'a Dios, gate Dios guchi'e chee benne' zaj zre'e lu zra na'a zra, na' xelase' benne' ca' gulezré'e xezre Nínive, na' xululé'ene' zaj nabaga zria benne' caní, lawe' da benne' ca' gulezré'e xezre Nínive belexebí'i lazre' gate Jonás bchálajlene' benne' ca' xrtizra' Dios, na' nigá zua tu Benne' nácadxe' blau ca Jonás na'.

*Da dxusení' lu xichaj lázrdaudxu*

(Mt. 5.15; 6.22-23)

<sup>33</sup>Gunná Jesús:

—Netú benne' che dxugale' xi' chee', quebe guzú'e na tu naga nagache, ne quebe gudusie' na tu xi'ina, san guzú'e na sibe chee xelexé'e benne' ca' xelu'e lu xu'u na'. <sup>34</sup>Xiaj laudxu zaj naca na ca tu xi' da dxusení na lu xichaj lázrdaudxu. Che xiaj lau' zaj naca na chawe', ca naca xichaj lázrda'u xu'u na lení, na' che xiaj lau' quebe zaj naca na chawe', na' xu'u da chul-la lu xichaj lázrda'u. <sup>35</sup>Bxue xanne' ca naca xi' da napu' chee quebe xexaca na da chul-la. <sup>36</sup>Che ca

naca xichaj lázrda'u xu'u na lení, na' quebe bi xu'u da chul-la, na' le'emu' chawe' xúgute ca dxaca gate tu xi' dxusení na lizru'.

*Jesús dxedil-le' benne' xudau' ca'*

(Mt. 23.1-36; Mr. 12.38-40; Lc. 20.45-47)

<sup>37</sup>Gate bezuzre bchalaj Jesús, na' tu benne' xudau' fariseo gunné' Le' chea-jtawe' xeta lize'. Na' guxú'u Jesús, gudxe'e dxawe'. <sup>38</sup>Na' benne' fariseo na' bebánene' gate blé'ene' Jesús quebe gudibe ne'e ca da zjácate benne' judío gate dxelawe' xeta. <sup>39</sup>Xránadxu guzre' le':

—Le'e, benne' fariseo, dxíbele cúzrela zriga', ne xé'ena, san lu'ule na, nazrátele ca naca da ba gulanle, ne da calela da dxunle. <sup>40</sup>Le'e, benne' lázrdau zide', ¿quebe nézele Bénnea' bené' da zua cúzrela bénqueze' da zua lu'ula? <sup>41</sup>Le gunezruj benne' xache' ca' chee da nápa'e, na' ca nácale xegá'ana'e chawe'.

<sup>42</sup>'jEdxugúa le'e, benne' fariseo ca'! Le'e dxunézrujle Dios tu cue' chee da chi cue' chee xixru weaj, ne chee binne chee ruda, ne chee xúgute xixre' cuan, san dxuzúale chalá'ala ca naca xel-la wen xrlátaje, ne xel-la zri'i lazre' chee Dios. Da caní dxal-la' gunle, ne quebe gusanle ca da ba dxunle.

<sup>43</sup>'jEdxugúa le'e, benne' fariseo ca'! Dxacá lázrele gápale lataj blau naga cue'le lu xu'u naga dxezragale, ne dxaca lázrele xelapa benne' le'e ba lá'ana lawe' xi'a ca'.

<sup>44</sup>'jEdxugúa le'e, benne' dxuluxuzájla'a da nadxixruj bea na, ne le'e, benne' fariseo ca', benne' dxelúne' láweze da xrlátaje! Nácale ca xedxu ba ca' da quebe zaj nalá', na' benne' ca' dxeledé' lávela na, ne quebe zaj nézene' da dxululéaje'.

<sup>45</sup>Nadxa gunná tu benne' dxuxuzájle'e da nadxixruj bea na, guzre' Jesús:

—Benne' Wesede, gate dxennáu' da nigá, dxennéteu' ca' cheentu'.

<sup>46</sup>Na' Jesús gunné':

—jEdxugúa le'e, benne' dxuluxuzájle'e da nadxixruj bea na! Dxugúale bénneache xua da quebe xelexuéne', na' le'e netú zrube názele quebe dxaca lázrele gutale na.

<sup>47</sup>'jEdxugúa le'e! Dxunle lu'a chee ba ca' chee benne' ca' buluchálaje' waláz chee Dios, benne' ca' belute xra xrtáule. <sup>48</sup>Ca da dxunle dxulé'e na nácale tuze nen da belún xra xrtáule ca'. Benne' ca' belutie' le', na' le'e dxunle lu'a chee ba chee' ca'.

<sup>49</sup> Chee le na' gunná Dios lu xel-la sina chee', gunné': "Wasel-la' naga zaj zra' benne' ca' benne' xelenné' waláz chia', ne gubáz chia' ca', na' bal-le' xelútié', na' xebal-le' xeláu zi' xúzrequeze' le'." <sup>50</sup> Dios gusebague' benne' zaj zre'e lu zra na'a zra ca naca xel-la gute chee xúgute benne' ca' gulenné' waláz chee', benne' gultatíe' lu na' benne' ca' zaj zre'e gate bente' xezr la xu, <sup>51</sup> gate na' tu benne' betíe' Abel, zrí'ine Adán, ca bzrinte zra belutié' Zacarías gachaj lówela naga zua lucugu, ne naga zua lataj lá'azxa. Ca'an dxapa' le'e, Dios gusebague' benne' zaj zre'e lu zra na'a zra xel-la gute chee benne' ca'.

<sup>52</sup> ¡Edxugúa le'e, benne' dxuluxuzájla'a da nadxiruj bea na! Xu'u lu na'le ca naca zren xia chee dxa xu'u naga za xel-la sina, san le'e quebe dxu'ule, ne quebe dxuele lataj xelú'u benne' dxelaca lazre' xelu'e na'.

<sup>53</sup> Gate Jesús guzre' benne' ca' da caní, na' benne' ca' dxuluxuzájle'e da nadxiruj bea na, ne benne' fariseo ca' belezrá'ale'e Le', na' gulezú lawe' dxelune' Le' zede, na' da zante da buluchébe' Le', <sup>54</sup> na' buluzure' che bi nna Jesús chee xelezéquene' xelagu zrie' Le'.

## 12

*Jesús dxenné' ca naca chee da naca xrlátaje láweze*

<sup>1</sup> Ca lu zra na' belezraga zane gaxúa benne' ca', na' dxululéajte ljwezre'. Na' guzú lau Jesús dxé'e benne' ca' dxusédene':

—Le guxúe xanne' cuínale ca naca cua zichaj chee xeta xtila chee benne' xudau' fariseo ca', da naca na da dxulé'e na láweze da xrlátaje chee benne' ca'. <sup>2</sup> Quebe bi de da dxundxu bagácheze da quebe gulé'e lawe', ne quebe bi de da nagache da quebe nu neze. <sup>3</sup> Chee le na', xúgute da gunle lu da chul-la, xululé'e lawe' te zra, na' da gunle bagácheze lu xu'u naga naxézxujte dxa xu'u, wénqueze na lau xúgute bénneache.

*Nu dxal-la' zrébedxu  
(Mt. 10.28-31)*

<sup>4</sup> Na' gunná Jesús:

—Dxapa' le'e, bi ljwézra'du ca', quebe dxal-la' zrébele benne' dxelute bēla' dxen chee bēnneache, san gate te na', québedxa xelezéquene' bi xeluné'. <sup>5</sup> Na'a dxapa' le'e nu dxal-la' zrébele. Le zrebe Bēnnea' gate te xequé'e xel-la nabán chee bēnneache,

nape' xel-la dxenná bea gudé'e bēnneache ca' lataj ba xa'. Awe', Le' le zrebe.

<sup>6</sup> ¿Quebe ta'u gazxu' bxínnedau' lawe' chupa dumí lasedau'? Dios quebe dxal-la lazre' netú bxínnedu ca'. <sup>7</sup> Cá'unqueze xicha xíchajle le'e xúgute na zaj nababa na lau Dios. Chee le na' quebe zrébele. Zácadxale le'e ca be zante bxínnedu ca'.

*Benne' dxexexehébe' zaj naque' chee Jesús  
(Mt. 10.32-33; 12.32; 10.19-20)*

<sup>8</sup> Na' gunná Jesús:

—Dxapa' le'e, xúgute benne' xelxexehébe' zaj naque' chia' neda' lau bēnneache, cá'unqueze neda', Benne' Gulje' Bēnneache, xechébequeza' chee benne' ca' lau gubáz chee xabáa ca' chee Dios, <sup>9</sup> san benne' ca' quebe xelxexehébe' chia' lau bēnneache, neda'queza' quebe xechéba' chee' lau gubáz chee xabáa ca' chee Dios.

<sup>10</sup> Che nu benne' bi nnie' chia' neda', Benne' Gulje' Bēnneache, gunite lau Dios chee', na' benne' nnie' chee Be' Lá'azxa, quebe gunite lau Dios chee bēnnea'.

<sup>11</sup> Gate xeleché'e le'e lau benne' xíchaje chee xudau', u lau benne' dxuchi'e da dxaca, u lau benne' xu'u lawe', quebe cue'le gunne xue bi xechébele u bi nnale, <sup>12</sup> lawe' da gate zrin zra dxal-la' nnele, Be' Lá'azxa gulé'ene' le'e da dxal-la' nnele.

*Da stēbe chee xel-la gunní'a*

<sup>13</sup> Tu benne' ládujla benne' ca' guzre' Jesús:

—Benne' Wesede, guzre bi bicha' gúnnabe' chia' da xexal-la' chee da guca chee xrantu'.

<sup>14</sup> Jesús guzre'-be':

—Benne', ¿zua nu bzua neda' ca benne' dxuchi'e da dxaca u ca benne' le'e xezr la xu?

<sup>15</sup> Nadxa guzre' benne' ca':

—¡Le na' xque! ¡Le guxúe xanne' cuínale chee quebe gucúdele! Xel-la nabán chee nu benne' quebe zua na lu da nápalé'e.

<sup>16</sup> Nadxa bchalaj Jesús da dxulé'e nigá, gunné':

—Guzúa tu benne' gunní'a, na' xezr la xu chee' bnézrujle'e na. <sup>17</sup> Na' benne' gunní'a na' guzú lawe' dxenné': ¿Bizra guna'? Québedxa de naga guzrá'a lina chia' nigá. <sup>18</sup> Nadxa dxenné': "¡Ba nezda' ca da guna'! Guchínnaja' naga dxezrá' lina chia', chee guna' da zrí'adxa, na' guzrá'a na' ca naca lina chia' nigá, ne ca naca da ba napa'.



<sup>19</sup> Nadxa nníqueza' néda'queza': Ba déle'e chiu' da zantē chee zane' iza. Bezi' lazre'. Güe'e gudagu, ne gubé." <sup>20</sup> Na' Dios guzre' bēne'a: "Lue', benne' zide', lu zre' na'a zre' gatiu', na' da nuzrá' chawu', quebe nézenu' nu chee gaca na." <sup>21</sup> Ca'an dxaca chee benne' dxutupe' xel-la gunní'a da gaca cheéqueze'. Naque' ca tu benne' xache' lau Dios.

*Dios dxuxúe' bi chee' ca'*  
(Mt. 6.25-34)

<sup>22</sup> Ca gudé na', Jesús guzre' benne' ca' dxusédene':

—Dxapa' le'e, quebe cue'le gunne xue ca naca da gágule chee gaca banle, ne ca naca zra lánale da gágule. <sup>23</sup> Xel-la nabán chee zácadxa na ca da gágule, na' bē-la' dxen chee zácadxa na ca zra lánale. <sup>24</sup> Le nna'xque ca dxaca chee bxínmedu ca'. Quebe dxelázaba', ne quebe dxelélápaba', ne quebe zaj zua naga dxuluxzraba', na' Díosqueze' dxuxi'aj dxugawe'-ba'. Zácadxale le'e ca bxínmedu ca'. <sup>25</sup> ¿Núlale le'e séquele gusetunna cuínale xetú ben lawe' da dxebé'le'ele gunne xue? <sup>26</sup> Che quebe gaca gunle tu da naca da dauze, ¿bizr chee na' dxebe'le gunne xue chee da ca' xezícala?

<sup>27</sup> Le nna'xque ca dxelegula xiaj xrtandu ca'. Quebe dxelún na zrin, ne quebe dxelún na du laxde', na' dxapa' le'e, wenná bea Salomón quebe gucue' da xrtandxa ca tu xiajdu caní. <sup>28</sup> Che Dios dxugacue' caní xixre'du ca', da zaj zua na'a le'e xixre', na' wxre xelezxe na, ¿quegá gundxe' cheele le'e, benne' dxeléajle'e láteze chia'? <sup>29</sup> Chee le' na', quebe cue'le gunne xue ca naca da gágule, u ca naca da xí'ajle, ne quebe súale stebe. <sup>30</sup> Ca' naca na, lawe' da ca naca benne' ca' zaj zre'e xezr la xu dxelxilaje' ca naca da caní, san le'e, zua Xrale xabáa ba nézene' nachínnele ca naca da caní. <sup>31</sup> Le cue' gunne xue nna bea Dios lu xichaj lárzdaule, na' sile ca naca da caní.

*Da gunní'a da dxegú'u cháwedxu xabáa*  
(Mt. 6.19-21)

<sup>32</sup> Na' gunná Jesús:

—Quebe zrébele, zrila'du chia', bábaze nácale le'e. Xrale Dios dxezaca ba lazre' gunne' cheele lataj naga dxenná be'e. <sup>33</sup> Le gute da nápale, na' le gunezruj benne' xache' ca'. Ca'an gaca, guzrale na naga quebe te chee na, na' gápale da gunní'a

xabáa da quebe xedú, naga quebe gaca chu'u gubán, ne quebe gaca xelú'u béadu ca' xuluteba' na. <sup>34</sup> Naga nuzúale xel-la gunní'a cheele, na' súaqueze lárzdaule.

*Dxal-la' gupá'a cuínadxu*

<sup>35</sup> Na' gunná Jesús:

—Le gupá'a cuínale, ne le gugala xi' cheele. <sup>36</sup> Le gaca ca benne' wen zrin ca' dxelebeze' xrane' xezrine' lu laní chee wechaga na', na' mne' dxu'a dxa xu'u na'. <sup>37</sup> Ba neza zrentē naca na chee benne' wen zrin ca', benne' ca' xedajxraca xrane' le' dxelennaze' gate xezrine'. Da li dxapa' le'e, xrane' na' cueche' benne' ca' xelawe', na' guzúa cuine' chee que'e da xelagu benne' wen zrin ca'. <sup>38</sup> Lácala xezrine' dxela u dxaní'sise', che xedajxraque' le' dxelennaze', ba neza naca na chee benne' wen zrin ca'. <sup>39</sup> Dxal-la' nézele da nigá, che xrane xu'u gunézene' bi zra zrin gubán, na' quebe gasie' chee quebe gu'e lataj quíduje' lizre' chee cuane' da nape'. <sup>40</sup> Cá'anqueze le'e, le sua ban lazre', lawe' da gate quebela nézele, xelá'a neda', Benne' Gulje' Bēneache.

*Benne' wen zrin li lazre', ne benne' wen zrin quebe naque' li lazre'*

(Mt. 24.45-51)

<sup>41</sup> Nadxa Pedro bchebe' Jesús:

—Xran, ¿bchálaju' da dxulé'e nigá chee nétu'ze, che chee xúgutē benne'?

<sup>42</sup> Xránadxu gunné':

—¿Nuzra naca wen zrin li lazre', bēne-a' dxucá'ana xrane' lu ne'e benne' zaj zra' lizre' chee gunézruje' da xelagu benne' ca' gate zrin zra chee na? <sup>43</sup> Ba neza naca na chee benne' wen zrin na', gate xezrin xrane', xedajxraque' le' dxune' ca da nabague'. <sup>44</sup> Da li dxapa' le'e, xrane' gucá'ane' lu ne'e xúgute da nape'. <sup>45</sup> Che benne' wen zrin na' dxéquene' wazré xrane' xelé'e, ne su lawe' gusaca zi'e benne' wen zrin xezica ca', ne nu'ula wen zrin ca', ne su lawe' xi'aj gawe', ne súzrene', <sup>46</sup> nadxa xrane' xelé'e lu zra quebe dxebeze' le', ne lu zra quebe nézene', na' gusaca zí'le'e le', ne chugue' chee' saque' ca' xelezaca benne' ca' quebe zaj naque' chee Dios.

<sup>47</sup> Benne' wen zrin na' nézene' ca da dxaca lazre' xrane' san quebe nucueze', ne quebe dxuzúe' dizra', benne' nigá gudé'e le' ba xa'. <sup>48</sup> Benne' wen zrin na' quebe nézene' da na', ne dxune' da dxusebaga na le' zria, benne' nigá té'e láteze xel-la

zi'. Che tu benne' dxezí'le'e da dxunezruj Dios le', Dios wanábale'e le, na' bénnea' Dios nuxrén lazre' le' da zrente, Dios wanné xúle'e'ene' le'.

*Dxelaca benne' chupa la'a nē cheē Jesús*  
(Mt. 10.34-36)

<sup>49</sup>Na' gunná Jesús:

—Neda' bla'a guzrena' xi' lu xēzr la xu nigá, na' la guzreda' ba dxala xi' na'. <sup>50</sup>Dxal-la' chu'a lu xel-la gute ca dxu'u tu benne' lu nisa gate dxedxúe' nisa, na' tēle'a xel-la zi' cadxa gácatequeze na. <sup>51</sup>¿Dxéquele le'e za' neda' cu'a xel-la dxebeza zri lazre' lu xēzr la xu nigá? Dxapa' le'e: Cabí. Za'a cheē guna' benne' chupa la'a. <sup>52</sup>Na'a su lau, gazxu' benne' zaj zre'e tu xu'u xelaque' chupa la'a. Chunne' xeledábague' chupe', na' chupe' xeledábague' chunne'. <sup>53</sup>Xra tu bi biu tábague' bi biu chee', na' bi biu na' tábagabe' xrabe'. Xra tu bi nu'ula tábague' bi nu'ula chee', na' bi nu'ula na' tábagabe' xrabe'. Tau zri'ine tu nu'ula tábague' zru'a lizre', na' zru'a lizre' na' tábague' tau zri'ine'.

*Da dxululé'e na ca da gaca lu zra na'a zra*  
(Mt. 16.1-4; Mr. 8.11-13)

<sup>54</sup>Na' Jesús guzre' benne' ca':

—Gate le'e dxel'é'ele da' beuj naga dxebía gubizra, na' dxennale, waca xiuj, ne ca' dxaca. <sup>55</sup>Gate dxaca be' za na chalá'a naga dxedé gubizra beu' zaga ca', na' dxennale waca da la, ne dxaca ca'. <sup>56</sup>Le'e, benne' dxunle láweze da xrlátaje. Le'e nézele mnale ca da gaca zran xabáa, ne lu xēzr la xu nigá, san quebe dxezéquele xuzájla'ale da dxululé'e na ca gaca chee'le lu zra na'a zra.

*Dxal-la' xezúadxu lu xel-la dxebeza zri lazre' nen benne' dxedábague' dxi'u*

(Mt. 5.25-26)

<sup>57</sup>Na' gunná Jesús:

—¿Bizr chee' na' quebe dxeque be'ele da naca xrlátaje? <sup>58</sup>Che nu benne' dxaca lazre' guzúe' lue' lau benne' dxuchi'e, na' gate chéájle'nu' le' chee' zrinle lau bénnea', ben ba xen xezú' lu xel-la dxebeza zri lazre' nen bénnea' dxácatē xu'ule neza, chee' quebe che'e' lue' lau bénnea', na' bénnea' gudé'e' lue' lu na' benne' gusézxuj'e' lue' lizre xia. <sup>59</sup>Dxapa' lue' quebe xedxúaju' na' cadxa quízruju' ca da dxebagu'.

## 13

*Dxal-la' xelexebí'i lazre' bénneache*

<sup>1</sup>Ca lu zra na' belezrín bal-la benne' lau Jesús, na' buluzenne' Le' ca ben Pilato, betie' bal-la benne' Galilea, na' bchague' dxen chee' benne' ca' nen dxen chee' be xixre', bea ca' ba belutie' chee' xuluzr'e' dxen chee' na lau Dios. <sup>2</sup>Na' Jesús guzre' le':

—¿Dxéquele le'e caní gulezaca benne' ca' lawe' da zaj nácadxe' benne' dul-la ca benne' ca' xezícala zaj zre'e xezre ca' zaj nababa Galilea? <sup>3</sup>Dxapa' le'e: Cabí, na' che quebe xebí'i lázrele le'e, xúgutele le'e cuía xile. <sup>4</sup>¿Dxéquele le'e benne' chinu chunna ca' gulatie' gate guzria cha xu'u sibe le' da nazí le na Siloé zaj nabágadx'e' dul-la ca xezícala benne' ca' zaj zre'e xezre Jerusalén? <sup>5</sup>Dxapa' le'e: Cabí, na' che le'e quebe xebí'i lázrele, cá'anqueze le'e wabía xile.

*Xaga higo da quebe dxebía na da zixre*

<sup>6</sup>Nadxa Jesús bchálajle'ne' benne' ca' da dxul'é'e nigá, dxenne':

—Tu benne' zua tu xaga higo chee' zua na lu xēzr la xu chee', na' xejné'e na che zría na, na' quebe bi bezrélene'. <sup>7</sup>Nadxa guzre' benne' dxun zrin lu xēzr la xu chee': "Gunná'xque, chun ízate' ba bida' dxenná'a che zria xaga nigá, ne quebe bi bezréleda'. ¿Guchugu na! ¿Bizr chee' na' nulán na xēzr la xu nigá?" <sup>8</sup>Bénnea' dxun zrin chee' xēzr la xu na' bechebe': "Xran, bca'ana na xetú iza na'a. Guzulujdx'a zran na, ne cua'a na bebe. <sup>9</sup>Nen da na", gúnnalja na, san che cabí, na' chugu' na."

*Jesús dxexune' tu nu'ula nalegu cuzre'*

<sup>10</sup>Gate naca zra dxulupá'ana judío ca', na' zua Jesús tu lu xu'u naga dxelezraga judío ca' dxuséden'e' benne' ca', <sup>11</sup>na' zua na' tu nu'ula xu'e' we' ba guca chinu chunna iza. Tu be' xriwe' nun na le' cuzru legu, na' quebe dxácaqueze' xelie'. <sup>12</sup>Gate ble'e Jesús le', na' gunné' le', ne guzre' le':

—Nu'ula, ba bexacu' chee' xízrawe' chiu'.

<sup>13</sup>Nadxa guxrúa ne'e nu'ula na', na' la ná'queze nu'ula na' belite', na' guzú lawe' dxue lá'ane' Dios. <sup>14</sup>Na' benne' xíchaj'e chee' xu'u na' bzre'e lawe' da bexún Jesús nu'ula na' lu zra dxulupá'ane', na' guzre' benne' zaj zre'e na':

—Xrupa zra dxal-la' gundxu zrin. Lu zra ca' waca xídale xexácale, quegá lu zra dxupá'anadxu.

<sup>15</sup>Nadxa Xránadxu bechebe':

—Le'e, benne' dxelún láweze da xrlá-taje, ¿quebe dxesézrele le'e bezre chee lu burro chee lu zra dxupá'anadxu hjua'le-ba' xelé'ajba' nisa? <sup>16</sup>Nú'ula nigá naque' xrtia Abraham, na' da xriwe' nuchéaj na le' lu xízrawe' nigá ba zeaj chinu chunna iza, na' ¿quebe dxal-la' xebéaja' xízrawe' da nuchéaj na le' lu zra dxupá'anadxu?

<sup>17</sup>Gate gunná Jesús da nigá, xúgute benne' dxeledábague' Le' belexedué'ene', na' xúgute benne' xezícadxa gulebene' gate belelé'ene' ca naca da zrente da dxun Jesús.

*Da dxulé'e na ca naca chee bínnedau' chee mostaza*

(Mt. 13.31-32; Mr. 4.30-32)

<sup>18</sup>Nadxa gunná Jesús:

—¿Aja naca xel-la dxenná bea chee Dios, ne bi gutil-le lébeda' na? <sup>19</sup>Naca na ca tu bínnedau' chee mostaza, tu benne' dxaze' na lu xezr la xu chee', na' dxegula na, ne dxácaté na ca tu xaga zren, na' bxínnedu ca' dxuluzríaba' xrú'uneba' lu zruze na ca'.

*Da dxulé'e na ca naca chee cua zichaj chee xeta xtla*

(Mt. 13.33)

<sup>20</sup>Cá'anqueze gunná Jesús:

—¿Bizra gutil-le lébeda' xel-la dxenná bea chee Dios? <sup>21</sup>Naca na ca cua zichaj chee xeta xtla tu nu'ula dxuchague' na chunna xaga de xezaj, na' dxuchazra na ca naca cua na'.

*Dxa xu'u lechide'*

(Mt. 7.13-14, 21-23)

<sup>22</sup>Dxácaté xu'u Jesús neza zexíaje' xezre Jerusalén, dxusédene' bènneache lu xezre ca', ne xézredu ca' naga dxedéé'. <sup>23</sup>Na' bchebe tu benne' Le':

—Xran, ¿bábaze benne' xelelá?

Bechebe Jesús:

<sup>24</sup>—Le gun ba xuzre chu'ule dxa xu'u lechide', lawe' da dxapa' le'e, benne' zan xelaca lazre' xelu'e na', na' quebe xelezéquene'. <sup>25</sup>Ca te na' chasa xrane xu'u, ne gusézxuje' dxa xu'u, na' le'e zrале chulé'ajla nnele dxu'a dxa xu'u na', nnale: “Xran, gusalaj chú'untu'.” Na' le' xechebe': “Quebe nezda' ga benne' le'e.” <sup>26</sup>Nadxa su láuquezle le'e nnale: “Güe'e gudágulentu' lue', na' lue' bsédenu' lu neza cheentu'

ca'.” <sup>27</sup>Le' xechebe': “Dxapa' le'e, quebe nezda' ga benne' le'e. Le cuasa cuita' neda', xúgutele le'e dxunle da calela.” <sup>28</sup>Na' cuézrele, ne xagu xá'ate' lázxale gate lé'ele Abraham, ne Isaac, ne Jacob, ne xúgute benne' ca' gulenné' waláz chee Dios, zaj zue' naga dxenná bea Dios, na' le'e zrале chulé'ajla. <sup>29</sup>Welelá' benne' zaj zre'e dapa saca chee xezr la xu nigá, na' xelebé'e xelawe' naga dxenná bea Dios. <sup>30</sup>Nadxa bal-la benne' zaj naque' bzébedxa na'a xelaque' benne' blau, na' benne' zaj naque' blau na'a xelaque' bzébedxa.

*Dxebezre Jesús chee xezre Jerusalén*

(Mt. 23.37-39)

<sup>31</sup>Lu zra ná'queze, belezrín lau Jesús bal-la benne' fariseo ca', na' gulé'e Le':

—Bezá' nigá, lawe' da dxaca lazre' Herodes gutié' Lue'.

<sup>32</sup>Jesús bechebe':

—Le hjaca cheajguézrele benne' wilaj lazre' calela na': “Na'a, ne wxre xebéaja' be' xriwe' ca' lu xichaj lázrdau benne' ca', ne xexuna' benne' we' ca', na' wizraj sueda'.” <sup>33</sup>Dxun na ba xen chéajlena' neza chia' na'a, ne wxre, ne wizraj, lawe' da quebe gaca gate tu benne' dxenne' waláz chee Dios che quebe xelute benne' Jerusalén le'.

<sup>34</sup>“Jerusalén, Jerusalén, le'e na' dxútele benne' dxelenné' waláz chee Dios, ne dxuzríale xiaj benne' gabáz ca' dxelel-la Dios. Zane' lasa guca lazra' gutupa' bi chee ca' ca dxun bedxuj, dxutúpaba' bédxujdu ca' zran xrlaba', san quebe guca lázrele. <sup>35</sup>¿Le nna'xque, na'a! Lízrele le'e xegá'ana na cá'aze. Dxapa' le'e québedxa xelé'ele neda' ca zrindxa zra nnale: ¡Lá'azxa naca Bènnea' ze'e lu La Xránadxu!”

## 14

*Jesús dxexunge' tu benne' de xi' ca naca bel-la' dxen chee'*

<sup>1</sup>Tu zra dxulupá'ana benne' judío ca' guxíaj Jesús zeajtawe' lizre tu benne' blau chee benne' fariseo ca', na' benne' fariseo ca' dxuluzuzre' Jesús bi gune'. <sup>2</sup>Zúaqueze lau Jesús tu benne' de xi' ca naca bel-la' dxen chee'. <sup>3</sup>Nadxa Jesús bchebe' benne' ca' dxuluxúzjle'e da nadxixruj bea na, ne benne' fariseo ca', gunné':

—¿Waca nu benne' xexune' benne' we' lu zra dxupá'anadxu, che cabí?

<sup>4</sup> Benne' ca' gulezúe' zrize. Nadxa Jesús guqu'e' benne' we' na', ne bexuné' le', na' guzre' le' xexíaje'. <sup>5</sup> Nadxa guzre' benne' fariseo ca':

—¿Núlae le'e, che bezre chee le u bia chee le bixreba' tu lu xedxu, quebe xebéajle-ba' zra ná'queze lálala naca zra dxupá'anadxu?

<sup>6</sup> Quebe bi guca xelexechebe'.

*Benne' zaj zre'e laní chee wechaga na'*

<sup>7</sup> Gate ble'e Jesús ca' dxelún benne' ca', dxelebé'e' lataj blaudxa ga dxelawe', na' bchálaje' da dxulé'e na, dxenné':

<sup>8</sup> —Gate tu benne' dxenné' lue' laní chee wechaga na', quebe cue'u lataj blau, lawe' da che wazá tu benne' nácadxe' blau ca' lue', <sup>9</sup> na' bénnea' gunné' dxúpatele xide' xe'e lue': "Bnezruj lataj nigá benne' nigá." Nadxa gun na ba xen xexíaju' lataj bzébedxa lu xel-la stu'. <sup>10</sup> Na'a, gate nu benne' nne' lue', gudxé'e' lataj bzébedxa, chee gate za bénnea' gunné' lue', wanne': "Bi ljwezra', gudé nigala naga nácadxa blau." Ca'an gaca, xegá'anu' szren lau benne' ca' zaj zre'e dxelágulene' lue'.

<sup>11</sup> Benne' dxucá'ana szren cuine', wexéxrujla bénnea', na' benne' dxucá'ana baxache' cuine' wegá'ana szrenqueze'.

<sup>12</sup> Nadxa Jesús guzre' benne' na' gunné' Le':

—Gate gunézruju' tu zrue u tu xrche' quebe nneu' bi ljwezru' ca', ne bi bichu' ca', ne xrtia ljwezru', ne benne' walírz chiu' ca' zaj nape' da gunní'a, lawe' da benne' caní welennéqueze' lue', na' zrué'equeznu' da xelexexunne' chiu'. <sup>13</sup> Gate dxunu' tu laní, gunné benne' xache' ca', ne benne' zaj nadxugu ni'a ne'e, ne benne' zrinnaj ca', ne benne' la chul-la ca'. <sup>14</sup> Caní gaca tu da ba neza chiu', lawe' da benne' caní quebe gaca xelexexunne' ca' chiu', na' wazrué'enu' lazrju' gate xelexebán benne' xrlátaje ca'.

*Da dxulé'e na ca naca chee tu xrche' zren*

<sup>15</sup> Gate ben tu benne' dxágule Le' da na', na' guzre' Jesús:

—Ba neza zrenté naca na chee benne' gawe' xeta naga dxenná bea Dios.

<sup>16</sup> Jesús guzre' le':

—Tu benne' gulu'e' tu xrche' zren, na' gunné' benne' zan. <sup>17</sup> Ca bzrin zra xelawe' xrche' na', gusél-le' wen zrin chee' chee cheajezre' benne' ca' gunné': "Le da, lawe' da ba nuseni'a da gágudxu." <sup>18</sup> Xúgute'

gulezú lawe' dxelenabe' gu'e le' lataj quebe xelide'. Benne' nedxu gunné': "Za bezítea' tu cue' xezr la xu chia', na' dxal-la' cheajnná'a na. Dxata' xueda' lue' si zrenu' chia'." <sup>19</sup> Xetúe' gunné': "Za bezítea' gazxu' cue' bezr chia', na' guxúa' aja xelumba'. Dxata' xueda' lue' si zrenu' chia'." <sup>20</sup> Na' xetúe' gunné': "Za bchágate' na'a, na' quebe gaca xida'." <sup>21</sup> Gate bezrín benne' wen zrin na', guzre' xrané' ca naca da nigá. Nadxa bzra'a xrané' na', na' guzre' wen zrin na': "Guxíaj na'a la neza ca', ne neza chee xezre nigá, na' xeaxrí' xúgute' benne' xache' ca', ne benne' zaj nadxugu ni'a ne'e, ne benne' zrinnaj ca', ne benne' la chul-la ca'." <sup>22</sup> Ca gudé na' gunná benne' wen zrin na': "Xran, ba bena' ca gunná'u, na' ne dedxa lataj." <sup>23</sup> Nadxa gunná xrané' na': "Guxíaj na'a la neza ca', ne neza lásedu ca', na' xeaxén ba xen xelélé'e, chee cha' lizra' nigá." <sup>24</sup> Dxapa' le'e, netú benne' ca' gunnéa' nédxula quebe xelawe' xrche' chia'."

*Xel-la zi' da te benne' chéajlene' Jesús*

<sup>25</sup> Benne' zan zjácálene' Jesús, na' Le' bexéchaje', na' guzre' benne' ca':

<sup>26</sup> —Che nu benne' ze'e naga zua', ne quebe guzúe' chalá'ala xre', ne xrne'e, ne zru'ule', ne zrí'ine' ca', ne bi biche' ca', ne bi zane' ca', ne xel-la nabán chee', quebe gaca gaque' neda' tuze. <sup>27</sup> Benne' quebe sá'lene' neda' lálala dxal-la' te'e xaga béguaj, quebe gaca gaque' neda' tuze. <sup>28</sup> Che tu benne' ládujla le'e dxaca lazre' gune' tu xu'u sibe, ¿quebe cue'e nedxu gune' xrbaba chee' che wazúene' xuzrte' na? <sup>29</sup> Che quebe gune' caní, ne che cueche' lane na, na' ca te na' quebe suene' xuzre' na, na' xúgute' benne' xelélé'ene' na xelézú lawe' xelún le' chee' bénnea', <sup>30</sup> na' xelenné': "Benne' nigá guzú lawe' dxuné' tu xu'u. Quebe guque' gune' ca naca." <sup>31</sup> Che tu benne' wenná bea dxal-la' cheajtíl-lalene' xetú benne' wenná bea, ¿quebe cue'e gune' xrbaba chee' che wazúene' nen tu gaxúa gaxúa benne' dxjaque' wedil-la cheajtíl-lalene' bénnea' za' nen chupa gaxúa gaxúa benne' dxjaque' wedil-la? <sup>32</sup> Che quebe séquene', gate benne' wenná bea na' xetú ne ze'e zitu', na' sel-le' gubáz chee' ca' xelenabe' gata' xel-la dxebeza zri lazre'. <sup>33</sup> Ca' naca na, núteteze benne' ládujla le'e, che quebe gusané' ca

naca da nape', quebe gaca gaque' neda' tuze.

*Zede' da québedxa naca na sna'a*  
(Mt. 5.13; Mr. 9.50)

<sup>34</sup>Na' gunná Jesús:

—Zede' naca na da chawe', san che québedxa naca na sna'a, ¿ájazra guchínedxu na? <sup>35</sup>Quebe gaca guchínedxu na, quegá chee gucá'ana cháwedxu xezr la xu, ne quegá chee guchíxredxu bebe, san dxal-la' chú'unadxu na. Benne' ca' zaj zua nague', dxal-la' xelenne'.

## 15

*Ca guca chee tu zrila' guníteba'*  
(Mt. 18.10-14)

<sup>1</sup>Benne' zante benne' wechizruj waláz chee Roma, ne benne' dul-la ca' gulebigue' naga zua Jesús chee xelenne' da dxuchá-laje'. <sup>2</sup>Chee lē na' benne' fariseo ca', ne benne' dxuluxuzájle'e da nadxixruj bea na gulez'í tizre' Jesús, gulenné':

—Benne' nigá dxunē' tu zren benne' dul-la ca', ne dxágulēne' lē'.

<sup>3</sup>Nadxa bchalaj Jesús da dxulé'e na, gunné':

<sup>4</sup>—Nu benne' ládujla le'e, che nape' tu gaxúa zrila', na' nite tuba', ¿quebe gucá'angē' xetápalalaj chennu zrila' ca', bea ca' zaj zra'ba' lē'e xixre', na' se'e cheajdílaje' bea na' guníteba' cadxa xezrelne'-ba'? <sup>5</sup>Na' gate xezrelne'-ba', bene', na' xeque'e-ba' xexrúe'-ba' xe'a xene'. <sup>6</sup>Na' ca xezrine' lizre', gutupe' ljwezre' ca', ne benne' walizre chee' ca'. Na' xe'e lē': “Le be nen neda', lawe' da bezrelda' zrila' chia' guníteba'.”

<sup>7</sup>Na' gunná Jesús, dxē'e benne' ca':

—Cá'anqueze zúale'edxa xel-la dxebé xabáa gate tu benne' dul-la dxexebí'i lazre', quézcala chee tápalalaj chennu benne' xrlátaje ca' dxelēquene' quebe dxun na ba xen xelēxebí'i lazre'.

*Ca guca chee tu dumí da gunite*

<sup>8</sup>Nadxa Jesús bchálaje' xetú da dxulé'e na, dxē'e benne' ca':

—Tu nu'ula nape' chi dumí zaca, na' che nite tu na, nadxa guzúe' xi' chee' chee gusaní na lu xu'u chee'. Nadxa su lawe' gulúe' lu xu'u chee', xexílaje' bínnalu ca xezrelne' dumí chee' da gunite na. <sup>9</sup>Na' ca xezrelne' dumí na', gutupe' nu'ula ljwezre' ca', ne nu'ula walíxr chee' ca', na' xe'e lē':

“Le be nen neda', lawe' da bache bezrelda' dumí chia' da gunite na.”

<sup>10</sup>Na' gunná Jesús, dxē'e benne' ca':

—Cá'anqueze dxelebé gubáz chee xabáa ca' chee Dios gate tu benne' dul-la dxexebí'i lazre'.

*Ca guca chee zri'ine tu benne' gunítebe'*

<sup>11</sup>Nadxa Jesús bchálaje' xetú da dxulé'e na, dxē'e lē':

—Tu benne' zaj zra' chupa bi chee'. <sup>12</sup>Na' bi cuide' chee' gúzrebe' xrabe': “Xrae, benna chia' da dxal-la' si'a chee da naca chiu'.” Nadxa xrabe' bene' gachaj da bnézruje' cha cheebe' tube', ne xetube'.

<sup>13</sup>Ca gudé tu chupa zra, bi cuide' chee béneea' btúpabe' xúgutē da naca cheebe', na' guzabe' zitu', na' bzrinbe' xetú xezr la xu. Na' ben dífajbe' dumí cheebe' lu da calela da benbe'. <sup>14</sup>Na' ca gudache xúgutē dumí cheebe', bzrin tu gubina' lu xezr la xu na', na' lebe' gudunbe'. <sup>15</sup>Nadxa guzabe' xeajtíljabe' zrin gunbe' chee tu benne' lu xezr la xu na'. Benne' na' gusél-lē'-be' lē'e xixre' chee' chee cheajxúbe' cuche chee' ca'. <sup>16</sup>Guca lázrebe' gágube' da calela da dxelagu cuche ca'. Netú benne' quebe bi bnézruje' da gágube'.

<sup>17</sup>Nadxa xeajśá lázrebe', dxennabe': “Benne' zante, benne' wen zrin zaj zre' e lizre xra', na' déle'e da dxelawe'. Neda' dxátequeza xel-la dxedún. <sup>18</sup>Webí'iza' xexá'a naga zua xra', na' xapa' lē': Xrae, bena' dul-la lau Dios, ne lau lue'. <sup>19</sup>Québedxa naca chia' gaca' zri'inu'. Bzua neda' ca tu benne' wen zrin chiu'.” <sup>20</sup>Nadxa begú'ube' neza, bezrinbe' lizre xrabe'.

Tu chi na', ble'e xrabe' lebe' ba zezabe', na' bexache lazre'-be'. Na' guzá chégüe' xeajchague'-be', na' bnide'-be', ne bnúpete'-be'. <sup>21</sup>Nadxa gunabe': “Xrae, bena' dul-la lau Dios, ne lau lue'. Québedxa naca chia' gaca' zri'inu'.” <sup>22</sup>Na' gunná xrabe', dxē'e benne' wen zrin chee' ca': “Le cueaj zra lana' da zaca, ne le gugacu-be'.

Le cu'u tu da naca oro zrube nabe', ne le cu'u xel-la ní'abe'. <sup>23</sup>Le cheajzri tu bezre be dxanne, na' gútele-ba'. Gágudxu, ne gundxu laní, <sup>24</sup>lawe' da bi chia' nigá guca cheebe' ca tu benne' ba gute, na' bebanbe'. Gunítebe', na' ba bezrágadxu-be'.” Na' gulezú lawe' dxelune' laní.

<sup>25</sup>Dxácate na', zri'ingē' bi waca zúabe' lē'e xixre' dxunbe' zrin. Na' chizrela' ca bezrinbe' gagu cuita xu'u lizre xrabe',

na' benbe' dxaca wil-la, ne dxaca wexá'a.  
<sup>26</sup> Nadxa gunnébe' tu bi wen zrin na',  
 dxé'ebe' lebe': "¿Bi dxaca nigá?" <sup>27</sup> Bi wen  
 zrin nigá cúnabe': "Ba belá' bi bichu', na'  
 xrau' gunná bé'ene' nu gute tu bejze be dx-  
 anne, lawe' da belabe' zúabe' zri'a chawe'."  
<sup>28</sup> Bzra'a bi waca na', na' quebe guca lázrebe'  
 xexú'ube'. Nadxa bdxuaj xrabe', ne guta'  
 xuene' lebe' xexú'ube'. <sup>29</sup> Na' cúnabe',  
 dxé'ebe' xrabe': "Nézqueznu' zane' iza ba  
 beña' zrin chiu', ne cabata' bcha'a lue',  
 na' ne tu lasa quebe ne gunnu' chia' tu  
 chífudau' chee guna' tu laní nen ljwezra'  
 ca'. <sup>30</sup> Na'a belá' bi chiu' nigá, bi ba ben dítá-  
 jbe' dumí chiu', guzúalebe' nu'ula dxeledá  
 zraga ca', na' beje lizu' bejze be dxanne  
 ne chee lebe'." <sup>31</sup> Nadxa gunná xrabe',  
 dxé'e-be': "Zri'ina', lue' tu zúalezquezu'  
 nen neda', na' xúguté da de chia' naca na  
 chiu'. <sup>32</sup> Na'a dxun na ba xen gundxu laní,  
 ne bedxu, lawe' da bi bichu' gicabe' ca tu  
 benne' ba gute, ne naca banbe'. Gunítebe',  
 na' ba bezrágadxu-be'."

## 16

*Benne' wen zrin blau quebe naque' xrlátaje*

<sup>1</sup> Nadxa Jesús guzre' benne' ca' dxusé-  
 dené':

—Guzúa tu benne' gunní'a, na' zua tu  
 benne' wen zrin blau chee'. Na' bal-la  
 benne' xejleguezre' le' benne' wen zrin  
 blau na' dxun dítaje' da de chee xrané'.  
<sup>2</sup> Nadxa xrané' gunné' le', ne guzre' le':  
 "¿Bizra da nigá dxeleonné' chiu'? Blué'e  
 neda' ca naca chee zrin dxunu', lawe' da  
 québedxa gaca gacu' wen zrin blau chia'."

<sup>3</sup> Nadxa benne' wen zrin blau na' guzú lawé'  
 dxenné' lu xichaj lázrdawe': ¿ájazra guna'  
 na'a, lawe' da xebéj xrana' neda' lu zrin  
 chia'? Quebe sueda' guna' zrin le'e xixre',  
 ne wedué'eda' naba' guna'. <sup>4</sup> Na'a ba nezda'  
 tu da guna' chee xelezúa benne' xelez'  
 lu ne'e neda' gate québedxa de zrin chia'.

<sup>5</sup> Nadxa gunné' tu tu benne' dxelal-le' chee  
 xrané' na'. Na' bchebe' benne' nedxu:  
 "¿ájate dxal-lu' chee xrana'?" <sup>6</sup> Benne' na'  
 bechebe': "Dxal-la' chee' tu gaxúa zruaga  
 da za." Nadxa benne' wen zrin blau na'  
 guzre' le': "Nigá de xiche chiu'. Gudxé'e  
 bexún xetú na, na' bzuaj na dxebagu' chi  
 xun zruaga ca'." <sup>7</sup> Gudé na' bchebe' xetú  
 benne' ca': "¿Gazra lue', ájate dxebagu'?"  
 Na' benne' nigá guzre' le': "Dxebaga' tu

gaxúa bzude' zrua' xtila." Nadxa benne'  
 wen zrin blau guzre' le': "Nigá de xiche  
 chiu'. Ben xetú na, na' bzuaj na dxe-  
 bagu' tápalalaje." <sup>8</sup> Xrané' gúquebe'ene'  
 nácale'e sina benne' wen zrin blau na' ca  
 bene' da ca'.

Nadxa gunná Jesús:

—Ca' naca na, benne' zaj zre'e na'a zra  
 zaj nácadxe' sina lu da dxelune' nen le sa'  
 ljwezre' ca', ca zaj naca benne' zaj naque'  
 chee Dios.

<sup>9</sup> Neda' dxapa' le'e, le guchine xel-la  
 gunní'a chee xezr la xu nigá chee cha  
 benne' ljwézrele, chee gate te chee xel-la  
 gunní'a na', na' sua nu si' lu na' le'e naga  
 gaca banle chadía chacanna.

<sup>10</sup> Benne' dxuchínene' láteze lu duté xel-  
 la li lazre' chee', cá'aqueze guchínene'  
 tu da zrendxa duté xel-la li lazre' chee',  
 na' benne' quebe naque' li lazre' ca dx-  
 uchínene' láteze, cá'aqueze quebe gaque'  
 li lazre' ca guchínene' tu da zrendxa. <sup>11</sup> Ca'  
 naca na, che quebe nácale li lazre' ca dx-  
 uchínele xel-la gunní'a chee xezr la xu nigá,  
 ¿nuzra guxrén lazre' le'e chee guchínele  
 xel-la gunní'a li? <sup>12</sup> Che quebe nácale li  
 lazre' ca dxuchínele da naca chee benne'  
 xula, ¿nuzra gunna le'e da gaca cheéque-  
 zle?

<sup>13</sup> Quebe gaca tu benne' wen zrin gune'  
 zrin chee chupa xrané', lawe' da cuídené'  
 tue', na' xetúe' zrí'ine', u gaque' li lazre'  
 nen tue', na' xetúe' guzúe' chalá'ala. Quebe  
 gaca nu gun zrin chee Dios, ne chee da  
 gunní'a da nape'.

<sup>14</sup> Benne' fariseo ca', benne' dxulucúdee'  
 dumí, ne dxuluzé nague' da dxenná Jesús,  
 belún le' chee'. <sup>15</sup> Nadxa gunná Jesús:

—Le'e dxulé'e cuínale xrlátaje lau bén-  
 neache ca', san Dios núnbe'e lázrdaule. Da  
 dxeleque bénneache naca na xrlátaje, naca  
 na da dxuzúa Dios chalá'ala.

*Da nadxixruj bea na, ne xel-la dxenná bea  
 chee Dios*

<sup>16</sup> Na' gunná Jesús:

—Ca bzin zra zua Juan gulenná bea da  
 nadxixruj bea na, ne da bululé'e benne' ca'  
 buluchálaje' waláz chee Dios. Na'a, ca na'te  
 dxendxu dizra' chawe' ca gaca chú'udxu  
 naga dxenná bea Dios, na' xúguté benne'  
 dxelune' ba xuzre xelu'e na'.

<sup>17</sup>Waca te chee xabáa, ne chee xezr la xu nigá, san quebe te chee tu da naxúaj na lu da nadxixruj bea na.

*Benne' biu dxulusáne' nu'ula chee'*  
(Mt. 19.1-12; Mr. 10.1-12)

<sup>18</sup>Na' gunná Jesús:

—Che tu benne' biu gusane' zru'ule', ne súalene' nu'ula xula, benne' biu nigá dxune' dul-la dxáchajne' xrba chee xel-la wechaga na', na' benne' biu zúalene' tu nu'ula ba bsan benne' chee' le', benne' nigá cá'anqueze dxune' dul-la dxáchajne' xrba chee xel-la wechaga na'.

*Tu benne' gunní'a, ne tu benne' xache'*

<sup>19</sup>Na' gunná Jesús:

—Guzúa tu benne' gunní'a, gúcué' zra lane' da zaca, ne da zri'a xrtan, na' xúgute zra bene' laní zren. <sup>20</sup>Cá'anqueze guzúa tu benne' xache' le' Lázaro, nazraté we' lu bel-la' dxen chee', na' dxeajché'e lu xu dxu'a lizre benne' gunní'a na'. <sup>21</sup>Benne' xache' nigá guzá lazre' gawe' ca da dx-elexruj zranla ga dxelagu benne' gunní'a na', na' bécudu ca' dxelelé'eba' lu we' ca' chee' Lázaro. <sup>22</sup>Bzrin zra gute benne' xache' na', na' belexeché' gubáz chee xabáa ca' le' zeajhezúalene' Abraham lu lataj chawe' chee' Dios. Cá'anqueze gute benne' gunní'a na', na' bulucache' le'. <sup>23</sup>Gate benne' gunní'a na' dzezaca zi'e lataj chul-la chee benne' gate, na' guchisa lawé', na' blé'ene' Abraham zue' zitu', ne Lázaro zúalene' le'. <sup>24</sup>Nadxa gudxezre xe'e, gunné': "¡Xrae, Abraham, bexache lazre' neda', ne gusella Lázaro, cheajsebise' tu zrube ne'e, na' xide' xucule' luzra' nigá! Dzezaca zi'a lu xi' nigá." <sup>25</sup>Na' Abraham gunné': "Bi chia', bsa lazre' gúcale'e chawe' chiu' lu xezr la xu, san Lázaro gúcale'e da zi' da xa' chee'. Na'a le' dxezi'e da ba neza nigá, na' lue' dzezaca zi'u na'. <sup>26</sup>Xetú da zua, zua tu chejéa zrenté laduj netu' ne le'e. Ca' naca na, che nu benne' zua nigá dxaca lazre' chéajé' naga zu', quebe gaca, ne quebe gaca benne' zua naga zu' xide' naga zúantu' netu'." <sup>27</sup>Nadxa gunná benne' gunní'a na': "Dxata' xueda' lue', xrae Abraham, sel-lu' Lázaro lizre xra', <sup>28</sup>naga zaj zra' gazxu' bi bícha'dau', chee cheajchálajlene'-be', chee quebe xeledá' lebe' nigá xelezaca zi'be' ca dxaca chia'." <sup>29</sup>Abraham gunné': "Zaj nape' da buluzúaj Moisés, ne benne' ca'

buluchálaje' waláz chee' Dios. Dxal-la' xelena' xánnie' da na' naxúaj na." <sup>30</sup>Benne' gunní'a na' bechebe': "Awe', xrae Abraham, san che nu benne' ládujla benne' gate chéajé' cheajchálajlene' le', welxebí'i lazre'." <sup>31</sup>Abraham gunné': "Che quebe xelenne' ca da gulenná Moisés, ne benne' ca' buluchálaje' waláz chee' Dios, québequeze xeléajle'e che tu benne' xebane' ládujla benne' gate."

## 17

*Ca naca da dxun na ga nabágadxu dul-la*  
(Mt. 18.6-7, 21-22; Mr. 9.42)

<sup>1</sup>Jesús guzre' benne' ca' dxusédene':

—Welezúaqueze da xelún na xelebaga bénneache dul-la, na' edxugúa bénnea' guné' da gun na xebaga benne' xula dul-la. <sup>2</sup>Gácadxa chawe' chee bénnea' che nu guchéaj xiaj xiche lbé', na' chu'e lu nísadau' naga gátete' quézcala guné' da gun na xebaga bidu caní dul-la. <sup>3</sup>Le guxúe xanne' cuínale.

'Che le sa' ljwezru' guné' chiu' da calela, bzéajni'ine', na' che xebí'i lazre', bnite lau chee'. <sup>4</sup>Lácala guné' chiu' da calela gazre lasa tu zra, na' gazre lasa xide' xe'e lue': "Dxexebí'i lazra'", dxal-la' gunite lau' chee'.

*Xel-la waca chee xel-la dxeajlí lazre'*

<sup>5</sup>Benne' gubáz ca' chee Xránadxu gulé'e Le':

—Ben ga cheajlí lázredxantu' Dios.

<sup>6</sup>Nadxa gunná Xránadxu:

—Che le'e zrué'ele xel-la dxeajlí lazre', lácala naca na láteze ca tu bínedu chee mostaza, waca xe'e xaga zrenté nigá: "Gucuasa nigá, ne xeajsiá lu nísadau'," na' xaga na' guzúa na dizra' chee'e.

*Da dxal-la' gun benne' wen zrin*

<sup>7</sup>Che tu benne' ládujla le'e zua tu benne' wen zrin chee', na' xelé'e le'e xixre' gate te gudé'e bezre u guxúe' béadu ca', ¿we'e benne' wen zrin na': "Gudé nigala, gudxé'e gagu'?" <sup>8</sup>Cabí, san nne': "Bcuesa da gawa', ne gusí' chawe' le'u chee gaca ca'u chia' da xi'aj gawa'. Te na' waca xi'aj gagu' lue'." <sup>9</sup>¿We'e benne' wen zrin na': "Xcalenu'", lawe' da bene' da gunná be'e xrane' le'? Cabí. <sup>10</sup>Cá'anqueze le'e, gate xuzre gunle xúgute da gunná be'e Dios le'e, dxal-la' mnale: "Nácantu' benne' wen zrin quebe

bi zaj zaca, lawe' da quebe bi ne guntu' da zréndxala ca naca da nabáagantu'."

*Jesús dxexuné' chi benne' zaj de'e we' guzru'*

<sup>11</sup> Ca zexíaj Jesús zéajé' Jerusalén, gudéé' lu xezr la xu chee xezre ca' zaj nababa Samaria, ne xezre ca' zaj nababa Galilea. <sup>12</sup> Gate bzrine' tu xézredau', bedajlechaga Le' chi benne' zaj de'e we' guzru', na' belezé' zítu'la, <sup>13</sup> ne gulebezre xe'e, dxelen-né':

—Jesús, Benne' Wesede, bexache lazre' netu'.

<sup>14</sup> Gate ble'e Jesús le', na' gunné':

—Le hjaca le cheajlué'e cuínale lau bxruze ca'.

Dxácaté' zjaque' na', na' belexexaque' chee xízrawe' chee'. <sup>15</sup> Nadxa tu benne' ca', gate guque bé'ene' ba bexaque', na' bebi'e, dxue lá'ane' Dios du lazre'. <sup>16</sup> Bzu zribe' lau Jesús, ne gudíxrujté' lawe' lu xu, dxé'e Le': "Xcalenu'." Benne' nigá naque' tu benne' Samaria. <sup>17</sup> Nadxa gunná Jesús:

—¿Quegá chie' na' belexexaque' lu xízrawe' na'? ¿Gazra na' xegué'? <sup>18</sup> ¿Tuze benne' zitu' nigá belá' güe lá'ane' Dios?

<sup>19</sup> Nadxa Jesús guzre' benne' na' bexaque':

—Bexasa, bexíaj. Ba bexacu' lawe' da guxéajlé'u chia'.

*Ca la' xel-la dxenná bea chee Dios*  
(Mt. 24.23-28, 36-41)

<sup>20</sup> Benne' fariseo ca' buluchébe' Jesús bátala la' xel-la dxenná bea chee Dios, na' bechebe Le':

—Ca la' xel-la dxenná bea chee Dios quebe naca na da lé'ele. <sup>21</sup> Quegá nu nna: "Nigá zua na", u "Na' zua na", lawe' da ba zua lu'ule le'e xel-la dxenná bea chee Dios.

<sup>22</sup> Nadxa guzre' benne' ca' dxusédene':

—Wazrín zra gate le'e gaca lázrele lé'ele tu zra zua' neda', Benne' Gulje' Bénneache, na' quebe lé'ele na. <sup>23</sup> Che xelenná bénneache, xelé'e le'e: "Nigá zue'", u: "Na' zue'", quebe cheájle, ne quebe gaule benne' ca'. <sup>24</sup> Ca dxejúsua xesa chalá'a zran xabáa, na' nalá'tequeze na xechalá'a zran xabáa, ca'an gaca gate xelá' neda', Benne' Gulje' Bénneache, lu zra xelá'a neda'. <sup>25</sup> Nédxula dxal-la' téle'a xel-la zi', na' benne' zaj zre'e lu zra na'a zra xuluzúe' neda' chalá'ala. <sup>26</sup> Ca guca lu zra gate zua Noé, cá'anqueze gaca lu zra gate xelá'a neda', Benne' Gulje' Bénneache. <sup>27</sup> Lu zra na' zua Noé gulé'aj

gulawe', ne buluchaga ne'e, ne bulunézruje' bi nu'ula chee' ca' lu xel-la wechaga na', cadxa bzrin zra guxú'u Noé lu da zren na' da dxedá lawe' nísadau', na' gúcale'e xiuj, na' gulate xúgute benne' ca'. <sup>28</sup> Cá'anqueze guca lu zra zua Lot, gulé'aj gula-we', ne gulá'awe', ne belútie', na' gulaze', ne belune' lizre', <sup>29</sup> na' gate Lot bedxúajé' lu xezre Sodoma, na' ca dxaca gate dxaca xiuj, ca'an guca bexruj xi', ne da gache da dxuzézzele'e zran xabáa, ne bzria xi na ca naca benne' ca'. <sup>30</sup> Ca'an gaca lu zra xelá'a neda', Benne' Gulje' Bénneache.

<sup>31</sup> Lu zra na', che nu benne' ze' chju'u chee', na' da de chee' zra na lu xu'u chee' na', quebe dxal-la' chu'e cuéajé' na, na' che nu benne' zue' le'e xixre', quebe dxal-la' xezrine' lizre'. <sup>32</sup> Le cheajsa' lazre' ca guca chee' zru'ula Lot. <sup>33</sup> Benne' dxaca lazre' gapa chi'e xel-la nabán chee' gunitie' na, na' bénnea' wde'e na, wazrué'e bénnea' xel-la nabán.

<sup>34</sup> Dxapa' le'e, lu zre na', chupa benne' xelate' tu zren ga dxelase'. Tue' xeché'e, na' xetúe' xegá'ane'. <sup>35</sup> Chupa nu'ula xelezré'e dxelútue'. Tue' xeché'e, na' xetúe' xegá'ane'. <sup>36</sup> Chupa benne' xelezré'e le'e xixre'. Tue' xeché'e, na' xetúe' xegá'ane'.

<sup>37</sup> Gate belén benne' ca' da nigá, na' buluchébe' Jesús:

—¿Gazra gaca ca', Xran?

Le' bechebe':

—Naga de tu da nate, na' xeledúpaqueze laba ca'.

## 18

*Da dxulé'e na ca naca chee tu nu'ula ba gute benne' chee', ne benne' dxuchi'a da dxaca*

<sup>1</sup> Jesús bchálajé' da dxulé'e na ca naca chee' gusédene' benne' ca' dxal-la' xuluwízrajtecaze' Dios, ne quebe xelexebigue'. <sup>2</sup> Na' guzre' benne' ca':

—Tu xezre guzúa tu benne' dxuchi'e da dxaca, na' quebe gudape' ba lá'ana Dios, ne cá'anqueze bénneache. <sup>3</sup> Lu xezre ná'queze guzúa tu nu'ula ba gute benne' chee'. Guxíajé' xejnabe' lau benne' dxuchi'e da dxaca chee' guchi'e da dxaca chee' nen tu benne' dxuné' chee' da calela. <sup>4</sup> Zane' lásate benne' dxuchi'e da dxaca quebe guca lazre' guchi'e chee' nu'ula na', san ca gudé na' gunné' lu xichaj lázrdawe': Lácala quebe



dxapa' ba lá'ana Dios, ne cá'anqueze bèneache, <sup>5</sup> san lawe' da nu'ula nigá dxune' neda' zede, guchí'a chaza' da dxaca chee' chee' quebedxa xidé' gúnle' e neda' zede.

<sup>6</sup> Na' gunná Xránadxu:

—Caní na' gunná benne' wen da calela na', benne' dxuchi'e da dxaca. <sup>7</sup> ¿Quebe guchi'a Dios da dxaca chee' benne' ca' ba guqué'e, benne' ca' dxelenné' Le' te zra, ne chizrela? ¿Wazrene' xechebe' chee' benne' ca'? <sup>8</sup> Dxapa' le'e, Le' guchi'e da dxaca chee', ne quebe chene'. Gate xelá'a neda', Benne' Gulje' Bénneache, ¿wazréldxada' tu benne' lu xezr la xu nigá, benne' dxéajle' e chia'?

*Da dxulé'e na ca naca chee' tu benne' fariseo, ne tu benne' wechizruj*

<sup>9</sup> Jesús bchálaje' xetú da dxulé'e na, chee' xelene benne' ca' dxeléquene' zaj naque' xrlátaje, san dxuluzúe' chala'ala le sa' ljwezre'. <sup>10</sup> Gunné':

—Chupa benne' xjaque' xudau' chee' xuluchálajlene' Dios. Tué' naque' benne' xudau' fariseo, na' xetúe' naque' wechizruj waláz chee' xezre zitu'. <sup>11</sup> Benne' xudau' na' guzé' dxuchálajlene' Dios, gunné': “Dios, xcalenu' quebe naca' ca benne' xula ca', zaj naque' gubán, ne benne' ca' dxelune' da calela, ne benne' dxelún dul-la dxeláchajne' xrba chee' wechaga na', ne quegá ca benne' wechizruj nigá. <sup>12</sup> Neda' dxuna' gubasa chupa lasa da gazre zra, ne dxunna' chiu' tu cue' chee' da chi cue' da dxezi'a.” <sup>13</sup> Benne' wechizruj na' guzúe' dxu'a dxa xú'uze, ne quebe bexazrjne' chisa lawe' xabáa. Bélé'e la chu'e, dxenné': “Dios, bexache lazre' neda', naca' benne' dul-la.” <sup>14</sup> Dxapa' le'e, benne' wechizruj na' bezé'e xexíaje' lizre', ne bexaque' xrlátaje lau Dios, san quegá caní guca chee' benne' xudau' na'. Ca' guca lawe' da benne' dxucá'ana szren cuine' wexéxruja bènea', san benne' dxucá'ana baxache' cuine' wegá'ana szrénequeze bènea'.

*Jesús dxenabe' gaca chawe' chee' bidu ca' (Mt. 19.13-15; Mr. 10.13-16)*

<sup>15</sup> Belezrín benne' ca' zaj naché'e bidu ca' lau Jesús chee' guzé' ne'e lebe'. Gate belelé'e benne' ca' dxusede Jesús da nigá, na' gulezú' lawe' dxeledil-le' benne' ca'. <sup>16</sup> Jesús gunné' benne' ca' dxusédene', na' dxé'e le':

—Le güe lataj xelélé' bidu ca' naga zua', ne quebe guzágale-be', lawe' da benne' zaj

naque' ca bidu caní welexu'e naga dxenná bea Dios. <sup>17</sup> Da li dxapa' le'e, benne' quebe si' lu ne'e nna bea Dios le' ca dxelún bidu caní, quebequeze chu'e naga dxenná bea Dios.

*Tu benne' cuide' naque' benne' gunní'a*

*(Mt. 19.16-30; Mr. 10.17-31)*

<sup>18</sup> Tu benne' xíchaje' bchebe' Jesús:

—Benne' Wesede xrlátaje, ¿bi da dxal-la' guna' chee' zrué'eda' xel-la nabán zeajli canna'?

<sup>19</sup> Jesús guzre' le':

—¿Bizr chee' na' dxennáu' naca' xrlátaje? Netú benne' quebe naque' xrlátaje. Tuze Dios naque' xrlátaje. <sup>20</sup> Lue' núnbe'u ca zaj naca xrba chee' Dios:

Quebe gunu' dul-la da dxachaj na xrba chee' wechaga na'.

Quebe gutiu' benne'.

Quebe cuanu'.

Quebe nneu' chee' le sa' ljwezru' da quebe naca na.

Gudapa ba lá'ana xra xrna'u.

<sup>21</sup> Benne' na' guzre' Jesús:

—Xúgute da caní dxuna' ne nácatea' bídau'te.

<sup>22</sup> Gate ben Jesús da nigá, na' guzre'-be':

—Ne dxexájrjenu' xetú da dxal-la' gunu'. Bete ca naca da de' chiu', na' bnezruj na chee' benne' xache' ca'. Nadxa gapu' xel-la gunní'a lu xabáa chee' Dios. Na' gudá sálenu' neda'.

<sup>23</sup> Gate benne' cuide' na' benne' da nigá, bewí'inele'ene' lawe' da nápalé'e da gunní'a. <sup>24</sup> Gate ble'e Jesús ca bewí'ine benne' na', gunné':

—Stébeté naca chee' benne' gunní'a ca' xelexú'e naga dxenná bea Dios.

<sup>25</sup> Chadídxala te tu bea zren lu negue' tu xeche' zriche quegala chu'u tu benne' gunní'a naga dxenná bea Dios.

<sup>26</sup> Na' benne' ca' dxelenne' gulenné':

—Che ca' naca na, ¿núzraqueze la?

<sup>27</sup> Jesús guzre' benne' ca':

—Da quebe gaca xelún bèneache, waca Dios gúnqueze' na.

<sup>28</sup> Na' gunná Pedro, guzre' Jesús:

—Xran, ba bsantu' ca da gudápantu' chee' zálentu' Lue'.

<sup>29</sup> Nadxa Jesús bechebe':

—Da li dxapa' le'e, núteteze benne' gusane' lizre', u xra xrné'e, u bi biche', bi zane' ca', u zru'ule', u zrí'ine' ca', chee' gune' zrin chee' xel-la dxenná bea chee' Dios, <sup>30</sup> benne'

nigá wazi'e da zrendxa lu xezr la xu nigá, na' lu xezr la xu da za za' wazi'e xel-la nabán da zeajlí canna.

*Jesús dxuchálajle' xecha lasa ca gaca gate gate'*

(Mt. 20.17-19; Mr. 10.32-34)

<sup>31</sup> Na' Jesús gunné' chala'ala benne' chazrinnu ca' dxusédené', na' guzre' le':

—Na'a zexíajdxu Jerusalén, naga gaca li ca naca da buluzúaj benne' ca' buluchálajle' waláz chee Dios ca gaca chia' neda', Benne' Gulje' Bénneache. <sup>32</sup> Benne' zaj zre'e Jerusalén xuludé'e neda' lu na' benne' zitu' ca', na' xelún le' chia', ne xelenéqueze' schanni' chia', ne wuluzráqueze' neda' zrene'. <sup>33</sup> Welúequeze' neda', na' te na' xelútie' neda', na' zra guxunne' zra xebana' ládujla benne' gate.

<sup>34</sup> Benne' ca' quebe guléajni'ine' da nigá, ne quebe zaj nézene' bi chee na' dxuchálajle' le', lawe' da zaj naca da quebe guca xeléajni'iquezne'.

*Tu benne' la chul-la, benne' zue' xezre Jericó*

(Mt. 20.29-34; Mr. 10.46-52)

<sup>35</sup> Gate Jesús bzrine' gagu naga zua xezre Jericó, na' dxe' tu benne' la chul-la dxu'a neza dxenabe' guna'. <sup>36</sup> Gate benne' dxeledé benne' zante, na' benne' la chul-la na' bchebe' benne' ca' bizra na' dxaca na. <sup>37</sup> Na' gulé'e le':

—Jesús, benne' Nazaret dxedé'e nigá.

<sup>38</sup> Nadxa gudxezre xa'a la chul-la na', gunné':

—Jesús, Zri'ine David, bexache lazre' neda'!

<sup>39</sup> Benne' ca' zaj zria lawe' lau Jesús guledil-le' benne' la chul-la na' chee sue' zrize, san gudxezre xá'adxa le', dxenné':

—¡Zri'ine David, bexache lazre' neda'!

<sup>40</sup> Nadxa gugá Jesús, na' gunná bé'ene' xeajlexrí'e le'. Gate ble'e lau Jesús, na' Jesús bchebe' le':

<sup>41</sup> —¿Bi dxaca lazru' guna' chiu'?

Bechebe la chul-la na':

—Xran, dxaca lazra' xelé'eda'.

<sup>42</sup> Jesús guzre' le':

—Gaca ca dxennáu'. Ba bexacu' lawe' da guxéajle'u chia'.

<sup>43</sup> Zra ná'queze belé'e benne' la chul-la na', na' guxíajle' Jesús, dxue lá'ane' Dios. Xúgute benne' ca' belelé'ene' da nigá cá'anqueze belúe lá'ane' Dios.

## 19

*Jesús dxuchálajle' Zaqueo*

<sup>1</sup> Nadxa Jesús guxú'e xezre Jericó, ne dxedé'e xezre na'. <sup>2</sup> Lu xezre na' zua tu benne' gunní'a le' Zaqueo. Naque' xíchajé chee benne' wechizruj ca'. <sup>3</sup> Benne' nigá dxaca lazre' gúnbe'e Jesús, san quebe guca lé'ene' Le' lawe' da zaj zra' benne' zante na', na' Zaqueo na' quebe naque' benne' tunna. <sup>4</sup> Nadxa guxíaj chégü'e guzrí'a lawe', ne chee gaca lé'ene' guluéne' tu lu xaga zren da zua gagu naga dxal-la' te Jesús. <sup>5</sup> Gate gudé Jesús na', gunné'e lu xaga na', ne guzre' le':

—Zaqueo, bexétajche, lawe' da na'a dxun na ba xen xegá'ana' lizru'.

<sup>6</sup> Nadxa Zaqueo na' bexétajé' chadí, na' nen dute xel-la dxebe' guz' lu ne'e Jesús.

<sup>7</sup> Gate belelé'e benne' ca' da nigá, xúgute' gulezú lawe' dxelezi tizre' Jesús, dxellené':

—Jesús bzrine' begá'ane' lizre tu benne' dul-la.

<sup>8</sup> Nadxa Zaqueo na' guz'é', na' guzre' Xrá-nadxu:

—Gunná'xque, Xran, gunézruja' benne' xache' ca' gáchajte ca da de chia', na' che nu benne' bsaca zia' le', xunézruja' tapa cue'la chee'.

<sup>9</sup> Na' Jesús guzre' le':

—Na'a bla' xel-la weselá lu xu'u nigá, lawe' da nácaqueze benne' nigá xrtia Abraham. <sup>10</sup> Ca' naca na lawe' da bla' neda', Benne' Gulje' Bénneache, chee xexilaja', ne guselá' benne' ca' zaj nanítie'.

*Da dxulé'e na ca naca chee chi dumí zaca*

<sup>11</sup> Dxácaté na' dxuluzé naga benne' ca' dxenná Jesús da caní, na' bchálajé' tu da dxulé'e na lawe' da ba zue' gáguze xezre Jerusalén, na' benne' ca' dxeléquene' zra ná'queze nna bea Dios lu xezr la xu nigá.

<sup>12</sup> Nadxa guzre' benne' ca':

—Guzúa tu benne' gunní'a xrlátaje, na' dxal-la' chéajé' zitu' chee xuluzúe' le' gaque' wenná bea, na' te na' xezrine' lazrie'. <sup>13</sup> Gate za se'e, gunné' chi benne' wen zrin chee', na' bnézruje' tu tu benne' ca' tuwéaj dumí zácalle', ne guzre' benne' ca': “Le guchine dumí nigá cadxa xelá'a.”

<sup>14</sup> Benne' zaj zre'e lázrie' dxelecuídené' le', na' gulesele-le' bal-la benne' gubáz chee' naga zéajé' chee' cheajleguezre' benne' zaj zre'e na': “Quebe dxaca lázrentu' gaca benne' nigá wenná bea cheentu'.”

<sup>15</sup> Buluzúe' le' gaque' wenna' bea, na' bezrine' lázrie'. Gate bezrine' gunné' benne' wen zrin ca' bnézuje' dumí, chee' nézene' ájate' bezi' tu tu benne' ca'.  
<sup>16</sup> Benne' nedxu bzrine' lawe', na' gunné': "Xran, dumí chiu' ba bezi' na chi cue'la."  
<sup>17</sup> Wenna' bea na' bechebe': "Chawe' benu'. Nacu' wen zrin xrlátaje. Lawe' da gucu' li lazre' lu late' da benna' lue', na'a guna' lue' benne' nna be'ene' chi xezre ca'."  
<sup>18</sup> Na' bzrin xetúe' lawe', na' gunné': "Xran, dumí chiu' ba bezi' na gazxu' cue'la."  
<sup>19</sup> Cá'anqueze guzre' benne' nigá: "Lue' gacu' benne' nna be'ene' gazxu' xezre ca'."  
<sup>20</sup> Nadxa xetúe' bzrine', na' gunné': "Xran, nigá de' dumí chiu'. Bcache chawa' na tu lu bazxu, <sup>21</sup> lawe' da bzreba' lue'. Nacu' tu benne' dxuzúa xuzre. Dxexeca'u da quebe guxru', ne dxelapu' naga quebe guzu'."  
<sup>22</sup> Nadxa wenna' bea na' guzre' le': "Wen zrin ca'lela. Ca dizra' da gunnéu' chuga' ca gaca chiu'. Che nézquezenu' naca' benne' dxuzúa xuzre, ne xecá'a da quebe guxrúa', ne dxelapa' naga quebe guza', <sup>23</sup> ¿bizr chee na' quebe xju'u dumí chia' lu na' benne' xuluchínene' na, chee' xezí' lu na'a neda' dumí chia' nen da gun xíchaje na, gate xezrina' neda' lizra'?" <sup>24</sup> Nadxa guzre' benne' ca' zaj zre'e na': "Le xecá'a dumí na' lu ne'e, na' le gunezruj na benne' nape' chi dumí ca'." <sup>25</sup> Benne' ca' gulé'e le': "Xran, ba nape' chi dumí." <sup>26</sup> Na' bechebe' wenna' bea na': "Dxapa' le'e, benne' nape' wazidxe' da zrendxa, na benne' quebe nape', wecá'a ca da du nape'. <sup>27</sup> Na'a, ca naca chee' benne' ca' quebe gulaca lazre' gaca' neda' wenna' bea chee', le cheajxri'e nigá, ne le gutie' lawa' neda'."

*Jesús dxexu'e Jerusalén*

(Mt. 21.1-11; Mr. 11.1-11; Jn. 12.12-19)

<sup>28</sup> Ca gudé gunné' da nigá, na' bexú'u Jesús neza zexíaje' Jerusalén. <sup>29</sup> Gate ba zua xezrine' xezre Betfagé, ne xezre Betania, ne zue' gáguze naga zua Xi'a Xaga Olivo, na' gusel-le' chupa benne' ca' dxusédené'.  
<sup>30</sup> Guzre' le':

—Le hjaca xézredu na' zua gáguze, na' ca zrinle na' lé'ele tu burru da'ba' xaga, be netú quebe nu ne cuía leba'. Le seze-ba', na' le che'-ba' nigá. <sup>31</sup> Che nu naba le'e bizr chee' na' dxesézrele-ba', le xe'e Xránadxu nachínene'-ba'.

<sup>32</sup> Na' gusiá'ca benne' ca', na' belelé'ene' xúgutę naca na ca ba guzre Jesús le'. <sup>33</sup> Na' gate dxesezre' búrrua', na' xránaba' buluchębe' le':

—¿Bizr chee na' dxesézrele búrrua'?

<sup>34</sup> Benne' chupa ca' belexechebe':

—Lawe' da nachine Xránadxu leba'.

<sup>35</sup> Na' beleché'e-ba' lau Jesús, na' belexrúe' xicha chee' cúzruba', na' buluzríe' Jesús cúzruba'. <sup>36</sup> Ca zeaj Jesús, xu'e neza zrie' búrruda na', na' dxelechiluj benne' ca' xicha chee' la neza naga tée'.  
<sup>37</sup> Gate bzrine' gagu naga naca létajla chee Xi'a Xaga Olivo, xúgutę benne' ca' zaj de'e Le' gulezú lawe' dxelebezre xe'e lu xel-la dxelebé, ne dxelúe lá'ane' Dios ca naca xúgutę xel-la waca chee' xabáa da belelé'ene'. <sup>38</sup> Gulenné':

—La'azxa naca wenna' bea, benne' za' waláz chee' Xránadxu Dios. Gaca xel-la dxebeza zri lazre' da za xabáa, ne gaca ba Dios.

<sup>39</sup> Nadxa bal-la benne' fariseo ca' zaj zra' ládujla benne' ca' gulé'e Jesús:

—Benne' Wesede, gudil-la benne' caní zaj de'e Lue'.

<sup>40</sup> Jesús bechebe':

—Dxapa' le'e, che benne' caní xelezúa zrie', xiaj caní xelebezre xa'a na.

<sup>41</sup> Gate bzrine' gagu xezre Jerusalén, ne ca blé'ene' na, na' gudxezre Jesús ca naca chee na. <sup>42</sup> Na' gunné':

—La chéajni' ile lu zra chee'le nigá da gaca gunna chee'le xel-la dxebeza zri lazre'. Na'a da na' nagache na, na' quebe gaca lé'ele na. <sup>43</sup> Welezrín zra gaca chee'le da zrin-naj, gate benne' dxelecuídene' le'e xelécha-je' ze'e dxu'a xezre chee'le, ne xuluzague' le'e gáteteze na', <sup>44</sup> na' xuluchínnaje' xezre chee'le. Na' xelútie' ca naca benne' zaj zre'e nigá, na' quebe xuluxucá'ane' tu xiaj cuzru ljwezre na. Caní gaca chee'le lawe' da quebe gúquebe'ele zra bla' Dios chee' gácalene' le'e.

*Jesús dxucá'ana chawe' chale'aj xudau'*

(Mt. 21.12-17; Mr. 11.15-19; Jn. 2.13-22)

<sup>45</sup> Nadxa guxú'u Jesús chale'aj xudau', na' guzú lawe' dxebéaje' na' benne' ca' dxelutie', ne dxelá'awe' na'. <sup>46</sup> Na' guzre' benne' ca':

—Lu xiche chee' Dios dxenné': "Lizra' naca na xu'u naga guchálajlele neda'," na' le'e nunle na ca tu lizre gubán ca'.

<sup>47</sup> Tu zra tu zra Jesús dxusédene' benne' ca' zaj zra' chale'aj xudau'. Benne' xíchaję ca' cheę bxruze, ne benne' dxuluxuzájle'ę da nadxixruj bea na, ne benne' xu'u lawe' cheę xęzre na' dxelłaję' ájala xelunę' xelútię' Lę'. <sup>48</sup> Quebe belezrelene' ájala xelunę', lawe' da dxuluzę naga xanne' xúgute benne' ca' Jesús, cheę xelenne' ca da dxenne'.

## 20

*Ca naca xel-la dxenná bea napa Jesús*

(Mt. 21.23-27; Mr. 11.27-33)

<sup>1</sup> Tu zra gate zua Jesús chale'aj xudau' dxusédene' benne' ca', ne dxuchálajlene' le' ca naca dizra' chawe' cheę Dios, na' belezrin na' benne' xíchaję ca' cheę bxruze ca', ne benne' ca' dxuluxuzájle'ę da nadxixruj bea na, ne benne' gula sina ca', <sup>2</sup> na' gulę'ę Lę':

—Gunná bi xel-la dxenná bea napu' dxunu' da caní. ¿Nuzra bęnna lue' xel-la dxenná bea nigá?

<sup>3</sup> Na' gunná Jesús:

—Cá'anqueze neda' gucheba' le'e tu. Le xechebe chia'. <sup>4</sup> ¿Nuzra gusel-la Juan guchúe' bęnneache nisa? ¿Dios che bęnneache?

<sup>5</sup> Na' gulezú lawe' dxelę ljwezre':

—¿Bizra nnadxu? Che nnadxu gusel-la Dios le', na' guchebe' dxi'u: "¿Bizr cheę na' quebe guxéajlele cheę?" <sup>6</sup> Che xędxu Lę', bęnneache gulesel-le' le', benne' zaj zre'ę nigá wuluzrę' dxi'u xiaj, lawe' da zaj neze xánnię' bchalaj Juan waláz cheę Dios.

<sup>7</sup> Nadxa belexechebe' quebe zaj nézene' nu gusel-la Juan bchuę' bęnneache nisa.

<sup>8</sup> Na' Jesús guzre' benne' ca':

—Cá'anqueze neda' quebe xapa' le'e bi xel-la dxenná bea napa' dxuna' da caní.

*Da dxulę'e na ca naca cheę benne' węn zrin calęla ca'*

(Mt. 21.33-44; Mr. 12.1-11)

<sup>9</sup> Na' guzú lau Jesús dxuchálajlene' benne' ca' zaj zre'ę na', dxuchálaję' da dxulę'e na, dxenne':

—Guzúa tu benne' bde'ę lba uva lu xęzr la xu cheę', na' ca gudę na' bca'anę' na lu na' benne' węn zrin ca', na' guzę'ę na' zane' iza. <sup>10</sup> Gate bzrin zra xuluchibe' uva ca', na' gusel-le' tu bi węn zrin cheę' zeajxenábabe' tu cue' cheę lina na' da dxal-la' xezi'e, san benne' węn zrin ca' buluzálaję'-be', na'

belexesel-le'-be' cá'aze. <sup>11</sup> Nadxa xrane lina na' gusel-le' xetú bi węn zrin cheę', na' cá'anqueze bi nigá bulucháchalęne'-be', ne buluzálaję'-be', na' belexesel-le'-be' cá'aze. <sup>12</sup> Xrane na' gusel-le' xetú bi węn zrin cheę', na' benne' węn zrin ca', cá'anqueze belunę'-be' zi', na' belexebéaję'-be' lu lina na'.

<sup>13</sup> Naga xeajche'tę na, xrane na' gunné': "¿ájazra guna? Sel-la' zri'ina' nazr'ite lazra'. Gate xeले'ęne'-be' nalja xelape'-be' ba lá'ana." <sup>14</sup> Na' gate benne' węn zrin ca' belele'ęne'-be', na' gulę' ljwezre': "Bi nigá xezi' lu na'be' da de cheę xránadxu. Gútedxu-be', cheę gácadxu xrane na dxi'úqueze." <sup>15</sup> Nadxa belexebéaję'-be' lu xęzr la xu na', na' belutię'-be'.

Nadxa Jesús bchebe' benne' ca':

—¿Bizra gun xrane na' cheę benne' węn zrin ca'? <sup>16</sup> Xelę'ę, na' gutię' benne' węn zrin ca', na' gudę'ę xęzr la xu na' lu na' benne' xula ca'.

Gate belén benne' ca' ca gunná Jesús, na' gulenne':

—Dios quebe gu'ę lataj gaca ca'.

<sup>17</sup> Na' Jesús gunné'ę benne' ca', na' gunné':

—¿Bizra zéaję da naxúaj na lu xiche cheę Dios? Dxenne' caní:

Xiaj na' da buluzúa benne' węn xu'u ca' chalá'ala, le' na' naca na xiaj blau.

<sup>18</sup> Núteteze benne' cheajchazię' lawe' xiaj na', na' chúzrujqueze bęnnea', na' che xiaj na' xeruj na lawe' nu benne', gútute na le'.

*Ca naca cheę da dxuchizruj xęzre zi'tu'*

(Mt. 21.45-46; 22.15-22; Mr. 12.13-17)

<sup>19</sup> Benne' xíchaję ca' cheę bxruze ca', ne benne' ca' dxuluxuzájle'ę da nadxixruj bea na gulaca lazre' xelele' Jesús zra ná'queze, lawe' da guleque bé'ęne' bchalaj Jesús da dxulę'e na ca zaj naca le', san belezrebe' da xelún bęnneache ca'. <sup>20</sup> Nadxa gulesel-le' benne' ca' xuluzuzre' Jesús, benne' xululę'e cuinę' ca benne' xrlátaje ca'. Benne' caní dxelaca lazre' xelebéaję' Jesús dizra' cheę xelezéquene' xuludęe' Lę' lu na' bęnnea' dxenná be'ę. <sup>21</sup> Cheę xelunę' da nigá, buluchębe' Lę':

—Benne' Wesęde, nézentu' dxennáu', ne dxusédenu' da naca li lazre', ne quebe dxuchi'u cheę bęnneache cáteze dxululę'e cuinę', san lu da li dxusédenu' da naca

chee Dios. <sup>22</sup> Guzre netu', ¿naca na chawe' quíuzrujdxu da dxuchizruj César, bènnea' dxenná bé'ene' duté xezr la xu, che cabí?

<sup>23</sup> Dxeque be'e Jesús ca naca da dxelaca lazre' xelune' chee', na' guzre' benne' ca':

—¿Bizr chee' na' dxaca lázrele gun xálele neda'? <sup>24</sup> Le gulé'e neda' tu dumí. ¿Nuzra lu'a na' da na nigá, ne nu la naxúaj nigá?

Benne' ca' belexechebe':

—Chee' benne' dxenná bea na'.

<sup>25</sup> Nadxa gunná Jesús:

—Le gunezruj bènnea' da naca chee', na' le gunezruj Dios da naca chee' Dios.

<sup>26</sup> Quebe gulezéquene' xelún xálene' Jesús ca naca da bechebe' lau benne' ca'. Belexebánene' ca naca da bechebe', na' gulezúa zrie'.

*Ca gaca gate xelexebán benne' gate*  
(Mt. 22.23-33; Mr. 12.18-27)

<sup>27</sup> Ca gudé na' bal-la benne' xudau' saduceo ca' belezrine' lau Jesús. Benne' saduceo ca' dxeléquene' quebe xelexebán benne' gate, na' gulé'e Jesús:

<sup>28</sup> —Benne' Weséde, Moisés bzúaje' cheentu' che tu benne' gatíe', ne gucá'ane' zru'ule', ne che quebe nu chilá' zrí'ine', na' bi biche bènnea' dxal-la' guchaga na'abe' nen nu'ula na' gute benne' chee' chee' galaj tu bidau' gácabe' ca zri'ine bènnea' ba gútee'. <sup>29</sup> Gulezrá' gazre benne' gulaque' zri'ine tuze xre'. Bi nedxu bchaga na'abe' nen tu nu'ula, na' gútebe', quebe nu chilá' bi cheebe'. <sup>30</sup> Bi gudxupe' bchaga na'abe' nen nu'ula na', ne cá'anqueze gútebe' quebe nu chilá' bi cheebe'. <sup>31</sup> Nadxa bi guxunne' bchaga na'abe' nen nu'ula na', na' cá'anqueze belún bi ca' xezica, na' bi gazre ca' gulátebe' quebe nu chilá' bi cheebe'. <sup>32</sup> Naga xeajche'te na, na' gute nu'ula na'. <sup>33</sup> Gate xelexebán benne' gate, ¿nula bi ca' gaca zrí'ulabe' nu'ula na', lawe' da ca naca bi gazre ca' buluchaga na'abe' nen nu'ula na'?

<sup>34</sup> Nadxa bechebe Jesús:

—Lu xezr la xu nigá dxuluchaga na' benne' biu ca' nen nu'ula ca'. <sup>35</sup> Na' benne' ca' naca chee' xelexexú'e xezr la xu da za za', ne chee' xelexebane' ládujla benne' gate, québedxa xuluchaga ne'e, ne québedxa xulunézruje' zrí'ine' lu xel-la wechaga na'. <sup>36</sup> Ca'an gaca lawe' da quebe nu gátédxa na'. Xelaque' ca zaj naca gubáz chee' xabáa ca', ne xelaque' bi chee' Dios

lawe' da belexebane'. <sup>37</sup> Moisésqueze, gate bzuaje' ca guca chee' bisigá da guzúa na' xi', dxulé'ene' dxi'u dxal-la' xelexebán benne' gate. Naga naxúaj da nigá dxenná na ca naca chee' Dios, naque' Dios chee' Abraham, ne Dios chee' Isaac, ne Dios chee' Jacob. <sup>38</sup> Dios quebe naque' Dios chee' benne' gate ca'. Naque' Dios chee' benne' ban ca', lawe' da lau Le' zaj naca ban xúgute bènneache. <sup>39</sup> Nadxa bal-la benne' ca', benne' dxuluxuzájle'e da nadxixruj bea na gulé'e Jesús: —Cháwedau' dxennáu', Benne' Weséde. <sup>40</sup> Québedxa belexázrje' bi xuluchebe' Jesús.

*¿Nu benne' naca Cristo zrí'ine'?*

(Mt. 22.41-46; Mr. 12.35-37)

<sup>41</sup> Jesús guzre' le':

—¿Bizr chee' na' dxennale le'e naca Cristo zri'ine David? <sup>42</sup> Davidqueze gunné' lu xiche naga zaj naxúaj salmo ca':

Xránadxu Dios guzre' Xrana':

“Gudxé'e cuita' xabela chia',

<sup>43</sup> Cadxa guzúa' benne' dxelecuídene' lue' ca' zran ni'u.”

<sup>44</sup> ¿ájazra chee' na' naca Cristo zri'ine David, na' Davidqueze dxé'e Le': “Xran”?

*Jesús dxenné' chee' benne' ca' dxuluxuzájle'e da nadxixruj bea na*

(Mt. 23.1-36; Mr. 12.38-40; Lc. 11.37-54)

<sup>45</sup> Ca naca benne' ca' zaj zra' na' dxuluzé nague' chee' Jesús gate guzre' benne' ca' dxusédene':

<sup>46</sup> —Le guxúe xanne' cuínale chee' benne' ca' dxuluxuzájle'e da nadxixruj bea na, lawe' da dxeledánene' dxeledé' zaj nacue' zre' tunna, ne dxelaca lazre' xelapa bènneache le' ba lá'ana lawe' xi'a ca', ne dxelebé'e lu lataj blau ca' lu xu'u naga dxezrágale, ne lataj blau ca' naga dxelawe' zrué. <sup>47</sup> Benne' caní dxelequé'e ca naca lizre nu'ula ca' ba gulate benne' chee', na' chee' xulucá'ana cuine' xrlátaje lau bènneache ca' dxululawízraje' Dios da tunna lu xu'u ca' naga dxezrágale. Benne' caní xelezaca zídxaqueze'.

## 21

*Dumí da bnezruj tu nu'ula xache' ba gute benne' chee'*

(Mr. 12.41-44)

<sup>1</sup> Gate zua Jesús chale'aj xudau', blé'ene' benne' gunní'a ca' dxelegú'e dumí lu xí'ina chee' xudau'. <sup>2</sup> Na' blé'ene' tu nu'ula naque'

benne' xache', ne ba gute benne' chee', gulu'e chupa dumí'dau'. <sup>3</sup>Na' gunná Jesús:

—Da li dxapa' le'e, nu'ula xache' nigá gulu'udxe' da zrendxa ca benne' gunní'a caní, <sup>4</sup>lawe' da dxelegú'u benne' ca' chee da dxutínneze na, san nu'ula nigá, lu xel-la baxache' chee' bnézuje' ca naca da nape' da nunte gawe'.

*Jesús dxuchálaje' ca gaca gate cuía xi' xudau'*

(Mt. 24.1-2; Mr. 13.1-2)

<sup>5</sup>Bal-la benne' dxuluchálaje' ca naca chee xudau' na', ne chee xiaj xrtante da zaj zrále'e na ze'e xudau' na', ne chee da xrtan da bulunezruj benne' chee xudau' na'. Nadxa gunná Jesús, dx'e'e le':

<sup>6</sup>—Wazrín zra gate xelebía xi' xúgute da caní dxelé'ele, ne quebe xegá'ana netú xiaj cuzru ljwezre na.

*Da xulul'é na gate cheajsé chee xezr la xu nigá*

(Mt. 24.3-28; Mr. 13.3-23)

<sup>7</sup>Nadxa benne' ca' buluchebe' Jesús:

—Benne' Wesede, ¿bata gaca da na'? ¿Bi gul'é na gate ba za xelaca da caní?

<sup>8</sup>Jesús gunné':

—Le guxúe xanne' cuínale, ne quebe güele lataj nu si xe le'e, lawe' da xelelá' benne' zante benne' xulusí' cuine' La' neda', xelenné' zaj naque' Cristo, ne xelenné' ba bzrin zra. Quebe chéajlele benne' ca'. <sup>9</sup>Gate xénele dxaca wedil-la, ne xeledábague' bénneache xu'u lawe', quebe zr'ébele, lawe' da dxal-la' gaca da caní nedxu, san quebe ne zrin zra cheajsé chee xezr la xu nigá.

<sup>10</sup>Nadxa guzre' benne' ca':

—Bénneache tu xezr la xu xeledíl-lale bénneache xetú xezr la xu, na' benne' tu xezre xeledíl-lale benne' xetú xezre. <sup>11</sup>Wazrú'le'equeze, ne gácale'e gubina', ne gáta'le'e xízrawe' du ca nácaqueze, na' zran xabáa lé'ele da guchébequeze na le'e, ne xel-la waca zri'a ca'.

<sup>12</sup>Nédxudxa gate quebe ne gaca da caní xelélaqueze' le'e, ne xeláu zi' xúzrequeze' le'e. Xeleché'e le'e lu xu'u ca' ga dx-elezrague' chee xelechugue' ca xelune' chee, na' xelegú'e le'e lizre xia, ne xeleché'e le'e lau benne' wenná bea ca', ne lau benne' xu'u lawe' ca' lawe' da nácale neda' tuze. <sup>13</sup>Gate gaca da caní gata' lataj guchálajlele benne' ca' ca naca chia'

neda'. <sup>14</sup>Le guzúa chacha lázrdaule, quebe gucuézale nédxula da dxal-la' nnele, <sup>15</sup>lawe' da gunna' neda' le'e dizra', ne xel-la sina da quebe xelezeque benne' dxeledábague' le'e bi xelenné' chee na. <sup>16</sup>Wuludéqueze bénneache le'e lu na' benne' dxeledábague' le'e. Caní xelúnqueze xra xrnale, ne bi bíchele, ne xrtia ljwézrele, ne bi ljwézrele ca'. Welútequeze' bál-lale le'e, <sup>17</sup>na' xúgute bénneache welecuídene' le'e lawe' da nácale neda' tuze, <sup>18</sup>san quebe nite tu xicha xíchajle lau Dios. <sup>19</sup>Che sua cháchale, na' gápale xel-la nabán.

<sup>20</sup>Gate lé'ele zaj naxechaj benne' dx-jaque' wedil-la xezre Jerusalén, na' nézele ba za cuía xi' xezre nigá. <sup>21</sup>Lu zra na', benne' zaj zre'e xezre ca' zaj nababa Judea dxal-la' xuluzrúnnuje' chjaque' lu xi'a ca', na' benne' zaj zre'e xezre Jerusalén dxal-la' xeledxúaje' na', na' benne' zaj zre'e le'e xixre' quebe dxal-la' xelexezrine' xezre na'. <sup>22</sup>Lu zra ca' Dios gudé'e benne' ca' lu da zi' da xa', na' gaca li ca naca da naxúaj na lu xiche chee Dios ca dxal-la' gaca chee benne' ca'. <sup>23</sup>Edxugúa nu'ula zaj zue' zi'i lu zra ca', ne nu'ula ca' zaj nuxre' bidu dxelázrebe', lawe' da gáta'le'e da xelezaca bénneache ca', na' gaca tu da ba xa' zrente chee benne' ca'. <sup>24</sup>Bal-le' xelatíe' lu wedil-la na', na' xebal-le' xeleché'e le' zaj nadxéaje' tu tu xezr la xu ca', na' benne' zitu' ca' xululéaje' xezre Jerusalén cadxa cheajsé chee zra xelenná bea benne' zitu' ca'.

*Ca gaca gate xelá' Benne' Gulje' Bénneache*  
(Mt. 24.29-35, 42-44; Mr. 13.24-37)

<sup>25</sup>Na' gunná Jesús:

—Lu zra na' xelata' da xulul'é na lau gubizra, ne lau beu', ne lau belaj ca', na' lu xezr la xu xelezúa stébe benne' ca', ne xelezrebe' ca naca schaga' da gun nísadau', ne xeajxruza chee na. <sup>26</sup>Benne' ca' xelate ni'a ne'e ne chee xel-la dxelezrebe gate xulusá lazre' ca da dxal-la' gaca lu xezr la xu, ne ca naca da zaj zra' zran xabáa, da zaj napa xel-la waca xelezrízequeze na. <sup>27</sup>Lu zra na' xelelé'equezne' neda', Benne' Gulje' Bénneache, xelá'a tu lu beuj, nen duté xel-la waca zren, ne da xabáa chia'. <sup>28</sup>Gate su lau gaca da caní, le gun dipa lázrele, ne le chisa xíchajle, lawe' da ba za zrin zra lale lu da dxaca cheele.

<sup>29</sup>Nadxa bchalaj Jesús tu da dxul'é na, gunné':

—Le nna'xque xaga higo, u bíteteze xaga. <sup>30</sup> Gate lé'ele ba dxezría na laga' dxe'ene, nézquezle le'e ba za xaca beu' la. <sup>31</sup> Cá'anqueze, gate lé'ele gaca da caní, dxal-la' nézele ba zua gagu zra nna bea Dios.

<sup>32</sup> Da li dxapa' le'e, xúgute da caní xelaca na nédxudxa gate quebe ne xelate bèneache zaj zra' lu zra na'a zra. <sup>33</sup> Xabáa, ne xezr la xu weledé chee na, san dizra' chia' quebe te chee na.

<sup>34</sup> Le guxúe xanne' cuínale, quebe güele lataj xelú'u lu xichaj lázrdaule da calela ca' ca naca xel-la dxagu xrata, ne xel-la dxezuzre, ne xel-la dxezá lazre' da naca chee xezr la xu nigá, chee quebe gácale ca tu benne' nachúl-lene' lu xichaj lázrdawe' gate zrin zra na', <sup>35</sup> ne chee quebe gaca na ca tu da quea na le'e, lawe' da caní gaca chee xúgute benne' zaj zre'e lu xezr la xu nigá. <sup>36</sup> Le sua le'e ban lazre', ne le naba lau Dios chee gaca lale lu da dxal-la' gaca lu xezr la xu nigá, ne chee gaca gulé'e cuínale du lázrele lawa' neda', Benne' Gulje' Bénneache.

<sup>37</sup> Jesús bsédene' benne' ca' lu xudau' te zra, na' chizrela dxexíaje' lu Xi'a Xaga Olivo. <sup>38</sup> Xúgute benne' ca' belezrine' lu xudau' na' xugu' zila chee xelenne' chee Jesús.

## 22

*Dxelune' tuze dizra' xelgle' Jesús*  
(Mt. 26.1-5, 14-16; Mr. 14.1-2, 10-11; Jn. 11.45-53)

<sup>1</sup> Ba zua gagu laní gate dxelawe' xeta xtila da quebe nachixre cua zichaj chee xeta xtila, da naca na Laní Pascua gate dxulusá lazre' ca da ben Dios gate bebéaje' bèneache chee' lu xezr la xu Egipto. <sup>2</sup> Lu zra ca' benne' xíchaje ca' chee bxruze ca', ne benne' ca' dxuluxuzájle'e da nadxixruj bea na belíaje' ájala xelune' xelútie' Jesús bagácheze, lawe' da dxelezrebe' da xelún benne' zan ca'.

<sup>3</sup> Nadxa guxú'u Satanás da xriwe' lu lázrdau Judas, bènea' cá'anqueze le' Iscariote. Naque' tu benne' chazrinnu gubáz ca' chee Jesús. <sup>4</sup> Judas nigá guxíaje' xejchála-jlene' benne' xíchaje ca' chee bxruze ca', ne benne' blau ca' chee xudau', na' bchála-jlene' benne' ca' ájala guné' gudée' Jesús lu na' benne' ca'. <sup>5</sup> Benne' caní gulebene', na' gulechebe lazre' xulunézruje' le' dumí.

<sup>6</sup> Judas na' guzi' lu ne'e dumí na', na' guzú lawe' dxílaje' ájala guné' gudée' Jesús lu na' benne' ca' gate quebe nu chilá' benne'.

*Da dxágudxu chee cheajsá lazrdxu ca gute Xránadxu*

(Mt. 26.17-29; Mr. 14.12-25; Jn. 13.21-30; 1 Co. 11.23-26)

<sup>7</sup> Bzrin zra laní gate dxelawe' xeta xtila da quebe nachixre cua zichaj chee xeta xtila, gate dxal-la' xelútie' zríla'dau' ca' chee Laní Pascua. <sup>8</sup> Na' Jesús gusel-le' Pedro ne Juan, na' guzre'-be':

—Le hjaca, ne le gucuéza da gágudxu chee Laní Pascua.

<sup>9</sup> Benne' caní buluchebe' Le':

—¿Ga dxaca lazru' gucuézentu' na?

<sup>10</sup> Na' bechebe Jesusen':

—Gate chu'ule lu xezre, na' xezrágale tu benne' biu zenu'e tu dxe'e nisa. Le chjácálene' xu'u naga xezrine', <sup>11</sup> na' le xe xrane xu'u na': "Benne' Weséde dxe'e lue': ¿Ga zua xu'u naga gágulena' benne' ca' dxuséde' zríla'dau' chee Laní Pascua?" <sup>12</sup> Nadxa gulé'ene' le'e tu xu'u zren da zua chupa cuia sibe, da bache nucá'ana chawe'. Le gucuéza da gágudxu na'.

<sup>13</sup> Benne' ca' xjaque', na' belezrélene' xúgute ca da ba guzre Jesús le', na' bulucueze' da xelawe' chee Laní Pascua.

<sup>14</sup> Gate bzrin zra, Jesús ne benne' ca' dxusédene' gulezré'e ga xelawe' na.

<sup>15</sup> Nadxa gunná Jesús, dxe'e benne' ca':

—Guzá lázrele'a gágulena' le'e chee Laní Pascua nigá nédxudxa ca quebe ne gatiá'.

<sup>16</sup> Dxapa' le'e québedxa gawa' da nigá cadxa gaca li na naga dxenná bea Dios.

<sup>17</sup> Nadxa guqu'é'e tu zruágadau', na' guzre' Dios: "Xcalenu'", na' gunné':

—Le xi'aj late' weaj tu tule le'e. <sup>18</sup> Dxapa' le'e québedxa xi'aja' chee nisa uva caní cadxa xida xel-la dxenná bea chee Dios.

<sup>19</sup> Nadxa guqu'é'e xeta xtila, ne guzre' Dios: "Xcalenu'", na' bzúzruje' na, ne bnézruje' na benne' ca', dxenné':

—Da nigá naca na bel-la' dxen chia', da guzúa' waláz cheele. Le gun da nigá chee cheajsá lázrele chia' neda'.

<sup>20</sup> Cá'anqueze bene' nen zruágadau' na' ca gudé gulawe' xrche', na' gunné':

—Zruágadau' nigá zéaje na xel-la wezría cube, da guzúa' chúchua' nen dxen chia', da gulálaja' waláz cheele.

<sup>21</sup> 'Na'a, zrua na' benne' biu na' tu zren nen na'a ga zua da dxágadxu, bénnea' gudéé' neda' lu na' benne' dxeledábague' neda'. <sup>22</sup> Neda', Benne' Gulje' Bénneache, waxá'a lu neza da ble'e Dios neda' naga gatia', san edxugúa bénnea' gudéé' neda' chee' gatia'.

<sup>23</sup> Nadxa benne' ca' dxuséde Jesús gulezú lawé' dxuluchebe ljwezre' nu na' gudé Jesús.

*Dxuluchebe ljwezre' nule' gácadxe' blau*

<sup>24</sup> Cá'anqueze buluchebe ljwezre' nule' gácadxe' benne' blau. <sup>25</sup> Na' Jesús guzre' le':

—Benne' wenna' bea chee' xezr la xu ca' dxeleñná bé'ene' bénneache ca' xrane bénneache ca', na' benne' xíchajé chee' benne' ca' dxeleñné' zaj naque' benne' dxeluné' da chawe' chee' benneáche ca'. <sup>26</sup> Le'e quebe dxal-la' gunle ca'. Benne' nácadxe' blau ládujla le'e dxal-la' gaque' ca' benne' nácadxe' cuide', na' benne' dxenná be'e dxal-la' gaque' ca' benne' nada'u chee' ljwezre' ca'. <sup>27</sup> ¿Nu nácadxa blau, benne' dxe'e dxawe', che benne' dxudéé' xel-la wagu? ¿Quebe naca bénnea' dxe'e dxawe'? Neda' zúalena' le'e ca' tu benne' dxuné' zrin cheele.

<sup>28</sup> 'Le'e guzúalequezele neda' gate neda' guzú guzaca'. <sup>29</sup> Chee' le' na' dxunna' le'e lataj nna beale, ca' ben Xra', benne' na neda', <sup>30</sup> chee' xi'aj gágule ga naca chia' naga nna be'a neda', na' cue'le lataj blau ca' chee' guchí'ale chee' chazrinnu cue' xrtia Israel.

*Jesús dxenné' Pedro nne' quebe núnbe'e Le' (Mt. 26.31-35; Mr. 14.27-31; Jn. 13.36-38)*

<sup>31</sup> Na' gunnáqueze Xránadxu:

—Simón, Simón, Satanás, da xriwe' ba gunaba na le'e chee' seque gudé na le'e lu dul-la ca' dxun tu benne' dxudxixre dxutul-le' xizre za. <sup>32</sup> Neda' guta' xueda' Xra' gácalene' lue' chee' quebe guníteu' xel-la dxajlí lazre' chiu'. Na' lue', gate bache bexacu' dipa lazre', gúcale le sa' ljwezru' ca' chee' xelezé' chache'.

<sup>33</sup> Na' gunná Simón, guzre' Jesús:

—Xran, ba zúaqueza' sá'lena' Lue' lizre xia, ne chee' gátequeza' nen Lue'.

<sup>34</sup> Jesús guzre' le':

—Pedro, dxapa' lue', ná'atela ne dédx-ela cuezre xjeaj, lue' wannáu' chunna lasa quebe núnbe'u neda'.

*Ba zua gagu zra si saca Jesús*

<sup>35</sup> Nadxa Jesús bchébe' benne' ca':

—Gate gusel-la' le'e quebe bíale xixruj, ne naga cu'ule dumí, ne zrélale, ¿bxáxrjele bi da guchínnele?

Benne' ca' belexechebe':

—Gutu bi de.

<sup>36</sup> Nadxa guzre' benne' ca':

—Na'a, benne' nape' xixruj dxal-la' gu'e na, ne naga dxugu'e dumí. Bénnea' quebe nape' xia da dxuluchínene' lu wedil-la, dxal-la' xexutie' xicha chee', na' si'e xia chee'. <sup>37</sup> Dxapa' le'e dxal-la' gaca chia' néda'queza' ca' da naxúaj na lu xiche chee' Dios, dxenné': "Gubabe' ca' tu benne' wen da zrinnaj." Xúgute' da naxúaj na chia' dxal-la' gaca li na.

<sup>38</sup> Nadxa benne' ca' gulenné':

—Xran, nigá de' chupa xia.

Le' bechebe':

—Da naze.

*Jesús dxuchálajlene' Dios naga nazí le na Getsemani*

*(Mt. 26.36-46; Mr. 14.32-42)*

<sup>39</sup> Nadxa bedxúaj Jesús xu'u na', na' ca' dxúnqueze', guxíajé' lu Xi'a Xaga Olivo, na' benne' ca' dxusédené' xjácálené' Le'. <sup>40</sup> Gate belezrine' na', Jesús guzre' le':

—Le naba lau Dios chee' quebe seque da xriwe' cu'u na le'e lu dul-la.

<sup>41</sup> Nadxa Jesús guzré' ca' tu legu'una xiaj naga zaj zra' benne' ca', na' bzu zribe' bchálajlene' Dios. <sup>42</sup> Gunne':

—Xrae, che dxaca lazru', bcuasa neda' ca' naca da dxal-la' saca', da naca na ca tu da sla' da dxal-la' xi'aja', quegá gaca na ca dxaca lazra' neda', san ca dxaca lazru' Lue'.

<sup>43</sup> Nadxa ble'e lau naga zua Jesús tu gubáz chee' xabáa, na' bti'pe' lazre' Jesús. <sup>44</sup> Gate ne dxezácale'e, du lazre' bchálajlene' Dios, na' xesa chee' guca na ca dxen dxelezerún na lu xu.

<sup>45</sup> Ca' bexuzre bchálajlene' Dios, na' bexase', na' bezrine' naga zaj zra' benne' ca' dxusédené', na' blé'ene' dxelase benne' ca', lu xel-la dxelexewi'ine lazre' chee'. <sup>46</sup> Nadxa guzre' benne' ca':

—¿Dxáselale le'e na'a? Le chasa, ne le naba lau Dios chee' quebe seque da xriwe' cu'u na le'e lu dul-la.

*Dxelele' Jesús*

*(Mt. 26.47-56; Mr. 14.43-50; Jn. 18.2-11)*

<sup>47</sup> Ne dxuchálajte Jesús gate belelá' benne' zan ca'. Bénnea' le' Judas, tu benne' chazrinnu ca', ze'e zria lawé' lau benne' ca',



na' gubiguē' cuita Jesús chee gunupe' Le'.  
<sup>48</sup>Nadxa Jesús guzre' le':

—Judas, ¿dxunupu' neda', Benne' Gulje' Bénneache, chee gudéu' neda' lu na' benne' dxeledábage' neda'?

<sup>49</sup>Benne' ca' zrálene' Jesús, ca belelé'ene' ca da dxaca, na' buluchebe' Jesús:

—Xran, ¿guchíntentu' xia?

<sup>50</sup>Tu benne' ca' dxdále Jesús bene' zi' tu bi wen zrin chee bxruze blau, guchugue' nágabe' zua xabela. <sup>51</sup>Jesús gunné':

—Québedxa gunle ca'. Cá'anze.

Nadxa Jesús bte' naga bi wen zrin na', na' bexune' na.

<sup>52</sup>Na' guzre' benne' xíchaje ca' chee bxruze, ne benne' blau ca' chee xudau', ne benne' gula sina ca', benne' zá'aque' xeleché'e Jesús, gunné':

—¿Blale le'e nen xia, ne xaga chee quélale neda' ca dxélale tu gubán? <sup>53</sup>Gate guzúa' neda' lu xudau' nen le'e tu zra tu zra, quebe bi benle le'e chia', san zra nigá naca na zra chee, gate dxenná bea da zua na lataj chul-la.

*Pedro dxenné' quebe núnbe'e Jesús*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup>Nadxa gulele' Jesús, na' guleché'e Le' lizre bxruze blau, na' Pedro záje' nawe' Le' zítu'la. <sup>55</sup>Na' gulebé'e guléchaje' xi' na', na' Pedro gudxé'e ládujla benne' ca'.

<sup>56</sup>Nadxa tu nu'ula wen zrin, gate blé'ene' Pedro dxe'e dxu'a xi' na', guzúe' dxenné'e le', na' gunné':

—Cá'anqueze benne' nigá guque' tuze len Jesús.

<sup>57</sup>Pedro gunné':

—Nu'ula, quebe núnbe'a bénnea'.

<sup>58</sup>Xetú chí'idau' guca, na' ble'e xetú benne' xula Pedro na', na' gunné':

—Cá'anqueze lue' nacu' tu zren benne' ca'.

Pedro gunné':

—Cabí. Quebe naca ca'.

<sup>59</sup>Xelate gudé na', xetú benne' ben chúchuē' xrtizre', gunné':

—Da li, benne' nigá guque' tuze len Jesús, lawe' da naque' benne' Galilea.

<sup>60</sup>Nadxa gunná Pedro:

—Benne', quebe nezda' nu chee na' dxuchálaju'.

Dxácate na' ne dxuchálajte Pedro ca', na' gudxezre xjeaj. <sup>61</sup>Nadxa Xránadxu

bzechaj xíchaje', gunné'e Pedro, na' Pedro xeajsá lazre' ca da guzre Xránadxu le', gunné': "Ná'atela ne dédxela cuezre xjeaj, lue' wannáu' chunna lasa quebe núnbe'u neda'." <sup>62</sup>Nadxa bedxúaj Pedro, na' gudxezre xáche'le'e.

*Dxelún le' chee Jesús*

(Mt. 26.67-68; Mr. 14.65)

<sup>63</sup>Na' benne' ca' zaj nuxre' Jesús belún le' chee', na' buluzalje' Le'. <sup>64</sup>Bulucache' lawe', na' belegape' xrague', dxelé'e Le':

—Gunné xa'a nu be Lue'.

<sup>65</sup>Da zan da gulenné', dxeleenné' schanni' chee Jesús.

*Jesús dxezrine' lau benne' ca' chee xu'u lawe' blau chee judío ca'*

(Mt. 26.59-66; Mr. 14.55-64; Jn. 18.19-24)

<sup>66</sup>Gate naca te zra, na' belezraga benne' gula sina ca' chee judío ca', ne benne' xíchaje ca' chee bxruze ca', ne benne' ca' dxuluxuzájle'e da nadxixruj bea na, na' guleché'e Jesús lau benne' ca' chee xu'u lawe' blau chee judío ca'. Na' buluchebe' Le':

<sup>67</sup>—Gunná, ¿nacu' lue' Cristo?

Na' bechebe Jesús:

—Che xapa' le'e: Awe', quebe chéajlele, <sup>68</sup>na' che bi guchéba' le'e, quebe xechébele chia', ne quebe gusanle neda'. <sup>69</sup>Ná'atela neda', Benne' Gulje' Bénneache, cue'a chalá'a xabéla chee Dios nape' dute xel-la waca.

<sup>70</sup>Nadxa xúgute' buluchebe' Le':

—¿Nacu' Lue' Zri'ine Dios?

Jesús bechebe':

—Naca', ca dxennáquezle le'e.

<sup>71</sup>Nadxa gulenná benne' ca':

—¿Núzradxa chínnedxu bi nne' chee benne' nigá? Dxí'unqueze ba bédedxu ca da gunnáqueze'.

## 23

*Jesús dxezrine' lau Pilato*

(Mt. 27.1-2, 11-14; Mr. 15.1-5; Jn. 18.28-38)

<sup>1</sup>Nadxa gulasa xúgute' benne' dxuluchi'e, na' guleché'e Jesús lau Pilato, benne' dxenná be'e waláz chee Roma. <sup>2</sup>Na' gulezú lawe' dxelagu zrie' Jesús, dxeleenné':

—Ble'entu' benne' nigá dxegú'u xel-le' bénneache chee xeledábage' xu'u lawe'. Dxeenné' quebe dxal-la' quízrujntu' da dxuchizruj César, benne' Roma, na'

ca'anqueze dxenné' naque' Cristo, Benne' Wenná Beá.

<sup>3</sup>Nadxa Pilato bchebe' Jesús:

—¿Nacu' Lue' Wenná Beá chee' judío ca'?

Na' bechebe Jesús:

—Ca' naca na, ca ba gunnáu' lue'.

<sup>4</sup>Nadxa gunná Pilato, guzre' benne' xíchajé ca' chee' bxruze ca', ne bénneache ca':

—Quebe bi da zrinna'j dxezrelda' nun benne' nigá.

<sup>5</sup>Benne' ca' belún chúchue' dizra' chee', gulenné':

—Dxegu'u xel-le' xúgute' benne' zaj zre'e xezre ca' zaj nababa Judea chee' xeledábage' xu'u lawe'. Guzú lawe' dxune' na naga nababa Galilea, na' na'a dxune' na nigá.

*Jesús dxezring' lau Herodes*

<sup>6</sup>Gate ben Pilato da nigá, na' bchebe' che naca Jesús benne' Galilea. <sup>7</sup>Gate gulé'e le' naca Jesús benne' Galilea, na' Pilato gusél-le' Le' lau Herodes, benne' dxenná be'e xezre ca' zaj nababa Galilea, na' lu zra na' zue' Jerusalén. <sup>8</sup>Gate ble'e Herodes Jesús, gubéle'ene', lawe' da bátate dxaca lazre' lé'ene' Le', lawe' da ba benne' dxuluchalaj bénneache chee' Jesús, na' guca lazre' lé'ene' gun Jesús tu xel-la waca da za xabáa. <sup>9</sup>Da zante da bchebe' Jesús, na' Le' quebe bi bechebe'. <sup>10</sup>Zráqueze benne' xíchajé ca' chee' bxruze ca' na', nen benne' ca' dxuluxuzájle' da nadxixruj bea na, na' belún chúchue' dizra' chee' da dxelagu zria Jesús. <sup>11</sup>Nadxa Herodes, ne benne' chee' ca' dxjaque' wedil-la buluzúe' Le' chalá'ala, na' chee' xelún le' chee', bulugácu'e Le' ladxe' bzawe ca naca zra tu benne' wenná bea. Nadxa Herodes besel-le' Le' lau Pilato. <sup>12</sup>Lu zra na' Pilato, ne Herodes belexaque' tuze, lawe' da belezrá'a ljwezre' nédxute'.

*Dxelechuqe' chee' Jesús gatie'*

(Mt. 27.15-26; Mr. 15.6-15; Jn. 18.39—19.16)

<sup>13</sup>Nadxa Pilato bchague' benne' xíchajé ca' chee' bxruze ca', ne benne' xu'u lawe' ca', <sup>14</sup>na' guzre' benne' ca':

—Le'e guchele benne' nigá za'le naga zua', dxennale dxegú'u xel-le' bénneache chee' xeledábage' xu'u lawe'. Neda' ba bcheba' Le' laule le'e, na' quebe bi da zrinna'j dxezrelda' nune' ca naca da dxennale chee'. <sup>15</sup>Cá'anqueze Herodes quebe bi da zrinna'j bzreléne' da nun Jesús, na' budé'e

Le' launtu'. Quebe bi ne gune' chee' chuga' chee' gatie'. <sup>16</sup>Gudéa' Le' xel-la zi', na' gusanqueza' Le'.

<sup>17</sup>Dxácate dxaca laní na', Pilato dxal-la' gune' tu da dxelezaca ba lazre' bénneache, gusané' tu benne' xu'e lizre xia. <sup>18</sup>Xúgute' benne' ca' gulezú lawe' dxelebezre xe'e, dxelenné':

—¿Gate benne' nigá! ¡Bsan Barrabás na'!

<sup>19</sup>Barrabás nigá gulegú'e le' lizre xia lawe' da gudábage' xu'u lawe', na' betie' tu benne'. <sup>20</sup>Pilato guca lazre' gusané' Jesús, na' bchalajene' benne' ca' xetú. <sup>21</sup>Na' benne' ca' gulebezre xe'e zizrajdxá, dxelenné':

—¡Bde'e xaga béguaj! ¡Bde'e xaga béguaj!

<sup>22</sup>Da guxunne' lasa gunná Pilato:

—¿Bizra da zrinna'j nune'? Quebe bi dxezrelda' da gudé na Le' gatie'. Gudéa' Le' xel-la zi', na' te na' gusana' Le'.

<sup>23</sup>Na' benne' ca' belún chúchue' dizra' chee' chee' te'e xaga béguaj, ne gulebezre xá'atie', nen benne' xíchajé ca' chee' bxruze ca', cadxa guca ca da gulaca lazre'. <sup>24</sup>Nadxa Pilato guchugue' chee' Jesús gaca chee' ca da dxelaca lazre' benne' ca'. <sup>25</sup>Na' bsane' bénea' belenabe', xu'e lizre xia lawe' da gudábage' xu'u lawe', ne betie' tu benne', na' bde'e Jesús chee' gaca chee' ca dxelaca lazre' benne' ca'.

*Dxuludé'e Jesús xaga béguaj*

(Mt. 27.32-44; Mr. 15.21-32; Jn. 19.17-27)

<sup>26</sup>Gate zjaque' zaj naché'e Jesús chee' xuludé'e Le' xaga béguaj, na' gulele' tu benne' Cirene, le' Simón, zezé'e le'e xixre', na' bulugu'e le' xaga béguaj chee' Jesús, na' zéaje' cuzru Jesús na'.

<sup>27</sup>Na' xjácalé Le' benne' zante, ne nu'ula zan dxelebezre', na' dxelebezre xache' ne chee' da dxaca chee' Jesús. <sup>28</sup>Nadxa Jesús gunné'e nu'ula ca', na' guzre' le':

—Le'e, nu'ula Jerusalén, quebe cuézrele chia' neda'. Le cuezre cheéqueze, ne chee' zrí'inele, <sup>29</sup>lawe' da zrin zra gate xelenné': “Ba neza zren naca na chee' nu'ula wizre, ne nu'ula ca' cabata' gulezúe' zi'i, ne nu'ula ca' cabata' bulugazre' bidau'.” <sup>30</sup>Lu zra na' xelezú lau bénneache xelé'e xi'a ca': “Le gugacu netu' xu.” Na' xelé'e xí'adu ca': “Le gucache netu'.” <sup>31</sup>Che dxeluné' da caní chia' neda', naca' ca tu xaga ban, ¡gágradxa xeluné' chee'le le'e, nácale ca xaga bizre ca'?

<sup>32</sup> Cá'anqueze guleché'e chupa benne' wen da zrinnaj chee xelútie' le' tu zren nen Jesús. <sup>33</sup> Gate belezrine' lataj na' nazi le na, Calavera, da zéaje na, Xi'a Zrita Xíchajdxu, na' buludé'e Jesús xaga béguaj, ne cá'anqueze beluné' chee benne' wen da zrinnaj ca', tue' cuité' xabela, ne xetúe' cuité' xéglala. <sup>34</sup> Ca dxuludé'e Le' xaga béguaj, na' gunná Jesús:

—Xrae, bnite lau chee benne' caní lawe' da quebe zaj nézene' bi na' dxelune'.

Na' benne' dxjaque' wedil-la gulebeje' da dxunna bea' chee xezezi'e late' weaj zra lana Jesús. <sup>35</sup> Benne' ca' zaj zre'e na' dxelenné'e, ne benne' xu'u lawe' ca' belún le' chee', dxelenné':

—Bselé' benne' xula ca'. Na'a dxal-la' guselá cuine' che da li naque' Cristo, Bénnea' Gucá'a Dios.

<sup>36</sup> Cá'anqueze benne' dxjaque' wedil-la belún le' chee', na' gulebigue' cuita Jesús, ne buluxí'aje' Le' nupe zichaj. <sup>37</sup> Gulé'e Le':

—Che lue' nacu' Wenná Bea chee judío ca', bselá cuinu'.

<sup>38</sup> Zua xichaj Jesús tu da naxúaj nen dizra' griego, ne dizra' latín, ne dizra' hebreo, da dxenná na:

—Wenná Bea chee judío ca'.

<sup>39</sup> Tu benne' wen da zrinnaj, bénnea' de'e xaga béguaj ben le' chee Jesús, dxenné':

—Che Lue' nacu' Cristo, bselá cuinu', ne bselate netu'.

<sup>40</sup> Na' xetú benne' wen da zrinnaj na' gudil-le' ljwezre'. Guzre' le':

—¿Quebe dxezrebu' Dios? Lue' dx-ezácaquezu' ca da gulechugue' chee' Le'.

<sup>41</sup> Dxi'u dxezácadxu ca da dxál-la'queze sá-cadxu, lawe' da dxaca cheedxu da dxal-la' sídxu ca naca da zrinnaj da nundxu, san benne' nigá quebe bi da zrinnaj nune'.

<sup>42</sup> Nadxa gunné':

—Jesús, xeajsá lazre' neda' gate su lau' nna be'u.

<sup>43</sup> Na' bechebe Jesús:

—Da li dxapa' lue', ná'atela súalequezu' neda' lu lataj chawe' chee Dios.

*Ca guca gate gute Jesús*

(Mt. 27.45-56; Mr. 15.33-41; Jn. 19.28-30)

<sup>44</sup> Guca ca wagubizra. Nadxa ca naca lu xezr la xu guchul-la na cadxa bzrinte na dxedá' chunna. <sup>45</sup> Gubizra guchul-la na, na' ladxe' ze lu xudau' bdxuaj na chúpala.

<sup>46</sup> Nadxa gudxezre xa'a Jesús, dxenné':

—Xrae, lu na'u dxegu'a be' xu'a.

Ca gunné' ca', na' gutie'.

<sup>47</sup> Gate benne' dxenná bé'ene' benne' dx-jaque' wedil-la blé'ene' ca da guca, na' be lá'ane' Dios, gunné':

—Da li, benne' nigá quebe bi da zrinnaj bene'.

<sup>48</sup> Xúgute benne' ca' zaj zre'e na', gate belelé'ene' ca da guca, na' besía'que' na', dxelu'e lachu'e. <sup>49</sup> Xúgute benne' ca' zaj núnbe'e Jesús, ne nu'ula ca' xjácálene' Jesús gate bezé'e Galilea, belexegá'ane' zítu'la dxelenné'e da caní.

*Dxulucache' Jesús*

(Mt. 27.57-61; Mr. 15.42-47; Jn. 19.38-42)

<sup>50</sup> Zua tu benne' chawe' ne xrlátaje le' José, benne' xezre Arimatea chee xezre ca' zaj nababa Judea. Nababe' xu'u lawe' blau chee judío ca'. <sup>51</sup> José nigá dxebeze' zra nna bea Dios, na' quebe bene' tuze ca da belún benne' xu'u lawe' blau ca'. <sup>52</sup> Benne' nigá guxíaje' xejchálajlene' Pilato, na' gunabe' latja gucache' Jesús. <sup>53</sup> Ca beuzre buluxu-létaje' Le' xaga béguaj, na' buluxuchele' Le' tu ladxe', na' gulu'e Le' tu lu xedxu ba, da ba gudene' tu le'e xi'a xiaj, naga quebe nu ne gáchequeze. <sup>54</sup> Naca na zra dxulucueze' chee zra dxulupá'ane', da ba zua su lau na.

<sup>55</sup> Nu'ula ca' xjácálene' Jesús gate bezé'e xezre ca' zaj nababa Galilea, xjaque' na', ne belelé'ene' ba na', ne belené'e ájala zaj nagu'e Le' xedxu ba. <sup>56</sup> Gate belexezrine' xu'u naga zaj zre'e, na' bulucueze' da du ca' dxelelále'e zixre, ne da zaj naca na ca za dxelelále'e na zixre. Belexezi' lazre' zra dxulupá'ane' cáteze naca da gunná bea Dios.

## 24

*Ca guca gate bebán Jesús*

(Mt. 28.1-10; Mr. 16.1-8; Jn. 20.1-10)

<sup>1</sup> Zra nedxu chee da gazre zra, nu'ula ca' belezrine' dxu'a ba na' dxan'isise', zaj nu'e ca naca da ca' dxelelále'e zixre da bulucueze', na' xebal-la nu'ula xjácálene' le'. <sup>2</sup> Gate belezrine' na', belelé'ene' xiaj da guduse dxu'a ba na', québedxa naduse na naga guduse na. <sup>3</sup> Belú'e lu ba na', san quebe belexezrelne' Xránadxu Jesús na'. <sup>4</sup> Na' belezrebele'e, ne quebe zaj nézene' ájala xelune', na' belelé'ene' chupa benne' zaj ze' cuité', zaj nacie' zra lané' dxácatite na.

<sup>5</sup> Nu'ula ca' belezúe' sudxú'ala lu xu, ne belezrébele'e. Na' benne' ca' gulé'e le':

—¿Bizr chee na' dxexíflajle le'e tu benne' naca bane' lálwela benne' gate? <sup>6</sup>Quebe zue' nigá, lawe' da ba bebane'. Le gusá lázre' da bchájlajlene' le'e le' Galilea. <sup>7</sup>Gunné': "Benne' Gulje' Bénneache dxalla' xuludé'e Le' lu na' benne' dul-la ca', na' xuludé'e Le' xaga béguaj, na' zra guxunne' zra xebane'."

<sup>8</sup>Nadxa nu'ula ca' xejlesá lazre' ca naca da gunná Jesús. <sup>9</sup>Ca gudé besía'que' dxu'a ba na', na' belexezrine' lu xezre na', na' buluchálajlene' benne' chinéaj gubáz ca' chee Jesús, ne xúgute' benne' ca' xezica, ca naca da guca na'. <sup>10</sup>Nu'ula ca' xjaque' xejlezenne' gubáz ca', zaj naque' María Magdalena, ne Juana, ne María xrna Jacobo, ne xebal-la nu'ula ca'. <sup>11</sup>Benne' gubáz ca' gulé'quene' da xálaze dxelenná nu'ula caní, na' quebe guléajle'e chee'.

<sup>12</sup>Nadxa bdxuaj Pedro, zeaj chégüe' dxu'a ba na', na' gate guné'e lu ba na', blé'ene' ladxe' da bedxela Jesús xu'u na chala'ala, na' bezé'e xezíaje' xu'u naga guz'é'e, dxexe-bánene' ca naca da guca.

*Da guca lu neza da zeaj xezre Emaús  
(Mr. 16.12-13)*

<sup>13</sup>Lu zra ná'queze, zjaca chupa benne' ca' busede Jesús xezre Emaús, da naca na láte'ze zitu' naga zua Jerusalén. <sup>14</sup>Zjaque' dxuluchálajle' ca naca da guca lu zra ca'. <sup>15</sup>Dxácate' na' dxuluchálajle' caní, na' Jesús ná'queze gubigue' cuita benne' ca', na' guzú lawe' zéajlene' le'. <sup>16</sup>Quebe belexúnbe'e Jesús, lawe' da guzúa tu da guxúa na xiaj lau benne' ca'. <sup>17</sup>Nadxa bchébe Jesús benne' ca':

—¿Bizra da na' dxuchálajle ljawézrele dxácate' xu'ule neza? ¿Bizr chee na' zale dxewí'ine lázrele?

<sup>18</sup>Tu benne' ca' le' Cleofas bechébe':

—Xúgute' benne' zaj nézene' ca da guca xezre Jerusalén lu zra caní. ¿Nacu' lue' benne' zitu' zu' Jerusalén, na' tuze lue' quebe nézenu' ca da guca na'?

<sup>19</sup>Nadxa Le' guzre' benne' ca':

—¿Bizra guca na'?

Gulé'e Le':

—Da guca chee Jesús, benne' Nazaret. Guque' tu benne' bchájaje' waláz chee Dios, na' xel-la waca zren ca' bene', ne bchájaje' dizra' lau Dios, ne lau xúgute' bénneache.

<sup>20</sup>Na' benne' xíchaje' ca' chee bxruze ca', ne benne' xu'u lawe' cheentu' ca' buludé'e Le' chee gulechugue' chee' gatie', na' buludé'e Le' xaga béguaj. <sup>21</sup>Netu' guleza lázrentu' Le' naque' Benne' dxal-la' guselé' xezr la xu Israel. Na'a, ba zeaj chunna zra guca da ca'. <sup>22</sup>Bal-la nu'ula ca' ládujla netu' buluzúaqueze' netu' lu da stébe, lawe' da xjaque' dxaní'sise' dxu'a ba chee' na', <sup>23</sup>na' gate quebe belexezrine' Le', na' belexel'é naga zúantu', ne gulenné' belelé'ene' chupa gubáz chee xabáa ca' bulul'é lawe' nu'ula ca', na' gulé'e le' nabán Jesús. <sup>24</sup>Nadxa bal-la benne' ljawézrentu' ca' xjaque' dxu'a ba na', na' belelé'ene' cáteze na' gulenná nu'ula ca', san quebe belelé'ene' Jesús.

<sup>25</sup>Nadxa gunná Jesús:

—Le'e quebe dxéajni'ile, na' ne naca zide' lázrdaule chee quebe chéajlele xúgute' da gulenná benne' ca' buluchálaje' waláz chee Dios. <sup>26</sup>¿Quebe dxal-la' saca Cristo da caní nédxudxa ca xegá'ane' szren?

<sup>27</sup>Nadxa guzú lawe' dxuzéajni'ine' benne' ca' ca naca xúgute' da naxúaj lu xiche chee Dios naga dxuchalaj na chee Le'. Guzú lawe' lu xiche ca' chee Moisés, na' ne zéa-jdxaqueze na lu xiche ca' chee benne' ca' buluchálaje' waláz chee Dios.

<sup>28</sup>Gate belezrine' lu xezre naga zjaque', Jesús bene' ca benne' zeajteze' xu'e neza. <sup>29</sup>Na' benne' ca' buluxucá'ane' Le' xadía, dxelenné':

—Begá'anale netu', lawe' da ba zeaj dxezré', ne ba dxe' xrínnequeze na'a.

Nadxa Jesús guxú'ulene' benne' ca'. <sup>30</sup>Gate na' dxé'lene' le' dxelawe', guqué'e xeta xtla, ne bzúzruje' na, na' guzre' Dios "Xcalenu'", ne bnézruje' na benne' ca'. <sup>31</sup>La' ná'queze becuasa ca naca da guxúa na xiaj lau benne' ca', na' belexúnbe'e Jesús, san la' ná'queze benite Le' lau benne' ca'. <sup>32</sup>Na' gulé ljawezre':

—¿Quebe guzúa xel-la dxebe' lu lázrdaudxu gate ze'e dxuchálajlene' dxi'u tu neza, ne bzéajni'ine' dxi'u ca naca da naxúaj lu xiche chee Dios?

<sup>33</sup>Nadxa, ne québedxa gulezrene', belexegu'e neza, zeajxaque' Jerusalén, naga belelé'ene' zaj nazraga benne' chinéaj gubáz ca', ne benne' ljawezre' ca'. <sup>34</sup>Benne' ca' zaj nazrague' na' gulé'e benne' chupa ca':

—Da li bebán Xránadxu, na' Simón ba blé'ene' Le'.

<sup>35</sup> Nadxa benne' chupa ca' buluzenne' le' ca naca da guca la neza, ne ca belexúnbe'e Jesús gate bzúruje' xeta xtila na'.

*Jesús dxulé'e lawe' benne' ca' xjácalene' Le' (Mt. 28.16-20; Mr. 16.14-18; Jn. 20.19-23)*

<sup>36</sup> Ne dxuluchálajte' caní gate ble'e lau Jesús gachaj lawe' benne' ca', na' bgape' le' diuzre, dxenné':

—Xela dxebeza zri lazre' súale' na le'e.

<sup>37</sup> Na' benne' ca' belexruse', ne belezré-bele'e. Guléquene' dxelelé'ene' bxinne dxela. <sup>38</sup> Na' Jesús guzre' benne' ca':

—¿Bizr chee na' dxezrébele? ¿Bizr chee na' dxaca chupa lázrele? <sup>39</sup> Le na' na'a caní, ne le na' ni'a. Néda'queza' na'. Le gutá neda', ne le guxúe xque neda'. Tu bxinne dxela quebe napa na bēla' zrita, ca dxel'é'ele le'e napa' neda'.

<sup>40</sup> Ca dxé'e benne' ca' da nigá, na' blé'ene' le' ne'e, ne ni'e. <sup>41</sup> Benne' ca' québequeze dxeléajle'e chee' lawe' da dxelebéle'ene', ne dxelexebánele'ene', na' guzre Jesús le':

—¿De late' da gawa' nigá?

<sup>42</sup> Nadxa bulunézruje' Le' late' bēla' guzrua xi', ne late' da zixre che bēzudau', <sup>43</sup> na' gucá'a Jesús da ca', ne gudawe' na lau benne' ca'. <sup>44</sup> Nadxa guzre' benne' ca':

—Da ba guca chia' naca na ca da gucha' le'e gate ne zúalequeza' le'e, gunnéa' dxalla' gaca li ca naca xúgute' da naxúaj lu da bdxixruj be'e Moisés, ne lu xiche naga zaj naxúaj salmo ca', ne lu xiche ca' chee benne' ca' buluchálaje' waláz chee Dios.

<sup>45</sup> Nadxa bzéajni'ine' benne' ca' ca da naxúaj lu xiche chee Dios, <sup>46</sup> na' guzre' benne' ca':

—Caní naxúaj na dxal-la' gate Cristo, na' zra guxunne' zra dxal-la' xebane' ládujla benne' gate ca', <sup>47</sup> na' lu La Le' dxal-la' xuluchalaj bēnneache lau xúgute' xezr la xu ca'. Su lau gunle na lu xezre Jerusalén, xele bēnneache dxal-la' xelexebí'i lazre' chee gunite lau Dios dul-la zaj nabaga benne' ca'. <sup>48</sup> Le'e nácale benne' xelexechebe' da caní. <sup>49</sup> ¡Le nna'xque! Neda' sel-la' chee'le ca da guchebe lazre' Xra'. Le xegá'ana nigá lu xezre Jerusalén, cadxa si'le xel-la waca da za xabáa.

<sup>50</sup> Nadxa Jesús beche'e benne' ca', belexedxúaje' Jerusalén, xeajxaque' xezre Betania, na' guchisa na' Jesús, ne gunabe' gaca chawe' chee benne' ca'. <sup>51</sup> Ne dxúntee' ca', na' bezé'e naga zaj zra' benne' ca', begüéne' zexiaje' xabáa. <sup>52</sup> Ca bexuzre belúe lá'ane' Le', besía'que' zeajxaque' Jerusalén lu dute' xel-la dxelebé, <sup>53</sup> na' gulezráqueze' chale'aj xudau' dxelúe lá'ane' Dios. Ca' naca na.

*Jesús dxexegüéne' xabáa (Mr. 16.19-20)*

## DIZRA' CHAWÉ' CA NACA CHEE JESUCRISTO DA BZUAJ SAN JUAN

*Bénnea' le' Xrtizra' Dios dxaque' bénneache*

<sup>1</sup> Gate guzú lau zua xúgute da de, ba zúaqueze Bénnea' le' Xrtizra' Dios, da zéaje na Benne' naque' duté da nácaqueze Dios, na' Bénnea' le' Xrtizra' Dios zúalene' Dios, ne nácaqueze' Dios. <sup>2</sup> Nédxudauté Benne' nigá zúalene' Dios. <sup>3</sup> Lu na' Benne' nigá ben Dios xúgute da de. Quebe bi de da quebe nun Le'. <sup>4</sup> Nácaqueze Le' xel-la' nabán, na' xel-la' nabán nigá naca na da dxusení na lu xichaj lázrdau bénneache chee xelaca bang'. <sup>5</sup> Xel-la' naxani' nigá dxusení na lu da chul-la chee dul-la da zaj nabaga bénneache, na' da chul-la nigá quebe dxezeque na xusula na xel-la' naxani' nigá.

<sup>6</sup> Guzúa tu benne' le' Juan, gusel-la Dios bennea'. <sup>7</sup> Benne' nigá blé'e chee bchálaje' ca naca chee Bénnea' naque' xel-la' naxani' nigá, chee xelájle xúgute bénneache chee Bénnea' ne chee da dxenné'. <sup>8</sup> Juan nigá quebe naque' xel-la' naxani' na'. Blé'e chee bchálaje' ca naca chee Bénnea' naque' xel-la' naxani' nigá. <sup>9</sup> Xel-la' naxani' li, da dxusení na lu xichaj lázrdau xúgute bénneache ba za' la' na lu xezr la xu nigá.

<sup>10</sup> Bénnea' naque' Xrtizra' Dios zue' lu xezr la xu nigá, na' lácala ben Dios xezr la xu lu na' Bénnea', bénneache zaj zre'e lu xezr la xu quebe belexexúnbe'e Le'. <sup>11</sup> Blé'e naga zua da naca chee', na' benne' lazrie' ca' quebe gulezí' lu ne'e Le'. <sup>12</sup> Benne' ca' gulezí' lu ne'e Le', ne guléajle'e chee', be'e benne' caní lataj xelaque' bi ca' chee Dios. <sup>13</sup> Benne' caní québedxa zaj naque' ca zri'ine bénneacheze, bi ca' dxelálajbe' ne chee bénneache, u ne chee da dxezá lazre' tu benne'. Benne' caní zaj naque' bi ca' chee Dios ná' queze.

<sup>14</sup> Bénnea' naque' Xrtizra' Dios gúlaje' ca tu bénneache, na' guzúe' ládujla dxi'u, zaj zúalé xel-la' zri'i lazre', ne da li Le'. Blé'entu' ca naca xel-la' szren chee', tu xel-la' szren da nunezruj Xradxu Dios chee Zrí'ine' tu licha'. <sup>15</sup> Juan bchálaje' ca naca chee Bénnea', gunné':

—Benne' nigá naque' Bénnea' bchálaja' neda' chee' gate gunnéa' Bénnea' zé'e te

chia' neda' naque' szrendxa ca neda' lawe' da zúaqueze' nédxute ca neda'.

<sup>16</sup> Xúgutedxu ba guzidxu xel-la' zri'i lazre' chee' da dxúnnaqueze Le'. <sup>17</sup> Bla' da nadxixruj bea Dios ládujla dxi'u lu na' Moisés, na' xel-la' zri'i lazre', ne da li belelá' na lu na' Jesucristo. <sup>18</sup> Netú benne' quebe ne lé'ene' Dios. Zrí'ine' tu licha', bi nazrí'ite lazre', benne' nigá guque' tuz ca nácaqueze Xre'.

*Juan, benne' bchué' bénneache nisa, dxexchebe' chee Jesús*

(Mt. 3.11-12; Mr. 1.7-8; Lc. 3.15-17)

<sup>19</sup> Benne' xíchaje ca' chee judío ca', benne' zaj zre'e Jerusalén, gulesel-le' bxruze ca', ne xrtia Leví, benne' ca' dxelune' zrin chee xudau', na' belezrine' lau Juan chee xuluchebe xánnie' le' nu naque'. <sup>20</sup> Bechebe Juan du lazre', gunné':

—Quebe naca' neda' Cristo. (Dizra' nigá zéaje na Benne' guchebe lazre' Dios sel-le'.)

<sup>21</sup> Nadxa buluchebe' le':

—¿Nuzra nacu'? ¿Nacu' Elías, bénnea' bchálaje' waláz chee Dios?

Bechebe Juan:

—Cabí.

Na' buluchébequeze' le':

—¿Nacu' bénnea' dxal-la' le'e, ne guchalaje' waláz chee Dios, ca da gunná Moisés dxal-la' gaca na?

Le' bechebe':

—Cabí.

<sup>22</sup> Nadxa buluchébedxaqueze' le':

—¿Nuzra nacu'? Dxun na ba xen gata' bi xechébentu' chee benne' gulesel-le' netu'. ¿Bi dxennáquezu' nu nacu'?

<sup>23</sup> Juan bechebe':

—Neda' naca' bénnea' naxúaj na ca naca chee' lu xiche chee Dios, da dxenná: Wen chi'i tu benne' dxebezre xe'e le'e xixre' lawe' lataj, dxenné': "Le salaj tu neza li naga te Xránadxu." Naquen cáteze gunná Isaías, bénnea' bchalaje' waláz chee Dios.

<sup>24</sup> Benne' xudau' fariseo ca' gulesel-le' benne' caní chee cheajlechálajlene' Juan.

<sup>25</sup> Le' buluchebe' le':

—Che lue' quebe nacu' Cristo, ne Elías, ne bénnea' dxal-la' xedajchalaje' waláz chee Dios, ¿bi xel-la' dxenná bea napu' dxuchú' bénneache nisa?

<sup>26</sup> Juan guzre' benne' ca':

—Neda' dxuchúa' bénneache nisa lu nísaze. Zua tu benne' ládujla le'e quebe nézele ca szren naque'. <sup>27</sup> Benne' nigá zé'e

ca te chia' neda', na' zúaqueze' nédxudxa ca neda'. Quebe zaca' neda' cuéaja' zrele' da xu'u ni'e.

<sup>28</sup> Xúgute da caní guca na lu xezr la xu chee xezre Betábara, da zua na chalá'a xegu Jordán naga dxalaj gubizra, naga zua Juan dxuchúe' bèneache nisa.

*Jesús naque' Zríla'dau' chee Dios, be dxelutie' lau Dios ne chee xtul-le'*

<sup>29</sup> Zra xula ble'e Juan dxezrín Jesús naga zue', na' gunné':

—¡Le nna'xque! Benne' nigá naque' Zríla'dau' chee Dios, cué' dul-la zaj nabaga bèneache. <sup>30</sup>Neda' bchálaja' ca naca chee' gate gunnéa': Te chia' neda' za tu benne' naque' szrendxa ca neda' lawe' da zúaqueze' nédxudautę ca neda'. <sup>31</sup>Néda'queza' quebe gunezda' nu naque'. Bla'a dxuchúa' bèneache nisa chee xeleneze xezre Israel nu Benne' naca Le'.

<sup>32</sup> Cá'anqueze gunná Juan:

—Neda' ble'eda' Be' Lá'azxa bétaje' xabáa ca tu bguu chíchedau', ne begá'analeñe' Benne' nigá. <sup>33</sup>Neda' quebe ne nezda' nu naque'. Dios na' nasele-le' neda' chee guchúa' bèneache nisa, Le' guzre' neda': “Gate le'enu' Be' Lá'azxa xétaje' xegá'analeñe' tu benne', Benne' nigá gunę' da zéaje xel-la' dxedxúa nisa, guzúe' Be' Lá'azxa lu xichaj lárdaule.”

<sup>34</sup> Na'a ba ble'eda' guca da nigá, ne dxexcheba' nácaqueze Benne' nigá Zrí'ine Dios.

*Benne' nedxu ca' dxusede Jesús*

<sup>35</sup> Zra xula zúaqueze na' Juan nen chupa benne' ca' dxusedeñe'. <sup>36</sup> Gate blé'ene' dxedé na' Jesús, na' gunná Juan:

—¡Le nna'xque! ¡Benne' nigá naque' Zríla'dau' chee Dios, bia gáteba' ne chee dul-la nabágadxu!

<sup>37</sup> Dxúpatę benne' ca' dxusede Juan benne' ca da gunné', na' xjácáleñe' Jesús.

<sup>38</sup> Nadxa bexechaj Jesús, gunné'e cúzrule', ne blé'ene' benne' ca' zá'aque' cúzrule', na' guzre' le':

—¿Bi dxexilajle?

Benne' caní gulę'e Jesús:

—Benne' Wesęde, ¿gazra zu'?

<sup>39</sup> Jesús bechebe':

—Le da nna'le.

Nadxa xjácáleñe' Jesús, ne belelé'ene' naga zue', na' belexegá'analeñe' Le' zra na' lawe' da bache zeaj du dxedá' tapa.

<sup>40</sup> Tu benne' chupa ca', benne' belene' ca da gunná Juan, ne xjácáleñe' Jesús, naque' Andrés, benne' biche Simón Pedro. <sup>41</sup> Andrés nigá la guxájte' xejdílaje' bi biche' Simón, na' guzre' le':

—Ba bezrélentu' Mesías. (Dizra' nigá zéaje na Cristo, Bénnea' guchebe lazre' Dios sel-le'.)

<sup>42</sup> Nadxa Andrés guché'e Simón naga zua Jesús, na' gate ble'e Jesús Simón na', na' guzre' le':

—Lue' nacu' Simón, zrí'ine Jonás. Si' lau' Cefas. (Dizra' hebreo nigá zéaje na: Pedro, da zeaje na: Xiaj.)

*Jesús dxenné' Felipe ne Natanael*

<sup>43</sup> Zra xula guca lazre' Jesús chéaje' naga nababa Galilea, na' bezrague' Felipe, ne guzre' le':

—Ben neda' tuze.

<sup>44</sup> Felipe nigá naque' benne' xezre Bet-saida, da naca na lazre Andrés, ne Pedro.

<sup>45</sup> Felipe guxájte' xejdílaje' Natanael, na' guzre' le':

—Ba bezrélentu' Bénnea' bzuj Moisés chee' lu xiche naga zaj naxúaj da nadxixruj bea na, ne cá'anqueze chee Benne' nigá buluzúaj benne' ca' buluchálaje' waláz chee Dios. Benne' nigá naque' Jesús, zrí'ine José, tu benne' xezre Nazaret.

<sup>46</sup> Na' gunná Natanael:

—¿Waca dxuaj tu da chawe' Nazaret?

Felipe bechebe':

—Gudá le'enu'.

<sup>47</sup> Gate ble'e Jesús za Natanael naga zue', gunné':

—Nigá za' tu benne' naca xánnie' benne' Israel, benne' dxenné'queze' da dxéquene'.

<sup>48</sup> Nadxa Natanael bchebe' Jesús:

—¿Ájazra naca núnbe'u neda'?

Jesús guzre' le':

—Ble'eda' lue' nédxudxa gate za mne Felipe lue', gate ze'u zran xaga higo.

<sup>49</sup> Nadxa Natanael guzre' Jesús:

—Benne' Wesęde, Lue' nacu' Zrí'ine Dios. Lue' nacu' Wenná Bea cheentu', benne' Israel.

<sup>50</sup> Bechebe' Jesús:

—¿Dxéajle'u chia' lawe' da gucha' lue' ble'eda' lue' zran xaga higo? Walé'enu' da zaj naca na da szrendxa ca da nigá. <sup>51</sup> Da li dxapa' le'e, walé'equenze le'e naxalaj xabáa,

na' gubáz chee xabáa ca' chee Dios dx-elétaje', ne dxelexegiene' naga zua neda', Benne' Gulje' Bénneache.

## 2

*Dxaca laní chee wechaga na' lu xezre Caná*

<sup>1</sup>Zra guxunne zra, na' guca laní chee wechaga na' lu xezre Caná da nababa Galilea. Xrna Jesús zue' na', <sup>2</sup>na' zua nu gunné Jesús, ne benne' ca' dxusédene' lu laní na'. <sup>3</sup>Bebizre xrise uva wal-la, na' xrna Jesús guzre' Le':

—Québedxa bi de xrise uva wal-la xel'é'aje'.

<sup>4</sup>Jesús bechebe':

—Nú'uladau', ¿bizr chee na' dxu'u neda' caní? Quebe ne zrin zra gulé'e lau da naca'.

<sup>5</sup>Xrne'e guzre' benne' wen zrin ca':

—Le gun ca naca da xe'e le'e.

<sup>6</sup>Zaj nnita xrupa xesu' xiaj na', da dxu-luchine judío ca' gate dxelibe ni'a ne'e ca naca da zjácálene'. Tu tu xesu' xiaj ca' dxeluzru na chupa u chunna dxe'e nisa. <sup>7</sup>Jesús guzre' benne' wen zrin ca':

—Le gusezrá nisa xesu' xiaj caní.

Gulegué'e nisa na, ne bulusuzrate' tu tu xesu' xiaj ca'. <sup>8</sup>Nadxa Jesús guzre' benne' ca':

—Le ca' a na, na' a, ne le gua na lau benne' ze' dxu'a ga dxelawe'.

Ca'an belune'. <sup>9</sup>Bénnea' zue' dxu'a ga dx-elawe' bxue' nisa na' da bexaca na xrise uva wal-la, ne quebe nézene' ga za na. Benne' wen zrin ca' zaj nézene' ga za na lawe' da gulegué'e nisa na'. Nadxa bénnea' zue' dxu'a ga dxelawe' gunné' benne' wechaga na', <sup>10</sup>na' guzre' le':

—Xúgute benne' dxelebéaje' nedxu xrise uva wal-la nácadxa chawe', na' gate ba gulé'ajle'e benne' ca' zaj zre'e laní, nadxa dxelebéaje' xrise uva wal-la quebe zúateca chawe'. Lue' bcuézaquezu' xrise uva wal-la chawe' na', ne guléaju' na' na'a.

<sup>11</sup>Da nigá da ben Jesús lu xezre Caná da nababa Galilea naca na tu xel-la' waca zrentę da bene' nedxu, da ble'e na xel-la' szren chee', na' benne' ca' dxusédene' guléajle'e chee'.

<sup>12</sup>Gudé na' Jesús bezé'e zexíaje' xezre Capernaum, zéajle xrne'e Le' nen benne' biche' ca', ne benne' ca' dxusédene'. Na' gulezúe' na' zane' zra.

*Jesús dxucá'ana chawe' chale'aj xudau'*  
(Mt. 21.12-13; Mr. 11.15-18; Lc. 19.45-46)

<sup>13</sup>Na' Jesús guxíaje' xezre Jerusalén lawe' da ba za Laní Pascua gate benne' judío ca' dxulusá lazre' ca' ben Dios, bebéaje' xra xrtawe' ca' lu xezr la xu Egipto. <sup>14</sup>Lu xezre Jerusalén blé'ene' lu chale'aj xudau' na' zaj zra' benne' dxelexutię' bezre ca', ne zrila' ca', ne bgúgudu ca', béadu ca' dxelutię' lau Dios. Cá'anqueze blé'ene' na' benne' dxuluxuché'e dumí chee xezr zitu' ca'. <sup>15</sup>Gate ble'e Jesús da caní, na' bgu'e du ca' da güe'e benne' ca', na' bebéaje' ca naca benne' ca' tu zrentę nen bezre chee' ca', ne zrila' chee' ca'. Na' gudxú'une' lu xula dumí chee benne' ca' dxuluxuché'e dumí, ne bdxixre' blaga' ca' chee benne' ca'. <sup>16</sup>Na' guzre' benne' ca' dxelexutię' bgúgudu ca':

—¡Le xebéaj da caní! Quebe gunle lizre Xra' ca tu lawe' xi'a.

<sup>17</sup>Nadxa benne' ca' dxusede Jesús xea-jlesá lazre' da naxúaj na lu xiche chee Dios, da dxenná na: Dxácatę zi' lázrdawa' lawe' da dxé'le'a gunne xue chee lizru'.

<sup>18</sup>Nadxa judío blau ca' buluchebe' Jesús:

—¿Bi xel-la' waca da za xabáa gulé'enu' netu' da gulé'e na napu' xel-la' dxenná bea dxunu' da caní?

<sup>19</sup>Bechebe Jesús:

—Le guzría xi' xudau' nigá, na' neda', te chunna zra xechisa' na.

<sup>20</sup>Nadxa judío ca' gulé'e Le':

—Xrupe xun iza ba zeaj dxelune' xudau' nigá, na' Lue', ¿xechisu' na chunna zraze?

<sup>21</sup>Bchalaj Jesús chee xudau' na' da naca na bel-la' dxen chee'. <sup>22</sup>Chee le' na', gate bebán Jesús ládujla benne' gate, na' benne' ca' bsédene' xea-jlesá lazre' ca da gunné', na' guléajle'e chee da naxúaj na lu xiche chee Dios ca naca chee Jesús, ne chee da guzre Jesús le'.

*Jesús núnbe'e xúgute bénneache*

<sup>23</sup>Gate zua Jesús xezre Jerusalén lu Laní Pascua chee judío ca', na' benne' zan guléajle'e chee' gate belelé'ene' ca naca xel-la' waca zren ca' da dxune'. <sup>24</sup>Jesús quebe bde cuing' lu na' benne' ca' lawe' da nézquezne' quegá xúgute benne' ca' dxeléajle'e chee'. <sup>25</sup>Quebe guchínene' nu benne' xe'e Le' ca zaj naca bénneache lawe' da nézquezne' ca da zaj xu'u xichaj lázxdau bénneache.



## 3

*Jesús dxuchálajlene' Nicodemo*

<sup>1</sup> Zua tu benne' xudau' fariseo le' Nicodemo. Naque' benne' blau lówela benne' judío ca'. <sup>2</sup> Benne' nigá guxiáje' xeajinne' e Jesús chizrela, na' guzre' Le':

—Benne' Wesede, nézentu' Dios nasel-le' Lue' chee gusédenu' netu' lawe' da quebe nu benne' gaca gune' ca zaj naca xel-la' waca zrenté da dxunu' Lue' che quebe zúalé Dios le'.

<sup>3</sup> Nadxa Jesús guzre' le':

—Da li dxapa' lue', nu benne' quebe gálaje' xecha lasa quebe gaca gaque' tuze benne' ca' dxenná be'e Dios.

<sup>4</sup> Nicodemo bchebe' Jesús:

—¿Ájazra gaca xexalaj tu benne' ba naque' gula? ¿Waca xexu'e le'e xrne'e chee gálaje' xetú?

<sup>5</sup> Jesús bechebe':

—Da li dxapa' lue', nu benne' quebe gálaje' ne chee nisa chee xrtizra' Dios, ne ne chee Be' Lá'azxa, quebe gaca chu'e naga dxenná bea Dios. <sup>6</sup> Benne' nálaje' lu ni'a lu na' bèneache, naque' bèneacheze. Nu benne' nálaje' ne chee Be' Lá'azxa, naca ban bènea' ne chee Be' Lá'azxa. <sup>7</sup> Quebe xebánenu' lawe' da dxapa' lue', dxun na ba xen gálaju' xecha lasa. <sup>8</sup> Gáteteze dxaca be'. Dxennu' ca schaga da dxun na, na' quebe nézenu' gala za na, ne gala zeaj na. Cá'anqueze naca chee benne' zaj nálaje' ne chee Be' Lá'azxa. Gaca le'enu' da ba nun Be' na' lu xichaj lázxdau bènea', na' quebe dxelé'enu' ájala dxun Be' na'.

<sup>9</sup> Nadxa Nicodemo bchebe' Jesús:

—¿Ájazra gaca da caní?

<sup>10</sup> Bechebe' Jesús:

—Lue' nacu' tu benne' weséde blau ládujla benne' Israel ca', na' ¿quebe nézenu' da caní? <sup>11</sup> Da li dxapa' lue', netu' dxuchálajntu' ca naca da nézentu', ne dxexechébtentu' ca da blé'entu', na' le'e quebe dxéajle da dxentu' le'e. <sup>12</sup> Che quebe dxéajle chia' gate dxuchálajlena' le'e ca naca chee da dxaca lu xezr la xu nigá, ¿ájazra gaca chéajle chia' che guchálajlena' le'e chee da dxaca xabáa?

<sup>13</sup> ¿Quebe ne cuen tu benne' xabáa chee lé'ene' ca dxaca na'. Tuze Bènea' bétaje' xabáa, Bènea' naca' neda', Benne' Gulje' Bèneache, naca' Bènea' zúaqueze' xabáa. <sup>14</sup> Ca ben Moisés, bde'e tu bela'

xia le'e xaga naga zua le'e xixre' lawe' lataj, cá'anqueze neda', Benne' Gulje' Bèneache, wuludá'queze' neda' tu le'e xaga, <sup>15</sup> chee quebe xelebía xi' nu benne' xeléajle'e chia'. Zrué'e bènea' xel-la' nabán da zeajlí canna.

*Dios dxezrí'i lazre' bèneache*

<sup>16</sup> Dios dxezrí'i lázrele'ene' bèneache, na' chee le na' bdee' Zrí'ine' tu licha' chee quebe xelebía xi' nu benne' dxeléajle'e chee'. Zrué'e bènea' xel-la' nabán da zeajlí canna. <sup>17</sup> Dios gusél-le' Zrí'ine' lu xezr la xu nigá, quegá chee guzría xi'e bèneache, san chee guselé' bèneache.

<sup>18</sup> Bènea' dxéajle'e chee Zrí'ine Dios quebe naca chee' cuía xi'e, san nu benne' quebe dxéajle'e chee' ba naca chee' cuía xi'e lawe' da quebe dxéajle'e chee Zrí'ine Dios, bi tu licha' chee'. <sup>19</sup> Benne' ca' quebe dxeléajle'e chee' ba zaj naca chee' cuía xi'e lawe' da gate bla' xel-la' naxaní' lu xezr la xu nigá, beledánedxene' da chul-la ca xel-la' naxaní', lawe' da dxelune' da calela. <sup>20</sup> Xúgute benne' dxelune' da calela dxelecuídene' xel-la' naxaní', ne quebe dxelebigue' lu xel-la' naxaní', chee quebe gaca bea da calela da dxelune'. <sup>21</sup> Benne' ca' dxelune' ca naca da li dxelebigue' lu xel-la' naxaní' chee gaca bea naca na chee Dios da dxelune'.

*Da gunná Juan, bènea' bchue' bèneache nisa*

<sup>22</sup> Gudé na' guxiáj Jesús naga nababa Judea nen benne' ca' dxusédene', na' guzúe' na' zane' zra nen benne' ca', dxuluchúe' bèneache nisa. <sup>23</sup> Cá'anqueze zua Juan lu xezr la xu chee xezre Enón da zua gáguzé naga dxe' xezre Salím, dxuchúe' bèneache nisa lataj na' lawe' da déle'e na' nisa zila, na' belezrín benne' zan naga zua Juan, na' beledxúe' nisa. <sup>24</sup> Da nigá guca na nédxudxa gate quebe ne xelégú'e Juan lizre xia.

<sup>25</sup> Nadxa bal-la benne' zaj de'e Juan gulezú lawe' dxulutil-le' judío ca' dizra' ca naca chee da dxucá'ana chawe na bèneache lau Dios. <sup>26</sup> Nadxa xeajleguezre' Juan:

—Benne' weséde, bènea' ble'e naga zu' chalá'a xegu Jordán naga dxalaj gubizra, bènea' bchálajlenu' netu' chee', na'a dxuchúe' bèneache nisa, na' xúgute bèneache zjácálene' Le'.

<sup>27</sup>Nadxa Juan guzre' benne' ca':

—Quegá nu benne' gaca bi gape' che quebe gunezruj Dios na chee'. <sup>28</sup>Le'e bénquezle gunniá' neda' quebe nácaqueza' neda' Cristo, Bénnea' guchebe lazre' Dios sel-le'. Naca' tu benne' nasel-la Dios chee quia lawa' lau Le'. <sup>29</sup>Lu laní chee wechaga na', bénnea' si'e nu'ula wechaga na' naque' benne' wechaga na', na' benne' ljwezre benne' wechaga na', bénnea' zue' na', ne dxenne' chee', dxebéle'ene' gate dxenne' da dxuchalaj benne' wechaga na'. Cá'anqueze neda' dxebéle'eda' lawe' da caní naca' ljwezre Cristo. <sup>30</sup>Le' dxal-la' gácadxé' szren, na' neda' dxal-la' gácadxá' cá'aze.

*Ca naca chee Bénnea' za' xabáa*

<sup>31</sup>Na' gunná Juan:

—Bénnea' za' xabáa nácadxe' blau ca xúgute bénneache. Benne' naque' chee xezr la xu nigá naque' bénneacheze, ne dxuchálaje' ca naca chee da dxaca lu xezr la xu nigáze. Bénnea' ze'e xabáa nácadxe' szren ca xúgute bénneache. <sup>32</sup>Le' dxuchálaje' ca naca chee da ba blé'ene', ne da ba benne' xabaala, na' quebe dxéajle' nu benne' chee da dxenné'. <sup>33</sup>Che nu benne' dxéajle'e chee', benne' nigá dxulé'ene' naca li ca da dxenná Dios. <sup>34</sup>Bénnea' nasel-la Dios dxuchálaje' xrtizra' Dios lawe' da dxunna Dios Le' Be' Lá'azxa chee' duté ca naque'. <sup>35</sup>Xradxu Dios nazrí'ine' Zrí'inequeze', ne ba bdee' lu ne'e xúgute da de. <sup>36</sup>Nu benne' dxéajle'e chee Zrí'ine Dios nape' xel-la' nabán da zeajlí canna, na' benne' quebe dxuzúe' dizra' chee Zrí'ine Dios quebe gape' xel-la' nabán caní. Wadée' lu da ba xa' da gun Dios.

#### 4

*Dxuchálaje Jesús tu nu'ula chee tu xezre nababa na Samaria*

<sup>1</sup>Benne' fariseo ca' belenne' zjácále benne' zandxa Jesús ca benne' zjácálene' Juan, na' dxuchúa Jesús benne' zandxa nisa ca benne' dxuchúa Juan nisa. <sup>2</sup>Quebe dxuchúaqueze Jesús bénneache nisa. Benne' ca' dxusédene' dxuluchúe' bénneache nisa. <sup>3</sup>Gate guque be'e Jesús da nigá, na' bezé'e naga nababa Judea, xexíaje' naga nababa Galilea.

<sup>4</sup>Ca xu'u Jesús neza, ben na ba xen té'e naga nababa Samaria. <sup>5</sup>Ca'an guca, bzrine'

tu xezre naga nababa Samaria nazí le na Sicar, da dxe' gáguze naga zua xezr la xu na' bnezruj Jacob chee zrí'ine', bi lebe' José. <sup>6</sup>Lu xezr la xu na' gudén Jacob, zre sua Abraham, tu beaj situj. Ba dxeajxreque Jesús xu'e neza, na' gudxé'e dxu'a beaj na'. Naca na zran wagubizra. <sup>7-8</sup>Benne' ca' dxusede Jesús xjaque' lu xezre Sicar, xejlegá'awe' da xelawe'. Dxácaté na' bzrin tu nu'ula Samaria dxu'a beaj na' zeajxri'e nisa, na' Jesús guzre' le':

—Benna nisa xí'aja'.

<sup>9</sup>Nadxa nu'ula na' bechebe':

—¿Ájazra naca, lue', benne' judío, dxenabu' neda' nisa, naca' nu'ula Samaria?

Caní gunné' lawe' da quebe zaj zra' chawe' benne' judío ca' nen benne' Samaria ca'. <sup>10</sup>Nadxa bechebe Jesús:

—Chela nézenu' da dxunna Dios, ne nua' dxenabe' lue' nisa xí'aje', lue' nábenú' neda', na' neda' gunna' lue' nisa da gunna na lue' xel-la' nabán.

<sup>11</sup>Na' nu'ula na' guzre' Le':

—Benne', quebe bi nuxru' cuéaju' nisa, na' beaj nigá nácale'e na situj. ¿Ájazra na' gunu' gunnu' neda' nisa chee xel-la' nabán? <sup>12</sup>Xra xrtáuntu', Jacob, benne' netu' beaj nigá, naga güé'equze le' nisa, ne naga gulé'ajqueze zrí'ine', ne be xixre' chee'. ¿Nácadxu' szrendxa ca le'?

<sup>13</sup>Jesús bechebe':

—Xúgute benne' dxelé'aje' nisa chee beaj nigá welexebilequezne' nisa. <sup>14</sup>Nu benne' xí'aje' nisa da gunézruja' neda', québedxa bílene' na, lawe' da nisa na' dxunézruja' neda' galaj na lu xichaj lázrdawe' ca tu beaj nisa da gunna na le' xel-la' nabán da zeajlí canna.

<sup>15</sup>Nadxa nu'ula na' guzre' Le':

—Benne', benna neda' nisa na', chee québedxa gun na ba xen xida' nigá xedaxrí'a nisa.

<sup>16</sup>Na' Jesús guzre' nu'ula na':

—Guxíaj xejinné benne' chiu', na' xídale nigá.

<sup>17</sup>Na' bechebe nu'ula na':

—Quebe nu chilá' benne' chia'.

Nadxa Jesús guzre' le':

—Da li dxennáu' quebe nu chilá' benne' chiu', <sup>18</sup>lawe' da ba guzúalenu' gazxu' benne', na' bénnea' zúalenu' na'a quebe naque' benne' chiu'. Ca naca da nigá gunnáu' da li.

<sup>19</sup> Gate nu'ula' benne' da nigá, na' gunné':  
—Xran, dxéqueda' nacu' lue' benne' dx-  
uchalaje' waláz chee' Dios. <sup>20</sup> Xra xrtáuntu'  
ca' bulucá'ana szrenę' Dios lu xi'a nigá, na'  
le'e, benne' judío, dxennale dxun na ba xen  
gucá'ana szrendxu Dios xęzre Jerusalén.

<sup>21</sup> Na' bechebe Jesús:

—Guxéajle' chia', nu'ula. Ba za zra gate  
le'e gucá'ana szrenle Xradxu Dios, ne quebe  
gun na ba xen xídale lu xi'a nigá, ne quebe  
gun na ba xen chéajle Jerusalén. <sup>22</sup> Le'e,  
benne' Samaria, quebe núnbeale nua' dx-  
ucá'ana szrenle. Netu' núnbeantu' Nua'  
dxucá'ana szrentu', lawe' da za' benne'  
weselá ládujla benne' judío ca'. <sup>23</sup> Wazrín  
zra, ne ba dxęzrín zra na', gate benne'  
ca' da li dxulucá'ana szrenę' Xradxu Dios,  
xelunę' na ne chee' Be' Lá'azxa, ne ne chee'  
da li, lawe' da dxaca lazre' Xradxu Dios  
xulucá'ana szren bėnneache Le' caní. <sup>24</sup> Dios  
naque' Be', na' benne' dxulucá'ana szrenę'  
Le', dxun na ba xen xulucá'ana szrenę' Le'  
ne chee' Be' Lá'azxa, ne ne chee' da li.

<sup>25</sup> Na' nu'ula na' guzre' Le':

—Neda' nezda' walá' benne' Mesías (da  
zėjaje na Cristo), na' gate la' Le', na' guzėja-  
jni'ing' dxi' u ca naca xúgute'.

<sup>26</sup> Jesús guzre' le':

—Neda' naca' Bėnnea', dxuchálajlena'  
lue'.

<sup>27</sup> Ca gunné' ca', na' belexęzrín benne'  
ca' dxusedene', na' belexebánene' lawe' da  
dxuchálajle Jesús tu nu'ula Netúe' quebe  
bexázrjene' guchebe' Le' bi da dxaca lazre',  
u bizra cheen dxuchálajlene' nu'ula na'.

<sup>28</sup> Nadxa nu'ula na' bca'ane' dxe'e chee'  
dxu'a beaj na', na' bezé'e zęxiájje' xęzre na'  
naga xeajęzre' benne' ca':

<sup>29</sup> —Le da lé'ele tu benne' guzre' neda'  
xúgute' da ba bėna'. ¿Quegá benne' nigá  
Cristo, Bėnnea' sel-la Dios?

<sup>30</sup> Nadxa beledxúaj benne' ca' xęzre na',  
zjaque' naga zua Jesús. <sup>31</sup> Dxácatę na',  
benne' ca' dxusede Jesús gulata' xuene' Le',  
gulennę':

—Benne' Wesęde, gudagu late'.

<sup>32</sup> Jesús guzre' benne' ca':

—Dę da dxawa', da quebe núnbeale le'e.

<sup>33</sup> Nadxa benne' ca' dxusede Jesús gulezú  
lawe' dxuluchebe ljwęzre', dxelennę':

—¿Núteca bedajgú'e da gudawe'?

<sup>34</sup> Jesús guzre' le':

—Xela wagu chia' naca na chee' guna' da  
dxaca lazre' Xra', Bėnnea' nasele' neda',

ne chee' gusexuzra' guna' zrin chee'. <sup>35</sup> Le'e  
dxennale: “Xetapa beu' xelápadxu.” Neda'  
dxapa' le'e, le nna' bėnneache zaj naque'  
ca tu lina, da bache naca na xelápadxu.  
<sup>36</sup> Benne' dxelape' dxezi'e lazruj chee', na'  
da dxelape' naca na chee' xelapa bėnneache  
xel-la' nabán da zeajlí canna, chee' sua xel-  
la' dxebe benne' dxaza tu zren nen benne'  
ca' dxelelape'. <sup>37</sup> Da li naca ca da dxelenná  
bėnneache: Tu benne' dxaze', na' xetúe'  
dxelape'. <sup>38</sup> Neda' gusel-la' le'e xelápale  
naga quebe gúzale. Ca' naca na, benne' xula  
belunę' zrin gulaze', na' le'e dxezile ba neza  
zrin da belún benne' ca'.

<sup>39</sup> Benne' zan, benne' xęzre na' naga  
nababa Samaria, guléajle'e chee' Jesús ne  
chee' xrtizra' nu'ula na', gunné': “Guzre'  
neda' xúgute' da ba bėna'.” <sup>40</sup> Gate belelá'  
benne' Samaria ca' naga zua Jesús, na'  
gulata' xuene' Le' xegá'ane' nen le', na'  
begá'ane' na' chupa zra. <sup>41</sup> Benne' zandxa  
guléajle'e chee' Jesús gate belenne' ca da  
dxenná Le'. <sup>42</sup> Nadxa gulé'e nu'ula na':

—Na'a dxéajlentu' chee' quegá tuze ne  
chee' da guzru' lue' netu', na' cá'anqueze  
lawe' da bėnquezentu' netu' chee', na'  
nézentu' da lí naque' Cristo, Bėnnea'  
guselé' ca naca bėnneache.

*Jesús dxexunę' zri'ine tu benne' węn zrin  
blau chee' xu'u lawe'*

<sup>43</sup> Gudé chupa zra bezá' Jesús xęzre ca'  
zaj nababa Samaria, na' guzė'e zėjaje' naga  
nababa Galilea. <sup>44</sup> Guxiájje' na' lawe' da gun-  
náqueze Jesús, gunné': “Tu benne' dxucha-  
lajje' waláz chee' Dios, quebe dxelapa benne'  
lazrie' le' ba lá'ana.” <sup>45</sup> Gate bezrine' naga  
nababa Galilea, benne' zaj zre'e na' belezí'  
lu ne'e Le' du lazre', lawe' da xjácaqueze  
le' Laní Pascua da guca na Jerusalén, na'  
belelé'ene' xúgute' da ben Jesús lu laní na'.

<sup>46</sup> Nadxa bezrín Jesús xęzre Caná naga  
nababa Galilea naga bene' bexaca nisa xrise  
uva wal-la. Zua lu xęzre Capernaum tu  
benne' węn zrin blau chee' xu'u lawe', zua tu  
zri'ing' bi biu quebe chawe' zúabe'. <sup>47</sup> Gate  
ben benne' węn zrin blau nigá ba bezá'  
Jesús naga nababa Judea, ne ba bezrine'  
naga nababa Galilea, na' guxiájje' xeajjnnę'  
Jesús, na' gutá' xuene' Le' chėjaje' lizre'  
xexune' bi biu chee', bi na' ba zua gátebe'.  
<sup>48</sup> Nadxa Jesús guzre' le':

—Le'e quebe chėjajle' chia' che quebe  
lé'ele xel-la' waca chee' xabáa da dxulé'eda'.

<sup>49</sup>Benne' wen zrin blau na' gunné':  
—Xran, gudázega na'a quebe ne gate zri'ina'.

<sup>50</sup>Nadxa guzre Jesús le':  
—Bexíaj lizru'. Naca ban bi chiu'.

Benne' wen zrin blau na' guxéajle'e chee da guzre Jesús lé', na' bezé'e zexíaje'. <sup>51</sup>Gate ba zua xezrine' lizre', na' benne' wen zrin chee' xejlexezrígale' le', na' gulé'e le':

—Naca ban zri'inu'.

<sup>52</sup>Nadxa bchebe' benne' ca' bátala guzú lau bexácabe', na' gulé'e le':

—Ná'aqueze dxedé wagubizra bedxúaj da la da xu'ube'.

<sup>53</sup>Nadxa benne' wen zrin blau na' bexúnene' guca na la' ná'queze gate guzre Jesús le': "Naca ban zri'inu'." Ca'an guca, le', ne xúgute benne' zaj zra' lizre' guléajle'e chee Jesús.

<sup>54</sup>Da nigá naca na xel-la' waca zren da gudxupe' da ben Jesús gate bezrine' naga nababa Galilea.

## 5

*Jesús dxexune' tu benne' biu naga nazí le na Betesda*

<sup>1</sup>Ca gude' na' guxú'u tu laní chee judío ca', na' bezrín Jesús xezre Jerusalén. <sup>2</sup>Lu xezre na', gáguze naga zua dxa xu'u chee xezre da nazí le na Dxa Xu'u Chee Zrila' Ca', dxe' tu cue'la nisa nazí le na Betesda lu dizra' hebreo, na' dxu'a nisa na' zaj nnita gazxu' lachila. <sup>3</sup>Lachila ca' zaj de benne' zan zaj xu'e we', benne' la chul-la ca', ne benne' zaj zua zri ni'a ne'e, ne benne' zrinnaj ca'. Dxelebeze' ca bixre nisa na'. <sup>4</sup>Ca'an naca lawe' da dxetaj tu gubáz chee xabáa bata gala, ne dxunibe' nisa na', na' benne' nedxu dxeajchu'e lu nisa na' ca dxedé dxunibe' na, dxexaque' chee bíteteze xel-la' we' xu'e. <sup>5</sup>Zua tu benne' na' ba guca chinu chunne dxua iza xu'e we'. <sup>6</sup>Gate ble'e Jesús benne' nigá, ne dxeque bé'ene' ba guca zane' iza xu'e we' na', na' bchebe' le':

—¿Dxaca lazru' xexacu'?

<sup>7</sup>Benne' we' na' bechebe':

—Benne', quebe nu chilá' benne' cu'e neda' lu nisa na' ca dxedé dxe bixre na. Tu tu lasa gate dxaca lazra' chu'a, benne' xula dxu'e nédxudxa.

<sup>8</sup>Jesús guzre' le':

—¿Guxasa! Becá'a da'a chiu', ne bexíaj.

<sup>9</sup>La' ná'queze bexaca benne' we' na', na' bequé'e da'a chee', ne guzú lawe' dxedé'.

Zra na' naca zra dxulupá'ana judío ca', <sup>10</sup>na' benne' judío ca' gulé'e bennea' bexaque':

—Na'a naca na zra dxupá'anadxu. Quebe naca na gu'u da'a chiu'.

<sup>11</sup>Na' benne' na' bechebe':

—Bénnea' bexune' neda' guzre' neda': "Becá'a da'a chiu', ne bexíaj."

<sup>12</sup>Nadxa buluchebe' le':

—¿Nuzra na' guzre' lue': Becá'a da'a chiu', ne bexíaj?

<sup>13</sup>Benne' na' quebe nézene' nu bennea' bexune' le' lawe' da ba zexíaj Jesús lávela benne' zan ca' zaj zre'e na'. <sup>14</sup>Ca gude' na' Jesús bezrague' bennea', dxedé' chale' aj xudau', na' guzre' le':

—¿Gunná'xque! Ba bexacu' na'a. Québedxa gunu' dul-la, chee quebe bi sacu' xetu' da wál-ladxa.

<sup>15</sup>Nadxa benne' na' bezé'e zexíaje', na' bzenne' judío ca' bexún Jesús le'. <sup>16</sup>Chee le' na' benne' judío ca' guláu zi' xuzre' Jesús, ne gulaca lazre' xelútie' Le' lawe' da dxune' da caní lu zra dxulupá'ane'. <sup>17</sup>Jesús guzre' benne' ca':

—Dios, Xra', tu dxúnzqueze' zrin, na' neda' dxuna' zrin.

<sup>18</sup>Chee le' na' benne' judío ca' gulaca lázredxe' xelútie' Jesús lawe' da quegá tuze dxuzúe' chalá'ala da nadxixruj bea na chee zra dxulupá'ane', na' cá'anqueze dxun cuine' ca Dios gate gunné' Dios nácaqueze' Xre'.

*Xel-la' dxenná bea da napa Zri'ine Dios*

<sup>19</sup>Nadxa Jesús guzre' benne' judío ca':

—Da li dxapa' le'e, neda', Zri'ine Dios, quebe gaca bi guna' cheézqueza'. Tuze dxuna' da dxelé'eda' dxun Xra'. Xúgute da dxun Xra', cá'anqueze dxuna' neda', Zrí'ine'. <sup>20</sup>Dios, Xra', nazrí'ine' neda', Zrí'ine', ne dxulé'ene' neda' xúgute da dxúnqueze' Le', na' gulé'ene' neda' da zaj nácadxa szren ca da ca' dxuna', na' xebánequeze le'e ca xelaca na. <sup>21</sup>Ca dxun Xradxu Dios, dxusebang' benne' gate, ne dxununéruje' xel-la' nabán chee', cá'anqueze neda', Zrí'ine', dxununéruja' xel-la' nabán chee benne' ca' dxaca lazra' xunézruja' na. <sup>22</sup>Xradxu Dios quebe dxuchi'e nu benne', san ba benne' neda', Zrí'ine', xel-la' dxenná bea guchi'a da dxelún tu tu bennéache, <sup>23</sup>chee xelapa xúgute benne' neda', Zrí'ine', ba lál'ana, cáteze na' dxelape' ba lál'ana Dios, Xra'.

Nu benne' quebe dxape' ba lá'ana neda', Zrí'ine', cá'anqueze quebe dxape' ba lá'ana Xradxu Dios nasel-le' neda'.

<sup>24</sup>Da li dxapa' le'e, benne' dxenne' da dxennéa' neda', ne dxéajle'e chee Dios nasel-le' neda', benne' nigá nape' xel-la' nabán da zeajlí canna, na' quebe cuía xi'e lawe' da ba bedxúaje' lu na' xel-la' gute, ne ba zue' lu xel-la' nabán. <sup>25</sup>Da li dxapa' le'e, wazrín zra, ne ba dxezrín zra na' gate benne' gate ca' xelenne' chi'a neda', Zrí'ine Dios, na' benne' xuluzúa xrtizra' welaca bánqueze'. <sup>26</sup>Xráqueza' nape' xel-la' dxenná bea xunézruje' xel-la' nabán da naca na li lazre' chee bénneache, ne cá'anqueze ba benne' neda', Zrí'ine', xel-la' dxenná bea xunézruja' bénneache xel-la' nabán caní, <sup>27</sup>ne ba benne' neda' xel-la' dxenná bea guchi'a chee bénneache lawe' da naca' Benne' Gulje' Bénneache. <sup>28</sup>Quebe xebánele chee da nigá lawe' da zrin zra gate xúgute benne' gate xelenne' chi'a <sup>29</sup>xelaxedxúaje' lu xedxu ba. Benne' ca' belune' da xrlátaje xelxebane' chee xelape' xel-la' nabán da zeajlí canna. Benne' ca' belune' da caléla xelxebane' chee xelebía xi'e.

*Da dxelunna bea na napa Jesús xel-la' dxenná bea*

<sup>30</sup>Na' gunná Jesús:

—Neda' quebe bi gaca guna' cheézqueza'. Neda' dxuchi'a chee bénneache ca gunná bea Dios, Xra', neda', na' ca dxuchi'a naca na xrlátaje lawe' da quebe dxuna' ca da dxaca lázrequeza' neda'. Dxuna' ca da dxaca lazre' Xra', nasel-le' neda'. <sup>31</sup>Che neda' dxexechéba' da nácaze cheéqueza', da dxennéa' quebe naca na da dxunna bea na. <sup>32</sup>Zua tu benne' xula dxexechébe' da nácaqueze chia', na' da dxenné' naca na da dxunna bea na. <sup>33</sup>Le'e gusél-lale benne' xejlechebe' Juan, na' ca da bechebe' naca na da li. <sup>34</sup>Da dxunna bea na da dxuxrén lazra' neda' quebe naca na chee bénneacheze. Dxapa' le'e da nigá chee lala le'e. <sup>35</sup>Juan na' guque' ca tu xi' da gula na, ne bsení na, na' le'e bezaca ba lázrele lu xi' na' tu chí'idau'. <sup>36</sup>Zua tu da dxunna bea na chia' neda', da nácadxa szren ca da bchalaj Juan. Da ca' dxuna' neda', da bsebagá Xra' neda' dxuna'. Da caní dxelunna bea na da li Dios, Xra', gusél-le' neda'. <sup>37</sup>Cá'anqueze Xra' nasel-le' neda' dxexechébe' chia'. Lácala ba bchalaj Le',

le'e quebe ne xénele chi'e, ne quebe ne lé'ele Le', <sup>38</sup>ne quebe nuzúale dizra' chee' xichaj lázraule lawe' da quebe dxéajlele chia' neda', nasel-la Xra' neda'. <sup>39</sup>Le'e dxusédele du lázrele da naxúaj na lu xiche chee Dios lawe' da dxéquele xezrélele xel-la' nabán da zeajlí canna lu xiche na', na' da naxúaj na lu xiche chee Dios dxuchalaj na ca naca chia' neda'. <sup>40</sup>Le'e quebe dxaca lázrele xídale naga zua' neda' chee gápale xel-la' nabán na'.

<sup>41</sup>'Neda' quebe dxezi'a xel-la' ba lá'ana ca da dxelunna bénneache, da quebe naca na li lazre'. <sup>42</sup>Neda' númbe'a le'e, ne nezda' quebe nazrí'ile Dios. <sup>43</sup>Bla'a neda' waláz chee Dios, Xra', na' le'e quebe dxezi' lu na'le neda'. Che za' tu benne' lu da naca cheézqueze', benne' na' wazí' lu na'le. <sup>44</sup>¿Ájazra gaca chéajlele le'e chia' che dxunle zrin chee xelapa ljwézrele le'e ba lá'ana, ne quebe dxue lázrele sile xel-la' ba lá'ana da dxunna Dios tu lichéa? <sup>45</sup>Quebe guéquele néda'queza' gusebaga' le'e zria lau Dios, Xra'. Da gusebaga le'e zria naca na da ba gunná Moisésqueze, da na' dxuxrén lázrele guselá na le'e. <sup>46</sup>Che da li guxéajlele le'e chee da gunná Moisés, cá'anqueze chéajlele chia' neda' lawe' da bzuaj Moisés ca naca chia' neda'. <sup>47</sup>Na'a, che quebe dxéajlele chee da bzuaj le', ¿ájjazra gaca chéajlele chee da dxapa' le'e?

## 6

*Jesús dxugawe' chi xun gaxúa benne' biu*  
(Mt. 14.13-21; Mr. 6.30-44; Lc. 9.10-17)

<sup>1</sup>Ca gudé na' guxiáj Jesús xecha la'a dxu'a nísadau' chee Galilea, da nazíqueze le na nísadau' chee Tiberias. <sup>2</sup>Benne' zante zjá-calene' Jesús lawe' da ba belelé'ene' xel-la' waca zren ca' da dxun Le', dxexune' benne' we' ca'. <sup>3</sup>Nadxa Jesús guluéne' tu lu xi'a, na' gudxé'e na' nen benne' ca' dxusédene'. <sup>4</sup>Ba zua gagu Laní Pascua chee judío ca'. <sup>5</sup>Gate ble'e Jesús benne' zan ca' zá'aque' zeaj nawé' Le', na' guzre' Felipe:

—¿Gazra cheajxridxu da xelagu benne' zan caní?

<sup>6</sup>Gunná caní Jesús chee la' bi nna Felipe, lawe' da ba neze Jesús ca da gune'. <sup>7</sup>Nadxa bechebe Felipe:

—Che sidxu xeta xtíla lazruj da sidxu chee chupa gaxúa zra, quebe gueque na xelezí' benne' caní late' weaj.

<sup>8</sup> Nadxa Andrés, xetú benne' ca' dxusede Jesús, ne naque' bi biche Simón Pedro, guzre' Jesús:

<sup>9</sup> —Ze tu bi cuide' nigá nápabe' gazxu' xeta xtila zrua' cebada, ne chupa bela. ¿Ájzra gun da nigá gueque na chee xúgute benne' caní?

<sup>10</sup> Nadxa gunná Jesús:

—Le xe xúgute' xelebé'e.

Naca lu daca lataj na', na' gulebé' ca du chi xun gaxúa benne' biu. <sup>11</sup> Nadxa gucá'a Jesús xeta xtila ca', na' ca gude' guzre' Dios “Xcalenu’”, bnéruje' na benne' ca' dxusédene', na' benne' caní gulísi'e na láwele benne' zan ca' zaj dxe'e na'. Cá'anqueze ben Jesús chee bela ca', na' bnéruje' ca da gulaca lazre' benne' ca'. <sup>12</sup> Gate gulélaje benne' ca', na' Jesús guzre' benne' ca' dxusédene':

—Le xutupa da bízrujdu ca' da dxelexegá'ana na, chee quebe bi gaca dítaje.

<sup>13</sup> Belexequé'e na, na' buluzré'e chazrinnu xcuite da bizruj ca' zaj nagá'ana na chee da gazxu' xeta xtila zrua' cebada ca'. <sup>14</sup> Nadxa benne' zan ca', gate belelé'ene' xel-la' waca zren nigá da ben Jesús, gulenné':

—Da li benne' nigá naque' bénnea' guchálaje' waláz chee Dios, bénnea' dxal-la' le'e.

<sup>15</sup> Guque bé'ene' Jesús dxelaca lazre' xeleché'e Le' xadía chee xuluzú'e Le' ca benne' wenná bea, na' bezé'e na', ne begüéne' lu xi'a sibe na' chee sue' leze'.

*Jesús dxedé' lawe' nísadau'*

*(Mt. 14.22-27; Mr. 6.45-52)*

<sup>16</sup> Gate ba za xrinne, benne' ca' dxusede Jesús belétaje' dxu'a nísadau', <sup>17</sup> na' gulu'e lu da dxedá lawe' nísadau', ne gulezú lawe' zjaque' xeledé'e xechalá'a nísadau' chee xelezrine' xezre Capernaum. Ca guxrinne, quebe ne xezrín Jesús na'. <sup>18</sup> Nadxa guzú lau dxaca tu be' bdu' lawe' nísadau' na', na' xejaxruza chee nísadau' na' guxásalé'e na. <sup>19</sup> Gate ba gulede'e lu nísadau' na' catite sadxu tu chi'i zren, na' belelé'ene' Jesús ba dxezrine' naga ziaj da dxedá lawe' nísadau', dxezé'e lawe' nísadau', na' belezrebe'. <sup>20</sup> Nadxa Jesús guzre' benne' ca':

—Neda' na'. Quebe zrébele.

<sup>21</sup> Nadxa lu duté xel-la' dxelebé gulezú' lu ne'e Le' lu da dxedá lawe' nísadau' na',

na' chadite belezrine' lu xezr la xu naga zjaque'.

*Benne' zan ca' dxelexílaje' Jesús*

<sup>22</sup> Zra xula benne' zan ca', benne' belexegá'ana xecha la'a nísadau', guleque bé'ene' ba zeajxaca benne' ca' dxusede Jesús lu da dxedá lawe' nísadau' tu licha' da dxe' chalá'a na', na' Jesús quebe guxiájlene' benne' ca'. <sup>23</sup> Dxácate na' xezícala da dxeledá lawe' nísadau', da ca' beledxúaj na xezre Tiberias, belezrín na tu lataj da zua gáguze naga gulawé' xeta xtila na' ca gude' guzre Xránadxu Dios: “Xcalenu’.” <sup>24</sup> Chee le na' gate benne' zan ca' guleque bé'ene' québedxa zua Jesús na', ne cá'anqueze benne' ca' dxusédene', na' gulu'e lu da dxeledá lawe' nísadau', ne xjaque' xezre Capernaum zeajlexedílaje' Jesús.

*Jesús naque' xeta xtila da dxunna na xel-la' nabán li lazre'*

<sup>25</sup> Gate benne' zan ca' belezrine' xecha la'a dxu'a nísadau', na' belexezrague' Jesús, ne buluchebe' Le':

—Benne' Wesede, ¿bata bla'u nigá?

<sup>26</sup> Jesús guzre' benne' ca':

—Da li dxapa' le'e, dxexílaje le'e neda' lawe' da gudágule, ne béljele, ne quegá lawe' da ble'ele xel-la' waca ca' da ble'eda' le'e. <sup>27</sup> Quebe cue'le gunne xue sile da gágule da te chee na. Le cue' gunne xue sile da gágule da zeajlí canna, da na' gunna na le'e xel-la' nabán da zeajlí canna. Da nigá naca na xel-la' wagu da gunna' neda', Benne' Gulje' Bénneache, le'e, lawe' da bzua Xra' Dios nen neda' da dxunna bea na naca' Zrí'ine'.

<sup>28</sup> Nadxa buluchebe' Le':

—¿Bi dxal-la' guntu' chee gaca ca da dxaca lazre' Dios guntu'?

<sup>29</sup> Jesús bechebe':

—Da dxaca lazre' Dios gunle naca na chéajlele chia' neda', naca' Bénnea' gusella Dios.

<sup>30</sup> Nadxa buluchebe' Le':

—¿Bizra xel-la' waca gunu' chee le'entu' na, na' chéajlentu' chiu'? ¿Bizra dxunu'?

<sup>31</sup> Xra xrtauntu' ca' gulawé' xeta maná le'e xixre' lawe' lataj, ca naxúaj na lu xiche chee Dios, dxenná na: Dios bgawe' benne' ca' xeta xtila da za xabáa.

<sup>32</sup> Bechebe Jesús:

—Da li dxapa' le'e, quegá Moisés na' bnéruje' benne' ca' xeta xtila da za xabáa.

Dios, Xra', dxunne' le'e xeta xtila da za xabáa da naca na li lazre'. <sup>33</sup>Xeta xtila na' da dxunna Dios le'e naca na Bénnea' bétaje' xabáa, ne dxunézruje' chee bénneache xel-la' nabán li lazre'.

<sup>34</sup>Nadxa benne' ca' gulé'e Lé':

—Xran, tu bénnazqueze cheentu' xeta xtila caní.

<sup>35</sup>Jesús guzre' benne' ca':

—Neda' naca' xeta xtila da dxunna na xel-la' nabán li lazre'. Benne' xide' naga zua' neda' cabátadxa tune', na' benne' chéajle'e chia' cabátadxa bílene'. <sup>36</sup>Naca na ca ba gucha' le'e. Le'e na' quebe dxéajle'le chia', lálaca ba ble'ele neda'. <sup>37</sup>Xúgute benne' ca' dxunna Xra' neda', xelexé'e lawa', na' benne' ca' xelexé'e naga zua', quebe gúzua' benne' ca' chalá'ala. <sup>38</sup>Neda' guzá'a xabáa, quegá chee guna' ca dxaca lázrequeza' neda'. Bla'a chee guna' ca da dxaca lazre' Xra', gusel-le' neda'. <sup>39</sup>Da dxaca lazre' Xra', nasele' neda', naca na chee quebe gunitia' netú benne' ca' ba benne' chia'. Nacan chee gusebana' benne' ca' lu zra bzebe. <sup>40</sup>Da dxaca lazre' Xra', nasele' neda', naca na chee xelapa bénneache xel-la' nabán da zeajlí canna, xúgute benne' ca' xelexé'e neda', Zri'ine Dios, ne xeláajle'e chia' neda', na' chee gusebana' neda' benne' ca' lu zra bzebe na'.

<sup>41</sup>Gate belexé'e da nigá, na' judío ca' gulezú lawe' dxelexí tizre' Jesús lawe' da gunné': "Neda' naca' xeta xtila da betaj xabáa." <sup>42</sup>Nadxa gulenné':

—¿Quegá benne' nigá zri'ine José? Dxi'u núnbeadxu xra xrne'e. ¿Bizr chee na' dxenne' bétaje' xabáa?

<sup>43</sup>Nadxa Jesús guzre' benne' ca':

—Québedxa si tízrale. <sup>44</sup>Quebe nu benne' gaca xide' naga zua' neda', che quebe xedajgúa Xra' nasele' neda' bénnea', na' neda' gusebana' bénnea' lu zra bzebe na'. <sup>45</sup>Lu xiche ca' naga naxúaj da gulenná benne' ca' buluchalaje' waláz chee Dios, dxenná na: Dios gusedene' xúgute bénneache. Ca' gaca na, xúgute benne' ca' dxuluzé nague' ca da dxusede Xra', dxelexé'e naga zua'.

<sup>46</sup>Quebe ne le'e nu benne' Xra'. Benne' tu licha', bénnea' blé'ene' Lé', naca bénnea' guzé'e naga zua Dios. <sup>47</sup>Da li dxapa' le'e, nu benne' dxéajle'e chia' neda' nape' xel-la' nabán da zeajlí canna. <sup>48</sup>Neda' naca' xeta xtila da dxunna na xel-la' nabán li lazre'. <sup>49</sup>Xra xrtáule ca' gulawe' xeta maná

le'e xixre' lawe' lataj, na' gudé na' xúgute benne' ca' gulate'e'. <sup>50</sup>Xeta xtila nigá naca na da za xabáa, na' che nu benne' gawe' na, quebe gatie' tu chi'ize. <sup>51</sup>Néda' queza' naca' xeta xtila da dxunna na xel-la' nabán da za xabáa. Benne' gawe' xeta xtila nigá waca bánqueze' chadía chacanna. Xeta xtila na' da dxunna' neda' naca na bela' dxen cheézezeze', da gunna' chee xelaca bánqueze bénneache.

<sup>52</sup>Nadxa benne' judío ca' gulezú lawe' dxuluchebe ljwezre', dxelexé'e:

—¿Ajzra gun benne' nigá, gunne' dxi'u bela' dxen cheézezeze' chee gágudxu na?

<sup>53</sup>Jesús guzre' benne' ca':

—Da li dxapa' le'e, che le'e quebe gágule bela' dxen chia' neda', Benne' Gulje' Bénneache, ne che quebe xí'ajle dxen chia', quebe gápale xel-la' nabán li lazre'. <sup>54</sup>Benne' dxawe' bela' dxen chia', ne dxi'aje' dxen chia' nape' xel-la' nabán da zeajlí canna, na' neda' gusebana' bénnea' lu zra bzebe na'. <sup>55</sup>Bela' dxen chia' naca na xel-la' wagu li lazre' chee bénne'du xu'u'le, na' dxen chia' naca na da xele'aj bénneache da naca na li lazre'. <sup>56</sup>Benne' dxawe' bela' dxen chia', ne dxi'aje' dxen chia', naque' neda' tuze, na' néda' queza' naca' bénnea' tuze. <sup>57</sup>Xra' nasele' neda' xu'u' lu ne'e xel-la' nabán li lazre', na' neda' naca bana' ne chee Lé'. Cá'anqueze bénnea' dxawe' da naca chia' neda' gaca bánqueze' ne chia' neda'. <sup>58</sup>Da nigá naca na xeta xtila da za xabáa. Xeta xtila nigá quebe naca na ca xeta maná da gulagu xra xrtáule ca', na' gudé na' gulate xúgute'. Benne' dxawe' xeta xtila nigá waca bánqueze' chadía chacanna.

<sup>59</sup>Bsede Jesús ca naca da caní naga zaj zra' benne' zan ca' lu xu'u naga dxelexzraga bénneache chee xezre Capernaum.

*Ca naca dizra' na' da dxunna na xel-la' nabán da zeajlí canna*

<sup>60</sup>Gate belén benne' zan ca' da nigá dxusede Jesús, na' benne' ca' zjácalle Jesús gulenné':

—Dizra' caní dxenná Jesús zaj nácale'e na stébe sidxu. ¿Nuzra gaca gun caní?

<sup>61</sup>Guque bé'ene' Jesús dxelexé'e chee xrtizre', na' bchebe' benne' ca':

—¿Dxuzúa dizra' nigá le'e stébe?

<sup>62</sup>¿Ajzra gunle checa' lé'ele neda', Benne' Gulje' Bénneache, xegüéna' xabáa naga

zua' nédxute? <sup>63</sup>Be' naca na da dxunna xel-la' nabán li lazre'. Da naca na bela' dxen quebe bi zaca na. Dizra' ca' da ba gucha' le'e zaj naca na chee Be', ne zaj naca na da dxelunna na xel-la' nabán li lazre'. <sup>64</sup>Bál-lale le'e quebe dxéajlele chia'.

Caní gunná Jesús lawe' da nézene' nédx-udaute nu benne' ca' quebe dxeléajle'e chee', ne nua' gudé Le' lu na' benne' guledábague' Le'. <sup>65</sup>Nadxa gunná Jesús:

—Chee le' na' gucha' le'e, quebe nu benne' gaca xidē' naga zua' neda' che quebe xedajgúa Xra' bēneea'.

<sup>66</sup>Lu zra ná'queze benne' zan ca', benne' xjácálenē' Jesús, québedxa xjácálenē' Le'.

<sup>67</sup>Nadxa Jesús bchebe' benne' chazrinnu ca' dxusédene', gunné':

—¿Cá'anqueze le'e dxaca lázrele xexíajle?

<sup>68</sup>Bechebe Simón Pedro:

—Xran, ¿nuzra chéajlentu'? Dizra' chiu' naca na da dxunna na xel-la' nabán da zeajlí canna. <sup>69</sup>Netu' dxéajlentu' chiu', ne nézentu' nacu' Cristo, Zri'ine Dios ban.

<sup>70</sup>Jesús bechebe':

—Neda' gucá'a le'e, benne' chazrinnu, na' tu benne' ládujla le'e xu'e da xriwe'.

<sup>71</sup>Da nigá gunná Jesús, bchálaje' ca naca chee Judás Iscariote, zri'ine tu benne' le' Simón, lawe' da gudé Judas nigá Jesús lu na' benne' guledábague' Le'. Naque' tu benne' chazrinnu ca' dxusede Jesús.

## 7

*Benne' biche Jesús quebe dxeléajle'e chee'*

<sup>1</sup>Gudé na' gudé Jesús naga nababa Galilea. Quebe guca lazre' tee' naga nababa Judea lawe' da dxelaca lazre' judío blau zaj zre'e na' xelútie' Le'. <sup>2</sup>Ba za laní gate judío ca' dxelézúe' lu xu'u laga' ca'. <sup>3</sup>Chee le' na' bi biche Jesús gulé'e Le':

—Quebe xegá'anu' nigáze. Bexíaj Judea, chee cá'anqueze benne' ca' dxeléajle chiu' zaj zre'e na' gaca xelelé'ene' ca da dxunu'. <sup>4</sup>Che nu benne' dxaca lazre' xelúnbe'e bēneache le', quebe dxunē' da ca' bagácheze. Lawe' da dxunu' Lue' da caní, ben na lau xúgute bēneache.

<sup>5</sup>Caní gulenné' lawe' da quebe dxeléajle benne' biche' ca' chee Jesús. <sup>6</sup>Nadxa Jesús guzre' benne' ca':

—Quebe ne zrin zra cha'a na'. Chee le'e biteteze zra waca chéajle. <sup>7</sup>Benne'

ca' zaj naca chee xezr la xu nigá quebe gaca xelecuídenē' le'e. Dxelecuídenē' neda' lawe' da dxulé'eda' neda' naca da calela da dxelún benne' ca'. <sup>8</sup>Le chjaca le'e laní na'. Quebe sa'a neda' na'a lawe' da quebe ne zrin zra cha'a.

<sup>9</sup>Ca gudé guzre Jesús benne' ca' da nigá, na' begá'ane' naga nababa Galilea na'.

*Jesús dxezrine' laní gate judío ca' dxelézúe' xu'u laga' ca'*

<sup>10</sup>Ca gudé besía'aca benne' biche Jesús, na' cá'anqueze Le' guxíaje' laní na'. Bagácheze guxíaje' chee quebe nu le'e Le'.

<sup>11</sup>Benne' xíchaje chee judío ca' belexíajle' Jesús lu laní na'. Dxelenné':

—¿Gazra zua bēneea'?

<sup>12</sup>Ládujla benne' zan ca', benne' zan bu-luchálaje' ca naca chee Jesús. Bal-le' gulenné': “Naque' benne' xrlátaje.” Xebal-le' gulenné': “Quebe naque' xrlátaje lawe' da dxexí xē'e bēneache.”

<sup>13</sup>Quebe nu benne' bchálaje' caníqueze ca naca chee' lawe' da dxelzrebe' da xelún benne' xíchaje ca' chee judío ca'.

<sup>14</sup>Ba zeaj gachaj laní na' gate guxú'u Jesús lu chale'aj xudau', na' guzú lawe' dxusede' benne' zaj zre'e na'. <sup>15</sup>Belexebane benne' judío ca', dxelenné':

—¿Ájazra na' benne' nigá da zante nézene', ne quebe bsédie' chee xudau'?

<sup>16</sup>Bechebe Jesús:

—Da dxusededa' neda' le'e quebe naca na cheézqueza'. Naca na chee Xra' nasel-le' neda'. <sup>17</sup>Che nu benne' dxaca lazre' gune' ca da dxaca lazre' Dios, na' wanézene' che da dxusededa' naca na chee Dios, u che dxenné'a' ca da naca cheézqueza'. <sup>18</sup>Benne' dxuchálaje' da naca cheézqueze' dxunē' na chee xelapa bēneache le' ba lá'ana. Bēneea' dxue lazre' xelapa bēneache ba lá'ana bēneea' gusel-le' le', benne' nigá dxenné' da li, ne quebe bi dxenné' da naca na da wen lazre'.

<sup>19</sup>Moisésqueze benne' le'e da nadxixruj bea na, na' netule le'e quebe dxuzúale dízra' chee da nadxixruj bea na na'. ¿Bizr chee na' dxaca lázrele gútele neda'?

<sup>20</sup>Belexechebe benne' zan ca':

—Xu'u lue' be' xriwe'. ¿Núzraqueze dxaca lazre' gutie' lue'?

<sup>21</sup>Jesús guzre' benne' ca':

—Tu xel-la' waca bēna' lu zra dx-upá'anale, na' xúgutele le'e dxebénele.



<sup>22</sup> Moisés benne' da zéajlele, dxechúgule late' weaj bela' chee bel-la' dxen chee zri'inele bi biudu ca' chee xelexegá'anabe' xrlátaje lau Dios. Da nigá da dxunle quebe guzú lau na gate na' zua Moisés. Guzú lau na gate zaj zra' xra xrtau Moisés cá'ante. Chee le na' le'e dxechúgule late' bela' chee bel-la' dxen chee tu bi biúda' chee xegá'anabe' xrlátaje lau Dios lácala naca zra dxupá'anale. <sup>23</sup> Che caní dxunle lu zra dxupá'anale chee quebe gusanle ca naca da bdxixruj be'e Moisés, ¿bizr chee na' dxezrá'ale neda' lawe' da bexuna' dute bel-la' dxen chee tu benne' gate naca zra dxupá'anale? <sup>24</sup> Quebe guchí'ale le'e chee tu da dxun benne' ca naca da dxel'ézele. Gate bi da guchí'ale, le gun na lu da naca xrlátaje.

*Jesús dxuchálaje' chee naga ze'e*

<sup>25</sup> Nadxa bal-la benne' ca' zaj zre'e Jerusalén gulezú lawe' dxuluchebe ljwezre':

—¿Quegá benne' nigá bénnea' dxelexí-laje' chee xelútie' le'? <sup>26</sup> Nigá zue' dxuchálaje' lálwela bénneache, na' quebe nu bi dxé Le'. ¿Zaj neze benne' xíchaje ca' da li naca benne' nigá Cristo, Bénnea' nase-l-la Dios? <sup>27</sup> Netu' nézentu' ga za' benne' nigá. Gate xida Cristo, quegá nu neze ga ze'e.

<sup>28</sup> Jesús zue' dxusédene' benne' ca' chale'aj xudau', na' gate benne' da nigá, na' gunné' zizraj:

—Dxennale núnbeale neda', ne dxennale nézele ga za'a. Bla'a nigá, quegá cheézqueza'. Bénnea' nase-l-le' neda' naque' li lazre', na' Bénnea' quebe núnbeale le'e. <sup>29</sup> Neda' núnbe'a Le' lawe' da za'a naga zua Le', na' Le' gusél-le' neda'.

<sup>30</sup> Nadxa gulaca lazre' xelél-le' Jesús. Quebe nu gudéla Le' lawe' da quebe ne zrin zra chee xelútie' Le'. <sup>31</sup> Benne' zan guléajle'e chee Jesús, na' gulenné':

—Gate xida Cristo, ¿gúnljadxé' xel-la' waca zrente ca da dxun benne' nigá?

*Benne' fariseo ca' dxelesel-le' xra'aga wen zrin chee' chee xelél-le' Jesús*

<sup>32</sup> Benne' fariseo ca' belenne' ca da dx-elenná bénneache ca naca chee Jesús, na' le', ne benne' xíchaje ca' chee bxruze ca' gulesel-le' xra'aga wen zrin chee xudau' chee xelél-le' Jesús. <sup>33</sup> Nadxa gunná Jesús:

—Wazúalena' le'e xetú chí'idau', na' xezrínqueza' naga zua Bénnea' gusél-le' neda'. <sup>34</sup> Le'e wexílajle neda', na' quebe

xezrélele neda', lawe' da quebe gaca sa'le naga sua' neda'.

<sup>35</sup> Nadxa benne' judío ca' gulezú lawe' dxuluchebe ljwezre':

—¿Gazra cheaj benne' nigá, naga quebe gaca xezreldxu Le'? ¿Waxíajle' naga zaj zra' benne' judío ca' zaj nase dínna'je' ládújla benne' xezr la xu ca' chee gusédene' benne' quebe zaj naque' judío? <sup>36</sup> ¿Bizra zéajle da nigá guzre' dxi'u: Wexílajle neda', na' quebe xezrélele neda' lawe' da quebe gaca sa'le naga sua' neda'?

*Jesús dxuchálaje' chee xegu nisa da dxunna xel-la' nabán li lazre'*

<sup>37</sup> Zra bzebe chee laní na' naca na zra blaudxa. Lu zra na' guzé Jesús, na' gunné' zizraj:

—Che nu benne' dxebílene', dxal-la' xide' naga zua' neda', na' xí'aje'. <sup>38</sup> Naca na ca naxúaj na lu xiche chee Dios, dxenné': "Benne' dxéajle'e chia', lu lázrdawe' galaj xegu nisa da gunna na xel-la' nabán."

<sup>39</sup> Da nigá gunná Jesús ca naca chee Be' Lá'azxa, Bénnea' xelezi' benne' ca' xeléal-jle'e chee Jesús, lawe' da quebe ne la' Be' Lá'azxa lawe' da quebe ne xegá'ana szren Jesús naga zua Xre'.

*Bénneache dxelaque' chupa la'a*

<sup>40</sup> Bal-la bénneache, gate belenne' da nigá, gulenné':

—Da li benne' nigá naque' Bénnea' guchalaje' waláz chee Dios, Bénnea' dxal-la' xide'.

<sup>41</sup> Xebal-le' gulenné':

—Benne' nigá naque' Cristo, Benne' guchebe lazre' Dios sel-le'.

Xebal-le' gulenné':

—¿Waca Cristo benne' Galilea? <sup>42</sup> Lu da naxúaj na lu xiche chee Dios dxenná na gaca Cristo zri'ine zre sua David, ne gaque' benne' xezre Belén, xezre na' naga gulaj David.

<sup>43</sup> Ca'an guca, gulaca benne' ca' chupa la'a ne chee Jesús. <sup>44</sup> Bal-le' gulaca lazre' xelél-le' Jesús, na' quebe nu bexazre guné na.

*Benne' xíchaje ca' chee judío ca' quebe dx-eléajle'e chee Jesús*

<sup>45</sup> Xra'aga wen zrin ca' chee xudau' belexezrine' naga zaj zra' fariseo ca', ne benne' xíchaje ca' chee bxruze ca', na' benne' caní buluchebe' xra'aga wen zrin ca':

—¿Bizr chee na' quebe guchéle bénnea'?

<sup>46</sup> Belexechebe xra'aga wen zrin ca':

—Quebe ne guchalaj nu bénneache ca dxuchalaj benne' nigá.

<sup>47</sup> Nadxa fariseo ca' gulé'e xra'aga wen zrin ca':

—¿Cá'anqueze le'e bele lataj guzí xe'e le'e? <sup>48</sup> Quebe nu ne chéajle chee bénnea', benne' xíchajé caní, ne cá'anqueze benne' fariseo ca'. <sup>49</sup> Benne' ca' dxeláajle'e chee bénnea' quebe zaj núnbe'e da nadxixruj bea na, ne zaj nabía xi'e.

<sup>50</sup> Nicodemo, bénnea' guxíaje' xeajnné'e Jesús chizrela naque' tu benne' fariseo ca', na' guzre' benne' ca':

<sup>51</sup> —Cáteze dxenná da nadxixruj bea chee dxu quebe gaca guzría xidxu tu benne' che quebe ne xénedxu xechébe' chee nézedxu che bi da nabague'e.

<sup>52</sup> Nadxa belexechebe benne' ca':

—¿Nácaquezu' lue' benne' Galilea? Gunná' xanne' da naxúaj na lu xiche chee Dios, na' le'enu' netú benne' dxuchalaje' waláz chee Dios quebe ne gálaje' naga nababa Galilea, naga zaj zra' bénneache quebe zaj naca xánnie' judío.

<sup>53</sup> Nadxa tu tu benne' ca' xeajxaque' lizre'.

## 8

<sup>1</sup> Na' Jesús guzé'e zéaje' lu Xi'a Xaga Olivo.

*Jesús dxuchálajle' tu nu'ula dxune' dul-la dxíchaje' xrba chee xel-la' nuchaga na'*

<sup>2</sup> Zra xula, gate guxaní, na' bezrín Jesús chale'aj xudau' na'. Xúgute benne' ca' gulebigue' naga zua Jesús, na' Le' gudxé'e, ne guzú lawé' dxusédené' benne' ca'. <sup>3</sup> Nadxa benne' ca' dxuluxúzajle'e da nadxixruj bea Dios, ne benne' fariseo ca' guleché'e tu nu'ula naga zua Jesús, belelé'ene' le' dxune' dul-la dxíchaje' xrba chee xel-la' nuchaga na'. Buluzé' nu'ula na' laduj benne' zaj zré'e na', 'na' gulé'e Jesús:

—Benne' Wesede, nu'ula nigá blé'entu' le' dxune' dul-la dxíchaje' xrba chee xel-la' nuchaga na'. <sup>5</sup> Da bdxixruj be'e Moisés dxenná be'e netu' gútentu' nu'ula caní, güentu' le' xiaj. ¿Bizra dxenná' Lue'?

<sup>6</sup> Caní gulenná benne' ca' chee xuludxixre' Jesús chee xelezé'quene' xelagu zria Le'. Nadxa gudxé' luche Jesús, ne guzú lawé' dxuzúaje' lu xu nen zrube ne'e. <sup>7</sup> Benne' ca' buluchébequeze' Jesús, na' Le' bezé' dxe'e benne' ca':

—Nútetezlake le'e quebe nabágate dul-la, waca su laule güele nu'ula nigá xiaj.

<sup>8</sup> Na' bebé' luche Jesús, ne búzajqueze' lu xu. <sup>9</sup> Benne' ca', gate belenne' da nigá, quebe bzua xichaj lázrdawe' le' zrize, na' belexedxúaje' tu weaje'. Belexedxúaj za'a benne' gúlaxda, na' ca belexedxúaj xúgute benne' ca' dxelagu zrié' nu'ula', na' begá'ana Jesús tuze' nen nu'ula na', ze' laduj benne' ca' dxuluzé' nague' chee'. <sup>10</sup> Nadxa bezé' Jesús, ne gate québedxa nu benne' ca' ble'e Jesús, benne' dxulagu zrié' nu'ula na', nadxa guzre' le':

—Nu'ula, ¿gazra na' benne' ca' gulagu zrié' lue'? ¿Quebe nu chilá' benne' guzría xi'e lue'?

<sup>11</sup> Nu'ula na' gunné':

—Quebe nu chilá', Xran.

Nadxa Jesús guzre' nu'ula na':

—Cá'anqueze neda', quebe guzría xi'a lue'. Bexíaj, ne québedxa gunu' dul-la.

*Jesús dxusení'e lu xichaj lázxdau bénneache*

<sup>12</sup> Bhálajle' Jesús benne' ca' xecha lasa, gunné':

—Neda' naca' xel-la' naxaní' chee lu xichaj lázxdau bénneache. Benne' dxedálene' neda' gape' xel-la' naxaní' nigá da gunezruj na le' xel-la' nabán li lazre', na' cabata' tadxé' lu da chul-la chee dul-la da zaj nabague'.

<sup>13</sup> Nadxa benne' fariseo ca' gulé'e Le':

—Lue' dxexechebu' cheé'quezu', na' da dxexechebu' quebe bi zaca na.

<sup>14</sup> Bechebe Jesús:

—Da dxexecheba' zaca na lálala néda'queza' dxexecheba' cheé'queza'. Neda' nezda' gala za'a, ne gala cha'a. Le'e quebe nézele gala za'a, ne gala cha'a. <sup>15</sup> Le'e dxuchí'ale cáteze dxenná xichaj lázrdau. Bla'a neda', quegá chee guchi'a ca da dxun nu benne'. <sup>16</sup> Che dxuchi'a, dxuchi'a cáteze naca na, lawé' da quebe dxuchi'a néda'za'. Xra' nasele' neda' dxuchi'e tu zren nen neda' ca naca da dxelún bénneache. <sup>17</sup> Lu da nadxixruj bea chee le'e naxúaj gate zaj zra' chupa benne' dxexechebe' tuz ca dxelenné', naca da li xrtizra' benne' ca'. <sup>18</sup> Néda'queza' dxexecheba' da naca cheé'queza', na' Xra' nasele' neda', cá'anqueze dxexechebe' chia'.

<sup>19</sup> Nadxa benne' ca' buluchébe' Jesús:

—¿Ga na' Xrau'?

Jesús bechebe':

—Le'e quebe núnbeale da nácaqueza' neda', ne quebe núnbeaquezle Xra'. Chela da li núnbeale neda', cá'anqueze núnbeale Xra'.

<sup>20</sup>Da caní bchalaj Jesús dxácatē na' dxusé-dene' bēneache chale'aj xudau' naga zaj nnita xi'ina dumí cheē xudau'. Quebe nu gudēla Lē' lawe' da quebe ne zrin zra cheē'.

*Dxenná Jesús: "Naga cha'a neda' quebe gaca sa'le le'e"*

<sup>21</sup>Nadxa Jesús guzre' benne' ca':

—Wexá'a neda', na' le'e xexilajle neda', na' wátele lu dul-la nabágale, lawe' da naga cha'a neda', le'e quebe gaca sa'le.

<sup>22</sup>Nadxa benne' judío ca' gulé ljwezre':

—¿Gute cuine', ne cheē lē na' dxenné' quebe gaca chéajdxu naga cheaj Lē'?

<sup>23</sup>Nadxa Jesús guzre' benne' ca':

—Le'e nácale cheē zran xabáa nigá. Neda' naca' cheē xabáa na'la. Le'e nácale cheē xēzr la xu nigá. Neda' quebe naca' cheē xēzr la xu nigá. <sup>24</sup>Cheē lē na' gucha' le'e wátele lu dul-la nabágale, lawe' da che quebe dxéajlele zúaqueza' neda', wátele lu dul-la nabágale.

<sup>25</sup>Nadxa benne' ca' buluchebe' Jesús:

—¿Nuzra nacu' Lue'?

Bechebe Jesús:

—Nácaqueza' ca ba gucha' le'e nédxu-daute. <sup>26</sup>Déle'e da dxal-la' nnia' chee, ne da dxal-la' guchi'a ca naca da dxunle. Bēneea' gusél-le' neda' dxenné' da li, na' da dxapa' bēneache naca na da ba benda' gunné Lē', lácala quebe dxezaca ba lázrele'na.

<sup>27</sup>Benne' ca' quebe guléajni'ine' dxuchálajle Jesús lē' ca naca cheē Dios, Xre'.

<sup>28</sup>Nadxa Jesús guzre' benne' ca':

—Gate le'e chísale sibe neda', Benne' Gulje' Bēneache, nadxa xúnbeale zúaqueza' neda', ne quebe bi dxuna' da naca cheézqueza'. Tuze dxennéa' ca da ba ble'e Xra' neda'. <sup>29</sup>Bēneea' gusél-le' neda' zúalequeze' neda'. Xra' quebe nucá'ane' neda' tuza' lawe' da tu dxúnzqueza' ca da dxezaca ba lazre' Lē'.

<sup>30</sup>Ca gunná Jesús da caní, guléajle benne' zan cheē'.

*Benne' zaj naque' cheē Dios, ne benne' ca' nuxru dul-la lē'*

<sup>31</sup>Nadxa Jesús guzre' benne' judío ca', benne' dxeléajle'e cheē':

—Che le'e se típale lu da dxapa' le'e, da li nácale neda' tuze. <sup>32</sup>Gúnbeale da li, na' da li na' guselá na le'e.

<sup>33</sup>Belexechebe benne' zan ca':

—Netu' nácantu' xrtia Abraham, ne quebe ne chú'untu' lu na' nu benne' ca benne' zaj nada'u. ¿Bizr cheē na' dxenná'u Lue' lantu'?

<sup>34</sup>Jesús guzre' benne' ca':

—Da li dxapa' le'e, xúgute benne' dxelúnqueze' dul-la, dúl-laqueze na' nuxru na benne' ca'. <sup>35</sup>Nu benne' xu'e lu na' tu benne' ca benne' nada'u quebe tu súazqueze' xu'u na'. Zrí'inequeze bēneea' wazúatequezebe'. <sup>36</sup>Cheē lē na', che neda', Zrí'ine Xra', guselá' le'e, da li láquezele le'e.

<sup>37</sup>Nezda' nácale le'e xrtia Abraham. Na'a dxaca lázrele gútele neda' lawe' da quebe dxezí' lu na'le da dxapa' le'e. <sup>38</sup>Neda' dxuchálaja' ca naca da ble'e Xra' neda', na' le'e dxunle ca da guzre xráquezele le'e.

<sup>39</sup>Belexechebe benne' ca':

—Xra xrtauntu' naca Abraham.

Na' Jesús guzre' benne' ca':

—Chela nácale da li xrtia Abraham, na' gunle ca da ben Abraham. <sup>40</sup>Lácala gucha' le'e da li da ble'e Xra' neda', le'e dxaca lázrele gútele neda'. Abraham cabata' benē' da caní. <sup>41</sup>Le'e dxúnquezele ca da dxun xráquezele.

Nadxa benne' ca' gulé'e Jesús:

—Netu' quebe nácantu' bi lan. Zua tuze Xrantu', Dios.

<sup>42</sup>Nadxa Jesús guzre' benne' ca':

—Chela naca Dios da li Xrale, le'e wazrí'ile neda' lawe' da za'a neda' naga zua Dios, ne zúaqueza' nigá. Quebe za'a da naca cheézqueza'. Dios nasel-le' neda'. <sup>43</sup>¿Bizr cheē na' quebe dxezéquele chéajni'ile da dxennéa'? Naca na lawe' da quebe dxaca lázrele xénele dizra' chia'. <sup>44</sup>Xráquezele le'e naca da xriwe'. Le'e nácale cheē da na', ne dxaca lázrele gunle ca da dxaca lazre' lē na. Da xriwe' na' naca na wete benne' nédxudaute. Cabata' dxenné na da li lawe' da quebe bi zua da li nen lē na. Gate dxun lazre' na, dxenné na cáteze naca na, lawe' da tu dxun lázrezqueze na, ne naca na da guzú lau na ben lazre' na. <sup>45</sup>Lácala dxapa' le'e da li, le'e quebe dxéajlele chia'.

<sup>46</sup>¿Núla'le le'e séquele gulé'ele nabaga neda' tu dul-la? Che dxennéa' da li, ¿bizr cheē na' quebe dxéajlele chia'? <sup>47</sup>Benne' naque' cheē Dios dxenne' dizra' cheē Dios. Le'e quebe

nácale chee Dios. Chee le na' quebe dxaca lázrele xénele chee Dios.

*Cristo ba zúaqueze' nédxudxa ca Abraham*

<sup>48</sup>Nadxa benne' judío ca' gulé'e Jesús:

—Da li dxennantu' gate dxennantu' nacu' benne' Samaria, ne xu'u be' xriwe'.

<sup>49</sup>Jesús bechebe':

—Quebe xu'a be' xriwe'. Neda' dxapa' ba lá'ana Xra' Dios, na' le'e dxuzúale neda' chalá'ala. <sup>50</sup>Quebe dxe'a gunne xue chee gápale neda' ba lá'ana, ne si' lu na'le neda'. Zua Benne' xabáa dxezá lazre' gápale neda' ba lá'ana, ne Le' dxuchi'e ca da dxunle. <sup>51</sup>Da li dxapa' le'e: Benne' dxuné' ca naca dizra' chia', cabata' gátequeze bénnea'.

<sup>52</sup>Nadxa benne' judío ca' belexechebe':

—Na'a nézquezentu' xu'u be' xriwe'. Ba gulátequeze Abraham, ne xúgute benne' ca' buluchálaje' waláz chee Dios, na' lue' dxennáu' benne' gune' ca naca dizra' chiu' cabata' gátequeze'. <sup>53</sup>¿Nácadxu' szrendxa ca xra xrtáudxu Abraham? Gútequeze Le', ne cá'anqueze gulate benne' ca' buluchá-laje' waláz chee Dios. ¿Bízraqueze dxugune cuinu'?

<sup>54</sup>Bechebe Jesús:

—Che neda' dxucá'ana cuina' ba lá'ana, quebe bi zaca na. Benne' dxape' neda' ba lá'ana naque' Xra', Bénnea' dxennale le'e naque' Xrale. <sup>55</sup>Le'e quebe núnbeale Le'. Neda' núnbeaqueza' Le'. Chela dxennéa' quebe núnbe'a Le', naca' wen lazre' ca nácale le'e. Neda' da li núnbe'a Le', ne dxuna' ca da dxenné'. <sup>56</sup>Xra xrtáule Abraham, bénnea' gutié' nédxudaute, gubéle'ene' lawe' da dxal-la' lé'ene' zra zua neda'. Blé'ene' na, na' gubéle'ene'.

<sup>57</sup>Nadxa benne' judío ca' gulé'e Jesús:

—Québequeze ne su' chi xun iza, na' ¿dxennáu' blé'enu' Abraham?

<sup>58</sup>Jesús bechebe':

—Da li dxapa' le'e, nédxudaute gate quebe ne sua Abraham, báchequeze zua' neda'.

<sup>59</sup>Nadxa gulequ'é'e xiaj chee xelu'e Jesús, na' Le' bcache cuine'. Bde' ládujla benne' ca', na' bedxúaje' chale'aj xudau', ne bezé'e.

## 9

*Jesús dxexune' tu benne' gúlaje' la chul-la*

<sup>1</sup>Gate gudé Jesús tu lataj, na' blé'ene' tu benne' gúlaje' la chul-la. <sup>2</sup>Benne' ca' dxuséde Jesús buluchebe' Le':

—Benne' Weséde, ¿bizr chee na' gulaj benne' nigá la chul-la? ¿Naca na lawe' da belún xra xrne'e dul-la, che lawe' da ben léqueze' dul-la?

<sup>3</sup>Jesús guzre' benne' ca':

—Quebe naca na lawe' da ben le' dul-la, ne quebe naca na lawe' da belún xra xrne'e dul-la. Naca na chee gulé'e lau xel-la' szren chee Dios ne chee benne' nigá. <sup>4</sup>Dxácate naca te zra dxal-la' guna' zrin chee Bénnea' nasel-le' neda' lawe' da ba za da chul-la gate netú benne' quebe seque' gune' zrin. <sup>5</sup>Dxácate ne zua' neda' xezr la xu nigá, naca' xel-la' naxani' chee bénneache.

<sup>6</sup>Ca gudé gunná Jesús da nigá, na' bzre'e zrene' lu xu, ne bene' guna' nen zrene' na', na' btupe' na xiaj lau benne' la chul-la na'. <sup>7</sup>Nadxa guzre' le':

—Guxíaj xeajtibe lau' lu beaj nisa nazí le na Siloé. (Dizra' nigá zéaje na: Da Nasel-la Na.)

Benne' la chul-la na' guxíaje' xeajtibe lawe', na' gate bezrine' ba dxelé'ene'.

<sup>8</sup>Nadxa benne' walíizr chee' ca', ne benne' ca' belelé'ene' le' nédxula, naque' la chul-la, gulenné':

—¿Quegá benne' nigá bénnea' dxebé'e dxenabe' guna'?

<sup>9</sup>Bal-le' gulenné':

—Le' na'.

Xebal-le' gulenné':

—Quegá le' na', na' ca'an ca dxenné'e.

Benne' ná'queze gunné':

—Neda' na'.

<sup>10</sup>Nadxa buluchebe' le':

—¿Ájazra na' ba dxelé'enu'?

<sup>11</sup>Bechebe bénnea':

—Bénnea' le' Jesús bene' guna', ne btupe' na xiaj lawa', na' gunné': “Guxíaj beaj nisa nazí le na Siloé, xeajtibe lau'.” Guxá'a na', na' gate gudiba' lawa', guca ble'eda'.

<sup>12</sup>Nadxa buluchebe' le':

—¿Ga na' zua bénnea'?

Le' guzre' benne' ca':

—Quebe nezda'.

*Benne' fariseo ca' dxuluchebe' bénnea' guque' la chul-la*

<sup>13</sup>Nadxa benne' ca' guleché'e bénnea' guque' la chul-la lau benne' fariseo ca'.

<sup>14</sup>Naca na zra dxulupá'ana judío ca' gate ben Jesús guna', ne btupe' na xiaj lau benne' la chul-la na'. <sup>15</sup>Chee le na' benne' fariseo ca'

buluchêbe' bénnea' guque' la chul-la ájazra guca dxelé'ene'. Le' guzre' benne' ca':

—Bzrië' guna' xiaj lawa', na' bexiba' na, ne dxelé'eda'.

<sup>16</sup>Nadxa bal-la benne' judío ca' gulenné':

—Bénnea' bënë' da nigá quebe naque' cheë Dios lawe' da quebe dxape' ba lá'ana zra dxupá'anadxu.

Na' xebal-le' gulenné':

—¿Ájazra na' dxunë' xel-la' waca zrente caní che naque' benne' dul-la?

Ca'an guca, gulaca chupa la'a benne' fariseo ca'. <sup>17</sup>Xecha lasa buluchêbe' bénnea' guque' la chul-la:

—¿Bi dxennáu' lue' cheë bénnea' bexunë' lue'?

Le' gunné':

—Neda' dxennéa' naque' benne' dxuchalaje' waláz cheë Dios.

<sup>18</sup>Benne' judío ca' quebe guléajle'e guque' la chul-la, ne na'a dxelé'ene', na' gulenné' xra xrna bénnea' bexaque'. <sup>19</sup>Na' buluchêbe' xra xrna bénnea':

—¿Nácaqueze benne' nigá zrí'inele, dxennale le'e gúlaje' la chul-la? ¿Ájazra na' dxaca dxelé'ene'?

<sup>20</sup>Belexechebe xra xrne'e:

—Nézentu' benne' nigá naque' zrí'inentu', ne gúlaje' la chul-la. <sup>21</sup>Quebe nézentu' aja guca dxelé'ene' na'a, ne quebe nézentu' nu bexún xiaj lawe'. Le guchebe le'. Ba nápaqueze' iza, ne waca xechébequeze'.

<sup>22</sup>Caní gulenná xra xrne'e lu xel-la' dx-elezrebe lawe' da ba zaj nun benne' xíchaje cheë judío ca' tuze dizra' xelexebéaje' xu'u na' núteteze benne' xechêbe' Jesús naque' Cristo. <sup>23</sup>Cheë le' na' gulenná xra xrne'e: "Le guchebe le'. Ba nápaqueze' iza."

<sup>24</sup>Nadxa benne' judío ca' belenné' bénnea' guque' la chul-la, na' gulé'e le':

—¿Gunné da li lau Dios! Nézentu' naca benne' nigá benne' dul-la.

<sup>25</sup>Le' bechébe':

—Quebe nezda' che naque' benne' dul-la, che cabí. Tuze da nezda'. Neda' guca' la chul-la, na' na'a dxelé'eda'.

<sup>26</sup>Na' buluchébequeze' le':

—¿Bizra bënë' chiu'? ¿Ájazra bënë' cheë bexunë' xiaj lau'?

<sup>27</sup>Na' bechébe bénnea':

—Ba gucha' le'e, ne quebe dxénele chia'. ¿Bizr cheë na' dxaca lázrele nmia' xetú?

¿Cá'anqueze le'e dxaca lázrele gácale Le' tuze?

<sup>28</sup>Nadxa benne' judío ca' gulenné' schanni' cheë bénnea' guque' la chul-la, dxelenné':

—Lue' da'u bénnea', na' netu' da'ntu' Moisés. <sup>29</sup>Netu' nézentu' Dios bchálajlene' Moisés. Quebe nézentu' ga benne' benne' nigá.

<sup>30</sup>Nadxa bénnea' bechébe':

—Da nigá naca na da dxebáneda'. Le'e quebe nézele ga bénnea', na' bexunë' xiaj lawa'. <sup>31</sup>Nézquezdxu Dios quebe dxenne' cheë benne' dul-la. Tuze dxenne' cheë benne' ca' dxulucá'ana szrenë' Le', ne dx-elunë' ca da dxaca lazre' Le'. <sup>32</sup>Quebe ne xendxu che nu benne' xexunë' tu benne' gúlaje' la chul-la. <sup>33</sup>Chela benne' nigá quebe naque' cheë Dios, quebe gaca bi gune'.

<sup>34</sup>Nadxa gulé'e le':

—Ca gúlajquezu' dxulé'e na nabagu' dul-la. Na'a, ¿dxaca lazru' guzéajni'inu' netu'? Nadxa belexebéaje' le' lu xu'u na'.

*Benne' zaj naque' la chul-la lu xichaj lázrdawe'*

<sup>35</sup>Jesús benne' belexebéaje' bénnea' guque' la chul-la, na' gate bezrague' le', guzre' le':

—¿Dxéajle'u lue' cheë Zri'ine Dios?

<sup>36</sup>Benne' na' guzre' Jesús:

—Xran, guzre neda' Nu na', cheë chéajle'a cheë'.

<sup>37</sup>Bechébe Jesús:

—Ba blé'equenznu' Le'. Neda', dxucháajlëna' lue' naca' Bénnea'.

<sup>38</sup>Nadxa benne' na' bzu zribe' lau Jesús, na' gunné':

—Dxéajle'a chiu', Xran.

<sup>39</sup>Nadxa gunná Jesús:

—Neda' bla'a lu xezr la xu nigá cheë guchi'a ca da dxelún bénneache, cheë xelexé'e la chul-la ca', ne cheë xelexaca ca la chul-la benne' ca' dxelenné' dxelexé'ene'.

<sup>40</sup>Nadxa bal-la benne' fariseo ca', benne' zaj zre'e nen Jesús, gate belenne' da nigá gunná Jesús, buluchêbe' Le':

—¿Cá'anqueze netu' nácantu' la chul-la?

<sup>41</sup>Jesús bechébe':

—Chela nácale le'e la chul-la quebe nabágale ca naca dul-la da benle. Dxnalle dxelé'ele, na' cheë le' na' nabágale dul-la.

## 10

*Dxuchalaj Jesús da dxul'é na ca naca chee le'aj chee zrila' ca'*

<sup>1</sup>Na' gunná Jesús:

—Da li dxapa' le'e, bénnea' quebe dxu'e dxu'a dxa xu'u chee le'aj chee zrila' ca', na' dxu'e naga xula, naque' gubán, ne tu dxebánzqueze'. <sup>2</sup>Bénnea' dxu'e dxu'a dxa xu'u na' naque' benne' dxuxúequeze' zrila' ca'. <sup>3</sup>Bénnea' zue' dxu'a dxa xu'u dxesá-laje' chee chu'u bénnea' dxuxúequeze'-ba', na' zrila' ca' dxelexúnbeaba' chi'e. Benne' nigá dxu'e la tu tu zrila' ca', ne dxebéaje'-ba' lu le'aj cheeba'. <sup>4</sup>Ca dxedé dxebéaje' xúguteba', na' dxebía lawe' lauba', na' zrila' ca' zjácáleba' Le', lawe' da dxelexúnbeaba' chi'e. <sup>5</sup>Quebe zjácáleba' tu benne' quebe zaj núnbeaba'. Dxuluzrúnnujba' lau benne' na' lawe' da quebe dxelexúnbeaba' chi'i benne' quebe zaj núnbeaba'.

<sup>6</sup>Bchálajle Jesús benne' ca' da dxul'é e nigá, na' benne' ca' quebe guléajni'ine' bi zéaje da guzre Jesús le'.

*Jesús naque' benne' chawe' dxuxúe' zrila' ca'*

<sup>7</sup>Nadxa Jesús guzre' benne' ca' da xula:

—Da li dxapa' le'e, neda' naca' dxa xu'u naga dxelú'u bénneache zaj naque' ca' zrila' chia' ca'. <sup>8</sup>Xúgute' benne' dxuluxúe' zrila', benne' belelé'e nédxudxa ca' neda', gulaque' gubán, ne tu gulebánzqueze'. Zrila' ca' quebe beléneba' chee benne' ca'. <sup>9</sup>Neda' naca' dxa xu'u. Bénnea' chu'e ne chia' neda', láqueze bénnea'. Gaque' ca' tu zrila' dxu'uba', ne dxuajba' le'aj cheeba', na' dx-ezréleba' zri'edu dxáguba'.

<sup>10</sup>'Benne' gubán ze'e tuze chee cuane'-ba', ne chee gútete'-ba, ne chee guzría xi'te'-ba'. Neda' bla'a chee gápale xel-la' nabán, ne chee gapa xánnele na. <sup>11</sup>Neda' naca' benne' chawe' dxuxú'a' zrila' ca'. Benne' chawe' dxuxúe' zrila' ca' dxuzúe' xel-la' nabán chee chee guselé' zrila' ca'. <sup>12</sup>Benne' dxuxúe'-ba' lawe' da dx-ezi'e lazruj, gate dxelé'ene' za becu' xi'a, na' dxusane' zrila' ca', ne dxuzrúnnuje', lawe' da quebe nácaqueze' benne' dxuxúe' leba', na' zrila' ca' quebe zaj náca' be cheézqueze'. <sup>13</sup>Benne' nigá dxuzrúnnuje' lawe' da dxunze' zrin chee si'e lázruje', na' quebe dxe'e gunne xue cheeba'.

<sup>14-15</sup>'Neda' naca' benne' chawe' dxuxú'a' zrila' ca'. Cáteze núnbea Xra' neda',

na' neda' núnbe'a Xra', cá'anqueze neda' núnbe'a zrila' chia' ca', na' leba' zaj núnbeaba' neda'. Neda' dxuzú'a' xel-la' nabán chia' chee guselá' zrila' ca'. <sup>16</sup>Cá'anqueze zaj zra' zrila' chia' quebe zaj zra'ba' lu le'aj nigá. Dxa-la' cheajxexri'a-ba'. Zrila' ca' xelunba' ca' dxenná xrtizra', ne xelácaba' tu cueze, na' tuze benne' guxúe' leba'.

<sup>17</sup>Xra' nazrí'ine' neda' lawe' da dxuzú'a' xel-la' nabán chia', na' xecá'a na. <sup>18</sup>Quebe nu seque' cua xel-la' nabán chia'. Neda' xuzú'a' na cáteze dxaca lázrequeza' neda'. Napa' xel-la' dxenná bea guzú'a' na, ne chee xecá'a na. Da nigá naca na da gunná be'e Xra' neda' guna'.

<sup>19</sup>Gate benne' judío ca' belenne' dizra' caní, na' gulaque' chupa la'a xetú. <sup>20</sup>Benne' zan benne' ca' gulenné':

—¿Bizr chee na' dxuzé' nágale chee benne' nigá? Xu'e be' xriwe', ne nadá xichaj lázrdawe'.

<sup>21</sup>Xebal-le' gulenné':

—Tu benne' xu'e be' xriwe' quebe séquene' guchálaje' caní. ¿Waca tu be' xriwe' xexún na xiaj lau tu benne' la chul-la?

*Dxuluzú'a benne' judío ca' Jesús chala'ala*

<sup>22</sup>Naca na beu' zaga, na' lu xezre Jerusalén zaj zue' laní gate dxulusá lazre' ca guca gate gulegú'e xudau' na' lu na' Dios.

<sup>23</sup>Jesús dxedé' chale'aj xudau' na' naga naca lachila chee Salomón. <sup>24</sup>Nadxa benne' judío ca' guléchaje' Le', ne gul'é Le':

—¿Bátalaqueze québedxa gunu' lue' chupa lázrentu'? Che lue' nacu' Cristo, Bénnea' sel-la Dios, gunnátégala.

<sup>25</sup>Bechebe Jesús:

—Ba gucha' le'e, na' quebe guxéajlele chia'. Ca naca da dxuna' neda', ne dx-uchíneda' xel-la' dxenná bea chee Xra', dxulul'é na nu naca' neda'. <sup>26</sup>Le'e quebe dxéajlele chia' lawe' da quebe náca-le zrila' chia', ca ba gucha' le'e nédx-ula. <sup>27</sup>Zrila' chia' dxelexúnbeaba' chi'a, na' neda' núnbe'a-ba', na' leba' dxelauba' neda'. <sup>28</sup>Benne' zaj naque' zrila' chia', dxunézruja' chee benne' ca' xel-la' nabán da zeajlí canna, ne cabáta'quezdxa xelebía xi'e, na' quebe nu seque' xecá'a le' lu na'a neda'. <sup>29</sup>Xra' benne' neda' benne' caní, na' Le' nácadxe' szren ca xúgute' béneache, na' quebe nu seque' xecá'a benne' ca' lu na' Xra'. <sup>30</sup>Neda', ne Xra' tuze nácantu'.

<sup>31</sup> Nadxa benne' judío ca' gulequé'e xiaj xetú chee xelútíe' Jesús. <sup>32</sup> Nadxa Jesús guzre' benne' ca':

—Ba bënqueza' da zan da chawe' laule le'e, dxuchíneda' xel-la' waca chee Xra'. ¿Nula chee da chawe' caní güele neda' xiaj?

<sup>33</sup> Belexechebe benne' judío ca':

—Quebe güentu' lue' xiaj lawe' da nunu' da chawe'. Dxuntu' na lawe' da gunnéu' schanni' chee Dios. Lue' nacu' bënneache, na' dxun cuinu' Dios.

<sup>34</sup> Nadxa Jesús guzre' benne' ca':

—Lu da nadxiruj bea chee le'e naxúaj xrtizra' Dios, dxenná na: Le'e nácale dios ca'. <sup>35</sup> Quebe gaca tábagadxu ca da naxúaj na lu xiche chee Dios, na' Diósqueze' gunné' chee benne' ca' gulez'í'e xrtizre' zaj naque' dios ca'. <sup>36</sup> Che Dios bzue' neda', ne gusél-le' neda' lu xezr la xu nigá, ¿bizr chee na' dxennale le'e gunnéa' schanni' chee Dios lawe' da gunnéa' naca' Zri'ine Dios? <sup>37</sup> Che quebe dxuna' ca naca da dxun Xra', quebe chéajlele chia'. <sup>38</sup> Che dxuna' na, lácala quebe dxéajlele chia' ne chee da dxennéa', le chéajle chia' ne chee da ca' dxuna', chee nézele Xra' zúalene' neda', na' neda' zúalena' Xra'.

<sup>39</sup> Xetú lasa gulaca lazre' xelex-le' Jesús, na' Le' gulé' lu na' benne' ca'.

<sup>40</sup> Nadxa bezrín Jesús dxu'a xegu Jordán chalá'a naga dxalaj gubizra, na' begá'ane' na', naga guzúa Juan nédxute dxuchúe' bënneache nisa. <sup>41</sup> Benne' zan xjaque' xea-jlenné'e Jesús, na' gulenné':

—Juan, da li quebe bi xel-la' waca zren bene', na' xúguté da gunné' ca naca chee benne' nigá naca na da li.

<sup>42</sup> Benne' zan guléajle'e chee Jesús lataj na'.

## 11

*Ca guca gate gute Lázaro*

<sup>1</sup> Zua tu benne' dxé'ene' le' Lázaro, benne' xezre Betania, da naca na lazre María, ne bi bile' le' Marta. <sup>2</sup> María nigá, bi zan Lázaro, benne' dxé'ene' na', naque' nu'ula na' gulu'e ni'a Jesús da na' dxelále'e zixre, ne bsebize' na nen xicha xícha-je'. <sup>3</sup> Dxúpaté nu'ula caní gulesel-le' benne' xeaizeze' Jesús:

—Xran, bënnea' nazrí'inu' quebe chawe' zue'.

<sup>4</sup> Ca ben Jesús da nigá, na' gunné':

—Da dxé'ene' quebe naca na da gútete na le'. Naca na chee gulé'e lau na xel-la' szren chee Dios, ne cá'anqueze chee gulé'e lau na xel-la' szren chia' neda', Zri'ine Dios, ne chee xel-la' we' na'.

<sup>5</sup> Lácala nazrí'i Jesús Marta, ne bi bile', ne Lázaro, <sup>6</sup> gate benne' quebe chawe' zua Lázaro na', begá'ane' naga zue' xechupa zra. <sup>7</sup> Ca gudé na' guzre' benne' ca' dxusé-dene':

—Le chu'u naga nababa Judea xetú.

<sup>8</sup> Nadxa benne' ca' gulé'e Le':

—Benne' Weséde, ná'asca benne' judío ca' zaj zre'e na' gulaca lazre' xelútíe' Lue' nen xiaj. ¿Dxaca lazru' chéaju' na' xetú?

<sup>9</sup> Jesús guzre' benne' ca':

—¿Quebe nun Dios duté te zra gate dx-elún bënneache zrin? Che nu benne' dxedé' te zra, quebe cheajchazíe' lu da stebe lawe' da dxelé'ene' xel-la' naxaní' da nuzúa Dios lu xezr la xu nigá. <sup>10</sup> Che nu benne' dxedé' chizrela, dxechégü'e lawe' da quebe zúale xel-la' naxaní' le'.

<sup>11</sup> Ca gudé na' guzre Jesús benne' ca':

—Benne' ljwézredxu Lázaro ba dxásie'. Cha'a neda' cheajsebana' le'.

<sup>12</sup> Nadxa benne' ca' gulé'e Jesús:

—Xran, che dxásie', wexaque'.

<sup>13</sup> Da nigá da gunná Jesús zéaje na ba gute Lázaro. Benne' ca' dxusédené' guléquene' gunná Jesús dxáseze'. <sup>14</sup> Nadxa Jesús bzéa-jni'ine' benne' ca', gunné':

—Ba gütequeze Lázaro. <sup>15</sup> Dxebeda' lawe' da quebe zua' na'. Caní gácadxa chawe' chee le'e, chee chéajlele chia'. Le chu'u cheajnnadxu Lázaro.

<sup>16</sup> Nadxa Tomás, bënnea' léqueze' bilide', guzre' xezícala benne' ca':

—Le chú'ueze dxi'u chee gátedxu tu zren nen Jesús.

*Jesús naque' benne' dxusebane' benne' gate ca', ne benne' dxunne' dxi'u xel-la' nabán li lazre'*

<sup>17</sup> Gate belezrine' xezre Betania, na' bene Jesús gudapa zra bulucache' Lázaro.

<sup>18</sup> Betania dxe' na gáguze naga dxe' Jerusalén, ca cadite sadxu tu chí'idau'ze zrindxu na', <sup>19</sup> na' benne' zan benne' judío ca' xjaque' xeaajlenné'e Marta ne María, na' xulunézruje' le' xel-la' zren lazre' lawe' da gute bi zane'. <sup>20</sup> Gate ben Marta ba za' Jesús, na' guzé'e zeaixrígale' Le', na' María begá'ane' xu'u. <sup>21</sup> Marta guzre' Jesús:

—Xran, chela zu' nigá, quebe gute bi zana'. <sup>22</sup> Neda' nezda' Dios gunne' Lue' bitéteze da nabu'.

<sup>23</sup> Jesús gunné':

—Webán bi zanu'.

<sup>24</sup> Nadxa Marta guzre' Le':

—Nezda' webane' lu zra xelexebán benne' gate ca', zra bzebe na'.

<sup>25</sup> Nadxa gunná Jesús:

—Neda' naca' benne' dxusebáne' benne' gate ca', ne benne' dxunne' xel-la' nabán li lazre'. Nu benne' dxéajle'e chia', lálaca gatié', webane', <sup>26</sup> na' xúgute benne' zaj naca bane', ne dxeléajle'e chia', québe-queze xelatíe' tu chí'ize. ¿Dxéajle'u da nigá?

<sup>27</sup> Marta guzre' Jesús:

—Awe', Xran. Neda' dxéajle'a nacu' Cristo, Zri'ine Dios, Bénnea' guchébe lazre' Dios sel-le'.

*Jesús dxebezre' lawe' da zaj zua baxache' nu'ula ca'*

<sup>28</sup> Ca gudé gunná Marta da nigá, na' guxiá-je' xejzenne' bi bile' María, na' guzre' le' zrize:

—Ba bla' Benne' dxusede, ne dxenné' lue'.

<sup>29</sup> Ca ben María da nigá, na' guxase' guzé'e, xejjné'e Jesús. <sup>30</sup> Jesús quebe ne chu'e xezre na', na' zue' naga bezraga Marta Le'. <sup>31</sup> Benne' judío ca' zaj zra' xu'u na' dxulunézruje' María xel-la' zren lazre', gate belelé'ene' guxasa María, ne hadí bdxúaje', na' xjácále benne' caní le', dx-eléquene' zéaje' dxu'a ba zeajchezre' na'.

<sup>32</sup> Gate bzrin María naga zua Jesús, na' bzu zribe' zran ni'a Jesús, gunné':

—Xran, chela zu' nigá, quebe gute bi zana'.

<sup>33</sup> Gate ble'e Jesús dxebezre María, ne cá'anqueze dxelebezre judío ca', benne' zjácálene' María, na' bexíajle'e'ne', ne guzúe' stebe lu lázrdawe'. <sup>34</sup> Na' bchébe' benne' ca':

—¿Ga bcáchele bénnea'?

Na' gulé'e Le':

—Xran, gudá le'entu'.

<sup>35</sup> Na' gudxezre Jesús. <sup>36</sup> Nadxa gulenná benne' judío ca':

—Le mna'xque cátité nazr'íne' le'.

<sup>37</sup> Bal-la benne' ca' gulenné':

—Benne' nigá bexune' benne' la chul-la. La zue' nigá, ¿quebe guzéquene' ájala guné' chee' quebe gute Lázaro?

*Jesús dxusebane' Lázaro*

<sup>38</sup> Jesús guzúe' stebe xetú, na' bzrine' dxu'a ba. Ba na' naca na tu bluaj, na' da' tu xiaj ta'a dxu'e na. <sup>39</sup> Gunná Jesús:

—Le xecá'a xiaj nigá.

Marta, bi zan benne' gate na' guzre' Jesús:

—Xran, ba dxelá bénnea' tula, lawe' da ba guca tapa zra na'a gutié'.

<sup>40</sup> Na' Jesús gunné':

—¿Quebe gucha' lue' che chéajle'u chia', walé'enu' xel-la' szren chee' Dios?

<sup>41</sup> Nadxa belexequé'e xiaj ta'a na'. Jesús guné'e xabáa, gunné':

—Xrae, dxapa' Lue': “Xcalenu” lawe' da ba bennu' chia'. <sup>42</sup> Neda' nezda' tu dxénzquezenu' chia'. Dxennéa' da nigá chee' gaca tu da ba neza chee' benne' caní, chee' xeléajle'e' chiu' nasel-lu' neda'.

<sup>43</sup> Ca gudé gunné' da nigá, na' gunné' zizraj:

—¡Lázaro, bedxúaj nigá!

<sup>44</sup> Bedxúaj benne' gate na', nadxéaj ni'a ne'e nen ládxe'dau' da buluchele' ni'a ne'e, na' lawe' dxela na ladxé'. Jesús guzre' benne' ca':

—Le xesezre', ne le gusané' xexíaje'.

*Benne' dxeledábage' Jesús dxelune' tuze dizra' xelé-le' Le'*

(Mt. 26.1-5; Mr. 14.1-2; Lc. 22.1-2)

<sup>45</sup> Nadxa guléajle' benne' zan chee' Jesús, benne' judío ca' xjácále María, ne belelé'ene' ca da ben Jesús. <sup>46</sup> Bal-la benne' ca' xjaque' xejlechálajlene' benne' fariseo ca', na' buluzenne' le' ca da ben Jesús. <sup>47</sup> Nadxa fariseo ca', ne benne' xíchaje' ca' chee' bxruze ca' belezrague' nen benne' xu'u lawe' blau chee' judío ca', na' gulenné':

—¿Ájazra gundu? Benne' nigá dxúnle'e xel-la' waca da za xabáa. <sup>48</sup> Che ca' güedxu Le' lataj, xúgute bénneache xelajlé'e chee' chee' xuluzúe' Le' ca wenná bea, na' xelalá' benne' Roma ca', benne' zjaque' wedil-la, na' xuluzríia xi'e xudau' cheedxu, ne xezr la xu cheedxu.

<sup>49</sup> Nadxa tu benne' le' Caifás, bxruze blau iza na', guzre' benne' ca':

—Le'e québequeze bi nézele, <sup>50</sup> ne quebe dxeque be'ele gácadxa chawe' cheedxu



gate' tuze benne' ne chee xezre nigá, ne quegala ca naca xezr la xu nigá cuía xi na.

<sup>51</sup> (Quegá gunná Caifás da nigá cheéqzeze'. Lawe' da naque' bxruze blau iza na', bchálaje' waláz chee Dios, gunné' gate' Jesús ne chee xezr la xu judío. <sup>52</sup>Quegá gatié' tuze ne chee xezr la xu naze. Cá'anqueze chee xutupe' lu na' Dios xúgute benne' zaj naque' chee Dios, benne' zaj nase dinnaje', benne' ca' zaj nababe' xúgute cue' xezr la xu.) <sup>53</sup>Ca'an guca, ca lu zra na'te benne' judío wenná bea ca' beluné' tuze dizra' xelútié' Jesús.

<sup>54</sup>Chee le na' Jesús québedxa gudé' naga zaj zra' benne' wenná bea ca' chee judío ca', na' guzé'e naga nababa Judea, na' guxíaje' xezre Efraín naga zua gáguze tu le'e xixre' lawe' lataj. Begá'ane' xezre na' nen benne' ca' dxusédené'.

<sup>55</sup>Ba zua gáguze zrin Laní Pascua chee judío ca', na' benne' zan chee xezre ca' xjaque' Jerusalén chee xulucá'ana chawe' cuine' nédxudxa ca zrin Laní Pascua. <sup>56</sup>Guledé' dxelexíaje' Jesús, na' gate zaj zre'e chale'aj xudau' na', buluchebe ljwezre':

—¿'Ajazra dxéquele? ¿Wide' laní, che quebe xide'?

<sup>57</sup>Benne' fariseo ca', ne benne' xíchaje' ca' chee bxruze ca' ba gulebéaje' dizra' che nu benne' ca' nézene' ga zua Jesús, na' xelé'e benne' ca' chee gaca xelél-le' Le'.

## 12

*María dxugu'e da dxelá zixre ni'a Jesús*

(Mt. 26.6-13; Mr. 14.3-9)

<sup>1</sup>Xrupa zra nédxudxa gate za chu'u Laní Pascua chee judío ca', guxíaj Jesús xezre Betania naga zua Lázaro, bénnea' bsebán Jesús ládujla benne' gate'. <sup>2</sup>Lu xezre na' beluné' tu xrche', chee gulape' ba lá'ana Jesús. Marta bdeé' xel-la' wagu, na' Lázaro dxé'lene' benne' ca' dxelá'gulene' Jesús. <sup>3</sup>Nadxa María guquqé'e tu xia da za da dx-elálé'e zixre, da naca na chee dusén lase, da zácale'e na, na' gulu'e da za na' ni'a Jesús, ne bsebizre' na nen xicha xíchaje'. Ca naca benne' zaj zra' xu'u na' gulelé'ene' ca dxelá da zixre na'. <sup>4</sup>Nadxa Judas Iscariote, zri'ine Simón, tu benne' ca' dxusede Jesús, ne naque' bénnea' gudéé' Jesús lu na' benne' guledábague' Le', gunné':

<sup>5</sup>—¿Bizr chee na' quebe gudá'u da zixre na', na' sidxu na dumí lazruj chee chunna gaxúa zra chee gácalédxu benne' xache' ca'?

<sup>6</sup>Quebe gunná Judas da nigá lawe' da dxe'e gunne xue chee benne' xache' ca'. Naque' gubán, ne nu'e bzude dumí chee benne' ca' dxusede Jesús, ne dxebane' late' weaj dumí na' da dxuluzré'e lu bzude na'. <sup>7</sup>Nadxa Jesús guzre' Judas na':

—Be lataj nu'ula nigá lawe' da bene' da nigá chee dxucá'ana chawe' neda' chee gate xulucache' neda' lu xedxu ba. <sup>8</sup>Benne' xache' ca' tu zrázqueze' ládujla le'e. Neda' quebe tu súazqueza' nen le'e.

*Dxeluné' tuze dizra' xelútié' Lázaro*

<sup>9</sup>Zane' benne' judío ca' belenne' zua Jesús xezre Betania, na' xjaque' na', quegá tuze zeajlenné'e Jesús. Cá'anqueze zeajlenné'e Lázaro, bénnea' bsebán Jesús ládujla benne' gate ca'. <sup>10</sup>Nadxa benne' xíchaje' ca' chee bxruze ca' beluné' tuze dizra' cá'anqueze xelútié' Lázaro, <sup>11</sup>lawe' da ne chee Lázaro benne' zan benne' judío ca' dx-elebéaj xíchaje' bxruze ca' chee xeleajlé'e chee Jesús.

*Dxexú'u Jesús Jerusalén*

(Mt. 21.1-11; Mr. 11.1-11; Lc. 19.28-40)

<sup>12</sup>Benne' zan ba zjaca Jerusalén, zjaque' Laní Pascua na', na' zra xula belenne' ba za' Jesús lu xezre na'. <sup>13</sup>Nadxa gulechugue' zina', na' xjaque' xeaixrígale' Jesús, ne dxelenné' zizraj:

—¡Gaca ba lá'azxa Dios! ¡Ba neza zrente naca na chee Benne' ze'e waláz chee Xránadxu Dios! ¡Ba neza zrente naca na chee Wenná Bea chee xezre Israel!

<sup>14</sup>Jesús xeaixraque' tu burro, na' guzríe'-ba', ca naxúaj na lu xiche chee Dios, dxenná na:

<sup>15</sup>Quebe zrèbele le'e, benne' zre'e xezre Sión.

Le nna'xque, ba za' Wenná Bea chee. Zrié' tu burro.

<sup>16</sup>Nédxute benne' ca' dxusede Jesús quebe guléajni'ine' da na' dxaca na. Ca gudé na', gate begá'ana szren Jesús lau Dios, na' xeailesá lazre' xúgute da caní zaj naxúaj na lu xiche chee Dios ca naca chee Jesús, na' ca'an guca chee'.

<sup>17</sup>Benne' ca' zaj zre'e nen Jesús gate gunné' Lázaro lu xedxu ba, ne bsebane' le' ládujla benne' gate, buluzenne' bénneache

Jerusalén ca da guca na'. <sup>18</sup> Chee le na' benne' caní xejalexrígalé' Jesús lawe' da benne' ca naca xel-la' waca zrenté da bene'. <sup>19</sup> Nadxa benne' fariseo ca' gulé ljwezre':

—Ba dxelé'ele quebe séquedxu bi gundxu. Ca naca bénneache dxelune' Le' tuze.

*Dxelexilaj benne' griego ca' Jesús*

<sup>20</sup> Zaj zra' bal-la benne' griego ca' ládujla benne' ca' belezrine' Jerusalén chee xulucá'ana szrene' Dios lu laní na'. <sup>21</sup> Benne' caní belezrine' lau Felipe, benne' Betsaida chee ga nababa Galilea, ne naque' Jesús tuze, na' gulata' xuene' le', dxelenné':

—Benne', dxaca lázrentu' le'entu' Jesús.

<sup>22</sup> Felipe guxiáje' xeajezre' Andrés caní, na' xjaca dxupe' xeajleguezre' Jesús ca'.

<sup>23</sup> Nadxa Jesús guzre' benne' dxupa ca':

—Ba bzrin zra xegá'ana szrena' neda', Benne' Gulje' Bénneache. <sup>24</sup> Da li dxapa' le'e, tu binne zrua' xtila wegá'ana na tuze na che quebe xexruj na lu xu, ne gacu na xu. Che gacu na xu, na' gunna na lina. Caní dxal-la' gaca chia' neda'. <sup>25</sup> Benne' dxe'e gunne xue gapa chi'e xel-la' nabán chee' gunitie' na. Bénnea' dxuzúe' chalá'ala xel-la' nabán chee' lu xezr la xu nigá, gapa chi'e na, ne zrué'ene' xel-la' nabán da zeajlí canna. <sup>26</sup> Che nu benne' dxaca lazre' guné' zrin chia', dxal-la' gaque' neda' tuze, na' gáteteze sua' neda', na' súaqueze benne' dxune' zrin chia'. Che nu benne' dxune' zrin chia', Xra' gape' le' ba lá'ana.

*Jesús dxuchálaje' ca gaca gate gatie'*

<sup>27</sup> Gunná Jesús:

—Na'a stébele'e zua'. ¿Bizra nnia'?' ¿Nnia': Xrae, bselá neda' lu da dxal-la' gaca chia' na'a? Belájqueza' chee gaca chia' da caní. <sup>28</sup> Xrae, bca'ana szren lau'.

Nadxa ben tu chi'i benne' dxenné' xabáa:

—Ba bca'ana szrena' na, ne gucá'ana szrena' na xetú.

<sup>29</sup> Benne' ca' zre'e na' dxelenne' gulenné' guziu' gunné. Xebal-le' gulenné':

—Tu gubáz chee xabáa bchálajlene' Le'.

<sup>30</sup> Nadxa Jesús guzre' benne' ca':

—Quegá gunné chi'e na' ne chia' neda'. Gunné na ne cheele le'e. <sup>31</sup> Na'a ba bzrin zra guchi'a Dios chee bénneache zre'e xezr la xu nigá, na' na'a cueaj Dios chalá'ala da xriwe', da na' dxenná bea na lu xezr la xu nigá, chee québedxa nna bea na. <sup>32</sup> Gate xelexise' neda' lu xezr la xu nigá le'e xaga

béguaj, na' neda' nnia' xúgute' bénneache chee xelaque' neda' tuze.

<sup>33</sup> Gate gunné' caní, ble'e Jesús ca gatie'.

<sup>34</sup> Nadxa benne' zan ca' gulé'e Jesús:

—Netu' béntu' ca da naxúaj na lu xiche chee da nadxixruj bea na da dxenná na waca bánqueze Cristo chadía chacanna. ¿Bizr chee na' dxennáu' Benne' Gulje' Bénneache xelexise' Le'? ¿Nuzra na' Benne' Gulje' Bénneache?

<sup>35</sup> Nadxa Jesús guzre' benne' ca':

—Xetú chí'idauze xel-la' naxaní' sua na ládujla le'e. Le ta na'a dxácate' ne zua xel-la' naxaní' nen le'e, chee quebe xrinnele, lawe' da benne' dxedé' lu da chul-la quebe nézene' ga zéaje'. <sup>36</sup> Le cheajlé chee xel-la' naxaní' da naca' neda' dxácate' zua xel-la' naxaní' nen le'e, chee gácale tuze xel-la' naxaní' na'.

Ca gudé gunná Jesús da nigá, na' bezé'e bcache cuine' lau benne' ca'.

*Benne' judío ca' quebe dxeajlé'e chee Jesús*

<sup>37</sup> Lácala ble'e Jesús zane' xel-la' waca zrenté lau benne' judío ca', quegá xúgute' guleajlé'e chee', <sup>38</sup> lawe' da ben na ba xen guca ca da gunná Isaías, benne' bchálaje' waláz chee Dios, gunné':

Xran, ¿nuzra guxeajlé chee dizra' cheedxu? ¿Nuzra na' ble'e Xránadxu xel-la' waca chee'?

<sup>39</sup> Ca'an guca, quebe guca xeajlé'e chee' lawe' da caní gunnáqueze Isaías na':

<sup>40</sup> Dios bene' benne' ca' la chul-la, ne bene' zide' lázrdawe',

chee quebe xelexé'ene' nen xiaj lawe', ne quebe xeléajni'ine' lu xichaj lázrdawe', ne quebe xelexé'e lawa' neda' chee xexuna' le'.

<sup>41</sup> Isaías na' gunné' da nigá lawe' da blé'ene' xel-la' szren chee Jesús, ne bchálaje' ca naca chee'.

<sup>42</sup> Zane' benne' judío ca' guléajlé'e chee Jesús, ne cá'anqueze bal-la benne' xíchaje ca'. Quebe belexechebe' lávela bénneache lawe' da belezrebe' da xelún benne' fariseo ca', chee quebe xelexebéaje' le' xu'u naga dxelezrague'. <sup>43</sup> Caní belune' lawe' da beledánedxene' xel-la' ba lá'ana da dxelúe bénneache le' ca xel-la' ba lá'ana da dxue Dios le'.

*Dizra' chee Jesús guchi'a na chee da dxelún bénneache*

<sup>44</sup> Jesús gunné' zizraj:

—Benne' dxéajle'e chia', quegá cheeza' dxéajle'e, cá'anqueze dxéajle'e chee Xra' nasel-le' neda'. <sup>45</sup> Bénnea' dxelé'ene' neda', dxelé'equezne' Xra' nasel-le' neda'. <sup>46</sup> Neda', xel-la' naxani', bla'a lu xezr la xu nigá chee québedxa xelexegá'ana benne' dxeléajle'e chia' lu da chul-la. <sup>47</sup> Che nu benne' dxenne' dizra' chia', ne quebe dxune' ca naca na, quegá neda' guzría xi'a le', lawe' da quebe bla'a neda' chee guzría xi'a bénneache. Bla'a chee guselá' benne' ca'. <sup>48</sup> Benne' dxuzúe' neda' chalá'ala, ne quebe dxune' ca naca dizra' chia', ba zua da guzría xi na le'. Dizra' da ba gunnéa' naca na da guzría xi na bénnea' lu zra bzebe na'. <sup>49</sup> Caní gaca na lawe' da quebe dxuchálaja' cheézzqueza', lawe' da Xra' nasel-le' neda' ba gunná bé'ene' neda' bi dxal-la' nnia', ne bi dxal-la' gusededa'. <sup>50</sup> Neda' nezda' gunná be'e Xra' neda' caní chee xezezeque bénneache xelape' xel-la' nabán da zeajlí canna. Ca'an naca, da dxennéa' neda', dxennéa' na ca gunná be'e Xra' neda'.

## 13

*Jesús dxibe' ni'a benne' ca' dxusedene'*

<sup>1</sup> Naca na zra nedxu gate za chu'u Laní Pascua chee judío ca'. Jesús ba nézene' ba bzrin zra xezé'e lu xezr la xu nigá chee xexiáje' naga zua Xre'. Nazrí'iquezne' benne' zaj naca chee', benne' zaj zre'e xezr la xu, na' na' ba zua gulé'ene' benne' ca' tu da zrendxa da gulé'e na nazrí'ine' le'.

<sup>2,4</sup> Da xriwe' ba nagú'u na xichaj lázxdau Judas Iscariote, zri'ine Simón, ca dxal-la' guné' chee gudé'e Jesús lu na' benne' guledábage' Le'. Nézqueze Jesús ze'e naga zua Dios, ne dxal-la' xezrine' naga zua Dios, na' Xre' ba bnézruje' Le' duté xel-la' dxenná bea. Chee le na', gate dxelawe' xrche', guxasa Jesús, na' gudúe' ladxe' naxrúa cuzre', ne bnase' tu ladxe' dxu'a le'e. <sup>5</sup> Nadxa gudé'e nisa tu zriga xia zren, ne guzú lawe' dxibe' ni'a benne' ca' dxusedene', na' bsebizre' ni'e nen ladxe' na' da nunase' dxu'a le'e.

<sup>6</sup> Ca bzrine' chee quibe' ni'a Simón Pedro, le' guzre' Jesús:

—Xran, ¿Lue' quíbequezu' ni'a?

<sup>7</sup> Jesús bechebe':

—Na'a quebe dxéajni'inu' da dxuna'. Te na'a chéajni'inu' na.

<sup>8</sup> Pedro guzre' Le':

—Cabata' quibu' ni'a.

Jesús guzre' le':

—Che quebe quiba' ni'u, quebe gaca gacu' neda' tuze.

<sup>9</sup> Na' Simón Pedro guzre' Jesús:

—Xran, quegá tuze ni'a quibu'. Cá'anqueze na'a, ne xíchaja'.

<sup>10</sup> Jesús guzre' le':

—Benne' ba bexuzrte' guzje', tuze ni'e dxal-la' chadxelawe' da ba naxádxeequeze'. Le'e ba naxádxelawe', san quegá xúgutele.

<sup>11</sup> Gunná Jesús: “Quegá xúgutele”, lawe' da nézene' nu na' gudé'e Le' lu na' benne' dxeledábage' Le'.

<sup>12</sup> Ca gudé gudibe Jesús ni'a benne' ca', na' bexrúe' ladxe' chee' cuzre', ne bebe'e gaca dxelawe', na' guzre' benne' ca':

—¿Dxéajni'ile le'e da ba bena'? <sup>13</sup> Le'e dxéle neda': Benne' Weséde, ne: Xran, na' caní dxal-la' nnale lawe' da caní naca'. <sup>14</sup> Che neda', Benne' Weséde chee, ne Xránale, ba gudiba' ní'ale, cá'anqueze le'e dxal-la' quíbele ni'a ljwézrele tule xetule.

<sup>15</sup> Neda' ba ble'eda' le'e tu da dxulé'e na, chee gunle le'e ca da bena' neda'. <sup>16</sup> Da li dxapa' le'e, tu benne' wen zrin quebe nácadxe' szren ca xrané', na' tu benne' gubáz quebe nácadxe' szren ca benne' nasel-le' le'. <sup>17</sup> Che dxéajni'ile da caní, ne dxunle ca zaj naca na, gaca chee tu da ba neza.

<sup>18</sup> Quebe dxuchálaja' chee xúgutele le'e. Neda' núnbe'a benne' ca' gucá'a, san dxal-la' gaca ca naxúaj na lu xiche chee Dios, dxenná na: Benne' dxágule neda' ba gudábage' neda' chee gudé'e neda'. <sup>19</sup> Dxapa' le'e da nigá na'a, nédxula gate quebe ne gaca na, chee gate gaca na, na' chéajle le'e zúaqueza' neda'. <sup>20</sup> Da li dxapa' le'e: Benne' dxezí' lu ne'e Bénnea' dxusel-le' neda', neda' na' dxezí' lu ne'e, na' benne' dxezí' lu ne'e neda', dxezí' lu ne'e Xra' nasel-le' neda'.

*Dxenná Jesús gudé Judas Le' lu na' benne' dxeledábage' Le'*

(Mt. 26.20-25; Mr. 14.17-21; Lc. 22.21-23)

<sup>21</sup> Ca gudé gunná Jesús da nigá, na' guzúe' stebe lu xichaj lázrdawe', na' bzéajni'ine' benne' ca', gunné':

—Da li dxapa' le'e, tu benne' ládujla le'e gudé'e neda' lu na' benne' ca' dxeledábage' neda'.

<sup>22</sup> Nadxa benne' ca' dxusede Jesús gulezú lawe' dxeleenná' ljwezre', ne quebe zaj

nézene' nu chee na' dxuchalaj Jesús.  
<sup>23</sup> Tu benne' ca' dxusede Jesús, bénnea' nazrí'ile'e Jesús le', zué' cuita Jesús naga dxelawé' xrche', <sup>24</sup> na' Simón Pedro bene' tu da dxunna bea lau bénnea' chee guchebe' Jesús nu chee na' dxenné' caní. <sup>25</sup> Nadxa bénnea' de'e cuita Jesús bchebe' Le':

—Xran, ¿nuzra na'?

<sup>26</sup> Bechebe Jesús:

—Gusebisa' late' xeta xtila, na' bénnea' gunézruja' na, benne' ná'queze'.

Nadxa Jesús bsebise' late' xeta xtila, na' bnézruje' na chee Judas Iscariote, zri'ine Simón. <sup>27</sup> Ca gucá'a Judas xeta xtila na', na' da xriwe' guxú'ute na lu xichaj lázrdawe'. Nadxa Jesús guzre' le':

—Da dxal-la' gunu', béntega na.

<sup>28</sup> Benne' ca' zaj zre'e dxelawé' na' quebe guléajni'ine' bizr chee na' guzre' Judas na' caní. <sup>29</sup> Lawe' da nua Judas bzude' dumí, bal-le' guléquene' Jesús guzre' le' bi si'e chee laní na', u bi gunézruje' benne' xache' ca'. <sup>30</sup> Ca gudé gudagu Judas xeta xtila na', na' bdxúajé'. Ba guxrinne.

*Da nadxiruj bea cube*

<sup>31</sup> Ca gudé bdxuaj Judas, gunná Jesús:

—Na'a gulé'e lau xel-la' szren chia' neda', Benne' Gulje' Bénneache, na' xegá'ana szren Dios ne chia' neda'. <sup>32</sup> Che neda', Benne' Gulje' Bénneache, dxulé'eda' ca naca xel-la' szren chee Dios, na' Dios gulé'ene' ca naca xel-la' szren chia' neda', ne la gúntequeze' na. <sup>33</sup> Le'e, bidu chia' ca', québedxa sua' scha' nen le'e. Le'e wexflajle neda', san ca gucha' benne' judío ca', dxapa' le'e na'a, quebe gaca sa'le le'e naga cha'a neda'. <sup>34</sup> Tu da cube dxixruj be'eda' le'e. Le zri'i le sa' ljwézrele tule xetule ca neda' nazrí'ida' le'e. Caní dxal-la' zri'i ljwézrele tule xetule. <sup>35</sup> Che nazrí'i ljwézrele tule xetule, na' xúgute bénneache xeleque bé'ene' nácale neda' tuze.

*Jesús dxenné' nna Pedro quebe núnbe'e Le' (Mt. 26.31-35; Mr. 14.27-31; Lc. 22.31-34)*

<sup>36</sup> Simón Pedro bchebe' Jesús:

—Xran, ¿gazra chéaju'?

Bechebe Jesús:

—Naga cha'a neda', quebe gaca sál'enu' neda' na'a. Te na'a wadéquezu' naga tea' neda'.

<sup>37</sup> Nadxa gunná Pedro:

—Xran, ¿bizr chee na' quebe gaca sál'ena' Lue' na'a? Zúaqueza' guzúa' xel-la' nabán chia' chee guna' Lue' tuze.

<sup>38</sup> Jesús bechebe':

—¿Zúaquezu' guzú' xel-la' nabán chiu' chee gacu' neda' tuze? Da li dxapa' lue', néxdudxa ca cuezre xjeaj, lue' wan-náquezu' chunna lasa quebe núnbe'u neda'.

## 14

*Jesús naque' neza da dxezrín na naga zua Xradxu Dios*

<sup>1</sup> Gunná Jesús:

—Quebe cuele le'e gunne xue. Le guxrén lazre' Dios, ne le guxrén lazre' neda'. <sup>2</sup> Lizre Xra' déle'e lataj naga súale. Chela quebe naca na caní, neda' ba gucha' le'e. Wexá'a cheajxecuteza' lataj cheele. <sup>3</sup> Ca te xexá'a cheajxecuteza' lataj cheele, na' wexeláiqueza' xetú chee xedajxezri'a le'e súalele neda', chee súale le'e naga súaqueza' neda'. <sup>4</sup> Le'e nézele naga cha'a, ne núnbeale neza na'.

<sup>5</sup> Tomás guzre' Jesús:

—Xran, quebe nézentu' ga chéaju'. ¿Ájazra guntu' gúnbeantu' neza na'?

<sup>6</sup> Jesús bechebe':

—Neda' naca' neza na', ne naca' da li, ne naca' xel-la' nabán. Tuze ne chia' neda' waca zrinle naga zua Xra'. <sup>7</sup> Chela núnbeale neda', cá'anqueze núnbeale Xra'. Ná'atela núnbeale Le' lawe' da ba dxelé'ele Le'.

<sup>8</sup> Nadxa Felipe guzre' Jesús:

—Xran, ble'e netu' Xrau', xetú da ná'teze.

<sup>9</sup> Bechebe Jesús:

—Felipe, scha' ba guzúalena' le'e, na' ¿quebe ne gúnbe'u neda'? Benne' dxelé'ene' neda', dxelé'eqezene' Xra'. Chee le na', ¿bizr chee na' dxenabu' neda' gulé'eda' le'e Xra'? <sup>10</sup> ¿Quebe dxéajle'u zúalena' Xra', na' Xra' zúalene' neda'? Da dxapa' le'e, quegá dxennéa' na cheézqueza'. Xra', Bénnea' zúalene' neda', Léqueze' na' dxune' zrin chee' lu na'a neda'. <sup>11</sup> Le chéajlele zúalena' Xra', na' Xra' zúalene' neda', u che cabí dxéajlele ca da dxennéa', le chéajle chia' ne chee da ca' dxuna'. <sup>12</sup> Da li dxapa' le'e, benne' dxéajle'e chia', gúnqueze' ca da dxuna' neda', na' gune' da zaj nácadxa zren ca da caní dxuna' lawe' da xexá'a neda' naga zua Xra'. <sup>13</sup> Xúgute da nábale le'e lu La' neda',

neda' guna' na, chee gulé'eda' neda' xel-la' szren chee Xra'. <sup>14</sup>Néda'queza' guna' biteteze da ná bale lu La' neda'.

*Jesús dxechebe lazre' sel-le' Be' Lá'azxa*

<sup>15</sup>Gunná Jesús:

—Che le'e nazrí'ile neda', le guzúa dizra' ca naca da dxixruj be'eda' le'e. <sup>16</sup>Neda' gata' xueda' Xra' sel-le' chee xetú Benne' gácalequeze' le'e, ne súatecaze' le'e. <sup>17</sup>Benne' nigá naque' Be' Lá'azxa gulé'ene' le'e ca naca da li. Benne' zaj naca chee xezr la xu nigá quebe xezezequene' xelezi' lu ne'e Le' lawe' da quebe gaca xelelé'ene' Le', ne quebe zaj núnbe'e Le'. Le'e núnbeale Le' lawe' da zúale' le'e, ne súaqueze' lu xichaj lázrdaule. <sup>18</sup>Quebe gucá'ana' le'e ca bi wezebe ca'. Welá'queza' súalena' le'e. <sup>19</sup>Xetú chí'idau' bènneache ca' québedxa xelelé'ene' neda', san le'e welé'ele neda'. Le'e tu gaca bázquezele lawe' da tu naca bázqueza' neda'. <sup>20</sup>Lu zra na' guéquebe'ele neda' zúalena' Xra', na' le'e zúalele neda', na' neda' zúalena' le'e. <sup>21</sup>Benne' nézene' ca naca da nadxixruj bea na nuna' neda', ne dxuné' na, dxulé'ene' nazrí'iqueze' neda'. Xra' zrí'ine' benne' nazrí'ine' neda', na' cá'anqueze neda' zrí'ida' bènnea', ne gulé'e lawa' le'.

<sup>22</sup>Judas, quegá bènnea' le' Iscariote, guzre' Jesús:

—Xran, ¿bizr chee na' gulé'e lau' netu', ne quegá gulé'e lau' lau' bènneache zaj zre'e xezr la xu nigá?

<sup>23</sup>Jesús bechebe':

—Benne' nazrí'ine' neda' dxuné' ca naca da dxennéa', na' Xra' zrí'ine' bènnea', na' neda' ne Xra' xedajsúalentu' le'. <sup>24</sup>Benne' quebe nazrí'ine' neda' quebe dxuné' ca da dxennéa'. Ca naca dizra' da dxénele quebe zaj naca na cheéqueza'. Zaj naca na chee Xra' nasele' neda'.

<sup>25</sup>Dxapa' le'e xúgute da caní dxácaté ne zúalena' le'e, <sup>26</sup>na' Be' Lá'azxa, Bènnea' sel-la Xra' lu La' neda' chee gácale' le'e, Le' gulé'ene' le'e xúgute, ne gusá'queze' lázrele ca naca xúgute da ba gucha' le'e.

<sup>27</sup>Xel-la' dxebeza zri lazre' dxuca'ana' chee. Dxunna' le'e xel-la' dxebeza zri lazre' chia'. Quebe dxunna' na ca dxelunna bènneache xel-la' dxebeza zri lazre'. Quebe cuele gunne xue, ne quebe zrébele. <sup>28</sup>Ba bénele gunnéa' wexá'a, ne welá'a súalena' le'e xetú. Chela da li nazrí'ile neda', suale xel-la' dxebe, lawe' da xexá'a gaca zua Xra',

na' nácadxa Le' szren ca neda'. <sup>29</sup>Da nigá dxapa' le'e na' nédxula gate quebe ne gaca na, chee gate gaca na, na' chéajle chee da dxennéa'.

<sup>30</sup>Québedxa guchálajleteca' le'e da zren lawe' da ba za' da xriwe', da na' dxenná bea na lu xezr la xu nigá. Da na' quebe seque na bi gune na neda'. <sup>31</sup>Caní dxal-la' gaca chee xeleneze bènneache neda' nazrí'ida' Xra', ne dxuna' ca da gunná bé'ene' neda'. ¡Le chasa! ¡Le xebú'u nigá!

## 15

*Jesús dxuchálaje' chee lba uva ne chee zruze na ca'*

<sup>1</sup>Gunná Jesús:

—Neda' naca' ca tu lba uva da naca na li lazre', na' Xra' naque' ca tu benne' dxá'ane' na. <sup>2</sup>Le' dxechugue' zruze na ca' da quebe dxelebia na da zixre, ne dxun chí'e zruze na ca' da dxelebia na da zixre chee xelebiádx na. <sup>3</sup>Le'e nácale ca zruze na ca' da ba nun chí'e, ne chee dizra' da ba gucha' le'e. <sup>4</sup>Le súaqueze gácale neda' tuze ca neda' tu zúaleze' le'e. Tu zruze xaga quebe gaca cuía na da zixre cheézeze na che quebe súalezeze na xaga na'. Cá'anqueze le'e quebe bi gaca gunle che quebe tu gácazezele neda' tuze.

<sup>5</sup>'Neda' naca' bzrigu lba uva, na' le'e nácale zruze na ca'. Bènnea' naque' neda' tuze, na' neda' naca' le' tuze, naque' ca tu zruze na da dxebiále'e na da zixre, lawe' da quebe bi seque' gunle chee quebe gácale neda' tuze. <sup>6</sup>Benne' quebe súatequeze' nen neda' gaque' ca tu zruze na da dxugu na, na' bizre na. Xuluxutupe' zruze na bizre ca', ne xuluzré'e na lu xi'.

<sup>7</sup>'Che le'e súatequezele neda' tuze, ne quebe gusanle dizra' chia', waca ná bale ca da dxaca lázrele, na' sile na. <sup>8</sup>Xra' dxegá'ana szrene' gate nácale ca zruze na ca' da dxebiále'e na da zixre, ne caní gaca bea na nácale neda' tuze. <sup>9</sup>Neda' nazrí'ida' le'e ca nazrí'i Xra' neda'. Chee le na' le súaquezele lu xel-la' zri'i lazre' chia'. <sup>10</sup>Che gunle ca da dxixruj be'eda' le'e, na' súatequezele lu xel-la' zri'i lazre' chia', ca dxuna' neda', dxuna' ca bdxixruj be'e Xra' neda', ne zúatequeza' lu xel-la' zri'i lazre' chee'.

<sup>11</sup>'Neda' dxuchálajlena' le'e caní chee súale lu xel-la' dxebe chia', ne chee gaca du lazre' xel-la' dxebe chee. <sup>12</sup>Caní naca da dxixruj be'eda' le'e: Le zri'i le sa' ljwézrele

tule xetule ca neda' nazrí'ida' le'e. <sup>13</sup>Xel-la' zri'i lazre' da naca szrendxa naca bea na che tu benne' guzúe' xel-la' nabán chee' chee gácalene' bi ljwezre' ca'. <sup>14</sup>Le'e nácale bi ljwezra' che dxunle ca da dxixruj be'eda' le'e. <sup>15</sup>Québedxa xapa' le'e nácale bi wen zrin chia' lawe' da quebe neze bi wen zrin bi da gun xránabe'. Dxapa' le'e nácale bi ljwezra' lawe' da ba bzenda' le'e xúgute da guzre Xra' neda'. <sup>16</sup>Le'e quebe gunnéle neda'. Neda' gunnéa' le'e, ne ba nuzúa' le'e chee gácale ca zruze lba na' da dxelebiale' na da zixre, na' tu súazqueze da zixre na'. Che gunle caní, na' Xra' gunne' le'e xúgute da nábele lu La' neda'. <sup>17</sup>Da nigá naca na da dxixruj be'eda' le'e: Le zri'i le sa' ljwézrele tule xetule.

*Bénneache chee xezr la xu nigá dxelecuí-dene' Jesús, ne cá'anqueze benne' chee' ca'*

<sup>18</sup>Nadxa gunná Jesús:

—Che bénneache dxelecuídene' le'e, dxal-la' cheajsá lázrele belecuídequeze' neda' nédxute. <sup>19</sup>Chela nácale le'e chee xezr la xu nigá, na' xelezrí'i bénneache le'e ca zaj nazrí'ine' le sa' ljwezre' ca'. Neda' ba gucá'a le'e ládujla bénneache chee xezr la xu nigá, na' chee le na' dxelecuide bénneache le'e lawe' da québedxa nácale xezr la xu nigá tuze. <sup>20</sup>Le gusá lázrele da gucha' le'e, gunnéa': Netú benne' wen zrin quebe nácadxe' szren ca xrané'. Che guláu zi' xuzre' neda', cá'anqueze xelau zi' xuzre' le'e, na' che belune' ca dxenná dizra' chia', cá'anqueze xelune' ca dxenná dizra' chee le'e. <sup>21</sup>Xúgute da caní xelune' chee le lawe' da nácale chia', ne lawe' da quebe zaj núnbe'e Xra' nasele' neda'.

<sup>22</sup>Chela quebe bla'a neda', ne bchála-jlena' benne' ca', quebe bi dul-la zaj nabague'. Na'a zaj nabágaqueze' dul-la <sup>23</sup>lawe' da nu benne' dxelecuídene' neda', cá'anqueze dxelecuídene' Xra'. <sup>24</sup>Chela quebe bena' neda' xel-la' waca zren ca' lávela benne' ca' ca da netú benne' quebe ne guné', na' quebe bi dul-la xelebágué'. Lácala ba belelé'ene' da ca', dxelecuídene' neda', ne dxelecuídene' Xra'. <sup>25</sup>Da nigá dxaca na chee gaca li ca naxúaj na lu da nadxixruj bea na da zjácale benne' ca'. Dxenná na: Belecuídene' neda' ne quebe bi da caléla bena' chee benne' ca'.

<sup>26</sup>Gate xida Bénnea' gácalene' le'e, Bénnea' naque' Be' Lá'azxa, ne dxulé'ene' da li, Bénnea' sel-la' neda' waláz chee Xra',

Léqueze' xechebe' ca naca chia' neda'. <sup>27</sup>Cá'anqueze le'e wechébequezele ca naca chia' neda' lawe' da zúalele neda' nédxudaute.

## 16

<sup>1</sup>Gunná Jesús:

—Dxapa' le'e da caní chee quebe gusán lázrele da naca chia'. <sup>2</sup>Welexebéaje' le'e lu xu'u naga dxelezrague', na' zrin zra gate nüteteze benne' gutie' le'e guéquene' guné' zrin chee Dios. <sup>3</sup>Caní xelune' lawe' da quebe ne xelúnbe'e Xra', ne neda'. <sup>4</sup>Dxapa' le'e da nigá chee gate zrin zra na', na' cheajsá lázrele ba gucha' le'e da nigá.

*Da dxun Be' Lá'azxa*

Nadxa gunná Jesús:

—Quebe gucha' le'e da nigá nédxute lawe' da zúalequeza' le'e. <sup>5</sup>Na'a wexá'a cheajxezúalena' Xra' nasele' neda', na' netule le'e quebe dxuchébele neda' ga cha'a. <sup>6</sup>Dxewí'ine lázrele lawe' da gucha' le'e da caní. <sup>7</sup>Na'a dxapa' le'e da li: Cháwe'dxa gaca chee le'e che xexá'a neda' lawe' da che quebe xexá'a, quebe xida Be' Lá'azxa xedajsúalene' le'e, Bénnea' gácalene' le'e. Che xexá'a neda', sel-la' Le' chee le. <sup>8</sup>Gate xida Le', na' gulé'ene' bénneache zaj naque' benne' dul-la, ne quebe dxelune' da xrlátaje, na' Dios guzrí'a xi'e benne' caní. <sup>9</sup>Zaj naque' benne' dul-la lawe' da quebe dxelájle' e chia' neda'. <sup>10</sup>Xeleque bé'ene' quebe dxelune' da xrlátaje lawe' da xexá'a neda' naga zua Xra', na' le'e québedxa lé'ele neda'. <sup>11</sup>Xeleque bé'ene' Dios guzrí'a xi'e le' lawe' da ba guchugue' chee da xriwe', da na' dxenná bea na lu xezr la xu nigá.

<sup>12</sup>Ne déle'e da dxal-la' xapa' le'e, san le'e quebe gaca chéajni'ile na na'a. <sup>13</sup>Gate xida Be' Lá'azxa, Bénnea' dxulé'ene' da li, Le' gulé'ene' le'e ca naca xúgute da li lawe' da quebe guchálaje' cheézqueze'. Wanné' xúgute da xénene', na' guzéajni'ine' le'e ca da dxal-la' gaca na. <sup>14</sup>Le' gucá'ana szrene' neda' lawe' da wazi'e chee da naca chia' neda', na' guzéajni'ine' na le'e. <sup>15</sup>Xúgute da napa Xra', cheéqueza' naca na, na' chee le na' gunnéa', wazi' Be' Lá'azxa da naca chia', na' guzéajni'ine' na le'e.

*Xel-la' dxelewi'ine lazre' chee benne' ca' xexaca na xel-la' dxelebe'*

<sup>16</sup>Gunná Jesús:

—Xetú chí'idau', na' le'e québedxa lé'ele neda', na' xetú chí'i, na' xel'é'ele neda' lawe' da xexá'a neda' naga zua Xra'.

<sup>17</sup>Nadxa bal-la benne' ca' dxusede Jesús buluchébe ljwezre':

—¿Bizra zéaje da nigá? Dxe'e dxi'u, xetú chí'idau' québedxa lé'edxu Le', na' xetú chí'i, na' xel'é'edxu Le' lawe' da xexájaje' naga zua Xre'. <sup>18</sup>¿Bi zéaje da na', xetú chí'idau'? Quebe dxéajni'idxu bi chee dxuchálaje'.

<sup>19</sup>Guque be'e Jesús dxelaca lazre' xu-luchébe' Le', na' guzre' benne' ca':

—Neda' gucha' le'e, xetú chí'idau' québedxa lé'ele neda', na' xetú chí'i, na' xel'é'ele neda'. ¿Da nigá na' dxuchébe ljwézrele? <sup>20</sup>Da li dxapa' le'e, wabézrele le'e, ne xewi'ine lázrele, san bénneache chee xezr la xu nigá xebebe'. Lácala le'e xewi'ine lázrele, xel-la' dxewi'ine lazre' chee xexaca na xel-la' dxebé. <sup>21</sup>Gate tu nu'ula zua sané' bidau' zue' stébe lawe' da ba bzin zra sua xel-la' dxudia chee'. Gate te galaj bidu na', na' québedxa dxeajsá lazre' da guzaque' lawe' da dxebé'ene' chee' bidu na' ba gúlajbe'. <sup>22</sup>Cá'anqueze le'e zúale stébe na'a, san neda' welá'queza' xedajxenná'a le'e, na' lu xichaj lázrdaule súatequeze xel-la' dxebé, da naca na tu xel-la' dxebé da quebe nu seque' cua.

<sup>23</sup>'Lu zra na' québedxa bi guchébele neda'. Da li dxapa' le'e, Xra' gunné' le'e xúgute da návale lu La' neda'. <sup>24</sup>Nédxula quebe bi gunábale lu La' neda'. Na'a le naba, na' si'le, chee súale'ele xel-la' dxebé.

*Jesús guchuchuj guléaje' da dxaca lu xezr la xu nigá*

<sup>25</sup>Gunná Jesús:

—Ba gucha' le'e da caní nen dizra' ca' da dxululé'e na. Wazrín zra gate québedxa guchálajlén'a le'e da naca da dxulé'e na. Guchálajlén'a le'e caníqueze da naca chee Xra'. <sup>26</sup>'Lu zra na' návale Xra' lu La' neda', na' quebe dxenné'a neda' gata' xueda' Xra' waláz chee, <sup>27</sup>lawe' da Xrá'queze nazrí'ine' le'e. Nazrí'ine' le'e lawe' da nazrí'ile le'e neda', ne dxéajlele chia' za'a naga zua Dios. <sup>28</sup>Guzá'a lau Xra' chee bla'a lu xezr la xu nigá chee xexá'a naga zua Xra'.

<sup>29</sup>Nadxa benne' ca' dxusede Jesús gulé'e Le':

—Na'a dxuchálajlenu' netu' caníqueze. Quebe dxuchínenu' dizra' ca' da dxululé'e na. <sup>30</sup>Na'a dxeque bé'entu' nézenu' xúgute

da ca', na' quebe dxal-la' nu guchébe Lue'. Chee le na' dxéajlentu' chiu' za'u naga zua Dios.

<sup>31</sup>Jesús guzre' benne' ca':

—¿Dxeájlele chia' na'a? <sup>32</sup>Za' zra, ne ba naca zra ná'queze gate le'e gase dínnajle ca'ale xrneza cha chee, na' gucá'ana le neda' tuza'. Quebe zúaqueza' tuza' lawe' da zúale Xra' neda'. <sup>33</sup>Dxapa' le'e da nigá chee gápale xel-la' dxebeza zri lazre' lawe' da nácale neda' tuze. Lu xezr la xu nigá dxun na ba xen si sácale. Le gun chuchu lázrdaule, lawe' da ba bchuchuj bléaja' da dxaca lu xezr la xu nigá.

## 17

*Jesús dxenabe' Dios xucá'ana chawe'e benne' ca' dxeléajle'e chee'*

<sup>1</sup>Ca gudé gunné' da nigá, na' Jesús gunné'e xabáa, dxenné':

—Xrae, ba bzin zra. Bca'ana szren neda', Zri'inu', chee cá'anqueze neda', Zri'inu', gucá'ana szrena' Lue'. <sup>2</sup>Lue' ba bennu' neda', Zri'inu', xel-la' dxenná' bea chee nna be'eda' xúgute bénneache, chee gunézruja' xel-la' nabán da zeajlí canna chee xúgute benne' ca' bennu' neda'. <sup>3</sup>Xel-la' nabán da zeajlí canna naca na chee xelúnbe'e Lue', nacu' Dios tu licha', ne li lazre', na' chee xelúnbe'e neda', Jesucristo, Bénnea' gusel-lu' Lue'.

<sup>4</sup>'Neda' ba bca'ana szrena' Lue' lu xezr la xu nigá, ne ba bexuzre bēna' da bdxixruj be'enu' neda'. <sup>5</sup>Na'a, Xrae, bēna neda' xel-la' szren lau Lue', da naca na xel-la' szren na' da guca na chia' naga zu' Lue' nédxudaute gate za gata' xezr la xu nigá.

<sup>6</sup>'Benne' ca' guca' u Lue' ládujla bénneache, benne' ca' bennu' neda', neda' ba bzéajni'ida' le' Nu nacu' Lue'. Gulaque' chiu', na' Lue' bennu' neda' benne' ca', na' ba beluné' ca dxenná' xrtizru'. <sup>7</sup>Na'a zaj nézene' xúgute da bennu' neda' za na naga zu' Lue'. <sup>8</sup>Ba bnézruja' chee benne' caní dizra' chiu' da bennu' neda', na' benne' caní ba gulezi' lu ne'e na. Ba guleque bé'ene' da li neda' za'a naga zu' Lue', ne ba guléajle'e chiu', gusel-lu' neda'.

<sup>9</sup>'Neda' dxata' xueda' Lue' gaca chawe' chee benne' caní. Quebe dxata' xueda' Lue' ne chee benne' ca' zaj naque' chee xezr la xu nigá. Dxenaba' Lue' ne chee benne' ca' bennu' neda', lawe' da zaj naque' chiu'.

<sup>10</sup>Xúgute da naca chia' naca na chiu', na' da naca chiu' naca na chia' neda', na' xel-la' szren chia' dxulé'e lawe' na ne chee benne' caní.

<sup>11</sup>'Neda' québedxa sua' lu xezr la xu nigá, san benne' caní xelxegá'ane' lu xezr la xu nigá, na' neda' wezá'a nigá, ne xedajx-ezúalequeza' Lue'. Xrae Lá'azxa, lu xel-la' dxenná bea chiu' bxue benne' caní, benne' ca' bennu' neda', chee xelácaqueze' tuze ca nácadxu dxi'u tuze, Lue' ne neda'. <sup>12</sup>Gate ne zua' neda' lu xezr la xu nigá, bxua' benne' caní nen xel-la' dxenná bea chiu', benne' caní bennu' neda', ne bcache chawa' le'. Netú benne' caní quebe gunite, san tuze bènea' ba nanítequeze', na' caní guca na chee guca li ca naxúaj na lu xiche chiu'.

<sup>13</sup>'Na'a ba zezá'a naga zu' Lue'. Dxácaté ne zua' lu xezr la xu nigá dxennéa' da caní chee xelápale'e benne' caní xel-la' dxebé ca da nápaqueza' neda'. <sup>14</sup>Neda' bnézruja' benne' caní dizra' chiu'. Bénneache chee xezr la xu nigá dxelecuídene' benne' caní lawe' da québedxa zaj naque' tuze nen benne' ca' chee xezr la xu nigá, ca na' neda' quebe naca' tuze nen da naca chee xezr la xu nigá. <sup>15</sup>Quebe dxenaba' Lue' xeca'u benne' caní lu xezr la xu nigá. Dxenaba' guzrá chawu' benne' caní chee quebe seque' da xriwe' bi gun na chee' le'. <sup>16</sup>Ca neda' quebe naca' chee xezr la xu nigá, cá'anqueze benne' caní quebe zaj naque' chee xezr la xu nigá. <sup>17</sup>Bzua benne' caní chee xelaque' cheéquezu' Lue' ne chee da li. Dizra' chiu' naca na da li. <sup>18</sup>Ca gusel-lu' Lue' neda' ládujla bèneache zaj naque' chee xezr la xu nigá, cá'anqueze neda' dxusel-le' benne' caní ládujla bèneache zaj naque' chee xezr la xu nigá. <sup>19</sup>Ne chee benne' caní nuzúa cuina' cheéquezu' Lue', chee cá'anqueze benne' caní xelaque' cheéquezu' Lue' ne chee da li.

<sup>20</sup>'Dxata' xueda' Lue', quegaze chee benne' caní, san cá'anqueze chee benne' ca' xeléajle'e chia' gate xelenne' da xuluchalaj benne' caní. <sup>21</sup>Dxenaba' Lue' chee xelaca xúgute benne' caní túzqueze, ca Lue', Xrae, nácaquezu' neda' tuze, ne neda' nácaqueza' Lue' tuze, ne chee xelaca benne' caní tuze nen dxi'u, chee xeléajle bèneache zaj naca chee xezr la xu nigá Lue' gusel-lu' neda'. <sup>22</sup>Neda' ba bnézruja' chee benne' caní xel-la' szren na' da bennu' neda' chee xelaque' tuze ca nácaquezdxu tuze dxi'u. <sup>23</sup>Neda'

súalena' benne' caní, na' Lue' súalenu' neda', chee xelácaqueze benne' caní tuze, na' caní xeleque be'e bèneache Lue' gusel-lu' neda', ne nazrí'inu' benne' caní cáteze nazrí'inu' neda'.

<sup>24</sup>'Xrae, Lue' bennu' neda' benne' caní, na' dxaca lazra' xelezúalene' neda' naga sua' neda', chee xelélé'ene' xel-la' szren da ba bennu' neda', lawe' da nazrí'inu' neda' nédxudauté gate quebe ne gunu' xezr la xu nigá. <sup>25</sup>Xrae chawe', benne' zaj naque' chee xezr la xu nigá quebe zaj núnbe'e Lue', san neda' núnbe'a Lue', na' benne' caní ba zaj nézene' Lue' gusel-lu' neda'. <sup>26</sup>Neda' bzéajni'ida' benne' caní Nu nacu' Lue', ne zúaqueza' dxuzéajni'ida' le' chee sua xel-la' zri'i lazre' dxéquenu' Lue' neda' lu xichaj lázrdau benne' caní, ne chee súale néda'queza' le'.

## 18

### Dxelel-le' Jesús

(Mt. 26.47-56; Mr. 14.43-50; Lc. 22.47-53)

<sup>1</sup>Ca gudé gunná Jesús da caní, na' bdxúaje' nen benne' ca' dxusédené' chee chjaque' xecha la'a xegu Cedrón. Lataj na' zéle'e xaga olivo naga guxú'u Jesús nen benne' ca'. <sup>2</sup>Cá'anqueze Judas, bènea' dxudé' Jesús lu na' benne' ca' dxeledábague' Le', núnbe'e lataj na' lawe' da zane' lasa guxíaj Jesús na' nen benne' ca' dxusédené'. <sup>3</sup>Ca' guca, bzrin Judas na' nen tu cue' benne' ca' dxjaque' wedil-la, ne nen bal-la benne' xra'aga wen zrin chee xudau', benne' ca' gulesel-la benne' xíchajé ca' chee bxruze ca', ne benne' fariseo ca'. Zaj nu'e xaga, ne xia ca', ne xi' ca', ne xi' xedxe. <sup>4</sup>Jesús ba nézene' ca da gaca chee', na' chee le' na' bdxúaje' lau benne' ca', na' bchebe' le':

—¿Nuzra dxexílajle?

<sup>5</sup>Belexechebe benne' ca':

—Jesús, benne' Nazaret.

Jesús bechebe':

—Neda' na'.

Judas, bènea' dxudé' Jesús lu na' benne' ca' zúaqueze' ládujla benne' ca'. <sup>6</sup>Gate gunná Jesús: Neda' na', na' benne' ca' belexebigue' lau Jesús, ne xejlechazte' lu xu. <sup>7</sup>Nadxa Jesús bchebe' benne' ca' da xula:

—¿Nuzra dxexílajle?

Gulenná benne' ca':

—Jesús, benne' Nazaret.

<sup>8</sup>Nadxa guzre Jesús benne' ca':



—Ba gucha' le'e neda' na'. Che dxexíajle neda', le güe benne' caní lataj cheajxaque'.

<sup>9</sup>Ca guca da nigá guca li ca gunná Jesús, gunné': "Benne' ca' benna Xra' neda', netue' quebe bnitia'." <sup>10</sup>Nadxa Simón Pedro, ne nu'e xia, guléaje' na, na' guchugue' naga da zua xabela chee Malco, wen zrin chee bxruze blau. <sup>11</sup>Jesús guzre' Pedro:

—Begú'u xia chiu' lu zre na. Ca da ba nun Xra' si' saca' neda', ¿quebe dxal-la' saca' na?

*Jesús dxezrine' lau bxruze blau*  
(Mt. 26.57-58; Mr. 14.53-54; Lc. 22.54)

<sup>12</sup>Nadxa benne' dxjaca wedil-la, ne benne' dxenná be'ene' le', ne benne' xra'aga wen zrin chee judío ca' gulel-le' Jesús, ne buluchéaje' le'. <sup>13</sup>Nadxa guleché'e Jesús lizre Anás. Anás nigá naque' xrtau zri'ine Caifás, bënnea' naque' bxruze blau iza na'. <sup>14</sup>Caifás nigá naque' bënnea' guzre' judío blau ca' gácadxa chawe' gate tuze benne' waláz chee xezr la xu chee'.

*Pedro dxenné' quebe núnbe'e Jesús*  
(Mt. 26.69-70; Mr. 14.66-68; Lc. 22.55-57)

<sup>15</sup>Simón Pedro, ne xetú benne' ca' dxusede Jesús zjaque' zeajnawe' Jesús. Benne' ljwezre Pedro nigá núnbea bxruze blau le'. Ca'an guca, benne' nigá guxú'ulene' Jesús chale'aj lizre bxruze blau na'. <sup>16</sup>Pedro begá'ane' dxu'a dxa xu'u da zua chale'aj na'. Chee le' na' bdxuaj bënnea' núnbea bxruze blau le', na' bchálajlene' nu'ula zua dxu'a dxa xu'u na', na' gulu'e Pedro chale'aj na'. <sup>17</sup>Nadxa nu'ula na' zua dxu'a dxa xu'u bchebe' Pedro:

—¿Quebe nacu' lue' tuze nen benne' Nazaret na'?

Pedro bechebe':  
—Quebe naca'.

<sup>18</sup>Lawe' da dxun na zaga, benne' wen zrin ca', ne benne' xra'aga wen zrin chee bxruze ca' ba zaj nabeque' xi', ne zaj ze' dxu'a xi' na' dxexezezé'ene'. Pedro ze' nen benne' ca', dxexezezé'ene' dxu'a xi' na'.

*Bxruze blau dxuchebe' Jesús*  
(Mt. 26.59-66; Mr. 14.55-64; Lc. 22.66-71)

<sup>19</sup>Bxruze blau guzú lawe' dxuchebe' Jesús nuca benne' ca' zaj naque' benne' dxusede', ne bi da dxusede' le'. <sup>20</sup>Jesús guzre' le':

—Neda' ba bchálajqueza' lálwela xúgute bënneache. Bsédequeza' lu xu'u ca', ne lu xu'u naga dxelezraga xúgute benne' judío

ca'. Quebe bi bchálaja' bagácheze. <sup>21</sup>¿Bizr chee na' dxuchebu' neda'? Bchebe benne' ca' ba belenne' chia', na' le' xelenné' bi da bchálajlena' le'. Benne' ca' zaj nézene' da ba gunnéa'.

<sup>22</sup>Gate gunná Jesús da nigá, na' tu benne' xra'aga wen zrin chee xudau', benne' ze' na', gudape' xraga Jesús, na' gunné':

—¿Caní dxexechebu' lau bxruze blau nigá?

<sup>23</sup>Jesús bechebe':

—Che gunnéa' tu da calela, gunná ájala naca na. Che da gunnéa' naca na xrlátaje, ¿bizr chee na' dxu'u neda'?

<sup>24</sup>Nadxa Anás gusél-le' Jesús, zaj nadxéaj ne'e, lau Caifás, bxruze blau.

*Pedro dxenné' xecha lasa quebe núnbe'e Jesús*

(Mt. 26.71-75; Mr. 14.69-72; Lc. 22.58-62)

<sup>25</sup>Dxácate na' ze' Pedro dxu'a xi' na' dxexezezé'ene', na' gulé'e le':

—¿Quebe nacu' lue' tu benne' ca' zaj naque' tuze nen bënnea'?

Na' Pedro gunné':

—Quebe naca'.

<sup>26</sup>Nadxa tu benne' wen zrin chee bxruze blau, benne' naque' xrtia bënnea' guchugu Pedro naque', bchebe' le':

—¿Quegá ble'eda' lue' nen bënnea' naga zaj ze' xaga olivo ca'?

<sup>27</sup>Pedro gunné' xecha lasa:

—Quebe núnbe'a bënnea'.

La' ná'queze gudxeze xjeaj.

*Jesús dxezrine' lau Pilato*

(Mt. 27.1-2, 11-14; Mr. 15.1-5; Lc. 23.1-5)

<sup>28</sup>Nadxa belexebeaje' Jesús lizre Caifás, na' guleché'e le' xu'u lizre benne' xu'u lu ne'e xezr la xu na' waláz chee Roma. Ba dxezú lau dxaní'sise', na' benne' judío ca' quebe gulu'e xu'u na' chee quebe xelexegá'ane' sban, lawe' da che xelu'e na', quebe gaca xelawe' xrche' chee Laní Pascua. <sup>29</sup>Chee le' na' bdxuaj Pilato bchálajlene' benne' ca', na' guzre' le':

—¿Bizra da zria dxágule benne' nigá?

<sup>30</sup>Belexebe benne' ca':

—Chela ca' naque' tu benne' wen da zrinaj, quebe gudentu' le' lau'.

<sup>31</sup>Nadxa Pilato guzre' benne' ca':

—Le xeché'e, ne le guchi'a chee' cáteze naca da nadxixruj bea chee.

Belexebe benne' judío ca':

—Netu', benne' judío, quebe naca cheentu' nu gútentu'.

<sup>32</sup>Ca'an guca, guca li ca naca da ba gunná Jesús ca gatié'. <sup>33</sup>Pilato bexu'e xu'u na', na' gunné' Jesús, ne bchebe' Le':

—¿Nacu' Lue' Wenná Bea chee judío ca'?

<sup>34</sup>Jesús gunné':

—¿Dxenabu' da nigá lue'zqueze, u lawe' da nu guzre lue' ca naca chia'?

<sup>35</sup>Pilato bechebe':

—¿Naca' neda' judío? Benne' xezr la xu chiu', ne benne' xíchaje ca' chee bxruze ca' buludéé' lue' lawa' neda'. ¿Bizra benu'?

<sup>36</sup>Nadxa bechebe' Jesús:

—Naga dxenná be'a quebe naca na chee xezr la xu nigá. Chela naca na chee xezr la xu nigá, na' benne' ca' zaj naque' neda' tuze welásaqueze' chee quebe tea' neda' lu na' benne' judío caní. Naga dxenná be'a quebe naca na nigá.

<sup>37</sup>Nadxa guzre Pilato Jesús:

—¿Nacu' Lue' wenná bea?

Bechebe' Jesús:

—Naca' wenná bea, cáteze dxennáu' lue'. Neda' gúlaja', ne bla'a lu xezr la xu nigá chee nnia' da li. Xúgute benne' ca' dxelune' ca dxenná dizra' chee da li dxelenne' da dxennéa' neda'.

<sup>38</sup>Pilato gunné':

—¿Bizra na' da li?

*Dxelechuque' chee Jesús gatié'*

(Mt. 27.15-31; Mr. 15.6-20; Lc. 23.13-25)

Ca gudé bchebe Pilato Jesús caní, na' bdxúaje' xetú. Bchálajlene' benne' judío ca', na' guzre' le':

—Neda' quebe bi da calela dxezrelda' nun benne' nigá. <sup>39</sup>Le'e zua tu da zéajlele. Gusana' neda' tu benne' xu'u lizre xia lu Laní Pascua nigá. ¿Dxaca lázrele gusana' wenná bea chee judío ca'?

<sup>40</sup>Nadxa xúgute' gulenne' zizraj:

—¿Quegá benne' nigá! ¡Bsan Barrabás!

Barrabás na' naque' gubán.

## 19

<sup>1</sup>Nadxa Pilato guqué'e Jesús, na' bdx-ixruj bé'ene' xelu'e Le' xide'. <sup>2</sup>Benne' dx-jaque' wedil-la buluzríe' xichaj Jesús tu da belune' zruze xaga xeche', ne bulugácue' Le' tu ladxe' bzawe. <sup>3</sup>Nadxa guléchaje' Le', dxelenné':

—¿Gaca ba lue', wenná bea chee judío ca'!

Nadxa belú'e dxu'a lau Jesús.

<sup>4</sup>Nadxa bdxuaj Pilato da xula, ne guzre' benne' ca':

—¿Le nna'xque! Dxebéaja' benne' nigá chee nézele quebe dxezrelda' bi da zrinnaj nabague'.

<sup>5</sup>Bdxuaj Jesús zria xíchaje' da naca zruze xaga xeche', ne nacue' ladxe' bzawe na'. Nadxa Pilato guzre' benne' ca':

—Nigá zua bénnea'.

<sup>6</sup>Gate benne' xíchaje' ca' chee bxruze ca', ne xra'aga wen zrin chee' ca' belelé'ene' Jesús, na' gulezú lawe' dxelenné' zizraj:

—¿Bde'e xaga béguaj! ¡Bde'e xaga béguaj!

Pilato guzre' benne' ca':

—Le che'e, ne le gudé'e xaga béguaj lé'equeze, lawe' da quebe dxezrelda' bi da zrinnaj nabague'.

<sup>7</sup>Na' benne' judío ca' belexechebe':

—Netu' nápantu' tu da nadxixruj bea na, ne ca dxenná na dxal-la' gatié' lawe' da dxun cuine' Zri'ine Dios.

<sup>8</sup>Gate ben Pilato da nigá, na' bezrebedxe'.

<sup>9</sup>Bexu'e xu'u na', na' bchebe' Jesús:

—¿Gazra benne' Lue'?

Quebe bi bechebe' Jesús.

<sup>10</sup>Nadxa guzre Pilato Le':

—¿Quebe dxexechebu' chia'? ¿Quebe nézenu' Lue' napa' neda' xel-la' dxenná bea gudá'a Lue' xaga béguaj, ne napa' xel-la' dxenná bea gusana' Lue'?

<sup>11</sup>Bechebe' Jesús:

—Quebe bi xel-la' dxenná bea napu' bi gunu' chia' chela ca benna Dios lue' xel-la' dxenná bea nigá. Chee le na', bénnea' bde'e' neda' lu na'u dul-la zrendxa nabague' ca lue'.

<sup>12</sup>Lu zra na'te gudilaj lazre' Pilato ájala guné' gusané' Jesús, san benne' judío ca' gulenné' zizraj:

—Che gusanu' benne' nigá, quebe nacu' César tuze, bénnea' dxenná bea Roma. Nu benne' dxun cuine' wenná bea dxedábague' César.

<sup>13</sup>Nadxa Pilato, gate benne' da nigá, bdx-ixruj bé'ene' xelexebéaje' Jesús, na' gudxé'e lataj blau chee', da zua lataj na' nazí le na Gabata nen dizra' hebreo, da zéaje na chale'aj xiaj ta'a. <sup>14</sup>Naca na zra za zrin Laní Pascua, ca du wagubizra. Nadxa Pilato guzre' benne' judío ca':

—Nigá zua wenná bea chee.

<sup>15</sup>Na' benne' ca' gulenné' zizraj:

—¡Gatié! ¡Gatié! ¡Bde'e xaga béguaj!

Pilato guzre' benne' ca':

—¿Gudá'a wenná bea chee'e xaga béguaj?

Belexechebe benne' xíchaje ca' chee bxruze ca':

—Netu' zua tuze wenná bea cheentu'. ¡César! <sup>16</sup> Nadxa Pilato bde'e Jesús lu na' benne' ca' chee te'e xaga béguaj, na' guleché'e Jesús.

*Jesús dxedé'e xaga béguaj*

(Mt. 27.32-44; Mr. 15.21-32; Lc. 23.26-43)

<sup>17</sup> Na' bdxuaj Jesús nu'e xaga béguaj chee chéajé' lataj na' nazí le na Zrita Xichaj Benne' Gate, na' nen dizra' hebreo nazí le na Gólgota. <sup>18</sup> Buludé'e Jesús xaga béguaj lataj na', na' tu zren nen Jesús buludé'e xechupa benne' xaga béguaj ca' chalá'a weaj naga da' Jesús. <sup>19</sup> Pilato bdxixruj bé'ene' buluzúe' le'e xaga béguaj xichaj Jesús da dxenná na: Jesús, Benne' Nazaret, Wenná Bea Chee Judío Ca'. <sup>20</sup> Zane' benne' judío ca' bululabe' da na' lawe' da zua lataj na' naga buludé'e Jesús xaga béguaj gáguze naga dxe' xezre na', na' da na' naxúaj na nen dizra' hebreo, ne nen dizra' griego, ne nen dizra' latín. <sup>21</sup> Chee le na' benne' xíchaje ca' chee bxruze chee judío ca' gulé'e Pilato:

—Quebe guzúaju' na: Wenná Bea Chee Judío Ca'. Bzuaj na: Le' Gunné' Naque' Wenná Bea Chee Judío Ca'.

<sup>22</sup> Bechebe Pilato:

—Da bzuaja', ba naxúajqueze na.

<sup>23</sup> Ca gudé buludá' benne' dxjaque' wedil-la Jesús xaga béguaj, na' belexequé'e zra lané', ne belebeque' na tapa cue', tu cue' weaj chee tu tu benne' dxjaque' wedil-la. Belecá'aqueze' ladxe' dxexrúa cuzre' da quebe nadía na. Tu ca nácheze na. <sup>24</sup> Chee le na' benne' dxjaque' wedil-la gulé ljwezre':

—Quebe chézadxu na. Cwéajdxu da gunna bea na chee la' nu xala le na.

Ca'an guca, guca li da naxúaj na lu xiche chee Dios, da dxenná na: Belexelé'e zra lana', ne guléaje' da gunna bea na chee le na. Caní belún benne' dxjaque' wedil-la.

<sup>25</sup> Gáguze naga zua xaga béguaj chee Jesús zé xrna Jesús nen bi bila xrne'e, ne María, zru'ula Cleofas, ne María Magdalena. <sup>26</sup> Gate ble'e Jesús xrne'e, ne cuita xrne'e na' zé Juan, benne' bséde Jesús, bènea' nazri'idxe', na' guzre' xrne'e:

—Nú'uladau', na' zé zri'inu'.

<sup>27</sup> Nadxa guzre Jesús bénnea':

—Na' zé xrna'u.

Zra na'te benne' nigá beche'e nu'ula na' lizre'.

*Dxate Jesús*

(Mt. 27.45-56; Mr. 15.33-41; Lc. 23.44-49)

<sup>28</sup> Ca gudé gunná Jesús da nigá, lawe' da nézene' xúguté na ba guca li, ne chee guca li ca naxúaj na lu xiche chee Dios, gunné':

—Dxebíleda'.

<sup>29</sup> Zua na' tu dxe'e nupe zichaj, na' bulusubise' tu da dxezrupe na nupe zichaj na', ne buluzúe' na lawe' tu xia tunna, na' buluzúe' na dxu'a Jesús. <sup>30</sup> Na' Jesús guzrupe' nupe zichaj na', na' gunné':

—Ba guca li ca naca na.

Nadxa bse dxu'a xíchaje', gutié'.

*Tu benne' dxeje' wedil-la dxechizie' xia lachú'u Jesús*

<sup>31</sup> Naca na zra za zrin Laní Pascua, na' judío ca' quebe gulaca lazre' xelexegá'ana benne' ca' le'e xaga béguaj ca' lu zra dxulupá'ane' lawe' da naca zra na' tu zra blau. Chee le na' gulenabe' lau Pilato dxixruj bé'ene' xelíchaje' ni'a benne' ca' zaj de'e xaga béguaj ca', ne xelexequé'e le' le'e xaga béguaj ca'. <sup>32</sup> Nadxa tu benne' ca' dxjaque' wedil-la gudíchaje' ni'a benne' nedxu na', ne cá'anqueze chee benne' xetú de'e cuita Jesús. <sup>33</sup> Gate bzrine' naga da' Jesús, blé'ene' ba gutié', na' chee le na' quebe gudíchaje' ni'e.

<sup>34</sup> Tu benne' ca' dxjaque' wedil-la guchízíe' xia chee' lachú'u Jesús, na' bdxuaj dxen, ne nisa na'. <sup>35</sup> Benne' dxuchalaj da nigá naque' benne' blé'ene' na, ne dxuchálaje' da li, ne nézene' dxenné' da li, chee cá'anqueze le'e chéajlele chee Jesús. <sup>36</sup> Da caní guca na chee guca li ca da naxúaj na lu xiche chee Dios, da dxenná na: Quebe gulíchaje' netú zrita chee'. <sup>37</sup> Xetú da naxúaj na lu xiche chee Dios dxenná na: Welelé'ene' bénnea' belune' we'.

*Dxulucaché' Jesús*

(Mt. 27.57-61; Mr. 15.42-47; Lc. 23.50-56)

<sup>38</sup> Ca gudé na' José, benne' xezre Arimatea, xeajnabe' Pilato gu'e le' lataj xexu'e Jesús. José naque' tu benne' guque' Jesús tuze, san bagácheze lawe' da bzrebe' judío blau ca'. Pilato be'e le' lataj, na' bexu'e Jesús. <sup>39</sup> Ca'anqueze Nicodemo, bénnea' xeajchálajlene' Jesús chizrela, bzrine' na', nu'e tu gaxúa xiaj nedxe, ne tu da dxelále'e

zixre. <sup>40</sup> Nadxa José, ne Nicodemo belexe-  
qué'e Jesús, na' buluchele' Le' ladxe' nen  
nedxe na' ca naca da zjácáḷe benne' judío  
ca' da dxelune' chee benne' gate', gate na'  
dxulucaché' le'. <sup>41</sup> Lataj na' naga buludé'e  
Jesús xaga béguaj zua tu lataj naga zaj zē  
xaga ca', na' lávela lataj na' zua tu ba cube  
le'e xiaj na', naga quebe nu ne chú'uqueze  
benne' gate'. <sup>42</sup> Lu ba na' belegu'e Jesús  
lawe' da zua ba na' gáguze, ne lawe' da  
ba dxebíá gubizra, ne ba zua su lau zra  
dxulupá'ana judío ca'.

## 20

*Jesús dxexebang' ládujla benne' gate*

(Mt. 28.1-10; Mr. 16.1-8; Lc. 24.1-12)

<sup>1</sup> Zra nedxu, guxíaj María Magdalena  
dxu'a ba na' dxaní'sise', gate ne nachúl-  
late, na' blé'ene' québedxa naduse xiaj  
dxu'a ba na'. <sup>2</sup> Nadxa bexíaj chégü'e' naga  
zua Simón Pedro nen xetú benne' bsede  
Jesús, bénnea' bzri'idxe' Jesús, na' guzre'  
benne' ca':

—Ba belequ'e' Xránadxu lu ba na', ne  
quebe nézentu' ga xeajlelú'e Le'.

<sup>3</sup> Nadxa Pedro, ne bénnea' xetú beledxúa-  
je' zjaque' dxu'a ba na'. <sup>4</sup> Dxúpat'e' zjaca  
chégü'e' tu zren, san bénnea' xetú guzá  
chégudxe' ca Pedro, ne bzrine' nédxudxa  
dxu'a ba na'. <sup>5</sup> Na' xeajse' su dxú'ala xea-  
jnné'e lu ba na', na' blé'ene' ladxe' da bu-  
luhele' Jesús xu'u na na', san quebe guxú'e  
lu ba na'. <sup>6</sup> Ca gudé na', bzrin Simón Pedro,  
na' guxú'e lu ba na'. Cá'anqueze le' blé'ene'  
ladxe' na' xu'u na na', <sup>7</sup> ne blé'ene' ladxe'  
da buluchele' xichaj Jesús, quebe xu'u na tu  
zren nen ladxe' da bedxela na le'. Nadube  
na, dxe' na chala'ala. <sup>8</sup> Nadxa cá'anqueze  
guxú'u bénnea' xetú, bénnea' bzrin nedxu  
dxu'a ba na', na' blé'ene' ladxe' ca', ne  
guxéajle'e. <sup>9</sup> Quebe ne xeléajni'ine' da  
naxúaj na lu xiche chee Dios da dxenná na  
xebán Jesús ládujla benne' gate'. <sup>10</sup> Nadxa  
benne' ca' bsede Jesús belexezrine' xu'u  
naga zaj zre'e.

*Jesús dxulé'e lawe' María Magdalena*

(Mr. 16.9-11)

<sup>11</sup> María begá'ane' dxu'a ba na', dxe-  
bezre'. Ca dxebezre' na', na' gulégü'e' dxen-  
né'e lu ba na', <sup>12</sup> na' blé'ene' chupa gubáz  
chee xabáa zaj nácu'e' zra lané' chiche, zaj  
dxe'e naga guxú'u Jesús. Tué' dxe'e naga  
guzrúa xichaj Jesús, na' xetú'e' dxe'e zeaj

zranle ga guzrúa ni'a Le'. <sup>13</sup> Na' buluchébe  
gubáz chee xabáa ca' María na':

—Nu'ula, ¿bizr chee na' dxebezru'?

Le' guzre' gubáz chee xabáa ca':

—Lawe' da belú'e Xrana', ne quebe  
nezda' ga xeajlelú'e Le'.

<sup>14</sup> Caní dxenné', na' bzéchaj xíchaje', ne  
blé'ene' Jesús ze' ca'ala, san quebe nézene'  
che Jesús na'. <sup>15</sup> Nadxa Jesús bchébe' María  
na':

—Nú'uladau', ¿bizr chee na' dxebezru'?  
¿Nu dxexíajaju'?

María gúquene' naque' benne' dxá'ane'  
xaga ca' zaj zē na', na' guzre' Le':

—Benne', che lue' bi'u Le', gunná ga  
xeajlú'u Le', chee cheajzezri'a Le'.

<sup>16</sup> Nadxa Jesús guzre' nu'ula na':

—María.

María na' bexéchaje', ne guzre' Le' nen  
dizra' hebreo:

—¡Raboni!

Dizra' nigá zéaje na: Benne' Dxusede.

<sup>17</sup> Jesús guzre' María na':

—Bsan neda' lawe' da quebe ne  
xegüéna' naga zua Xra'. Bexíaj, xeajxezre  
bi bícha'dau' ca', benne' ca' bsédeda',  
xegüéna' naga zua Xra', ne nácaqueze'  
Xrale. Naque' Dios chia', ne Dios cheeḷe.

<sup>18</sup> Nadxa bexíaj María Magdalena, xea-  
jzenne' benne' ca' bsede Jesús ba blé'ene'  
Jesús, na' Le' guzre' le' da caní.

*Jesús dxulé'e lawe' benne' ca' bsédene'*

(Mt. 28.16-20; Mr. 16.14-18; Lc. 24.36-49)

<sup>19</sup> Lu zra ná'queze, da naca na zra nedxu  
chee da gazre zra, na' chizrela zaj nazraga  
benne' ca' bsede Jesús, ne zaj nusézxujé'  
dxa xu'u ca' lawe' da dxelezrebe' judío blau  
ca'. Na' guxú'u Jesús, guzre' laduj benne' ca',  
na' bgape' benne' ca' diuzre, dxenné':

—Le gapa xel-la' dxebeza zri lazre'.

<sup>20</sup> Ca gudé gunná Jesús da nigá, na'  
blé'ene' benne' ca' ne'e, ne le'e naga  
gudé xia na'. Benne' ca' bsede Jesús  
gulebéle'ene' gate beledé'ene' Xránadxu.

<sup>21</sup> Nadxa Jesús guzre' benne' ca' xecha lasa:  
—Le gapa xel-la' dxebeza zri lazre'.  
Cáteze gusel-la Xra' neda', cá'anqueze  
dxusel-la' neda' le'e.

<sup>22</sup> Nadxa blube' lau benne' ca' ne guzre'  
le':

—Le si' Be' Lá'azxa chee Dios. <sup>23</sup> Benne'  
ca' dxunite laule le'e chee dul-la zaj  
nabague' ba bnite lau Dios chee', na' benne'

ca' quebe dxunite laule le'e chee dul-la zaj nabague', quebe bunite lau Dios chee'.

*Tomás dxel'é'eng' Xránadxu ba bebang'*

<sup>24</sup> Tomás, tu benne' chazrinnu ca' bsede Jesús, bënnea' le' Bi Lide', quebe zué' nen benne' ca' xezicadxa gate ble'e lau Jesús.

<sup>25</sup> Ca gudé na' gulé'e Tomás na':

—Ba blé'entu' Xránadxu.

Gunná Tomás:

—Che quebe le'eda' ne'e naga guledé bdiduj ca', ne gudéa' zrube na'a lu xedxu chee' bdiduj ca', ne gudéa' na'a le'e naga gudé xia na', québequeze chéajle'a.

<sup>26</sup> Ca guca xrunu' zra, benne' ca' bsede Jesús zaj nazrágaqueze' lu xu'u na' xetú lasa, na' zua Tomás nen benne' ca'. Nadxa, lácala zaj naxezxuj dxa xu'u ca', ble'e lau Jesús lau benne' ca', ne guzé' laduj le', na' bgape' le' diuzre, gunné':

—Le gapa xel-la' dxebeza zri lazre'.

<sup>27</sup> Nadxa Jesús guzre' Tomás:

—Bde zrube na'u nigá, ne gunná' na'a nigá. Bëna na'u, bde na le'a nigá. Québedxa gun chupa lazru', san guxéajle.

<sup>28</sup> Nadxa bechebe Tomás:

—Xrana', ne Dios chia'.

<sup>29</sup> Jesús guzre' le':

—Tomás, na' dxéajle'u lawe' da ba blé'enu' neda'. Ba neza zrentę naca na chee' benne' ca' dxeléajle'e chia' lácala quebe ne xeledé'eng' neda'.

*Da dxaca lazre' Juan gun xiche nigá*

<sup>30</sup> Jesús bene' da zandxa xel-la' waca zrentę lau benne' ca' bsédeng' da quebe zaj naxúaj na lu xiche nigá. <sup>31</sup> Da caní zaj naxúaj na chee' chéajlele le'e chee' Jesús, naque' Cristo nasel-la Dios, ne Zri'ine Dios, ne chee' gápale xel-la' nabán lawe' da dxéajlele chee'.

## 21

*Jesús dxulé'e lawe' gazre benne' ca' bsédeng'*

<sup>1</sup> Ca gudé na' Jesús ble'e lawe' lau benne' ca' bsédeng' dxu'a nísadau' chee' Tiberias. Caní guca na. <sup>2</sup> Zaj nazraga Simón Pedro, ne Tomás, bënnea' léqueze' Bi Lide', ne Natanael, benne' xezre Caná da nababa Galilea, ne chupa zri'ine Zebedeo, ne xechupa benne' ca' bsede Jesús. <sup>3</sup> Simón Pedro guzre' benne' ca':

—Cheajsendxa' bela.

Benne' ca' gulenné':

—Cá'anqueze netu' wazá'lent'u' lue'.

Nadxa xjaque', na' gulu'e tu lu da dxedá lawe' nísadau'. Xela na' quebe nu' bela gulezénqueze'. <sup>4</sup> Ca guzú lau dxan'isise', ble'e lau Jesús dxu'a nísadau' na'. Benne' ca' bsédeng' quebe zaj nézene' che Jesús na'. <sup>5</sup> Nadxa Jesús guzre' benne' ca':

—Bënne'dau', ¿quebe nu' bela ne senle?

Belexechebe benne' ca':

—Quebe bi ne sentu'-ba'.

<sup>6</sup> Nadxa guzre Jesús benne' ca':

—Le guzala xixruj na' chalá'a xabęla chee' da dxedá lawe' nísadau' na', na' senle bela.

Ca' belung', na' ca' dxelexequé'e xixruj na' quebe dxelexegué'eng' na' lawe' da nazratę na' bela znan. <sup>7</sup> Nadxa bënnea' nazrí'idxa Jesús guzre' Pedro:

—Xránadxu na'.

Ca ben Simón Pedro naca Xránadxu, na' bexázię' ladxe' dxexrúa cuzre' lawe' da nagüe' na, na' bexétaje' lu nisa. <sup>8</sup> Xezicadxa benne' ca' belexezrine' dxu'a nísadau' na', zaj zre'e lu da dxedá lawe' nísadau', dx-elexezrube xuę' xixruj na' nazratę na' bela ca' lawe' da dxe' da dxedá lawe' nísadau' na' lu nísadau' ca' tu le gu'una xiaj. <sup>9</sup> Gate belexétaje' lu xu bizre, na' belelé'eng' ba dxe' xi', ne ba zrua tu bela lawe' xi' na', na' de' na' xeta xtila. <sup>10</sup> Nadxa Jesús guzre' benne' ca':

—Le cheajxri' tu chupa bela ca', be za guzentele.

<sup>11</sup> Begüén Simón Pedro lu da dxedá lawe' nísadau' na', ne bezrube xue' xixruj na' dxu'a nísadau' na'tę, nazratę na' bela zri'a, tu gaxúa chi'inu xunba', na' lácala naca tu cá'antęba' quebe gudxeza xixruj na'.

<sup>12</sup> Nadxa guzre Jesús benne' ca':

—Le da gágule xrsila.

Netú benne' ca' quebe dxelexázreng' xuluchębe' Le' nu' Le', lawe' da zaj nézene' naque' Xránadxu. <sup>13</sup> Nadxa Jesús guqué'e xeta xtila na', na' bnézurje' na' benne' ca', ne cá'anqueze bene' cheg' bela ca'.

<sup>14</sup> Da nigá naca na' da guxunne' lasa ble'e lau Jesús lau benne' ca' bsédeng' ca' gudé bebang' ládujla benne' gate.

*Jesús dxuchálajleng' Simón Pedro*

<sup>15</sup> Ca gudé gulawe' xrsila, na' Jesús bchebe' Simón Pedro:

—Simón, zri'ine Jonás, ¿nazrí'idxenu' neda' ca' benne' caní?

Bechebe Pedro:

—Awe', Xran, nézenu' dxelé'eda' Lue' chawe'.

Na' Jesús guzre' le':

—Bxue zrila' du chia' ca'.

<sup>16</sup>Nadxa Jesús bchebe' le' da xula:

—Simón, zri'ine Jonás, ¿nazrí'inu' neda'?

Pedro bechebe':

—Awe', Xran, Lue' nézenu' dxelé'eda' Lue' chawe'.

Jesús guzre' le':

—Bxue zrila' chia' ca'.

<sup>17</sup>Da guxunne' lasa Jesús bchebe' le':

—Simón, zri'ine Jonás, ¿dxelé'enu' neda' chawe'?

Pedro bewi'ine lazre' lawe' da bchebe Jesús le' da guxunne' lasa che dxelé'ene' Le' chawe', na' guzre' Jesús:

—Xran, Lue' nézquezenu' xúgute. Lue' nézenu' dxelé'eda' Lue' chawe'.

Na' Jesús guzre' le':

—Bxue zrila' chia' ca'. <sup>18</sup>Da li dxapa' lue', gate ne nacu' benne' cuide' gucu' zra lanu', ne guxíaju' naga dxaca lazru'. Gate bache nacu' benne' gula, chilju' na'u, na' benne' xula gugácue' lue', ne che'e lue' naga quebe gaca lazru' chéaju'.

<sup>19</sup>Gate gunná Jesús da nigá, dxuzéa-jni'ine' benne' ca' ca dxal-la' gate' Pedro chee' gucá'ana szrené' Dios. Ca gudé na' Jesús guzre' le':

—Ben neda' tuze.

*Da gaca chee' bénnea' nazrí'idxa Jesús*

<sup>20</sup>Gate bexechaj Pedro, blé'ene' bénnea' nazrí'idxa Jesús zéaje nawe' le', naque' bénnea' dxe'e cuita Jesús gate na' gu-lawe' xrche' na', ne bchebe' Jesús: “Xran, ¿nuzra na' gudé Lue' lu na' benne' ca' dx-eledábague' lue'?” <sup>21</sup>Gate Pedro blé'ene' bénnea', na' bchebe' Jesús:

—Xran, ¿gazra benne' nigá? ¿Aja gaca chee'?

<sup>22</sup>Jesús bechebe':

—Che neda' dxaca lazra' xegá'ane' nigá ca zrindxa zra xelá'a neda', ¿naca na chiu' lue' nézenu'? Lue', ben neda' tuze.

<sup>23</sup>Belén benne' ca' zaj de'e Jesús quebe gate benne' na'. Jesús quebe guzre' le' quebe gatié'. Guzre' le': “Che neda' dxaca lazra' xegá'ane' ca zrindxa zra xelá'a neda', ¿naca na chiu' lue' nézenu'?”

<sup>24</sup>Benne' nigá naque' benne' dxexechébe' chee' da nigá, ne ba nuzúaje' na. Nézentu' dxenné' da li.

<sup>25</sup>Cá'anqueze ne zaj dēdxā da zante da ben Jesús, na' chela xuaj tu tu na, dxéqueda' quebe gueque lu xēzr la xu nigá cha' xiche ca' dxal-la' guzúajdxu. Ca' naca na.

## DA CA' BELÚN BENNE' GUBÁZ CHEE CRISTO

*Dios nachębe lazre' sel-le' Be' Lá'azxa*

<sup>1</sup> Lue', Teófilo, bzuaja' chiu' lu xiche nedxu ca naca xúgute da guzú lau Jesús dxune', ne dxusédenę' nédxudaute, <sup>2</sup> cadxa begüéne' xabáa. Gate za xezé'e xexíaje' xabáa guquę'e gubáz chee' ca', na' zúale Be' Lá'azxa Le' guzre' benne' ca' ca da dxal-la' xelune'. <sup>3</sup> Ca gudé gutię', Jesús ná'queze ble'e lawe' benne' ca', ne lawe' chua zra ble'e lawe' benne' ca', na' blé'ene' da zan da dxelunna bea na naca bane', ne bchálajlene' benne' ca' ca dxal-la' nna bea Dios.

<sup>4</sup> Gate ne zúale Jesús benne' gubáz ca', gunné xuene' le' quebe xesíaque' xęzre Jerusalén. Na' guzre' benne' ca':

—Le cueza ca da guchębe lazre' Xra' gunne' cheęle, ca gunníqueza' neda'. <sup>5</sup> Da lí Juan bchue' bęnneache nisa, san lu zra caní gaca cheęle ca da zęaje xel-la' dxedxúa nisa, xida Be' Lá'azxa xedajsúe' lu xichaj lázrdaule.

*Jesús dxegüéne' xabáa*

<sup>6</sup> Gate na' zaj nazrague' nen Jesús, na' buluchębe' Le':

—Xran, ęgüe Dios lataj nna béaqueze xęzre Israel lu zra caní?

<sup>7</sup> Na' bechębe Jesús:

—Quebe naca cheęle nézele bátala, u bi zra gun Dios da ca' tuze Le' nape' xel-la' waca gune'. <sup>8</sup> Gate xida Be' Lá'azxa súalęne' le'e, sile xel-la' waca, na' chęajle cheajchálajle da naca chia' lu xęzre Jerusalén, ne ca naca naga nababa Judea, ne naga nababa Samaria, ne ca nácaqueze xęzr la xu nigá.

<sup>9</sup> Ca gudé gunné' da nigá, ne dxácatę dxe-lenná' benne' ca' Le', begüén Jesús xabáa, na' ca bexu'e tu lu beuj benite Jesús lau benne' ca'. <sup>10</sup> Ne zaj zra' benne' ca' dxelenę'e dxácatę dxegüén Jesús, belelá' chupa benne' zaj nácue' ladxe' chiche lau benne' ca', <sup>11</sup> na' gulé'e benne' gubáz ca':

—Le'e, benne' Galilea, ębiz cheę na' zele dxenna'le xabáa? Jesús nigáqueze begüéne' zexíaje' xabáa, bezé'e ládujla le'e, welé'e xetú cáqueze ble'e'le Le' zexíaje'.

*Dxelequę'e Matías cheę xedęe' waláz cheę Judas*

<sup>12</sup> Nadxa besí'aca benne' gubáz ca' lu Xi'a Xaga Olivo, ne belexezrine' Jerusalén, da quebe naca na zitu', san dxę' cátięze da dxunna da nadxiruj bea na lataj xesí'aque' lu zra dxulupá'ane'. <sup>13</sup> Gate belexezrine' lu xęzre na', belexegüéne' xu'u sibe naga zaj zuę'. Benne' caní zaj naque' Pedro, ne Jacobo, ne Juan, ne Andrés, ne Felipe, ne Tomás, ne Bartolomé, ne Mateo, ne Jacobo zri'ine Alfeo, ne Simón, bęnnea' dxedábague' benne' Roma ca', ne Judas, zri'ine Jacobo. <sup>14</sup> Xúgute benne' caní tu dxelezrágazqueze' nen benne' biche Jesús, ne María xrna Jesús, ne xebal-la nu'ula ca', cheę xuluchálajlene' Dios.

<sup>15</sup> Lu zra ca' Pedro guzé' laduj bi bíchedxu ca', zaj naque' ca tu gaxúa galaj bęnneache, na' guzre' le':

<sup>16</sup> —Le'e, bi bícha'dau', bęn na ba xen guca lí ca da gunná Be' Lá'azxa lu xiche cheę Dios, da na' gunná David waláz cheę Dios ca naca da dxal-la' gaca cheę Judas, bęnnea' guché'e benne' ca' gulel-le' Jesús.

<sup>17</sup> Judas nigá guzúalęne' dxi'u tu zren, ne guquę' dxi'u tuze lu zrin nigá. <sup>18</sup> Bxa'u tu cue' xęzr la xu ca naca lazruj cheę Judas, da guzú' lu ne'e cheę da calela da bęne'. Na' benne' nigá xęajcházie' suxíchajla, ne gutín le'e, na' bdxuaj ca naca zrájlue'. <sup>19</sup> Xúgute benne' zaj zre'e Jerusalén belenne' da nigá, na' buluzúe' la xęzr la xu na' Acéldama, da zęaje na: Xęzr La Xu Chee Dxen. <sup>20</sup> Guca lí ca da dxal-la' gaca chee' lawe' da naxúaj lu xiche lá'azxa naga zaj naxúaj salmo ca', da dxenná na:

Xegá'ana cá'aze lize',

ne quebe nu chilá' sua na'.

Cá'anqueze dxenná na:

Xetú benne' té'e waláz cheę'.

<sup>21</sup> Zaj zra' nigá benne' ca' gusá'acalęne' dxi'u ca naca dxácatę guzúale Jesús dxi'u.

<sup>22</sup> Guzú lau na gate bchua Juan Jesús nisa, cadxa bzrin zra begüéne' xabáa. Dxun na ba xen tu benne' caní gague' dxi'u tuze cheę xęchębe' ca guca gate bebán Jesús lu xel-la' gute.

<sup>23</sup> Nadxa gulebéaje' chupa benne' ca', José ne Matías. José na' léqueze' Barsabás ne léqueze' Justo. <sup>24</sup> Buluchálajlene' Dios, gu-lenné':

—Xran, Lue' nézqueznu' ca naca da xu'u lu xichaj lázxdau xúgute bęnneache. Ble'e netu' nula benne' chupa caní ba nabęaju'

Lue', <sup>25</sup> chee gaque' gubáz chiu', ne xedé'e waláz chee Judas, bënnea' bniti'e da naca chee' lawe' da bene' dul-la, na' bexiáje' lataj naga naca chee'.

<sup>26</sup> Nadxa gulebéaje' da gaca bea na, na' bexala Matías, na' gúcate' tuze benne' chinéaj gubáz ca'.

## 2

*Ca guca gate bla' Be' Lá'azxa*

<sup>1</sup> Ca bzin zra Pentecostés, xúgute benne' ca' dxeléajle'e chee Jesús zaj nazrague' tuze lataj. <sup>2</sup> Ca' guca, belenne' tu schaga da za' lu be' zran xabáa, ca dxun tu be' bdu'u, na' belenze' na xúgute benne' zaj zre'e lu xu'u naga zaj dxe'e. <sup>3</sup> Nadxa belelé'ene' lu be' xi' ca', da dxelala, na' xejlezúa na xíchaj tu tu benne' ca'. <sup>4</sup> Nadxa guzáletequeze Be' Lá'azxa xúgute benne' ca', na' tu tue' gátezú lawe' dxuluchálaje' dizra' nazrala cáteze dxuchine Be' Lá'azxa le'.

<sup>5</sup> Ca lu zra ca' zaj zra' xezre Jerusalén benne' judío ca' dxulucá'ana szrénqueze' Dios. Benne' caní zá'aque' xúgute xezr la xu zaj dxe' lu xezr la xu nigá. <sup>6</sup> Ca belenne' bënneache ca naca schaga na' da dxaca na, na' belenezrague', ne quebe zaj nézene' bi na', lawe' da dxelén tu tu benne' ca' dizra' cha chee' da dxuluchalaj benne' ca' dxeléajle'e chee Jesús. <sup>7</sup> Na' belexebánele'ene', ne belexruse', ne gulé ljwezre' tue' xetúe':

—Zaj naca benne' Galilea xúgute benne' caní dxuluchálaje'. <sup>8</sup> ¿Ájazra na' dxendxu dxuluchálaje' dizra' cha cheedxu dxi'u? <sup>9</sup> Zradxu dxi'u nigá, nácadxu benne' xezr la xu Partia, ne benne' xezr la xu Media, ne benne' xezr la xu Elam, ne benne' xezr la xu Mesopotamia, ne benne' chee xezre ca' zaj nababa Judea, ne benne' chee naga nababa Capadocia, ne benne' chee naga nababa Ponto, ne benne' chee naga nababa Asia, <sup>10</sup> ne benne' chee naga nababa Frigia, ne benne' chee naga nababa Panfilia, ne benne' xezr la xu Egipto, ne benne' chee xezr la xu Africa da zua dédedxa chee xezre Cirene. Cá'anqueze zaj zra' benne' xezr la xu Roma nigá. Bal-la benne' Roma ca' zaj naque' benne' judío, benne' gulálaje' ca', ne benne' zaj nazi'e ca naca da nadxiruj bea chee benne' judío ca'. <sup>11</sup> Cá'anqueze nácadxu benne' xezr la xu Creta, ne benne' xezr la xu Arabia. Xúgute dxu dxendxu lu

dizra' cha cheedxu dxuluchalaj benne' caní ca naca da zren ca' da dxun Dios.

<sup>12</sup> Xúgute' belexebáne'ne', ne quebe zaj nézene' bi da dxaca na', na' gulenaba ljwezre' tue' xetie':

—¿Bizra zéaje da nigá?

<sup>13</sup> Benne' xula ca' belún le', gulenné':

—Dxelezuzre benne' caní.

*Da bchalaj Pedro lau benne' ca'*

<sup>14</sup> Nadxa guxasa Pedro nen benne' chinéaj gubáz chee Cristo, na' zizraj bchálajlene' bënneache zaj zra' na'. Dxe'e le':

—Le'e, benne' Judea, ne xúgutele le'e nazrágale xezre Jerusalén. Dخال-la' nézele le'e da nigá. Le xen xanne' ca naca da xapa' le'e. <sup>15</sup> Netu' quebe dxezúrentu' ca dxéquele le'e. Za gudeté xrsila na'a. Netú benne' quebe dxezúzrene' ca ná'queze. <sup>16</sup> Da nigá naca da gunnáqueze Joel, bënnea' bchálaje' waláz chee Dios gate na' gunné':

<sup>17</sup> Caní dxenná Dios: “Lu zra bzébe wasé-laqueza'

Be' Lá'azxa chia' chee súalene' xúgute bënneache.

Zrí'inele bi biu ne bi nu'ula welennéquezebe' waláz chia' neda'.

Bi cuide' ca' welelé'equezebe' ca da gulé'eda'-be'.

Na' benne' gula ca' welelé'ne' xela.

<sup>18</sup> Ca lu zra na' guzuáqueza' Be' Lá'azxa chia' nen bi wen zrin chia' ca', benne' biu ne nu'ula ca',

na' guchálajquezebe' waláz chia' neda'.

<sup>19</sup> Lu be' zran xabáa gulé'equezda' xel-la' waca chia',

na' lu xezr la xu dxe'ela gulé'eda' da xelunna bea na,

dxen, ne xi', ne zren da naca ca beuj gasaj.”

<sup>20</sup> Gubizra xechul-la na,

na' beu' xexaca na xrna ca dxen

nedxu ca za zrin zra xelá' Xránadxu.

Zra na' gaca na tu zra chee da xebánedxu

ne zra na' walé'equezdXu xel-la' szren chee Dios.

<sup>21</sup> Nadxa xelélé' xúgute benne' ca'

xelenné' Xránadxu lu xel-la' dxeleajlí lazre' chee'.

<sup>22</sup> Chee le' na', le'e, benne' Israel, le xen ca da xapa' le'e. Jesús, benne' Nazaret, guque' tu benne' bedxúaje' xrlátaje lau xúgutele le'e ne chee da ben Dios laule le'e. Lu na' Jesús Dios blé'ene' da zan da dxebánedxu, ne xel-la' waca ca', ne da dxelunna bea na ca ba nézquezele le'e. <sup>23</sup> Gate Dios be'e



lataj tu benne' bdeē' Lē' lu na'le le'e cáteze bache núnqueze' nedxu, nadxa le'e gudél-lale Lē', na' bétele Lē' gate na' bdele Lē' lu na' benne' ca' dxelunge' da calela, benne' ca' buludé'e Lē' xaga béguaj naga gutie'.<sup>24</sup> Nadxa Dios bsebanē' Lē', bebéaje' Lē' lu xel-la' gute. Quebe guxú'u ájala xegá'ane' chalásaze lu xel-la' gute na'.<sup>25</sup> Ca naca da nigá bchalaj wenná bea David ca naca chee Jesús na', gate gunné':

Belé'equesda' Xrana' lawa' nigá.

Lē' zue' cuita' xabēla, chee quebe bi guchebe na neda'.

<sup>26</sup> Chee lē na' gubélé'eda', ne bil-la' lu xel-la' dxebé chia'.

Chee lē na' guxrén lázrequeza' Lē' gate gatia',

<sup>27</sup> lawe' da quebe xucá'anaquezu' neda' lu lataj chee benne' gate.

Quebe güéquezu' lataj guzru bel-la' dxen chia' neda',

naca' benne' wen zrin chiu', ne benne' nazrí'inu'.

<sup>28</sup> Blé'equezenu' neda' ca dxal-la' guna' chee zrué'eda' xel-la' nabán, na' gúnna'le'u neda' xel-la' dxebé lawe' da zúalenu' neda'.

<sup>29</sup> 'Le'e, bi bícha'dau'. Naca bea na gute xra xrtáudxu David, na' bulucachē' lē' lu xēdxu ba chee' da zúaqueze na' na' nagá zúadxu. <sup>30</sup> David na' guque' tu benne' bchálaje' waláz chee Dios, ne gunézene' ca da nachebe lázrequeze Dios gunē'. Guné lie' tu benne' zri'ine zre sua David na' gaque' Cristo, Bénnea' nna béaqueze', xe-qué'e lawe' chee David. <sup>31</sup> Ca' guca, David nigá belé'equenze' nedxu ca naca da dxal-la' gaca chee Cristo, na' bchálaje' ca guca gate bebán Cristo, gunné': "Benne' nigá quebe xegá'anaqueze' lataj chee benne' gate, ne quebe gúzruqueze bel-la' dxen chee'."

<sup>32</sup> Caní guca, Dios bsebanē' Jesús nigá, na' netu' dxexeché'entu' da li ca guca da nigá. <sup>33</sup> Ca' guca, Dios bzue' Jesús lu xabáa chee' nen xel-la' waca chee', na' be'e Lē' lataj gusel-le' Be' Lá'axza chee' nigá ca nachebe lázrequeze' nedxu gunē', na' xúgute da caní dxelé'ele le'e, ne dxenle zaj naca na da dxun Be' Lá'axza na'. <sup>34</sup> David na' quebe begüéne' xabáa, san léqueze' gunē': Xránadxu Dios guzre' Xrana':

"Gudxe'e cuita' xabēla nigá

<sup>35</sup> ca zrindxa zra guzúa' benne' dxedábague' lue' chee nna be'enu le'."

<sup>36</sup> 'Xúgutele le'e, benne' Israel, dxal-la' nézquezele da nigá: Jesús nigá, bénnea' bda'le le'e xaga béguaj, Dios ba nune' Lē' Xránale ne Cristo chee, Benne' guselé' le'e.

<sup>37</sup> Gate benne' ca' belenne' da nigá, na' belexewí'ine lazre', na' buluchebe' Pedro, ne benne' gubáz ca' chee Jesús, dxelé'e le':

—Benne' bíchentu', jájazra dxal-la' guntu' xca'?

<sup>38</sup> Nadxa gunná Pedro:

—Le xebí'i lazre' lau Dios, ne le chua nisa tu tule chee gácale Jesucristo tuze, chee gunite lau Lē' chee le'e ca naca dul-la da nabágale. Ca' gaca, nadxa Dios sél-laqueze' Be' Lá'axza chee' chee súalene' le'e. <sup>39</sup> Da nigá nachebe lazre' Dios naca na chee le'e, ne chee zrí'inele, ne chee xúgute benne' zaj zre'e zitu', xúgute benne' ca' dxaca lazre' Dios nne'.

<sup>40</sup> Ca naca dizra' nigá, ne xezícaladxa dizra' da bchalaj Pedro, bzéajni'ine' benne' ca', na' gunné':

—Le la ládujla benne' wen da calela caní.

<sup>41</sup> Ca'an guca, benne' ca' guléajle'e chee da bchalaj Pedro belexedxúe' nisa, na' lu zra na' belaca tuze ca chi dxua gaxúa benne' nen benne' ca' ba dxeléajle'e chee Jesús. <sup>42</sup> Na' xúgute benne' ca' gulezúa típaqueze' ca da dxulusede benne' gubáz chee Jesús le', na' gulezúe' tuze nen le sa' ljwezre' chee bululáwizre' Dios, ne buluzrague' chee xelawe' da dxusá lázredxu ca guca gate gute Cristo.

*Ca belún benne' nedxu ca', benne' guleajlí lazre' Cristo*

<sup>43</sup> Xúgute benne' ca' gulezrebe' gate belelé'ene' xel-la' waca zante, ne da dxelunna bea na da dxelún benne' gubáz chee Jesús. <sup>44</sup> Xúgute benne' ca' dxeléajle'e chee Jesús gulaque' tuze, ne bulunézruje' da de chee' tue' xetúe'. <sup>45</sup> Belutiē' xúgute da zaj nape', ne bulunézruje' dumí na' chee benne' ca' ca da dxelaxzrjene'. <sup>46</sup> Xugu' zra belexzrague' lu xudau', ne cá'aqueze lu lizre cha chee', chee xelawe' da dxusá lázredxu ca guca gate gute Cristo. Gulawe' tu zrente lu xel-la' dxelebe', ne dutē xel-la' dxelaxruj lazre' chee'. <sup>47</sup> Belúe lá'ane' Dios, na' xúgute bénneache guléquene' benne' ca' ba lá'ana. Tu zra tu zra Xránadxu bzane'

benne' ca' chee Cristo ca dxelezi' lu ne'e tu tue' Cristo.

### 3

#### *Dxexaca tu benne' zrinnaj*

<sup>1</sup> Tu zra xjaque' Pedro ne Juan lu xudau' dxexedá' chunna, da naca na gate dxuláwizraj bénneache Dios lu xudau'. <sup>2</sup> Tu zra tu zra zua tu benne' na' naque' zrinnaj ca nálajte'. Dxeleché' benne' ljwezre' le' xudau' na', ne dxelebeche' le' dxu'a dxa xu'u na' nazí le na: Da Xrtante, chee nabe' guna' chee benne' dxelu'e na'. <sup>3</sup> Gate benne' zrinnaj nigá blé'ene' Pedro ne Juan, dxelu'e xudau', na' gunabe' guna' lau benne' caní. <sup>4</sup> Nadxa Pedro ne Juan gulenné' le', na' Pedro guzre' benne' na':

—Gunná' netu'.

<sup>5</sup> Benne' na' gunná' xánnie' le' lawe' da dxéquené' bi xulunezruje' le'. <sup>6</sup> Pedro guzre' le':

—Quebe bi de chia' dumí plata ne dumí oro. Da napa' gunna' lue'. Lu La Jesucristo, benne' Nazaret, guxasa gudá.

<sup>7</sup> Nadxa Pedro guqu'é na' benne' zrinnaj na' da zua xabela, ne bechise' le', na' ca bene' caní, belexezúa chacha ni'e, ne béchajdu chee' ca'. <sup>8</sup> Nadxa benne' zrinnaj na' guxrítie' tu, na' guzé', ne guzú lawe' dxedé'. Guxú'e nen benne' ca' xudau', dxedé', dxexritie', ne dxue lá'ane' Dios. <sup>9</sup> Xúgute benne' zaj zre'e na' belelé'ene' le' dxedé', ne dxue lá'ane' Dios. <sup>10</sup> Belexebánene', ne belezrebe' ca da belelé'ene' guca na, lawe' da zaj núnbe'e benne' zrinnaj na', ne zaj nézene' naque' bénnea' dxebé'e dxenabe' guna' ga dx-elexú'u bénneache xudau', da na' nazí le na Da Xrtante.

#### *Da bchalaj Pedro la chila da nazí le na La Chila Chee Salomón*

<sup>11</sup> Benne' zrinnaj na', benne' ba bexaque', quebe bsane' na' Pedro ne Juan, na' xúgute benne' dxelxebánene', ne xjaque' naga nazí le na La Chila Chee Salomón, naga zaj zra' Pedro ne Juan. <sup>12</sup> Gate ble'e Pedro da nigá, na' guzre' benne' ca':

—Le'e, benne' Israel, ¿bizr chee na' dxe-bánele le'e? ¿Bizr chee na' dxenná'le netu' caní, ne dxéquele netu' bexuntu' benne' nigá, na' dxexedé' ne chee xel-la' waca cheentu', u ne chee xel-la' benne' xudau' cheentu'? <sup>13</sup> ¡Cabí! Dios chee xra xrtáudxu

Abraham, ne Isaac, ne Jacob bca'ana szrene' Zrí'ine', Jesús, Bénnea' bdele le'e lu na' benne' xu'u lawe'. Gate guca lazre' Pilato gusané' Le', le'e quebe guca lázrele. <sup>14</sup> Bzúale chalá'ala Benne' na' naque' lá'azca ne xrlátaje, na' gunábale la tu benne' wen da zrinnaj. <sup>15</sup> Ca'an guca, bétele le'e Bénnea' dxunne' bénneache xel-la' nabán, san Dios bsebane' Le' ládujla benne' gate, na' netu' dxexeché'entu' chee da nigá. <sup>16</sup> Guca lu La Jesús nigáqueze, u nnadxu guca na lawe' da guxéajle chee La Jesús, chee bezí' le dipa benne' nigá dxelé'ele, ne núnbeale le'. Lawe' da guxéajle'e chee Jesús, ba bexácatequeze' ca dxelé'ele le'e xúgutele.

<sup>17</sup> Le'e, Bi bicha', nezda gate le'e, ne benne' xíchaje ca' chee bétele Jesús, quebe guce be'ele ca da dxunle. <sup>18</sup> Dios bene' guca caní chee guca li ca da ba gunné' nédxute gate buluchalaj waláz chee' benne' ca', na' gulenné' dxal-la' si' saca Cristo chee Dios. <sup>19</sup> Chee le na', le xebí'i lázrele, ne le xexaca Dios tuze, chee xusule' dul-la nabá-gale. Nadxa Xránadxu Dios gunne' le'e lataj xexaca chawe' xichaj lázrdaule. <sup>20</sup> Sel-le' chee Jesús, Bénnea' guchebe lazre' sel-le' chee nédxudaute. <sup>21</sup> Lu zra caní Jesucristo dxal-la' xegá'ane' xabáa cadxa gucá'ana chawe' Dios xúgute da dxaca, ca na' gunné' lu dxu'a benne' ca' buluchálaje' waláz chee' nédxudaute. <sup>22</sup> Ca' naca na, lawe' da gunná Moisés, guzre' xra xrtáudxu ca': "Sel-la Xránadxu Dios chee tu benne' guchálaje' waláz chee'. Gaque' tu benne' ládujla bi bíchele ca', na' sel-le' le' chee ca gusel-le' neda'. Le xen xanne' xúgute da xe'e le'e, <sup>23</sup> lawe' da welebía xi' xúgute benne' quebe xelapa Le' ba lá'ana, na' cuase' benne' ca' ládujla xezre Israel."

<sup>24</sup> Xúgute benne' ca', benne' buluchálaje' waláz chee Dios, guzú lau na gate zua Samuel, ne zeaj na, buluchálaje' chee zra caní. <sup>25</sup> Le'e dxezile ca da gulenná benne' ca' buluchálaje' waláz chee Dios, ne nácale tuze lu xel-la' wezría da ben Dios nen xra xrtáule ca', ca guzre' Abraham: "Lu na' benne' zri'ine zre su' gaca chawe' chee xúgute bénneache zaj zre'e lu xezr la xu." <sup>26</sup> Gate Dios bsebane' Zrí'ine', gusel-le' Le' nedxu laule le'e chee gaca chawe' chee, chee gusanle tu tule le'e da calęla da dx-unle.

## 4

*Pedro ne Juan dxelēzrine' lau benne' xu'u lawe' ca'*

<sup>1</sup> Pedro ne Juan ne dxuluchálajlene' benne' ca' gate belezrín na' bxruze ca', ne benne' xu'u lu ne'e bi xra'aga chee xudau', ne benne' saduceo ca'. <sup>2</sup> Dxelezzé'e lawe' da dxulusede Pedro, ne Juan benne' ca', dxeleonné' welexebán benne' gate lawe' da bebán Jesús. <sup>3</sup> Nadxa gulel-le' Pedro ne Juan, na' guleché'e le' lizre xia ca zrindxa zra xula lawe' da ba dxezré' zra na'. <sup>4</sup> Guléajle' benne' zan ládujla benne' ca' belénne' da bchalaj Pedro, na' cáтите benne' ca' dxeléajle'e chee Jesús zaj naque' ca gaxzu' cue' chi gaxúa benne' biu.

<sup>5</sup> Zra xula na' benne' xíchaje ca' chee judío ca', ne benne' gula sina ca', ne benne' ca' dxuluxuzájle'e da nadxixruj bea na, belezrague' lu xezre Jerusalén <sup>6</sup> nen Anás, bxruze blau, ne Caifás, ne Juan, ne Alejandro, ne xúgute benne' xrtia bxruze blau ca'. <sup>7</sup> Nadxa gulenná be'e xeajlexrí'e Pedro ne Juan, na' buluzé' le' laduj naga zaj zre'e, na' buluchebe' le':

—¿Bi xel-la' dxenná bea, u nu lu La dxunle da caní?

<sup>8</sup> Nadxa Pedro, zúalequeze Be' Lá'azxa le', guzre' benne' ca':

—Le'e, benne' xíchaje ca' chee bxruze, ne benne' gula sina ca', <sup>9</sup> le'e dxuchébele netu' chee tu da chawe' da guca chee tu benne' we', chee nézele ájala guca bexaca bénnea'. <sup>10</sup> Dxuzentu' xúgutele le'e chee xeleneze xúgute benne' Israel, benne' nigá ze' lau xúgutele le'e, ba bexaque' lu La Jesucristo, Benne' Nazaret, Bénnea' bda'le le'e le'e xaga béguaj, na' Dios bsebane' Le' ládujla benne' gate. <sup>11</sup> Jesús nigá naque' xiaj na', le'e, benne' wen xu'u bzúale chalá'ala, san na'a Léqueze' naque' xiaj blau chee xu'u.

<sup>12</sup> Quebe nu chilá' bénneache seque' guselé' dxi'u lawe' da quebe ne gunna Dios xetú La bénneache lu xezr la xu nigá, benne' séquene' guselé' dxi'u.

<sup>13</sup> Gate benne' xu'u lawe' belelé'ene' Pedro ne Juan dxuluchálaje' du lazre', ne dxeleque bé'ene' quebe zaj nazédie' lu na' bxruze ca', san zaj naque' benne' zre'e cá'aze, na' belexebáne benne' xíchaje ca', san guleque bé'ene' zaj naque' benne' guledálene' Jesús. <sup>14</sup> Cá'anqueze bénnea' bexaque' ze' na' nen Pedro ne Juan,

na' chee le' na' quebe gulezéquene' bi xelenné' chee'. <sup>15</sup> Nadxa gulenná be'e belexedxúaj benne' gubáz ca' ládujla le'. Cate' belexegá'ana leze' buluchebe ljwezre', <sup>16</sup> dxeleonné':

—¿Ájazra gundxu chee benne' caní? Xúgute benne' zaj zre'e Jerusalén zaj nézene' belune' xel-la' waca zren nigá, na' quebe gaca tábagadxu na. <sup>17</sup> Na'a, chee québedxa zriluj da nigá lówela bénneache, guxrúsadxu benne' caní chee québedxa nu xuluchálajlene' lu La Jesús.

<sup>18</sup> Nadxa gulenná be'e belexezrín Pedro ne Juan, na' gulenná bé'ene' le' québedxa nu xuluchálajlene', ne quebe nu xulusé-dene' lu La Jesús. <sup>19</sup> Pedro ne Juan belexechebe':

—Le nna' le'e che naca xrlátaje lau Dios guzúazrantu' xrtizrale le'e, quézcala xrtizra' Dios. <sup>20</sup> Netu' quebe gaca gusantu' gucháljantu' ca naca da blé'entu', ne da bénentu'.

<sup>21</sup> Nadxa benne' xu'u lawe' ca' buluxruse' Pedro ne Juan, san bulusané' le'. Quebe belezrelne' ájala xelune' xuluzaca zi'e le' lawe' da dxelúe lá'ana xúgute bénneache Dios ca naca da ba guca. <sup>22</sup> Bénnea' bexaque' ne chee xel-la' waca zren nigá ba gudé'e' chua iza.

*Benne' ca' dxeléajle'e chee Jesús dxelenabe' lau Dios gunézruje' le' xel-la' dxuluxrén lazre'*

<sup>23</sup> Gate bulusané' Pedro ne Juan, benne' caní xjaque' naga zaj zra' benne' ljwezre', na' buluzenne' le' ca naca xúgute da gulenná benne' xíchaje ca' chee bxruze ca', ne benne' gula sina ca'. <sup>24</sup> Gate belenne' da caní, xúgute' buluchálajlene' Dios, gulenné':

—Xránantu', Lue' nacu' Dios. Benu' xabáa, ne xezr la xu, ne nísadau', ne xúgute da zaj nnita lataj ca'. <sup>25</sup> Lue', lu na' Be' Lá'azxa, ne lu dxu'a David, benne' wen zrin chiu', gunnáu':

¿Bizr chee na' dxelasa bénneache xezr la xu ca', na' bénneache dxelegú'u lazre' da quebe bi zaj zaca?

<sup>26</sup> Benne' wenná bea ca' chee xezr la xu gulune' tuz, na' benne' blau ca' chee xezr ca' belezrague' chee xeledábague'e Xránadxu Dios, ne Cristo chee'.

<sup>27</sup> 'Da li, Herodes. ne Poncio Pilato belezrague' lu xezre nigá nen benne' zitu' ca', ne nen benne' Israel ca', na' guledábague' Zri'inu' Lá'azxa, Jesús, Bénnea' bzúaquezu' Lue'. <sup>28</sup> Ca'an guca, benne' ca' belunge' xúgute' ca da ba núnquezu' Lue' dxal-la' gaca na. <sup>29</sup> Na'a, Xran, gunná' ca dxuluxruse' netu', ne benna netu', wen zrin chiu' ca', xel-la' dxuxrén lazre' chee' guchálajntu' xrtizru', ne quebe zrémentu', <sup>30</sup> ne benna netu' xel-la' waca chiu' chee' gaca xexuntu' benne' we' ca', ne chee' guntu' xel-la' waca chee' xabáa lu La Zri'inu' Lá'azxa Jesús. ¡Ca'an gaca!

<sup>31</sup> Gate bexuzre buluchálajlene' Dios, lu lataj naga zaj nazrague' guzrú', na' xúgute' latúzale Be' Lá'azxa le', na' buluchálaje' xrtizra' Dios duté' xel-la' dxuluxrén lazre' chee'.

*Xúgute' dxelunge' tuze ca naca da zaj nape'*

<sup>32</sup> Benne' zan ca', benne' dxeléajle' chee' Jesús gulaque' tuze lu xichaj lázrdawe'. Netúe' quebe gunné' cheeze' naca da nape'. Xúgute' da zaj nape' zaj nune' tuze. <sup>33</sup> Benne' gubáz ca' chee' Jesús, nen duté' xel-la' dxelenná bea buluchálajqueze' ca guca gate bebán Xránadxu Jesús, na' Dios bene' guca chawe' chee' xúgute' benne' ca'. <sup>34</sup> Quebe nu guzúa ládujla benne' ca' bi bxázejene' lawe' da caní belún xúgute' benne' zaj nape' xezr la xu ca' u xu'u ca'. Belutié' na, na' belúe' dumí na', <sup>35</sup> ne xeajlenézruje' na lu na' benne' gubáz ca', chee' xelexele'e' na tu tu benne' ca' ca da dxelechínene'. <sup>36</sup> Zua ládujla benne' ca' tu benne' xrtia Leví le' José, benne' gúlaje' Chipre da naca tu xezr la xudau' naxečaj nísadau' le' na. Benne' nigá, buluzúa gubáz ca' le' Bernabé, da zéaje' na benne' dxexúe' zrene'. <sup>37</sup> Benne' nigá beti'e' tu xezr la xu da nape', na' bi'e' dumí na', ne bnézruje' na lu na' benne' gubáz ca'.

## 5

*Dul-la da belún Ananías ne Safira*

<sup>1</sup> Xetú benne' le' Ananías nen zru'ule' Safira, beti'e' tu xezr la xu chee'. <sup>2</sup> Benne' nigá bequ'é' late' dumí na', na' da begá'anaze bi'e' lau benne' gubáz ca', ne gunné' ca naca na'. Zru'ule' ca naca na nézene'. <sup>3</sup> Nadxa guzre Pedro le':

—Ananías, ¿bizr chee' na' be'u lataj Satanás guxú'u na lu xichaj lázrda'u chee' si xe'u Be' Lá'azxa, na' beca'u late' chiu' ca naca da guzi'u chee' xezr la xu na'? <sup>4</sup> ¿Quebe guca xezr la xu na' chiu'? Na' gate betiu' na, ¿quebe guca dumí na' chiu'? ¿Ájazra guca benu' da nigá? Dios guzú' xe'u, quegá bénneache.

<sup>5</sup> Ca ben Ananías da nigá, na' guzré'e' gútete'. Xúgute' benne' belén da nigá belezrébele'e'. <sup>6</sup> Nadxa gulebiga bal-la bi cuide' ca', ne buluchélabe' le' tu ladxe', na' belúabe' le' cheajlecáchebe' le' lu ba.

<sup>7</sup> Ca guca chunna hora gudé' na', guxú'u zru'ula Ananías na', ne quebe nézene' bi ba guca. <sup>8</sup> Pedro bche'e' le':

—Gunná, ¿bétéle le'e' xezr la xu na' ca dxennale guzile na?

Gunná Safira na':

—Awe', ca naca na'.

<sup>9</sup> Nadxa Pedro guzre' le':

—¿Bizr chee' na' benle le'e' tuze dizra' gúquele si xele Be' Lá'azxa? Chale'aj na' ba zesi'aca bi ca' xeajlecáchebe' benne' chiu', na' na'a xelúatequezebe' lue'.

<sup>10</sup> La' ná'queze nu'ula na' guzré'e' gútete' zran ni'a Pedro. Gate belú'u benne' cuide' ca', na' belelé'ebe' le' ba guti'e', na' belexebéajbe' le' xeajlecáchebe' le' cuita ba chee' benne' chee'. <sup>11</sup> Xúgute' benne' ca' zaj nazrague' na', ne xúgute' bénneache, benne' belén da caní belezrébele'e'.

*Benne' gubáz ca' dxelúnle'e' xel-la' waca chee' xabáa*

<sup>12</sup> Benne' gubáz ca' belúnle'e' xel-la' waca chee' xabáa, ne da dxelunna bea na lau benne' ca', na' xúgute' belezrague' La Chila Chee' Salomón, da naca na chee' xudau'. <sup>13</sup> Netú benne' ca', benne' quebe dxeléajle'e' chee' Jesús, quebe belexázrene' gune' benne' ca' tuze, san xúgute' bénneache belape' benne' caní ba lá'ana. <sup>14</sup> Benne' zandxa gulezú lawe' dxeléajle'e' chee' Xránadxu, benne' biu ne nu'ula ca'. <sup>15</sup> Ca' guca na, belebéaje' benne' we' ca', zaj de' lu da dxelá'ta'ne', ne da'a chee', na' gulíxru'e' le' la neza ca' chee' gate te Pedro na', na' te zru'la chee' lawe' benne' ca'. <sup>16</sup> Cá'anqueze benne' xezre walizre ca' belelé'e' lu xezre Jerusalén, zaj nu'e' benne' we' chee' ca', ne benne' ca' zaj xu'e' be' xriwe' ca', na' xúgute' belexexaque'.

*Benne' gubáz ca' dxelu'e' lizre xia*

<sup>17</sup>Nadxa bxruze blau, ne benne' saduceo ca' zaj zúalene' le', gulaque' xa lazre', <sup>18</sup>na' gulel-le' benne' gubáz ca', ne buluzré'e le' lizre xia. <sup>19</sup>Na' tu gubáz chee xabáa chee Xránadxu gusaláje' dxa xu'u chee lizre xia na' chizrela, na' bebéaje' benne' ca', ne dxé'e le':

<sup>20</sup>—Le chjaca, ne le cheajsé lu xudau', ne le guzén benne' ca' ca naca chee xel-la' nabán cube nigá.

<sup>21</sup>Ca belemné' da nigá, zra xula belú'e chila xudau' che zílala, na' gulezú lawe' dxulusédene' benne' zaj zré'e na'.

Dxácate' na', bxruze blau na', ne benne' zraléne' le', buluchague' benne' ca' chee xu'u lawe' blau, ne benne' gula sina ca' chee xezre Israel, na' gulenná be'e xelexebéaje' gubáz ca' zaj xu'e lizre xia.

<sup>22</sup>Gate belezrín bi xra'aga chee xudau' na', quebe nu belelé'ene' lu xu'u lizre xia, na' belexezrine', ne buluzenne' benne' ca', <sup>23</sup>dxelemné':

—Gate bzrintu' lizre xia na', naxeexuj tipa na, na' benne' dxjaque' wedil-la zaj zré'e dxu'a dxa xu'u na', ne dxuluxúe' na, san gate gusalájntu' na, quebe nu bezré-lentu' lu xu'u na'.

<sup>24</sup>Gate bxruze blau, ne benne' xíchaje ca' chee bxruze ca', ne xíchaje chee bi xra'aga ca', belemné' da nigá, na' buluchebe ljwezre' ga cheajsé da nigá. <sup>25</sup>La' ná'queze bzrin tu benne' guzre' le':

—Benne' ca' bzra'le le'e lizre xia zaj zré'e lu chila xudau', dxulusédene' bénneache.

<sup>26</sup>Nadxa benne' xíchaje chee bi xra'aga chee xudau' guxíajlene' bi xra'aga ca', na' xejlexrí'e gubáz ca'. Quebe bi belúnene' le' lawe' da belezrebe' bi xelún benne' ca' dxe-lenne' chee gubáz ca', lawe' da dxeléquene' xelu'e le' xiaj. <sup>27</sup>Gate xejlexrí'e gubáz ca', na' buluzré'e le' lau benne' xu'u lawe' blau, na' gunná bxruze blau na', dxé'e benne' gubáz ca':

<sup>28</sup>—Netu' bzrúnantu' le'e quebe guchá-ljédxale bénneache lu la bénnea'. ¿Bizra na' benle? Ba bzenle ca naca benne' zaj zré'e xezre Jerusalén ca naca da dxusédele, ne dxaca lázrele gusebágale netu' xel-la' gute chee benne' na'.

<sup>29</sup>Nadxa belexechebe Pedro, ne xezícadxa benne' gubáz ca':

—Dxalá' guzúantu' xrtizra' Dios, quegá xrtizra' bénneache. <sup>30</sup>Dios chee xra

xrtáudxu ca' bsebane' Jesús, Bénnea' bétele le'e bda'ale Le' xaga béguaj. <sup>31</sup>Dios bca'ana szreng' Le' chalá'a xabéla chee', ne bene' Le' Benne' Blau, ne Weselá, chee gata' lataj chee benne' Israel xelexebí'i lazre' chee gunite lau Dios dul-la chee'. <sup>32</sup>Chee le' na' netu' dxexeché'bentu', ne cá'anqueze dxun Be' Lá'azxa. Dios dxunézruje' Be' Lá'azxa benne' dxuluzúe' dizra' chee'.

<sup>33</sup>Gate belemné' da nigá, na' belezré'e, ne gulaca lazre' xelútie' gubáz ca'. <sup>34</sup>Ládujla benne' xu'u lawe' ca' zua tu benne' fariseo le' Gamaliel. Naque' benne' dxuxuzájle'e da nadxixruj bea na, na' dxelápale'e bén-neache le' ba lá'ana. Benne' nigá guzé', na' gunná bé'ene' xelexebéaje' gubáz ca' chalé'ajla tu chí'idau'. <sup>35</sup>Nadxa guzre' benne' xu'u lawe' ca':

—Le'e, benne' Israel, le guxúe xanne' ca gunle chee benne' caní. <sup>36</sup>Le gusá lazre', bache guca zane' iza, gudábaga Teudas xu'u lawe', gunné' naque' tu benne' blau, na' xjácále ca tapa gaxúia benne' biu le'. Na' belutie' le', na' xúgute benne' ca' gulaca le' tuze belexase dinnaje' ca', na' gudé chee da na'. <sup>37</sup>Gudé na', lu zra gate belú'u bénneache xiche, na' bla' Judas, benne' Galilea, na' benne' zan xjácálene' le'. Cá'anqueze belutie' bénnea', na' xúgute benne' guledé'e le' belexase dinnaje'. <sup>38</sup>Chee le' na', le gusán benne' caní, ne quebe guchixre chee nen benne' ca'. Che da nigá naca na da dxun beneácheze, wadé chee na. <sup>39</sup>Che naca na da dxun Dios, quebe séquele le'e guzrí'a xile na. Le guxúe xanne' chee quebe tíl-lalele Dios.

<sup>40</sup>Xúgute' belexaque' tuze. Nadxa gulenná be'e belú'u gubáz ca' da xula, na' ca belú'u benne' ca', na' buluzruné' le' québedxa nu xuluchálajle benne' ca' lu La Jesús. Gudé na' bulusane' le'. <sup>41</sup>Na' benne' gubáz ca' belexedxúaje' naga zaj zra' benne' xu'u lawe' ca', dxelebé'ene' lawe' da be' Dios lataj guledé'e xel-la' zi' lawe' da zaj naque' Jesús tuze. <sup>42</sup>Quebe bulusane' dxuluchálaje', ne dxulusédene' bénneache ca naca chee Jesucristo xúgute zra, lu chila xudau', ne lu xu'u ca'.

## 6

*Dxuluzúe' gazre benne' xelunge' zrin chee benne' zaj de'e Cristo*

<sup>1</sup> Lu zra ca', gate zaj dxan benne' ca' zaj de'e Jesús, na' benne' ca' dxelenné' dizra' griego gulawé' zria benne' ca' dxelenné' dizra' hebreo. Dxelenné' quebe nu dxunezruj xanne' da xeláw nu'ula ba gulate benne' chee' zaj zre'e ládujla le' gate dxelísie' xel-la' wagu tu zra tu zra. <sup>2</sup> Nadxa benne' gubáz ca' buluchague' ca naca benne' ca' dxelájle'e chee' Jesús, na' gulé'e le':

—Quebe naca xrlátaje gusantu' guchálanjntu' xrtizra' Dios chee' gudentu' xel-la' wagu. <sup>3</sup> Chee le' na', biche ljwézrentu', le quilaj gazre benne' láwela le'e, benne' zaj naque' du lazre', ne dxelájni'ine', ne zúalé Be' Lá'azxa le', na' le gusebage' zrin nigá. <sup>4</sup> Netu' tu guchálajlezqezentú' Dios, ne gusedentu' bènneache xrtizra' Dios.

<sup>5</sup> Xúgute' gulaza lazre', na' gulequé'e Esteban, tu benne' dxéajle'e duté lázrdawé' chee' Jesús, ne zúalé Be' Lá'azxa le'. Cá'anqueze gulequé'e Felípe, ne Prócoro, ne Nicanor, ne Timón, ne Parmenas, ne Nicolás, tu benne' xezre Antioquía, benne' nédxute bexaque' tuze benne' judío ca'. <sup>6</sup> Na' guleché'e benne' caní' lau benne' gubáz ca', na' le' bululáwizre' Dios, ne buluzé ne'e lawe' benne' gazre caní'.

<sup>7</sup> Xrtizra' Dios zeaj dxezriluj na, na' benne' ca' dxelájle chee' Jesús guxánle'e lu xezre Jerusalén, na' bxruze zan chee' judío ca' gulájle'e chee'.

#### *Dxelel-le' Esteban*

<sup>8</sup> Esteban, tu benne' nápalé'e xel-la' waca, ne naque' chawe' lau Dios, bene' xel-la' waca ca' chee' xabáa, ne da dxelunna bea na chee' da ca' lau bènneache ca'. <sup>9</sup> Nadxa bal-la benne' chee' xu'u naga dxelezraga bènneache ca', nazí le na Xu'u Chee Benne' Québedxa Zaj Nada'u, benne' xezre Cirene ca', ne benne' xezre Alejandría ca', ne benne' chee' ga nababa Cilicia, ne Asia, gulezú lawé' dxulutí-laláne' Esteban dizra'. <sup>10</sup> Quebe gulezéquene' bi xelenné' chee' xrtizra' Esteban lawe' da bchálaje' nen duté xel-la' sina chee' Be' Lá'azxa. <sup>11</sup> Nadxa gulízruje' bal-la benne' ca' chee' xelenné' belenne' gunné Esteban dizra' schanni' chee' Moisés, ne chee' Dios. <sup>12</sup> Caní' belune', ne gulu'e xel-le' bènneache ca', ne benne' gula sina ca', ne benne' dxuluxuzájle'e da nadxixruj bea na, na' gulebía di'e Esteban. Gulel-le' le', ne guleché'e le' lau benne' xu'u

lawe' blau. <sup>13</sup> Cá'anqueze gulájle' benne' wen lazre' xelenné' chee' Esteban, na' gulenné':

—Benne' nigá quebe dxusane' dxenné' schanni' chee' xudau' lá'azxa nigá, ne chee' da bdxixruj bea Dios. <sup>14</sup> Ba bentu' gunné' ca gun Jesús, benne' Nazaret, dxenné' guzría xi'e xudau' nigá, ne guché'e ca naca da zéajledxu da bca'ana Moisés.

<sup>15</sup> Nadxa benne' xu'u lawe' ca', ne xúgute benne' zaj zre'e na', gate gulenné'e Esteban, belelé'ene' lawé', naca na ca lau tu gubáz chee' xabáa.

## 7

*Dxexechebe Esteban lau benne' xu'u lawe' ca'*

<sup>1</sup> Nadxa bxruze blau bchebe' Esteban:

—¿Zaj naca da li da caní'?

<sup>2</sup> Na' Esteban bechebe':

—Le'e, benne' gula, ne le'e biche ljwezra', le xene. Xradxu zué' xabáa ble'e lawé' lau xra xrtáudxu Abraham gate ne zué' lu xezr la xu Mesopotamia, nédxudxa gate quebe ne xezé'e cheajxezúe xezre Harán. <sup>3</sup> Dios guzre' le': "Bsan lázriu' ne xúgute xrtia ljwezru', na' guxíaj lu xezr la xu da gulé'eda' lue'." <sup>4</sup> Nadxa Abraham guzé'e lu xezr la xu Caldea, xeajsúe' xezre Harán. Ca gudé gute xra Abraham, Dios guché'e Abraham lu xezr la xu nigá, naga zrle le'e na'a. <sup>5</sup> Dios quebe bi bnéruje' chee' Abraham naga sue' lu xezr la xu nigá, ne naga gune' lize', san guchebe lazre' gunézruje' le' xezr la xu nigá, na' gate te gate le', na' gaca na chee' zri'ine', lácala lu zra na' quebe ne galaj nu zri'ine Abraham. <sup>6</sup> Cá'anqueze Dios guzre' le' xelezúa zri'ine zre sue' ca benne' zitu' tu lu xezr la xu chee' benne' xula, ne xelaque' benne' zaj nada'u, na' xuluzálaje' le' tapa gaxúa iza. <sup>7</sup> Cá'anqueze guzre Dios le': "Neda' chuga' ca gaca chee' xezr la xu na' guchine na zri'ine zre su', na' te na' xelaxedxúaje' ga na', ne xelúe lá'ane' neda' lu xezr la xu nigá." <sup>8</sup> Dios bene' tu xel-la' wezría nen Abraham, na' gunná bé'ene' le' chugu látedu weaj belá' chee' benne' biu ca' lu bel-la' dxen chee', tu da guzúa chuchu na xel-la' wezría na'. Chee le' na' gategu galaj Isaac, zri'ine Abraham, guchugue' látedau' belá' chee' bel-la' dxen chee' Isaac gate gúquebe' xrunu' zra, na' cá'anqueze ben Isaac chee'

zrí'ine', Jacob, ne cá'anqueze ben Jacob chee zrí'ine' ca', benne' ca' gulaque' xra chazrinnu cue' benne' Israel.

<sup>9</sup>'Zri'ine Jacob na', benne' ca' zaj naque' xra xrtáudxu, gulaque' xa lazre' chee bi biche' José, na' belutie-be' chee chu'ube' lu na' benne' guchínene'-be' lu xezr la xu Egipto. Dios guzálene' José, <sup>10</sup>na' bselé'-be' lu xúgute' da zi' da xa'. Bnézruje'-be' xel-la' dxéajni'i, na' ben Dios bezaca ba lázrele Faraón José na'. Faraón nigá guque' wenná bea lu xezr la xu Egipto, na' bzue' José gácabe' benne' xu'u lu ne'e xezr la xu Egipto na', ne benne' walizre Faraón na'.

<sup>11</sup>'Nadxa guca gubina' du ca naca xezr la xu Egipto, ne ca naca xezr la xu Canaán, na' xra xrtáudxu ca' quebe bi belezrélene' da xelawe'. <sup>12</sup>Gate ben Jacob de zrua' xtila lu xezr la xu Egipto, na' gusel-le' na' zrí'ine' ca', benne' ca' zaj naque' xra xrtáudxu. Da nigá guca na da nedxu lasa xjaque' Egipto. <sup>13</sup>Da gudxupe' lasa xjaque' na', José ble'e lawe' benne' biche' ca', na' ca'an guca guneze wenná bea chee Egipto ga benne' José na'. <sup>14</sup>Nadxa José gunná bé'ene' xeajlexri'e xre', ne ca naca xrtia ljwezre', zaj naque' ga xun chínue'. <sup>15</sup>Ca'an guca, Jacob xeajsúe' Egipto naga gutie', ne naga gulátequeze xra xrtáudxu ca'. <sup>16</sup>Ca gudé na' belú'e bel-la' dxen gate chee benne' ca' lu xezre Siquem, naga bulucache' le' lu ba da zua na lu xezr la xu na' da guzi' Abraham nen dumí da gudízruje' bi ca' zri'ine Hamor lu xezre Siquem na'.

<sup>17</sup>Gate ba zua gagu zra gaca li da guchebe lazre' Dios da na' ben chúchue' lau Abraham, na' benne' Israel zaj zre'e xezr la xu Egipto gulánle'e. <sup>18</sup>Nadxa guzú lau dxenná bea tu wenná bea lu xezr la xu Egipto, benne' quebe núnbe'e José. <sup>19</sup>Wenná bea nigá guzi xé'e benne' ljwézredxu, ne bzálaje' xra xrtáudxu ca', na' gunná bé'ene' le' cheajlecá'ane'-be' bidu dxe'ene chee' ca' chee xelátebe'. <sup>20</sup>Lu zra ca' gulaj Moisés, ne gúcabe' tu bidau bezaca ba lazre' Dios chee'be', na' xra xrnabe' bulusegule'-be' lizre' chunna beu'. <sup>21</sup>Gate bzin zra zxalla' cheajlega'ane'-be', na' bi nu'ula chee wenná bea na' beque'e-be', ne bsegule'-be' ca zrí'inequeze'. <sup>22</sup>Chee le' na', Moisés guzúdebe' ca naca xel-la' sina chee Egipto, na' gúcabe' tu benne' napé' xel-la' dxenná bea ca naca da gunné', ne da bene'.

<sup>23</sup>'Gate bzrie' chua iza, Moisés guca lazre' cheajnné'e benne' ljwezre', benne' Israel ca'. <sup>24</sup>Blé'ene' tu benne' Egipto dxu'e tu benne' Israel. Chee gúcalene' benne' na', ne chee bebéaj lazre' bénnea', betie' benne' Egipto na'. <sup>25</sup>Moisés gúquene' benne' lazrie', benne' Israel ca', xeleeque bé'ene' Dios guselé' benne' ca' ne chee le'. Benne' ca' quebe guleque bé'ene' na. <sup>26</sup>Zra xula Moisés blé'ene' chupa benne' Israel dxeledil-le', na' lawe' da guca lazre' xelezrá zrie' benne' ca', na' guzre' le': "Le'e nácale biche ljwézrele. ¿Bizr chee na' dxue ljwézrele?" <sup>27</sup>Nadxa benne' na' dxu'e benne' ljwezre' bzrigue' Moisés, na' guzre' le': "¿Nu bzua lue' ca benne' xíchaje cheentu' chee guchi'u ca da dxuntu'?" <sup>28</sup>¿Dxaca lazru' gutiu' neda' ca benue' neaje, betiu' benne' Egipto na'?" <sup>29</sup>Ca ben Moisés da nigá, na' bzurúnaje' zexíaje' lu xezr la xu chee benne' Madián ca'. Na' guzúe' ca tu benne' zitu', na' bchaga ná'lene' nu'ula, na' gulaj chupa zrí'ine'.

<sup>30</sup>'Ca gudé chua iza, gate zue' le'e xixre' lawe' lataj da zua na gagu lu xi'a Sinaí, na' ble'e lau tu gubáz chee xabáa le' tu lu xi' da dxe' lu xeche' bisigá. <sup>31</sup>Moisés bzrebe' ca naca da blé'ene', san gate gubigue' chee le'e xánnene', benne' chi'i Xránadxu, dxenné': <sup>32</sup>"Neda' naca' Dios chee xra xrtá'u ca', Dios chee Abraham, ne Dios chee Isaac, ne Dios chee Jacob." Nadxa Moisés guzú lau dxezríe' lu xel-la' dxezrebe, na' quebe bexázrjene' nne'e. <sup>33</sup>Xránadxu guzre' le': "Guleaj zrelu' xu'u ni'u lawe' da naca lá'azxa lataj naga dxeléaju'. <sup>34</sup>Neda' ba ble'eda' ca naca da dxelezaca zi' bénneache chia' zaj zre'e lu xezr la xu Egipto. Dxada' ca dxelebezre xache', ne ba bla'a chee guselá' benne' ca'. Gudá lue', sel-la' lue' lu xezr la xu Egipto."

<sup>35</sup>'Lácala benne' ca' buluzúe' Moisés chalá'ala, gulé'e le': "¿Nu bzua lue' ca benne' xíchaje cheentu' chee guchi'u ca da dxuntu'?" Dios gusel-le' le' ca benne' xíchaje, ne benne' guselá' le', ne chee gubáz chee xabáa na' ble'e lawe' le' lu xeche' bisigá. <sup>36</sup>Moisés na' bebéaje' xra xrtáudxu ca' lu xezr la xu Egipto, ne bene' xel-la' waca ca', ne da gulunna bea na da bene' lu xezr la xu na', ne lu nísadau' Xrna, ne le'e xixre' lawe' lataj da chua iza na'.

<sup>37</sup>Moisés nigáqueze guzre' benne' Israel

ca': "Dios sel-le' tu benne' guchálaje' waláz chee', benne' gálaje' ládujla xrtia ljwézrele le'e, ca gusel-le' neda'. Chee Le' le xen."

<sup>38</sup> Cá'anqueze Moisés nigá, bènea' guzúale benne' ca' le'e xixre' lawe' lataj, tu zren nen gubáz chee xabáa na' bchálaje le' lu xi'a Sinaí, guzúalene' xra xrtáudxu ca', ne guzi'e dizra' chee xel-la' nabán chee bdee' na cheentu'.

<sup>39</sup> Xra xrtáudxu ca' quebe gulaca lazre' xuluzúa dizra' chee Moisés, san buluzúe' le' chálá'ala, ne gulaca lazre' xelexezrine' Egipto. <sup>40</sup> Gate cabí zu'e Moisés ga na' gulé'e Aarón: "Dxaca lázrentu' gunu' dios ca' chee xelebía lawe' launtu', lawe' da quebe nézentu' bi guca chee Moisés, bènea' bebéaje' netu' lu xezr la xu Egipto." <sup>41</sup> Nadxa belune' tu bedáu' guca na ca tu bézredau', ne beluti'e be xixre'du ca' lau bedáu' na', ne gulebene' chee da zaj nunge'. <sup>42</sup> Nadxa Dios becuase' nen benne' ca', na' be'e le' lataj belúe lá'ane' belaj zaj zria zran xabáa. Ca'an naxúaj na lu xiche chee benne' ca' buluchálaje' waláz chee Dios. Dxelenné':

Le'e, benne' Israel ca', ¿guzríale-ba' chia' neda' be xixre'du ca' bétele duté chua iza gate na' guzúale le'e xixre' lawe' lataj?

<sup>43</sup> Cabí! Bíale xudau' xide zra be xixre' chee dios cheele, Moloc, ne xudau' chee belaj nazí le na Renfán, dios cheele, bedáu' ca' bénquezle le'e chee be lá'anale na.

Chee le na' cuéaja' le'e lu xezr la xu cheele, ne sel-la' le'e dédedxa ca naga dx'e Babilonia.

<sup>44</sup> Le'e xixre' lawe' lataj na' xra xrtáudxu ca' belune' tu xudau' xide naga buluzrá chawe' blaga' xiaj naga naxúaj da nadxixruj bea na. Belune' na ca naca da ble'e Dios Moisés, gate guzre' le' gune' na ca naca da na' ba blé'ene'. <sup>45</sup> Zri'ine xra xrtáudxu ca' belexaca lu ne'e xudau' xide na', na' belú'e na gate belezrine' lu xezr la xu nigá nen Josué, chee belequé'e xezr la xu nigá lu na' benne' xezr la xu ca' zaj zre'e nigá, benne' ca' Dios bebéaje' le' chee bnézuje' xezr la xu nigá chee xra xrtáudxu ca'. Ca'an guca ca bzrinte zra ca' zua David. <sup>46</sup> Wenná bea David na', Dios bezaca ba lazre' chee', na' guca lazre' David gune' tu xudau' naga sua Dios chee Jacob. <sup>47</sup> Salomón, zri'ine David, bene' lizre Dios na'. <sup>48</sup> Dios szrenté quebe

zu'e lu xudau' ca' da zaj nun bénneache. Caní gunná tu benne' bchálaje' waláz chee Dios, gunné':

<sup>49</sup> Xabáa naca lataj naga dx'e'a, na' xezr la xu naca na naga nuléaj ni'a.

¿Ájazra naca xu'u gunle le'e chia'? dxenná Xránadxu.

¿Ájazra naca lataj naga dxal-la' xezí' lazra'? <sup>50</sup> ¿Quegá neda' bénqueza' da ca'?

<sup>51</sup> Nadxa gunná Esteban:

—Le'e nácaquezle lázxdau zide', ne zria nágale, ne lázrdaule ca zaj naca chee benne' quebe zaj núnbe'e Dios, quebe dxezile xrtizre'. Dxedábagaquezle Be' Lá'azxa. Nácale ca gulaca xra xrtáule ca'. <sup>52</sup> Xra xrtáule ca' buluzría xi'e xúgute benne' ca' buluchálaje' waláz chee Dios. Beluti'e' benne' ca' buluchálaje' néxdudaute ca dxal-la' gaca chee benne' xrlátaje nigá, na' gate ble'e, lé'equezle bdele Le' lu na' benne' ca' guledábague' Le', ne bétele Le'. <sup>53</sup> Le'e guzile da nadxixruj bea na da benna gubáz chee xabáa dxi'u, san quebe dxuzúale dizra' chee na.

*Dxeluti'e Esteban*

<sup>54</sup> Gate belén benne' ca' da caní, na' gulagu lazxe' lu xel-la' dxelezrá'a Esteban.

<sup>55</sup> Nadxa Esteban, zúale Be' Lá'azxa le', gunné'e xabáa, ne blé'ene' xel-la' szren chee Dios, na' Jesús ze' chálá'a xabela chee Dios. <sup>56</sup> Nadxa gunné':

—Le nna'xque, dxelé'eda' naxalaj xabáa, na' Benne' Gulje' Bénneache ze' chálá'a xabela chee Dios.

<sup>57</sup> Benne' ca' bulusézxuje' nague', na' gulebezre xe'e, ne xeajlechía che'e Esteban na'. <sup>58</sup> Na' belebéaje' le' lu xezre na', naga belú'e le' xiaj. Na' benne' ca' gulenné' chee Esteban bulucá'ane' zra lane' lu na' tu benne' cuide' le' Saulo. <sup>59</sup> Dxácaté dxuluzrí'e le' xiaj, Esteban na' bláwizre' Dios, gunné':

—Xrana' Jesús, bezi' lu na'u be' nácaqueza'.

<sup>60</sup> Gudé na' bzu zribe', na' gunné' zizraj:

—Xran, quebe gusebagu' benne' caní dul-la nigá.

Ca bexuzre gunné' ca', na' gutie'.

## 8

*Saulo dxenáu zi' xuzre' benne' ca' dxeléajle'e chee Jesús*



<sup>1</sup> Saulo guque' tuze nen benne' ca' belu-  
tie' Esteban.

Lu zra ná'queze gulezú lawe' dxelau  
zi' xuzre' benne' ca' dxeléajle'e chee  
Jesús, benne' ca' zaj zre'e xezre Jerusalén.  
Xúgute' belexase dínnaje' ca naca xezre ca'  
zaj nababa Judea, ne xezre ca' zaj nababa  
Samaría. Benne' gubáz ca' belexegá'ane'  
xezre Jerusalén na'. <sup>2</sup> Bal-la benne' ca' zaj  
naque' chee Dios bulucache' Esteban na',  
ne gulebézrele'e chee'. <sup>3</sup> Dxácate na' Saulo  
dxenáu zi' xuzre' benne' ca' dxeléajle'e  
chee Jesús, na' guxú'e tu tu xu'u chee  
cheajxrube xue' benne' ca', ne cheajlu'e  
le' lizre xia.

*Dxuluchálaje' dizra' chawe' chee Jesús naga  
nababa Samaría*

<sup>4</sup> Benne' ca' chee Cristo, benne' buluzrún-  
nuje' Jerusalén, buluchálaje' dizra' chawe'  
chee Jesús gáteteze na' zjaque'. <sup>5</sup> Felipe, tue'  
benne' ca', guxiáje' tu xezre naga nababa  
Samaría, na' guzú lawe' dxuchálajlene'  
benne' ca' ca naca chee Cristo. <sup>6</sup> Benne'  
ca' zaj nazrague' belén xánnene' ca da dx-  
uchalaj Felipe, ne belelé'equezne' ca naca  
xel-la' waca ca' da dxune'. <sup>7</sup> Benne' zan,  
benne' zaj xu'e be' xriwe' belexexaque',  
na' be' xriwe' ca' belexedxúaj na lu xichaj  
lázdau benne' ca', dxelebezre xa'a na, na'  
benne' zan benne' zaj zua zri ni'a ne'e, ne  
benne' zrinnaj ca' belexexaque'. <sup>8</sup> Ca'an  
guca, gulebéle'e xúgute' benne' ca' lu xezre  
na'.

<sup>9</sup> Zua na' tu benne' le' Simón, nédxute  
guque' benne' wazrá', ne guzú xe'e benne'  
Samaría ca', dxenné' naque' tu benne'  
szren. <sup>10</sup> Xúgute' belén xánnene' chee',  
benne' cazraze ca', ne benne' blau ca', gu-  
lenné':

—Benne' nigá nape' xel-la' szren chee  
Dios.

<sup>11</sup> Gulape' le' ba lá'ana lawe' da lu xel-  
la' wazrá' chee' na' guzú xe'e benne' ca'  
zane' iza. <sup>12</sup> Gate guléajle'e chee dizra'  
chawe' da dxuchalaj Felipe ca dxenná bea  
Dios, ne ca naca chee La Jesucristo, xúgute',  
benne' biu, ne nu'ula ca', beledxúe' nisa.  
<sup>13</sup> Cá'anqueze Simón na' guxéajle'e chee  
Jesús, ne gudxúe' nisa, na' guzú lawe' zéa-  
jlene' Felipe, na' dxexebánene' ca naca xel-  
la' waca da za xabáa da dxun Felipe.

<sup>14</sup> Gate benne' gubáz ca' chee Jesús,  
benne' zaj zre'e Jerusalén, belenne' gulezi'

lu na' benne' Samaría ca' xrtizra' Dios,  
na' gulesel-le' Pedro ne Juan na'. <sup>15</sup> Gate  
belezrine' na', na' belenabe' law Dios chee  
benne' Samaría ca' dxeléajle'e chee Jesús  
chee xelezi'e Be' Lá'azxa. <sup>16</sup> Quebe ne  
xida Be' Lá'azxa súalene' netú benne' ca'.  
Tuze beledxúaze' nisa lu La Xránadxu Jesús.  
<sup>17</sup> Nadxa Pedro ne Juan buluzé ne'e lawe'  
benne' ca', na' gulezi'e Be' Lá'azxa.

<sup>18</sup> Gate ble'e Simón bla' Be' Lá'azxa gate  
gubáz ca' buluzé ne'e benne' ca', na' guca  
lazre' gunézruje' gubáz ca' dumí, <sup>19</sup> gunné':

—Le gunna neda' xel-la' waca nigá chee  
gate guzéa' na'a lawe' núteteze benne', na'  
si'e Be' Lá'azxa.

<sup>20</sup> Nadxa guzre Pedro le':

—Wabía xi' dumí chiu' na' nen lue' lawe'  
da dxéquenu' wazéquenu' ga'u nen dumí  
ca da dxúnnaze Dios. <sup>21</sup> Quebe naca chiu',  
ne quebe napu' lataj lu da nigá lawe' da  
quebe naca xrlátaje xichaj lázrda'u lau Dios.  
<sup>22</sup> Bsan ca naca da calela chiu' nigá, ne  
guta' xue Dios chee gunite lawe' chiu' ca  
da gúquenu' lu xichaj lázrda'u. <sup>23</sup> Dxeque  
be'eda' nazrate' xichaj lázrda'u da calela,  
na' da calela na' nuchéaj na lue'.

<sup>24</sup> Na' bechebe Simón:

—Le gata' xue Xránadxu chia' neda',  
chee quebe gaca chia' ca da gunnú'.

<sup>25</sup> Ca gudé belexechebe' chee Jesús, ne  
buluchálaje' dizra' chee Dios, na' benne'  
gubáz ca' buluzenne' bèneache dizra'  
chawe' chee Jesús lu xézredu ca' zaj nababa  
Samaría, na' ca gudé na' belexezrine'  
Jerusalén.

*Felipe dxuchálajlene' tu benne' chee xezr la  
xu Etiopía*

<sup>26</sup> Gudé na' guzre tu gubáz chee xabáa  
chee Xránadxu Felipe:

—Guxasa, guxiáj chalá'a naga dxedé gu-  
bizra beu' zaga ca', naga zrua neza chee  
Jerusalén da zzej xezre Gaza, da dxedé na  
le'e xixre' lawe' lataj.

<sup>27</sup> Felipe guxase', na' guzú'e zéaje', na'  
la neza na' bezrague' tu benne' Etiopía.  
Benne' nigá naque' wizre, ne naque' benne'  
szren xu'u lu ne'e xel-la' gunní'a chee Can-  
dace, nu'ula na' dxenná bé'ene' xezr la xu  
Etiopía. Ba guxiáj benne' nigá Jerusalén  
chee be' lá'ane' Dios. <sup>28</sup> Na'a zexíaje' Etiopía  
na', dxe'e lu carreta chee' da dxelecá'a  
bzrina', ne dxulabe' xiche naga zaj naxúaj  
xrtizra' Isafas, benne' bchálaje' waláz chee

Dios. <sup>29</sup> Nadxa gunná Be' Lá'azxa, guzre' Felipe:

—Gubiga gagu cuita carreta na'.

<sup>30</sup> Gate gubiga Felipe na' benne' dxulaba béneea' xiche chee Isaias, na' bchebe' le':

—¿Dxéajni'inu' ca naca da dxulabu'?

<sup>31</sup> Benne' biu na' guzre' le':

—¿Ájazra gaca chéajni'ida' che quebe nu chilá' guzéajni'i neda'?

Na' guzre' Felipe cuene' cué'lene' le'.

<sup>32</sup> Naga dxulabe' lu xiche chee Dios dxenná na caní:

Beleché'e Le' naga gatié' ca tu zrila'dau', na' ca zrila' na' dxátaba' zrize lau benne' ca' dxuluchibe' zra'ba',

ca' bénqueze Le', quebe bi gunné'.

<sup>33</sup> Bulucá'ana ditje' Le', ne quebe belú'e lataj nu guchi'a chee',

ne quebe nu gaca guchálaje' ca naca chee zri'ine zre sue',

lawe' da belutie' Le'.

<sup>34</sup> Na' benne' Etiopía na' bchebe' Felipe:

—Gunná, ¿nuzra chee dxenná benne' nigá, cheéqueze' na', che chee xetú benne' xula?

<sup>35</sup> Nadxa guzú lau Felipe bzéajni'ine' le' ca naca naga dxulabe', ne bchálajlene' le' dizra' chawe' ca naca chee Jesús. <sup>36</sup> Gate guledé'e tu naga de nisa, na' gunná benne' Etiopía na':

—Nigá de nisa. ¿Quebe gaca chua' nisa, zra?

<sup>37</sup> Felipe guzre' le':

—Che dxéajle'u duté lázrda'u, waca.

Benne' na' bechebe':

—Dxéajle'a naca Jesucristo Zri'ine Dios.

<sup>38</sup> Nadxa gunná bé'ene' guleza carreta na', na' dxúpaté' gulu'e lu nisa, na' Felipe bchue' le' nisa. <sup>39</sup> Gate belexedxúaje' lu nisa na', na' Be' chee Xránadxu beche'e Felipe naga xula. Benne' Etiopía na' québedxa blé'ene' le', na' bexu'e neza chee' duté xella' dxebé. <sup>40</sup> Felipe na' guque bé'ene' ba zue' xezre Azoto, na' gudé'e tu tu xezre dxuchálaje' dizra' chawe' ca naca chee Jesús cadxa bezrine' Cesarea.

## 9

*Saulo dxexaque' benne' chee Jesús*

(Hch. 22.6-16; 26.12-18)

<sup>1</sup> Dxácate na' Saulo quebe dxusané' dxune' ba xuzre gutié' benne' ca' dxeléajle'e chee Xránadxu. Chee guné' caní guxíaje' xejchálajlene' bxruze blau. <sup>2</sup> Gunabe'

xiche da dxulé'e na nape' xel-la' dxenná bea da gu'e chéaje' xudau' ca' zaj nmita xezre Damasco, chee séquene' cheajxedíla-je' benne' ca' dxeléajle'e chee dizra' chawe' chee Jesús, ne che'e le', benne' biu, ne nu'ula ca', chee guzré'e le' lize xia lu xezre Jerusalén. <sup>3</sup> Na' gate ne xu'e neza zéaje', ne ca ba zua zrine' xezre Damasco, na' bsaní' tu xi' naga zéaje' da za' xabáa. <sup>4</sup> Saulo xejcházie' lu xu, na' benne' chí'i tu benne' dxé'e le':

—Saulo, Saulo, ¿bizr chee na' nau zi' xuzru' neda'?

<sup>5</sup> Nadxa Saulo bchebe':

—¿Nuzra Lue', Xran?

Na' béneea' bechebe':

—Neda' naca' Jesús, benne' na' nau zi' xuzru'. Lue'ze dxun zi' cuinu', ca dxun beze gate dxulibebe' lawe' xágala da dxádué'-ba'.

<sup>6</sup> Nadxa Saulo dxezrizque' dxezrebe', gunné':

—Xran, ¿bi dxaca lazru' guna'?

Na' Xránadxu guzre' le':

—Guxasa, guxú'u lu xezre, na' xeléqueze' lue' da dxal-la' gunu'.

<sup>7</sup> Benne' ca' zjácate Saulo belezrébele'e lawe' da belemné' chí'i benne' lu', san quebe nu belelé'ene'. <sup>8</sup> Nadxa Saulo bexase' lu xu na', na' gate guxá' lawe', quebe guca lé'ene'. Ca' guca, belequé'e ne'e, ne guleché'e le' lu xezre Damasco. <sup>9</sup> Guzú'e na' chunna zra quebe dxelé'ene', ne quebe bi güe'e gudawé'.

<sup>10</sup> Lu xezre Damasco na' zua tu benne' dxéajle'e chee Jesús le' Ananías, na' Xránadxu ble'e lawe' le' tu lu da ble'e le', na' guzre' le':

—Ananías.

Na' le' bechebe':

—Nigá zua', Xran.

<sup>11</sup> Nadxa gunná Xránadxu, dxé'e le':

—Guxasa, guxíaj neza da nazí le na: Neza Li, na' lize Judas guchebu' chee tu benne' Tarso, le' Saulo. Benne' nigá dxuláwize' Dios. <sup>12</sup> Tu lu da blé'ene', ba blé'ene' tu benne' le' Ananías chu'e guzé ne'e le' chee xelé'ene'.

<sup>13</sup> Gate benne' da nigá, na' gunná Ananías:

—Xran, benne' zan ba buluzenne' neda' chee benne' nigá, ne chee xúgute' da caléla da dxune' chee benne' ca' dxeléajle'e chiu' Lue' lu xezre Jerusalén. <sup>14</sup> Na'a ble'e nigá

nape' xel-la' dxenná bea chee benne' xícha-  
je ca' chee bxruze ca', chee che'e lizre xia  
xúgute benne' dxelenné' Dios lu Lau' Lue'.

<sup>15</sup>Na' Xránadxu guzre' le':

—Guxíaj. Neda' ba gucá'a benne' na'  
chee cheajzenne' benne' xezr la xu ca', ne  
benne' wenná bea ca', ne benne' Israel ca',  
ca naca chia' neda'. <sup>16</sup>Neda' gulé'eda' le' ca  
naca da zante da saque'e ne chia' neda'.

<sup>17</sup>Nadxa Ananías guzé'e zéaje' xu'u naga  
zua Saulo. Gate guxú'e na', guxrúa ne'e  
lawe' le', na' guzre' le':

—Saulo, bicha'. Xránadxu Jesús, Bén-  
nea' ble'e lawe' lue' la neza naga za'u, nase-  
le' neda' chee xelé'enu', ne chee súale Be'  
Lá'azxa lue'.

<sup>18</sup>Ca' guca beléxrujte lu xiaj lawe' da zaj  
naca ca xrlacu bela, na' belé'ene'. Na'  
bexasa Saulo, ne gudxúate' nisa. <sup>19</sup>Gudé na'  
gudawe', ne bedipe'. Begá'ane' tu chupa zra  
nen benne' Damasco ca' dxelájlē'e chee  
Jesús.

*Saulo dxuchálaje' chee Jesús lu xezre Dam-  
asco*

<sup>20</sup>Nadxa guzú' lau Saulo dxuchálaje' chee  
Jesús lu xu'u ga dxelezraga judío ca'  
zaj nnite' Damasco, dxenné' Jesús naque'  
Zri'ine Dios. <sup>21</sup>Xúgute benne' beléne'  
chee' belexebánene', dxelenné':

—¿Quegá benne' nigá bēneea' gudáu zi'  
xuzre' benne' ca' zaj zre'e Jerusalén, benne'  
ca' dxelenné' Dios lu La Jesús? ¿Quegá  
léqueze' na' ble'e nigá chee che'e benne'  
ca' xezre Jerusalén chee gudée' le' lu na'  
benne' xíchaje' ca' chee bxruze ca'?

<sup>22</sup>Saulo bchálajdxē' du lazre' chee Jesús,  
ne dxulé'ene' Jesús naque' Cristo chee Dios,  
na' bzua zrie' benne' judío ca' zaj zre'e  
Damasco.

*Saulo dxelé' lu na' benne' judío ca'*

<sup>23</sup>Ca gudé zane' zra, benne' judío  
ca' belune' tuze dizra' xelútie' Saulo.  
<sup>24</sup>Gunezne' le' da nigá. Te zra ne chizrela  
gulebeza benne' judío ca' dxu'a dxa xu'u  
ca' naga dxelexedxúaj bēneache xezre  
na', chee xelútie' le'. <sup>25</sup>Nadxa benne' ca'  
dxelájlē'e chee Jesús gulegú'e Saulo tu  
lu xcuite lba zren, na' buluxulétaje' le'  
chizrela le'e ze'e da naxechaj na xezre. Ca'  
guca, gulá Saulo.

*Saulo dxezrine' Jerusalén*

<sup>26</sup>Gate bezrín Saulo Jerusalén, guca lazre'  
gune' tuze benne' ca' dxelájlē'e chee Jesús,  
san benne' ca' dxelezrebe' le' lawe' da  
quebe dxelájlē'e ba dxéajle'e Saulo chee  
Jesús. <sup>27</sup>Bernabé guché'e Saulo, ne bze'  
le' lau benne' gubáz ca' chee Jesús. Na'  
bchálajle Bernabé gubáz ca' ca ble'e Saulo  
Xránadxu la neza, ne ca ben Xránadxu  
bchálajlēne' Saulo, ne ca bchalaj Saulo du  
lazre' lu xezre Damasco nen xel-la' dxenná  
bea chee La Jesús. <sup>28</sup>Nadxa Saulo begá'ane'  
Jerusalén, dxedálēne' benne' ca'. <sup>29</sup>Bchalaj  
Saulo du lazre' lu La Xránadxu, dxuchála-  
jlēne' benne' ca' dxelenné' dizra' griego,  
san benne' caní gulaca lazre' xelútie' le'.  
<sup>30</sup>Gate guleque be'e biche ljuwézredxu da  
caní, na' guleché'e Saulo lu xezre Cesarea,  
na' lu xezre na' gulesel-le' le' xezre Tarso.

<sup>31</sup>Nadxa benne' ca' dxelezrague' lu La  
Jesús tu tu xezre zaj nababa Judea, ne  
Galilea, ne Samaria, gulebeza zri lazre', ne  
beledipa lazre'. Xel-la' dxelezrebe lague'  
Xránadxu tuze, na' lawe' da gúcale Be'  
Lá'azxa le', gulane'.

*Pedro dxexune' Eneas*

<sup>32</sup>Gate dxedá Pedro dxejnné'e biche  
ljuwézredxu ca', na' guxíajqueze' xejnné'e  
benne' ca' dxelájlē'e chee Jesús lu xezre  
Lida. <sup>33</sup>Na' bezrague' tu benne' le' Eneas,  
bache guca xrunu' iza de' lu da'a lawe' da  
naque' benne' zrinnaj. <sup>34</sup>Na' gunná Pedro,  
dxē'e le':

—Eneas, Jesucristo ba bexune' lue'. Bex-  
asa, ne butube da'a chiu'.

Na' bexásate Eneas na'. <sup>35</sup>Belelé'e xúgute  
benne' le', benne' zaj zre'e xezre Lida, ne  
xezre Sarón, na' belexaque' chee Xránadxu.

*Dorcas dxexebang' ládujla benne' gate*

<sup>36</sup>Lu zra na' zua tu nu'ula le' Tabita lu  
xezre Jope. Dxéajle'e chee Jesús. Lu dizra'  
griego le' Dorcas. Nu'ula nigá dxúnqueze'  
da xrlátaje, ne dxácalēne' benne' xache' ca'.  
<sup>37</sup>Lu zra ca' guxú'u Dorcas xel-la' we', na'  
gutie'. Na' bulugazje' le', ne belexrue' le'  
tu lu xu'u naga zua gudxupe' cuía dxala.  
<sup>38</sup>Xezre Jope na' zua na gagu naga zua xezre  
Lida naga zua Pedro, na' lawe' da zaj neze  
benne' Jope ca' zue' na', na' gulesel-le'  
chupa benne' biu cheajlegueze' le':

—Gudázega xezre Jope.

<sup>39</sup>Nadxa Pedro guxíajlēne' benne' ca'.  
Gate bzrine' na', na' beleché'e le' naga

zrua Dorcas na', na' xúgute nu'ula ca' ba zaj nate benne' chie' zaj naxéchaje' Pedro dxelebezre', ne dxulul'é'ene' le' zra nu'ula, ne zra benne' biu, da ca' ben Dorcas na' gate ne zué' nen benne' ca'.<sup>40</sup> Nadxa guleaj Pedro xúgute benne' ca', na' bzu zribe' bchálajlene' Dios. Na' gunné'e' nu'ula gate na', gunné'e':

—Tabita, bexasa.

Nadxa nu'ula na' bexá' lawe', na' gate blé'ene' Pedro, bexase' gudxé'e'.<sup>41</sup> Na' Pedro beque'e' ne'e, bechise' le'. Nadxa gunné'e' biche ljwézredxu ca', ne nu'ula ca' ba gute benne' biu chee', na' blé'ene' benne' ca' le' naca bané'.<sup>42</sup> Ca guca da nigá belén ca naca benne' zaj zre'e xezre Jope, na' benne' zan guléajle'e chee Xránadxu.<sup>43</sup> Pedro begá'ane' zane' zra lu xezre na' lizre Simón, tu benne' dxucá'ana chawe' xide zra be xixre'.

## 10

### *Pedro ne Cornelio*

<sup>1</sup> Zua lu xezre Cesarea tu benne' le' Cornelio, benne' dxenná be'e lu wedil-la tu cue' benne' nazí le na Benne' Italia Zjaque' Wedil-la. <sup>2</sup> Benne' nigá, ne benne' zaj zre'e lizre' dxulucá'ana szrene' Dios, ne dxelezrebe' Le'. Cá'anqueze dxunézrujle'e dumí dxácalene' benne' judío ca', ne tu dxuchálajlezeque' Dios. <sup>3</sup> Tu zra gate dxexedá chunna ble'e Cornelio tu da ble'e Dios le', na' blé'ene' cátequeze guxú'u tu gubáz chee xabáa naga zué', na' guzre' le':

—Cornelio.

<sup>4</sup> Cornelio guzúe' dxenné'e' gubáz chee xabáa na' duté xel-la' dxezrebe, na' bchebe' le':

—¿Bizra na', Xran?

Nadxa gunná gubáz chee xabáa, guzre' le':

—Dios ba benne' da dxuláwizru' Le', ne nézene' ca da dxunu' dxácalenu' benne' xache' ca'. <sup>5</sup> Gusel-la benne' chjaque' xezre Jope, cheajlenné' Simón, bénnea' léqueze' Pedro. <sup>6</sup> Zue' lizre xetú benne' le' Simón, benne' dxucá'ana chawe' xide zra be xixre', na' zua lizre' dxu'a nísadau'. Pedro na' xe'e lue' ca da dxal-la' gunu'.

<sup>7</sup> Gate bezá' gubáz chee xabáa na' bchálajlene' le', na' gunné' Cornelio chupa bi wen zrin chee', ne tu benne' dxeje' wedil-la, ne dxape' Dios ba lá'ana, ne zúaqueze' lizre Cornelio na'. <sup>8</sup> Na' bchálajlene' benne' ca'

ca naca da ba guca, na' ca gudé na' gusel-le' le' chjaque' xezre Jope.

<sup>9</sup> Zra xula, dxácaté zaj xu'e benne' ca' neza, ne ba dxezrine' gagu naga dxe' Jope, na' guluén Pedro chju'u sibe du wagubizra chee guchálajlene' Dios. <sup>10</sup> Ba dxedúnle'e, ne guca lazre' gawe', na' dxácaté ne dxulucueze' da gawe', blé'ene' tu da ble'e Dios le'. <sup>11</sup> Blé'ene' naxalaj xabáa, ne dxetaj lu xezre la xu da naca na ca tu ladxe' zren nadxéaj na dápaté la'a chee na. <sup>12</sup> Lawe' ladxe' na' zaj zria xúgute cue' be xixre', be zria tapa ni'a na'ba', ne be snia ca', ne be zua xrila ca'. <sup>13</sup> Nadxa benne' tu chi' benne' dxe'e le':

—Guxasa, Pedro. Bete tu bea ca' chee gagu'-ba'.

<sup>14</sup> Pedro bechebe':

—Cabí, Xran. Neda' cabata' ne gawa' da quebe nun Dios gagu bénneache, ne quegá da naca na sban.

<sup>15</sup> Benne' na' bchálaje' da xula, dxe'e le':

—Da ba nucá'ana chawe' Dios, quebe nnau' lue' naca na sban.

<sup>16</sup> Da nigá guca na chunna lasa, na' ladxe' na' beguén na xabáala. <sup>17</sup> Dxácaté dxe' Pedro dxulaba lazre' bi zéajé ca naca da blé'ene', na' belezrin benne' ca' nasel-la Cornelio dxu'a dxa xu'u, dxuluchebe' ga zua lizre Simón. <sup>18</sup> Gate belezrine' lizre Simón na', na' gulenné' zizraj, dxelenabe' che zua xu'u na' tu benne' le' Simón, bénnea' léqueze' Pedro. <sup>19</sup> Gate Pedro ne dxulaba lazre' ca naca da blé'ene', na' Be' Lá'azxa guzre' le':

—Gunná'xque, chunna benne' dxelxílaje' lue'. <sup>20</sup> Guxasa, bexetaj. Guxíajle benne' ca', ne quebe gun chupa lazru' lawe' da nasel-la' neda' benne' ca'.

<sup>21</sup> Nadxa Pedro bexétaje' naga zaj zra' benne' ca' nasel-la Cornelio, na' guzre' le':

—Neda' na' dxexíajle le'e. ¿Bizra chee za'le'?

<sup>22</sup> Benne' ca' belexechebe':

—Za'ntu' waláz chee Cornelio, benne' dxenná be'e lu wedil-la. Naque' benne' xrlátaje, ne dxezrebe' Dios, na' xúgute benne' judío ca' dxelape' le' ba lá'ana, ne zaj nazrí'ine' le'. Tu gubáz chee xabáa chee Dios guzre' le' dxal-la' sel-le' benne' xedajlenné' lue' xidu' lizre' chee xenne' ca da dxal-la' xu'u le'.

<sup>23</sup> Nadxa Pedro bzre'e benne' ca' xu'u na', na' belexegá'ane' nen le' xela na'. Zra xula

guxíajlę Pedro benne' ca', na' xjácald bal-la biche ljwézredxu le', benne' zaj zřę'e Jope.

<sup>24</sup> Zra gudxupe' zra belezřine' xezre Cesarea naga zua Cornelio dxebeze' le', ne zřald bal-la benne' xrtie' le', ne xezícadxa benne' ljwezřę', benne' ca' gunné'. <sup>25</sup> Gate bzřin Pedro chale'aj, bdxuaj Cornelio guzi' lu ne'e le'. Bzu zřibe' lau Pedro chee gucá'ana szřene' le'. <sup>26</sup> Pedro bechise' le', dxenné':

—Guzé. La gázqueze neda' naca' bėnneache ca lue'.

<sup>27</sup> Dxácate dxuchálajlę Pedro Cornelio, gulu'e lu xu'ula, na' blé'ene' benne' zan zaj nazrague' na'. <sup>28</sup> Nadxa gunná Pedro, dxę'e le':

—Nézquezle le'e quebe dxunna da nadxixruj bea chee judío ca' neda' lataj gaca' tuze nen benne' quebe zaj naque' judío u chu'a lizřę'. Na'a Dios ba blé'ene' neda' quebe dxal-la' nmia' chee netú benne', quebe nmia' naque' sban, u naque' benne' quebe gapa' ba lá'ana. <sup>29</sup> Chee le' na', gate gulenné' neda', la guzát'ea', ne quebe ben chupa lazra'. Dxaca lazra' nezda' bi chee na' gunnele neda'.

<sup>30</sup> Nadxa bechebe Cornelio:

—Ba zeaj tapa zra ca zúadxu na'a, zua lizra' nigá dxuna' gubasa, ne dxuchálajlena' Dios, gate ble'e lau tu benne' neda', nacue' zra lanę' da dxácátite na. <sup>31</sup> Benne' na' guzřę' neda': "Cornelio, Dios ba benę' da dxuchálajlenu' Le', na' nézene' ca da dxunu' dxácalenu' benne' xache' ca'. <sup>32</sup> Gusel-la benne' chjaque' xezre Jope, cheajlexri'e Simón, bėnnea' lęqueze' Pedro. Zue' lizre xetú benne' le' Simón, benne' dxucá'ana chawe' xide zra bę xixřę' ca', na' zua lizřę' dxu'a nísadau'. Gate xide' nigá, na' guchálajlęne' lue'." <sup>33</sup> Ca'an guca, gusél-latea' benne' ca' bedajlexedílaję' lue', na' benu' da chawe' bla'u nigá. Na'a xúgütęntu' zřantu' nigá lau Dios, ne dxaca lázřentu' xėnentu' xúgütę ca da gunná be'e Xřánadxu lue' guchálajlęnu' netu'.

*Da bchalaj Pedro lizre Cornelio*

<sup>34</sup> Nadxa guzú lau Pedro dxuchálaję, dxenné':

—Na'a dxėajni'ida' Dios quebe dxebėaje' bál-laze bėnneache, <sup>35</sup> Na' xúgütę xezř la xu Dios dxezi' lu ne'e benne' ca' dxelezrebe Le', ne dxelunę' da xřlátaję. <sup>36</sup> Dios bchálajlęne' zři'ine zře sua Israel ca', ne

bchálaję dizra' chawe' chee xel-la' dxębeza zři lazre', da dxęzidxu ne chee Jesucristo, Bėnnea' naque' Xřana xúgütę bėnneache. <sup>37</sup> Le'e ba nézquezle ca naca da guca du ca naca lu xezř la xu chee benne' judío ca', da guzú lau na naga nababa Galilea ca gudę bchalaj Juan xřtizra' Dios, ne bchue' bėnneache nisa. <sup>38</sup> Nézele ca ben Dios, bnėzruje' Jesús, benne' Nazaret, xel-la' waca chee Be' Lá'azxa, ne ca gudá Le' dxunę' da chawe', ne dxexunę' xúgütę benne' dxelezaca zi'e lu na' da xřiwe'. Da nigá bęne' lawe' da guzúale Dios Le'. <sup>39</sup> Netu' dxexechėbentu' chee da caní, xúgütę da ben Jesús naga nababa Galilea, ne da bęne' lu xezřę Jerusalén. Gudę na' belutię' Le', gate buludę'e Le' xaga bėguaj, <sup>40</sup> na' Dios bsebane' Le' gate guca chunna zra, na' bę'e lataj ble'e lau Jesús netu'. <sup>41</sup> Quebe ble'e lawe' xúgütę bėnneache, san launtu' nėtu'ze, nácantu' benne' ca' guleaj Dios nédxudaute chee xechėbentu' chee da caní. Netu' güe'e gudáguntu' nen Le' gate gudę bebane' ládujla benne' gate. <sup>42</sup> Gusel-le' netu' guchálajlęntu' bėnneache, ne xechėbentu' ca da nun Dios, nuzúe' Jesús nigá chee guchi'e chee benne' ban ca', ne chee benne' gate ca'. <sup>43</sup> La gázqueze nédxudaute gulenná xúgütę benne' ca' buluchálaję waláz chee Dios, buluchálaję' ca dxal-la' gaca chee Jesús, gulenné' xúgütę benne' xelėajlę'e chee Jesús, na' ne chee Le' Dios gunite lawe' xtul-la benne' ca'.

*Benne' quebe zaj naque' judío dxelezi'e Be' Lá'azxa*

<sup>44</sup> Ne dxuchalaj Pedro gate bzřin Be' Lá'azxa bedajsúalęne' xúgütę benne' ca' dxelennę' da dxuchalaj Pedro. <sup>45</sup> Benne' judío ca' dxelėajlę'e chee Jesús, benne' ca' zá'acalęne' Pedro, belexebānene' gate guleque bė'ęne' ba zúale Be' Lá'azxa benne' ca' quebe zaj naque' judío. <sup>46</sup> Dxeleque bė'ęne' na lawe' da belennę' dxuluchalaj benne' ca' dizra' chee benne' xula, ne dxelúe lá'ane' Dios. <sup>47</sup> Nadxa gunná Pedro:

—;Waca nnadxu quebe dxal-la' xeledxúa benne' caní nisa, benne' ca' bache gulezi'e Be' Lá'azxa ca bęntu' netu'?

<sup>48</sup> Nadxa gunná bea Pedro xeledxúa benne' ca' nisa lu La Jesucristo. Gudę na', benne' ca' gulata' xuene' Pedro xegá'ane' nen le' tu chupa zra.

## 11

*Pedro dxuzenne' benne' gubáz ca' zaj zře'ę Jerusalén ca naca da beņe'*

<sup>1</sup> Benne' gubáz ca', ne biche ljwézredxu ca' zaj zře'ę Jerusalén belenne' ba gulezi' lu na' benne' quebe zaj naque' judío dizra' cheę Dios. <sup>2</sup> Gate bezrín Pedro xęzre Jerusalén, gulezi' tizra' benne' ca' le', benne' ca' dxelenné' dxal-la' chugu late' beła' cheę benne' ca' zaj naque' cheę Dios. <sup>3</sup> Benne' caní buluchębe' Pedro:

—¿Bizr cheę na' guxájau' xeajsúalenu' benne' ca' quebe zaj naque' judío, ne gudágulenu' le'?

<sup>4</sup> Nadxa Pedro bzenne' benne' ca' xúgute da guca cha cheę na, gunné':

<sup>5</sup> —Neda' zua' lu xęzre Jope, na' gate dxuchálajlena' Dios, ble'eda' tu da ble'e Dios neda'. Ble'eda' tu ladxe' zren nadxéaj dápatę la'a cheę na, da dxetaj na xabáa, ne bedajsę na lawa'. <sup>6</sup> Gate gunná xánnia' cheę ble'eda' bi na' zaj zria na lawe', ble'eda' be xixre', be zria tapa ni'a na'ba', ne be snia ca', ne bea ca' zaj zua xrílaba'. <sup>7</sup> Na' benda' tu chi'i benne' guzře' neda': "Guxasa Pedro, beę tu bea ca', na' gagu'-ba'." <sup>8</sup> Neda' gunnéa': Cabí, Xran, lawe' da cabata' ne gawa' neda' tu da quebe nun Dios gagu bęnneache, ne quegá da naca sban. <sup>9</sup> Nadxa bęnnea' dxenné' xabáa gunné' neda' da xula, na' guzře' neda': "Da ba nucá'ana chawe' Dios, quebe nnau' lue' naca na sban." <sup>10</sup> Da nigá guca na chunna lasa, na' ca gudé na' xúgute da ca' belexegüen na xabáa. <sup>11</sup> Lu zra ná'queze belelá' chunna benne' lu xu'u naga zua', benne' ca' gusel-la tu benne' zua Cesarea cheę zedajixedilaj neda'. <sup>12</sup> Be' Lá'azxa gunná bé'ene' neda' chéajlęna' benne' ca', ne quebe gun chupa lazra'. La gázqueze gusiá'cale xrupa benne' biche ljwézredxu caní neda'. Xúgutentu' guxú'untu' lizre tu benne'. <sup>13</sup> Le' bchálajlęne' netu' ca blé'ene' lizre' tu gubáz cheę xabáa, zę ni'e, ne guzře' le': "Gusel-la benne' chjaca xęzre Jope cheę cheajlenné' Simón, benne' léqueze' Pedro. <sup>14</sup> Benne' nigá xe'ę lue' aja gunu' cheę lau' lue', ne xelexá xúgute benne' zaj zře'ę lizru'." <sup>15</sup> Gate guzú lawa' dxuchálajlena' benne' ca', na' bzrin Be' Lá'azxa guzúalęne' benne' ca', ca ble'ę guzúalęne' dxi'u nédxudaute. <sup>16</sup> Nadxa xeajsá lazra' ca gunná Xránadxu, gunné':

"Da li Juan bchue' bęnneache nisa, na' gaca cheęle da zéaje xel-la' dxedxúa nisa, súale Be' Lá'azxa le'e." <sup>17</sup> Che Dios bnézruje' cheę benne' ca' ca bęnne' dxi'u, guxéajlędxu cheę Xránadxu Jesucristo, ¿nuzra naca' neda' cheę tábaga' Dios?

<sup>18</sup> Nadxa gate biche ljwézredxu ca' zaj zře'ę Jerusalén belenne' da caní, na' gulezúa zře'ę, ne gulezú lawe' dxelúe lá'ane' Dios, dxelenné':

—Ca' naca, la gázqueze dxunna Dios lataj benne' quebe zaj naque' judío xelexeb'i lazře' cheę xezezi'e xel-la' nabán zeajli canna.

*Benne' dxelájle'ę cheę Jesús zaj zře'ę xęzre Antioquía*

<sup>19</sup> Gate belutie' Esteban, na' belau zi' xuzře' xezícala benne' dxelájle'ę cheę Jesús, na' bal-le' buluzrúnnaje', xjaque' xęzre Fenicia, ne lu xu Chipre, ne xęzre Antioquía. Gate belezrine' lataj ca', na' buluchálaję' dizra' cheę Jesús lau benne' judío cá'aze, ne quegá lau benne' quebe zaj naque' judío. <sup>20</sup> Nadxa bal-la benne' dxelájle'ę cheę Jesús, benne' Chipre, ne benne' Cirene, belelé'ę xęzre Antioquía, na' buluchálajlęne' benne' ca' quebe zaj naque' judío, ne buluzenne' le' dizra' chawe' ca naca cheę Xránadxu Jesús. <sup>21</sup> Xel-la' waca cheę Xránadxu guzúale na benne' ca', na' ca'an guca, benne' zan belexexaque' cheę Xránadxu.

<sup>22</sup> Gate belén benne' ca' da nigá, benne' dxelájle'ę cheę Jesús zaj zře'ę Jerusalén, na' gulesel-le' Bernabé xęzre Antioquía. <sup>23</sup> Gate bzrin Bernabé na', blé'ene' ca da chawe' da dxun Dios cheę benne' ca', na' gubéle'ene'. Na' bsízrene' xúgute benne' ca' cheę xelexúa chúchue' lu da naca cheę Xránadxu. <sup>24</sup> Bernabé naque' benne' xrlátaje, na' zúale Be' Lá'azxa le', ne dutę lázrdawe' dxéajle'ę cheę Jesús. Ca'an guca, ne cheę le' gulájle benne' zan cheę Xránadxu.

<sup>25</sup> Gudé na' guxíaj Bernabé xęzre Tarso, zeajxedilaje' Saulo, na' gate bezrelnę' le', beche'ę le' Antioquía. <sup>26</sup> Gulezúe' na' tu iza naxá' nen benne' ca' dxelájle'ę cheę Jesús, na' bulusędenę' benne' zan. Lu xęzre Antioquía na' guca na da nedxu gul'ę benne' ca' dxelájle'ę cheę Xránadxu, Benne' Cristiano.

<sup>27</sup> Ca lu zra ca', bal-la benne' dxelenné' waláz cheę Dios besia'que' Jerusalén,

xjaque' Antioquía. <sup>28</sup>Tu benne' ca' le' Agabo guzé' lówela biche l'wézredxu ca', na' ca da bnezruj Be' Lá'azxa le', gunné' waca tu gubina' zren du ca naca xezr la xu, na' gubina' nigá guca na gate naca Claudio benne' dxenná bé'ene' ca naca xezr la xu Roma. <sup>29</sup>Nadxa benne' ca' dxeléajle'e chee Jesús, benne' zaj zre'e Antioquía belún zi' lazre' xelesel-le' da gácale na biche l'wézredxu zaj zre'e xezre ca' zaj nababa Judea, ca da xezeque' tu tue' xulunéruje'. <sup>30</sup>Ca'an belune', na' belesel-le' tu guna' lau benne' gula ca' chee Cristo zaj zre'e Judea, na' Bernabé ne Saulo belú'e na na'.

## 12

*Dxelutié' Jacobo ne dxelegú'e Pedro lizre xia*

<sup>1</sup>Lu zra ca' guzú lau wenná bea Herodes nau zi' xuzre' bal-la benne' ca' dxeléajle'e chee Jesús. <sup>2</sup>Gunná bé'ene' belutié' Jacobo, biche Juan nen xia nalá. <sup>3</sup>Gate ble'e Herodes dxelexezaca ba lazre' benne' judío ca' ca naca da bene', na' gudél-le' Pedro. Da nigá guca na lu zra laní ca' gate dxelawe' xeta xtila da quebe nachixre na cua zichaj chee xeta xtila. <sup>4</sup>Ca gudé gudél-le' Pedro, na' gulu'e le' lizre xia naga buluxúe tapa cue' benne' dxjaca wedil-la le', zaj naca tapa benne' zeje' wedil-la tu cue' tu cue'. Herodes guca lazre' guzúe' Pedro lau benne' xezre ca' te laní. <sup>5</sup>Ca'an guca xu'u Pedro lizre xia naga dxuluxúe xánnie' le', na' benne' biche l'wézredxu ca' buluchála-jlequeze' Dios du lazre'.

*Dios dxuselé' Pedro lizre xia*

<sup>6</sup>Dxelá xanne' ca za chaní' zra xula gate dxal-la' guzúa Herodes le' lau benne' xezre ca', Pedro de' dxásié' laduj chupa benne' dxjaque' wedil-la, nadxéaje' chupa du xia, na' xebal-la benne' dxjaca wedil-la zaj zre'e dxu'a dxa xu'u dxuluxúe' lizre xia na'. <sup>7</sup>Nadxa ble'e lau tu gubáz chee xabáa chee Xránadxu, na' ca naca lizre xia na' guxaní'. Na' gubáz chee xabáa na' bte' le'e Pedro, ne bsebané' le', na' guzre' le':

—Guxásache.

Ca'an guca, du xia ca' belexezre na na' Pedro. <sup>8</sup>Na' gunná gubáz chee xabáa na', guzre' le':

—Besí le'u, ne buléaj zrelu'.

Gate bexuzre ben Pedro da na', na' guzre gubáz chee xabáa na' le':

—Guxrúa xicha chiu' cuxru', ne gudále neda'.

<sup>9</sup>Pedro bedxúaje' cuzru gubáz chee xabáa na', ne quebe nézene' che naca da li che cabí ca da dxun gubáz chee xabáa na'. Dxéquene' dxelé'ene' tu da dxulé'e Dios le'. <sup>10</sup>Belexedéé' naga zaj zra' benne' dxjaque' wedil-la nedxu ca', ne naga zaj zra' benne' gudxupe' benne' dxjaque' wedil-la, na' gate belexezrine' dxu'a dxa xu'u xia da dxedxuaj zeaj la nézala, dxa xu'u na' leze na bxalaj na. Belexedxúaje', na' ca gudé besí'que' belezrine' xetú neza xula chee xezr na', na' bca'ana gubáz chee xabáa na' leze'. <sup>11</sup>Nadxa guque be'e Pedro ba bedxúaje', na' guzá' lazre', gunné': Na'a dxelé'eda' naca na da li. Xrana' gusel-le' gubáz chee xabáa chee' chee bselé' neda' lu na' Herodes, ne lu xúgute' da gulaca lazre' judío ca' xelune' chia'.

<sup>12</sup>Da nigá dxulaba lazre' Pedro gate bzrine' lizre María, xrna Juan, bi na' léquezebe' Marcos, na' lu xu'u na' zaj nazraga benne' zan dxelenabe' Dios gácalene' Pedro. <sup>13</sup>Gate gunné Pedro dxu'a dxa xu'u na', bzrin na' tu bi nu'ula lebe' Rode zeajnabe' nu na'. <sup>14</sup>Gate bexúnbeabe' chi'i Pedro, quebe gusaláje' dxa xu'u. Xella' dxebé cheebe' zexíaj chégube' naga zaj nazraga benne' ca' chee zeajézebe' benne' ca' ze Pedro dxu'a dxa xu'u. <sup>15</sup>Nadxa benne' ca' gulé'e bi nu'ula na':

—Nadá xichaj lázrda'u.

Bi nu'ula na' ben chúchube' xrtízrabe'. Benne' ca' gulenné':

—Quebe le' na'. Be' guxu'e na'.

<sup>16</sup>Dxácaté na' ze Pedro tu dxennézeze' dxu'a dxa xu'u. Na' gate gulesálaje', ne belelé'ene' Pedro, na' belexebánene'. <sup>17</sup>Pedro guchisa ne'e chee xelexúe' benne' ca' zrize, na' bchálajlene' benne' ca' ca ben Xránadxu bebéaje' le' lizre xia. Na' guzre' benne' ca':

—Le guzén Jacobo, ne biche l'wézredxu ca' ca naca da nigá.

Nadxa bezé'e zexíaje' naga xula.

<sup>18</sup>Gate guxaní', gulezúale'e stebe benne' dxjaque' wedil-la ca' lawe' da quebe zaj nézene' aja guca chee Pedro. <sup>19</sup>Herodes gunná bé'ene' xelexilaj benne' dxjaca wedil-la Pedro, na' lawe' da quebe belexezrelne' le', na' gunáb xánnie' benne' dxjaque' wedil-la bi guca, na' gudé na'

gunná bé'eng' xelate benne' ca' dxjaque' wedil-la. Ca gudé na' guzá' Herodes xezre ca' zaj nababa Judea, guxiáje' xeajsúe' xezre Cesarea.

#### *Dxate Herodes*

<sup>20</sup> Herodes dxezré'e benne' ca' zaj zře'e xezre Tiro, ne xezre Sidón. Benne' chee xezre ca' belune' tuze dizra' chee chea-jlelé'e cuine' lau Herodes na'. Belune' Blasto benne' ljwezre'. Naque' tu benne' blau chee wenná bea Herodes, na' gulesel-le' le' lau Herodes na' chee nabe' le' sua zri ca' naca da dxaca chee Herodes nen benne' ca'. Caní belune' lawe' da nédxute dxe-lagu benne' xezre Tiro, ne Sidón da guzá' xezre Cesarea naga zua Herodes. <sup>21</sup> Nadxa Herodes bzue' tu zra xelezrín benne' ca' lawe'. Lu zra na' Herodes gucue' zra lane' da zácale'e, na' gudxé'e lataj blau chee', ne bchálajlene' benne' zan ca'. <sup>22</sup> Nadxa benne' zan ca' gulezú lawe' dxelenné' zizraj:

—jBenne' nigá dxuchálaje' quebe naque' beniácheze! jDios na'!

<sup>23</sup> Zra na'te tu gubáz chee xabáa chee Xránadxu gulu'e Herodes tu xízrawe' lawe' da guzi'e xel-la' ba lá'ana da dxal-la' si' Dios, na' guzré'e bzuga', ne gútete'.

<sup>24</sup> Bzriluj dizra' chawe' chee Xránadxu, na' benne' ca' buluchálaje' ca' naca na gáteteze na'.

<sup>25</sup> Gate belezúe Bernabé, ne Saulo zrin dx-elune' lu xezre Jerusalén, besía'que' xezre na', zaj naché'e Juan, bi na' léquezebe' Marcos.

## 13

*Bernabé ne Saulo dxelezú lawe' dxeledé' dxuluchálaje' dizra' chee Dios*

<sup>1</sup> Ládujla benne' ca' zaj nazraga chee Cristo lu xezre Antioquia zaj zra' benne' ca' dxelenné' waláz chee Dios, ne benne' ca' dxulusédene' bénneache xrtizra' Dios. Ládujla benne' caní zaj zua Bernabé, ne Simón, bénnea' léqueze' benne' gasaj, ne Lucio, benne' xezre Cirene, ne Manaén, benne' gúlalebe' Herodes, benne' xu'u lu ne'e xezr la xu Galilea na', ne Saulo. <sup>2</sup> Tu zra gate benne' caní zaj zře'e dxelúe lá'ane' Dios, ne dxelune' gubasa, Be' Lá'azxa gunné':

—Le cueaj Bernabé, ne Saulo chee xelune' zrin na' da gunnéa' le' xelune'.

<sup>3</sup> Chee le' na', ca gudé buluchálajlene' Dios, ne belune' gubasa, na' buluzé ne'e lawe' benne' ca', ne buluzé' le' dizra'.

*Dxupa benne' gubáz ca' dxuluchálaje' dizra' chee Dios lu xezr la xu Chipre*

<sup>4</sup> Gudé na', ca gusel-la Be' Lá'azxa le', na' Bernabé, ne Saulo xjaque' xezre Seleucia naga gulu'e tu lu da dxedá lawe' nísadau' chee chjaque' lu xezr la xu da naxechaj nísadau' da nazí le na Chipre.

<sup>5</sup> Gate belezrine' na', na' belexedxúaje' lu da dxedá lawe' nísadau' naga zua xezre Salamina, na' gulezú lawe' dxuluchálaje' dizra' chee Dios lu xudau' ca' chee benne' judío ca'. Juan zéajléquezebe' gubáz ca' chee gácalebe' le'. <sup>6</sup> Na' guledeé' xúgute xézredu ca' da zaj nnita lu xezr la xu na', na' belezrine' xezre Pafos. Na' belexezrague' tu benne' judío le' Barjesús, naque' benne' wazrá'. Naque' tu benne' wen lazre' dxen-né' dxuchálaje' waláz chee Dios. <sup>7</sup> Benne' wazrá' nigá zue' nen Sergio Paulo, benne' xu'u lu ne'e xezr la xu na', ne naque' benne' sina. Benne' xu'u lu ne'e xezr la xu na' gusel-le' benne' xeajnné' Bernabé, ne Saulo lawe' da dxaca lazre' xenne' dizra' chee Dios. <sup>8</sup> Na' benne' wazrá' na', léqueze' Elimas gudábague' gubáz ca' lawe' da guca lazre' quebe chéajle chee Jesús benne' xu'u lu ne'e xezr la xu na'. <sup>9</sup> Nadxa Saulo, bénnea' léqueze' Pablo, zúale Be' Lá'azxa le', gunná dxugüe' le', <sup>10</sup> na' guzre' le':

—Guzri xe, benne' wen da caleja. Zri'ine da xriwe', ne benne' dxusezxuj xrneza xúgute bénneache. jBizr chee na' quebe dxusanu' dxusézxuju' neza chee benne' ca' dxelaca lazre' chjácálene' Xránantu'? <sup>11</sup> Na'a, Xránantu' gudé' lue' ba xa'. Xegá'anu' la chul-la, na' tu chí'iqueze quebe le'enu' xel-la' naxani' chee gubizra.

Benne' na' guzúe' lu da chul-la, na' guzú lawe' dxílaje' nu xecá'a ne'e lawe' da québedxa dxelé'ene'. <sup>12</sup> Gate ble'e benne' xu'u lu ne'e xezr la xu na' da nigá, na' guxéajle' chee Jesús lawe' da bebánene' ca' naca da dxusede Pablo ca' naca chee Xránadxu.

*Pablo ne Bernabé dxelezrine' xezre Antioquia da nababa xezr la xu Pisidia*

<sup>13</sup> Pablo ne benne' ljwezre' ca' belú'e tu lu da dxedá lawe' nísadau' lu xezre Pafos na', na' belezrine' xezre Perge da nababa na xezr la xu Panfilia. Lu xezre na'



Juan bsanbe' gubáz ca', na' bexíajbe' xezre Jerusalén. <sup>14</sup> Gudé na' gubáz ca' besía'que' Perge, na' belezrine' xezre Antioquia da nababa na xezr la xu Pisidia. Lu xezre na', gate naca zra dxulupá'ana judío ca', gulu'e xudau' chee judío ca', na' gulebé'e. <sup>15</sup> Nadxa, ca gudé bululabe' lu xiche naga naxúaj da bdxixruj bea Moisés, ne da gullenná benne' ca' buluchálaje' waláz chee Dios, na' benne' xíchaje' ca' chee xudau' na' gulesel-le' benne' xeajezre' Pablo, ne Bernabé:

—Le'e, biche ljwézrentu', che nápale dizra' da guzėjajni'ile netu', waca nnele na na'a.

<sup>16</sup> Nadxa Pablo guxase', na' guchisa ne'e chee xelezúa zri benne' ca', na' gunné':

—Le xene le'e, benne' Israel, ne le'e dxezrébele Dios. <sup>17</sup> Dios chee xezre Israel guqu'e xra xrtáudxu ca', na' bene' benne' ca' tu cue' benne' zantę gate ne zaj zre'e ca' benne' zitu' ca' lu xezr la xu Egipto, na' ca gudé na' bebéaje' le' lu xezr la xu na' dutę xel-la' waca chee'. <sup>18</sup> Dios bchaga lawe' benne' ca' chua iza le'e xixre' lawe' lataj, <sup>19</sup> na' bzria xi'e gazre cue' bėnneache gulezúa lu xezr la xu Canaán, chee bnėzruje' xra xrtáudxu ca' xezr la xu chee benne' ca'. <sup>20</sup> Gudé na', lawe' tapa gaxúa xu gachaj iza gunná be'e Dios benne' ca' lu na' benne' ca' buluchi'e chee', cadxa bzin zra zua Samuel, benne' bchálaje' waláz chee Dios. <sup>21</sup> Nadxa benne' ca' gulenabe' Dios sua tu benne' gaque' wenna bea chee', na' Dios bzue' wenna bea tu benne' le' Saúl, zri'ine Cis, tu benne' chee tu cue' benne' judío zaj naque' zri'ine zre sua Benjamín. Saúl nigá guqu'e' wenna bea lawe' chua iza. <sup>22</sup> Gudé na' Dios begü'e Saúl lataj chee', na' bzue' David gaque' wenna bea chee', na' chee benne' nigá gunné': "Nezda' David, zri'ine Isái, naque' tu benne' dxunge' da dzezaca ba lazra', ne gune' xúgute da dxaca lazra'." <sup>23</sup> Tu benne' zri'ine zre sua David nigá naca Jesús, bėnnea' bzua Dios chee guselé' benne' Israel ca', ca ba guchebe lazre' chee David. <sup>24</sup> Nédxudxa gate za xida Jesús, Juan bchálajlene' ca naca benne' Israel ca', guzre' benne' ca' dxal-la' xelexebí'i lazre', ne xelexedxúe' nisa. <sup>25</sup> Na' gate ba za cheajsé chee Juan, na' gunné': "Neda' quebe naca' bėnnea' dxėquele naca', san ca

te chia' neda' za xetú benne' quebe naca chia' neda' cuėja' zrele' da xu'u ni'e."

<sup>26</sup> Le'e, biche ljwezra', zri'ine zre sua Abraham, ne le'e dxezrébele Dios. Dios nasel-le' chee dizra' nigá chee lale. <sup>27</sup> Benne' ca' gulezrá' Jerusalén, ne benne' blau chee' ca', quebe belexúnbe'e nu na' Jesús, ne quebe gulėjajni'ine' dizra' da buluchalaj benne' ca' buluchálaje' waláz chee Dios da dxellenę' xúgute zra dxulupá'ane'. Ca' guca, benne' ca' belún líqueze' ca naca da naxúaj na chee Jesús gate gulechugue' chee' gatie'. <sup>28</sup> Lácala quebe belezrelne' tu da nabaga Jesús chee xelútię' Le', gulenabe' lau Pilato nna bé'ene' gatie'. <sup>29</sup> Nadxa, gate gudé belune' xúgute da naxúaj na lu xiche chee Dios ca naca da dxal-la' gaca chee Jesús, na' buluxulėtaje' Le' xaga béguaj, ne bulucache' Le'. <sup>30</sup> Nadxa Dios bsebane' Le' ládujla benne' gate. <sup>31</sup> Lu zane' zra Jesús ble'e lawe' benne' ca' guledále' Le' gate bezé'e Galilea dxeaje' Jerusalén, na' na'a, benne' caní dxelexechebe' ca naca chee' lau bėnneache.

<sup>32</sup> Cá'anqueze netu' dxuzėnentu' le'e dizra' chawe' ca naca da guchebe lazre' Dios lau xra xrtáudxu ca'. <sup>33</sup> Ben lię' ca naca da guchebe lazre' cheedxu dxi'u, nácadxu zri'ine zre sua benne' ca', gate bsebane' Jesús, ca naxúaj gudxupe' salmo, dxenné': "Lue' nacu' zri'ina'. Neda' bzua' Lue' na'a." <sup>34</sup> Dios blé'ene' gusebane' Le' ládujla benne' gate, chee quebe guzru bė-la' dxen chee' gate gunné' lu xiche chee': "Gonna' le'e da chawe' da guchebe lazra' lau David." <sup>35</sup> Cá'anqueze dxenné' xetú lu salmo: "Quebe gu'u lataj guzru bė-la' dxen chee wen zrin chiu', bi nazri'ite lazru'." <sup>36</sup> Da li David bene' zrin chee benne' ca' zaj zre'e gate zua le', ca gunná be'e Dios le', san ca gudé na' gutie', na' bulucache' le' naga belegache xra xrtawe' ca', na' guzru bė-la' dxen chee'. <sup>37</sup> Quebe guzru bė-la' dxen chee Bėnnea' bsebán Dios Le'. <sup>38</sup> Biche ljwezra', dxuzenda' le'e, dxal-la' nézele Dios gunitę lawe' chee dul-la chee ne chee Jesús. <sup>39</sup> Ne chee Le', xúgute benne' dxeleajli lazre' Le', Dios dxunitę lawe' chee benne' ca' ca naca xúgute da quebe guca gunitę lawe' chee' lácala belune' ca naca da bdxixruj be'e Moisés. <sup>40</sup> Le guxúe xanne' cuínale chee quebe gaca chee ca naca da buluzúaj

benne' ca' buluchálaje' waláz chee Dios, gate gulenné':

<sup>41</sup>Le nna', le'e, benne' wen la, ne le xebane, ne le xenite, lawe' da guna' neda', Dios chee, lu zra chee, lu zra chee, tu da naca da zrente, da quebe chéajlele lácala nu guzén le'e.

<sup>42</sup>Gate Pablo ne benne' ljwezre' ca' belexedxúaje' lu xudau' chee judío ca', na' benne' ca' quebe zaj nálaje' judío gulenabe' le' guchálajlene' le' chee da caní gate zrin xetú zra dxulupáne'. <sup>43</sup>Gate belexedxúaje' lu xudau' na', benne' zan benne' judío ca', ne benne' ca' belexaque' judío, ne dxelune' da naca chee Dios, xjácálene' Pablo ne Bernabé. Gubáz caní buluzéajni'ine' benne' ca' dxal-la' xelezúa chache' lu xel-la' zri'i lazre' chee Dios.

<sup>44</sup>Guledé xrunu' zra gate naca zra dxulupáne', belezraga ca' nácaqueze benne' zaj zre' chee zrente na' chee xelenne' dizra' chee Dios. <sup>45</sup>Gate benne' judío ca' belelé'ene' benne' zante zaj nazrague' na', na' be-laque' xa lazre' ne gulezú lawe' dxelenné' chee da dxenná Pablo, ne gulenné' schanni' chee'. <sup>46</sup>Nadxa Pablo ne Bernabé gulenné' du lazre', gulé' chee benne' judío ca':

—Ben na ba xen bzéentu' le'e nedxu dizra' chee Dios, le'e nácale judío, san lawe' da quebe dxaca lázrele xénele, ne da dxunle dxulé'e na quebe naca chee gápale xel-la' nabán zeajlí canna, chee le' na' chéajntu' na'a chálajlentu' benne' quebe zaj naque' judío. <sup>47</sup>Caní guntu' lawe' da caní gunná bea Xránadxu gate gunné':

Bzua' Lue' ca tu xi' da gusení na benne' xezr la xu ca', ne chee gacu' weselá chee bénneache zaj zre' ca naca xezr la xu.

<sup>48</sup>Gate belenne' da nigá, benne' quebe zaj naque' judío gulebé'ene', na' gulezú lawe' dxelenné' xrlátaje naca dizra' chee Xránadxu, na' guléajle xúgute benne' ca' ba nabéaj Dios chee xelape' xel-la' nabán zeajlí canna. <sup>49</sup>Ca' guca, bziriluj dizra' chee Dios du ca naca lu xezre ca' zaj nababa na'. <sup>50</sup>Benne' judío ca' buluchálajlene' bal-la nu'ula blau ca' zjácálene' da dxulusédene' chee Dios, ne benne' biu blau ca' chee xezre, na' gulegú'u xel-le' benne' ca' chee xeláu zi' xuzre' Pablo, ne Bernabé, ne chee xuluxulage' le' naga nababa na'. <sup>51</sup>Nadxa gubáz

ca' belexebibe' bxrte xu da zeajzria na zrele' da dxulé'e na zaj nabaga benne' ca' zria, na' xjaque' lu xezre Iconio. <sup>52</sup>Gulebé'le' benne' zaj zre' Antioquia na', benne' dxeléajle' chee Jesús, zúale Be' Lá'azxa le'.

## 14

*Da belún Pablo ne Bernabé lu xezre Iconio*

<sup>1</sup>Gate belezrin Pablo ne Bernabé xezre Iconio, na' belú'e tu zrente lu xudau' chee judío ca', na' ca buluchálaje' dizra' chee Dios, benne' zante guléajle' chee Jesús, benne' judío ca', ne benne' quebe zaj naque' judío. <sup>2</sup>Nadxa benne' judío ca', benne' quebe dxeléajle' chee Jesús belegú'u xel-le' benne' quebe zaj naque' judío chee xelecuídene' biche ljwézredxu ca'. <sup>3</sup>Lácala belune' caní, benne' gubáz ca' gulezúaqueze' na' zane' zra, ne du lazre' buluchálaje' dizra' chee Dios, dxuluxrén lazre' Xránadxu, na' Xránadxu bzua chúchue' ca da dxelenná benne' gubáz ca' ca naca xel-la' zri'i lazre' chee Dios, na' Le' bnézruje' gubáz ca' xel-la' dxenná bea xelune' xel-la' waca ca' chee xabáa ne da dxelunna bea na naca da li da dxelenné'. <sup>4</sup>Benne' ca' zaj zre' chee zrente na' gulaque' chupa la'a. Bal-le' beledé' judío ca', na' xebal-le' beledé' gubáz ca' chee Jesús. <sup>5</sup>Nadxa benne' judío ca', ne benne' quebe zaj naque' judío belune' tuze dizra' nen benne' xu'u lawe' ca' chee gulenné' schanni' chee benne' gubáz ca', na' gulaca lazre' xuluzríe' le' xiaj. <sup>6</sup>Pablo ne Bernabé, gate belenne' ca', buluzrúnnaje' zjaque' naga zaj dxe' xezre Listra, ne xezre Derbe, da zaj nababa Licaonia, na' guledé' ca naca xézredu ca' chee xezre ca' zaj nababa na', <sup>7</sup>na' buluchálaje' na' ca naca dizra' chawe' chee Jesús.

*Dxuluzríe' Pablo xiaj lu xezre Listra*

<sup>8</sup>Lu xezre Listra zua tu benne' nazrinnaj ni'e. Dxe'e na' lawe' da gúlaje' nazrinnaj ni'e, ne quebe dxácaqueze se'e. <sup>9</sup>Benne' nigá dxenne' da dxuchalaj Pablo, na' Pablo gunné' chee benne' zrinnaj na', na' guque bé'ene' nape' xel-la' dxeajlí lazre' chee xequaque'. <sup>10</sup>Nadxa Pablo gunné' zizraj:

—Guzé ni'u.

Benne' na' guxase' guzete', na' guzú lawe' dxedé'. <sup>11</sup>Gate belelé'e benne' ca' da ben Pablo, na' gulezú lawe' dxelenné' zizraj nen dizra' walazre' chee benne' Licaonia, dxelenné':

—Dios ca' zaj naca ca bénneache ba belelé'e naga zúadxu.

<sup>12</sup> Dxeleonné' naca Bernabé dios Júpiter, ne naca Pablo dios Mercurio lawe' da dx-uchálajqueze Pablo. <sup>13</sup> Na' bxruze chee dios Júpiter, zua xudau' chee na ca dxú'udxu xezre na', guché'e bezre ca' ne xiaj zaj nuzé'e na du, na' bxruze na', ne benne' zan ca' gulaca lazre' xuluxucá'ana szrene' benne' gubáz ca', ne xelútie' bezr ca' lau benne' gubáz ca' ca dxelúnqueze benne' xezre Listra na' chee dios chee'. <sup>14</sup> Gate guleque be'e Bernabé ne Pablo, benne' gubáz ca', na' gulecheze' zra lané' da dx-ulé'e na dxelezrebe' bi gun Dios, na' gulu'e lávela benne' ca', dxeleonné' zizraj:

<sup>15</sup> —Le'e, benne', ¿bizr chee na' dxunle da nigá? Netu' nácantu' bénneache ca lé'equeze, ne za'ntu' nigá chee xentu' le'e dxal-la' gusanle québedxa gunle da caní da quebe bi zaca na, ne chéajlele chee Dios ban, Bénnea' bene' xabáa ne xezr la xu, ne nísadau', ne xúgute da de lu'ule na. <sup>16</sup> Lu iza da ba guledé Dios be'e lataj xúgute bénneache guledé' lu xrneza cha chee', na' belune' ca da gulaca lazre', <sup>17</sup> lálaca blé'equenze' benne' ca' nu naca Le' ne chee da chawe' da dxune' chee benne' ca'. Le' dxusel-la' xiuj cheedxu ne ca naca lina xrtante, ne dxunne' da dxechínedxu da gágudxu, ne chee bedxu.

<sup>18</sup> Lálaca gulenná gubáz ca' da nigá, gú-calé'e na stebe buluzague' benne' ca' chee quebe xelútie' bezr ca' lau le' chee xuluxucá'ana szrene' le'.

<sup>19</sup> Gudé na' belezrín bal-la benne' judío, benne' Antioquía, ne benne' Iconio, na' belegú'u xel-le' bénneache ca', na' buluzríe' Pablo xiaj. Guléquene' ba belutie' Pablo, na' gulezrube xue' le' belebéajé' le' xezre na'. <sup>20</sup> Gate benne' ca' dxeléajle'e chee Jesús belezrague' zaj naxéchajé' naga de' Pablo, na' bexasa le', ne bexu'e xezre na', na' zra xula bezá'lene' Bernabé, zjaque' xezre Derbe.

<sup>21</sup> Ca gudé bchálaje' dizra' chawe' chee Jesús lu xezre Derbe, naga benne' zante gulezí' lu ne'e dizra' chee Dios, na' gubáz ca' belexedé'e xezre Listra, ne xezre Iconio, ne xezre Antioquía. <sup>22</sup> Lu xezre caní belún chache' lázrdau benne' ca' dxeléajle'e chee Jesús, ne bulusízrene' le' chjácálene' da naca chee Dios, dxelé'e le':

—Benne' xelu'e naga dxenná bea Dios, xel-la' zi' zrente xeledé'e.

<sup>23</sup> La gázqueze buluzúe' benne' gula ca' chee xuluxúe' tu tu cue' benne' ca' dxeléajle'e chee Jesús, na' ca gudé na' buluzré'e benne' ca' lu na' Xránadxu, Bénnea' ba guléajle'e chee'.

*Pablo ne Bernabé dxelexezrine' lu xezre Antioquía da nababa Siria*

<sup>24</sup> Ca gudé na' belexedé'e naga nababa Pisidia, na' belezrine' naga nababa Panfilia. <sup>25</sup> Buluchálaje' dizra' chee Dios lu xezre Perge, na' ca gudé na' xjaque' xezre Atalia. <sup>26</sup> Na' belexúe' da dxedá lawe' nísadau', na' belexezrine' xezre Antioquía, naga zaj zra' benne' belegu'e gubáz ca' lu na' Dios chee xelune' zrin na', da ba belezuene' na'a. <sup>27</sup> Gate belezrine' Antioquía na', na' bulutupe' benne' ca' dxeléajle'e chee Jesús, ne buluzenne' benne' ca' xúgute da ba ben Dios, bchínene' gubáz ca', ne ca ben Xránadxu, be'e benne' quebe zaj naque' judío lataj xeléajle'e chee Jesús. <sup>28</sup> Na' Pablo, ne Bernabé belexegá'ane' na' zane' beu' nen benne' ca' dxeléajle'e chee Jesús.

## 15

*Gubáz ca' chee Jesús dxelexezrague' Jerusalén*

<sup>1</sup> Ca lu zra ca', bal-la benne' gusiá'que' xezre ca' zaj nababa Judea, ne belezrine' xezre Antioquía na', na' gulezú lawe' dx-elé'e biche lfwézredxu ca' dxal-la' chugu late' weaj bela' chee bel-la' dxen chee benne' biu ca' chee xelélé', ca gunná bea Moisés. <sup>2</sup> Pablo ne Bernabé bulutíl-lalé'e le' dizra', na' naga xeajche'te na, biche lfwézredxu ca' buluzúe' Pablo, ne Bernabé, ne xezícala benne' ca' chee chjaque' Jerusalén chee cheajlechálaje' chee da nigá nen benne' gubáz ca', ne benne' gula ca' chee cue' benne' dxeléajle'e chee Jesús zaj zre'e Jerusalén.

<sup>3</sup> Benne' dxeléajle'e chee Jesús, benne' zaj zre'e Antioquía, belexegu'e benne' caní neza, na' belexedé'e xezre ca' zaj nababa Fenicia, ne xezre ca' zaj nababa Samaria, na' dxuluzenne' benne' xézredu ca' ca belún benne' quebe zaj naque' judío, ba belexexaque' chee Dios, na' xúgute biche lfwézredxu belebéle'ene' gate belenne' da nigá.

<sup>4</sup> Gate Pablo ne Bernabé belexezrine' Jerusalén, na' benne' ca' dxeléajle'e chee Jesús ne benne' gubáz ca', ne benne' gula ca' gulezi' lu ne'e le', na' Pablo ne Bernabé buluzenne' le' ca naca da ben Dios lu na' le'. <sup>5</sup> Bal-la benne' fariseo ca', benne' ba guléajle'e chee Jesús, gulezé' gulenné':

—Dxun na ba xen chugu late' weaj bela' chee bel-la' dxen chee benne' biu ca', benne' ba guléajle'e chee Jesús, benne' quebe zaj naque' judío, ne nna be'edxu le' xuluzúe' dizra' da bdxixruj be'e Moisés.

<sup>6</sup> Nadxa belezraga benne' gubáz ca' ne benne' gula ca', benne' dxeléajle'e chee Cristo, chee xulucá'ana chawe' da na' dxaca. <sup>7</sup> Ca gudé buluchálajle' ljwezre' chee da nigá, na' Pedro guxase', ne guzre' benne' ca':

—Biche ljwezra', nézquezle le'e Dios guqu'é neda' nédxute ládujla le'e chee guzenda' benne' quebe zaj naque' judío dizra' chawe' ca naca chee Jesús, chee xeléajle' benne' ca' chee Le'. <sup>8</sup> Dios nézene' ca naca da xu'u lu xichaj lázxdau bènneache, na' blé'ene' dxezi' lu ne'e benne' ca', lawe' da bnézruje' benne' ca' Be' Lá'azxa ca bene' cheedxu dxi'u. <sup>9</sup> Dios quebe dxuché'e ca zrí'ine' tudxu xetudxu lawe' da bca'ana cháwequeze' lázxdau benne' ca' guleajlí lazre' Jesús. <sup>10</sup> Na'a, ¿bizr chee na' dxaca lázrele le'e guchale ca da ba ben Dios, dxuzúale tu xua' lawe' benne' ca' dxeléajle'e chee Jesús, da quebe gaca guádxu dxi'u, ne quebe guca xelúa xra xrtáudxu na? <sup>11</sup> Na'a, dxéajle'dxu dxi'u bache naládxu ne chee xel-la' zri'i lazre' chee Xránádxu Jesús, ne cá'anqueze zaj nalá benne' ca'.

<sup>12</sup> Nadxa xúgute' gulezúa zrie', ne buluzé nague' dxácaté dxuchalaj Pablo ne Bernabé ca naca da ben Dios, bene' da zan da dxelunna bea na naca li xrtizre' nen xel-la' waca ca' da za xabáa, da ca' bene' lu na' Pablo ne Bernabé lávela benne' ca' quebe zaj naque' judío. <sup>13</sup> Gate beuxzre buluchálaje', na' gunná Jacobo:

—Biche ljwezra', le xene chia'. <sup>14</sup> Simón Pedro bzenne' dxi'u ca ben Dios, be'e lataj benne' ca' quebe zaj naca judío xelexexaque' chee' da nedxu lasa, bequ'é'e ládujla benne' ca' bènneache xelexexaque' chee'. <sup>15</sup> Da na' guca naca na tuze nen da buluzúaj benne' ca' buluchálaje' waláz chee Dios, da na' naxúaj na lu xiche chee Dios, dxenné':

<sup>16</sup> Te nigá xelá'a

na' xechisa' ca naca lizre David da nazre'e. Gucá'ana chawa' da nagá'ana chee na, na' xechisaqueza' na,

<sup>17</sup> chee xelaxíaj xúgute' benne' xezica ca' Xrané' Dios,

ne cá'anqueze xelún xúgute' benne' zaj zra' xezr la xu ca',

benne' ca' xelenne' chee La' neda'.

<sup>18</sup> Ca' dxenná Xránádxu, blé'ene' da nigá nédxudaute.

<sup>19</sup> Chee le na' dxapa' le'e quebe dxal-la' gunle zede benne' quebe zaj naque' judío, benne' ca' dxellexaque' chee Dios.

<sup>20</sup> Dxal-la' guzúajntu' chee benne' ca' dxal-la' xulusane' da naca chee bedáu' xaga ca' u bedáu' xiaj, ne quebe dxal-la' xelune' dul-la' chee da dxucá'ana sban bènneache, ne quebe dxal-la' xelawe' bela' chee be xixre', be quebe bdxuaj dxen, ne quebe dxal-la' xelawe' dxen cheeba'. <sup>21</sup> Caní dxal-la' xelune' lawe' da ca ni'i zaj zra' benne' tu tu xezre, benne' dxuluzenne' bènneache ca naca da bdxixruj bea Moisés, da na' dxululabe' lu xudau' ca' chee benne' judío ca' tu tu zra ca' dxulupáne'.

<sup>22</sup> Nadxa benne' gubáz ca', ne benne' gula ca', ne xúgute' benne' dxeléajle'e chee Jesús belune' tuze dizra' xelequ'é'e bal-la benne' ca' ládujla le' ne xelésele' le' le' xezre Antioquia nen Pablo, ne Bernabé. Belequ'é'e Judas, bènnea' léqueze' Barsabás, ne Silas. Chupa benne' caní zaj naque' benne' blau ládujla biche ljwézredxu ca'.

<sup>23</sup> Bulugüé'e benne' ca' tu xiche da dxenná na: "Netu', benne' gubáz zrantu' nigá, ne benne' gula zrantu' nigá, ne biche ljwézrele zrantu' nigá, dxugápantu' le'e diuzre, biche ljwézrentu' quebe nácale judío, zrle xezre Antioquia, ne le'e zrle xezre ca' zaj nababa Siria, ne xezre ca' zaj nababa Cilicia. <sup>24</sup> Ba bémentu' bal-la benne' ba besía'que' nigá, ne quebe nasél-lantu' netu' le', na' belune' le'e zede nen dizra' da buluchálaje', ne belún zréajene' le'e, dxelenné' dxal-la' chugu late' weaj bela' chee bel-la' dxen chee, benne' biu ca', ne chéajlele ca naca da bdxixruj be'e Moisés. <sup>25</sup> Chee le na' dxéquentu' naca xrlátaje cá'antu' bal-la benne' ládujla netu' chee xelélé'e xedajlenné'e le'e nen biche ljwézredxu Bernabé ne Pablo, benne' ca' nazrí'i lázrele'entu'.

<sup>26</sup> Benne' caní belune' zrin chee Xránádxu Jesucristo, xjaque' lu da stebe naga gulaca lazre' bènneache xelútie' le'. <sup>27</sup> Ca' naca

na, dxesél-lantu' naga zúale Judas ne Silas, na' benne' caní xuluchálajlene' le'e ca naca chee da nigá. <sup>28</sup> Guque Be' Lá'azxa xrlátaje, ne cá'anqueze netu' gúquentu' xrlátaje quebe bi xua' guzúantu' lawe' le'e, san da canize dxun na ba xen gunle. <sup>29</sup> Dxal-la' gusanle da naca chee bedáu' xaga, ne bedáu' xiaj ca', ne quebe dxal-la' gunle dulla chee da dxucá'ana sban bènneache, ne quebe dxal-la' gágule bela' chee be xixre', be quebe bdxuaj dxen, ne quebe dxal-la' gágule dxen cheeba'. Che gunle ca naca da nadxixruj bea caní, gunle xrlátaje. Dxenábantu' lau Dios gaca chawe' cheele."

<sup>30</sup> Nadxa benne' ca' gulesel-le' xjaque' xezre Antioquia. Na' buluchague' benne' ca' zaj naque' chee Dios, ne bulunézruje' le' xiche na'. <sup>31</sup> Gate biche ljwézredxu ca' bululabe' na, na' gulebéle'ene' lawe' da dxue zren na le'. <sup>32</sup> Judas ne Silas zaj naque' benne' dxelenné' waláz chee Dios. Chee le' na' buluchálajlene' biche ljwézredxu ca', belúe zrene' le', ne bulutipe' lazre' le'. <sup>33</sup> Gate gudé guca tu chi'i zaj zre'e na', na' benne' bíchedxu ca' buluzé' benne' ca' dizra', ne gulenabe' Dios sua xella' dxebeza zri lazre' nen benne' ca', chee xesí'aque' xelxezrine' naga zaj zra' benne' ca' gulesel-le' le'. <sup>34</sup> Silas gúquene' xrlátaje xegá'ane' na'. <sup>35</sup> Cá'anqueze Pablo, ne Bernabé belexegá'ane' lu xezre Antioquia, na' tu zren nen benne' zandxa gulezúe' dxulusédene' bènneache, ne dxuluchálaje' ca naca dizra' chee Xránadxu.

*Dxezú lau Pablo zéajé' zitu' da gudxupe' lasa guchálaje' chee Jesús*

<sup>36</sup> Ca gudé na', Pablo guzre' Bernabé:

—Xu'u xecha lasa cheajnnadxu biche ljwézredxu ca' zaj zre'e xúgute xezre ca' naga xejchálajdxu dizra' chee Xránadxu, chee cheajnnadxu aja dxaca zaj zre'e.

<sup>37</sup> Bernabé guca lazre' che'e Juan nen le', bi na' léquezebe' Marcos, <sup>38</sup> san Pablo quebe guxáza lazre' che'e-be' lawe' da bsanbe' benne' ca' gate zaj zre'e xezre ca' zaj nababa Panfilia, ne québedxa guxíajlebe' le' lu zrin chee Xránadxu. <sup>39</sup> Na' Pablo, ne Bernabé bulutil-la ljwezre' dizra'. Ca'an guca, belexela'a cha chee'. Bernabé guché'e Marcos, na' gulu'e tu lu da dxedá lawe' nísadau', na' xjaque' Chipre. <sup>40</sup> Na' Pablo guqu'é'e Silas, na' ca gudé biche ljwézredxu ca' belegüe'e

Pablo ne Silas lu na' Xránadxu chee guné' da chawe' chee benne' ca', <sup>41</sup> na' gusiá'que', ne guledé'e xezre ca' zaj nababa Siria, ne xezre ca' zaj nababa Cilicia, na' bulutipe' lazre' bi bíchedxu ca'.

## 16

*Timoteo dxéajlebe' Pablo ne Bernabé*

<sup>1</sup> Pablo ne Silas belezrine' xezre Derbe, ne xezre Listra naga belexezrague' tu benne' cuide' dxéajlebe' chee Jesús, lebe' Timoteo, zri'ine tu nu'ula judío dxéajle'e chee Jesús, san xrabe' naque' benne' griego. <sup>2</sup> Bi bíchedxu zaj zre'e xezre Listra, ne xezre Iconio dxelenné' xrlátaje dxgua dxunbe'. <sup>3</sup> Pablo guca lazre' chéajle Timoteo le', na' guchugue' late' bela' chee bel-la' dxen cheebe' ca dxenná bea da bdxixruj be'e Moisés, chee quebe xelezrá'a benne' judío ca' zaj zre'e naga nababa na lawe' da zaj neze xúgute benne' ca' naca xra Timoteo benne' griego. <sup>4</sup> Lu xúgute xezre naga dxeledé'e buluzenne' benne' bíchedxu ca' ca naca da zaj nadxixruj bea na belún benne' gubáz ca', ne benne' gula ca' zaj zre'e Jerusalén. <sup>5</sup> Ca'an guca bi bíchedxu ca' gulezúa chúchu'e ca dxeleajlé lazre' Jesús, na' benne' ca' dxeléajle'e chee', tu zra tu zra zeajte dxelane'.

*Dxele'e Pablo tu da ble'e Dios le', dxel'é'eng' tu benne' Macedonia*

<sup>6</sup> Be' Lá'azxa quebe be'e benne' gubáz ca' lataj xuluchálaje' dizra' chee Dios naga nababa Asia. Chee le' na' guledé'e naga nababa Frigia, ne xezre ca' zaj nababa Galacia. <sup>7</sup> Belezrine' naga nazraga xezre ca' zaj nababa Misia. Gulaca lazre' chjaque' naga nababa Bitinia, san Be' Lá'azxa chee Jesús quebe be'e le' lataj. <sup>8</sup> Nadxa guledé'e naga nababa Misia, na' belezrine' xezre Troas. <sup>9</sup> Lu xezre na' Pablo blé'ene' tu da ba ble'e Dios le' chizrela, blé'ene' tu benne' biu chee ga nababa Macedonia, ze' dxata' xuene' Pablo, dxenné'; "Gudá Macedonia nigá, gácalenu' netu'." <sup>10</sup> Gate ble'e Pablo da nigá, na' benne' ca', ne neda', Lucas, la gudflajtentu' ájala guntu' chee chéajntu' ga nababa Macedonia lawe' da gúquequezentu' Dios dxenné' netu' chee cheajchálajlentu' benne' ca' dizra' chawe' ca naca chee Jesús.

*Pablo ne Silas dxelezrine' ciudad Filipos*

<sup>11</sup> Lu xezre Troas na' guxú'untu' tu lu da dxedá lawe' nísadau', na' guxéajntu' tu xezr la xu da naxechaj nísadau', nazí le na Samotracia, na' zra xula bzrintu' xezre Neápolis. <sup>12</sup> Beza'ntu' Neápolis, na' bzrintu' xezre Filipos, da naca tu xezre naga zaj zra' benne' Roma, ne naca xezre blau ga nababa Macedonia. Lu xezre na' guzúantu' tu chupa zra. <sup>13</sup> Gate naca zra dxulupá'ana judío ca', na' bdxúajntu' dxu'a xezre na', ne bzrintu' dxu'a xegu naga zaj nabéaje' dxeajlechálajlene' Dios. Gudxe'ntu' na' ne bchálajlentu' nu'ula ca' zaj nazrague' na' ca naca dizra' chawe' ca naca chee Jesús. <sup>14</sup> Tu nu'ula ca' le' Lidia, naque' nu'ula chee xezre Tiatira, nu'ula dxute' ladxe' zaca da naca bzawe. Nu'ula nigá zéajlene' da naca chee Dios, na' benne' cheentu', na' Xránadxu bzani'e lázrdawe' chee guzi' lu ne'e da dxuchalaj Pablo. <sup>15</sup> Na' bdxue nisa nu'ula nigá nen benne' zaj zre'e lizre'. Gudé na' gutá' xuene' netu', gunné':

—Che le'e dxéquele da li dxeajlí lazra' Xránadxu, le da súale lizra'.

Na' bene' ba xuzre begá'anantu' na'.

<sup>16</sup> Tu zra gate zéajntu' naga zeajchálajlentu' Dios, bezrágantu' tu bi nu'ula cuide' xu'ube' be' xriwe', ne dxenné xa'abe' ne chee be' xriwe' na'. Bi nu'ula nigá xú'ube' lu na' benne' ca' dxuluchínene' lebe' xadía, na' xránabe' ca' dxelezíle'e dumí da dx-ezibe', dxenné xa'abe'. <sup>17</sup> Bi nu'ula nigá guzú laube' za'be' cuzru Pablo ne netu', dxennabe' zizraj:

—Benne' caní dxelune' zrin chee Dios szrente, ne dxuluzenne' le'e ájala gunle lala.

<sup>18</sup> Zane' zra benbe' caní cadxa guque Pablo zede, na' bexéchaje', ne guzre' be' xriwe' da xu'ube':

—Lu La Jesucristo dxenná be'eda' lue' xedxúaju' lu bel-la' dxen chee bi nu'ula nigá.

Na' be' xriwe' na' bedxúajte na.

<sup>19</sup> Gate benne' ca' dxuluchínene'-be' xadía guleque bé'ene' québedxa bi xelexezí'e ne cheebe', na' gulél-le' Pablo ne Silas, na' guleché'e benne' caní lau benne' xu'u lawe' naga zua chale'aj xu'u lawe' blau. <sup>20</sup> Na' buluzúe' benne' caní lau benne' xu'u lawe' ca', na' gulenné':

—Benne' caní zaj naque' judío ne dxelún zréajene' benne' zaj zre'e xezre cheedxu, <sup>21</sup> ne dxulusédené' ca naca da zjácálene', da

quebe gaca sidxu, ne quebe gaca gundxu na lawe' da nábabadxu Roma.

<sup>22</sup> Nadxa benne' zaj zre'e xezre na' guledábague' Pablo ne Silas, na' benne' xu'u lawe' na' gulenná be'e xelexéchaje' zra lana Pablo ne Silas, ne xelu'e le' zrise. <sup>23</sup> Ca gudé belúlele'e le', na' buluzré'e le' lizre xia, ne gulenná bé'ene' benne' xu'u lu ne'e lizre xia na' guxúe xánne' benne' ca'. <sup>24</sup> Gate benne' ca' gulenná be'e, na' bzre' ca' le' zane' lézxdxa ne bzre'e ni'a benne' ca' lu xedxu chee cuaga da dxuxru na ni'e.

<sup>25</sup> Gate gula dxela Pablo ne Silas dxuluchálajlene' Dios, ne dxelul-le' da dxelúe lá'ane' Dios, na' xezicadxa benne' zaj zre'e lizre xia dxuluzé nague' chee'. <sup>26</sup> La' na'te guzrú'le'e da bxrize na ca naca lizre xia, na' belexalaj xúgute' dxa xu'u ca', ne belexezeze du xia da zaj nadxéaj ni'a xúgute' benne' ca' zaj zre'e lizre xia. <sup>27</sup> Na' benne' xu'u lu ne'e lizre xia na' bebané', ne gate blé'ene' zaj naxalaj dxa xu'u ca' chee lizre xia, gúlaje' xia chee xute cuine' lawe' da dxéquene' ba buluxuzrúnnaj benne' ca' zaj zre'e lizre xia. <sup>28</sup> Pablo gudxezre xe'e, guzre' le':

—Quebe bi gune cuinu'. Xúgute'ntu' zúantu' nigá.

<sup>29</sup> Nadxa benne' na' xu'u lu ne'e lizre xia gunabe' tu xi', na' guxú'u chégúe', dx-ezrizezeze' xel-la' dxezrebe, na' bzu zribe' lau Pablo ne Silas. <sup>30</sup> Nadxa guléaje' benne' ca' ne bchebe' le':

—Le'e, benne', ¿bizra dxal-la' guna' chee la'?

<sup>31</sup> Benne' ca' belexechébe':

—Guxéajle chee Xránadxu Jesucristo, na' lau', ne cá'anqueze benne' zaj zre'e lizru'.

<sup>32</sup> Na' buluchálajlene' le', ne xúgute' benne' zaj zre'e lizre' ca naca dizra' chee Xránadxu. <sup>33</sup> Lu xela ná'queze benne' na' xu'u lu ne'e lizre xia gudibe' we' chee Pablo ne Silas, na' ca gudé na', le' ne xúgute' benne' zaj zre'e lizre' guledxúe' nisa. <sup>34</sup> Ca gudé na' beche'e Pablo ne Silas lizre', na' bnézruje' da gulawe', na' le' ne benne' zaj zre'e lizre' gulebéle'ene' lawe' da ba guléajle'e chee Dios.

<sup>35</sup> Che zílala benne' xu'u lawe' ca' gulesel-le' bi xra'aga lau benne' na' xu'u lu ne'e lizre xia, ne gulenná bé'ene' le' gusane'

Pablo ne Silas. <sup>36</sup>Nadxa benne' na' xu'u lu ne'e lizre xia guzre' Pablo:

—Benne' xu'u lawe' ca' gulenná bé'ene' neda' gusana' le'e. Na'a waca xedxúajle du lázrele.

<sup>37</sup>Pablo guzre' bi xra'aga ca':

—Netu' nabáantu' Roma, na' belú'e netu' lávela benne' xezre ca', ne quebe ne xuluchí'e cheentu', na' buluzré'e netu' lizre xia. Na'a ¿dxeléquene' xulusane' netu' bagácheze? Quebe gaca. Xelída léqueze' xelexebéaje' netu'.

<sup>38</sup>Bi xra'aga ca' xejlexezénnebe' benne' xu'u lawe' ca', na' benne' caní belezrebe' gate guleque bé'ene' Pablo ne Silas zaj nababe' Roma. <sup>39</sup>Na' xjaque' lizre xia na', ne gulenabe' Pablo ne Silas xelexí zrene' chee'. Nadxa belexebéaje' le', ne gulata' xuene' le' xelexedxúaje' xezre na'. <sup>40</sup>Gate Pablo ne Silas belexedxúaje' lizre xia na', na' xjaque' lizre Lidia, na' ca' gudé bulucháaljlene' biche ljwézredxu ca', ne bulutipe' lazre', na' besía'que'.

## 17

*Benne' zaj zré'e xezre Tesalónica dxeledábague' Pablo*

<sup>1</sup>Nadxa Pablo ne Silas guledé'e xezre Anfípolis, ne xezre Apolonia, na' belezrine' xezre Tesalónica, naga zua tu xudau' chee judío ca'. <sup>2</sup>Pablo guxíaje' xudau' na', na' ca' dxúnqueze' bchálajlene' benne' ca' tu tu zra dxulupá'ane' du chunna da gazre zra. <sup>3</sup>Ca da naxúaj na lu xiche chee Dios, bzéajni'ine' le' ben na ba xen Cristo guzí guzaque', ne gutié', na' ca' gudé na' ben na ba xen bebane' ládujla benne' gate. Na' guzre' benne' ca':

—Jesús nigáqueze, bénnea' dxuzenda' le'e chee', naque' Cristo, Bénnea' guchebe lazre' Dios sel-le'.

<sup>4</sup>Nadxa bal-la benne' judío ca' guléajle'e chee Jesús, ne gulaque' tuze Pablo ne Silas. La gázqueze guléajle' benne' zan benne' griego, ne nu'ula zan zaj naque' nu'ula blau. <sup>5</sup>Benne' judío ca', benne' quebe dxeléajle'e chee Jesús gulaque' xa lazre' chee Pablo, na' buluchague' bal-la benne' ca' dxelune' da calela dxeledaze', ne bulutupa ljwezre', na' buluzúe' stébe ca naca benne' xezre. Gulu'e xadía lizre Jasón, dxelexíflaje' Pablo ne Silas, chee xelexebéaje' le', ne xuludé'e le' lu na' benne' xezre ca'. <sup>6</sup>Gate quebe belexezrelne'

Pablo ne Silas lu xu'u na', nadxa beleché'e xadía Jasón ne xebal-la biche ljwézredxu ca' lau benne' xu'u lawe' ca' chee xezre, na' dxelebezre xé'e, dxelenné':

—Benne' ca', benne' ba belún zréajene' ca naca benne' zaj zré'e xezre la xu, cá'anqueze ba belelé'e nigá. <sup>7</sup>Jasón nigá ba gulu'e benne' ca' lizre'. Ca naca benne' ca' dxeledábague' da bdxixruj bea César lawe' da dxelenné' zua xetú wenná bea, tu benne' le' Jesús.

<sup>8</sup>Gate belenne' da caní, na' benne' xezre ca', ne benne' xu'u lawe' ca' gulezúe' stébe. <sup>9</sup>Jasón, ne biche ljwézredxu ca' bulucá'ane' dumí chee gulezú'e lataj, na' benne' xu'u lawe' ca' bulusané' le'.

*Pablo ne Silas dxelezrine' xezre Berea*

<sup>10</sup>Nadxa biche ljwézredxu gulé'e Pablo ne Silas chee xesi'aque' chizrela, chee chjaque' xezre Berea. Gate belezrine' na', na' belú'e lu xudau' chee judío ca'. <sup>11</sup>Benne' judío caní zaj nácadxe' zren lazre' ca benne' Tesalónica ca' lawe' da du lazre' gulezú'e dizra' chee Dios, na' tu zra tu zra dxululabe' lu xiche chee Dios chee xuluxúe' che naca da li da dxelé'e le'. <sup>12</sup>Ca'an guca, benne' zan benne' judío ca' guléajle'e chee Jesús, ne cá'anqueze benne' griego. Benne' zan guléajle'e, nu'ula blau ca', ne benne' biu ca'. <sup>13</sup>Gate benne' judío ca' zaj zré'e xezre Tesalónica guleque bé'ene' dxuchalaj Pablo dizra' chee Dios lu xezre Berea, na' belezrine' na', ne gulegú'u xel-le' bénneache chee xeledábague' Pablo ne Silas. <sup>14</sup>Biche ljwézredxu ca' la gulesél-la'te' Pablo chéaje' dxu'a nísadau', na' Silas ne Timoteo belexegá'ane' lu xezre Berea. <sup>15</sup>Benne' ca' zjácálene' Pablo beleché'e le' lu xezre Atenas. Nadxa benne' ca' belexezrine' lazri'e, ne gulé'e Silas, ne Timoteo chjácázegue' naga zua Pablo.

*Da dxun Pablo lu xezre Atenas*

<sup>16</sup>Dxácate' na' Pablo dxebeze' Silas ne Timoteo naga zue' lu xezre Atenas, na' guzúale'e stébe gate blé'ene' ca naca xezre na', ni' naze nítale'e bedáu' xiaj. <sup>17</sup>Chee le' na' bchálaje' lu xudau' chee judío ca' nen benne' judío ca', ne xezícala benne' ca' zjácálene' da naca chee Dios, na' tu zra tu zra bchálajlene' benne' ca' zaj zré'e lawe' xi'a. <sup>18</sup>Bal-la benne' zjácálene' ca naca da dxuluséde benne' ca' zaj le' benne'

epicureo, ne benne' estoico gulezú lawe' dxuluchálajlene' Pablo. Bal-le' gulenné':

—¿Bizra xega benne' wechalaj nigá dxi'u?

Na' xebal-le' gulenné':

—Dxéquentu' naque' benne' dxuse dizra' chee' dios zitu' ca'.

Ca'an gulenné' lawe' da dxuchalaj Pablo dizra' chawe' ca naca chee' Jesús, ne ca naca chee' xel-la' dxexebán. <sup>19</sup>Nadxa guleché'e Pablo lu lataj nazí le na Areópago, naga dxelezágaqueze' bi xuluzén ljweze'. Na' buluchebe' Pablo:

—¿Waca guzénenu' netu' ca naca da cube nigá da dxusédenu' bènneache? <sup>20</sup>Lue' dxuchálaju' dizra' da quebe ne xénentu', na' dxaca lázrentu' nézentu' bi zéaje ca naca da caní.

<sup>21</sup>Caní gulenné' lawe' da dxuluzé nágaze, ne dxuluchálaje ca naca tu dizra' cube xúgute' benne' Atenas, ne benne' zitu' ca' zaj zre'e xezre na'.

<sup>22</sup>Nadxa Pablo guzé' laduj benne' ca' zaj zre'e Areópago na', na' guzre' le':

—Le'e, benne' Atenas, ca naca xúgute da dxel'é'eda', dxulé'e na dxápale'ele ba lá'ana dios chee'le ca', <sup>23</sup>lawe' da gate gudá neda' gunná'a ca zaj naca xudau' ca' naga dxue lá'anale dios chee'le ca', na' ble'eda' tu xudáudau' naga naxúaj dizra' caní: Chee' Dios Quebe Nu Núnbea. Na'a, Dios na' dxue lá'anale le'e, ne quebe núnbeale Le', chee' Dios na' dxuchálajlene' le'e.

<sup>24</sup>'Naque' Dios na' bene' xezr la xu nigá, ne xúgute da de lawe na. Naque' Xrane xabáa, ne Xrane xezr la xu nigá. Quebe zue' xudau' da nun ni'a na' bènneache. <sup>25</sup>Quebe nachínene' bi da gaca xelún bènneache chee' Le' lawe' da dxunna Dios ná'queze xúgutedxu xel-la' nabán, ne be' da dxeca'adxu, ne xúgute da de.

<sup>26</sup>'Tuze benne' bene' naque' xra xúgute cue' xezr la xu ca' chee' che'e du gabí'i xezr la xu, na' blé'ene' zra, ne lataj naga dxal-la' xelezré'e, <sup>27</sup>chee' xellexilaje' Dios chee' ájala xellexzrelne' Le' lácala quebe xelún-bea xánnie' Le', san da li Dios quebe zue' zitu' naga zua tu tudxu dxi'u. <sup>28</sup>Ne chee' Dios nigá naca bandxu, ne dxedadxu, ne zradxu. Naga ca gulenná bal-la benne' wila chee'le, gulenné': "Nácadxu xrtia Dios." <sup>29</sup>Che nácadxu xrtia Dios, quebe dxal-la' guéquadxu naca Dios ca tu bedáu' oro, u tu bedáu'

plata, u tu bedáu' xiaj, da zaj nun bènneache cáteze dxululaba lázrequeze'. <sup>30</sup>Dios bzue' chalá'ala da belún bènneache ca ni'te lu xel-la' quebe zaj neze chee', san na'a dxenna bé'ene' xúgute' benne' gáteteze zaj zre'e xellexbí'i lazre'. <sup>31</sup>Dios ba nuzúe' tu zra gate guchi'e chee' xúgute' bènneache lu da xrlátaje chee' lu na' tu benne' ba gucá'a Le', na' chee' da nigá bzue' tu da dxunna bea na gate bsebané' bènnea' ládujla benne' gate.

<sup>32</sup>Gate benne' ca' belenne' dizra' nigá ca naca chee' tu benne' bebane' ládujla benne' gate, na' bal-le' belún le' chee', ne xebal-le' gulenné':

—Waca guchálajlenu' netu' ca naca da nigá xetú zra.

<sup>33</sup>Nadxa Pablo bezé'e naga zaj zra' benne' ca'. <sup>34</sup>Bal-la benne' ca' guléajle'e chee' Jesús, na' gulaque' Pablo tuze. Ládujla benne' caní zua Dionisio, benne' naque' tuze nen benne' dxelezrague' Areópago na', ne tu nu'ula le' Dámaris, ne xebal-la benne' ca'.

## 18

### *Pablo dxezrine' xezre Corinto*

<sup>1</sup>Gudé na' bezá Pablo xezre Atenas, bexíaje' xezre Corinto. <sup>2</sup>Lu xezre na' xeajxraque' tu benne' judío le' Aquilo, naque' benne' nababe' tu xezre nababa Ponto. Láteze ba guca belezexrín Aquilo, ne zru'ule' Priscila ga na'. Benne' caní besí'aque' xezr la xu Italia lawe' da gunná bea César Claudio xelaxedxúaj xúgute' benne' judío ca' xezre Roma. Pablo guxíaje' xea-jnné'e Aquilo ne Priscila, <sup>3</sup>na' lawe' da tuze ca naca zrin da dxelún Pablo ne Aquilo, dxeluné' xu'u xide zra be xixre' da dxelútie' chee' benne' dxjaca wedil-la, na' begá'ana Pablo nen benne' caní chee' xeluné' tu zren zrin. <sup>4</sup>Tu zra tu zra gate naca zra dxulupá'ana judío ca', Pablo zéaje' lu xudáudau' chee' judío ca' naga bchálaje', ne blé'ene' benne' ca', benne' judío, ne benne' quebe zaj naque' judío, Jesús naque' Cristo, Bènnea' guchébe lazre' Dios sel-le'.

<sup>5</sup>Gate belezrín Silas, ne Timoteo ga na', gudé belexesí'aque' xezre ca' zaj nababa Macedonia, na' Pablo tu dxuchálajzqueze' dizra' chee' Dios, ne dxulé'ene' benne' judío ca' da li Jesús naque' Cristo, bènnea' nasel-la Dios, bènnea' dxelebeza judío



ca'. <sup>6</sup> Benne' judío ca' gulezú lawe' dx-eledábague' Pablo, ne dxelenné' schanni' chee'. Nadxa Pablo guzribé' gabán chee' da dxulé'e na dxebéaj xíchaje' benne' ca', dxenné':

—Le'e nabágale chee xel-la' gute chee bénnedu xu'ule. Québedxa nabaga' neda' chee na lawe' da ba bzenda' le'e dizra' chawe' chee Cristo. Ná'atela guchálajlena' benne' quebe zaj naque' judío.

<sup>7</sup> Bezé'e lu xudáudau' na', na' bezrine' lizre tu benne' le' Justo, benne' dxucá'ana szrene' Dios ne zua lizre' cuita xudáudau' chee judío ca'. <sup>8</sup> Na' Crispo, benne' xíchaje chee xudáudau' chee judío ca', ne ca naca benne' zaj zre'e lizre' guléajle'e chee Xránadxu. Cá'anqueze benne' zan benne' Corinto, gate belenne' dizra' chee Dios, guléajle'e ne guledxúe' nisa. <sup>9</sup> Nadxa Xránadxu ble'e lawe' Pablo tu zre' tu lu da ble'e Dios le', ne guzre' le':

—Quebe zrebu'. Bchálajteze, ne quebe sua zriu'. <sup>10</sup> Neda' zúalena' lue', na' quebe nu seque' bi gune lue' lawe' da zaj zralé'e benne' zaj naque' chia' lu xezre nigá.

<sup>11</sup> Ca'an guca, begá'ana Pablo tu iza xugachaj lu xezre Corinto, dxusédené' benne' ca' dizra' chee Dios.

<sup>12</sup> Lu zra ca' gate naca Galión benne' xu'u lu ne'e xezr la xu na' naga nababa Acaya, waláz chee Roma, na' benne' judío ca' guledábague' Pablo. Beleché'e le' xu'u lawe', <sup>13</sup> ne gulé'e benne' xu'u lu ne'e xezr la xu na':

—Benne' nigá dxedé' dxegú'u xel-le' bénnearchee chee xelúe lá'ané' Dios, ne xeluné' tu da dxedábaga da nadxixruj bea cheentu'.

<sup>14</sup> Pablo ba zué' guchálaje' gate Galión guzre' benne' judío ca':

—Chela naca na chee tu da dxuzúa chalá'ala da bdxixruj bea César u chee tu da zrinnaj zren, na' gun na ba xen xenda' ca da dxennale le'e, benne' judío. <sup>15</sup> Lawe' da naca na chee dízra'ze, ne chee la tu benne', ne chee da nadxixruj bea na cheézele, le gucá'ana chawe' na lé'equenze, lawe' da quebe dxaca lazra' neda' guchi'e da dxaca chee da ca'.

<sup>16</sup> Nadxa bebéaje' benne' ca' lu xu'u lawe' na'. <sup>17</sup> Nadxa xúgute' benne' griego guléle' Sóstenes, benne' xíchaje chee xudáudau' chee judío ca', ne belú'e le' lau benne' xu'u

lu ne'e xezr la xu na', le' Galión. Galión na' quebe be' lazre'e chee da na'.

*Pablo dxezrine' xezre Antioquia, na' dxezú lawe' zéaje' da guxunne' lasa zéaje' wen zrin chee Cristo*

<sup>18</sup> Pablo begá'ane' xezre na' xezane' zra. Gudé na' bze' biche ljwézredxu ca' dizra', na' guxú'e tu lu da dxedá lawe' nísadau' zéaje' naga nababa Siria tu zren nen Priscila ne Aquilo. Lu xezre Cencrea nédxudxa gate za chu'e lu da dxedá lawe' nísadau', Pablo bzuaté' xídeze xíchaje', da dxunna bea na zua tu da nachebe lazre' guné' lau Dios. <sup>19</sup> Gate belezrine' lu xezre Efeso, Pablo bsané' Priscila ne Aquilo, na' guxíaje' lu xudáudau' chee judío ca', ne bchálajlene' judío ca' zaj nazrague' na'. <sup>20</sup> Benne' ca' gulata' xuene' le' xegá'anadxe' xetú chi'i, na' le' quebe guca lazre'. <sup>21</sup> Nadxa Pablo bze' benne' ca' dizra', dxenné':

—Dxun na ba xen xezrina' sua' Jerusalén chee súaquez' lu laní da ba za'. Welá'aqueza' xedajnná'a le'e che gunna Dios lataj.

Na' guxú'e lu da dxedá lawe' nísadau', ne bezé'e Efeso na'. <sup>22</sup> Gate bezrine' xezre Cesarea, Pablo guxíaje' Jerusalén xeajape' diuzre benne' ca' dxeléajle'e chee Jesús, na' gudé na' guxíaje' xezre Antioquia. <sup>23</sup> Ca gudé guzúe' na' tu chi'i, na' bezé'e na', gudé'e tu tu xézredu ca' zaj nababa Galacia, ne xezre ca' zaj nababa Frigia, dxutipe' lazre' benne' ca' dxeléajle'e chee Jesús.

*Apolos dxuchálaje' dizra' chee Dios lu xezre Efeso*

<sup>24</sup> Ca lu zra ca' tu benne' judío le' Apolos bzrine' lu xezre Efeso, naque' benne' xezre Alejandria, lu xu Egipto. Naque' tu benne' nupá'ale'e xrtizre', ne núnbeale'e da naxúaj na lu xiche chee Dios. <sup>25</sup> Naxéajni'ile'ene' ca naca chee Xránadxu, ne duté lázrdawe' dxuchálaje', dxusédené' cáteze naca chee Jesús, lálala dxusédezene' xel-la' dxuchúa nisa ca ben Juan. <sup>26</sup> Apolos guzú lawe' dxusédené' benne' ca' zaj zre'e xudáudau' chee judío ca' du lazre'. Gate belén Priscila, ne Aquilo chee', na' guleché'e le' chalá'ala, ne buluzéajni'idxene' le' cáteze naca dizra' chee Dios. <sup>27</sup> Ca gudé na', gate guca lazre' Apolos chéaje' naga nababa Acaya, bi bíchedxu ca' bulutipe' lazre', ne buluzuaje' tu xiche chee benne' ca' dxeléajle'e chee

Jesús zaj zře'e xezre ca' zaj nababa Acaya na' chee xezezi' lu ne'e Apolos na'. Gate bzrin le' naga nababa Acaya, gúcalele'ene' benne' ca', na' Dios be'e le' lataj guléajle'e chee Jesús. <sup>28</sup> Apolos blé'ene' lau xúgute benne' ca' ca dxeleque zréaje benne' judío ca', ne blé'ene' ne chee da naxúaj na lu xiche chee Dios Jesús naque' Cristo, Bénnea' nase-la Dios, Bénnea' dxelebeza judío ca'.

## 19

*Pablo dxezrine' xezre Efeso*

<sup>1</sup> Dxácate zua Apolos lu xezre Corinto, na' gudé Pablo xézredu ca' zaj dxe' laduj xi'a ca', na' bzrine' lu xezre Efeso naga xeajxraque' bal-la benne' dxeléajle'e chee Jesús. <sup>2</sup> Na' bchebe' benne' ca':

—¿Guzi'le le'e Be' Lá'azxa gate guxéajle?

Belexechebe':

—Ne quebe xénentu' che zua Be' Lá'azxa.

<sup>3</sup> Nadxa Pablo bchebe' benne' ca':

—¿Bi xel-la' dxedxúá nisa guzi'le le'e?

Benne' ca' belexechebe':

—Xela dxuchúa nisa ca ben Juan.

<sup>4</sup> Na' gunná Pablo, guzre' benne' ca':

—Awe', Juan bchue' nisa benne' ca' belexebi'i lazre', san guzre' benne' ca' dxalla' xeléajle'e chee Bénnea' xide' ca te chee le', da zéaje na, chee Jesús, Bénnea' naque' Cristo, nase-la Dios.

<sup>5</sup> Gate belenne' da nigá, na' beledxúe' nisa lu La Xránadxu Jesús. <sup>6</sup> Gate bze' na' Pablo benne' ca', na' guzúale Be' Lá'azxa le', na' gulenné' dizra' chee benne' zitu' da quebe bulusede', ne buluchálaje' waláz chee Dios. <sup>7</sup> Benne' caní zaj naca chazrinnue'.

<sup>8</sup> Lawe' chunna beu' dxeaj Pablo lu xu'u ca' naga buluzraga judío ca' naga bchálajlene' benne' ca' dizra' chee Dios, ne blé'ene' benne' ca' naca da li da dxuchálaje' ca naca xel-la' dxenná bea chee Dios.

<sup>9</sup> Bal-le' belún zide' lázrdawe', ne quebe gulaca lazre' xeléajle'e chee Jesús, na' gulenné' schanni' chee dizra' chawe' ca naca chee Jesús lávela benne' ca'. Nadxa Pablo bezé'e naga zaj zra' benne' ca', ne guché'e benne' ca' dxeléajle'e chee Jesús lu xu'u ga dxusede' tu benne' le' Tiranno, na' lu xu'u na' bchálajlene' benne' ca' tu zra lu zra. <sup>10</sup> Ca' bene' lawe' chupa iza, na' ca'an guca xúgute benne' zaj zře'e xezre ca' zaj nababa Asia belenne' dizra' chee Xránadxu

Jesús, benne' judío ca', ne benne' quebe zaj naque' judío. <sup>11</sup> Dios bene' xel-la' waca zri'a ca' lu na' Pablo lu zra ca'. <sup>12</sup> Ca'an guca, gulequ'e' ladxe' ca' da dxuchéaj xichaj Pablo, ne ladxe' ca' da bde'e lachu'e, na' belú'e na naga zaj de' benne' we' ca', na' benne' caní belexexaque' ca naca xízrawe' da zaj nape', na' be' xriwe' ca' belexedxúaj na lu bel-la' dxen chee benne' ca'.

<sup>13</sup> Bal-la benne' judío ca', benne' dxeledé' dxelexebéaje' be' xriwe' ca' lu xichaj lázxdau benne' ca', gulaca lazre' xuluchínene' La Xránadxu Jesús chee xelexebéaje' na, na' gulé'e be' xriwe' ca':

—Dxenná bé'entu' le'e xedxúajle lu xichaj lázxdau benne' nigá lu La Jesucristo, Bénnea' dxuchalaj Pablo chee'.

<sup>14</sup> Caní belún gazre benne' zaj naque' zri'ine tu benne' judío le' Esceva, naque' tu benne' xíchaje chee bxruze ca'. <sup>15</sup> Gate belune' caní, be' xriwe' na' bechebe na chee':

—Núnbe'a Jesús, ne nezda' nua' Pablo, san le'e, ¿nuzra le'e?

<sup>16</sup> Gate gunná na da nigá, na' benne' biu na' xu'e be' xriwe' na', guxritie' guzríja che'e benne' ca', na' dute xel-la' wal-la chee' bucule' xúgute benne' ca', na' bé'le'e benne' ca' cadxa buluzrúnnuje' lu xu'u na' gala' xídeze, ne dxelaque' dxen. <sup>17</sup> Xúgute benne' zaj zře'e xezre Efeso, benne' judío ca', ne benne' quebe zaj naque' judío, belenne' ca guca da nigá, na' chee le' na' belezrébele'e, ne bulucá'ana szrene' La Xránadxu Jesús.

<sup>18</sup> Cá'anqueze benne' zan lávela benne' ca' dxeléajle'e chee Jesús belelé'e dxelxurálepé' da caléla da belune', <sup>19</sup> na' benne' zan, benne' belúne' xel-la' wazrá', zaj nu'e xiche chee wazrá', na' buluzezxe' na lau xúgute benne' ca'. Gate bululabe' ca gulezaca xiche ca', na' gulénézene' gulezaca na ca gazxu gaxúa cue' tu gaxúa dumí plata. <sup>20</sup> Ca'an guca, guxíaj bzriluj dizra' chee Xránadxu, ne ble'e na xel-la' waca chee na.

<sup>21</sup> Gudé na' Pablo guca lazre' té'e xézredu ca' zaj nababa Macedonia, ne Acaya, na' te na' chéaje' xezre Jerusalén. Gunné' ca te chéaje' Jerusalén, na' dxal-la' cheajte' xezre Roma. <sup>22</sup> Nadxa gusel-le' chupa benne' dxelácale le', Timoteo ne Erasto, naga nababa

Macedonia, dxácatę begá'ana le' xetú chi'i naga nababa Asia.

*Benne' xęzre Efeso dxeledábage' Pablo*

<sup>23</sup> Ca lu zra na' benne' zan guledábage' dizra' chawe' ca naca cheę Jesús, <sup>24</sup> da na' guca na ne cheę tu benne' le' Demetrio, benne' gubizre plata. Benne' nigá dxune' níchudu ca' da zaj naca plata ca xudau' cheę dios nu'ula le' Diana, na' benne' ca' dxelünlene' le' zrin nigá dxelezi'le'e dumí.

<sup>25</sup> Demetrio na' bchague' benne' caní tu zren nen xezica benne' dxelune' zrin caní, na' guzre' benne' ca':

—Le'e, benne', nézquezle lu zrin nigá dxaca cheędxu da cháwele'e, <sup>26</sup> na' ca' dxel'équezle le'e ne dxenle, Pablo nigá dxedé' dxenné' dios ca' da zaj nun bėnneache quebe zaj naca na dios, na' caní ba bsédene' benne' zan, quegá Efeso nigáze, san du ca nababa Asia. <sup>27</sup> Da nigá nácale'e na stębe cheędxu, lawe' da ca naca zrin cheędxu nigá nazruzre cuía xi na, ne la gaze xudau' cheę dios nu'ula Diana nazruzre nite xel-la' nuzé cheę na, na' caní xegá'ana ditaj ca naca xel-la' szren cheę dios nu'ula, bėnnea' dxelúe lá'ana ca naca benne' zaj zře'e ga nababa Asia, ne du ca naca bėnneache zaj zře'e xęzr la xu.

<sup>28</sup> Gate belenne' da nigá, na' belezrá'alę'e benne' ca', ne gulebezre xę'e, dxelenné':

—¡Ga'ana szren Diana, dios cheędxu, benne' Efeso!

<sup>29</sup> Na' ca naca benne' zaj zře'e xęzre na' guleque zréajene'. Gulele' Gayo, ne Aristarco, benne' Macedonia dxeledálęe' Pablo, na' gulezrube xuę' benne' caní chale'aj xu'u lawe'. <sup>30</sup> Pablo guca lazre' chu'e na' cheę guchálajlene' benne' ca', san bi bíchedxu ca' quebe gulegú'e le' lataj.

<sup>31</sup> Cáp'aqueze bal-la benne' xu'u lawe' cheę xęzre ca' zaj nababa Asia gulesel-le' benne' xęajęzre' Pablo quebe dxal-la' chu'e na'.

<sup>32</sup> Dxácatę na', naga zaj nazraga benne' ca', bal-le' gulebezre xę'e, tu da dxelenné', na' xebal-le' dxelebezre xę'e, dxelenné' da xula, lawe' da beledxé'ena zraga benne' zan, na' benne' zantę quebe zaj nézene' bizr cheę na' zaj nazrague' na'. <sup>33</sup> Nadxa benne' judío ca' buluzúe' Alejandro lau benne' ca' cheę guzėjni'ine' le' ca naca da nigá, na' le' guchisa ne'e cheę xelezúa zri benne' ca' lawe' da guca lazre' guchálajlene' benne' zan ca' da gácale na judío

ca'. <sup>34</sup> Gate benne' zan ca' guleque bé'ene' naque' benne' judío, na' gulebezre xa'a xúgute' ca chupa hora, dxelenné':

—¡Ga'ana szren Diana, dios cheędxu, benne' Efeso!

<sup>35</sup> Nadxa benne' dxuzúaje' ne cheę xęzre na', gate ba bzua zrie' benne' zan ca', gunné':

—Le'e, benne' Efeso. Ca naca bėnneache zaj zra' xęzr la xu nigá zaj nézene' benne' zaj zře'e xęzre Efeso nigá zaj nabague' xuluxúe' xudau' cheę dios nu'ula Diana, ne bedáu' cheę' da bexruij na zran xabáa.

<sup>36</sup> Quebe nu seque' tábaga' da nigá. Cheę le na' le sua zrize, ne quebe bi gunle da quebe ne guxúe xánnele. <sup>37</sup> Benne' caní nache'le nigá quebe bi da calela ne xelune', ne quebe bi schanni' ne xelenné' cheę dios nu'ula cheęle. <sup>38</sup> Che Demetrio, ne benne' ca' dxelune' zrin nen le' dxelaca lazre' xelagu zria cheę tu benne', zaj zra' benne' dxuluchi'e da dxaca, ne zaj zua xu'u lawe' ca' naga gaca xelawe' zría cheę benne' ca'. <sup>39</sup> Na' che le'e bi xetú da ná bale, dxal-la' ná bale na naga zaj nazraga benne' xu'u lawe' ca' dxenná bea da bdxixruj bea César. <sup>40</sup> Na'a zúadxu stębe ga gaze nu gagu zria cheędxu ca naca da bendxu, xelenné' dxedábagadxu xu'u lawe' lawe' da quebe seque' bi xechébedxu che nu gagu zria dxi'u ne cheę da guca na'a.

<sup>41</sup> Ca gudé gunné' da nigá, na' bze' benne' zan ca' dizra'.

## 20

*Pablo dxedé'e ga nababa Macedonia ne Grecia*

<sup>1</sup> Gate gudé guca da stębe na' lu xęzre Efeso, na' Pablo btupe' benne' ca' dxelájle'e cheę Jesús cheę guzėjni'ine' le'. Nadxa bze' benne' ca' dizra', ne bnide' le', na' guzé'e zėjje' xęzre ca' zaj nababa Macedonia. <sup>2</sup> Xęajné'e bíchedxu ca' zaj zře'e xúgute' xęzredu ca', ne btípale'e lazre' benne' ca' ne cheę bizra' da bchálajlene' le'. Ca gudé na' bezrine' naga nababa Grecia. <sup>3</sup> Begá'ane' na' chunna beu', na' gudé na' gate ba zuate' chu'e tu lu da dxedá lawe' nísadau' chėjje' xęzre ca' zaj nababa Siria, guque bé'ene' ba zaj nun judío ca' ca da xelune' cheę'. Cheę le' na' gulú'u bi'e xezé'e ni'e té'e naga nababa Macedonia. <sup>4</sup> Belún le' tuze Sópater, benne' xęzre Berea, ne Aristarco, ne Segundo, benne'

xezre Tesalónica na', ne Gayo, benne' xezre Derbe, ne Timoteo, ne Tíquico, ne Trófimo, benne' ca' chee xezre ca' zaj nababa Asia. <sup>5</sup> Bi bíchedxu caní gulebía lawe' launtu', neda', Lucas, ne xezícadxa ljwezre Pablo, na' gulebeze' netu' lu xezre Troas. <sup>6</sup> Netu', gate gudé laní gate dxelagu benne' judío xeta xtila da quebe nachixre cua zichaj chee na, guxú'untu' tu lu da dxedá lawe' nísadau', na' beza'ntu' xezre Filipos. Zra gazxu' zra na' xeajzrentu' bi bíchedxu ca' lu xezre Troas, naga guzántu' gazre zra.

*Da ben Pablo lu xezre Troas*

<sup>7</sup> Zra nedxu chee da gazre zra bezrántu' chee gáguntu' da dxusá lázredxu ca guca gate gute Xránadxu, na' Pablo bsédene' bi bíchedxu ca'. Ben na ba xen xeza'ntu' zra xula, na' chee le na' bchálajqueze Pablo cadxa bzrinte dxela. <sup>8</sup> Nazrántu' tu xu'u da zua chunna cuía sibe, na' zaj zéle'e xi' da dxulusení na. <sup>9</sup> Tu bi cuide' zríabe' ga dxu'u lení, na' gate Pablo bsetúnnadxe' xrtizre', na' guca wáselé'e bi cuide' na', na' naga xeajcheté na, na' dxásetebe' gubíxrebe' chunna cuía sibe, na' xeajlechise'-be' ba nátebe'. <sup>10</sup> Nadxa betaj Pablo, na' gulégüe' bequé'e-be', ne bnide'-be'. Nadxa guzre' bi bíchedxu ca':

—Quebe zrébele. Nabanbe'.

<sup>11</sup> Nadxa Pablo begüéne' bezrine' chunna cuía sibe na'. Na' bzírzuje' xeta xtila gudawe', na' bezú lawe' dxuchálaje' cadxa guxaní'te. Zra na' bezé'e na'. <sup>12</sup> Nadxa bíchedxu ca' belexeché'e bi na' gubíxrebe' ba bexaca banbe', na' xúgute' gulezúe' lu xel-la' dxeleznén lazre'.

*Pablo dxexeze'e xezre Troas xezrine' xezre Mileto*

<sup>13</sup> Netu' guzría launtu' lau Pablo, na' guxu'untu' lu da dxedá lawe' nísadau', na' bzrintu' xezre Asón naga xezrántu' Pablo ca ba nun le' lawe' da guca lazre' zéaje' ní'aze'. <sup>14</sup> Gate bezrántu' le' lu xezre Asón, na' guxú'e lu da dxedá lawe' nísadau' naga xu'untu', na' guxíajntu' xezre Mitilene. <sup>15</sup> Beza'ntu' na', na' zra xula bedentu' le nna' xezre Quío, na' xetú zra, zra xula bezrintu' lu xezre Samos. Na' guzántu' xezre Trogilio naga bezí' lázrentu', na' zra xula bzrintu' xezre Mileto. <sup>16</sup> Ca' bentu' chee quebe guzre'tecantu' naga nababa Asia. Chee le na' Pablo quebe guca lazre'

chéaje' Efeso lawe' da guca lazre' xezrinze' lu xezre Jerusalén chee sue' na' lu zra Pentecostés che ba guca.

*Pablo dxuchálajene' benne' gula dxeláajle'e chee Jesús, benne' zaj zre'e Efeso*

<sup>17</sup> Ca zrantu' lu xezre Mileto, Pablo gusel-le' tu benne' cheajnné' benne' gula ca' dxeláajle'e chee Jesús zaj zre'e xezre Efeso. <sup>18</sup> Gate belelá' benne' ca', Pablo guzre' le':

—Le'e nézquezle ca bena' neda' xúgute zra ca gudé bla'a ga nababa Asia. <sup>19</sup> Xúgute zra guzúa' lávela le'e dxuna' zrin chee Xránadxu duté xel-la' dxexrux lazre', ne zane' lasa gudxezra, na' gudéa' lu zane' da guzxaca' ca naca da gulaca lazre' benne' judío ca' xelune' chia'. <sup>20</sup> Bchálajlena' le'e xúgute da naca na xrlátaje, ne bsédeda' le'e lávela benne' zan, ne lízquezle. <sup>21</sup> Benne' zaj naque' judío, ne benne' quebe zaj naca judío, gúchequeza' benne' ca' dxalla' xelexebí'i lazre' lau Dios, ne xeláajle'e chee Xránadxu Jesucristo. <sup>22</sup> Na'a zexá'a Jerusalén, ca dxenná be'e Be' Lá'azxa neda', ne quebe nezda' bi gaca chia' na'. <sup>23</sup> Tuze da nezda', lu xúgute xezre ca' naga dxedéa', Be' Lá'azxa dxé'e neda' dxal-la' chu'a lizre xia, ne tea' zane' xel-la' zi'. <sup>24</sup> Quebe dxebe'a gunne xue chee da nigá, ne quebe bi zaca xel-la' nabán chia', san tuze che gaca chéajlena' ca naca da dxuna', ne chee gusexúzrqueza' guna' ca naca da nusebaga Xránadxu Jesús neda', guchálaja' dizra' chawe' ca nazrí'i Dios dxi'u.

<sup>25</sup> Nézquezda' netule le'e, ba bchálajlena' le'e ca dxenná bea Dios, québedxa lé'ele neda'. <sup>26</sup> Chee le na', dxaca lazra' xapa' le'e na'a, quebe nabaga' zria ne chee tule le'e, <sup>27</sup> lawe' da ba bzenda' le'e ca naca da dxaca lazre' Dios guné, ne quebe bi bcá'ana' da quebe bzéajni'ida' le'e. <sup>28</sup> Chee le na', le guxúe cuínale, ne le guxúe ca naca benne' ca' nácale tuze, benne' ca' Be' Lá'azxa ba nuzúe' le'e ládujla le' chee chu'u lu na'le guxuele benne' ca' zaj nazrague' chee Xránadxu, benne' ca' naxá'awene' nen dxen cheéqueze'. <sup>29</sup> Nezda' gate xezá'a neda' xelélé' bal-la benne' xelaca lazre' guzríia xi'e benne' zaj nazraga chee Xránadxu ca dxelún becu' xi'a, be snia ca' dxuluzríia xiba' zrila' ca'. <sup>30</sup> Ládujla le'e welelá' bal-la benne' xulusédene' da wen lazre', ne quegá da li, chee hjácale benne' ca' dxeláajle'e chee Jesús le'. <sup>31</sup> Chee le na', le guxúe

cuínale. Le gusá' lázrele ca bēna' chun iza, te zra ne chizrela quebe bsana' bzéajni'ida' le'e tu tule le'e, ne gudxézreteá'.

<sup>32</sup>Na'a, biche ljwezra', dxuzúa' le'e lu na' Dios, ne lu dizra' chee xel-la' zri'i lazre' chee', da napa na xel-la' waca chee gun na le'e benne' chuchu lazre', ne chee guzúa na le'e lávela xúgute benne' ca' ba guleaj Dios cheéqueze'. <sup>33</sup>Quebe guca lazra' neda' si'a chia' dumí ne zra lana nu benne'. <sup>34</sup>Néquezele le'e ca bēna', bēna' zrin nen ni'a ná'queza' chee guta' da guchín'nedá' neda', ne da gulechinne benne' ca' gulaque' neda' tuze. <sup>35</sup>Blé'equezda' le'e, ca'an dxal-la' gunle zrin chee séquele gácalele benne' dxexazrje. Bsa lázrele xrtizra' Xránadxu Jesús, gate gunné': "Ba neza zrendxa naca na chee benne' dxunezruj, quézcala chee benne' si' lu ne'e."

<sup>36</sup>Ca gudé gunná Pablo da nigá, na' bzu zribe', ne bchálajlene' Dios nen xúgute benne' ca'. <sup>37</sup>Xúgute' gulebezre', na' bulunide', ne bulunupe' Pablo. <sup>38</sup>Belexewí'inele'ene' lawe' da guzre' le' québedxa xelelé'ene' le'. Na' xjácálene' le' naga bexu'e lu da dxedá lawe' nísadau'.

## 21

### *Pablo dxezrine' xezre Jerusalén*

<sup>1</sup>Gate beza'ntu' naga zaj zra' bi bíchedxu ca', na' bexú'untu' lu da dxedá lawe' nísadau', na' bexíajteczentu' naga dxe' xezre Cos, na' zra xula gudentu' naga dxe' xezre Rodas, na' gudé na' bzrintu' xezre Pátara. <sup>2</sup>Lu xezre Pátara xeajxrácantu' tu da dxedá lawe' nísadau' da zeaj na naga nababa Fenicia. Na' guxu'untu' lu da dxedá lawe' nísadau' nigá, na' beza'ntu' na'. <sup>3</sup>Gate gudentu' naga dxe' xezr la xu Chipre, blé'entu' na chala' xéglala, na' bexíajteczentu', bzrintu' lu xezre ca' zaj nababa Siria. Lu xezre Tiro ben na ba xen xuluxuléajé' xua' da nua da dxedá lawe' nísadau' na', na' chee le' na' bzrintu' na'. <sup>4</sup>Na' bezrágantu' benne' ca' dxeléajle'e chee Jesús, benne' zaj zre'e xezre Tiro na', na' begá'anantu' nen benne' ca' gazre zra. Benne' caní, lawe' da bzéajni'i Be' Lá'azxa le' da gaca, gulé'e Pablo quebe dxal-la' chéajé' Jerusalén. <sup>5</sup>Gate gudé guca gazre zra ca', na' zua zeza'ntu' na'. Xúgute benne' ca' dxeléajle'e chee Xránadxu, ne zru'ule' ca', ne bidu chee' ca' gusá'acalene'

netu' bedxúajtentu' xezre na', na' dxu'a nísadau' na' bzu zribentu' bchálajlentu' Dios. <sup>6</sup>Nadxa bze ljwézrentu' dizra', ne bnídate ljwézrentu'. Nadxa bexú'untu' lu da dxedá lawe' nísadau', na' bi bíchedxu ca' belexezrine' lize'.

<sup>7</sup>Beza'ntu' Tiro, gudentu' lu nísadau', ne bzrintentu' xezre Tolemaida, naga bgápantu' bi bíchedxu ca' diuzre, ne begá'anantu' nen benne' ca' tu zra. <sup>8</sup>Zra xula Pablo, ne netu' zralentu' le' bezá'ntu' na', na' bzrintu' xezre Cesarea. Na' bzrintu' lize Felipe, benne' dxedá dxuchálaje' dizra' chee Dios. Naque' tu benne' gazre, benne' ca' buluzúa gubáz ca' xelune' zrin chee Jesús. Begá'anantu' nen benne' nigá. <sup>9</sup>Felipe na' zaj zra' tapa zri'ine' nu'ula quebe ne xuluchaga na'abe', ne dxuluchálajbe' waláz chee Dios. <sup>10</sup>Guzúantu' na' zane' zra gate bla' tu benne' le' Agabo chee xezre ca' zaj nababa Judea. Naque' benne' dxuchálaje' waláz chee Dios. <sup>11</sup>Agabo na' bide' bedajnné'e netu'. Guqué'e bazxu dxu'a le'e chee Pablo, na' bchéajé' na ni'a na' cuine', dxenné':

—Be' Lá'azxa dxenné' judío ca' lu xezre Jerusalén xuluchéaj caní benne' xrane bazxu dxu'a le'e nigá, na' xuludé'e le' lu na' benne' zitu' ca'.

<sup>12</sup>Gate bentu' netu', ne benne' Cesarea da nigá, na' guta' xuentu' Pablo quebe chéajé' Jerusalén. <sup>13</sup>Pablo bechebe':

—¿Bizr chee na' dxebézrele, ne dxuzúale neda' xel-la' dxewí'ine lazre'? Ba zúa'queza', quegá tuze xuluchéaje' neda', san la gázqueze zua' chee gatia' lu xezre Jerusalén ne chee Xránadxu Jesús.

<sup>14</sup>Gate guque bé'entu' quebe séquentu' guzágantu' Pablo, na' québedxa bi gúzrentu' le', dxennantu':

—Gaca ca dxaca lazre' Xránadxu.

<sup>15</sup>Gudé na' bsení'antu' cheentu', na' guxíajntu' Jerusalén. <sup>16</sup>Na' gusiá'acale bal-la benne' netu', benne' Cesarea dxeléajle'e chee Jesús, na' ládujla benne' ca' zua tu benne' Chipre le' Mnason, zane' iza ba zeaj dxéajle'e chee Jesús, na' lize benne' nigá dxal-la' zrintu' súantu'.

### *Pablo zeajnné'e Jacobo*

<sup>17</sup>Gate bzrintu' Jerusalén, bi bíchedxu ca' belezi' lu ne'e netu' duté xel-la' dx-elebé. <sup>18</sup>Zra xula Pablo guxíajlene' netu' xeajnná'ntu' Jacobo, na' zaj zrá'queze na'

xúgute benne' gula ca' dxelájle'e chee Jesús. <sup>19</sup>Pablo bgape' le' diuzre, na' bzenne' benne' ca' tu tu da ben Dios lu na' le' lá-dujla benne' quebe zaj naque' judío. <sup>20</sup>Gate belenne' ca', na' belúe lá'ane' Dios. Nadxa gulé'e Pablo:

—Chawe' naca na, bi bícha'dau'. Dxelé'equezenu' zane gaxúa benne' judío dxelájle'e chee Jesús, na' xúgute' dxelenné' dxun na ba xen chéajlédxu da bdxixruj bea Moisés. <sup>21</sup>Zaj zra' benne' ba gulé'e benne' judío caní lue' dxusédenu' xúgute' benne' judío zaj zre'e zitu' québedxa xelune' ca da gunná be'e Moisés, ne quebe xelechugue' late' béla'dau' chee bel-la' dxen chee bidu biu chee' ca', ne quebe chjácálene' ca naca da zéajlédxu dxi'u dxundxu. <sup>22</sup>¿Ájala dxalla' gundxu? Benne' judío caní welezrague' gate xelenné' ba bla'u. <sup>23</sup>Cháwedxa gunu' da caní: Zaj zra' tapa benne' lówela dxi'u dxal-la' xelune' tu da zaj nachebe lazre' lau Dios. <sup>24</sup>Guché benne' caní chjá'acalene' lue', ne bca'ana chawe' cinu' lau Dios nen benne' caní, na' gudizruj ca naca da dxalla' xelízruje' benne' guchibe' xicha xichaj benne' caní. Ca'an gaca, xúgute' benne' xelegene' bé'ene' quebe naca da li ca da gulenné' chiu', san la gázqueze lue' dxunu' xúgute' ca da dxenná da nadxixruj bea na. <sup>25</sup>Ca naca chee' benne' ca' quebe zaj naque' judío, ba bzúajntu' chee' quebe dxun na ba xen xelune' da caní, san tuze dxal-la' xulusane' da naca chee' bedáu' xiaj xaga ca', ne quebe xelawe' dxen chee' be xixre' ca', ne quebe xelawe' béla' chee' be xixre', be quebe bdxuaj dxen, ne quebe xelune' dul-la chee da dxucá'ana sban bénneache.

*Dxelele' Pablo lu xudau'*

<sup>26</sup>Nadxa Pablo guché'e tapa benne' ca', na' zra xula bca'ana chawe' cuine' lau Dios nen benne' ca', na' belexú'e lu xudau' chee buluzenne' bxruze ca' gate xexuzre zra ca' chee da dxulucá'ana chawe' cuine' lau Dios, gate na' tu' dxal-la' xelegú'e guna'.

<sup>27</sup>Gate ba zua xuzre da gazre zra, na' bal-la judío ca', benne' zá'aca xezre ca' zaj nababa Asia, belelé'ene' Pablo lu xudau' na', na' buluchague' ca naca benne' ca' zaj zre'e na', na' gulebía che'e Pablo. <sup>28</sup>Dxelenné' zizraj:

—Benne' Israel, le gácale netu'. Benne' nigá dxedé' gáteteze dxusédene' xúgute bénneache xuluzúe' chalá'ala xezr la xu

cheedxu, ne da bdxixruj be'e Moisés, ne xudau' nigá, ne ba guzre'e lu xudau' nigá bal-la-benne' griego. Dxucá'ana dítajé' lataj lá'azxa nigá.

<sup>29</sup>Caní gulenné' lawe' da ba belelé'ene' Pablo lu xezre na' nen Trófimo, tu benne' xezre Efeso, na' dxeléquene' gulú'u Pablo le' lu xudau'.

<sup>30</sup>Ca naca benne' zaj zre'e xezre na' beledxé'ena zrague', ne zá'aca chégüe'. Nadxa gulel-le' Pablo, ne gulezrube xue' le' chale'aj xudau' na', na' bulusézxuje' dxa xu'u chee na. <sup>31</sup>Ba zuate xelútie' Pablo gate benne' Roma dxenná be'e lu wedil-la-benne' ba dxeledxé'ena zraga ca naca benne' zaj zre'e xezre Jerusalén. <sup>32</sup>Nadxa benne' nigá bchague' benne' dxjaque' wedil-la-nen benne' dxenná bé'ene' le', na' xjaca chégüe' naga zaj nazraga benne' zan ca'. Gate benne' ca' belelé'ene' benne' na' dxenná be'e lu wedil-la, na' bulusane' québedxa buluzálaje' Pablo. <sup>33</sup>Nadxa gubiga' benne' na' dxenná be'e lu wedil-la, na' gudél-le' Pablo, ne gunná bé'ene' xuluchéaje' le' chupa du xia. Gudé na' bchebe' benne' ca' nua' benne' nigá, ne bi ba bene'. <sup>34</sup>Benne' ca' gulebezre xe'e da zan da gulenné'. Ca'an guca benne' dxenná be'e lu wedil-la quebe bi guxéajni'ine' lawe' da dxelúnle'e schaga'. Nadxa gunná bé'ene' xeleché'e Pablo xu'u naga zaj zra' benne' dxjaque' wedil-la, benne' zan ca'. <sup>35</sup>Gate bezreine' dxa xu'u naga zaj zra' benne' dxjaque' wedil-la, na' benne' dxjaque' wedil-la belexú'e Pablo lu na'ze' lawe' da dxelúele'e benne' zan ca' Pablo, <sup>36</sup>na' xúgute' zá'aque' cuzre na' dxelenné' zizraj:

—Gate bénnea'.

*Pablo dxexechébe' lau benne' zan ca'*

<sup>37</sup>Gate dxelegú'e Pablo lu xu'u naga zaj zra' benne' dxjaque' wedil-la, le' guzre' benne' na' dxenná bé'ene' le':

—¿Waca bi nnia'?

Na' bchebe bénnea' le':

—¿Waca nneu' dizra' griego? <sup>38</sup>¿Quebe nacu' lue' benne' Egipto na' ba zeaj tu chupa iza btupe' benne' ca' guledábague' xu'u lawe', na' guché'e tapa gaxúa benne' dxelutie' benne', xeajzré'e le' le'e xixre' lawe' lataj?

<sup>39</sup>Nadxa Pablo guzre' benne' na':

—Neda' naca' benne' judío, ne nababa' tu xezre blau chee ga nababa Cilicia.

Ben culuén gunu' neda' lataj guchálajlęna' benne' zan caní.

<sup>40</sup>Benne' na' be'ę le' lataj, na' Pablo guzė' lachila cheę xu'u na', na' guchisa ne'ę cheę xelexúa zri benne' zan ca'. Gate guxdé' zri, na' bchálajlęne' le' dizra' hebreo, dxenné':

## 22

<sup>1</sup>—Le'e, benne' gula, ne le'e, bi bicha', le xen ca da xapa' le'e da dxexcheba' cheęle.

<sup>2</sup>Gate belenne' dxuchálajlę Pablo le' dizra' hebreo, na' gulezúadxę' zrize, na' Pablo guzre' le':

<sup>3</sup>—Neda' naca' judío. Gúlaja' xęzre Tarso naga nababa Cilicia, na' bgula' Jerusalén nigá, na' Gamaliel bsédene' neda' cáteze naca da nadxixruj bea na cheę xra xrtáudxu ca'. Tu dxue lázrezqueza' dxuna' da naca cheę Dios cáteze dxunle le'e na'a. <sup>4</sup>Nédxute gudáú zi' xuzra' benne' ca' dxelėjajle'ę cheę Jesús, ne bętequeza' bal-le', ne guchę'a benne' biu, ne nu'ula cheę, na' bzra'a le' lizre xia. <sup>5</sup>Bxruze blau, ne xúgute benne' gula sina waca xelexechębequeze' belunne' neda' xiche cheę bi'a na lau bi bíchedxu judío ca' zaj zre'ę xęzre Damasco. Guxá'a na' xęaxedilja' naga zaj zra' benne' ca' dxelėjajle'ę cheę Jesús cheę che'a benne' ca' Jerusalén nigá, cheę xeledé' ba xa'.

<sup>6</sup>Gate zexá'a xu'a neza, ne ba zua zrina' Damasco, ca du wagubizra gúcatite' tu xi' naga zexá'a da za' xabáa. <sup>7</sup>Na' xęajchazia' lu xu, ne benda' chi'i tu benne' guzre' neda': "Saulo, Saulo, ¿bizr cheę na' nau zi' xuzru' neda'?" <sup>8</sup>Nadxa bcheba' le': ¿Núzraqueze lue', Xran? Na' guzre' neda': "Neda' naca' Jesús, benne' Nazaret, bęnnea' nau zi' xuzru' lue'." <sup>9</sup>Benne' ca' zrlęne' neda' belelé'ęne' xi' na', ne belezrebe', san quebe belenne' chi'i bęnnea' gunné' neda'. <sup>10</sup>Nadxa gunná'a: ¿Bi dxal-la' guna', Xran? Na' Xránadxu gunné': "Guxasa, ne guxíajteze Damasco, ga na' zua benne' xelé'ę lue' ca da dxal-la' gunu'." <sup>11</sup>Benne' ca' zjácälęne' neda' belequę'ę na'a zeajntu' Damasco lawe' da bca'ana xi' na' neda' la chul-la.

<sup>12</sup>Zua na' tu benne' le' Ananías, benne' dxunę' du lazre' ca naca da bdxixruj be'e Moisés, na' xúgute benne' judío zaj zre'ę Damasco dxelenné' cháwele'ę ca dxunę'. <sup>13</sup>Ananías na' blę'ę naga zua' neda', na' guzre' neda': "Bicha' Saulo, na'a xe'e'enu'." Lu zra ná'queze belé'etęda', ne ble'eda'

benne' na'. <sup>14</sup>Nadxa guzre' neda': "Dios cheę xra xrtáudxu guquę'ę lue' nédxute cheę gúnbe'u ca naca da dxaca lazre' Le', ne cheę le'enu' Benne' xrlátaje cheę Dios, ne xennu' chi'i Bęnnea'. <sup>15</sup>Lue' guchálaju' da naca cheę Le' lau ca naca bęnneache zaj zre'ę lu xęzr la xu, ne guzennu' benne' ca' ca naca da blé'enu', ne da bennu'. <sup>16</sup>Na'a, ¿bizr cheę na' dxezrenu'?" Guxasa, gudxúa nisa, ne bxren lazre' cheę Xránu' Dios cheę cue' dul-la chiu'."

<sup>17</sup>Gate bezrina' Jerusalén, guxá'a lu xudau' xęajchálajlęna' Dios, na' ble'eda' tu da ble'e Dios neda'. <sup>18</sup>Ble'eda' Xránadxu, na' guzre' neda': "Bdxuajche Jerusalén nigá lawe' da quebe xelexi'ę ca naca da guchálaju' chia'." <sup>19</sup>Nadxa gucha' Le': Xran, zaj nézquezne' guxá'a neda' xúgute xu'u naga dxelezraga judío ca', ne xęajxri'a benne' ca' dxelėjajle'ę chiu', na' bzra'a le' lizre xia, ne bzálajqueza' benne' ca', <sup>20</sup>na' gate belútie' Esteban, benne' węn zrin chiu', na' zęqueza' neda' naca' tuze nen benne' ca' belútie' le'. <sup>21</sup>Xránadxu guzre' neda': "Guxíaj, lawe' da sel-la' lue' zitu' naga zaj zra' benne' quebe zaj naque' judío."

*Da bęn benne' dxenná be'ę lu wedil-la*

<sup>22</sup>Dizra' caní belenne', san lu dizra' nigá gulezú lawe' dxelebezre xę'ę, dxelenné':

—¿Gate benne' nigá! ¿Québedxa dxal-la' gaca banę'!

<sup>23</sup>Na' gulebezre xá'aqueze', ne buluzale' sibe zra lane', ne belequę'ę bxrte xu da buluzalę' sibe. <sup>24</sup>Cheę le' na' benne' na' dxenná be'ę lu wedil-la gunná bé'ęne' xelegú'ę Pablo lu xu'ula, ne xelu'ę le' cheę nne' da li, bizr cheę na' gulebezre xa'a benne' zan ca' cheę le'. <sup>25</sup>Gate bęxuzre buluchęaje' na' Pablo, cheę xelu'ę le', Pablo guzre' tu benne' dxeaje' wedil-la zue' na':

—¿Naca cheęle le'e güele tu benne' nababe' Roma, ne quebe ne guchí'ale aja naca cheę'?

<sup>26</sup>Gate ben benne' dxeaje' wedil-la da nigá, na' guxíaje' xęajezre' benne' dxenná be'ę lu wedil-la:

—Guxúe xánniu' bi na' gunu', lawe' da nababa Roma benne' nigá.

<sup>27</sup>Nadxa benne' nigá gubigue' naga zę Pablo, na' bchebe' le':

—¿Da li na' nababu' Roma?  
Pablo bechebe':

—Awe'.

<sup>28</sup>Na' benne' dxenná be'e lu wedil-la gunné':

—Neda' da zrente gudízruja' chee gubaba' Roma.

Na' Pablo gunné':

—Neda' nabábaqueza' Roma gate gúla-jtea'.

<sup>29</sup>Gate belenne' da nigá, na' benne' ca' ba zaj ze' xelu'e Pablo belexecuase' cuita le', na' la gaze benne' na' dxenná be'e lu wedil-la, gate guque bé'ene' nababa Pablo Roma, bzrebe' lawe' da nuchéaje' le' du xia.

*Pablo dxezrine' lau benne' xu'u lawe' blau ca' chee judío ca'*

<sup>30</sup>Zra xula, benne' na' dxenná be'e lu wedil-la guca lazre' nézene' bi chee na' dxelagu zria judío ca' Pablo, na' bequé'e du xia na' nadxéaj na na' Pablo, na' gunná bé'ene' xelezraga benne' xíchaje' ca' chee bxruze, ne xúgute' benne' xu'u lawe' blau. Nadxa guléaje' Pablo, na' bze' le' lau benne' ca'.

## 23

<sup>1</sup>Pablo gunné'e benne' xu'u lawe' blau ca', na' guzre' le':

—Le'e, bi bicha', ca naca xúgute' da ba bena' neda', zua zri xichaj lázrdawa' lau Dios.

<sup>2</sup>Nadxa Ananías, bxruze blau, gunná bé'ene' benne' zaj ze' na' xelegape' dxu'a Pablo. <sup>3</sup>Na' Pablo bechebe':

—Dios güe'e lue', benne' dxun láweze da xrlátaje. Dxe'u na' chee guchi'u chia' neda' ca dxenná bea da nadxiruj bea Dios. ¿Bizr chee na' dxunu' da dxedábaga da bdxiruje', dxenná be'enu' xelu'e neda'?

<sup>4</sup>Benne' ca' zaj zre'e na' gulé'e Pablo:

—¿Caní schanni' dxennáu' chee bxruze blau chee Dios?

<sup>5</sup>Pablo gunné':

—Le'e, bi bicha', quebe gunezda' che benne' nigá naque' bxruze blau lawe' da dxenná lu xiche chee Dios: Quebe nneu' schanni' chee benne' dxenná be'e lázriu'.

<sup>6</sup>Nadxa guque bé'ene' Pablo bal-le' benne' xu'u lawe' zaj naque' benne' saduceo ca', na' xebal-le' zaj naque' benne' fariseo ca', na' gunné' zizraj:

—Le'e, bi bicha', neda' naca' fariseo, ne xrtia' zaj naue' fariseo ca', na' dxuchi'ale ca naca chia' lawe' da dxebeza lazra' xelexebán benne' gate.

<sup>7</sup>Gate gunná Pablo da nigá, na' benne' fariseo ca', ne benne' saduceo ca' gulezú lawe' dxulutil-la ljwezre' dizra', na' gulaca chupa la'a ca naca benne' ca'. <sup>8</sup>Ca'an guca lawe' da dxelenná saduceo ca' quebe xelexebán benne' gate, ne quebe nu chilá' gubáz chee xabáa ca', ne quebe nu chilá' béenne' du xu'u bénneache, san benne' fariseo ca' dxeléajle'e dxata' xúgute' da ca'. <sup>9</sup>Xúgute' gulebezre xe'e, na' gulezé bal-la benne' dxuluxuzájle'e da nadxiruj bea na, benne' zaj naque' fariseo, na' gulenné':

—Benne' nigá quebe bi da calela ne guné'. Che nu bénnedu xu'u bénneache, u tu gubáz chee xabáa ba gunné' le', quebe dxal-la' nnedxu chee Dios.

<sup>10</sup>Na' bulutil-lale'e ljwezre' dizra', na' benne' na' dxenná be'e lu wedil-la bzrebe' xelél-le' Pablo xuluzúruje' le'. Chee le' na' gunná bé'ene' benne' dxjaca wedil-la xelexebéaje' le' lávela benne' ca', ne xelexeché'e le' lu xu'u na' naga zaj zra' benne' dxjaque' wedil-la.

<sup>11</sup>Xela xula, Xránadxu ble'e lawe' Pablo, na' guzre' le':

—Ben dipa lazru', Pablo, lawe' da ca bchálajquezu' chia' Jerusalén nigá, ca'an dxál-la' queze guchálaju' chia' lu xezre Roma.

*Zaj nun benne' judío ca xelune' xelútie' Pablo*

<sup>12</sup>Zra xula bal-la benne' judío ca' belune' tuze dizra' xelútie' Pablo. Gulenné':

—Dios cu'e dxi'u de' che bi xi'aj gágudxu, ne quebe ne gútedxu Pablo.

<sup>13</sup>Nadé chua benne' biu ca' zaj nachebe lazre' xelune' da nigá. <sup>14</sup>Benne' caní xjaque' lau benne' xíchaje' ca' chee bxruze ca', ne benne' gula sina ca', na' gulenné':

—Netu' ba guchebe lázrentu' lau Dios cu'e netu' de' che bi gáguntu', ne quebe ne gútentu' Pablo. <sup>15</sup>Na'a, le'e, ne xezícadxa benne' xu'u lawe' blau ca' dxal-la' nábale benne' dxenná be'e lu wedil-la xedajlegüe'e Pablo wxre zila laule le'e, xe'e bénnea' dxaca lázrele guchébe xánnele Pablo, na' netu' se' cuásantu' gútentu' le' québela ne xide' nigá.

<sup>16</sup>Zri'ine bi zan Pablo benne' ca naca da nigá, na' guxíajbe' naga zua Pablo chea-jézrebe' le'. <sup>17</sup>Nadxa Pablo gunné' tu benne' xu'u lu ne'e benne' ca' dxjaque' wedil-la, na' guzre' le':



—Guché' bi cuide' nigá lau benne' xícha-je chiu' lawe' da de da dxal-la' xebe' le'.

<sup>18</sup>Na' benne' na' xu'u lu ne'e benne' ca' dxjaque' wedil-la guché'e-be' lau xrané', na' guzre' le':

—Pablo, bénnea' nadxéaje' gunné' neda', na' gunabe' xedajgu'a bi cuide' nigá naga zu' lawe' da de da dxal-la' xebe' lue'.

<sup>19</sup>Benne' xíchaje' na' guqu'é'e na' bi cuide' na', na' guché'e-be' chalá'ala, ne bchebe'-be':

—¿Bi dxaca lazru' xu'u neda'?

<sup>20</sup>Na' gunná bi cuide' na', gúzrebe' le':

—Benne' judío ca' ba zaj nuné' tuze dizra' xelenabe' lue' che'u Pablo wxre zila lau benne' xu'u lawe' blau ca', xelenné' dx-elaca lazre' xuluchebe xánnie' le'. <sup>21</sup>Quebe chéajle'u chee benne' ca' lawe' da nadé chua benne' ca' xelebeze' le' bagácheze, ne ba gulechebe lazre' lau Dios Le' cu'e benne' ca' de' che bi xele'aj xelawe', ne quebe ne xelútie' Pablo. Na'a ba zaj zue' dxelebeze' xrtizru'.

<sup>22</sup>Nadxa benne' xíchaje' na' bze' bi cuide' na' dizra', na' guzre'-be' quebe nu xebe' ba xeaájzebe' le' caní.

*Dxelesel-le' Pablo lau Félix, benne' xu'u lu ne'e xezr la xu na'*

<sup>23</sup>Benne' xíchaje' na' gunné' chupa benne' chee', benne' xu'u lu ne'e benne' ca' dxjaque' wedil-la, na' gunná bé'ene' le' xulucueze' chupa gaxúa benne' dxjaque' wedil-la, benne' sa'aca ni'e, ne ga xun chi benne' dxjaque' wedil-la, benne' xelebia bzrina', ne chupa gaxúa benne' dxjaque' wedil-la, benne' xelu'e xia tunna, chee chjaque' lu xezre Cesarea dxedá' ga chizrela. <sup>24</sup>La gázqueze gunná bé'ene' xulucueze' bzrina' cuía Pablo, ne gunná bé'ene' xeleché'e le' cháwedau' lau Félix, benne' xu'u lu ne'e xezr la xu na' waláz chee Roma. <sup>25</sup>Gusel-le' tu xiche da belúa benne' dxjaque' wedil-la. Caní naxúaj na:

<sup>26</sup>Neda' Claudio, dxugapa' lue' diuzre Félix, benne' xu'u lu na'u xezr la xu nigá.

<sup>27</sup>Benne' judío ca' gulé-lé' benne' nigá ná'tega na'a chee xelútie' le'. Gate gunezda' neda' nababe' Roma, na' guxíajlena' benne' chia' ca', benne' dxjaque' wedil-la, xaexselá' le'. <sup>28</sup>Guca lazra' nezda' bi dxelagu zria le', na' guché'a le' lau benne' xu'u lawe' ca' chee judío ca'. <sup>29</sup>Na' gunezda' dxelagu zria le' da naca chee da nadxixruj bea chee judío

ca', san quebe naca na chee xelútie' le', ne chee chu'e lizre xia. <sup>30</sup>Gate benda' ca ba zaj nun judío ca' chee xelútie' le', na' dxusel-la' le' naga zu', ne ba gucha' benne' ca' dxelagu zria le' waca xelawe' le' zria lau lue'. Gaca xrlátaje chiu'.

<sup>31</sup>Nadxa benne' dxjaque' wedil-la belune' ca' gunná be'e benne' xíchaje chee', na' beleché'e Pablo chizrela, na' belezrine' xezre Antípatris. <sup>32</sup>Zra xula benne' dx-jaca wedil-la, benne' ca' dxeledá' ní'aze, belexezrine' Jerusalén, na' benne' dxjaque' wedil-la zaj zrié' bzrina' beleché'e Pablo naga dxal-la' zrine'. <sup>33</sup>Gate belezrine' xezre Cesarea, na' bulunézruje' benne' xu'u lu ne'e xezr la xu na' xiche na', ne buludé' Pablo lu ne'e. <sup>34</sup>Ca bexuzre blabe' xiche na', na' benne' xu'u lu ne'e xezr la xu na' bchebe' ga benne' Pablo. Gate benne' naque' benne' chee xezre nababa Cilicia, <sup>35</sup>na' guzre' le':

—Guchi'a chee da dxaca chiu' gate xelelá' benne' ca' dxelagu zria lue'.

Nadxa gunná bé'ene' cha benne' dxjaca wedil-la xuluxúe' Pablo naga zua xu'u lawe' chee Herodes.

## 24

*Pablo dxuzri'e dizra' da dxácale na le' lau Félix*

<sup>1</sup>Ca gudé gazxu' zra, Ananías, bxruze blau, bzrine' xezre Cesarea nen bal-la benne' gula sina ca', ne tu benne' dxenné' waláz chee benne' ca', le' Tértulo. Benne' caní belezrine' lau benne' xu'u lu ne'e xezr la xu na' chee xelagu zria Pablo. <sup>2</sup>Gate xea-jlexrí'e Pablo, na' guzú lau Tértulo dxawe' xria Pablo, dxé'e Félix:

—Xcalenu' lue', benne' xu'u lu na'u xezr la xu nigá, lawe' da zúantu' xel-la' dxe-beza zri lazre', na' da chawe' dxgua dx-aca na cheentu', na' ca dxenná be'enu' netu' lu xel-la' sina chiu' dxexedxúaj na chawe'. <sup>3</sup>Xúgute da nigá dxezí'queze lu na'ntu' gáteteze na', ne dxentu' lue' xcalén cuinu', Félix. <sup>4</sup>Chee québedxa guntu' lue' zédete, dxata' xueda' lue' gun zren lazru' xennu' cheentu' tu chí'idau'. <sup>5</sup>Dxenná'antu' benne' nigá dxúnle'e da calela, ne gáteteze na' lu xezr la xu nigá dxune' benne' judío chupa la'a, ne naque' benne' xíchaje chee benne' ca' zaj da' tu benne' Nazaret. <sup>6</sup>Benne' nigá guca lazre' guzúe' chalá'ala xudau' cheentu', na'

netu' gudél-lantu' le', ne guca lázrentu' guchí'antu' da naca chee' ca nadxixruj bea na cheentu'. <sup>7</sup> Na' Lisias, benne' dxenná be'e lu wedil-la, bequ'é le' lu na'ntu' xadía. <sup>8</sup> Na' gunné' che zaj zra benne' xelagu zrie' Le', dxal-la' xelelé'e lau lue'. Lue' gaca guchebu' benne' nigá, na' nézenu' naca da li zria dxáguntu' le'.

<sup>9</sup> Benne' judío ca' zaj zre'e na' gulenné' naca da li xúgute da ca'. <sup>10</sup> Nadxa benne' xu'u lu ne'e xezr la xu na' guchisa ne'e chee guchalaj Pablo, na' gunná Pablo:

—Dxebéle'eda' dxunu' neda' lataj xecheba' lau lue', lawe' da nezda' naca xrlátaje ca dxuchi'u da dxaca chee xezr la xu cheentu' ba zeaj zane' iza. <sup>11</sup> Lué'queze waca chéajni'inu' ba zeaj chazrinnu zraze bla'a Jerusalén chee güe lá'ana' Dios. <sup>12</sup> Quebe belelé'ene' neda' nu gutil-la' dizra', ne quebe nu benne' guché'ena' zraga lu xudau' blau, ne lu xezícala xu'u ca', ne lu neza ca' chee xezre na'. <sup>13</sup> Benne' caní quebe xelezé'quene' xululé'ene' naca da li ca zaj naca da dxelawe' neda' zria. <sup>14</sup> Tu da dxexecheba', dxucá'ana szrena' Dios chee xra xrtáudxu ca', dxuna' ca da dxelenná benne' caní naca na da wen lazre', lawe' da dxéajle'a xúgute da naxúaj na lu xiche chee da nadxixruj bea na, ne chee benne' ca' buluchálaje' waláz chee Dios. <sup>15</sup> Neda' dxebeza lázrqueza' ca da gun Dios, ca dxelebeza lazre' benne' caní, dxebeza lázrentu' Dios gusebane' benne' gate ca', benne' xrlátaje, ne benne' ca' dxelune' da calela. <sup>16</sup> Chee le' na' dxue lazra' sua zri xichaj lázrdawa' lau Dios, ne lau bénneache ca'.

<sup>17</sup> 'Ca gudé gudá' xezre xula ca' zane' iza, na' bezrina' lazria' chee gunézruja' da gácale na benne' xache' ca', ne cu'a guna' lau Dios. <sup>18</sup> Da nigá dxuna' neda' gate balla benne' judío chee xezre ca' zaj nababa Asia belexezraque' neda' lu xudau' ca gudé bca'ana chawe' cuina' cáteze naca da zéajlentu', san quebe nu benne' bchaga', ne quebe nu benne' guché'ena' zraga. <sup>19</sup> Benne' caní dxal-la' xelelé'e nigá chee xelawe' neda' zria che bi zua dxelaca chee' nen neda', <sup>20</sup> san che quebe bi de, na' benne' caní zaj zre'e nigá dxal-la' xelenné' che bi belezrélene' da dxebaga' gate zua' lau benne' xu'u lawe' blau ca' chee judío ca'. <sup>21</sup> Tuze da bəna' gate zua' lau benne' ca',

gunnéa' zizraj; Na'a dxuchi'ale chia' lawe' da dxeajlí lazra' xelexebán benne' gate.

<sup>22</sup> Gate Félix benne' da nigá, na' bca'ane' na cá'aze lawe' da neze xanne' le' ca naca chee benne' ca' dxeléajle'e chee Jesús, na' guzre' benne' ca':

—Gate xida Lisias, benne' dxenná be'e lu wedil-la, na' chéajni'idxada' chee da nigá dxaca cheele.

<sup>23</sup> Nadxa Félix gunná bé'ene' benne' dxenná be'e lu wedil-la, ne benne' ca' dxenná be'ene' xelexegu'e Pablo lu xu'u lawe' na', na' xelu'e le' lataj bi guné', ne xelu'e lataj benne' ljwezre Pablo cheajlenné'e le', ne bi xelune' chee'.

<sup>24</sup> Gudé tu chupa zra Félix belé'e xetú nen zru'ule' Drusila, nu'ula judío, na' gunná bé'ene' bzrin Pablo chee guchálajlene' le' ca naca xel-la' dxeajlí lazre' chee chee Jesucristo. <sup>25</sup> Gate Pablo bchálajlene' le' ca dxal-la' gundxu da xrlátaje, ne nna be'e cuínadxu, na' zrin zra guchi'a Dios chee dxu gate cheajsé chee xezr la xu, na' bzrebe Félix, ne guzre' Pablo:

—Bexíaj na'a. Gate nalátaja', na' mné'queza' lue'.

<sup>26</sup> La gaze dxaca lazre' Félix gunezruj Pablo le' dumí chee gusané' le'. Chee le' na' gunnéle'e Pablo chee guchálajlene' le'. <sup>27</sup> Ca' guca, gudé chupa iza, na' Félix bedxúaje' xrlátaje' ga xu'u lu ne'e xezr la xu na', na' bedé tu benne' le' Porcio Festo waláz chee Félix. Félix bca'ane' Pablo lizre xia lawe' da guca lazre' xegá'ane' chawe' lau judío ca'.

## 25

### *Pablo dxexechébe' lau Festo*

<sup>1</sup> Nadxa Festo bzrine' xezre Cesarea chee si' lu ne'e gaque' benne' xu'u lu ne'e xezr la xu na', na' gate guca chunna zra, guxíaje' Jerusalén. <sup>2</sup> Lu xezre na' belezrín benne' xíchaje ca' chee bxruze ca', ne benne' judío blau ca' lau le', ne gulawe' zria Pablo. <sup>3</sup> Gulata' xuene' benne' xu'u lu ne'e xezr la xu na' sel-le' benne' cheajlexezri'e Pablo chee xezrine' Jerusalén. Benne' judío ca' ba zaj nune' xelútie' Pablo la neza gate zezé'e na'. <sup>4</sup> Bechebe Festo ba xu'u Pablo lizre xia lu xezre Cesarea, na' lé'queze' ba nune' chéaje' na' xetú chupa zra. <sup>5</sup> Na' guzre' benne' ca':

—Benne' ca' zaj zre'e lálwela le'e, benne' zaj nape' xel-la' dxenná bea, dxal-la' chjá-calene' neda' Cesarea, na' che benne' na' zua bi da calela da bene', waca gágule le' zria.

<sup>6</sup>Festo begá'ane' Jerusalén ca du xrunu' ga chi zraze, na' bezrine' Cesarea. Zra xula gudxé'e lataj blau chee', ne gunná bé'ene' xeajlexrí'e Pablo. <sup>7</sup>Gate bzin Pablo lau benne' xu'u lu ne'e xezr la xu na', na' gulebiga judío ca' zá'aca Jerusalén, ne gulágule'e zria Pablo, san quebe guca xululé'ene' naca na da li. <sup>8</sup>Nadxa Pablo bechebe' waláz chee', gunné':

—Neda' quebe bi da calela ne guna', quegá chee' da nadxiruj bea chee' judío ca', ne quegá chee' xudau' chee', ne quegá chee' César.

<sup>9</sup>Festo guca lazre' xegá'ane' xrlátaje lau benne' judío ca', na' bchebe' Pablo:

—¿Dxaca lazru' chéaju' Jerusalén chee' guchi'a neda' ca naca chiu' na'?

<sup>10</sup>Pablo bechebe':

—Zua' lau xu'u lawe' da nuzúa César naga dxal-la' zri'a ca naca chia'. Lue' nézqueznu' quebe bi da zrinnaj ne guna' chee' benne' judío ca'. <sup>11</sup>Che ba bena' tu da zrinnaj da dxun na gútele neda', waca gútele neda'. Che quebe bi de naca na da li ca naca zria da dxelawe' neda', quebe nu napa xel-la' dxenná bea gudé' neda' lu na' benne' ca'. Dxenaba' zri'a chia' lau César.

<sup>12</sup>Ca gudé' bchálajlene' benne' dxuluzéa-jni'i le', na' Festo guzre' Pablo:

—Ba gunabu' zri'a chiu' lau César. Chéaju' lau César.

*Pablo dxezrine' lau Agripa, benne' wenna' bea*

<sup>13</sup>Ca gudé' zane' zra Agripa, benne' wenna' bea, ne bi zane' belezrine' Cesarea chee' xulugape' Festo diuzre. <sup>14</sup>Gulezúe' na' tu chupa zra, na' Festo bzenne' Agripa, benne' wenna' bea na' ca naca chee' Pablo. Guzre' le':

—Zua tu benne' nigá, benne' bca'ana Félix lizre xia. <sup>15</sup>Gate guzúa' xezre Jerusalén, na' benne' xíchaje' ca' chee' bxruze ca', ne benne' gula sina ca' chee' judío ca' gulenné' chee' benne' nigá, ne gulenabe' neda' chuga' chee' gatie'. <sup>16</sup>Neda' becheba' benne' ca', gunniá' benne' xu'u lawe' chee' Roma quebe nu benne' dxechugue' chee' gatie' che quebe zrine'

lau benne' ca' dxelawe' le' zria chee' xechebe' waláz chee'. <sup>17</sup>Chee' le' na', gate belelá' benne' ca' nigá, quebe guzreda', na' zra xula gudxe'a lataj blau chia', ne gunná be'eda' bla' benne' na'. <sup>18</sup>Benne' ca' gulawe' le' zria quebe bi gulenné' chee' ca da gúqueda' neda'. <sup>19</sup>Laze láweze da gulenné' chee' naca na ca naca da dxelájle'e chee' Dios, ne chee' tu benne' le' Jesús, benne' gute, san dxenná Pablo naca bane'. <sup>20</sup>Quebe bezréleda' ájala guna' chee' da na', na' bcheba' Pablo che dxaca lazre' chéaje' Jerusalén chee' zri'a ca naca chee' na'. <sup>21</sup>Nadxa le' gunabe' zri'a chee' lau César Augusto, na' gunná be'eda' xegá'ane' lizre xia cadxa séqueda' sel-la' le' lau César.

<sup>22</sup>Nadxa gunná Agripa, dxé'e Festo:

—La gaze neda' dxaca lazra' xenda' chee' benne' nigá.

Na' bechebe Festo:

—Wxre xennu' chee'.

<sup>23</sup>Zra xula, gate belezrin Agripa, ne Berenice ga na', belú'e lu duté xel-la' szren nen benne' dxenná be'e lu wedil-la, ne benne' blau ca' chee' xezre. Na' Festo gunná bé'ene' xeajlexrí'e Pablo, <sup>24</sup>na' gunné':

—Agripa, benne' wenna' bea, ne le'e, nazrágale nigá nen netu'. Nigá zua benne' na'. Benne' zan, benne' judío zaj zre'e Jerusalén, ne benne' zaj zre'e Cesarea nigá, gulenné' chee' benne' nigá, na' tu gulézqueze' neda' dxal-la' gatie'. <sup>25</sup>Neda' dxéqueda' quebe bi bene' da gudé na le' gatie', san léqueze' gunabe' zri'a chee' lau César. Chee' le' na' ba nuna' chee' sel-la' le' lau César. <sup>26</sup>Quebe bi de da guzúaja' chee' Xrana' César ca naca chee' benne' nigá. Chee' le' na' dxuzúa' benne' nigá laule le'e, ne da naca bláuqueze, dxuzúa' le' lau lue', wenna' bea Agripa, chee' guchebu' le' chee' gata' late' da guzúaja' ca naca chee'. <sup>27</sup>Dxéqueda' quebe naca chawe' sel-la' tu benne' nadxéaje' du xia, ne quebe nnia' bi da zria nape'.

## 26

*Pablo dxexechebe' lau Agripa, benne' wenna' bea*

<sup>1</sup>Nadxa gunná wenna' bea Agripa, guzre' Pablo:

—Waca xechebu'.

Na' Pablo guchisa ne'e, ne guzú lawe' dxuchálaje', dxenné':

<sup>2</sup>—Dxebéle'eda' dxunu' neda' lataj dx-uchálaja' lau lue', wenna' bea Agripa, chee xecheba' ca da gulenná benne' judío chia' neda', <sup>3</sup> ne da naca blaudxa, lawe' da nézqueznu' lue' ca naca da zéajlentu' netu', benne' judío ca', ne ca naca dizra' dxutil-la ljwézrentu'. Chee le' na' dxenaba' lue' xennu' chia' dutę xel-la' zren lazre' chiu'.

<sup>4</sup>Xúgute benne' judío ca' zaj nézene' ca bena' lazria', ne lu xezre Jerusalén gate nácatea' bidau'te. <sup>5</sup>Zaj nézqueze benne' ca', ne waca xelexechębe' che dxelaca lazre', ca nácatea' benne' cuide'te, naca' fariseo. Benne' fariseo ca' zjácaldęe' ca naca chee da dxelájle' judío ca' chee Dios. <sup>6</sup>Na'a lawe' da dxebeza lazra' gusebán Dios benne' gate ca', ca guchebe lazre' chee xra xrtáuntu' ca', benne' ca' buluzúe' neda' lau xu'u lawe'. <sup>7</sup>Dxelebeza lazre' chazrinu' cue' zri'ine zre sua Israel xelexe'ene' gaca ca naca da nigá guchebe lazre' Dios, na' chee le' na' dxulucá'ana szrene' Dios, ne dxelune' zrin chee' te zra ne chizrela. Na'a, wenna' bea Agripa, benne' judío ca' dxelawe' neda' zria lawe' da dxebeza lazra' ca naca da caníqueza da nachebe lazre' Dios. <sup>8</sup>¿Quebe dxéajle'u gusebán Dios benne' gate ca'?

<sup>9</sup>Néda'queza' nédxute gúqueda' da zan da dxal-la' guna' chee benne' ca' dxelájle'e chee Jesús, benne' Nazaret. <sup>10</sup>Caní bena' lu xezre Jerusalén. Lu xel-la' dxenná bea chee benne' xíchaję ca' chee bxruze ca', benne' zan bzra'a lizre xia, benne' dxelá-jle'e chee Jesús, na' gate belútie' benne' ca' neda' bęnqueza' tuze benne' ca' belútie' le'. <sup>11</sup>Zane' lásate bdea' benne' ca' ba xa' chee xulusane' xel-la' dxelejli' lazre' chee'. Caní bena' xúgute lu xu'u ca' naca dxelezraga judío ca', na' lu xel-la' dxezrá'a chia' benne' ca', gudáu zi' xuzra' benne' ca' zaj zre'e lu xezre zitu' ca'.

<sup>12</sup>Chee guna' da nigá zexá'a xezre Damasco, zaj naseł-la benne' xíchaję ca' chee bxruze ca' neda' nen xel-la' dxenná bea chee'. <sup>13</sup>Ca zexá'a xu'a neza na', du wagu-bizra ble'eda' tu xi' da za' xabáa da nácadxa ca xel-la' dxenná' chee gubizra, na' gusení na naga zexá'a neda' nen benne' zjácaleęe' neda'. <sup>14</sup>Nadxa xúgute'ntu' xejacházentu' lu xu, na' benda' chí'i tu benne' gunné' dizra' hebreo, guzre' neda': "Saulo, Saulo, ¿bizr chee na' nau zi' xuzru' neda'?' Lue'ze dxun zi' cuinu' ca dxun bęzre gate dxulíbeba'

lawe' xágala da dxádue'-ba'." <sup>15</sup>Nadxa gun-néa': ¿Nuzra Lue', Xran? na' Xránadxu guzre' neda': "Neda' naca' Jesús, bęnnea' nau zi' xuzru'. <sup>16</sup>Bexasa, guzé, lawe' da ble'e lawa' lue' chee gunu' zrin chia', ne chee xechębu' ca naca da ba blé'enu', ne ca naca da za le'enu' gate te na'a. <sup>17</sup>Guselá' lue' lu na' benne' judío ca', ne lu na' benne' zitu' ca' naga dxusel-la' lue' na'a. <sup>18</sup>Dxusel-la' lue' lau benne' ca' chee sálaju' xiaj lau benne' ca' chee xulusane' da naca chee da chul-la, na' xelune' da naca chee xel-la' naxaní, ne chee xelexedxúaję' lu na' da xriwe', ne xelexú'e lu na' Dios, ne chee xelájle'e chia' neda', na' xunite lau Dios ca naca dul-la chee', ne gaca chee' tu da xelape' lálwela benne' ca' ba gucá'a Dios."

<sup>19</sup>'Ca' guca, wenna' bea Agripa. Bzua' dizra' ca naca da ble'e Dios neda' da naca chee xabáa. <sup>20</sup>Nedxu bchálaja' dizra' chee Dios lau benne' zaj zre'e xezre Damasco, na' gudé na' lau benne' zaj zre'e Jerusalén, ne ca naca naga nababa Judea, ne lau benne' ca' quebe zaj naque' judío. Gucha' benne' ca' dxal-la' xelexebí'i lazre', ne xelexe-aque' chee Dios, na' xelune' da xelunna bea na ca da ba zaj naque'. <sup>21</sup>Chee le' na' benne' judío ca' gulęl-le' neda' lu xudau', ne gulaca lazre' xelútie' neda'. <sup>22</sup>Dios dxá-calene' neda', na' zę chúchuqueza' lu zra na'a zra, dxuchálajlena' xúgute benne' ca naca chee Dios, benne' cá'aze ca', ne benne' blau ca'. Dxapa' benne' ca' tuze ca naca da gulenná benne' ca' buluchálaję' waláz chee Dios, ne da gunná Moisés dxal-la' gaca. <sup>23</sup>Gulenné' Cristo dxal-la' si' saque', na' ca te gatie' dxal-la' xebane' ládujla benne' gate nédxudxa ca xúgute benne' ca', na' gulenné' xelén benne' judío ca', ne benne' quebe zaj naque' judío ca naca chee xel-la' naxaní' chee Dios, da dxul'e na le' ca gaca xelexé'.

*Pablo dxaca lazre' guzėjni'ine' Agripa gaque' benne' chee Cristo*

<sup>24</sup>Gate gunná Pablo da caní, na' gunná zizraj Festo:

—Nadá xichaj lázrda'u, Pablo. Lawe' da dxusédele'u, na' nadá xichaj lázrda'u.

<sup>25</sup>Pablo bechebe':

—Quebe nadá xichaj lázrdawa', dxapa' cuinu' Festo. Da dxennéa' naca na da gaca chéajledxu, ne da li. <sup>26</sup>Nigá zua wenna' bea Agripa. Nézele'ene' ca naca chee da

caní, na' chee le na' dxuchálaja' duté xel-la' dxuxrén lazre' chia' lawe'. Nézquezda' le' nézene' ca naca da nigá lawe' da dxuchálaja' ca naca chee da quebe guca na bagácheze. <sup>27</sup> ¿Dxéajle'u lue', wenná bea Agripa, ca naca da gulenná benne' ca' bu-luchálaje' waláz chee Dios? Nezda' dxéajle'u.

<sup>28</sup>Nadxa gunná Agripa:

—Xeláteze guzéajni'inu' neda' gaca' chee Cristo.

<sup>29</sup>Nadxa gunná Pablo:

—Che xeláteze u che da zrendxa dxen-aba' gun Dios, quegá lue'ze, san cá'anqueze xúgute' benne' dxelenne' chia' na'a, xelaque' ca neda'queza', san quebe xeledxéajle' du xia.

<sup>30</sup>Ca gudé gunná Pablo da nigá, na' gulex-asa wenná bea, ne benne' xu'u lu ne'e xezr la xu na' tu zren nen Berenice, ne xúgute' benne' ca' zaj dxe'e na'. <sup>31</sup>Belexedxúaje' cheeze' chee xuluchálaje' ljwezre' ca naca chee da nigá. Na' gulenné', dxelé' ljwezre':

—Benne' nigá quebe bi da calela ne guné' da gudé na le' gatie', ne quebe dxalla' chu'e lizre xia.

<sup>32</sup>Na' gunná Agripa, guzre' Festo:

—Waca gusandxu benne' nigá chela quebe gunabe' zri'a chee' lau César.

## 27

### *Dxelesel-le' Pablo lu xezre Roma*

<sup>1</sup>Gate ba zaj nuné' xelesel-le' netu' lu xezr la xu Italia, na' Pablo, ne xezícala benne' ca' zaj zre'e lizre xia, buludé'e le' lu na' tu benne' dxenná bé'engé' lu wedil-la le' Julio, benne' yu'u lu ne'e tu cue' benne' dx-jaque' wedil-la nazí le na Benne' Chee Augusto Dxjaque' Wedil-la. <sup>2</sup>Na' guxú'untu' tu lu da dxedá lawe' nísadau' chee xezre Adramitio, da ba zua te na xézredu ca' chee ga nababa Asia. Zúalequeze Aristarco netu', tu benne' xezre Tesalónica chee ga nababa Macedonia. <sup>3</sup>Zra xula bzrintu' xezre Sidón, naga Julio bénle'e da chawe' chee Pablo, na' be'e le' lataj xejnné'e bi bíchexu ca' chee bi beluné' chee'. <sup>4</sup>Gate beza'ntu' xezre Sidón, na' gudentu' naga dxe' xezr la xu Chipre da naxechaj nísadau'. Blé'entu' na chala'a xéglala lawe' da dxaca be' da quebe dxue na da dxedá lawe' nísadau' lataj cheaj na lizra lidau'.

<sup>5</sup>Gudentu' lu nísadau' le nna' xezre ca'

zaj nababa Cilicia, ne Panfilia, na' bzrintu' xezre Mira da nababa Licía.

<sup>6</sup>Lu xezre na' benne' dxenná be'e lu wedil-la bezrague' tu da dxedá lawe' nísadau' chee xezre Alejandria da zezj na xezr la xu Italia, na' bzre'e netu' lawle chee zezajntu' Italia na'. <sup>7</sup>Zane' zra zéajntu' chawe' lazre', na' stébele'e bzrintu' le nna' xezre Gnido. Lawe' da ne za be' na' dxedábaga na da dxedá lawe' nísadau', na' gudentu' le nna' Salmón, ne guxéchajntu' naga dxe' xezr la xu Creta da naxechaj nísadau'. <sup>8</sup>Stébele'e gudentu' chala'ala naga dxe' Creta na', na' bzrintu' tu xézredau' nazí le na Buenos Puertos, da zua gagu naga zua xezre Lasea.

<sup>9</sup>Záne'te zra bnítentu' xu'untu' da dxedá lawe' nísadau' na', na' ba naca stebe zéajntu' lu nísadau' na' lawe' da ba dxexú'udxu beu' zaga. Chee le' na' bzéajni'i Pablo benne' ca'. <sup>10</sup>Dxenné':

—Le'e, benne', dxelé'eda' wácale'e stebe naga zéajdxu na'a, na' wabía xi' da dxedá lawe' nísadau' nigá ne xua da nua na, na' zrúzeté' cuía xidxu dxi'u.

<sup>11</sup>Benne' dxenná be'e lu wedil-la guxéajlédxe' chee xrane da dxedá lawe' nísadau' na', ne chee benne' xu'u na lu ne'e, ca chee Pablo. <sup>12</sup>Na' lawe' da quebe naca lataj na' chawe' súadxu na' beu' zaga ca', na' xúgute' guléquene' nácdaxa chawe' xezá' da dxedá lawe' nísadau' na' chee xexéaj na Fenice, tu xezre chee Creta na', da dxe' chala'a chee xezr la xu Creta naga dxebía gubizra, na' xegá'anadxu na' beu' zaga ca'.

### *Dxaca be' bdunu' lu nísadau'*

<sup>13</sup>Nadxa guzú' lau dxaca lase be' da za' chala'a naga dxedé' gubizra beu' zaga, na' guléquene' waca chéajtezentu' lu nísadau', na' gudentu' gáguze lu xezr la xu Creta na'.

<sup>14</sup>Nadxa chíteze guca guzú' lau dxácale'e be' bdunu' da za' chala'a ga za' be' zaga. <sup>15</sup>Be' na' guzú' lau dxuzriga na chala'ala da dxedá lawe' nísadau' na', na' lawe' da québedxa guca chéajdxantu' naga za' be' na' ben na ba xen bentu' lataj bzriga na da dxedá lawe' nísadau' na'. <sup>16</sup>Na' gudentu' cúzrela tu xezr la xudau' naxechaj nísadau' da nazí le na Clauda, naga québedxa dxácaté na be' na' wal-la, na' stébele'e gúquentu' bcuentu' da dau' da dxedá lawe' nísadau' da nazrube xu da zren na' xu'untu', na' bzuantu' na lu da zren da dxedá lawe' nísadau' na'. <sup>17</sup>Ca

gudé bulucuenē' da dau' na', na' buludéē' du zri'a ca' zran da dxedá lawe' nísadau' na' da xeluxru chacha na. Nadxa, lawe' da belezrebe' chaze da dxedá lawe' nísadau' na' lu xuzre' naga nazí le Sirte, na' bululétaje' ladxe' ca' da dxelecá'a be' lu da dxedá lawe' nísadau' na', na' belúe lataj be' na' bzriga na len. <sup>18</sup> Zra xula, lawe' da ne dxácale'ē be' bđunu', gulezú lawe' dxeledxú'üne' xua ca' lu nísadau', da nua da dxedá lawe' nísadau' na'. <sup>19</sup> Zra guxunne' zra nen ná'quezentu' gudxú'unantu' lu nísadau' da dxuluchínene' cheē da dxedá lawe' nísadau' na'. <sup>20</sup> Zane' zra quebe blé'entu' gubizra ne belaj ca', ne ca naca be' bđunu' zren na' ne dxuzriga na da dxedá lawe' nísadau' na', na' québedxa guleza lázrentu' láquezentu'.

<sup>21</sup> Zane' zra gudentu' quebe ná'guntu', na' guzē Pablo lówela benne' ca', ne gunné':

—Le'e, benne', cháwexa la guca cheēdxu la beñle da gucha' le'e, na' quebe bedxúajdxu lu xēzr la xu Creta, ne quebe bi guque da dxedá lawe' nísadau' nigá, na' xua' da nua na quebe guzrí'a xi'. <sup>22</sup> Na'a, quebe guchebe lázrele. Netudxu dxi'u quebe cuía xidxu, lálaca cuía xi' da dxedá lawe' nísadau' nigá. <sup>23</sup> Ba dxele ble'e lau tu gubáz cheē xabáa cheē Dios neda'. Naca' cheē Dios nigá ne dxuna' zrin cheē'. <sup>24</sup> Gubáz na' guzre' neda': "Quebe zrebu', Pablo, lawe' da dxun na ba xen zrinu' lau César, na' ne chiu' lue' Dios guselé' lu xēla' gute xúgute benne' zaj zra' nen lue' lu da dxedá lawe' nísadau' nigá." <sup>25</sup> Cheē le na', benne', le gun dipa lázrele, lawe' da dxuxrén lazra' Dios, ne nezda' waca ca gunná gubáz cheē xabáa na' bchálajlene' neda'. <sup>26</sup> Na'a dxun na ba xen cheajchaze da dxedá lawe' nísadau' nigá tu lu xēzr la xu da naxečaj nísadau'.

<sup>27</sup> Ca gudé chinu' zra gate naca chizrela, ne zrantu' lu nísadau' nazí le na Adria, na' be' na' dxaca dxuzriga na da dxedá lawe' nísadau' quela ca'ala, na' dxela guleque be'e benne' ca' dxulusá da dxedá lawe' nísadau' na' ba dxezrín na dxu'a xu bizre. <sup>28</sup> Na' buludxixre' cátite situj dxe' nisa na', na' dxe' na galaj esa. Na' xetú chí'idau' gudé buludxixre' da xula, na' dxe' na chinu' ésaze. <sup>29</sup> Belezrebe' cheajtá da dxedá lawe' nísadau' na' xiaj, na' buluzalē' tapa xia da nácale'ē zi'i zran nisa zeaj zranla

da dxedá lawe' nísadau' na', na' gulebeze' chaní' dudxuze dxelezrebe'. <sup>30</sup> Nadxa benne' ca' dxulusá da dxedá lawe' nísadau' na' guléquene' xelixedxúaje' lu da dxedá lawe' nísadau' na', na' gulezú lawe' dxululétaje' da dau' na' zria lawe' da zren na' dxedá lawe' nísadau', dxelune' ca benne' xuluzáladx xia da guxrú na da dxedá lawe' nísadau' zren na' da zeaj laula na. <sup>31</sup> Pablo bzenne' benne' dxenná be'e lu wedil-la, ne benne' dxjaque' wedil-la, dxenné':

—Che quebe xelegá'ana benne' caní lu da dxedá lawe' nísadau', quebe lale le'e.

<sup>32</sup> Nadxa benne' dxjaque' wedil-la gulechugue' du zri'a da nadxéaj da dau' na', na' belú'ē na lataj bexruj na lu nísadau'.

<sup>33</sup> Ca guxaní'sise' bzéajni'i Pablo xúgute benne' ca' dxal-la' xelawe' xeta, gunné':

—Ba zeaj chinu' zra quebe dxásele ne quebe dxágule. <sup>34</sup> Dxata' xueda' le'e gágule. Da nigá dxun na ba xen cheē lale. Netudxu dxi'u quebe cuía xi' netú xicha xíchajdxu.

<sup>35</sup> Ca gunné' caní, Pablo guquē'ē tu xeta xtila, na' guzre' Dios: "Xcalenu'", lau xúgute benne' ca'. Nadxa bzúzruje' na, na' guzú lawe' dxawe'. <sup>36</sup> Nadxa xúgute' belún dipa lazre', na' gulezú lau dxelawe'. <sup>37</sup> Cátite netu' zrantu' lu da dxedá lawe' nísadau' na' nácantu' chupa gaxúa ga xun chinu tuntu'. <sup>38</sup> Ca gudé gulawe' cátite guléljene', na' buluzalē' zrua' xtila lu nísadau' cheē bezrá da dxedá lawe' nísadau' na'.

*Dxebía xi' da zren da dxedá lawe' nísadau'*

<sup>39</sup> Gate guxaní', benne' ca' dxulusá da dxedá lawe' nísadau' na' quebe belexúnbe'ē xēzr la xu na' da zua na le nna' naga zaj zre'ē. Belelé'ene' naga dxexú'u nísadau' gachaj lówela xēzr la xu na', na' dxu'e na' naca lache'. Na' gulaca lazre' xuluxudé' da dxedá lawe' nísadau' laduj na'. <sup>40</sup> Gulechugue' du zri'a ca' zaj nacá'a xia ca', ne bulucá'ane' xia ca' lu nísadau'. Gulesezre' du zri'a da nadxéaj ne'e xaga da dxuzrechaj na da dxedá lawe' nísadau'.

Nadxa gulechise' ladxe' da dxece'á'a be' da zeaj lówela da dxedá lawe' nísadau', na' da dxedá lawe' nísadau' na' guzú lau dxebiga na naga naca lache'. <sup>41</sup> Bzrin na naga dxezraga nisa na' dxupa la'a, na' da dxedá lawe' nísadau' na' guxaze na lu xuzre' da dxe' zran nisa na'. Zeaj lówela da dxedá lawe' nísadau', na' begá'ana na chalásaze lu xuzre' na', ne québedxa gulezéquene'

xuluté' na. Da zeaj zranla guzú lau dxuzruj na lawe' da dxejále'e xeajxruza chee nísadau' na' zran da dxedá lawe' nísadau' na'. <sup>42</sup>Benne' dxjaque' wedil-la gulaca lazre' xelútie' benne' zaj nadxéaje' chee quebe xuluxuzrúnnuje' xelezrúe' lawe' nisa na'. <sup>43</sup>Benne' dxenná be'e lu wedil-la guca lazre' guselé' Pablo, na' quebe be'e lataj benne' dxjaque' wedil-la xelútie' benne' ca'. Na' gunná bé'ene' benne' ca' dxelaque' dx-elezrúe' nisa cheajlexerítie' lu nisa na' chee xelexezrine' lu xu bizre. <sup>44</sup>Benne' ca' xezícala, bal-le' gulequé'e blaga', ne xebal-le' gulequé'e blaga' bizruj chee da dxedá lawe' nísadau' na', na' caní guca, xúgute' belexezrine' lu xu bizre.

## 28

*Da ben Pablo lu xezr la xu na' nazí le na Malta*

<sup>1</sup>Ca gulá xúgudentu', na' gunézentu' xezr la xu na' da naxechaj nísadau' nazí le na Malta. <sup>2</sup>Benne' zaj zre'e na' belún-le'e netu' cháwedau'. Gulebéche'le'e xi' lawe' da dxúnle'e zaga, ne dxaca xiuj, na' gulenné' netu' cheajsentu' dxu'a xi' chee xezré'entu'. <sup>3</sup>Nadxa Pablo guqué'e tu xrunu zruze xaga, na' ca dxuzré'e na lu xi', bedxúaj tu bela' da na' dxuzrúnnujba' lu da la na', na' gudagu xa'aba' na' Pablo. <sup>4</sup>Gate belelé'e benne' ca' zaj zre'e lu xezr la xu na', nal-la' bela' na' na' Pablo, na' gulé ljwezre':

—Benne' nigá naque' wete benne' lawe' da lálcala gulé' lu nísadau', quebe dxue lataj dios na' nazí' i le' Xrlátaje gaca ban le'.

<sup>5</sup>Pablo guzribe' bela' na' lu xi', ne quebe bi gúquene'. <sup>6</sup>Xúgute' gulebeze' chee gata' xi' na' Pablo u che'e gatie'. Ca gudé gulebeze' tu chi'i wal-la, ne belelé'ene' quebe bi gúquene', na' buluché'e ca da dxeléquene', ne gulezú lawe' dxelenné' naca Pablo tu dios.

<sup>7</sup>Gágute' naga zrantu' de xezr la xu chee benne' blau chee xezr la xu na', le' Publio. Benne' nigá guz' lu ne'e netu', ne bxúle'e netu' cháwedau' lawe' chunna zra. <sup>8</sup>Xra Publio deze', quebe chawe' zue', na' xu'e da la, ne dxaque' xizrawe' dxen. Pablo guxíaje' xeajnné'e le', na' ca gudé bchála-jlene' Dios, bze ne'e lawe' le', na' bexaque'. <sup>9</sup>Gate belenne' da nigá, na' benne' ca' xezí-cadxa, benne' we' ca' zaj zre'e xezr la xu na', belezrine' lau Pablo, na' belexaque'.

<sup>10</sup>Gulápale'e netu' ba lánana, na' ca gudé na', gate ba zua chú'untu' da xula tu lu da dxedá lawe' nísadau', belunne' xúgute' da nachínnentu'.

*Pablo dxezrine' xezre Roma*

<sup>11</sup>Ca gudé guca chunna beu' zúantu' lu xezr la xu na', na' bexú'untu' tu lu da dxedá lawe' nísadau' da gudxé' na' na' dxácate' naca beu' zaga ca'. Naca na tu da dxedá lawe' nísadau' chee xezre Alejandría, na' luzrgue da dxedá lawe' nísadau' na' zaj da bedáu' chee dios bi lide' ca' zaj le' Cástor ne Pólux. <sup>12</sup>Bzrintu' dxu'a xezre Siracusa naga begá'anantu' chunna zra. <sup>13</sup>Gate beza'ntu' na', na' gudentu' dxu'a xezr la xu na', ne bzrintu' xezre Regio. Zra xula dxaca be' da za' chalá'a naga dxedé' gu-bizra beu' zaga ca', na' zra gudxupe' zra bzrintu' xezre Puteoli. <sup>14</sup>Lu xezre na' bezrá-gantu' bal-la bi bíchedxu, benne' gulenné' netu' lizre' xegá'analentu' le' xrunu' zra, na' ca gudé na' guza'ntu' ní'antu' zéajntu' Roma. <sup>15</sup>Bi bíchedxu zaj zra' Roma ba belenne' cheentu', na' beledxúaje' xezre na', bedajlechague' netu' tu xézredau' nazí le na Xí'a Chee Apio, na' xebal-le' belexezrague' netu' tu lataj nazí le na Chunna Xú'udau'. Gate ble'e Pablo bi bíchedxu ca', na' guzre' Dios: “Xcalenu”, ne ben dipa lazre'. <sup>16</sup>Gate bzrintu' Roma, benne' dxenná be'e lu wedil-la bdee' benne' zaj nadxéaje' lu na' benne' xíchaje' chee bi xra'aga ca', san be'e lataj Pablo sue' cheeze' nen tu benne' dxéaje' wedil-la, benne' guxúe' le' chee quebe xuzrúnnuje'.

*Pablo dxuchálaje' chee Jesús lu xezre Roma*

<sup>17</sup>Ca gudé chunna zra Pablo gusel-le' benne' xeajnné' benne' judío blau ca' zaj zre'e Roma, na' gate belezrague', guzre' benne' ca':

—Le'e, bi bicha'. Neda' quebe gudábaga' judío ca', ne quebe gudábaga' da xjácale' xra xrtáudxu ca', san benne' judío ca' zaj zre'e Jerusalén buludé'e neda' lu na' benne' Roma ca'. <sup>18</sup>Gate benne' Roma zaj zre'e na' buluchebe' neda', gulaca lazre' xulusane' neda' lawe' da quebe belezrelne' bi da bena' da gun na xelechugue' chia' gatia'. <sup>19</sup>Judío ca' guledábague', na' ben na ba xen gunaba' neda' zri'a chia' lau César. Quebe nacan chee gawa' zria benne' lázredxu. <sup>20</sup>Chee le' na' gunnéa' le'e chee le'eda' le'e, ne

guchálajlęna' le'e lawe' da naca ne chee da dxebeza lázredxu dxi'u, benne' Israel, zua' nigá nadxéaja' xia.

<sup>21</sup> Nadxa gulé'e le':

—Netu' quebe bi xiche ne si' lu na'ntu' da za na Judea ca naca chiu' lue', na' netú bi bíchedxu, benne' judío, benne' ba bele'e nigá bezé'e Judea, quebe bi da caleła dxenné' bęnu'. <sup>22</sup> Dxaca lázrentu' xénetu' ca da dxéquenu' lue' lawe' da nézentu' gáteteze na' dxeleńné' chee benne' ca' dxeléajle'e dizra' cube nigá.

<sup>23</sup> Buluzúe' tu zra gate xelexezrague', na' lu zra na' benne' zan belezrague' naga zua Pablo. Bchálajlęne' benne' ca' ca naca xel-la' dxenná bea chee Dios che zlátęła guxrínnelete. Bęne' ba xuzre guzėjani'ine' benne' ca' ca naca chee Jesús ne chee da bdxixruj be'e Moisés, ne ne chee da buluzúaj benne' ca' buluchálaje' waláz chee Dios. <sup>24</sup> Bal-le' gulezí'e xrtizra' Pablo, san xebal-le' quebe guléajle'e. <sup>25</sup> Quebe belune' tuze dizra', na' gulezú lawe' dxelexedxúaje'. Nadxa gunná Pablo:

—Da li naca da gunná Be' Lá'azxa, guzre' xra xrtáudxu ca' lu dxu'a Isafás, bęnnea' bchalaje' waláz chee Dios, gunné':

<sup>26</sup> Guxíaj, xeajezre benne' ca':

Da li wenle le'e san quebe chėjani'ile.

Da li walé'ele, ne quebe gueque be'ele.

<sup>27</sup> Zaj naca zide' lázxdau benne' caní,

ne quebe dxelenne' chawe'.

Zaj naxezxuj xiaj lawe'

chee quebe xelexé'ene' nen xiaj lawe',

ne quebe xeléne' nen nague',

ne quebe xelėjani'ine' nen lázrdawe',

ne quebe xelexelé'e lawa' neda' chee xex-una' neda' le'.

<sup>28</sup> 'Dxal-la' nézele le'e, na'a ne da za' xel-la' weselá chee Dios guchálajlęntu' benne' quebe zaj naque' judío, na' benne' ca' xelexé'e na.

<sup>29</sup> Gate gunná Pablo da nigá, na' besía'aca judío ca', dxuluchébele'e ljwezre'.

<sup>30</sup> Pablo guzúe' chupa iza lu xu'u da dxízruje', ne dxezí' lu ne'e xúgute benne' dxedajlęné'e le'. <sup>31</sup> Du lazre' bchálaje' ca naca xel-la' dxenná bea chee Dios, ne bsé-dene' ca naca chee Xránadxu Jesucristo, na' netú quebe nu blále' le'.



## DA BZUJ SAN PABLO CHEE BI CHEE CRISTO ZAJ ZRABE' XEZRE ROMA

*Pablo dxugape' diuzre bi chee Cristo zaj zrabé' Roma*

<sup>1</sup> Neda', Pablo, naca' wen zrin chee Jesucristo. Dios bláwizre' neda' chee gaca' gubáz chee', ne guqué'e neda' chee guzenda' bénneache dizra' chawe' chee'.

<sup>2</sup> Dios guchebe lazre' sel-le' dizra' chawe' nigá gate nate lu dizra' lá'azxa chee' lu na' benne' ca' buluchálaje' waláz chee'. <sup>3</sup> Dizra' chawe' nigá dxulé'e na ca naca chee Xrá-nadxu Jesucristo, Zri'ine Dios. Lu belá' dxen chee' naque' zri'ine zre sua wenná bea David. <sup>4</sup> Lu be' nácaqueze' da naca na lá'azxa, naque' Zri'ine Dios. Dios blé'ene' naca caní gate bsebané' Le' ládújla benne' gate ne chee xel-la waca chee'. <sup>5</sup> Ne chee Zrí'ine' Dios nunne' netu' lataj nácantu' gubáz chee' chee xelezrá' benne' ládújla xúgute cue' xezr la xu, benne' xeleajlí lazre' Cristo, ne xuluzúe' dizra' chee' chee gaca ba La Le'. <sup>6</sup> Ládújla benne' caní zrale le'e chee gácale bi chee Jesucristo.

<sup>7</sup> Dxuzúaja' chee xúgutele le'e dxéajle chee Cristo, zrale xezre Roma. Dios nazrí'ine' le'e, ne bláwizre' le'e chee gácale bi cheéqueze'. Dxenaba' Xradxu Dios, ne Xránadxu Jesucristo gune' chawe' chee, ne gunne' le'e xel-la dxebeza zri lazre'.

*Pablo dxaca lazre' chéaje' xezre Roma*

<sup>8</sup> Da naca blaudxa, ne chee Jesucristo dxapa' Dios chia' xcalene' ca naca chee xúgutele lawe' da dxezralaj ca dxeajlí lázrele Cristo du gáb'i xezr la xu. <sup>9</sup> Duté lázrdawa' dxuna' zrin chee Dios, dxuzenda' bénneache dizra' chawe' chee Zrí'ine'. Le' nézquezne' dxeajsá lázrqueza' le'e gate dx-uchálajlena' Le'. <sup>10</sup> Dxata' xúeda' Dios, che naca da dxaca lazre' Le', chee ájala gunne' neda' lataj xedajnná'a le'e <sup>11</sup> lawe' da dxaca lazra' le'eda' le'e ne gunna' le'e lataj si'le da naca chee Be' Lá'azxa, chee se cháchadxale. <sup>12</sup> Caní gutipa lázredxu tudxu xetudxu lu xel-la dxeajlí lazre' cheedxu.

<sup>13</sup> Bi bícha'dau', dxaca lazra' nézele zane' lasa guca lazra' xida' xedajnná'a le'e, san dxácaté ca' dxecuasa na. Dxaca lázrele'a xida' chee guna' zrin gusededa' da naca

chee Cristo ládújla le'e, cáteze ba bēna' ládújla xezcadxa bēnneache zaj zre'e lu xezr la xu nigá. <sup>14</sup> Nabaga' guna' zrin caní ládújla xúgute bēnneache, che zaj naque' benne' blau u ca zaj naque', u che zaj naque' benne' zaj naxéajni'i u ca zaj naque'. <sup>15</sup> Chee le na', neda' ba zúaqueza' guzenda' le'e zrale xezre Roma dizra' chawe' chee Cristo.

*Xel-la waca chee dizra' chawe' chee Cristo*

<sup>16</sup> Quebe dxedué'eda' chee dizra' chawe' chee Cristo lawe' da napa na xel-la waca chee Dios chee guselá na xúgute benne' dxeajlí lazre' le na, nédxula benne' judío ca', san cá' anqueze benne' quebe zaj naque' judío. <sup>17</sup> Dizra' chawe' nigá dxulé'e na dxi'u nagá'anadxu chawe' lau Dios che dxeajlí lázredxu le na, chee cheajlí lázredxu Le' ca naxúaj na lu dizra' lá'azxa, da dxenná na: Benne' nagá'ane' chawe' lau Dios gata' chee' xel-la nabán li lazre' che dxeajlí lazre' Le'.

*Dul-la da zaj nabaga bēnneache*

<sup>18</sup> Ba ble'e Dios lu xabáa chee' ca gune', gudé' xel-la zi' xúgute benne' dxuluzúe' chalá'ala Dios, ne benne' wen da calela, benne' dxuluzague' da li ne chee da calela da dxelune'. <sup>19</sup> Zaj nézquezne' ca gaca xelúnbea bēnneache da naca chee Dios lawe' da Léqueze Dios na' bache blé'ene' na zaca ba lau. <sup>20</sup> Da quebe gaca le'edxu chee Dios gaca gúnbeadxu na ne chee da ca' da ben Dios. Gate bente' xezr la xu dx-unna bea ne nácaqueze Dios, ne nápaqueze' xel-la waca. Chee le na' quebe bi de xuludé'ene'. <sup>21</sup> Lácala zaj núnbe'e ca naca Dios, quebe ne xelape' Le' ba lá'ana ca Dios, ne quebe ne xelé'e Le'; Xcalenu', san dxuludé lazre' da níteze, na' gulechul-la xichaj lázrdawe' lawe' da zaj naque' benne' zide'. <sup>22</sup> Lácala dxeléquene' zaj naxéajni'ine', da li zaj naque' benne' xala, <sup>23</sup> lawe' da buluzúe' chalá'ala Dios xabáa, Bēnnea' quebe dxedé chee', ne dxelúe lá'ane' bedáu' xiaj xaga zaj naca na lu'a bēnneache dxelate, ne lu'a bea ca' zaj zua xrla, ne lu'a be snia, ne lu'a be xixre' be zria tapa ni'a na'ba'.

<sup>24</sup> Chee le na' Dios ba guleaj xíchaje' benne' ca' chee xelune' xúgute da sban da dxelezá lazre', na' bulucá'ana ditaj cuine' tue' xetue', <sup>25</sup> lawe' da buluzúe' chalá'ala xel-la li chee Dios, na' gulezi' lu ne'e da wen lazre', ne belúe lá'ane', ne belecá'ana szrene' da ca' nun Dios,

ne quegá Diosqueze, Bénnea' dxal-la' güe lá'anaquezdXu. ¡Ca'an gaca na!

<sup>26</sup> Chee le na' Dios ba guleaj xíchaje' benne' ca' chee xelune' da dxelezá lazre' da ca' xedué'edXu. Cá'anqueze nu'ula buluzúe' chalá'ala xel-la zúale benne' chee', ne dxelune' da quebe zaj naca chee' xelune'. <sup>27</sup> Cá'anqueze belún benne' biu, buluzúe' chalá'ala xel-la zúale zru'ule', ne dxelune' da sban da dxelezá lazre' tue' xetue', ne dxelune' da ca' xedué'edXu tue' xetue', na' dxeledéé' xel-la zi' lu bel-la' dxen chee' ne chee' da sban da dxelune'.

<sup>28</sup> Lawe' da québedxa gulaca lazre' xelexúnbe'e Dios, Le' guleaj xíchaje' benne' ca' chee' xuludé' lazre' da calela, ne chee' xelune' da quebe dxal-la' xelune'.

<sup>29</sup> Dxelune' xúgute' da calela.

Dxulucá'ana ditje' bénneache.

Dxelune' da quebe naca xrlátaje.

Zaj naque' benne' wecude'.

Dxelune' da zrinnaaj.

Zaj naque' benne' xa lazre'.

Dxelutíe' benne'.

Dxelílaje' da ba xa'.

Dxelezí xe'e.

Dxeledanne' da xálaze.

Dxuluchálaje' dizra' bizruj.

<sup>30</sup> Dxeleonné' schanni' chee' ljwezre'.

Dxelecuídene' Dios.

Zaj naque' benne' wenné wal-la.

Dxulucá'ana szren cuine'.

Zaj naque' benne' wezé cua.

Dxelalaj lazre' bícala da sban.

Quebe dxuluzúe' dizra' chee' xra xrne'e.

<sup>31</sup> Zaj naque' benne' lázrdau zide'.

Dxulunitie' xrtizre'.

Quebe zaj naque' zri'i lazre'.

Quebe dxulunitie' lawe' chee' ljwezre'.

Quebe dxelexache lazre' chee' ljwezre'.

<sup>32</sup> Zaj nézene' Dios guzríá xi'e bénneache,

na' benne' dxelune' da caní dxal-la' xelátie'.

Benne' caní tu dxelúnzqueze' na, ne dxelexezaca ba lazre' nen benne' dxelune' da caníqueze.

## 2

*Dios dxuchi'e chee' bénneache cáteze da zaj nune'*

<sup>1</sup> Chee le na' québedxa bi de da gudé'enu', lue' dxuchi'u da dxun benne' xula, núteteze nacu'. Gate dxuchi'u da dxun benne' xula,

na' dxule'enu' nabagu' zria, lawe' da dxuchi'u da dxun benne' xula, ne cá'anqueze dxunu' lue'. <sup>2</sup> NézquezdXu dxuchi'a Dios cáteze da naca na gate dxenne' zaj nabaga zria benne' ca' dxelún da caní. <sup>3</sup> ¿Dxéquentu' lue' wadé gun ca'aze chiu' gate Dios nne' zaj nabaga zria bénneache, lue' na' dxennáu' zaj nabaga zria benne' dxelún da caní, ne cá'anqueze dxunu' lue'? <sup>4</sup> ¿Dxuzú' chalá'ala xel-la zri'i lazre', ne xel-la zren lazre' zren chee' Dios, ne quebe nézenu' lu xel-la zri'i lazre' chee' dxunne' lue' lataj xebi' lazru'? <sup>5</sup> Nacu' lázrdau zide', ne quebe dxexeb'i lazru'. Chee le na' dxuzanu' da si sacu' lu zra na' gate Dios nne' zaj nabaga zria benne' ca' dxelune' da calela. Naca xrlátaje guné' da caní. <sup>6</sup> Lu zra na' gunne' ca da dxal-la' si' tu tudxu cáteze naca da bendxu. <sup>7</sup> Xel-la nabán zejálí canna gunna Le' xúgute' benne' dxelaca lazre' xelezi'e lu na' Dios da xabáa, ne xel-la ba lá'ana, ne da zaj naca na da chadía chacanna ne chee' da chawe' da tu dxelúnzqueze'. <sup>8</sup> Lu xel-la dxezrá'a chee' nne' zaj nabaga zria xúgute' benne' zre'e lazre' ca', benne' quebe dxuluzúe' dizra' da li, san dxuluzúe' dizra' da wen lazre'. <sup>9</sup> Gusaca zí'e, ne gudé' lu da ba xa' xúgute' benne' dxelune' da calela. Ga su lau guné' caní chee' benne' judío ca', ne cá'anqueze guné' chee' benne' quebe zaj naque' judío. <sup>10</sup> Da xabáa, ne da ba lá'ana, ne xel-la dxebeza zri lazre' gunne' xúgute' benne' dxelune' da chawe'. Ga su lau guné' caní chee' benne' judío ca', ne cá'anqueze guné' chee' benne' quebe zaj naque' judío.

<sup>11</sup> Dios tuze ca dxuchi'e da dxelún xúgute' bénneache, <sup>12</sup> na' benne' dxelune' dul-la, ne quebe zaj núnbe'e da bdxixruj be'e Moisés welebía xi'e lácala quebe belúnbe'e da nadxixruj bea na, na' benne' dxelune' dul-la lácala zaj núnbe'e da bdxixruj be'e Moisés welebía xi'e ne chee' da nadxixruj bea na na'. <sup>13</sup> Quebe zaj nagá'ana chawe' lau Dios benne' dxelénzene' da nadxixruj bea na, san zaj nagá'ana chawe' lau Dios benne' dxuluzúe' dizra' da nadxixruj bea na. <sup>14</sup> Benne' zitu' ca', benne' quebe zaj núnbe'e da bdxixruj be'e Moisés, gate dxelune' ca dxenná da nadxixruj bea na, lácala quebe zaj núnbe'e da nadxixruj bea na, naca chee' cáteze zua da nadxixruj bea na lu xichaj lázrdawe'. <sup>15</sup> Caní naquen lawe' da ca dxelune' dxulé'e na zua xichaj lázr-

dawë' ca naca da nadxixruj bea na, na' naca na ca naca da bdxixruj be'e Moisés. Xichaj lázrdawë' dxunna bea na cheë da nigá, na' da dxelegú'u lazre' guzrí'a xi na le', u xecá'a na le' <sup>16</sup> lu zra na' gate Dios guchi'e xúgute da nagache' cheë xúgute bënneache lu na' Jesucristo cáteze dxenná dizra' chawe' na' da dxuzenda' bënneache.

*Ca naca cheë benne' judío ca' ne da bdxixruj be'e Moisés*

<sup>17</sup> Dxenná'u' nacu' judío, ne dxenné'enu' da bdxixruj be'e Moisés, ne dxucá'ana szren cuinu' lawe' da núnbe'u Dios chi'u'. <sup>18</sup> Nézenu' da dxaca lazre' Dios, na' da gunná bé'ene' dxulé'e na lue' gunu' da nácadxa chawe'. <sup>19</sup> Dxuxrén lazru' cuinu' waca gulé'enu' ca da xelún benne' zaj naque' ca lo chul-la, ne guseni'u benne' zaj zra' lu da chul-la. <sup>20</sup> Dxé'quenu' waca guz'éajni'inu' benne' quebe zaj nax'éajni'e, ne gusé'denu' benne' quebe ne cheajni'e lawe' da naca da nadxixruj bea na da napu' tu da dxulé'e na dxi'u cheë gúnbeadxu da li. <sup>21</sup> Lue' dxusé'denu' benne' xula. ¿Bizr cheë na' quebe dxuse'de cuinu'? Lue' dxuzennu' benne' quebe dxal-la' cuandxu. ¿Bizr cheë na' dxebanu' lue'? <sup>22</sup> Lue' dxenná'u' quebe dxal-la' súalé'dxu zru'ula benne' xula. ¿Bizr cheë na' dxunu' lue' ca'? Lue' dxecuí'denu' bedá'u' xiaj xaga. ¿Bizr cheë na' dxebanu' lue' da gunní'a da de lu xudau' ca' cheë bedá'u' xiaj xaga ca'? <sup>23</sup> Dxucá'ana szren cuinu' lawe' da núnbe'u da nadxixruj bea na, san dxucá'ana ditju' Dios lawe' da quebe dxunu' lue' ca da dxenná bea da nadxixruj bea na. <sup>24</sup> Naxúaj lu dizra' lá'azxa da dxenná na: Benne' quebe zaj naque' judío dxelen-né' schanni' cheë Dios ne cheë da calela da dxunle le'e.

<sup>25</sup> Da li da nadxugu lu bēla' chiu' da dxulé'e na nacu' bi cheë Dios, naca na tu da chawe' che dxunu' ca da dxenná bea da bdxixruj be'e Moisés, san che quebe dxunu' ca dxenná na, nacu' ca tu benne' quebe nadxugu lu bēla' cheë' da na' dxulé'e na. <sup>26</sup> Che benne' quebe nadxugu lu bēla' cheë' dxuné' ca nadxixruj bea na, naque' ca tu benne' nadxú'gunqueze lu bēla' cheë' da na', lálaca quebe naca caní cheë'. <sup>27</sup> Benne' quebe nadxugu lu bēla' cheë' da na' dxulé'e na, san dxuné' da nadxixruj bea na, da na' dxuné' dxulé'e na nabagu' zria lue', lawe' da quebe dxunu' da dxenná bea da

nadxixruj bea na, lálaca zua lu na'u da nadxixruj bea na, ne nadxugu lu bēla' chiu' da na'. <sup>28</sup> Quebe naca xanne' judío bēnnea' naque' caní cúzreze, ne quebe naca xanne' da nadxugu na lu bēla' cheë benne' da naca na cúzreze, lu bēla'ze. <sup>29</sup> Benne' naca xánne' judío naque' bēnnea' naque' judío lu xichaj lázrdawë', ne da naca xanne' da nadxugu lu bēla' cheë benne' naca na da zua na lázrdawë'. Quebe nácaqueze na men dízra'ze san naca na cheë be' cheë'. Benne' caní dxelezi'e xel-la ba lá'ana, quegá cheë bēnneache, san cheë Dios.

### 3

<sup>1</sup> ¿Bizra da ba neza naca na cheë benne' lawe' da nadxugu lu bēla' cheë' da na' dxulé'e na? <sup>2</sup> Nácale'e na, ne zánete ca naca na. Da nédxute, Dios bdeë' dízra' cheë' lu na' benne' judío ca'. <sup>3</sup> ¿Bizra xca'? Che bal-la benne' judío ca' quebe zaj naque' li lazre', ¿nnadxu cheë da na' quebe naca Dios li lazre'? <sup>4</sup> ¿Cabata! Dios dxúnqueze' ca naca da li lálaca xúgute bēnneache zaj naque' wen lazre', lawe' da naxúaj lu dizra' lá'azxa da dxenná Dios. Dxenné': Nacu' xrlátaje ca da dxenná'u', na' wegá'anaquezu' xrlátaje gate xuluchí'e ca da dxunu'.

<sup>5</sup> Che da calela da dxundxu dxulé'e na naca Dios xrlátaje, ¿Bízraqueze nnadxu? (Dxuchálaja' ca da dxuluchalaj bēnneache.) ¿Naca Dios benne' quebe naca xrlátaje lawe' da dxudé'e dxi'u xel-la zi'? <sup>6</sup> ¿Cabata! Chela naca Dios Benne' quebe dxun da xrlátaje, ¿ájzra guné' guchi'e ca da dxelún bēnneache?

<sup>7</sup> Che da wen lazre' da dxuna' gun na cheë xegá'ana zrendxa da li da dxun Dios, ¿bizr cheë na' dxuchi'e chia' neda', dxenné' naca' benne' dul-la? <sup>8</sup> Che naca na caní, ¿bizr cheë na' quebe gundxu da calela cheë gulé'e laudxa da xrlátaje? Da nigá naca na da dxelenná bal-la benne' dxundxu, benne' ca' dxelún da calela, ne dxelenné' schanni' cheëdxu. Xrlátaje naca Dios nne' zaj nabaga zria benne' caní.

*Xúgute'dxu nabágadxu dul-la*

<sup>9</sup> ¿Bizra xca'? Dxi'u, benne' judío, ¿nácadxadxu xrlátaje ca xezícadxa benne' ca'? ¿Cabata! Bache blé'entu' zaj nabaga dul-la benne' judío, ne cá'anqueze xezícadxa

benne' ca'. <sup>10</sup> Naxúaj lu xiche lá'azxa da dxenná na:

Quebe nu chilá' benne' xrlátaje, netú gue'.

<sup>11</sup> Quebe nu chilá' benne' dxéajni'ing'.

Quebe nu chilá' benne' dxexíljaje' Dios.

<sup>12</sup> Xúgute' dxeledé' caléla. Xúgute' zaj nanítie'.

Quebe nu chilá' benne' dxune' da xrlátaje, netú gue'.

<sup>13</sup> Da dxeleನ್ನéqueze' naca na ca tu da sgute, ca tu ba da naxálajze.

Nen luzre' ca' dxelezí xe'e.

Xrtizre' zaj naca na ca nisa snia chee' bela' da dxe na zran láxzaba'.

<sup>14</sup> Tu dxeleನ್ನéqueze' dizra' schanni', ne dizra' zi'.

<sup>15</sup> Chadite dxelútie' bénneache.

<sup>16</sup> Gáteteze dxeledé' dxuluzría xi'e, ne dxulusaca zi'e.

<sup>17</sup> Quebe zaj nézene' ájala xelebeza zri lazre'.

<sup>18</sup> Quebe dxelezrebe' Dios.

<sup>19</sup> Nezdxa xúgute' ca da dxenná da nadxixruj bea gula na' da bzuj Moisés, dxé na benne' ca' zaj xu'e lu na' da nadxixruj bea na naca, chee' xelezúa zri xúgute', ne chee' xelaxúnbea xúgute' bénneache zaj nabague' zria lau Dios. <sup>20</sup> Netú benne' quebe xegá'ane' xrlátaje lau Dios lawe' da nune' da dxenná bea da nadxixruj bea na, lawe' da dxulé'eze da nadxixruj bea na dxi'u nácaxdu benne' dul-la.

*Xelélé bénneache che xeléajle'e chee' Cristo*

<sup>21</sup> Na'a, dxunna bea na ca gaca xegá'anaxdu xrlátaje lau Dios, da quebe naca na ne chee' da nadxixruj bea na, lácala lu da nadxixruj bea na, ne lu da buluzúaj benne' ca' gulenné' waláz chee' Dios dxuluchalaj na ca naca chee' da nigá.

<sup>22</sup> Nagá'anaxdu xrlátaje lau Dios caní che dxeajlí lázredxu Jesucristo, ne cá'anqueze gaca chee' xúgute' bénneache xeléajlí lazre' Le'. Tuz ca naca chee' bénneache <sup>23</sup> lawe' da zaj nun xúgute' bénneache dul-la, ne quebe zaj naca chee' xelxú'e lu xabáa chee' Dios.

<sup>24</sup> Lu da chwaw' chee' Dios, cá'aze nune' chee' xegá'anaxdu xrlátaje lau Le' lawe' da bexa'u Jesucristo dxi'u lu dul-la da nabágaxdu.

<sup>25</sup> Dios bzue' Jesucristo gutie' ne chee' xtúlladxu chee' xegá'anaxdu xrlátaje lau Le' che dxeajlí lázredxu da ben Le'. Da nigá guca na chee' ble'e Dios naque' xrlátaje lácala lu xel-la zren lazre' chee' bde'e' cá'aze ca naca dul-la da bendxu nédxute'. <sup>26</sup> Gúcaqueze da

nigá chee' gulé'e lawe' naca Dios xrlátaje na'a, ne gácaqueze' xrlátaje gate gucá'ane' xrlátaje benne' ca' dxeleajlí lazre' Jesús.

<sup>27</sup> Na'a, ¿waca gucá'ana szren cuínaxdu? ¿Cabata! ¿Bizr chee' na'? Naca na lawe' da nagá'anaxdu xrlátaje, quegá lawe' da bendxu ca nadxixruj bea na, san lawe' da guxeajlí lázredxu Cristo. <sup>28</sup> Ca'an naca, dxunna bea na nagá'ana xrlátaje tu benne' lau Dios lawe' da dxeajlí lazre' Cristo, ne quegá lawe' da nune' ca da nadxixruj bea na.

<sup>29</sup> ¿Naca Dios cheeze benne' judío ca'? ¿Quegá nácaqueze' Dios chee' benne' ca' quebe zaj naque' judío? Da li nácaqueze' Dios chee' benne' ca' <sup>30</sup> lawe' da zua tuze Dios, na' Le' gucá'ane' xrlátaje benne' ca' zaj nadxugu lu bela' chee' da na' dxunna bea na che dxeleajlí lazre' Cristo, ne cá'anqueze gucá'ane' xrlátaje benne' ca' quebe zaj nadxugu lu bela' chee' da na', che dxeleajlí lazre' Cristo. <sup>31</sup> Na'a che dxucá'ana Dios xrlátaje benne' dxeleajlí lázreze', ¿naca da nadxixruj bea na tu da québedxa zaca? ¿Cabata! Che dxéajlédxu chee' Cristo dxúnquezdxa ca dxenná da nadxixruj bea na.

## 4

*Da dxulé'e da guca chee' Abraham*

<sup>1</sup> ¿Bízraqueze nnaxdu chee' da ba neza da guca na chee' xra xrtáudxu Abraham?

<sup>2</sup> Che Abraham bega'ane' xrlátaje lau Dios ne chee' tu da bene', waca gucá'ana szren cuine' san quegá lau Dios. <sup>3</sup> ¿Bízraqueze naxúaj na lu dizra' lá'azxa? Dxenná na:

Abraham guxeajlí lazre' Dios, na' Dios guzi' lu ne'e le' ca tu benne' xrlátaje. <sup>4</sup> Che nu benne' dxune' zrin, lazruj da si'e quebe naca na tu da dxunézrujzedxu, san naca na tu da nabágaquezdxu chee'.

<sup>5</sup> Che nu benne' quebe bi nune', san dxeajlí lázreze' Dios, Bénnea' dxucá'ane' xrlátaje benne' dul-la, nacan lawe' da dxezi' lu na' Dios xel-la dxeajlí lazre' chee' xucá'ane' le' xrlátaje. <sup>6</sup> Cá'anqueze bchalaj David ca naca chee' benne' naca da ba neza chee' lawe' da dxucá'ana Dios le' xrlátaje lácala quebe bi nune' chee' xegá'ane' xrlátaje. <sup>7</sup> Gunná David:

Ba neza zrente' naca na chee' benne' ca' ba bunité lau Dios chee' da zrinnaj da zaj nune',

ne gudé'e cá'aze dul-la da belún benne' ca'.  
<sup>8</sup>Ba neza zrentę naca na cheę benne' ca'  
 quebe dxusebaga Xránadxu le' dul-la da  
 belune'.

<sup>9</sup>¿Naca ba neza nigá cheęze benne' ca'  
 zaj nadxugu lu belá' cheę' da na' dxulé'e  
 na, u che nácaqueze na cheę benne' ca'  
 quebe zaj nadxugu lu belá' cheę' da na'?  
 Bache blé'entu' bca'ana Dios Abraham xrlá-  
 taje lawe' da guxeajlí lazre' Le'. <sup>10</sup>¿Bátazra  
 bca'ane' le' xrlátaje? ¿Guca na ca gudé  
 gudxugu lu belá' cheę Abraham da na'  
 dxulé'e na, u che nédxula? Quebe guca  
 na ca gudé na', san nédxula guca na.  
<sup>11</sup>Gudxugu da na' lu belá' cheę Abraham  
 ca tu da dxunna bea na cheę gulé'e na  
 nagá'ane' xrlátaje lau Dios lawe' da gux-  
 eajlí lazre' Dios gate na' quebe ne chugu  
 da na' lu belá' cheę'. Ca'an guca, naca  
 Abraham xra xúgute benne' dxeleajlí lazre'  
 Dios, ne quebe zaj nadxugu da na' lu belá'  
 cheę'. Cá'anqueze dxucá'ana Dios le' xrlá-  
 taje lawe' da dxeleajlí lazre' Le'. <sup>12</sup>Da li naca  
 Abraham xra benne' ca' zaj nadxugu da  
 na' lu belá' cheę', na' cá'anqueze dxeleajlí  
 lazre' Dios ca ben xradxu Abraham gate na'  
 quebe ne chugu lu belá' cheę' da na'.

*Dxezidxu da guchebe lazre' Dios che dxeajlí  
 lázredxu Cristo*

<sup>13</sup>Dios guchebe lazre' cheę Abraham, ne  
 cheę zri'ine zre suę' gaca cheę benne' ca'  
 xęzr la xu nigá. Quebe guchebe lazre' na  
 cheę' lawe' da nunę' ca dxenná bea da  
 nadxiruj bea na, san lawe' da bega'ane'  
 xrlátaje lau Dios gate guxeajlí lazre' Le'.  
<sup>14</sup>Che xęzr la xu nigá gaca na tuze cheę  
 benne' ca' dxelunę' ca da dxenná bea da  
 nadxiruj bea na, dácheze nagá'ana xel-la  
 dxeajlí lazre', ne québedxa zaca da guchebe  
 lazre' Dios. <sup>15</sup>Lu da nadxiruj bea na xelebía  
 xi' bėneache, san naga quebe ne zrin da  
 nadxiruj bea na, quebe bi zaj nabaga bėn-  
 eache cheę da nadxiruj bea na na'.

<sup>16</sup>Ca' naca na, dxezi' lu nnadxu da  
 guchebe lazre' Dios ne cheę xel-la dxeajlí  
 lazre' cheędxu Le', cheę gaca na tu da sidxu  
 cá'aze, ne cheę gaca na tu da súatequeze  
 cheę xúgute zri'ine zre sua Abraham. Ca'  
 naca na, quegá naca na cheęze benne'  
 ca' dxelunę' ca da nadxiruj bea na, san  
 cá'anqueze naca na cheę benne' ca' dxele-  
 ajlí lazre' Dios ca ben Abraham. Ca' naca  
 na, le' naque' xra xúgute dxu <sup>17</sup>lau Dios,

Bėnnea' guxeajlí lazre' Abraham Le'. Naca  
 na ca da naxúaj na lu dizra' lá'azxa, dxenná  
 na:

Nuna' lue' xra bėneache zánete cue' xęzr  
 la xu.

Dios na' dxu'e xel-la nabán cheę benne' ca'  
 zaj nate, ne dxuchálaje' cheę da quebe ne  
 sua ca dxuchálaje' cheę da ba zua.

<sup>18</sup>Abraham guxeajlí lazre' Dios, ne guleza  
 lazre' si'e da guchebe lazre' Dios, lácala ba  
 gudé cheę si'e da dxebeza lazre'. Ca'an  
 guca, guque' xra bėneache zánete cue'  
 xęzr la xu cáteze ba guzre Dios le', gunné':  
 "Canite chan zri'ine zre su'." <sup>19</sup>Abraham  
 ba zuę' ca tu gaxúa iza, san quebe gute  
 ni'a ne'e lu xel-la dxeajlí lazre' cheę' gate  
 xeajsá lazre' zaj naque' ca benne' ba zaj  
 nate, le' ne zru'ule' Sara, ne naca Sara  
 nu'ula wizre. <sup>20</sup>Quebe ben chupa lazre',  
 san bxren lazre' da guchebe lazre' Dios  
 cheę', na' gudápadxe' xel-la dxeajlí lazre',  
 ne bxren lázredxe'. Bca'ana szrene' Dios,  
<sup>21</sup>ne bėntequeze' neza napa Dios xel-la waca  
 gunę' xúgute ca da guchebe lazre'. <sup>22</sup>Cheę  
 le' na' Dios guzi' lu ne'e xel-la dxeajlí lazre'  
 cheę' cheę bca'ane' le' xrlátaje.

<sup>23</sup>Gate dxenná na: "Dios guzi' lu ne'e  
 xel-la dxeajlí lazre' cheę'", quebe guxuj  
 na cheę tuze Abraham <sup>24</sup>san cá'anqueze  
 cheędxu dxi'u lawe' da si' lu na' Dios xel-la  
 dxeajlí lazre' cheędxu che dxeajlí lázredxu  
 Bėnnea' bsebanę' Xránadxu Jesucristo lá-  
 dujla benne' gate, <sup>25</sup>na' naca Jesús Bėnnea'  
 bde Dios Le' cheę gutie' ne cheę dul-la  
 da nabágadxu dxi'u, ne bsebanę' Le' cheę  
 xegá'anadxu xrlátaje lau Dios.

## 5

*Da naca cheędxu lawe' da nagá'anadxu  
 xrlátaje lau Dios*

<sup>1</sup>Che nagá'anadxu xrlátaje lau Dios lawe'  
 da dxeajlí lázredxu Cristo zúadxu xrlá-  
 taje nen Dios ne cheę Xránadxu Jesu-  
 cristo. <sup>2</sup>Cá'anqueze lawe' da dxeajlí  
 lázredxu Cristo, ne cheę Le' dxezidxu da  
 xrlátaje cheę Dios da tu dxeajlézquezdxu,  
 ne dxebéle'edxu lawe' da dxebeza lázredxu  
 sidxu da xabáa cheę Dios. <sup>3</sup>Quegaze da  
 nigá, san cá'anqueze dxebéle'edxu gate  
 dxededxu xel-la zi', lawe' da nézedxu xel-la  
 zi' da dxededxu dxun na dxi'u zren lazre',  
<sup>4</sup>na' xel-la zren lazre' dxucá'ana na dxi'u  
 xrlátaje lau Dios, na' gate nagá'anadxu xr-  
 látaje dxebeza lázredxu. <sup>5</sup>Quebe naca tu

da dácheze da na' dxebeza lázredxu lawe' da ba nuzúa Dios lu lázrdaudxu xel-la zri'i lazre' chee' ne chee Be' Lá'azxa, Bénnea' ba nunna Dios dxi'u.

<sup>6</sup> Gate na' quebe guzéquedxu guselá cuí-nadxu, lu zra blé'eeuze Dios, gute Cristo waláz chee' benne' wen da zrinnaj ca'. <sup>7</sup> Stébele'e naca che nu benne' gatie' waláz chee' tu benne' xrlátaje, lácala wexázrelja tu benne' gatie' waláz chee' tu benne' naque' dutę li lazre'. <sup>8</sup> Dios dxulé'ene' dxi'u ca nazri'ile'ene' dxi'u lawe' da gute Cristo waláz cheedxu gate ne nácadxu benne' dul-la. <sup>9</sup> Na'a nagá'anadxu xrlátaje lau Dios lawe' da gute Cristo waláz cheedxu, ne ba nácaqueze cheedxu ladxu ne chee' Le' lu da zi' da xa', da za za' lu zra ni'. <sup>10</sup> Gate na' ne dxecuidedxu Dios, Le' bexunge' dxi'u tuze nen Le' lawe' da gute Cristo waláz cheedxu, na' na'a lawe' da nácadxu tuze nen Dios ba nácaqueze cheedxu ladxu ne chee' xel-la nabán chee' Cristo da zúale na dxi'u. <sup>11</sup> Quegá tuze da nigá, san cá'anqueze dxébéle'edxu lu da naca chee' Dios ne chee' Xránadxu Jesucristo, ne ne chee' Le' nácadxu tuze nen Dios.

*Da nun Adán, na' da nun Cristo*

<sup>12</sup> Ca guca, guxú'u dul-la lu xęzr la xu nigá ne chee' da ben tuze benne', na' bla' xel-la gute ne chee' dul-la, ca'an guca gulú'u bėnneache lu na' xel-la gute lawe' da zaj nun xúgute' dul-la. <sup>13</sup> Nédxula ca bla' da nadxixruj bea na, ba zaj nun bėnneache dul-la lu xęzr la xu nigá, lácala quebe dxusebaga Dios bėnneache dul-la gate quebe ne zrin da nadxixruj bea na. <sup>14</sup> Ca guzú lau lu zra zua Adán ca bzin zra zua Moisés, gulú'u bėnneache lu na' xel-la gute, benne' ca' zaj nune' dul-la, lácala quebe belune' dul-la ca da ben Adán, bėnnea' gudichje' da gunná be'e Dios, na' Adán na' naque' tu da dxulé'ze na ca naca Bénnea' dxal-la' xide', Le' Cristo.

<sup>15</sup> Da zrinnaj da ben Adán quebe gaca dí-lalębe na ca da dxunna Dios dxi'u. Ne chee' da zrinnaj da ben tuze benne', gulate benne' zante, san xel-la weselá da nunna Dios dxi'u cá'aze ne chee' xetuze benne', Jesucristo, naca na da zrėndxaqueze, ne naca na da ba neza chee' benne' zante. <sup>16</sup> Da zrinnaj na' da ben tuze benne' quebe gaca dí-lalębe na ca da dxunna Dios dxi'u lawe' da ne chee' tuze da zrinnaj, zaj nabaga zria bėnneache, san da dxunna Dios dxi'u

naca na chee' xellexegá'ana xrlátaje benne' zante benne' zaj nune' da zrinnaj. <sup>17</sup> Ne chee' da zrinnaj da ben tuze benne' gulú'u bėnneache lu na' xel-la gute, na' benne' ca' zaj nazí' lu ne'e da dxunna Dios cá'aze, ne zaj nagá'ane' xrlátaje lau Le' ba zaj nalé' lu na' dul-la, ne dxellexeque' xelenná be'e cuine' lu xel-la nabán chee' ne chee' da nun xetuze benne', Jesucristo.

<sup>18</sup> Ca guca zaj nabaga zria xúgute' bėnneache ne chee' da zrinnaj da ben tuze benne', Adán, cá'anqueze ne chee' da xrlátaje da ben xetuze benne', Jesucristo, belexexaca bėnneache xrlátaje chee' xelaca bane'. <sup>19</sup> Ca guca belexexaca bėnneache zante benne' dul-la lawe' da quebe bzua dizra' tuze benne', cá'anqueze lawe' da bzua dizra' xetuze benne', xellexegá'ana benne' zante xrlátaje lau Dios.

<sup>20</sup> Bzua Dios da nadxixruj bea na chee' gunná bėadxa na da naca dul-la, na' gate dul-la guxánle'e na, ca' guzrendxa xel-la zri'i lazre' chee' Dios. <sup>21</sup> Ca naca zua lu na' dul-la gute na bėnneache, cá'anqueze zua lu na' xel-la zri'i lazre' chee' Dios gucá'ana na dxi'u xrlátaje lau Dios chee' gaca bandxu chadía chacanna ne chee' Xránadxu Jesucristo.

## 6

*Nácadxu ca benne' gate ca' chee' québedxa gundxu dul-la, na' naca bandxu nen Cristo*

<sup>1</sup> ¿Bízraqueze mnadxu? ¿Gúndxadxu dul-la chee' gulé'e láwedxa xel-la zri'i lazre' chee' Dios? <sup>2</sup> ¡Cabata! Ba nácadxu ca benne' gate chee' québedxa gundxu dul-la. ¿Ájazra gúndxadxu dul-la? <sup>3</sup> ¿Quebe nézele le'e, xúgute'dxu dxi'u ba nadxúadxu nisa chee' gácadxu tuze nen Jesucristo, naca na ca ba nátedxu tu zren nen Le' lu da nadxúadxu nisa? <sup>4</sup> Ca' naca na, ne chee' da nadxúadxu nisa naca ca bgáchedxu tu zren nen Le', ne nátedxu chee' xebandxu, ne súadxu tu lu xel-la nabán cube cáteze guca chee' Cristo, bebanę ládújla benne' gate ne chee' xel-la waca xabáa chee' Xre'.

<sup>5</sup> Che gúcadxu tuze nen Cristo lu xel-la gute, cá'anqueze gácadxu tuze nen Le' lu xel-la dxexebán chee'. <sup>6</sup> Nezdxu da gúcadxu gate nate ba gudá na le'e xaga bėguaj tu zren nen Le' chee' cuía xi' benne' dul-la da gúcadxu chee' québedxa gundxu zrin chee' dul-la ca benne' zaj nada'u cheen. <sup>7</sup> Tu

benne' ba nate, ba bedxúaje' lu na' dul-la. <sup>8</sup> Che ba gútedxu tu zren nen Cristo, dxuxrén lázredxu gaca bánquezdXu tu zren nen Le' 'lawe' da nezdxu quebe gate Cristo da xula lawe' da ba bebane' ládujla benne' gate, na' québedxa xu'e lu na' xel-la gute. <sup>10</sup> Gate gute Cristo, tu lászaze gutie' ne chee dul-la waláz chee xúgute bènneache, san na'a naca bane', na' lu na' Dios naca bane'. <sup>11</sup> Cá'anqueze le'e, le gueque nácale benne' gate chee québedxa gunle dul-la, san naca banle lu na' Dios tu zren nen XránadXu Jesucristo.

<sup>12</sup> Chee le na' québedxa güele lataj nna be'e dul-la belá' dxen chee da dxal-la' gate, chee québedxa gun na gunle da dxezá lazre' belá' dxen chee. <sup>13</sup> Quebe guzúa cuínale lu na' dul-la chee guchine na le'e lu da calela, san le guzúa cuínale lu na' Dios, gácale ca benne' belexebán ládujla benne' gate, chee guchíne' le'e lu da xrlátaje. <sup>14</sup> Québedxa gaca dul-la nna be'e na le'e lawe' da québedxa xu'ule lu na' da nadxixruj bea na, san xu'ule lu na' xel-la zri'i lazre' chee Dios.

*Tu da dxulé'e na ca naca chee benne' zaj nada'u*

<sup>15</sup> ¿Bizra xca'? ¿Gundxu dul-la lawe' da québedxa xú'udxu lu na' da nadxixruj bea na, san xú'udxu lu na' xel-la zri'i lazre' chee Dios? ¡Cabata! <sup>16</sup> Ba nézqueze che guzúa cuínale lu na' tu xránale ca benne' zaj nada'u chee guzúale dizra' chee', nadxa nácale benne' zaj nada'u chee xránale, ne dxun na ba xen guzúale dizra' chee'. Cá'anqueze naca chee le'e che guzúale dizra' chee dul-la, da gunna na le'e xel-la gute, u che guzúale dizra' chee Dios, chee gácale xrlátaje. <sup>17</sup> Xcalén Dios, lácala gúcale ca benne' zaj nada'u lu na' dul-la, na'a du lázrele dxuzúale dizra' chee dizra' li na', lu da na' bzua cuínale. <sup>18</sup> Gate bedxúajle le'e lu na' dul-la, bexácale wen zrin chee da xrlátaje. <sup>19</sup> (Dxuchálajlena' le'e ca dxu-luchalaj bènneache lawe' da lu belá' dxen chee quebe gaca chéajni'ile ca naca da nigá.) Cáteze benle gate na' bzua cuínale lu na' da sban, ne lu na' da zrinnaj chee gunle da zrinnaj, cá'anqueze le gun na'a, le guzúa cuínale lu na' da xrlátaje chee gácaqueze bi chee Dios.

<sup>20</sup> Gate ne nácale ca benne' zaj nada'u lu na' dul-la, quebe ben na ba xen gunle

da xrlátaje. <sup>21</sup> Na'a ¿bizra da ba neza guca chee da ca' dxexedué'ele chee na'a? Da ca' benle nédxute guché na le'e lu xel-la gute. <sup>22</sup> Na'a nadxúaje lu na' dul-la, ne ba nácale wen zrin chee Dios chee gácaqueze bi chee Dios da naché na le'e lu xel-la nabán da zeajlí canna. <sup>23</sup> Benne' dxuné' dul-la dzezi'e lazruj chee' da naca na xel-la gute, san da dxúnnaze Dios dxi'u naca na xel-la nabán da zeajlí canna tu zren nen XránadXu Jesucristo.

## 7

*Tu da dxulé'e na ca naca chee xel-la wechaga na'*

<sup>1</sup> Bi bícha'dau', le'e núnbeale da nadxixruj bea na, zaj xu'u lu na' da nadxixruj bea na bènneache tuze dxácaté ne zaj naca bane'. <sup>2</sup> Ca naca da nigá, tu nu'ula nuchaga na' xu'e lu na' benne' chee' ne chee da nadxixruj bea na dxácaté zue' nabane', san che gate benne' chee', na' xedxúaj zru'ule' lu na' da nadxixruj bea na na'. <sup>3</sup> Ca' naca na, che nu'ula na' súalene' benne' xula dxácaté ne nabán benne' chee', guné' dul-la gáchajne' xrba chee xel-la nuchaga na', san che benne' chee' na' gatie', xedxúaj zru'ule' lu na' da nadxixruj bea na na', na' waca xuchaga ná'lene' benne' xula, ne quebe guné' dul-la da gáchajne' xrba chee xel-la nuchaga na'.

<sup>4</sup> Cá'anqueze naca chee le'e, bi bícha'dau', le'e zrágale bel-la' dxen chee Cristo, ba nácale ca benne' gate, ne québedxa xu'ule lu na' da bdxixruj be'e Moisés, chee gácale ca zru'ula benne' xula. Na'a nácale ca zru'ula Cristo, Bènnea' bebane' ládujla benne' gate, chee gácadXu bi guchine Dios. <sup>5</sup> Dxácaté na' bëndxu da naca chee belá' dxen cheedXu, da nadxixruj bea na ble'e na dxi'u naca dul-la da bëndxu ca da dxezá lazre' belá' dxen cheedXu, na' da na' guché na dxi'u lu xel-la gute.

<sup>6</sup> Na'a ba nácadXu ca benne' zaj nate, na' ba bedxúajdxu lu na' da nadxixruj bea na da gunná be'e na dxi'u, chee gaca gundxu zrin chee Dios lu xel-la nabán cube da dxunna Be' Lá'azxa dxi'u, ne quegá gundxu zrin na' lu da nadxixruj bea gula da naxúaj na.

*Dul-la da zúale neda'*

<sup>7</sup> ¿Bizra nnadXu xca'? ¿Dxun da nadxixruj bea na nácadXu benne' dul-la? ¡Cabata! Quebe gunezda' da naca na dul-la

chela ca ble'e da nadxixruj bea na neda'. Quebe gunezda' naca dul-la sa lazra' da naca chee nu benne' chela ca gunná da nadxixruj bea na: Quebe sa lazru' da naca chee nu benne'. <sup>8</sup> Ble'e da nadxixruj bea na neda' da naca dul-la, na' guque be'eda' zúale'e zánete da calela lu xichaj lázrdawa' da guzá lazra', lawe' da gate quebe ne gúnbe'a da nadxixruj bea na, guca dul-la chia' tu da nagache lawa' neda'. <sup>9</sup> Guzúa tu zra gate quebe ne la' da nadxixruj bea, na' gúqueda' naca bana' neda', san gate benda' da na' gunná be'e na neda', bénbe'a da naca dul-la, na' guque be'eda' nabaga' zria, ne dxal-la' gatia'. <sup>10</sup> Ca'an guca, da nadxixruj bea na' naca na chee gunna na neda' xel-la nabán, san guca na chia' ca tu da bete neda' <sup>11</sup> lawe' da ble'e da nadxixruj bea na' neda' da naca na dul-la, da na' guzú xe na neda', na' ne chee da nadxixruj bea na' guque be'eda' nabaga' zria, ne dxal-la' gatia'.

<sup>12</sup> Ca' naca na, da li naca lá'azxa da nadxixruj bea na. Da nadxixruj bea na' naca na lá'azxa, ne xrlátaje, ne chawe'. <sup>13</sup> ¿Ájazra naca da nigá? ¿Bete da nadxixruj bea xrlátaje na' neda'? ¡Cabata! Dul-la na' bete na neda', na' caní guque be'eda' naca na dul-la. Da nigá guque be'eda' ne chee da nadxixruj bea xrlátaje na', na' caní ble'e da nadxixruj bea na' da sbánle'e naca dul-la.

<sup>14</sup> Nezdú da nadxixruj bea na naca na da benna Be' Lá'azxa chee Dios dxi'u, san lu bela' dxen chia' naca' ca tu benne' nada'u, na' da naca' dxun na guna' dul-la. <sup>15</sup> Neda' quebe dxéajni'ida' da dxaca chia' lawe' da quebe dxuna' da dxaca lazra' guna', san da dxecuída' naca na da dxuna'. <sup>16</sup> Che dxuna' da calela da quebe dxaca lazra' guna', da na' dxenná da nadxixruj bea na naca na dul-la, na' nezda' xrlátaje naca da nadxixruj bea na. <sup>17</sup> Ca' naca na, quegá neda' dxuna' da na', san dul-la da zúale neda', le na' dxun na ca'. <sup>18</sup> Nezda' quebe bi zúale bela' dxen chia' da naca xrlátaje, lawe' da dexáz lazra' guna' da xrlátaje, san quebe dxezéqueda' guna' na. <sup>19</sup> Quebe dxuna' da xrlátaje da dxaca lazra' guna', san dxuna' da calela da quebe dxaca lazra' guna'. <sup>20</sup> Chee le na', che dxuna' da quebe dxaca lazra' guna', quebe naca neda' dxuna' na, san dul-la da zúale neda' dxun na ca'.

<sup>21</sup> Caní naca da dxaca chia': Gate dxaca lazra' guna' da xrlátaje, dxulé'e lawe

zúale da calela neda'. <sup>22</sup> Lu xichaj lázrdawa' dxedáneda' da nadxixruj bea Dios, <sup>23</sup> san dxeque be'eda' lu bela' dxen chia' zua tu da dxedábaga na ca da dxaca lazra', da naca da nadxixruj bea dul-la da zúale bela' dxen chia', na' dxenná be'e na neda'.

<sup>24</sup> ¡Edxugúa neda'! ¿Nu guselá neda' lu bela' dxen chia' da naché na neda' lu xel-la gute? <sup>25</sup> Xcalén Dios, Le' gungé na ne chee Xránadú Jesucrísto. Ca' naca, lu xichaj lázrdawa' dxuzúo cuina' lu na' Dios, san lu bela' dxen chia' naca' ca tu benne' nada'u lu na' da nadxixruj bea dul-la.

## 8

*Xel-la nabán da dxunna Be' Lá'azxa chee Dios dxi'u*

<sup>1</sup> Na'a, quebe zaj nabía xi' benne' ca' zaj naque' tuze nen Jesucrísto, benne' ca' québedxa dxeluné' da calela cáteze dxenná bea bela' dxen chee', san dxeluné' da xrlátaje cáteze dxenná bea Be' Lá'azxa. <sup>2</sup> Da nadxixruj bea na da dxunna Be' Lá'azxa, Béneea' dxunne' dxi'u xel-la nabán lawe' da nácadú tuze nen Jesucrísto, ba bsela' na neda' lu na' da bdxixruj be'e Moisés da dxulé'e na neda' naca' benne' dul-la, ne nabaga' zria, ne dxal-la' gatia'. <sup>3</sup> Ba ben Dios da quebe guca gun da bdxixruj be'e Moisés, ba gudúe' dul-la da zaj nabaga bénneache. Da nadxixruj bea na quebe guca gun na gundú da xrlátaje lawe' da nate ni'a na' bela' dxen cheedú. Chee le na' Dios gusel-le' Zrí'inequeze', na' guque' bénneache ca naca bela' dxen cheedú da xu'u na lu na' dul-la, chee gutie' ne chee dul-la cheedú, lawe' da nabágadú zria gátedú ne chee dul-la da zúale bela' dxen cheedú. <sup>4</sup> Caní bene' chee gaca gundú da nadxixruj bea na, dxi'u québedxa dxundú ca dxenná bea bela' dxen cheedú, san dxundú ca dxenná bea Be' Lá'azxa.

<sup>5</sup> Benne' dxeluné' ca dxenná bea bela' dxen chee' zaj dxe'e gunne xue da naca chee' bela' dxen chee', san benne' dxeluné' ca dxenná bea Be' Lá'azxa zaj dxe'e gunne xue da naca chee' Be' Lá'azxa. <sup>6</sup> Benne' zaj dxe'e gunne xue da naca chee' bela' dxen chee' welátequeze', san benne' ca' zaj dxe'e gunne xue da naca chee' Be' Lá'azxa xelaca bané', ne xelebea zri lazre'. <sup>7</sup> Benne' zaj dxe'e gunne xue chee' bela' dxen chee' dxelecuída' Dios, lawe' da quebe dxelaca lazre', ne quebe gaca xuluzúa cuine' lu na'



da nadxixruj bea Le'. <sup>8</sup> Chee le na' benne' dxelunę' ca da dxezá lazre' bela' dxen chee' quebe gaca xelunę' da dxezaca ba lazre' Dios.

<sup>9</sup> Le'e quebe dxunle ca dxenná bea bela' dxen cheele, san dxunle ca dxenná bea Be' Lá'azxa, lawe' da ba zúale Be' Lá'azxa chee' Dios le'e. Benne' quebe zúale Be' Lá'azxa le', Be' da nasel-la Cristo, quebe naque' bi chee' Cristo. <sup>10</sup> Lácala zua Cristo lu xichaj lázrdaule, lu bela' dxen cheele dxal-la' gátele, san lu xichaj lázrdaule ba xu'ule tu xel-la nabán cube lawe' da bca'ana Dios le'e xrlátaje. <sup>11</sup> Che zúale Be' Lá'azxa le'e, Be' chee' Dios, Bénnea' bsebanę' Jesucristo ládujla benne' gate, Léqueze Dios na', Bénnea' bsebanę' Le', gunne' xel-la nabán cube chee' bela' dxen cheele da gátequeze na. Da nigá gunę' ne chee' Be' Lá'azxa chee' Dios, Bénnea' zue' xichaj lázrdaule.

<sup>12</sup> Ca' naca na, bi bicha'dau', nabágadxu tu da gundxu, san quegá chee' gundxu ca dxenná bea bela' dxen cheedxu. <sup>13</sup> Che gundxu ca dxenná bea bela' dxen cheedxu, gátequezdxu, san che ne chee' Be' Lá'azxa guzúadxu chalá'ala da dxun bela' dxen cheedxu, na' gaca bandxu.

<sup>14</sup> Xúgute benne' ca' dxelún ca dxulé'e Be' Lá'azxa le', benne' caní zaj naque' bi chee' Dios. <sup>15</sup> Be' Lá'azxa da guzi' lu na'le quebe dxugu'e le'e lu xel-la dxezrebe ca benne' zaj nada'u, san dxunę' nácale bi chee' Dios. Ne chee' Be' Lá'azxa nigá dxennędxu: "Xrae", gate dxuláwizredxu Dios. <sup>16</sup> Léqueze Be' Lá'azxa nigá dxexechébelenę' be' nácadxu, dxennę' nácadxu bi chee' Dios. <sup>17</sup> Che nácadxu bi chee' ca', gácaqueze cheedxu da naca chee' Dios. Gaca cheedxu da dxal-la' gaca chee' Cristo che gudedxu xel-la zi' tu zren nen Le', chee' xegá'ana szrendxu tu zren nen Le'.

<sup>18</sup> Dxéqueda' ca xel-la zi' da dxededxu na'a quebe gutíl-lelebe na ca da xabáa da sidxu lu zra da za za'. <sup>19</sup> Da dxelezá lazre', ne da dxelebeza xúgute da nun Dios naca na chee' gulé'e Dios bi zaj naca be' bi chee' ca'. <sup>20</sup> Ca naca da nun Dios belexaca na dácheze, quegá ca gulaca lazre' le na, san lawe' da núnqueze Dios gaca na ca'. Benę' zua da dxelebeza lazre na <sup>21</sup> lawe' da xeledxúaj ca da nun Dios lu na' da dxuzríá xi' le na, chee' gaca ba neza chee' na tu zren nen bi ca' zaj naca bi ca' chee' Dios lu xel-la weselá cheębe' da naca xabáa.

<sup>22</sup> Nézquezdxu, ca zrin na'a zra, xúgute da nun Dios dxelebezre we' na, ne dxeledé na xel-la zi' ca tu nu'ula zue' xel-la dxudía chee' sane' bidau'. <sup>23</sup> Quegá tuze da na' nun Dios dxedé na xel-la zi', san cá'anqueze dxi'u dxededxu xel-la zi', dxi'u na' ba zúale Be' Lá'azxa dxi'u, da naca cheedxu tu da dxunna bea na da dxal-la' sidxu. Cá'anqueze dxi'u dxebezre lázredxu dxácatę na' dxebézadxu zra gulé'e Dios nácadxu bi chee' ca', gate na' gunne' cheedxu tu bela' dxen cube. <sup>24</sup> Lu da dxebeza lázredxu guládxu, san che gaca lé'edxu da dxebeza lázredxu, québedxa naca na tu da dxebeza lázredxu. Tu da ba dxelé'edxu, québedxa dxun na ba xen cueza lázredxu na. <sup>25</sup> Che da dxebeza lázredxu naca na tu da quebe gaca lé'edxu, dxun na ba xen cuézadxu na lu dute xel-la zren lazre' cheedxu.

<sup>26</sup> Cá'anqueze Be' Lá'azxa dxácalenę' dxi'u lu xel-la nate ni'a na' cheedxu. Quebe nezdxu guchálajlędxu Dios ca dxal-la' gundxu, san Léqueze Be' Lá'azxa dxue lazre' lau Dios waláz cheedxu, ne dxebezre lazre' ca da quebe dxezeque' nu nne. <sup>27</sup> Dios, Bénnea' dxennę'e da zua xichaj lázrdaudxu nézenę' da dxaca lazre' nne Be' Lá'azxa lawe' da dxue lazre' Be' Lá'azxa lau Dios cáteze naca da dxaca lazre' Dios waláz chee bi zaj naca be' chee'.

*Nácadxadxu wal-la ca tu benne' dx-ezrué'eng'*

<sup>28</sup> NezdXu dxuchine Dios xúgute da dxaca cheedxu chee' gucá'ana na dxi'u chawe', dxi'u na' nazrí'idxu Le', na' Le' bláwizre' dxi'u ca naca da nune' gunę'. <sup>29</sup> Benne' ca' bënbea Dios nédxudaute, ben Le' nédxudaute xelaque' ca naca Zrí'inequeze', chee' gaca Zrí'ine' na' Benne' blau ládujla zánete bi biche'. <sup>30</sup> Benne' ca' ben Dios nédxudaute ca xelaque', cá'anqueze bláwizre' le', na' benne' ca' bláwizre', cá'anqueze bca'ane' le' xrlátaje, na' benne' ca' bca'ane' xrlátaje, cá'anqueze bca'ana szrenqueze' le'.

<sup>31</sup> ¿Bizra nnadxu chee da caní? Che caní dxácale Dios dxi'u, ¿nuzra benne' seque' tábague' dxi'u? <sup>32</sup> Dios quebe bezúene' zi' gunne' dxi'u Zrí'inequeze', san bdee' Le' chee' gútię' waláz cheedxu. ¿Quebe gunne' cheedxu xúgute da ca' tu zren nen Zrí'ine'? <sup>33</sup> ¿Nuzra seque' bi nne chee benne' ca' ba gucá'a Dios le'? Léqueze Dios na' bca'ane' benne' ca' xrlátaje. <sup>34</sup> ¿Nuzra benne' seque' nne' zaj nabaga zria benne' ca'? Léqueze

Cristo gutie' waláz cheedxu, ne da naca na blaudxa, naque' Bénnea' bebán ládujla benne' gate, na' zue' chalá'a xabela chee Dios, ga dxue lazre' lau Le' waláz cheedxu. <sup>35</sup> ¿Nuzra seque' xecá'a dxi'u lu na' Cristo, Bénnea' nazrí'ine' dxi'u? ¿Wazeque' xel-la zi', u xel-la xache', u da nau zi' xuzre na dxi'u, u xel-la dxedún, u da dxugúa zra lánadxu, u da stebe, u xel-la gute? <sup>36</sup> Naca na ca da naxúaj na lu dizra' lá'azxa, dxenná na:

Lawe' da nácantu' bi chiu' zúaquezentu' gátentu' xúgute' zra.

Dxeluné' netu' ca zrí'la'dau' ba zaj zúaba' chee xelútie'-ba'.

<sup>37</sup> Lu xúgute' da caní nácadxadxu szren ca benne' dxelezué'ene', ne chee Bénnea' bzri'ine' dxi'u. <sup>38</sup> Chee le na' dxuxrén lazra' quebe bi de da seque' gucuasa na dxi'u lu na' Dios, Bénnea' nazrí'ine' dxi'u.

Ne xel-la gute, ne xel-la nabán, ne gubáz chee xabáa ca', ne be' xriwe' dxelenná bea,

ne xel-la waca chee be' xriwe' ca', ne da dxaca na'a, ne da za za',

<sup>39</sup> ne da zua xabáa, ne da zua lu xezr la xu, ne xetú da nun Dios, quebe seque' xecá'a na dxi'u lu xel-la zri'i lazre' chee Dios,

da blé'ene' dxi'u gate bdeé' Xránadxu Jesu-cristo waláz cheedxu.

## 9

### *Dios guqu'é'g benne' Israel ca'*

<sup>1</sup> Dxenná' da li ca bi chee Cristo, ne quebe dxun lazra', na' xichaj lázrdawa' ne chee Be' Lá'azxa dxé na neda' naca na da li. <sup>2</sup> Dxexíaje lázre'eda', ne tu zúazqueze xel-la dxudía lu lázrdawa', <sup>3</sup> na' dxezá lázrtea' cuía xi'a neda', ne xecuasa' nen Cristo, la naca da nigá da gácale na bi bícha'dau' ca', benne' waláizr chia', benne' judío. <sup>4</sup> Benne' caní zaj naque' zri'ine' zre sua Israel, na' Dios guz' lu ne'e benne' caní ca bi chee' ca'. Dios guzúe' ládujla benne' ca' lu da xabáa chee', ne bene' tu xel-la wezrí nen benne' ca', ne bnézruje' le' da nadxixruj bea na da bzuaj Moisés, ne xel-la wil-la chee xudau', ne da nachebe lazre'. <sup>5</sup> Zaj naque' zri'ine' zre zua xra xrtáudxu ca', na' ládujla benne' waláizr chee' ca', lu belá' dxen chee' bla' Cristo, Bénnea' naque' Dios lawe' xúgute' da de, ne gaca báqueze' chadía chacanna. ¡Ca' gaca na!

<sup>6</sup> Quebe nnadxu quebe dxun Dios da dxenná xrtizre', san da naca na, quegá xúgute' zri'ine' zre sua Israel zaj nababa benne' Israel ca' chee' Dios. <sup>7</sup> Quegá xúgute' zri'ine' zre sua Abraham zaj naca xánnie' zri'inequeze', san naca na ca guzre Dios le', gunné': "Lu zri'ine' zre sua Isaac xelaca zri'ine' zre su." <sup>8</sup> Da nigá dxul'é na dxi'u quebe nu naca bi chee' Dios cáteze nálajbe', san zaj naca bi chee' benne' ca' zaj nálaje' ca naca da guchebe lazre' Dios. <sup>9</sup> Ca naca da guchebe lazre' Dios da gunné' chee' Abraham naca na da nigá: Lu zra da ba gunnía' xida', na' Sara chiu' sané' tu zri'inu'.

<sup>10</sup> Quegá tuze da nigá, san cá'anqueze gate Rebeca guzrá' chupa zri'ine' naca tuze xrabe', Isáac, xra xrtáudxu, <sup>11-13</sup> ne gate bi ca' quebe ne xelálajbe', ne quebe ne xelunbe' da xrlátaje u da calela, Dios guzre' Rebeca: "Bi waca chiu' gácabe' wen zrin chee' bi cuide'." Da nigá naca na tuze nen da naxúaj lu dizra' lá'azxa, da dxenná na: Bzri'ida' Jacob, ne quegá Esaú. Ca' guca na, begá'ana chawe' da xu'u lu na' Dios chee' gudxé' ca naca da núnqueze', benne' ca' dxaca lazre' guláwizre', ne quebe dxuché'e ca da zaj nune'.

<sup>14</sup> ¿Bízraqueze nnadxu? ¿Naca Dios Benne' quebe dxun da xrlátaje? ¡Cabata'!

<sup>15</sup> Guzre' Moisés: "Wezrí lazra' benne' dxaca lazra', ne wexache lazra' benne' dxaca lazra'." <sup>16</sup> Ca' naca na, quebe naca lawe' da dxaca lázredxu, ne quegá lawe' da dxun zi' lázredxu, san naca na lawe' da dxexache lazre' Dios dxi'u. <sup>17</sup> Lu dizra' lá'azxa Dios dxé'e wenná bea chee' xezr la xu Egipto: "Bena' lue' wenná bea chee' gulé'eda' ne chiu' lue' xel-la waca chia', ne chee' xelún-bea bénneache La neda' du gabí'i xezr la xu." <sup>18</sup> Ca' naca na, Dios dxexache lazre' benne' dxaca lazre', ne cá'anqueze dxu'e lataj gaque' zizraj lazre' benne' dxaca lazre' gu'e lataj gaque' zizraj lazre'.

<sup>19</sup> Na'a xi'u neda': Che caní naca na, ¿bizr chee' na' dxugapa Dios bénneache dul-la? ¿Núzraqueze seque' tábaga ca da dxaca lazre' Le'? <sup>20</sup> Lue', benne', ¿nuzra nacu' lue' chee' gutil-lu' Dios dizra'? ¿Waca tu xesu' xé na benne' bene' le' na: ¿Bizr chéé na' benu' neda' caní? <sup>21</sup> Benne' wen xesu' zruaga na' wazéquene' guné' chee' guna' na' ca dxaca lazre'. Wazéquene' guné' chee' guna' ná'queze tu xesu' da zácadxa, ne tu xesu'

da xálaze. <sup>22</sup> ¿Bizra nnáquezdxu che Dios guca lazre' gulé'ene' dxi'u ca dxuzría xi'e bèneache, ne ca naca xel-la waca chee', na' lu xel-la zren lazre' chee' bchaga lawe' chee benne' ca' lácala dxal-la' xeledé' le' xel-la zi', na' xelebía xí'tequeze'?

<sup>23</sup> Bene' na chee blé'ene' ca naca xel-la szren chee da xabáa chee' lu da naca cheedxu dxi'u, nácadxu benne' dxexache lazre' Le', ne bequé' dxi'u nédxute chee gaca cheedxu xabáa na' da nucueza Le'.

<sup>24</sup> Dios bláwizre' dxi'u ládujla benne' judío, ne ládujla benne' quebe zaj naque' judío.

<sup>25</sup> Naca na ca naxúaj na lu dizra' lá'azxa ca gunná Oseas, gunné':

Benne' ca' quebe zaj naque' bi chia', xapa' le' bi chia',

na' benne' quebe bzri'ida', xapa' le' bi nazri'ite lazra'.

<sup>26</sup> Lu lataj naga gucha'-be': Quebe nácale bi chia',

ná'queze xapa' le' bi chee Dios ban.

<sup>27</sup> Ca naca chee benne' Israel ca', Isaías dxenné': "Lácala zaj naxán zri'ine zre sua Israel ca naxán xuzre' dxe' dxu'a tu xegu zren, bábaze benne' ca' xelexegá'ane' chee xelelé'", <sup>28</sup> lawe' da gun Xránadxu ca dxenná xrtizre', guzría xi'e zezr la xu nigá lu da naca xrlátaje, ne chadite. <sup>29</sup> Naca na ca gunná lé'queze Isaías na' gate nate, gunné':

Chela Xránadxu, Xrana zánete gubáz chee xabáa, quebe bca'ane' zri'ine zre súadxu ca',

na' xenítedxu ca guca chee xezre Sodoma, ne chee xezre Gomorra.

*Benne' judío ca', ne dizra' chawe'*

<sup>30</sup> ¿Bízraqueze nnadxu? Benne' quebe zaj naque' judío, ne quebe belexé'íaj lazre' xelexegá'ane' xrlátaje lau Dios, zaj naque' benne' belexegá'ane' xrlátaje lau Dios, da zéaje na, belexegá'ane' xrlátaje lawe' da guleajlí lazre' Cristo. <sup>31</sup> Benne' Israel ca', benne' belune' ca dxenná da nadxixruj bea na da dxal-la' xucá'ana na le' xrlátaje lau Dios, quebe gulezé'quene' xelexegá'ane' xrlátaje lawe' Le'. <sup>32</sup> ¿Bizr chee na'? Naca na lawe' da quebe belune' ba xuzre xelexegá'ane' xrlátaje ne chee xel-la dxejlí lazre' chee', san gulaca lazre' xelexegá'ane' xrlátaje ne chee da belúnqueze' le'. Chee le' na' xejlecházíe' lawe' xiaj da dxelehegu bèneache, da na' naca Cristo

<sup>33</sup> ca da dxenná Dios lu dizra' lá'azxa chee', dxenné':

Neda' dxuzúa' lu xezre Sión tu benne' naque' xiaj da dxelehegu bèneache.

Nu benne' cheajlí lazre' Le' quebe xedué'eqezne'.

## 10

<sup>1</sup> Le'e, bi bícha'dau', da dxezá lazra', ne da dxenaba' Dios gune' chee benne' Israel ca' naca na chee xelelé'. <sup>2</sup> Ca naca chee benne' ca', da lí dxelebile lazre' da naca chee Dios, san quebe naca na chee xel-la sina lí. <sup>3</sup> Quebe zaj nézene' ca xrlátaje dxucá'ana Dios bèneache, san dxelaca lazre' xulucá'ana xrlátaje cuine', ne quebe dxelezi' lu ne'e ca xrlátaje dxucá'ana Dios bèneache. <sup>4</sup> Cristo dxung' da dxaca lazre' Dios gun da nadxixruj bea na, lawe' da dxucá'ana Cristo xrlátaje xúgute bèneache dxelejli lazre' Le'.

<sup>5</sup> Ca naca chee da dxucá'ana xrlátaje bèneache lau Dios da naca na ne chee da nadxixruj bea na, bzuaj Moisés caní: Benne' dxune' ca naca da dxenná da nadxixruj bea na gaca bané' ne chee le' na. <sup>6</sup> Ca naca chee da dxucá'ana xrlátaje bèneache lau Dios da naca na ne chee xel-la dxejlí lazre' dxenná na caní: Quebe nnau' lu lazrda'u: "¿Núzraqueze benne' cuéne' xabáa?" (da naca na chee gulétaje' Cristo), <sup>7</sup> ne quebe nnau': "¿Núzraqueze benne' xétaje' lataj chul-la chee benne' gate ca'?" (da naca na chee xebéaje' Cristo ládujla benne' gate.)

<sup>8</sup> ¿Bizra da na' dxenná na: Dizra' na' zua na gágute naga zu', lu dxu'u ne lu lazrda'u? Dizra' nigá naca na dizra' chawe' da dxuzénentu' bèneache chee xelájle' chee Cristo. <sup>9</sup> Che nen dxu'u dxennáu' naca Cristo Xranu', ne che lu lazrda'u dxejlí lazru' Dios bsebané' Le' ládujla benne' gate, nadxa lau'. <sup>10</sup> Lu lázrdaudxu dxejlí lázredxu chee xegá'anadxu xrlátaje lau Dios, ne nen dxú'adxu dxexchébedxu nácadxu chee Cristo chee laxdu.

<sup>11</sup> Lu dizra' lá'azxa dxenná na: Nu benne' dxejlí lazre' Le' quebe xedué'ene'. <sup>12</sup> Dios quebe dxebé'e' benne' judío ca', u benne' quebe zaj naque' judío lawe' da Lé'queze Xránadxu na' naque' Xrana xúgute bèneache, na' dxunézrujle' xúgute benne' ca' dxululáwizre' Le'. <sup>13</sup> Naca na ca da dxenná na: Xúgute benne' dxululáwizre'

La Xránadxu xelexé'. <sup>14</sup> Na'a ¿ájazra xululáwizre' Le' che quebe ne xeléajle'e chee'? ¿Ájazra xeléajle'e chee' che quebe ne xelenne' nu dxuchalaj chee'? ¿Ájazra xelenne' che quebe nu chilá' benne' guzenne' le'? <sup>15</sup> ¿Ájazra xuluzenne' bènneache che quebe nu nasel-la le'? Naca na ca dxenná dizra' lá'azxa, dxenná na: Xrtante naca lau Dios da dxelún benne' dxeledé' dxuluzenne' bènneache dizra' chee' xel-la dxebeza zri lazre', ne dizra' chawe'.

<sup>16</sup> Quegá xúgute bènneache dxelezi' lu ne'e dizra' chawe' nigá. Naca na ca gunná Isaías, gunné': "Xran, ¿zua nu benne' ba guxéajle'e ca da dxuchálajntu?" <sup>17</sup> Ca' naca na, dxéajledxu chee' gate dxénedxu, na' da dxal-la' xénedxu naca na da gunná Cristo.

<sup>18</sup> Na'a dxenaba': ¿Quebe ne xelenne'? Da li ba belenne'. Lu dizra' lá'azxa dxenná na: Da dxuluzén benne' caní bache belén bènneache du ca naca xezr la xu nigá.

Dizra' chee' benne' caní bache belén bènneache du gabí'i xezr la xu.

<sup>19</sup> Xecha lasa dxenaba': ¿Quebe ne xeque be'e benne' Israel ca da gunná Dios? Za'a Moisés bzuaje' ca gunná Dios, gunné': Neda' guna' gácale benne' se lazre' chee' tu xezre benne' quebe ne xelaque' tu xezre.

Guna' zrá'ale tu xezre benne' quebe ne xeléajni'ine'.

<sup>20</sup> Gudé na' bzuaj Isaías ca gunná Dios, gunné': Benne' quebe belexíajle' neda' belexezrélene' neda'.

Ble'e lawa' benne' ca' quebe bululáwizre' neda'.

<sup>21</sup> Ca naca chee' benne' Israel, gunná Dios: "Tu dxuláwizrazqueza' benne' quebe dxuluzé' dizra', ne dxeledábague' xrtizra'."

## 11

*Nu benne' Israel ca' zaj nalé'*

<sup>1</sup> Na'a dxenaba': ¿Ba bzua Dios chalá'ala xezre chee', benne' Israel ca', tu chí'izqueze? ¿Cabata! Néda'queza' naca' benne' Israel. Neda' nabábalena' zri'ine zre sua Abraham, ne nabábalena' zri'ine zre sua Benjamín. <sup>2</sup> Gate nate Dios guzi' lu ne'e benne' Israel ca', na' na'a quebe nuzúe' benne' ca' chalá'ala. ¿Quebe nézele le'e da dxenná dizra' lá'azxa ca naca chee' Elías, bènnea' bchálajle' waláz

chee' Dios, gate na' gudawe' zria benne' Israel ca' lau Dios? Gunné': <sup>3</sup> "Xran, ba belútie' benne' buluchálajle' waláz chiu', ne buluzría xi'e lataj lá'azxa chiu' ca', na' tuza' neda' nagá'ana', na' cá'anqueze neda' dxelaca lazre' xelútie'." <sup>4</sup> Dios bechêbe', guzre' Elías: "Ba gucá'a chia' ga xun chí gaxúa benne' quebe ne xuluzúa zribe' lau bedáu' xiaj xaga le' na Baal." <sup>5</sup> Cá'anqueze na'a ba begá'ana tu cue' benne' ca', benne' ba gucá'a Dios chee' lu xel-la zri'i lazre' chee'. <sup>6</sup> Na'a, che naca na ne chee' xel-la zri'i lazre' chee' Dios, quebe naca na ne chee' da gaca gun nu benne', lawe' da la guca na ca', na' xel-la zri'i lazre' chee' Dios quebe naca na xel-la zri'i lazre'.

<sup>7</sup> ¿Bizra xca'? Benne' Israel ca' quebe belezrué'ene' da dxelexíajle', san benne' ca' gucá'a Dios le' belezrué'ene' na, san xezícaxa benne' ca' gulaque' benne' zide'. <sup>8</sup> Naca ca dxenná dizra' lá'azxa, dxenná na: Dios be'e lataj gulaca benne' ca' lázrdau zide'. Be'e le' lataj gulaque' ca benne' la chul-la, ne ca benne' cwezru' ca', na' caní zaj naque' na'a. <sup>9</sup> Cá'anqueze gunná David, gunné':

Ca naca laní chee' benne' ca' ben xelaca na ca tu xralaj, u ca tu da que'la na le' chee' cheajlecházie', na' gudé Dios le' lu da ba xa'.

<sup>10</sup> Xiaj lawe' xelechul-la na chee' québedxa xelexé'ene', na' xelexégü'e' chadía chacanna zran xua da naca na dul-la chee'.

*Ca zaj nalá benne' quebe zaj naque' judío*

<sup>11</sup> Na'a dxenaba': ¿Tu chí'ize belenite benne' judío ca' gate xeajlecházie'? ¿Cabata! Gate benne' judío ca' guledábague' xrtizra Dios, guta' lataj xelexé' benne' quebe zaj naque' judío, chee' xelexú'a benne' judío ca' lu xel-la dxezá' lazre'. <sup>12</sup> Na'a, che da zrinna' da belún benne' judío ca' ben na guca tu da ba neza chee' xúgute bènneache, ne che gate belenitie' guca na tu da ba neza chee' benne' quebe zaj naque' judío, gaca na tu da ba neza zrendxa gate xelexú'u xúgute benne' judío ca' lu na' Dios.

<sup>13</sup> De tu da dxal-la' xapa' le'e, núlale quebe nácale benne' judío. Lawe' da gusella Dios neda' chee' guzenda' benne' quebe zaj naque' judío xrtizre', dxé'le'a gunne xue chee' zrin nabaga' guna'. <sup>14</sup> Dxaca lazra'

guna' xelexúa lu xel-la dxezá lazre' bal-la benne' waláZR chia' chee xelexé'. <sup>15</sup> Che gate bzua Dios chalá'ala benne' judío ca', belexaca tuze nen Dios benne' quebe zaj naque' judío, ¿ájazra gaca gate xelexaca benne' judío ca' tuze nen Dios? Gaca na ca xelexaca bane' ládujla benne' gate. <sup>16</sup> Che guzúadxu lau Dios xeta nedxu chee cua, na' nácaqueze chee' duté' cua na'. Na' che naca chee' Dios lue xaga, zaj nácaqueze chee' ca naca zruze xaga na'.

<sup>17</sup> Benne' judío ca' zaj naque' ca zrúzequeze tu xaga olivo, san bal-la zruze guledxugu na, na' lue' beda'u waláz chee zruze ca', ne nacu' ca tu zruze xaga olivo xixre'. Ca'an guca, gucu' tuze nen lue xaga olivo chawe' na', ne dxezi'u ba neza xel-la nabán chee xaga olivo na'. <sup>18</sup> Quebe gucá'ana szren cuinu' lawe' zrúzequeze xaga olivo na'. Che dxucá'ana szren cuinu', naca be'e quebe dxugagu' lue' lue xaga na', san luéqueze na' dxugagu na lue'.

<sup>19</sup> Wannáu': Awe', guledxugu zruze ca' chee cheajxedá'a neda' le'e xaga olivo na'. <sup>20</sup> Ca'an naca, san guledxugu na lawe' da quebe guléajle'e chee' Dios, na' lue' bedá'azu' le'e xaga na' lawe' da dxéajle'u. Ca'an naca, quebe gucá'ana szren cuinu', san bxue xanne' cuinu'. <sup>21</sup> Che Dios quebe bnite lawé' chee' benne' ca' zaj naque' ca zrúzequeze xaga na', na' bebéajé' le', cá'anqueze quebe gunite lawé' chiu' lue', na' xebéajé' lue'. <sup>22</sup> Le nna'xque ca xrlátaje naca Dios, na' cá'anqueze ca snia naque'. Guque' snia nen benne' ca' xejlecházje', na' naque' chawe' nen lue'. Dxun na ba xen tu gúnzquezu' ca dxal-la' gunu' chee tu sí'zquezu' da chawe' chee', lawe' da che quebe gunu' caní, cá'anqueze wegüé' lue'.

<sup>23</sup> Che benne' judío ca' xelexexéaj lazre', na' xelexaque' tuze nen xaga olivo na', lawe' da napa Dios xel-la waca xuné' le' tuze. <sup>24</sup> Lue' quebe nacu' judío, san guchugue' lue' le'e tu xaga olivo xixre', na' bexune' lue' tuze nen xaga olivo chawe' na', da quebe nu dxun. Benne' judío ca', benne' zaj naque' ca zrúzequeze xaga olivo chawe' na', gácadxa chawe' xexuné' le' tuze nen xaga olivo cheéqueze' na'.

*Ca xelexú'u benne' judío lu na' Dios*

<sup>25</sup> Le'e, bi bícha'dau', dxaca lazra' chéajni'ile chee' da nagache nigá, chee' quebe

guéquele nácale benne' sina. Benne' Israel ca' zaj naque' benne' lázrdau zide' tu chí'idauze, ca zrin zra xelexú'u lu na' Dios xúgute' benne' quebe zaj naque' judío. <sup>26</sup> Gate gaca na, nadxa xelexá xúgute' benne' Israel ca' lawe' da naxúaj lu dizra' lá'azxa da dxenná na:

Benne' weselé ze'e Sión,  
na' cue' da calela da zaj nabaga zri'ine zre sua Jacob.

<sup>27</sup> Da nigá gaca xel-la wezría guna' nen benne' ca', gate neda' cua' dul-la chee'.

<sup>28</sup> Ca naca chee' dizra' chawe' chee' Cristo, zaj naca benne' judío ca' ca benne' dxelecuídené' Dios chee' gaca da ba neza chee' le'e, san Dios ne nazrí'ine' benne' ca' lawe' da guqué'e xra xrtawe' ca'. <sup>29</sup> Ca da dxunna Dios, quebe xequé'e na, ne quebe dxuzúe' chalá'ala nu ba bláwizre'. <sup>30</sup> Le'e nédxute' gudábagale xrtizra Dios, san na'a, lawe' da guledábaga benne' judío ca' xrtizre', Dios dxexache lazre' le'e. <sup>31</sup> Cá'anqueze na'a, benne' judío ca' dxeledábague' xrtizra Dios, san naca na chee' xexache lazre' Dios le' ca dxexache lazre' le'e. <sup>32</sup> Dios be' lataj xúgute' guledábague' xrtizre' chee' gaca xexache lazre' xúgute'.

<sup>33</sup> Szrenté naca xel-la gunní'a chee' xel-la sina, ne xel-la dxéajni'i chee' Dios. Quebe séquedxu chéajni'idxu ca da dxuchi'e, ne quebe gaca gúnbea xánnedxu da dxuné'. <sup>34</sup> ¿Núzraqueze gaca chéajni'i ca da xu'u xichaj lázrdau Xránadxu? ¿Núzraqueze gaca guzéajni'i le'? <sup>35</sup> ¿Núzraqueze benne' bi bnézruje' chee' Xránadxu, chee' gun na ba xen bi xuzri'e chee' bénnea'? <sup>36</sup> Xúgute' da dxelé'edxu zá'aca na lu na' Dios, na' Le' bène' da ca', ne zaj naca na chee' Léqueze'. ¡Gaca ba Dios chadía chacanna! ¡Ca'an gaca na!

## 12

*Da dxal-la' gun benne' naque' bi chee' Dios*

<sup>1</sup> Ca'an naca, bi bícha'dau', lu xel-la dxexache lazre' chee' Dios, dxata' xúda' le'e guzúa cuínale lu na' Dios ca tu guna' ban, da naca na lá'azxa, ne da xezaca ba lazre' Dios. Da nigá naca na tu da gucá'ana szrene Dios da dxal-la' gunle. <sup>2</sup> Québedxa gunle ca dxelún bénneache chee' xezr la xu nigá, san le guchá cuínale chee' caní zra duté ca naca lu xichaj lázrdau. Ca'an gaca, gúnbeale da dxaca lazre' Dios gunle, da na'

naca xrlátaje, ne da dhexaca ba lazre' Dios, ne da naca na li lazre'.

<sup>3</sup> Ne chee da nusebaga Dios neda' lu da chawe' chee' dxapa' xúgutele le'e quebe nu benne' dxal-la' gucá'ana cuine' szrendxa ca dxal-la' gungé', san dxal-la' guxúe' ca da naque' lu xel-la dxexrui lazre', cáteze naca xel-la dxeajlí lazre' da nunezrui Dios le'. <sup>4</sup> Ca naca chee bel-la' dxen cheedxu, zánete da napa na, na' xúgute da ca' quebe dxelín na tuze zrin, <sup>5</sup> cá'anqueze dxi'u, láqueze naxandxu, nácadxu ca tuze bel-la' dxen chee Cristo, ne nácadxu tuze tudxu xetudxu ca zaj naca da ca' napa tu bel-la' dxen chee nu benne'.

<sup>6</sup> Dios nunne' dxi'u cha cheedxu ca da gaca gundxu ca da dxaca lazre' gunne' tu tudxu. Dخال-la' guchine xánnedxu ca da nunne' dxi'u.

Che nunne' dxi'u chee guchálajdxu waláz chee', dxal-la' gundxu na duté xel-la dxeajlí lazre' da nápadxu.

<sup>7</sup> Che nunne' dxi'u chee gundxu zrin chee ljwézredxu,

dxal-la' gundxu na cháwe'dau'.

Che nunne' dxi'u chee gusededxu bèneache,

dxal-la' gusede xánnedxu le'.

<sup>8</sup> Che nunne' dxi'u chee gutípadxu lazre' bèneache,

dxal-la' gutipa xánnedxu lazre' le'.

Che nunne' dxi'u chee bi gunézrujdxu,

dxal-la' gundxu na du lázredxu.

Che nunne' dxi'u chee nne xuedxu,

dxal-la' guxúe xánnedxu ca dxundxu na.

Che nunne' dxi'u gácaleđdxu benne' xache' ca',

dxal-la' gundxu na duté xel-la dxebe cheedxu.

<sup>9</sup> Le zri'i ljwézrele du lázrele tule xetule.

Le guzúa chalá'ala da caleļa, ne le gun da xrlátaje.

<sup>10</sup> Dخال-la' zri'i ljwézrele tule xetule ca nazri'ile bi bíchequeze.

Le gapa ba lá'ana ljwézrele, ne le güe lataj tule xetule.

<sup>11</sup> Le gun zi' lázrele, ne quebe gácale zrawede,

na' le gun zrin chee Xránadxu duté lázra-daule.

<sup>12</sup> Le sua xel-la dxebe lu da dxebeza lázrele. Le gaca dxexrui lazre' gate dxedele xel-la zi'.

Le guchálajleze Xránadxu.

<sup>13</sup> Le gunezrui da dxelexazrje benne' ca' zaj naque' bi chee Dios.

Le si' lu na'le du lázrele benne' ca' zá'aque' dxelenabe' le'e.

<sup>14</sup> Le naba da chawe' chee benne' ca' zaj nau zi' xuzre' le'e.

Le naba da xrlátaje chee', ne quebe nábale da caleļa chee benne' ca'.

<sup>15</sup> Le be nen benne' dxelebé, ne le xexache lazre' benne' ca' dxelebezre xache'.

<sup>16</sup> Le gaca tuze nen ljwézrele tule xetule.

Quebe gucá'ana szren cuínale, san le gaca tuze nen benne' dxexrui lazre' ca'.

Quebe guéquele ba nápale duté xel-la sina.

<sup>17</sup> Quebe xebi'ile da caleļa chee benne' nunne' chee da caleļa.

Le gun ba xuzre gunle da xrlátaje lau xúgute bèneache.

<sup>18</sup> Che naca chee, le gun naga ze lau séquele cueza zri lázrele nen xúgute bèneache.

<sup>19</sup> Bi bícha'dau' nazri'ite lazra', quebe xebéaj lázrele, san le güe lataj Dios xebéaj lazre', lawe' da naxúaj lu dizra'

lá'azxa da dxenná na: Chia' neda' naca xebéaj lazra'.

“Neda' xebi'a chee bèneache,” dxenná Xránadxu.

<sup>20</sup> Cá'anqueze dxenná na: Che dxedún benne' dxecuí-dene' lue', bnezrui da gawe', na' che dxe-bílene', bnezrui da xí'aje', lawe' da gate

dxunle caní, xedu'e e bènea'.

<sup>21</sup> Quebe gu'u lataj da caleļa nna be'e na lue', san gunná be'e da caleļa ne chee da xrlátaje da dxunu'.

## 13

<sup>1</sup> Xúgutedxu dxal-la' guzúadxu dizra' chee benne' xu'u lawe', lawe' da quebe nu chilá' benne' xu'u lawe' che quebe nunna

Dios le' xel-la dxenná bea chee'. Benne' xu'u lawe' ca' zaj naque' benne' nuzúia Dios.

<sup>2</sup> Chee le na' nu benne' dxedábage' benne' xu'u lawe' dxedábage' ca da nun Dios.

Benne' dxeledábage' caní zaj nabague' zria, na' Dios xuzri'e chee' da xexal-le'.

<sup>3</sup> Benne' ca' dxeleenná be'e quebe nuzúia Dios le' chee xuluchebe' benne' dxelune'

da xrlátaje, san chee xuluchebe' benne' dxelune' da caleļa.

¿Dxaca lazru' quebe zrebu' benne' xu'u lawe'?

Ben da xrlátaje, na' benne' xu'u lawe' ca' xelape' ba lá'ana lue' <sup>4</sup> lawe' da zaj naque' wen zrin chee Dios chee xelune' chiu' da xrlátaje.

Che dxunu' da calela, dxal-la' zrebu' lawe' da quegá dácheze zaj nape' xel-la dxenná bea xelexebi'e chee béneache lawe' da zaj naque' wen zrin chee Dios chee xuluzúe' lu da ba xa' benne' ca' dxelunge' da calela. <sup>5</sup>Chee le na', dxun na ba xen guzúadxu dizra' chee benne' xu'u lawe', quegá tuze chee quebe xuluzúe' dxi'u lu da ba xa', san lawe' da nezdxu naca na da nadxixruj bea Dios. <sup>6</sup>Chee le na' dxízruje da dxebagale chee xu'u lawe', lawe' da zaj naca benne' xu'u lawe' wen zrin chee Dios, ne dxelún xánnie' zrin chee' na'.

<sup>7</sup>Le quizruj xúgute béneache ca da nabá-gale chee'.

Da nabágale chee benne' wechizruj, le quizruj da nabágale.

Da nabágale chee xu'u lawe', le quizruj na. Benne' dxal-la' gápale ba lá'ana, le gape' ba lá'ana.

Benne' dxal-la' gucá'ana szrenle, le gucá'ane' szren.

<sup>8</sup>Quebe dxal-la' cue zria chee nen nu benne' san tuze chee zri'ile le' ca dxal-la' gunle chee le sa' ljwezrele tule xetule. Che gunle da nigá, na' gunle da nadxixruj bea na. <sup>9</sup>Naga zaj naxúaj da nadxixruj be'e Dios dxenná na:

Quebe súalenu' zru'ula benne' xula.

Quebe gutiu' benne'.

Quebe cuanu'.

Quebe gun lazru' chee benne'.

Quebe sa lazru' da naca chee benne'.

Xúgute da nadxixruj bea caní, ne xúgute da nadxixruj bea xezícadxa dxun béneae' dxuzúe' dizra' da nadxixruj bea na' dxenná na: Bzri'i le sa' ljwezru' ca nazrí'i cuinu'. <sup>10</sup>Béneae' nazrí'ine' le sa' ljwezre' quebe dxune' da calela chee le sa' ljwezre' na'. Ca'an naca, béneae' nazrí'ine' le sa' ljwezre' dxuzúe' dizra' chee da nadxixruj bea na.

<sup>11</sup>Ca naca da caní, le guxúe xanne' ca naca zra zúadxu na'a lawe' da ba bzin zra xebandxu lu bchigala lawe' da ba zua gágudxa zra ladxu lu da nácadxu ca guzúa na gate na' guzú lau dxéajledxu. <sup>12</sup>Ba dxedé chee da chul-la, ne ba za te zra. Chee le na' dxal-la' gusandxu da dxelún béneache lu da chul-la, na' gácadxu ca tu benne' zeje' wedil-la dxacu zra lané' xia, chee tadxu lu xel-la naxaní' chee Dios.

<sup>13</sup>Dxal-la' tadxu li lazre' ca dxal-la' tadxu te zra.

Quebe dxal-la' xí'ajdxu da dxuzuzre na bèneache,

ne quebe gagu xrátadxu.

Quebe gundxu da sban, ne da calela.

Quebe tíl-lalédxu le sa' ljwézredxu,

ne quebe gácadxu xa lazre'.

<sup>14</sup>Xránadxu Jesucristo gácaqueze' ca zra lánadxu xia, na' quebe gundxu da dxezá lazre' be'la' dxen cheedxu.

## 14

*Quebe si tizru' biche ljwezru'*

<sup>1</sup>Che tu bi bíchedxu quebe ne se cháchabe' lu xel-la dxeajlí lazre', le si' lu na'le lebe', san quegá chee gutíl-lalele lebe' dizra' ca naca da quebe dxun na ba xen. <sup>2</sup>Ca naca na, zaj zra' benne' dxeleajlí lazre' naca chee' xelawe' bal-la bi de, san zaj zra' benne' xezícadxa quebe ne xezezé chache' lu xel-la dxeajlí lazre', na' dxeléquene' waca xelawe' tuze xixre' cuan. <sup>3</sup>Benne' dxawe' xúgute da ca' quebe dxal-la' guzúe' chala'ala béneae' nadxúaj nadxeze da dxawe', na' benne' nadxúaj nadxeze da dxawe' quebe dxal-la' si tizre' béneae' dxawe' bal-la bi de, lawe' da nazí' lu na' Dios béneae'. <sup>4</sup>¿Nuzra nacu' lue' dxezí tizru' wen zrin chee Xránadxu? Che xegá'ane' xrlátaje, u che quegá, naca na da nabaga Xránadxu. Xegá'ane' xrlátaje lawe' da napa Xránadxu xel-la waca chee gucá'ane' le' xrlátaje.

<sup>5</sup>Caní naca xetú. Zaj zra' benne' dxulupá'anadxe' tu zra ca xetú zra, na' zaj zra' benne' dxeléquene' tuz ca zaj naca xúgute zra. Tu tudxu dxal-la' se cháchadxu lu xichaj lázrdaudxu ca naca da caní. <sup>6</sup>Benne' dxupá'ane' tu zra dxune' na chee gape' ba lá'ana Xránadxu, na' béneae' quebe dxupá'ane' zra na' dxune' ca' chee gape' ba lá'ana Xránadxu. Benne' dxawe' bal-la bi de dxune' na chee gape' ba lá'ana Xránadxu lawe' da dxé'e Dios: Xcalenu', na' béneae' nadxúaj nadxeze da dxawe' dxune' na chee gape' ba lá'ana Xránadxu, na' cá'anqueze dxé'e Dios: Xcalenu'.

<sup>7</sup>Netudxu dxi'u naca bandxu chee gundxu da naca cheézedxu, ne quegá gátedxu lu da naca cheézedxu. <sup>8</sup>Che naca bandxu, naca na chee gaca ba Xránadxu. Ca' naca na, che gaca bandxu, u che gátedxu nácadxu bi chee Xránadxu. <sup>9</sup>Cristo gutie',

ne bebang' chee gaque' Xrana benne' gate ca', ne Xrana benne' ban ca'.

<sup>10</sup> Na'a lue', ¿bizr chee na' quebe dx-elé'enu' chawe' ca da dxun le sa' ljwezru', bi bíchedxu? ¿Bizr chee na' dxuzú' le' chalá'ala? Xúgute dxal-la' zrindxu lau Cristo chee guchi'e ca da nundxu tu tudxu.

<sup>11</sup> Naxúaj lu xiche lá'azxa da dxenná na:

Dxenná Xránadxu: "Dxuzetaj cuina' dxenná'":

Xúgute bènneache xuluzú zribe' lawa'.

Xúgute' xelexechebe' lawe' lau naca' Dios."

<sup>12</sup> Ca'an naca, tu tudxu dxi'u dxun na ba xen gulé'edxu ca da nundxu lau Dios.

<sup>13</sup> Chee le na' québedxa dxal-la' si tízradxu tudxu xetudxu. Le gun ba xuzre quebe bi gunle da gun na ga chegu bi bíchele, u da gun na cheajcházie' lu dul-la.

<sup>14</sup> Dxuxrén lazra' Xránadxu Jesús, ne nezda' quebe bi da dxágudxu nácaqueze sban, san che tu bi bíchedxu dxéquebe' de tu da dxágudxu da naca na sban, chee lebe' naca na da sban. <sup>15</sup> Che ne chee da dxagu' lue', dxunu' dxeajchaze bi bichu', quebe dxunu' da naca chee xel-la zri'i lazre'.

Quebe gunu' cuía xi' tu benne', bènnea' gute Cristo waláz chee', lawe' da dxaca lazru' lue' gagu' bi xel-la wagu. <sup>16</sup> Quebe bi gunle da güe lataj nu nne schanni' chee da dxéquele naca na da xrlátaje. <sup>17</sup> Chee súadxu naga dxenná be'e Dios dxi'u quebe naca na chee da dxágudxu, u chee da dxi'ajdxu, san naca na chee xegá'anadxu xrlátaje lau Dios, ne chee gápadxu xel-la dxebeza zri lazre', ne chee súadxu xel-la dxebe, da ca' nápadxu ne chee Be' Lá'azxa. <sup>18</sup> Nu benne' dxune' zrin chee Cristo caní dxune' da dxezaca ba lazre' Dios, na' dxelapa bènneache le' ba lá'ana.

<sup>19</sup> Ca' naca na, dxal-la' gundxu da dxulusá na xel-la dxebeza zri lazre', ne da dxuluzúa chacha na dxi'u. <sup>20</sup> Quebe guzría xi'u da nun Dios lu xichaj lázrdau le sa' ljwezru' ne chee da dxagu'. Da li xúgute da dxágudxu zaj naca na xrlátaje, san quebe naca xrlátaje bi gágudxu da gun na cheajchaze benne' xula lu dul-la. <sup>21</sup> Xrlátaje naca quebe gágudxu bela', ne quebe xi'ajdxu xrise uva wal-la, ne quebe bi gundxu da gun na cheajchaze bi bíchedxu lu dul-la, u da guzría xi na xel-la dxeajlí lazre' chee'. <sup>22</sup> Che napu' xel-la dxeajlí lazre' bi gaca gunu', dxal-la' gunu' na lué'queze lau Dios. Ba neza naca na

chee benne' quebe guzría xi' cuine' ne chee da dxéquene' naca na da xrlátaje guné'.

<sup>23</sup> Bènnea' dxawe' da dxéquene' quebe dxal-la' gawe', nabague' zria gate dxawe' na lawe' da dxawe' da quebe dxeajlí lazre' naca chee' gawe'. Xúgute da dxundxu zaj naca dul-la che quebe dxuxrén lázredxu zaj naca na xrlátaje.

## 15

*Ben da dxezaca ba lazre' bi bichu', ne quegá da dxezaca ba lázrezu' lue'*

<sup>1</sup> Dxi'u ba ze cháchadxu lu xel-la dxeajlí lazre' dxal-la' gácale dxu benne' quebe ne se chache' lu xel-la dxeajlí lazre', ne quebe gundxu da dxezaca ba lázredxu dxi'uze. <sup>2</sup> Tu tudxu dxal-la' gundxu da dxezaca ba lazre' bi bíchedxu lu da gun na chawe' cheebe', ne lu da gusegula na lebe' lu xel-la dxeajlí lazre' cheebe'.

<sup>3</sup> Cristoqueze quebe bene' da dxezaca ba lazre' leze', san guca chee' ca naxúaj na lu dizra' lá'azxa, dxenná na: Benne' ca' gulenné' schanni' chiu' Lue', Dios, guca na ca gulenné' schanni' chia' neda'.

<sup>4</sup> Xúgute da naxúaj nédxudauté lu dizra' lá'azxa zaj naxúaj na chee guzéajni'i na dxi'u, chee gápadxu xel-la dxebeza lazre' ne chee xel-la zren lazre', ne xel-la dxexúe zren, da ca' nápadxu ne chee da ca' zaj naxúaj na. <sup>5</sup> Dxenaba' lau Dios, Bènnea' dxunne' dxi'u xel-la zren lazre', ne dxexúe zrene' dxi'u, chee gácalene' le'e chee gácale tuze tule xetule ne chee Jesucristo, <sup>6</sup> chee gunle xúgute lu zren je lué' lá'anale Dios, Xra Xránadxu Jesucristo.

*Dxelén benne' quebe zaj naque' judío dizra' chawe'*

<sup>7</sup> Ca'an naca, chee gaca ba Dios, le si' lu na'le ljwézrele tule xetule ca ben Cristo, guz' lu ne'e dxi'u. <sup>8</sup> Ca da dxennéa' neda', dxennéa' bla' Cristo, ne bene' zrin chee benne' judío ca', chee bene' ca da guchebe lazre' Dios lau xra xrtáudxu ca', ne caní blé'ene' naca Dios li lazre'. <sup>9</sup> Cá'anqueze ble'e chee xelúe lá'ana Dios benne' ca' quebe zaj naque' judío lawe' da dxeache lazre' bènneache, ca da naxúaj na caní chee Cristo lu dizra' lá'azxa, dxenné': Güe lá'ana' lue', Dios, lau benne' xezr la xu

ca',

ne tu gul-lazqueza' da xelapa ba lá'ana Lue'. <sup>10</sup> Cá'anqueze dxenná na:

Le be, le'e, bènneache dute xezr la xu

ca',

ne tu gul-lazqueza' da xelapa ba lá'ana Lue'.

<sup>10</sup> Cá'anqueze dxenná na:

Le be, le'e, bènneache dute xezr la xu



nen benne' zaj naque' bi chee Dios.

<sup>11</sup> Cá'anqueze dxenná na:

Le güie lá'ana Xránadxu,  
le'e, bénneache chee xúgute xezr la xu,  
ne le guchalaj chee xel-la szren chee',  
le'e, xúgute bénneache.

<sup>12</sup> Cá'anqueze bchalaj Isaías ca naca chee Cristo, gunné':

Welá'queze tu zri'ine zre sua Isaí,  
Bénnea' nna bé'ene' xúgute cue' xezr la xu,  
na' benne' ca' xelebeza lazre' Le'.

<sup>13</sup> Dxenaba' Dios, Bénnea' dxunne' dxi'u xel-la dxebeza lazre', chee gúnnale'e le'e xel-la dxebé, ne xel-la dxebeza zri lazre' lawe' da dxeajlí lázrele Le', chee gá-pale'eqeuzle xel-la dxebeza lazre' ne chee xel-la waca chee Be' Lá'azxa.

<sup>14</sup> Le'e, bi bícha'dau', dxuxrén lazra' ná-pale'ele da chawe', ne núnbeale xúgute chee gaca guzėjani'ile ljwézrele tule xetule.

<sup>15</sup> Lu xiche nigá bechugu lazra' guzújaja' chee da caní chee quebe gal-la lázrele na. Dxuna' na ne chee da bsebaga Dios neda' lu da chawe' chee'. <sup>16</sup> Caní guna' zrin chee Jesucristo ládujla benne' quebe zaj naque' judío. Zrin dxuna' naca na chee guzenda' bénneache dizra' chawe' chee Dios chee guzrá'a benne' quebe zaj naque' judío lau Dios ca tu guna' da dxezaca ba lazre' Le'. Xelaque' benne' lá'azxa ne chee Be' Lá'azxa.

<sup>17</sup> Lu da naca' chee Jesucristo waca xezaca ba lazra' lu zrin dxuna' chee Dios <sup>18</sup>lawe' da quebe dxedxugu lazra' guchálaja', san tuze ca naca da nun Cristo ne chia' neda', chee guna' xuluzúa benne' quebe zaj naque' judío xrtizra Dios. Da nigá bəna' ne chee da bchálaja', ne da bəna', <sup>19</sup>ne ne chee xel-la waca chee da ble'e Dios, nen xel-la waca chee xabáa, ne ne chee xel-la waca chee Be' Lá'azxa. Caní bchálaja' dizra' chawe' chee Cristo du ca naca xezr la xu. Guzú lawa' dxuna' na xezre Jerusalén, bzrintea' naga nababa Ilírico. <sup>20</sup>Caní naca, bəna' ba xuzre bchálaja' dizra' chawe' naga quebe ne xelenne' La Cristo, chee quebe guna' zrin naga ba zaj nun zrin xezicadxə benne', <sup>21</sup>na', ca dxenná dizra' lá'azxa:

Xelelé'e benne' ca' quebe ne zrin nu benne' guzenne' le' chee Cristo,  
na' benne' ca' quebe ne xelén chee Le'  
xelėjani'ine da naca chee'.

*Pablo dxugú'u be'e chėjaj' xezre Roma*

<sup>22</sup> Chee guzenda' le'e da caní, da zan lasa guca lazra' xedajnná'a le'e zrale xezre Roma, san quebe guca chia'. <sup>23</sup>Na'a, ba bexuzre bəna' zrin nigá, ne lawe' da zánete iza ba guca lazra' xida' súaləna' le'e, <sup>24</sup>dxebeza lazra' tea' xedajnná'a le'e gate cha'a lu xezr la xu España. Gate te sua' xel-la dxebé nen le'e dxebeza lazra' xusi'ile neda' neza, na' cha'a ná'ala. <sup>25</sup>Na'a cha'a Jerusalén, gu'a late' da gácale na bi bíchedxu zaj zre'e na', <sup>26</sup>lawe' da bi bíchedxu zaj zre'e xezre ca' zaj nababa Macedonia, ne xezre ca' zaj nababa Acaya guléquene' naca xrlátaje bulutube' dumí da xelesel-le' chee bi bíchedxu zaj naque' baxache', zaj zrabe' Jerusalén. <sup>27</sup>Guléquene' naca xrlátaje xelune' da nigá, na' caní naca na lawe' da dxelebague' chee benne' ca', lawe' da benne' judío ca', benne' dxelėjale'e chee Cristo, bulunézruje' chee benne' quebe zaj naque' judío chee da zaj nape' chee Dios, na' benne' caní dxal-la' xulunézruje' chee benne' judío ca' chee da zaj nape' chee xezr la xu nigá. <sup>28</sup>Caní naca, gate xexuzre guna' da nigá, ne ba bnézruja' le' dumí nigá, na' cha'a lu xezr la xu España, na' ca teza' xedajnná'a le'e. <sup>29</sup>Dxuxrén lazra' gate xida' naga zrale le'e, gúale'a da chawe' chee dizra' chawe' chee Cristo.

<sup>30</sup>Le'e, bi bícha'dau', dxata' xúeda' le'e ne chee Xránadxu Jesucristo, ne ne chee xel-la zri'i lazre' da dxunna Be' Lá'azxa dxi'u, chee gácale tuze nen neda' guchálajledxu Dios chee gácaləne' neda'. <sup>31</sup>Le naba Dios chee guselé' neda' lu na' benne' quebe dxelėjale'e chee Cristo naga nababa Judea, ne chee xelezi' du lazre' bi bíchedxu zaj zre'e Jerusalén dumí nigá da nu'a, <sup>32</sup>na' che naca da dxaca lazre' Dios, la'a lu dutə xel-la dxebé xedajnná'a le'e, ne chee xezi' lazra' naga zrale le'e. <sup>33</sup>Dxenaba' Dios, Bénnea' dxunne' dxi'u xel-la dxebeza zri lazre', súaləne' xúgutele le'e. ¡Ca'an gaca na!

## 16

*Pablo dxugape' diuzre bi bíchedxu ca'*

<sup>1</sup>Dxegu'a lu na'le nu'ula zandxu Febe, nu'ula na' ba bəne' zrin chee Cristo ládujla bi bíchedxu zaj zre'e xezre Cencrea. <sup>2</sup>Le si' lu na'le le' cháwedau' lu La Xránadxu, ca dxal-la' gaca ládujla bi bíchedxu dxelėjale'e chee Cristo, na' le gácaləne' biteteze da

dxexájrjene', lawe' da ba gúcale le' benne' zan, ne neda'queza'.

<sup>3</sup> Le gugapa diuzre Priscila ne Aquilo, benne' belún zrin chee Jesucristo tu zren nen neda'. <sup>4</sup> Benne' caní buluzúe' xel-la nabán chee' lu da stebe chee gúcalene' neda'. Ca' naca na, dxapa' benne' ca' xcalenle, ne quegaze neda', san cá'anqueze dxelún xúgute bi bíchedxu quebe zaj naque' judío. <sup>5</sup> Le gugapa diuzre bi bíchedxu ca' dxelezzrágabe' lizre Priscila, ne Aquilo. Le gugapa diuzre Epeneto, benne' ljwezra' nazri'ite' lazra'. Le' guque' benne' nedxu naga nababa Acaya guxéajle'e chee Cristo. <sup>6</sup> Le gugapa diuzre María, nu'ula na' ba benle'e zrin ládujla le'e. <sup>7</sup> Le gugapa diuzre benne' walázzr chia', Andrónico, ne Junias, benne' ca' gulaque' ljwezra' lizre xía. Zaj naque' benne' blau ládujla benne' gubáz ca' chee Cristo, na' guléajle'e chee Cristo nédxudxa ca neda'.

<sup>8</sup> Le gugapa diuzre Amplias, benne' ljwezra' nazri'ite' lazra' lu La Xránadxu. <sup>9</sup> Le gugapa diuzre Urbano, benne' ljwezra' lu zrin chee Jesucristo, ne le gugapa diuzre Estaquis, benne' nazri'ite' lazra'. <sup>10</sup> Le gugapa diuzre Apeles, benne' blé'ene' da zan lasa ca dxeajlí lazre' Cristo. Cá'anqueze le gugapa diuzre Aristóbulo, benne' xrtia'. <sup>11</sup> Le gugapa diuzre Herodión, benne' walázzr chia', ne Narciso, benne' xrtia', benne' dxeléajle'e chee Xránadxu. <sup>12</sup> Le gugapa diuzre Trifena ne Trifosa, nu'ula ca' dxelune' zrin chee Xránadxu, ne le gugapa diuzre Pérsida, bi zandxu nazri'ite' lazrdxu, nu'ula na' ba benle'e zrin chee Xránadxu. <sup>13</sup> Le gugapa diuzre Rufo, benne' blau dxéajle'e chee Xránadxu, ne xrne'e, nu'ula na' naque' ca xrnáqueza'. <sup>14</sup> Le gugapa diuzre Asíncrito, ne Flegonte, ne Hermas, ne Patrobas, ne Hermes, ne bi bíchedxu ca' zralene' le'. <sup>15</sup> Cá'anqueze le gugapa diuzre Filólogo, ne Julia, ne Nereo, ne nu'ula zane', ne Olimpas, ne xúgute bi bíchedxu dxeajlí lazre' Cristo, benne' zralene' benne' caní.

<sup>16</sup> Le gugapa diuzre ljwézrele tule xe-tule, gunídate' ljwézrele. Xúgute cue' bi bíchedxu dxulugape' le'e diuzre.

<sup>17</sup> Le'e, bi bícha'dau', dxata' xúeda' le'e, nna' xánnele benne' ca' dxelune' chupa la'a bi bíchedxu ca', ne dxelune' dxeajlecházie' benne' ca', na' dxulusédenē' da dxedábaga

na ca da nusédele. Le cuasa naga zaj zra' benne' ca' <sup>18</sup>lawe' da quebe dxelún benne' ca' zrin chee Xránadxu Jesucristo. Dxelune' ca da dxezaca ba lazre' belá' dxen cheequeze', ne dxelezi xe'e benneáchedu ca' quebe ne xeleneze xámie' ca naca dizra' chawe'. Benne' wen lazre' ca' cadite zaj nupé'e, ne zaj nézene' da dxuluchála-je'. <sup>19</sup> Xúgute' bēnneache zaj nézene' ca ba bzúale xtizra' Dios. Chee le na' dxebeda', ne dxaca lazra' gácale ban lazre' gunle da xrlátaje, na' quegá gunle da calēla. <sup>20</sup> Dios, Bēnnea' dxunne' dxi'u xel-la dxebeza zri lazre' ba zúaqueze' gácalene' le'e, chee guchúchujle Satanás da xriwe'. Dxenaba' lau Xránadxu Jesucristo gune' gaca chawe' cheele.

<sup>21</sup> Bi bíchedxu Timoteo dxugápabe' le'e diuzre. Nácabe' ljwezra' lu zrin chee Cristo. Cá'anqueze dxulugape' le'e diuzre benne' walázzr chia' Lucio, ne Jasón, ne Sosípater.

<sup>22</sup> Neda', Tercio, dxuzúajja' xtizra' Pablo caní, dxugapa' le'e diuzre lu La Xránadxu.

<sup>23</sup> Gayo dxugape' le'e diuzre, bēnnea' zua' lizre', na' dxunne' lizre' naga dxelezzraga xúgute benne' bíchedxu caní. Cá'anqueze dxulugape' le'e diuzre Erasto, benne' xu'u lu ne'e dumí chee xezre, ne bi bíchedxu Cuarto.

<sup>24</sup> Dxenaba' Xránadxu Jesucristo gune' gaca chawe' chee xúgutele le'e. ¡Ca'an gaca na!

#### *Pablo dxue lá'anē' Dios*

<sup>25</sup> Na'a, dxue lá'anantu' Dios, Bēnnea' séquene' guzē cháchadxe' le'e lu dizra' chawe' da dxuzenda' bēnneache, ne lu da dxusédeda' ca naca chee Jesucristo. Da nigá naca na tuze nen da ble'e Dios chee da nagache da gulú'u chawe' bagácheze nédxudaute, <sup>26</sup>san na'a ba ble'e lawe' na ne chee dizra' lá'azxa da buluzúaj benne' ca' buluchálaje' waláz chee Dios, ca da bdxixruj be'e Dios chadía chacanna. Ba ble'e lau dizra' chawe' nigá na'a lau benne' xúgute xezr la xu chee xeléajle'e chee na, ne xuluzúe' dizra' chee na.

<sup>27</sup> Dios, Benne' tu licha', ne Benne' sina, gaca ba Le' chadía chacanna ne chee Jesucristo. ¡Ca'an gaca na!

## DIZRA' NEDXU DA BZUAJ SAN PABLO CHEE BI CHEE CRISTO ZAJ ZRE'E XEZRE CORINTO

*Pablo dxuzúajé' chee bíchedxu zaj zré'e  
xezre Corinto*

<sup>1</sup>Neda', Pablo, naca' benne' bláwizra Dios chee gaca' gubáz chee Jesucristo. Naca na da guca lazre' Dios gaca'. Tu zren nen bíchedxu Sóstenes <sup>2</sup>dxuzúaja' da nigá chee le'e, bi bicha', zrágale chee Dios lu xezre Corinto. Nácale bi chee Dios lawe' da nácale tuze nen Jesucristo. Dios ba bláwizre' le'e chee gácale bi cheequeze' tu zren nen xúgute' benne' ca' zaj zré'e du ca naca xezr la xu, ne dxululáwizre' La Xránadxu Jesucristo, Bénnea' naque' Xrane benne' ca', ne Xránadxu dxi'u. <sup>3</sup>Dxenaba' Xradxu Dios, ne Xránadxu Jesucristo gunne' le'e xel-la dxebeza zri lazre', ne gun chawe'e le'e.

*Da chawe' da nápadxu ne chee Cristo*

<sup>4</sup>Dxápequeza' Dios: Xcalenu', ca naca chee le'e ne chee Jesucristo. <sup>5</sup>Lawe' da nácale tuze nen Cristo, Dios ba benne' le'e xel-la gunní'a zanté da naca chee Be' Lá'azxa chee', lu da dxuchálajle, ne lu da nézele. <sup>6</sup>Ca' naca na, da dxuchálajdxu ca naca chee Cristo ba guca na li chee le'e. <sup>7</sup>Ca' naca na, quebe bi dxexájrjele ca da dxunna Dios dxi'u dxácaté dxebézadxu zra xelá' Xránadxu Jesucristo. <sup>8</sup>Le' guxru chache' le'e ca zrin zra bzébe, chee quebe nu benne' gaca gusebágué' le'e zrí gate xelá' Xránadxu Jesucristo. <sup>9</sup>Dios tu dxúnzqueze' ca da nachebe lazre', naque' Bénnea' bláwizre' le'e chee gácale tuze nen Zrí'ine', Xránadxu Jesucristo.

*Dxaca chupa la'a bi chee Cristo*

<sup>10</sup>Bi bicha', dxata' xúeda' le'e lu La Xránadxu Jesucristo, chee gácale tuze, ne quebe gácale chupa la'a. Le gaca xanne' tuze, ne tuze da cu'u xichaj lázrdaule, ne da gunle. <sup>11</sup>Da nigá dxapa' le'e, bi bicha', lawe' da buluzén benne' xrtia Cloé neda' dxutil-lale dizra'. <sup>12</sup>Da nigá zéaje na nácale chupa la'a, na' bál-lale dxennale: Netu' da'ntu' Pablo. Xezícale' dxennale: Netu' da'ntu' Apolos. Xezícale' dxennale: Netu' da'ntu'

Pedro. Xezícale' dxennale: Netu' da'ntu' Cristo. <sup>13</sup>¿Dxéquele naca Cristo chupa la'a? ¿Dxéquele gudá'a neda', Pablo, le'e xaga béguaj waláz chee? ¿Bedxúale le'e nisa lu la Pablo? <sup>14</sup>Xcalén Dios quebe núlale le'e bchua' nisa san tuze Crispo, ne Gayo <sup>15</sup>lawe' da quebe nu gaca nna: Lu la Pablo gudxúa' nisa. <sup>16</sup>Ca'anqueze bchua' nisa benne' xrtia Estéfanos, san quebe dxeajsá lazra' che nu xetú bchua' nisa. <sup>17</sup>Cristo quebe gusel-le' neda' nu guchúa' nisa, san chee guzenda' bèneache dizra' chawe' chee', quegá nen dizra' sina, chee quebe gaca dácheze da ben Cristo gate gutie' le'e xaga béguaj.

*Cristo naque' xel-la waca, ne xel-la sina  
chee Dios*

<sup>18</sup>Dizra' ca gute Cristo le'e xaga béguaj naca na ca tu da xálaze lau benne' xele-bía xi'e, san cheedxu dxi'u, nápadxu xel-la weselá, dizra' nigá napa na xel-la waca chee Dios. <sup>19</sup>Naca na ca naxúaj na lu dizra' lá'azxa. Dxenná Dios:

Guzrí xi'a xel-la sina chee benne' sina ca', ne guzú'a' chalá'ala xel-la naxéajni'i chee benne' dxeléajni'ine'.

<sup>20</sup>¿Gazra nagá'ana benne' sina na'a? ¿Waca guselá cuine'? ¿Gazra nagá'ana benne' dxusédene' bèneache? ¿Gazra nagá'ana benne' dxuchálaje' ca naca da dxaca lu xezr la xu nigá? Ca naca xel-la sina chee xezr la xu nigá, Dios ba nunge' na tu da xálaze lawe' da tuze Le' gaca guselé' bèneache. <sup>21</sup>Dios nézene' xúgute. Quebe be'e lataj bèneache xelúnbe'e Le' ne chee xel-la sina chee bèneache. Bezaca ba lazre' Dios ne chee dizra' nigá bselé' benne' ca' dxuluxrén lazre' Le', lácala zaj zra' benne' dxeléquene' naca dizra' nigá tu da xálaze.

<sup>22</sup>Benne' judío ca' dxelaca lazre' xelélé'ene' xel-la waca da za xabáa, na' benne' griego ca' dxelexflaje' xel-la sina, <sup>23</sup>san dxi'u dxuzendxu bèneache ca naca chee Cristo, ca gutie' le'e xaga béguaj. Benne' judío dxelexedu'é'ene' chee dizra' nigá, na' benne' quebe zaj naque' judío dxeléquene' naca na tu da ca zeaje na. <sup>24</sup>Na'a, benne' ca' ba bláwizra Dios, benne' judío ca', ne benne' quebe zaj naque' judío, Cristo nácaqueze' xel-la waca, ne xel-la sina chee Dios. <sup>25</sup>Da dxeleque bèneache naca tu da xálaze chee Dios nácadxa na sina ca xel-la sina chee bèneache, na' da dxeleque bèneache naca na tu da naca bea

nate ni'a na' Dios nápadxa na xel-la waca ca xel-la waca chee bénneache. <sup>26</sup> Le'e, bi bicha', dxal-la' gueque be'ele ba bláwizra Dios le'e lácala bábaze le'e nácale sina lau bénneache chee xezr la xu nigá, ne bábaze le'e nácale xel-la dxenná bea, u nácale xrtia benne' zaj naque' blau. <sup>27</sup> Dios ba guqu'é benne' ca' dxeleque bénneache zaj naque' benne' xálaze, chee xelexedué'e benne' sina ca', ne ba guqu'é benne' ca' dxeleque bénneache zaj nate ni'a ne'e, chee xelexedué'e benne' wal-la ca'. <sup>28</sup> Dios ba guqu'é benne' ca' quebe zaj naque' blau, ne benne' ca' zaj nuzúa bénneache chalá'ala, benne' ca' quebe nu zaj naque', chee guzague' naze benne' zaj naque' blau, <sup>29</sup> chee quebe nu seque' gucá'ana szren cuina lau Dios. <sup>30</sup> Díosqueze ba nuné' le'e tuze nen Jesucristo, ne nuné' naca Cristo Benne' dxunna dxi'u xel-la sina, ne Benne' gucá'ana dxi'u xrlátaje, ne Benne' dxuzúe' dxi'u lu na' Dios, ne benne' dxexá'awe' dxi'u. <sup>31</sup> Ca' naca na ca da naxúaj na lu dizra' lá'azxa, da dxenná na: Che nu benne' dxaca lazre' nu gucá'ana szrene', dxal-la' gucá'ana szrene' Xránadxu.

## 2

*Dizra' ca naca chee Cristo, gudé'e xaga béguaj*

<sup>1</sup> Na'a, bi bicha'dau', gate bedajchálajlena' le'e da li chee Dios, quebe bchíneda' dizra' sina, ne dizra' zaca. <sup>2</sup> Gate ne zúalena' le'e quebe guca lazra' guchálaja' chee bila da xetú san tuze chee Jesucristo, Bénnea' gudé'e xaga béguaj. <sup>3</sup> Gate guzúalena' le'e ne náteté ni'a na'a, ne guzrízetea' lawe' da bzreba' quebe guca guna' da nusebaga' Cristo neda'. <sup>4</sup> Gate bchálajlena' le'e, ne bzenda' le'e dizra' chawe', quebe guca lazra' guna' chéajle chee' nen dizra' sina chee bénneache da guchálaja', san bena' guxéajle chee' ne chee Be' Lá'azxa, ne ne chee xel-la waca chee Dios <sup>5</sup> chee gápale xel-la dxeajlí lazre' da naca na ne chee xel-la waca chee Dios, ne quegá ne chee xel-la sina chee bénneache.

*Dios dxulé'e cuine' ne chee Be' Lá'azxa*

<sup>6</sup> Dxuchálajntu' dizra' sina lau benne' ca' ba zaj zé chache' lu xel-la dxeajlí lazre' chee'. Xel-la sina nigá quebe naca na xel-la sina chee xezr la xu nigá, ne chee benne' dxelenná be'e lu xezr la xu nigá,

benne' ca' xeledé chié'. <sup>7</sup> Dxuchálajntu' xel-la sina nagache chee Dios, da na' bzua Dios nédxudaute ca bene' xezr la xu nigá, chee ladxu chadía chacanna. <sup>8</sup> Netú benne' ca', benne' dxelenná be'e lu xezr la xu nigá, quebe guléajni'ine' da nigá, lawe' da la guléajni'ine' na quebe buludé'e Xránadxu, Benne' xabáa, le'e xaga béguaj. <sup>9</sup> Naca na ca da naxúaj na lu dizra' lá'azxa, dxenná na: Dios ba nucuze' chee benne' ca' zaj nazrí'ine' Le'

da ca' quebe nu ne le'e, ne quebe nu ne xen, ne da quebe nu ne cu'u lazre'.

<sup>10</sup> Da caní zaj naca na da ble'e Dios dxi'u ne chee Be' Lá'azxa nasele' la Le', lawe' da dxelé'e Be' Lá'azxa xúgute da de, ne dute da xu'u na lu xichaj lázrdau Díosqueze.

<sup>11</sup> Ládujla bénneache, ¿nu seque' neze da xu'u lu xichaj lázrdau xetú benne', san tuze be' da nacaqueze'? Cá'anqueze, tuze Be' Lá'azxa chee Dios nézene' da xu'u lu xichaj lázrdau Dios. <sup>12</sup> Be' Lá'azxa da xú'udxu quebe naca na chee xezr la xu nigá. Nazidxu Be' Lá'azxa da dxunna Dios dxi'u chee chéajni'idxu da ca' ba nunna Dios dxi'u. <sup>13</sup> Dxuchálajntu' ca naca da caní nen dizra' da bsede Be' Lá'azxa chee Dios netu', ne quegá nen dizra' da bsédentu' lu xel-la sina cheentú'. Ca' naca na, dxuzéajni'intu' benne' zaj nazi'e Be' Lá'azxa chee Dios da nusede Be' Lá'azxa nigá dxi'u.

<sup>14</sup> Nu benne' quebe nazi'e Be' Lá'azxa chee Dios quebe dxezi' lu ne'e da zaj naca na chee Be' Lá'azxa chee Dios, lawe' da dxéquene' zaj naca na tu da xálaze. Quebe dxezeque' chéajni'ine' na lawe' da zaj naca na da dxéajni'idxu tuze ne chee Be' Lá'azxa. <sup>15</sup> Bénnea' nazi'e Be' Lá'azxa chee Dios dxézéquene' chéajni'ine' xúgute da dxulé'e Be' Lá'azxa le'. Benne' quebe zúale Be' Lá'azxa le', quebe séquene' chéajni'ine' da dxusede Be' Lá'azxa dxi'u. <sup>16</sup> Naxúaj lu dizra' lá'azxa da dxenná na: ¿Nuzra ba guxéajni'i da xu'u xichaj lázrdau Xránadxu? ¿Nuzra benne' séquene' guzéajni'ine' Dios? Dxi'u nazidxu ca da xu'u xichaj lázrdau Cristo.

## 3

*Benne' dxelune' tu zren Dios lu zrin chee'*

<sup>1</sup> Na'a, le'e, bi bicha'dau', quebe guca guchálajlena' le'e ca dxuchálajlena' benne' ca' zúale Be' Lá'azxa chee Dios le', san

bchálajlena' le'e ca dxuchálajlena' benne' ca' quebe zúale Be' Lá'azxa le', lawe' da ne nácale ca bidu ca' lu da naca chee Cristo. <sup>2</sup>Bsédeda' le'e da quebe zaj naca na stebe da naca na ca da dxugágudxu bidu dxe'ene, bidu ne dxázrebe', ne quebe gaca gágube' xel-la wagu da naca na zibaj, lawe' da quebe ne séquele chéajni'ile da zaj naca na stebe. Cá'anqueze na'a quebe ne séquele chéajni'ile na <sup>3</sup>lawe' da ne nácale ca zaj naca benne' cun ca nalaje'. Dxácate ne xu'ule xel-la zre lazre', ne dxutil-la ljwézrele dizra' ne nácale chupa la'a, ne nácale ca zaj naca benne' cun ca nálaje', ne dxunle cáteze dxelún xúgute bénneache. <sup>4</sup>Dxácate ne dxennale: Netu' da'ntu' Pablos, ne dxunle dxennale: Netu' da'ntu' Apolos, ne dxunle ca dxelún benne' cun ca nálaje'.

<sup>5</sup>Na'a, ¿nuzra na' Pablos? ¿Nuzra na' Apolos? Nácantu' wen zrin chee Dios, na' ne chee netu' guxéajlele chee Xránadxu. Tu tuntu' bentu' zrin chee Xránadxu da blé'ene' netu'. <sup>6</sup>Neda' guza' bínnedu ca' lu xichaj lázrdaule, bchálajlena' le'e xrtizra Dios, na' Apolos gudile' na, san Dios bsegule' na. <sup>7</sup>Ca' naca na, ne benne' dxaze', ne benne' dxile' na, quebe bi zaque', san Dios na' dxune' xúgute, lawe' da dxusegule' da du ca'. <sup>8</sup>Benne' dxelaze', ne benne' dxelile' zaj naque' lébete, san Dios quízruje' tu tu benne' caní ca naca zrin da belune'. <sup>9</sup>Nácantu' wen zrin tu zren nen Dios, na' le'e nácale ca tu xezr la xu naga dxun Dios zrin.

Cá'anqueze nácale ca tu xu'u da dxun Dios. <sup>10</sup>Neda' naca' ca tu wen xu'u blau, na' Dios benne' neda' lataj gulecha' lane na, na' benne' xula dxusegule' ze'e na'. Tu tu benne' dxal-la' guxúe xánnie' ca dxusegule' na. <sup>11</sup>Québedxa nu seque' cueche' xetú lane ca da ba dxe', da na' naca na Jesucristo-queze, <sup>12</sup>san waca nu benne' gusegule' lawe' na da zaca na ca oro, ne plata, ne xiaj da zaj zaca, u waca gusegule' lawe' na da quebe zaca na ca blaga', ne xizre, ne luaj laga'. <sup>13</sup>Zrin da nun tu tu benne' gul'équeze lawe na lu zra guchi'a Dios, lawe' da lu zra na' la' tu xi', na' lu xi' na' gul'é' lawe na ca naca zrin nun tu tudxu. <sup>14</sup>Che nu benne' nune' tu zrin da quebe chezxe na lu xi', na' wazi'e lazruj chee'. <sup>15</sup>Che chezxe zrin na', ca naca na nite na, san léqueze' walé', ca tu benne' dxexedxúaje' lu xi'.

<sup>16</sup>¿Quebe nézele le'e nácale xudau' chee

Dios, na' Be' Lá'azxa chee Dios zué' lu xichaj lázrdaule? <sup>17</sup>Che nu benne' gucá'ana dítaje' xudau' nigá chee Dios, Dios guzría xi'e bénnea' lawe' da naca lá'azxa xudau' chee Dios, na' lé'equeze nácale xudau' na'.

<sup>18</sup>Quebe si xé cuínale. Che núlale dxéquele nácale benne' sina lu da naca chee xezr la xu nigá, dxal-la' xun cuínale ca tu benne' quebe bi dxaque', chee gunna Dios le'e xel-la sina li. <sup>19</sup>Xel-la sina chee xezr la xu nigá naca na tu da xálaze lau Dios. Naxúaj lu dizra' lá'azxa da dxenná na: Dios dxun zréajane' benne' sina ca' lu xel-la sina da zaj nápaqueze'. <sup>20</sup>Cá'anqueze dxenná na: Xránadxu nézene' quebe bi naca da dxululaba lazre' benne' sina ca'. <sup>21</sup>Chee le' na' quebe nu benne' dxal-la' gun szren cuine' lawe' da de'e tu benne', lawe' da Dios dxunne' le'e xúgute da ca' dxechínnele. <sup>22</sup>Pablo, ne Apolos, ne Pedro, ne xezr la xu nigá, ne xel-la nabán, ne xel-la gute, ne na'a zra, ne da za za', ne xúgute da ca' zaj naca na chee gaca da chawe' cheele, <sup>23</sup>na' lé'equezele xu'ule lu na' Cristo, na' Cristo xu'e lu na' Xradxu Dios.

#### 4

##### *Zrin dxelún benne' gubáz chee Cristo*

<sup>1</sup>Ca' naca na, dxal-la' guéquele nácazentu' wen zrin chee Cristo, ne nabá-gantu' gusédentu' bénneache da zaj nagache chee Dios. <sup>2</sup>Na'a, benne' nabague' tu zrin, dxun na ba xen gaque' li lazre'. <sup>3</sup>Neda' quebe dxe'a gunne xue bi dxéquele naca' neda', u bi dxelique bénneache naca'. Quebe gaca nnia' xrlátaje u quegá chee da nuna' <sup>4</sup>lawe' da lácala quebe dxagu na zria neda' lázrdawa', da nigá quebe dxul'é na quebe nabaga' zria. Xránadxu naque' Benne' dxuchi'e ca da dxuna'. <sup>5</sup>Ca' naca na, quebe guchi'ale chee da ca' che quebe ne zrin zra. Le cueza zra xelá' Xránadxu, na' xebéaje' lu xel-la naxaní' ca naca da nagache lu da chul-la. Xránadxu gul'é'ene' ca naca da dxulaba lázredxu, na' Dios gul'é'ene' chawe' tu tudxu ca da dxal-la' sidxu.

<sup>6</sup>Le'e, bi bicha', dxuchálajlena' le'e da caní chee gaca chawe' cheele, dxuzúa' ca tu da gul'é' na le'e Apolos, ne néda'queza'. Dxennía' da nigá chee gusédele ne chee netu' chee quebe gundxale ca da dxue lataj dizra' lá'azxa le'e, ne chee quebe gucá'ana szren cuínale, ne chee quebe

guzúale chalá'ala le sa' ljuwézrele. <sup>7</sup> ¿Nuzra nun lue' blaudxa ca xezicadxa benne'? ¿Bizra napu' da quebe nunna Dios lue'? Che Le' benne' chiu' da na', ¿bizr chee' na' dxucá'ana szren cuinu', dxéquenu' lué'queze gudilju' da na'?

<sup>8</sup> ¿Nácale le'e benne' gunní'a? ¿Nápale xúgute' da dxechínele? ¿Dxequele nácale wenná bea lácala quebe nácantu' netu' wenná bea? Xrlátaje dxgua la nácaquezele wenná bea chee' guntu' netu' le'e tu zren lu xel-la dxenná bea cheele. <sup>9</sup> Dxéqueda' Dios nuzúe' netu', benne' gubáz chee', lu lataj bzēbe. Nácantu' ca benne' ba zaj nabía xi' chee' gátentu'. Nácantu' ca tu da dxuzé na lau bēnneache, na' dxelenná' gubáz chee' xabáa ca', ne bēnneache netu'. <sup>10</sup> Dxeleque bēnneache nácantu' netu' tu da xálaze lawe' da dxuntu' zrin chee' Cristo, san le'e dxéquele dxéajni'i xánnele da zaj naca chee' Cristo. Dxeleque bēnneache nate ni'a na'ntu' netu' san le'e dxéquele nácale le'e benne' wal-la. Dxuluzúa bēnneache netu' chalá'ala, san dxelape' le'e ba lá'ana. <sup>11</sup> Ga bzrinte' lu zra na'a zra dxeduntu', ne dxebíntu', ne nácantu' gala xídeze, na' bēnneache dxulucháchalēne' netu', ne quebe zua lízrentu'. <sup>12</sup> Dxexedú lázrentu' dxuntu' zrin. Dxelenné' bēnneache schanni' cheentu', san netu' dxexechēbentu' dizra' chawe'. Zaj nau zi' xuzre' netu' san dxuchaga launtu' na. <sup>13</sup> Dxelenné' schanni' cheentu', san netu' dxuchálajlentu' le' da li dute' xel-la zren lazre' cheentu'. Dxelune' netu' ca tu xizre bēbe, ne ca tu da ba guca ditaj chee' bēnneache ca lu zra na'a zra.

<sup>14</sup> Quegá dxuzúaja' chee'le da nigá chee' xedué'ele, san chee' guzējajni'ida' le'e, nácale ca bi chia' nazri'ite' lazra'. <sup>15</sup> Lácala zaj zúale' le'e gaxúa gaxúane benne' dxulusé-dene' le'e ca naca chee' Cristo, quebe nu zua xetú xrale. Néda'queza' naca' xrale lu xel-la dxeajlí lazre' chee'le Cristo lawe' da bzenda' le'e dizra' chawe' chee' Jesucristo. <sup>16</sup> Ca' naca na, dxata' xúeda' le'e gunle ca dxuna' neda'.

<sup>17</sup> Chee' le' na' dxusel-la' Timoteo xedajná'abe' le'e, nácabē' ca bi li lazre' chia' nazri'ite' lazra', lu da naca chee' Xránadxu. Lebe' gusá'abe' lázrele ca dxuna' lu da naca chee' Cristo, ne ca naca da dxusédēda' bēnneache gáteteze na', ne lau xúgute' cue' bi chee' Cristo. <sup>18</sup> Bál-lale le'e ba nucá'ana szren cuínale lawe' da dxéquele quebe xida'

xedajnnaba' le'e, <sup>19</sup> san dxebeza lazra' xí-dazequeza' xedajnná'a le'e che gunna Xránadxu lataj. Nadxa le'eda' da dxelezeque' xelún benne' ca' dxulucá'ana szren cuine', ne quegá tuze da dxelenné'. <sup>20</sup> ¿Dxenná be'e Dios dxi'u quebe naca na chee' tu da dxuchálajzedxu. Lécaze' ba nunne' dxi'u xel-la waca chee'. <sup>21</sup> ¿Bizra dxaca lázrele le'e? ¿Dxaca lázrele gun na ba xen gudéa' le'e xel-la zi', u che xida' xedajnná'a le'e lu xel-la zri'i lazre', ne xel-la dxexruj lazre'?

## 5

*Pablo dxuchi'e chee' tu da sban*

<sup>1</sup> Ba benda' zua tu benne' ládujla le'e nune' ca zru'ule' xrna zie'. Da nigá naca na tu da sbánle'e da quebe ne xelún benne' quebe zaj núnbe'ene' Dios. <sup>2</sup> Ca naca da na' le'e ne dxucá'ana szren cuínale. Dxal-la' cuezre xáchele. Bēnnea' nune' da nigá dxal-la' xebéajle le' ládujla le'e. <sup>3</sup> Quebe zua' neda' naga zúale lu bēla' dxen chia', san naca cáteze zúale'na' le'e lu be' nácaqueza', na' ba bchi'a chee' bēnnea' nune' dul-la nigá ca tu benne' zúaletequeze le'e. <sup>4</sup> Le zraga le'e lu La Xránadxu Jesucristo, na' gaca na cáteze neda' súale'na' le'e lu be' nácaqueza', na' xel-la waca chee' Xránadxu Jesús suale na le'e. <sup>5</sup> Nadxa dxal-la' xudele bēnnea' lu na' Satanás da xriwe', na' lácala cuía xi' bēla' dxen chee' na' be' nácaqueze' la na lu zra xelá' Xránadxu Jesús.

<sup>6</sup> Quebe dxal-la' gucá'ana szren cuínale ca naca da dxunle. ¿Quebe núnbeale dizra' na' dxenná na: Láteze cua zichaj dxuchazra na ca naca cua na'? <sup>7</sup> Le xebéaj chalá'ala cua zichaj gula na' da dxuxrinnaj na le'e, chee' gácale ca tu xeta xtila da dxágudxu Laní Pascua, da dxundxu nen cua cube da quebe nachixre na cua zichaj, ca da li nácale le'e. Crístoqueze gutie' waláz cheedxu. Naque' cheedxu zrila', be dxelutie' laní pascua. <sup>8</sup> Ca' naca na, dxal-la' gupá'adxu Laní Pascua cheedxu lu da naca du lazre', ne lu da li, da ca' zaj naca na ca xeta xtila da quebe nachixre na cua zichaj. Quebe gupá'adxu na lu da calela, ne lu da zrinnej, da ca' zaj naca na ca cua zichaj gula na'.

<sup>9</sup> Lu da bzuaja' chee'le nédxudxa gucha' le'e quebe guchixre chee'le nen benne' ca' dxelune' da sban. <sup>10</sup> Quebe gucha' le'e xecuásatequezele chee' benne' zaj zre'e xezr la xu nigá, benne' dxelune' da sban, ne

benne' wecude' ca', ne benne' gubán ca', ne benne' dxelúe lá'ane' bedáu' xiaj xaga ca', lawe' da chee quebe guchixre cheele nen benne' caní, dxun na ba xen xedxúajle xezr la xu nigá. <sup>11</sup> Da guca lazra' xapa' le'e naca na chee quebe guchixre cheele nen netú benne' dxenné' naque' bíchedxu, san dxune' da sban, u naque' benne' wecude', u dxue lá'ane' bedáu' xiaj xaga, u dxutupe' dizra' bizruj, u dxí'aje', u naque' gubán. Quebe dxal-la' gágulele benne' caní. <sup>12-13</sup> Quegá naca chia' guchi'a chee benne' dxeledá cúzrela. Dios guchi'e chee benne' ca'. Le'e dxal-la' guchí'ale chee benne' zaj naque' bi bíchedxu. Chee le na' le xebéaj benne' dul-la na' ládujla le'e.

## 6

### Zria da dxelaqu ljwezre bi ca' chee Cristo

<sup>1</sup> Gate tule le'e zua da dxaca cheele nen xetule le'e, ¿bizr chee na' dxeajle lau benne' dxuchi'e da dxaca, na' quebe dxéajle'e chee Cristo, ne quebe dxeajle lau bi bíchele? <sup>2</sup> ¿Quebe nézele le'e, benne' zaj naca bi chee Dios xuluchi'e ca da dxelún bénneache chee xezr la xu nigá? Che le'e guchi'ale chee bénneache lu xezr la xu nigá, ¿quebe naca cheele guchí'ale chee tu da dauze? <sup>3</sup> ¿Quebe nézele le'e guchí'adxu chee gubáz chee xabáa ca'? Cá'anqueze dxal-la' guchí'adxu da naca chee xezr la xu nigá. <sup>4</sup> Che le'e zua da dxaca cheele lu xezr la xu nigá, ¿bizr chee na' dxeajle lau benne' ca' quebe nu zaj naque' ládujla bi bíchedxu ca' chee xuluchi'e chee da na'? <sup>5</sup> Da nigá dxapa' le'e chee gapa stu'le. ¿Quebe nu chilá' ládujla le'e nu bíchedxu, benne' naxéajni'ing' chee guchi'e tu da dxaca chee bi bíchedxu ca'? <sup>6</sup> ¿Dxun na ba xen tu bi bíchedxu cheajtágube' zria da dxaca cheebe' nen benne' ljwézrebe' lau tu benne' dxuchi'e da dxaca, na' quebe naque' bi chee Dios?

<sup>7</sup> Che zua da dxedíl-lalele biche ljwézrele, naca na tu zria da ba nabágale. ¿Bizr chee na' quebe dxucá'anale na cá'aze? ¿Bizr chee na' quebe dxuele lataj nu benne' cuane' cheele? <sup>8</sup> Le'e dxunle da quebe naca na xrlátaje, ne dxebanle, na' dxunle caní chee bi bíchele.

<sup>9-10</sup> ¿Quebe nézele le'e, quebe xelexú'u benne' wen da caléla naga dxenná bea Dios?

Quebe güele lataj nu si xe le'e. Quebe xelexú'u naga dxenná bea Dios benne' ca' dxelune' da sban, ne benne' ca' dxelúe lá'ane' bedáu' xiaj xaga, ne benne' ca' dx-elezúalene' zru'ula benne' xula, ne benne' ca' dxeledálene' ljwezre biue', ne benne' gubán ca', ne benne' wecude' ca', ne benne' ca' dxelé'aje', ne benne' ca' dxulutupe' dizra' bizruj, ne benne' ca' dxulucache lane'. <sup>11</sup> Caní gúcale bál-lale le'e, san na'a bache bexádxele lu xichaj lázrdaule, ne nuzúa cuínale lu na' Dios, na' nazi' lu ne'e le'e lu La Xránadxu Jesús ne chee Be' Lá'azxa chee Dios cheedxu.

### Naca lá'azxa bela' dxen cheedxu

<sup>12</sup> Da li naca da dxeleenné': Nápadxu lataj gundxu da dxaca lazre' tu tudxu. Quegá xúguté na naca na da ba neza. Awe', napa tu benne' lataj guné' da dxaca lazre', san quebe dxal-la' gu'e lataj bi da nna be'e na le'. <sup>13</sup> Naca da li da dxeleenné': Xela wagu naca na chee le'edxu, na' le'edxu naca na chee xel-la wagu, san Dios gusexuzre' dxú-pate' na. Quebe naca bela' dxen cheedxu chee gun na da sban. Bela' dxen cheedxu naca na da gunézrujdxu chee Xránadxu, na' Xránadxu naque' Bénnea' guchínene' bela' dxen cheedxu lu da xrlátaje. <sup>14</sup> Ca ben Dios bsebane' Xránadxu ládujla benne' gate ca', cá'anqueze gusebane' dxi'u nen xel-la waca chee'.

<sup>15</sup> ¿Quebe nézele le'e bela' dxen cheele naca na chee Cristo? ¿Wacá'a tu da naca na bela' dxen chee Cristo, ne guchaga' na nen bela' dxen chee tu nu'ula wen da sban? ¡Cabata! <sup>16</sup> ¿Quebe nézele le'e gate tu benne' biu dxuchague' tu nu'ula wen da sban dxú-pate' zaj naque' ca tuze bela' dxen? Naxúaj lu dizra' lá'azxa da dxenná na: Dxú-pate' xelexaque' tuze bela' dxen. <sup>17</sup> Gate tu benne' dxuchague' Xránadxu, dx-elexaque' tuze be'.

<sup>18</sup> Le guzrunnaj chee da sban. Zaj nita dul-la xula da dxun benne' da quebe dxulucá'ana ditaj na bela' dxen chee', san benne' dxuchague' nu'ula quebe naca zru'ule' dxune' dul-la lu bela' dxen cheequeze'. <sup>19</sup> ¿Quebe nézele le'e naca bela' dxen cheele xudau' chee Be' Lá'azxa, Bénnea' nunna Dios le'e, na' Be' Lá'azxa zué' xichaj lázrdaule? Quebe nácale xrana bela' dxen cheele, <sup>20</sup> lawe' da guzi' Dios le na nen tu lazruj zrente. Chee le na', dxal-la'

gápale ba lá'ana Dios nen bela' dxen chee, ne nen be' nácaqueze, lawe' da dxúpatę na' zaj naca na cheę Dios.

## 7

*Ca naca cheę xel-la dxuchaga na'*

<sup>1</sup> Na'a xechęba' ca zaj naca da bchębele neda'. Da li naca xrlátaje quebe guchaga na' tu benne'. <sup>2</sup> Lawe' da dxácale'ę da sban naga zúale, tu tu benne' biu dxal-la' súalęe' nu'ula cheęqueze', na' tu tu nu'ula dxal-la' súalęe' benne' biu cheęqueze'. <sup>3</sup> Benne' biu dxal-la' gune' nen zru'ule' da nabague' cheę zru'ule', na' cá'anqueze nu'ula dxal-la' gune' nen benne' biu cheę' da nabague' cheę benne' cheę'. <sup>4</sup> Nu'ula na' quebe naque' xrana bela' dxen cheę', san naca na cheę benne' biu cheę'. Cá'anqueze benne' biu quebe naque' xrana bela' dxen cheę', san naca na cheę zru'ule'. <sup>5</sup> Quebe dxal-la' xeledábaga ljwezre', san tuze gate xezezúę' xel-la wezría tu chí'idauze cheę xuluzúa cuinę' lau Dios cheę xuluchálajęe' Le'. Te na' dxal-la' xuluchaga ljwezre' cheę quebe seque' Satanás nna be'e na le' che quebe xezezųene' xelenná be'e cuinę'.

<sup>6</sup> Da nigá dxapa' le'e naca na tu da dxue le'e lataj. Quebe naca na tu da nadxixruj bea na. <sup>7</sup> Neda' dxezá lazra' súale xúgutele ca zua' neda', san Dios ba nunne' tu tudxu da gaca gundxu. Tu da nunne' tudxu, na' da xula xetudxu.

<sup>8</sup> Dxapa' benne' wegú', ne nu'ula wezębe, naca xrlátaje xelexegá'ane' cá'aze ca zua' neda'. <sup>9</sup> Che quebe xezezųene' xelenná be'e cuinę', waca xuluchaga ne'ę, lawe' da nácadxa xrlátaje xuluchaga ne'ę quęzcala xeledęe' ba xa' lu bela' dxen cheę'.

<sup>10</sup> Benne' zaj nuchaga ne'ę dxapa' nu'ula quebe gusanę' benne' biu cheę'. Quebe naca cheeza' da nadxixruj bea nigá, san naca na da dxun Xránadxu. <sup>11</sup> Che nu'ula gusanę' benne' biu cheę', dxal-la' xegá'ane' cá'aze, u xexaque' tuze nen benne' biu cheę' na'. Cá'anqueze benne' biu quebe dxal-la' gusanę' zru'ule'.

<sup>12</sup> Dxapa' xezícadxa benne' néda'queza', quegá Xránadxu, che zru'ula tu bi bíchedxu quebe dxéajle'ę cheę Xránadxu, dxéquene' xrlátaje zúalęe' benne' cheę' bi bíchedxu na' quebe dxal-la' gusanę' le'. <sup>13</sup> Che benne' biu cheę tu nu'ula zandxu quebe dxéajle'ę cheę Xránadxu, san dxéquene' xrlátaje zúalęe' zru'ule', nu'ula zandxu na'

quebe dxal-la' gusanę' benne' biu cheę' na'. <sup>14</sup> Benne' biu na' quebe dxéajle'ę cheę Xránadxu naque' ca tu bi cheę Dios lawe' da nuchague' zru'ule' dxéajle'ę cheę Xránadxu, na' nu'ula na' quebe dxéajle'ę cheę Xránadxu naque' ca tu bi cheę Dios lawe' da nuchague' benne' biu cheę' dxéajle'ę cheę Xránadxu. La quebe naca na caní, zrí'inele le'e xelácabe' ca zri'ine benne' quebe zaj naque' cheę Dios, san da li zaj nácabę' ca bi cheę Dios. <sup>15</sup> Che benne' biu na' u zru'ule', benne' quebe dxéajle'ę cheę Xránadxu, dxaca lártequeze' gusanę' ljwezre', waca na. Che caní dxaca cheę tu bi bíchedxu u cheę tu bi zandxu, nape' lataj lawe' da gunné Dios dxi'u cheę cueza zri lázredxu. <sup>16</sup> Che quebe gaca caní, quebe nézenu' lue', nu'ula, che wazéquenu' cu'u benne' biu chiu' lu na' Cristo, na' lue', benne' biu, quebe nézenu' che wazéquenu' cu'u zru'ulu' lu na' Cristo.

<sup>17</sup> Ájateze naca, tu tudxu dxal-la' gundxu ca naca da nunna Xránadxu dxi'u, ne xegá'anadxu cáteze nácadxu gate gunné Dios dxi'u. Caní dxapa' xúgute cue' bi cheę Cristo. <sup>18</sup> Che Dios dxenné' tu benne' biu nadxugu lu bela' cheę' da dxulé'e na naque' bi cheę Dios, benne' nigá dxal-la' xegá'ane' ca', na' che dxenné' Dios tu benne' quebe nadxugu lu bela' cheę' da na', quebe dxal-la' chugu lu bela' cheę' da na'. <sup>19</sup> Quebe bi naca che nadxugu da na' lu bela' cheędxu, u quebe. Da dxun na ba xen naca gundxu da dxaca lazre' Dios. <sup>20</sup> Tu tudxu dxal-la' xegá'anadxu cáteze nácadxu gate Dios dxenné' dxi'u cheę gácadxu bi cheę'. <sup>21</sup> Che gucu' benne' nada'u gate Dios gunné' lue', quebe cue'u gunne xue, san che gapu' lataj gacu' benne' quebe nada'u, dxal-la' guchínenu' na. <sup>22</sup> Bénnea' guque' benne' nada'u gate gunné Xránadxu le' naque' ca benne' quebe nada'u cheę gune' zrin cheę Xránadxu, na' cá'anqueze bénnea' quebe naque' benne' nada'u gate gunné Xránadxu le', naque' ca benne' nada'u cheę Xránadxu. <sup>23</sup> Dios ba ná'awe' le'e nen tu lazruj zrentę. Quebe güele lataj nu benne' gune' le'e benne' zaj nada'u. <sup>24</sup> Ca' naca na, bi bicha', tu tudxu dxal-la' xegá'anadxu lau Dios cáteze nácadxu gate gunné' dxi'u.

<sup>25</sup> Ca naca cheę benne' ca' quebe zaj nuchaga ne'ę quebe bi gunná be'e Xránadxu neda', san dxapa' le'e ca da dxéqueda', na' waca guxrén lázrele neda'



lawe' da bexache lazre' Xránadxu neda'.  
<sup>26</sup> Dxéqueda' neda' dxal-la' xegá'ana tu benne' biu cáteze naque' lawe' da zúadxu zra stébele'e. <sup>27</sup> Che nuchagu' nu'ula quebe cuasu' le', na' che quebe nuchagu' nu'ula, quebe guchaga na'u. <sup>28</sup> Che guchaga na'u, quebe gunu' dul-la, na' che tu nú'uladau' guchaga na'abe', quebe gunbe' dul-la. Benne' ca' dxuluchaga ne'e welezúe' stebe lu zra caní, na' dxaca lazra' quebe súale stebe caní.

<sup>29</sup> Bi bícha'dau', da nigá dxaca lazra' xapa' le'e. Xelátega ne de súadxu lu xezr la xu nigá. Ná'atela benne' zaj nuchaga ne'e dxal-la' guné' da naca chee Cristo ca dxelún benne' quebe zaj nuchaga ne'e. <sup>30</sup> Benne' dxelebezre xache' dxal-la' xelune' da naca chee Cristo ca dxelún benne' quebe zaj naque' baxache'. Benne' zaj zra' laní dxal-la' xelune' da naca chee Cristo ca dxelún benne' quebe zaj naque' quebe zaj zué' xel-la dxebé, na' benne' dxelá'awe' dxal-la' xelune' da naca chee Cristo ca dxelún benne' quebe zaj nape' da na' dxelá'awe'. <sup>31</sup> Benne' dxelezi'e ba neza lu xezr la xu nigá dxal-la' xelune' da naca chee Cristo ca dxelún benne' quebe dxelezi'e ba neza na, lawe' da ba dxexuzre lazre' xezr la xu nigá.

<sup>32</sup> Dxaca lazra' quebe bi cue'le gunne xue. Gate tu benne' biu nácabe' wegú' dxe'ebe' gunne xue da naca chee Xránadxu chee gunbe' da dxezaca ba lazre' Xránadxu.

<sup>33</sup> Gate ba nuchaga ne'e, dxe'e gunne xue da naca chee xezr la xu nigá chee guné' da dxezaca ba lazre' zru'ule'. <sup>34</sup> Cá'anqueze dxaca chee nu'ula zua benne' biu chee', ne nu'ula wegú'. Nu'ula wegú' dxe'ebe' gunne xue da naca chee Xránadxu chee chu'ube' lu na' Dios duté' bela' dxen cheebe', ne duté' be' cheebe', san nu'ula zua benne' biu chee' dxe'e gunne xue da naca chee xezr la xu nigá chee guné' da dexaca ba lazre' benne' chee'.

<sup>35</sup> Dxapa' le'e da nigá chee gaca chawe' chee, ne quebe chee nna be'eda' le'e, san chee gunle da xrlátaje, ne da li, chee chu'ule du lázrele lu na' Xránadxu.

<sup>36</sup> Che nu benne' dxéquene' nácadxa xrlátaje guchaga na' zrí'ine' nu'ula lawe' da ba dxedé xel-la cuide' cheebe', ne naca da dxal-la' gunbe', dxal-la' guné' da dxéquene' naca xrlátaje. Waca guchaga na'abe'. Quebe naca na dul-la. <sup>37</sup> Che nu benne' quebe dxéquene' dxun na ba xen, ne che

nape' lataj guné' da dxaca lazre', ne che ba nune' lu xichaj lázrdawe' xegá'ana zrí'ine' nu'ula wegú', dxune' da xrlátaje. <sup>38</sup> Ca' naca na, benne' dxu'e lataj guchaga na'abe' zrí'ine' nu'ula, dxune' da xrlátaje, na' bènea' quebe dxu'e lataj dxune' da nácadxa xrlátaje.

<sup>39</sup> Nu'ula zua benne' biu chee' nuchague' bènea' ne chee da nadxixruj bea na dxácaté ne zué' nabane', san che gate benne' chee', de lataj nu'ula na' guchaga ne'e nen núteteze benne' biu, san dxun na ba xen dxéajle'e chee Xránadxu. <sup>40</sup> Gácadxa chee' da ba neza che xegá'ane' cá'aze. Caní dxéqueda' neda', ne dxéqueda' dxun Be' Lá'azxa chee Dios neda' tuze.

## 8

*Xel-la wagu da zaj nuzúa bènneache lau bedáu' xiaj xaga*

<sup>1</sup> Na'a guchálaja' ca naca chee xel-la wagu da zaj nuzúa bènneache lau bedáu' xiaj xaga. Da li xúgute dxu nápadxu xel-la dxéajni'i ca naca da nigá. Xel-la dxéajni'i dxun na dxi'u benne' dxulucá'ana szren cuina, san xel-la zri'i lazre' dxusegula na dxi'u lu xel-la dxeajlí lazre' cheedxu. <sup>2</sup> Che nu benne' dxéquene' nape' duté xel-la dxéajni'i, quebe ne chéajni'ine' ca dxal-la' chéajni'ine'. <sup>3</sup> Che nu benne' nazrí'ine' Dios, Dios ba nazi' lu ne'e bènea'.

<sup>4</sup> Na'a, ca naca chee xel-la wagu da zaj nuzúa bènneache lau bedáu' xiaj xaga, nezdxu quebe bi naca tu bedáu' xiaj xaga lu xezr la xu nigá, ne tuze Bènea' naque' Dios. <sup>5</sup> Lácala zaj zra' xabáa, ne xezr la xu nigá da zanté da dxeleque bènneache zaj naca na dios, ne chee benne' caní zanté dios zaj zra na, ne zanté xrane' zaj zra na, <sup>6</sup> cheedxu dxi'u che nácadxu chee Cristo, tuze Bènea' naque' Dios, Bènea' naque' Xradxu. Xradxu Dios bene' xúgute da de, na' dxi'u zúadxu chee guchínene' dxi'u. Cá'anqueze tuze Bènea' naque' Xránadxu, Jesucristo. Ne chee Le' guzrá' xúgute da de, na' zúadxu dxi'u ne chee Le'.

<sup>7</sup> Quegá xúgute bi chee Cristo zaj nézene' da nigá. Bal-la benne' caní gulú'u lawe' belúe lá'ane' bedáu' xiaj xaga, na' gate dxelawe' xel-la wagu na', dxeléquene' naca na tu da naca na chee bedáu', na' lawe' da quebe zaj ze chache' lu xichaj lázrdawe', dxeléquene' zaj nabague' zria ne

chee da dxelawe'. <sup>8</sup>Da na' dxágudxu quebe dxucá'anadx na dxi'u xrlátaje lau Dios, lawe' da quebe nácadxadxu xrlátaje che dxágudxu, ne quebe nácadxadxu calela che quebe dxágudxu. <sup>9</sup>Le guxúe xanne' cuínale ca naca lataj da nápa le bi gágule chee quebe guzría xile tu benne' quebe ze chache' lu xel-la dxeajlí lazre' chee'. <sup>10</sup>Ca' naca na, che lue' nézenu' da nigá, na' che cue'u gagu' tu naga zra' bedáu' xiaj xaga, na' che tu bi bíchedxu, benne' quebe ze chache' lu xel-la dxeajlí lazre' chee', lé'ne' lue' dx'e'u dx-agu' na', na' bi bíchedxu na' wexázrquezne' cue'e gawe' da na' zaj nuzúa bénneache lau tu dios quebe bi naca. <sup>11</sup>Ca' naca na, lue', lawe' da napu' xel-la dxéajni'i, guzría xi'u tu bi bichu' quebe ze chache' lu xel-la dxeajlí lazre' chee', na' naque' benne' gute Cristo waláz chee'. <sup>12</sup>Ca' naca na, gate dxuzría xile bi bíchedxu quebe zaj ze chache' lu xel-la dxeajlí lazre' chee', dxunle dul-la da dxuzúa Crístoqueze chalá'ala. <sup>13</sup>Chee le na', che guzría xi'a tu bi bicha' ne chee da dxawa', nácadxa chawe' cabátadxa gawa' bela' chee quebe guzría xi'a le'.

## 9

*Da naca chee tu benne' gubáz chee Cristo*

<sup>1</sup>Naca chia' naca' gubáz chee Cristo, ne napa' lataj bi guna' lawe' da ble'eda' Xránadxu Jesús, na' nácale le'e bi chee Cristo ne chee zrin bena' chee'. <sup>2</sup>Che dxeleque xezicadxa benne' quebe naca' gubáz chee Cristo, san dxun na ba xen guéquele le'e naca' gubáz chee' lawe' da dxunna bea da nácale chee Xránadxu da li naca' gubáz chee'.

<sup>3</sup>Da nigá naca na da dxapa' benne' ca' dxelezi tizre' neda': 'Naca chia' si' lu na'a da xi'aj gawa' ne chee zrin da dxuna'.

<sup>5</sup>Cá'anqueze naca chia' guchaga na'a tu nu'ula zandxu chee chéajlene' neda' ca dxelún xezicadxa benne' gubáz chee Cristo, ne benne' bíchequeze Xránadxu, ne Pedro. <sup>6</sup>Dxéquele tuze Bernabé, ne neda' dxal-la' guntu' zrin chee gata' da xi'aj gá-guntu' gate dxuzénentu' bénneache dizra' chawe'? <sup>7</sup>¿Nuzra benne' gaque' benne' zeje' wedil-la che quebe nu quizruj le'? ¿Nuzra benne' dxaze' lba uva che quebe gawe' na? ¿Nuzra benne' gusegule' zriila' che quebe xeque'e xicha zra'ba'? <sup>8</sup>Quebe dxal-la' guéquele dxapa' le'e da nigá néda'queza',

lawe' da caníqueze dxenná na lu da bdxixruj be'e Moisés. <sup>9</sup>Naxúaj lu da nadxixruj bea na da dxenná Dios: Quebe cu'ule xixruj dxu'a bezre, be dxíchuba' zrua' xtila. Quebe gunná Dios da nigá lawe' da dxue lazre' chee bezre cá'aze. <sup>10</sup>Gunné' na ne cheedxu dxi'u. Naxúaj da nadxixruj bea nigá chee gaca da ba neza cheedxu, lawe' da benne' dxugá'ane' bezre, ne benne' dxine' dxal-la' xelebeza lazre' xelexezi'e ca naca da gunna lina da xelaze'. <sup>11</sup>Na'a, che netu' ba gúzantu' lu xichaj lázrdaule da naca na chee Be' Lá'axza, ¿quebe dxal-la' si' lu na'ntu' látedauze da naca chee lu xezr la xu nigá? <sup>12</sup>Che xezicadxa benne' naca chee' xelezi' lu ne'e da naca chee, ¿gáxrada netu'?

Quebe ne guchínentu' da nigá naca na cheentu'. Bchaga launtu' xúgute chee quebe guzágantu' ca naca dizra' chawe' chee Cristo. <sup>13</sup>Ba nézele benne' dxelung' zrin chee xudau' dxelawe' chee da xu'u lu xudau' na', na' benne' dxelung' zrin chee lu cugu naga dxelutie' be xixre' du ca' lau Dios dxelawe' be'la' chee béadu ca'. <sup>14</sup>Cá'anqueze ba nun Xránadxu chee benne' dxuluchalaje' dizra' chawe', xelezi'e ba neza zrin da dxelune'. <sup>15</sup>Cabata' guchíneda' netú da caní zaj naca na chia', ne quebe dxuzúaja' da nigá chee gúnnale neda' late'. Gaca lázredxa' gatia' quézcala nu gucuasa da ba neza da napa'.

<sup>16</sup>Quebe dxal-la' gucá'ana szren cuina' lawe' da dxuzenda' bénneache dizra' chawe' chee Cristo, lawe' da dxun na ba xen guna' na. Baxache' naca' che quebe guzenda' bénneache dizra' chawe' nigá.

<sup>17</sup>Chee le na', che dxuna' na lawe' da naca na da dxaca lazra' guna', ba de lazruj chia'. Na'a, che dxuna' na xadfaze, naca na tu da nusebaga Dios neda'. <sup>18</sup>Ca' naca na, lazruj da dxezi'a naca na da ba neza napa' gate dxuzenda' bénneache dizra' chawe' chee Cristo, ne quebe bi dxuchízruja' benne' ca'. Ca' naca na, quebe dxuchíneda' da naca na chia' lawe' da dxuna' zrin nigá.

<sup>19</sup>Lácala quebe naca' benne' nada'u chee nu benne', ba nun cuina' ca tu benne' nada'u chee xúgute bénneache, chee séqueda' cu'a benne' zandxa lu na' Cristo. <sup>20</sup>Gate zua' ládujla benne' judío ca', dxun cuina' benne' judío chee cu'a le' lu na' Cristo. Ca' naca na, ládujla benne' zaj xu'e lu na' da nadxixruj bea na dxun cuina' ca tu benne' xu'e lu na' da nadxixruj bea na,

chee cu'a le' lu na' Cristo lácala da li quebe xu'a lu na' da nadxixruj bea na na'. <sup>21</sup>Xetú na'a, chee séqueda' cu'a lu na' Cristo benne' ca' quebe zaj xu'e lu na' da bdxixruj be'e Moisés, dxun cuina' ca tu benne' quebe xu'e lu na' da nadxixruj bea na na', lácala da li xu'a lu na' da nadxixruj bea na chee Dios lawe' da xu'a lu na' da nadxixruj bea na chee Cristo. <sup>22</sup>Gate zua' ládujla benne' ca' quebe zaj ze chache' lu xel-la dxeajlí lazre' chee' dxun cuina' ca zaj naca benne' ca' chee séqueda' cu'a le' lu na' Cristo. Ca' naca na, dxun cuina' ca naca tu tu benne' ca' chee ájatezla séqueda' cu'a bal-la benne' ca' lu na' Cristo. <sup>23</sup>Dxuna' xúgute' da nigá ne chee dizra' chawe' chee Cristo chee gapa' tu da ba neza chee na.

<sup>24</sup>Ba nézquezle le'e tu lu da huitaj benne' zan dxes'aca chégüe' na' tuze' dx-zrué'ene' lataj blau. Le sa'aca chegu le'e chee zrué'ele da dxunna Cristo. <sup>25</sup>Xúgute' benne' ca' dxulupá'a cuine' chee xelu'e da huitaj, dxuluzúe' chalá'ala xúgute' da dxun na calela chee'. Benne' caní dxelune' da caní chee xelezi' lu ne'e tu da guzúe' xícha-je' da naca na laga' da québequeze si bea, san dxi'u dxundxu zrin chee zrué'edxu da zeajlí canna. <sup>26</sup>Neda' quebe dxezá chégua' ájatezla, ne quebe dxedil-la' ca tu benne' dxu'e lu be'ze gate dxedil-le'. <sup>27</sup>Neda' dx-udéa' xel-la zi' bela' dxen chia', ne dxenná be'eda' na, chee quebe gunitia' neda' da naca chia' lu zrin nigá, ca te na' ba bsédeda' benne' xula ca'.

## 10

*Da dxuzéajni'i na dxi'u ca naca chee bedáu' xiaj xaga ca'*

<sup>1</sup>Dxaca lazra' nézele, bi bícha'dau', ca guca chee xra xrtáudxu ca' xjácálene' Moisés. Dios guché'e xúgute' benne' ca' ne chee beuj bza na', na' xúgute' guledé'e lá-dujla nísadau' da nazí le na Xrna. <sup>2</sup>Ca' naca na, waca mnadxu xúgute' beledxúe' nisa lu nísadau' na', ne gulaque' tuze nen Moisés gate guledálene' beuj bza na'. <sup>3</sup>Cá'anqueze xúgute' gulawe' tuze xel-la wagu da bnezruj Dios le', <sup>4</sup>ne gule'aj xúgute' tuze nisa da bnezruj Dios le', lawe' da gulé'aje' nisa na' bedxúaj na xiaj xre na'. Xiaj xre nigá dxulé'e na ca naca Crístoqueze, Bénnea' guxéajlene' benne' ca' le'e xixre' lawe' lataj na'. <sup>5</sup>Benne' zan benne' ca' quebe belune'

da bezaca ba lazre' Dios, na' chee le' na' gultatíe' le'e xixre' lawe' lataj.

<sup>6</sup>Xúgute' da caní guca na chee guzéajni'i na dxi'u chee quebe sa lázredxu da calela ca', ca belún benne' ca'. <sup>7</sup>Chee le' na' quebe gucá'ana szrenle bedáu' xiaj xaga ca' ca belún bal-la benne' ca', ca naxúaj na lu dizra' lá'azxa, dxenná na: Bénneache gulebé'e, ne gule'aj gulawe' lau bedáu' xiaj xaga, na' belexase' chee bu-luxé'e. <sup>8</sup>Quebe dxal-la' gundxu da sban ca belún bal-la benne' ca', na' tu zraze gulate chupa gaxúa chi dxua gaxue'. <sup>9</sup>Quebe dxal-la' guchínedxu xel-la zren lazre' chee Xránadxu chee gundxu da calela ca belún bal-la benne' ca', na' gultatíe', gate gulí'ina bela' le'. <sup>10</sup>Quebe nmele chee Dios ca gulenné bal-la benne' ca', na' gubáz chee xabáa chee xel-la gute beté' benne' ca'.

<sup>11</sup>Xúgute' da caní gulezaca xra xrtáudxu, na' zaj naxúaj na lu dizra' lá'azxa chee guzéajni'i na dxi'u, zúadxu lu zra bzebe caní. <sup>12</sup>Ca' naca na, nu benne' dxéquene' ze chache' lu da naca chee Dios dxal-la' guxúe xanne' cuine' chee quebe cheajcházie'. <sup>13</sup>Da dxelún zrəaje le'e naca na tuze ca da dxelún zrəaje xúgute' bénneache, na' waca guxré'n lázrele Dios lawe' da quebe gu'e lataj bi gun zrəaje le'e da quebe séquele guchaga laule, na' gate gaca tu da gun zrəaje na le'e, Dios gunne' le'e ájala gunle chee lale lu da na', chee séquele guchaga laule na.

<sup>14</sup>Chee le' na', bi bicha' nazrí'te lazra', québedxa gucá'ana szrenle bedáu' xiaj xaga ca'. <sup>15</sup>Dxuchálajlena' le'e ca dxuchálajlena' benne' dxeləajni'ine', na' lé'eequeze waca guchí'ale chee da dxapa' le'e. <sup>16</sup>Gate dxágadxu da dxucube na ca guca gate gute Xránadxu, dxápádxu ba lá'ana Dios. Gate dxí'ajdxu xrisa uva lá'azxa, da nigá dxulé'e na dxezidxu ba neza dxen chee Cristo da gulalaj na le'e xaga béguaj. Xeta xtila na' da dxuzizrujdxu dxulé'e na xezidxu ba neza bela' dxen chee Cristo da bdeé' waláz cheedxu le'e xaga béguaj. <sup>17</sup>Lácala naxandxu, xúgutedxu dxágudxu tu xeta xtilaqueze da naca na tuze, da na' dxulé'e na nácádxu ca tuze bela' dxen chee Cristo.

<sup>18</sup>Le nna'xque ca zaj naca benne' Israel ca'. Benne' caní, benne' dxelawe' da dxuluzré'e lu cugu chee Dios dxelezi'e ba neza lu cugu na'. <sup>19</sup>Quebe dxenní'a' naca tu bedáu' xiaj xaga tu da zaca, na'

bela' da dxuluzría bénneache lau bedáu' xiaj xaga quebe zácadxa ca bíteteze xetú' bela'. <sup>20</sup> Dxennía' da dxuluzría lau bedáu' xiaj xaga benne' ca' quebe zaj núnbe'e Dios, dxuluzríe' na lau be' xriwe' ca' ne quegá lau Dios, na' quebe dxaca lazra' gunle tuze be' xriwe' ca'. <sup>21</sup> Quebe gaca xí'ajle da na' dxul'é na nácale Xránadxu tuze, ne xí'ajtele da gul'é na nácale tuze be' xriwe' ca', ne quebe gaca gágule da naca na chee Xránadxu, ne gágutele da naca na chee be' xriwe' ca'. <sup>22</sup> ¿Dxaca lázrele xewine lazre' Xránadxu lawe' da dxusandxu Le'? ¿Dxéquele le'e nácadxu benne' wáladxa ca Le'?

*Da naca cheedxu gundxu, ne ca naca xel-la zri'i lazre'*

<sup>23</sup> Da li naca da na' dxelenná bénneache, dxelenné': Naca chia' guna' da dxaca lazra'. Quegá xúgute' naca na da sídxu ba neza. Naca chee nu benne' guné' ca dxaca lazre' san quegá xúgute' gusegula na le' lu xel-la dxeajlí lazre' chee'. <sup>24</sup> Dخال-la' gundxu da gaca chawe' chee benne' xula, ne quegá da gaca na chawe' cheézedxu.

<sup>25</sup> Le gagu le'e ca naca da dxeda'u lawe' xi'a, ne quebe naba xúzrele chee na chee quebe sua stébe xichaj lázrdaule, <sup>26</sup> lawe' da zaj naca chee Xránadxu xezr la xu nigá, ne xúgute' da ca' zaj zra' lu xezr la xu.

<sup>27</sup> Che nu benne', benne' quebe dxéajle'e chee Xránadxu, dxenné' le'e gágule xeta, na' che dxaca lázrele chéajle, le gagu xúgute' da guzríe' laule, ne quebe naba xúzrele chee na chee quebe sua stébe xichaj lázrdaule. <sup>28</sup> Che nna nu benne' zúale le'e, na' xé'e le'e: "Bela' nigá bache guzría na lau bedáu' xiaj xaga", quebe gágule na, chee quebe guzúale stébe bénnea' gunné' ca', ne chee quebe sua stébe xichaj lázrdaule. <sup>29</sup> Dxennía' da nigá chee xichaj lázrdau benne' zúalene' lue', ne quegá chee xichaj lázrdau' lué'queze.

Waca naba xuzre tu benne': "¿Bizr chee na' dxuchi'u da naca chia' lawe' da sua stébe xichaj lázrdau benne' xula? <sup>30</sup> Che dxapa' Dios: Xcalenu' chee da dxawa', ¿bizr chee na' xelezí tizre' neda' chee da dxawa'?" <sup>31</sup> Chee le na', che dxágule u dxí'ajle, u bíteteze da dxunle, le gun xúgute' chee gaca ba Dios. <sup>32</sup> Quebe bi gunle da guzúa na stébe benne' xula, quegá benne' judío ca', ne quegá benne' quebe zaj naque' judío,

ne quegá nu benne' naque' bi chee Dios. <sup>33</sup> Neda' dxuna' ba xuzre guna' da xelezaca ba lazre' xúgute' bénneache ca naca xúgute' da dxuna'. Quebe dxuna' da gaca chawe' cheeza' san da gaca chawe' chee xezícadxa bénneache chee xelelé'.

## 11

<sup>1</sup> Le gun ca dxuna' neda', ca neda' dxúnqueza' ca ben Cristo.

*Da dxelún nu'ula naga zaj nazraga bi chee Cristo*

<sup>2</sup> Bi bicha', dxapa' le'e ba lá'ana lawe' da dxeajsá lázrequezle neda', ne dxunle ca naca da bzéajni'ida' le'e. <sup>3</sup> Na'a dxaca lazra' chéajni'ile naca Cristo xíchaje' chee tu tu benne' biu, na' benne' biu naque' xíchaje' chee zru'ule', ca naca Dios, naque' xíchaje' chee Cristo. <sup>4</sup> Che tu benne' biu gugácue' xíchaje' gate dxuchálajlene' Dios naga zaj nadupa bi chee Cristo, u gate dxuchálaje' waláz chee Dios, naca na tu xel-la stu' chee Bénnea' naque' xíchaje'. <sup>5</sup> Che tu nu'ula quebe gugácue' xíchaje' gate dxuchálajlene' Dios, u gate dxuchálaje' waláz chee Dios, naca na tu xel-la stu' chee', lawe' da dxun cuine' ca tu benne' biu. Lébezqueze naca na chugue' xíchaje'. <sup>6</sup> Che tu nu'ula quebe gugacu xíchaje', nácadxa xrlátaje chugue' tu chi'ize ca naca xicha xíchaje'. Na' che naca na tu xel-la stu' chee nu'ula che chugue' xíchaje', u che guzúe' zrígaze xíchaje' ca dxun tu benne' biu, dxal-la' gugacu xíchaje' naga zaj nazraga bi chee Cristo. <sup>7</sup> Benne' biu quebe dxal-la' gugacu xíchaje' lawe' da naque' lu'a le saca Dios, na' da naque' dxul'é na ca naca xel-la szren chee Dios. Da naca nu'ula dxul'é na ca naca xel-la szren chee benne' biu. <sup>8</sup> Gate ben Dios benne' biu, quebe bi guléaje' le' lu bela' dxen chee nu'ula, san guléaje' lu bela' dxen chee benne' biu da na' bexune' nu'ula na'. <sup>9</sup> Dios bene' nu'ula na' chee nna be'e benne' biu le', ne quegá bene' benne' biu chee nna be'e nu'ula le'. <sup>10</sup> Chee le na' nu'ula dxal-la' guzúe' xíchaje' tu da dxul'é na zua nu dxenná be'e le' chee quebe gun zréajene' gubáz chee xabáa ca' chee Dios. <sup>11</sup> Lu da nácadxu chee Cristo, benne' biu dxechinne' nu'ula, ne cá'anqueze dxechin nu'ula benne' biu. <sup>12</sup> Da li Dios guléaje' nu'ula na' lu bela' dxen chee benne' biu, na'

ca'anqueze benne' biu dxálaje' chee nu'ula, na' xúgutedxu zadxu lu na' Dios.

<sup>13</sup> Le nna'xque le'e che naca xrlátaje che tu nu'ula guchálajlene' Dios, ne quebe gugacu xíchaje'. <sup>14</sup> Da nácaquezdxu dxulé'e na dxi'u naca tu xel-la stu' che benne' biu se tunna xicha xíchaje', <sup>15</sup> na' naca tu da ba lál'ana chee nu'ula se na tunna, lawe' da nunna Dios le' xicha xíchaje' tunna chee gugacu na xíchaje'. <sup>16</sup> Na'a che nu benne' dxaca lazre' gutil-le' dizra' ca naca da nigá, dxal-la' nézene' quegá dxi'u ne quegá benne' zaj nazraga chee Cristo quebe núnbeadxu xetú da xula.

*Da dxelún benne', gate dxelawe' da naca chee Xránadxu*

<sup>17</sup> Ca naca chee da nigá quebe dxapa' le'e ba lál'ana lawe' da dxaca da calela chee gate nazrágale, ne quegá da chawe'. <sup>18</sup> Da nédxuteca, dxulé'e neda' gate dxezrágale chee güe lál'anale Dios nácale chupa la'a. Dxéqueda' naca da li da dxelenné'. <sup>19</sup> Dxál-la' queze gácale chupa la'a chee gulé'e lawe' nu benne' ládujla le'e da li naque' bi chee Cristo. <sup>20</sup> Chee le na' gate dxezrágale le'e chee gágule da naca chee Xránadxu, da li québedxa naca na chee Xránadxu. <sup>21</sup> Gate dxezrín zra dxágule, tu tule le'e dxebía lau chee le dxecá'ale xel-la wagu cha chee, na' bál-lale le'e dxegá'anale dxedunle, na' xezí-cadxale dxezúzele. <sup>22</sup> ¿Quebe bi de chee naga xi'aj gágule? Ca'an dxunle, dxuzúale chalá'ala bi ca' chee Dios, ne dxugu'ule xel-la stu' benne' ca' quebe bi de chee'. ¿Bízraqueze xapa' le'e? ¿Dxal-la' gapa' le'e ba lál'ana? ¿Cabata'!

*Da dxágudxu da naca chee Xránadxu*

(Mt. 26.26-29; Mr. 14.22-25; Lc. 22.14-20)

<sup>23</sup> Xránaquezdxu bzéajni'ine' neda' da nigá bsédeda' le'e: Lu zre' ná'queze gate Judas bdee' Xránadxu Jesús lu na' benne' guledábague' Le', na' Jesús guqu'é'e xeta xtila, <sup>24</sup> na' gudé guzre' Dios: Xcalenu', bzúzruje' na, na' gunné': "Le gagu. Xeta xtila nigá dxulé'e na ca gaca chee bel-la' dxen chia' lu da na' saca zi'a waláz chee. Le gun da nigá chee cheajsá lázrele neda'."

<sup>25</sup> Cá'anqueze, gudé gulawe', guqu'é'e xrisa uva, na' gunné': "Xrisa uva nigá dxulé'e na ca naca da dxuzé chacha na xel-la wezría cube da naca na dxen chia'. Tu tu lasa xi'ajle na, le gun na chee cheajsá lázrele

neda'." <sup>26</sup> Ca' naca na, ca zrin zra xelá' Xránadxu, gulé'ele ca guca gate gute Xránadxu tu tu lasa gate gágule xeta xtila nigá, ne xi'ajle xrisa uva nigá.

*Ca dxal-la' gágudxu da naca chee Xránadxu*

<sup>27</sup> Ca' naca na, núteteze benne' gawe' xeta xtila nigá, u xi'aje' xrisa uva chee Xránadxu, ne quebe dxape' ba lál'ana na, na' dxuné' dul-la da dxuzúa bela' dxen chee Xránadxu chalá'ala. <sup>28</sup> Chee le na' tu dxu dxal-la' guxúe xánnedxu xichaj lázrdaudxu gate za gágudxu xeta xtila nigá, ne za xi'ajdxu xrisa uva nigá, <sup>29</sup> lawe' da che xi'aj gágudxu, ne quebe dxéquedxu dxulé'e na ca naca bela' dxen chee Xránadxu, na' da xi'aj gágudxu gun na bágadxu zria. <sup>30</sup> Chee le na' benne' zan ládujla le'e quebe chawe' zaj zue', ne zaj mate ni'a ne'e, na' balla benne' ládujla le'e ba gulatie'. <sup>31</sup> Che guxúe xanne' cuínadxu, quebe gun na ba xen guchi'a Xránadxu cheedxu caní. <sup>32</sup> Gate Xránadxu dxuchi'e cheedxu, dxudé'e dxi'u xel-la zi' chee quebe cuía xidxu nen benne' zaj zre'e xezr la xu nigá.

<sup>33</sup> Ca' naca na, bi bicha'. Gate dxezrágale chee gágule da naca chee Xránadxu, le cueza ljwézrele tule xetule chee bi gágule. <sup>34</sup> Che núlale dxedunle, le gagu lu xu'u lízrquezle, chee quebe gun na ba xen guzría xi' Dios le'e gate na' nazrágale. Xezícadxa da ca' dxelaca chee le gucá'ana' chawe' gate xida' xedajnná'a le'e.

## 12

*Xel-la waca ca' da dxunna Be' Lá'azxa tu tudxu dxi'u*

<sup>1</sup> Bi bicha', zaj de da dxaca lazra' chéajni'ile ca naca chee xel-la waca ca' da dxunna Be' Lá'azxa tu tudxu dxi'u.

<sup>2</sup> Ba nézquezle gate na' quebe ne chéajlele chee Xránadxu, be'ele lataj gulezrube xue' le'e chee xeajé lál'anale bedá'u xi'aj xaga ca', da quebe dxelenné na. <sup>3</sup> Chee le na' dxaca lazra' nézele che zua nu benne' nne': Nabía xi' Jesús, quebe dxuchálaje' ne chee Be' Lá'azxa chee Dios. Na' netú benne' gaca nne': Jesús naque' Xrana', che quebe dxuchálaje' ne chee Be' Lá'azxa.

<sup>4</sup> Zaj nazrá' xel-la waca ca' da gaca si' lu nna dxu, q san tuze naca Be' Lá'azxa, Bénnea' dxunne' dxi'u na.

<sup>5</sup> Zaj nazrá' ca gaca gundxu zrin,

san tuze naca Xránadxu, Bénnea' dxundxu zrin chee'.

<sup>6</sup>Zaj nazrá' ca da gaca gundxu, san tuze naca Dios, Bénnea' dxunne' dxi'u xel-la waca gundxu na.

<sup>7</sup>Dios dxunne' cha cheedxu tu xel-la waca chee Be' Lá'azxa chee gaca da ba neza chee xúgutedxu.

<sup>8</sup>Ne chee Be' Lá'azxa dxunne' bal-la benne' xel-la waca xuluchálaje' duté xel-la sina,

na' xebal-le' ne chee Be' ná'queze dxunne' le' xel-la waca xuluchálaje' duté xel-la naxéajni'i.

<sup>9</sup>Xebal-le' dxelezi'e xel-la dxeajlí lazre' ne chee Be' ná'queze,

na' xebal-le' dxelezi'e xel-la waca chee xelxuné' benne' we' ca'.

<sup>10</sup>Xebal-le' dxelezi'e xel-la waca xeluné' xel-la waca ca' chee xabáa,

na' xebal-le' dxelezi'e xel-la waca chee xuluchálaje' waláz chee Dios.

Xebal-le', Dios dxunne' le' xel-la waca xelenézené' nu be' dxuchalaj na lu dxu'a bénneache.

Xebal-le' dxelezi'e xel-la waca xuluchálaje' dizra' nazrá', da quebe naca xrtízrqueze',

na' xebal-le' dxelezi'e xel-la waca xuluxuzájle'e dizra' nazrá' na'.

<sup>11</sup>Xúgute' da caní dxun tuze Be' ná'queze, Bénnea' dxunne' cha cheedxu xel-la waca caní cáteze da dxaca lázrequeze'.

#### *Xúgutedxu nuchágadxu tuze bela' dxen*

<sup>12</sup>Zua cheedxu tu bela' dxen da napa na zánete cue'. Dxi'u, dxéajledxu chee Cristo, nácadxu ca tuze bela' dxen chee Cristo.

<sup>13</sup>Xúgutedxu dxi'u, che nácadxu benne' judío, u benne' quebe nácadxu judío, ne che nácadxu benne' zaj nada'u, u benne' quebe zaj nada'u, gate gudxúadxu nisa da dxul'é na nácadxu Cristo tuze, cá'anqueze bexácadxu ca tuze bela' dxen, da na' ben tuze Be' Lá'azxa, na' Diosqueze benne' dxi'u lataj sídxu tuze Be' ná'queze.

<sup>14</sup>Tu bela' dxen quebe naca na tu cue'ze, san naca na zane' cue'. <sup>15</sup>Che ní'adxu nna na: Quebe naca' na'u, ne chee le' na' quebe naca' chee bela' dxen chiu', quegá da ni gun na québedxa naca na chee bela' dxen na'. <sup>16</sup>Na' che nágadxu nna na: Quebe naca' lau', ne chee le' na' quebe naca' chee bela' dxen chiu', quegá da ni gun na québedxa naca na chee bela' dxen na'. <sup>17</sup>Che duté bela' dxen cheedxu naca na laudxu, ¿ájazra gundxu

xendxu? Che duté bela' dxen cheedxu naca na nágadxu, ¿ájazra gundxu lé'edxu? <sup>18</sup>Dios nuzúe' cha chee cue' bela' dxen na' naga dxaca lazre' Le'. <sup>19</sup>Che duté na' naca na tuze cue', ¿gazra zúaqueze bela' dxen na'? <sup>20</sup>Ca naca na, lácala naca na zane' cue', tuze bela' dxen naca na.

<sup>21</sup>Xia laudxu quebe dxal-la' xe na nadxu: Quebe nachinda' lue', ne quebe dxal-la' nna xíchajdxu, xe na ní'adxu: Quebe nachinda' le'e. <sup>22</sup>Da naca na, da zaj naca chee bela' dxen cheedxu da dxéquedxu quebe zaj nácateca na blau, zaj naca na da dxechínedxadxu, <sup>23</sup>Da zaj naca na chee bela' dxen cheedxu da quebe dxápadxu ba lá'ana zaj naca na da dxugacu xánnedxadxu. Da ca' dxéquedxadxu quebe dxal-la' gul'édxu zaj naca na da dxucáchedxu, <sup>24</sup>da quebe dxun na ba xen gundxu chee da ca' gaca gul'édxu. Ca' naca na, Dios bené' bela' dxen cheedxu chee gápadxu ba lá'ana da ca' dxéquedxu quebe nácateca na da gápadxu ba lá'ana, <sup>25</sup>chee quebe gaca chupa la'a bela' dxen cheedxu. Tu tu cue' chee bela' dxen cue' na gunne xue chee ljwezre na. <sup>26</sup>Che dxedé xel-la zi' tu da naca na chee bela' dxen cheedxu, xúgute' da ca' dxeledé na xel-la zi', na' che tu da na' gaca da ba neza chee na, na' xúgute' da ca' dxelebé na tu zren.

<sup>27</sup>Ca' naca na, le'e nácale bela' dxen chee Cristo, na' tu tule nácale ca tu tu cue' chee bela' dxen chee' na'. <sup>28</sup>Ca' naca na, Dios nunézruje' lataj blau chee bal-la benne' ládujla bi chee Cristo. Lu lataj blau nuzré'e benne' gubáz chee' ca', na' lu lataj gudxupe' nuzré'e benne' dxuluchálaje' waláz chee', na' lu lataj guxunne' nuzré'e benne' dxulúsédene' bi chee' ca', na' gudé na' nuzré'e benne' dxeluné' xel-la waca da za xabáa. Gudé na' nuzré'e benne' ca' dxelexuné' benne' we' ca', ne benne' ca' dxelácalene' bi chee' ca', ne benne' ca' dxeleonná be'e, ne benne' ca' dxuluchálaje' dizra' nazrá' da quebe zaj nézene'. <sup>29</sup>¿Zaj naca xúgute' benne' gubáz chee'? ¿Dxuluchalaj xúgute' waláz chee'? ¿Dxulusede xúgute' bi chee' ca'? ¿Dxelún xúgute' xel-la waca chee xabáa? <sup>30</sup>¿Dxelexún xúgute' benne' we' ca'? ¿Dxuluchalaj xúgute' dizra' nazrá' da quebe naca xrtízre'? ¿Dxuluxuzájla'a xúgute' dizra' nazrá' na'? ¡Cabí! <sup>31</sup>Le gun ba xuzre si' lu na'le chee Dios xel-la waca

ca' da nácadxa chawe'. Na'a gulé'eda' le'e tu da cháwedxa.

## 13

*Xel-la zri'i lazre' li*

<sup>1</sup> Che dxuchálaja' dizra' chee benne', ne chee gubáz chee xabáa ca', san quebe napa' xel-la zri'i lazre' li, quebe nácadxa' ca tu xide da dxenné na, u ca tu xia da dxenné na. <sup>2</sup> Che dxuchálaja' waláz chee Dios, ne che nezda' xúgute da zaj nagache, ne dxéajni'ida' xúgute da dxelaca, ne napa' xel-la dxeajli lazre' chee séqueda' gucuasa' xi'a ca', san che quebe napa' xel-la zri'i lazre' li, quebe nu nácaqueza'. <sup>3</sup> Che quísia' xúgute da de chia', ne che guzúa' bela' dxen chia' chee chezxe na, san che quebe napa' xel-la zri'i lazre' li, quebe bi da ba neza naca na chia'.

<sup>4</sup> Bénnea' nape' xel-la zri'i lazre' li: Naque' zren lazre'. Naque' zri'i lazre', ne quebe naque' xa lazre'.

Quebe dxucá'ana szren cuine', ne quebe dxuzécu'e.

<sup>5</sup> Quebe dxune' da calela, ne quebe naque' zre'e lazre'.

Quebe dxezre'e, ne quebe dxu'u lazre'.

<sup>6</sup> Quebe dxebene' gate nu benne' dxeajházie' lu dul-la, san dxebene' lu da li.

<sup>7</sup> Dxuchaga lawe' xúgute da dxaca nen dute xel-la dxeajli lazre' chee', ne dute xel-la dxebeza lazre' chee', ne dute xel-la zren lazre' chee'.

<sup>8</sup> Xel-la zri'i lazre' li quebe te chee na. Wazrín zra gate québedxa chínedxu nu benne' guchálajle' dxi'u waláz chee Dios, ne benne' dxéajni'ine' xúgute. <sup>9</sup> Na'a dxéajni'idxu látedauze, ne látedauze dxuchálajdxu waláz chee Dios. <sup>10</sup> Zrin zra gate na' chéajni'idxu dute ca naca, na' te chee da na' naca na látedauze.

<sup>11</sup> Gate ne naca' bidau' bchálaja' ca bidau', ne gulába lazra' ca bidau', ne bchi'a ca bidau', san gate guca' benne' waca, bzua' chalá'ala da zaj naca chee bidau'. <sup>12</sup> Cá'aqueze na'a quebe dxelé'edxu cátequeze, ne da dxelé'edxu ze zrul-la, san lu zra na' lé'edxu cátequeze. Na'a látedauze númbe'a, san lu zra na' gúnbe'a cátequeze ca dxun Dios, númbe'tequeze' neda'. <sup>13</sup> Ca' naca na, xel-la dxeajli lazre', ne xel-la dxebeza lazre', ne xel-la zri'i lazre' li xelezúaqueze na chadía chacanna, san da

blaudxa chee da caní naca na xel-la zri'i lazre' li.

## 14

*Ca naca chee nu benne' dxuchálaje' dizra' nazrá' da quebe naca na xrtizre'*

<sup>1</sup> Le gun ba xuzre gápale xel-la zri'i lazre' li, ne cá'aqueze le naba Dios gunne' le'e xel-la waca ca' chee Be' Lá'azxa, ne da naca blaudxa, chee gaca guchálajle waláz chee Dios. <sup>2</sup> Bénnea' dxuchálaje' dizra' nazrá' da quebe naca na xrtizre' dxuchálajle' Dios, quegá nen bénneache, lawe' da quegá nu dxéajni'i da dxenné'. Dxuchálaje' ne chee Be' Lá'azxa da zaj nagache. <sup>3</sup> Bénnea' dxuchálaje' waláz chee Dios dxuchálajle' bénneache chee gusegule' benne' ca' lu da naca chee Dios, ne chee ne xúne'-be', ne chee xue zrene'-be'. <sup>4</sup> Bénnea' dxuchálaje' dizra' nazrá' na' dxusegula cuine', san bénnea' dxuchálaje' waláz chee Dios dxusegule' bi ca' chee Cristo lu da naca chee Dios.

<sup>5</sup> Dxaca lazra' gapa xúgutele xel-la waca guchálajle dizra' nazrá', san dxaca lázredxa' gaca guchálajle waláz chee Dios, lawe' da nácadxa chawe' guchálajle waláz chee Dios quézcala guchálajle dizra' nazrá', che quebe zua nu benne' xuzájle'e dizra' nazrá' na' chee xelegula bi chee Cristo lu da naca chee Dios. <sup>6</sup> Chee le na', bi bícha' dau', che xida' xedajnná' le'e, ne guchálajle' le'e dizra' nazrá', zbizra da ba neza gaca na chee che quebe guchálajle' le'e tu da ba ble'e Dios neda', u tu da bzéajni'ine' neda', u tu da guchálaja' waláz chee Dios, u tu da guzéajni'ida' le'e?

<sup>7</sup> Nná'xquedxu ca da ca' dxelenné na da quebe zaj naca bane na ca bchiuj, ne bihuel-la. Che quebe gaca chéajni'idxu da dxelenné na, quebe gaca nezdxu ca da dxelulla na. <sup>8</sup> Gate dxaca wedil-la, che quebe dxebezre luzu da dxulucueze' cátequeze, quebe nu se lu wedil-la. <sup>9</sup> Cá'aqueze dxaca chee le'e. Che quebe guchálaja' dizra' da dxéajni'ile, zájazra gaca nézele da dxennía'? Guchálaja' lu be'. <sup>10</sup> Da zante dizra' nazrá' zaj de lu xezr la xu nigá, ne da li xúgute na zaj zéaje na. <sup>11</sup> Na'a che quebe dxéajni'ida' dizra' dxuchálajle tu benne' neda', gaca' ca tu benne' zitu' lau bénnea', na' le' gaque' ca tu benne' zitu' lawa' neda'. <sup>12</sup> Chee le na', lawe' da dxaca lázrele si' lu na'le xel-la waca ca' da dxunna Be' Lá'azxa

dxi'u, le gun ba xuzre si' lu na'le da ca' xulusegula na bi ca' chee Cristo lu da naca chee Dios.

<sup>13</sup> Ca' naca na, bennea' dxuchálajle' dizra' nazrá' dxal-la' naba lau Dios gunne' le' xel-la waca xuzájle'e dizra' nazrá' na'. <sup>14</sup> Che guchálajlena' Dios tu dizra' nazrá'la, da li dxuchálajlena' le' lu be' nácaqueza', san quebe bi da ba neza naca na chee xel-la dxéajni'i chia'. <sup>15</sup> ¿Bizra da dxal-la' guna' xca'? Dخال-la' guchálajlena' Dios lu be' nácaqueza', ne cá'anqueze nen xel-la dxéajni'i chia'. <sup>16</sup> Che dxue la'anu' Dios tuze lu be' nácaquezu', na' benne' ljwezru' dxenne' chiu' quebe gaca gunne' tu zren lue' gate dxu'u Dios: Xcalenu', lawe' da quebe dxéajni'ine' da dxennáu'. <sup>17</sup> Da dxuchálajlenu' Dios nácale'e na chawe', san bennea' dxenne' quebe dxegule' lu da naca chee Dios. <sup>18</sup> Dxapa' Dios: Xcalene' lawe' da dxuchálajdxu' dizra' nazrá' ca xúgutele le'e, <sup>19</sup> san naga zaj nazraga bi chee Cristo dxaca lázredxa' guchálaja' gáxxuze dizra' da xeléajni'ibe' chee gusédeda'-be', quézcala guchálaja' chi mila dizra' nazrá' da quebe gaca xeléajni'ibe'.

<sup>20</sup> Bi bícha'dau'. Quebe gulaba lázrele ca bidau'. Le gaca ca bidau' chee quebe gunle da calëla, san le gaca benne' wal-la chee gulaba lázrele cháwe'dau'. <sup>21</sup> Naxúaj lu xiche lá'azxa chee da dxenná bea Dios, da dxenná na: Guchálajlena' benne' xezr la xu nigá nen dizra' nazrá', ne lu dxu'a benne' zitu' ca', san ne caní quebe xelenne' chia'. Caní dxenná Xránadxu. <sup>22</sup> Ca' naca na, xel-la waca chee guchálajdxu dizra' nazrá' naca na tu da dxulé'e na lau benne' quebe dxeléajle'e chee Dios, ne quegá lau benne' dxeléajle'e chee'. <sup>23</sup> Na'a, gate nazrágale, che xúgutele dxuchálajle dizra' nazrá', na' che xelxú'u benne' quebe zaj nazédene', u benne' quebe dxeléajle'e chee Dios, ¿quebe xelenne' zaj nadá xichaj lázrdaule? <sup>24</sup> Na'a che dxuchalaj xúgutele waláz chee Dios, na' che chu'u tu benne' quebe dxéajle'e chee Dios, u tu benne' quebe nazédene', na' guéquene' nabague' dul-la, na' léqueze' guchi'a cuine' gate xenne' da dxennale xúgutele. <sup>25</sup> Ca' gaca na, da zaj nagache xichaj lázrdawe' xululé'e lau na, na' guzúa zribe', ne güe lá'anë' Dios, na' nne' da li

zúale Dios le'e.

<sup>26</sup> Ca' naca na, bi bícha'dau', gate dx-ezrágale, bál-lale le'e nápaie salmo ca', ne xebál-lale nápaie da gusédele ljwézrele, ne xebál-lale nápaie tu da ble'e Dios le'e, ne xebál-lale nápaie tu dizra' nazrá' da guchálajle, ne xebál-lale nápaie xel-la waca xuzájla'ale dizra' nazrá' na'. Cháwe'dau' naca na, san xúgute' da ca' dxal-la' xulusegula na bi ca' chee Cristo lu da naca chee Dios. <sup>27</sup> Gate guchálajle dizra' nazrá', waca xuluchalaj chupa benne', u chunna benne', ne tuwéaj tuwéajle, na' tu benne' dxal-la' xuzájle'e da dxennale. <sup>28</sup> Na'a che quebe nu chilá' benne' xuzájle'e dizra' nazrá' na', gácadxa chawe' quebe bi da nne' naga nazrágale. Tu tule dxal-la' nnale lé'equezle, ne nen Dios. <sup>29</sup> Cá'anqueze benne' dxuluchálajle' waláz chee Dios waca xelenne' chupa chúnnaze', na' xezicadxale dxal-la' guchí'ale da na' dxenne'. <sup>30</sup> Che dxulé'e Dios xetu' benne' dxé'e na' tu dizra', na' bennea' dxuchálajle' dxal-la' gusané' ca da dxuchálajle'. <sup>31</sup> Xúgutele le'e waca guchálajle waláz chee Dios tuwéaj tuwéajle chee chéajni' xúgutele, ne sile da gun chacha na le'e. <sup>32</sup> Benne' ca' dxuluchálajle' waláz chee Dios dxun na ba xen nna bé'ene' be' nácaqueze', <sup>33</sup> lawe' da naca Dios Bénnea' dxunne' dxi'u xel-la dxebeza zri lazre', ne quebe dxun zréajene' bénneache.

Ca zaj xu'u lau xúgute' cue' bi bíchedxu, bi chee Dios, <sup>34</sup> dxal-la' xelezúa zrize nu'ula ca' naga nazrágale, lawe' da quebe naca chee' xuluchálajle'. Dخال-la' xuluzúe' dizra' ca naxúaj na lu da nadxixruj bea Dios. <sup>35</sup> Che dxelaca lazre' bi xeléajni'ine', dxal-la' xuluchebe' benne' cha chee' lizre tu tue' lawe' da quebe dxulé'e na chawe' tu nu'ula guchálajle' naga nazrágale.

<sup>36</sup> Dخال-la' gueque be'ele quebe guzú lau xrtizra Dios sua na bédujla le'e, ne quegá le'eze nazi' lu na'le na. <sup>37</sup> Che nu benne' dxéquene' naque' benne' dxuchálajle' waláz chee Dios, u zúale Be' Lá'azxa le', dxal-la' gueque bé'ene' da nigá dxuzúaja' cheele naca na tu da gunná be'e Xránadxu. <sup>38</sup> Che quebe dxaca lazre' gueque bé'ene' da nigá, quebe dxal-la' si' lu na'le bénnea'.

<sup>39</sup> Ca' naca na, bi bícha'dau', le gun ba xuzre guchálajle waláz chee Dios, ne quebe guzágale bénnea' dxuchálajle' dizra'



nazrá'la. <sup>40</sup> Xúgute da caní dxal-la' gunle dutę ba lá'ana, ne ca dxal-la' gaca na.

## 15

### *Ca bebán Cristo ládujla benne' gate*

<sup>1</sup> Na'a, bi bicha'dau', dxuzenda' le'e dizra' chawe' da ba bzenda' le'e, da na' guzi' lu na'le, ne da da'le le'e. <sup>2</sup> Ne cheę dizra' chawe' nigá nalale che dxęjlele cheę da bzenda' le'e, ne che quebe guca dácheze xel-la dxęajlí lazre' cheęle.

<sup>3</sup> Da naca blaudxa, bzęajni'ida' le'e da guzi' lu na'a, gute Cristo ne cheę dul-la da nabágadxu ca naxúaj na lu dizra' lá'azxa, 'na' bulucachę' Le', na' bebane' zra guxunne' zra ca naxúajqueze na lu dizra' lá'azxa, 'na' ble'e lawe' lau Pedro, na' gudę na' ble'e lawe' lau benne' gubáz cheę' ca'. <sup>6</sup> Gudę na' ble'e lawe' lau bi bichedxu zaj ná-cadxę' ca gazxu' gaxúa benne' zaj nazrague' tu zren, na' benne' zan, benne' ca' ne zaj naca bane', láqueze benne' zan, benne' ca' ba gulatię'. <sup>7</sup> Gudę na' ble'e lawe' lau Jacobo, na' gudę na' ble'e lawe' lau xúgute benne' gubáz cheę' ca'.

<sup>8</sup> Bzębedxa, ca gudę cheę xúgute da na', ble'e lawe' lawa' neda', lácala neda' naca' ca tu bidau', bi gúlajbe' ba gudę beu' cheębe'. <sup>9</sup> Neda' naca' benne' bzębedxa cheę xúgute benne' gubáz cheę Cristo, ne quebe naca chia' si' la' gubáz cheę Cristo lawe' da gudáu zi' xuzra' bi ca' cheę Dios. <sup>10</sup> Naca' da naca' lawe' da guca Dios zri' lazre' nen neda', na' quebe guca dácheze xel-la zri'i lazre' cheę' nen neda', lawe' da ba nundxa' zrin ca xúgute benne' gubáz ca', láqueze quegá neda' nuna' na, san Dios bchínene' neda'. <sup>11</sup> Quebe zácadxu na che naca neda', u che naca benne' ca', da nigá naca na dizra' bzęnentu' bęnneache, ne naca na da guxęajlele.

### *Ca xelexebán benne' gate*

<sup>12</sup> Che da dxuzęnentu' bęnneache dxenná na bebán Cristo ládujla benne' gate, ¿ájzra naca na bál-lale le'e dxennale quebe xelexebán benne' gate? <sup>13</sup> Che quebe xelexebán benne' gate, Crístoqueze quebe bebane' ládujla benne' gate, <sup>14</sup> na' che quebe bebán Cristo ládujla benne' gate, dácheze naca da dxuzęnentu' bęnneache, ne dácheze naca da dxęajlí lázrele cheę Cristo. <sup>15</sup> Che caní naca na dxexechębentu' cheę Dios da węn lazre'

lawe' da dxennantu' bsebán Dios Cristo, na' che quebe xelexebán benne' gate, quebe bsebán Dios Cristo. <sup>16</sup> Che quebe xelexebán benne' gate, Crístoqueze quebe bebane', <sup>17</sup> na' che quebe bebán Cristo, dácheze naca da dxęajlí lázrele cheę', na' ne nabágale dul-la. <sup>18</sup> Che caní naca na, cá'anqueze benne' zaj nate, benne' ca' guleajlí lazre' Cristo zaj nanítequeze'. <sup>19</sup> Che da dxębeza lázrentu' da naca cheę Cristo naca na cheęze xęzr la xu nigá, nácadxu baxáchedxa ca xúgute bęnneache.

<sup>20</sup> Na'a da li bebán Cristo ládujla benne' gate. Le' naque' benne' nedxu bebane' ládujla benne' gate quęzcala xúgute benne' ca' dxal-la' xelexebane'. <sup>21</sup> Ca guca, bla' xel-la gute lu xęzr la xu nigá ne cheę tuze benne', cá'anqueze ne cheę tuze benne' bla' xel-la dxexebán cheę benne' gate. <sup>22</sup> Ca naca dxelate xúgute bęnneache lawe' da zaj naque' tuze nen Adán, cá'anqueze xelape' benne' zaj naca tuze nen Cristo xelape' xel-la nabán li lazre'. <sup>23</sup> Xelexebán tu tuę' gate xelexexalę', nédxula bebán Cristo ca tu lina nedxu, na' gudę na', gate xelá' Cristo xelexebán benne' zaj naque' bi cheę' ca'.

<sup>24</sup> Nadxa cheajsę cheę xęzr la xu nigá gate guzría xi' Cristo xúgute da dxelenná bea, ne xúgute da dxelixeruj bea na, ne xúgute da zaj napa xel-la waca, na' gudę' xel-la dxenná bea cheę' lu na' Xradxu Dios. <sup>25</sup> Dxun na ba xen nna bea Cristo ca zrin zra ba nuzúa Dios zran ni'e xúgute benne' guledábague' Le', <sup>26</sup> na' da bzębedxa da cuía xi' naca na xel-la gute. <sup>27</sup> Ba nuzúa Dios xúgute zran ni'a Cristo, san gate dxenná na nuzúe' xúgute zran ni'e, dxaca bea na quebe zua Dios ládujla da ca', lawe' da Léqueze' naque' Bęnnea' bzuę' xúgute zran ni'a Cristo. <sup>28</sup> Gate ba zua xúgute lu na' Cristo, nadxa Crístoqueze, Bęnnea' naque' Zrí'inequeze Dios guzúa cuinę' lu na' Dios, Bęnnea' bdeę' xúgute lu na' Le'. Ca' naca na, Dios gaque' blau lawe' xúgute da de.

<sup>29</sup> Xetú da dxaca, zaj zua benne' dxeledxúe' nisa waláz cheę benne' zaj nate. ¿Bizr cheę na' dxelunę' caní che quebe xelexebán benne' gate? ¿Bizr cheę na' dxeledxúe' nisa waláz cheę benne' gate?

<sup>30</sup> Cá'anqueze, ¿bizr cheę na' zúate-quezdXu dxi'u lu da stębe? <sup>31</sup> Xúgute zra zua' lu da stębe cheę xel-la gute. Dxapa' le'e, bi bicha', da li naca da nigá ne cheę da

ba neza da napa' ne chee lu da nácadxu nen Xránadxu Jesucristo. <sup>32</sup> Che ca tu bénneacheze gudíl-lalëna' benne' zaj naca ca be snia ca' lu xezre Efeso ¿bizra da ba neza naca na chia'? Che quebe xelexebán benne' gate dxal-la' gundxu ca dxelenná bénneache, dxelenné': "Xi'aj gágudxu lawe' da wxre gátédxu."

<sup>33</sup> Quebe güele lataj nu si xe le'e. Naca cáteze dxenná na:

Che gácadxu tuze benne' ca' dxeluné' da calela,

tu zrénqueze gundxu da calela.

<sup>34</sup> Le guxúe xanne' cuínale, ne quebe gunle dul-la, lawe' da bál-lale le'e quebe núnbea xánnele Dios. Da nigá dxapa' le'e chee gápale xel-la stu'.

<sup>35</sup> Guchebe nu benne' neda': Ájazra xelexebán benne' gate? ¿Ájazra gaca belá' dxen chee'? <sup>36</sup> Da nigá naca na tu da xálaze, lawe' da gate dxázadxu tu binne, dxun na ba xen cuía xi' bínnedu na' chee gaca na tu xágadau'. <sup>37</sup> Da na' dxázadxu quebe naca na da xelá', san tu bínnedauze naca na, che naca na zrúa' xtíla u xetú bínnedau'. <sup>38</sup> Te na' gun Dios chee bínnedu na' tu xágadau' cáteze dxaca lázrequeze', na' chee tu tu bínnedau' dxuné' tu tu xágadau' cáteze zaj naca bínnedu ca'. <sup>39</sup> Quegá xúguté belá' dxen tuz ca zaj naca na. Tuze ca naca belá' dxen chee bénneache, ne xetuze ca naca belá' dxen chee be xixre' ca', na' xetuze ca naca belá' dxen chee bxínnedu ca', ne xetuze belá' dxen chee belá' ca'. <sup>40</sup> Cá'anqueze zaj naca belá' dxen chee xabáa, ne belá' dxen da zaj naca na chee xezr la xu nigá. Xel-la xrtan chee da zaj naca chee xabáa nazrá' ca xel-la xrtan chee da zaj naca chee xezr la xu. <sup>41</sup> Xel-la naxaní' chee gubizra nazrá' ca xel-la naxaní' chee beu', ne cá'anqueze nazrá' ca xel-la naxaní' chee belaj ca', na' ládujla belaj ca', xel-la naxaní' chee tu belaj nazrá' ca xel-la naxaní' chee xetú belaj. <sup>42</sup> Cá'anqueze dxaca chee benne' ca' xelexebang' ládujla benne' gate. Dxucáchedxu lu ba tu da guzru', na' xebán tu da québedxa gate. <sup>43</sup> Dxucáchedxu tu da xálaze, na' xebán tu da xabáa. Dxucáchedxu tu da nate ni'a na', na' xebán tu da wál-lale'e. <sup>44</sup> Dxucáchedxu tu belá' dxen chee beniácheze, na' xebán tu belá' dxen da naca na chee be' nácaquezdXu. Che zua tu belá' dxen da naca na bénneacheze,

cá'anqueze zua tu belá' dxen da naca na chee be' nácaquezdXu.

<sup>45</sup> Cá'anqueze caní naxúaj lu dizra' lá'azxa da dxenná na: Benne' nedxu Adán guque' bénneache ban, na' Adán, benne' bzebe, naque' Be' da dxunna xel-la nabán. <sup>46</sup> Bénnea' naque' Be' quebe ble'e nedxu, san bénnea' naque' bénneacheze. Gudé na' bla' Bénnea' naque' Be'. <sup>47</sup> Benne' nedxu guque' xu bxrte, ne guque' chee xezr la xu nigá, na' Benne' gudxupe' naque' Xránadxu, Benne' chee xabáa. <sup>48</sup> Belá' dxen ca' chee xezr la xu nigá zaj naca na ca guca bénnea' guque' xu bxrte, na' belá' dxen ca' da zaj naca na chee xabáa zaj naca na ca Bénnea' naque' chee xabáa. <sup>49</sup> Ca naca, nácadxu ca bénnea' guque' xu bxrte, cá'anqueze gácadxu ca Bénnea' naque' chee xabáa.

<sup>50</sup> Dxaca lazra' xapa' le'e, bi bícha'dau', belá' dxen cheedxu da naca na xu bxrte quebe gaca chu'u na naga dxenná bea Dios lawe' da na' guzru quebe gaca zraga na da na' si bea chadía chacanna. <sup>51</sup> Dxapa' le'e tu da nagache nédxute: Quegá xúgutédxu gátédxu, san xúgutédxu sidxu tu belá' dxen cube. <sup>52</sup> Chadíte gaca na, ca dxun benne' guchudie' xexraté lawe', gate xendxu chi'i luzu da dxulucuezre' da bzebe. Cuézre-queze luzu da dxulucuezre', na' xelexebán benne' gate naga cabátadxa xelatie', na' dxi'u sidxu tu belá' dxen cube. <sup>53</sup> Belá' dxen cheedxu da guzru dxal-la' xexaca na tu da québedxa guzru, na' belá' dxen cheedxu da gate dxal-la' xexaca na tu belá' dxen da québedxa gate. <sup>54</sup> Gate belá' dxen cheedxu da guzru ba bexaca na da québedxa guzru, ne belá' dxen cheedxu da gate ba bexaca na tu da québedxa gate, madxa gaca li da naxúaj na lu dizra' lá'azxa, da dxenná na: Ba beladxu lu na' xel-la gute.

<sup>55</sup> Lue', xel-la gute, ¿ga na' xel-la waca chiu' chee gunu' netu' we'?

Lue', xel-la gute, ¿ga na' da zrué'enu'?

<sup>56</sup> Da dxunna xel-la gute xel-la waca chee gun na dxi'u we' naca na dul-la, na' da nadxixruj bea da gula na' naca na da dxunna na dul-la xel-la waca chee gudé na dxi'u lu xel-la gute. <sup>57</sup> Na'a, xcalén Dios, Bénnea' dxunne' dxi'u xel-la waca chee zrué'edxu lu dul-la, ne lu xel-la gute ne chee Xránadxu Jesucristo.

<sup>58</sup> Chee le na', bi bícha' nazri'ite lazra', le se chacha, ne le súateze lu zrin dxúndxale

chee Xránadxu lawe' da nézele quebe naca dácheze zrin dxunle tu zren nen Xránadxu.

## 16

*Dumí da gutúpale chee gácalele bíchedxu ca'*

<sup>1</sup> Ca naca chee dumí gutúpale chee gácalele bi bíchedxu ca', le gun na cáteze bzéajni'ida' xúgute cue' bi chee Cristo zaj zra' xezre ca' zaj nababa Galacia. <sup>2</sup> Tu tu zra nedxu chee da gazre zra tu tule le'e dxal-la' gúnnale late' weaj ca da dxezile, na' cu'u cháwele na chee quebe gun na ba xen gúnnale dumí gate xida'. <sup>3</sup> Gate na' xelá'a, sel-la' xezre Jerusalén benne' ca' cuele, na' gunézruja' le' tu xiche chee xelu'e dumí na' chee bi bíchedxu zaj zre'e na'. <sup>4</sup> Che gata' lataj cha'a, na' sá'acalequeze' neda'.

*Da dxugú'u bea Pablo gune'*

<sup>5</sup> Lu neza chia' dxun na ba xen tea' naga nababa xezr la xu Macedonia, na' xelá'a xezre Corinto ca te na'. <sup>6</sup> Wegá'analja' nen le'e tu chi'i, u che ba guca, na' sua' nen le'e dutę beu' zaga ca', na' le'e waca gácalele neda' lu neza chia' naga dxal-la' cha'a. <sup>7</sup> Quebe dxaca lazra' xedajnná'a le'e ca teza', san dxebeza lazra' súaqueza' tu chi'i nen le'e, che gunna Xránadxu lataj.

<sup>8</sup> Na'a xegá'ana' lu xezre Efeso nigá ca zrin zra Pentecostés, <sup>9</sup> lawe' da napa' lataj guna' tu zrin zren chee Xránadxu da gulé'ete' lawe na, lácala naxán benne' ca' dxeledábage'.

<sup>10</sup> Che ba bla' Timoteo, le gun ba xuzre suabe' xel-la dxebe' nen le'e, ne quebe bi cué'ebe' gunne xue, lawe' da dxunbe' zrin chee Xránadxu cáteze dxun neda'. <sup>11</sup> Chee le na' netule le'e quebe guzúale-be' chalá'ala, san le gácale-be' chee xexu'ube' neza lu xel-la dxebeza zri lazre' chee xedajnná'abe' neda', lawe' da dxebeza'-be' tu zren nen bi bíchedxu caní.

<sup>12</sup> Ca naca chee bíchedxu Apolos, guta' xúele'eda' le' chee chéajlene' bi bíchedxu ca' xedajlenné'e le'e, san quebe guca lazre' se'e na'a. Widé' gate gape' lataj.

*Dxulugapa ljwezre' diuzre*

<sup>13</sup> Le sua ban lazre'. Le se chacha lu xel-la dxeajlí lazre' chee. Le se ca ze benne' biu. Le gaca benne' wal-la. <sup>14</sup> Dutę xel-la zri'i lazre' le gun xúgute da dxunle.

<sup>15</sup> Na'a, bi bícha'dau', ba nézquezle gulaca xrtía Estéfanos benne' nedxu naga nababa Acaya gulezi' lu ne'e dizra' chawe' chee

Cristo, na' buluzúa cuine' chee xelácalene' bi bíchedxu ca', bi chee Cristo. <sup>16</sup> Dxaca lazra' guzúa cuínale lu na' benne' caní, ne lu na' xúgute benne' dxelácale ljwézredxu, ne dxelún zrin chee Cristo. <sup>17</sup> Zua' xel-la dxebe' lawe' da belelá' Estéfanos, ne Fortunato, ne Acaico, lawe' da belune' chia' da quebe guzúquele gunle le'e lawe' da zrale zitu'. <sup>18</sup> Belún chúchue' be' nácaqueza', ne be' nácaquezle le'e. Dxun na ba xen si' lu na'le benne' caní.

<sup>19</sup> Xúgute cue' bi chee Cristo naga nababa xezr la xu Asia dxulugapa le'e diuzre. Aquilo ne Priscila, ne bi bíchedxu ca' dx-elezraga lu xu'u lize' dxulugápale'e le'e diuzre lu La Xránadxu. <sup>20</sup> Xúgute bíchedxu nigá dxulugape' le'e diuzre. Le gugapa diuzre ljwézrele tule xetule, ne le gunida ljwézrele.

<sup>21</sup> Neda', Pablo, dxuzúaja' da dxugapa' le'e diuzre nen ná'aqueza'.

<sup>22</sup> Che nu benne' quebe nazrí'ine' Xránadxu Jesucristo, cuía xi' bènnea'. ¡Gudá Xránantu'!

<sup>23</sup> Dxenaba' Xránadxu Jesucristo gun cháwe'e le'e. <sup>24</sup> Dxusel-la' chee xúgutele xel-la nazrí'i chia' lu La Jesucristo. ¡Ca'an gaca na!

## DIZRA' GUDXUPE' DA BZUAJ SAN PABLO CHEE BI CHEE CRISTO ZAJ ZRE'E CORINTO

*Pablo dxuzúajé' chee bi bíchedxu zaj zré'e xezre Corinto*

<sup>1</sup> Neda', Pablo, naca' gubáz chee Jesucristo lawe' da naca na da dxaca lazre' Dios. Tu zren nen bíchedxu Timoteo dxuzúaja' da nigá chee le'e, bi bícha'dau', zrágale chee Dios lu xezre Corinto. Cá'anqueze dxuzúaja' da nigá chee xúgute' bi chee Dios zaj zré'e xezre ca' zaj nababa xezr la xu Acaya. <sup>2</sup> Dxenaba' Xradxu Dios, ne Xránadxu Jesucristo gun chawé'e le'e, ne gunné' le'e xel-la dxebeza zri lazre'.

*Da ca' guz' guzaca' Pablo*

<sup>3</sup> Dxue lá'anantu' Dios, Xra Xránadxu Jesucristo, lawe' da naque' Xradxu dxexache lazre' dxi'u, ne Dios dxexúe zrene' dxi'u. <sup>4</sup> Dios dxexúe zré'nqueze' dxi'u ca naca xúgute' xel-la zi' da dxededxu, chee cá'anqueze dxi'u gaca xexúe zrendxu benne' ca' dxeledé'e xel-la zi', na' xue zrendxu le' cáteze da ba nun Dios cheedxu dxi'u. <sup>5</sup> Lawe' da dxededxu xel-la zi' zren ca da gudé Cristo, cá'anqueze ne chee Cristo zua Nu dxexúe zré'nqueze dxi'u, Léqueze Dios. <sup>6</sup> Chee le' na', che dxedentu' netu' xel-la zi', naca na chee sua Nu xexúe zren le'e, ne chee lale, na' caní gaca guchaga laule lu duté xel-la zren lazre' chee le' xel-la zi' ca' da dxededxu dxi'u. <sup>7</sup> Dxuxrén lázrele'entu' le'e, lawe' da nézentu' ca dxedele xel-la zi' tu zren nen netu', cá'anqueze sua Nu xexúe zren le'e tu zren nen netu', Léqueze Dios.

<sup>8</sup> Bi bicha', dxaca lázrentu' nézele ca naca xel-la zi' zren da gudentu' naga nababa Asia. Guca na tu xel-la zi' zrendxa ca da gaca guchaga launtu', na' québedxa guleza lázrentu' lantu'. <sup>9</sup> Gúquentu' ba zua gagu xelute benne' ca' netu'. Guca cheentu' da nigá chee bzéajni'i na netu' guxrén lázrentu' Dios, ne quegá guxrén lazre' cuínantu'. <sup>10</sup> Dios bselé' netu', na' ne dxuselé' netu' lu da stébe zren nigá chee xel-la gute, na' dxebeza lázrentu' Le' guseláqueze' netu' <sup>11</sup> che le'e gácalele netu', nábadxu Dios gácalene' netu'. Che benne' zan xelenabe' Dios gácalene' netu', na'

benne' zan xel'é'e Dios: Xcalenu', chee da chawe' ca' da gun Dios cheentu'.

*Bizr chee na' Pablo guzrene' chéajé' Corinto*

<sup>12</sup> Naca tu da ba neza da nápantu' da zua na lawe' da dxé xichaj lázrdauntu' netu' ba gudantu' lu da lá'azxa, ne du lázrentu', lu xezr la xu nigá, ne láduja le'e. Dios lu xel-la zri'i lazre' chee' gúcalene' netu' chee bentu' caní, ne quebe bentu' na lu xel-la sina cheézquezentu'. <sup>13</sup> Lu da dxuzúajntu' chee le' quebe bi de da quebe gaca gulábase, ne chéajni'ile, na' dxaca lazra' chéajni'i xánnele <sup>14</sup> ca ba guxéajni'ile late', chee lu zra xelá' Xránadxu Jesús, gácantu' netu' tu da ba neza chee le'e, ca le'e gácale tu da ba neza cheentu'.

<sup>15</sup> Lawe' da dxuxrén lazra' gaca caní, bechugu lazra' xida' nédxula xedajnná'a le'e chee gaca tu da ba neza chee le', na' xedajnná'a le'e chupa lasa, <sup>16</sup> lawe' da bechugu lazra' xedajnná'a le'e gate tea' cha'a xezre ca' zaj nababa Macedonia, na' te na', gate zezá'a lu xezre ca' zaj nababa Macedonia, xedajnná'a le'e xetú. Ca' gaca na, le'e gaca gácalele neda' cha'a xezre ca' zaj nababa Judea. <sup>17</sup> ¿Quebe naca' du lazra' gate dxechugu lazra' caní? ¿Dxéquele le'e naca' ca tu benne' chee xezr la xu nigá, na' dxennía': Awe', cabí, gate dxechugu lazra' da guna'? <sup>18</sup> Dios nézquezne' neda', ne Silvano, ne Timoteo, quebe dxentu' le'e: Awe', cabí. <sup>19</sup> Naca na caní lawe' da Jesucristo, Zri'ine Dios, Bénnea' bzénentu' le'e ca naca chee', cabata' gunné': Awe', cabí. Nen Cristo nácaqueze da li xrtizra Dios, <sup>20</sup> lawe' da ne chee Le' dxelaca li xúgute' da guchebe lazre' Dios. Chee le' na', gate dxue lá'anantu' Dios, dxennantu': ¡Ca'an naca na! ne chee Jesucristo. <sup>21</sup> Dios naque' Bénnea' ba nuzé chúchue' netu', ne le'e lu da naca chee Cristo, ne ba guqué'e dxi'u, <sup>22</sup> ne ba nuzé' cheedxu tu da dxulé'e na nácadxu bi chee Le', lawe' da ba nuzé' Be' Lá'azxa lu xichaj lázrdaudxu, da dxunna bea na sidxu da naca chee'.

<sup>23</sup> Che quebe ne xida' Corinto ca bechugu lazra', neze Dios naca na chee gaca' zren lazre' nen le'e, ne che quebe naca caní, dxenaba' Dios xeque'e xel-la nabán chia'. <sup>24</sup> Quebe naca na lawe' da dxaca lázrentu' mna bé'entu' le'e da dxal-la' chéajlele, lawe' da ba zé cháchale lu da dxéajlele. Dxaca lázrentu' bédxale lu da naca chee Cristo.

## 2

<sup>1</sup> Chee lē na' bechugu lazra' quebe xida' xedajnná'a le'e lu da baxache'. <sup>2</sup> Che neda' guzúa' le'e lu da baxache', ζnúzraqueze guzúa neda' lu xel-la dxebé? Tuze le'e, benne' ca' ba bzua' lu da baxache'. <sup>3</sup> Chee lē na' bzua' chee ca da bēna' lawe' da quebe guca lazra' xida' chee guzúale neda' lu da baxache', le'e na' dxal-la' guzúale neda' lu xel-la dxebé. Bxren lazra' che neda' zua' lu xel-la dxebé, cá'anqueze le'e súale lu xel-la dxebé. <sup>4</sup> Gate bzua' chee da na' guzélē'ēda' gunne xue, ne guzúa' lu da zi' da xa', ne cá'anqueze gudxézrele'ēqueza', san quebe bzua' da na' chee guzúa' le'e lu da baxache', san chee nézele nazrí'ilē'ēda' le'e.

*Ca dxal-la' xulunite lawe' chee bēnea' bene' da calēla*

<sup>5</sup> Che nu benne' ba bzue' neda' lu da baxache', quegá chia' néda'ze bene' na, san cá'anqueze waca nna dxu, bzue' xúgutele lu da baxache'. Dxennía': Waca nna dxu, chee quebe gácatēca' snia. <sup>6</sup> Ca xel-la zi' da bdele bēnea' gate na' bzragale, ba nácale'ēqueze da na'. <sup>7</sup> Ca' naca na, na'a dxal-la' gunitē laule chee bēnea', ne xue zrenle lē', chee quebe gunitie' xel-la dxebeza lazre' chee' ne chee da baxache' zren da dxedé'. <sup>8</sup> Chee lē na' dxata' xueda' le'e gulé'ele lē' xecha lasa ca nazrí'ilē'ēle lē'. <sup>9</sup> Bzua' nédxula chee ca naca da nigá chee gulé'ele lawe' che nácale wezúe dizra' lu xúgute da dxaca. <sup>10</sup> Na'a, nu benne' dxunite laule chee', cá'anqueze neda' dxunite lawa' chee'. Ca da bnite lawa' neda', che naca na tu da dxal-la' gunitē lawa', ba bnite lawa' na ne chee le'e lau Cristo <sup>11</sup> chee quebe seque' Satanás nna be'e na dxi'u, na' ba nézquezdxu ca da dxun na.

*Pablo dxezé' gunne xue lu xezre Troas*

<sup>12</sup> Gate bzrina' xezre Troas chee guzenda' bēneache dizra' chawe' chee Cristo, gutá'lē'ē lataj chia' guna' zrin chee Xránadxu. <sup>13</sup> Guzúale'a gunne xue lawe' da quebe bezrelda' bi bíchedxu Tito ga na'. Chee lē na' bzea' dizra' benne' ca' zaj zre'ē na', na' guxá'a xezr la xu Macedonia.

*Dxezrué'edxu ne chee Cristo*

<sup>14</sup> Xcalén Dios, Bēnea' dxeché'tequeze' dxi'u lu neza guxú'u Jesucristo lu da bzrué'ene', ne dxulé'ele lawe' ne cheedxu dxi'u dizra' chee' ca tu da dxelá zixre da

dxezriluj gáteteze na. <sup>15</sup> Dxi'u nácadxu ca da dxelá zixre da dxuzúa Cristo lau Dios, ne dxezriluj na ládujla benne' ca' xelélé', ne ládujla benne' ca' xelebía xi'ē. <sup>16</sup> Lau benne' ca' xelebía xi'ē da dxelá nigá naca na ca tu da dxute bēneache, san lau benne' ca' xelélé naca na tu da dxunezruj na bēneache xel-la nabán. ζNu benne' naca chee' gaque' caní? <sup>17</sup> Netu' quebe dxedantu' dxútentu' dizra' chee Dios, ne quebe dxuchantu' na ca dxelún benne' zantē. Lawe' da dxen Dios, dxuchálajntu' du lázrentu', ca benne' nasel-la Dios, ne ca wen zrin chee Cristo.

## 3

*Dizra' chee xel-la wezría cube*

<sup>1</sup> Gate dxennantu' da nigá, ζdxéquele dxézú launtu' xecha lasa dxennentu' chawe' da naca cheé'zquezentu'? ζDxun na ba xen gulé'entu' le'e tu xiche da dxulé'e na nácantu' xrlátaje, u nábantu' chee tu xiche caní, ca dxelún bal-la benne'? ζCabí! Lawe' da nácaqueze le'e ca tu xiche da dxulé'e na nácantu' xrlátaje, da naxúaj na lu xichaj lázrdauntu', na' xúgute bēneache gaca xelexúnbe'e na, ne xululabe' na. <sup>3</sup> Le'e nácale ca tu xiche da nuzúaj Cristo, ne da dxulé'e launtu' netu'. Nácale ca tu da naxúaj na da quebe naca na tu lu xiche, san ne chee Be' Lá'azxa chee Dios ban, tu da quebe naxúaj na lu blaga xiaj, san lu lázrdaudxu.

<sup>4</sup> Ne chee Cristo dxuxrén lázrentu' Dios, <sup>5</sup> quegá chee bi gaca guntu' da naca cheé'zquezentu', san, ca naca da gaca guntu' naca na chee Dios. <sup>6</sup> Le' ba nunne' netu' guntu' zrin chee' ne chee tu xel-la wezría cube da quebe naca na ne chee tu da naxúaj na, san da naca na ne chee Be' Lá'azxa chee'. Da nadxixruj bea na da naxúaj na dxuzría xi na dxi'u, san Be' Lá'azxa na' dxunna dxi'u xel-la nabán.

<sup>7</sup> Da bdxixruj be'e Moisés na' bxuaj na lē'ē xiaj blaga', ne bla' nen tu da bsení'lē'ē, na' québedxa belezúe benne' Israel ca' xelené'ē lau Moisés, lawe' da gúcatite legala lē'ē dxu'a lawe', na' xel-la naxaní' na' bexul-la na chawe lazre'. Che lu xel-la naxaní' zren bla' da nadxixruj bea na, da dxuzría xi na dxi'u, <sup>8</sup> da zrenlē'ēdxu naca xel-la naxaní' chee dizra' chawe' na' da nusá Be' Lá'azxa cheedxu. <sup>9</sup> Che da nadxixruj bea na da dxuzría xi na dxi'u guca na tu da xabáa zrente, na' tu da xabáa zrenlē'ēdxu naca dizra'

chawe' na' da dxucá'ana na dxi'u xrlátaje lau Dios. <sup>10</sup>Lácala che da nadxixruj bea na nédxula guca na tu da xabáa, na'a quebe bi naca xabáa chee na lau dizra' chawe' nigá da naca na tu da xabáa zrénlé'edxa. <sup>11</sup>Che guca tu da xabáa chee da na' guzi bea na tu chí'idauze, napa na tu da xabáa zrénlé'edxa da na' si bea na chadía chacanna.

<sup>12</sup>Lawe' da dxuxrén lázrentu' naca na caní, du lázrentu' dxuchálajntu' dizra' chawe' na'. <sup>13</sup>Quebe dxuntu' ca ben Moisés, bgacu lawe' tu ladxe' chee quebe xelexé'e benne' Israel ca' xexul-la xel-la naxaní' na' da quebe guzi bea na. <sup>14</sup>Benne' Israel ca' quebe guléajni'ine'. Ne na'a zra, gate dxululabe' xel-la wezría gula na', ladxe' ná'queze quebe dxue na le' lataj xeléajni'ine', lawe' da quebe ne xedúa na, na' gaca xedúa na tuze ne chee Cristo. <sup>15</sup>Na'a zra, gate dxululabe' dizra' chee Moisés, zua ca tu ladxe' da dxucache na xichaj lázrdawé'. <sup>16</sup>Gate tu benne' xexaque' chee Xránadxu, xedúa ladxe' na' lu xichaj lázrdawé', <sup>17</sup>lawe' da naca Xránadxu Be' na', na' naga zua Be' chee Xránadxu, na' de xel-la weselá lu na' da nadxixruj bea na chee Moisés na'. <sup>18</sup>Chee le' na' xúgutedxu dxi'u, lawe' da quebe da' laudxu tu ladxe', nácadxu ca tu wana' da dxulé'e na da xabáa chee Xránadxu, na' dxi'úqueze, tu tu lasa gate dxelé'edxu da xabáa chee' dxexácadxu ca naca Cristo, lawe' da tu tu lasa na' nápadxadxu da xabáa chee'. Da nigá dxun Be' chee Xránadxu, na dxuché'e dxi'u lu xichaj lázrdaudxu.

## 4

<sup>1</sup>Ca' naca na, cabata' dxate ni'a nantu' lawe' da lu xel-la dxexache lazre' chee', Dios ba nusebague' netu' zrin nigá chee Cristo da dxuntu'. <sup>2</sup>Ba nuzántu' chalá'ala da dxelún bénneache bagácheze, ne da dxedué'entu' ca zaj naca na. Quebe bi dxuntu' da wen lazre', ne quebe dxuchantu' dizra' chee Dios, san dxennentu' tuze da li, na' caní dxuzúa cuñantu' lu na' xichaj lázrdau xúgute' bénneache lau Dios. <sup>3</sup>Che dizra' chawe' da dxuzé'entu' bénneache ne nagache na, naca na caní tuze lau benne' ca' xelebía xi'e. <sup>4</sup>Lawe' da quebe dxeléajle'e chee Cristo, na' da xriwe', da na' naca na dios chee xezr la xu nigá ba nun chul-la na xichaj lázrdawé' chee quebe xelexé'ene' xel-la naxaní' chee dizra' chawe' chee xabáa

chee Cristo, Bénnea' naque' lu'a lesaca Dios. <sup>5</sup>Quebe dxuzé'entu' bénneache ca naca cheézquezentu', san ca naca chee Jesucristo. Dxnennantu' naque' Xránadxu, na' ca naca cheentu' dxennantu' nácantu' wen zrin chee lawe' da nazrí'intu' Jesús. <sup>6</sup>Dios ná'queze, Bénnea' gunná be'e guxaní' xi' na' lu da chul-la, naque' Benne' ba bene' guxaní' xi' chee' lu xichaj lázrdaudxu, chee gaca gúnbeadxu da xabáa chee Dios da dxácate legala na dxu'a lau Jesucristo.

*Dxundxu xúgute ne chee xel-la dxeajlí lazre' cheédxu*

<sup>7</sup>Da xabáa nigá nápantu' lu belá' dxen cheentu', da naca na ca tu xesu' xu, chee gaca bea za xel-la waca zren nigá lu na' Dios, ne quegá cheézquezentu'. <sup>8</sup>Chee le' na':

Láqueze zúantu' lu da stébele'e, quebe dxezentu' gunne xue.

Láqueze dxezentu' gunne xue, tu dxebeza lárezquezentu' gácale Dios netu'.

<sup>9</sup>Láqueze zaj nau zi' xuzre' netu', quebe dxusán Dios netu'.

Láqueze dxeline' netu' xu, quebe dxebía xintu'.

<sup>10</sup>Gáteteze dxéajntu' naca tuze belá' dxen cheentu' nen xel-la gute chee Jesús chee gulé'e lau lu belá' dxen cheentu' xel-la nabán chee Jesús. <sup>11</sup>Dxácate naca bantu' zúantu' chee gátentu' xúgute zra ne chee Jesús, chee gulé'e lau xel-la nabán chee Jesús lu belá' dxen cheentu' da gate. <sup>12</sup>Ca' naca na, lácala tu zúazquezentu' lu da stebe chee xel-la gute da nigá, dxun na sua tu xel-la nabán cube chee.

<sup>13</sup>Naxúaj lu dizra' lá'azxa da dxenná na: Guxéajle'a, na' chee le' na' bchálaja', na' cá'anqueze netu', lu xel-la dxeajlí lazre' caníqueze, dxéajle'entu', ne dxuchálajntu', <sup>14</sup>lawe' da nézentu' Dios, Bénnea' bsebane' Xránadxu Jesús ládujla benne' gate, cá'anqueze gusebane' dxi'u tu zren nen Jesús, na' tu zren nen le'e, xeché'e dxi'u lau le'. <sup>15</sup>Xúgute da nigá guzaca zintu' chee gaca tu da ba neza chee, chee gaca na, gate xelezi' benne' zante xel-la xrlátaje chee Dios, cá'anqueze benne' zante xelé'e le': Xcalenu', chee gaca ba chee Dios.

<sup>16</sup>Chee le' na', cabata' dxate ni'a nadxu. Láqueze dxexru belá' dxen cheedxu, Dios dxuxucubé' be' nácaquezdXu tu zra tu zra.

<sup>17</sup>Da dxézácadxu lu xezr la xu nigá naca na tu da dauze, da teze chee na, na' nusá na cheedxu tu xabáa chadía chacanna da

szrente, ne da cháwedxa. <sup>18</sup>Quebe nná'adxu ca da dxelé'edxu, san nná'adxu da quebe nalá', lawe' da quebe dxelezí bea da ca' dxelé'edxu, san da ca' quebe dxelé'edxu dxelezí bea na chadía chacanna.

## 5

<sup>1</sup>Bela' dxen cheedxu naca na ca tu xu'u lizre be' nácaquezdxu. Bela' dxen cheedxu naca na ca tu xu'u da quebe si bea na, na' gate gátedxu Dios ba nucueze' cheedxu xabáa tu xu'u da zea jlí canna, da nun Diósqueze, ne quegá bènneache. <sup>2</sup>Da li dxácatę naca bandxu lu belá' dxen nigá dxebezre we'dxu lawe' da dxaca lázredxu cheajchú'udxu belá' dxen cube na' da gunna Dios dxi'u xabáa. <sup>3</sup>Quebe xegá'ana cá'aze be' nácaquezdxu xabáa. Cheajchú'u na belá' dxen cube na'. <sup>4</sup>Dxácatę ne naca bandxu lu xu'u nigá da naca na belá' dxen cheedxu, dxebezre we'dxu, ne dxededxu xel-la zi'. Quebe nácaze na lawe' da dxaca lázredxu gusandxu belá' dxen gula cheedxu nigá. Dxaca lázredxu cheajchú'udxu belá' dxen cube, na' ca'an gaca xenite belá' dxen cheedxu da dxal-la' gate, na' la' belá' dxen cube cheedxu da gaca ban na chadía chacanna. <sup>5</sup>Bènnea' ba nune' dxi'u cheę gaca cheedxu caní naque' Dios, Bènnea' ba nune' dxi'u Be' Lá'azxa ca tu da dxunna bea na dxal-la' sidxu tu belá' dxen cube xabáa.

<sup>6</sup>Ca' naca na, dxuxrén lázretequezdxu Dios. Ba nezdxu dxácatę naca bandxu lu belá' dxen nigá zúadxu zitu'la naga zua lúzredxu, da naca na, quebe zúaledxu Xránadxu, <sup>7</sup>na' dxedadxu ne cheę xel-la dxeajlí lazre' cheedxu, quegá ne cheę da dxelé'edxu. <sup>8</sup>Dxuxrén lázredxu Dios, ne dxaca lázredxadxu gusandxu xel-la nabán cheedxu lu belá' dxen nigá cheę chéajdxu cheajsúaledxu Xránadxu. <sup>9</sup>Cheę le' na' dxundxu ba xuzre gúntequezdxu da xezaca ba lazre' Xránadxu, che nagá'anadxu lu belá' dxen cheedxu nigá, u che cheajchú'udxu belá' dxen cube, da zua na xabáa, <sup>10</sup>lawe' da xúgutedxu dxun na ba xen xezrindxu lau Cristo cheę guchi'e ca da nundxu tu tudxu, cheę si' lu nadxu ca da xáladxu, cáteze naca da xrlátaje, u da calęla da ba bendxu gate ne zúadxu lu belá' dxen cheedxu nigá.

*Dizra' da dxexún dxi'u tuze nen Dios*

<sup>11</sup>Cheę le' na', lawe' da núnbeantu' ca dxal-la' zrębedxu Xránadxu, dxuntu' ba xuzre guntu' xelélé bènneache. Dios ba nézene' da nácantu', na' dxebeza lazra'

cá'anqueze le'e nézele na. <sup>12</sup>Quegá dxen- nęntu' xrlátaje cheęzquezentu', san dxún- nantu' le'e lataj gápale netu' ba lá'ana, cheę gaca xechębele cheę benne' ca' dxu- lucá'ana szren cuine' ca naca da zaj naque' cúzreze, ne quegá ca naca da zaj naque' lu xichaj lázrdawe'. <sup>13</sup>Che dxeleque bèn- neache nadá xichaj lázrdauntu' naca na cheę guntu' zrin cheę Dios, na' che quebe nadá xichaj lázrdauntu' naca na cheę gaca tu da ba neza cheęle le'e. <sup>14</sup>Xel-la zri'i lazre' cheę Cristo dxusebaga na netu' lawe' da nézentu' che tu benne' gutię' waláz cheę xúgute bènneache, na' ba gulate xúgute'. <sup>15</sup>Cristo gutię' waláz cheę xúgute bèn- neache, cheę benne' ca' zaj naca bane' quębedxa xelaca bane' cheęzqueze', san cheę Le', Bènnea' gutię', ne bebane' waláz cheę benne' ca'. <sup>16</sup>Cheę le' na', quębedxa nna'ntu' ca naca da nácaqueze tu benne' lu xęzr la xu nigá, na' láqueze nédxula gunna'ntu' Cristo cáteze gúcaqueze' lu xęzr la xu nigá, na'a quębedxa nna'ntu' Le' caní. <sup>17</sup>Ca' naca, che tu benne' naque' tuze nen Cristo, naque' tu benne' cube. Da gula ca' cheę benne' nigá ba guledé cheę na, na' xúgute na zaj naca na cube.

<sup>18</sup>Xúgute da caní dxun Dios, Bènnea' bex- une' dxi'u tuze nen Léqueze' ne cheę Cristo, na' bsebage' dxi'u guzendxu bènneache ca gaca xelexaque' tuze nen Dios. <sup>19</sup>Gate gute Cristo, Dios guzúalequeze' Le', ne bexune' bènneache cheę xęzr la xu nigá tuze nen Le', ne quebe gunné'e ca zaj naca dul-la zaj nabaga bènneache ca', na' bsebage' dxi'u guzendxu bènneache dizra' da dx- exún dxi'u tuze nen Dios. <sup>20</sup>Ca' naca na, nácantu' gubáz cheę Dios ne cheę Cristo, na' naca na cáteze Diósqueze dxata' xuene' le'e lu dxúa'antu', na' dxata' xuentu' le'e lu La Cristo, le xexaca tuze nen Dios. <sup>21</sup>Cristo netú dul-la ca bene', san ne cheędxu dxi'u, Dios bdeę' Le' cheę gutię' le'e xaga bęguaj ca tu benne' dul-la, cheę xexácadxu benne' xrlátaje lau Dios ne cheę da ben Cristo.

## 6

<sup>1</sup>Ca' naca na, ca wen zrin tu zren nen Dios dxata' xuentu' le'e cheę quebe guzúale chalá'ala xel-la zri'i lazre' cheę Dios, <sup>2</sup>lawe' da lu dizra' lá'azxa dxenné':

Tu zra dxezaca ba lazra' benda' chiu', na' lu zra cheę xel-la weselá gúcalęna' lue'.

Na'a naca na zra dxezaca ba lazre' xenne' chee, ne guselé' le'e.

<sup>3</sup> Quebe bi dxuntu' da gun na quebe xelájle bèneache chee Cristo, chee quebe nu nne calela chee zrin dxuntu'. <sup>4</sup> Ca naca xúgute da dxuntu', dxaca lázrentu' gulé'entu' bèneache nácantu' wen zrin chee Dios,

ne chee xel-la dxebeza zren lazre' cheentu' gate dxuchaga launtu' da dxezá-cantu',

ne da dxexázzrentu', ne da zaj naca stebe cheentu',

<sup>5</sup> ca buluzálaje' netu', ne gulegu'e netu' lizre xia.

Guledábague' netu' san bénle'entu' zrin.

Zane' lasa quebe gúsentu', ne quebe bi gudáguntu'.

<sup>6</sup> Cá'anqueze blé'entu' da nácantu'

ne chee tu xel-la nabán li lazre' cheentu',

ne ne chee da li da núnbeantu',

ne ne chee xel-la zren lazre' cheentu',

ne xel-la zri'i lazre' cheentu',

ne ne chee Be' Lá'azxa, Bénnea' zúalene' netu',

ne ne chee xel-la nazrí'i cheentu' da naca na du lazre',

<sup>7</sup> ne ne chee dizra' li da dxuzénentu' bèneache,

ne ne chee xel-la waca chee Dios da zúale na netu'.

Bhínentu' da zaj naca ca xia chee wedil-la chee da xrlátaje chee gudíl-lantu', ne chee gudentu' chalá'ala da zaj naca ca xia chee wedil-la chee benne' ca' dxeledábague' netu'.

<sup>8</sup> Zua gate dxelape' netu' ba lá'ana',

ne zua gate dxuluzúe' netu' chalá'ala.

Zua gate dxelenné' cheentu' da xrlátaje,

ne zua gate dxelenné' cheentu' da calela.

Zua gate dxelenné' nácantu' wen lazre',

ne zua gate dxelenné' dxennentu' da li.

<sup>9</sup> Zua gate quebe nu dxuzé naga netu',

ne zua gate dxuluzé naga xánnie' netu'.

Zua gate zúantu' lu da stebe chee xel-la gute, san ne naca bantu'.

Zua gate dxuludé' netu' xel-la zi', san quebe ne xelutie' netu'.

<sup>10</sup> Láqueze zúantu' lu da baxache', zúatequezentu' lu xel-la dxebé.

Lácala nácantu' benne' xache', ba nuntu' benne' zan benne' gunní'a.

Láqueze quebe bi núantu', xúgute ná-pantu'.

<sup>11</sup> Bi bíchentu', benne' Corinto, ba bchálanjtu' du lázrentu'. Ba blé'entu' le'e ca nazrí'i lázrentu' le'e. <sup>12</sup> Tu zúazqueze xel-la zri'i lazre' cheentu', na' le'e na' quebe nazrí'ile netu' du lázrele. <sup>13</sup> Dxata' xueda' le'e ca dxun tu benne' dxata' xuene' bi cheéqueze' chee gulé'ele neda' du lázrele xel-la nazrí'i da zua na lu xichaj lázrdaule cáteze beña' neda'.

*Nácadxu xudau' chee Dios ban*

<sup>14</sup> Quebe gunle tuze nen benne' quebe dx-eléajle'e chee Cristo, da gaca na ca chacué' bezre gu'una, be quebe zaj nadíl-leba'.

¿Ájazra gun da xrlátaje gaca na tuze nen da calela?

¿Ájazra gun xel-la naxaní' gaca na tuze nen da chul-la?

<sup>15</sup> ¿Ájazra gun Cristo gaque' tuze nen Sattanás?

¿Ájazra gun benne' dxéajle'e chee Cristo gaque' tuze nen benne'

quebe dxéajle'e chee'?

<sup>16</sup> ¿Ájazra gun xudau' chee Dios gaca na tuze nen bedáu' xiaj xaga?

Lé'equenze nácale xudau' chee Dios ban cáteze gunná Díósqueze:

Súalena' le', ne tálena' benne' ca'.

Gaca' Dios chee benne' ca', na' le' xelaque' benne' xezre chia'.

<sup>17</sup> Chee le na', cá'anqueze gunné':

Le xedxúaj ládujla benne' ca', ne le cuasa na', dxenná Xránadxu.

Quebe gutale da sban.

Nadxa sí' lu na'a le'e <sup>18</sup> ne gaca' Xrale le'e, na' le'e gácale zri'ina' bi biu, ne zri'ina' bi nu'ula.

Caní dxenná Xránadxu, Bénnea' nape' dute xel-la waca.

## 7

<sup>1</sup> Ca' naca na, bi bícha'dau' nazrí'ite lazra', da caní zaj naca na da guchébe lazre' Dios cheedxu. Chee le na' dxal-la' guxúe xanne' cuínadxu chee quebe güedxu lataj netú da sban gudxén na dxi'u lu bela' dxen cheedxu, ne lu be' nácaquezdxu, na' lawe' da dxezrébedxu Dios dxal-la' guzúa cuínadxu lu na' Dios dute ca nácadxu.

*Ca belexebí'i lazre' benne' Corinto*

<sup>2</sup> Le sí' lu na' le netu'. Quebe bi da calela ne guntu' chee nu benne' ládujla le'e, ne quebe nu ne guchántu', ne quebe nu ne sí xentu'.

<sup>3</sup> Quebe dxennía' da nigá chee gusebaga' le'e zria, san naca na ca ba gucha' le'e nédxula,



le'e zúale lu lázrdawa' che gaca bana', u che gatia' tu zrentę nen le'e. <sup>4</sup> Du lazra' dxuchálajlena' le'e, ne zua' lu da ba neza ne cheęle le'e. Lu xúgutę da dxezácantu' zua da dxexúe zrenle'ę neda', na' dxebéle'ęda'.

<sup>5</sup> Da li, gate bzrintu' naga nababa Macedonia, quebe bezi' lázrentu'. Guzúantu' lu da stębe gáteteze, lawe' da gáteteze gudentu' guledábaga bėnneache netu', na' lu lázrdauntu' bezrėbentu'. <sup>6</sup> Nadxa Dios, Bėnnea' dxexúe zrene' benne' zaj nate ni'a ne'ę, bexúe zrene' netu' ne cheę Tito lawe' da bezrinbe' naga zúantu', <sup>7</sup> ne quegá tuze lawe' da bla'be', san cá'aqueze lawe' da bexúe zrenle lebe'. Gúzrebe' netu' ca dxezá lázrele lé'ele netu', ne bzenbe' netu' ca lu da baxache' zúale, ne ca gunne xue dxezele neda', na' cheę le na' gubéle'ędxeda'.

<sup>8</sup> Láqueze da bzuaaja' cheęle bzua na le'e lu da baxache', quebe dxebezre lazra' cheę da na'. Láqueze gudxezre lazra' nédxula gate guque be'eda' bzua na le'e lu da baxache' tu chí'idau', <sup>9</sup> na'a dxebeda', quegá lawe' da guzúale lu da baxache', san lawe' da ben da baxache' na' bexíaje lázrele. Le'e bchaga laule da baxache' na' ca da bezaca ba lazre' Dios, na' da bzuaaja' cheęle quebe bi da calela ben na cheęle. <sup>10</sup> Da baxache' da dxuchaga laudxu ca da dxezaca ba lazre' Dios dxun na dxexebi' lázredxu cheę ladxu, na' quebe dxal-la' cuezre lázredxu cheę na. Che xegá'anadxu lu da baxache' ca dxelún bėnneache cheę xęzr la xu nigá, na' tu chí'ize gátėdxu. <sup>11</sup> Le'e bchaga laule da baxache' da guca na cheęle ne cheę da bzuaaja', ne bėnle ca da dxezaca ba lazre' Dios, na' le nna'xque na'a:

Bzua na le'e gunne xue ca naca da guca, ne bėn na ble'ele ca da bėnle.

Bcha'a na le'e, ne bchebe na le'e.

Nadxa guzė lázrele lé'ele neda',

ne guzúale gudele xel-la zi' bėnnea' bėn da calela na'.

Ca naca xúgutę da nigá ble'ele quebe nabá-gale zria cheę dul-la nigá. <sup>12</sup> Ca' naca na, gate bzuaaja' cheęle da na', quebe guca na lawe' da gudxe'a gunne xue cheę bėnnea' bėne' da calela na', ne quegá lawe' da gudxe'a gunne xue cheę bėnnea' guca na cheę', san bėna' na cheę gueque be'ele lau Dios ca dxele gunne xue cheęntu'. <sup>13</sup> Cheę le na' guca da bexúe zren na netu'.

Da naca tu da zrendxa, gubéle'entu' gate blé'entu' zúale Tito xel-la dxebé, lawe' da xúgutęle le'e bexúe zrenle-be'. <sup>14</sup> Láqueze bca'ana szrena' le'e lau Tito, quebe dxe-dué'eda', lawe' da cáteze naca da li ca naca xúgutę da bchálajlena' le'e, cá'aqueze guca da li da bėna' gate bca'ana szrena' le'e lau Tito. <sup>15</sup> Nazrí'idxabe' le'e gate dxajsá lázrebe' ca bėnle xúgutęle le'e, bėnle cáteze gunábabe' le'e, ne ca guzı' lu na'le lebe' lu dutę xel-la dxexurj lazre', ne lu xel-la dxezrebe. <sup>16</sup> Dxebeda' lawe' da dxuxrėn lazre' xánnia' le'e.

## 8

### *Da dxunėzrujdxu du lázredxu*

<sup>1</sup> Na'a, bi bicha', dxaca lazra' guzenda' le'e ca ble'e lau xel-la zri'i lazre' cheę Dios ne cheę xúgutę cue' bi cheę Cristo zaj nnita' lu xęzr la xu Macedonia. <sup>2</sup> Láqueze guledéę' tu xel-la zi' zren gulebéle'ęquezne', na' láqueze zaj nácalę'e benne' xache', du lazre' bulunėzruje' da zaj de cheę', na' belunę' ca benne' gunni'a ca'. <sup>3</sup> Dxexecheba' du lazre' bulunėzruje' xúgutę da gulezėquene', ne da zrendxa ca da gulezėquene'. <sup>4</sup> Gulata' xuene' netu' güentu' le' lataj xelunę' tu zren bėnneache dxelácalęe' bi bíchedxu ca' dxelexázrjene'. <sup>5</sup> Belundę' ca da guleza lázrentu', lawe' da belunna cuínaqueze', nédxula cheę Xránadxu, na' gudé na' cheęntu' netu', cáteze dxaca lazre' Dios. <sup>6</sup> Ca' naca na, guta' xúentu' Tito gusexuzre' gutupe' da gunėzruje le'e, da na' guzú lawe' dxutupe' gate nate. <sup>7</sup> Le'e dxúnle'ęle ca naca da dxunle, ca dxeajlı lázrele Dios, ne ca dxusėdele bi cheę Cristo, ne ca naca da naxėajni'ile, ne ca du lázrele dxunle xúgutę, ne ca nazri'ile netu'. Ca' naca na, cá'aqueze dxal-la' gúnle'ęle ca gunle zrin chawe' nigá.

<sup>8</sup> Quebe dxapa' le'e da nigá ca tu da dxenná be'eda' le'e. Dxaca lazra' nézele ca du lazre' dxelún xezicadxa bėnneache zrin nigá, dxulunėzruje' dumı, cheę gueque be'ele che naca li lazre' xel-la zri'i lazre' cheęle. <sup>9</sup> Ba nézquezele ca naca xel-la zri'i lazre' cheę Xránadxu Jesucristo. Naque' benne' gunni'a, san bėn cuine' benne' xache' lawe' da bzri'ine' le'e, cheę gácale le'e benne' gunni'a lu da naca cheę Cristo lawe' da gudé Le' lu xel-la xache'.

<sup>10</sup> Chee gaca da ba neza chee dxapa' le'e da dxéqueda' ca naca da nigá. Gudú iza guzú laule, quegá dxúnzele, san du lázrele dxunle da nigá, dxunézrujle dumí. <sup>11</sup> Na'a, le gúnteze na chee xexuzrte gunle na, gunle na du lázrele cáteze guzú laule dxunle nédxute, gunézrujle ca da du de chee. <sup>12</sup> Che da li dxaca lazre' tu benne' gunézruje', Dios xezaca ba lazre' na chee gunézruje' ca da nape', ne quegá dxenabe' da quebe napa béneea'.

<sup>13</sup> Quebe dxennía' da nigá chee xexácale le'e xache' chee gácale benne' xula. <sup>14</sup> Naca na chee gápale lébete. Na'a nápale chee gunézrujle ca da dxelaxzrje benne' xula ca', na' xetú lasa xelapa benne' ca' da xelunne' chee gate bi xázrjele le'e. Caní gápale lébete <sup>15</sup> cáteze naxúaj na lu dizra' lá'azxa, dxenná na: Bénnea' nápale'e quebe bi begá'ana chee', na' bénnea' nape' láteze quebe bi bexázrjene'.

*Tito ne bi ljwezre' ca'*

<sup>16</sup> Xcalén Dios, Bénnea' bzué' lu lázrdau Tito sue' gunne xue chee le'e ca zua' neda'. <sup>17</sup> Guzi' lu ne'e da bsebagá' le', na' lawe' da zúaqueze' gunne xue chee le'e, ba bezé'e chee xide' xedajnné'e le'e lawe' da dxaca lázrequeze le'.

<sup>18</sup> Tu zren nen Tito nasél-lantu' tu bi bíchedxu, tu benne' dxelenné chawe' chee' xúgute cue' bi chee Cristo, ca naca zrin xrlátaje da nune' chee dizra' chawe' chee Cristo. <sup>19</sup> Quegá tuze da nigá, san xúgute cue' bi chee Cristo gulequé'e bi bíchedxu níqueze chee sálene' netu' chee gácalene' netu' lu zrin nigá da dxuntu' dxutúbentu' dumí da gácale na benne' xache' ca' chee gaca ba Xránadxu, ne chee gulé'e lau du lázrele dxunle zrin chawe' nigá. <sup>20</sup> Caní dxuntu' chee quebe nu benne' si tizre' netu' ca dxuchínentu' dumí zrente nigá da dxulunezruj bi bíchedxu ca'. <sup>21</sup> Dxuntu' ba xuzre guntu' zrin nigá lu duté xel-la li lazre' cheentu', quegá tuze lau Xránadxu, san cá'aqueze lau xúgute béneache.

<sup>22</sup> Tu zren nen benne' caní nasél-lantu' xetú bi bíchedxu, tu benne' da zánete lasa ba blé'ene' netu' du lazre' dxune' zrin chee Cristo, na' na'a du lázredxe' dxune' zrin nigá lawe' da dxuxrén lazre' le'e. <sup>23</sup> Che nu benne' guchebe le'e ca naca chee Tito, le xe'e nácabe' bi ljwezra', ne dxunbe' zrin tu zren nen neda' chee gunbe' zrin chee.

Che nu guchebe le'e ca naca chee xezícadxa bi bíchedxu ca' zeajzrague' Tito, le xe'e zaj naque' benne' gulesel-la xúgute cue' bi chee Cristo, ne dxelape' ba lá'ana Cristo. <sup>24</sup> Chee le na', chee xeleneze xúgute cue' bi chee Cristo, le gulé'e le' nazri'ile le', na' naca cheentu' xucá'ana szrentu' le'e.

## 9

*Da dxulunézruje' chee bi bíchedxu ca'*

<sup>1</sup> Ca naca chee dumí da gunézrujle chee bi ca' chee Cristo, quebe dxun na ba xen guzúaja' chee, <sup>2</sup> lawe' da ba nezda' ca dxaca lázrele gunle na. Dxezaca ba lazra' dxapa' bi bíchedxu zaj zre'e xezre ca' zaj nababa xezr la xu Macedonia, le'e zrle xezre ca' zaj nababa Acaya, gudú iza ba zúatequezele bi gunézrujle, ca' benne' zante benne' Macedonia du lazre' dxulunézruje' lawe' da dxunézrujle le'e du lázrele. <sup>3</sup> Dxusel-la' bi bíchedxu caní chee quebe gaca tu da wen lazre' ca da chawe' da ba gunnía' ca dxunle le'e da nigá, ne chee súatezele bi gunézrujle, ca ba gucha' benne' caní, <sup>4</sup> ne che sa'aca bal-la benne' Macedonia tu zren nen neda' chee quebe xelelé'ene' quebe zúatequezele le'e bi gunézrujle. Chela gaca na caní xedué'entu' lawe' da bxren-lázrentu' le'e caní, na' da zrendxa ca dxal-la' xedué'ele le'e. <sup>5</sup> Chee le na' gúqueda' dxun na ba xen naba' bi bíchedxu ca' xelide' xedajlennabe' le'e nédxula, ne chee xelácalene' le'e gutúpale da guchebe lázrele nédxula gunézrujle. Ca' gaca na, dumí da gutúpale watá'queze na chee gulé'e na naca tu da dxaca lázrele gunle, ne quegá tu da gunne xúentu' le'e.

<sup>6</sup> Le nna'xque da nigá: Bénnea' dxaze' láteze, cá'aqueze láteze xezí'e, na' bénnea' dxázale'e, cá'aqueze xezí'ile'e. <sup>7</sup> Tu tu benne' dxal-la' gunézruje' cáteze da ba nune' lu lázrdawe', quegá ca tu benne' quebe dxezaca ba lazre', u xadíaze, lawe' da nazrí'i Dios benne' dxunézruje' duté xel-la dxebé. <sup>8</sup> Wazeque' Dios gúnnale'e le'e ca naca xúgute da chawe', chee gata' chee xúgute da nachínele, ne gápale bi gunézrujle chee gunle xúgute zrin xrlátaje. <sup>9</sup> Naxúaj lu dizra' lá'azxa da dxenná na: Du lazre' bnézruje' chee benne' xache' ca'. Ca zaj naca zrin xrlátaje nune' xelegá'anequeze na.

<sup>10</sup> Dios, Bénnea' dxunézruje' binnedu ca' da dxázadxu, ne dxunne' da dxi'aj dxágudxu, gunne' le'e xúgute da nachínele chee gázale, na' gusegule' na chee gúnnale'equeze na lina chee zrin chawe' da gunle. <sup>11</sup> Ca' gaca na, gáta'le'e cheele xel-la gunn'a ca' chee séquele gunézruje du lázrele, na' dumí na' sél-lale lu na'ntu' netu' gun na xelé bi bíchedxu ca' Dios: Xcalenu'. <sup>12</sup> Ca' naca na, gate gunézrujdxu bi bíchedxu ca' dumí nigá da gácale na le', quegá tuze dxunézrujdxu tu da dxelechinnene' san cá'anqueze dxundxu xel'é Dios: Xcalenu'. <sup>13</sup> Xelúe lá'ane' Dios lawe' da da nigá dxunézruje gul'é na dxuzúale dizra' chee dizra' chawe' chee Cristo. Cá'anqueze xelúe lá'ane' Dios ne chee da gunézruje du lázrele da gácale na le', ne xúgute cue' bi chee Cristo. <sup>14</sup> Chee le na' benne' ca' xelenabe' cheele lau Dios, ne xelezri'ilé'ene' le'e ne chee xel-la zri'i lazre' zren da gul'é lau Dios ne cheele le'e. <sup>15</sup> Xcalén Dios lawe' da nunne' dxi'u tu da zrente da quebe séquedxu xuzájla' adxu.

## 10

*Xel-la dxenná bea napa Pablo lawe' da naque' gubáz chee Cristo*

<sup>1</sup> Neda', Pablo, dxuzenda' le'e da nigá ne chee xel-la dxexruj lazre', ne xel-la zri'i lazre' chee Cristo. Dxeleonné' naca' benne' zren lazre' gate zúalena' le'e, na' gate zua' zitu' nácale'a benne' snia. <sup>2</sup> Dxata' xueda' le'e quebe gunle, gate xida' xedajnná'a le'e, gaca' benne' snia nen bal-la benne' ládujla le'e, benne' ca' dxeleonné' dxuntu' zrin chee Cristo lu bela' dxenze cheentu', na' zúaqueza' tíl-laqueza' benne' ca'. <sup>3</sup> Láqueze nácantu' bela' dxen quebe dxedí-lantu' lu bela' dxenze cheentu', <sup>4</sup> lawe' da quebe zaj naca chee bela' dxenze da dxuchínentu' lu wedil-la cheentu', san zaj napa na xel-la waca chee Dios chee séquentu' guzría xintu' da wal-la ca' chee nu na' dxedábaga' netu'. <sup>5</sup> Ca'an naca, dxuzría xintu' da dxusebaga bénnea' dxi'u, ne da dxuzié' lu xel-la dxucá'ana szren cuina chee quebe xelúnbea bénneache Dios. Xúgute da zaj xu'u lu xichaj bénneache dxuzúantu' lu na' Cristo chee xuluzúe' dizra' chee'. <sup>6</sup> Zúatequezentu' gudentu' xel-la zi' xúgute benne' ca' quebe dxuluzúe' dizra' chee' gate na' ba dxuzúale dizra' chee' du lázrele.

<sup>7</sup> Le'e dxenna'le benne' ca' cáteze da zaj naque' cúzreze. Che nu benne' dxéquene' da li naque' bi chee Cristo, dxal-la' gueque bé'ene' cáteze na' naca le' bi chee Cristo, cá'anqueze nácantu' netu' bi chee Cristo. <sup>8</sup> Láqueze dxuchínedxada' ca dxal-la' guna' xel-la dxenná bea cheentu', quebe dxedu'eda' lawe' da nunna Cristo netu' xel-la dxenná bea na' chee séquentu' gusegúlantu' le'e lu da naca chee Dios, ne quegá chee guzría xintu' le'e. <sup>9</sup> Quebe dxaca lazra' guéquele le'e dxaca lazra' gucheba' le'e ne chee da dxuzúaja' cheele. <sup>10</sup> Dxeleonné' xiche ca' da dxusél-la' zaj naca na snia, ne wal-la, san néda'queza' naca' benne' nate ni'a na', ne ca dxuchálaja' quebe zátateca. <sup>11</sup> Bénnea' dxenné' da nigá dxal-la' gueque bé'ene' cáteze naca' lu dizra' dxuzúaja' gate ne zua' zitu', cá'anqueze gaca' lu da guna' gate na' súalena' le'e.

<sup>12</sup> Quebe dxexázrentu' gutil-le lébentu', u gul'é cuínantu' ca zaj naca bal-la benne' ca' dxulucá'ana szren cuine'. Dxelune' tu da xálaze gate dxeleonné' e ca da zaj nácaqueze', ne dxulutil-le lebe ljwezre'. <sup>13</sup> Quebe gucá'ana szren cuínantu' lu da quebe naca cheentu'. Dios naque' Bénnea' gul'é'ene' netu' naga ze lau guntu' zrin, na' Le' benne' netu' lataj blantu' naga zrle le'e lu xezre Corinto. <sup>14</sup> Chee le na' quebe dxedxúajntu' naga ze lau cheentu', cáteze gaca na che quebe ne zrintu' naga zrle le'e nédxute. Netu' nácantu' benne' nedxu blantu' naga zrle le'e núantu' dizra' chawe' chee Cristo. <sup>15</sup> Quebe dxucá'ana szren cuínantu' lu zrin da zaj nun benne' xula, san dxebeza lázrentu' cáteze gula xel-la dxeajlí lazre' cheele, waca gúndxantu' zrin ládujla le'e gusegúlantu' xel-la dxeajlí lazre' cheele, san guntu' na lu'ule da naca cheentu'. <sup>16</sup> Te na' dxebeza lázrentu' tédxantu' ca naga zrle chee guzénentu' bénneache zaj zre'e ga na' dizra' chawe' chee Cristo, ne quebe chú'untu' naga ba zaj nun zrin xezicadxa benne' ca', chee quebe gucá'ana szren cuínantu' lu da ba zaj nuné'.

<sup>17</sup> Che nu benne' dxaca lazre' nu gucá'ana szrene', dxal-la' gucá'ana szrene' Xránadxu. <sup>18</sup> Bénnea' dxexedxúaj xrlátaje, quebe naque' benne' dxucá'ana szren cuine', san naque' bénnea' dxucá'ana szren Xránadxu le'.

## 11

*Ca naca chee Pablo, ne benne' gubáz ca' quebe nase-la Cristo le'*

<sup>1</sup>Le guchaga lau neda' chee nnia' late' da ca zeaje na. Ájateze naca na, le guchaga lau neda', <sup>2</sup>lawe' da dxé'le'a gunne xue chee le'e lu da nusebaga Dios neda', ne lawe' da ba nachebe lazra' chee le gácale zru'ula Cristo, dxaca lazra' gudéa' le'e lau Le' ca tu nu'ula cuíde'dau' du lazre' súalebe' benne' chebe'. <sup>3</sup>Ca ben' bela' gula na' guz'í xéba' Eva nen xel-la neze cheeba', dx-ezreba' güele lataj nu si xé le'e, na' cuásale lu xichaj lázrdawle chee québedxa gácale du lázrele chee Cristo. <sup>4</sup>Le'e dxuchaga laule benne' ca' zá'aque' dxuluchálaje' chee tu Jesús, benne' nazrá' ca Bénnea' bzénentu' le'e chee Le', ne du lázrele dxezí' lu na'le tu be' da nazrá' ca Be' na' da ba guz'í lu na'le, ne dxezí' lu na'le tu dizra' da nazrá' ca naca dizra' chawe' da ba guz'í lu na'le. <sup>5</sup>Dxéqueda' quebe zaca' neda' látezdxca ca benne' gubáz zren ca', benne' ca' zéajlele le'e. <sup>6</sup>Láqueze quebe gaca guchálaja' xrtán-dau', dxéajni'ida' da na' dxuchálaja' chee na, na' blé'entu' caní naca na lu xúgute' da ba bentu'.

<sup>7</sup>¿Bena' tu da calela gate bzenda' le'e dizra' chawe' chee Cristo, ne quebe bi bchízruja' le'e, na' ben' cuina' dxexruj lazre' chee xegá'ana szrenle le'e? <sup>8</sup>Guca na ca gudawa' dumí chee xezicadxa cue' bi chee Cristo gate guzi'a da belunne' neda' chee bena' zrin ga zúale le'e. <sup>9</sup>Gate na' guzúalena' le'e, ne bxázrjeda', quebe bi guz'í lu na'a da naca chee, san bi bíchedxu zá'aque' xezr la xu Macedonia belunne' neda' ca da guchíneda'. Bena' ba xuzre quebe bi gunábeda' le'e, na' cá'anqueze guna'. <sup>10</sup>Lawe' da múnbe'a da li chee Cristo, quebe zua nu benne' naga nababa xezr la xu Acaya gaca guzague' neda' chee québedxa gucá'ana szren cuina' chee da nigá dxuna'. <sup>11</sup>¿Bizr chee na' dxennía' caní? ¿Naca na lawe' da quebe nazrí'ida' le'e? Nézqueze Dios nazrí'ida' le'e.

<sup>12</sup>Gúnqueza' ca dxuna' chee quebe gata' lataj chee benne' ca' dxelaca lazre' xulucá'ana szren cuine' lawe' da dxeléquene' dxelune' zrin cáteze dxuntu' netu'. <sup>13</sup>Benne' caní zaj naque' gubáz quebe nase-la Cristo. Dxelezí xé'e bénneache, ne dxululé'e cuine' ca gubáz chee Cristo.

<sup>14</sup>Quebe naca da nigá da xebánedxu lawe' da Satanásqueze dxulé'e cuina na ca tu gubáz chee xabáa zue' lu xel-la naxaní' chee Dios, <sup>15</sup>na' chee le' na' dxululé'e cuine' ca benne' dxelún da xrlátaje. Benne' caní xelebía xi'e ca ba naca chee benne' dxelún da caní.

*Da guzaca Pablo lawe' da naque' gubáz chee Cristo*

<sup>16</sup>Xecha lasa dxapa' le'e, quebe nu benne' dxal-la' guéquene' nadá xichaj lázrdawa'. Che ca'an dxéquele le'e, le gunna neda' lataj guchálajena' le'e ca tu benne' nadá xichaj lázrdawe', chee gaca gucá'ana szren cuina'. <sup>17</sup>Quebe dxapa' le'e da nigá lu xel-la dxenná bea chee Xránadxu. Guchálaja' ca tu benne' nadá xichaj lázrdawe', nnia' tu da gucá'ana szren cuina'. <sup>18</sup>Lawe' da zaj zra' benne' zanté dxulucá'ana szren cuine' lu da zaj naque' chee xezr la xu nigá, cá'anqueze neda' gucá'ana szren cuina'. <sup>19</sup>Lawe' da nácale'ele benne' sina dxuchaga laule du lázrele benne' zaj nadá xichaj lázrdawe'.

<sup>20</sup>Dxuchaga laule benne' ca' dxelexune' le'e ca benne' zaj nada'u, ne benne' ca' dx-uluchínene' le'e, ne benne' ca' dxeleenná bé'ene' le'e, ne benne' ca' dxuluzúe' le'e chalá'ala, ne benne' ca' dxelegape' xraga laule.

<sup>21</sup>Láqueze dxedué'eda' dxennía' da nigá, quebe guca' benne' dxechugu lazre' chee guna' ca dxelún xezicadxa benne'.

Na'a gaca' lazre' dxugu guna' caní. Ba dxelechugu lazre' benne' xezicadxa dx-ulucá'ana szren cuine'.

Cá'anqueze neda' xechugu lazra' guna' na, láqueze naca

tu da ca zeaje da dxennía'.

<sup>22</sup>¿Zaj naque' benne' hebreo?

Cá'anqueze neda' naca' benne' hebreo.

¿Zaj naque' benne' Israel? Cá'anqueze neda'.

¿Zaj naque' zri'ine zre sua Abraham? Cá'anqueze naca' neda'.

<sup>23</sup>¿Zaj naque' wen zrin chee Cristo? Nácadxa' neda' wen zrin chee' ca benne' ca',

lácala dxuchálaja' ca tu benne' nadá xichaj lázrdawe' gate dxennía' da nigá.

Ba bendxa' zrin ca benne' ca'.

Ba buluzálajdxa bénneache neda' ca nu bzálaj benne' ca'.

Ba gulegu'udxa bénneache neda' lize xia ca belunne' chee benne' ca',

na' zane' lásatë ba guzúa' lu da stëbe chee  
xel-la gute.

<sup>24</sup>Gazxu' lasa ba belúe benne' judío ca' neda'  
xide chennu dxua weaj.

<sup>25</sup>Chunna lasa beline' neda' xaga. Tu lasa  
belú'e neda' xiaj.

Chunna lasa guxaze da dxedá lawe'  
nísadau' da xu'a lu nisa.

Tu lasa, tu zra tu xëla guxu'a lu nísadau'.

<sup>26</sup>Zane' lásatë guxu'a neza, ne guzúa' lu da  
stëbe:

Cheë xëgu ca', ne cheë gubán ca'.

Cheë benne' waláxr chia' ca', ne chee  
benne' zitu' ca'.

Guzúa' lu da stëbe lu xëzre, ne le'e xixre',  
ne lu nísadau',

ne ládujla benne' wën lazre' dxelenné' zaj  
naquë' bi bíchedxu.

<sup>27</sup>Bënle'a zrin, ne guzúa' lu da zi' da xa'.

Zane' lásatë quebe gusia' dxëla.

Gudúnle'a, ne gubíle'e'da', na' zane' lásatë  
bëna' gubasa.

Catitë bexaga', ne bexáxrjeda' zra lana'  
gacua'.

<sup>28</sup>Da zrendxa ca da caní, ne xezícadxa da  
guzraca'.

Xúgütë zra dxéqueda' zi' lawe' da zua'  
gunne xue chee

xúgütë cue' bi cheë Cristo.

<sup>29</sup>Che nu benne' nate ni'a ne'e lu xel-la  
dxeajlí lazre' chee',

cá'anqueze neda' dxéqueda' nate ni'a  
ná'aqueza'.

Che nu benne' dxelunë' dxeajchazë',  
néda'queze dxaca' tul-la.

<sup>30</sup>Che dxun na ba xen gucá'ana szren cuina',  
gucá'ana szren cuina' cheë da ca' dxululë'e  
na nate ni'a na'a.

<sup>31</sup>Dios, Xra Xránadxu Jesucristo, Bén-  
nea' naca cheë' güe lá'anatequedxu Le',  
nézene' dxennia' da li. <sup>32</sup>Gate guzúa' xëzre  
Damasco, benne' wnná bea na' dxune' zrin  
cheë wenná bea Aretas bzrë'e benne' dxu-  
luxúe' dxa xu'u cheë xëzre na', cheë xelë-  
le' neda'. <sup>33</sup>Na' bi bíchedxu ca' bululetjé'  
neda' tu lu xcuite xia ga dxu'u lení' cheë  
xu'u lu ze'e da naxechaj na xëzre na'. Ca'  
guca na, gulá' lu na' benne' ca'.

## 12

*Da ca' Dios blé'ene' Pablo*

<sup>1</sup>Da li quebe dxal-la' gucá'ana szren  
cuina', san guchálaja' cheë da ca' ble'e  
Xránadxu neda', ne da ca' ble'eda' ca naca

cheë'. <sup>2</sup>Neda', ca tu benne' dxéajle chee  
Cristo, ba zeaj chidá' iza guché Dios neda'  
xabáa guxunne'. Quebe nezda' che guxá'a  
na' dutë bëla' dxen chia', u che cabí. Dios  
nézene'. <sup>3</sup>Nezda' néda'queza', che zua' lu  
bëla' dxen chia', u che cabí, quebe nezda',  
tuze Dios nézene'. <sup>4</sup>Guché Dios neda' tu  
xabáa cheë', naga benda' dizra' bagache  
da quebe naca cheë bénneache xelenné'  
ca zaj naca na. <sup>5</sup>Waca gucá'ana szrena'  
tu benne' caní, san quebe gucá'ana szren  
cuínaqueza', che quebe naca na cheë xel-  
la nate ni'a na' chia'. <sup>6</sup>Láqueze che gaca  
lazra' gucá'ana szren cuina' quebe gaca na  
tu da xálaze, lawe' da gaca na tu da li.  
Quebe guna' na cheë quebe nu guéquene'  
nácadxa' ca da gaca lé'ene' naca', u ca da  
gaca xenne' da dxennia'.

<sup>7</sup>Da caní ble'e Xránadxu neda' gulaca na  
da xebánele'edxu, na' cheë quebe gucá'ana  
szren cuina', guca chia' ca tu xechë' nax-  
aze lu bëla' dxen chia' da dxuchine Sa-  
tanás cheë guzalaj na neda'. <sup>8</sup>Chunna  
lasa guta' xuëda' Xránadxu gucuae' da  
dxezaca'. <sup>9</sup>Xránadxu guzrë' neda': "Xela  
zri'i lazre' chia' naca na dutë da dxechí-  
nenu' lawe' da dxulë'edxa lau xel-la waca  
chia' nen benne' nate ni'a ne'e." Ca' naca,  
dxebeda' lawe' da nate ni'a na'a cheë gulé'e  
lau lu bëla' dxen chia' xel-la waca cheë  
Cristo. <sup>10</sup>Cheë le' na' dxebeda' ca naca xel-  
la nate ni'a na' chia', ne ca naca dizra'  
schanni' ca' dxelenná bénneache chia', ne  
ca naca da ca' dxexáxrjeda', ne gate zaj nau  
zi' xuzre' bénneache neda', ne ca naca da ba  
xa' ca' da dxedéa' ne cheë Cristo, lawe' da  
gate nátedxa ni'a na'a, dxéqueda' nácadxa'  
benne' wal-la.

*Pablo dxe'e gunne xue cheë bi cheë Cristo  
zaj zrë'e Corinto*

<sup>11</sup>Guca' ca tu benne' nadá xichaj lázr-  
dawe' gate bca'ana szren cuina' caní, san  
le'e bënle bëna' na. Le'e na' dxal-la'  
gucá'anale neda' szren lawe' da quebe zaca'  
látedzxa ca benne' gubáz zren ca', benne'  
ca' dxéajlele, láqueze quebe bi zaca' neda'.

<sup>12</sup>Zrin bëna' ládujla le'e lu dutë xel-la zren  
lazre' chia' ble'e na da li naca' gubáz cheë  
Cristo ne cheë da dxelunna bea na, ne xel-  
la waca ca' cheë xabáa, ne da ca' dxexe-  
bánedxu. <sup>13</sup>¿Dxéquele le'e nácale látedzxa  
blau ca xezícadxa cue' bi cheë Cristo lawe'  
da guzí' lu na'a da belunne' chia', na' quebe

guzí' lu na'a da zaj naca cheele? Le gu-nite lau neda' che naca tu da calela quebe benna' le'e lataj bi gúnnale chia'.

<sup>14</sup> Na'a ba zua' xida' xedajnná'a le'e da guxunne' lasa, ne quebe si' lu na'a da zaj naca na cheele. Quebe dxexíflaja' da ná-pale, san lé'eqeze, lawe' da dxal-la' xulucude xruze xrna' dumí da xulunézru-je' zrí'ine', ne quegá xulucude zrí'ine' da xulunézruje' xra xrnabe'. <sup>15</sup> Du lazra' guchínedá' dumí chia' chee gaca chawe' chee bénne'du xu'ule, láqueze dxéqueda' gate nazrí'idxada' le'e, látezdxa nazrí'ile le'e neda'.

<sup>16</sup> Bal-la benne', láqueze zaj nézene' quebe bi guzí' lu na'a da zaj naca na cheele, dxelenné' gudél-la' le'e lu da wen lazre'. <sup>17</sup> ¿Guzí xé'a le'e lu na' tu benne' gusel-la' cheele? <sup>18</sup> Guta' xueda' Tito xídabe' xedajnná'abe' le'e, ne gusel-la' nen lebe' xetú bi bíchedxu. ¿Guzí xé Tito le'e? ¿Quebe bentu' tuze ca bentu' ládujla le'e neda', ne Tito, na' nen tuze Be' Lá'azxa?

<sup>19</sup> Bi bicha' nazrí'ite lazra', ¿dxéquele dxucá'ana cuínantu' xrlátaje laule le'e? Dxuchálajlentu' le'e lau Dios, ne lu La Xránadxu Jesucristo. Xúgute da caní dxennantu' chee gúrale lu da naca chee Dios. <sup>20</sup> Dxezreba' gate xida' xedajnná'a le'e, walé'eda' le'e quebe nácale cáteze dxaca lazra' gácale, na' le'e walé'ele neda' quebe naca' da dxaca lázrele gaca'. Dxezreba' dxedíl-lalele ljwézrele, ne nácale xa lazre', ne dxezrá'ale ljwézrele, ne nácale zide lazre', ne nácale wetupa dizra' bizruj, ne dxezí tízrale ljwézrele, ne dxucá'ana szren cuínale, ne dxunle da calela. <sup>21</sup> Dxezreba' gate xida' xedajnná'a le'e, Dios guné' xedué'eda' ne cheele le'e, da gucyezre na neda' ne chee zánele le'e, benne' ca' dx-elúntequeze' dul-la, ne quebe dxulusane' dxeluné' da sban, ne da dxulucá'ana sban ljwézre', ne da calela da tu dxelúnzqueze'.

### 13

#### *Dizra' bzebe*

<sup>1</sup> Da nigá naca na da guxunne' lasa xida' xedajnná'a le'e. Xúgute dxul'é lawe na naca na da li ne chee dizra' chee chupa u chunna benne' xelexechebe'. <sup>2</sup> Benne' ca' beluné' dul-la nédxula, ne xúgutele le'e, dxácate ne zua' zitu' naga zrale, dxuzenda'

le'e da xula ca da gucha' le'e gate bedajnná'a le'e da gudxupe' lasa, che xida' xedajnná'a le'e da xula quebe gudéa' cá'aze ca da ba nunle. <sup>3</sup> Nadxa lé'ele da gul'é'e na dxenné' Cristo lu dxu'a neda', na' Le' quebe nate ni'a ne'e lu da gune' cheele, san naque' benne' wal-la ládujla le'e. <sup>4</sup> Da li gudé'e xaga béguaj ca tu benne' nate ni'a ne'e, san naca bané' ne chee xel-la waca chee Dios. Cá'anqueze netu' nate ni'a nantu' ca da guca chee', san lawe' da nácantu' tuze nen Le' gaca bantu' ne chee xel-la waca chee Dios chee guntu' zrin cheele le'e.

<sup>5</sup> Le guxúe xanne' cuínale chee gueque be'ele che da li dxeajlí lázrele Cristo. Le guxúequeze cuínale. ¿Quebe dxeque be'ele zua Jesucristo xichaj lázrdaule, che da li dxeajlí lázrele Le'? <sup>6</sup> Dxebeza lazra' gueque be'ele quebe naca' neda' benne' wen lazre' lu da naca' chee Cristo. <sup>7</sup> Dxenábantu' lau Dios chee quebe bi da calela gunle, quegá chee gul'é'entu' dxennantu' da li, san chee gunle le'e da xrlátaje, láqueze dxéquele le'e quebe dxennantu' da li. <sup>8</sup> Quebe bi gaca guntu' da dxedábaga na da li, san tuze da dxácale na da li. <sup>9</sup> Chee le na' dxebentu' gate nate ni'a nantu', che le'e nácale benne' wal-la, na' nábaquezentu' Dios chee gácale dute da dxal-la' xelaca bi chee Dios. <sup>10</sup> Dxuzúaja' cheele da nigá nédxula ca xida' xedajnná'a le'e, chee quebe gun na ba xen gate xida', gácale'a benne' snia ca guchínedá' xel-la dxenná' bea chia', da benna Xránadxu neda' chee séqueda' gusegula' le'e lu da naca chee Dios, ne quegá chee guzrí'a xi'a le'e.

<sup>11</sup> Na'a, bi bicha', le sua xel-la dxebé. Le gaca dute da dxal-la' xelaca bi chee Dios. Le xue zren ljwézrele. Le gaca tuze tule xetule, ne le sua xel-la dxebeza zri lazre', na' Dios, Bénnea' dxunne' dxi'u xel-la dxebeza zri lazre', ne nazrí'ine' dxi'u súalene' le'e. <sup>12</sup> Le gugapa diuzre ljwézrele tule xetule, ne le gunida ljwézrele. <sup>13</sup> Xúgute bi bíchedxu, bi chee Cristo dxulugape' le'e diuzre.

<sup>14</sup> Dxaca lazra' gucá'ana Xránadxu Jesucristo le'e chawe', ne zri'i Dios le'e, ne sua tuze Be' Lá'azxa nen le'e. ¡Ca'an gaca na!

## DIZRA' BZUAJ SAN PABLO CHEE BI CHEE CRISTO ZAJ ZRE'Ē XEZR LA XU GALACIA

*Dizra' da bzuj Pablo chee bi chee Cristo zaj zre'ē xezr la xu Galacia*

<sup>1</sup>Neda', Pablo, naca' gubáz chee Cristo. Quebe gulesel-la bēneache neda', ne quegá buluzúa bēneache neda' gaca' gubáz. Caní bēnqueze Jesucristo chia', ne Xradxu Dios, Bēne' bsebanē' Jesús ládujla benne' gate. <sup>2</sup>Xúgute benne' bíchedxu zrálene' neda' zaj naque' neda' tuze. Neda' dxuzúaja' dizra' nigá chee xúgute cue' benne' bíchedxu zaj zre'ē xezre ca' zaj nmita' xezr la xu Galacia. <sup>3</sup>Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'. <sup>4</sup>Jesucristo bzane cuine' chee gutie' nē chee dul-la da nabágdaxu, chee bselé' dxi'u lu da naca chee xezr la xu nigá da naca na da calēla. Bēne' da guca lazre' Xradxu Dios. <sup>5</sup>¡Gaca báqueze Dios chadía chacanna! ¡Ca'an gaca na!

*Quebe de xetú dizra' chawe' chee Dios*

<sup>6</sup>Dxexebánele'ēda' chee le'e lawe' da dxebéaj xíchajtēle Dios, Bēne' gunné' le'e chee si' lu na'le da dxunna Cristo, na' dxezi' lu na'le tu dizra' nazrala ca naca dizra' chawe' chee Cristo. <sup>7</sup>Da li quebe bi de xetú dizra' chawe', san zaj zra' bal-la benne' dxelún zréajene' le'e, ne dxelaca lazre' xuluchuque' dizra' chawe' chee Cristo. <sup>8</sup>Che nu benne' dxuzenne' le'e xetú dizra' da nazrala ca naca dizra' chawe' da ba bzé-mentu' le'e, dxenaba' lau Dios cue'e bēne' de', lálaca naca neda', u naca tu gubáz chee xabáa. <sup>9</sup>Báchequeze bzenda' le'e, ne dxuzenda' le'e da xula, che nu benne' guzenne' le'e tu dizra' da nazrala ca naca dizra' chawe' da ba guzi' lu na'le, dxenaba' lau Dios cue'e bēne' de'.

<sup>10</sup>Gate dxennia' da nigá, ¿Dxaca lazra' xegá'ana' xrlátaje lau bēneache, u che lau Dios? ¿Dxaca lazra' guna' da xelezaca ba lazre' bēneache? Che ca'an dxaca lazra' guna' da dxelezaca ba lazre' bēneache, quebe naca' wen zrin chee Cristo.

*Ca bexaca Pablo gubáz chee Cristo*

<sup>11</sup>Dxuzéajni'ida' le'e, bi bicha', dizra' chawe' da dxuzenda' bēneache, na' quebe naca na tu da gulaj na lu xichaj lázrdau bēneache. <sup>12</sup>Quebe nu benne' benne' na neda', ne quegá nu benne' bsédene' neda' le' na, san Léqueze Jesucristo bzenne' na neda'.

<sup>13</sup>Ba bēnquezle ca bēna' neda' nédxula gate na' nazi' lu na'a xel-la benne' xudau' chee judío ca', ca gudáu zi' xuzra' bi chee Dios zaj nácabe' bi chee Cristo, ne ben zi' lazra' guzría xi'a-be'. <sup>14</sup>Lu xel-la benne' xudau' chee judío ca', neda' ba bzrué'edxeda' ca xúgute bi waláZR chia', bi ljwezra' ca', lawe' da be lázredxa' gapa' ca da xjácale xra xrtawa' ca'. <sup>15</sup>Dios guqu'é' neda' nédxula gate za gálaja', na' lu xel-la zri'i lazre' chee' gunné' neda'. Nadxa gate guca lazre' Le'. <sup>16</sup>blé'ene' neda' Zrí'ine', chee guzenda' benne' ca' quebe zaj naque' judío ca naca chee Zrí'ine'. Gate guca da nigá, quebe nu benne' gunábeda', <sup>17</sup>ne quebe guxá'a Jerusalén cheajnábeda' benne' zaj naque' gubáz chee Cristo nédxudxa ca neda'. Guxá'a naga nababa xezr la xu Arabia, na' gudé na' bezrina' xezre Damasco.

<sup>18</sup>Gudé chun iza guxá'a Jerusalén, chee xeajchálajlena' Pedro, na' begá'analēna' le' xta' gubizra. <sup>19</sup>Quebe nu ble'eda' xetú benne' gubáz chee Cristo, san tuze Jacobo, bi biche Xránadxu. <sup>20</sup>Ne chee La Dios dxapa' le'e, da li naca da nigá dxuzúaja' chee le'e.

<sup>21</sup>Ca gudé na' guxá'a xezre ca' zaj nababa xezr la xu Siria, ne xezre ca' zaj nababa xezr la xu Cilicia. <sup>22</sup>Benne' bíchedxu ca', bi chee Cristo zaj zre'ē xezr la xu Judea quebe zaj nunbe'ē neda'. <sup>23</sup>Belēzene' nu dxenná: "Bēne' nédxula gudáu zi' xuzre' dxi'u, na'a dxuchálaje' dizra' chawe' chee xel-la dxeajlí lazre' Cristo, da na' guca lazre' guzría xi'e nédxute." <sup>24</sup>Na'a dxelúe lánē' Dios ca da belenne' ca naca chia'.

## 2

*Benne' gubáz ca' dxelezi' lu ne'ē Pablo*

<sup>1</sup>Ca gudé chidá' iza guxá'a xecha lasa Jerusalén nen Bernabé, na' ben bi Tito neda' tu zren. <sup>2</sup>Guxá'a na' lawe' da ble'e Dios neda' dxal-la' cha'a na'. Na' cheézela bchálajlena' benne' ca' zaj naque' blau ládujla bi chee Cristo, ne bzenda' le' dizra' chawe' da dxuchálaja' ládujla benne' ca'

quebe zaj naque' judío. Bena' caní chee nezda' quebe guca dácheze zrin da ba bena', ne da dxuna'. <sup>3</sup>Gulezi' lu ne'e zrin nuna', na' quebe nu gunná be'e Tito, bi zálēbe' neda', chugu lu belá' chebe' da gulé'e na nácabē' bi chee Dios, lácala quebe nácabē' judío. <sup>4</sup>Bal-la benne' quebe zaj naque' du lazre' benne' bíchedxu, benne' gulu'e ládujla dxi'u lu da wen lazre', gulaca lazre' chugu da gulé'e na lu belá' chee Tito. Benne' caní gulu'e ládujla dxi'u chee xelenézene' ájala xelegúe' lataj da nazidxu lu na' Jesucristo, chee xuluxuzúe' dxi'u ca benne' zaj nada'u lu da bdxiruj bea Moisés. <sup>5</sup>Ne chiteze quebe bentu' le' lataj xelegú'u xel-le' netu' lawe' da guca lázrentu' xegá'analē' le'e da li dizra' chawe' chee Cristo.

<sup>6</sup>Benne' ca' zaj naque' blau quebe bi da cube bulusebague' netu'. Da zaj naque' quebe bi naca na chia' lawe' da quebe xuchi'a Dios ca da nalá' láweze chee bēneache. <sup>7</sup>Quebe bi bulusebague' neda', lawe' da belexúnbe'e Diósqueze bsebage' neda' guzenda' benne' ca' quebe zaj naque' judío dizra' chawe', cáteze bsebage' Pedro guzenne' benne' judío ca' dizra' chawe'. <sup>8</sup>Léqueze Dios na', Bēnnea' bzue' Pedro gubáz chee' ládujla benne' judío ca', cá'anqueze bzue' neda' gaca' gubáz chee' ládujla benne' quebe zaj naque' judío.

<sup>9</sup>Chee le' na', Jacobo, ne Pedro, ne Juan, benne' zaj naque' blaudxa, belexúnbe'e ben Dios neda' culuēn nígá, na' gulezi' lu ne'e neda', ne Bernabé, na' belune' tuze dizra' cheajzentu' netu' benne' ca' quebe zaj naque' judío dizra' chawe', dxácatē na' le' xuluzenne' na benne' judío ca'. <sup>10</sup>Túteze da gulénabene' netu' xexache lázrentu' benne' xache' ca', da na' dxue lazra' dxuna'.

*Pablo dxedil-le' Pedro lu xezre Antioquia*

<sup>11</sup>Gate bla' Pedro xezre Antioquia gudilla' le' caníqueze lawe' da gunegue lazre'. <sup>12</sup>Nédxute' gudágulene' benne' ca' quebe zaj naque' judío cadxa belelá' bal-la benne' gusel-la Jacobo. Nadxá bebígue'e chalá'ala, ne bsané' québedxa gudágulene' benne' ca' lawe' da bzrebe' judío ca', benne' ca' zaj nadxugu lu belá' chee' da dxulé'e na. <sup>13</sup>Nadxá xezícadxa judío ca' zaj naque' bi chee Cristo belune' tu zren Pedro lu da dxune' láweze. Caní belune', na' ca' bente Bernabé tu zren benne' ca' lu da na' dxelune' láweze. <sup>14</sup>Gate ble'eda' neda' quebe

dxelune' cáteze naca chee da li chee dizra' chawe' chee Cristo, na' gucha' Pedro lau xúgute' benne' ca': Lue' nacu' judío, na' benu' ca tu benne' quebe naque' judío, ne quebe benu' ca tu benne' judío. <sup>15</sup>Biz chee na' dxenná be'enu' benne' quebe zaj naque' judío xelune' ca dxelún benne' judío?

*Benne' judío xeelé' che dxeajlí lazre' Cristo ca dxaca chee xezícadxa benne'*

<sup>15</sup>Cá'anqueze gucha'-ne': Dxi'u nácadxu benne' judío lawe' da nálajdxu ca', ne quebe nácadxu benne' dul-la ca benne' zaj nababa xezícadxa xezr la xu ca'. <sup>16</sup>Nézedxu netú benne' quebe xegá'ane' xrlátaje lau Dios lawe' da nune' da bdxiruj be'e Moisés, san tuze che dxeajlí lazre' Jesucristo. Chee le' na' cá'anqueze dxi'u dxeajlí lázredxu Cristo chee xegá'anadxu xrlátaje lau Dios ne chee xel-la dxeajlí lazre' cheedxu Cristo, ne quegá lawe' da bendxu ca nadxiruj bea na. Netú benne' quebe xegá'ane' xrlátaje lau Dios lawe' da nune' da nadxiruj bea na.

<sup>17</sup>Na'a, che dxi'u dxuxrén lázredxu nagá'anadxu xrlátaje lau Dios ne chee Cristo, ne che zua da dxulé'e na ne nácadxu benne' dul-la, <sup>18</sup>mnadxu Cristo dxunne' dxi'u lataj gundxu dul-la lawe' da québedxa dxenná be'e da bdxiruj be'e Moisés dxi'u? ¡Cabata! <sup>18</sup>Che dxuchinnaja' tu, na' che te na' xexuna' na, na' nabaga' zria. <sup>19</sup>Ba naca' ca tu benne' gate lu da naca chee da nadxiruj bea na. Da nadxiruj béaqueze ble'e na neda' naca' ca tu benne' gate, chee gaca bana' ne chee da nun Dios. <sup>20</sup>Ba naca' ca tu benne' gate lawe' da naca chia' ca naca chee tu benne' gudá' xaga béguaj tu zren nen Cristo. Chee le' na', québedxa naca bana' neda'. Cristo naca banē' lu xichaj lázrdawa'. Xel-la nabán da napa' lu belá' dxen chia', napa' na ne chee xel-la dxeajlí lazre' chia' Zri'ine Dios, Bēnnea' bzri'ine' neda', ne bzane cuine', gutie' waláz chia' neda'. <sup>21</sup>Quebe dxaca lazra' guzúa' chalá'ala xel-la zri'i lazre' chee Dios. Che nu benne' gaca xegá'ane' xrlátaje lau Dios lawe' da nune' da nadxiruj bea na, na' dácheze guca da ben Cristo gate gutie'.

### 3

*Dxezidxu Be' Lá'azxa ne chee xel-la dxeajlí lazre'*

<sup>1</sup>Bi bicha', zrale Galacia, nácale le'e benne' xala ca'. <sup>2</sup>Zua nu benne' dxezi



xe'e le'e chee québedxa guzáale dizra' chee da li? Ba blé'entu' le'e caníqueze Jesucristo, ca gudé'e le'e xaga béguaj. <sup>2</sup> Le xexque neda': ¿Guzile Be' Lá'azxa lawe' da benle da bdxixruj be'e Moisés, u lawe' da guxéajle chee da bénnele? <sup>3</sup> ¿Ájala chee na' nácale benne' xala? ¿Dxéquele gunle gácale duté da na' guzú laule gácale ne chee Be' Lá'azxa? <sup>4</sup> ¿Dácheze gudele zánete xel-la zi' ca'? Dxaca lazra' quebe guca na níteze. <sup>5</sup> Gate Dios dxunne' le'e Be' Lá'azxa chee, ne dxunne' xel-la waca ca' chee xabáa ládujla le'e, ¿dxunne' na lawe' da dxunle ca nadxixruj bea na, u lawe' da guxéajle chee dizra' chawe' da bénnele?

<sup>6</sup> Abraham guxeajlí lazre' Dios, na' Dios guzú' lu ne'e da nigá ca tu da bca'ana le' xlátaje. <sup>7</sup> Chee le na' dxal-la' nézele, benne' ca' da li zaj naque' zri'ine zre sua Abraham zaj naque' benne' dxelejíl lazre' Dios. <sup>8</sup> Naxúaj na lu dizra' lá'azxa ca naca da nigá. Lawe' da neze Dios nédxute gucá'ane' xlátaje benne' quebe zaj naque' judío, benne' xeleajlí lazre' Le', na' guzre' Abraham nédxute dizra' chawe' nigá, gunné': "Gaca chawe' chee benne' duté xezr la xu ne' chiu' lue'." <sup>9</sup> Ca'an naca, dxaca chawe' chee benne' dxelejíl lazre' Dios tu zren nen Abraham, bénnea' guxeajlí lazre' Dios.

<sup>10</sup> Benne' ca' dxuluxrén lazre' zaj nagá'ane' xrlátaje lau Dios lawe' da zaj nune' ca da nadxixruj be'e Moisés zaj xu'e de' lawe' da naxúaj lu dizra' lá'azxa da dxenná na: Zaj xu'u de' xúgute benne' quebe dxelúnqueze' xúgute da nadxixruj bea na, da na' naxúaj na lu xiche lá'azxa. <sup>11</sup> Dxunna bea na netú benne' quebe xegá'ane' xrlátaje lau Dios lawe' da nune' da nadxixruj bea na lawe' da naxúaj lu xiche lá'azxa da dxenná na: Bénnea' nagá'ane' xrlátaje lau Dios gata' chee' xel-la nabán li lazre' che dxeajlí lazre' Dios. <sup>12</sup> Bénnea' dxunne' ca bdxixruj be'e Moisés quebe dxunne' na ne chee xel-la dxeajlí lazre' chee' lawe' da naxúaj da dxenná na: Benne' dxunne' xúgute da caní gaca bane' ne chee le na.

<sup>13</sup> Cristo bselé' dxi'u lu de' da xu'u nu quebe dxun da nadxixruj bea na lawe' da guxú'uqueze' de' waláz cheedxu cáteze naxúaj lu dizra' lá'azxa da dxenná na: Xu'u de' bénnea' de'e le'e xaga. <sup>14</sup> Da nigá guca na chee gaca gun Dios xrlátaje

benne' ca' quebe zaj naque' benne' judío, da na' guchebe lazre' guné' lau Abraham ne chee Jesucristo, na' chee si' lu nnadxu xúgutedxu Be' Lá'azxa ne chee xel-la dxeajlí lazre' cheedxu ca da guchebe lazre' Dios.

*Da naca chee da nadxixruj bea na, ne da naca chee da guchebe lazre' Dios*

<sup>15</sup> Bi bicha', dxulé'eda' le'e ca da dxaca chee bénneache. Gate tu benne' dxunne' tu xel-la wezría, ne ba bzuajte' láqueze' lawe na, netú benne' quebe gaca guchinnaje' na, ne quebe bi gaca gudé'e chee na. <sup>16</sup> Dios guchebe lazre' da guné' chee Abraham, ne chee zri'ine zre sue'. Quebe dxenná na: Chee zri'ine zre sue' ca', da naca na chee benne' zan, san dxenná na: Chee zri'ine zre su', da naca na chee tuze benne', bénnea' naque' Cristo. <sup>17</sup> Da dxennia' naca na da nigá: Dios benge' tu xel-la wezría nen Abraham, ne bca'ana chawe' na. Chee le na', da bdxixruj be'e Moisés da bla' na ca gudé tapa gaxúa chi dxua iza quebe gaca guchinnaj na xel-la wezría na', u xucá'ana na dácheze da guchebe lazre' Dios. <sup>18</sup> Che dxezidxu da dxunna Dios che dxundxu ca da bdxixruj be'e Moisés, quebe naca na da nachebe lazre' Dios, san da li Dios guchebe lazre' gunézruje' na cá'aze chee Abraham.

<sup>19</sup> Na'a xca', ¿bizra dxun da bdxixruj be'e Moisés? Dios bnézruje' da na' gudé na' chee gulé'e na ca naca xtul-la bénneache cadxa xelá' zri'ine zre sua Abraham na', Bénnea' guchebe lazre' Dios guné' da xrlátaje chee'. Dios gusel-le' da gunná bé'ene' lu na' gubáz chee xabáa chee', na' Moisés guque' benne' dxudé dizra' cheen. <sup>20</sup> Quebe dxun na ba xen nu benne' gudé dizra' gate naca na chee tuze benne', na' Dios naque' tuze, Bénnea' guchebe lazre' chee Abraham ca da guné'.

*Da dxun da bdxixruj be'e Moisés*

<sup>21</sup> ¿Nnadxu dxedábaga da bdxixruj be'e Moisés da na' guchebe lazre' Dios? ¡Cataba'! Che da nadxixruj bea na da bnezruj Dios gaca gunna na xel-la nabán chee bénneache, na' gaca xegá'ana xrlátaje lau Dios tu benne' che guné' ca da nadxixruj bea na na'. <sup>22</sup> Dxenná na lu dizra' lá'azxa, xúgute bénneache zaj nabague' dul-la chee gaca xelezi' lu ne'e da guchebe lazre' Dios gunne' benne' ca' xeleajlí lazre' Jesucristo.

<sup>23</sup> Nédxudxa ca bzin zra gaca nu cheajlí lazre' Cristo, ne chee da nadxixruj bea na, xúgutedxu, benne' judío, gicadxu ca

benne' zaj xu'e lizre xia, lawe' da xadíaze bendxu ca dxenná da nadxixruj bea na, na' gulézdaxu ca bzin zra guca cheajlí lázredxu Cristo. <sup>24</sup> Da nadxixruj bea na gunná be'e na dxi'u, ca dxun tu benne' dxusegule' bidau' chee benne' xula cadxa bzin zra bla' Cristo, chee xegá'anadxu xr-látaje lau Dios gate guxeajlí lázredxu Cristo. <sup>25</sup> Na'a lawe' da ba bzin zra gaca cheajlí lázredxu Cristo, québedxa xú'udxu lu na' da nadxixruj bea na da naca na cheedxu ca tu benne' dxusegule' bidau'.

<sup>26</sup> Xúgutele na' dxeajlí lázrele Jesucristo nácale tuze nen Le'. Chee le na' nácale bi chee Dios. <sup>27</sup> Xúgutele le'e na' gudxúale nisa chee gácale tuze nen Cristo, Le' naque' chee ca tu ladxe' nácale. <sup>28</sup> Québedxa dxelé'e Dios le'e ca benne' judío, u benne' quebe naque' judío, u ca benne' nada'u, u benne' quebe nada'u, u ca benne' biu, u nu'ula. Dxelé'eng' le'e, naca xúgutele ca tuze bel-la' dxen lawe' da nácale tuze nen Jesucristo. <sup>29</sup> Che nácale bi chee Cristo, da li nácale zre sua Abraham, na' gaca chee da guchebe lazre' Dios guné'.

## 4

<sup>1</sup> Da dxaca lazra' nmia' naca na da nigá: Dxácate ne naca bidau' bi na' gaca chee' da naca chee xrabe', nácabé' ca bi nada'u xu'ube' lu na' xránabe', lálcala da li gácabe' xrane xúgute' da de lizre xrabe'. <sup>2</sup> Xu'ube' lu na' benne' dxulusédene'-be', ne lu na' benne' ca' xu'u lu ne'e da naca chee', cadxa zrin zra gulé'e xrabe' da li ná-cabe' zrí'ine'. <sup>3</sup> Cá'anqueze dxaca cheedxu. Gate ne nácadxu ca bidau', xú'udxu lu na' xúgute' da dxelenná bea na lu xezr la xu nigá. <sup>4</sup> Gate bzin zra ba ble'e lau Dios, na' gusel-le' Zrí'ine', gúlajbe' ne chee tu nu'ula, na' guxú'e lu na' da bdxixruj be'e Moisés. <sup>5</sup> Ble'e bselé' benne' zaj xu'e lu na' da nadxixruj bea na, chee gaca si' lu na' Dios dxi'u ca zrí'inequeze'.

<sup>6</sup> Lawe' da ba nácale bi chee Dios, Le' gusel-le' Be' Lá'azxa chee Zrí'ine' lu xichaj lázrdaule, na' dxenná Be' na': "Abba", da zéaje na: Xrae. <sup>7</sup> Ca'an naca, ba nácadxu bi chee Dios, ne québedxa nácadxu ca benne' zaj nada'u lu na' da bdxixruj be'e Moisés. Na' lawe' da nácadxu bi chee', Dios gunne' dxi'u da de cheen'. Caní naca lawe' da nácadxu Cristo tuze.

*Pablo dxe'e gunne xue chee bi ca' chee Cristo*

<sup>8</sup> Da líqueze, gate quebe ne gúnbeale Dios, gúcale benne' zaj nada'u chee dios ca', da' quebe zaj nácaqueze dios. <sup>9</sup> Na'a gate ba núnbeale Dios, u nnadxu, Dios na' núnbe'e le'e, íájzra gunle xexú'ule xecha lasa lu na' da dxelenná bea na lu xezr la xu nigá, da ca' quebe zaj zaca? <sup>10</sup> Le'e ne dxapa ba lá'anale bal-la zra ca', ne bal-la beu' ca', ne tu tu iza ca'. <sup>11</sup> Dxezrébele'a bena' zrin níteze ládujla le'e gate bzenda' le'e dizra' chawe' chee Cristo.

<sup>12</sup> Bi bícha'dau', dxata' xúeda' le'e gácale ca naca' neda', québedxa xu'a lu na' da nadxixruj bea na, lawe' da gúcaqueza' neda' ca nácale le'e. Quegá bi da calela benle chia' neda'. <sup>13</sup> Ba nézquezele gate nédxudau' bzenda' le'e dizra' chawe' chee Cristo. Guca na gate na' guxu'a tu xízrawe'. <sup>14</sup> Xízrawe' na' guca na da gusegute na le'e, san le'e quebe begútele neda', ne quebe bzúale neda' chala'ala, san guz' lu na'le neda' ca tu gubáz chee xabáa chee Dios, u ca náqueza' Jesucristo. <sup>15</sup> ¿Bizra guca chee xel-la dxebe da guzúale? Waca nmia' tu da xecá'ana le'e chawe', la naca da guzéquele gunle, bebéajtele xiaj láuquezele, chee gúnnale na neda'.

<sup>16</sup> Na'a, ¿bexaca' ca tu benne' dxecuídene' le'e lawe' da gucha' le'e da li?

<sup>17</sup> Benne' ca' dxelaca lazre' chugu lu bela' chee da na' dxulé'e na, dxe'e gunne xue chee le'e, san quegá chee xegá'anale chawe'. Da dxelaca lazre' naca na xulu-cuase' le'e nen netu' chee cuele gunne xue chee le'. <sup>18</sup> Naca chawe' cuedxu gunne xue chee benne' xula chee xegá'ane' chawe', ne quegaze gate zúalena' le'e. <sup>19</sup> Zrí'ina'dau', naca chia' ca zua' lu xel-la dxudía ne chee ca dxaca chee tu nu'ula ba zua sané' bidau', ne wabédxequeza' gunne xue chee cadxa gulé'e lau da li dxenná bea Cristo lu xichaj lázrdaule. <sup>20</sup> Dxezé lazra' súalena' le'e ná'aqueze chee gaca guchálajlena' le'e xezí-cadxa dizra' lawe' da dxezí'ale' a gunne xue.

*Da dxusede dxi'u ca guca chee Sara, ne chee Agar*

<sup>21</sup> Le'e na', dxaca lázrele chu'ule lu na' da bdxixruj be'e Moisés, le xechébxque da nigá: ¿Quebe ne xénnele ca dxenná da nadxixruj bea na? <sup>22</sup> Dxenná na gulezrá' chupa zrí'ine Abraham. Tube' gúcabe' zrí'ine zrú'ulaqueze', nu'ula quebe nada'u.

<sup>23</sup> Zri'ine nu'ula nada'u gúlajbe' cáteze dxe-lalaj xúgute bidau', na' zri'ine nu'ula quebe nada'u gúlajbe' chee guca li ca da guchebe lazre' Dios. <sup>24</sup> Da nigá naca na ca tu da dxul'é na. Dxúpaté nu'ula caní dxulul'éne' ca zaj naca chupa xel-la wezría. Tu xel-la wezría nigá naca na da bnezruj Dios Moisés lu xi'a Sinaí, da na' dxul'é Agar. Benne' ca' zaj xu'e lu na' xel-la wezría nigá dx-elálaj' ca benne' zaj nada'u. <sup>25</sup> Cá'anqueze dxul'é Agar da naca chee xi'a Sinaí da zua na ga nababa Arabia, Cá'anqueze xi'a nigá dxul'é na ca naca Jerusalén lu zra na'a zra lawe' da zaj naca benne' chee xezre nigá ca benne' zaj nada'u tu zren nen zri'ine' ca'. <sup>26</sup> Benne' zaj nababe' Jerusalén chee xabáa quebe zaj naque' benne' zaj nada'u, na' dxi'u nácadxu ca zri'ine benne' ca'. <sup>27</sup> Lu dizra' lá'azxa, naxúaj na ca naca chee benne' zaj nababa Jerusalén chee xabáa na', da dxenná na:

Gubé lue', nu'ula wizre, lue' quebe nu chilá' zri'inu'.

Gudxeze xa'a lu xel-la dxebé, lue' quebe núnbe'u xel-la dxudía chee xel-la dxezán bidau'.

Nu'ula quebe guzán bidau' gate guque' cuide' waxandxa zri'ine' quezcala zri'ine nu'ula zúalene' benne' chee'.

<sup>28</sup> Le'e, bi bícha'dau', nácadxu ca Isaac. Nácadxu zri'ine Abraham, bi ca' guchebe lazre' Dios gunézruje' le'. <sup>29</sup> Na'a ca guca lu zra na', Ismael, zri'ine Abraham na', bi gúlajbe' ca dxelalaj xúgute bidau', gudáu zi' xúzrebe' Isaac, zri'ine Abraham na', bi gúlajbe' ne chee Be' chee Dios, cá'anqueze dxaca na na'a. <sup>30</sup> Na'a ¿bizra dxenná dizra' lá'azxa? Dxenná na: Bebéaj chalá'ala nu'ula nada'u tu zren nen zri'ine' lawe' da quebe gaca chee zri'ine nu'ula nada'u sibe' da dxal-la' si' zri'ine nu'ula quebe nada'u. <sup>31</sup> Ca' naca na, bi bicha', quebe nácadxu ca Ismael, zri'ine nu'ula nada'u, san nácadxu ca Isaac, zri'ine zru'ula Abraham, nu'ula quebe nada'u.

## 5

### *Le sua chuchu lu xel-la weselá*

<sup>1</sup> Cristo bselé' dxi'u lu na' da nadxixruj bea na chee gácadxu ca benne' quebe zaj nada'u. Le sua chuchu lu xel-la weselá da ba guzile, ne québedxa xexú'ule lu na' da na' dxun na le'e benne' zaj nada'u.

<sup>2</sup> Le xene da dxapa' le'e. Neda', Pablo, dxapa' le'e, che güele lataj chugu lu belá' cheele da na' dxul'é na, quebe bi da ba neza gaca chee da naca chee Cristo.

<sup>3</sup> Dxaca lazra' xapa' le'e xecha lasa, che nu benne' chugu lu belá' chee' da na' dxul'é na, dxun na ba xen gun bénnea' xúgute da bdxixruj be'e Moisés. <sup>4</sup> Le'e na' dxéquele nagá'anale xrlátaje lau Dios lawe' da nunle ca nadxixruj bea na, ba bcá'anale da naca chee Cristo, ne dxexebéaj cuínale lu xel-la zri'i lazre' chee Dios. <sup>5</sup> Dxi'u, ne chee Be' Lá'azxa, ne lawe' da dxeajlí lázredxu Cristo, dxuxrén lázredxu nagá'anadxu xrlátaje lau Dios. <sup>6</sup> Che nácadxu tuze nen Cristo, quebe bi da ba neza gaca na cheedxu che chugu lu belá' cheedxu da na' dxul'é na, u che quebe chugu na. Da ba neza naca na cheedxu che dxeajlí lázredxu Cristo, na' xel-la dxeajlí lazre' cheedxu dxuzúa na dxi'u lu xel-la zri'i lazre'.

<sup>7</sup> Da xrlátaje bénqueze. ¿Nuzra gulú'u xel-la le'e chee québedxa guzúale dizra' da li? <sup>8</sup> Quegá Dios bene' da na'. Nácaqueze Le' Bénnea' bláwizre' le'e. <sup>9</sup> Quebe gal-la lázrele da dxenná na: Láteze cua zichaj dxuchazra na ca naca cua. <sup>10</sup> Dxuxrén lazra' Xránadxu ca naca cheele le'e, quebe guzúale chalá'ala da nigá dxuchálaja'. Dios gudéé' lu da ba xa' bénnea' dxun zréajene' le'e, nüteteze naque'.

<sup>11</sup> Da naca chia', bi bicha', la xapa' neda' bénneache dxal-la' chugu lu belá' chee' da na' dxul'é na, quegá weláu zi' xuzre benne' judío neda' lawe' da che dxuna' da caní quebe xelaque' tula che cu'a lban chee xaga béguaj chee Cristo. <sup>12</sup> Na'a ca naca chee benne' ca', benne' dxelún zréajene' le'e, ne dxelenné' dxal-la' chugu lu belá' cheele da na' dxul'é na, dxaca lazra' chugu ca da zaj naca benne' ca' chee québedxa xelún zréajene' le'e.

<sup>13</sup> Bi bícha'dau', Dios bláwizre' le'e chee gácale benne' quebe zaj nada'u, ne québedxa xu'ule lu na' da bdxixruj be'e Moisés. Quebe guchínele da nácale chee gunle ca da dxezá lázrele. Le gun cuínale ca benne' zaj nada'u, chee gunle zrin chee le sa' ljwézrele tule xetule lu xel-la zri'i lazre' cheele. <sup>14</sup> Xúgute da nadxixruj bea na dxun bénnea' dxuzúé' dizra' da na' dxenná na: Bzri'i le sa' ljwezru' cáteze nazrí'i cinu'.

<sup>15</sup> Che dxunle ca dxelún be' xixre' ca', ne

dxun zi' ljwézrele, ne dxasa ljwézrele tule xetule, le guxúe ga guzrí'a xi' cuínale.

*Da dxundxu cáteze dxezá lazre' belá' dxen cheedxu, ne da dxundxu cáteze dxezá lazre' Be' Lá'azxa*

<sup>16</sup> Da nigá dxapa' le'e: Le gun cáteze dxul'é Be' Lá'azxa le'e, na' quebe gunle cáteze dxezá lazre' belá' dxen chee. <sup>17</sup> Da dxezá lazre' belá' dxen cheedxu dxedíl-lale na da dxezá lazre' Be' Lá'azxa, na' da dxezá lazre' Be' Lá'azxa dxedíl-lale na da dxezá lazre' belá' dxen cheedxu. Dxúpatē da caní dxeledíl-lale ljwezre na, na' chee le na' quebe gaca gunle da dxaca lázrele gunle.

<sup>18</sup> Che dxunle ca da dxul'é Be' Lá'azxa le'e, québedxa xu'ule lu na' da nadxiruj bea na.

<sup>19</sup> Zaj nul'é láuqueze da dxelún benne' ca' dxelunē' cáteze da dxezá lazre' belá' dxen chee':

Deledálene' nu'ula xula.

Dulucá'ana dí'taje' le sa' ljwezre'

Dxelunē' da sban, ne da schanni'.

<sup>20</sup> Dxelúe szrene' bedau' xi'aj xaga, ne dx-elunē' xel-la wazrá'.

Dxeleucidē' le sa' ljwezre', ne dxelezezé'e.

Dxelaque' wide', ne dxelezrá'a xíchaje'.

Dxeleenné' chee ljwezre'.

Dxelebéaj xichaj ljwezre' tue' xetue', ne dxelaque' chupa la'a.

<sup>21</sup> Dxelaque' xa lazre', ne dxelutie' benne'.

Dxelezúzrene', ne dxeledanne' da calela da dxelunē' lu laní ca'.

Zánete da dxelundxe' bi chee da caní. Che le na' dxapa' le'e ca bēnqueza' nédxute, benne' dxelunē' da caní quebe xelexú'e naga dxenná bea Díos.

<sup>22</sup> Da dxelún benne' ca' dxelunē' cáteze da dxul'é Be' Lá'azxa le' zaj naca na caní:

Zaj nazri'ine' le sa' ljwezre', ne zaj nape' xel-la dxebé.

Dxelebeza zri lazre', ne zaj naque' zren lazre'.

Zaj naque' zri'i lazre', ne dxelunē' da zri'a chawe'.

Zaj naque' li lazre'.

<sup>23</sup> Zaj naque' dxexruj lazre', ne dxeleenná be'e cuine'.

Quebe de da nadxiruj bea na da dxē na dxi'u quebe gundxu da caní. <sup>24</sup> Benne' ca' zaj naque' bi chee Cristo ba buludé'e le'e xaga béguaj belá' dxen chee' nen xúgute da dxezá lazre na. <sup>25</sup> Che naca bandxu ne chee Be' Lá'azxa, dxal-la' gundxu ca da dxul'é Be' Lá'azxa dxi'u.

<sup>26</sup> Quebe dxal-la' gucá'ana szren cuínadxu, ne quebe gácadxu wide' tudxu xetudxu, ne quebe sua da xa lazre' ládujla dxi'u.

## 6

*Le gácale le sa' ljwézrele tule xetule*

<sup>1</sup> Bi bícha'dau', che nu benne' ládujla le'e nunē' dul-la, le'e na' dxedálele Be' Lá'azxa dxal-la' gácalele bēne' chee xezé chúchue'. Dخال-la' gácale dxexruj lazre' gunle da nigá chee quebe güele lataj da xriwe' cu'u xel-la na le'e. <sup>2</sup> Le gácale le sa' ljwézrele tule xetule lu da naca xua chee, na' caní gunle ca nadxiruj be'e Cristo.

<sup>3</sup> Che nu benne' dxéquene' naque' benne' blau, ne quebe nu naque', dxezí xézeze cuine'. <sup>4</sup> Tu tu benne' dxal-la' na' xánnie' da dxúnqueze', na' che nagá'ana xrlátaje da dxune', waca xape' ba lá'ana da dxúnqueze', ne quegá da ben xetú benne'. <sup>5</sup> De tu xua da nabágadu chee Cristo, da dxal-la' gua tu tu benne'.

<sup>6</sup> Benne' zua nu dxusede le' ca naca xrtizra Díos dxal-la' gunézruje' late' da naca chee' chee bēne'.

<sup>7</sup> Quebe si xē cuínale: Netú benne' gaca quítajlene' Díos. Da dxaza bēneache, léqueze na xelape'. <sup>8</sup> Che dxune' da dxezá lazre' belá' dxen chee', da xezi'e naca na xel-la gute, na' che dxune' da dxezá lazre' Be' Lá'azxa, da xezi'e naca na xel-la nabán zeajlí canna. <sup>9</sup> Ca' nacan xca', quebe gusandxu gundxu da xrlátaje lawe' da che quebe gate lazrdxu, lu zra na' quizruj Díos dxi'u, na' xezidxu lazruj cheedxu. <sup>10</sup> Chee le na', gate nazidxu lataj, dxal-la' gundxu da xrlátaje chee le sa' ljwézredxu, ne da dxundxa na ba xen, gundxu da xrlátaje chee le sa' ljwézredxu dxelejli lazre' Cristo.

*Da bzuaj Pablo nen ná'queze'*

<sup>11</sup> Le nna'xque cadite da zri'a naca da nigá dxuzúaja' chee'le nen ná'queza'. <sup>12</sup> Benne' ca' dxelaca lazre' chugu lu belá' chee'le da na' dxul'é na, dxelunē' na chee xelexegá'ane' chawe' lau bēneache, ne chee quebe xeláu zi' xuzre' le' lawe' da dxuluchálaje' dízra' chee da ben Cristo le'e xaga béguaj. <sup>13</sup> Benne' caní, benne' zaj nadxugu lu belá' chee' da na' dxul'é na quebe dxelunē' xúgute ca da nadxiruj bea na. Dxelaca lazre' chugu lu belá' chee'le da na' dxul'é na chee gaca xulucá'ana szren

cuine' ca naca da belune' chee. <sup>14</sup> Quebe dxaca lazra' xucá'ana szren cuina' chee tu da bena', san tuze chee da ben Xránadxu Jesucristo le'e xaga béguaj. Ne chee Le' naca xezr la xu nígá ca tu da gate chia' neda', na' neda' naca' ca tu benne' gate. Québedxa dxezá lazra' da naca chee xezr la xu. <sup>15</sup> Che nácadxu tuze nen Cristo, quebe bi da ba neza gaca na cheedxu che nadxugu lu belá' cheedxu da na' dxulé'e na, u che quebe nadxugu na. Da ba neza naca na cheedxu che nácadxu benne' cube lu xichaj lázrdaudxu. <sup>16</sup> Dxenaba' lau Dios gunézruje' xel-la dxebeza zri lazre' chee xúgute' benne' ca' zaj naque' benne' cube caní, ne xexache lazre' benne' ca' da li zaj naque' bi chee'.

<sup>17</sup> Lawe' da zaj zria lu bel-la' dxen chia' xizra' da dxululé'e na naca' wen zrin chee Cristo quebe nu benne' dxal-la' gulálene' neda' na'a, ne lu da za za'.

<sup>18</sup> Le'e, bi bícha'dau', dxenaba' lau Xránadxu Jesucristo gune' chawe' chee xúgutele. Ca'an gaca na.

## DIZRA' BZUAJ SAN PABLO CHEE BI CHEE CRISTO ZAJ ZRE'Ē XEZRE ÉFESO

*Pablo dxugape' diuzre bi chee Cristo zaj zre'ē xezre Efeso*

<sup>1</sup> Neda', Pablo, naca' gubáz chee Jesucristo lawe' da guca lazre' Dios gaca' caní. Dxuzúaja' da nigá cheele le'e, nácale bi chee Dios, ne dxeajlí lázrele Jesucristo, na' zrале xezre Éfeso. <sup>2</sup> Dxenaba' lau Xradxu Dios, ne lau Xránadxu Jesucristo gun chawe'ē le'e, ne gunne' le'e xel-la dxebeza zri lazre'.

*Ca naca da chawe' da dxez' lu nmadxu ne chee Cristo*

<sup>3</sup> Dxue lá'anadxu Dios, Xra Xránadxu Jesucristo lawe' da ba bene' cheedxu ca naca xúgute da chawe' chee Be' Lá'azxa da zá'aca xabáa lawe' da nácadxu bi chee Cristo. <sup>4</sup> Dios guqué'ē dxi'u chee gácadxu bi chee Cristo gate quebe ne gunte' xezr la xu, chee gácadxu benne' lá'azxa, ne du lazre' lau Le'. <sup>5</sup> Lawe' da bzri'ine' dxi'u, bene' cheedxu gate nate si' lu ne'ē dxi'u ca bi cheéqueze' ne chee Jesucristo, cáteze da guca lazre' gune'. <sup>6</sup> Chee le na', tu dxue lá'anazquezdxu Dios ne chee xel-la xrlátaje chee' da naca na szente. Lu xel-la xrlátaje chee' na' gúcalene' dxi'u lawe' da nácadxu tuze nen Zrí'ine', bi nazri'ite lazre'. <sup>7</sup> Ne chee Zrí'ine' na' naxá'awene' dxi'u nen dxen cheéqueze', na' lu xel-la zri'i lazre' zren chee' bnite lawe' cheedxu dxi'u ca naca dul-la da nabágadxu. <sup>8</sup> Dios nazri'ilé'ene' dxi'u, ne dxunne' dxi'u xel-la sina, ne xel-la dxéajni'i, <sup>9</sup> na' bzéajni'ine' dxi'u ca naca da dxaca lazre' da bgache na, da na' lu xel-la zri'i lazre' chee' ba núnqueze' gune' ne chee Cristo. <sup>10</sup> Nuchague' xúgute da zaj zua na xabáa, ne xezr la xu, chee xelú'u na lu na' Cristo, da gusexúzre' gune' gate zrin zra chee na.

<sup>11</sup> Ne chee Cristo Dios guqué'ē dxi'u chee' gate nate, chee si' lu nmadxu da xáladxu da gunna Le', ca da ba núnqueze Dios, Bénnea' dxune' xúgute da dxeque Le' xrlátaje. <sup>12</sup> Caní bene' chee gácadxu tu da gucá'ana szren na xel-la szren chee', nácadxu dxi'u benne' nedxu dxebeza lázredxu Cristo. <sup>13</sup> Cá'anqueze le'e, gate benle dizra' li, da naca na dizra' chawe' chee da ben Cristo,

bselé' le'e. Guxeajlí lázrele Le', na' Dios bzue' Be' Lá'azxa lu xichaj lázrdaule ca tu da dxunna bea na nácale bi chee', ca guchebe lazre' gune'. <sup>14</sup> Be' Lá'azxa na' naque' da dxunna bea na sidxu da xáladxu da gunna Dios dxi'u, gate zrin zra da ba nune' guselé' bi chee' ca', chee güe lá'anaquezdxu Le' ca naca xel-la szren chee'.

*Dxenaba Pablo gunezruij Dios xel-la sina chee bi ca' chee Cristo*

<sup>15</sup> Chee le na' gate benda' ca dxeajlí lázrele Cristo, ne ca nazri'ile xúgute bi ca' chee Dios, <sup>16</sup> dxápaqueza' Dios; Xcalenu', ca naca cheele le'e gate dxuchálajlena' Dios, ne dxeajsá lázrqueza' le'e. <sup>17</sup> Dxenaba' Dios chee Xránadxu Jesucristo, naque' Xradxu zue' xabáa, gunne' le'e xel-la sina lu be' nácaqueze da gulé'ē na le'e gúnbea xánnele Le'. <sup>18</sup> Dxenaba' lau Dios guzéajni'ine' xichaj lázrdaule le'e chee nézele ca naca da dxebeza lázredxu da bláwizre' dxi'u sidxu, ne ca naca xel-la gunni'a chee xel-la szren da gunezruij Dios bi chee ca', <sup>19</sup> ne ca naca xel-la waca zrente chee' da dxun na zrin lu xichaj lázrdaudxu dxi'u dxeajlí lázredxu Le'. Xel-la waca nigá bchine Dios lu duté xel-la dxenná bea zren chee' <sup>20</sup> gate bsebane' Cristo ládujla benne' gate ca', ne guleche' Le' chalá'a xabéla chee' xabáa, <sup>21</sup> ne bzue' Le' chee' nna bé'ene' xúgute benne' blau xabáa, ne xúgute benne' dxelenná bea xabáa, ne xúgute benne' zaj napa xel-la waca, ne xúgute benne' zaj naca xrane, ne xúgute da dxelenná bea na lu zra na'a zra, ne lu da za za'. <sup>22</sup> Bzue' xúgute da zaj zua lu na' Cristo, ne bzue' Le' gaque' benne' xíchajje chee bi chee ca' ca naca xúgute da dxelune'. <sup>23</sup> Benne' caní zaj naque' ca belá' dxen chee Cristo, da dxulé'ē na duté ca nácaqueze Le', Bénnea' dxusexuzre' dxucá'ana chawe' ca naca xúgute da zaj zua.

## 2

*Naca bandxu lawe' da nazri'i Dios dxi'u*

<sup>1</sup> Gate nate gücale ca benne' gate lu xichaj lázrdaule ne chee da caléla ca', ne dul-la ca' <sup>2</sup> da benle gate ne dxunle ca dxelún benneache zaj zre'ē xezr la xu nigá, benne' dxelune' ca dxenná da xriwe', be' na' da dxenná bea na lu be', ne dxun na zrin lu xichaj lázrdau benne' ca' quebe dxuluzé' dizra' chee Dios. <sup>3</sup> Cá'anqueze dxi'u, xúgutedxu bendxu caní gate nate, gate

bendxu cáteze da guzá lázredxu, ne bendxu ca da gunná bela' dxen cheedxu, ne ca da gunná xichaj lázrdaudxu. Chee le na' guca na cheedxu sidxu da zi' da xa' chee Dios ca gune' chee xezicadxa benne' ca', <sup>4</sup> san Dios bexache lázrele'e dxi'u, ne bzri'ilé'ene' dxi'u, <sup>5</sup> na' benne' dxi'u xel-la nabán tu zren nen Cristo gate ne nátedxu lu xichaj lázrdaudxu ne chee dul-la da nabágadxu. Naladxu ne chee xel-la xrlátaje chee Dios. <sup>6</sup> Cá'anqueze bsebán Dios dxi'u tu zren nen Jesucristo, ne guleche' dxi'u tu zren nen Le' xabáa. <sup>7</sup> Bene' caní chee gulé'ene' lu zra da za za' ca nazrí'ile'ene' dxi'u, ne ca naca da cháwele'e bene' cheedxu ne chee Jesucristo. <sup>8</sup> Lu xel-la xrlátaje chee Dios bselé' le'e lawe' da guxeajlí lázrele Cristo. Quebe naca na ne chee bi da benle le'e, san naca na tu da ben Dios cá'aze ne chee. <sup>9</sup> Quebe nalá nu benne' ne chee bi da dxúnqueze', chee quebe nu benne' gucá'ana szren cuine'. <sup>10</sup> Dios bene' dxi'u, na' bexune' dxi'u tuze nen Jesucristo chee gundxu da xrlátaje ca' da ba nun Le' gundxu gate nate.

#### *Nácadxu tuze ne chee Cristo*

<sup>11</sup> Le gusá lázrele ca gúcale le'e gate nate. Quebe nácale benne' judío, benne' ca' dx-elechugue' lu bel-la' dxen chee' da na' dx-ulé'e na zaj nababe' chee Dios, ne zaj nazí le' benne' zaj nadxugu, na' dxelenné' chee le nácale benne' quebe zaj nadxugu. <sup>12</sup> Lu zra ca' quebe guzúale Cristo le'e. Quebe benle tuze benne' Israel ca', ne quebe bènbeale ca naca xel-la wezría da ben Dios, ne ca naca da guchebe lazre' Dios. Guzúale lu xezr la xu nigá, ne quebe bi guleza lázrele, ne quebe bènbeale Dios. Gate nate guzrale zítu'la naga zua Dios. <sup>13</sup> Na'a ne chee Cristo Dios ba bzue' le'e gágute lawe' da gute Cristo waláz chee le. <sup>14</sup> Léqueze Cristo benne' dxi'u xel-la dxebeza zri lazre', ne bexune' dxi'u tuze, netu', benne' judío ca', ne le'e, benne' quebe zaj naque' judío, ne bzria xi'e xel-la dxezrá'a da ben na dxi'u chupa la'a, da guca na ca tu ze'e. <sup>15</sup> Gate gute Jesús waláz cheedxu guchugue' da nadxiruj bea na da naca na da gunná Dios gundxu, ne da ca' dxelenná bea na, na' bexune' dxúpaté xezre ca' tuze xezre cube da nababa na chee'. Caní gudíxruje' xel-la dxebeza zri lazre' cheedxu. <sup>16</sup> Caní guca ne chee xel-la gute chee Cristo le'e

xaga béguaj, guchugue' naze xel-la dx-ezrá'a ljwezre chee dxúpaté xezr ca', na' bexune' dxúpaté tuze bel-la' dxen, ne bexune' le' tuze nen Dios.

<sup>17</sup> Bla' Cristo, ne bzenne' le'e dizra' chawe' chee', le'e quebe nácale judío, na' guzrale zítu' naga zua Dios, ne le'e nácale judío, na' guzrale gagu naga zua Dios, <sup>18</sup> na' ne chee Cristo, xúgutedxu, benne' judío ca', ne benne' quebe zaj naque' judío, dxebigadxu lau Xradxu Dios ne chee Be' Lá'azxa. <sup>19</sup> Chee le na' le'e, benne' quebe nácale judío, québedxa nácale ca benne' zítu' tu lu xezr la xu da quebe naca na chee le, san nácale benne' walazre' ca xúgute benne' ca' zaj nababa chee Dios. Nabábale Zri'ine Dios. <sup>20</sup> Nácale ca tu xu'u zren da zria na lawe' lane da gulixruj benne' gubáz ca' chee Cristo, ne benne' ca' buluchálaje' waláz chee Dios, na' Jesucristo nácaqueze' xiaj blau chee lane xu'u na'. <sup>21</sup> Lawe' lane nigá da naca Cristo, duté xu'u na' dxegula na tu li chee gaca na tu xudau' lá'azxa chee Xránadxu. <sup>22</sup> Cá'anqueze le'e, lawe' da nácale Cristo tuze, xu'ule lu xu'u na' naga zua Dios ne chee Be' Lá'azxa chee'.

### 3

#### *Pablo dxuzenne' benne' quebe zaj naque' judío dizra' chawe'*

<sup>1</sup> Chee le na' neda', Pablo, dxuzú zriba' lau Dios. Xu'a lizre xia lawe' da dxuna' zrin chee Jesucristo chee gaca chawe' chee le'e, quebe nácale judío. <sup>2</sup> Ba nézele ca ben Dios lu xel-la xrlátaje chee', bsebage' neda' guchálaja' dizra' chawe' chee Cristo ládujla le'e. <sup>3</sup> Lu da ble'e Dios neda' bzéajni'ine' neda' tu da nagache chee' ca da bzuaja' chee le nedxu. <sup>4</sup> Gate gulábale na weque bé'eezele núnbe'a da nagache ca naca chee Cristo. <sup>5</sup> Guca na tu da nagache gate nate. Dios quebe bzéajni'ine' na bènneache, san na'a ne chee Be' Lá'azxa chee' ba blé'ene' na benne' gubáz lá'azxa ca', na' benne' ca' dxuluchálaje' waláz chee'. <sup>6</sup> Caní naca da nagache na': Ne chee dizra' chawe' chee Cristo benne' quebe zaj naque' judío welezí'queze' da gunezruj Dios le' ca da xezezi' benne' judío ca', ne zaj naque' tuze bel-la' dxen, ne xezezi' chee' tu zren da nachebe lazre' Dios ne chee Jesucristo.

<sup>7</sup> Dios bene' neda' wen zrin chee dizra' chawe' na' ne chee tu da bennaze' neda',

bchínene' xel-la waca zren chee'. <sup>8</sup> Neda' nácadxa' benne' baxáche ca xúgute benne' zaj naca bi chee Dios. Bene' neda' tu culuén zren chee guzenda' benne' quebe zaj naque' judío dizra' chawe' ca naca xel-la gunní'a zrente chee Cristo. <sup>9</sup> Bsebague' neda' guzéajni'ida' xúgute bénneache ca da nun Dios guné' da bgache gate nate, na' naca Dios Bénnea' bene' xúgute da zaj zua, <sup>10</sup> chee xelúnbea na'a benne' dxelenná be'e, ne zaj nape' xel-la szren xabáa ca naca xel-la sina zrente chee Dios. Xelúnbe'e na ne chee benne' ca' zaj naca bi chee Cristo. <sup>11</sup> Da nigá ben Dios ca da nune' gate nate gusexuzre' ne chee Xránadxu Jesucristo. <sup>12</sup> Ne chee Cristo waca bígadxu lau Dios du lázredxu, ne dute xel-la dxuxrén lazre' cheedxu lawe' da dxejilí lázredxu le'. <sup>13</sup> Chee le na' dxata' xúeda' le'e quebe gate ni'a na'le lawe' da dxedéa' xel-la zi' ne chee le'e. Xel-la zi' da dxedéa' neda' gaca na cheele tu da ba neza.

*Xel-la zri'i lazre' chee Cristo*

<sup>14</sup> Chee le na' dxuzú zriba' lau Xra Xránadxu Jesucristo, <sup>15</sup> Bénnea' dxuzúe' la cha chee benne' zaj zre'e xabáa, ne xezr la xu. <sup>16</sup> Dxenaba' lau Xradxu, ca naca xel-la gunní'a zrente chee' guzê tipe' le'e nen xel-la waca chee' lu xichaj lázrdaule ne chee Be' Lá'azxa chee', <sup>17</sup> chee sua Cristo lázrdaule ne chee xel-la dxejilí lazre' chee, ne se cháchale lu xel-la zri'i lazre', ca tu xaga da nudéa' lue na sítujla. <sup>18</sup> Chee seque' chéajni'ile tu zren nen xúgute bi chee' ca nazriluj, ne ca natunna, ne ca nasituj, ne ca nasibe xel-la zri'i lazre' chee Cristo. <sup>19</sup> Dxenaba' lau Dios gúnbeale xel-la zri'i lazre' na', lálaca cabata' séquedxu gúnbeadxu dute ca naca na. Caní dxenaba' Le' chee suale le'e dute da nácaqueze Dios.

<sup>20</sup> Na'a, gaca báqueze Dios, Bénnea' nape' xel-la waca gúnle'equeze' da zrendxa ca da dxenábadxu, u ca da dxéquedxu, ne chee xel-la waca chee' da dxun na zrin lu xichaj lázrdaudxu. <sup>21</sup> Gaca ba Dios ládujla benne' zaj naque' bi chee Cristo ne chee Jesucristo xúgute iza chadía chacanna. ¡Ca'an gaca na!

4

*Nácadxu tuze ne chee Be' Lá'azxa*

<sup>1</sup> Chee le na' dxata' xúeda' le'e, neda', xu'a lizre xia lawe' da dxuna' zrin chee Xránadxu, chee gunle da xrlátaje ca dxal-la' xelún bénneache ba gucá'a Dios le', ca

gucá'aqueze' le'e. <sup>2</sup> Le gaca dxexruj lazre', ne zri'i lazre'. Le cueza lazre', ne le cue' gunne xue chee tule xetule lu xel-la zri'i lazre' chee. <sup>3</sup> Le gun ba xuzre gácaqueze tuze, guchínele xel-la waca chee Be' Lá'azxa lu xel-la dxebeza zri lazre' da na' dxun na le'e tuze.

<sup>4</sup> Tuze naca bēla' dxen chee Cristo da nácadxu.

Tuze naca Be' Lá'azxa, Nu na' zúalene' tu tudxu.

Tuze da dxuxrén lázredxu, da na' sidxu lu na' Dios.

<sup>5</sup> Tuze Bénnea' naque' Xránadxu.

Tuze da dxejilí lázredxu.

Tuze ca dxedxúadxu nisa.

<sup>6</sup> Tuze Bénnea' naque' Dios, ne Xra xúgutedxu.

Le' naque' Benne' xíchaje xúgutedxu.

Dxulé'e cuine' lu da dxundxu xúgutedxu.

Zúaqueze' lu xichaj lázrdau xúgutedxu.

<sup>7</sup> Tu tudxu nasidxu tu xel-la waca cha cheedxu

ca da nunna Cristo dxi'u.

<sup>8</sup> Naca na ca naxúaj na lu dizra' lá'azxa, dxenná na:

Begüéne' xabáa, gate gudé bzétaje' benne' guledábague' Le'.

Na' bnézuje' bénneache xel-la waca ca'.

<sup>9</sup> ¡Bi zéaje na, dxenná na: Begüéne'?

Zéaje na nédxula bétaje' lu xezr la xu nigá. <sup>10</sup> Bénnea' bétaje' nácaqueze' Bénnea' begüéne' lu da blaudxa lu xabáa chee gaca bea na xu'u lu ne'e xúgute da de, <sup>11</sup> na' benne' cha cheedxu xel-la waca chee: Gaca bál-ladxu benne' gubáz chee'.

Gaca guzendxu xezícadxu bénneache dizra' chawe' chee'.

Gácadxu xezícadxu benne' dxuxúedxu bi chee' ca'.

Na' gusededxu-be' xezícadxu.

<sup>12</sup> Ca'an bene' chee bpa'adxé' bi chee' ca' chee xelunbe' zrin xulucá'anabe' xrlátaje bénneache ca' zaj naque' zruza ni'a na' Cristo:

<sup>13</sup> Chee gácadxu tuze ca dxéajledxu,

ne ca núnbeadxu Zri'ine Dios,

chee gácadxu benne' du lazre',

chee gácadxu cáteze nácaqueze Cristo.

<sup>14</sup> Caní nacan chee québedxa gácadxu ca bidu ca', bi ca' dxelezibe' bíteteze dizra' da zaj naca na ca tu be' da zeaj na nila na'la, ne québedxa güedxu lataj xelún zrėje benne' wen da zrimnaj ca' dxi'u, chee quebe xelezi



xē'ē dxi'u chee gundxu da calēla. <sup>15</sup> Lu xel-la zri'i lazre' dxal-la' guchálajdxu da li chee gácadxu cáteze nácaqueze Cristo, Bénnea' naque' xichaj bel-la' dxen da nácadxu dxi'u. <sup>16</sup> Le' dxunē' tuze xúgute' ni'a na' zaj zria bel-la' dxen chee' chee' gaca na tu bel-la' dxen nazá'atē chee' na, ne chee' xelún zrin xúgute' ni'a na' ca' chee' gula bel-la' dxen na', ne gaca na chawe' lu xel-la' zri'i lazre'.

*Xel-la nabán cube da dxunna Cristo dxi'u*

<sup>17</sup> Da nigá dxapa' le'e, ne dxusebaga' le'e waláz chee' Xránadxu chee' québedxa gunle ca dxelún bénneache quebe zaj núnbe'e Dios, benne' ca' dxelunē' cáteze dxeléquene' xrlátaje, <sup>18</sup> benne' ca' zaj nachul-la xichaj lázrdawe'. Benne' caní quebe zaj nape' xel-la nabán li lazre' da dxunna Dios bénneache: Zaj nachul-la nanítene', ne zaj naca zide' lázrdawe'.

<sup>19</sup> Québedxa dxelexedué' ene'. Belezanne cuine' dxelunē' da schanni'. Du lazre' dxelunē' xúgute' da sban.

<sup>20</sup> Quegá caní nazédele le'e chee' Cristo, <sup>21</sup> che da li xca' bénnele da dxuchalaj Le', ne nusé-dene' le'e ca naca da li da zúale Jesús. <sup>22</sup> Ca naca da benle nédxula, le guzúa chalá'ala da gúcale lawe' da guzrinnajle lu da sban da guzá lázrele.

<sup>23</sup> Dxal-la' gácale benne' cube lu xichaj lázr-daule.

<sup>24</sup> Dxal-la' gunle da naca chee' benne' cube na' da ben Dios le'e chee' gunle da naca na xlátaje, ne da li da naca na l'azxa.

<sup>25</sup> Chee' le' na' québedxa gun lázrele.

Le nne' da li tule xetule lawe' da nácadxu ni'a na' tuze bel-la' dxen chee' Cristo.

<sup>26</sup> Che dxezrá'ale, quebe dxal-la' gunle dul-la, ne quebe zrá'ale scha'.

<sup>27</sup> Quebe güele da xriwe' lataj guchixre chee na le'e.

<sup>28</sup> Bénnea' guque' gubán québedxa dxal-la' cuane'. Dxal-la' gunē' tu zrin chawe' nen ni'a ná'queze' chee' gape' da gunézruje' benne' dxelexá'zrene'.

<sup>29</sup> Quebe nnele dizra' calēla. Le guchalaj da naca na xrlátaje chee' xelezé' tipa benne' xelenne', ne xelezí'e na ba neza. <sup>30</sup> Quebe guzúa xáchele Be' Lá'azxa chee' Dios, lawe' da zúale Be' le'e chee' gaca bea na nácale bi chee' Dios ca zrindxa zra xezi' lu ne'ē dxi'u.

<sup>31</sup> Le guzúa chalá'ala:

Xel-la dxeuide', ne xel-la dxezrá'a, ne xel-la xichaj zra'a, ne xel-la wetil-la dizra', ne xel-la wechacha, ne xúgute' da zrinnaj.

<sup>32</sup> Dxal-la' gácale du lazre', ne xache lázrele tule xetule, ne gunite laule chee' tule xetule ca ben Dios, bnite lawe' chee' le'e lawe' da nácale bi chee' Cristo.

## 5

*Ca dxal-la' xelaca bi ca' chee' Dios*

<sup>1</sup> Lawe' da nácale bi chee'queze Dios, bi nazri'ine', le gun ba xuzre gácale cáteze nácaqueze Le'. <sup>2</sup> Le zri'i le sa' ljwézrele tule xetule cáteze ben Cristo, bzri'ine' dxi'u, ne bzanne cuine' waláz cheedxu ca tu zrla'dau', béadu dxelute benne' lau Dios chee' xedúa xtul-le'. Gate gute Cristo le'ē xaga béguaj, guca ca tu da dxelá zixre lau Dios da dxelegú'u benneache lau Le'.

<sup>3</sup> Lawe' da nácale bi chee' Dios, québedxa dxal-la' guchálajle chee' da dxucá'ana ditaj na bénneache, ne chee' da sban ca', ne chee' xel-la wecude' da de. <sup>4</sup> Quebe guchálajle dizra' schanni', ne dizra' bize, ne dizra' calēla, da quebe dxulucá'ana na chawe' bénneache, san dxal-la' xéquezle Dios: "Xcalenu'." <sup>5</sup> Ba nézquezle quebe chu'u naga dxenná' bea Cristo nen Dios netú benne' dxucá'ana dítajē' bénneache, u tu benne' dxunē' da sban, u tu benne' dxucúdie' da de, da naca na ca dxucá'ana szrene' bedau' xiaj xaga. <sup>6</sup> Quebe güele lataj nu si xē le'e nen dizra' xala, lawe' da ne chee' da nigá dxelel-la Dios da dxusaca zi na benne' ca' quebe dxuluzúe' dizra' chee'. <sup>7</sup> Quebe gunle tu zren benne' dxelunē' da caní.

<sup>8</sup> Nédxute' guzúale lu da chul-la, na' na'a zrágale xel-la naxani' lawe' da nácale bi chee' Xránadxu. Chee' le' na', le gun da naca na chee' xel-la naxani', <sup>9</sup> da na' naca xel-la dxucá'ana chawe' ljwézredxu, ne da xlátaje, ne da li. <sup>10</sup> Le gun zi' lázrele nézele gunle da dxezaca ba lazre' Xránadxu. <sup>11</sup> Quebe gunle tu zren benne' dxelunē' da calēla, da ca' naca chee' da chul-la, san le til-la da ca' <sup>12</sup> lawe' da naca na tu da xedué'edxu guchálajzedxu chee' da dxelún benne' ca' bagácheze. <sup>13</sup> Gate dxeledxúaj da caní lu da chul-la, ne zaj xu'u na lu xel-la naxani', gul'é lawe' ca zaj naca xúgute' da

caní, lawe' da dxulé'e lawe' xel-la naxaní' xúgute. <sup>14</sup>Ca naca da caní dxenná na: Bebán, lue' dxásiu'.  
Bexasa ládujla benne' gate,  
na' gusení' Cristo lu xicháj lazrda'u.

<sup>15</sup>Cheeḡ le' na', le guxúe xanne' ca da dxunle. Quebe gunle ca dxelún benne' zaj nachul-la naníteneḡ, san le gun ca dxelún benne' zaj naxéajni'ineḡ. <sup>16</sup>Le guchine chawe' zra caní lawe' da dxácale'e da zrinaj lu zra na'a zra. <sup>17</sup>Quebe gácale benne' xala, san le gun zi' lázrele chéajni'ile da dxaca lazre' Xránadxu gundxu. <sup>18</sup>Quebe súzrele, da na' dxuxrinaj na bénneache, san du lázrele le si' Be' Lá'azxa. <sup>19</sup>Le guchálajle le sa' ljwézrele tule xetule nen Salmo ca', ne nen da dxúl-lale, ne nen da du dxúl-lale da dxunna Be' Lá'azxa le'e. Du lázrele le gul-la, ne le güe lá'ana Xránadxu. <sup>20</sup>Le xéqueze Xradxu Dios: "Xcalenu'", chee xúgute lu La Xránadxu Jesucristo.

*Ca dxal-la' xelún bi cheeḡ Cristo nen lwézrebe'*

<sup>21</sup>Le gaca dxexruj lazre' tule xetule, ne le gapa ba lá'ana Dios.

<sup>22</sup>Nu'ula dxal-la' gaqueḡ dxexruj lazre' lau benne' cheeḡ, cáteze dxal-la' gaqueḡ lau Xránadxu, <sup>23</sup>lawe' da naca benne' biu xicháj cheeḡ zru'uleḡ, cáteze naca Cristo xicháj cheeḡ bi cheeḡ ca'. Cristo naqueḡ Benne' weselá cheeḡ bi cheeḡ ca', bi zaj naca be' ca beḡ-la' dxen cheéquezeḡ. <sup>24</sup>Cáteze zaj naca dxexruj lazre' bi cheeḡ ca' lau Cristo, cá'anqueze nu'ula dxal-la' gaqueḡ dxexruj lazre' lau benne' cheeḡ lu xúgute.

<sup>25</sup>Benne' biu dxal-la' zrí'ineḡ zru'uleḡ cáteze ben Cristo, bzri'ineḡ bi cheeḡ ca', ne bzáneneḡ xel-la nabán cheeḡ ne cheeḡbe'.

<sup>26</sup>Caní beneḡ cheeḡ bebéajeḡ-be' cheéquezeḡ, ne ben chí'e-be' ne cheeḡ dizra' cheeḡ, da guca na ca dxun benne' dxexibeḡ bi cheeḡ nen nisa, <sup>27</sup>cheeḡ guzúe'-be' lau Le', xelá-cabe' bi xabáa, ne quebe bi da sban zaj nápabe', ne netú da zrinaj, ne netú da naca na ca da ca', san xelá-cabe' lá'azxa, ne du lazre'. <sup>28</sup>Cá'anqueze benne' biu dxal-la' zrí'ineḡ zru'uleḡ cáteze nazri'ineḡ beḡ-la' dxen cheéquezeḡ. Benne' nazri'ineḡ zru'uleḡ nazri'i cuineḡ. <sup>29</sup>Netú benne' quebe dxe-cuídeneḡ beḡ-la' dxen cheéquezeḡ, san dxugaweḡ na, ne dxuxúeḡ na, ca dxúnqueze Cristo cheeḡ bi cheeḡ ca' <sup>30</sup>lawe' da zaj ná-cabe' ca beḡ-la' dxen cheéquezeḡ, na' dxi'u nácadxu ca ni'a na' beḡ-la' dxen cheeḡ, ne

nácadxu ca bela' dxen cheeḡ, ne zrita cheeḡ. <sup>31</sup>Cheeḡ le' na' tu benne' biu dxal-la' gusaneḡ xra xrneḡ cheeḡ gaqueḡ tuze nen zru'uleḡ, na' dxúpatéḡ xelaqueḡ ca tuze benne'. <sup>32</sup>Da nigá naca na tu da zren da nagache, na' dxennía' da caní ca naca cheeḡ Cristo nen bi cheeḡ ca'. <sup>33</sup>Cá'anqueze tu tule le'e dxal-la' zrí'ile zrí'ulale cáteze nazri'i cuínale, na' nu'ula dxal-la' gapeḡ ba lá'ana benne' cheeḡ.

## 6

<sup>1</sup>Le'e, bi cuide', lawe' da nácale bi cheeḡ Xránadxu, dxal-la' guzúale dizra' xruze xrna cheeḡ, da naca na xlátaje. <sup>2</sup>Da nad-xiruj bea nedxu da zraga na tu da guchebe lazre' Dios naca na da dxenná na: Gudapa ba lá'ana xra xrna'u, <sup>3</sup>cheeḡ gaca chawe' chiu', ne cheeḡ su' scha' lu xezr la xu.

<sup>4</sup>Le'e, xruze xrna', quebe guchá'ale zrí'inele. Le gusegula-be' lu xel-la dxenná bea cheeḡ Xránadxu, ne le gusina-be' da naca cheeḡ Le'.

<sup>5</sup>Le'e, benne' nada'u, le guzúa dizra' cheeḡ benne' zaj naqueḡ xránale lu xezr la xu nigá, ne le gapa le' ba lá'ana, ne le zrebe le', ne du lázrele le gaca cheeḡ, cáteze dxuzúale dizra' cheeḡ Cristo. <sup>6</sup>Le gun zrin cheeḡ xránale ca', quegaze gate dxeleenná'teḡ le'e, ca dxelún benne' ca' dxelaca lazre' xelezaca ba lazre' bénneache cheeḡ. Le gun zrin na' cáteze dxunle zrin cheeḡ Cristo, gunle du lázrele da dxaca lazre' Dios. <sup>7</sup>Le gun zrin cheeḡ xránale du lázrele, cáteze dxunle zrin cheeḡ Xránadxu, ne quegaze cheeḡ bénneache. <sup>8</sup>Ba nézqueze lu tu benne', benne' nada'u, ne benne' quebe nada'u, wazi'e lu na' Xránadxu ca naca da xrlátaje da nuneḡ.

<sup>9</sup>Le'e, xrana benne' ca', cá'anqueze le gun le'e nen benne' wen zrin cheeḡ ca', ne quebe guzálajle le' lawe' da nézele zua Bénnea' xabáa naqueḡ Xrana benne' ca', ne Xránale le'e, na' Le' quebe dxebebéajeḡ cha cheeḡ bénneache.

*Zra lana bi cheeḡ Cristo da dxácaleḡ lebe' lu wedil-la*

<sup>10</sup>Na'a, bi bícha'dau', le gaca chuchu ne cheeḡ Xránadxu nen xel-la wala zren cheeḡ.

<sup>11</sup>Le gaca ca benne' zjaqueḡ wedil-la zaj nácueḡ zra lanéḡ xia da na' dxunna Dios le'e, cheeḡ gaca se chúchule lau xúgute da dxuzé da xriweḡ laule cheeḡ si xe na le'e. <sup>12</sup>Quegá dxedíl-lalédxu bénneache zaj naqueḡ bela' dxen. Dxedíl-lalédxu xel-la dxenná bea cheeḡ da xriweḡ da dxeledá na lu be', ne

dxedíl-laledxu be' xriwe' ca', da dxeleenná bea na, ne be' xriwe' ca' dxę na ljwezre ca' da xelún na, ne be' xriwe' ca' xu'u lu na' na xęzr la xu chul-la nigá. <sup>13</sup> Cheę ę na', le gaca ca benne' zjaque' wedil-la zaj nacue' zra lanę' xia da dxunna Dios le'e, cheę séquele súale wedil-la lu zra che da xriwe', na' ca te na' xegá'ana chúchule. <sup>14</sup> Le se chuchu xca', suale le'e da li ca tu bazxu da nacá'a na le'ele, ne suale le'e da xlátaje ca tu xia da da' lachu'le. <sup>15</sup> Le gaca sina cheę guchálajle dizra' chawe' cheę xel-la dxebeza zri lazre', da gaca na cheęle ca tu cue' zrelale. <sup>16</sup> Da dxun na ba xen, le gapa xel-la dxeajlí lazre', da gaca na cheęle ca tu da xegapa na, da xusula na xúgute da zaj nalá na zaj zua na xi' da dxuzala da xriwe'. <sup>17</sup> Xel-la weselá gaca na cheęle ca tu lapa xia da gucache xíchajle, na' xrtizra Dios gaca na cheęle ca tu xia da gunna Be' Lá'azxa le'e. <sup>18</sup> Gate ne dxunle da caní dxal-la' guchálajlele Dios, gata' xúele, ne nábale lau Le' ne cheę Be' Lá'azxa. Cheę gaca gunle da caní dxal-la' súale ban lazre', ne quebe gate ni'a na'le, na' nábale Dios cheę gácalęne' xúgute bi cheę' ca'. <sup>19</sup> Cá'anqueze le naba Le' waláz chia' neda' cheę gunne' neda' dizra' da guchálaja', cheę xazrda' guzenda' benneache dizra' chawe' cheę'. <sup>20</sup> Dios bene' neda' gubáz cheę dizra' chawe' cheę', na' cheę ę na' xu'a lizre xia na'a. Le naba Le' gácalęne' neda' cheę xazrda' guchálaja' dizra' chawe' cheę' ca dxal-la' guna'.

*Pablo dxugape' diuzre le sa' ljwezre'*

<sup>21</sup> Tíquico, bi bíchedxu nazri'ite lazrdxu, bi li lazre' lu zrin cheę Xránadxu, guzenbe' le'e da dxaca chia' nigá, ne da dxuna'. <sup>22</sup> Cheę ę na' dxusel-la'-be' lau le'e cheę guzenbe' le'e ca zúantu', ne cheę gutípabe' lázrele.

<sup>23</sup> Dxenaba' lau Xradxu Dios, ne lau Xránadxu Jesucristo gunézruje' bi bíchedxu ca' zaj zre'ę na' xel-la dxebeza zri lazre', ne xel-la zri'i lazre', ne xel-la dxeajlí lazre', <sup>24</sup> na' gunę' chawe' xúgute benne' ca' du lazre' zaj nazri'ine' Xránadxu Jesucristo. Ca'an gaca na.

## DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE FILIPOS

*Pablo dxugape' diuzre bi bíchedxu ca' zaj zre'e xezre Filipos*

<sup>1</sup>Neda' Pablo, ne Timoteo nácantu' wen zrin chee Jesucristo. Dxuzúaja' da nigá chee le'e, bi bíchentu', ne chee le'e, dxuxúele bi chee Cristo, ne le'e, zaj xu'u lu na'le bi chee Cristo, ne zrale xezre Filipos. Nabábale chee Dios, ne nácale tuze nen Jesucristo. <sup>2</sup>Dxenábantu' lau Xradxu Dios, ne lau Xránadxu Jesucristo guné' chee le da xrlátaje, ne gunné' le'e xel-la dxebeza zri lazre'.

*Da dxenaba Pablo gun Dios chee bi ca' chee Cristo*

<sup>3</sup>Tu tu lasa dxajsá lazra' le'e dxapa' Dios chia': Xcalenu'. <sup>4</sup>Gate dxuchálajlena' Dios, duté xel-la dxebe dxenábaqueza' bi gun Le' chee xúgutele le'e. <sup>5</sup>Caní dxuna' lawe' da dxundxu zrin tu zren chee dizra' chawe' chee Cristo gate guzú lau núnbe'tu' na bzrinte lu zra na'a zra. <sup>6</sup>Dxuxrén lazra' Dios, Bénnea' guzú lawe' dxuné' tu zrin chawe' lu xichaj lázrdaule le'e, gúnqueze' na ca zrinte zra xelá' Jesucristo. <sup>7</sup>Naca xrlátaje dxéqueda' neda' caní chee xúgutele le'e, lawe' da nazrí'ile'eda' le'e, ne dx-ezidxu tu zren da chawe' ca' dxunna Dios dxi'u. Dxácaté ne xu'a lizre xia nigá, ne gate na' gudíl-laləna' bėnneache ca' dizra', benne' ca' guledábague' dizra' chawe' chee Cristo, ba ble'eda' benne' ca' naca na da li. <sup>8</sup>Dios nézquezene' nazrí'ile'eda' le'e, lu duté xel-la zrí'i lazre' da dxunna Jesucristo neda'. <sup>9</sup>Dxenaba' lau Dios guné' zrí'idxa ljwézrele, ne gápale'eqezele xel-la sina, ne xel-la dxéajni' lu xúgute da dxunle, <sup>10</sup>chee nézele cuele da cháwedxa, chee gácale du lazre', ne quebe bi gata' da gagu na zria chee lu zra na' xelá' Cristo. <sup>11</sup>Caní gaca, da ca' dxunle xululé'e na da xrlátaje da dxun Jesucristo lu xichaj lázrdaule, chee gaca ba lá'ana Dios, ne xegá'ana szrėnqueze'.

*Dxenná Pablo: Che naca bana', Cristo dx-uchínene' neda'*

<sup>12</sup>Le'e, bi bicha'dau', dxaca lazra' nézele ca da ca' guzraca' gulácale na neda' chee bchálaja' dizra' chawe' chee Cristo. <sup>13</sup>Caní

guca, xúgute benne' xra'aga xu'u lawe', ne xezícadxa benne' ca' zaj zre'e xu'u lawe' na' zaj nézene' xu'a lizre xia lawe' da dxuna' zrin chee Cristo. <sup>14</sup>Lawe' da xu'a neda' lizre xia nigá, chaze xúgute bi bíchedxu ca' dxuluxrén lázredxe' Xránadxu, na' dxuluchálaje' du lazre' dizra' chee Dios, ne quebe dxelezrebe'.

<sup>15</sup>Da li bal-la benne' ca' dxuluchálaje' ca naca chee Cristo lawe' da zaj naque' zre'e lazre', ne zaj naque' wil-la dizra'. Xezícadxa benne' caní dxuluchálaje' na duté xel-la li lazre' chee'. <sup>16</sup>Benne' nedxu ca' dxuluchálaje' da naca chee Cristo chee xulucá'ana szren cuine', ne quegá du lazre', lawe' da dxelaca lazre' súadx da guzúa na neda' stebe dxácaté xu'a lizre xia nigá. <sup>17</sup>Xezícadxa benne' ca' dx-elune' na duté xel-la zrí'i lazre' chee', lawe' da zaj nézene' nuzúa cuina' guzėa-jni'ida' benne' ca' dxeledábague' dizra' chawe' chee Cristo. <sup>18</sup>¿Bizra xca'? Ájate-zla dxelune', che dxuluchálaje' du lazre', u quebe dxuluchálaje' du lazre', dxuluchálaje' chee Cristo, na' dxebeda', ne wabéquezda' <sup>19</sup>lawe' da nezda' lu xúgute da caní wedxúaj na chawe' chia' neda', lawe' da dxenábale le'e lau Dios chia' neda', na' gácale Be' Lá'azxa neda', Bénnea' gusel-le' Jesucristo cheedxu. <sup>20</sup>Dxaca lazra', ne dxuxrén lazra' quebe xedué'eda' neda', séqueda' guchálaja' du lazra' chee xelexéle bėnneache zúalexda xel-la szren chee Cristo neda' na'a, ca zúalequeze na neda', che gaca bana', u che gatia'. <sup>21</sup>Chia' neda', che naca bana', Cristo dx-uchínene' neda', ne che gatia' wzrue'eda' da cháwedxa. <sup>22</sup>Che xedxúaj na chawe' chee zrin chee Xránadxu che naca bana', quebe nezda' bila na ca'a. <sup>23</sup>Naca na stebe chia' neda' bila da caní ca'a. Dxaca lazra' gatia' chee cheajsúaləna' Cristo, da gácadxa chawe' chia' neda', <sup>24</sup>san che naca bana' nácadxa chawe' chee le'e. <sup>25</sup>Lawe' da nuxrén lazra' naca caní, nezda' wazúalexda' le'e chee se cháxadxale lu da naca chee Cristo, ne chee béquezdxale. <sup>26</sup>Chee le na' bėdxale lu da naca chee Cristo ne chia' neda' gate súaləna' le'e.

<sup>27</sup>Dxun na ba xen gunle da dxuzėajni'i dizra' chawe' chee Cristo le'e, na' che xeda-jnná'a le'e, u che sua' zitu', wenda' ze cháchale, ne nácale tuze, dxunle tu zren zrin chee Cristo chee xelexálj lazre' bėn-

neache dizra' chawe' chee'. <sup>28</sup> Quebe zrébele benne' ca' dxeledábague' le'e. Ca dxunle gulé'e na le' xelebía xi'e, na' nalale le'e lawe' da bselé Dios le'e. <sup>29</sup> Tu da zrente naca da dxunna Dios le'e gate gunle zrin chee' Cristo, quegaze chéajlele chee', na' cá'anqueze che tele xel-la zi' ne chee' Le'. <sup>30</sup> Le'e dxunle neda' tu zren dxedíl-lalédxu da zaj naca da calela. Blé'eqezle gate nate ca gudíl-lalena' na, na' na'a dxenle ca dxedíl-lalena' na.

## 2

*Xel-la dxexruj lazre', ne xel-la szren chee' Cristo*

<sup>1</sup> Cristo dxutipe' lázrele, na' xel-la zri'i lazre' chee' dxuzúa na le'e lu da ba neza, na' Be' Lá'azxa chee' zúalene' le'e, na' nápaie xel-la zri'i lazre', ne xel-la dxexache lazre' chee'. <sup>2</sup> Chee' le na' le gun ga béle'eda', gaca tuze ca da dxéquele, ne gácale tuze lu xel-la zri'i lazre' chee', ne gunle tuze lu xichaj lázrdaule. <sup>3</sup> Quebe bi gunle chee' xulucá'ana szren bénneache le'e, ne chee' gaca gucá'ana szren cuínale, san duté xel-la dxexruj lazre' chee'le dxal-la' guéquele nácadxa blau le sa' ljwézrele ca le'e. <sup>4</sup> Netule le'e quebe dxal-la' gunle ca da gácalen le'eze. Le gun da gácalen na xezícadxa bénneache.

<sup>5</sup> Dخال-la' si' lu na'le da gaca na chee'le ca ben Jesucristo. <sup>6</sup> Lácala naque' ca nácaqueze Dios, quebe gúquene' dxal-la' gune' ba xuzre xegá'anaqueze' ca Dios. <sup>7</sup> Bzue' chalá'ala da nápaqueze', ne ben cuine' ca tu benne' nada'u, guque' bénneache. <sup>8</sup> Gate ba naque' bénneache, guque' dxexruj lazre', na' bzue' dizra' chee' Dios ca bzrinte gutie', lácala gutie' ca tu benne' wen da calela le'e xaga béguaj. <sup>9</sup> Chee' le na' Dios bca'ana szrénle'e Le', ne bzue' tu Le' da naca szrendxa ca xúgute' la xezícadxa, <sup>10</sup> chee' gace xelenne' La Jesús, na' xuluzú zribe lau Le' xúgute' benne' zaj zre'e xabáa, ne xezr la xu nigá, ne zran xezr la xu nigá, <sup>11</sup> ne chee' xelexechebe xúgute' naca Jesucristo Xránadxu, chee' gaca ba lá'ana Xradxu Dios.

*Bi chee' Cristo zaj nácabé' ca xi' da dxulusení na*

<sup>12</sup> Chee' le na', le'e, bi bicha' nazri'ite lazra', ca na' benle le'e, bzúaquezle dizra' chee' Dios gate na' zúalena' le'e, le guzúadxa

dizra' chee' Dios na'a gate zua' zitu'. Dute xel-la dxexruj lazre', ne duté xel-la dxezrebe le gun zrin chee' zru'é'ele duté ca naca xel-la weselé chee'le, <sup>13</sup> lawe' da dxun Dios zrin lu xichaj lázrdaule chee' sa lázrele gunle da xrlátaje da dxaca lazre' Le', ne chee' séquele gunle na.

<sup>14</sup> Le gun xúgute' da dxunle, ne quebe gáchajele, ne quebe gutil-la dizra' ljwézrele <sup>15</sup> chee' gácale li lazre', ne quebe nu nne chee'le. Gácale bi chee' Dios du lazre' ládujla bénneache zaj naque' benne' dxelún da calela, ne gácale ca belaj ca' dxulusení na lu xezr la xu naga nachul-la na, <sup>16</sup> ne guchálajlele benne' ca' dizra' da nua na xel-la nabán. Che gunle caní, neda' wezaca ba lazra' chee'le gate xelá' Cristo, lawe' da wanezda' quebe ben zi' lazra' dácheze, ne quebe bena' zrin níteze. <sup>17</sup> Béle'eda' lácala gun na ba xen gatia' chee' gaca li lazre' xel-la dxejlí lazre' chee'le lau Dios. Bzua cuínale lu na' Dios ca tu guna' da gúnnale chee', na' chee' le na' béle'eqezda' tu zren nen xúgute'le le'e. <sup>18</sup> Le béquezle le'e, ne le gun tuze neda' lu xel-la dxebe' chia'.

*Ca naca chee' Timoteo, ne Epafrodito*

<sup>19</sup> Che naca da dxaca lazre' Xránadxu Jesús, dxebeza lazra' sél-lazequeza' Timoteo xedajnná'abe' le'e, chee' beda' gate xelabe', ne guzenbe' neda' chee'le le'e. <sup>20</sup> Quebe nu chilá' xetú benne' guéquene' chee'le ca da dxéqueda' neda'. Tuze Timoteo dxe'ebe' gunne xue chee' gaca chawe' chee'le le'e. <sup>21</sup> Xúgute' benne' ca' xezícala zaj dxe'e' gunne xue da zaj naca chee'le, ne quebe zaj dxe'e' gunne xue da naca chee' Jesucristo. <sup>22</sup> Le'e nézquezele ca da xrlátaje dxun Timoteo, ne ca benbe' zrin tu zren nen neda'. Dxuchálajntu' dizra' chawe' chee' Cristo, na' dxunbe' ca dxun tu bi dxácalebe' xrabe'. <sup>23</sup> Caní naca, dxebeza lazra' sel-la'-be' gate nezda' ca gaca chia'. <sup>24</sup> Dxuxrén lazra' Xránadxu, néda'queza' xida' xedajnná'a le'e.

<sup>25</sup> Cá'anqueze dxéqueda' dxun na ba xen sel-la' Epafrodito, bi bíchedxu. Dxunbe' zrin tu zren nen neda', dxedíl-lalentu' da calela. Lé'eqezle gusél-lale bi nigá chee' gácalenbe' neda', ne xu'a lizre xia nigá. <sup>26</sup> Dxezá lázrele'ebe' xedajnná'abe' le'e, ne zúale'ebe' stébe lawe' da nézebe' bénele quebe chawe' guzúabe'. <sup>27</sup> Da li quebe chawe' guzúabe', ne bache gátebe', san

Dios bexache lazre' lebe', ne quegá tuze lebe', cá'unqueze neda' chee quebe xewine lázredxa' ca da dxaca chia' na'a. <sup>28</sup> Chee le na' dxezá lázredxa' sel-la' lebe' chee bele le'e gate xelé'ele lebe', ne chee quebedxa xewine lazra' neda'. <sup>29</sup> Le xezí' lu na'le lebe' dutę xel-la dxebé, ca bi bichele lu da naca chee Xránadxu, ne le gápaqueze ba lá'ana benne' ca' zaj naque' ca lebe', <sup>30</sup> lawe' da guzúa gátebe' dxunbe' zrin chee Cristo. Bzuabe' lu da stebe xel-la nabán cheebe' chee gunbe' zrin chia' da quebe guzéquele le'e gunle.

### 3

*Da naca chawe' da naca na du lazre'*

<sup>1</sup> Na'a, bi bicha', le be lu da naca chee Xránadxu. Quebe naca na zede chia' neda' guzúaja' chee le xecha lasa ca da ba bzúa-jujeza', lawe' da dxun na ba xen guna' da nigá, san tuze da dxuna', dxuzúa' chalá'ala da ba gudé, ne dxun zi' lazra' chee zrué'eda' da za za', <sup>14</sup> chee gusexuzra' guna' zrin da dxuna', chee zrué'eda' da na' bláwizra Dios dxi'u sidxu lu xabáa chee' lawe' da nácadxu bi chee Jesucristo.

<sup>15</sup> Caní dxal-la' guéquedxu dxi'u, ze cháchadxu ca naca da dxeajlí lázredxu. Che quebe dxéquele caní chee bíteteze da caní, Dios guzéajni'ine' le'e ca naca chee na. <sup>16</sup> Tuze ca dxal-la' guéquedxu, ne tuze ca dxal-la' gundxu lu da ca' ba bzrué'edxu.

<sup>17</sup> Le'e, bi bícha'dau', le gun ca dxuna' neda', ne le nna' ca dxelún benne' ca', dxelune' ca da blé'entu' le'e. <sup>18</sup> Zane' lasa ba gucha' le'e, ne na'a dxebézrtea' dxapa' le'e, zrále'e bi bíchedxu dxelune' ca dxelún benne' dxuluzúe' chalá'ala da ben Cristo le'e xaga béguaj. <sup>19</sup> Ca gaca chee benne' ca' lu zra bzebe, xelebía xi'e. Zaj nune' dios chee da dxelé'aj dxelawe', ne dxulucá'ana szren cuine' chee da na' dxal-la' xelapa stu'e. Zaj dxe'e gunne xue da naca chee xezr la xu nigaze. <sup>20</sup> Dxi'u nácadxu benne' zaj nababe' xabáa, ne dxebézadxu zra xelá' benne' weselá cheedxu, Xránadxu Jesucristo, ze'e xabáa. <sup>21</sup> Le' xegüe' bel-la' dxen chegdxu da dxeledé chee na, ne guné' na ca naca bel-la' dxen xabáa chee', guchínene' xel-la waca chee' da nape' chee nna bé'ene' xúgute da zaj zua.

### 4

*Dxal-la' béquezdXu lu da naca chee XránadXu*

<sup>1</sup> Chee le na' le'e, bi nazri'ite lazra', le se chacha lu da naca chee Xránadxu. Le'e, bi bícha'dau' nazri'ite lazra', dxezá lázrele'a

da ble'e Dios neda' xlátaje lawe' da dxeajlí lazra' Cristo, na' Dios dxelé'ene' xlátaje xúgute benne' dxeleajlí lazre' Cristo. <sup>10</sup> Da dxaca lazra' naca na gúnbeadxa' Cristo, ne súa le xel-la waca neda' da bsebán na Le', ne tea' xel-la zi' ca da gudé' Le', ne gudé cuina' lu na' Dios lácala dxal-la' gatia' ca gute Cristo, <sup>11</sup> na' dxebeza lazra' xebana' ládujla benne' gate ca'.

*Pablo dxun zi' lazre' gusexuzre' guné' zrin chee Cristo*

<sup>12</sup> Quebe dxennía' ba bzrué'eda' xúgute da caní, u ba naca' dutę xlátaje, san dxun zi' lazra' chee zrué'eda' da na' bláwizra Jesucristo neda' chee zrué'eda'. <sup>13</sup> Le'e, bi bicha', quebe dxennía' ba bzrué'eda' da nigá, san tuze da dxuna', dxuzúa' chalá'ala da ba gudé, ne dxun zi' lazra' chee zrué'eda' da za za', <sup>14</sup> chee gusexuzra' guna' zrin da dxuna', chee zrué'eda' da na' bláwizra Dios dxi'u sidxu lu xabáa chee' lawe' da nácadxu bi chee Jesucristo.

<sup>15</sup> Caní dxal-la' guéquedxu dxi'u, ze cháchadxu ca naca da dxeajlí lázredxu. Che quebe dxéquele caní chee bíteteze da caní, Dios guzéajni'ine' le'e ca naca chee na. <sup>16</sup> Tuze ca dxal-la' guéquedxu, ne tuze ca dxal-la' gundxu lu da ca' ba bzrué'edxu.

<sup>17</sup> Le'e, bi bícha'dau', le gun ca dxuna' neda', ne le nna' ca dxelún benne' ca', dxelune' ca da blé'entu' le'e. <sup>18</sup> Zane' lasa ba gucha' le'e, ne na'a dxebézrtea' dxapa' le'e, zrále'e bi bíchedxu dxelune' ca dxelún benne' dxuluzúe' chalá'ala da ben Cristo le'e xaga béguaj. <sup>19</sup> Ca gaca chee benne' ca' lu zra bzebe, xelebía xi'e. Zaj nune' dios chee da dxelé'aj dxelawe', ne dxulucá'ana szren cuine' chee da na' dxal-la' xelapa stu'e. Zaj dxe'e gunne xue da naca chee xezr la xu nigaze. <sup>20</sup> Dxi'u nácadxu benne' zaj nababe' xabáa, ne dxebézadxu zra xelá' benne' weselá cheedxu, Xránadxu Jesucristo, ze'e xabáa. <sup>21</sup> Le' xegüe' bel-la' dxen chegdxu da dxeledé chee na, ne guné' na ca naca bel-la' dxen xabáa chee', guchínene' xel-la waca chee' da nape' chee nna bé'ene' xúgute da zaj zua.

le'eda' le'e, lawe' da dxebeda' ca nácale le'e, na' lawe' da bena' neda' nácale bi chee Cristo dxal-la' si'a tu da gunna Dios neda'.

<sup>2</sup> Dxata' xueda' Evodia, ne Síntique xe-laque' tuze, lawe' da zaj naque' bila ne chee Xránadxu. <sup>3</sup> Na'a lue', bi ljwezra' li lazre', dxata' xueda' lue' gácalenu' nu'ula zandxu caní, nu'ula belúnle' neda' zrin chee dizra' chawe' chee Cristo. Belune' zrin na' tu zren nen Clemente, ne xezicadxá benne' ca' belúnle' neda' zrin. La benne' caní zaj naxúaj na lu xiche chee xel-la nabán zeajlí canna.

<sup>4</sup> Le béqueze lu da naca chee Xránadxu. Xecha lasa dxennía': Le be. <sup>5</sup> Dxaca lazra' xeleque be'e xúgute' bènneache nácale zren lazre'. Ba zua bagu zra xelá' Xránadxu.

<sup>6</sup> Quebe bi cuele gunne xue, san le guchálajlequeze Dios ca naca chee da ca'. Le naba na lau Dios, na' le xe'e; Xcalenu'. <sup>7</sup> Nadxa gunna Dios le'e xel-la dxebeza zri lazre', da naca na szrendxa ca da seque' gúnbea bènneache, na' guzúa chuchu na xichaj lázrdaule ne chee Jesucristo.

*Le gulaba lazre' ca naca da xrlátaje*

<sup>8</sup> Na'a, bi bicha', le gulaba lazre' ca naca xúgute' da zaj naca li, ne xúgute' da zaj napa na ba lá'ana, ne xúgute' da zaj naca na li lazre', ne xúgute' da zaj naca na du lazre', ne xúgute' da dxezaca ba lazre' Dios, ne xúgute' da dxulucá'ana na bènneache xrlátaje.

Che zua tu da naca xrlátaje, u da dxal-la' gucá'ana szrendxu, le gulaba lazre' da caní.

<sup>9</sup> Le gun ca naca da bsédeda' le'e, ne da bzéajni'ida' le'e, ne da bzenda' le'e, ne da ble'eda' le'e, na' súale Dios le'e, Bénnea' dxunne' dxi'u xel-la dxebeza zri lazre'.

*Da gulesel-la benne' Filipos ca' chee Pablo*

<sup>10</sup> Dxebéle'eda' ne chee Xránadxu, lawe' da dxajsá lázrele neda'. Quebe dxennía' ba gul-la lázrele neda', san quebe guta' lataj gácalele neda'. <sup>11</sup> Quebe dxennía' da nigá lawe' da bi dxexájrjeda', lawe' da ba bséde Xránadxu neda' sua' xel-la dxebé ájateze dxaca chia'. <sup>12</sup> Ba gudéa' xel-la xache', ne cá'anqueze xel-la gunní'a. Nazédia' dxuchaga lawa' xúgute' da dxaca chia', che néljada', u che dxeduna', che nápalé'a, u che quebe bi napa'. <sup>13</sup> Xúgute' wazéqueda' guchaga lawa' lawe' da dxuzé tipa Cristo

neda'. <sup>14</sup> Benle da xrlátaje, gúcalele neda' ne chee da gusél-lale chia'.

<sup>15</sup> Ba nézquezle le'e, benne' Filipos, ca guca gate guzú lawa' dxuchálaja' dizra' chawe' chee Cristo nigá. Gate bezá'a xezre ca' zaj nababa xezr la xu Macedonia, le'eze gusél-lale chia' dumí chee da guzi' lu na'le. <sup>16</sup> Gate guzúa' xezre Tesalónica, chupa chunna lasa gusél-lale dumí chia' chee quebe bi xázrjeda'. <sup>17</sup> Quebe dxennía' da nigá lawe' da dxaca lazra' bi gúnnale chia', san dxaca lazra' gácadxa da ba neza chee le'e lau Dios. <sup>18</sup> Ba guzi'a xúgute' da gusél-lale, na' dele'e chia'. Ca naca da gusélal-le chia' lu na' Epafrodito, da zrendxa guca na ca da bexájrjeda'. Da na' gusél-lale naca na ca tu guna' da dxelá zixre na lau Dios, u tu da bzúale lau Dios da dxezaca ba lazre'. <sup>19</sup> Dios chia' gunne' le'e xúgute' da dxexájrjele, chee xel-la gunní'a chee xabáa chee ne chee Jesucristo. <sup>20</sup> Gaca ba Xradxu Dios chadía chacanna. ¡Ca'an gaca na!

*Pablo dxuzé dizra' benne' Filipos ca'*

<sup>21</sup> Waláz chia' neda' le gugapa diuzre lu La Jesucristo xúgute' benne' zaj nababe' chee Dios. Bi bíchedxu ca' zaj zúale neda' dxulugape' le'e diuzre. <sup>22</sup> Xúgute' bi bíchedxu zaj zre'e nigá, benne' zaj nababe' chee Dios, ne bi bíchedxu zaj zre'e lizre bènnea' dxenná bé'ene' xezr la xu Roma, dxulugape' le'e diuzre.

<sup>23</sup> Dxenaba' lau Xránadxu Jesucristo gunne' da chawe' chee xúgutele le'e. Ca'an gaca na.

## DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE COLOSAS

*Pablo dxugape' diuzre bi bíchedxu zaj zre'e xezre Colosas*

<sup>1</sup> Neda', Pablo, naca' gubáz chee Jesucristo lawe' da naca da dxaca lazre Dios, na' zúalé bi bíchedxu Timoteo neda'. <sup>2</sup> Dxuzúaja' da nigá chee le'e zrle xezre Colosas, ne nabáale chee Dios, ne dxeajlí lázrele Cristo. Dxenaba' Xradxu Dios guné' da chawe' chee le'e, ne gunné' le'e xel-la dxebeza zri lazre'.

*Da dxenaba Pablo lau Dios chee bi bíchedxu ca'*

<sup>3</sup> Dxéquezentu' Dios, Xra Xránadxu Jesucristo: Xcalenu' ca naca chee gate dxuchálajlentu' Le'. <sup>4</sup> Ba bémentu' ca dxeajlí lázrele Cristo, ne ca nazrí'ile xúgute bi ca' chee Dios. <sup>5</sup> Caní dxunle lawe' da dxebeza lázrele da nucueza Dios chee xabáa, na' guzú laule dxunle ca naca da nigá gate guzile dizra' chawe' da naca na da li. <sup>6</sup> Dizra' chawe' nigá bla na ládujla le'e ca bla na duté xezr la xu nigá, na' dxezriluj na, ne dxun na zrin duté xezr la xu ca dxun na ládujla le'e, gate béntele ca nazrí'i Dios béneache, ne gunézele naca na da li. <sup>7</sup> Da nigá ble'e Epafras le'e. Naque' bi bíchedxu nazrí'i lázredxu, ne ba bénqueze' zrin nen netu', ne naque' chee le'e tu benne' wen zrin li lazre' chee Cristo. <sup>8</sup> Epafras nigá bzenne' netu' ca dxaca chee le'e, ne ca nazrí'i ljwézrele ne chee Be' Lá'azxa.

<sup>9</sup> Chee le' na', zra gunézentu' da nigá, dxuchálajlêquezentu' Dios chee le'e, ne dxenábantu' Le' guzéajni'ine' le'e ca naca da dxaca lazre', ne gunné' le'e duté xel-la sina, ne duté xel-la dxéajni'i da dxunna Be' Lá'azxa dxi'u. <sup>10</sup> Caní dxenábantu' Le' chee gaca gunle ca dxal-la' xelún bi ca' chee Xránadxu, ne gunle ca da dxezaca ba lazre' Le', gunle xúgute da naca da xrlátaje, ne gúnbeadxaquezle Dios. <sup>11</sup> Dxenábantu' Le' guzúa chache' le'e lu xel-la waca da naca chee xel-la szren chee' chee séquele guchaga laule xúgute da dxaca chee lu duté xel-la zren lazre' chee, ne duté xel-la dxebé. <sup>12</sup> Dخال-la' xe le Dios: Xcalenu', lawe' da bzua Dios dxi'u chee sidxu da

nucueze' cheedxu, chee súadxu lu xel-la naxaní' chee', lawe' da nácadxu bi chee Le'. <sup>13</sup> Dios bselé' dxi'u lu xel-la dxenná bea chee da chul-la, na' bzue' dxi'u naga dxenná bea Zrí'ine' nazrí'ite lazre'. <sup>14</sup> Zrí'ine' nácaqueze' Bénnea' bselé' dxi'u gate gutie' waláz cheedxu, chee bnite lau Dios dul-la gubáadxu.

*Bexácadxu tuze nen Dios lawe' da gute Cristo*

<sup>15</sup> Ca naca Jesús, dxulé'e na dxi'u ca nácaqueze Dios, Bénnea' quebe gaca lé'edxu, ne naque' chee Dios ca tu bi nedxu chee béneache, bi nácadxabe' blau ca xúgute da ben Dios. <sup>16</sup> Ne chee Le' ben Dios xúgute da zaj zua xabáa, ne da zaj zua xezr la xu nigá, da ca' dxelé'edxu, ne da ca' quebe gaca lé'edxu, che zaj naca na be' ca' zaj naca na blau, u be' ca' dxelenná bea na, u be' ca' zaj napa na xel-la szren, u be' ca' zaj napa na xel-la waca, xúgute na ben Dios ne chee Le', na' chee Le' zaj naca na. <sup>17</sup> Cristo ba zúaqueze' nédxute ca xúgute da zaj zua, na' ne chee Le' xúgute da ca' dxelún na ca zaj naca chee na. <sup>18</sup> Xúgute benne' zaj naque' bi chee Cristo zaj naque' ca tuze bel-la' dxen, na' Crístoqueze naque' xichaj bel-la' dxen na' da nácadxu. Le' bzue' bel-la' dxen na', ne Le' naque' Benne' bebán nédxute ládujla benne' gate ca' chee gaque' Benne' blau lu xúgute da zaj zua. <sup>19</sup> Caní naca na lawe' da guca lazre' Dios súale Cristo duté da nácaqueze Dios. <sup>20</sup> Cá'anqueze guca lazre' Dios ne chee Cristo xexuné' tuze nen Le' xúgute da zaj zua, ca da zaj zua na lu xezr la xu, ne da zaj zua na xabáa. Bexuné' dxi'u tuze nen Le' ne chee xel-la gute chee Cristo le'e xaga béguaj.

<sup>21</sup> Nédxute le'e gúcale ca benne' zitu' lau Dios, ne bzá'ale Dios lu xichaj lázrdaule, ne benle xúgute da calela, san na'a Dios ba bexuné' le'e tuze nen Le', <sup>22</sup> ne chee da ben Cristo gate gutie' le'e xaga béguaj lu bel-la' dxen chee'. Da nigá ben Le' chee gaca guzúe' le'e lau Le', gácale benne' lá'azxa, ne du lazre', ne quebe bi nabácale da calela. <sup>23</sup> Chee gaca caní dxal-la' se cháchale, ne sua típale ca dxeajlí lázrele Cristo, ne quebe gusanle ca da dxebeza lázrele, da na' nápale lawe' da dxéajlele dizra' chawe' chee Cristo. Dizra' chawe' nigá nene na duté xezr la xu, na' nuzúa Dios neda', Pablo, benne' wen



zrin chee', chee guchálaja' dizra' chawe' nigá.

*Zrin dxun Pablo chee bi ca' chee Cristo*

<sup>24</sup>Na'a dxebeda' lu xel-la zi' da dxedéa' ne chee le'e, lawe' da dxuzá lawa' lu bel-la' dxen chia' ca da dxezaca Cristo ne chee bi chee' ca', benne' ca' zaj naque' ca bel-la' dxen cheéqueze'. <sup>25</sup>Bzua Cristo neda' ca benne' wen zrin chee bi chee' ca', ne chee da bláwizra Dios neda' guna', gácalena' le'e, na' guchálaja' dútequeze da naca dizra' chee Dios, <sup>26</sup>ne chee guzéajni'ida' bèneache ca da nagache, da na' nagache nédxute, san na'a Dios ba blé'ene' bi chee' ca' ca naca na. <sup>27</sup>Guca lazre' Dios gulé'ene' benne' ca' ca naca xel-la gunni'a zren chee da na' nagache nédxute, da gunézruje' benne' ca' quebe zaj naque' judío. Da na' nagache nédxute naca na caní: Cristo zue' xichaj lázrdaule, na' chee le na' dxebeza lázredxu síadxu xabáa chee'.

<sup>28</sup>Netu' dxuchálajntu' ca naca chee Cristo. Dxuzéajni'intu' xúgute bèneache, ne dxusédentu' xúgute', chee xeleajni'i xánne' chee xelaca xúgute bèneache du lazre' lau Dios ne chee Jesucristo. <sup>29</sup>Chee gaca caní dxuna' neda' zrin, dxuchíneda' duté xel-la waca chee Cristo, da dxun na zrin lu xichaj lázrdawa'.

## 2

<sup>1</sup>Dxaca lazra' nézele le'e dxúnle'a zrin, dxe'a gunne xue len Dios da naca chee le'e, ne da naca chee bi bíchedxu ca' ca' zaj zre'e Laodicea, ne da naca chee xúgute bi bíchedxu ca' quebe ne xeelé'ene' neda' caníqueze. <sup>2</sup>Dxaca lazra' xeledipa lazre', ne xelaque' tuze lu xel-la zri'i lazre', ne xelaque' benne' gunni'a lu xichaj lázrdawe', chee xelúnbe'e da nagache chee Xradxu Dios da nácaqueze Cristo. <sup>3</sup>Lu na' Le' zaj de ca naca xel-la gunni'a chee xel-la sina, ne xel-la dxéajni'i. <sup>4</sup>Dxapa' le'e da nigá chee quebe xelezí xé le'e benne' ca' zaj neze xrgúe' ca dxuluchálaje'. <sup>5</sup>Lácala quebe zúaletea' le'e caníqueze, naca na cáteze zúalena' le'e lu be' nácaqueza', na' dxebéle'eda' dxenda' dxunle da xlátaje, ne ze cháchale ca dxeajlí lázrele Cristo.

<sup>6</sup>Chee le na', ca benle, guzi' lu na'le Xránadxu Jesucristo, cá'anqueze dxal-la' gunle súalele Le'. <sup>7</sup>Dxal-la' gácale ca tu xaga da dxudé lue na síujla lu da naca chee Cristo. Cá'anqueze dxal-la' gácale ca

tu xu'u da dxe' lane lu da naca chee' Le', chee se cháchale ca dxeajlí lázrele Le', ca blé'entu' le'e, na' dxál-la'queze xe le Dios: Xcalenu'.

*Xel-la nabán cube da dxunna Cristo dxi'u*

<sup>8</sup>Le guxúe cuínale. Quebe güele lataj xelezí xé benne' ca' le'e, xuluchínene' xel-la sina chee bèneache, ne dizra' calela, ca naca da dxulusédequeze bèneache, ne ca zaj naca da ca' dxácaqueze lu xezr la xu nigá, ne quegá ca naca chee Cristo.

<sup>9</sup>Duté ca naca Dios nácaqueze Cristo.

<sup>10</sup>Nápale le'e xúgute da naca chee'

lawe' da nácaqueze bel-la' dxen chee Le'. Le' dxenná be'ene' xúgute be' da dxeleenná bea na,

ne xúgute be' da zaj napa na xel-la waca.

<sup>11</sup>Cá'anqueze, lawe' da nácale tuze nen Cristo nácale bi chee Dios. Quebe guca chee ca da na' belúnqueze benne' judío ca', gulechugue' late' bel-la' dxen chee bi biu chee' ca', da na' dxulé'e na zaj ná-cabe' chee Dios. Bedúa duté da naca chee bela' dxen chee da naca sban, da guca na ne chee da ben Cristo lu xichaj lázrdaule. Bene' nácale bi chee Dios. <sup>12</sup>Gate gudxúale nisa guca chee ca guca chee Cristo gate bgache' lu xedxu ba, na' cá'anqueze guca chee ca guca chee Le' gate bebane' lá-dujla benne' gate. Caní guca chee lawe' da guxeajlí lázrele xel-la waca chee Dios, Béneea' bsebane' Cristo ládujla benne' gate ca'. <sup>13</sup>Gate nate gücale le'e ca benne' gate lu dul-la da gubágale, ne lu bela' dxen sban chee da quebe ne xedúa na. Na'a Dios ba nunne' le'e xel-la nabán tu zren nen Cristo, ne ba bnite lawe' xúgute dul-la da gubágale. <sup>14</sup>Dios bzria xi'e ca naca da nabágadxu chee xúgute da nadxixruj bea na da gula da buluzría xi na dxi'u. Bebéaje' na chalá'ala, ne bde'e na le'e xaga béguaj ca tu da gubaga' Cristo. <sup>15</sup>Gate gute Cristo le'e xaga béguaj begüe' ca naca xel-la dxenná bea, ne xel-la waca chee be' xriwe' ca', na' blé'ene' da ca' lávela gubáz chee xabáa ca' lawe' da gunná be'ene' na.

*Le sa lazre' da ca' zaj de na xabáa*

<sup>16</sup>Chee le na', quebe nu dxal-la' si tizra' le'e ca naca da dxe'aj da dxágule, ne ca zaj naca zra laní, ne ca naca laní chee beu' dxe'ene, ne ca zaj naca zra dxupá'anale. <sup>17</sup>Xúgute da caní zaj naca na ca tu zrúl-laze chee da zaj zéaje da ca'. <sup>18</sup>Quebe güele

lataj nu cua da nucueza Dios chee le'e, ne chee da dxululé'e benne' ca', benne' dxeléquene' zaj naque' dxexruj lazre' lawe' da dxulucá'ana szrené' gubáz chee xabáa ca', ne dxuluchálaje' chee da quebe ne xelelé'ene', ne dxulucá'ana szren cuine' ca naca xel-la sina chee bénneacheze da zaj nape'. <sup>19</sup> Quebe zaj de'e Cristo, Bénnea' naque' xichaj bel-la' dxen da nácadxu dxi'u, na' Le' dxusegule' duté bel-la' dxen na', ne dxugawe' na, ne dxuné' na tuze du ca naca na, chee gaca na ca dxaca lazre' Dios.

<sup>20</sup> Naca chee ca naca chee tu benne' ba nate lawe' da nácale bel-la' dxen chee Cristo, chee québedxa gunle ca zaj naca da ca' dxácaqueze lu xezr la xu nigá. Na'a, ħbizr chee na' dxedale ca benne' ne zaj nácaqueze' chee xezr la xu nigá, ne dxunle ca da dxelenná bea bénneache. <sup>21</sup> Dxelenné': Quebe guchínenu' da nigá. Quebe gagu' da ca'. Quebe chajtáu' da na'. <sup>22</sup> Xúgute da nadxiruj bea caní dxuluchalaj na chee da ca' dxeledé chee na gate dxuchínedxu na, ne zaj nácaze na da dxelenná bea bénneache, ne da dxulusede bénneache. <sup>23</sup> Da li dxeleque bénneache zaj naca na sina da nadxiruj bea caní, lawe' da dxulusede na bénneache xelúe lá'ane' Dios, ne xelaque' dxexruj lazre', ne xelenná be'ene' bel-la' dxen chee'. Quebe bi culuén zaj napa na chee xelenná be'e na xel-la dxezá lazre' sban ca' chee bénneache.

### 3

<sup>1</sup> Le'e nácale ca benne' ba belexebán tu zren nen Cristo. Chee le na' le sa lazre' da zaj zua xabáa, naga dxe' Cristo chalá'a xabéla chee Dios. <sup>2</sup> Le gulaba lazre' chee da zaj de xabáa, quegá chee da zaj de lu xezr la xu. <sup>3</sup> Nácale ca benne' ba zaj nate, na' xel-la nabán chee nuzúa chawe' Dios naga zua Cristo. <sup>4</sup> Cristo nácaqueze xel-la nabán cheedxu, na' gate xelá' Le', cá'anqueze le'e gunle tu zren Le' lu xel-la szren chee'.

*Xel-la nabán gula ne xel-la nabán cube*

<sup>5</sup> Chee le na', le xebéaj ca tu da nate xúgute da zaj zua lu xichaj lázrdaule da zaj naca na chee xezr la xu nigá, ca naca xel-la dxichaj na xrba chee xel-la nuchaga na', ne da sban, ne xel-la dxezá lazre' da sban ne da calela ca', ne xel-la dxucude', lawe' da naca da dxucude bénneache ca dios cheequeze'. <sup>6</sup> Xúgute da caní dxelín

benne' quebe dxuluzúe' dizra' chee Dios, na' chee le na' gudé Dios benne' ca' lu da ba xa'. <sup>7</sup> Cá'anqueze le'e benle xúgute da caní gate nate. <sup>8</sup> Na'a, québedxa gunle xúgute da caní:

Xel-la dxezrá'a, ne xel-la xichaj zra'a, ne xel-la dxeuide ljwezre.

Québedxa nnele dizra' schanni'.

Québedxa gucháchale ljwezrele.

<sup>9</sup> Quebe si xe ljwezrele tule xetule, lawe' da ba bzúale chalá'ala da gúcale nédxute, ne ca naca da benle. <sup>10</sup> Nácale ca benne' cube, lawe' da dxuxucube Dios le'e chee gácale ca nácaqueze Dios, Bénnea' bene' le'e, ca zrindxa gúnbea xánnele Le'. <sup>11</sup> Lau Dios québedxa bi zaca che nácadxu benne' griego, che benne' judío, u che nácadxu benne' zaj nadxugu lu bel-la' dxen chee' da dxulé'e na zaj nababe' chee Dios, che benne' quebe zaj nape' da na' dxulé'e na, u che nácadxu benne' zitu', che benne' ca' zaj zre'e xi'a xegu ca', u che nácadxu benne' zaj nada'u, che benne' quebe zaj nada'u. Da zaca na naca na che naca Cristo benne' xíchajdxu, ne che zue' lu xichaj lázrdaudxu.

<sup>12</sup> Dios nazri'ine' le'e, ne guqu'é le'e chee gácale bi chee' ca'. Chee le na' le gaca:

Benne' dhexache lazre', ne benne' zri'i lazre',

ne benne' dxexruj lazre', ne benne' chawe' lazre',

ne benne' zren lazre'.

<sup>13</sup> Le gácale ljwezrele tule xetule, ne le gunite lau chee tule xetule, che núlale dxezrá'a ljwezrele.

Ca ben Cristo, bnite lawe' chee, cá'anqueze le gun le'e chee ljwezrele.

<sup>14</sup> Da dxundxa na ba xen, le zri'i ljwezrele lawe' da naca xel-la zri'i lazre' da dxun na dxi'u tuze, ne li lazre'. <sup>15</sup> Xel-la dxebeza zri lazre' da dxunna Dios dxi'u dxal-la' nna bea na lu xichaj lázrdaudxu, lawe' da bláwizra Dios le'e chee súale lu xel-la dxebeza zri lazre' chee', ne gácale ca tuze bel-la' dxen. Cá'anqueze dxal-la' xele Dios: Xcalenu'.

<sup>16</sup> Dizra' chee Cristo dxal-la' guzúa xánnele lu xichaj lázrdaule chee séquele guzéajni'ile, ne guszre ljwezrele nen duté xel-la sina chee Dios. Lu duté xel-la dxezaca ba lazre' le gul-la lau Dios salmo ca', ne da dxue lá'anale Dios, ne da ca' dxuzúa Be' Lá'azxa xichaj lázrdaule. <sup>17</sup> Bíteteze da gunle, u da nmale, le gun xúgute na lu

La Xránadxu Jesús, ne xeje Xradxu Dios: Xcalenu', ne chee Le'.

Ca dxal-la' xelún benne' ca' zaj naque' bi chee Cristo

<sup>18</sup>Le'e, nu'ula, le guzúa dizra' chee benne' chee chee, lawe' da naca na da dxal-la' xelún benne' dxeajlí lazre' Xránadxu.

<sup>19</sup>Le'e, benne' biu, le zri'i zrú'ulale, ne quebe xexitaj lázrele le'.

<sup>20</sup>Le'e, bi cuide', le guzúa dizra' chee xra xrnale lu xúgute da dxelenné', chee gunle da dxezaca ba lazre' Xránadxu.

<sup>21</sup>Le'e, xruze xrna', quebe tételale xel-la snia nen zrí'inele, chee quebe xelate ni'a na'be'.

<sup>22</sup>Le'e, benne' zaj nada'u, le guzúa dizra' xúgute da xelenná xránale lu xezr la xu nigá, quegaze gate dxelenná'tee', chee xeléquene' le'e xrlátaje, san le gun da ca' du lázrele, ne le zrebe Dios. <sup>23</sup>Bítezeze da gunle, le gun na du lázrele, ca nu benne' dxune' zrin chee Xránadxu, ne quegá zrin chee beniácheze. <sup>24</sup>Lácala dxunle zrin nigá chee bénneache, nézele gunna Xránadxu lazruj chee da dxal-la' sile lu zra na', lawe' da dxunle zrin chee Cristo, Bénnea' nácaqueze' Xránale. <sup>25</sup>Nu benne' dxune' da calēla, wazi'e lazruj chee da calēla nune' lawe' da quebe dxuchá Dios ca da dxune' chee tu xetú benne'.

#### 4

<sup>1</sup>Le'e, benne' nácale xrane bénneache, dxal-la' gácale xlátaje, ne li lazre' ca dxuchínele benne' ca' ná'ule. Le gusá lázrele, cá'anqueze le'e, zua Xránale xabáa.

<sup>2</sup>Le'e, bi bícha'dau', le guchálajlequeze Dios, súale ban lazre', ne xeje Dios: Xcalenu'. <sup>3</sup>Cá'anqueze, le naba lau Dios waláz cheentu', chee gácale Xránadxu netu' chee séquentu' guchálajntu' xrtizre', ne guzėjni'intu' bénneache ca naca da nagache ca naca chee Cristo. Lawe' da dxuna' da caní ne xu'a lizre xia nigá. <sup>4</sup>Le naba lau Dios chee séqueda' guzėjni'i xánnea' bénneache ca dxal-la' guna'.

<sup>5</sup>Le gaca sina ca dxunle chee benne' ca' quebe dxeajlí lazre' Cristo, guchine xánnele zra ca' dxunna Dios le'e. <sup>6</sup>Dizra' dxuchálajle dxal-la' gaca na xrlátaje, ne da xelexezaca ba lazre' bénneache, na' dxal-la' nézele ca xechébele chee tu tu benne' ca' gate bi dxelenábene' le'e.

*Dxulugapa diuzre bi bíchedxu ca' ljwezre'*

<sup>7</sup>Tíquico, bi bíchedxu nazrí'i lázredxu guzenbe' le'e ca naca da dxaca chia'. Ná-cabe' tu bi li lazre' dxácalēnbe' neda', ne dxunbe' zrin chee Xránadxu tu zren nen neda'. <sup>8</sup>Chee le na', dxusel-la'-be' naga zúale, chee guzenbe' le'e ca dxaca cheentu', ne chee gutipabe' lázrele. <sup>9</sup>Cá'anqueze zéajle Onésimo lebe', naque' bíchedxu li lazre', benne' nazrí'i lázredxu, ne naque' benne' walázr cheele. Benne' caní xuluzenne' le'e ca naca da dxaca nigá.

<sup>10</sup>Aristarco, benne' xú'ulēne' neda' lizre xia, dxugape' le'e diuzre, ne cá'anqueze dxun Marcos, bi xrtia Bernabé. Ba bzéajni'ida' le'e ca dxun Marcos. Che waza'be' xedajnná'abe' le'e, le si' lu na'le lebe' cháwe'dau'. <sup>11</sup>Cá'anqueze bénnea' le' Jesús dxugape' le'e diuzre, bénnea' léqueze' Justo. Benne' zan benne' judío dxeajlí lazre' Cristo, san benne' canize ládujla benne' judío ca' dxelune' zrin tu zren nen neda', na' dxuzénentu' bénneache ca xezelequene' xelu'e naga dxenná bea Dios, na' dxuluzé' neda' tu lu da ba neza zrente. <sup>12</sup>Dxugapa Epafras le'e diuzre. Naque' wen zrin chee Cristo, ne benne' walázr cheequeze. Dxenábaqueze' lau Dios chee le'e chee se cháchale, ne guzúa cuínale du lázrele chee gunle da dxaca lazre' Dios. <sup>13</sup>Neda' dxexechēba' chee Epafras, dxe'e gunne xue chee le'e, ne chee bi bíchedxu zaj zre'e xezre Laodicea, ne xezre Hierápolis. <sup>14</sup>Dxugapa le'e diuzre Lucas, bénnea' dxexune' benne' we' ca', ne naque' benne' nazrí'i lazra'. Cá'anqueze dxugapa Demas le'e diuzre.

<sup>15</sup>Le gugapa diuzre bi bíchedxu zaj zre'e xezre Laodicea. Cá'anqueze le gugapa diuzre Ninfas, ne bi bíchedxu ca' dx-elezzrague' lizre'. <sup>16</sup>Ca te gulábele le'e xiche nigá, le sel-la na chee xululaba bi bíchedxu ca' zaj zre'e Laodicea na. Cá'anqueze le gulaba le'e xiche da ze za na Laodicea. <sup>17</sup>Le xe Arquivo da nigá: Bxue xanne' gunu' cháwe'dau' ca naca zrin chee Xránadxu da bzu'e lu na'u.

<sup>18</sup>Neda' Pablo dxuzúaja' da nigá nen ná'aqueza'. Dxugapa' le'e diuzre. Le gusá lázrele xu'a lizre xia. Dxenaba' lau Dios guné' chee da chawe'. ¡Ca'an gaca na!

**DIZRA' NEDXU BZUAJ SAN  
PABLO CHEE BI CHEE  
CRISTO ZAJ ZRE'E XEZRE  
TESALÓNICA**

*Pablo dxugape' diuzre bi bíchedxu ca'*

<sup>1</sup>Neda', Pablo, ne Silvano, ne Timoteo dxugápantu' le'e diuzre. Dxuzúaja' da nigá cheele le'e, bi bicha', nazrágale chee Cristo lu xezre Tesalónica, ne nabábale chee Xradxu Dios, ne chee Xránadxu Jesucristo. Dxenaba' lau Xradxu Dios ne lau Xránadxu Jesucristo gunë' cheele da xrlátaje, ne gunne' le'e xel-la dxebeza zri lazre'.

*Ca dxelejil' lazre' benne' Tesalónica Cristo*

<sup>2</sup>Dxequezentu' Dios xcalenu' ca naca chee xúgutele le'e, ne dxenábantu' gaca da chawe' cheele le'e gate dxuchálajentu' Le'. <sup>3</sup>Lau Xradxu Dios dxeajsá lázrentu' ca benle zrin dutë lu xel-la dxeajil' lazre' cheele, ne ca benle zrin chee Cristo lu dutë xel-la zri'i lazre' cheele, ne ca zë cháchale ca dxebeza lázrele súalele Xránadxu Jesucristo. <sup>4</sup>Le'e, bi bicha', Dios nazri'ine' le'e, na' nézentu' gucá'a Le' le'e. <sup>5</sup>Gate bchá-lajntu' dizra' chawe' chee Cristo naga zúale, quebe bentu' na nen dízra'ze, san nen dutë xel-la waca chee Be' Lá'azxa bchá-lajntu', ne lu dutë xel-la dxuxrën lazre' cheentu'. Nézquezle ca bentu' zrin nigá ládujla le'e lawe' da nazrí'ile'entu' le'e.

<sup>6</sup>Le'e bénquezle ca bentu' netu', ne ca ben Xránadxu, na' guzile dizra' na' lu dutë xel-la dxebé cheele da benna Be' Lá'azxa le'e, lácala gudéle'ele xel-la zi'. <sup>7</sup>Caní guca, nácale tu da dxulé'e na ca dxal-la' xelaca xúgute benne' dxelejil' lazre' Cristo naga nababa Macedonia, ne naga nababa Acaya. <sup>8</sup>Caní guca, bzenle le'e benne' ca' dízra' chee Xránadxu. Na'a quegá tuze benne' zaj zre'e Macedonia, ne Acaya, san cá'anqueze benne' ca' zaj zre'e xúgute xezre zaj nézene' ca dxeajil' lázrele Dios, na' québedxa dxun na ba xen guzëntu' le'. <sup>9</sup>Benne' caníqueze dxuluchálaje' ca guca gate bedajnná'antu' le'e ne ca guz' lu na'le netu', ne ca bsanle bedau' xiaj xaga ca' chee bábale chee Dios, na' guzú laule dxunle zrin chee Dios ban, Benne' li. <sup>10</sup>Cá'anqueze

dxuluchálaje' ca dxebézale zra xelá' Jesús, zë'e xabáa. Le' naque' Zri'ine Dios, na' Dios bsebanë' Le' ládujla benne' gate ca'. Léqueze' guselé' dxi'u lu da ba xa' zrentë da za za' da sel-la Dios lu dutë xel-la dxezrá'a chee'.

**2**

*Zrin ben Pablo lu xezre Tesalónica*

<sup>1</sup>Le'e, bi bicha', ba nézquezle le'e da bentu' gate na' bedajnná'antu' le'e quebe guca na zrin nite. <sup>2</sup>Nézquezle ca belún benne' zaj zre'e xezre Filipos, bulucháchalëne' netu', ne buluzaljë' netu' gate na' za xedajnná'antu' le'e, na' Dios bexru chachë' netu' chee bchá-lajntu' dizra' chawe' chee Cristo naga zúale, lácala buluzaga benne' zan netu'. <sup>3</sup>Quebe guque zréajentu' ca bchá-lajntu', ne quegá bi da calela guca lázrentu' guntu', ne quegá guca lázrentu' si xentu' le'e. <sup>4</sup>Dxuchálajquezentu' ca dxaca lazre' Dios lawe' da bxren lazre' netu', ne bsebage' netu' guchálajntu' dizra' chawe' chee Cristo. Caní dxuchálajntu', quegá chee xelexezaca ba lazre' bénneache san chee xezaca ba lazre' Dios, Bénnea' dxenná'tëe da zua xichaj lázrdaudxu. <sup>5</sup>Nézquezle le'e cabata' ne xentu' le'e dízra' gúladau' da gucá'ana szren na le'e, ne quegá bi gunnantu' chee bi gúnnale netu'. Dios nézquezene' naca na da li. <sup>6</sup>Cabata' ne gaca lázrentu' xelapa bénneache netu' ba lá'ana, le'e u benne' xula, lácala wazéquentu' nna bé'entu' le'e bi gúnnale netu' lawe' da nácantu' gubáz chee Cristo. <sup>7</sup>Bentu' le'e xrtandau' ca dxun tu nu'ula dxusegule' zrí'ine'. <sup>8</sup>Nazrí'ile'entu' le'e, la guzréntu' gúnnatëntu' le'e, quegaze dízra' chee Dios, san cá'anqueze xel-la nabán cheentu'. Caní nazrí'ile'entu' le'e. <sup>9</sup>Le'e, bi bicha', nézquezle ca bentu' zrin du lázrentu' chee gata' da xe'aj gáguntu'. Bentu' zrin te zra ne chizrela chee quebe bi gusaca z'i'ntu' le'e dxácate bchá-lajntu' le'e dízra' chee Dios.

<sup>10</sup>Le'e dxexechébequeze, ne cá'anqueze Dios nézene' ca bentu' gate na' zúalëntu' le'e, gúcantu' li lazre', ne xlátaje, na' quebe nu guzeque' nu nne cheentu'. <sup>11</sup>Cá'anqueze nézquezle ca bentu', bsízrentu' tu tule le'e, ne btípantu' lázrele ca dxun tu xra bidau' chee zrí'ine'. <sup>12</sup>Gunná bé'entu' le'e gunle ca dxal-la' xelún benne' zaj naque' bi chee

Dios, Bénnea' dxuláwizre' le'e chee chu'ule naga dxenná be'e lu dutē xel-la szren chee'.

<sup>13</sup> Chee le na' dxéquezentu' Dios xcalenu' lawe' da benle ca naca dizra' chee Dios da bchájlantu', ne guzile na ca dizra' chee Dios, ne quegá ca dizra' chee benneácheze. Da li naca na dizra' chee Dios, ne dxun na zrin lu xichaj lázrdaule le'e, na' dxejlí lázrele Le' chee gácale chee Dios dute ca nácale. <sup>14</sup> Le'e, bi bicha', gate gudele xel-la zi' chee da belún benne' walázh chee, guca chee ca guca chee benne' zaj nababa chee Dios naga nababa Judea, benne' ca' zaj naque' bi chee Cristo, lawe' da cá'aqueze guledé' xel-la zi' chee da belún benne' walázh chee' ca', benne' judío. <sup>15</sup> Benne' judío caní belutie' Xránadxu Jesús, ca belún benne' judío ca' gate nate, belutie' benne' ca' gulenné' waláz chee Dios, na' benne' caní gulebeaje' netu' lázrentu'. Quebe dxelunē' da dxezaca ba lazre' Dios, ne dxeledábague' xúgute' bēneache, <sup>16</sup> na' gate dxaca lázrentu' guchálajlentu' benne' quebe zaj naque' judío chee xeelé', quebe dxelunne' netu' lataj. Caní dxelunē', dxuluzandxe' dul-la da zaj nabague'. Na'a, ba be' Dios lataj dxaca da ba xa' zrentē chee benne' ca'.

*Pablo dxezá lazre' cheajnné' bíchedxu zaj zre'e xezre Tesalónica*

<sup>17</sup> Le'e, bi bicha', gate becuásentu' naga zúale tu chi'i, lácala québedxa blé'entu' le'e, nuzúaquezentu' le'e lu lázrdauntu', ne guzá lázrele'entu' xedajnná'antu' le'e. <sup>18</sup> Guca lázrentu' xídanu', na' neda', Pablo, guca lazra' xida' tu chupa lasa, na' bzaga Satanás neda'. <sup>19</sup> Bizra da na' dxunna na netu' xel-la dxebeza lazre', ne xel-la dxebé, ne da dxuzúa na netu' lu da ba neza, ne da dxunna bea na zua da si'ntu' lu na' Dios? Lé'eqeaze gácale da caní lu zra xelá' Xránadxu Jesucristo. <sup>20</sup> Awe'. Da nácale le'e gun na si'ntu' da xabáa lau Dios, ne súantu' lu da ba neza.

### 3

<sup>1</sup> Nadxa gate québedxa guca guchaga launtu' lawe' da quebe bi bēnentu' ca dxaca chee, na' gúquentu' xegá'ana chúpantu' lu xezre Atenas, <sup>2</sup> na' sél-lantu' bi bíchedxu Timoteo xedajnná'abe' le'e, lawe' da naca lebe' tu bi wen zrin chee Dios, ne ba benbe' zrin tu zren nen netu', bchálajntu' dizra' chawe' chee Cristo, na' wazéquebe' guzé

cháchabe' le'e, ne gutípabe' lázrele ca dxejlí lázrele Cristo, <sup>3</sup> chee quebe gate ni'a na'le lawe' da dxedentu' lu da stebe caní. Le'e nézqueze dxal-la' tedxu xel-la zi' caní. <sup>4</sup> Gate ne zúalentu' le'e bzéajni'ntu' le'e wadéquezdXu lu da zi' da xa', na' ca'an guca, ca ba nézqueze. <sup>5</sup> Chee le na', gate québedxa bzúeda' guchaga lawa' lawe' da quebe bi benda' chee, na' gusel-la' nu bedajnába le'e ájala dxaca chee lu xel-la dxejlí lazre' chee Cristo, lawe' da bzreba' ga gaze xucuasa da xriwe' le'e lu neza chee Dios, na' gaca níteze zrin bēntu' ga na'.

<sup>6</sup> Na'a ba belá' Timoteo ga ni zúantu', ze zabe' Tesalónica, ne ze núabe' dizra' chawe' ca naca xel-la dxejlí lazre', ne xel-la zri'i lazre' chee. Dxebe' netu' dxejlá lázrqueze le'e netu' nen dutē xel-la zri'i lazre', ne dxezá lázrele'ele lé'ele netu', ca netu' dxaca lázrentu' le'entu' le'e. <sup>7</sup> Chee le na', bi bicha', dxácate dxedentu' lu da stebe caní, ne lu da zi' da xa', zúantu' xel-la dxebé lawe' da nézentu' ze cháchale ca dxejlí lázrele Cristo. <sup>8</sup> Na'a naca cheentu' ca naca chee tu benne' bezúatee' chawe' lawe' da nézentu' ze cháchale lu da naca chee Xránadxu. <sup>9</sup> Ájazra guntu' xéle'entu' Dios: Xcalenu' ca dxal-la' guntu' waláz chee le'e, ne ca naca xel-la dxebé nápantu' lau Dios ne chee le'e? <sup>10</sup> Te zra, ne chizrela dxata' xúentu' Dios gunne' netu' lataj xedajnná'quezentu' le'e, chee gácadxale li lazre' ca dxejlí lázrele Cristo.

<sup>11</sup> Dxenábantu' lau Xradxu Dios, ne lau Xránadxu Jesucristo gácalene' netu' chee séquentu' xedajnná'antu' le'e. <sup>12</sup> Dxenábantu' Le' chee zrí'dxa ljwézrele tule xetule, ne chee zrí'dxale xúgute' bēneache ca nazrí'ntu' netu' le'e. <sup>13</sup> Dxenábantu' Le' guzúa chúchue' lázrdaule, chee gácale benne' li lazre', ne benne' lá'azxa lau Xradxu Dios lu zra na' gate xelá' Xránadxu Jesús nen xúgute' bi chee Le'.

### 4

*Dxal-la' gundxu da dxezaca ba lazre' Dios*

<sup>1</sup> Le'e, bi bicha', dxata' xúentu' le'e, ne dxusebágantu' le'e da nigá lu La Xránadxu Jesús. Le gúndxaqueze da blé'entu' le'e gunle, da na' dxezaca ba lazre' Dios.

<sup>2</sup> Nézqueze le'e da bzéajni'ntu' le'e ne chee Xránadxu Jesús. <sup>3</sup> Da dxaca lazre' Dios naca na guzúa cuínale lu na' Le',

ne québedxa gunle da sban, <sup>4</sup> na' súaŀeŀe zrú'ulaquezle tu tule le'e lu xel-la lá'azxa chee Xránadxu, ne gápale le' ba lá'ana, <sup>5</sup> ne quebe súaŀe lu xel-la dxezá lazre' chee da sban ca dxelún benne' quebe zaj nunbe'e Dios. <sup>6</sup> Ca naca chee da nigá, netule le'e quebe dxal-la' si xeŀe bi bíchele, quebe gunle da sban chee', lawe' da xebéaj lazre' Xránadxu chee xúgute benne' dxelune' da caní, ca ba bzéajni'intu' le'e. <sup>7</sup> Dios bláwizre' dxi'u chee gundxu da xrlátaje, ne quegá gundxu da sban. <sup>8</sup> Caní naca, che nu benne' dxuzúe' chalá'ala ca naca da nigá, quegá tuze bénneache dxuzúe' chalá'ala, san Díosqueze dxuzúe' chalá'ala, Bénnea' nunne' dxi'u Be' Lá'azxa.

<sup>9</sup> Ca dxal-la' zri'i ljwézrele quebe dxun na ba xen guzúaja' cheeŀe, lawe' da ba blé'equeze Dios le'e chee zri'i ljwézrele tule xetule. <sup>10</sup> Caníqueze dxal-la' zri'ile xúgute bi bíchedxu zaj zre'e xezre ca' zaj nababa xezra la xu Macedonia. Dxata' xuentu' le'e, bi bicha', chee zrí'idxa ljwézrele. <sup>11</sup> Le gun ba xuzre súaŀe lu xel-la dxebeza zri lazre', ne gunle da naca cheézqueze, ne gunle zrin nen ni'a na'le ca ba guzrentu' le'e, <sup>12</sup> chee xelapa benne' xula le'e ba lá'ana, ne chee quebe bi xáxrjele le'e.

*Ca gaca zra xelá' Xránadxu*

<sup>13</sup> Le'e, bi bicha', dxaca lázrentu' nézele ca naca chee bi bíchele zaj nate, chee quebe xewine lázrele ca dxelún xezícadxu benne' ca' quebe bi dxelebeza lazre'. <sup>14</sup> Dxéajlédxu gute Jesús, ne bebane' ládujla benne' gate, ne cá'anqueze dxéajlédxu Dios gusebane' benne' gate ca' guleajlí lazre' Jesús, chee xeŀezúalene' Le'.

<sup>15</sup> Chee le' na' dxentu' le'e da na' ble'e Xránadxu, gunné': Dxi'u naca bandxu gate xelá' Xránadxu, quebe cheajsúaŀédxu Le' nédxula ca benne' ca' zaj nate.

<sup>16</sup> XránaquezdXu ze'e xabáa, na' cuezre xe'e nen duté xel-la dxenná bea chee', na' xendxu chi'i gubáz blau chee xabáa, ne chi'i luzu da dxulucuezre' waláz chee Dios. Nadxa benne' gate ca', benne' guléajle'e chee Cristo xeŀexebánqueze' za'a le'. <sup>17</sup> Te na', dxi'u na' naca bandxu xeché'e dxi'u tu zren nen benne' ca' ládujla beuj chee xezrágadxu Xránadxu lu be'. Ca'an gaca súaŀédxu Xránadxu chadía chacanna. <sup>18</sup> Chee le' na' le gutipa lázrele tule xetule nen dizra' caní.

5

<sup>1</sup> Na'a, ca naca chee bi zra, u bi iza xelá' Xránadxu, quebe dxun na ba xen guzúaja' cheeŀe, bi bicha'. <sup>2</sup> Ba nézqueze le'e zrin zra xelá' Xránadxu gate québela nu dxebeza Le', ca za tu benne' gubán chizreŀa. <sup>3</sup> Gate dxelenná bénneache: Cháwelle'e dxaca chegdXu, ne quebe bi dxuchixre chee, nadxa za da guzría xi na benne' ca', ca za xel-la dxudía chee tu nu'ula gate zue' zi'i, ne quebe xeŀelé' lu da na'. <sup>4</sup> Le'e, bi bicha', quebe zúaŀe lu da chul-la, chee quebe gaca cheeŀe lu zra na' xelá' Xránadxu ca dxaca chee tu benne' dxu'u gubán lizre'. <sup>5</sup> Xúgutele le'e dxunle xrlátaje, da naca chee xel-la naxaní, ne chee te zra. Quebe dxundxu da caléŀa, da naca chee chizreŀa, ne chee da chul-la. <sup>6</sup> Chee le' na' quebe dxal-la' gácadxu ca benne' la wase' ca dxelún benne' xula, san dxal-la' gácadxu ban lazre', ne guzéajni'i cuínadxu. <sup>7</sup> Benne' dxelase, chizreŀa dxelásie', ne benne' dxeleuzre, chizreŀa dxeleuzrequeze'. <sup>8</sup> Nácadxu dxi'u chee te zra, na' dxal-la' guzéajni'i cuínaquezdXu. Che dxéajlí lázredxu Xránadxu, ne zri'idxu Le', da nigá gaca na chegdXu ca tu zra lana benne' zeje' wedil-la da naca na xia. Cá'anqueze che dxebeza lázredxu ladxu, da nigá gaca na chegdXu ca tu lapa xia ca da dxuzía tu benne' zeje' wedil-la xíchaje'. <sup>9</sup> Dios quebe bene' chegdXu tedxu lu da ba xa' da sel-le' lu xel-la dxezrá'a chee. Bene' chegdXu zrué'dxu xel-la weselá ne chee Xránadxu Jesucristo. <sup>10</sup> Jesucristo gutie' waláz chegdXu chee gaca bandxu tu zren nen Le', che naca bandxu, u che ba nátedxu gate zrin zra na'. <sup>11</sup> Chee le' na' le gutipa lázrele, ne le guzé' chacha ljwézrele tule xetule, ca ba dxúnquezele.

*Pablo dxuzéajni'ing' bi bíchedxu ca'*

<sup>12</sup> Le'e, bi bicha', dxata' xúentu' le'e gápale ba lá'ana benne' dxelune' zrin ládujla le'e, benne' ca' gucá'a Xránadxu chee xelenná be'ene' le'e, ne xulusédene' le'e. <sup>13</sup> Dخال-la' gápale benne' ca' ba lá'ana, ne zri'ile le' lawe' da dxelune' zrin chee Dios. Le sua lu xel-la dxebeza zri lazre' tule xetule.

<sup>14</sup> Cá'anqueze dxusebágantu' le'e, bi bicha', gusfzrele benne' ca' quebe dxelaca lazre' xelune' zrin, ne gutipa lázrele benne' ca' dxelate ni'a ne'e, ne gacalele benne'

quebe zaj ze' chacha, ne gácale zren lazre'  
nen xúgute bénneache.

<sup>15</sup> Le guxúe xanne' cuínale chee quebe  
gunle da calela chee nu benne' dxune'  
chee da calela, san le gun ba xuzre gún-  
queze da xrlátaje, tule xetule, ne chee  
xúgute bénneache.

<sup>16</sup> Le béquezele.

<sup>17</sup> Le guchálajlequezele Dios.

<sup>18</sup> Le xe Dios: Xcalenu' ca naca xúgute da  
dxaca chee.

Dxal-la' gunle da nigá lawe' da naca na da  
dxaca lázrqueze Dios gunle le'e, lawe' da  
nácale bi chee Jesucristo.

<sup>19</sup> Quebe guzágale da dxun Be' Lá'azxa.

<sup>20</sup> Quebe guzúale chalá'ala dizra' da  
nunezruj Be' Lá'azxa nu bi bíchedxu  
ca'.

<sup>21</sup> Le guchi'a xanne' xúgute da ca', na' le si'  
da naca na xrlátaje.

<sup>22</sup> Le cuasa lu xúgute da quebe naca na  
xrlátaje.

<sup>23</sup> Dios dxunne' dxi'u xel-la dxebeza zri  
lazre'. Dxenaba' lau Le' gune' le'e benne'  
lá'azxaqueze, ne guxúe' be' nácaquezele, ne  
bénne' du xu'ule, ne bel-la' dxen chee  
chee gácale du lazre' lu zra na' xelá' Xrá-  
nadxu Jesucristo. <sup>24</sup> Bénnea' bláwizre' le'e  
naque' li lazre', na' Le' gune' xúgute da  
caní.

*Pablo dxuzé dizra' bi bíchedxu ca'*

<sup>25</sup> Le'e, bi bícha', le naba lau Dios gácal-  
lene' netu'.

<sup>26</sup> Le gugapa diuzre xúgute bi bíchedxu  
ca', ne gunídale le'.

<sup>27</sup> Lau Xránadxu dxusebaga' le'e gulábale  
xiche nigá lávela xúgute bi bíchedxu ca'.

<sup>28</sup> Dxenaba' lau Xránadxu Jesucristo  
gune' chee da chawe'. ¡Ca'an gaca na!

DIZRA' GUDXUPE' BZUAJ  
SAN PABLO CHEE BI CHEE  
CRISTO ZAJ ZRE'E XEZRE  
TESALÓNICA

*Pablo dxugape' diuzre bi bíchedxu ca'*

<sup>1</sup>Neda', Pablo, nen Silvano, ne Timoteo, dxugápantu' le'e diuzre. Dxuzúaja' da nigá chee le'e, bi bícha'dau', nazrágale chee Cristo lu xezre Tesalónica, ne nácale bi chee Xradxu Dios, ne chee Xránadxu Jesucristo. <sup>2</sup>Dxenaba' lau Xradxu Dios, ne lau Xránadxu Jesucristo guné' chee da chawe', ne gunné' le'e xel-la dxebeza zri lazre'.

*Dios guchi'e da belún benne' dul-la ca' gate xelá' Cristo*

<sup>3</sup>Le'e, bi bícha'dau', dxal-la' xéquezentu' Dios: Xcalenu' ca naca chee, da dxal-la' guntu' lawe' da ba dxegula xel-la dxeajlí lazre' chee, ne ba zúadxa xel-la nazrí'i lazre' len lǝwézrele tule xetule. <sup>4</sup>Chee le' na' dxuchálajntu' ca naca chee le'e lálwela bi ca' chee Cristo. Dxuchálajntu' ca dxuchaga laule da dxelún benne' ca' zaj nau zi' xuzre' le'e, ne ca naca xel-la zi' da dxedele, san nácale zren lazre', ne dxeajlí lázrele Dios. <sup>5</sup>Da nigá dxulé'e na xlátaje naca Dios ca dxuchi'e da dxelún bénneache, dxenné' naca chee chu' ule naga dxenná bea Le' lawe' da dxedele xel-la zi' chee la' xel-la dxenná bea chee'.

<sup>6</sup>Xlátaje naca gudé Dios benne' ca' xel-la zi', benne' ca' dxuludé' le'e xel-la zi' na'a, <sup>7</sup>na' guzúe' le'e naga xezí' lázrele chee xel-la zi' da dxedele na'a. Xezí' lázrele tu zren nen netu' gate xelá' Xránadxu Jesús, ze'e xabáa nen gubáz blau ca' chee xabáa chee'. <sup>8</sup>Ze'e nu'e xi' chee gudé' lu da ba xa' benne' ca' quebe dxexulúnbe'e Dios, ne quebe dxuluzúe' dizra' ca dxenná dizra' chawe' chee Xránadxu Jesucristo. <sup>9</sup>Benne' caní xelecuase' naga zua Xránadxu lu xel-la szren chee', ne xel-la dxenná bea chee', na' xeledé' xel-la zi' chee da ba xa' chadía chacanna. <sup>10</sup>Caní gaca gate xelá' Xránadxu lu zra na' chee xulucá'ana szren benne' chee' ca' Le', na' benne' ca' dxeajlí lazre' Le' xelape' Le' ba lál'ana. Le'e gunle benne' ca' tu zren lawe' da guxéajléle chee da bechébentu'.

<sup>11</sup>Chee le' na' tu dxuchálajlequezentu' Dios ca naca chee, ne dxenábantu' Le' gaca chee sile da na' bláwizre' le'e sile. Cá'anqueze dxenábantu' lau Dios guchínene' xel-la waca chee' chee gaca gunle ca naca xúgute da xrlátaje da dxezá lázrele, ne xúgute zrin dxunle ne chee xel-la dxeajlí lazre' chee. <sup>12</sup>Caní gunle, gucá'ana szrenle La Xránadxu Jesucristo, na' Le' gape' le'e ba lál'ana ne chee xel-la xrlátaje chee Dios chee dxu, ne chee Xránadxu Jesucristo.

2

*Benne' xriwe'*

<sup>1</sup>Le'e, bi bícha', ca naca chee zra xelá' Xránadxu Jesucristo chee xutupe' dxi'u chee Le', dxata' xúentu' le'e <sup>2</sup>chee quebe guchale ca dxéquele, ne quebe súale stébe chee bi dizra' xuluchalaj bénneache lálcala xelenné' naca na da dxunezruj Be' Lá'azxa le', u chee xetú bila dizra' xénele, u chee bi xiche xelenné' naca na da gusél-lantu' netu', che dxenná na ba belá' Xránadxu. <sup>3</sup>Quebe güele lataj nu si xe le'e, lawe' da xelélé' bénneache xelebéaj xíchaje' Dios, ne la' bénnea' dxedábague' Dios nédxula gate zrin zra xelá' Xránadxu. Bénnea' dxedábague' Dios, na' ba naca chee' cuía xíqueze', <sup>4</sup>na' tábague' xúgute da naca chee Dios, ne xúgute da dxulucá'ana szren bénneache. Gucá'ana szren cuine' ca zrinte cheajché'e lu xudau' chee Dios, ne gun cuine' ca Diósqueze.

<sup>5</sup>¿Quebe dxeajsá lázrele güchequeza' le'e da nigá gate na' zúlagna' le'e? <sup>6</sup>Le'e ba nézele Nu Benne' nuzague' bénnea' dxedábague' Dios chee quebe le'e gate quebe ne zrin zra le'e. <sup>7</sup>Ba dxun zrin xel-la waca da nagache chee da calela, san zua Nu Benne' nuzague' le' na na'a, ca zrin zra xecuasa Bénnea' nuzague' le' na. <sup>8</sup>Nadxa la' bénnea' dxedábague' Dios, na' Xránadxu Jesús gütie' le', guchínene' be' da dxuaj na dxu'e, ne guzrí'a xi'e le', guchínene' xel-la naxaní' chee zra ze'e. <sup>9</sup>Benne' xriwe' na' ze'e ne chee xel-la dxenná bea chee Satanás, na' lu duté xel-la waca chee na guné' da ca' xelunna bea na, ne xel-la waca ca' da zaj naca na wen lazre', <sup>10</sup>ne guchínene' xúgute da calela ca' chee si xe'e benne' ca' xelebí'a xi'e, benne' ca' quebe gulaca lazre' xelez'é da li chee xelelé'. <sup>11</sup>Chee le' na' Dios dxu'e lataj si xe da calela benne' ca' chee



xeléajle'e chee da wen lazre', <sup>12</sup> chee xelebía xi' xúgute benne' ca' quebe gulaca lazre' xeléajle'e chee da li, san dxeledánedxene' da naca da calēla.

*Dios guqu'e dxi'u chee ladxu*

<sup>13</sup> Netu' tu dxál-la'queze xentu' Dios: Xcalenu' ca naca cheele le'e, bi bícha'dau', nazrí'i Xránadxu le'e, lawe' da gucá'a Dios le'e nédxute chee lala. Be' Lá'azxa ba nune' le'e chee Dios lawe' da dxéajlele chee da li. <sup>14</sup> Chee gaca cheele da nigá Dios ba bláwizre' le'e ne chee dizra' chawe' da dxuchálajntu', chee zrué'ele xel-la szren chee Xránadxu Jesucristo.

<sup>15</sup> Chee le' na', bi bícha'dau', le se chacha, ne quebe gal-la lázrele da ca' bzéajni'intu' le'e caníqueze, ne cá'aqueze lu xiche. <sup>16</sup> Dxenaba' lau Xránadxu Jesucristo, ne lau Xradxu Dios, Bénnea' lu duté xel-la xrlátaje chee' bzri'ine' dxi'u, ne ba benne' dxi'u xel-la dxexúe zren chee' tu chi'i gaze, ne tu xel-la dxebeza lazre' li. <sup>17</sup> Dxenaba' Le' gutipe' lázrele, ne guzé chúchue' le'e chee nnale, ne gunle xúgute da xrlátaje.

3

*Pablo dxenné xúene' bíchedxu ca' xelenabe' Dios gácalene' le'*

<sup>1</sup> Na'a, bi bícha'dau', le naba Dios gácalene' netu', chee zrínzega dizra' chee Xránadxu xúgute xezre ca', ne chee xelezí'e na duté lu xel-la ba lá'ana, ca guca ládujla le'e. <sup>2</sup> Le nábaquezle chee ladxu lu na' benne' ca' dxelune' da calēla, ne lu na' benne' sban ca', lawe' da quegá xúgute benne' dxelejli' lazre' Cristo. <sup>3</sup> Xránadxu naque' li lazre', na' Le' guzé chache' le'e, ne guxúe' le'e chee quebe bi da calēla gaca na cheele. <sup>4</sup> Dxuxrén lázrentu' Xránadxu gácalene' le'e chee gunle ca da dxénetu' le'e, ca ba dxúnquezele. <sup>5</sup> Dxenábantu' lau Xránadxu gácalene' le'e chee gápale xel-la zri'i lazre' da gunna Dios le'e, ne gápale xel-la zren lazre' da gunna Cristo le'e.

*Dxal-la' gundxu zrin*

<sup>6</sup> Le'e, bi bícha'dau', lu La Xránadxu Jesucristo dxénetu' le'e quebe gunle tuze núteteze bi bíchedxu quebe dxaca lazre' guné' zrin, ne quebe dxune' ca da bsédentu' le'e. <sup>7</sup> Ba nézele dxal-la' gunle zrin ca bentu' netu' gate na' zúalentu' le'e. <sup>8</sup> Quebe nu chee gudáguntu' cá'aze che nadxu quebe gudízrujntu' na. Bénéle'equezentu' zrin te

zra, ne chizrela chee quebe bsaca zi'ntu' le'e da gáguntu'. <sup>9</sup> Nácaqueze cheentu' nábantu' le'e da gáguntu', san bentu' zrin chee blé'entu' le'e dxal-la' gunle ca bénquezentu' netu'. <sup>10</sup> Gate na' zúalentu' le'e, bdentu' lu na'le da nadxixruj bea nigá: Benne' quebe dxaca lazre' guné' zrin ca'an guné' quebe gawe'. <sup>11</sup> Ba bémentu' bál-lale le'e quebe dxunle zrin, na' dxedázele dxuchixe cheele da dxaca chee benne' xula. <sup>12</sup> Benne' caní dxixruj be'entu', ne dxusebágantu' le' lau Xránadxu Jesucristo chee xelune' zrin du lazre' chee gata' da xele'aj xelawe'.

<sup>13</sup> Le'e, bi bícha', le gun da xrlátaje, ne quebe cheajtá lázrele. <sup>14</sup> Che nu benne' quebe dxuzúe' dizra' ca da dxennantu' lu xiche nigá, le nna' nu bénnea', ne quebe gunle le' tuze, chee gapa stué'. <sup>15</sup> Quebe zrá'ale le', san le guzéajni'i le' ca bi bíchele.

*Pablo dxuzé' dizra' bi bíchedxu ca'*

<sup>16</sup> Xránadxu naque' Bénnea' dxunne' dxi'u xel-la dxebeza zri lazre'. Dxenaba' lau Le' gúnnaqueze' le'e xel-la dxebeza zri lazre' lu xúgute da dxunle, ne súalene' xúgutele le'e.

<sup>17</sup> Neda', Pablo nen ná'aqueza' dxuzúaja' cheele da nigá. Da nigá dxunna bea na xúgute xiche da dxuzúajqueza' neda'. Caní dxuzúaja'. <sup>18</sup> Dxenaba' lau Xránadxu Jesucristo guné' da chawe' chee xúgutele le'e. Ca'an gaca na.

## DIZRA' NEDXU BZUAJ SAN PABLO CHEE TIMOTEO

*Pablo dxugape' diuzre Timoteo*

<sup>1</sup> Neda', Pablo, naca' gubáz chee Jesu-cristo lawe' da caní bdxixruj bea Dios, Xra Xránadxu Jesucristo, weselá chegdxu, Bén-nea' dxebeza lázredxu xelá'tee'. <sup>2</sup> Dxuzúaja' da nigá chiu' lue', Timoteo, nacu' ca zrí'inequeza' lawe' da dxeajlí lazru' Cristo. Dxenaba' Xradxu Dios, ne Xránadxu Jesu-cristo guné' chiu' da chawe', ne xexache lazre' lue', ne gunne' lue' xel-la dxebeza zri lazre'.

*Pablo dxusírene' Timoteo ca naca chee benne' ca' dxulusédene' da wen lazre'*

<sup>3</sup> Ca ba guta' xúeda' lue' gate na' bezá'a naga zu', ne bexá'a naga nababa xezr la xu Macedonia, begá'ana lu xezre Efeso chee nne xúenu' benne' ca' zaj zre'e na' québedxa xulusédene' da wen lazre', <sup>4</sup> ne québedxa xululapa ne'e dizra' dxuluzaze benne' ca' ca zaj naca zánete xra xrtawe' ca'. Dizra' caní dxulutit-la na bénneache. Quebe naca na da xelácale na bénneache chee xelezé chache' ca' dxeajlí lazre' Dios. Caní dxenné xúeda' lue' xecha lasa.

<sup>5</sup> Dxenné xúeda' lue' gunu' caní chee xelezrí'i ljwezre' dute lázrdawe', chee quebe bi sua da gagu na zria lázrdawe' ca', ne gaca du lazre' ca' dxeajlí lazre' Cristo. <sup>6</sup> Bal-la benne' ca' belexeuase' lu da caní, na' ba zaj nazi'e dizra' xálaze. <sup>7</sup> Dxelaca lazre' xuluzájle'e da nadxixruj bea Dios, ne quebe dxelájni'ine' da dxuluchálajqueze', ne ca naca da ca' dxuluxrén lazre'.

<sup>8</sup> NezdXu da nadxixruj bea na naca na xrlátaje che nu benne' dxuchínene' na ca naca chee na. <sup>9</sup> Dxal-la' gusá lázredxu quebe bzua Dios da nadxixruj bea na chee nna be'e na benne' xrlátaje ca', san chee nna be'e na benne' ca' dxeluné' da calela, ne benne' ca' quebe dxuluzúe' xrtizre'e, ne benne' ca' dxeluné' da zrinnaj, ne benne' wen dul-la ca', ne benne' ca' quebe dxelape' Dios ba lá'ana, ne quebe dxelapa ba lá'ana da naca chee Dios, ne benne' ca' dxelute xra xrna', ne benne' ca' dxelutie' benne', <sup>10</sup> ne benne' ca' dxeluné' da sban, ne benne' biu ca', benne' dxuluguné' ljwezre biue' ca nu'ula,

ne benne' dxelebang' benne' ca' chee xelutie' le' lu na' benne' xula, ne benne' ca' dxelún lazre', ne benne' ca' dxelexechebe' da wen lazre', ne benne' ca' dxuluchuque' da li. <sup>11</sup> Caní naca da dxulé'e dizra' chawe' da bsebaga Dios neda'. Naque' Dios xabáa, Benne' szrente'.

*Pablo dxé'e Dios: Xcalenu'*

<sup>12</sup> Dxapa' Xránadxu Jesucristo: Xcalenu'. Naque' Bénnea' benne' neda' xel-la waca chee guna' da nigá, lawe' da dxelé'ene' neda' xlátaje, na' nuzúe' neda' lu zrin chee'. <sup>13</sup> Xúgute' da caní ba bene' chia' lácala gun- nía' schanni' chee Cristo gate nate, ne gudáu z' xuzra' bi chee' ca', ne ben la' chee benne' ca'. Dios bexache lazre' neda' lawe' da quebe ne cheajlí lazra' Cristo, ne quebe guxéajni'ida' da na' bena'. <sup>14</sup> Chee le' na' Xránadxu, dute lu xel-la zri'i lazre' zren chee' bnite lawe' chia', ne benne' neda' xel-la dxeajlí lazre', ne xel-la zri'i lazre' da nápadxu lawe' da nácadxu bi chee Jesucristo.

<sup>15</sup> Da nigá naca na da li, na' xúgute' bén- neache dxal-la' xelájle'e chee na. Caní dxenná na: Jesucristo ble'e lu xezr la xu nigá chee guselé' benne' dul-la ca', na' neda' nácadxa' benne' dul-la ca' xúgute' benne' ca'. <sup>16</sup> Chee le' na' Dios bexache lazre' neda' chee gulé'e Cristo ca' szren naca xel-la zren lazre' chee' nen neda', nácale'a benne' dul-la, chee gaca' neda' tu da gulé'e na lau xúgute' benne' ca' xelajlí lazre' Cristo, na' xelape' xel-la nabán chadía chacanna. <sup>17</sup> Chee le' na' dxal-la' gápadxu ba lá'ana, ne güe lá'anadxu Bénnea' nna béaqueze' chadía chacanna. ¡Cabata' gatíe', ne quebe gaca lé'edxu Le', ne naque' Dios tu licha', ne sina! ¡Gaca ba Le' chadía chacanna! ¡Ca'an gaca na!

<sup>18</sup> Lue', bi chia', Timoteo, dxusebaga' lue' su' wedil-la chee tíl-lalenu' da naca chee da calela, ca da buluchalaj nédxute' benne' ca', benne' gulenné' waláz chee Dios ca dxal-la' gunu' lue'. <sup>19</sup> Bexru tipa xel-la dxeajlí lazre' chiu', chee quebe bi sua da gulale na lu xichaj lazrda'u. Bal-la benne' ca' quebe beluné' caní, na' buluzúe' chalá'ala xel-la dxeajlí lazre' chee'. <sup>20</sup> Caní guca chee Himeneo, ne chee Alejandro, benne' ca' bdea' neda' lu na' Satanás chee xulusédie' quebe xelenné' schanni' chee Dios.

## 2

*Ca dxal-la' guchálajledxu Dios*

<sup>1</sup> Da dxundxa na ba xen dxenné xúeda' lue', dxal-la' nábale lau Dios gácalene' bénneache, ne guchálajlele Dios, ne gucá'ana szrenle Le', ne nábale Dios gunne' le'e da dxezáxrjele, ne xeje Dios: Xcalenu'. Dxal-la' gunle caní, guchálajlele Dios da naca na chee xúgute bénneache. <sup>2</sup> Cá'anqueze dxal-la' nábale Le' gácalene' benne' xichje ca', benne' dxelenná be'ene' bénneache, ne benne' xu'u lawe' ca' chee chadxu chawe', ne síadxu lu xel-la dxebeza zri lazre', ne guzúa cuínadxu lu na' Dios du lázredxu, ne gápadxu ba lá'ana bénneache. <sup>3</sup> Da nigá naca na xrlátaje, ne da dxezaca ba lazre' Dios, weselá cheedxu, 'lawe' da dxaca lazre' Le' xelalá xúgute bénneache, ne xelúnbe'e da li. <sup>4</sup> Zua tuze Dios, ne zua tuze wenaba chee bénneache lau Dios, Bénnea' naque' Jesucristo, ne cá'anqueze ben cuine' bénneache. <sup>5</sup> Jesucristo bzua cuine' lu xel-la gute chee bexá'awe' xúgute bénneache, na' blé'ene' da na' ca bzrin zra chee na. <sup>6</sup> Chee le na' bzué' neda' gubáz chee' chee cu'a lban, ne gulé'eda' benne' ca' quebe zaj naque' judío dxal-la' xeleajlí lazre' Cristo, ne xelune' ca naca da li. Lau Cristo dxex-echeba', ne quebe dxun lazra'.

<sup>8</sup> Chee le na' dxaca lazra' xuluchálajle xúgute bénneache Dios gáteteze na', ne xelechisa ne'e duté xel-la li lazre' chee' lau Dios, ne quebe xelezré'e ljwezre', ne quebe xeledíl-lalene' ljwezre' ca'. <sup>9</sup> Nu'ula ca' dxal-la' xelácué' da naca xlátaje, ne ca naca chee da dxelúe lechítaje cuine' dxal-la' gaca na xel-la dxexruj lazre', ne xel-la du lazre', ne quegá ca dxulupá'a xíchaje', ne quegá lechítaje da naca na oro, ne quegá bga ca', ne quegá zra lané' da zácalle'e na. <sup>10</sup> Dxal-la' xelune' da gácale na bénneache, ca dxal-la' xelún nu'ula ca' ba zaj nuzúa cuine' lu na' Dios. <sup>11</sup> Nu'ula ca' duté lu xel-la dxexruj lazre' chee' dxal-la' xuluzé nague' gate nu dxusede xrtizra Dios, ne quebe xelenné' chee na. <sup>12</sup> Quebe dxunna' lataj nu'ula gusédene' benne' biu ca', ne quebe nna be'ene' le', san dxal-la' sue' zrize. <sup>13</sup> Caní naca na lawe' da ben Dios teca Adán, na' gudé na' bene' Eva, nu'ula chee Adán na'. <sup>14</sup> Adán, quebe guzí xe da xriwe' le', san guzí xe na Eva, nu'ula na', na' gudé guzí xe na le', na' bene' dul-la. <sup>15</sup> Tu nu'ula gape' xel-la weselá che dxezane' bidu ca', ne cheajlí lazre' Dios, ne nazri'ine' Le', ne nuzúa cuine' lu na' Dios, ne gaque' dxexruj

lazre'.

### 3

*Ca dxal-la' xelaca benne' ca' dxulusédene' bi ca' chee Cristo*

<sup>1</sup> Da líqueze naca da nigá: Che nu benne' dxezá lazre' gaque' benne' gusédene' bi ca' chee Cristo, tu zrin xrlátaje dxaca lazre' guné'. <sup>2</sup> Tu benne' dxusédene' bi ca' chee Cristo:

Dxal-la' gaque' benne' quebe bi zua da dx-unite na le'.

Dxal-la' súałene' tuze nu'ula.

Dxal-la' gaque' benne' dxuzéajni'i cuine',

ne benne' dxenná be'e cuine',

ne benne' nape' ba lá'ana.

Dxal-la' si' lu ne'e benne' xelezrine' lize'.

Dxal-la' gaque' benne' dxaca dxusédene' bénneache.

<sup>3</sup> Quebe dxal-la' xé'aje' da guzuzre na le',

ne quebe gutil-le' nu benne',

ne quebe sa lazre' dumí.

Dxal-la' gaque' benne' dxexruj lazre', ne zren lazre'.

<sup>4</sup> Dxal-la' nézene' nna be'ene' benne' zaj zre'e lize',

ne gulé'ene' zri'ine' ca' xelácabe' weszúa dizra',

ne xelápabe' ba lá'ana xra xrnabe'.

<sup>5</sup> Che nu benne' quebe nézene' ajala nna be'ene' benne' zaj zre'e lize', zájazra guné' gusédene' bi ca' chee Dios? <sup>6</sup> Benne' dxusédene' bi ca' chee Cristo quebe dxal-la' gaque' benne' za dxúnbeate dizra' chee Cristo, chee quebe gucá'ana szren cuine',

chee quebe cuía xi'e ca guzría xi' da xriwe'.

<sup>7</sup> Cá'anqueze dxal-la' gaque' benne' nape' ba lá'ana lávela benne' quebe zaj naque' chee Cristo, chee quebe gata' lataj nu guzúa le' chalá'ala, na' chee quebe chu'e lu na' da xriwe'.

*Ca dxal-la' xelaca benne' dxelácalene' bi ca' chee Cristo*

<sup>8</sup> Cá'anqueze benne' ca' dxelácalene' bi ca' chee Cristo:

Dxal-la' xelaque' benne' zaj nape' ba lá'ana,

ne benne' li lazre'.

Quebe dxal-la' xelé'aje' da guzuzre na le',

ne quebe xelaque' benne' dxulucudee'.

<sup>9</sup> Dxal-la' xelapa xánnie' da zácalle'e chee da dxeajlí lázredxu,

ne quebe bi sua da gagu na zría chee' lu xichaj lázrdawe'.

<sup>10</sup> Dxal-la' xelapa xánnie' da zácalle'e chee da dxeajlí lázredxu,

ne quebe bi sua da gagu na zría chee' lu xichaj lázrdawe'.

<sup>10</sup> Dxal-la' xelapa xánnie' da zácalle'e chee da dxeajlí lázredxu,

Te na', che quebe bi zua da dxagu na zria chee', waca xelácalene' bi ca' chee' Cristo.

<sup>11</sup> Zru'ula benne' caní:

Dxal-la' xelaque' benne' zaj nape' ba lá'ana, ne quebe xelaque' wetupa dizra' bizruj.

Dxal-la' xelaque' du lazre', ne li lazre' ca naca xúgute' da dxelune'.

<sup>12</sup> Tu benne' dxácalene' bi ca' chee' Cristo dxal-la' súalene' tuze nu'ula, ne dxal-la' nézene' nna be'ene' zrí'ine' ca', ne benne' zaj zre'e' lize'. <sup>13</sup> Benne' ca' dxelácalene' bi ca' chee' Cristo, che dxelune' cháwedau' zrin chee', welezru'e'ne' xel-la ba lá'ana, na' xelezéquedxene' xuluchálaje' du lazre' ca dxeajlí lázredxu Jesucristo.

*Tu da ble'e Dios dxi'u ca naca da zéajlédxu*

<sup>14</sup> Dxebeza lazra' xídazequeza' xedajnná'a lue', na' dxuzúaja' chiu' da nigá <sup>15</sup> chee' chéajni'inu' che dxezreda', ca dxal-la' gunu' ládujla benne' ca' zaj nababe' chee' Dios, benne' ca' ba bláwizra Dios ban, ne zaj nuxru chache' da li, ne dxuluxúe xánnie' na. <sup>16</sup> Da li tu da zrente' naca da nigá ble'e Dios dxi'u ca naca da zéajlédxu:

Dios ble'e nigá, ne guque' bénneache.

Be' Lá'azxa blé'ene' naque' xlátaje.

Belelé'e gubáz chee' xabáa ca' Le'.

Benne' duté xezr la xu belenne' ca naca chee'.

Guleajlí lazre' benne' zaj zre'e' duté xezr la xu nigá Le'.

Dios bezi'e Le' xabáa.

#### 4

*Ca naca chee' benne' ca' dxuluzúe' chalá'ala xel-la dxeajlí lazre' chee'*

<sup>1</sup> Be' Lá'azxa ba bdxixruj lie' wazrín zra xulusán bal-la benne' xel-la dxeajlí lazre' chee', na' chjácálene' be' ca' xelezi xé na le', ne xelezi'e ca da xulul'é be' xriwe' ca'.

<sup>2</sup> Xuluzé nague' ca da xuluse' benne' wen lazre' ca', benne' dxelún láweze da xrlátaje, ne québedxa zaj zua xel-la dxeléquebe'e xichaj lázrdawe', ne zaj naque' lázrdau zizraj, na' quebe zaj nape' xel-la stu' gate dxelún lazre'. <sup>3</sup> Benne' caní quebe dxelu'e' latja nu guchaga na', ne cá'anqueze nu xe'aj gagu bal-la da dxágudxu, lálcala ben Dios da ca' chee' xelagu benne' ca' dxeajlí lazre' Le', ne benne' ca' zaj núnbe'e' da li, ne xelé'e Le'; Xcalenu'. <sup>4</sup> Xúgute' da ben Dios naca na chawe', ne quebe dxal-la' bi guzúadxu chalá'ala, san dxal-la' sidxu na, ne xédxu

Dios; Xcalenu', <sup>5</sup> lawe' da naca chawe' lau Dios bíteteze da dxágudxu che dxundxu ca dxenná xrtizre', ne che nábadxu Le' gune' gaca na da chawe'.

*Benne' wen zrin xrlátaje chee' Jesucristo*

<sup>6</sup> Che dxusédenu' bi bíchedxu ca' da caní, nacu' bi wen zrin chawe' chee' Jesucristo, na' nazí lu na'u dizra' chee' Dios, ne ca naca da dxusededxu, da na' zéajlenu'. <sup>7</sup> Quebe gulapa na'u da dxuluzaze bénneache, ne dizra' xálaze. Bzazraj cuinu' lu da naca chee' Dios. <sup>8</sup> Che dxuzazraj cuinu' ca naca lu bel-la' dxen chiu' wácalequeze na lue' late', san che dxuzazraj cuinu' lu da naca chee' Dios, wácale' na lue' lu xúgute' da dxunu', na' naca na da sidxu ba neza lu xezr la xu nigá, ne cá'anqueze lu xezr la xu da za'. <sup>9</sup> Da li naca da nigá, na' xúgute' bénneache dxal-la' xeléajle'e chee' na. <sup>10</sup> Chee' le' na' dxudé xel-la zi' cuínadxu dxundxu zrin lawe' da dxebeza lázredxu Dios ban, Bénéa' naque' wselá chee' xúgute' bénneache, na' dxuselé' benne' ca' dxeajlí lazre' Le'.

<sup>11</sup> Da caní dxal-la' gusédenu' bénneache, ne nne' xuenu' le' xelune' na. <sup>12</sup> Quebe gu'u lataj nu guzúa lue' chalá'ala lawe' da nacu' benne' cuide', san dxal-la' gacu' tu da gulé'e na benne' ca' dxeajlí lazre' Cristo ca dxal-la' xelune'. Gulé'e na le':

Ne chee' da dxuchálaju',

ne ne chee' da dxunu',

ne ca nazri'inu' le sa' ljwezru',

ne ca naca Be' Lá'azxa zúalene' lue',

ne ca dxeajlí lazru' Cristo,

ne ca nacu' du lazre'.

<sup>13</sup> Dxácate' xida' neda', ben zi' lazru' gulabu' xiche lá'azxa lávela bénneache, ne gutipu' lazre' bi bíchedxu ca', ne guzéajni'inu' le'.

<sup>14</sup> Quebe gusanu' xel-la waca da benna Dios lue' gate buluzé na' benne' gula ca' xichju', ne gulenné' ca da ble'e Be' Lá'azxa le' ca naca zrin chee' Xránadxu da dxal-la' gunu'.

<sup>15</sup> Ben da caní du lazru' chee' xelélé'e xúgute' bénneache nápaquezu' da naca chee' Dios. <sup>16</sup> Bxue xanne' cuinu', ne ca da dxusédenu', ne guzé' chacha lu zrin chiu'. Che gunu' da caní, na' guseláqueze cuinu', ne guseláquezu' benne' ca' xelenne' da guchálaju'.

#### 5

*Ca dxal-la' xelaca benne' ca' dxeajlí lazre' Cristo*

<sup>1</sup> Quebe cun til-lu' tu benne' gula, san bzéajni'i le' ca xráquezu'. <sup>2</sup> Gúcalē benne' cuide' ca' ca bi bichequezu'. <sup>3</sup> Gúcalē nu'ula guila ca' ca xrnáquezu'. <sup>4</sup> Gúcalē nu'ula cuide' ca' ca bi zánquezu', dutē lu xel-la dxapa ba lá'ana chiu'.

<sup>5</sup> Gúcalē nu'ula ba nate benne' chee', nu'ula' quebe nu xrtiē' zradxa. <sup>6</sup> Che tu nu'ula ba gute benne' chee' ne zaj zra' zr'ingē', u zre suē', lebe' dxal-la' xelunbe' ca da zaj nabágabe' chee' xelácalebe' benne' zaj naca xrtiaquezbe', ne xelunbe' ca da zaj nabágabe' chee' xra xrnabe', lawe' da naca na xrlátaje, ne da dxezaca ba lazre' Dios. <sup>7</sup> Nu'ula da li québedxa nu chilá' chee' dxebeza lazre' Dios, ne dxuchálajlēne' Dios te zra, ne chizrela. <sup>8</sup> Nu'ula caní, che dxunē' ca da dxezaca ba lazre' léqueze', naque' ca benne' ba nate. <sup>9</sup> Bdxixruj be'e benne' ca' xelunē' caní, chee' quebe gun na ba xen nu til-la le'. <sup>10</sup> Che nu benne' quebe dxebé'e gunne xue chee' benne' ca' zaj naque' tuze, ne da dxun na ba xen che quebe dxácalēne' xrtiaqueze', ba bsanē' xel-la dxeajlí lazre' chee', ne nácadxe' benne' wen da zrinnaj ca tu benne' quebe ne chéajlē'e chee' Dios.

<sup>11</sup> Lu xiche naga zria la nu'ula ca' quebe nu chilá' chee', benne' dxácalele, dxal-la' guzúajle la nu'ula caní, nu'ula na' ba gudé'e ga xun iza, ne guzúa tuze benne' chee'.

<sup>12</sup> Dxal-la' gaque' nu'ula ba bēnlē'e da xrlátaje ca da caní:

Che ba bsegulē' zr'ingē' ca'.

Che ba guzú' lu nē'e benne' bíchedxu belezrín lizre'.

Che ba gúcalēne' benne' caní dutē lu xel-la dxexruj lazre' chee'.

Che ba gúcalēne' benne' dxedé'e xel-la zi'.

Che bi xetú da xrlátaje ba bene'.

<sup>13</sup> Quebe guzríale lu xiche na' nu'ula caní che quebe ne xelexríe' ga xun iza lawe' da gagaze xucuasa xel-la dxelezá lazre' chee' le' lu da naca chee' Cristo, na' xelaca lazre' xuluchaga nē'e xecha lasa, <sup>14</sup> na' xelebague' zria lawe' da bulusanē' ca da gulechebe lazre' chee' Cristo. <sup>15</sup> Cá'anqueze che dx-eledé' tu tu xu'u, xelaque' zrawēde, ne quegaze zrawēde, san cá'anqueze xelaque' wetupa dizra' bizruj, na' xuluchixre chee' lu xúgute da xelennē', ne xelennē' da quebe dxal-la' xelennē'. <sup>16</sup> Chee le' na' dxaca lazra' xuluxuchaga nē'e che ne zaj naque' nu'ula cuide', ne xelexzá zr'ingē', ne xuluxúe' lizre', chee' quebe xelexí lataj xelexí

tizra benne' ca' dxelexre'e dxi'u. <sup>17</sup> Bal-la nu'ula caní ba belexecuase' chee' Cristo, ne zjácálenē' da xriwe'.

<sup>18</sup> Che nu benne' dxeajlí lazre' Cristo, benne' biu, u nu'ula, che zua xrtiē' naque' nu'ula ba gute benne' chee', dxal-la' gá-calēne' le' chee' quebe xelebaga bi ca' chee' Cristo da nigá, na' benne' caní welezeque' xelácalēne' nu'ula caní québedxa nu chilá' chee'.

<sup>19</sup> Che zaj zra' benne' gula ca' dxulusē-dene' cháwedau' bi ca' chee' Cristo, dxal-la' gápale' ele benne' ca' ba lá'ana, na' dxundxa na ba xen gápale ba lá'ana benne' gula ca' dxuluchálajlequeze' le'e dizra' chee' Dios, ne dxulusēdene' le'e. <sup>20</sup> Lu xiche lá'azxa dxenná na: Quebe cu'ule xixruj dxu'a bezre, be dxíchujba' zrua' xtila. Cá'anqueze dxenná na: Benne' wen zrin dxal-la' si'e xrlázruje'.

<sup>21</sup> Quebe guzē' nagu' che nu gagu zria chee' tu benne' gula chee' xudau' che quebe xelexá' chupa u chunna benne' xelexechebe'. <sup>22</sup> Benne' ca' dxelúnqueze' dul-la, dxal-la' til-lu' benne' ca' lálwela xúgute bi ca' chee' Cristo, chee' xelexrebe xezícadxa benne' ca'. <sup>23</sup> Lau Dios, ne lau Xránadxu Jesucristo, ne lau gubáz blau ca' chee' xabáa chee', dxusebaga' lue' chee' gunu' da caní. Dxenné' xueda' lue' quebe cueu' ca zaj naca benne', ne quebe gucha' u ca gunu' chee' tu tu benne'. <sup>24</sup> Quebe xexúbenu' nu la guzúateu' lu zrin chee' Cristo chee' quebe bagu' dul-la chee' benne' xula. Quebe gulapa na' u ne tu da calela.

<sup>25</sup> Lawe' da quebe chawe' zua le'u, ne tu lize dxaca na, québedxa xé'aju' nísaze, san güe'e late' xrise uva wal-la.

<sup>26</sup> Zaj nalá' dul-la chee' bal-la benne' gate quebe nu ne guchi'a ca da zaj nune', san dul-la da zaj nun xezícadxa benne' ca' xulul'é' lawe na te na'. <sup>27</sup> Cá'anqueze zaj nalá' da xrlátaje da zaj nun bal-la benne', ne che zra da xrlátaje da quebe zaj nalá', quebe gaca tu xelegáchequeze na.

## 6

<sup>1</sup> Benne' zaj nada'u dxal-la' xelápale'e ba lá'ana xranē' ca' chee' quebe nu nne' schanni' chee' Dios, ne chee' da dxusédedxu. <sup>2</sup> Che benne' zaj nada'u, zaj zra' xranē' ca' dxelexlí lazre' Cristo, quebe dxal-la' xuluzúe' le' chalá'ala lawe' da zaj naque' benne' biche', san dxal-la' xelunē' zrin da

nácaxa xrlátaje chee xrané' ca' dxelezi'e ba neza zrin na', lawe' da dxeleajlí lazre' Cristo, ne zaj naque' benne' biche' zaj nazri'ine'. Bzéajni'i benne' ca' da nigá ne bsizre le'.

*Da calela da dxulusede benne', ne xel-la gunní'a li*

<sup>3</sup> Che nu benne' dxusédené' da zaj naca calela da quebe zaj naca na tuze ca da bsede Xránadxu Jesucristo, ne ca da dxusede da dxéajlédxu chee Dios, <sup>4</sup> benne' nigá dxucá'ana szren cuine', ne quebe bi nézene'. Dxezá lázrele'e gutil-le' benne' dizra' ca naca chee tu tu dizra' ca'. Benne' dxelún caní:

Dxelaque' benne' xre lazre', ne dxeledil-le', ne dxulucháchale ljwezre',

ne dxeléquene' dxun le sa' ljwezre' da calela,

<sup>5</sup> ne tu lize dxulutil-la dizra' ljwezre',

ne zaj naque' benne' zaj nazrinnaj lu xichaj lázrdawe',

ne quebe zaj nunbe'e da li.

Dxeléquene' zrin dxundxu chee Cristo naca na tu da waca xuluchínene' chee xelaque' benne' gunní'a. Quebe gunu' tuze benne' caní. <sup>6</sup> Da li da zéajlédxu chee Cristo naca na tu da gunní'a zren, na' caní nácaqueze chee tuze bénnea' dxezaca ba lazre' ca da nape'. <sup>7</sup> Quebe bi núadxu gate gúlajdxu lu xezr la xu nigá, ne quebe bi xexúadxu gate xezá'adxu nigá, <sup>8</sup> san che de da gágudxu, ne zra lánadxu, dxal-la' xezaca ba lázredxu nen da ca'. <sup>9</sup> Benne' ca' dxelaca lazre' xelaque' gunní'a, cheajlecházie' lu na' da xriwe', na' cheajlechu'e lu xralaj chee le na, chee xelezá lazre' da xálaze, da dxulucá'ana ditaj na bénneache, ne dxelegú'u na bénneache lu da ba xa' naga xelebía xi'e. <sup>10</sup> Benne' nazri'ine' dumí dxune' xúgute da calela, na' zaj zra' bal-la benne' gulezá lazre' na, na' bulusané' xel-la dxeleajlí lazre' chee', na' ba gulezíf' lataj xel-la dxudía lu lázrdawe'.

*Da dxusizre Pablo Timoteo*

<sup>11</sup> Lue', wen zrin chee Dios, gucuasa lu da caní. Ben da naca xlátaje, ne bzua cuinu' lu na' Dios, ne guxeajlí lazre' Cristo, ne bzri'i Le', ne guca zren lazre', ne dxexruj lazre'.

<sup>12</sup> Gudíl-lale da xriwe', guchínenu' xel-la dx-eajlí lazre' chiu'. Bexru tipa xel-la nabán da chadía chacanna lawe' da bláwizra Dios lue'

chee gapu' da nigá, na' ba blé'enu' ca dxeajlí lazru' Cristo lówela zane' benne' dxelexechebe' chee na. <sup>13</sup> Na'a, lau Dios, Bénnea' nuzúe' xel-la nabán chee xúgute da naca ban, ne lau Jesucristo, Bénnea' cá'anqueze blé'ene' da naque', ne bechebe' chee na lau Poncio Pilato, dxenné xueda' lue'. <sup>14</sup> Guzú' dizra' ca da dxapa' lue', ne quebe gucha'u na. Dخال-la' gunu' na chee quebe nu seque' bi nne' chiu' ca zrin zra xelá' Xránadxu Jesucristo. <sup>15</sup> Ca zrin zra chee na Dios sel-le' Le'. Naque' Dios tu licha', na' Benne' Lá'azxa dxenná be'e. Naque' Wenná bea, Benne' dxenná be'ene' wenná bea ca', ne naque' Xrana xúgute benne' zaj naque' xrana bénneache. <sup>16</sup> Tuze Dios quebe gatíe', ne zue' lu xel-la naxaní' naga quebe nu seque' cheaj. Netú bénneache quebe ne lé'ene' Le', ne quebe nu gaca le'e Le'. Chee Le' naca xel-la ba lá'ana, ne xel-la dxenná bea chadía chacanna. ¡Ca'an gaca na!

<sup>17</sup> Gunné xue benne' zaj naque' gunní'a lu xezr la xu nigá chee quebe xulucá'ana szren cuine', ne quebe xuluxrén lazre' xel-la gunní'a chee', lawe' da quebe naca na da chadía chacanna. Dخال-la' xuluxrén lazre' Dios ban, Bénnea' dxúnnale'e dxi'u xúgute da dxechínedxu chee sidxu da ba neza. <sup>18</sup> Gunné xue benne' caní xelune' da xrlátaje, ne xelaque' benne' gunní'a lu da xrlátaje da xelune', ne bi xulunézruje' benne' xache' ca', ne xulunézrujle'e na. <sup>19</sup> Caní gaca, xelezrué'ene' xel-la gunní'a da gaca na tu da guzúa chacha na le' lu zra da za za', ne xelape' xel-la nabán da zéajlí canna.

<sup>20</sup> Lue', Timoteo, bxue xanne da nuzúa Dios lu na'u. Quebe guzé nagu' dizra' xálaze chee xezr la xu nigá, da na' dxelenná bal-la benne' naca na xel-la sina. Da nigá naca na da wen lazre'. <sup>21</sup> Bal-la benne' gulezíf' e na, na' bulusané' xel-la dxeleajlí lazre' chee'. Dxenábeda' Dios guné' da chawe' chiu'. ¡Ca'an gaca na!

## DIZRA' GUDXUPE' DA BZUAJ SAN PABLO CHEE TIMOTEO

*Pablo dxugape' diuzre Timoteo*

<sup>1</sup> Neda', Pablo, naca' gubáz chee Jesucristo lawe' da guca lazre' Dios gaca' caní, chee cu'a lban ca naca xel-la nabán da guchebe lazre' Dios gunne' chee benne' ca' zaj naque' bi chee Jesucristo. <sup>2</sup> Dxuzúaja' da nigá chiu' lue' Timoteo, bi chia' nazrí'i lazra', na' dxenaba' Xradxu Dios, ne Xránadxu Jesucristo guné' da chawe' chiu', ne xexache lazre' lue', ne gunne' chiu' xel-la dxebeza zri lazre'.

*Pablo dxusízrene' Timoteo chee gunbe' zrin chee Cristo*

<sup>3</sup> Te zra ne chizrela gate dxuchálajlena' Dios, ne dxeajsá lazra' lue', dxápequeza' Dios: Xcalenu', Bénnea' dxuna' zrin chee', ne quebe bi zua da dxagu na zria lu xichaj lázrdawa'. Dxuna' zrin na' ca belúnqueze xra xrtawa' ca'. <sup>4</sup> Dxeajsá lázrqueza' ca gudxezru' gate na' bezá'a naga zu', ne dxaca lázrele'a xelé'eda' lue' chee gápale'a xel-la dxebé. <sup>5</sup> Cá'anqueze dxeajsá lazra' xel-la dxeajlí lazre' li da napu'. Xrna'u gula, Loida, ne xrna'u, Eunice gulape' xel-la dxeajlí lazre' caní, na' nuxrén lazra' lue' nápaquezu' na.

<sup>6</sup> Chee le na' dxuzéajni'ida' lue' guchínenu' ca da benne Dios lue' gate na' bzea' na'a xichju', ne gunaba' gun Dios da chawe' chiu'. <sup>7</sup> Be' Lá'azxa benna Dios dxi'u quebe dxune' dxi'u bi zra chebe, san dxunne' dxi'u xel-la wal-la, ne xel-la zri'i lazre', ne dxune' dxi'u benne' dxenná be'e cuina. <sup>8</sup> Chee le na' quebe gapa stu' ca naca chee Xránadxu, ne cá'anqueze ca naca chia' neda', xu'a lizre xia nigá lawe' da dxuna' zrin chee Cristo, san bchaga lau lue' xel-la zi' da dxeledé benne' ca' dxuluchálaje' dizra' chawe' chee Jesús, na' Dios gutípaqueze' lazru'. <sup>9</sup> Dios bselé' dxi'u, ne bláwizre' dxi'u chee guzúa cuínadxu lu na' Le', quegá lawe' da bendxu tu da xrlátaje, san lawe' da guca lázrequeze Le' gaca na caní, ne lawe' da bzri'ine' dxi'u, nazrágadxu chee Cristo. Dios bzri'ine' dxi'u gate quebe ne gunte' xezr lu xú nigá, <sup>10</sup> na' blé'ene' xel-la zri'i lazre' nigá na'a, lawe' da gusel-le' Jesucristo, weselá cheedxu, na' bzria xi'e xel-la dxenná bea chee xel-la

gute, ne blé'ene' bénneache ca gaca xezezi' lu ne'e xel-la nabán chadía chacanna, ca dxennáqueze dizra' chawe' da dxuchálajdxu.

<sup>11</sup> Dios bzué' neda' chee guchálaja' ca naca dizra' chawe' nigá, ne bene' neda' benne' gubáz chee' chee gusededa' benne' quebe zaj naque' judío. <sup>12</sup> Chee le na' dxedéa' xel-la zi' caní. Quebe dxapa stu'a ne chee da nigá, lawe' da núnbe'a Bénnea' nuxrén lazra', ne nezda' nape' xel-la waca cu'u chawe' da nuzúa' lu ne'e ca zrindxa zra na'.

<sup>13</sup> Bexru tipa ca naca dizra' da bsédeda' lue', ne quebe gusanu' xel-la dxeajlí lazre', ne xel-la zri'i lazre' da nápadxu lawe' da nácadxu bi chee Jesucristo. <sup>14</sup> Ne chee xel-la waca chee Be' Lá'azxa, Bénnea' zue' xichaj lázrdaudxu, bexru tipa da na' nuzúa Dios lu na'u.

<sup>15</sup> Ba nézenu' ca belún xúgute bi bíchedxu zaj zre'e naga nababa Asia. Gulebéaj xíchaje' neda'. Cá'anqueze Figelo, ne Hermógenes belune' tu zren benne' ca'. <sup>16</sup> Dxenaba' Xránadxu xexache lazre' benne' zaj zre'e lizre Onesiforo. Gúcale le' neda' zane' lásaqueze, ne quebe gudapa stue' chia' neda', xu'a lizre xia. <sup>17</sup> Gate ble'e xezre Roma, bexílaje' neda', na' bezrélene' neda'. <sup>18</sup> Dxenaba' Xránadxu xexache lazre' le' lu zra ná' gate xelá' Le'. Ba nézenu' ca gúcalele'ene' dxi'u lu xezre Efeso.

## 2

*Benne' wen zrin du lazre' chee Jesucristo*

<sup>1</sup> Lue', zri'ina', guzé tipa ne chee da xrlátaje da nápadxu lawe' da nácadxu bi chee Jesucristo. <sup>2</sup> Ca da bennu' bchálaja' lálawa benne' zan, benne' belexechebe' naca na da li, bzua na lu na' benne' zaj naque' li lazre', benne' xelezéquene' xulusédene' na benne' xula.

<sup>3</sup> Lue' dxal-la' gacu' benne' wen zrin du lazre' chee Jesucristo, guchaga lau' xel-la zi' ca tu benne' zeje' wedil-la. <sup>4</sup> Netú benne' zeje' wedil-la, benne' xu'e lu zrin chee xrane', quebe dxune' zrin xula, lawe' da dxaca lazre' xezaca ba lazre' xrane' chie'. <sup>5</sup> Cá'anqueze, benne' xu'e lu witaj quebe zrue'ene' da xexale' che quebe quitaje' ca naca chee na. <sup>6</sup> Cá'anqueze benne' dxaza dxa'ana, benne' dxúnle'e zrin, dxal-la' xezí' lu ne'e lina chee'. <sup>7</sup> Blaba lazre' ca da dxapa' lue', na' Xránadxu guzéajni'ine' lue' xúgute na.

<sup>8</sup> Bsa lazre' ca naca chee Jesucristo, guque' xrtia David, ne bebane' ládujla benne' gate, ca dxenná dizra' chawe' da dxuchálaja' neda'. <sup>9</sup> Ne chee dizra' chawe' nigá dxedéa' xel-la zi', ne xu'a lizre xia nigá ca tu benne' wen da zrinnaj, san dizra' chee Dios quebe nu seque' cu'u le na lizre xia. <sup>10</sup> Chee le na' xúgutę da ca' dxuchaga lawa' ne chee benne' ca' ba gucá'a Dios le', chee cá'anqueze benne' ca' xelexé' ne chee Jesucristo, ne xelexé' lu xabáa chadia chacanna.

<sup>11</sup> Da nigá naca na da li:

Che nuzúa cuínadxu gátędxu ca bzua cuina Le',

cá'anqueze waca bandxu nen Le'.

<sup>12</sup> Che dxedędxu xel-la zi',

na' nna béaquezdxu tu zren nen Le'.

Che quebe xechębedxu nácadxu bi chee Le', cá'anqueze Le' quebe xechębe' nácadxu bi chee'.

<sup>13</sup> Che dxi'u quebe nácadxu li lazre',

Le' nácaqueze' li lazre'.

Dios québequeze guchę'ę ca naque'.

*Tu benne' wen zrin du lazre'*

<sup>14</sup> Bsa lazre' bi bíchedxu ca', ne bsizre le' lu La Xránadxu québedxa xulutil-la dizra' ljwezre'. Xel-la dxutil-la dizra ljwezre quebe bi culuén napa na, san dxuxrinnaj na xichaj lázrdau benne' ca' dxelénne' na.

<sup>15</sup> Ben ba xuzre gacu' wen zrin du lazre' lau Dios, na' quebe gaca xel-la stu' chiu', lawe' da dxuchínenu' xrlátaje dizra' li. <sup>16</sup> Quebe gulapa na'u dizra' xálaze, ne dizra' sban da dxuluchálajze bénneache, da ca' dxulu-cuasa na bénneache lu da naca chee Dios.

<sup>17</sup> Dizra' sban caní dxuluxrinnaj na xichaj lázrdau bénneache ca dxun tu wę' da dxuzru na lu bęl-la' dxen cheędxu. Caní guca chee Himeneo, ne Fileto, <sup>18</sup> benne' ca' gulecuase' lu xel-la li, na' dxelennę' ba belxebán benne' gate, na' dxuluxrinnaję' xel-la dxeajlí lazre' chee bal-la benne'. <sup>19</sup> Dios ba gudixruj bi'ę xrtizre' da naca na ca tu lane xu'u chee xel-la dxeajlí lazre' cheędxu, da dxenná caní: Xránadxu núnbe'ę bi chię' ca' Cá'anqueze dxenná na: Xúgutę bi ca' chee Cristo québedxa dxal-la' xelunę' da caleļa.

<sup>20</sup> Tu lu xu'u zaca, quegá zra' tuze zriga xé'ena da zaj naca na oro ne plata, san cá'anqueze zaj zra' da zaj naca na xiaj ne xu. Dxuluchínene' da ca' zaj zácadxa lu da zaca, na' kezícadxa da ca' dxuluchínene' ájateje. <sup>21</sup> Nácadxu ca zriga xé'ena ca'.

Che nu benne' dxaca lazre' gaque' ca tu da zaca, chee gaque' benne' guchine Xránadxu lu zra xrlátaje chee', dxal-la' xexadxe' ca naca da caleļa ca'.

<sup>22</sup> Bxue xanne' cuinu' ca zaj naca da ca' dxelezá lazre' benne' cuide' ca', ne quebe gusanu' da xrlátaje da dxunu', ne ca dxeajlí lazru' Cristo, ne ca nazri'inu' Le', ne ca dxebeza zri lazru', da ca' dxunu' tu zren nen xúgutę benne' ca' du lazre' dxululáwizre' Xránadxu. <sup>23</sup> Quebe gulapa na'u dizra' xálaze, ne dizra' quebe zeaj xrlátaje, lawe' da nézenu' dxuluzúa na bénneache lu da ba xa'.

<sup>24</sup> Benne' wen zrin chee Xránadxu:

Quebe dxal-la' tıl-lalęne' benne'.

Dxal-la' gaque' zri'i lazre' nen xúgutę bénneache.

Dxal-la' gaque' benne' dxezeque' gusędęne' bénneache.

Dxal-la' gaque' zren lazre',

<sup>25</sup> ne dutę xel-la dxexruj lazre' gusízrene' benne' dxelunę' da caleļa.

Caní dxal-la' gunę' che ba benļa Dios xelexęájaje lazre' benne' ca chee xelúnbe'ę da li,

<sup>26</sup> na' xelexé' lu xralaj chee da xriwe', naga nuzrá na le', na' dxelunę' ca da dxenná le' na.

### 3

*Ca xelaca bénneache lu zra bzebe*

<sup>1</sup> Cá'anqueze dxal-la' nézele lu zra bzebe ni' gaca na stebe chee bénneache.

<sup>2</sup> Bénneache ca' xelaque':

Benne' xelexrí'ize cuina, ne xelexrí'ine' dumí.

Xulucá'ana szren cuine',

ne xulucá'ana cuine' ca benne' blau ca'.

Xelennę' schanni' chee Dios,

ne quebe xuluzúe' dizra' chee xra xrne'ę.

Xelaque' benne' quebe dxelezí le,

ne benne' quebe dxelapa ba lá'ana Dios.

<sup>3</sup> Quebe xelaque' zri'i lazre',

ne quebe xelexexache lazre' ljwezre'.

Xelennę' chee ljwezre', ne quebe xelenná be'ę cuine'.

Xelaque' benne' snia ca', ne xuluzúe' chalá'ala da naca xrlátaje.

<sup>4</sup> Quebe xelaque' li lazre' nen ljwezre'.

Xelaque' benne' dxelexube.

Xelęquene' zaj naque' benne' szrente.

Xelexezaca ba lázredxene' da ca' dxeledánene' quęzcala da naca chee Dios.



<sup>5</sup>Lácala xululé'e cuine' ca benne' zaj naque' chee Dios, quebe síalé le' xel-la waca chee Dios. Quebe gunu' tu zrén benne' ca'. <sup>6</sup>Ca zaj naca benne' caní zaj naca benne' ca' zjaque' tu tu xu'u, ne dxelezí xe'e nu'ula quebe zaj zie' du lazre', ne zaj zua da dxagu na zria lázrdawe' da naca chee xtul-le'. Xel-la dxelezá lazre' chee nu'ula caní nazrube xu na le'. <sup>7</sup>Lácala tu dxulusédezqueze' chee xel-la li, cabata' dxeléajni'iquezñe' na. <sup>8</sup>Ca belún Janes ne Jambres, benne' wazrá' ca', benne' ca' guledábage' Moisés, cá'anqueze dxelún benne' caní, dxeledábage' xel-la li. Zaj nazrinnaj xichaj lázrdawe', ne belexecuase' lu xel-la dxeajlí lazre' chee Dios. <sup>9</sup>Quebe bi xelezrué'e benne' caní, lawe' da xeleque bé'equeze xúgute' bénneache zaj naque' benne' xálaze, ca gulaca benne' chupa ca' guledábage' Moisés.

*Da bzébe da dxusebaga Pablo Timoteo*

<sup>10</sup>Ba benu':

Ca da bzéajni'ida' bénneache, ne blé'equeznu' ca bénqueza'. Nézenu' da dxaca lazra' guna', ne ca dxeajlí lazra' Cristo. Bchaga lawa' da guzxaca', ne nazrí'ida' xúgute' bénneache. Nézenu' ca naca xel-la zren lazre' chia'. <sup>11</sup>Blé'enu' ca guláu zi' xuzre' neda', ne ca gudéa' xel-la zi'.

Nézenu' xúgute' da guzraca' lu xezre Antioquia, ne xezre Iconio, ne xezre Listra.

Guláu zi' xuzre benne' ca' neda', na' Xránadxu bselé' neda' lu xúgute' da ca'.

<sup>12</sup>Xúgute' benne' ca', benne' dxelaca lazre' xelúnqueze' ca da dxenná Jesucristo, weláu zi' xúzrequeze bénneache le'. <sup>13</sup>Benne' ca' dxelune' da calela, ne benne' dxelezí xe'e welúndxaqueze' da calela. Xelezí xe'e bénneache, na' benne' xula xelezí xe'e benne' caní.

<sup>14</sup>Lue', guzé chacha ca da ba naxéajni'inu', da na' nuxrén lazru'. Nézqueznu' nu' bşde lue', <sup>15</sup>na' ne nácateu' bídau'te' ba núnbe'u da dxenná lu xiche lá'azxa, da dxezeque na guzéajni'i na lue', chee lau' lawe' da dxeajlí lazru' Jesucristo. <sup>16</sup>Xúgute' da naxúaj na lu xiche lá'azxa naca na da bzéajni'i Dios benne' ca' zaj naque' bi chee Le', ne naca na da dxuzéajni'i na dxi'u, ne da dxedil-la na benne' dxelune' da calela, ne da dxusizre na dxi'u, ne da dxulé'e na

dxi'u ca dxal-la' gundxu da xrlátaje, <sup>17</sup>chee gaca du lazre' bi chee Dios, na' gácabe' bi nazéde xanne chee gunbe' xúgute' da xrlátaje.

#### 4

<sup>1</sup>Lau Dios, ne lau Xránadxu Jesucristo, Bénéne' guchi'e chee benne' ban ca', ne chee benne' gate ca' gate ze'e xedajnná be'e, dxusebaga' lue' <sup>2</sup>guchálaju' dizra' chee Dios, ne gunu' ba xuzre guchálaju' che xuluzé naga bénneache, ca xuluzé nague'. Bzéajni'i benne' ca' duté xel-la zren lazre' chiu', ne ble'e le' ca da zaj nabague'. Gudilla, ne bsizre benne' ca'. Caní dxal-la' gunu' lawe' da wazrín zra québedxa xuluzé naga bénneache chee xel-la li da dxusédedxu. Ca dxelezá lázrqueze le', xulunné' zane' benne' xulusédengé' le' ca da dxelaca lázreze le' xelenne'. <sup>4</sup>Québedxa xuluzé nague' da li. Wuluzé nague' dizra' da dxuluzaze bénneache. <sup>5</sup>Na' lue', bzéajni'i cuinu' lu xúgute' da caní. Bchaga lau xel-la zi' da teu'. Bzua cuinu' chee guchálaju' dizra' chawe' chee Cristo, ne ben zrin da nabagu' chee Cristo.

<sup>6</sup>Ba bzrin zra guzúa' xel-la nabán chia' lu na' Dios, lawe' da ba zua bagu xelutie' neda'. <sup>7</sup>Du lazra' gudábage' benne' ca' guledábage' da naca chee Cristo. Tu bénzqueza' ca naca da li chee', ne ba bexuzre bena' da bsebaga Cristo neda' guna'. <sup>8</sup>Lawe' da bena' da xrlátaje, na'a ba dxebeza da dxexala' neda', da na' gunna Xránadxu neda' lu zra na', ne quegá tuza' neda' gunne' na. Cá'anqueze gunéruje' na chee benne' ca' duté xel-la zri'i lazre' chee' dxelebeze' zra xelé'e.

*Pablo dxulé'engé' Timoteo ca dxal-la' gunbe'*

<sup>9</sup>Ben ba xuzre xídazeu' xedajnná'u neda'.

<sup>10</sup>Ba guleaj xichaj Demas neda' lawe' da dxedánedxabe' da naca chee xezr la xu nigá, ne ba zexíajbe' Tesalónica. Crescente ba gusel-la'-be' zexíajbe' naga nababa Galacia, na' Tito gusel-la'-be' naga nababa Dalmacia. <sup>11</sup>Tuze Lucas zúabe' neda'. Bexilaj Marcos, na' guché'-be' tu zrén len lue', lawe' da wazéquebe' gácalebe' neda' lu zrin chee Cristo. <sup>12</sup>Tíquico gusel-la'-be' lu xezre Efeso. <sup>13</sup>Gate xidu', guágu' gabán chia' da nucá'ana' zezre Troas lizre Carpo. Cá'anqueze gu'u xiche ca' bcá'ana' ga na', ne da dxunte' na ba xen gu'u xiche ca' zaj naca na xide.

<sup>14</sup> Alejandro, benne' gubizre xia bsaca' zí'le'e neda'. Xránadxu gunézruje' lazruj chee' ca da bene'. <sup>15</sup> Bxue xanne cuinu' chee benne' nigá lawe' da ba gudábagale'e dizra' da dxuchálajdxu.

<sup>16</sup> Da nedxu lasa gate becheba' ca naca chia' lau benne' xu'u lawe' ca', netú benne' quebe gúcalene' neda'. Xúgute' buluzá' xíchaje' neda'. <sup>17</sup> Gúcale Xránadxu neda', ne btipe' lazra' chee guzéqueda' bchálaja' dizra' chawe' lau xúgute' benne' ca' quebe zaj naque' judío. Ca'an guca bselá Xránadxu neda' lu na' benne' ca', ca dxun benne' dxuselé' béadu ca' lu dxu'a bezre xixre', <sup>18</sup> na' guseláqueze' neda' lu xúgute' da calela, ne guxúequeze' neda' ca zrin zra xezrina' xabáa naga dxenná bea Le'. ¡Gaca báqueze Le'! ¡Ca'an gaca na!

*Benne' chee Cristo dxulugapa diuzre ljweze'*

<sup>19</sup> Dxugapa' diuzre Priscila, ne Aquilo, ne benne' zaj zra' lizre Onesíforo. <sup>20</sup> Erasto begá'anabe' xezre Corinto, na' bcá'ana' Trófimo lu xezre Mileto lawe' da quebe chawe' zúabe'. <sup>21</sup> Ben ba xuzre xidu' nigá dxácaté quebe ne chú'udxu beu' zaga. Eubulo, ne Pudente, ne Lino, ne Claudia, ne xúgute' bi bíchedxu zaj zre'e nigá dxulugape' lue' diuzre.

<sup>22</sup> Dxenaba' Xránadxu Jesucristo súalene' lue', ne dxenaba' Dios gune' da chawe' chee xúgutele le'e. ¡Ca'an gaca na!

## DIZRA' DA BZUAJ SAN PABLO CHEE TITO

*Pablo dxugape' Tito diuzre*

<sup>1</sup>Neda', Pablo, naca' wen zrin chee Dios, ne gubáz chee Jesucristo chee guzéajni'ida' benne' ca' ba gucá'a Dios chee xeleajlí lazre' Cristo, ne xelúnbe'e da naca li lazre' chee da naca chee Dios, <sup>2</sup>ne chee xelebeza lazre' xel-la nabán chadía chacanna, da guchebe lazre' Dios gunne' cheedxu gate za gunte' xezr la xu nigá. Dios quebe dxun lazre', <sup>3</sup>na' na'a, ca ba bzrin zra chee na, ba bzéajni'ine' dxi'u ca naca xrtizre' ne chee da bxrize' Dios neda' cu'a lban chee na. Dios nácaqueze' weselá cheedxu. <sup>4</sup>Dxuzúaja' da nigá chiu', Tito. Nacu' ca zrí'inequeza' lawe' da dxeajlí lázredxu Cristo. Dxenaba' lau Xradxu Dios, ne lau Xránadxu Jesucristo, Benne' weselá cheedxu, guné' chiu' da cháwedau', ne xexache lazre' lue', ne gunne' lue' xel-la dxebeza zri lazre'.

*Zrin da dxun Tito lu xezr la xu Creta*

<sup>5</sup>Bcá'ana' lue' lu xezr la xu Creta da naxechaj nisa chee gucá'ana chawu' da quebe begá'ana chawe' ládujla bíchedu ca', ne chee gunnit'u benne' gula chee xudau' tu tu xézredu ca', cáteze bxriseda' lue' gunu'. <sup>6</sup>Tu benne' gula chee xudau':

Dxal-la' gaque' benne' quebe bi zua da gagu na chie'.

Dxal-la' súalene' tuze nu'ula.

Zrí'ine' dxal-la' xelácabe' bi ba dxéajlí lázrebe' Cristo.

Quebe bi da zrinnaj dxelún zrí'ine' ca',

ne quebe gaca nu' gagu zria chee da dxelunbe'.

<sup>7</sup>Lawe' da xu'u lu ne'e zrin chee Dios, tu benne' dxuxúe' benne' zaj nababe' chee Cristo:

Dxal-la' gaque' benne' quebe bi zua da gagu na zria chee'.

Quebe dxal-la' gaque' benne' dxucá'ana szren cuine'.

Quebe dxal-la' gaque' benne' xichaj zra'a.

Quebe dxal-la' gaque' benne' dxé'aje' da dxuzuzre na le'.

Quebe dxal-la' gaque' benne' dxedí-lalene' bèneache.

Quebe dxal-la' gaque' benne' dxucúdeé'.

<sup>8</sup>Dxal-la' súateze' sí' lu ne'e benne' zjaque' lizre'.

Dxal-la' guné' da naca cháwedau'.

Dxal-la' gaque' benne' nna be'e cuine'.

Dxal-la' gaque' benne' xrlátaje.

Dxal-la' gaque' benne' nuzúa cuine' chee Dios.

Dxal-la' gaque' benne' dxuzéajni'i cuine'.

<sup>9</sup>Dxal-la' gaque' benne' nuzúa cuine' chee dizra' li.

Dizra' li naca na da bsede nu benne' le' chee séquene' gusízrene' benne' xubla ne chee da li da dxusédene', ne chee séquene' guzexruje' lazre' benne' ca' dxelenné' chee da li na'.

<sup>10</sup>Caní dxal-la' guné' lawe' da zrále'e benne' dxelenné' chee dizra' li, benne' dxelezí xe'e benne' xubla lu da xala da dxlenné'. Zane' benne' Israel dxelune' caní.

<sup>11</sup>Dxal-la' guzúa zriu' benne' dxelune' da caní lawe' da dxuluxrínna'je' xichaj lázxdau xúgute' benne' zaj zra' tu tu xu'u naga dxelú'e chee xulusédene' da quebe naca xrlátaje. Dxelune' caní chee xelezí' lu ne'e dumí. Da nigá da dxelune' naca na da calela.

<sup>12</sup>Tu benne' Creta naga zu', benne' gunné' waláz chee xudau' chee benne' ca', gunné': "Benne' Creta zaj nácaqueze' wen lazre', ne zaj naque' ca be snia ca', ne zaj naque' benne' wagu xrata', ne zrawede."

<sup>13</sup>Da li gunné'. Chee le' na' gudí-laqueze' benne' ca' chee xelaque' li lazre' ca dxeajlí lazre' Cristo, <sup>14</sup>ne chee quebe xuluzé nague' dizra' da dxuluzaze benne' Israel ca', ne ca naca da nadxixruj bea ca' da dxelún benne' ca' dxuluzúe' chalá'ala dizra' li.

<sup>15</sup>Xúgute' naca na xrlátaje chee benne' ca' zaj naca xrlátaje xichaj lázrdawe', san chee benne' ca' dxelune' da sban, ne québedxa dxeléajle' chee Cristo, quebe bi de da naca xrlátaje. Zaj nazrinnaj xichaj lázrdawe'.

<sup>16</sup>Benne' caní dxelenné' zaj núnbe'ene' Dios, san da dxelune' dxulé'e na quebe naca da li da dxelenné'. Zaj naque' benne' wen da sban, ne benne' wen da calela, ne quebe xelezéquene' xelune' tu da xrlátaje.

## 2

<sup>1</sup>Dxal-la' guchálaju' da ca' dxusede na dxi'u da naca li.

<sup>2</sup>Benne' gula chee xudau':

Dxal-la' xelaque' benne' dxelenná bé'e cuine'.

Dxal-la' xelaque' benne' du lazre'.

Dxal-la' xelaque' benne' dxuluzéajni'i cuine'.

Dxal-la' xelaque' li lazre' ca dxleajlí lazre' Cristo,

ne ca zaj nazrí'ine' Le',

ne ca naca xel-la zren lazre' chee'.

<sup>3</sup> Cá'anqueze nu'ula gula ca' chee' xudau':

Dxal-la' dxelapa ba lá'ana Dios ca naca xúgute' da dxelune'.

Quebe dxal-la' xelaque' benne' dxulutupe' dizra' bizruj.

Quebe dxal-la' xelaque' benne' dxelé'aje' da xuzuzre na le'.

Dxal-la' xulusédene' da naca xrlataje

'chee' gaca xulusédene' nu'ula cuide' ca'

chee' xelezrí'ine' benne' chee' ca', ne zrí'ine' ca',

<sup>5</sup> ne chee' xelenná be'e cuine',

ne xelaque' du lazre',

ne xulupe'e lizre',

ne xuluzúe' dizra' chee' benne' chee'.

Caní dxal-la' xelune' chee' quebe nu nne' schanni' chee' xrtizra' Dios.

<sup>6</sup> Cá'anqueze bsizre bi cuide' ca' chee' xelenná be'e cuíne'. <sup>7</sup> Ca naca da xrlátaje dxunu' lue' dxal-la' gulé'e na benne' ca' ca dxal-la' xelune'. Gate dxusédenu' benne' ca' dxal-la' gacu' li lazre', ne du lazre'. <sup>8</sup> Dxal-la' guchálaju' da naca li lazre' chee' quebe nu seque' si tizra le' na. Che gunu' caní, na' che nu benne' nnie' chee', wedué'equezne', lawe' da quebe sua tu da calela da dxunle.

<sup>9</sup> Bzéajni'i benne' ca' zaj nada'u chee' xuluzúe' dizra' chee' xrané' ca naca xúgute' da xelé' xrané' le'. Dxal-la' xelune' da xelexzaca ba lazre' xrané', ne quebe xelexenné' lau xrané'. <sup>10</sup> Quebe dxal-la' xelebane' da naca chee' xrané', san dxal-la' xelaque' li lazre', chee' xelexé'e benne' ca' da dxelún benne' caní, na' xelenné' chawe' chee' xrtizra' Dios, Benne' weselá chee'dxu.

<sup>11</sup> Dios ba blé'ene' ca naca da chawe' chee' chee' xelexé' xúgute' bénneache. <sup>12</sup> Da xrlátaje chee' Dios dxusede na dxi'u chee' québedxa gundxu da calela, ne ca naca xel-la dxezá lazre' da calela, san chee' nna be'e cuínadxu, ne gácadxu du lazre', ne gápadxu ba lá'ana Dios lu xezr la xu nigá <sup>13</sup> dxácaté ne dxebézadxu zra xelá' Dios szren, ne weselá chee'dxu Jesucristo nen xel-la szren chee', da na' dxebeza lázredxu. <sup>14</sup> Le' bzua cuine' lu na' benne' ca' belútie' Le' waláz chee'dxu dxi'u chee' bselé' dxi'u lu xúgute' da zrinnaj, na' bca'ana chawe' dxi'u chee' gácadxu bi

cheéqueze', ne chee' gundxu da xrlátaje du lázredxu.

<sup>15</sup> Da caní dxal-la' gusédenu' benne' ca'. Gudil-la benne' ca', ne bsizre-ne' duté xel-la dxenná bea chiu'. Quebe bi da calela gunu' chee' quebe nu si tizra lue'.

### 3

*Da dxal-la' xelún benne' zaj nababé' chee' Cristo*

<sup>1</sup> Bsa lazre' benne' bíchedxu ca' chee' xelune' ca dxuluchixruj benne' ca' dxe-lenná be'ene', ne benne' xu'u lawe', ne chee' xuluzúe' dizra' chee' benne' ca', ne chee' xelexúe' xelune' xúgute' da xrlátaje.

<sup>2</sup> Quebe dxal-la' xelenné' chee' nu benne', san dxal-la' xelaque' zren lazre', ne zrí'i lazre', ne dxexruj lazre' lau xúgute' bénneache. <sup>3</sup> Cá'anqueze dxi'u gate nate gú-cadxu benne' xala, ne quebe bzúadxu dizra' chee' Dios. Gudadxu calela, na' gunná be'e belá' dxen chee'dxu dxi'u, chee' bendxu ca naca xúgute' da guzá lázredxu, ne da bezaca ba lázredxu. Bendxu da zrinnaj, ne gú-cadxu xa lazre'. Belexuide bénneache dxi'u, na' bzrá'adxu ljwézredxu tudxu xetudxu.

<sup>4</sup> Gate Dios, weselá chee'dxu, blé'ene' da naca chawe' chee', ne xel-la zrí'i lazre' chee', <sup>5</sup> na' bselé' dxi'u, quegá lawe' da bendxu dxi'u tu da xrlátaje, san lawe' da bexache lazre' dxi'u. Bselé' dxi'u ne chee' da gudibe na dxi'u gate na' bexálajdxu, na' bucube Be' Lá'azxa chee' dxi'u. <sup>6</sup> Ne chee' Jesucristo, weselá chee'dxu, Dios ba núnnalé'e dxi'u Be' Lá'azxa chee', <sup>7</sup> chee' ne chee' da naca chawe' chee' gácadxu xrlátaje lau Le', ne zrué'edxu xel-la nabán chadía chacanna da dxebeza lázredxu. <sup>8</sup> Da caní zaj naca na da li. Dxaca lazra' gusízrequeznu' benne' ca' ca naca da caní chee' xelebé' gunne xue xelún benne' ca' da chawe', benne' ca' dxeléajle'e chee' Dios. Da caní zaj naca na da xrlátaje, ne da gaca xuluchine xúgute' bénneache. <sup>9</sup> Quebe gulapa na'u dizra' xala ca', ne dizra' dxuluzaze bénneache ca naca chee' zra xrtawe', ne dizra' da dxun na bénneache chupa la'a, ne da dxulutil-la bénneache da naca chee' da bchixruj be'e Moisés. Da caní quebe culuén zaj napa na. Dácheze naca na.

<sup>10</sup> Che nu benne' dxune' le'e chupa la'a, bsizre-ne' tu chupa lasa, ne che quebe dxenne' ca dxu'u le', bebéaje' ládujla le'e <sup>11</sup> lawe' da nézenu' nazrinnaj xichaj lázxdau

benne' caní, na' dul-la dxelúnqueze' ba nuzría xi na le'.

*Da dxal-la' gun Tito*

<sup>12</sup> Gate sel-la' Artemas u Tíquico naga zu', ben baxuzre xidu' xedajna'u neda' lu xezre Nicopolis lawe' da bache nuna' sua' nigá beu' zaga ca'. <sup>13</sup> Gúcale Zenas, benne' wedé dizra', ne Apolos, ca da séquenu'. Bnezruj benne' ca' ca da zaj nachínene' chee chjaque' lu neza chee', na' quebe bi xelexázejene'. <sup>14</sup> Cá'anqueze benne' zaj nabábalene' dxi'u dxal-la' xulusédie' xelune' da chawe', chee xelácalene' benne' dxelaxázejene', chee xelaque' benne' gu-chine Cristo.

*Pablo dxuzé' Tito dizra'*

<sup>15</sup> Xúgute benne' zralene' neda' dxulugape' lue' diuzre. Bgape diuzre benne' ca' zaj nazrí'ine' dxi'u lu da naca chee Cristo. Dxenaba' Dios gun chawe'e xúgutele le'e. ¡Ca'an gaca na!

## DIZRA' BZUAJ SAN PABLO CHEE FILEMÓN

### *Pablo dxugape' diuzre Filemón*

<sup>1</sup> Neda', Pablo, xu'a lizre xia lawe' da dxuna' zrin chee Jesucristo, nen bi bíchedxu Timoteo. Dxugápantu' lue' diuzre, Filemón, benne' nazrí'ite lázrentu'. Nacu' bi ljwézrentu' lu zrin chee Cristo. <sup>2</sup> Dxugapa' diuzre benne' bíchedxu ca' dxelefrague' lizru', ne nu'ula zandxu Apia, ne Arquipo, bi ljwézredxu nácabe' benne' zeje' wedil-la chee Cristo. <sup>3</sup> Dxenaba' Xradxu Dios ne Xránadxu Jesucristo guné' da chawe' chee, ne gunne' le'e xel-la' dxebe zri lazre'.

### *Ca naca chee Filemón*

<sup>4</sup> Dxápequeza' Dios xcalenu' gate dxuchálajlena' Le' ne dxeajsá lázrqueza' lue', <sup>5</sup> lawe' da ba benda' ca nazrí'inu' Xránadxu Jesucristo ne ca dxeajlí lazru' Le', ne ca nazrí'inu' xúgutē bi ca' chee Dios. <sup>6</sup> Dxenaba' lau Dios guzéajni'ine' benne' ca' dxeajlí lazre' Le' ne chee xel-la' dxeajlí lazre' chiu', ca naca xúgutē da chawe' ca' da nápadxu ne chee Jesucristo. <sup>7</sup> Xel-la' zri'i lazre' chiu', bi bicha', dxúnnale'e na neda' xel-la' dxebe, ne dxutipá na lazra', ca dxutipá na lazre' xúgutē bi chee Dios.

*Pablo dxenabe' Filemón tu da guné' chee Onésimo, bi na'u Filemón*

<sup>8</sup> Chee le na', lácala xu'u lu na'a nna be'eda' lue' ca dxal-la' gunu' lawe' da naca' gubáz chee Cristo, <sup>9</sup> dxata' xúeda' lue' lu xel-la' zri'i lazre' chee dxu, neda', Pablo, benne' gula, ne xu'a lizre xia lawe' da dxuna' zrin chee Cristo. <sup>10</sup> Dxata' xúeda' lue' tu da gunu' chee Onésimo, bi nácabe' ca zrí'inequeza' lu da naca chee Cristo, neda', xu'a lizre xia nigá.

<sup>11</sup> Gate nate Onésimo, bi na'u lue' gúcabe' tu bi wen da calēla, san na'a nácabe' wen zrin li lazre' chiu' lue', ne chia' neda'. <sup>12</sup> Dxesel-la'-be' naga zu'. Bezi' lu na'u-be', nácabe' bi nazrí'ite lazra'. <sup>13</sup> Guzá lazra' neda' xegá'analebe' neda' nigá chee gunbe' zrin chia' neda' waláz chiu' lue' dxácatē ne xu'a lizre xia lawe' da dxuna' zrin chee dizra' chawe'. <sup>14</sup> Quebe dxaca lazra' bi guna' che quebe naca na da nnau' lue', chee gácalēnu' neda' lawe' da naca na ca

dxaca lazru' lue', ne quegá lawe' da dxenná be'eda' lue'. <sup>15</sup> Becuasa Onésimo nen lue' tu chí'idau', san na'a súaletequezebe' lue', <sup>16</sup> quegá ca tu bi na'u lue', san gácabe' tu bi cháwedxa ca tu bi na'u lue', da zéaje na, gácabe' tu bi bichu' nazrí'ite lazru'. Neda' nazrí'ile'eda'-be', san lue' dxal-la' zrí'idxenu'-be', quegaze ca bēnneacheze, san cá'anqueze ca bi bíchedxu, bi chee Cristo.

<sup>17</sup> Chee le na', che dxéquenu' neda' ca bi ljwezru', bezi' lu na'u-be' ca dxezi' lu na'u neda'. <sup>18</sup> Che bi da calēla ba benbe' chiu', u che bi dxál-labe' chiu', neda' quízruja' na. <sup>19</sup> Neda', Pablo, dxuzúaja' da nigá nen ná'aqueza': Neda' quízruja' na, lácala neda' la gusá'a lazru' lue' dxál-laquezu' chia' cuínquezu'. <sup>20</sup> Lue', bi bicha', dxata' xúeda' lue' lu La Xránadxu, ben da guzúa na neda' lu da ba neza.

<sup>21</sup> Dxuzúaja' chiu' lawe' da nuxrén lazra' gunu' ca da dxapa' lue', ne nezda' gundxu' ca da dxenaba' lue'. <sup>22</sup> Cá'anqueze bcueza latja naga sua' neda' lawe' da dxebeza lazra' gun Dios da dxenábale Le', gunne' neda' lataj xida' xedajnná'a le'e.

### *Bi chee Cristo dxulugápabe' diuzre Filemón*

<sup>23</sup> Epafras, bi ljwezra', xú'ulebe' neda' lizre xia lawe' da dxunbe' zrin chee Jesucristo, <sup>24</sup> ne Marcos, ne Aristarco, ne Demas, ne Lucas, bi ca' dxelácalebe' neda' lu zrin chee Cristo dxulugápabe' lue' diuzre.

<sup>25</sup> Dxenaba' lau Xránadxu Jesucristo guné' da chawe' chee le'e. Ca'an gaca na.

## DIZRA' DA NAZÚAJ CHEE BENNE' HEBREO CA'

*Dios ba bchálajlene' dxi'u lu dxu'a Zrí'inequeze'*

<sup>1</sup>Dios bchálajlene' xra xrtáudxu ca' gate nate zane' lasa, ne zane' ca bchálaje' lu dxu'a benne' ca' buluchálaje' waláz chee'. <sup>2</sup>Na'a, lu zra caní, Dios ba bchálajlene' dxi'u lu dxu'a Zrí'inequeze'. Dios bene' xezr la xu nigá lu na' Zrí'ine' nigá, ne ba bene' naca chee' xúgute' da ca' bene'. <sup>3</sup>Zrí'ine Dios nigá naque' Benne' dxulé'ene' ca naca xel-la' szren chee' Dios, ne naque' ca da nácaqueze Dios, na' nuxre' xúgute' da ca' nuné', dxuchínene' dizra' chee' da nápalé'e na xel-la' waca. Gate ba gudúe' dul-la da nabágadxu xeajxedxé'e chálá'a xabéla chee lataj blau chee' Dios xabáa.

*Zrí'ine Dios nácadxe' blau ca gubáz chee xabáa ca'*

<sup>4</sup>Zrí'ine Dios nácadxe' blau ca gubáz chee xabáa ca' chee' Dios, ca naca La Cristo da bzua Dios, nácadxa na blau ca la gubáz chee xabáa ca'. <sup>5</sup>Dios cabata' guzre' tu gubáz chee' xabáa ca guzre' Cristo, gunné': Lue' nacu' Zrí'ina'.

Neda' nácaqueza' Xrau' na'a zra. Cá'anqueze cabata' guzre' tu gubáz chee xabáa ca gunné' chee' Cristo:

Neda' gaca' Xre',  
na' Le' gaque' Zrí'ina'.

<sup>6</sup>Gate bzué' Zrí'ine' lu xezr la xu nigá, gunné':

Xúgute' gubáz chee' xabáa ca' xelue lá'ane' Le'.

<sup>7</sup>Ca naca chee' gubáz chee' xabáa ca', Dios gunné':

Dsesel-le' gubáz chee' ca' ca tu be' da dxaca, ne dxuchínene' gubáz wen zrin chee' ca' ca tu xi'.

<sup>8</sup>Ca naca chee' Zrí'ine', gunná Dios:

Lataj blau chiu' lue', Dios, zúatequeze.

Xel-la' dxenná bea chiu' naca na xlátaje.

<sup>9</sup>Nazrí'inu' da xlátaje, ne dxezra'u da calela.

Chee' le' na' Dios chiu' ba bénnadxe' Lue' xel-la dxebé ca da bnézruje' bi ljwezru' ca'.

<sup>10</sup>Cá'anqueze guzre' Le':

Lue', Xran, nédxudauté' benu' xezr la xu.

Nen xel-la' waca chiu' benu' xabáa.

<sup>11</sup>Da caní weledé chee' na, san Lue' súatequezu'.

Xúgute' da caní welaca gula ca zra lana benneache.

<sup>12</sup>Na' xutubu' na ca tu ladxe', ne gucha'u na ca dxun tu benne' dxuché'e zra lané'.

Lue' zúaquezu' chadía chacanna, na' xel-la' nabán chiu' quebe téqueze chee na.

<sup>13</sup>Dios cabata' guzre' tu gubáz chee' xabáa ca guzre' Zrí'ine', gunné':

Gudxe'e chálá'a xabéla chia', cadxa guzúa' benne' ca' dxeledábague' Lue' zran ni'u.

<sup>14</sup>Xúgute' gubáz chee' xabáa ca' zaj naque' be' ca' dxelún zrin chee' Dios, na' dxesel-le' gubáz chee' xabáa ca' chee' xelácalene' benne' ca' dxelezi'e xel-la' weselá.

## 2

*Quebe dxal-la' guzúadxu chálá'ala xel-la' weselá*

<sup>1</sup>Chee' le' na' dxal-la' nna' xánnedxu dizra' da ba bendxu chee' quebe cuásadxu lu neza chee' xel-la' li. <sup>2</sup>Dizra' da gusel-la Dios gate nate lu na' gubáz chee' xabáa ca' guca na li lazre', na' xúgute' benne' ca' buluzúe' na chálá'ala, ne quebe buluzúe' dizra' ca da gunná Dios, Dios bdee' le' xel-la' zi' ca da dxal-la' xelezi'e. <sup>3</sup>¿Ájazra gaca ladxu che guzúadxu chálá'ala tu xel-la' weselá zren caní? Xránaquezdxu bchálaje' chee' xel-la' weselá nigá nédxute, na' gudé na' buluchálaj benne' ca' belenne' na, na' gulenné' naca na da li laudxu dxi'u. <sup>4</sup>Cá'anqueze ba bzua chacha Dios na ne chee' da dxelunna bea na, ne ne chee' da zren ca' ben Dios, ne ne chee' xel-la' waca zan ca', ne ne chee' Be' Lá'azxa, Bénnea' benne' dxi'u xel-la' waca ca', ca da guca lázrequeze Le'.

*Jesucristo ben cuine' ca nácadxu dxi'u*

<sup>5</sup>Dios quebe bzué' lu na' gubáz chee' xabáa ca' xezr la xu da za za', chee' da na' dxuchálajdxu na'a. <sup>6</sup>Naca na ca naxúaj na lu xiche lá'azxa, ca da gunná tu benne':

¿Ájazra naca benneache che Lue', Dios, dx-eajsá lazru' chee'?

¿Ájazra naca benneache, che Lue' dxe'u gunne xue chee' le'?

<sup>7</sup>Tu chí'idau'ze bzu' benneache látezdxa ca gubáz chee' xabáa ca'.

Nunu' chee' si'e xel-la' szren, ne xel-la' ba lá'ana,

ne bzu' lu ne'e xúgute da benu'.

<sup>8</sup>Xúgute ba bzu' na zran ni'a le'.

Caní naca, gate Dios bzu'e' xúgute zran ni'a bèneache, quebe bi de da quebe guzúa na dizra' chee' bèneache, na' quebe ne xuluzúa ca naca da ca' dizra' chee'. <sup>9</sup>Na'a dx-elé'dxdu Jesús, Bénnea' bzua Dios guque' tu chí'idau' látezdxa ca gubáz chee' xabáa ca'. Dios gúnene' gate Jesús waláz chee' xúgute bèneache lawe' da nazri'ine' bèneache, na' na'a nunézruje' Le' xel-la' szren, ne xel-la' ba lá'ana lawe' da gudé'e' lu xel-la' gute zi xa'.

<sup>10</sup>Dios bene' xúgute da zaj zua, na' zaj zua na chee' gaca ba Le'. Le' dxaca lazre' xezezi' xúgute bi chee' ca naca xel-la' szren chee'. Chee' le na' ben na ba xen ben Dios naca Jesucristo duté weselá cheedxu, ne chee' da zi' da xa' da gudé'e' chee' séquene' guselé' bèneache chadía chacanna. <sup>11</sup>Benne' caní dxegúa Jesús dul-la da zaj nabague', na' benne' caní, ne Léqueze' zaj naque' bi ca' chee' tuze Xradxu. Chee' le na' quebe dxe-dué'e Jesús nne' chee' benne' ca', zaj naque' bi biche'. <sup>12</sup>Naca na ca dxenná lu xiche lá'azxa:

Guchálajqueza' da naca chiu' Lue' lávela bicha' ca', na' gúl-laqueza' da güe lá'ana' Lue' ládujla benne' ca' zaj nazrague' lau Lue'.

<sup>13</sup>Cá'anqueze dxenná xiche lá'azxa:

Neda' guxrén lazra' Dios.

Cá'anqueze dxenná na:

Nigá zua' nen bi chia' ca', bi ca' benna Dios neda'.

<sup>14</sup>Lawe' da zaj naca belá' dxen benne' ca' zaj naque' bi chee', Le' ben cuine' belá' dxen chee' guzéquene' gutie', ne caní bene' chee' séquene' guzrí'a xi'e da xriwe', da na' napa na xel-la' dxenná bea gute na bèneache.

<sup>15</sup>Caní guca bselé' xúgute benne' gulaque' ca benne' zaj nada'u xúgute iza zaj naca bane' lawe' da belezrebe' xel-la' gute. <sup>16</sup>Da li quebe ble'e' nigá chee' gácalene' gubáz chee' xabáa ca', san naca na ca dxenná xiche lá'azxa: Ble'e' chee' gácalene' benne' zaj naque' zri'ine zre sua Abraham. <sup>17</sup>Chee' le na' ben na ba xen guque' duté ca zaj naca bi biche' ca', chee' séquene' gaque' lau Dios tu bxruze blau naque' li lazre', ne dxexache lazre' bèneache, ne chee' séquene' gun cuine' tu da dxegúa na dul-la zaj nabaga bèneache. <sup>18</sup>Lawe' da gudéqueze Le' xel-la' zi' gate guca lazre Satanás gun zréaje

Le', dxezéquene' na'a gácalene' benne' ca' dxun zréaje da xriwe' le'.

### 3

*Jesús nácadxe' blau ca Moisés*

<sup>1</sup>Le'e, benne' bícha'dau', nácale bi chee' Dios, lawe' da nácale benne' ca' ba gunné Dios, le nna' xanne' Jesucristo, Bénnea' gusel-la Dios chee' gaque' bxruze blau chee' da dxéajledxu. <sup>2</sup>Jesús nigá guque' li lazre' lau Dios, Bénnea' bzu'e' Le' lu zrin na' da ba bene', ca guca Moisés, guque' li lazre' lu zrin na' bene' lau benne' ca' gulaque' bi chee' Dios. <sup>3</sup>Jesús dxal-la' sidxe' xel-la' ba lá'ana ca da si' Moisés, ca dxaca chee' benne' dxune' tu xu'u, dxezidxe' xel-la' ba lá'ana ca da dxezi' xu'u ná'queze. <sup>4</sup>Tu tu xu'u naca na da ben benne', san Dios nune' xúgute da zaj zua. <sup>5</sup>Ca wen zrin chee' Dios guca Moisés li lazre' lu zrin na' bene' lau benne' ca' gulaque' bi chee' Dios, na' bchálaje' ca naca da nne' Dios ca te na'. <sup>6</sup>Cristo naque' li lazre' ca Zri'inequeze Dios laudxu dxi'u. Nácadxu ca lize Dios che se cháchadxu lu da dxuxrén lázredxu ca zrindxa zra cheajsé cheedxu, ne dxebéle'edxu lu da dxebeza lázredxu.

*Bi ca' chee' Dios xelexezi' lazre' naga zua Dios*

<sup>7</sup>Caní naca, naca na ca da dxenná Be' Lá'azxa lu xiche lá'azxa, dxenné':

Na'a, che le'e dxenle ca da dxenná Dios,

<sup>8</sup>quebe gácale lázrdau zide' ca gulaca benne' ca' guledábague' Dios, na' belune' Dios zede le'e xixre' lawe' lataj. <sup>9</sup>Belún xra xrtaule ca' neda' zede chee' guna' ca gunnía',

lácala belelé'eng' da bena' lávela chua iza.

<sup>10</sup>Chee' le na' bzra'a xichja' benne' ca',

na' gunnía': Tu dxelebéaj xíchajzqueze benne' caní neda',

ne dxeledábague' ca naca da bdxíxruja'.

<sup>11</sup>Chee' le na' bzra'a xichja' benne' ca', ne bzua chíchua' da gucha' benne' ca', gunnía' quebe xelexú'e naga xelexezi' lazre' naga zúaqueza' neda'.

<sup>12</sup>Le'e, benne' bícha'dau', le guxúe cuínale chee' quebe gaca lázrdau zide' netule le'e, quebe cuásale lau Dios ban lawe' da quebe dxéajlele chee' Le'. <sup>13</sup>Le gutipa lázrele tule xetule tu zra tu zra, dxácaté ne zúadxu lu zra da nunna Dios dxi'u, chee' quebe si xe dul-la netule le'e, na' gácale lázrdau zide'.

<sup>14</sup>Che se cháchadxu ca zrin zra cheajsé



cheędxu ca naca da dxuxrén lázrequezdxu nédxute, na'a nácadxu bi cheę Cristo.

<sup>15</sup>Naca na ca dxenná na lu xiche lá'azxa: Na'a, che le'e dxenle ca da dxenná Dios, quebe gácale lázrdau zide' ca gulaca benne' ca' guledábage' Dios.

<sup>16</sup>¿Nuzra benne' ca' belenne' dizra' cheę Dios, na' ca gudé na' guledábage' Dios? Zaj naca xúgute benne' ca' bebéaj Moisés lu xęzr la xu Egipto. <sup>17</sup>¿Nuzra benne' ca' bzra'a Dios le' lówela chua iza? Zaj naca benne' ca' belún dul-la, na' gulátie' le'e xixre' lawe' lataj. <sup>18</sup>¿Nuzra benne' ca' bzua chuchu Dios xrtizre' gate guzre' le' quebe xelexú'e naga xelexezi' lazre' naga zua Le'? Zaj naca benne' ca' guledábage' xrtizra Dios. <sup>19</sup>Na'a dxelé'edxu quebe guca xelexú'e lawe' da quebe guléajle'e cheę Le'.

#### 4

<sup>1</sup>Caní naca, dxácate ne zua cheędxu da nachebe lazre' Dios cheę xexú'udxu naga xezi' lázredxu naga zua Dios, dxal-la' guxúe cuínadxu gagáze nule le'e quebe xexú'ule. <sup>2</sup>Cá'anqueze dxi'u ba bendxu dizra' chawe' cheę Dios ca da belén benne' ca', san benne' ca' quebe bi da ba neza gulezi'e cheę dizra' da belenne' lawe' da quebe guléajle'e cheę na. <sup>3</sup>Dxi'u ba guxéajledxu, na' chú'udxu naga xezi' lázredxu, ca da gunná Dios gate gunné':

Cheę le' na' bzra'a xichja' benne' ca', na' bzua chúchua' da gucha' benne' ca', gunná':  
Quebe xelexú'e naga xelexezi' lazre' naga zua neda'.

Caní gunná Dios lácala ba bsexuzre' zrin cheę gate na' bente' xęzr la xu, <sup>4</sup>lawe' da naxúaj na lu xiche lá'azxa ca naca cheę zra gazre', dxenná na:

Lu zra gazre bezi' lazre' Dios lu zrin da bene'.

<sup>5</sup>Xetú dizra' da naxúaj na lu xiche lá'azxa dxenná na:

Quebe xelexú'e naga xelexezi' lazre' naga zua neda'.

<sup>6</sup>Benne' ca' belenne' dizra' chawe' nigá cheę Dios nédxute quebe belexú'e lawe' da quebe buluzúe' dizra' ca naca da gunná Dios. Na'a ne zaj zra' benne' dxal-la' xelexú'unqueze' naga xelexezi' lazre'. <sup>7</sup>Cheę le' na' Dios ba guléaje' xetú zra, gunné': Na'a zra. Caní naca lawe' da dxuchálajle' Dios dxi'u dxuchínene' dizra' da gunná David

gudé na', da naxúaj na lu xiche lá'azxa naga dxenná na:

Na'a, che le'e dxenle ca da dxenná Dios, quebe gácale lázrdau zide'.

<sup>8</sup>Chela belexezi' lazre' benne' ca' be Josué lataj gulu'e xęzr la xu na', quegá guchálajdxu Dios cheę xetú zra. <sup>9</sup>Caní naca na, de lataj xelú'u bi ca' cheę Dios naga xelexezi' lazre' naga zua Dios, <sup>10</sup>lawe' da xezi' lazre' lu zrin dxun nu benne' chu'e naga xezi' lazre' naga zua Dios, ca ben Dios, bezi' lazre' lu zrin ben Le'. <sup>11</sup>Dxal-la' gun zi lázredxu séquedxu chú'udxu naga xezi' lázredxu gagáze nu benne' guné' ca belún benne' ca' quebe guléajle'e.

<sup>12</sup>Dizra' cheę Dios naca na da bane, ne napa na xel-la' waca. Naládxu na ca tu xia da nalá na dxupa la'ate, ne dxaze na naga dxelezraga bénne'du xú'udxu, ne be' nácaquezdxu, ne dxaze na lu xichaj lázrdau bénneache, na' dxuchi'a na ca naca da dxugú'u bea bénneache ne ca da dxéquene' guné'. <sup>13</sup>Quebe bi de da ben Dios da seque' gucache cuina na lau Dios. Xúgute zaj nalá' na, ne zaj naxalaj na lau Bénnea' dxal-la' xulé'edxu Le' ca da bendxu.

*Jesús naque' bxruze blau zrente*

<sup>14</sup>Jesús, Zri'ine Dios naque' bxruze blau zrente cheędxu, Bénnea' ba bexu'e lau Dios. Cheę le' na' dxal-la' se típadxu lu da dxéajledxu cheę Dios. <sup>15</sup>Bxruze blau cheędxu wazéquene' xexache lazre' dxi'u che dxi'u dxate ni'a nadxu lu xel-la' dxeajlí lazre' cheędxu, lawe' da gudéqueze Le' lu xel-la' zi' ca' gate guca lazre da xriwe' gun zréaje na Le', ca da dxededxu dxi'u na'a, na' Le' quebe bene' dul-la. <sup>16</sup>Cheę le' na' dxal-la' bígadxu du lázredxu lu lataj blau cheę Dios cheędxu, Bénnea' nazri'ine' dxi'u, cheę xexache lazre' dxi'u, ne duté xel-la' xrlátaje cheę' gácalene' dxi'u gate nachínedxu nu gácale dxi'u.

#### 5

<sup>1</sup>Tu tu bxruze blau dxecá'a Dios ládujla bénneache, ne dxuzúe' le' cheę guné' zrin lau Dios waláz cheę bénneache ca', ne cu'e guna' lau Dios, ne gutie' béadu ca' ne cheę dul-la zaj nabaga' bénneache. <sup>2</sup>Cá'anqueze bxruze blau nigá dxate ni'a ne'e lu da ca' dxune' ca da dxaca cheędxu dxi'u. Cheę le' na' wape' xel-la' zren lazre' cheę benne' ca' quebe dxeléajni'ine', ne dxelune' da calela, <sup>3</sup>na' lawe' da dxate ni'a ne'e, dxal-la' gutie'

béadu ca' nę cheę dul-la da nabágaqueze', cáteze dxune' nę cheę dul-la da zaj nabaga xezicadxa bénneache.

<sup>4</sup>Quebe nu gaca gun cuina bxruze blau, san Diósqueze dxenné' bénnea', ne dx-unézruje' lę' xel-la' szren na', ca bene' cheę Aarón. <sup>5</sup>Cá'anqueze naca na cheę Cristo, quebe bzua cuine' bxruze blau, san Dios be'ę Lę' xel-la' szren na' ca da guzre' Lę': Lue' nacu' Zri'ina'.

Neda' nácaqueza' Xrau' na'a.

<sup>6</sup>Cá'anqueze naxúaj na lu xiche lá'azxa ca guzre' Lę':

Lue' nacu' bxruze blau chadía chacanna ca gúcaqueze Melquisedec.

<sup>7</sup>Gate zua Cristo lu xęzr la xu nigá, bchálajlene' Dios, ne guta' xuene' Dios nen chi'ę zizraj, ne gudxzérelę'e, lawe' da napa Dios xel-la' waca guselé' Lę' lu xel-la' gute, na' Dios benne' cheę' lawe' da gudape' Xre' ba lá'ana. <sup>8</sup>Ca'an guca, lácala naca Cristo Zri'ine Dios, bsédie' guque' wezúa dizra' nę cheę xel-la' zi' da gudéę, <sup>9</sup>na' gate guque' dutę Weselá cheędxu nę cheę da caní, nadxa guzéquenę' bselé' bénneache chadía chacanna, benne' ca' dxuluzúę' dizra' cheę', <sup>10</sup>na' Dios bzue' Lę' bxruze blau ca gúcaqueze Melquisedec.

*Quebe dxal-la' gusandxu xel-la' dxeajli lazre' cheędxu*

<sup>11</sup>Déle'ę da dxal-la' guchálaja' ca naca cheę da nigá, san naca na stębe guzėjajni'ida' le'e na'a, lawe' da quebe ne gaca chėjini'ile na. <sup>12</sup>Zane' iza ba guca dxėjajle cheę Cristo, na' ba gul-la' gusédele benne' xula ca naca cheę Lę', san dxun na ba xen nu guzėjajni'i le'e da xula da quebe nácatęca stębe ca naca dizra' cheę Dios. Ne nácale ca bidau' ne dxázrebe' nizre'. Quebe ne gaca gágule xel-la' wagu cheę benne' waca. <sup>13</sup>Benne' ca' zaj naca ca bidau' ne dxázrebe' nizre' zaj naque' benne' ca' quebe ne xuluchínenę' dizra' cheę xel-la' li. <sup>14</sup>Xel-la' wagu cheę benne' waca naca na cheę benne' ca' ba zaj nézenę' xelxúnbe'ę da naca da xrlátaje, ne da naca da calęla.

## 6

<sup>1</sup>Cheę lę na' québedxa dxal-la' guséd-edxu ca da bsédedxu nédxute' ca naca cheę Cristo, san chėjatęzedxu gusédedxu da naca cheę' cheę gácadxu benne' waca. Québedxa bi dxal-la' guchálajdxu cheę da du ca' da bsédedxu nédxute, ca dxal-la'

xexéaje lázredxu cheę da ca' bendxu da zaj nua na xel-la' gute, ne ca dxal-la' chęajlędxu cheę Dios, <sup>2</sup>ne ca dxal-la' xedxúadxu nisa, ne ca dxal-la' xuluzę nę'ę xíchajdxu, ne ca xelxebán benne' gate, ne ca gun Dios, guchi'ę da nun tu tu bénneache cheę gudéę' benne' ca' dxelunę' da calęla lu lataj ba xa' chadía chacanna. <sup>3</sup>Cheę lę na' chėjatędxu lu da naca cheę Cristo, che Dios gunnę' dxi'u lataj.

<sup>4</sup>Benne' ca' ba gulezi'ę ca naca xel-la' naxani' cheę Dios, ne ba gulezú lawe' xelúnbe'ę da dxunna Dios, ne ba gulezi'ę Be' Lá'azxa, <sup>5</sup>ne ba gulezú lawe' xelúnbe'ę da xrlátaje ca' cheę Dios ca naca da xelęzi'ę lu xęzr la xu da za za', <sup>6</sup>na' te na' che xuluzúę' Dios chalá'ala, québedxa gaca xelx-exéaje lazre' lawe' da gaca na ca xuludę'ę Cristo lę'ę xaga begúaj da xula, ne dxelún lę' cheę' lówela xúgute' bénneache. <sup>7</sup>Zaj naque' ca xęzr la xu da dxezi' na nisa xiuj. Che xęzr la xu na' dxunna lina chawe' cheę benne' dxelunę' na zrin, naca na da dxun chawe' Dios, <sup>8</sup>san che dxachuj na xechę', ne xixre' da quebe bi culuén napa na, quebe bi zaca xęzr la xu na', san naca na tu da xu'u de', na' naga chėjsetę chezxa na.

*Xel-la' dxebeza lazre' da nápadxu*

<sup>9</sup>Le'e, benne' bícha' dau', lácala dxuchálajntu' caní, dxuxrén lázrentu' ca naca cheęle le'e wazile le'e da chawe' cheę xel-la' wselá. <sup>10</sup>Dios dxune' da xlátaje, ne quebe gal-la lazre' ca naca zrin da ba benle, ne ca bzri'ile Lę' gate gúcalele benne' bíchedxu ca', ne ca da tu dxúnzquezle. <sup>11</sup>Dxaca lázrentu' chėjatęze tu tule gunle da caní dutę lázrdaule ca zrin zra cheajsę cheęle, cheę zrué'le da dxebeza lázrele. <sup>12</sup>Quebe dxaca lázrentu' xewédele. Dxaca lázrentu' gunle le'e ca belún benne' ca' guleajli lazre' Dios, ne gulaque' zren lazre', na' gulezi'ę ca da guchebe lazre' Dios gunézruje' cheę'.

<sup>13</sup>Gate guchebe lazre' Dios bi gunézruje' cheę Abraham, na' bzętajęze cuine' lawe' da québedxa nu zua nácadxa szren ca Lę', nu guzétaje', <sup>14</sup>gunné': "Da li gún-queza' da chawe' chiu' lue', ne gúzánqueza' zri'ine zre su'." <sup>15</sup>Abraham gulezę' dutę xel-la' zren lazre', na' cheę lę na' guzi'ę da guchebe lazre' Dios gunézruje' cheę'. <sup>16</sup>Gate nu dxuluzetaj bénneache, dxuluzétaje' benne' nácadxę' szren ca léęqueze', ne

gate bi dxuluzúa chúchue', ne dxuluzéta-  
je' Dios, québedxa bi de da bi xelenné'.  
<sup>17</sup>Cheë le na' Dios bzua chúchue' da guchebe  
lazre', ne bzetaj cuine', lawe' da guca lazre'  
gulé'ene' benne' ca' xelezí'e da guchebe  
lazre', Le' gungé' ca naca da guchebe lazre',  
ne quebe guché'e ca gungé'. <sup>18</sup>Caní naca, da  
chupa caní quebe gaca cha na, na' lu da caní  
Dios quebe gaca gun lazre', ne ne cheë da  
ca' Dios ba nunne' dxi'u tu da gun na dxi'u  
dipa lazre', dxi'u na' ba nézedxu dxuxúe  
Le' dxi'u, ne nuxrén lázredxu si' lu nnadxu  
da dxebeza lázredxu ca naca da gunne'  
dxi'u. <sup>19</sup>Da nigá dxebeza lázredxu nuxru  
chacha na bénne'du xú'udxu ca dxun tu  
xia da dxuxru chacha na tu da dxedá lawe'  
nísadau' gate zria na lawe' nísadau'. Da  
na' dxebeza lázredxu zúale na Cristo cuzru  
ladxe' da ze lu xudau' da zua xabáa, <sup>20</sup>naga  
guxú'u Jesús waláz cheëdxu cheë gusaláje'  
neza naga tedxu, na' Le' naque' tu bxruze  
blau chadía chacanna ca guca Melquisedec.

## 7

*Jesús naque' bxruze blau ca guca  
Melquisedec*

<sup>1</sup>Melquisedec nigá guque' wenná bea  
cheë xezre Salem, ne bxruze cheë Dios  
szrente. Gate ze za' Abraham lu wedil-  
la gate bzétaje' benne' wenná bea ca',  
na' Melquisedec nigá xeajchague' le', ne  
gunabe' lau Dios gungé' da chawe' cheë  
Abraham, <sup>2</sup>na' Abraham bnézruje' cheë le'  
tu cue' cheë da chi cue' ca' ca naca da  
bzrué'ene' lu wedil-la na'. La Melquisedec  
zéaje' na wenná bea xlátaje, ne lawe' da  
guque' benne' wenná bea cheë xezre Salem,  
da zéaje' na xel-la' dxebeza zri lazre', le' zéa-  
jequeze na wenná bea cheë xel-la' dxebeza  
zri lazre'. <sup>3</sup>Quebe naxúaj na zua xre', ne  
xrne'e, ne xra xrtawe', ne quebe naxúaj na  
che gúlaje', ne che gutie'. Caní naca na, da  
guca Melquisedec dxulé'e na ca naca cheë  
Zri'ine Dios, naque' bxruze blau chadía cha-  
canna.

<sup>4</sup>Le na' xque na'a ca szren guca  
Melquisedec, che bnezruj xra xrtáudxu  
Abraham cheë le' tu cue' cheë da chi cue'  
cheë da guqué'e lu na' wenná bea ca' lu  
wedil-la na'. <sup>5</sup>Ca naca da bdxixruj bea  
Moisés, bxruze ca', benne' ca' zaj naque'  
xrtia Leví dxal-la' xelezí'e tu cue' cheë da  
chi cue' ca' da xelizruj benne' Israel ca',

benne' zaj naque' xrtia ljwezre', lálaca  
zaj naque' zri'ine zre sua Abraham ca  
zaj nácaqueze benne' ca'. <sup>6</sup>Melquisedec,  
benne' quebe naque' xrtia Leví guzi'e  
tu cue' cheë da chi cue' ca' da gudizruj  
Abraham, bénnea' dxal-la' si'e da guchebe  
lazre' Dios. Cá'anqueze Melquisedec  
gunabe' lau Dios gungé' da chawe' cheë  
Abraham, <sup>7</sup>na' dxeleenná xúgute' bénneache  
nácadxa blau bénnea' dxenabe' lau Dios  
gungé' chawe' cheë benne' xula ca' quézcala  
bénnea' si'e da chawe' na' dxenabe'. <sup>8</sup>Na'a  
benne' ca' dxelezi'e tu cue' cheë da chi  
cue' ca' zaj naque' benne' dxelate, san ca  
naca cheë Melquisedec, naque' ca tu benne'  
naca bánqueze' lawe' da quebe naxúaj na  
lu xiche lá'azxa che gutie'. <sup>9</sup>Ca naca cheë  
Leví, ne ca naca cheë xúgute' bxruze ca' zaj  
naque' zri'ine zre sua Leví na', benne' ca'  
dxelezí'e na'a tu cue' cheë da chi cue' ca',  
wácaqueze nnadxu cá'anqueze benne' caní  
gulízruje' cheë Melquisedec tu cue' cheë  
da chi cue' gate na' bezrague' Abraham,  
<sup>10</sup>lawe' da wazeque' nnadxu ne zaj zua  
zri'ine zre sua Abraham lu be'l-la' dxen  
cheë', benne' quebe ne xelalaj gate na'  
bdxuaj Melquisedec xeajchague' Abraham  
na'.

<sup>11</sup>Benne' Israel ca' gulezi' lu ne'e da  
bdxixruj bea Dios lu na' bxruze ca' zaj  
naque' xrtia Leví. Chela guzeque' da belún  
bxruze ca' gun na li lazre' benne' ca' bu-  
luzúe' dizra' cheë da bdxixruj bea Dios na',  
na' quebe ben na ba xen la' xetú bxruze  
ca guca Melquisedec, ne quegá ca guca  
Aarón. <sup>12</sup>Che xezrá' ca dxal-la' gaca bxruze  
na', na' dxál-la'queze xezrá' da nadxixruj  
bea na'. <sup>13</sup>Xránadxu, Bénnea' naxúaj na  
cheë' gaque' bxruze ca guca Melquisedec,  
nababe' xetú cue' xrtia Israel ca', benne' ca'  
netue' quebe ne gaque' bxruze. <sup>14</sup>Naca bea  
na nababa Xránadxu xrtia Judá, na' Moisés  
quebe gunné' xelaca benne' caní bxruze.

<sup>15</sup>Da nigá naca béadxa na che bxruze cube  
na' dxal-la' gaque' ca guca Melquisedec,  
<sup>16</sup>ne bxruze cube nigá quebe gaque' bxruze  
ne cheë tu da nadxixruj bea da dxenná na  
nu xrtia dxal-la' gaque'. Gaque' bxruze  
lawe' da nape' xel-la' waca cheë tu xel-la'  
nabán da quebe te cheë na. <sup>17</sup>Naca cheë' ca  
da dxenná Dios:

Lue' nacu' bxruze chadía chacanna  
ca da guca Melquisedec.

<sup>18</sup> Caní guca, bedxúaj chálá'ala da bdxixruj bea Dios gate nate lawe' da quebe guzeque' bi gun na, ne quebe bi culuén gudapa na, <sup>19</sup>lawe' da quebe guca da gunná bea Moisés gun na bénneache li lazre'. Na'a nápadxu tu xel-la' dxebeza lazre' da cháwedxa, na' ne chee na dxebigadxu lau Dios.

<sup>20</sup> Gate Dios bene' Jesús bxruze, bzetaj cuine'. <sup>21</sup> Quebe bzetaj cuine' gate bzue' xezícadxa bxruze ca'. Gate bene' Jesús bxruze bzetaj cuine' ca da naxúaj na lu xiche lá'azxa, dxenná na: Xránadxu Dios bzetaj cuine', ne quebe guché'e xrtizre'.

Gunné': "Lue' nacu' bxruze chadía chacanna

ca da guca Melquisedec."

<sup>22</sup> Chee le na' Jesús dxun chúchue' tu xel-la' wezría da nácadxa chawe' ca da nedxu. <sup>23</sup> Xezícadxa bxruze ca', benne' gulezrá' nédxula ben na ba xen gulaque' benne' zan lawe' da gulate tu tue', na' quebe guca xeledé'. <sup>24</sup> Jesús naque' tu bxruze chadía chacanna lawe' da quebe gatié'. <sup>25</sup> Chee le na' dxezéquene' guselé' chadía chacanna benne' ca' xelebigue' lau Dios ne chee Le', lawe' da naca ban Le' chadía chacanna chee gudéé' dizra' chee benne' ca' lau Dios.

<sup>26</sup> Jesús naque' bxruze blau, bxruze na' dxechínedxu. Naque' lá'azxa, ne quebe bi da calela bene', ne quebe nabague' dul-la. Quebe naque' tuze ca zaj naca benne' dul-la, na' Dios nucá'ana szrendxe' Le' ca xúgute' da zaj zua xabáa. <sup>27</sup> Quebe naque' ca xezícadxa bxruze ca', benne' ca' ben na ba xen belutie' béadu ca' tu zra tu zra, béadu ca' buluzúe' nedxu ne chee xtúl-laqueze', na' ca gudé na' buluzúe' béadu xula ca' ne chee xtul-la bénneache. Jesús tu lásaze bzua cuine' ne chee dul-la zaj nabaga xúgute' bénneache. <sup>28</sup> Da bdxixruj bea Moisés dxuzúa na bxruze blau ca' zaj naque' benne' quebe zaj naque' li lazre'. Gate Dios bzetaj cuine' ca gudé bla' da nadxixruj bea na', bzue' tu bxruze blau naque' Zrí'inequeze', Bénnea' ben Dios naque' tu bxruze blau li lazre' chadía chacanna.

## 8

*Jesús naque' bxruze blau cheedxu*

<sup>1</sup> Da naca blaudxa chee da caní dxenantu' naca na da nigá: Zua tu bxruze blau cheedxu caní, Bénnea' dxe'e chálá'a

xabéla chee lataj blau chee Dios xabáa, <sup>2</sup> ne naque' bxruze blau dxune' zrin lu lataj lá'azxa li, da ben Xránadxu, quegá bénneache. <sup>3</sup> Xúgute' bxruze blau nuzúa Dios le' chee xelegú'e guna' lau Dios, ne xelútie' béadu ca' lau Dios. Chee le na' dxun na ba xen bi guzúa Cristo lau Dios. <sup>4</sup> La zua Cristo xezr la xu nigá, quebe gaque' bxruze lawe' da ne zaj zra' bxruze ca' dxelegú'e guna' ca nadxixruj bea da bde Moisés. <sup>5</sup> Zrin dxelún bxruze caní naca na ca tu da dxulé'eze na, ne ca tu zrúaze chee da na' zua xabáa. NezdXu naca na tu da dxulé'eze lawe' da gunná Dios, guzre' Moisés gate ba zue' gune' lataj lá'azxa: "Bxue xanne' gunu' xúgute' na cáteze naca da ble'eda' lue' lu xi'a na'." <sup>6</sup> Na'a bxruze blau cheedxu nigá dxune' tu zrin zácadxa lawe' da naque' wedé dizra' chee tu xel-la' wezría cháwedxa, da nun Dios ne chee da ca' guchebe lazre' da zaj naca na cháwedxa.

<sup>7</sup> La guca li lazre' xel-la' wezría da bene' nedxu, quebe ben na ba xen gune' xel-la' wezría gudxupe' na'. <sup>8</sup> Gate Dios gudíl-le' benne' ca' zaj naque' bi che, gunné':

Dxenná Xránale: Wazrín zra gate guna' tu xel-la' wezría cube nen benne' Israel ca', ne benne' Judá ca'.

"Quebe gaca na ca guca xel-la' wezría da bena' nen xra xrtaule ca' gate becá'a ne'e,

ne bebéaja' benne' ca' lu xezr la xu Egipto. Caní guna' lawe' da quebe buluzúe' dizra' xel-la' wezría da nuna', na' chee le na' guleaj xichja' benne' ca'.

Da ni dxenná Xránale.

<sup>10</sup> Xel-la' wezría guna' nen benne' Israel ca' ca te chee lu zra caní gaca na caní, dxenná Xránale:

Guzúa' da gudxixruj be'a lu xichaj lázrdau benne' ca',

ne guzúaja' na lu lázrdawe'.

Nadxa gaca' neda' Dios chee benne' ca', na' le' xelaque' bi chia' ca'.

<sup>11</sup> Quebe gun na ba xen xulusede ljwezre', ne quegá nu benne' xe'e bi biche': Benbea Xránadxu.

Xúgute' xelúnbe'e neda',

benne' cá'aze, ne benne' blau.

<sup>12</sup> Gunita lawa' chee benne' ca' ca naca da calela da zaj nune', ne québedxa cheajsá lazra' chee dul-la da zaj nune'.

<sup>13</sup> Gate dxuchalaj Dios chee tu xel-la' wezría cube, naca na lawe' da ba gunné' chee da nedxu naca na da gula, na' da ba dxaca na da gula, ne da gulasa la xenítete na.

## 9

*Lataj lá'azxa da zua lu xezr la xu, ne da zua xabáa*

<sup>1</sup> Gate ne zua xel-la' wezría nedxu, zaj de da nadxiruj bea ca dxal-la' xelún bxruze ca' tu lu xudau' da zua xezr la xu nigá. <sup>2</sup> Xudau' nedxu caní guca na tu xu'u xide zren. Lu lataj nedxu chee xudau' na' da nazí le na Lataj Lá'azxa zaj zua da dxusa'ní', ne tu ta'a naga zria xeta xtila lá'azxa. <sup>3</sup> Cuzre naga ze ladxe' gudxupe' zua xetú lataj da nazí le na Lataj Lá'azxa Blau. <sup>4</sup> Lu lataj nigá zaj zua tu tá'adau' naga xezxe xala, ne tu xi'ina chee xel-la' wezría da nun Dios, da nacu na oro du ca nácaqueze na. Lu'ule xi'ina na' xu'u tu zruágadau' xu'u na xeta maná. Cá'anqueze lu'ule na xu'u xágadau' da bexru Aarón da na' bezría na, ne zaj xu'u na xiaj ca' naga zaj naxúaj dizra' chee xel-la' wezría. <sup>5</sup> Lawe' xi'ina nigá zaj zua gubáz chee xabáa ca' zaj naca na oro, da dxululé'e na zua Dios na', na' zaj nugacu xrile na naga dxuluzríe' dxen ne chee dul-la zaj nabaga bénneache. Québedxa séquentu' guchálajntu' ca naca chee da caní na'a.

<sup>6</sup> Gate ba nagá'ana chawe' da caní, na' bxruze ca' dxelú'uweze' lu lataj nedxu chee lataj lá'azxa chee xelune' zrin chee xel-la' bxruze chee'. <sup>7</sup> Lu lataj gudxupe' dxu'u tuze bxruze blau tu lásaze tu tu iza, na' gate dxu'e na' dxun na ba xen gu'e dxen chee béadu ca' da guzríe' ne chee dul-la nabáaqueze', ne ne chee dul-la zaj nabaga bénneache ca'. <sup>8</sup> Be' Lá'azxa dxuzéajni'ine' dxi'u quebe naxalaj neza chee chú'udxu Lataj Lá'azxa Blau na' dxácate dxelune' zrin chee xel-la' bxruze chee' lu lataj nedxu chee lataj lá'azxa na'. <sup>9</sup> Xúgute da caní zaj naca na da dxululé'eze, da dxaca lu zra na'a zra, lawe' da guna' ca', ne dxen chee béadu ca' da dxuluzúa bxruze ca' lau Dios quebe gaca xelún na bénneache duté li lazre'. <sup>10</sup> Da caní zaj naca na chee da dxelé'aj dxelawe', ne chee da dxulucá'ana chawe' cuine', ne chee da nadxiruj bea ca naca chee bela' dxen chee bénneache, da ca' bzua Dios ca zrindxa zra guché'e da ca'.

<sup>11</sup> Na'a ba bla' Cristo, ne naca Le' bxruze blau chee da xrlátaje ca' da ba belelá'. Lataj Lá'azxa naga dxun Le' zrin ca bxruze blau naca na blaudxa, ne da li lázredxa. Quebe naca na tu da zaj nun bénneache, da zéaje na, quebe naca na chee xezr la xu nigá.

<sup>12</sup> Cristo ba guxú'e Lataj Lá'azxa Blau, quegá chee guzúe' dxen chee béadu ca', ne chee medu ca', san chee guzúe' dxen cheequeze', na' guxú'e ga na' tu lásaze lawe' da ba bene' xel-la' weselá chadía chacanna cheedxu dxi'u. <sup>13</sup> Da li dxen chee bezre, ne chee béadu ca', ne de chee bézredu ca', bea ca' dxuluzezxe' lu ta'a chee Dios, da ca' dxuluzré'e xichaj benne' ca' zaj naque' sban, zaj napa na xel-la' waca xelibe na benne' ca' cúzreze, ne chee xulucá'ana chawe na le' lau Dios. <sup>14</sup> Che caní naca na, wazéquedxa dxen chee Cristo, Bénnea' bzua cuine' lau Dios ne chee Be' Lá'azxa duté xel-la' li lazre' chee', na' dxen chee' na' dxibe na xichaj lázrdaudxu chee da bendxu da nua na xel-la' gute, chee séquedxu gundxu zrin chee Dios ban.

<sup>15</sup> Chee le na' naca Jesucristo wedé dizra' chee tu xel-la' wezría cube. Xel-la' gute chee Cristo dxun na zrin chee gaca gunitite lau Dios cheedxu ca naca dul-la da bendxu gate ne zúadxu lu xel-la' wezría nedxu, na' na'a benne' ca' ba gunné Dios waca xelezí'e ca naca da ca' guchebe lazre' Dios, da zaj naca na chadía chacanna. <sup>16</sup> Gate tu benne' dxune' tu xiche da dxelá'a na da de chee', dxun na ba xen gulé'edxu ba nate bénnea' chee gundxu ca dxenná xiche na'. <sup>17</sup> Xiche na' quebe bi seque na dxácate ne naca ban benne' bene' na, san gate ba gute bénnea', na' seque na. <sup>18</sup> Chee le na', xel-la' wezría nedxu na' guzúa chuchu na ne chee dxen da buluzríe' na. <sup>19</sup> Moisés blabe' xúgute da nadxiruj bea da zaj naxúaj na lu dizra' chee Dios lau xúgute bénneache, na' ca gudé na' guqué'e zrila' da nadxé na da xrna, ne tu zruze xaga hisopo, na' gusebise' na dxen chee medu ca', ne dxen chee béadu ca', ne nisa, na' bzre'e na lawe' xiche naga naxúaj xtizra Dios, ne bzre'e na bénneache ca'. <sup>20</sup> Nadxa guzre' benne' ca': "Dxen nigá naca na da dxuzúa chuchu na xel-la' wezría da nun Dios nen le'e." <sup>21</sup> Cá'anqueze bzra Moisés dxen lu lataj lá'azxa, ne lu xúgute da dxuluchínene' lu zrin da dxelún bxruze ca'. <sup>22</sup> Ca naca da bdxiruj bea Dios, dxal-la' xulucá'ana chawe' xúgute da ca' nen dxen,

na' che quebe nu gulalaj dxen, Dios quebe gunité lawe' chee bénneache ca naca dul-la da zaj nabague'.

*Dxen chee Jesucristo dxegúa na dul-la*

<sup>23</sup> Caní ben na ba xen xulucá'ana chawe' da ca' zaj naca na da dxululé'eze na ca zaj naca da zaj zua xabáa, na' da ca' zaj zua xabáa dxun na ba xen xulucá'ana chawe' na nen tu da zácadxa. <sup>24</sup> Cristo quebe guxú'e lu lataj lá'azxa da zaj nun bénneache, da na' naca na tu da dxulé'eze ca naca lataj lá'azxa li da zua xabáa, san guxú'e xabáqueze, naga zue' na'a lau Dios, dxudé' dizra' chegdxu dxi'u. <sup>25</sup> Bxruze blau chee benne' judío ca' dxu'e lu lataj lá'azxa blau tu iza tu iza chee guzú'e ga na' dxen da quebe naca cheéqueze'. Na'a Cristo quebe dxuzúa cuine' zane' lasa. <sup>26</sup> La ben na ba xen guzúa cuine' zane' lasa, cá'anqueze zane' lasa gatie' ca gudé bene' xezr la xu nigá. Na'a, gate ba bzrin zra dxaca li ca da guchebe lazre' Dios, Cristo ba ble'e tu lásaze, na' bzua cuine' chee cue' dul-la zaj nabaga bénneache. <sup>27</sup> Ca dxun na ba xen xelate xúgute bénneache tu lásaze, na' te na' Dios guchi'e da zaj nun tu tue', <sup>28</sup> cá'anqueze Cristo bzua cuine' chee gutie' tu lásaze chee gudú'e dul-la zaj nabaga' benne' zante. Te nigá xelé'e da gudxupe', quegádxa chee cue' dul-la, san chee xedajselé' xúgute benne' dxelebeze' Le'.

## 10

<sup>1</sup> Da nadxixruj bea da bde Moisés guca na ca tu zrúf-laze chee da chawe' ca' da dxal-la' xeledá', ne quegá naca na léqueze na. Chee le na' da ca' buluzúa bxruze ca' lau Dios ca nadxixruj bea na', da ca' buluzú'e tu iza tu iza, quebe gulezeque na xelún na benne' ca' li lazre', benne' ca' gulebigue' lau Dios. <sup>2</sup> La guzeque' da nadxixruj bea na' gun na benne' ca' li lazre', québedxa nu guzúa da ca' lau Dios lawe' da la guladxe benne' ca' lu dul-la zaj nabague', québedxa zaj nabague' dul-la. <sup>3</sup> Na'a da ca' buluzú'e lau Dios tu iza tu iza bulusá na lazre' chee dul-la da zaj nabague', <sup>4</sup> lawe' da quebe guzeque' dxen chee bezre ca', ne dxen chee béadu ca' cua na dul-la zaj nabaga bénneache.

<sup>5</sup> Chee le na', gate bla' Cristo lu xezr la xu nigá, guzre' Dios: Quebe dxaca lazru' guna', ne béadu ca' nu gute leba' lau'.

Na'a ba benu' bel-la' dxen chia' nigá.

<sup>6</sup> Quebe dxezaca ba lazru' béadu ca' dxuluzexé' lau', ne béadu ca' dxelutie' lau' chee cua na dul-la zaj nabague'.

<sup>7</sup> Nadxa gunnía': "Nigá za'a neda' chee guna' ca da nnau' Lue', Dios, ca naxúaj na chia' neda' lu xiche lá'azxa."

<sup>8</sup> Nédxula gunné': "Quebe dxaca lazru', ne quebe dxezaca ba lazru' guna', ne béadu ca' nu gute leba' lau', ne béadu ca' dxuluzexé' lau', ne béadu ca' dxelutie' lau' chee cua na dul-la zaj nabaga bénneache." Caní gunné' lácala zaj naca na da nadxixruj bea na xuluzú'e na lau Dios. <sup>9</sup> Ca gudé na' gunné': "Nigá za'a neda' chee guna' ca da nnau' Lue', Dios." Da nigá zéajé na gudé' lu waláz chee da ca' buluzúa bxruze ca' lau Dios, gate bzua cuine' lau Dios ne chee dul-la zaj nabaga bénneache. <sup>10</sup> Dios ba bca'ana chawe' dxi'u lu dul-la nabágdaxu lawe' da ben Cristo ca da gunná Dios gate bde cuine' lau Dios tu lásaze gate gutie' le'e xaga begúaj.

<sup>11</sup> Xúgute bxruze judío dxelune' zrin lau Dios tu zra tu zra, ne zane' lasa dxuluzrí'e lau Dios da cá'anqueze lácala da ca' cabata' xezezeque na xelegúa na dul-la chee bénneache. <sup>12</sup> Jesucristo bzrie' lau Dios tuze da dxugúa na dul-la, na' gudé na' gudxé'e chalá'a xabela chee Dios. <sup>13</sup> Zue' na'a dxebeze' zra gate guzúa Dios benne' ca' dxeledábague' chee' zran ni'e. <sup>14</sup> Caní dxune' lawe' da bca'ana chawe' chadía chacanna benne' ca' zaj naque' bi chee Dios. Caní bene' gate bzua cuine' lau Dios tu lásaze.

<sup>15</sup> Caníqueze dxenná Be' Lá'azxa lawe' da gunné' nédxula:

<sup>16</sup> Caní naca xel-la' wezría guna' nen benne' Israel ca' ca te chee lu zra caní, dxenná Xránale: Guzúa' da nadxixruj bea na' lu xichaj lázrdau benne' ca', ne guzúaja' na lu lázrdawe'.

<sup>17</sup> Ca gudé na' dxenné':

Cabátadxa cheajás lazra' chee dul-la da zaj nabague',

ne chee da calela ca' da zaj nune'.

<sup>18</sup> Ca'an naca, gate Dios ba bnite lawe' chee bénneache ca naca dul-la da zaj nabague', québedxa dxun na ba xen bi xuluzú'e lau Dios chee cua na dul-la ca'.

*Dxal-la' bigadxu lau Dios*

<sup>19</sup> Chee le na', benne' bícha'dau', waca chú'udxu lu lataj lá'azxa blau dutę lázrdaudxu ne chee dxen chee Jesucristo da blalje'. <sup>20</sup> Dxezrindxu lau Dios, dxededxu tu neza cube, da quebe naca na ca da xjá-calę bxruze ca' lu lataj lá'azxa. Dxededxu neza da naca Crístoqueze, Bénnea' zúale Dios xabáa. <sup>21</sup> Jesús naque' bxruze blau cheedxu, ne zaj xu'lu lu ne'e Bénneache chee Dios. <sup>22</sup> Chee le na' dxal-la' bígadxu lau Dios dutę lázrdaudxu ne dutę xel-la' dxejlí lazre' li, lawe' da bca'ana chawe' Le' lázrdaudxu chee québedxa sua da stebe lu xichaj lázrdaudxu ca naca chee dul-la, ne naca cheedxu cáteze ba gudibe' bel-la' dxen cheedxu nen da naca ca tu nisa chawe'. <sup>23</sup> Dخال-la' sua cháchadxu ca naca da dxebeza lázredxu chee da dxėjlejdxu, ne quebe guchadxu ca dxundxu, lawe' da gun Dios ca da guchebe lazre' gunę' cheedxu. <sup>24</sup> Dخال-la' quilaj lázredxu ca gundxu gá-calę ljwézredxu tudxu xetudxu chee zri'i ljwézredxu, ne gundxu da xrlátaje. <sup>25</sup> Quebe dxal-la' gusandxu xezrágadxu lau Dios ca dxelún bal-la benne'. Dخال-la' gutipa lazre' ljwézredxu tudxu xetudxu, na' gúndxadxu caní na'a lawe' da dxelé'edxu ba za bagu zra xelá' Xránadxu.

<sup>26</sup> Che núnbeadxu ca naca xel-la' li chee Dios, ne chėjdxadxu gundxu dul-la, québedxa bi de da cua na dul-la bágadxu. <sup>27</sup> Lu xel-la' dxezrebe síadxu da naca chee zra guchi'a Dios, ne chee xi' da guzrí'a xi na benne' ca' dxeledábague' chee Dios. <sup>28</sup> Gate nu benne' bzue' chalá'ala da gunná bea Mnoisés, ne gulezrá' chupa u chunna benne' belexechebe' chee da ben bénnea', na' belutie' bénnea', ne quebe belexache lazre' le'. <sup>29</sup> Tu da stebe zrendxa dxal-la' xelezi' benne' ca' dxuluzúe' chalá'ala Zri'ine Dios, ne dxulucá'ana dítaję' dxen chee', da blalje', dxen na' dxuzia chuchu na xel-la' wezrí'a chee Dios, ne dxucá'ana chawe na benne' ca', na' dxelenné' schanni' chee Be' Lá'azxa chee Dios, Bénnea' nazri'ine' le'. <sup>30</sup> Ba núnbeadxu Xránadxu, Bénnea' gunnáqueze': "Neda' xebéaj lazra' bénneache. Neda' gunézruja' lazruj chee benne' ca'." Cá'anqueze gunné': "Xránale guchi'e chee bénneache chee'." <sup>31</sup> Da dxal-la' xelezrebe bénneache naca da stebe da gun Dios benne' ca'. <sup>32</sup> Le gusá lázrele le'e iza da ba guledé, gate za guzítele xel-la' naxaní' chee Dios, na' dutę xel-la' zren

lazre' bchaga laule xel-la' zi' da gudele. <sup>33</sup> Bál-lale le'e bulucháchalene', ne belú'e le'e láwale bénneache, na' xebál-lale le'e guzáca'le gate guná'ale benne' ca' guledé' xel-la' zi' caní. <sup>34</sup> Bexache lázrele benne' gulezrá' lizre xia, ne dutę xel-la' dxebe bchaga laule da belune' gate gulequé'e ca da nápaie, lawe' da nézele nápaie xabáa da zácadxa na, ne da naca na da chadí'a chacanna. <sup>35</sup> Quebe gusanle ca da dxuxrén lázrele, lawe' da nusá xel-la' dxuxrén lazre' chee tu da zren da si'le. <sup>36</sup> Le'e dxal-la' gácale zren lazre' chee gunle ca da nna Dios, na' síle ca da guchebe lazre' Dios gunne' chee. <sup>37</sup> Naca na ca dxenná xiche lá'azxa: Xátedauze de, na' xelá' Bénnea' dxal-la' xelá', ne quebe chene'.

<sup>38</sup> Benne' naque' xlátaje lawa' neda', gata' chee' xel-la' nabán li lazre' lawe' da dxėjlej'e chia', na' che cueaj xíchaje' neda' quebe xezaca ba lazra' nen bénnea'.

<sup>39</sup> Na'a dxi' u quebe nácadxu tuze nen benne' ca' dxelebéaj xíchaje' Dios, ne xelebía xi'e. Nácadxu tuze nen benne' dxelėjlej'e chee Dios, na' xelélé' benne' du zaj xu'e.

## 11

### *Xel-la' dxejlí lazre'*

<sup>1</sup> Che nápadxu xel-la' dxejlí lazre' dxuxrén lazrdxu sídxu da dxebézadxu, ne nézquezdxu naca da li da quebe dxelé'edxu. <sup>2</sup> Xra xrtáudxu ca' belexegá'ane' xrlátaje lau Dios lawe' da gulėjlej'e chee'.

<sup>3</sup> Lu xel-la' dxejlí lazre' cheedxu nezdxu ben Dios xęzr la xu nigá, bchínene' dízra' chee', na' ca naca da dxelé'edxu na'a ben Dios le na nen da quebe nalá' gate nate.

<sup>4</sup> Abel, lu xel-la' dxejlí lazre' chee', bzue' lau Dios tu guna' da zácadxa na ca da bzua Caín, na' chee le na' Dios gunné' naca xlátaje Abel, ne guzi'e guna' chee'. Ca'an naca, lácala ba gute Abel, ne dxusédeng' dxi' u ne chee da benę' lawe' da gudape' xel-la' dxejlí lazre'.

<sup>5</sup> Enoc, lu xel-la' dxejlí lazre' chee', Dios beche'e le'. Quebe gutie', na' québedxa nu ble'e le' lawe' da beché Dios le'. Naxúaj na lu xiche lá'azxa da dxenná na, gate quebe ne xeché Dios le', ben Enoc ca da bezaca ba lazre' Dios. <sup>6</sup> Quebe gaca nu gun da xezaca ba lazre' Dios che quebe dxejlí lazre' Le'. Bénnea' dxebigue' lau Dios, dxun na ba

xen chéajlë'e zua Dios, ne xunézruje' chee benne' ca' dxelexílajë' Lë'.

<sup>7</sup>Noé, lu xel-la' dxeajlí lazre' chee', gate Dios guzre' lë' nédxula ca da dxal-la' gaca, bzuë' dizra' chee' Dios, ne bene' tu da zren da dxedá lawe' nísadau' chee' xeledá xrtie' ca'. Guxeajlí lazre' Noé Dios, san gulebía xí' bënneache zaj zre'e xezr la xu na', lawe' da quebe guleajlí lazre' Dios. Dios bca'ane' Noé xrlátaje lawe' da guxeajlí lazre' Lë'.

<sup>8</sup>Abraham, lu xel-la' dxeajlí lazre' chee', gate Dios gunné' lë', bzuë' dizra', ne guzë'e zéajë' tu lu xezr la xu da guchebe lazre' Dios gunézruje' chee'. Bdxuajë' lázrie', ne quebe nézene' naga zéajë'. <sup>9</sup>Lawe' da guxeajlí lazre' Dios, guzúa Abraham lu xezr la xu na' da guchebe lazre' Dios gunézruje' chee', naga naca xezr la xu chee' benne' zitu' ca'. Guzúë' tu lu xu'u ladxë', ne cá'anzeze ben Isaac, ne Jacob, benne' ca', cá'anzeze Dios guchebe lazre' xezezi' e da na' gunezruj Dios lë'. <sup>10</sup>Caní ben Abraham lawe' da guleza lazre' chu'e lu xezre na' da quebe te chee na, da na' guleche Dios, ne da ben Léqueze'.

<sup>11</sup>Cá'anzeze Sara, lácala ba nácalë'e benne' gula, ne quebe nu bi chee' dxalaj, san xel-la' dxeajlí lazre' chee' guque' xrna bidau'. Guzúa tu bi biu chee' lawe' da guxeajlí lazre' Dios gune' ca da guchebe lazre'. <sup>12</sup>Caní guca, Abraham, lácala ba gúxrulë'e, guxánlë'e zri'ine zre sue' ca naxán xuzre' da zaj dxë' dxu'a tu yegu zren, da quebe nazeque' gulábadxu.

<sup>13</sup>Xúgutë benne' caní gultatie', ne quebe ne xezezi'e da ca' nachebe lazre' Dios, san lawe' da guleajlí lazre' Dios, belelé'ene' na zítu'la, na' belehezaca ba lázrelëne' na. Caní bululë'ene' gulaque' ca benne' zitu', benne' guledeze lu xezr la xu nigá. <sup>14</sup>Benne' dxuluchálajë' caní dxululë'ene' dxeledé' dxelexílajë' tu lazrie'. <sup>15</sup>La buluwía lazre' ca naca xezr la xu naga gúsá'aque', na' waca xelexezrine' na'. <sup>16</sup>Gulaca lazre' tu lazrie' da naca na cháwe'dxa, da na' naca na lazrie' da zua xabáa. Chee' lë na' Dios quebe dxexedué'ene' gate dxelenná benne' ca' naque' Dios chee', na' nucueze' tu xezre naga xelezúa benne' ca'.

<sup>17</sup>Gate guca lazre' Dios nézene' ca naca xel-la' dxeajlí lazre' chee' Abraham, na' lu xel-la' dxeajlí lazre' chee' guchë'e Isaac chee' gutie'-be' lau Dios. Ba zuë' gutie' bi tu licha' chee' lácala ba nachebe lazre'

Dios, gunné': <sup>18</sup>“Ne chee' Isaac wazrálë'e zri'ine zre su'.” <sup>19</sup>Abraham bxren lazre' Dios wazéque'ne' gusebanë' benne' gate, na' waca nnadxu bezi' lu ne'e zri'ine' Isaac ládujla benne' gate.

<sup>20</sup>Isaac, lu xel-la' dxeajlí lazre' chee', guchebe lazre' xezezi' zri'ine' Jacob, ne Esaú da xrlátaje ca'. <sup>21</sup>Jacob, lu xel-la' dxeajlí lazre' chee', gate zua gatie', guchebe lazre' xezezi' tu tu zri'ine José da xrlátaje ca', ne be lá'ane' Dios, nuchiche tipe' xágadu nuxre'. <sup>22</sup>José, lu xel-la' dxeajlí lazre' chee', gate ba zua gatie' gunné' welexedxúaj benne' Israel ca' lu xezr la xu Egipto, ne bdxixruj be'e ca dxal-la' xelune' chee' zrita xu'e.

<sup>23</sup>Gate gulaj Moisés, xra xrne'e, lu xel-la' dxeajlí lazre' chee' bulucache' lebe' lawe' chunna beu', lawe' da belelé'ene' naca bidu na' xrtanlë'e, ne quebe belezrebe' benne' wenná bea, bënnea' bdxixruj be'e xelate bidu ca'. <sup>24</sup>Moisés, lu xel-la' dxeajlí lazre' chee', gate guque' benne' waca, quebe guca lazre' gaque' zri'ine nu'ula zri'ine benne' wenná bea chee' xezr la xu Egipto, <sup>25</sup>san guca lázredxe' téë' xel-la' zi'nen bi ca' chee' Dios quézcala sue' tu chí'dau' lu da ba neza chee' da naca dul-la. <sup>26</sup>Gúquene' nácadxa chawe' gate belún lala bënneache chee' ca da guca chee' Cristo, quézcala gape' ca naca da gunní'a chee' xezr la xu Egipto, lawe' da dxenné'e da gunezruj Dios lë'. <sup>27</sup>Moisés, lu xel-la' dxeajlí lazre' chee', bedxúajë' lu xezr la xu Egipto, ne quebe bezrebe' xel-la' dxezrá'a chee' benne' wenná bea, na' guzúa chúchuë' ca tu benne' dxelë'ene' Dios, Bënnea' quebe gaca nu le'e.

<sup>28</sup>Moisés, lu xel-la' dxeajlí lazre' chee', bene' Laní Pascua gate na' bdxixruj be'e xuluzrá benne' Israel ca' dxen lë'e xaga dxa xu'u chee' quebe gute gubáz chee' xabáa chee' xel-la' gute netú zri'ine benne' Israel ca', bi biu nedxu. <sup>29</sup>Benne' Israel ca', lu xel-la' dxeajlí lazre' chee', beledé' lu Nísadau' Xrna ca benne' dxeledé' lu xu bizre, san gate gulú'u benne' Egipto ca' naga ba guledé benne' ca', na' bezraga nisa na', na' gulebé' chi'i benne' Egipto ca', na' gultatie'.

<sup>30</sup>Benne' Israel ca', lu xel-la' dxeajlí lazre' chee', guzre'e ze'e da naxechaj na xezre Jericó ca gudé guledé benne' Israel ca' bezúate xezre na' tu tu lasa du gazre



zra. <sup>31</sup> Rahab, nu'ula dxezí' lu ne'e benne' zaj xu'e neza, lu xel-la' dxeajlí lazre' chee', quebe gutie' tu zren nen benne' Jericó ca', benne' quebe buluzúa dizra' chee' Dios, lawe' da gudapa le' ba lá'ana benne' Israel ca', benne' xeajlenná' lanē' xezre na'.

<sup>32</sup> ¿Bíradxa nnia'? Québedxa bi lataj napa' guchálaja' ca ben Gedeón, ne ca ben Barac, ne ca ben Sansón, ne ca ben Jefté, ne ca ben David, ne ca ben Samuel, ne ca belún benne' ca' gulenné' waláz chee' Dios.

<sup>33</sup> Benne' ca' lu xel-la' dxeajlí lazre' chee' gulezí'e xezr la xu ca' chee' benne' xula, ne gulenná' be'eng' cháwe'dau' benne' waláZR chee' ca', na' gulezí'e da guchebe lazre' Dios, lawe' da gúcalēne' le'.

Belelé' lu dxu'a beZre xixre' ca'.

<sup>34</sup> Buluxusule' xi' da dxéneaca.

Belelé' lu xia nalá.

Benne' ca' zaj nate ni'a na' belexaque' dipa lazre'.

Gulaque' benne' wala lu wedil-la, ne gulaca lu ne'e

da guta' chee' benne' ca' guledábague' le'.

<sup>35</sup> Nu'ula ca' belezí' lu ne'e benne' gate chee' ca', benne' belexabáne'.

Xebal-le' gulatiē' gate buludéē' le' ba xa', lawe' da quebe belú'e lataj nu gúsán le', chee' xelexrué'eng' xel-la' dxexebán chee' xelexi'e xetú xel-la' nabán da naca na da li.

<sup>36</sup> Xebal-le' belún le' chee', na' xebal-le' belú'e le', na' xebal-le' buluchéjē' le' du xia ne gulegu'e le' lizre xia.

<sup>37</sup> Belutiē' xebal-le' nen xiaj, na' xebal-le' gulecheze' le' nen xia.

Xebal-le' buludéē' le' lu da stēbe ca', na' xebal-le' belutiē' nen xia nalá.

Xebal-le' guledéē' nila na'la, zaj nacue' zra zrila' ne zra béadu ca'. Baxache' gulaque', na' guledéē' lu da zi' da xa', na' buluzaljē' le'.

<sup>38</sup> Bénneache zaj zra' lu xezr la xu nigá quebe zaj naca chee' xelexi'e ba neza chee' benne' caní. Tu guledázqueze' le'e xixre', ne lu xi'a ca', ne lu bluaj ca', ne lu bluaj xu ca'. <sup>39</sup> Xúgute' benne' ca' bca'ana chawe' Dios le' lawe' da guleajlí lazre' Le', san quebe ne xelexi'e ca naca da guchebe lazre' Dios, <sup>40</sup> lawe' da nucueza Dios tu da ná-cadxa chawe' chee'dxu dxi'u, chee' xelexaca benne' ca' li lazre' tu zren nen dxi'u.

## 12

*Dxal-la' nna'dxu Jesús*

<sup>1</sup> Lawe' da zaj naxéčaj benne' zante dxi'u, benne' ca' ba bululé'eng' ca' guléa-jle'e chee' Dios, dxal-la' guzúadxu chalá'ala xúgute' da dxululale na dxi'u, ne dul-la da naxel-la na dxi'u, na' lu dutē xel-la' zren lazre' chee'dxu gundxu zrin chee' Dios, da naca na ca dxezá' chégudxu chee' zrué'eledxu da dxelé'edxu tu chi na'. <sup>2</sup> Dxal-la' nna'dxu Jesús, Bénnea' dxunē' nápadxu xel-la' dxeajlí lazre', ne dxunē' li lazre' xel-la' dxeajlí lazre' na'. Jesús gudéē' xel-la' zi' le'e xaga begúaj, ne quebe bedué'eng' lawe' da guné'e xel-la' dxebé na' da dxebeza na Le', na' gudxé'e chalá'a xabēla chee' lataj blau chee' Dios.

<sup>3</sup> Le nna' xanne' ca da ben Jesús, gudéle'e xel-la' zi' da bulusaca benne' dul-la ca' Le'. Chee' le' na' quebe chajxréquele gunle zrin chee', ne quebe gute lázrele. <sup>4</sup> Ba gudíl-lalele dul-la, na' quebe ne gátele lu wedil-la na'. <sup>5</sup> Quebe gal-la lázrele le'e ca dxun Dios, dxuzéajni'ine' le'e ca zrí'inequeze', gate dxenné':

Zrí'ina', quebe guzú' chalá'ala da dxun Xranu' gate dxusízrene' lue', ne quebe gate lazru' gate dxedil-le' lue'. <sup>6</sup> Xránadxu dxusízrene' bi ca' nazrí'ine', na' xúgute' bi dxezí' lu ne'e ca zrí'inequeze' dxudéē'-be' xel-la' zi'.

<sup>7</sup> Le guchaga lau le'e xel-la' zi' da dxedele, lawe' da dxuxúe Dios le'e ca zrí'inequeze'. ¿Zra bi quebe dxusizre xrabe' lebe'? <sup>8</sup> Che Dios quebe dxusízrene' le'e ca dxusízrene' xúgute' bi chee' ca', quebe nácale zrí'inequeze Le'. Nácale ca bi lan ca'. <sup>9</sup> Gate ne nácadxu bídau', bulusizre xra xrnadxu dxi'u, na' gudápadxu le' ba lá'ana. Dxal-la' guzúadxadxu dizra' Xradxu zue' xabáa, na' gaca bandxu. <sup>10</sup> Xra xrnadxu bulusízrene' dxi'u tu chí'idauze ca da guléquene' chawe', san Dios dxusízrene' dxi'u chee' gaca tu da ba neza chee'dxu da naca na li lazre', chee' gácadxu lá'azxa ca naca lá'azxa Léqueze'. <sup>11</sup> Da li quebe dxedánnedxu da dxusizre xradxu dxi'u, san dxéquedxu zi', na' dxedé na', che dxéajni'idxu ca da dxusízrene' dxi'u, na' gundxu da xrlátaje ca', ne cueza zri lázredxu lau Dios.

*Quebe dxal-la' guzúadxu chalá'ala da dxenná Dios*

<sup>12</sup> Chee le na' le guzazraj na'le, ne zrífbele da ba dxelate ni'a na', <sup>13</sup> ne le sa' lu neza da zaj naca na li, chee quebe chegu ní'ale da quebe zaj zua chacha, ne chee xelexaca chacha na.

<sup>14</sup> Le gun ba xuzre suale lu xel-la' dxebeza zri lazre' nen xúgute bèneache, ne le gaca li lazre' lau Dios. Che quebe gunle caní, quebe gaca lé'elele Xránadxu. <sup>15</sup> Le guxúe xanne' chee quebe gusanle da chawe' ca' dxunna Dios le'e, ne chee quebe gaca ne-tule le'e ca tu xixre' sla' da dxulala na, ne dxuxrinnaj na da xezícala. <sup>16</sup> Le guxúe xanne' chee quebe gunle da sban, ne quebe guzúale chalá'ala ca da dxunna Dios, ca ben Esaú, bènea' bsane' xúgute da gunezruj xre' le' chee guzi'e tu cueze xel-la' wagu. <sup>17</sup> Ba nézele ca da guca gudé na', gate guca lazre' Esaú na' si'e da chawe' da naba xre' lau Dios, na' xre' bzué' le' chalá'ala, ne lácala gudxézrele'e, quebe guca xuché'e ca da ba bene'.

<sup>18</sup> Quebe dxaca chee ca da guca chee benne' Israel ca', gulebigue' naga zua tu xi'a, da na' wazeque' nu guchiche, ne naga dxala na xi', naga zua da chul-la, ne dxe' zren, ne dxaca be' bdunu'. <sup>19</sup> Belenne' gudxezre luzu da dxulcuezre', ne chi'i Dios bchálajlene' le'. Benne' ca' belenne' chi'i Dios na' gulata' xúene' québedxa guchálajlene' le'. <sup>20</sup> Ca'an guca lawe' da quebe gulezéquene' xuluchaga lawe' ca naca da bdxixruj be'e Dios, gunné': "Che tu béadauze guléajba' lu xi'a na', dxal-la' xelútié'-ba' nen xiaj u nen tu xia nalá xéche'ze." <sup>21</sup> Da na' belelé'ene' bchébele'e na le', na' Moisés gunné': "Dxezrízetea' xel-la' dxezrebe."

<sup>22</sup> Na'a le'e ba nabícale naga zua xi'a lá'azxa da nazí le na Sión, ne lu xezre chee Dios ban, da naca na Jerusalén da zua xabáa, ne naga zaj zra' gázxue gázxue gubáz chee xabáa, <sup>23</sup> ne naga zaj nazraga benne' ca' gulaca bi chee Dios nédxute, benne' ca' ba zaj naxúaj le' xabáa, ne lau Dios, Bénnea' guchi'e chee xúgute bèneache, ne naga zaj zra' be' gulácaqueze benne' ca' ba nun Dios le' li lazre', <sup>24</sup> ne lau Jesús, Benne' wedé dizra' chee xel-la' wezría cube, ne naga bzre'e dxen da dxuchalaj na da cháwedxa ca da bchalaj dxen chee Abel.

<sup>25</sup> Chee le na', le guxúe xanne' cuínale chee quebe guzúale chalá'ala Bénnea' dx-

uchálajlene' dxi'u. Quebe belegache benne' ca' buluzúe' chalá'ala Dios gate na' bchálajlene' le' lu xezr la xu nigá, ne quebe gáchedxu dxi'u che guzúadxu chalá'ala Bénnea' dxuchálajlene' dxi'u, zue' xabáa. <sup>26</sup> Lu zra na' gate gunná Dios, na' guzrú' xezr la xu nigá. Na'a dxenné': "Xetú lásaze guniba' quegaze xezr la xu nigá, san cá'anqueze xabáa." <sup>27</sup> Gate gunné': "Xetú lásaze", zéaje na xecá'a Dios ca naca da dxeledá, da ca' bene', na' xegá'ana da quebe seque' nu gutá. <sup>28</sup> Dxal-la' xedxu Dios: Xcalenu' lawe' da gunné' dxi'u tu lataj naga dxenná bea Le' da quebe seque' nu gutá. Dxal-la' güe lá'anadxu Dios du lázredxu ne duté xel-la' ba lá'ana, ca da dxezaca ba lazre', <sup>29</sup> lawe' da naca Dios cheedxu ca tu xi' da guzría xi na da sban.

## 13

### *Da dxezaca ba lazre' Dios*

<sup>1</sup> Quebe gusanle ca nazrí'i ljwézrele tule xetule ca bíchequezle. <sup>2</sup> Le gusá lázrele dxal-la' si' lu na'le benne' zá'aque' lízrele, lawe' da gate belún caní bal-la benne', gulez' lu ne'e gubáz chee xabáa ca', ne quebe guleque be'ene'.

<sup>3</sup> Le gusá lázrele gácalele benne' zaj xu'e lizre xia, gun cuínale ca benne' xú'uqueze lizre xia nen benne' ca'. Le gusá lázrele gácalele benne' ca' dxeledéé' xel-la' zi', gun cuínale ca benne' dxeledéqueze' xel-la' zi'.

<sup>4</sup> Xúgutele dxal-la' gápale ba lá'ana xel-la' wechaga na', ne gunle da xlátaje lu xel-la' wechaga na' cheele, lawe' da guchi'a Dios chee benne' ca' dxuluzúe' chalá'ala xel-la' wechaga na' chee', ne chee benne' ca' dxelune' da sban.

<sup>5</sup> Quebe sa lázrele xel-la' gunní'a. Le xezaca ba lázrele ca da nápale lawe' da ba gunná Dios: "Cabata' gusana' lue', ne quebe cueaj xíchajqueza' lue'." <sup>6</sup> Caní naca, du lázredxu waca nnadxu: Xrana' Dios dxácalene' neda'.

Quebe zreba' bi da gusaca bèneache neda'.

<sup>7</sup> Le gusá lázrele gácalele benne' ca' dxuluxúe' le'e, ne dxuluchálajlene' le'e dizra' chee Dios. Le na' xque ca da dxelúne', ne le chéajle chee Dios ca dxelún benne' ca'.

<sup>8</sup> Túzqueze ca naca Jesucristo neaje, ne na'a zra, ne chadía chacanna. <sup>9</sup> Quebe sile ca da dxuluchalaj benne' dxulusédene' da quebe naca na ca da naxúaj na lu xiche

lá'azxa chee Dios. Cháwedxa naca guzúa chuchu lázrdaudxu lu xel-la' zri'i lazre' chee Dios, ne quebe chéajledxu da dxeledx-ixruj bea benne' ca naca da dxal-la' xi'aj gágudxu, lawe' da benne' ca' zjácálenē' da ca' cabata' ne xelezí' ba neza ne chee da ca'.

<sup>10</sup> Bxruze judío ca' gulawē' béadu ca' belutie' lataj lá'azxa. Quebe zaj naca chee' xelawē' guna' da dxugú'udxu dxi'u chee Dios.

<sup>11</sup> Bxruze blau judío bzrie' dxen chee béadu ca' lu lataj lá'azxa blau ca tu guna' da dxejúa na dul-la. Buluzexze' da nagá'ana chee béadu ca' cúzrela xezre.

<sup>12</sup> Cá'anqueze gute Jesús cúzrela xezre na' chee bca'ana chawe' bénneache ne chee dxen cheéqueze'. <sup>13</sup> Le dxuaj, gundxu tu zren Cristo, lácála xuluzúa bénneache dxi'u chalá'ala ca belunē' chee Lē'. <sup>14</sup> Lu xezr la xu nigá quebe de cheedxu tu xezre da súatequeze. Dxebézadxu tu da za za'.

<sup>15</sup> Chee lē na' tu dxál-lazqueze güe lá'anadxu Dios nen dxú'aquezdxu ne chee Jesucristo, da naca na ca tu guna' da dxugú'udxu chee Dios. <sup>16</sup> Dxal-la' gusá lázredxu gundxu da xrlátaje, ne bi gunézrujdxu chee benne' ca' quebe bi zaj nape', lawe' da dxezaca ba lazre' Dios lē na.

<sup>17</sup> Le guzúa dizra' chee benne' ca' dxuluxúē' le'e, ne le gun ca da dxeleñné'. Benne' caní dxuluxúē' bénne'du xu'ule, ne xuluxudéē' lau Dios ca da zaj nunē'. Che gunle caní, na' benne' caní welunē' zrin chee' du lazre', ne quebe xelezúa xache', lawe' da che quebe gunle caní, quebe bi da ba neza gaca na chee.

<sup>18</sup> Le naba lau Dios gaca chawe' cheentu'. Quebe bi zua lu lázrdauntu' da dxagu na zria netu' lawe' da dxun zi' lázrentu' guntu' da xrlátaje ca naca xúgutē' da dxuntu'.

<sup>19</sup> Dxenaba' le'e nábale lau Dios gunne' neda' lataj xídazega' súalēna' le'e naga zúale.

<sup>20</sup> Dxenaba' lau Dios, Bénnea' dxunne' dxi'u xel-la' dxebeza zri lazre', ne bse-bane' Xránadxu Jesucristo ládújla benne' gate. Léqueze' naque' Benne' Blau Dxuxúē' Dxi'u, nácadxu zríla' chee', na' caní naque' lawe' da blájje' dxen chee' da bzua chuchu na xel-la' wezría chadía chacanna da bēne'.

<sup>21</sup> Dxenaba' Dios gunē' le'e li lazre' chee séquele gunle da xrlátaje ca da dxaca lazre' Lē', ne gunē' cheentu' ca da dxaca lazre' ne chee Jesucristo. ¡Gaca ba Cristo chadía chacanna! ¡Ca'an gaca na!

<sup>22</sup> Le'e, benne' bícha'dau', dxata' xueda' le'e gácale zren lazre' ca naca dizra' caní, da dxulusizre na le'e, na' látēga da du nigá dxuzúaja' chee. <sup>23</sup> Dxuzenda' le'e ba bedxúaj bi bíchedxu Timoteo lizre xia, ne che xelá' zé'ēbe', na' che'a-be' gate xedajnná'a le'e.

<sup>24</sup> Le gugapa diuzre xúgutē' benne' ca' dxuluchálajlēne' le'e dizra' chee Dios, ne le gugapa diuzre xúgutē' benne' bíchedxu ca'. Benne' zaj zre'ē xezr la xu Italia nigá dxulugape' le'e diuzre.

<sup>25</sup> Dxenaba' lau Dios gunē' da chawe' chee xúgutēle le'e. ¡Ca'an gaca na!

## DIZRA' CHEE DIOS DA BZUAJ SANTIAGO

*Santiago dxuzuaje' chee benne' ca' zaj nadxúaje' lazrie'*

<sup>1</sup>Neda', Jacobo, naca' wen zrin chee Dios, ne chee Xránadxu Jesucristo. Dxugapa' le'e diuzre. Nácale chazrinnu cue' zri'ine zre sua Israel, ne nase dínnajle du gabí'i xęzr la xu nigá.

*Xel-la' sina da za lu na' Dios*

<sup>2</sup>Benne' bícha'dau', dxal-la' béle'ele gate dxedele zane cue' da stebe ca', <sup>3</sup>lawe' da nézele gate dxedé' xel-la' dxeajlí lazre' cheele lu da stebe, da nigá dxundxa na le'e zren lazre'. <sup>4</sup>Le gun ba xuzre gaca li lazre' xel-la' zren lazre' cheele chee gácale benne' xrlátaje ne li lazre', ne quebe bi xázrjele.

<sup>5</sup>Che núlale le'e dxexázrjele xel-la' sina, le naba na lau Dios, na' Le' gunne' na le'e, lawe' da dxunézrujle'e Dios chee xúgute' bėnneache, ne quebe dxexezúene' zi'. <sup>6</sup>Dxal-la' nábale nen dutę xel-la' dx-eajlí lazre' cheele, ne quebe gun chupa lázrele. Benne' dxun chupa lazre' naque' ca xeajxruga chee nísadau' da dxua be' nila na'la. <sup>7,8</sup>Benne' dxunę' caní, ne quebe zrize dxezúa lázrdawe', ne quebe tuz ca dxun xichaj lázrdawe' quebe dxal-la' guéquene' bi da xunezruj Xránadxu chee'.

<sup>9</sup>Tu benne' bíchedxu naque' baxache' dxal-la' benę' lawe' da guzúa Dios le' ca tu benne' zaca. <sup>10</sup>Benne' nape' xel-la' gunní'a dxal-la' benę' gate gun Dios le' dxexruj lazre' lawe' da naca benne' gunní'a ca tu xiaj xixre' da quebe dxezi' béateca na. <sup>11</sup>Gate dxalaj gubizra, ne dxennálę'e na, na' dxe-bizre xixre' na', na' dxexruj xiaj chee na, na' dxedé' xel-la' xrtan chee na. Cá'anqueze gaca chee benne' gunní'a, xenitie' dxácate na' dxezi' lu ne'e xel-la' gunní'a.

*Ca naca chee da stebe ca' da dxededxu*

<sup>12</sup>Ba neza naca na chee benne' dxuchaga lawe' da stebe ca' dutę xel-la' zren lazre' chee', lawe' da che ba bedxúaje' chawe' lu da stebe da dxedéę', na' si' lu ne'e da nachebe lazre' Dios gunézruje' chee benne' ca' zaj nazri'ingę' Le'. <sup>13</sup>Gate nu benne' zua da dxegú'u xel-la' na le' chee gunę' da calęla, quebe dxal-la' guéquene' dxuzúa Dios da na' dxegú'u xel-la' na le', lawe' da

quebe bi de' da seque' xegú'u xel-la' na Dios chee gunę' da calęla, ne quebe bi guzúa Dios da xegú'u xel-la' na dxi'u chee gundxu da calęla. <sup>14</sup>Tu benne' zua da dxegú'u xel-la' na le' chee gunę' da calela gate xel-la' dxezá lazre' da calela chee' dxezá na le', ne dxenná be'e na le'. <sup>15</sup>Nadxa ca naca xel-la' dxezá lazre' da calela caní dxuluzán na dul-la, na' gate ba guzeque' zua dul-la na', na' dxute na bėnnea'.

<sup>16</sup>Benne' bícha'dau' nazri'ite' lazra', quebe güele lataj nu si xę le'e. <sup>17</sup>Xúgute' da zaj naca xrlátaje ne da zaj naca li lazre' da dxexidxu zá'aca na xabáa lu na' Dios, Bėnnea' benę' da ca' dxulusení na zran xabáa. Dios quegá dxuchá cuine', ne quebe dxuchę'e ca dxunę'. <sup>18</sup>Ca naca da guca lazre' Dios, ba benne' dxi'u xel-la' nabán. Bchínene' dizra' li chee', chee gácadxu ca tu lina nedxu chee', chee da ba ben Le'.

*Xel-la' dxucá'ana szren Dios da naca na li lazre'*

<sup>19</sup>Chee le' na', benne' bícha'dau' nazri'ite' lazra', tu tule le'e dxal-la' gácale ban lazre' chee xėnele, san dxal-la' cueza lázrele ca da nnęle ne quebe la' zrátatele. <sup>20</sup>Tu benne' xichaj zra'a quebe dxunę' da dxezaca ba lazre' Dios. <sup>21</sup>Chee le' na', le gusán xúgute' da sban ne ca naca da calela da dxanle'e na, na' dutę xel-la' dxexruj lazre' cheele le si' ca naca dizra' chee Dios da ba naxaza na lu xichaj lázrdaule, lawe' da wazeque' dizra' na' guselá na bėnne'du xu'ule.

<sup>22</sup>Le gun ca da dxulę'e dizra' na' le'e, ne quegá xėnezele na. Benne' dxėnzene' na dxezi' xęze cuine'. <sup>23</sup>Bėnnea' dxėnzene' dizra' na', ne quebe dxunę' ca dxenná na, naque' ca tu benne' dxennę'e lawe' tu lu wana'. <sup>24</sup>Dxennę'e ca naque', na' gate ze xeajze' na', na' dxal-la lazre' ca naque'. <sup>25</sup>Benne' dxenná' xánnie' ca da bdxixruj be'e Dios da naca na li lazre', ne da dxuselá na dxi'u, ne dxusėdie' ca naca na, ne quegá dxėnzene' na, quebe dxal-la lazrte' na. Che dxunę' ca naca na, benne' nigá gaca tu da ba neza chee' lu xúgute' da dxunę'.

<sup>26</sup>Che nu benne' dxėquene' naque' benne' dxucá'ana szren Dios, ne quebe dxezėquene' nna be'ene' luzre', benne' nigá dxezi' xęze cuine', na' ca naca xel-la' dxucá'ana szren Dios chee' dácheze naca na. <sup>27</sup>Xel-la' dxucá'ana szren Dios da naca na du lazre', ne da naca na da dxezaca ba lazre' Xradxu Dios naca na caní: Gácaleđxu

bidu ca' zaj nazebe, ne nu'ula ca' ba zaj nate benne' biu chee' gate zaj zue' lu da zi' da xa', ne quebe gundxu ca naca da sban chee xezr la xu nigá.

## 2

*Quebe guchale ca gunle chee tu tu benne'*

<sup>1</sup> Benne' bícha'dau', le'e dxéajlele chee Xránadxu, Benne' xabáa Jesucristo, quebe dxal-la' guchale ca gunle chee tu tu benne'. <sup>2</sup> Che chu'u tu benne' naga nazrágale, ne nácué' zra lané' da zaca, ne xu'u da naca na oro lu xrube ne'e, na' cá'anqueze che chu'u tu benne' xache', ne nácué' zra lané' tuzruj, <sup>3</sup> na' che dxelé'ele cháwedau' bēnnea' nácué' zra lané' da zaca, ne dxele le': "Gudxe'e nigala naga nácadxa na chawe'", na' dxele benne' xache' na': "Xeajsé na'la, u gudxe'e lu xu ná'teze." <sup>4</sup> Che dxunle caní, dxuchale ca dxunle chee tu tu benne', ne dxuchí'ale ca zaj naca bēnneache, quebe naca xrlátaje xichaj lázrdaule.

<sup>5</sup> Benne' bícha'dau' nazri'ite lazra', le xen da nigá: Dios ba guqué'e benne' ca' zaj naque' benne' xache' lu xezr la xu nigá chee xelaque' benne' gunní'a lu xel-la' dxeajlí lazre', ne chee xelezí' lu ne'e da nucueza Dios naga dxenná bea Le', da na' guchebe lazre' Le' guné'zruje' chee benne' ca' zaj nazri'ine' Le'. <sup>6</sup> Le'e dxuzúale chalá'ala benne' xache' ca'. ¿Quegá benne' gunní'a ca' benne' dxuluchíne' le'e, ne dxeleché'e le'e lau benne' xulawe' ca'? <sup>7</sup> ¿Quegá benne' gunní'a ca' benne' dxele'enu' schanni' chee da xrlátaje ca nazi' lala, dxennale nácale bi chee Cristo?

<sup>8</sup> Che da li dxunle ca dxenná da nadxixruj be'e Dios, da nácadxa blau ca da naxúaj na lu xiche lá'azxa, dxenná na: Bzri'i biche ljwezru' ca nazri'i cuinu', xrlátaje dxunle. <sup>9</sup> Na'a che dxuchale ca dxunle chee tu tu benne', dul-la dxunle, ne nabágale zria lawe' da quebe dxunle du ca bdxixruj be'e Dios. <sup>10</sup> Che tu benne' dxuné' ca zaj naca da nadxixruj be'e Dios, san che dxené'guene' ca naca tuze da nadxixruj be'ene', naca na cáteze nabague' zria ca zaj naca xúgute da nadxixruj be'e Dios. <sup>11</sup> Lé'queze Dios gunné': "Quebe gunle dul-la da dxichaj na xrba chee xel-la' wechaga na'", cá'anqueze gunné': "Quebe gútele benne'." Caní naca, che tu benne' quebe dxuné' dul-la da dxichaj na

xrba chee xel-la' wechaga na', san che dxutíe' benne', ba guné'guene' ca da nadxixruj be'e Dios. <sup>12</sup> Le'e dxal-la' guchálajle, ne gunle ca dxal-la' xelún benne' ca' guchi'a Dios ca da dxeluné', benne' ca' zaj nalá lu na' da gunná bea Le'. <sup>13</sup> Benne' ca' quebe dxelexexache lazre' chee benne' xula, Dios guchi'e ca da dxelún benne' ca', ne quebe xexache lazre' chee benne' ca', san benne' ca' dxelexexache lazre' chee benne' xula quebe bi zria xelebague' gate Dios guchi'e ca da zaj nun benne' caní.

*Ca naca chee xel-la' dxeajlí lazre', ne chee zrin dxundxu*

<sup>14</sup> Le'e, benne' bícha'dau', ¿bizra culuén gapa na che tu benne' dxenné' dxeajlí lazre' Cristo, na' quebe bi dxuné' da dxácalen nu benne' dxexá'zrjene'? ¿Wazeque' xel-la' dxeajlí lazre' na' guselá na le'? <sup>15</sup> Che zra' benne' bíchedxu u nu'ula zandxu, benne' quebe bi zaj de zra lané' u da xelawe', <sup>16</sup> na' che núlale le'e xe'le benne' ca': "Bexiajzé cháwedau'. Nazré'enu', ne gágugu' zri'", san che quebe bi guné'zruje ca da dxexá'zrjene', ¿bizra culuén gapa da na' gunnále? <sup>17</sup> Caní naca na chee xel-la' dxeajlí lazre'. Che quebe bi zaj de da chawe' da xululé'e na che dxeajlí lazre' bēnnea' Cristo, xel-la' dxeajlí lazre' chee' naca na ca tu da gate.

<sup>18</sup> Wannalja nu benne': Lue' dxenná'u dxéajle'u chee Cristo, na' neda' dxuna' da chawe' ca'. Ble'e neda' dxéajle'u chee Cristo ne quebe dxunu' da chawe' ca', na' neda' gulé'eda' lue' dxeajlí lazra' Cristo ne chee da chawe' ca' da dxuna'. <sup>19</sup> Dxéajle'u lue' zua tuze Dios. Nácaqueze na ca'. Cá'anqueze da xriwe' ca' dxeléajle na, ne dxelezrize na lu xel-la' dxelezrebe. <sup>20</sup> Lue', benne' xala, ¿dxaca lazru' gulé'eda' lue' naca xel-la' dxeajlí lazre' ca tu da gate che nu benne' dxeajlí lazre' Cristo na' quebe bi zaj de da chawe' da xelunna bea na? <sup>21</sup> ¿Ajzra guca chee xra xrtáudxu Abraham guque' benne' xrlátaje lau Dios? Guca na ne chee da be'ne' gate guxúe' zrí'ine' Isaac lu bdupa xiaj chee guzeze'-be'. <sup>22</sup> ¿Quebe dxele'enu'? Ca da be' Abraham dxulé'e na guxeajlí lazre' Dios, na' xel-la' dxeajlí lazre' chee' guca na du lazre' ne chee da be'ne'. <sup>23</sup> Caní guca li ca da dxenná na lu xiche lá'azxa: Abraham guxeajle'e chee Dios, na' Dios blé'ene' le' benne' xrlátaje. Na'

bchálaje' ca naca chee Abraham, gunné': "Bi zrágaqueza', Abraham."

<sup>24</sup> Na'a dxelé'ele Dios dxez' lu ne'e tu benne' ne chee da chawe' da dxuné', ne quegá tuze lawe' da dxeajlí lazre' Le'. <sup>25</sup> Cá'anqueze guca chee Rahab, nu'ula wen da sban. Nu'ula nigá gulu'e lizre' benne' ca' gusel-la Josué, na' bsi'e benne' ca' neza xula chee belelé' lu na' benne' ca' dxjaque' wedil-la, na' ne chee da bene', Dios guz' lu ne'e nu'ula na'. <sup>26</sup> Ca naca chee bela' dxen cheedxu, che ba bedxúaj be' chee na, ba nate na, cá'anqueze naca chee xel-la' dxeajlí lazre' cheedxu. Che quebe bi zaj de da chawe' da xululé'e na dxeajlí lazrdxu Cristo, naca na ca tu da gate.

### 3

#### *Ca naca chee lúzredxu*

<sup>1</sup> Benne' bícha'dau', quebe dxal-la' gun cuínale benne' dxulusede dizra' chee Dios, lawe' da nézele ca gun Dios, guchi'a xánnedxe' chee da dxundxu dxi'u, dxuchálajdxu xrtizre'. <sup>2</sup> Xúgutedxu dxúnle'edxu da calela. Che nu benne' quebe bi da calela dxuné' ca naca da dxuchálaje', naque' benne' li lazre', na' wazéquene' nna be'ene' ca nácaqueze bela' dxen chee'. <sup>3</sup> Gate dxugú'udxu xia dxu'a bzrina' chee gunba' da dxaca lazrdxu, wazéquedxu nna be'edxu dutéba'. <sup>4</sup> Le na' xque ca naca chee da ca' dxeledán lawe' nísadau'. Lácala zaj naca na da zri'a, na' be' da dxuzriga na le na dxacále'e na, benne' dxusé'e na dxuchíne' tu xágadauze, na' dxenná be'ene' na chee cheaj na naga dxaca lazre' le'. <sup>5</sup> Cá'anqueze naca chee lúzredxu. Naca na tu da dauze da naca chee bela' dxen cheedxu, na' da zrenté da dxenná na. Tu xi'dauze waca guzezxé na tu xi'a zren. <sup>6</sup> Lúzredxu naca na ca tu xi'. Lúzredxu naca na ca tu xezr la xu sban da zua lu bela' dxen cheedxu, ne dxuxinnaj na du ca nácadxu. Zúale ca tu xi' lúzredxu da za' lataj ba xa', ne naca na ca tu da dxegú'u na xi' ca naca xúgute da dxundxu. <sup>7</sup> Wazeque' nu benne' nna bé'ene' xúgute be' xixre' ca', ne be' zaj zua xrila, ne be' snia ca', ne be' zaj zra' lu nísadau', ne ba gunná bé'ene'-ba'. <sup>8</sup> Quebe nu benne' dxezéquene' nna bé'ene' duté da dxenná lúzre'. Naca na tu da calela da quebe dxue na lataj nu nna be'e le na, ne naca na ca tu be' snia, be' dxúteba' bèneache ca'. <sup>9</sup> Nen lúzredxu

níqueze dxue lá'anadxu Xradxu Dios, ne nen le na dxennéquezdxu da calela chee bèneache, benne' ca' nun Dios na' lu'a le saca Léqueze'. <sup>10</sup> Lu dxú'adxu ná'queze dxeledxúaj da xrlátaje ne da calela. Benne' bícha'dau', da nigá quebe dxal-la' gaca na ca'. <sup>11</sup> ¿Waca galaj nisa chawe' ne nisa sla' lu tuze beaj? <sup>12</sup> Benne' bícha'dau', ¿waca tu xaga higo cuía na da zixre chee xaga olivo? ¿Waca tu lba uva cuía na da zixre chee xaga higo? Cá'anqueze, tu beaj quebe gaca gunna na nisa xene', ne nisa zri lazre'.

#### *Xel-la' sina da naca li lazre'*

<sup>13</sup> Che zua tu benne' ládujla le'e naque' benne' sina, ne dxéajni'ine', dxal-la' gulé'ene' na ne chee da chawe' da dxune' duté xel-la' dxexruj lazre' chee' da dxunexruj xel-la' sina le'. <sup>14</sup> Che zua lu lázrdaule xel-la' zre'e lazre' ne xel-la' xa lazre', quebe dxal-la' gucá'ana szren cuínale ca naca xel-la' sina chee lawe' da caní nnele da wen lazre' chee da naca da li. <sup>15</sup> Xel-la' sina caní quebe naca na chee Dios. Naca na chee xezr la xu nigá, ne chee bèneache, ne za na lu na' da xriwe'. <sup>16</sup> Naga zua xel-la' zre'e lazre' ne xel-la' xa lazre', na' zaj zra' benne' wechacha ca', ne dxeluné' xúgute da calela. <sup>17</sup> Benne' zaj nape' xel-la' sina da dxunna Dios zaj naque' du lazre', ne zren lazre', ne dxe'ene lazre', ne dxexruj lazre'. Dxelexache lazre' ljwezre', ne dxeluné' da chawe'. Zaj naque' li lazre' ne quebe dxeluné' cuzreze da chawe'. <sup>18</sup> Benne' dxelebeche zrie' da ba xa' dxeluné' tu zrin da naca ca tu binne da dxunna na da chawe'.

### 4

*Ca naca chee benne' zaj nazri'ine' da zaj naca chee xezr la xu nigá*

<sup>1</sup> ¿Bizr chee na' dxedíl-lale ne dxe' da ba xa' ládujla le'e? Dxaca caní lawe' da dxezá lázrele da zaj naca chee da calela, da dxuluzúa na le'e lu da ba xa'. <sup>2</sup> Le'e dxaca lázrele bi gápale, na' lawe' da quebe dxezrué'ele na, na' dxútele benne'. Dxezá lázrele tu da síle, na' lawe' da quebe dxezéquele síle na, na' dxedíl-lale ljwezrele, ne dxebéquele da ba xa'. Quebe dxezile ca da dxezá lázrele lawe' da quebe dxenábale na lau Dios. <sup>3</sup> Che dxenábale na, quebe dxezile na lawe' da dxenábale na calela, lawe' da dxedánele na chee guchínele na ca da dxaca lázrele. <sup>4</sup> Le'e, benne' quebe nácale li lazre', ¿quebe

nézele che nu benne' dxedánnene' da calela da de lu xezr la xu nigá, benne' nigá dxecuí-dene' Dios? Núteteze benne' dxaca lazre' si'e ba neza ca da dxaca lu xezr la xu nigá naque' benne' dxecuí-dene' Dios. <sup>3</sup> Chee le na' dxenná xiche lá'azxa: Be' da nuzúa Dios lázrdaudxu cadite dxe'e gunne xue cheedxu. <sup>4</sup> Dios dxácalędxene' dxi'u lu xel-la' xrlátaje chee', ca dxenná xiche lá'azxa: Dios dxezré'e benne' ca' dxulucá'ana szren cuina, na' dutę xel-la' xrlátaje chee' dxá-calęne' benne' dxexruj lazre' ca'.

<sup>7</sup> Le guzúa dizra' chee' Dios.

Le til-la da xriwe', na' le' na xuzrunnuj na naga zrale.

<sup>8</sup> Le biga lau Dios, na' Le' bigue' naga zúale le'e.

Le'e, benne' dul-la, le gupá'a cuínale chee' dul-la da nabágale.

Le'e, benne' quebe nazri'ile Dios du lázrele, le gaca benne' du lazre'.

<sup>9</sup> Le guzua ba xa' lázre'le.

Le cuezre, ne le gaca xache' lazre'.

Québedxa guzrízrele, na' le cuezre.

Québedxa bele, ne le xewine lazre'.

<sup>10</sup> Le gaca dxexruj lazre' lau Xránadxu, na' Le' gucá'ana szrene' le'e.

*Quebe dxal-la' guchi'adxu ca da dxun tu benne' bíchedxu*

<sup>11</sup> Le'e, benne' bícha'dau', quebe nęęle chee' lįwézrele tule xetule. Benne' dxenné' chee' tu benne' bíchedxu, u dxuchi'e ca da dxun bénnea', naque' benne' dxenné' calela chee' da bdxixruj be'e Dios, ne dxe-bé'e' ca zaj naca da bdxixruj be'e Dios. Che dxebéu' ca zaj naca da bdxixruj be'e Dios, dxun cuinu' ca benne' dxuchi'e da dxaca, ne quebe dxuzú' dizra' da bdxixruj be'e.

<sup>12</sup> Zua tuze Dios, Bénnea' bdxixruj be'e da ca', ne dxuchi'e da dxaca, na' Léqueze' wazęquene' guselé' dxi'u, ne guzría xi'e dxi'u. Lue', ęnúzraqueze nacu', dxuchi'u da dxun benne' xula?

*Quebe nezdXu bi gaca wxre*

<sup>13</sup> Na'a, le xene da nigá, le'e dxennale: Na'a u wxre chéajdxu tu xezre ne chea-įsúadxu na' tu iza. Gá'udxu, ne gútedxu chee' gucúdedxu dumí. <sup>14</sup> Quebe nézele ca da gaca wxre. ęÁjazra naca chee' xel-la' nabán cheedxu? Naca na ca tu beuj da dxebé' tu chi'i, na' chadí dxenite na. <sup>15</sup> Da dxal-la' guchálajle naca caní: Che Xránadxu dxaca lazre', gaca bandxu ne gundxu da nigá u da

na'. <sup>16</sup> Le'e dxucá'ana szren cuínale ca da dxuchálajle. Xel-la' dxucá'ana szren cuina caní naca na da calela. <sup>17</sup> Che nu benne' ba nézene' ca da chawe' da dxal-la' gune', na' quebe dxune' na, na' bágale'e dul-la.

## 5

*Santiago dxusízrene' benne' gunnı'a ca'*

<sup>1</sup> Le xene da nigá, le'e, benne' gunnı'a. Le cuezre ne le xewine lazre' ca naca da zi' da xa' da lé'ele. <sup>2</sup> Ca naca xel-la' gunnı'a chee'le ba zaj nuzru na, na' zra lánale zaca ba zaj nagu béadu ca' le' na. <sup>3</sup> Ca naca oro chee'le ne plata chee'le, ba gulezén xrche'e na, na' lawe' da quebe bchínele da gunnı'a chee'le lu da xrlátaje, da caní dxululé'e na nabágale zria lau Dios, na' Le' gudé'e' le'e lu da ba xa'. Caní gaca chee'le lawe' da btúbele xel-la' gunnı'a chee' gápale na gate ba dxérxule. <sup>4</sup> Quebe gudízruje ca naca chee' na benne' ca' belexelape' lina chee'le, na' dxelawe' zria chee' da quebe gudízruje, na' Xránadxu, Bénnea' nape' dutę xel-la' dxenná bea, ba benne' ca naca zria da dxelagu benne' ca' chee'le le'e. <sup>5</sup> Lu xezr la xu nigá ba guzile ba neza xel-la' gunnı'a chee'le ne xúgute' da zaca ca', ne guzrenle ca tu bezre dxánnele'e, na' ba dxezrın zra xelútie'-ba'. <sup>6</sup> Le'e ba bzria xile, ne ba bétele benne' quebe bi da calela zaj nune', na' benne' ca' quebe guledábage' le'e.

*Dxal-la' gácadxu benne' zren lazre' ne guchálajledxu Dios*

<sup>7</sup> Chee le' na', benne' bícha'dau', le gaca zren lazre' ca zrindxa zra xelá' Xránadxu. Benne' dxaca dxa'ana dxal-la' cueze' dutę xel-la' zren lazre' chee' ca zrindxa zra xelá' xiuj ba ne xiuj lina, chee' xezı' lu ne'e lina chawe' chee'. <sup>8</sup> Cá'anqueze le gaca zren lazre', ne quebe gute lázrele, lawe' da ba zua gagu zra xelá' Xránadxu. <sup>9</sup> Le'e, benne' bícha'dau', quebe gágule zria chee' lįwézrele, chee' quebe guchi'a Dios chee' da dxunle, lawe' da zua gágute' zra xelá' Dios, Bénnea' dxuchi'e da dxaca. <sup>10</sup> Le'e, benne' bícha'dau', le gusá lázrele ca guca chee' benne' ca' gulenné' waláz chee' Dios, gulaque' zren lazre' lálala guledé'e' xel-la' zi'. <sup>11</sup> Dxennadxu guca da ba neza zren chee' benne' ca' buluchaga lawe' xel-la' zi' ca'. Le'e ba benle ca benne' zren lazre' guca Job, ne ba nézele ca da chawe' ben Dios chee' ca

gudé na'. Xránadxu naque' zri'i lazre', ne dxexache lazre' dxi'u.

<sup>12</sup> Da dxundxa na ba xen, benne' bícha'dau', quebe guzétajle xabáa, ne quebe guzétajle da zua xęzr la xu nigá, ne quebe bi da xula guzétajle. Gate nnale: Awe', le nnaze: Awe', ne gate nnale: Cabí, le nnaze: Cabí, cheę quebe guzría xi' Dios le'e.

<sup>13</sup> Che núlale dxedele lu da zi' da xa', dxal-la' guchálajlęne Dios. Che nu benne' zue' xel-la' dxebé, dxal-la' gul-łę' da güe lá'ane' Dios. <sup>14</sup> Che nu benne' quebe chawe' zue', dxal-la' nņę' benne' gula ca' dxuluxúę' bi cheę Cristo, cheę xelenabe' lau Dios xex-une' benne' wę' na', ne xelegú'ę' le' da za lu La Xránadxu. <sup>15</sup> Gate dxuluchálajlęne' Dios dutę xel-la' dxeleajlı lazre' cheę', na' xexaca benne' wę' na', na' Xránadxu xechise' le', ne che bi dul-la nune', na' gunitite lau Dios cheę bėnnea'. <sup>16</sup> Cheę le' na', le xrúalepe lau lįwézrele tule xetule dul-la da nunle, ne le guchálajlę Dios cheę tule xetule, cheę xexune' le'e. Da dxenaba benne' xrlátaje du lazre' lau Dios wazrué'ene' na. <sup>17</sup> Elías, bėnnea' gunné' waláz cheę Dios, guque' tu bėnneache ca dxi'u, na' gate gunabe' lau Dios cheę quebe gaca xiuj, na' quebe guca xiuj lu xęzr la xu dutę chun iza xugachaj. <sup>18</sup> Gudé na', gate gunabe' lau Dios da xula, na' belá' xiuj, na' xęzr la xu na' bėnna na lina.

<sup>19</sup> Le'e, benne' bícha'dau', che nu benne' ládujla le'e dxecuase' lu da li, na' che núlale le'e xegu'ule le' lu xel-la' li, <sup>20</sup> dxal-la' nézele, níteteze benne' xucuase' tu benne' dul-la lu neza calela da zeajlęne', guselé' bėnne'du xu'u benne' dul-la na' lu xel-la' gute, na' xunitite lau Dios dul-la zan da nabaga bėnnea'.



## DÍZRA'DAU' NEDXU DA BZUAJ SAN PEDRO

*Dizra' gusel-la Pedro chee benne' ca' gucá'a Jesús, ne zaj nase dínnaje'*

<sup>1</sup>Neda', Pedro, naca' benne' gubáz chee Jesucristo. Dxuzúaja' da nigá chee le'e naxúajle lázrele, ne zrle xezre ca' zaj nababa Ponto, ne xezre ca' zaj nababa Galacia, ne xezre ca' zaj nababa Capadocia, ne xezre ca' zaj nababa Asia, ne xezre ca' zaj nababa Bitinia. <sup>2</sup>Xradxu Dios ba guqué'e le'e ca da gunné' gate nate. Ne chee Be' Lá'azxa ba gucá'a Dios le'e chee guzúale dizra' chee', ne chee chádxele lu dxen chee Jesucristo. Dxenaba' lau Dios gúnnale'e le'e da chawe', ne xel-la' dxebeza zri lazre'.

*Ca da dxebeza lázredxu*

<sup>3</sup>Dxue lá'anadxu Dios, Xra Xránadxu Jesucristo. Lawe' da dxexache lázrele'e dxi'u ba bene' cheedxu bexálajdxu lawe' da bebán Jesucristo ládujla benne' gate. Da nigá nuzaga na dxi'u chee cueza lázredxu, <sup>4</sup>ne gun na sile ca da nucueza Dios chee xabáa, da na' quebe cuía xi na, ne quebe xexúe na, ne quebe te chee na. <sup>5</sup>Lawe' da dxéajle chee Dios, Le' guxre' le'e nen xel-la' waca chee' ca zrinxa zra na' sile du ca naca xel-la' weselá da nucueze' cheedxu, na' gulé'ene' na lu zra bzebe ni'.

<sup>6</sup>Chee le na' dxebéle'ele lácala dxun na ba xen tele xel-la' zi' tu chí'idau'. <sup>7</sup>Xel-la' dxeajlí lazre' chee gaca chee na ca dxaca chee oro da dxedé na lu xi' chee xegá'ana chawe' na. Caní naca chee xel-la' dxeajlí lazre' chee, gate ba gudé na lu xel-la' zi', na' xegá'ana na da zácadxa chee sile xel-la' szren, ne xel-la' ba lá'ana lu zra na' gate xelá' Jesucristo.

<sup>8</sup>Le'e nazri'ile Jesucristo lácala quebe ne lé'ele Le', na' lawe' da nuxrén lázrele Le' lácala quebe ne xelé'ele Le', dxebéle'ele. Ca naca xel-la' dxebé chee naca na da zrenté da quebe séquentu' xuzájla'antu' <sup>9</sup>lawe' da nalá bénne'du xu'u le lawe' da dxéajle chee Dios. <sup>10</sup>Lu iza da ba guledé gate nate, benne' ca' gulenné' waláz chee Dios buluxúe xánnie', ne belexebéajni'e ca naca chee xel-la' weselá nigá, na' buluchálaje' ca naca xel-la' chawe' chee Dios da gunné' le'e.

<sup>11</sup>Be' Lá'azxa, Bénnea' gusel-la Cristo, bzéajni'ine' benne' ca' buluchálaje' waláz chee Dios gate nate ca da saca Cristo, ne ca naca xel-la' szren da si'e te na', na' benne' ca' belexexálaje' nuzra benne' nigá, ne bátala gaca da dxenná Be' Lá'azxa, Bénnea' zúale le'. <sup>12</sup>Dios bzéajni'ine' benne' ca' ca naca chee da na' dxuluchálaje', gunné' quebe naca na chee lé'queze', san naca na cheedxu dxi'u. Na'a, da nigá naca dizra' chawe' da ba bénqueze, da buluchalaj benne' ca' ne chee Be' Lá'azxa, Bénnea' ze'e xabáa. Da caní gulaca lazre' gubáz chee xabáa xeléajni'ine'.

*Dios dxenné' dxi'u chee gácadxu bi lá'azxa chee'*

<sup>13</sup>Chee le na', le guxúe xanne' ca da gunle. Tu dxál-lazqueze gunle da xrlátaje. Dute lázrdaule le guxrén lazre' xel-la' chawe' chee Dios, ne le cueza da gunné' le'e lu zra na' gate xelá' Jesucristo. <sup>14</sup>Lawe' da nácale bi chee Dios, le guzúa dizra' chee', ne québedxa gunle ca da guzá lázrele gate quebe ne gúnbeale Dios. <sup>15</sup>Na'a, le ta lu xel-la' lá'azxa chee' lawe' da naca Dios lá'azxa, Bénnea' gunné' le'e. <sup>16</sup>Cá'anqueze naxúajqueze na lu xiche lá'azxa chee', dxenné': "Le gaca lá'azxa, lawe' da naca' neda' lá'azxa."

<sup>17</sup>Che dxennale le'e naca Dios Xrale, na' Le' dxuchi'e ca da dxelún bénneache, dxalla' zrbele Le' dxácate ne zúale lu xezr la xu nigá. <sup>18</sup>Dios ba bselé' le'e lu da benle gate na' guxíajle ca da belún xra xrtaule, da caléla, na' ba nézqueze quebe guca na ne chee tu da dxuzru na ca oro, ne plata. <sup>19</sup>Bselé' le'e ne chee dxen zácále'e chee Cristo, Bénnea' bzua cuine' lau Dios ca tu zrfla'dau' du lazre', ne quebe nadxenba', be dxelutie' chee xunite lau Dios dul-la zaj nabague'. <sup>20</sup>Cristo ba nácaqueze chee' gate nate saque' da nigá, na' ble'e lu zra caní chee gaca chawe' chee. <sup>21</sup>Ne chee Cristo dxéajle chee Dios, Bénnea' bsebang' Le' ládujla benne' gate, ne bca'ané' Le' szren. Chee le na' dxéajle chee Dios, ne dxuxrén lázrele Le'.

<sup>22</sup>Na'a, ba bzúale dizra' chee xel-la' li ne chee Be' Lá'azxa, chee zri'ile dute lázrdaule benne' zaj nababé' dxi'u. Chee le na' dxalla' zri'ile ljwézrele tule xetule dute lázrdaule, ne dute xel-la' wala chee. <sup>23</sup>Caní naca na lawe' da ba bexálajle, quegá chee bénneache, benne' dxelate. Nálajle ne chee

dizra' chee Dios, da naca ban na, ne da zua na chadía chacanna. <sup>24</sup>Caní naca na lawe' da naxúaj na lu xiche lá'azxa, da dxenná na: Xúgute bènneache zaj naque' ca xixre', na' xel-la' szren chee' naca na ca xiaj chee xixre'du ca'. Xixre' na' dxebizre na, na' xiaj chee na dxexruj na.

<sup>25</sup>Dizra' chee Xránadxu zúatequeze na chadía chacanna. Dizra' nigá ba benle le'e ne chee dizra' chawe' da dxuchálajntu'.

## 2

<sup>1</sup>Chee le na', québedxa gunle da calela. Québedxa nu si xele, ne quebe gunle láweze da xrlátaje. Québedxa gácale xa lazre', ne quebe bi nnele chee ljwézrele. <sup>2</sup>Cáteze dxeledane bidu dxe'ene ca' nizre', ca' le gane xrtizra Dios, da naca na du lazre', chee gun na se cháchale, ne lale lu na' dul-la. <sup>3</sup>Che da li ba guzú laule nézele naca Xránadxu chawe', na' gaca lázrele sídxale xrtizre'.

*Cristo naque' ca xiaj xre ban*

<sup>4</sup>Le biga lau Xránadxu, Bénnea' naque' ca xiaj xre ban. Bénneache buluzúe' Le' chalá'ala, san lau Dios naque' tu xiaj chawe' da zácalle na. <sup>5</sup>Cá'aqueze le'e nácale ca xiaj ban ca'. Le güe Dios lataj guchínene' le'e chee gune' tu xudau' chee Be' Lá'azxa chee', gácale bxruze chee Dios chee guzúale lau Dios ca da dxunna Be' Lá'azxa le'e. Da nigá waca gunle ne chee Jesucristo, da xezaca ba lazre' Dios. <sup>6</sup>Chee le na' lu xiche lá'azxa dxenná Dios:

Neda' nuzúa' lu xezre lá'azxa tu benne' naque' ca tu xiaj blau chee xu'u, da naca na tu xiaj du lazre', ne da zácalle na, na' nu benne' chéajle'e chee Le' quebe gaca xel-la' stu chee'.

<sup>7</sup>Cheele le'e dxéajle chee', xiaj nigá zácalle na, san chee benne' ca' quebe dxéajle'e naca na ca da dxenná xiche lá'azxa:

Xiaj na' buluzúa benne' wen xu'u ca' chalá'ala,

le na' naca na xiaj blau.

<sup>8</sup>Cá'aqueze naca na ca dxenná xiche lá'azxa:

Naque' tu xiaj da dxehegu bènneache, na' lawe' le na' dxeajlecházie'.

Caní naca na, dxeajlecházie' lawe' da quebe dxelezi'e dizra' chee Dios. Dios ba núnqueze' gaca caní chee benne' ca'.

*Benne' zaj naque' bi chee Dios*

<sup>9</sup>Le'e nácale benne' ba gucá'a Dios. Nácale bxuze lu zrin chee Benne' Wenná Bea, Jesús. Nácale tu xezre lá'azxa chee Dios, na' Le' naxá'awene' le'e chee guzenle bènneache ca naca xel-la' szren chee Dios. Le' gunné' le'e chee xedxúajle lu da chul-la, na' súale lu xel-la' naxani' li lazre' chee'. <sup>10</sup>Gate nate quebe nu bexache lazre' le'e, san na'a Díósqueze' dxexache lazre' le'e.

*Zúale chee gunle zrin chee Dios*

<sup>11</sup>Bi bicha' nazri'ite' lazra', dxata' xueda' le'e, nácale ca benne' zaj zre'e zitu' naga zua lazre', chee quebe gunle ca da dxenná be'la' dxen cheele, da dxedil-lale na bènne'du xu'ule. <sup>12</sup>Ca da dxunle, dxal-la' gaca na xrlátaje lau bènneache quebe zaj núnbe'e Dios. Caní gaca na, lácala na'a dxeleñe' cheele, dxeleñe' nácale benne' ca' dxelune' da zrinnaj, na' welelé'equezne' da xrlátaje da dxunle, na' xelúe lá'anaqueze' Dios gate zrin zra xenaba Dios da ben tu tu bènneache.

<sup>13</sup>Lawe' da nácale bi chee Xránadxu, le guzúa dizra' ca da dxenná benne' xu'u lawe', bènnea' buluzúa benne' xezre ca'. Le guzúa dizra' chee benne' nape' xel-la' dxenná bea zren, <sup>14</sup>ne chee benne' dxeleñná bea, benne' ca' nasel-la le' chee xuludé' xel-la' zi' benne' ca' dxelune' da zrinnaj, ne xelu'e ba lá'ana benne' ca' dxelune' da xrlátaje. <sup>15</sup>Dios dxaca lazre' gunle le'e da xrlátaje chee guzúa zrile benne' ca' quebe zaj naxéajni'ine', gate dxeleñe' calela chee dizra' chawe' da nazile.

<sup>16</sup>Le gaca ca benne' quebe zaj nada'u, san quebe guchínele da na' nazile, quebe gunle da calela. Le gaca ca benne' ca' dxenná be'e Dios. <sup>17</sup>Le gapa ba lá'ana xúgute bènneache. Le zri'i bi bíchedxu ca'. Le zrebe Dios, ne le gapa ba lá'ana benne' dxenná be'e.

*Ca da guzaca zi' Cristo dxuzéajni' na dxi'u*

<sup>18</sup>Le'e, bi wen zrin, le guzúa dizra' chee xránale duté xel-la' ba lá'ana, quegaze chee benne' zaj naque' zri'i lazre', ne dxelebé'e gunne xue cheele, san cá'aqueze gunle chee benne' snia ca' zaj naque' xránale. <sup>19</sup>Naca na tu da xrlátaje chee guchaga laudxu xel-la' zi' da dxulusaca bènneache dxi'u

gate dxundxu da nezdxu naca na da dx-  
ezaca ba lazre' Dios. <sup>20</sup> Che dxunle tu da  
calela, na' dxulusaca zi'e le'e, ¿bizra da ba  
neza gaca na chee? Na'a, che dxedele  
xel-la' zi' lawe' da dxunle da xrlátaje, ne  
dxuchaga laule na duté xel-la' zren lazre'  
chee, da nigá naca na xrlátaje lau Dios.  
<sup>21</sup> Dios gunné' le'e chee tele xel-la' zi' caní,  
lawe' da gudé Cristo xel-la' zi' waláz cheele  
le'e, da dxuzéajni' na le'e gunle ca da ben  
Le'.

<sup>22</sup> Le' quebe bene' dul-la, ne quebe nu guzi  
xe'e.

<sup>23</sup> Gate bulucháchalene' Le', quebe bi dizra'  
schanni' bechebe'.

Gate buludée' Le' xel-la' zi', Le' quebe  
bexéchaje'.

Bzua cuine' lu na' Dios, Bénnea' dxuchi'e  
ca da naca na. <sup>24</sup> Biá'queze Cristo na' lu  
bela' dxen chee' ca naca dul-la cheedxu  
gate gudé'e le'e xaga begúaj, chee gácadxu  
ca benne' gate, québedxa gundxu dul-la,  
na' gaca bandxu chee gundxu da xrlátaje.  
Le' guzríe' we' chee xexácale le'e chawe'.

<sup>25</sup> Le'e gudale gate nate ca zri-la' zaj  
naniteba'.

Na'a ba bela'le lau Cristo, Bénnea' dxuxúe'  
le'e ca dxun tu benne' dxuxúe' zríla'du ca',  
ne dxe'e gunne xue chee bénne'du xú'ule.

### 3

*Ca dxal-la' xelún benne' zaj nuchaga na'*

<sup>1</sup> Cá'anqueze le'e, nu'ula nuchaga na'le,  
le guzúa dizra' chee benne' chee, na' che  
núlale zua benne' biu chee quebe dxéa-  
jle'e xrtizra Dios, xexúnbe'e naca na da li  
gate lé'ene' da xrlátaje da dxun zru'ule', ne  
quebe gun na ba xen bi guchalaj zru'ule',  
<sup>2</sup> lawe' da lé'ezené' da xrlátaje dxuné' lawe'  
da naque' xrlátaje, ne dxape' le' ba lá'ana.  
<sup>3</sup> Ca lechítaje chee tu nu'ula quebe dxal-  
la' gaca na cúzreze ca xel-la' dxupá'a xicha  
xíchaje', ne lechítaje da naca na oro, ne zra  
lane' da zácale'e. <sup>4</sup> Lechítaje chee' dxal-la'  
gaca na lu xichaj lázrdawe', da naca na tu  
da xrtan da quebe te chee na. Da xrtan nigá  
naca na tu be' dxexruj lazre', ne zren lazre',  
da na' zácale'e na lau Dios. <sup>5</sup> Cá'anqueze  
guca lechítaje chee nu'ula ca' gulaque' bi  
chee Dios gate nate. Nu'ula ca' buluxrén  
lazre' Dios, ne buluzúe' dizra' chee benne'  
chee'. <sup>6</sup> Cá'anqueze guca Sara, bzue' dizra'  
chee Abraham, na' guzre' le': "Xran." Le'e

wácaquezele ca guca Sara na' che gunle da  
xrlátaje, ne quebe bi guchebe lázrele.

<sup>7</sup> Cá'anqueze le'e, benne' biu, zúalele  
nu'ula, le gaca dxexruj lazre' nen zru'ulale.  
Le gapa ba lá'ana zru'ulale lawe' da  
quebe zaj naque' benne' wal-la ca le'e, ne  
cá'anqueze zaj nape' xel-la' nabán ca da  
nunna Dios le'e duté xel-la' chawe' chee'.  
Dxal-la' gunle caní chee quebe bi guzaga na  
le'e gate guchálajlele Dios.

*Benne' dxeledéé' xel-la' zi' lawe' da dxelune'  
da chawe'*

<sup>8</sup> Na'a:

Le gaca tuze

Le xexache lazre' ljwézrele, ne le zri'i  
ljwézrele.

Le gaca benne' zri'i lazre', ne zren lazre'.

<sup>9</sup> Quebe gunle da calela chee benne' dxuné'  
chee da calela, ne quebe guchácalele  
benne' dxulucháchalene' le'e. Le gun da  
chawe' chee benne' ca' lawe' da gunné' Dios  
le'e chee sile da chawe'. <sup>10</sup> Caní naca na lawe'  
da dxenná xiche lá'azxa:

Benne' dxaca lazre' gaca tu da ba neza  
chee',

ne sue' xel-la' dxebe

dxal-la' guxúe' luzre' chee quebe nne'  
dizra' schanni',

ne guxúe' dxu'e chee quebe nne na da wen  
lazre'.

<sup>11</sup> Dxal-la' gusane' ca da calela bene',  
ne québedxa guné' na, chee guné' da  
chawe'.

Dxal-la' cueche zrie' da ba xa',

ne gaque' benne' zren lazre'.

<sup>12</sup> Xránadxu dxuxúe' benne' chawe' ca',

ne dxenne' ca da dxelenaba benne' ca'.

Dxuzúe' chalá'ala benne' wen da zrinna'  
ca'.

<sup>13</sup> ¿Núzraqueze benne' guné' chee da  
zrinna' che le'e cuele gunne xue gunle da  
chawe'? <sup>14</sup> Lácala tele xel-la' zi' lawe' da dx-  
unle da chawe', gaca na da ba neza chee.  
Quebe nu zrébele, ne quebe xrúsale. <sup>15</sup> Le  
gapa ba lá'ana Cristo ca Xránale lu xichaj  
lázrdale. Le súateze ban lazre' xechébele  
lau benne' ca' dxelenabe' le'e bizr chee na'  
dxuxrén lázrele Le'. Le gun na lu xel-la'  
dxexruj lazre', ne le gapa ba lá'ana benne'  
ca'. <sup>16</sup> Le gun da chawe' chee quebe bi  
sua da gagu na zria lu xichaj lázrdale,  
na' benne' ca' dxelenné' schanni' chee da  
chawe' da dxunle lawe' da dxéajle-le chee  
Cristo, xelapa stu'e ca dizra' da dxelenné'.

<sup>17</sup>Zácadxa tele xel-la' zi' lawe' da dxunle da chawe' cáteze dxaca lazre Dios, ne quegá tele xel-la' zi' lawe' da dxunle da calela.

<sup>18</sup>Caní naca na lawe' da gudé Cristo tu lásaze lu xel-la' gute zi' xa' ne chee dul-la da nabágadxu. Le' guque' benne' xrlátaje, na' gudé' xel-la' zi' waláz cheedxu dxi'u, benne' wen da zrinnaj, chee gaca xeché'e dxi'u lau Dios. Gute Cristo lu bel-la' dxen chee', san bebánqueze' lu be' nácaqueze'.  
<sup>19</sup>Cá'anqueze lu be' nácaqueze' guxíaje' lataj chul-la naga xeajchálajlene' be' zaj nácaqueze benne' ca' nuzaga xel-la' gute lu lataj na'.  
<sup>20</sup>Benne' caní quebe buluzúe' dizra' ca da bchalaj Noé gate nate, gate na' guleza Dios dute xel-la' zren lazre' chee' dxácaté na' ben Noé da zren na' da dxedá lawe' nísadau'. Lu da dxedá lawe' nísadau' gulelá xrúnuze benne' ne chee' nisa xiuj da na' bzria xi na ca naca bèneache.  
<sup>21</sup>Nisa xiuj na' dxulé'e na ca naca nisa naga dxelixedxúa benne' nisa, na' lu le' na' naladxu na'a. Nisa nigá quegá le' na' quibe na dxi'u, san dxulé'e na dxaca lázredxu chádxedxu lau Dios, na' ladxu lawe' da bebán Jesucristo ládujla benne' gate,  
<sup>22</sup>ne begüene' xabáa, ne zue' chalá'a xabéla chee' Dios, na' dizra' chee' Le' dxuluzúa gubáz chee' xabáa, gubáz ca' zaj nape' xel-la' dxenná bea, ne gubáz blau ca'.

#### 4

*Dxal-la' gundxu zrin chee' Dios guchínedxu ca da ba nunna Dios dxi'u*

<sup>1</sup>Chee' le' na', ca ben Cristo, gudé' xel-la' zi' lu belá' dxen chee', cá'anqueze le'e dxal-la' si lu nale tele xel-la' zi' lawe' da che tu benne' ba gudé' xel-la' zi' lu belá' dxen chee', ba bzua bènea' chalá'ala da naca dul-la,  
<sup>2</sup>chee' guné' ca da dxaca lazre' Dios dxácaté naca bane', ne quebe guné' ca da dxenná belá' dxen chee'.  
<sup>3</sup>Naze cáтите da ba benle gate nate da dxeledanne benne' quebe zaj núnbe'e Dios. Ca lu iza da ba guledé benle da sban ca', ne da zrinnaj ca' da guzá lázrele, ne guzúrele, ne benle laní sban ca'. Güé'ele'e, ne bca'ana szrenle bedau' xiaj xaga ca' da na' dxecuide Dios.  
<sup>4</sup>'Benne' ca' quebe zaj núnbe'e Dios dxelxebánene' lawe' da québedxa dxunle le' tuze ca naca da sban da dxelune', na' chee' le' na' dxelenné' schanni' chee'.  
<sup>5</sup>'Benne' ca', dxun na ba xen xululé'ene' ca da zaj nune' lau Bènea' naca chee' guchi'e chee' benne'

ban ca', ne chee' benne' gate ca'.  
<sup>6</sup>'Benne' ca' zaj nate belenne' ca naca dizra' chee' Dios chee' xelexaca bane' lu be' zaj nácaqueze' ca naca ban Dios, lálala lu xezr la xu nigá Dios bchi'e ca da belune' ca guchi'e chee' xúgute bèneache.

<sup>7</sup>Ba za cheajsé chee' xúgute da dx-elé'edxu. Chee' le' na', le sua ban lazre', ne le guchálajlecheze Dios.  
<sup>8</sup>Da nácadxa blau, le zrí'ile'e ljwézrele. Che nazrí'idxu benne' bíchedxu ca', na' gunite laudxu da calela da belune' cheedxu.  
<sup>9</sup>Le guzúa lízrele ljwézrele tule xetule, ne quebe nnele chee' ljwézrele.  
<sup>10</sup>Tu tule le'e dxal-la' gunle zrin chee' ljwézrele ca da nunna Dios chee', ca benne' dxuluchínene' chawe' ca da chawe' da dxunezuj Dios chee'.  
<sup>11</sup>Che nu benne' dxuchálaje', dxal-la' guchálaje' da gunezruj Dios le'. Che nu benne' guné' zrin chee', dxal-la' guné' na guchínene' xel-la' waca chee' da nunezruj Dios le'. Ca naca xúgute da dxunle, dxal-la' gaca ba Dios lawe' da nácale bi chee' Jesucristo, na' chee' Le' gaca xel-la' szren, ne xel-la' dxenná bea chadía chacanna. ¡Ca'an gaca na!

*Wadedxu xel-la' zi' lawe' da nácadxu bi chee' Cristo*

<sup>12</sup>Benne' bícha'dau' nazri'ite lazra', quebe xebánele ca naca xel-la' zi' zren da tele, quebe guéquele naca na tu da quebe dxal-la' gaca.  
<sup>13</sup>Le be lawe' da tele xel-la' zi' ca xel-la' zi' da gudé Cristo chee' cá'anqueze béle'e gate lé'e xel-la' szren chee' Cristo gate zezé'e.  
<sup>14</sup>Che dxulugazja' benne' le'e dizra' lawe' da nácale bí chee' Cristo, ba neza zren naca na chee', lawe' da zúale Be' Lá'azxa chee' Dios le'e, Bènea' ze'e xabáa. Dxeleenné' bèneache schanni' chee' Le', san le'e dxápale Le' ba lá'ana.  
<sup>15</sup>Che núlale le'e dxedele xel-la' zi', quebe dxal-la' gaca na lawe' da bétele benne', u bi gulanle chee' benne', u bi da zrinnaj benle, u lawe' da guchixre chee' da naca chee' benne' xula.  
<sup>16</sup>Che nu benne' dxedé' xel-la' zi' lawe' da naque' bi chee' Cristo, quebe dxal-la' xedué'ene', san dxal-la' güe lá'ane' Dios lawe' da nazí le' bi chee' Cristo.  
<sup>17</sup>Ba zrin zra su lau Dios guchi'e ca da zaj nun tu tu bi nácabé chee' Le'. Che Dios su lawe' guchi'e ca da nundxu dxi'u, ¿ájala gaca chee' benne' ca' quebe dxelune' ca dxenná dizra' chawe' chee' Dios?  
<sup>18</sup>Che benne' xrlátaje ca' cánnaze

xelélé' *ǰájazraqueze gaca chee benne' wen da zrinnaj ca', ne chee benne' wen dul-la ca'?* <sup>19</sup>Caní naca, benne' dxeledé' xel-la' zi' lawe' da dxeluné' da xrlátaje da dxaca lazre' Dios, dxal-la' xelúnqueze' da xrlátaje, ne xuluzé' bénne'du zaj xu'e lu na' Dios, Bénnea' bene' le', lawe' da naca Le' li lazre'.

## 5

*Pedro dxuzéajni'ine' bi ca' chee Cristo*

<sup>1</sup> Dxuzéajni'ida' le'e, benne' gula dxuxéle tu tu cue' bi ca' chee Cristo lawe' da naca' neda' benne' gula ca le'e, ne dxexecheba' ca xel-la' zi' da gudé Cristo, ne cá'anqueze lawe' da gúnnaqueze' neda', ne le'e, chee sidxu da xabáa chee' da gul'é'ene' te chee zra caní. <sup>2</sup>Ca dxelún benne' dxuluxé' zrila' ca', le guxúe bidu ca' chee Dios, bénne'du ca' nabágale. Le gun na duté lázrdaule ca dxaca lazre' Dios, quebe gun na ba xen nu benne' nna bé'ene' le'e, ne quebe gunle ba chee dumí. Le gun zrin du lázrele, <sup>3</sup>ne quebe gun cuínale ca xrane bénne'du ca' nabágale. Le gun ba xuzre gácale tu da gul'é' na ca dxal-la' xelún bénne'du ca'. <sup>4</sup>Caní gaca, gate xelá' Xránadxu, Benne' Blau dxuxé' zrila' ca', sile tu lazruj da naca na chee xabáa, da quebe te chee na. <sup>5</sup>Cá'anqueze le'e, benne' cuide', le gun ca da dxelenná benne' gula ca'. Xúgutele dxal-la' guzúale dizra' chee ljwézrele tule xetule lu xel-la' dxexruj lazre' chee lawe' da dxenná xiche lá'azxa: Dios dxezré'e benne' ca' dxulucá'ana szren cuine'.

Duté xel-la' chawe' chee' dxácalene' benne' dxexruj lazre' ca'.

<sup>6</sup>Le guzexruj lázrele lu xel-la' dxenná bea zren chee Dios, na' xechisa Le' le'e ca zrin zra chee na. <sup>7</sup>Le guzúa lu na' Dios xúgute da dxele gunne xue, lawe' da dxe' Le' gunne xue da naca chee.

<sup>8</sup>Le gaca benne' li lazre', ne le sua ban lazre' lawe' da dxedá da xriwe', da na' dxezrá'a na le'e, ne naca na ca tu bezre xixre', dxebezre xa'aba', dxíljaba' nu guébeba'. <sup>9</sup>Le tíl-lalé da xriwe', ne le se chacha lu xel-la' dxeajlí lazre' chee, lawe' da nézquezele dxeledéqueze xúgute bíchele zaj zré'e lu xezr la xu nigá xel-la' zi' ca da dxedele le'e. <sup>10</sup>Gate bache gudele xel-la' zi' tu chi'i, Dios guné' le'e li lazre', ne guzúa chawé'e le'e. Dios ná'queze dxunne' dxi'u xúgute

da chawe' chee', ne ba gunné' dxi'u chee gápadxu da naca chee xabáa chee' lawe' da nácadxu bi chee Jesucristo. <sup>11</sup>Gaca ba Le', ne chee' Le' gaca xel-la' dxenná bea chadía chacanna. ¡Ca'an gaca na!

*Pedro dxugape' diuzre bi bíchedxu ca'*

<sup>12</sup>Silvano, benne' nigá dxéqueda' naque' tu bi bíchedxu li lazre', ba bzuaje' dizra' caní chee le'e cáteze neda', Pedro, ba gucha' le' guzúaje'. Dxuzéajni'ida' le'e, ne dxapa' le'e ca naca da xrlátaje da ba guzile da dxululé' na Dios nazri'ine' le'e. Le se chacha ca zaj naca da caní.

<sup>13</sup>Bi chee Cristo zaj zré'e Babilonia nigá, benne' ca' gucá'a Dios ca guqu'é' le'e, dxulugape' le'e diuzre. Cá'anqueze Marcos, bi na' nácabe' ca bi cheéqueza' dxugápabe' le'e diuzre. <sup>14</sup>Le gugapa diuzre ljwézrele tule xetule, ne le gunida' ljwézrele lu xel-la' zri'i lazre'.

Dxenaba' lau Dios gunné' le'e xel-la' dxebeza zri lazre', le'e nácale bi ca' chee Jesucristo. ¡Ca'an gaca na!

## DIZRA' GUDXUPE' DA BZUAJ SAN PEDRO

*Dizra' da gusel-la San Pedro chee bi ca' chee Jesús*

<sup>1</sup>Neda', Simón Pedro, naca' wen zrin chee Jesucristo, ne benne' gubáz chee'. Dx-uzúaja' da nigá chee le'e, ba nápa le-xel-la' dxeajlí lazre' da zácale'e, ne naca tuze ca da nápantu' netu'. Caní naca lawe' da naca li lazre' Dios cheedxu, ne Benne' Weselá cheedxu Jesucristo. <sup>2</sup>Dxenaba' lau Dios gúnnale'e le'e da chawe' chee', ne xel-la' dxebeza zri lazre', lawe' da núnbeale Dios, ne Xránadxu Jesús.

*Ca dxal-la' gaca bi chee Cristo*

<sup>3</sup>Dios lu xel-la' waca chee' ba nunne' dxi'u xúgute da nachínedxu chee gápadxu xel-la' nabán chee Le', ne chee gaca gundxu zrin chee', lawe' da núnbeadxu Bénnea' gúnné' dxi'u chee gápadxu da xabáa chee Le', ne xel-la' szren chee'. <sup>4</sup>Caní naca na, ba nunne' dxi'u ca da nachébe lazre', da zaj naca na szréne'e, ne da zaj zácale'e na, chee ne chee da guchébe lazre' wazrué'ele le'e gácale ca náaqueze Dios, ne chee lale lu da sban da dxaca lu xezr la xu nigá ne chee da dxezá lazre' bela' dxen chee béneache. <sup>5</sup>Chee le na' dxal-la' cue'le gunne xue gun xel-la' dxeajlí lazre' chee gunle da xrlátaje, ne chee gun da xrlátaje da dxunle gácale benne' sina. <sup>6</sup>Xel-la' sina chee dxal-la' gun na nna be'e cuínale, na' xel-la' dxenná be'e cuina chee dxal-la' gun na gácale benne' zren lazre', na' xel-la' zren lazre' chee dxal-la' gun na zri'ile Dios. <sup>7</sup>Xel-la' zri'i lazre' chee nen Dios dxal-la' gun na zri'ile benne' bíchedxu ca', na' xel-la' zri'i lazre' chee nen bíchele ca' dxal-la' gun na gácale zri'i lazre'.

<sup>8</sup>Che le'e dxunle da caní, ne dxelepe ban na, quebe xegá'ana cá'aze xel-la' nabán chee, ne quebe naca na níteze núnbeale Xránadxu Jesucristo. <sup>9</sup>Benne' quebe dxune' da caní naque' ca benne' la chul-la, u ca benne' quebe dxenné'e ca da za za'. Ba gul-la lazre' guxádxie' ca naca chee dulla ca' da bene' gate nate. <sup>10</sup>Chee le na', benne' bícha'dau', le gun ba xuzre nézele Dios gúnné' le'e, ne ba guqué'e le'e, na' che gunle da nigá, cabata' cheajházele.

<sup>11</sup>Caní gun Dios, gúnnale'e le'e lataj chu'ule

naga nna bea Xránadxu, ne weselá cheedxu Jesucristo chadía chacanna.

<sup>12</sup>Chee le na' tu dxusá'azqueza' lázrele da caní, lácala ba nézele na, ne ba ze cháchale lu xel-la' li da ba nápa le. <sup>13</sup>Dxácate naca bana' dxéqueda' dxun na ba xen gusá'a lázrele chee da caní <sup>14</sup>lawe' da ba nezda' wátezea' ca ba gúnná Xránadxu Jesucristo, guzre' neda'. <sup>15</sup>Na'a guna' ca da séqueda' chee gate te gatia' neda', cheajsá lázrquezle chee da caní.

*Benne' belelé'eng' xel-la' szren chee Cristo*

<sup>16</sup>Da bsédentu' le'e ca naca chee xel-la' szren chee Xránadxu Jesucristo, ne ca xel'é xecha lasa quebe naca na ca da dxenná xichaj lázrdau bénneache. Netu' blé'equezentu' ca naca xel-la' szren chee Xránadxu. <sup>17</sup>Blé'entu' Le' gate Xradxu Dios be'e Le' xel-la' ba lá'ana, ne xel-la' szren, na' Dios gúzrequeze' Le' lu da xabáa chee': "Benne' nigá naque' Zri'ina' nazri'ite' lazra', ne dxezaca ba lazra' nen Le'." <sup>18</sup>Nétu'queze bémentu' chi'i na' da za na xabáa gate zúantu' nen Xránadxu lu xi'a lá'azxa na'. <sup>19</sup>Chee le na' dxuxrén lázredxantu' dizra' da buluzúaj benne' ca' gulenné' waláz chee Dios. Da xrlátaje dxunle le'e lawe' da dx-enle ca naca dizra' nigá. Naca na ca tu xi' da dxusení na tu lataj naga naca chul-la ca zrin zra chani', na' Cristo, Bénnea' naque' ca belaj zila súaleng' le'e chee gusení'e lu xichaj lázrdau le. <sup>20</sup>Le guxúe xanne' ca naca da nigá. Netú da naxúaj na lu xiche lá'azxa quebe nu benne' seque' xuzájle'e na lu xel-la' dxéajni'i cheeze'. <sup>21</sup>Benne' ca' buluchálaje' waláz chee Dios quebe buluchálaje' ca da gulaca lázrequeze le'. Gulaque' benne' chee Dios, na' gulenné' waláz chee' ca da bnezruj Be' Lá'azxa le'.

## 2

*Ca naca chee benne' ca' dxulusédene' da wen lazre'*

*(Judás 4-13)*

<sup>1</sup>Cá'anqueze gulezrá' ládujla benne' Israel benne' wen lazre' ca', benne' belún cuine' ca benne' dxelenné' waláz chee Dios. Cá'anqueze welezrá' ládujla le'e benne' wen lazre', benne' xelún cuine' ca benne' dxulusédene' bénneache dizra' chee Dios. Benne' caní wuluzéajni'ine' bénneache bagácheze ca naca dizra' wen lazre' da guxrinnaj na, na' caní xeledábage' Xránadxu, Bénnea' bselé' dxi'u, na' lawe' da

dxulusédene' da caní xelebía xi' zéqueze'.  
 2 Benne' zan chjácálene' ca da sban dxu-  
 luséde benne' ca', na' nę cheę benne' caní  
 xelenné bėnneache schanni' cheę dizra' li  
 cheę xel-la' weselá. 3 Lawe' da dxelezá lazre'  
 xezeł'ę dumí, xelebéaje' le'e dumí nę cheę  
 da wen lazre' da dxuluzėjni'ine' le'e. Dios  
 ba nucuzeę' da guzría xi na benne' caní,  
 lawe' da ba guchugue' gate nate ca da gaca  
 cheę benne' ca'.

4 Dios quebe bnite lawe' cheę gubáz cheę  
 xabáa ca' belún dul-la. Bdeę' gubáz cheę  
 xabáa ca' lu lataj ba xa', ne bzre'ę le' lu  
 da chul-la, ne bcheaje' le' du xia naga zaj  
 nadxėjaje' ca zrin zra chugu Dios ca da gaca  
 cheę gubáz cheę xabáa ca'. 5 Cá'anqueze  
 Dios quebe bnite lawe' cheę benne' ca'  
 gulezrá' gate nate. Gusel-le' nisa xiuj da  
 bzria xi na benne' ca' belune' da calela.  
 Bselé' Noé, bėnnea' bchálaje' ca naca da  
 xrlátaje da dxal-la' xelún bėnneache. Bselé'  
 gázreze benne'. 6 Cá'anqueze guchugu Dios  
 cheę xezre Sodoma, ne xezre Gomorra cheę  
 xelebía xi na. Bzėxjie' dxúpatę xezre ca',  
 na' belexegá'anate na de. Caní dxuluzėja-  
 jni'i na benne' ca' xelune' da calela, benne'  
 xezeł'ę te na'. 7 Dios bselé' Lot lu xezre  
 Sodoma na' lawe' da guque' tu benne' xrlá-  
 taje, ne bexíajelę'ene' gate blę'ene' ca naca  
 da sban da dxelún benne' ca' dxelune' da  
 calela. 8 Benne' xrlátaje nigá guzúę' ládujla  
 benne' ca', na' tu zra tu zra guzúja ba xa'  
 lázrdawe' ca dxennę'ę, ne dxenne' ca da  
 calela da dxelún benne' ca'. 9 Nėzqueze  
 Xránadxu guselę' benne' zaj naca bi cheę'  
 che bi da dxusaca zi na le', na' guzráqueze'  
 benne' ca' dxelune' da calela, ca tu lize xia,  
 ca zrin zra chugue' cheę' chjaque' lataj ba  
 xa'.

10 Dios xudéę' xel-la' zi' zrendxa benne'  
 ca' dxelune' cáteze da sban da dxelezá  
 lazre', ne dxuluzúę' chalá'ala xel-la' dxenná  
 bea cheę Xránadxu. Benne' caní zaj naque'  
 lazre' dxugu dxelune' da sban, ne dxu-  
 lucá'ana szren cuine'. Quebe dxelezrebe'  
 dxelenné' schanni' cheę gubáz cheę xabáa  
 ca'. 11 Gubáz ca' zaj nápadxe' xel-la' dxenná  
 bea, ne xel-la' szren ca benne' caní, quebe  
 dxelenné' da calela cheę benne' ca' gate  
 dxelawe' zria cheę' lau Xránadxu.

12 Benne' caní zaj naque' ca bea ca'  
 quebe zaj naxėjni'iba', be dxelunba' ca  
 da zaj nézezeba', ne zraba' cheę xelę-lę'-  
 ba', ne xelutie'-ba'. Benne' caní dxelen-

nę' schanni' cheę da quebe dxelėjni'ine',  
 na' xelátequeze' ca dxelate bea ca', 13 ne  
 xeledéę' xel-la' zi' ca xel-la' zi' buludéę'  
 benne' xula. Dxelequene' zaj zre'ę lu da  
 ba neza gate dxelebeņę' ca da dxaca tu zra  
 tu zra. Zaj naque' ca tu da sban da dxusi'i  
 na le'e xel-la' stu' gate zaj zre'ę nen le'e lu  
 laní cheele, dxácate ne dxelezię' lu xel-la'  
 dxebé lu da calela da dxelune'.

14 Dxelezá lazre' xúgute nu'ula dx-  
 elelé'ene', ne quebe dxelálene' dxelune'  
 dul-la. Dxulusi'ę neza xula benne'  
 bíchedxu quebe zaj zę chache'. Dxulucú-  
 equeze', ne zaj naque' benne' zaj xu'ę de'.  
 15 Zaj nanitie' lawe' da gulecuase' lu neza  
 li cheę Dios. Dxelune' ca da beņ Balaam,  
 zri'ine Beor. Balaam nigá beņę' ba cheę  
 dumí, ne gudé' dxune' da calela, 16 na' bea  
 na', be dxua xua', gunneba' ca benne',  
 ne gudíl-laba' Balaam ca naca dul-la da  
 dxune', na' guchúguba' da xala da dxun  
 Balaam.

17 Benne' caní zaj naque' ca tu beaj bizre,  
 ne ca tu beuj da dxua be' bđunu'. Ba zaj  
 naca cheę benne' ca' xellexgá'anę' chadía  
 chacanna lu da chul-la. 18 Dxeleņné' dizra'  
 da dxulucá'ana szren na le', ne da zaj naca  
 na dácheze. Dxuluchíneņę' da sban ca',  
 ne da dxezá lazre' bełá dxen cheę bėn-  
 neache cheę dxulusi'ę chalá'ala benne' ca'  
 za dxelexedxúajteque' ládujla benne' ca'  
 dxelune' da calela. 19 Dxelechebe lazre'  
 xulunézruje' benne' ca' tu xel-la' weselá,  
 san léqueze benne' ca' zaj naque' wen zrin  
 cheę da sban. Tu tu bėnneache naque'  
 benne' nada'u cheę da dxenná be'e na le'.  
 20 Benne' ba zaj núnbe'ę Xránadxu, ne We-  
 selá cheędxu Jesucristo, ne ba gulelé' lu da  
 sban cheę xezr la xu nigá, na' te na' che  
 xellexu'ę xecha lasa lu da sban na', ne  
 xelu'ę lataj xenná be'e na le', na' gácadxa da  
 ba xa' cheę benne' ca' ca da guca cheę' gate  
 nate. 21 Cháwe'dxela gaca na cheę benne'  
 caní la quebe zaj núnbe'ę Cristo, quegala  
 gate ba belúnbe'ę Le', na' xellexeucase' ca  
 naca xel-la' dxixruj bea lá'azxa da guzre  
 Dios le' xelune'. 22 Ca da guca cheę benne'  
 caní dxulę'e na naca da li dizra' nigá da  
 dxenná na:

Becu' dxexáguba' ca da ba bexębeba',

na' cuche za bexíbeba' bexú'uba' xecha lasa  
 lu guzra' cheęba'.

## 3

*Ca naca chee zra xelá' Xránadxu*

<sup>1</sup> Benne' bícha'dau' nazri'ite lazra', da nigá naca na dizra' gudxupe' da dxuzúaja' chee. Lu dxúpatę xiche caní guca lazra' guzėjni'ida' le'e chee gulaba lázrele chee da caní. <sup>2</sup> Le gusá lazre' ca da gulenná benne' lá'azxa ca', benne' buluchálaje' waláz chee Dios, ne ca naca da gudixruj be'e Xránadxu, Benne' Weselá cheedxu, da na' buluseđe benne' gubáz chee' ca' le'e.

<sup>3</sup> Dxunna ba xen gúnbeale, lu zra da za zá'aca welelá' benne' xelún le' chee da zaj naca na da lá'azxa, ne xelunę cáteze da dxelezá lazre', <sup>4</sup> ne xuluchebe' bėnneache: ¿Bizra guca chee da guchebe lazre' Cristo, gunné': Welá'a? Xra xrtáudxu ca' ba gulate', na' tızqueze ca guca, gaca na gate guzrete xęzr la xu. <sup>5</sup> Benne' caní quebe dxeleque be'eng' gulezúa xabáa, ne xęzr la xu gate nate, Dios gunné' bedxúaj na lu nisa, na' guzúa chacha na lu nisa, <sup>6</sup> na' xęzr la xu da zua gate nate guzría xi na ne chee nisa xiuj, <sup>7</sup> na' xabáa, ne xęzr la xu da zaj zua na na'a, ba naca chee na xelezxe na ca ba núnqueze Dios chee na. Xi' na' guzezxe na da caní lu zra guchi'a Dios, gate xelebía xi' benne' ca' dxelunę' da calela.

<sup>8</sup> Benne' bícha'dau' nazri'ite lazra', quebe gal-la lázrele da nigá: Lau Xránadxu tu zraze naca na ca chi gaxúa iza, na' chi gaxúa iza zaj naca na ca tu zraze. <sup>9</sup> Quebe dxezre Xránadxu gunę' da nachebe lazre' ca dxeleque bėnneache. Naque' zren lazre' nen dxi'u lawe' da quebe dxaca lazre' nu cuía xi'. Dxaca lazre' xelexėjaje lazre' xúgute bėnneache.

<sup>10</sup> Zra xelá' Xránadxu zrin na gate quebe nu dxeque ca', ca za' tu gubán chizrela. Lu zra na' cuía xi' xabáa da dxelé'edxu, na' gunle'ę na schaga, ne ca naca da dxelé'edxu zran xabáa xelebía xi na lu xi', na' xęzr la xu nigá chezxe na tu zren nen da de lawe na.

<sup>11</sup> Che ba nézele xelebía xi' xúgute da caní, ¿ájala dxal-la' gunle? Dخال-la' gácale li lazre' ne guzúa cuínale lu na' Dios <sup>12</sup> dxácatę ne dxebézale zra na', ne dxal-la' gunle ca da séquele zrintę zra na'. Lu zra na' cuía xi' xabáa lu xi', na' da zaj zria zran xabáa xelexuna na lu xi' na'. <sup>13</sup> Dxi'u dxebézadxu tu xabáa cube, ne tu xęzr la xu cube da ba guchebe lazre' Dios naga gaca xlátaje xúgute.

<sup>14</sup> Chee le na', benne' bícha'dau' nazri'ite lazra', dxácatę dxebézale da caní, le gun ca da séquele chee quebe bi bágale, ne quebe bi nadxenle chee dul-la lau Dios, ne suale lu xel-la' dxebeza zri lazre'. <sup>15</sup> Le gusá lázrele naca Xránadxu zren lazre' nen dxi'u chee ladxu. Cá'anqueze Pablo, benne' bíchedxu nazri'ite lázredxu, bzuaaje' cheele, bchínene' ca naca xel-la' sina da bnezruj Dios le'. <sup>16</sup> Lu xúgute xiche da ba bzuaaje', ba bchálajlęne' le'e ca naca chee da caní, lálcala bal-la na nácale'ę na stebe cheėjni'idxu na, na' benne' ca' quebe dxelėjni'ine' na, ne benne' ca' quebe zaj zua chache' dxuluchuque' na, ca dxuluchuque' xezícala xrtizra Dios, na' chee le na' Dios guzría xi'e benne' ca'.

<sup>17</sup> Chee le na', benne' bícha'dau' nazri'ite lazra', che le'e ba nézele da nigá nédxula, le guxúe cuínale chee da wen lazre' chee benne' ca' dxelunę' da calela chee quebe xelechę le'e chalá'ala, ne quebe nite xel-la' li lazre' chee lau Dios. <sup>18</sup> Le gúnbea xanne' Xránadxu, Benne' Weselá cheedxu, Jesucristo, ne le gula lu xel-la' zri'i lazre' chee'. ¿Gaca ba le' na'a, ne chadía chacanna! ¿Ca'an gaca na!



## DIZRA' NÉDXUDAU' DA BZUAJ SAN JUAN

*Xtizra Dios da dxunna na xel-la' nabán li lazre'*

<sup>1</sup>Dxuzúaja' cheele da nigá ca naca chee Bénnea' zúaqueze' gate guzú' lau zua xúgute da dxelé'edxu. Dxuzúaja' ca naca chee Bénnea' ba bémentu' chee', ne ca naca da ba blé'equezentu' bene', neda' ne xezicadxa benne' ca' bsede Jesús. Ca naca chee Benne' nigá guzúantu' dxennantu', ne btantu' Le' nen na'ntu'. Dxuchálajntu' ca naca chee Bénnea' naque' Dizra' da dxunna na xel-la' nabán li lazre'. <sup>2</sup>Bénnea' dxunne' xel-la' nabán zeajlí canna ba blé'e, na' netu' blé'entu' Le'. Dxixruj béantu' da naca chee', ne dxuzentu' le'e ca naca chee'. Léqueze' zúalene' Xradxu Dios, na' blé'e naga zúadxu. <sup>3</sup>Da blé'entu', ne da bémentu' dxuzentu' le'e chee gácale tuze nen netu'. Da lítegaze, nácadxu tuze nen Xradxu Dios, ne nen Jesucristo, Zri'ine Dios. <sup>4</sup>Ca naca da caní dxuzúaja' cheele chee gaca du lazre' xel-la' dxebe cheele.

*Dios naque' lení' chee xichaj lázrdau bèneache*

<sup>5</sup>Da nigá naca dizra' da bchálajle Jesús netu', ne da dxuzentu' le'e. Gunné': Dios naque' lení', ne quebe bi zúale Le' da naca chee da chul-la. <sup>6</sup>Che dxennadxu nácadxu tuze nen Le', na' che dxundxu da naca na chee da chul-la, dxun lázredxu ca naca da dxennadxu, na' ca naca da dxundxu quebe dxundxu da li. <sup>7</sup>Che dxundxu da li da naca chee xel-la' naxaní', ca naca Dios, Bénnea' naque' li lazre', ne zue' lu xel-la' naxaní', nadxa zúadxu tuze tudxu xetudxu, na' dxen chee Jesús, Zri'ine Dios, dxibe na dxi'u ca naca xúgute dul-la nabáxadxu.

<sup>8</sup>Che dxennadxu quebe nabáxadxu dul-la, dxezí xéqueze cuínadxu, na' da li quebe zúale na dxi'u. <sup>9</sup>Che xrúalapedxu ca naca dul-la da nabáxadxu, Dios naque' li lazre', ne xlátaje, na' chee le na' Le' gunité lawe' cheedxu ca naca dul-la da nabáxadxu, ne quibe' dxi'u ca naca xúgute da sban da ba bendxu. <sup>10</sup>Che dxennadxu quebe nondxu dul-la, dxucá'anadxu Dios ca wen lazre', ne quebe ne sidxu du lázredxu ca naca dizra' chee'.

## 2

<sup>1</sup>Le'e, bi nazri'ite lazra', dxuzúaja' da nigá cheele chee quebe gunle dul-la. Che nu benne' gune' dul-la, zua wenaba cheedxu lau Dios, Jesucristo, Benne' xlátaje. <sup>2</sup>Le' gutie' waláz cheedxu chee gudúe' da nabágadxu lau Dios ca naca dul-la cheedxu, ne quegaze da nabágadxu dxi'u, san gudúe' da zaj nabaga xúgute bèneache.

<sup>3</sup>Che dxuzúadxu dizra' ca naca da bdxixruj be'e Dios, nezdxu ba núnbeadxu Le'. <sup>4</sup>Che nu dxenná: Neda' núnbe'a Le', ne che quebe dxuzúe' dizra' ca naca da bdxixruj be'e Dios, benne' nigá naque' wen lazre', ne quebe dxenné' da li. <sup>5</sup>Che nu benne' dxuzúe' dizra' ca naca da bdxixruj be'e Dios, benne' nigá nazri'ine' Dios du lazre'. Che dxundxu caní nezdxu ba zúadxu tuze nen Le'. <sup>6</sup>Bénnea' dxenné' naque' tuze nen Dios dxal-la' gaque' ca guca Jesús.

*Tu da cube da bdxixruj be'e Jesús*

<sup>7</sup>Le'e, bi nazri'ite lazra', dxuzúaja' cheele ca naca da dxenná na dxal-la' zri'idxu le sa' ljwézredxu. Quebe naca na tu da cube da bdxixruj bea Dios. Naca na da gula na' da ba guzile nédxudauté. Da gula da bdxixruj bea Dios naca na dizra' da ba bénequezle. <sup>8</sup>Naca na ca dxuzúaja' cheele tu da cube da dxixruj bea Dios, da naca béaqueze na naca da li lawe' da ben Jesús ca naca na, ne lawe' da dxunle le'e ca naca na. Caní naca na lawe' da ba dxusení' xel-la' naxaní' li chee xel-la' zri'i lazre' lu xichaj lázrdaudxu, da dxegúa na da naca na chee da chul-la.

<sup>9</sup>Che nu benne' dxenné' dxune' da naca na chee xel-la' naxaní', ne che dxecuídene' le sa' ljwezre', benne' nigá ne dxedé' lu da naca na chee da chul-la. <sup>10</sup>Benne' nazri'ine' le sa' ljwezre' dxune' da naca chee xel-la' naxaní', ne quebe dxune' da guzrí'a xi na le sa' ljwezre'. <sup>11</sup>Bénnea' quebe chawe' dxelé'ene' le sa' ljwezre', lu da naca na chee da chul-la zua bènea', ne lu da na' dxedé', ne quebe nézene' ga zéaje' lawe' da dxucá'ana da chul-la le' ca tu benne' la chul-la.

<sup>12</sup>Le'e, bi nazri'ite lazra', dxuzúaja' cheele lawe' da ba bnite lau Dios cheele ca naca dul-la cheele, lawe' da gute Jesucristo waláz cheedxu. <sup>13</sup>Le'e, benne' nazri'ite lazra', dxuzúaja' cheele lawe' da ba núnbeale Bénnea' zúaqueze' nédxudaute.

Le'e, benne' cuide', dxuzúaja' cheeḷe lawe' da ba bsanle da dxenná da xriwe'.

Le'e, bi nazri'itē lazra', dxuzúaja' cheeḷe lawe' da ba núnbeale Xradxu Dios.

<sup>14</sup> Le'e, xruze xrna', dxuzúaja' cheeḷe lawe' da ba núnbeale Bénnea' zúaqueze' nédxudaute.

Le'e, benne' cuide', dxuzúaja' cheeḷe lawe' da nácale benne' wal-la, ne dizra' chee Dios nápaḷe, ne bsanle da dxenná da xriwe'.

<sup>15</sup> Quebe sa lázrele da calēla ca' da zaj naca na chee xezr la xu nigá, ne quegá da zaj de lu xezr la xu nigá. Che nu benne' dxezá lazre' da zaj de lu xezr la xu nigá, quebe nazri'ine' Xradxu Dios. <sup>16</sup> Da caní zaj naca na chee xezr la xu nigá, da dxezá lázredxu da dxezaca ba lazre' belá' dxen cheedxu, ne da dxezaca ba lazre' xiaj laudxu, ne ca naca xel-la' dxucá'ana szren zujna chee da nápadxu. Xúgute' da caní quebe zaj naca na da dxunna Dios, san zaj naca na chee xezr la xu nigá. <sup>17</sup> Ba za zra xuzre lazre' xezr la xu nigá, ne ca naca da dxezá lázredxu da naca na chee xezr la xu nigá. Bénnea' dxunē' da dxaca lazre' Dios wazúatecaze'.

*Ca naca da li, ne da wen lazre'*

<sup>18</sup> Le'e, bi nazri'itē lazra', zra caní zaj naca na zra bzebe. Ba bénele gulé'e lawe' benne' tábague' Cristo. Neda' dxapa' le'e na'a, bache belelá' benne' zantē benne' dxeledábage' Cristo. Chee le na' nezdXu ba zúadxu zra bzebe. <sup>19</sup> Benne' caní belexedxúajqueze' ládujla dxi'u. Da líqueze quebe gulaque' tuze nen dxi'u. La gulaque' tuze nen dxi'u, na' belexegá'anaḷequeze' dxi'u. Caní guca chee nezdXu quebe zaj naca xúgute' tuze nen dxi'u.

<sup>20</sup> Ca naca cheeḷe le'e, ba zúale Be' Lá'azxa le'e, Bénnea' gusel-la Xradxu Lá'azxa. Chee le na' ba nézele xúgute' da caní. <sup>21</sup> Dxuzúaja' cheeḷe da nigá lawe' da ba nézele da li, ne quegá dxennia' quebe nézele da li. Ba nézquezele le'e quebe dxun lazre' Bénnea' naque' da li.

<sup>22</sup> ¿Nuzra' naca benne' wen lazre'? Naca bénnea' dxennē' Jesús quebe naque' Cristo, Benne' naseḷ-la Dios. Benne' wen lazre' nigá dxennē' Dios quebe naque' Xra Jesús, ne Jesús quebe naque' Zri'ine Dios. <sup>23</sup> Xúgute' benne' dxeleñné' Jesús quebe naque' Zri'ine Dios, Dios quebe zúaleñē' benne' ca'. Bénnea' dxexechēbe'

Jesús naque' Zri'ine Dios, Dios zúalequeze' bénnea'.

<sup>24</sup> Chee le na', le cu'u lu xichaj lázrdaule dizra' da ba bénele nédxudaute. Che da ba bénele nédxudaute' zua na lu xichaj lázrdaule, le'e súatequezele tuze nen Zri'ine Dios, ne nen Xradxu Dios. <sup>25</sup> Da nigá naca na da nachebe lazre' Dios, gunne' dxi'u xel-la' nabán zeajlí canna.

<sup>26</sup> Ba bzuaaja' cheeḷe da nigá ca naca chee benne' ca' dxelezi xē'e le'e. <sup>27</sup> Na'a zúale Be' Lá'azxa le'e, Bénnea' gusel-la Jesucristo cheeḷe, na' Be' Lá'azxa nigá zuē' xichaj lázrdaule. Chee le na' quebe nachínele nu guseḷe le'e lawe' da dxuseḷe Be' Lá'azxa le'e ca naca xúgute' da caní, na' da dxuseḷe le'e naca na da li, ne quebe naca na da wen lazre'. Chee le na', le súatequeze tuze nen Cristo ca naca da ba bseḷe Be' Lá'azxa le'e.

*Ca naca chee benne' zaj naque' zri'ine Dios*

<sup>28</sup> Na'a, bi nazri'itē lazra', le súatequeze tuze nen Cristo, chee súadxu li lazre' gate xelá' Le', ne quebe xedué'edxu lau Le' gate xelé'e. <sup>29</sup> Ba nézele naca xlátaje Dios. Chee le na' dxal-la' nézele xúgute' benne' ca' dxelúnqueze' da naca na xlátaje zaj naque' zri'ine Dios.

### 3

<sup>1</sup> Le nna' xque ca nazri'ilē'e Dios dxi'u lawe' da nazí ladxu bi chee Dios, ne caní nácadxu. Chee le na' quebe zaj neze bénneache lu xezr la xu nigá da nácadxu lawe' da quebe belúnbe'e Jesús. <sup>2</sup> Le'e, bi nazri'itē lazra', na'a nácadxu bi chee Dios. Quebe ne gulé'e lawe' da gácadxu. NezdXu gate xelá' Le', gácadxu ca naca Le' lawe' da lé'edxu Le' ca nácaqueze Le'. <sup>3</sup> Nu benne' dxebeza lazre' gaque' ca naca Jesús dxue lazre' gaque' du lazre' ca naca Jesús, naque' du lazre'.

<sup>4</sup> Nu benne' dxunē' dul-la quebe dxuzúe' dizra' ca naca da bdxixruj be'e Dios lawe' da naca dul-la da dxeḷábaga da bdxixruj be'e Dios. <sup>5</sup> Ba nézele bla' Jesucristo chee gudúe' dul-la nabágadxu, ne Le' quebe bi dul-la bene'. <sup>6</sup> Xúgute' benne' zaj zúatequeze' tuze nen Jesús quebe dxelunē' dul-la, na' xúgute' benne' dxelunē' dul-la quebe ne xelélé'ene' Cristo, ne quebe ne xelúnbe'e Le'. <sup>7</sup> Le'e, zri'ina'dau', quebe güeḷe lataj nu si xē le'e. Bénnea' dxunē' da xlátaje, xlátaje naque',

ca naca Dios, naque' xlátaje. <sup>8</sup> Benne' dxuné' dul-la naque' chee da xriwe' lawe' da dxun da xriwe' dul-la nédxudaute. Chee le na' bla' Zri'ine Dios, chee bzria xi'e xúgute da nun da xriwe' lu xezr la xu nigá.

<sup>9</sup> Xúgute benne' zaj naca bi chee Dios quebe dxelune' dul-la lawe' da zúalete-queze Be' chee Dios benne' ca'. Chee le na' québedxa gaca xeze' xelune' dul-la lawe' da zaj naque' bi chee Dios. <sup>10</sup> Naca bea nu naca bi chee Dios ne nu naca bi chee da xriwe'. Bénnea' quebe dxune' da xrlátaje ne quebe nazri'ine' le sa' ljwezre' quebe naque' bi chee Dios.

*Dxal-la' zri'idxu tu xetudxu*

<sup>11</sup> Da nigá naca na dizra' da ba béneque-zle nédxudaute, da dxenná na: Dxal-la' zri'idxu tudxu xetudxu. <sup>12</sup> Quebe gundxu ca ben Caín, bi na' gúcabe' chee da xriwe', na' bétebe' bi bíchebe'. ¿Bizr chee na' bétebe' lebe'? Bétebe' lebe' lawe' da naca da zrinnaj da ben Caín, na' da ben bi bíchebe' naca na da xrlátaje.

<sup>13</sup> Le'e, benne' bícha'dau', quebe xebánele che bénneache lu xezr la xu nigá dxuluzúe' le'e chalá'ala. <sup>14</sup> NezdXu ba bdxúajdxu lu na' xel-la' gute, ne ba guxú'udxu lu xel-la' nabán lawe' da nazri'idxu bíchedxu ca'. Bénnea' quebe nazri'ine' bíchedxu ca' zúaqueze' lu xel-la' gute. <sup>15</sup> Bénnea' dxuzúe' chalá'ala bíchedxu ca' naque' ca tu benne' dxute benne', na' ba nézquezele le'e nu benne' dxute benne' quebe nape' xel-la' nabán zeajlí canna. <sup>16</sup> Ba nezdXu da naca xel-la' zri'i lazre' lawe' da bzanne Jesucristo xel-la' nabán chee', na' gutie' waláz cheedxu. Cá'anqueze dxi'u dxal-la' guzúadXu xel-la' nabán cheedxu chee gácale' dxu bíchedxu ca'. <sup>17</sup> Che tu benne' nape' xel-la' gunni'a da naca na chee xezr la xu nigá, ne che dxelé'ene' le sa' ljwezre' dxexá'zrene', na' che quebe xexache lazre' le', benne' nigá quebe nazri'ine' Dios. <sup>18</sup> Le'e, zri'ina'dau', dxal-la' zri'idxu tudxu xetudxu, quegá nen dízra'ze, ne quegá nen da nnézedxu. Dxal-la' gúntequezdXu na, na' gaca bea na da li nazri'idxu bíchedxu ca'.

*Zua zri lázrdaudxu lau Dios*

<sup>19</sup> Che gundxu caní ba nezdXu nácadXu chee da lí, na' sua zri lázrdaudxu lau Dios, <sup>20</sup> gate zua tu da dxagu na zria lu lázrdaudxu, lawe' da nezdXu naca Dios zrendxa

ca lázrdaudxu. Le' nézquezne' ca naca da dxundxu. <sup>21</sup> Ca'an naca, bi nazri'ite' lazra', che quebe zua tu da dxagu na zria lu lázrdaudxu, waca sua zrize lázrdaudxu lau Dios, <sup>22</sup> na' Le' gunne' dxi'u xúgute da nábadxu lawe'. Ca'an gaca lawe' da dxuzúadXu dizra' da bdxixruj be'e Dios, ne dxundxu da dxezaca ba lazre' Le'. <sup>23</sup> Da bdxixruj be'ene' dxi'u naca na chéajle' dxu chee Jesucristo, Zri'ine Dios, ne zri'idxu tudxu xetudxu ca bdxixruj be'e Le'. <sup>24</sup> Bénnea' dxuzúe' dizra' da bdxixruj be'e Le' zúalequeze' Dios, na' Dios zúalequeze' bénnea'. Ba nezdXu Le' zúalequeze' dxi'u lawe' da bache benne' dxi'u Be' chee'.

4

*Naca bea Be' chee Dios*

<sup>1</sup> Le'e, bi nazri'ite' lazra', quebe chéajle' chee xúgute benne' dxelenné' zúale Be' chee Dios le'. Le nna' xque ca naca da dxulusé'ene' chee nézele che zúale Be' chee Dios le'. Caní dxal-la' gunle lawe' da ba belelá' benne' zante, benne' wen lazre', dxelenné' dxuluchálaje' waláz chee Dios. <sup>2</sup> Caní gaca nézele che zúale Be' chee Dios tu benne'. Xúgute benne' dxellexechebe' ba bla' Jesucristo, ne guque' bénneache, benne' caní zaj naque' chee Dios. <sup>3</sup> Xúgute benne' quebe dxellexechebe' ca guca Jesucristo quebe zaj naque' chee Dios. Zaj naque' chee bénnea' dxedábague' Jesucristo. Ba bénele gulé'e lawe' bénnea', na' na'a ba zue' lu xezr la xu nigá.

<sup>4</sup> Le'e, bi nazri'ite' lazra', nácale chee Dios, ne bache bzúale chalá'ala benne' ca' dxelezi xe'e lawe' da szrendxa naca Be' zúale na le'e ca be' zua na lu xezr la xu nigá. <sup>5</sup> Benne' ca' zaj naque' chee xezr la xu nigá. Chee le na' dxuluchálaje' chee da naca na chee xezr la xu nigá, na' benne' zaj zre'e xezr la xu nigá dxelenne' da dxuluchalaj benne' ca'. <sup>6</sup> Dxi'u nácadXu chee Dios. Benne' zaj núnbe'e Dios dxuluzé' nague' cheedxu. Benne' quebe zaj naque' chee Dios quebe dxuluzé' nague' cheedxu. Chee le na' nezdXu nu benne' zúale Be' chee xel-la' li le', ne nu benne' zúale be' chee da dxezi xe na le'.

*Tu dxúnzqueze Dios da naca chee xel-la nazri'i lazre'*

<sup>7</sup> Le'e, bi nazri'ite' lazra', dxal-la' zri'idxu tudxu xetudxu lawe' da dxunna Dios dxi'u xel-la' nazri'i lazre' na'. Xúgute benne' zaj

naque' zri'i lazre' caní zaj naque' zri'ine Dios ne zaj núnbe'e Dios. <sup>8</sup> Bénnea' quebe naque' zri'i lazre' caní quebe núnbe'e Dios lawe' da tu dxúnzqueze Dios da naca chee xel-la nazrí'i lázre'. <sup>9</sup> Naca béaqueze Dios nazrí'ile'ene' dxi'u lawe' da gusel-le' Zrí'ine' tu licha' lu xezr la xu nigá chee zrué'dxu xel-la' nabán da naca na chee Zrí'ine' na'. <sup>10</sup> Xel-la' zri'i lazre' li naca na caní: Quegá dxi'u na' bzri'idxu Dios. Le' bzri'ine' dxi'u, ne gusel-le' Zrí'ine' chee guque' da gudúa na da nabágadxu lau Dios lawe' da nabágadxu dul-la.

<sup>11</sup> Le'e, bi nazrí'ite' lazra', che Dios bzri'ine' dxi'u caní, dxi'u dxal-la' zri'idxu tudxu xetudxu. <sup>12</sup> Quebe nu ne le'e Dios, san che zri'idxu tudxu xetudxu, Dios zúaqueze' lu xichaj lázrdaudxu, na' xel-la' zri'i lazre' chee' dxun na li lazre' xel-la' zri'i lazre' chegdxu. <sup>13</sup> NezdXu nácadxu tuze nen Dios, na' Dios naque' tuze nen dxi'u lawe' da bzué' Be' chee' lu lázrdaudxu. <sup>14</sup> Ba blé'entu', ne dxuzentu' le'e ca naca da ben Xradxu Dios, gusel-le' Zrí'ine' chee bedajselé' bénneache chee xezr la xu nigá. <sup>15</sup> Bénnea' dxexchebe' naca Jesús Zrí'ine Dios, Dios zúaqueze' bénnea', na' le' zúaqueze' Dios.

<sup>16</sup> Ba núnbeadxu ca nazrí'i Dios dxi'u, ne ba guxéajlédxu nazrí'ine' dxi'u. Tu dxúnzqueze Dios da naca chee xel-la nazrí'i lazre', na' bénnea' naque' zri'i lazre' caní zúaqueze' Dios, na' Dios zúaqueze' le'. <sup>17</sup> Caní dxaca li xel-la' zri'i lazre' chegdxu, chee sua zrize lázrdaudxu lu zra guzría xi' Dios bénneache, benne' ca' dxelune' da calela, lawe' da nácadxu lu xezr la xu nigá ca náaqueze Jesucristo. <sup>18</sup> Bénnea' naque' zri'i lazre' caní quebe dxexzebe' da gaca na lu zra na'. Xel-la' zri'i lazre' li dxebéaj na chalá'ala xel-la' dxexzebe na'. Nu benne' dxexzebe' dxebeze' bi da saque', na' bénnea' dxexzebe' quebe dxaca li xel-la' zri'i lazre' chee'.

<sup>19</sup> Dxi'u nazrí'idxu Dios lawe' da bzri'i Dios dxi'u nédxudaute. <sup>20</sup> Che nu benne' dxenné': Nazrí'ida' Dios, ne che benne' nigá dxuzúe' chalá'ala le sa' ljwezre', dxun lazre'. Che quebe nazrí'ine' le sa' ljwezre', bi dxelé'etene', ¿ájazra gune', zrí'ine' Dios, ne quebe dxelé'ene' Le'? <sup>21</sup> Dios ba bdxixruj be'ene' dxi'u caní, gunné': Bénnea' nazrí'ine' Dios, zrí'iquezne' le sa' ljwezre'.

## 5

*Ca bdxúajdxu chawe' lu xezr la xu nigá*

<sup>1</sup> Xúgute benne' dxeléajle'e Jesús naque' Cristo, Benne' nase-la Dios, benne' caní zaj naque' bi chee Dios, na' che zaj nazrí'ine' Xradxu Dios, dxal-la' xelezrí'iquezne' xúgute benne' zaj naque' bi chee Dios. <sup>2</sup> NezdXu nazrí'idxu benne' zaj naque' bi chee Dios chete nazrí'idxu Dios, ne dxundxu ca naca da dxi'e dxi'u. <sup>3</sup> Che da li nazrí'idxu Dios, dxundxu da dxi'e dxi'u. Da dxi'e dxi'u quebe naca na stebe. <sup>4</sup> Xúgute benne' zaj naque' bi chee Dios dxedxúaje' chawe' lau da calela da dxaca na lu xezr la xu nigá. Dxedxúajdxu chawe' lau da calela da dxaca na lu xezr la xu nigá lawe' da dxéajlédxu da naca na chee Jesucristo. <sup>5</sup> Benne' dxedxúaje' chawe' lau da calela da dxaca na lu xezr la xu nigá naque' bénnea' dxéajle'e naca Jesús Zrí'ine Dios.

*Da dxenná Dios ca naca chee Zrí'ine'*

<sup>6</sup> Guca bea Jesús naque' Cristo gate gudxúe' nisa, ne gate gulalaj dxen chee'. Quegá gudxúaje' nisa san cá'anqueze gulalaj dxen chee'. Be' chee Dios gudxixruj lie' da nigá, na' Le' dxuchálaje' da li. <sup>7</sup> Chunne' dxelixruj lie' chee' da nigá xabáa, Xradxu Dios, ne Zrí'ine', ne Be' Lá'azxa, na' chunne' caní zaj naque' tuze. <sup>8</sup> Cá'anqueze chunna da dxelixruj li na chee da nigá lu xezr la xu nigá, Be' Lá'azxa, ne da guca gate gudxúa Jesús nisa, ne da guca gate gulalaj dxen chee', na' da chunna caní, túzqueze da dxelixruj li na. <sup>9</sup> Dxéajlédxu da dxelixruj li bénneache, san da nadxixruj li Dios zácaxa na, na' Le' nadxixruj lie' naca Jesús Zrí'inequeze'. <sup>10</sup> Bénnea' dxéajle'e naca Jesús Zrí'ine Dios ba guzi'e xichaj lázrdawe' da ba gudxixruj li Dios, san bénnea' quebe dxéajle'e chee Dios dxucá'ane' Dios ca tu benne' wen lazre', lawe' da quebe guxéajle'e chee da ba gudxixruj li Dios ca naca chee Zrí'ine'. <sup>11</sup> Da nigá naca na da nadxixruj li Dios, dxenné' ba benne' dxi'u xel-la' nabán zeajli canna, na' xel-la' nabán nigá za na lu na' Zrí'ine', Jesucristo. <sup>12</sup> Bénnea' zua Zrí'ine Dios na' lu xichaj lázrdawe' zúale xel-la nabán nigá le', san bénnea' quebe zua Zrí'ine' lu xichaj lázrdawe' quebe zúale xel-la' nabán nigá le'.

*Ca gaca nezdXu nápadxu xel-la' nabán zeajli canna*

<sup>13</sup>Da nigá dxuzúaja' chee dxéajle chee Zri'ine Dios chee nézele zúale xel-la' nabán zeajlí canna le'e.

<sup>14</sup>Dxuxrén lázredxu Dios lawe' da nezdXu che bi nábadxu lau Le' ca naca da dxaca lazre' Le', Léqueze' wenne' cheedxu.

<sup>15</sup>Lawe' da nezdXu Dios dxenne' cheedxu, cá'anqueze ba nezdXu gunna Le' da ba gunábadxu lau Le'.

<sup>16</sup>Che tu benne' dxelé'ene' dxun bíchedxu dul-la da quebe nua na xel-la' gute, dxal-la' nabe' lau Dios ne chee bíchedxu na', na' Dios gunézruje' xel-la' nabán chee', che naca na tu dul-la da quebe nua na xel-la' gute. De dul-la da nua na xel-la' gute, na' quebe dxennía' nábale lau Dios ne chee bérnea' dxune' dul-la nigá.

<sup>17</sup>Xúgute da calela naca na dul-la, na' de dul-la da quebe nua na xel-la' gute.

<sup>18</sup>NezdXu nu benne' naca bi chee Dios québedxa dxúnqueze' dul-la lawe' da dxuwía dxuxúe Zri'ine Dios le', na' da xriwe' quebe bi dxezeque guné na le'.

<sup>19</sup>NezdXu nácadxu bi chee Dios, na' xúgute benne' zaj naca chee xezr la xu nigá zaj xu'e lu na' da xriwe'.

<sup>20</sup>NezdXu ba bla' Zri'ine Dios, ne ba bzéajni'ine' dxi'u chee gúnbeadxu Dios li. Nácadxu tuze nen Bérnea' naque' li lazre', Jesucristo, Zri'ine Dios. Benne' nigá naque' Dios li, ne Léqueze' naque' xel-la' nabán zeajlí canna da zúale na dxi'u. <sup>21</sup>Le'e, zrí'ina'dau', le guxúe xanne' cúnale chee quebe gucá'ana szrenle bedau' xiaj xaga ca'.

## DIZRA'DAU' GUDXUPE' DA BZUAJ SAN JUAN

*Da naca li, ne xel-la' zri'i lazre'*

<sup>1</sup>Neda', benne' gula wen zrin chee Cristo, dxuzúaja' da nigá chiu' lue', nu'ula zana', ba gucá'a Dios lue'. Dxuzúaja' chee zri'inu' ca'. Da li nazrí'ida' le'e, ne quegá tuze neda', san cá'anqueze benne' ca' zaj núnbe'e da li zaj nazrí'iquezne' le'e. <sup>2</sup>Nazrí'ida' le'e lawe' da ba núnbeadxu da li, da súatequeze na xíchaj lázrdaudxu. <sup>3</sup>Dxenaba' lau Xradxu Dios, ne lau Xránadxu Jesucristo, Zri'ine Dios, xezá' lazre' chee da xrlátaje, ne xache lazre' le'e, ne gunne' le'e xel-la' dxebeza zri lazre', chee gúnbeale da li, ne chee gácale zri'i lazre'.

<sup>4</sup>Dxebéle'eda' lawe' da ba benda' zri'inu' ca' dxelunbe' ca naca da li, ca naca da bdxixruj be'e Xradxu Dios. <sup>5</sup>Na'a, nu'ula zána'dau', dxata' xúeda' lue' zri'idxu tudxu xetudxu. Da nigá dxuzúaja' chiu' quebe naca na tu da cube da nadxixruj bea Dios, san naca na da ba bendxu nédxudaute. <sup>6</sup>Xel-la' zri'i lazre' li naca bea na che dxundxu ca da nadxixruj bea Dios, na' da nadxixruj be'e naca na da ba bénele nédxudaute, chee zri'idxu tudxu xetudxu.

*Benne' dxelezí xé'e*

<sup>7</sup>Ba belelá' benne' zante, benne' dxelezí xé'e. Benne' caní quebe dxelexechebe' guca Jesús bela' dxen. Benne' caní zaj naque' benne' dxelezí xé'e, ne dxeledábague' Cristo. <sup>8</sup>Le guxúe xanne' cuínale chee quebe gunítele da dxal-la sile du naxá'.

<sup>9</sup>Nu benne' dxedé' nagá xula chee da nigá quebe dxezilene' ca naca da bşede Cristo, ne quebe zúale Dios le'. Bénnea' dxezilene' ca naca da bşede Cristo, da li Dios zúalene' Le', na' cá'anquez zúale Cristo Le'. <sup>10</sup>Che nu benne' xide' naga zúale le'e, ne quebe dxusédene' le'e ca naca da bşede Cristo, quebe nnele bénnea' lízrele, ne quebe gá-pale le' ba lá'ana. <sup>11</sup>Nu benne' gape' bénnea' ba lá'ana, dxun benne' nigá tuze ca da calela da dxun bénnea'.

*Dizra' bzébe*

<sup>12</sup>Da zante dxal-la' xapa' le'e, san quebe dxaca lazra' guzúaja' na lu xícheze. Dxebeza lazra' xida' xedajná'a le'e, na' guchála-jlequeza' le'e, chee gaca béle'edxu.

<sup>13</sup>Bidu ca' chee bi bilu', nu'ula ba gucá'a Dios le', dxulugápabe' lue' diuzre. Ca'an gaca na.

## DIZRA'DAU' GUXUNNE' DA BZUAJ SAN JUAN

*San Juan dxenné' da chawe' chee benne' le'*  
Gayo

<sup>1</sup>Neda', benne' gula wen zrin chee Cristo, dxuzúaja' da nigá chiu' lue', Gayo, bi nazrí'ite lazra'. Da líqueze nazrí'ida' lue'.

<sup>2</sup>Lue', bi nazrí'ite lazra', dxenaba' lau Dios gaca da chawe' chiu', ne su' chawe', ca dxaca chee bénne'du xu'u. <sup>3</sup>Gubéle'eda' gate belelá' tu chupa benne' bíchedxu, ne gulé'e neda' ca dxéajle'u chee Xránadxu, ne ca dxunu' ca naca da li. <sup>4</sup>Québequeze bi de da gundxa na neda' s'uale'a xel-la' dxebé, ca xel-la' dxebé da zua' gate dxenda' dxelún benne' zaj naque' ca zrí'inequeza' ca naca da li.

<sup>5</sup>Lue', bi nazrí'ite lazra', nacu' benne' li lazre' ca naca da dxunu' dxácalenu' bi bíchedxu ca', ne da naca blaudxa dxácalenu' bi bíchedxu za'aque' xezre xula.

<sup>6</sup>Lau benne' zaj nazrague' chee Dios nigá dxuluchalaj bi bíchedxu caní ca nazrí'inu' bi bíchedxu ca'. Da cháwedau' dxunu' gate dxugú'u benne' caní neza, dxácalenu' le' ca naca da dxezaca ba lazre' Dios. <sup>7</sup>Benne' caní zjaque' dxelune' zrin nigá lawe' da zaj nazrí'ine' Cristo, ne quebe bi dxelezi'e da xelunna benne' quebe zaj núnbe'e Dios. <sup>8</sup>Chee le' na' dxal-la' gápadxu ba lá'ana benne' caní chee gúnledxu le' zrin chee da li.

*Da calëla da dxun benne' le' Diótréfes*

<sup>9</sup>Ba bzuaja' chee benne' zaj nazrague' chee Dios naga zu', na' bénnea' le' Diótréfes quebe dxape' netu' ba lá'ana lawe' da dxaca lazre' gaque' blau lówela benne' ca'. <sup>10</sup>Chee le' na', che xida' naga zu', guzéajni'ida' benne' ca' ca naca da dxun bénnea', dxezí tizre' netu', ne dxennéle'e cheentu'. Quegá da nigáze dxune', san cá'anqueze quebe dxezí' lu ne'e benne' bíchedxu zá'aque' ga na', ne quebe dxu'e lataj benne' ca' dxelaca lazre' xelezí' lu ne'e benne' caní, ne dxexe-béaje' le' ládujla benne' ca' zaj nazrague' chee Dios.

<sup>11</sup>Lue', bi nazrí'ite lazra', quebe gunu' lue' ca naca da calëla da dxelún benne' caní. Ben ca naca da xrlátaje. Bénnea' dxune' da xrlátaje naque' chee Dios, san nu benne'

dxune' da calëla, quebe ne gúnbeaqueze' Dios.

*Da xrlátaje da dxun benne' le' Demetrio*

<sup>12</sup>Xúgutë benne' dxelenné' da chawe' ca naca da dxun Demetrio, na' da líqueze naca bea na ca dxune'. Cá'anqueze netu' dxixruj beantu' ca naca da dxune', na' lue' nézqueznu' dxuchálajntu' da li.

*Dizra' bzebe*

<sup>13</sup>Déle'e da dxal-la' guchálajlena' lue', san quebe dxaca lazra' guzúaja' na lu xícheze, <sup>14</sup>lawe' da dxebeza lazra' lé'etequezda' lue'. Nadxa guchálajdxu caníqueze.

<sup>15</sup>Dxenaba' lau Dios sua zrize lazrda'u. Bi bíchedxu zaj zra' nigá dxulugape' lue' diuzre. Bgapa lue' diuzre tu tu benne' bíchedxu zaj zre'e naga zu'. Ca'an gaca na.

## XTIZRA DIOS DA BZUAJ SAN JUDAS

*Dizra' da gusel-la San Judas chee bi ca' chee  
Dios*

<sup>1</sup>Neda', Judas, wen zrin chee Jesucristo, naca' benne' biche Jacobo, na' dxeasel-la' dizra' nigá cheele le'e, nácale benne' ca' ba gunné Xradxu Dios, ne ba guqué'e le'e chee gácale bi chee', ne dxuxúe' le'e lawe' da nácale tuze nen Jesucristo. <sup>2</sup>Dxenaba' lau Dios xache lázrele'e le'e, ne gúnnale'e cheele xel-la' dxebeza zri lazre', ne xel-la' zri'i lazre'.

*Ca naca chee benne' ca' dxulusédenē' da  
wen lazre'*

*(2 Pedro 2.1-17)*

<sup>3</sup>Benne' bícha'dau' nazri'ite lazra', ba guca lázreli'a guchálajlena' le'e ca naca chee xel-la' weselá da ba nazile le'e, ne cá'anqueze neda', san na'a dxun na ba xen guchálajlena' le'e, ne gata' xueda' le'e gapa típale da naca chee xel-la' dxeají lazre' da ba benna Dios chalásaze chee bi chee' ca'. <sup>4</sup>Caní naca lawe' da ba gulú'u benne' wen lazre' ca' ládujla dxi'u, benne' ca' ba gunná Dios gate nate dxal-la' xele-bía xi'e. Zaj naque' benne' dxelune' da sban, na' lawe' da dxunite lau Dios chee benne' dul-la, dxeléquene' zaj nápaqueze' lataj xelune' cáteze da dxelaca lazre', ne dxuluzúe' chalá'ala Dios tu licha', Bénnea' dxenná bea, ne Xránadxu Jesucristo.

<sup>5</sup>Lácala ba nézquezle le'e da nigá, dxaca lazra' gusá'a lázrele ca ben Xradxu Dios gate bebéaje' benne' Israel ca' ládujla benne' Egipto, na' gudé na' bzria xi'e benne' Israel ca', benne' quebe guléajle'e chee'. <sup>6</sup>Cá'anqueze gubáz chee xabáa, gubáz ca' chee Dios, quebe belune' ca da guzre Dios le', san bulucá'ane' lataj chee'. Dios nuzague' le' lu da chul-la, ne nuchéaje' gubáz ca' chalásaze nen du xia, chee guzria xi'e le' lu zra bzebe ni'. <sup>7</sup>Cá'anqueze guca chee xezre Sodoma, ne xezre Gomorra ne chee xezre walízredu ca'. Ca belún gubáz chee xabáa ca', cá'anqueze belún bènneache chee xezre caní. Buluzúe' cuine' lu da sban, ne belune' cáteze da gulaca lazre', ne buluzúe' chalá'ala ca da bdxixruj bea Dios chee xel-la' zúale nu'ula. Na'a,

lawe' da bzria xi' Dios benne' ca', bdee' le' tu lu xi' da québedxa xexula na, na' da na' guca chee benne' caní dxuzéajni'i na dxi'u chee quebe gúnquezdxu ca'.

<sup>8</sup>Láqueze gulaca caní chee benne' ca', cá'anqueze dxelún benne' caní, zjácálene' xel-la' bchigala, ne dxuluca'ane' sban bela' dxen chee', ne dxuluzúe' chalá'ala xel-la' dxenná bea chee Xránadxu, ne dxeleenne' schanni' chee gubáz chee xabáa, gubáz ca' chee Dios. <sup>9</sup>Léqueze Miguel, gubáz blau chee xabáa chee Dios gate gudíl-lalene' da xriwe', ne btil-le' dizra' nen le' na chee guca bexu'e bel-la' dxen chee Moisés, quebe bexájrjene' nnabe' da ba xa', san guzre' na: "Xránadxu Dios tíl-laqueze' lue'." <sup>10</sup>Na'a benne' caní dxeleenne' schanni' chee da quebe zaj núnbe'e, na' da ba zaj núnbeaqueze', ca da zaj neze be xixre', be quebe zaj naxéajni'iba', da caní dxuluchínene' chee xuluzría xi' cuine'.

<sup>11</sup>Edxugua benne' caní lawe' da dxelune' ca da ben Caín, chee gulezí' lu ne'e dumí, buluzúe' chalá'ala da dxenná Dios ca ben Balaam, na' welexenite' ca guca chee Coré, bènnea' bzria xi' Dios lawe' da gudábague' xrtizra Dios. <sup>12</sup>Benne' caní, gate dxelágulene' le'e lu laní chee dxelune' cheajlechaze bènneache. Dxelé'aj dxelawe' nen le'e, ne quebe dxelape' ba lá'ana Dios. Dxelún cuine' ca benne' dxuluxúe' zri-la, san dxuluxúeze cuine'. Zaj naque' ca beuj ca' quebe zaj xuzru nisa, beuj ca' da dxua be'. Zaj naque' ca xaga ca' quebe dxelebía na da zixre chee na, ne zaj nabizre na du lue na, ne ba zaj zua na chee lepe na. <sup>13</sup>Zaj naque' ca xeajxruza chee nísadau' da dxedxú'u na bzrina' sgute, da dxulé'e na ca da sban da dxelune'. Zaj naque' ca belaj ca' dxelecuasa na lu xrneze na, ne zaj nabía xi' na chee cheajjsúa na chadía chacanna lu da chul-la.

<sup>14</sup>Cá'anqueze Enoc, benne' chee gazre cue' zre sua Adán gunné' waláz chee Dios ca naca chee benne' caní, gunné': "Ble'eda' Xránadxu ze'e nen gaxúane gaxúane bi chee ca' <sup>15</sup>chee guchi'e ca da zaj nun xúgute bènneache. Gulezría xi' xúgute benne' wen da sban ne chee da calela da belune' lu xel-la' calela chee', nen benne' dul-la ca' ne chee xúgute dizra' schanni' da gulenne' chee Dios." <sup>16</sup>Zaj naque' benne' wagu zria, ne benne' wezí tizra', benne' dxelunze' cáteze dxelezaca ba lazre'. Dxuluchálaje'



dizra' da dxucá'ana szren na le', ne dxe-lennáze' da chawe' chee bénneache chee xezezí'e da zaj de chee benne' ca'.

*San Judas dxenné xuene' bi ca' chee Xránadxu*

<sup>17</sup> Le'e, benne' bícha'dau' nazri'itē lazra', le gusá lázrele ca zánete iza gulenná benne' gubáz chee Xránadxu Jesucristo, <sup>18</sup> gulé'e le'e: Lu zra bzebe welezzrá' benne' xelún le' chee da ca' zaj naca lá'azxa, ne xelune' cáteze zaj naca da sban da dxelezá lazre'.

<sup>19</sup> Benne' caní dxelune' chupa la'a bénneache. Zaj naque' benne' chee xezr la xu nigá, ne quebe zúale Be' Lá'azxa chee Dios le'.

<sup>20</sup> Le'e, benne' nazri'itē lazra', le se chacha ca naca lu xel-la' dxeajlí lazre' lá'azxa da nápaie. Le guchálajle Dios, zúale xel-la' waca chee Be' Lá'azxa le'e. <sup>21</sup> Le cha' lu xel-la' zri'i lazre' chee Dios, ne le cueza zra gate gunna Xránadxu Jesucristo dxi'u xel-la' nabán da zeajlí canna lu xel-la' zri'i lazre' chee'.

<sup>22</sup> Le gácale benne' ca' dxelaca chupa lazre' ca naca chee Cristo. <sup>23</sup> Le gun xeledá benne' xula chee quebe chjaque' lu xi' chee lataj ba xa', ne le xexache lazre' xezícala bénneache. Le guxúe xanne' ca naca da sban da dxelún benne' ca' chee quebe ca'a le na le'e.

*San Judas dxue lá'ang' Dios*

<sup>24-25</sup> Dios tu licha', Benne' naque' sina, ne naque' Weselá cheedxu, wazéquene' guxúe' le'e chee quebe cuásale Le', ne chee guzúe' le'e lau Le' lu xel-la' szren chee', ne chee quebe dxenle da naca chee dul-la, ne chee súalequeze xel-la' dxebé le'e.

¡Gaca ba Le', ne gaca chee' xel-la' szren, ne xel-la' waca, ne xel-la' dxenná bea, ne chee Xránadxu Jesucristo, na'a zra, ne chadía chacanna! ¡Ca'an gaca na!

## DIZRA' DA BLE'E JESUCRISTO JUAN

### Da ble'e Jesucristo Juan

<sup>1</sup> Da nigá naca tu da bnezruj Dios Jesucristo da gulé'engé' wen zrin chee' ca' ca naca da dxal-la' gácate. Jesucristo gusel-le' gubáz chee' xabáa chee', na' le' bzéajni'ine' neda', Juan, naca' wen zrin chee' Jesús. <sup>2</sup> Neda' dxulé'eda' le'e da li ca naca xúgute da ble'eda', ne dxexechéba' ca naca dizra' chee' Dios, ne ca naca da gunná Jesucristo.

<sup>3</sup> Ba neza zrentę naca na chee' benne' gulabe', ne cá'anqueze ba neza zrentę naca na chee' benne' ca' dxuluzé nague' chee' bënnea' gulabe' dizra' nigá da benna Dios, ne xelunę' ca naca da naxúaj nigá, lawe' da ba za gáguze zra gaca na.

*Juan dxuzuaję' chee' gazre cue' benne' dxelájle'ę chee' Jesús*

<sup>4</sup> Neda', Juan, dxuzúaja' chee' gazre cue' benne' dxelájle'ę chee' Jesús, zaj zre'ę naga nababa Asia. Dxenaba' lau Dios gaca chawe' chee'le, ne gunnę' le'e xel-la' dxebeza zri lazre'. Le' guzúaqueze' nédxudautę, ne zúaqueze' na'a, ne tu súazqueze' chadía chacanna. Gazre Be' ca' zaj zra' ca li naga dxe' Dios zaj naca Le' tuze, <sup>5</sup> ne cá'anqueze Jesucristo naque' Le' tuze ca naca da chawe' da dxun Dios chee'le. Jesucristo naque' benne' li lazre' dxexechébe' ca da zaj naca chee' Dios, ne naque' benne' nedxu bebane' chalásaze ládujla benne' gate ca', ne nape' xel-la' dxenná bea lówela xúgute wenná bea zaj zre'ę xęzr la xu nigá. Cristo nazri'ine' dxi'u, ne ba gudibe' xichaj lázraudxu. Begüę' dul-la cheedxu gate blálaje' dxun cheéqueze' le'ę xaga begúaj. <sup>6</sup> Bene' dxi'u ca benne' wenná bea ca', ne bxruze ca' chee' gundxu zrin chee' Dios chee', Bënnea' naque' Xre'. ¡Gaca ba Le', ne gape' xel-la' dxenná bea chadía chacanna! ¡ca'an gaca na!

<sup>7</sup> Le' na' xque. Cristo zę'ę lu beuj bza. Xúgute bënneache xeledé'engé' Le', ne cá'anqueze benne' ca' belunę' Le' wę', na' ca naca bënneache zaj zra' lu xęzr la xu xebeze xache'ę ca xeledé'engé' Le'. ¡Awe', ca'an gaca na!

<sup>8</sup> Le' dxenné': "Neda' zúaqueza' nédxudautę, ne zúaqueza' bzébedxa. Dxuna'

su lau sua xúgute ne guna' xexuzre na." Caní dxenná Xránadxu, nape' dutę xel-la' dxenná bea, naque' Bënnea' guzúaqueze', ne zúaqueze', ne tu súazqueze'.

*Juan dxelé'engé' tu da ble'e Dios le' da naca na da xabáa chee' Cristo*

<sup>9</sup> Neda', Juan, naca' benne' bíchele le'e, ne naca' tuze nen le'e lu xel-la' zi', ne lu xel-la' dxenná bea, ne lu xel-la' dxuchaga lau da dxunna Jesucristo dxi'u. Ca tu benne' xu'ę lize xia guzúa' lu xęzr la xu Patmos da naxechaj nísadau', lawe' da bchálaja' dizra' chee' Dios ne dxuna' ba nalí ca naca chee' Jesucristo. <sup>10</sup> Guzúale Be' Lá'azxa neda' lu zra chee' Xránadxu, na' benda' cúzrula' chi'i tu benne' dxenné' zizraj ca chi'i luzu da dxulucueze'. <sup>11</sup> Gunné':

—Neda' naca' nedxu, ne bzebe ca naca da dxezú lau, ne da dxexuzre na. Bzuaj tu lu xiche da dxelé'enu', na' gusel-la na chee' gazre cue' bënneache dxelájle'ę chia', zaj zre'ę naga nababa Asia, benne' ca' zaj zre'ę xęzre Efeso, ne xęzre Esmirna, ne xęzre Pérgamo, ne xęzre Tiatira, ne xęzre Sardis, ne xęzre Filadelfia, ne xęzre Laodicea.

<sup>12</sup> Bexéchaja' chee' le'eda' nu chi'i na' gunné' neda', na' ca bexéchaja' na', ble'eda' gazre da zua na xi' da' zaj naca na oro.

<sup>13</sup> Laduj da zaj zua na xi' ca' ble'eda' tu benne' naque' ca Bënnea' gulje' bënneache, nácue' zra lane' da dxezrite lu ni'ę dxe'ela, na' xu'u tu bazxu oro lachu'e. <sup>14</sup> Xicha xíchaje' zaj naca na chiche ca zrila' chiche, u ca bezxe', na' xiaj lawe' dxelácatite legala na ca xi'. <sup>15</sup> Ni'ę dxelácatite na ca xia da gudetę bea guxú'u na lu xi', na' chi'ę naca na zizraj ca naca chi'i zane' xęgu zri'a ca'.

<sup>16</sup> Lu ne'ę da zua xabęla nuxre' da ca' zaj naca ca gazre belaj xabáa, na' dxu'ę dxedxuaj da naca na ca tu xia da nalá dxupa la'ate. Dxu'a lawe' dxácatite na ca gubizra gate dxenná'ę na.

<sup>17</sup> Ca ble'eda' Le', xeajchazia' zran ni'ę ca tu benne' gate. Na' Le' guxrúa ne'ę xabęla neda', na' gunné':

—Quebe zrebu'. Neda' zúaqueza' nédxudautę, ne zúaqueza' bzébedxa. <sup>18</sup> Naca bânqueza'. Gutia', na' na' a nabânqueza' chadía chacanna. Neda' nuxra' zren xia chee' xel-la' gute, ne chee' lataj ba xa'. <sup>19</sup> Bzuaj da ba blé'enu' ne da dxaca na'a, ne da gaca te nigá. <sup>20</sup> Caní naca da zęaje ca gazre belaj ca' blé'enu' nuxra' na'a xabęla, ne ca naca chee' gazre da zua na xi' da' zaj naca na oro. Gazre

da zaj naca ca belaj ca' zéaję na gubáz ca' nasel-la' cheę gazre cue' bėnneache chia' ca', na' gazre da zua na xi' zéaję na gazre cue' bėnneache chia' ca'.

## 2

*Dizra' gusel-la Cristo cheę gazre cue' bėnneache cheę*

*Dizra' gusel-le' cheę bi cheę' zaj zřę'e xęzre Efeso*

<sup>1</sup>Guzre Jesús neda':

—Bzuaj cheę gubáz chia' zúalęę' bi chia' zaj zřę'e xęzre Efeso. Bzuaj da nigá: Caní dxenná Jesús, Bėnnea' nuxřę' gazre belaj ne'e xabęla, ne dxedé' laduj gazre da zua na xi' da zaj naca na oro. <sup>2</sup>Neda' nezda' xúgute da dxunle. Nezda' dxúnle'e le zrin ne nácale zren lazre', ne quebe dxuele lataj benne' węn da zrinna' ca'. Neda' nezda' ba bxue xánnele benne' ca' dxelenné' zaj naque' gubáz chia' ne quebe zaj naque', na' ba ble'e le zaj naque' benne' węn lazre'. <sup>3</sup>Gúcale zren lazre', ne gudele xel-la' zi', na' bėnle'e le zrin chia', ne quebe gute ni'a na'le. <sup>4</sup>Na'a zua tu da dxagu na zria cheęle, québedxa nazri'ile neda' ca bzri'ile neda' nédxute. <sup>5</sup>Cheę le na', le gusá lazre' ca bzri'ile neda' nédxute, ne le xexiaje lazre', na' le gun ca da bęnle nédxute. Che quebe gunle caní xídaqueza' naga zúale, na' xecá'a xrlátajle lu da naca chia' cheę québedxa gácale ca da zua na xi' chia'. Caní guna' che quebe xexiaje lázrele. <sup>6</sup>Zua tu da dxexecá'a na le'e, dxecuídele da dxelún benne' ca' zaj nazí le' nicolaíta ca', benne' ca' dxulucá'ana szrenę' bedau' xiaj xaga ca', da na' dxecuídequeza' neda'. <sup>7</sup>Benne' zua nague' dxal-la' xenne' da nigá dxę Be' Lá'azxa bi chia' ca'. Benne' ca' xeledxúaje' xrlátaje lawe' da zrinna', neda' gunézruja' da xelawe' da dxebía xaga da dxunna na xel-la' nabán, ne zua na lu lataj xrlátaje cheę Dios.

*Dizra' gusel-le' cheę bi cheę' zaj zřę'e xęzre Esmirna*

<sup>8</sup>Guzre Jesús neda':

—Bzuaj cheę gubáz chia' zúalęę' bi chia' zaj zřę'e xęzre Esmirna. Bzuaj da nigá: Caní dxenná Jesús, Bėnnea' zúaqueze' nédxudaute, ne zúaqueze' bzębedxa, Bėnnea' gutię', ne bebánqueze'. <sup>9</sup>Neda' nezda' xúgute da dxunu'. Nezda' gudele xel-la' zi', ne nácale benne' xache'. Da li

nácale benne' gunní'a. Nezda' ca dxelenné schanni' cheęle benne' ca' dxelenné' zaj naque' judío, san zaj naque' tu cue' benne' dxulucá'ana szrenę' da xřiwe'. <sup>10</sup>Quebe zřębele ca naca xel-la' a' zi' da tele, lawe' da guzrá' da xřiwe' bál-lale le'e lizre xia cheę gulé'e lau da nácale, na' tele xel-la' zi' lawe' chi zra. Le gaca li lazre' lácala xelutię' le'e, na' neda' gunna' le'e xel-la' nabán ca tu da dxunna bea na będxuajle chawe'. <sup>11</sup>Benne' zua nague' dxal-la' xenne' da nigá dxę Be' Lá'azxa bi chia' ca'. Benne' ca' xeledxúaje' chawe' lawe' da zrinna', quebe bi gune da zi' da xa' da zeajli canna cheę benne' ca'.

*Dizra' gusel-le' cheę bi cheę' zaj zřę'e xęzre Pérgamo*

<sup>12</sup>Guzre Jesús neda':

—Bzuaj cheę gubáz chia' zúalęę' bi chia' zaj zřę'e xęzre Pérgamo. Bzuaj da nigá: Caní dxenná Jesús, Bėnnea' nuxřę' xia da nalá dxupa la'a. <sup>13</sup>Neda' nezda' xúgute da dxunle. Nezda' zúale naga dxenná bea da xřiwe'. Quebe nusanle da naca chia'. Quebe bsanle dxexechębele chia', ne lu zra ca' gate belutię' Antipas, benne' bechebe' du lazre' da naca chia' ládujla le'e, naga zua da xřiwe'. <sup>14</sup>Na'a, zua tu da dxagu na zria cheęle, dxuele lataj zaj zra' ládujla le'e benne' ca' ne zjácálęę' da będe Bal-aam, bėnnea' gulú'u xel-le' Balac, bennen' bęę' belún benne' Israel ca' dul-la, na' gulawe' da buluzřię' lau bedau' xiaj xaga ca', ne belune' da sban. <sup>15</sup>Cá'anqueze zaj zra' ládujla le'e bal-la benne' ne zjácálęę' da dxulusęde benne' zaj nazí le' nicolaíta, da na' dxecuídequeza' neda'. <sup>16</sup>Cheę le na' le xexiaje lázrele lawe' da che quebe xexiaje lázrele xida' naga zúale, na' tıl-lalęna' benne' ca' nen xia nalá da dxedxuaj na dxu'a. <sup>17</sup>Benne' zua nague' dxal-la' xenne' da nigá dxę Be' Lá'azxa bi chia' ca'. Benne' xedxuaję' chawe' lawe' da zrinna', neda' gunézruja' da gawe' da naca na xeta maná da nagache na xabáa, ne gunézruja' le' tu xiaj chiche, na' le'e xiaj na' naxúaj tu la cube cheę bėnnea', da quebe nu neze, san tuze bėnnea' si'e na.

*Dizra' gusel-le' cheę bi cheę' zaj zřę'e xęzre Tiatira*

<sup>18</sup>Guzre Jesús neda':

—Bzuaj cheę gubáz chia' zúalęę' bi chia' zaj zřę'e xęzre Tiatira. Bzuaj da nigá: Caní dxenná Jesús, Bėnnea' zaj zra xiaj lawe' da

dxelácatite na ca xi', na' ni'e zaj naca na ca xia gache da nabá'alé'e na. <sup>19</sup>Neda' nezda' xúgute da dxunle. Nezda' ca nazri'ile neda', ne ca dxéajlele chia', ne ca dxunle zrin chia', ne ca nácale zren lazre', na' dxúndxale na'a da zrendxa ca da benle nédxute. <sup>20</sup>Na'a, zua tu da dxagu na zria chee, dxuele lataj nu'ula na' le' Jezabel, nu'ula na' dxenné' dxuchálaje' waláz chee Dios, na' dxezí xé'e benne' wen zrin chia' ca' ca naca da dxusédené' chee xeluné' da sban, ne xelawé' da dxuluzrie' lau bedau' xiaj xaga ca'. <sup>21</sup>Neda' ba be'a nu'ula na' lataj xexíaje lazre', na' quebe guca lazre'. Quebe dxusané' ca naca da sban da dxuné'. <sup>22</sup>Na'a, che benne' ca' quebe xulusané' ca da dx-eluné' ca dxun nu'ula na', neda' cu'a le' xel-la' we' da quixruj na le', na' weledéle'e xel-la' zi' benne' ca' dxeluné' dul-la nen nu'ula na', <sup>23</sup>na' gútequeza' benne' ca' zaj de'e nu'ula na'. Caní gaca, xúgute cue' bi chia' ca' xeleque be'ene' neda' nezda' ca naca duté da zua lu xichaj lázrdau bènneache, na' tu tule le'e gunna' le'e cáteze naca da benle. <sup>24</sup>Xezícadxale le'e zrале xezre Tiatira, quebe zéajlele da na' dxuséde nu'ula na', ne quebe ne sile da dxenné' naca na da nagache chee da xriwe', neda' dxapa' le'e, quebe bi xetú da gucha' le'e gunle. <sup>25</sup>Le gapa chi'i xel-la' dxixruj be'e da ba gucha' le'e gunle ca zrindxa zra xelá'a neda'. <sup>26</sup>Benne' ca' xeledxúaje' chawe' lawe' da zrinnaj, ne xeluné' ca dxaca lazra' neda' ca zrindxa zra bzebe ni', neda' gunézruja' chee benne' ca' xel-la' dxenná bea lawe' xezre ca', <sup>27</sup>ca ben Xra', benne' neda' xel-la' dxenná bea, na' xelenná be'ene' benne' xezre ca' nen tu var xia, na' xuluzría xi'e xezre ca' ca dxun tu benne' dxelé'e tu xesu' xu. <sup>28</sup>Cá'anqueze gu'a benne' ca' lataj xelezúalene' neda', naca' ca belaj zila. <sup>29</sup>Benne' zua nague' dxal-la' xenne' da nigá dxé Be' Lá'azxa bi chia' ca'.

## 3

*Dizra' gusel-le' chee bi chee' ca' zaj zre'e xezre Sardis*

<sup>1</sup>Guzre Jesús neda':

—Bzuaj chee gubáz chia' zúalene' bi chia' zaj zre'e xezre Sardis. Bzuaj da nigá: Caní dxenná Jesús, Bénnea' zaj zúale gaze Be' chee Dios Le', ne nuxre' da gaze ca' zaj naca ca belaj ca'. Neda' nezda' xúgute da dxunle. Nezda' ba nácale ca benne' gate ca'

lau Dios lácala dxeleque bènneache naca banle. <sup>2</sup>Le guxúe, ne le sua chacha chee québedxa gácale ca benne' ca' ba zúate xelátie'. Dxele'eda' da dxunle, quebe naca na li lazre' lau Dios chia'. <sup>3</sup>Le gusá lazre' ca naca da ba nazédele. Le chéajle na, ne le xexíaje lazre'. Che quebe guxúe cuínale wida' naga zúale ca za tu gubán, ne quebe nézele bi zra xida'. <sup>4</sup>Zaj zra' ládujla le'e bábaze benne' quebe ne xeluné' da sban, na' benne' caní xeledálene' neda', ne xelácue' zra lané' chiche lawe' da caní dxal-la' gaca chee'. <sup>5</sup>Benne' ca' xeledxúaje' chawe' lawe' da zrinnaj xelácue' zra lané' chiche ne quebe xusula' la benne' ca' lu xiche naga zaj naxúaj la benne' ca' zúale xel-la' nabán le', na' xecheba' chee benne' ca' lau Xra' ne lau gubáz chee xabáa chee' ca'. <sup>6</sup>Benne' zua nague' dxal-la' xenne' da nigá dxé Be' Lá'azxa bi chia' ca'.

*Dizra' gusel-le' chee bi chee' zaj zre'e xezre Filadelfia*

<sup>7</sup>Guzre Jesús neda':

—Bzuaj chee gubáz chia' zúalene' bi chia' zaj zre'e xezre Filadelfia. Bzuaj da nigá: Caní dxenná Jesús, Bénnea' naque' lá'azxa ne li lazre', Bénnea' nuxre' zren xia da dxunna bea na nape' xel-la' dxenná bea ca da gudapa wenna' bea David, na' gate salje', netú quebe nu gaca xusezxuj, na' gate xusézxuje' netú quebe nu gaca salaj. <sup>8</sup>Neda' nezda' xúgute da dxunle. Nuzúa' laule le'e tu dxa xu'u da naxalaj, da quebe nu gaca xusezxuj. Lácala quebe nadípatécale, zéajlele dizra' chia', ne quebe ne gusán lázrele da naca chia'. <sup>9</sup>Benne' ca' dxulucá'ana szrene' da xriwe', benne' wen lazre' ca', benne' dxelenné' zaj naque' judío ne quebe zaj naque', neda' guna' xuluzú zribe' zran ni'ale chee xelenézene' neda' nazrí'ida' le'e. <sup>10</sup>Ba benle ca da gucha' le'e gunle chee gácale zren lazre', na' chee le na' guxúequeza' le'e lawe' xel-la' zi' da xeledé xúgute bènneache zaj zre'e lu xezr la xu, chee gulé'e lau da zaj naque'. <sup>11</sup>Wídazequeza'. Le gapa chi'i da nápale chee quebe nu ca'a ca da dxal-la' si'le. <sup>12</sup>Benne' ca' xeledxúaje' chawe' lawe' da zrinnaj, neda' gun chacha' benne' ca', na' xelaque' ca ze'e xiaj ca' zaj zua na lizre Xra', ne cabátaquezdxa xeledxúaje' na', na' lu lázrdawe' guzúaja' La Xra', ne la xezre chee Dios chia' da naca na Jerusalén cube da za'

xabáa, ne La' cube. <sup>13</sup>Benne' zua nague' dxal-la' xenne' da nigá dxę Be' Lá'azxa bi chia' ca'.

*Dizra' gusel-łę cheę bi cheę' zaj zrę'ę xęzre Laodicea*

<sup>14</sup>Guzre Jesús neda':

—Bzuaj cheę gubáz chia' zúalęę' bi chia' zaj zrę'ę xęzre Laodicea. Bzuaj da nigá: Caní dxenná Jesús, Bénnea' naque' li lazre', Bénnea' dxexęchebe' da li, Bénnea' naque' naga guzú lau xúgute da ben Dios. <sup>15</sup>Neda' nezda' xúgute da dxunle. Nezda' quebe nácale zaga ca dxunle da naca chia', ne quebe nácale látęła. Dxaca lazra' la gácale zaga u la. <sup>16</sup>Nácale ca nisa bate, ne quebe nácale zaga, ne quebe nácale la, na' chu'una' le'e ca tu benne' dxęębe' nisa bate. <sup>17</sup>Le'e dxennale nácale gunnı'a, ne dxaca chawe' cheęle ne quebe bi dxexázrjele, na' quebe dxęquebe'ele' dxaca ba xa' cheęle ne dxezaca zi'le, ne nácale xache', ne nácale la chul-la, ne nácale gala xide. <sup>18</sup>Cheę ęę na' dxuzęajni'ida' le'e si'le lu na' neda' da naca ca oro da nabá'a na lu xi', cheę gápale xel-la' gunnı'a li lazre', ne si'le zra lánale chiche cheę gácule, da gunna' le'e, na' xenite xel-la' stu' cheę da gúcale gala xide, ne si'le da cu'ule xiaj laule cheę xelę'ele. <sup>19</sup>Neda' dxusízreda', ne dxudęa' xel-la' zi' xúgute benne' ca' nazrı'ida'. Cheę ęę na' dxal-la' xęxıaje lázrele ne gunle zrin chia' du lázrele. <sup>20</sup>Le na' xque. Neda' zea' dxa xu'u dxennıa'. Che nu benne' xenne' chi'a, ne salje' xu'u, na' chu'a gágulęna' ęę, na' ęę gágulęne' neda'. <sup>21</sup>Benne' ca' xeledxúaje' chawe' lawe' da zrinna, neda' gunézruja' ęę' lataj xelebé'lene' neda' naga dxenná be'a, ca neda' bedxúaja' chawe', ne dxę'lena' Xra' naga dxenná bea ęę'. <sup>22</sup>Benne' zua nague' dxal-la' xenne' da nigá dxę Be' Lá'azxa bi chia' ca'.

#### 4

*Dxulucá'ana szreęę' Dios lu xabáa*

<sup>1</sup>Ca gudę na' gunná'a, na' ble'eda' tu dxa xu'u da naxalaj na xabáa, na' benda' chi'i Bénnea' benda' cheę' nédxute da naca na ca chi'i luzu da dxulucęzre', na' guzre' neda':

—Guluén nigá, na' gulę'eda' lue' da ca' dxal-la' gaca ca te cheę da nigá.

<sup>2</sup>Ca gunnę' ca' guzúale Be' Lá'azxa neda', na' ble'eda' tu lataj blau xabáa, ne ble'eda' tu Benne' zaca dxę'ę lataj blau na'. <sup>3</sup>Bénnea'

dxę'ę lu lataj blau na' nalę' ca tu xiaj jaspe da dxácátite na, u ca tu xiaj cornalina, na' dxu'a lataj blau na' naxęchaj ca tu bchita' da dxácátite na ca tu xiaj esmeralda. <sup>4</sup>Dxu'a lataj blau na' zaj zua tape dxu'a lataj naga zaj dxę' tape dxua benne' gula ca', zaj nacue' zra lanę' chiche, ne zaj zria xıchaję' da zaj naca na oro. <sup>5</sup>Lu lataj blau na' dxeledxúaj xesa, ne dxaca nine, ne dxelennę guzıu', na' lau lataj blau na' zaj zua gazre xi' dxelala na, da zaj naca na gazre Be' cheę Dios. <sup>6</sup>Le na' lau lataj blau na' dę ca tu nısadau' da naca na ca xiaj esa' xanı'le'ę.

Laduj na' dxu'a lataj blau na' zaj zra' xetapa da zaj naca ban, zaj zua xiaj lau cuzre', ne laule'. <sup>7</sup>Benne' nedxu nalę'ę ca tu bezre xıxre', na' benne' gudxupe' nalę'ę ca tu bezre, na' benne' guxunne' naca lawe' ca lau bęnneache, na' benne' gudape' nalę'ę ca tu bsia nachilıj xıłaba'. <sup>8</sup>Dápate benne' canı zaj zua xrupa xrıle' tu tue', na' dxupa la'a ęę xrıla benne' canı zaj zria zane' xiaj lawe'. Te zra ne chızrela quebe dxulusane' dxelennę':

Lá'azxa, lá'azxa, lá'azxa naca

Xránadxu Dios nape' dute xel-la' dxenná bea,

Bénnea' guzúaqueze', ne zúaqueze', ne tu súazqueze'.

<sup>9</sup>Tu tu lasa gate dápate benne' ban canı dxelegú'ę ba Dios, ne dxulucá'ana szreęę' ęę, ne dxelę'ę ęę: Xcalenu', Bénnea' zúaqueze' chadıa chacanna, <sup>10</sup>na' dape dxuatę benne' gula ca' dxuluzú zrıbe' lau ęę, ne dxulucá'ana szreęę' Bénnea' zúaqueze' chadıa chacanna, ne dxuluzúę' da ca' zaj zrıa xıchaję' ca' lau lataj blau na', dxelennę':

<sup>11</sup>Xránantu' Dios, Lue' naca chıu' si' lu na'u xel-la' szren,

ne xel-la' ba lá'ana, ne xel-la' dxenná bea, lawe' da bęnu' Lue' xúgute da dę, na' ca dxaca lazru' Lue' zaj zua na, ne gulá gulebinna na.

#### 5

*Tu xiche nadube, ne Bénnea' naque' Zrıla'dau'*

<sup>1</sup>Lu na' xabela cheę Dios, Bénnea' dxę'ę lataj blau na', ble'eda' tu xiche nadube, da naxúaj dxupa la'ate na, na' nazrıche na gazre da dxelunna bea na. <sup>2</sup>Ble'eda' tu gubáz cheę xabáa nápalę'ę xel-la' waca, na' gunnę' zızraj:

—¿Nuzra naca chee' chílujé' xiche na',  
ne cheze' da ca' dxelunna bea na?

<sup>3</sup>Queba nu chilá' xabáa, ne lu xezr la  
xu, ne zranla xezr la xu naca chee' chílujé'  
xiche na', ne quebe nu gaca nne' e na chee  
lé'ene' ca naca na. <sup>4</sup>Neda' gudxézreli'a  
lawe' da quebe nu chilá' benne' naca chee'  
chílujé' xiche na', ne gulabe' na, ne quebe  
gaca nne' e na. <sup>5</sup>Nadxa tu benne' ládujla  
benne' gula ca' guzre' neda':

—Québedxa cuezru' lawe' da ba bzrué'e  
Jesús, Bénnea' nazi'i le' Bezre Xixre' chee  
xrtia Judá lawe' da nape' xel-la' dxenná bea  
zrente, ne naque' zri'ine zre sua David, na'  
Le' naca chee' chílujé' xiche na', ne cheze'  
da gazre ca' dxelunna bea na.

<sup>6</sup>Nadxa ládujla naga zua lataj blau na',  
ládujla tapa benne' ban ca', ne ládujla tape  
dxua benne' gula ca', ble'eda' Jesús, Bén-  
nea' naque' Zríla'dau' chee Dios. Ze'e na',  
lácala zrie' we' lawe' da belutié' Le'. Zria  
gazre lúzuba' ne gazre xiaj lauba', na' xiaj  
lauba' ca' zaj naca na gazre Be' chee Dios  
da ca' nasel-la Dios du ca naca xezr la xu.  
<sup>7</sup>Bénnea' naque' Zríla'dau' guxíaje' guqué'e  
xiche na' lu na' xabêla Bénnea' dxe'e lataj  
blau na'. <sup>8</sup>Ca guqué'e xiche na', na' tapa  
benne' ban ca', ne tape dxua benne' gula ca'  
buluzú zribe' lau Bénnea' naque' Zríla'dau'.  
Tu tu benne' gula ca' zaj nuxre' tu da  
dxelúl-lalene' da can zríadi'i na du, nazí le  
na árpa, ne zaj nu'e xé'ena bzri da naca na  
oro zaj xu'u na xala zixre, da zéaje na xel-la'  
dxuláwizra Dios da dxelún bi ca' chee Dios.  
<sup>9</sup>Dxelul-le' tu da cube caní:

Lue' naca chiu' ca' u xiche na',  
ne chezu' da ca' dxelunna bea na,  
lawe' da belutié' Lue', na' nen dxen chiu'  
bexa'u bèneache chee xelaque' chee Dios,  
Zaj naque' benne' xúgute cue' bèneache,  
ne dxelenné' xúgute dizra' walazre',  
ne zaj naque' benne' xúgute xezre  
ne xúgute cue' xezr la xu.

<sup>10</sup>Benu' le' benne' wenná bea ca',  
ne bxruze ca' lau Dios cheedxu,  
na' xelenná be'e lu xezr la xu.

<sup>11</sup>Nadxa gunná'a, na' benda' chi'i zane'  
gubáz ca' chee xabáa zaj naxéchaje' lataj  
blau na', ne tapa benne' ban ca', ne tape  
dxua benne' gula ca'. Zaj zra' benne' zan-  
tau' gubáz ca', <sup>12</sup>na' dxelenné' zizraj:  
Bénnea' naque' Zríla'dau' belutié',  
naca chee' si'e xel-la' dxenná bea, ne xel-la'  
gunná'a,

ne xel-la' sina, ne xel-la' waca,  
ne xel-la' ba lá'ana, ne xel-la' szren,  
ne xel-la' dxue lá'ana.

<sup>13</sup>Cá'anqueze benda' dxelenná xúgute da  
ca' ben Dios, da ca' zaj zra' xabáa, ne da  
ca' zaj zra' xezr la xu, ne da ca' zaj zra' lu  
nísadau', ne xúgute da ca' zaj nita xúgute  
lataj ca', dxelenná na:

Xel-la' dxue lá'ana, ne xel-la' ba lá'ana,  
ne xel-la' szren, ne xel-la' dxenná bea  
zaj naca na chee Bénnea' dxe'e lataj blau  
na',  
ne chee bénnea' naque' Zríla'dau',  
gaxúane gaxúane iza.

<sup>14</sup>Dápaté benne' ban ca' gulenné':

—¡Ca'an gaca na!

Na' dape dxuate benne' gula ca' buluzú  
zribe', ne bulucá'ana szrene' Bénnea' naca  
bane' gaxúane gaxúane iza.

## 6

*Dxecheze' xrupa da gazre ca' da dxelunna  
bea na*

<sup>1</sup>Nadxa ble'eda' gate Bénnea' naque'  
Zríla'dau' gucheze' da nedxu da gazre ca'  
dxelunna bea na. Na' benda' dxenná tu  
benne' tapa ca' zaj naca bane', na' chi'e ben  
na ca guziu', dxenné':

—Gudá, le'enu'.

<sup>2</sup>Gunná'a, na' ble'eda' tu bzrina'  
chiche, na' benne' zrie'-ba' nuxre' tu da  
dxedxú'una na xágadau' nalá xéche'ze.  
Bulunézruje' le' tu da naquen oro da guzúe'  
xíchaje', na' nen duté xel-la' dxenná bea  
bdxuaje' chee zrué'ene' lu wedil-la.

<sup>3</sup>Gate Bénnea' naque' Zríla'dau' gucheze'  
da gudxupe' da dxunna bea na, na' benda'  
benne' gudxupe' chee benne' tapa ca' zaj  
naca bane', dxenné':

—Gudá, le'enu'.

<sup>4</sup>Na' bdxuaj xetú bzrina', nácaba' be  
xrna, na' bénnea' zrie'-ba' guzi'e xel-la'  
dxenná bea chee cue' xel-la' dxebeza zri  
lazre' lu xezr la xu, ne chee guné' xelute  
bèneache ljwezre' ca', na' bulunézruje' le'  
tu xia tunna da nalá.

<sup>5</sup>Gate Bénnea' naque' Zríla'dau' gucheze'  
da guxunne' da dxunna bea na, na' benda'  
benne' guxunne' chee benne' tapa ca' zaj  
naca bane', gunné':

—Gudá, le'enu'.

Gunná'a, ne ble'eda' tu bzrina' gasaj, na'  
benne' zrie'-ba' nuxre' zrgú'unsá. <sup>6</sup>Benda'

tu chi'i dxenné na ládujla tapa benne' ban ca', gunná na:

—Chupa xia zrua' xtila saca na lazruj chee tu zra, ne xrupa xia zrua' cebada saca na lazruj chee tu zra, san quebe cu' za xel-la' wagu, ne quebe cu' xrise uva wal-la.

<sup>7</sup>Gate Bénnea' naque' Zríla'dau' gucheze' da gudape' da dxunna bea na, na' benda' benne' gudape' chee benne' ban ca', gunné':

—Gudá, le'enu'.

<sup>8</sup>Gunná'a, ne ble'eda' tu bzrina' gache, na' benne' zrie'-ba' le' Xel-la' Gute, na' cuzru bénnea' za tu benne' ze'e waláz chee lataj chul-la ga nnita benne' gate ca'. Bénnea' le' Xel-la' Gute guzi'e xel-la' dxenná bea chee gutie' tu cue' chee tapa cue' ca naca bénneache zaj zre'e xezr la xu. Gutie' benne' ca' lu wedil-la, ne lu xel-la' dxedún, ne lu xízrawe' ca', ne lu na' bę snia zaj zraba' lu xezr la xu.

<sup>9</sup>Gate Bénnea' naque' Zríla'dau' gucheze' da gáxzue da dxunna bea na, na' ble'eda' zran cugu bénne'du ca' gulú'u benne' ca' belute bénneache le' lawe' da buluchálaje' dizra' chee Dios, ne belexechebe' ca naca chee'. <sup>10</sup>Bénne'du ca' gulú'u benne' ca' gulenné' zizraj:

—Xran lá'azxa, ne li lazre', ¿xeajátę chenu' chee guchi'u cheętu', ne xebéaj lazru' benne' ca' belutie' netu', benne' ca' zaj zre'e lu xezr la xu?

<sup>11</sup>Nadxa bénne'du ca' gulú'u benne' ca' gulezi'e zra lanę' chiche, na' guzre' le' xelebeze' xetú chí'idau', cadxa cha benne' biche' ca' dxelunę' zrin chee Cristo, xelute bénneache le' ca' belutie' benne' ca'.

<sup>12</sup>Gate Bénnea' naque' Zríla'dau' gucheze' da xrupe da dxunna bea na, na' guná'a, na' guzrú'le'e lu xezr la xu. Gubizra bexaca na da chul-la ca ladxe' gasaj, na' beu' bexaca na xrna ca dxen, <sup>13</sup>na' belaj zaj zria xabáa belexruj na lu xezr la xu, ca dxelexruj higo dxe'ene ca' gate dxácale'e be' dxunibe na xaga higo na'. <sup>14</sup>Xabáa benite na ca tu xiche da dxexedube, na' xúguté xi'a ca', ne xezr la xu ca' da zaj naxechaj nísadau' gulecuasa na naga zaj zua na. <sup>15</sup>Benne' wenna' bea ca' zaj zre'e lu xezr la xu bulucache cuine' lu bluaj ca' ne ládujla xiaj ca' zaj nita lu xi'a ca', na' tuze gulaca benne' blau ca' ne benne' gunn'a ca', ne benne' xíchaje' ca' chee benne'

dxjaca wedil-la, ne benne' ca' dxelenná bea, ne benne' zaj nada'u, ne benne' zaj nadxúaje' lu na' xranę' ca', <sup>16</sup>na' benne' caní gulé'e xi'a ca', ne xiaj xre ca':

—Le quia cha netu', ne le gucache netu' lau Dios, Bénnea' dxe'e lataj blau, ne lu xel-la' zi' zren da gunna Bénnea' naque' Zríla'dau'.

<sup>17</sup>Ba bzrin zra chee xel-la' zi' zren. ¿Núzraqueze sue le na?

## 7

### *Benne' Israel ca' gucá'a Dios*

<sup>1</sup>Ca gudé chee da nigá, ble'eda' tapa gubáz chee xabáa zaj ze' dapa saca chee xezr la xu, na' zaj nuzague' be' da zá'aca na dapa saca, chee quebe bi be' gaca lu xezr la xu, ne lawe' nísadau', ne lawe' xaga ca'. <sup>2</sup>Cá'anqueze ble'eda' xetú gubáz chee xabáa ze'e naga dxalaj gubizra, na' nuxre' da gunna bea na nu benne' naque' che Dios ban. Gubáz nigá gunné' zizraj, dxe'e dápatę gubáz chee xabáa ca' bache zaj nazi'e xel-la' dxenná bea xuluzría xi'e xezr la xu, ne nísadau', gunné':

<sup>3</sup>—Quebe guzría xile xezr la xu, ne nísadau', ne xaga ca', dxácatę quebe ne guchichentu' luzrgá benne' ca' tu da gunna bea na zaj naque' chee Dios chee dxu.

<sup>4</sup>Benda' cátite zaj naca benne' ca' gulezriche luzrgue' da na' dxunna bea na. Zaj naque' tu gaxúe tape xun cue' da zaj naca na chi gaxúa weaj lówela xúguté cue' benne' Israel. <sup>5</sup>Gulezriche luzrgue' da na': Chazrinnu cue' benne' xrtia Judá, ne chazrinnu cue' benne' xrtia Rubén, ne chazrinnu cue' benne' xrtia Gad, ne <sup>6</sup>chazrinnu cue' benne' xrtia Aser, ne chazrinnu cue' benne' xrtia Neftalí, ne chazrinnu cue' benne' xrtia Manasés, ne <sup>7</sup>chazrinnu cue' benne' xrtia Simeón, ne chazrinnu cue' benne' xrtia Leví, ne chazrinnu cue' benne' xrtia Isacar, ne <sup>8</sup>chazrinnu cue' benne' xrtia Zabulón, ne chazrinnu cue' benne' xrtia José, ne chazrinnu cue' benne' xrtia Benjamín.

### *Benne' zan zaj nacu zra lanę' chiche*

<sup>9</sup>Gudé na' gunná'a ne ble'eda' benne' zan chee xúguté cue' bénneache: Benne' xúguté cue' xezr la xu, ne benne' dxelenné' xúguté dizra' walazre' cha chee', ne benne' xúguté xezr ca'.

Zaj zē' le na' naga zua lataj blau na', ne naga zē Bēnnea' naque' Zrīla'dau'. Benne' caní zaj nacue' zra lanē' chiche, ne zaj nuxre' zina'. <sup>10</sup>Xúgute' dxelenné' zizraj:

Xel-la' weselá za na lu na' Dios cheēdxu, Bēnnea' dxe'e' lataj blau,

ne lu na' Bēnnea' naque' Zrīla'dau'.

<sup>11</sup>Xúgute' gubáz cheē xabáa ca' zaj zē' zaj naxéchajē' lataj blau na', ne naga zaj zra' benne' gula ca', ne tapa benne' ban ca', na' buluzú zribe' belixrujte lawe' zran ni'e, na' bulucá'ana szrenē' Dios. <sup>12</sup>Dxelenné': jCa'an gaca na!

jXel-la' dxue lá'ana, ne da xabáa,

ne xel-la' sina, ne xel-la' dxezaca ba lazre', ne xel-la' ba lá'ana, ne xel-la' dxenná bea, ne xel-la' szren,

zaj naca na cheē Dios cheēdxu chadía chacanna!

jCa'an gaca na!

<sup>13</sup>Nadxa tu benne' gula ca' bchebe' neda':

—jNuzra benne' caní zaj nacue' zra lanē' chiche, ne gazra zesí'aque'?

<sup>14</sup>Neda' gucha' le':

—Xran, lue' nézqueznu'.

Le' guzrē' neda':

—Benne' caní ba guledé' lu xel-la' zi' zren na', na' benne' caní ba zaj nacue' zra lanē' chiche lawe' da Bēnnea' naque' Zrīla'dau' ba gudibe' xichaj lázrdawe' nen dxen chee'. <sup>15</sup>Cheē le' na' zaj zrē'e dxu'a lataj blau naga dxe' Dios, ne dxelúe lá'ane' Le' te zra ne chizrela lu xudau' chee', na' Bēnnea' dxe'e' lataj blau na' guxúequeze' benne' ca', ne súaletecaze' le'. <sup>16</sup>Québedxa xeledune' ne québedxa xelebíne', ne québedxa guzezxe gubizra benne' ca', ne québedxa xeléquene' da la, <sup>17</sup>lawe' da zua Bēnnea' naque' Zrīla'dau' cuita lataj blau na', na' guxúe' benne' ca' ca dxun benne' dxuxúe' zrila' ca', ne che'e benne' ca' naga dxelalaj nisa da dxunna na xel-la' nabán, na' Diósqueze tu súalezqueze' benne' ca' cheē québedxa xelebezre'.

## 8

*Dxecheze' da gazre da ca' dxelunna bea na*

<sup>1</sup>Gate Bēnnea' naque' Zrīla'dau' gucheze' da gazre da ca' dxelunna bea na, da ca' zaj nuchiche na xiche na', na' gudxé' zri xabáa tu chi'i zrénequeze. <sup>2</sup>Nadxa ble'eda' gazre gubáz cheē xabáa ca' zaj zē' lau Dios, na' bulunézruje' gubáz cheē xabáa ca' gazre

luzu da xulucuezre'. <sup>3</sup>Gudé na' bla' xetú gubáz cheē xabáa nuxre' tu xé'ena bzri da naca na oro ne guzé' dxu'a cugu, na' bulunézruje'e le' xala zixre cheē guzúe' na lau Dios tu zren nen xel-la' dxuláwizra Dios ca' da belún benne' ca' zaj naque' cheē Dios. Bzue' na lu cugu naca na oro, da zua na lau lataj blau na'. <sup>4</sup>Zren cheē xala na' guluén na lau Dios tu zren nen xel-la' dxuláwizra Dios ca' belún benne' ca' zaj naque' cheē Dios. <sup>5</sup>Nadxa tu gubáz cheē xabáa guqué'e xé'ena bzri na', na' bzrē'e na xi' da guqué'e lu cugu na', na' gudxú'une' xi' na' lu xezr la xu, na' gulenné' guziu', ne guléninne'le'e, ne gulépele'e xesa, ne guzrú' xezr la xu.

*Dxuluchine gubáz ca' da dxulucuezre'*

<sup>6</sup>Nadxa gázrete' gubáz cheē xabáa ca' zaj nuxre' gazre luzu da dxulucuezre' gulezē chawe' xuluchinene' na.

<sup>7</sup>Gubáz nedxu na' bchínene' da dxucuezre', na' gulinnaj xiaj bezxe', ne xi' da zaj nachixre na dxen da belexruj na lu xezr la xu. Xáteze quebe bedú gachaj xezr la xu guzezxe na late weaj du ca naca lu xezr la xu. Xáteze quebe gudache gáchajte xaga ca' zaj zē lu xezr la xu gulezxe na, ne cá'anqueze guca cheē xixre' xa'a ca'.

<sup>8</sup>Gubáz cheē xabáa gudxupe' bchínene' da dxucuezre', na' bexruj da naca na ca tu xi'a zren da dxala na xi' lu nísadau', na' xáteze quebe guca gáchajte nísadau' na' bexaca na dxen. <sup>9</sup>Xáteze quebe guca gáchajte bea zaj zra' lu nísadau' guláteba', na' xáteze quebe guca gáchajte da ca' dxeledán lawe' nísadau' gulebía xi na.

<sup>10</sup>Gubáz cheē xabáa guxunne' bchínene' da dxucuezre', na' bexruj tu belaj zrente zran xabáa, da dxala na ca tu xi' xedxe. Naga bexruj na, xáteze quebe gudache gáchajte xegu ca', ne beaj ca' gulebía xi na.

<sup>11</sup>Belaj na' le' na Ajenjo, da zéaje na da naca na sla', na' xáteze quebe guca gáchajte nisa da de lu xezr la xu bexaca na ajenjo, na' benne' zante' gulatie' ne cheē nisa na' lawe' da bexaca na sla'.

<sup>12</sup>Gubáz cheē xabáa gudape' bchínene' da dxucuezre', na' xáteze quebe bedú gachaj xel-la' naxaní' cheē gubizra, ne xel-la' naxaní' cheē beu', ne xel-la' naxaní' cheē belaj ca' belexaca na chul-la, na' quebe bulusení na du lazre' xáteze quebe guca gachaj zra, ne cá'anqueze che zrela.



<sup>13</sup>Nadxa gunná'a, ne benda' chi'i tu gubáz chee xabáa dxedé' lu be', dxenné' zizraj:

—Edxugua bénneache zaj zra' xezr la xu gate xebezeze luzu da xuluchine xechunna gubáz chee xabáa ca'.

## 9

<sup>1</sup>Gubáz chee xabáa gáxzue bchínene' da dxucuezeze', na' ble'eda' tu benne' naque' ca tu belaj bexruj na lu xezr la xu, na' bulunézruje' le' zren xia chee lataj chul-la chee benne' gate ca'. <sup>2</sup>Gusálaje' lataj chul-la na', na' lu'ule na' bdxuaj zren ca naca da dxedxuaj na naga dxeluzre' bla'dau', na' zren na' bchul-la na lau gubizra, ne lu be'. <sup>3</sup>Lu zren na' beledxúaj biche zu. Guledaba' du ca naca xezr la xu, na' biche zu ca' guleziba' lataj xeláduba' bénneache ca da dxelún béxrujni. <sup>4</sup>Dios guzre' biche zu ca' quebe xuluzría xiba' xixre' xa'a ca', ne netú xaga, san xeláduzeba' bénneache quebe nazriche luzrgue' da dxunna bea na benne' ca' zaj naque' chee Dios. <sup>5</sup>Quebe zaj naziba' lataj xelúteba' bénneache, san xuludézeba' bénneache ba xa' lawe' gazxu' beu', na' xel-la' dxelá chee naga dxeláduba' naca na ca naca da dxun béxrujni, be dxelúteba' bénneache. <sup>6</sup>Lu zra ca' xelaca lazre' bénneache xelaxute cuine', ne quebe xelézqueue'. Xelaca lazre' xelatie' ne quebe xelatie'.

<sup>7</sup>Biche zu ca' zaj nácabá' ca bzirina' ca' ba zaj nabézaba' chjácaba' lu wedil-la. Xíchajba' zaj zria na ca tu da naca na oro, na' dxu'a lau biche zu ca' naca na ca lau bénneache. <sup>8</sup>Xícha xíchajba' zaj naca na ca xícha xíchaj nu'ula ca', na' lázxabá' zaj naca na ca lazxa bezeze xixre'. <sup>9</sup>Lachu'uba' xu'u na ca zraba' xia, na' xrílabá' dxeleninne na ca dxeleninne da dxelecá'a bzirina' ca' zjaca chéguba' lu wedil-la. <sup>10</sup>Zaj zua xrbánba' ca xrbán béxrujni, zaj zua na liba'. Zaj nazi'ba' lataj xeláduba' bénneache lawe' gazxu' beu'. <sup>11</sup>Zua tu xrane biche zu ca' naca gubáz chee lataj chul-la, ne le na Abadón nen dizra' hebreo, ne nen dizra' griego le na Apolión, da zéaje na da dxuzría xi na.

<sup>12</sup>Caní guca da nedxu da ba xa' da xeledé benneache, na' da' zí'aca xechupan ca'.

<sup>13</sup>Nadxa gubáz chee xabáa xrupe bchínene' da dxucuezeze', na' benda' tu chi'i da gunná ládujla tapa luzu cugu lá'azxa na' naca na oro da zua na lau Dios. <sup>14</sup>Chi'i na'

guzre na gubáz chee xabáa xrupe na' nuxre' luzu da dxucuezeze':

—Bsan dápaté gubáz ca' zaj nadxéaje' dxu'a xegu zren le na Eufrates.

<sup>15</sup>Ca' guca na, na' gulelá gubáz ca' chee xelutie' xáteze ca gaca gáchajte bénneache lawe' da ba zaj nabeza gubáz ca' chee zra na', ne beu' na', ne iza na'. <sup>16</sup>Benda' cáтите zaj naca benne' dxjaca wedil-la ca' zaj zrie' bzirina' zrálene' gubáz ca'. Zaj naque' chupa cue' gaxua da zaj naca gaxúane gaxúane.

<sup>17</sup>Lu da ble'e Dios neda' ble'eda' ca zaj naca bzirina' ca', ne ca zaj naca benne' dxjaca wedil-la ca' zaj zrie'-ba'. Zaj xu'u lachu'e zre' xrna da naca na xia, ne da nalá ca zran xabáa, ne da gache. Xíchaj bzirina' ca' zaj naca na ca xíchaj bezeze xixre', na' dxú'aba' ca' beledxúaj xi', ne zren, ne tu da gache da dxuzézele'e na. <sup>18</sup>Xáteze quebe gudache gáchajte bénneache gulatie' lu da ca' beledxúaj na dxu'a bzirina' ca', xi', ne zren, ne da gache na'. <sup>19</sup>Xel-la' snia chee bzirina' ca' zua na dxú'aba', ne xrbánba' lawe' da zaj naca xrbánba' ca belá' ca' zaj zua xíchajba', na' nen da ca' dxuluzría xiba' bénneache.

<sup>20</sup>Benne' ca' xezica, benne' quebe belúteba', belúnqueze' da zrinnaj ca da dxelúnqueze', ne bulucá'ana szrénqueze' be' xriwe' ca', ne bedau' oro ca', ne bedau' plata ca', ne bedau' xia gache ca', ne bedau' xiaj ca', ne bedau' xaga ca', da ca' quebe dxaca xelélé'e na, ne quebe dxaca xelén na, ne quebe dxaca sí'aca na. <sup>21</sup>Cá'anqueze belútequeze' benne' ca', ne belúnqueze' xel-la' wazrá', ne belúnqueze' da sban, ne gulebánqueze'.

## 10

*Tu gubáz chee xabáa nuxre' tu xíchedau' nazriluj na*

<sup>1</sup>Nadxa ble'eda' xetú gubáz chee xabáa nápalé'e xel-la' dxenná bea. Bétaje' xabáa, xu'e tu lu beuj, ne zua tu bchita' xíchaje'. Dxu'a lawe' dxácáтите na ca gubizra, na' ni'e zaj naca na ca xi'. <sup>2</sup>Nuxre' tu xíchedau' da nazriluj na, na' bzue' ni'e zua xabéla lawe' nísadau', ne ni'e zua xéglala lawe' xezr la xu bizre. <sup>3</sup>Nadxa gudxeze xe'e ca dxun bezeze xixre' dxebezeze xa'aba', na' ca gudxeze xe'e gulenné gazre guziu'. <sup>4</sup>Ca gudé gulenné gazre guziu' ca', ba zúate

guzúaja', na' benda' tu chi'e za xabáa, guzre neda':

—Bcache naze da gulenná gazre guziu' ca'. Quebe guzúaju' na.

<sup>5</sup>Nadxa gubáz chee xabáa na' ble'eda' ze' lawe' nísadau', ne lawe' xezr la xu bizre guchisa ne'e da zua xabéla zran xabáa, 'na' bzétaje' La Bénnea' zue' chadía chacanna, ne bene' xabáa, ne xezr la xu, ne nísadau', ne xúgte da zaj de lawe' da ca' bene', na' gunné':

—Québedxa che na, <sup>7</sup>lawe' da gate su lau gubáz chee xabáa gazre guchínene' luzu da xulucuezre', ba guca li ca naca da nun Dios dxal-la' gaca ca bzenne' benne' wen zrin chee' ca', benne' gulenné' waláz chee'.

<sup>8</sup>Ca naca chi'e da benda', da za xabáa, bchálajlene' neda' xetú, gunné':

—Guxíaj xeajcá'a xíchedu na' nuxru gubáz chee xabáa na' ze' lawe' nísadau', ne lawe' xezr la xu bizre.

<sup>9</sup>Nadxa guxá'a lau gubáz chee xabáa na', na' gunaba' gunné' neda' xíchedu na', na' guzre' neda':

—Gucá'a na. Gudagu na. Lu dxu'u gaca na zixre ca bzrina'dau', na' lu le'u xexaca na da sla'.

<sup>10</sup>Nadxa gucá'a xíchedu na' lu na' gubáz chee xabáa na', na' gudawa' na, na' lu dxu'a guca na zixre ca bzrina'dau'. Ca gudé gudawa' na, bexaca na sla' lu le'a. <sup>11</sup>Nadxa gulé'e neda':

—Dxun na ba xen guchálaju' waláz chee Dios lau benne' zaj zre'e zane cue' xezr la xu, ne lau benne' zaj zre'e xezre zan ca', ne lau benne' dxeleonné' dizra' walazre' cha chee' ca', ne lau benne' wenná bea ca'.

## 11

### *Chupa benne' dxelexechebe'*

<sup>1</sup>Nadxa belunne' neda' tu xia xtíladau' da naca na ca tu xaga da dxudxíredxu, na' gulé'e neda':

—Guxasa, bdxixre' xudau' chee Dios ne lu cugu, na' blaba bal-la benne' zaj zre'e na' dxulucá'ana szrene' Dios. <sup>2</sup>Quebe gudxixru' chale'aj chee xudau' na' lawe' da ba gudé na lu na' benne' zitu' ca', na' benne' ca' xululéaje' xezre lá'azxa lawe' chupe xun beu'. <sup>3</sup>Neda' sel-la' chupa benne' zaj nacue' ladxe' tuzruj, na' xelenné' waláz chia' lawe' chazrinnu gaxúa ga xun zra.

<sup>4</sup>Benne' chupa caní zaj naque' ca chupa xaga olivo ca', ne ca zaj naca chupa da zaj zuan xi', da ca' zaj zua na lau Dios, Xrane xezr la xu. <sup>5</sup>Che nu benne' dxaca lazre' guzría xi'e benne' caní, na' le' xululube' xi' da dxuaj lu dxu'e ca', na' guzézxete na benne' ca' dxeledábague' le'. Caní gate nüteteze benne' tábague' benne' chupa caní. <sup>6</sup>Benne' chupa caní zaj nape' xel-la' dxenná bea xelune' ga quebe gaca xiuj dxácate na' dxeleonné' waláz chee Dios. Cá'anqueze zaj nape' xel-la' dxenná bea xelune' xaca nisa dxen, ne chee xulusaca zi'e bénneache nen xúgte xízrawe' ca', bátatezla dxelaca lazre'. <sup>7</sup>Gate bache belexuzre belune' zrin chee', na' be xixre' snia, be dxedxúajba' lataj chul-la, tíl-laléba' benne' chupa ca', na' quél-laba' le', ne gúteba' le'. <sup>8</sup>Bela' dxen gate chee benne' caní xelxegá'ana na la neza chee xezre zrentau' naga gudá' Xránadxu xaga begúaj, ne ca dxutil-la Dios lebe, le na Sodoma, ne Egipto. <sup>9</sup>Lawe' chunna zra xugachaj, bénneache chee xúgte cue' benne', ne benne' xezre ca', ne benne' zra du gabí'i xezr la xu, ne benne' dxeleonné' dizra' walazre' cha chee' xelélé'ene' bela' dxen gate chee benne' caní, ne quebe xelu'e lataj nu benne' gucache' le'. <sup>10</sup>Benne' zaj zre'e lu xezr la xu xelebene' lawe' da zaj nate benne' caní, na' xelxezaca ba lázrele'e, ne xelxel-le' da xulunezruj ljwezre' tue' xetue' lawe' da bulusaca zi' benne' caní gulenné' waláz chee Dios bénneache ca'. <sup>11</sup>Gate guca chunna zra xugachaj, na' Dios bsebang' benne' caní, na' belexase', na' xúgte benne' ca' belelé'ene' le' belezrébele'e. <sup>12</sup>Nadxa dxúpate benne' ca' dxelexechebe belenne' chi'i tu benne' dxenné' zizraj xabáa, dxé'e benne' ca':

—Le xegüen nigá.

Na' belexegüene', na' belelé'e benne' ca' dxeledábague' le' ca guca. <sup>13</sup>Ca'an gúcate guzrú'le'e xezr la xu, na' xu'u zaj nita na lu xezre na' gulebía xi na, na' gulate gazre cue' da nacan chi gaxúa bénneache weaj ne chee da guzrú'. Benne' ca', benne' quebe gulate lu xezre na', nen duté xel-la' dxelezrebe belúe lá'ane' Dios zue' xabáa.

<sup>14</sup>Ba gudé da gudxupe' da ba xa' da xeledé bénneache, na' la za'te da guxunne'.

*Gubáz gazre dxuchínene' da dxucuezre'*

<sup>15</sup> Gubáz gazre bchínene' da dxucuezre', na' ben chi'i benne' zan xabáa dxeleñné' zizraj:

Naga dxeleñná bea bēneache lu xēzr la xu ba guledé na

lu na' Xránadxu Dios, ne lu na' Cristo chee', na' Le' mna be'ene' lataj ca' chadía chacanna.

<sup>16</sup> Nadxa tape dxua benne' gula ca' zaj dxe'e dxu'a lataj blau naga dxe' Dios buluzú zribe' zaj nuzuatē lawe' zran ni'e, dxulucá'ana szreñe' Dios, <sup>17</sup> dxeleñné':

Xcalenu', Xran.

Dios, napu' dutē xel-la' dxenná bea.

Guzáquezu', ne zúaquezu', ne tu súazquezu',

lawe' da ba guzi'u xel-la' dxenná bea zrente chiu',

ne ba guzú lau' dxenná be'u.

<sup>18</sup> Bēneache xúgute xēzre ca' dxelezré'e san ba bzrin zra gudéu' benne' ca' ba xa', zra na' guchi'u chee' benne' gate ca'.

Xunézruju' da naca chee' benne' ca' gulenné' waláz chiu',

ne da naca chee' benne' ca' zaj naque' chiu', ne da naca chee' benne' ca' belune' Lue' ba lá'ana,

benne' blau ca', ne benne' quebe nu zaj naca.

Ba bzrin zra guzrí xi'u benne' ca' buluzrí xi'e xēzr la xu.

<sup>19</sup> Nadxa bxalaj xudau' chee' Dios da zua xabáa, na' ble'e lau xi'ina naga xu'u xel-la' wezrí xrlátaje chee', da zua na lu xudau' na'. Gulepe xesa, ne guleninne na, ne gulenné guziu', ne guzrú' xēzr la xu, na' bxínnajle'e xiaj bezxe'.

## 12

*Tu nu'ula ne bē snia schanni' zrente*

<sup>1</sup> Nadxa ble'e lau tu da zrente xabáa. Zua tu nu'ula naca zra lanē' ca gubizra, na' zran ni'e zua da naca ca beu', na' xíchaje' zria tu da zaca zaj zria na chazrinnu belaj.

<sup>2</sup> Nu'ula nigá zuē' zi'i, ne dxebezre xē'e xel-la' dxudi'a sanē' tu bidau', dxedéle'e xel-la' zi' chee' galaj bidu na'. <sup>3</sup> Nadxa ble'e lau xabáa xetú da zrente, zua tu bē snia schanni', bē xrna, zua gazre xíchajba' ne chi lúzuba', na' zria tu da zaca tu tu xíchajba' ca'.

<sup>4</sup> Nen xrbamba' gucá'a dxéguba' xáteze quebe guca gáchajte belaj zaj zria zran xabáa, na' bzálaba' na lu xēzr la xu. Bē snia schanni' na' guzēba' lau nu'ula na'

sanē' bidau' chee' gáguba' bidu na' gate ze gálajbe'. <sup>5</sup> Nu'ula na' guzane' tu bi biudau', bi na' mna be'ebe' dutē xēzr la xu nen tu var xia. Nadxa bi biu chee' nu'ula na' gucá'a Dios lēbe', na' bexu'e-be' lataj blau chee' naga dxe'e. <sup>6</sup> Na' nu'ula na' bzrínnuje' zéaje' lē'e xixre' lawe' lataj naga nucueza Dios tu lataj naga sua nu'ula na', naga xulugawe' lē' lawe' chazrinnu gaxúa ga xun zra.

<sup>7</sup> Gudé na' guxú'u wedil-la xabáa gate gubáz chee' xabáa blau lē' Miguel nen gubáz chee' xabáa zaj da lē' guledíl-lalene' bē snia schanni' zrente. Bē snia schanni' na', ne gubáz zaj dē'e-ba' belune' wedil-la. <sup>8</sup> Quebe bi gulezéquene' lu wedil-la na', na' québedxa guta' lataj chee' gubáz ca' lu xabáa. <sup>9</sup> Ca'an guca gulebéaje' bē snia schanni' na' xabáa, bē snia na' zúaba' nédxute, na' nazí laba' da xriwe', ne Satanás, da na' dxezí xē na xúgute bēneache. Da xriwe' na', ne gubáz ca' zaj dē'e na guledxú'une' na lu xēzr la xu.

<sup>10</sup> Nadxa benda' tu chi'i benne' gunné' zizraj xabáa:

—Ba bla' xel-la' weselá, ne xel-la' szren, ne xel-la' dxenná bea chee' Dios cheedxu, ne xel-la' dxenná bea chee' Cristo chee', lawe' da ba guledxú'une' da na' gudagu zria na chee' benne' bíchedxu, da na' dxagu zria na chee' benne' ca' te zra, ne chizrela lau Dios cheedxu. <sup>11</sup> Benne' bíchedxu ca' beledxúaje' chawe' ne chee' dxen chee' Bēneea' naque' Zríla'dau', ne ne chee' da belexechebe' ca naca chee' dizra' chee' Cristo, ne quebe belezrebe' nu benne' gutiē' lē'. <sup>12</sup> Chee lē na' gata' xel-la' dxebe xabáa.

¡Le be le'e zrale xabáa!

¡Edxuga benne' ca' zaj zre'e xēzr la xu, ne lawe' nísadau'

lawe' da ba bla' da xriwe' naga zúale,

dutē xel-la' dxezrá'a chee' na,

lawe' da neze na xáte'ga ne dē chee' na!

<sup>13</sup> Gate guque be'e da xriwe' ba buluzalē' na lu xēzr la xu, na' gudxé' nau na nu'ula na' guzane' bi biudu na'. <sup>14</sup> Nu'ula na' bulunézruje' lē' chupa xrilē' zren ca xrila bsia chee' gaca xexiaje' xezue' lē'e xixre' lawe' lataj, zitu' naga zua bē snia schanni' na', na' bulugawe' lē' lawe' chun iza xugachaj.

<sup>15</sup> Bē snia schanni' na' bexébeba' nisa chee' benba' tu xēgu chee' gua na nu'ula na'.

<sup>16</sup> Gúcale xēzr la xu nu'ula na'. Bzra xēzr la xu, na' gudebe na xēgu na' bexébe bē

snia schanni' na'. <sup>17</sup> Chee le na' bzá'le'e da xriwe' nu'ula na', na' guxiáj na xejtíl-lalé na xrtia nu'ula na' zaj zré'e xezr la xu, benne' ca' dxuluzúe' dizra' da bdxixruj be'e Dios, ne dxelexechebe' ca' naca chee Jesucristo.

### 13

#### *Chupa be xixre' snia ca'*

<sup>1</sup>Nadxa guzéa' dxu'a nísadau', ne ble'eda' bdxuaj tu be xixre' snia lu nísadau' na', zua gazre xíchajba', ne chi lúzuba'. Zria tu tu lúzuba' na' tu da zaca, na' da' tu laba' xíchajba' ca' da dxecuide Dios. <sup>2</sup>Be xixre' snia nigá nácaba' ca' tu bezrtau', na' ní'aba' zaj naca na wal-la ca ni'a oso, na' dxú'aba' naca na ca dxu'a bezre xixre'. Be snia schanni' bnézrujba' xel-la' dxenná bea cheeba', ne lataj blau cheeba', ne xel-la' waca cheeba' lu na' be snia na' nácaba' ca bezrtau'. <sup>3</sup>Zua tu we' tu xichaj be xixre' snia na' nácaba' ca bezrtau' da gute na leba', na' we' na' bexaca na, na' ca naca bénneache ca' zaj zré'e lu xezr la xu belxebánele'engé', ne zjácálené' be xixre' snia na'. <sup>4</sup>Bulucá'ana szrené' be snia schanni' na' lawe' da bnézrujba' xel-la' dxenná bea chee be xixre' na' nácaba' ca bezrtau', ne cá'anqueze bulucá'ana szrené' be xixre' snia na', dxelenné':

—¿Núzraqueze naca ca be xixre' nigá, ne nu seque' tíl-lalé leba'?

<sup>5</sup>Nadxa da xriwe' be na leba' lataj gunneba' dizra' zri'a, na' gunneba' da caléla chee Dios, ne gudápaba' xel-la' dxenná da lawe' chupe xun beu'. <sup>6</sup>Gunneba' da caléla chee Dios, ne chee La Dios, ne chee lataj lá'azxa chee', ne chee benne' ca' zaj zré'e xabáa. <sup>7</sup>Cá'anqueze guziba' xel-la' dxenná bea tíl-laléba' benne' ca' zaj naque' chee Dios, ne gúteteba' benne' ca', na' guziba' xel-la' dxenná bea lu xúgute cue' bénneache, ne benne' zaj zré'e xúgute xezre ca', ne xúgute cue' xezr la xu ca', ne benne' dxelenné' dizra' walazre' cha chee'. <sup>8</sup>Xúgute benne' zaj zré'e xezr la xu bulucá'ana szrené' be xixre' snia na', benne' ca' quebe zaj naxúaj le' lu xiche naga zaj naxúaj la benne' ca' zaj nape' xel-la' nabán, xiche na' bzuj Bénnea' naque' Zríla'dau' belutie'-ba'.

<sup>9</sup>Che nu benne' zua nague', dxal-la' xenne' dizra' nigá. <sup>10</sup>Benne' ca' dxelegú'e' bénneache lizre xia, cá'anqueze xelú'u benne' ca' lizre xia, na' benne' ca' dxelutie' benne'

nen xia nalá, cá'anqueze xelatie' lu xia nalá. Chee le na' benne' zaj naque' chee Dios dxal-la' xelaque' zren lazre', ne xeléajle'e chee Dios.

<sup>11</sup>Gudé na' ble'eda' xetú be xixre' snia bdxúajba' lu xezr la xu. Bea nigá zua chupa lúzuba' zaj naca na ca luzu zríla'. Bea nigá gunneba' ca be snia schanni' na'. <sup>12</sup>Bea nigá nápaba' duté xel-la' dxenná bea da napa be nedxu na', gate zúaba' lau be nedxu na', na' gunná be'eba' ca naca bénneache zaj zré'e duté xezr la xu xulucá'ana szrené' be nedxu na', bea na' bexaca we' cheeba' da na' naca gute leba'. <sup>13</sup>Be gudxupe' na' benba' xel-la' waca zri'a ca', ne benba' bexruj xi' zran xabáa lu xezr la xu lau bénneache ca'. <sup>14</sup>Ne chee xel-la' waca ca' da benba' lau be nedxu na', guz' xeba' benne' zaj zré'e xezr la xu, na' gunná be'eba' benne' ca' xeluné' tu bedau' ca naca be nedxu na', bea na' guzúa we' chee xia nalá, na' naca bánquezeba'. <sup>15</sup>Be gudxupe' na' guziba' xel-la' dxenná bea gunézrujba' xel-la' nabán bedau' na' naca na ca be nedxu na', chee nne' bedau' na', ne gute na xúgute benne' quebe xulucá'ana szrené' na'. <sup>16</sup>Cá'anqueze bedau' na' gunná be'e na zriche tu da gunna bea na luzrgá u lu na' zua xabéla chee xúgute bénneache, benne' blau, ne benne' quebe nu naca, ne benne' gunní'a, ne benne' xache', ne benne' zaj nada'u, ne benne' zaj zré'e cá'aze. <sup>17</sup>Netú benne' quebe gaca ga'uwé' ne gutié' che quebe zriche da na' dxunna bea na le', u la be xixre' snia na', u xrbaba ca naca laba'. <sup>18</sup>Nu benne' gulabe' da nigá dxal-la' gaque' sina. Benne' dxéajni'ine' waca gulabe' ca naca xrbaba chee laba'. Naca na tuze ca naca xrbaba chee bénneache, na' xrbaba nigá naca na xrupa gaxúa ga xun xrupa.

### 14

*Da dxelul-la tu gaxúa tape xun cue' chi gaxúa weaj benne'*

<sup>1</sup>Gudé na' gunná'a, na' ble'eda' Bénnea' naque' Zríla'dau' ze' lu xi'a Sión. Tu zren nen Le' zaj zra' tu gaxúa tape xun cue' chi gaxúa weaj benne', zaj zriche luzrgue' La Bénnea' naque' Zríla'dau', ne La Xre'. <sup>2</sup>Nadxa benda' tu da dxeninne na da za' xabáa, da dxeninne na ca schaga' da dxelún zánete' xegu ca', ne ca schaga' da dxun guziu' gate dxennéle'e na, ne ca dxeninne naga zaj zra' zánete' benne' dxelínnie' da

ca' cun zríadi'i na du. <sup>3</sup> Belul-le' tu da cube dxu'a lataj blau naga dxe' Dios, ne lau tapa benne' ca' zaj zua nabancze', ne lau tape dxua benne' gula ca'. Netú benne' xezica quebe guca gul-le' ca naca da na' belul-le'. Dxaca dxelul-le na benne' tu gaxúa tape xun cue' chi gaxúa weaj, benne' ca' gulelé' lávela benne' zaj zre'e xezr la xu. <sup>4</sup> Benne' caní quebe gulezúalene' nu'ula chee benne' xula, san belexegá'ana chawe', na' zjácálene' Bénnea' naque' Zríla'dau' gáteteze zéaje'. Benne' caní gulelé' lávela bèneache, ne zaj naque' lau Dios ca tu da blaudxa chee da dxezidxu, da dxuzúadxu lau Dios, ne lau Bénnea' naque' Zríla'dau'. <sup>5</sup> Cabata' dxelún lazre', na' zaj naque' du lazre' dxu'a lataj blau naga dxe' Dios.

*Dizra' da dxuluzén chunna gubáz chee xabáa bèneache*

<sup>6</sup> Nadxa ble'eda' xetú gubáz chee xabáa dxedé' lu be' zran xabáa, nape' dizra' chawe' da chadía chacanna, chee guzenne' na benne' ca' zaj zre'e xezr la xu, benne' xúgute cue' bèneache, ne benne' xúgute cue' xezr la xu, ne xúgute xezre, ne benne' dxelenné' dizra' walazre' cha chee'. <sup>7</sup> Gubáz na' gunné' zizraj:

—Le zrebe Dios, ne le güe lá'ana Le' lawe' da ba bzrin zra guchi'a Le' chee bèneache. Le gucá'ana szren Bénnea' bene' xabáa, ne xezr la xu, ne nísadau', ne beaj ca'.

<sup>8</sup> Xetú gubáz chee xabáa zéaje' cuzru gubáz chee xabáa nedxu na', dxenné':

—¡Ba guzría xi'! ¡Ba guzría xi' xezre Babilonia, xezre zren na', lawe' da bulusuzre' benne' xezre ca', ne benne' duté xezr la xu nen da naca ca xrise uva wal-la chee da sban da dxelune'!

<sup>9</sup> Xetú gubáz chee xabáa zéaje' cuzru gubáz chupa ca', dxenné' zizraj:

—¡Che nu benne' dxucá'ana szrene' be snia na', ne bedau' cheeba', ne gu'e lataj zriche luzrgue' u ne'e laba', <sup>10</sup> benne' nigá tég' lu da ba xa' da nucueza Dios lu xel-la' dxezrá'a chee', na' saca zi'e lu xi' chee da dxuzézele'e na lau gubáz chee xabáa ca' chee Dios, ne lau Bénnea' naque' Zríla'dau'! <sup>11</sup> ¡Zren chee xi', naga saca zi'e, cuen na chadía chacanna, na' xelezaca zi' te zra ne chizrela benne' ca' dxulucá'ana szrene' be snia na', ne bedau' cheeba', ne dxelu'e lataj zriche laba' luzrgue'! <sup>12</sup> ¡Chee le na', benne' ca' zaj naque' chee Dios, ne dxuluzé' dizra'

ca nadxiruxj be'ene', ne zjácálene' da naca chee Jesús, dxal-la' xelaque' zren lazre'!

<sup>13</sup> Nadxa benda' chi'i tu benne' da za xabáa. Dxe'e neda':

—Bzuj da nigá: Na'a, ne lu da za za' ba neza zrenté naca na chee benne' gate ca' xelute bèneache le' lawe' da dxeléajle'e chee Xránadxu. Be' Lá'azxa dxenné': “¡Ca' naca na, lawe' da xelexezi' lazre' ca naca lu zrin da belune', na' da xrlátaje da belune' zeajle na benne' ca'!”

*Lina chee xezr la xu*

<sup>14</sup> Nadxa guná'a, na' ble'eda' tu beuj chiche, na' lawe' beuj na' dxe' tu benne' naque' ca Bénnea' gulje' bèneache. Zria tu da naca na oro xíchaje', ne nuxre' tu xia nalá. <sup>15</sup> Bdxuaj tu gubáz chee xabáa lu xudau' da zua xabáa, na' gunné' zizraj. Dxe'e bènea' dxe'e lawe' beuj:

—¡Bchine xia nalá chiu', ne becá'a lina, lawe' da ba bzrin zra, na' lina chee xezr la xu ba guca na!

<sup>16</sup> Nadxa bènea' dxe'e lawe' beuj na' gudine' xia nalá chee' na', na' bequé'e lina chee xezr la xu.

<sup>17</sup> Nadxa xetú gubáz chee xabáa bdxuaje' xudau' da zua xabáa, nuxre' tu xia nalá. <sup>18</sup> Xetú gubáz chee xabáa bdxuaje' lu cugu, gubáz chee xabáa na' nape' xel-la' dxenná bea lu xi', na' gunné' zizraj. Dxe'e gubáz chee xabáa na' nuxre' xia nalá:

—¡Bchine xia nalá chiu' na', ne becá'a uva ca' da zaj den lu xezr la xu lawe' da ba güe na!

<sup>19</sup> Na' gubáz chee xabáa na' gudine' xia nalá chee' lawe' xezr la xu, ne bequé'e uva ca' da zaj de lu xezr la xu da zéaje na benne' ca' dxelune' da zrinnaj, na' bzre'e na naga xelesié' na, da na' zéaje na da ba xa' da nucueza Dios chee benne' ca' dxelune' da zrinnaj. <sup>20</sup> Uva ca' gulesié' na naga dxedxuaj xezre, na' naga dxelesié' na bdxuaj dxen chee benne' ca' dxelune' da zrinnaj da gulén na cáttite sibe zua dxu'a bzrina', na' guzá' dxen na' cáttite sadxu du gazre zra.

## 15

*Gubáz chee xabáa ca' zaj nuxre' gazre da ba xa' da xuluzále' xezr la xu*

<sup>1</sup> Ble'eda' xabáa xetú da zrenté da xe-bánedxu, belelá' gazre gubáz chee xabáa zaj

nuxre' gazre da ba xa' bzebe, da zaj naca na naga cheajsete' xel-la' dxezra'a chee' Dios.

<sup>2</sup> Ca'anqueze ble'eda' tu da naca na ca nisadau' da naca na ca xiaj esa', ne nachixre na xi', na' benne' ca' quebe gulezi' lu ne'e da naca na chee' be snia na', ne da nacan chee' bedau' cheeba', ne xrbaba chee' laba', zaj ze' lu nisadau' na' da naca na ca xiaj esa', zaj nuxre' da ca' con zriadi'i na du da ba bnezruj Dios le'. <sup>3</sup> Dxelul-le' da bil-la Moisés, benne' wen zrin chee' Dios, ne da dxul-la Bénnea' naque' Zrila'dau', da dxenná na:

Da zrente', ne da dxebanedxu zaj naca xúgute' da ba benu' Lue'.

Xran, nacu' Dios napu' duté xel-la' dxenná bea.

Xrlátaje, ne li lazre' zaj naca xrba chiu' Lue'. Nacu' Wenná Be chee' duté xezr la xu.

<sup>4</sup> ¿Núzraqueze quebe zrebe Lue', Xran?

¿Núzraqueze quebe güe lá'ana Lue'?

Tuze Lue' nacu' lá'azxa.

Xelelá' benne' duté xezr la xu, na' xulucá'ana szrene' Lue',

lawe' da ba belelé'ene' da xrlátaje da nunu'.

<sup>5</sup> Gudé na' gunná'a ne ble'eda' bjalaj xudau' da zua na xabáa, naga zua lataj naga zaj naxúaj da ca' bdxixruj be'e Dios.

<sup>6</sup> Lu xudau' na' beledxúaj gazre gubáz chee' xabáa ca' zaj nuxre' gazre da ba xa'. Zra lané' zaj nacue' naca na ladxe' zaca, da naca na ba'a, ne dxelácatite na, na' zaj nasie' lachu'e bazxu da naca na oro.

<sup>7</sup> Nadxa tu benne' laduj tapa benne' zaj naca bán-queze' bnézruje' tu tu gubáz gazre ca' tu xé'ena bzri da naca na oro, ne zaj nazrate na da ba xa' da nucueza Dios, Bénnea' zue' chadia' chacanna. <sup>8</sup> Guzrate' xudau' na' nen zren chee' xi' da dxulé'e na ca zaj naca xel-la' szren, ne xel-la' dxenná bea chee' Dios, na' netú benne' quebe guca chu'e ga na' cadxa gudé chee' da gazre da ba xa' ca' da zaj nuxruj gazre gubáz chee' xabáa ca'.

## 16

*Da gazre da ba xa' ca'*

<sup>1</sup> Nadxa benda' chi'i tu benne' gunné' zizraj lu xudau'. Dxe'e gazre gubáz chee' xabáa ca':

—Le hjaca, le cheajzala da ba xa' ca' lu xezr la xu, da ca' nucueza Dios.

<sup>2</sup> Na' guxéaj gubáz chee' xabáa nedxu, xeajlatje' xé'ena bzri chee' lawe' xezr la xu, na' xúgute' bénneache, benne' zaj nazriche

luzrgue' la be snia na', ne dxulucá'ana szrene' bedau' cheeba', gulebía we' lu bela' dxen chee' benne' ca' da gulále'e na.

<sup>3</sup> Gubáz gudxupe' xeajlatje' xé'ena bzri chee' lu nisadau', na' nisadau' na' bexaca na dxen ca dxen chee' benne' gate, na' gulate xúgute' bea zaj naca banba' lu nisadau' na'.

<sup>4</sup> Gubáz guxunne' xeajlatje' xé'ena bzri chee' lu xegu nisa ca', ne lu beaj ca', na' belexaca na dxen. <sup>5</sup> Na' benda' chi'i tu gubáz chee' xabáa dxenná be'ene' nisa caní, gunné':

—Xran, Dios Lá'azxa, zúaquezu', ne guzúaquezu'. Xrlátaje nacu' lawe' da guchugu' chee' benne' ca' guca caní, <sup>6</sup>lawe' da bululalje' dxen chee' benne' chiu' ca', ne chee' benne' ca' gulenné' waláz chiu', na' na'a dxuxí'aju' benne' caní dxen lawe' da caní zaj naca chee' xelé'aje'.

<sup>7</sup> Ca'anqueze benda' chi'i tu benne' zue' lu cugu, dxenné':

—Ca' naca na, Xran. Nacu' Dios napu' duté xel-la' dxenná bea. Ba bchi'i chee' bénneache ca' ca naca da li, ne da xrlátaje.

<sup>8</sup> Gubáz gudape' xeajlatje' xé'ena bzri chee' lau gubizra, na' gubizra guzí na lataj guzezxe na bénneache ca' nen xi' chee' na.

<sup>9</sup> Xúgute' bénneache gulé'xele'e, ne quebe belexeb'i lazre', ne quebe belúe lá'ane' Dios, san gulenné' da calela chee' Bénnea' nucueze' da ba xa' na'.

<sup>10</sup> Gubáz gáxzue xeajlatje' xé'ena bzri chee' lawe' lataj naga dxe' be xixre' snia, na' naga dxenná beaba' guchul-la na. Bénneache ca' gulagu xa'a luzre' lu xel-la' dxudía chee', <sup>11</sup> ne quebe bulusané' da zrinnaj da dxelune'. Gulenné' da calela chee' Dios zue' xabáa, lawe' da dxelezaque' caní ne chee' we' da zaj zria bela' dxen chee' ca'.

<sup>12</sup> Gubáz xrupe xeajlatje' xé'ena bzri chee' lawe' xegu zren le na Eufrates, na' nisa xegu na' bebizre na, chee' xalaj tu neza naga xeledé benne' dxjaca wedil-la chee' benne' wenná bea ca' zá'aque' naga dxalaj gubizra.

<sup>13</sup> Nadxa ble'eda' beledxúaj chunna be' xriwe' dxu'a be snia schanni', ne dxu'a be xixre' snia na', ne dxu'a benne' dxenné' waláz cheeba'. Be' xriwe' ca' zaj naca na ca bluzru ca'. <sup>14</sup> Be' xriwe' caní belún na xel-la' waca zri'a ca', na' beledxúaj na chee' xulutupa na xúgute' benne' wenná bea chee' xezr la xu, chee' chjaque' lu wedil-la chee' zra zren chee' Dios, Bénnea' nape' duté xel-la' dxenná bea.

<sup>15</sup> Dxenná Xránadxu:

—Le na' xque, neda' xida' gate quebe dxebézale neda', ca za' tu benne' gubán. Ba neza zrenté naca na chee bénnea' zue' ban lazre' ne nupé' lázrdawe' ca tu benne' dxuxúe' zra lane' chee quebe te' gala xídeze, ne quebe xedué'eng' lau bénneache.

<sup>16</sup> Nadxa beledube' benne' wenna' bea ca' lu lataj naga le' na Armagedón nen dizra' hebreo.

<sup>17</sup> Gubáz gazre na' xeajlatje' xé'ena bzri chee' lu be', na' lu xudau' da zua xabáa ben tu chi'i benne' dxenne' xizraj, da za na lataj blau naga dxe' Dios, dxenné':

—Bache naca na.

<sup>18</sup> Nadxa gulepe xesa, ne guleninne na, ne gulenné guziu', na' lu xezr la xu guzrú'le'e ca netú lasa quebe ne xru', na' gulálate zaj zra' bénneache lu xezr la xu. <sup>19</sup> Xezre zrentau' na' guzrá na chunna cue', na' xezre ca' zaj nita lu xezr la xu gulebía xi na, na' xeajsá lazre' Dios benne' ca' chee xezre zrentau' na' le' na Babilonia chee xeledé' lu da ba xa' zren da nucueza Dios lu xel-la' dxezrá'a chee'. <sup>20</sup> Xúgute xezr la xu ca' da naxechaj nísadau', ne xúgute xi'a ca' belexenite na. <sup>21</sup> Cá'anqueze belexruij zran xabáa xiaj bezxe' zri'a lawe' bénneache ca', da dxelá'a na ca tu gaxúa xia weaj, na' bénneache ca' gulenné' da calela chee Dios ne chee da ba xa' da gulezaque', lawe' da guca na tu da ba xa' zrenté.

## 17

*Dios dxurzía xi'e nu'ula dxúnle'e da sban*

<sup>1</sup> Nadxa bla' tu gubáz chee gazre gubáz chee xabáa ca', gubáz ca' bululátaje' xé'ena bzri ca', na' guzre' neda':

—Gudá, na' gulé'eda' lue' ca naca da ba xa' da saca' nu'ula na' dxúnle'e da sban, nu'ula na' dxe'e lawe' nísadau' ca'. <sup>2</sup> Benne' wenna' bea ca' zaj zre'e xezr la xu dxelune' da sban nen nu'ula na', na' benne' zaj zre'e xezr la xu zaj naque' ca benne' dxelezuzre' lawe' da dxelune' da sban nen nu'ula na'.

<sup>3</sup> Nadxa, lu da blé'e Be' Lá'azza neda', gubáz chee xabáa na' guché'e neda' le'e xixre' lawe' lataj, na' lataj na' ble'eda' tu nu'ula zrié' cuzru tu be xixre' schanni' xrna, na' zaj naxúaj lu belá' dxen cheeba' laba' schanni' ca', da ca' dxeuicide Dios, na' zaj naca gazre xíchajba', ne chi lúzuba'.

<sup>4</sup> Nu'ula nigá nacue' zra lane' bzawe, ne da xrna, na' lechítaje chee' zaj naca na

oro, ne xiaj xrtante, ne bga ca'. Nuxre' tu xé'ena bzri da naca na oro da nazrate na da sgate ca', ne da sban da dxune'. <sup>5</sup> Naxúaj luzrgue' ca le', da dxenná na: Babilonia, Xezre Szrentau', Xrna' Xúgute Nu'ula Ca' Dxelune' Da Sban, ne Xúgute Da Sgate Da De Xezr La Xu. <sup>6</sup> Nadxa ble'eda' nu'ula na' dxezúrene' nen dxen chee benne' ca' zaj naque' chee Dios, ne chee benne' ca' belute bénneache le' lawe' da belexechebe' chee Jesús. Gate ble'eda' da na', bebánele'eda'. <sup>7</sup> Nadxa gubáz chee xabáa na' guzre' neda':

—¿Bizr chee na' dxebánenu'? Gulé'eda' lue' ca naca da nagache chee nu'ula nigá, ne chee be xixre' schanni' na' núaba' le', bea na' zaj napa gazre xíchajba', ne chi lúzuba'. <sup>8</sup> Be xixre' schanni' na' blé'enu', nácaba' tu be zúaba' nédxute, na na'a québedxa zúaba'. Wagüenba' lu lataj chul-la nédxudxa ca za gáteba' tu chí'izqueze. Benne' zaj zra' xezr la xu, ne quebe zaj naxúaj le' lu xiche chee xel-la' nabán ca bente Dios xezr la xu, xelxebánele'eng' gate xeledé'eng' bea nigá, be zúaqueze nédxute, na' na'a québedxa zúaba', na' wela'ba'.

<sup>9</sup> Nigá de late' da gulé'eda' benne' xeléajni'ing' na. Gazre xíchajba' caní zaj zéaje na gazre xi'a naga dxenná bea nu'ula na'. <sup>10</sup> Cá'anqueze xíchajba' ca' zaj zéaje na gazre benne' wenna' bea. Gazxu' benne' wenna' bea caní ba gultatje'. Tu benne' ca' dxenná be'e na'a, na' xetue' quebe ne xide'. Gate la' benne' bzebe nigá, québedxa suateque' scha'. <sup>11</sup> Be xixre' schanni' na', be zúaba' nédxute, na' na'a québedxa zúaba', zéaje na benne' xrunu' naque' benne' wenna' bea. Naque' tu benne' ládujla benne' gazre ca', na' te na' gatié' tu chí'izqueze.

<sup>12</sup> Chi lúzu be xixre' snia na' da blé'enu' zaj naca na chi benne' wenna' bea ca', benne' quebe ne xelézú lawe' xelenná be'e, na' xelézú'e xel-la' dxenná bea xelaque' wenna' bea tu chí'idau'ze tu zren nen be xixre' schanni' na'. <sup>13</sup> Benne' chi wenna' bea caní zaj nuné' tuze dizra', na' xulunézruje' xel-la' szren chee', ne xel-la' dxenná bea chee' lu na' bénnea' naque' be xixre' schanni' na'. <sup>14</sup> Benne' caní xeledí'la'lene' Bénnea' naque' Zríla'dau', na' Benne' nigá guzría xi'e benne' wenna' bea ca', lawe' da naca Le' Benne' Wenna' Be chee benne' wenna' bea ca', ne Xrane benne' zaj naque' xrane bénneache, na' benne' ca' zrálene'

Le', gunné Dios le', ne guqué'e le', na' zaj naque' li lazre'.

<sup>15</sup>Cá'anqueze gubáz chee xabáa na' guzre' neda':

—Nísadau' ca' blé'enu', naga dxe' nu'ula na' dxúnle'e da sban, zaj naca na xezre bèneache ca', ne benne' dxeleonné' dizra' walazre' cha chee', ne benne' zane cue' xezr la xu. <sup>16</sup>Chi lúzuba' na' blé'enu' xichaj be xixre' schanni' na', da zaj naca na chi benne' wenná bea ca', xelecuídené' nu'ula na' dxúnle'e da sban, na' xelebéaj xíchaje' le', ne xulucá'ane' le' gala xídeze. Xelawe' belá' dxen chee', ne xuluzexxe' le' lu xi'. <sup>17</sup>Dios bzue' lu lázrdau benne' wenná bea ca' xelune' ca da dxaca lazre' Le', gate belune' tuze dizra', ne bulunézruje' xel-la' dxenná bea chee' lu na' bénnea' naque' be xixre' schanni' na', cadxa gaca ca da ba gunná Dios. <sup>18</sup>Nu'ula na' blé'enu' naque' Babilonia, xezre zrentau' na' dxenná be'e na benne' wenná bea ca' zaj zre'e xezr la xu.

## 18

### *Dxebía xi' xezre Babilonia*

<sup>1</sup>Gudé na' ble'eda' betaj xetú gubáz chee xabáa, nápalé'e xel-la' dxenná bea, na' bseni' xel-la' szren chee' lu xezr la xu. <sup>2</sup>Na' gunné' zizraj:

—Ba guzría xi'. Ba guzría xi' Babilonia, xezre zrentau' na', ne ba bexaca na lataj naga zaj zra' da xriwe' ca', ne lataj naga zaj zra' xúgute cue' be' xriwe' ca', ne lataj naga zaj zra' be zua xrila, be schanni' ca', ne be sgute ca'. <sup>3</sup>Xúgute bèneache zaj zre'e tu tu cue' xezr la xu zaj naque' ca benne' dxelezuzre', lawe' da dxelune' da sban da dxaca xezre na', na' benne' wenná bea ca' zaj zre'e xezr la xu belune' da sban da dxaca xezre na', na' benne' ca' dxelúti'e gulaque' benne' gunní'a ne chee da zante da gulezá lazre' benne' ca' zaj zre'e xezre na'.

<sup>4</sup>Nadxa benda' chí'i xetú benne' da za xabáa, dxenné':

—Le dxuaj xezre na', le'e, nácale chia', chee quebe gácale benne' ca' tuze lu dul-la da dxelune', ne chee quebe tele lu da ba xa' da xelezaca benne' ca'. <sup>5</sup>Dul-la chee benne' ca' ba guxán na, na' zaj naca na ca tu da ba bgula, da ba bzrinte na zran xabáa, na' Dios ba xeajsá lazre' ca naca da zrinna' da dxelún benne' ca'. <sup>6</sup>Dios gunézruje' chee benne' ca' cáteze da bulunézruje' chee benne' xula, ne xunézruje' le' chupa cuenla ca da zrinna'

da belune'. Ba nucueze' da xelezaque' da nácale'edxa zi' ca da bulusaque' benne' xula. <sup>7</sup>Gudé'e benne' ca' lu da ba xa', ne gudé'e le' xel-la' zi' cáteze nu' belune'. Buluzúa cuine' lu xel-la' szren, ne gulezúe' lu xel-la' dxelexezaca ba lazre' chee', lawe' da dxeleonné' lu lázrdawe': Dxé'entu' nigá dxenná béantu'. Quebe nácantu' wezebe, ne quebe bi sácantu'. <sup>8</sup>Chee le' na', tuze zra xelezrín da ba xa' ca' da xelezaque', xel-la' gute, ne xel-la' zi', ne xel-la' dxedún, na' xelezxe' lu xi', lawe' da napa Xránadxu Dios duté xel-la' dxenná bea, na' naque' Bénnea' guchugue' chee benne' ca' xelezaque' caní.

<sup>9</sup>Benne' wenná bea ca' zaj zre'e xezr la xu, ne belúnle'e benne' ca' da sban ne da belexezaca ba lazre', xelebezre xache' gate xelelé'ene' ca naca zren chee xezre na', da dxezxe na. <sup>10</sup>Welezé' zítu'la lawe' da xelezrebe' xelezaque' ca da dxelezaca benne' ca', na' xelenné':

—Baxache' nácale le'e, benne' zaj zre'e xezre zrentau', Babilonia, lawe' da chadite bla' da ba xa' da dxezácale.

<sup>11</sup>Cá'anqueze benne' ca' dxelúti'e, benne' zaj zre'e xezr la xu, welebezre', ne welebezre xáchequeze' ca naca da dxaca chee xezre na', lawe' da québedxa nu chilá' benne' si'e da dxeluti'e,

<sup>12</sup>da zaj naca oro, ne plata,

ne xiaj xrtante' ca', ne bga ca',

ne ladxe' zaca ca', ne ladxe' bzawe ne da xrna,

ne xúgute cue' xaga ca' dxelelále'e na zixre, ne zrita xrtante, ne xaga xrtante,

ne xia gache, ne xia, ne xiaj esa',

<sup>13</sup>ne lacu zixre, ne xixre'dau' dxelále'e na zixre,

ne xala, ne da ca' dxelelále'e na zixre,

ne xrise uva wala, ne za xel-la' wagu,

ne xrte xezaj, ne zrúa' xtila,

ne be xixre', be dxelúa xua',

ne zrila' ca', ne bzrina' ca',

ne da ca' dxudé xua,

ne benne' ca' dxelúti'e le' lu na' benne' gunní'a ca'.

<sup>14</sup>Benne' caní xelé'e benne' zaj zre'e xezre na':

—Na'a québedxa gápale da zixre ca' da zácalle'e na da bdánnele'ele, ne ba bnítele tu chí'izqueze xúgute xel-la' gunní'a chee, ne da xrtante chee.



<sup>15</sup> Benne' ca' belúti'e da ca' xelezé' zítu'la lawe' da dxelezrebe' xelezaque' ca da dx-elezaca benne' zaj zře'e xęzre na', na' xebezeře', ne xebezeře xáchequeze', <sup>16</sup> na' xe-lenné':

—Baxache' zaj naca benne' ca' zaj zře'e xęzre zrentau' na'. Gulaque' ca tu nu'ula nacue' ladxe' zácale'e da bzawe, ne da xrna, ne nazi'e lechítaje da naca na oro, ne xiaj xrtante, ne bga ca'. <sup>17</sup> Chadite benite xel-la' gunní'a na', ne guxexxe na.

Xúgute benne' xrane da ca' dxeledán lawe' nísadau', ne benne' zaj zře'e lu'ule na, ne benne' dxulusé'e da ca' dxeledán lawe' nísadau', ne benne' dxelunge' zrin lu nísadau' belelé'e zítu'la, <sup>18</sup> na' gate belelé'ene' zren chee xęzre na' dxezxe na, na' gulenné' zizraj:

—jBízraqueze xetú xęzre naca na da zren ca xęzre zrentau' nigá?

<sup>19</sup> Dute xel-la' dxelexewí'ine lazre' xuluzré'e xu xíchaj'e ca', ne xebezeře', ne xebezeře xáchequeze', xelenné':

—Baxache' zaj naca benne' ca' zaj zře'e xęzre zrentau' na'. Nen xel-la' gunní'a chee benne' ca' gulenni'a xúgute benne' ca' zaj nape' da ca' dxeledán lawe' nísadau'. Chadite guzrí'a xi' xęzre zrentau' na'.

<sup>20</sup> Ca guca chee xęzre na', le be, le'e zrale xabáa, ne le'e, gubáz chee Cristo, ne le'e bchálajle waláz chee Dios, ne xúgutele le'e nácale bi chee Dios, lawe' da gate bzria xi' Dios xęzre na', bebéaj lazre' da naca chee le'e.

<sup>21</sup> Nadxa tu gubáz chee xabáa, gubáz ná-pale'e xel-la' dxenná bea guchise' tu xiaj zren da naca na ca xiaj xiche, na' bzale' na lu nísadau', gunné':

—Cá'ante cuía xi' Babilonia, xęzre zrentau' na', na' québedxa nu lé'equezdxa le na, <sup>22</sup> ne québedxa nu xen la neza chee xęzre na' da ca' dxulugul-la bėnneache, da can zríadi'i na du, ne bchiuj, ne luzu da dxulucuzre', ne québedxa nu chilá' gun zrin lu xęzre na', ne québedxa xen schaga da dxun da dxutu na. <sup>23</sup> Québedxa gusení' netú xi' lu xęzre na', ne québedxa xen laní chee wechaga na' ga na', lálcala benne' ca' belúti'e lu xęzre na' gulenná be'e lawe' xúgute benne' zaj zře'e xęzr la xu, ne gulez' xę'e xúgute cue' xęzr la xu nen xel-la' wazrá' chee'.

<sup>24</sup> Caní guca lawe' da lu xęzre na' gulalaj dxen chee benne' ca' gulenné' waláz chee

Dios, ne dxen chee benne' ca' zaj naque' bi chee Dios, ne dxen chee benne' ca' belute bėnneache le' du ca naca xęzr la xu.

## 19

<sup>1</sup> Gudé na' benda' chi'i benne' zan zaj zře'e xabáa, dxelenné' zizraj:

jGaca ba Dios! jXel-la' weselá, ne xel-la' szren, ne xel-la' dxenná bea zaj naca na chee Dios cheedxu.

<sup>2</sup> Ca dxuchi'a Le', xrlátaje, ne li lazre' naca na!

jBa bzria xi'e xęzre na' dxulé'e na nu'ula na' núnle'e da sban,

nu'ula na' bxrínnaje' bėnneache zaj zře'e dute xęzr la xu lu da sban da bene'!

jDios ba bebéaj lazre' nu'ula na' lawe' da betie' wen zrin ca' chee Dios!

<sup>3</sup> Nadxa gulenné' da xula:

—jGaca ba Dios lawe' da tu cuéznqueze zren chee xęzre na' dxezxe na!

<sup>4</sup> Nadxa tape dxua benne' gula ca' ne tapa benne' ban ca' buluzú zribé', na' bulucá'ana szrene' Dios, Bėnnea' dxe'e lataj blau na', dxelenné':

—jCa' naca na! jGaca ba Dios!

<sup>5</sup> Nadxa ben tu chi'i benne' lu lataj blau na', dxenné':

jLe güe lá'ana Dios cheedxu, xúgutele le'e dxunle zrin chee',

ne dxezrebele Le', le'e benne' blau, ne benne' quebe nu nácale!

*Laní chee wechaga na' chee Bėnnea' naque' Zríla'dau'*

<sup>6</sup> Cá'anqueze benda' tu da naca ca chi'i benne' zan, ca dxeleninne zánete xęgu, ne ca dxelenné'le'e guziu' ca', dxelenné':

jGaca ba Dios lawe' da ba guzú lau dxenná bea Xránadxu Dios, Benne' nape' dute xel-la' dxenná bea!

<sup>7</sup> jDu be! jBéle'equedzdu, ne güe lá'anadxu Le'!

jBa bzrin zra chee laní wechaga na' chee Bėnnea' naque' Zríla'dau'!

Nu'ula na' si'e ba nupá'a cuínabe',

<sup>8</sup> nu'ula na' nazi'ibe' lataj nácube' ladxe' zaca, da quebe nadxén na, ne dxá-catite na.

Ladxe' zaca na' zéaję na da xrlátaje da zaj nun benne' ca' zaj naque' bi chee Dios.

<sup>9</sup> Nadxa guzre gubáz chee xabáa neda':

—Bzuaj caní: Ba neza zren naca na chee benne' ca' gunné' Dios xeledé'e laní wechaga na' chee Bėnnea' naque' Zríla'dau'.

Nadxa guzre' neda':

—Da caní zaj naca na dizra' li chee Dios.

<sup>10</sup>Nadxa bzu zriba' lau gubáz chee xabáa na' chee gucá'ana szrena' le', na' le' guzre' neda':

—Quebe gunu' caní lawe' da nácaqueza' neda' wen zrin chee Dios ca lue', ne ca benne' bichu' ca' zéajle da li na' da ble'e Jesús le'e. Bca'ana szren Dios. Da li na' da ble'e Jesús le'e naca na da dxelenná benne' ca' dxuluchálaje' waláz chee Dios.

*Benne' zrie' bzrina' chiche*

<sup>11</sup>Nadxa ble'eda' ba naxalaj xabáa, na' ble'e lau tu bzrina' chiche, na' Benne' zrie'-ba' le' Du Lazre', ne Li Lazre', lawe' da dxenná be'e, ne dxunge' wedil-la lu da xr-látaje. <sup>12</sup>Xiaj lawe' dxelácatite na ca xi' ca, na' xíchaje' zaj zria zánete da zaca ca', na' naxúaj tu le' lawe', da nézene' tuze Le'. <sup>13</sup>Nacue' tu zre' da nazaj na dxen, na' La Le' naca na Xrtizra Dios. <sup>14</sup>Xúgute benne' ca' zaj zre'e xabáa zjácálenē' Le', zaj nacue' ladxe' zaca ca', ladxe' chiche zrládau', ne zaj zrie' bzrina' chiche ca'. <sup>15</sup>Dxu'a Bénnea' zua tu da naca na ca tu xia nalále' da quine' benne' xezre ca', na' nna be'ene' benne' ca' nen tu bar xia. Le' guzríá xi'e benne' ca' ca tu benne' dxešie' uva ca', ne dxuléaje' na, da zéaje na da ba xa' da nucueza Dios lu xel-la' dxezrá'a chee', ca da xelezaca bēnneache ca'. <sup>16</sup>Naxúaj le'e zre', ne zríchuje' da nazí Le' caní: Benne' Dxenná Be'ene' Benne' Wenná Bea Ca', ne Xrane Benne' Ca' Zaj Naque' Xrane Bénneache.

<sup>17</sup>Nadxa ble'eda' tu gubáz chee xabáa ze' lu gubizra, na' gunné' zizraj xúgute be zua xrila, be dxeledá zran xabáa, dxenné':

—Le da. Le zraga gágule da dxúnnale'e Dios le'e, <sup>18</sup>chee gágule bela dxen chee benne' wenná bea ca', ne chee benne' dxelenná be'e lu wedil-la, ne chee benne' wal-la ca', ne chee bzrina' ca', ne chee benne' zaj zrie'-ba', ne chee xúgute bēnneache, benne' ca' zaj nadá'ue', ne benne' ca' quebe zaj nadá'ue', benne' blau ca' ne benne' quebe nu zaj naque'.

<sup>19</sup>Nadxa ble'eda' be xixre' schanni', ne ca naca benne' wenná bea zaj zre'e xezr la xu nen benne' dxjaca wedil-la chee ' ca', ba nazrague' chee xeledíl-lalēne' Bénnea' zrie' bzrina' chiche na', ne nen benne' ca' zaj de'e Le'. <sup>20</sup>Gulel-le' be xixre' schanni' na' tu zren nen bēnnea' gunné' waláz cheeba', bēnnea' bēnlē'e xel-la' waca zren lauba'. Ne

chee xel-la' waca caní da bēne', benne' nigá guzú xē'e benne' ca' belú'e lataj guzriche luzrgue' laba', ne bulucá'ana szrene' bedau' cheeba'. Nadxa beleché'e be xixre' schanni' na', ne bēnnea' gunné' waláz cheeba', na' belegu'e le' zaj nabante' lu xi' chee da dxuzézele'e na da dxe' ca tu nísadau'. <sup>21</sup>Nadxa Bénnea' zrie' bzrina' chiche bētie' benne' ca' xezícala nen xia nalá na' zua dxu'e, na' xúgute bea ca' zaj zua xrila gulélajba' bela dxen chee benne' ca'.

## 20

*Chi gaxúa iza*

<sup>1</sup>Gudé na' ble'eda' betaj tu gubáz chee xabáa, nuxre' zren xia chee lataj chul-la, ne nuxre' tu du xia zren. <sup>2</sup>Gubáz nigá gudēl-le' be snia schanni', nácaba' belá' zua nédxute, ne nácaba' da xriwe', ne Satanás, na' bcheaje'-ba' du xia lawe' chi gaxúa iza. <sup>3</sup>Na' gudxú'une'-ba' lataj chul-la na' naga bsézxuje'-ba', na' bdē'e le'e dxa xu'u na' tu da gunna bea na, chee québedxa si xē na bēnneache chee xezr la xu ca' cadxa te chí gaxúa iza. Te chee chí gaxúa iza, dxal-la' xelá' na tu chí'idau'.

<sup>4</sup>Nadxa ble'eda' lataj blau ca', naga zaj dxe' benne' ca' ba zaj nazi'e xel-la' dxenná bea chee xuluchi'e ca da zaj nun bēnneache. Cá'anqueze ble'eda' bēnne'du ca' gulexú'u bēnneache ca' gulechugu bēnneache xícha-je' lawe' da belexechebe' chee Jesús, ne buluchálaje' xrtizra Dios. Benne' caní quebe bulucá'ana szrene' be xixre' schanni' na', ne bedau' cheeba', ne quebe belú'e lataj zriche laba' luzrgue', u ne'e. <sup>5</sup>Benne' gate ca' xezícala quebe xelexebane' ca tedxa chee chí gaxúa iza ca'. Da nigá guca naca na xel-la' dxexebán nedxu. <sup>6</sup>Ba neza zrente naca na chee benne' ca' zaj naque' bi chee Dios, benne' ca' xelexebane' nedxu. Da zi' da xa' da zeajlí canna quebe seque' bi gune na benne' ca'. Xelaque' bxruze chee Dios, ne chee Cristo, na' xelenná be'e tu zren nen Le' chí gaxúa iza.

<sup>7</sup>Ca te chee chí gaxúa iza ca', na' la' Satanás naga nadxéaj na, <sup>8</sup>na' xedxúaj na chee cheajxri xē na bēnneache zaj zre'e xúgute cue' xezr la xu ca'. Si xē na bēnneache xezre Gog, ne xezre Magog, na' guchaga na benne' dxjaque' wedil-la chee xúgute cue' xezr la xu lu wedil-la, na' benne' dxjaque' wedil-la zaj naque' benne'

zan ca naxán xuzre' da dxe' dxu'a tu xegu zren. <sup>9</sup>Ca' guca, beledxúaje' du ca naca lu xęzr la xu, na' guléchaję' naga zaj zra' benne' zaj naque' cheę Dios, ne xęzre na' da nazrí'i Dios. Nadxa Dios gusel-le' xi' da za' xabáa, na' bzezxe xi' na' ca naca benne' ca'. <sup>10</sup>Nadxa gulel-le' da xriwe', da guzí xę na bėnneache ca', na' guledxú'une' na lu xi' cheę da dxuzęzrele'e na da dxe' ca tu nısadau', naga zaj zra' bę xixre' schanni', ne bėnnea' gunné' waláz cheęba'. Lu xi' na' xeledęę' lu da ba xa' te zra, ne chizrela chadıa chacanna.

*Dios dxe'e lataj blau chiche, dxuchi'e cheę benne' ca' dxelune' da zrinnaј*

<sup>11</sup>Nadxa ble'eda' tu lataj blau chiche, ne Bėnnea' dxe'e lataj na'. Lau Lę' belexenite xęzr la xu, ne xabáa, na' québedxa nu benne' lé'eng'e da ca'. <sup>12</sup>Nadxa ble'eda' benne' gate ca', benne' blau, ne benne' quebe nu zaj naque', zaj ze' lau Dios, na' belexalaj xiche ca', ne cá'anqueze xetú xiche naga zaj naxúaj la benne' ca' zaj nape' xel-la' nabán. Dios bchi'e cheę benne' ca' cáteze da belún tu tue', da ca' zaj naxúaj na lu xiche ca'. <sup>13</sup>Belexedxúaj benne' gate ca' zaj nagache' lu nısadau', ne belexedxúaj benne' gate ca' zaj nagache' lataj chul-la cheę benne' gate, na' Dios bchi'e cheę xúgute' cáteze da belún tu tue'. <sup>14</sup>Nadxa guledxú'une' benne' gate ca' gulezúe' lataj chul-la naga zra' benne' gate lu xi' cheę da dxuzęzrele'e na da dxe' ca tu nısadau'. Xi' nigá naca na da zi' da xa' da zeajlı canna, <sup>15</sup>na' lu xi' nigá guledxú'une' xúgute benne' ca' quebe zaj naxúaj le' lu xiche cheę xel-la' nabán.

## 21

*Tu xabáa cube ne tu xęzr la xu cube*

<sup>1</sup>Ca gudé na' ble'eda' tu xabáa cube, ne tu xęzr la xu cube, lawe' da belexenite xabáa nedxu, ne xęzr la xu nedxu, na' québedxa de nısadau'. <sup>2</sup>Neda', Juan, ble'eda' xęzre lá'azxa, da naca na Jerusalén cube, dxetaj na xabáa, za na naga zua Dios. Xęzre na' nabeza na ca tu nu'ula wechaga na' nupá'a cuínabe' cheę gácabe' tuze nen benne' cheębe'. <sup>3</sup>Benda' chi'i tu benne' da za' xabáa, dxenné':

—Gunná'xque, Dios zuę' ládujla bėnneache, na' xelaque' xęzre cheę', na' Dios súaqueze' nen benne' ca', ne gaque' Dios

cheę'. 'Dios tu súalezqueze' benne' ca' cheę québedxa xelebezre', na' québedxa gata' xel-la' gute, ne xel-la' gubezre, ne xel-la' dxebezre xache', ne xel-la' dxudía, lawe' da ba gudé cheę xúgute' da gulaca nédxute.

<sup>5</sup>Nadxa Dios, Bėnnea' dxe'e lataj blau na' gunné':

—Gunná'xque, neda' dxuna' cube xúgute' da ca'.

Cá'anqueze gunné':

—Bzuaj dizra' canı lawe' da naca li lazre', na' waca guxrén lázrele le na.

<sup>6</sup>Gudé na' guzre' neda':

—Ba bęna' xúgute' da ba gunnía' guna'. Neda' naca' Benne' zúaqueze' nédxudaute, ne Benne' zúaqueze' bzębedxa. Naca' Bėnnea' dxuna' su lau sua xúgute, ne dxuna' xexuzre na. Nu benne' dxeбіlene', neda' gunézruja' nisa beaj xı'aje' da gunezruj na le' xel-la' nabán, ne quebe bi quízruje'. <sup>7</sup>Nu benne' zrue'ene' si'e xúgute' da canı, neda' gaca' Dios cheę', na' le' gaque' zri'ina'. <sup>8</sup>Benne' ca' zaj naque' zra' chebe, ne benne' ca' quebe dxelęajle'e chia, ne benne' ca' dxelune' da zrinnaј, ne benne' ca' dxelutie' benne', ne benne' dxelune' da sban, ne benne' wazrá' ca', ne benne' dxulucá'ana szrene' bedau' xiaj xaga ca', ne xúgute benne' dxelún lazre', gudęa' le' lu xi' cheę da dxuzęzrele'e na da dxe' ca nısadau', da naca na da zi' da xa' da zeajlı canna.

*Jerusalén cube*

<sup>9</sup>Nadxa bla' tu gubáz cheę gazre gubáz cheę xabáa ca' belúxrue' gazre xé'ena bzri ca' naga zaj xu'u da gazre da ba xa' bzebe ca', na' guzre' neda':

—Gudá. Gulé'eda' lue' nu'ula wechaga na', zru'ula Bėnnea' naque' Zríla'dau'.

<sup>10</sup>Lu da ble'e Be' Lá'azxa neda', gubáz cheę xabáa na' guché'e neda' tu xu'a zren, ne sibe, na' blé'eng'e neda' ca naca xęzre lá'azxa zren na', Jerusalén cube. Dxetaj na xabáa naga zua Dios. <sup>11</sup>Xęzre nigá dxácatite na nen da xabáa cheę Dios, na' xel-la' dxácatite cheę na naca na ca dxácatite tu xiaj xrtante, ca tu xiaj jaspe, da naca na ca xiaj esa' xrtante. <sup>12</sup>Dxu'a xęzre na' naxechaj na tu ze'e sibe, na' napa na chazrinnu dxa xu'u, na' tu tu dxa xu'u ca' zaj ze tu weaj gubáz cheę xabáa, na' le'e dxa xu'u ca' zaj naxúaj la chazrinnu cue' benne' Israel. <sup>13</sup>Zaj zua chunna dxa xu'u weaj dapa sácate. <sup>14</sup>Lu lane ze'e da naxechaj na xęzre na' zaj zra'

chazrinnu xiaj, na' zaj naxúaj lu xiaj ca' la chazrinnu benne' gubáz chee Bénnea' naque' Zríla'dau'.

<sup>15</sup> Gubáz chee xabáa na' dxuchálajlene' neda' nuxre' tu da naca na ca tu xia xtila da naca na oro chee gudxixre' xezre na', ne dxa xu'u chee na ca', ne ze'e da naxechaj na. <sup>16</sup> Xezre na' naca na lébete dapa saca. Lébete naca na xel-la' tunna, ne xel-la' laga chee na. Gubáz na' bdxixre' xezre na' nen da nuxre', na' naca na laga catite sadxu tapa gaxúa zra, na' xel-la' laga, ne xel-la' tunna, ne xel-la' sibe chee na zaj naca na lébete. <sup>17</sup> Gudé na' bdxixre' xel-la' sibe chee ze'e na' naxechaj na. Naca na tu gaxúa tape xun zrita, na' chazrita chee gubáz chee xabáa na' naca na lébete ca chee benneache.

<sup>18</sup> Ze'e na' da naxechaj na xezre na' naca na xiaj jaspe, na' xezre na' naca na oro du lazre', da naca na ca xiaj esa' du lazre'. <sup>19</sup> Xiaj lane ze'e na' zaj naca na xiaj xrtante ca': Xiaj nedxu naca na xiaj jaspe,

na' xiaj gudxupe' naca na xiaj zafiro, na' xiaj guxunne' naca na xiaj ágata, na' xiaj gudape' naca na xiaj esmeralda, <sup>20</sup> na' xiaj gázxue naca na xiaj ónice, na' xiaj xrupe naca na xiaj cornalina, na' xiaj gazre naca na xiaj crisólito, na' xiaj xrunu' naca na xiaj berilo, na' xiaj ga naca na xiaj topacio, na' xiaj chi naca na xiaj crisoprasa, na' xiaj chinéaj naca na xiaj jacinto, na' xiaj chazrinnu naca na xiaj amatista.

<sup>21</sup> Chazrinnu da dxusezxuj na dxa xu'u ca' zaj naca na chazrinnu bga ca'. Tu tu na naca na tuze bga. Neza blau chee xezre na' naca na oro du lazre', ca xiaj esa' du lazre'.

<sup>22</sup> Quebe ble'eda' netú xudau' xezre na', lawe' da Xránadxu Dios, Bénnea' nape' duté xel-la' dxenná bea, nácaqueze' xudau' chee xezre na', ne cá'anqueze naca Bénnea' naque' Zríla'dau'. <sup>23</sup> Xezre na' quebe nachine na gusení' gubizra na', ne beu', lawe' da dxusení'queze da xabáa chee Dios ga na', na' Bénnea' naque' Zríla'dau' naque' xel-la' naxaní' chee na. <sup>24</sup> Bénneache chee xúgute cue' xezr la xu, bénneache gulelé', xeledé' lu xel-la' naxaní' chee xezre na', na' benne' wenná bea ca' chee xezr la xu xelu'e da gunni'a chee lu xezre na'. <sup>25</sup> Dxa xu'u chee xezre na' quebe xelexzuj na te zra, na' québedxa gata' chizrela. <sup>26</sup> Xelu'e xel-la' szren, ne xel-la' ba lá'ana chee xúgute cue' xezr la xu lu xezre na'. <sup>27</sup> Cabata' chu'u da

sban ga na', ne netú benne' dxune' da zrin-naj, ne netú benne' dxun lazre'. Xelú'uze benne' ca' zaj naxúaj le' lu xiche chee xel-la' nabán da napa Bénnea' naque' Zríla'dau'.

## 22

<sup>1</sup> Nadxa gubáz chee xabáa na' blé'ene' neda' tu xegu nisa da dxunna na xel-la' nabán. Naca na xaní' ca xiaj esa', na' dxedxuj na lataj blau naga zaj dxe' Dios, ne Bénnea' naque' Zríla'dau'. <sup>2</sup> Laduj neza blau chee xezre na' zaj naxaza xaga dxapa la' a dxu'a xegu na', na' da zixre chee xaga caní zaj naca na da dxunna na xel-la' nabán, ne dxebía na da zixre chazrinnu lasa tu tu iza. Dxebía na da zixre chee na tu tu beu', na' xr-legue xaga na' naca na da dxexún na benne' zaj zre'e du gabí'i xezr la xu. <sup>3</sup> Québedxa bi gata' da xu'u de'. Lataj blau naga zaj dxe' Dios, ne Bénnea' naque' Zríla'dau' sua na lu xezre na', na' benne' wen zrin chee' ca' xulucá'ana szrene' le'. <sup>4</sup> Xelelé'ene' le' caníqueze, na' La Dios zriche na luzrgá benne' ca'. <sup>5</sup> Québedxa gata' chizrela ga na', na' benne' zaj zre'e na' quebe xelexhinne' xi', ne xel-la' naxaní' chee gubizra, lawe' da Xránadxu Dios gusení'e benne' ca', na' benne' ca' xelenná be'e chadía chacanna.

*Ba zua gagu zra xelá' Cristo*

<sup>6</sup> Nadxa gubáz chee xabáa na' guzre' neda':

—Dizra' caní zaj naca na li lazre', ne waca guxrén lázrele le na. Xránadxu Dios, Bénnea' dxuzúe' Be' chee' xichaj lázrdau benne' ca' dxelenné' waláz chee' ba gusel-le' gubáz chee xabáa chee' chee gulé'ene' benne' wen zrin chee' da ba zua gaca, <sup>7</sup> dxenné': “La zátequeza'. Ba neza zrente naca na chee benne' zéajlene' dizra' chee Dios da naxúaj na lu xiche nigá.”

<sup>8</sup> Neda', Juan, benda', ne ble'eda' da caní. Ca gudé benda' na, na' bzu zriba' zran ni'a gubáz chee xabáa na', gubáz blé'ene' neda' da caní chee gucá'ana szrena' le'. <sup>9</sup> Na' le' guzre' neda':

—Quebe gunu' ca' lawe' da naca' wen zrin chee Dios ca nacu' lue', ne ca zaj naca benne' bichu' ca' dxelenné' waláz chee Dios, ne ca zaj naca xúgute benne' ca' zjácálene' ca da naxúaj na lu xiche nigá. Bca'ana szren Dios.

<sup>10</sup> Cá'anqueze guzre' neda':

—Quebe guchachu' ca naca dizra' chee Dios da naxúaj na lu xiche nigá lawe' da ba zua gaca da naxúaj na. <sup>13</sup> Dxácatę na', be' lataj benne' dxelunę' da zrinnaj xelúnqueze' da zrinnaj dxelunę', ne benne' ca' dxelunę' da sban xelúnqueze' da sban na', san benne' xrlátaje ca' xelúnqueze' da xrlátaje, na' benne' zaj naque' bi cheę Dios chjácalequeze' da naca na cheę'.

<sup>12</sup> Dxenné':

—Ca' naca. La zátequeza', ne nu'a ca naca da gunézruja' tu tu benne' ca', cáteze da zaj nun tu tue'. <sup>13</sup> Neda' naca' benne' zúaqueza' nédxudaute, ne benne' zúaqueza' bzébedxa, bénnea' dxuna' su lau sua xúgute, ne dxuna' xexuzre na. <sup>14</sup> Ba neza zrentę naca na cheę benne' ca' dxulupé'ę xichaj lázrdawe' ca tu benne' dxibe' zra lane', cheę xelape' lataj xelawe' da zixre cheę xaga da dxunna na xel-la' nabán, na' caní xelezéquene' xelu'e lu dxa xu'u cheę xęzre na'. <sup>15</sup> Benne' ca' dxelunę' da zrinnaj quebe xelu'ę ga na', ne québequeze xelú'u benne' wazrá' ca', ne benne' dxelunę' da sban ca', ne benne' wete benne', ne benne' dxulucá'ana szrene' bedau' xiaj xaga ca', ne benne' zaj nazri'ine' da wen lazre', ne benne' dxelún lazre'. <sup>16</sup> Neda', Jesús, ba gusel-la' gubáz cheę xabáa chia' cheę xuluzenne' tu tu cue' bénneache chia' ca naca

da nigá. Neda' naca' ca xra xrtau David, benne' wenná bea, ne naca' zri'ine zre sua David na'. Neda' naca' ca belaj zila da dxácatitele'ę na.

<sup>17</sup> Be' Lá'azxa, ne benne' ca' zaj naca ca zru'ula Bénnea' naque' Zríla'dau', dxelenné':

—Gudá, Xran.

Nu benne' xenne' da nigá dxal-la' nne':

—Gudá, Xran.

Benne' dxebílene', ne dxaca lazre' dxal-la' xide', na' xí'aje' nisa da dxunna na xel-la' nabán, na' quebe bi quízruje'.

<sup>18</sup> Xúgutele le'e dxulábale dizra' cheę Dios da naxúaj na lu xiche nigá, neda' dxuzéajni'ida' le'e da nigá: Che nu benne' bi gudé'ę cheę da caní, Dios gudé'ę cheę bénnea' da ba xa' ca' da zaj naxúaj na lu xiche nigá. <sup>19</sup> Cá'anqueze che nu benne' bi xequé'ę cheę da zaj naxúaj na lu xiche nigá, Dios wecá'aqueze' da naca cheę bénnea' lu xiche cheę xel-la' nabán, ne lu xęzre lá'azxa cheę', cáteze naxúaj na lu xiche nigá.

<sup>20</sup> Xránadxu, Bénnea' dxulé'ene' da nigá, dxenné':

—Ca' naca na. La zátequeza'.

¡Ca' gaca na! ¡Gudá, Xrana' Jesús!

<sup>21</sup> Dxenaba' Xránadxu Jesucristo gunę' da chawe' cheęle le'e, xúgutele. ¡Ca'an gaca na!